



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>





S. n. 296.



UNIVERSITEITSBIBLIOTHEEK GENT



900000010223

Digitized by Google







# LETTRES

*Bibliothèque Augustinienne Gand? J. Leo Maroben Br.*

DE L'ILLVSTRISSIME ET REVERENDISSIME

## CARDINAL DOSSAT,

### EVESQUE DE BAYEVX:

CONTENANT TOUT CE QUI S'EST

*passé à Rome en sa négociation comme Protecteur de la France,  
durant le regne de HENRY LE GRAND.*

*DERNIERE EDITION REVEUE ET AUGMENTEE.*

Ex libris R.P. Jacobi de Leu. Aug. Gand.



AROUEN,

Chez IACQUES CAILLOVE,

dans la Court du Palais.

---

M. DC. XXXXIII.

Ex libris R. P. Jacob de Leeuw, Amsterdam.

# ADVERTISSEMENT

SVR CETTE DERNIERE

EDITION.



ELVY qui a le premier publié ce liure, t'a priué, Lecteur, de l'entier contentement que tu en deuois attendre, en partie par malheur, & en partie aussi par trop de circonspection. Le malheur a esté, en ce qu'il n'a peu auoir que trop tard certaines coppies dont il a tiré quelques pieces de lettres qu'il a esté contraint de mettre à la fin du liure, chose qui non seulement est de mauuaise grace, mais aussi de fort peu d'vtilité; car il se trouuera peu de personnes qui vueillent se diuertir du cours de leur lecture, pour s'arrêter à la recherche de ces parties separees de leurs corps, sans estimeront que le fruit qu'ils en pourroient tirer, ne vaut pas la peine qu'il y a de les ajouter en leur lieu, particulièrement le nombre en estant si grand comme il est. Mais il faut auouer que le publicateur de ces lettres ne peut en aucune façon s'excuser de la trop grande circonspection qu'il a eue: car pour n'offencer quelques personnes il a retranché à escient de grandes pieces, voire mesme des lettres entieres; & partant a rendu cet ouurage entierement inutile & imparfait: ce qui ne peut estre ap-



## 4 ADVERTISSEMENT.

prouvé que par ceux qui voudroient tout à fait estouffer la verité, & enseuelir dans des profondes tenebres ce qui donne à leur desauantage de la lumiere à ceux qui ont en main le gouuernement des affaires publiques. Or ceste Edition, Lecteur, te donne ce qui t'auoit esté iniustement rauy. Tous ces membres, ramassez par cy-deuant en vn tas, & en confusion à la fin du Liure, sont maintenant remis en leur ordre, & en leur place; & ce qui auoit esté entierement soustrait avec peu d'ingenuité, r'est maintenant présenté avec toute sorte de candeur. Il y a pourtant six lettres qui ont esté laissées avec les traittez, pource qu'elles n'ont aucun rapport avec le tiltre, qui ne promet que celles qui ont esté escriites au feu Roy, & à Monsieur de Villeroy, ny aucune conuenance avec les matieres qui sont traittees dans tout le corps du liure. C'est tout de ce dequoy j'auois à t'aduertir, Lecteur, & ne me reste qu'à te prier que tu sçaches gré à ceux qui travaillent pour te servir.





# A V L E C T E V R.

**L** semble qu'il est superflu de deduire particulièrement tous les aduantages que la France peut tirer de la publication des lettres de Monsieur le Cardinal d'Osset. L'on ne doit non plus attendre de ceste Preface, qui n'est que de peu de pages, toutes les recommandations que meritent & l'auteur & son ouurage ; seulement l'on se contentera de remarquer que les eminentes qualitez de celuy qui a escrit les lettres, & de ceux qui les ont receuës, qui sont hors de toute comparaison, rendent ceste collection assez Auguste & promettent de grandes choses. Par ce qui suit ceste Preface, l'on peut voir quela esté Monsieur le Cardinal d'Osset, quelle son origine, quel le cours de sa vie, mais assez succinctement. Sa doctrine, sa preud'homie, & la profonde cognoissance qu'il auoit de tous les interests des Princes de la Chrestienté, & sur tout l'amour grand & incomparable qu'il auoit pour son pays, paroissent en toutes les pages de ce liure ; mais avec vne telle candeur & liberté, que ceux qui estoient lors ennemis de la France & du feu Roy, le craignoient & le reueroient tout ensemble. Ceux qui ont donné leur iugement des grands hommes de ce siecle, ont dit qu'ils ne cognoissoient rien qui se peust comparer à la

parfaite sagesse de Monsieur le Cardinal d'Ossat , & à la dextérité admirable qu'il avoit au maniement des affaires. Ce jugement est d'autant plus excellent qu'il est véritable , & tel qu'il se recognoist en effect dans ces lettres ; où ne se trouvant rien que de sérieux , rien que d'important , il ne faut pas penser d'y voir des pages entières de complimens ou de flatteries , celles-cy pour estre indignes d'une ame genereuse , ceux-là superflus à ceux qui manient les grandes affaires. Et c'est vn des grands avantages qui se peut tirer de cette collection , de n'y voir rien d'inutile , rien que de solide & sans nulle affectation. Et certes comme elle est excellente , elle doit aussi servir à l'avenir comme d'un parfait modelle sur lequel tous les ministres des Princes de toute qualité se devront former , soit pour la façon de traiter les affaires de vive voix , ou de les faire entendre par escrit tels qu'ils sont ; ce qui se trouve en peu d'hommes qui ont eu de l'employ. Car les vns nourris dans les disputes & dans les contentions , n'ont peu rien produire que d'extrême & de passionné , n'ont représenté les choses que par miracles , ou les ont tellement diminuées que la verité ne s'y recognoist plus.

Les autres sont si concis & si racourcis , & s'occupent à tant d'autres affaires hors de leur profession , qu'ils obmettent les circonstances , dont les moindres donnent grands poids aux affaires , y donnent quelques-fois la forme , & ouvrent d'ordinaire le chemin aux résolutions. Icy toutes ces parties sont remplies très-parfaitement ; vn stile signifiant , qui represente les choses aussi clairement comme si elles estoient présentes , avec une telle abondance de raisons , iniques aux moindres , que le jugement de ceux qui doivent tra-



travailler dans les affaires est tellement préparé & nettoyé de toutes sortes de difficultez, qu'il est aisé d'y prendre de bonnes résolutions.

L'on a toujours fait grand estat pour l'instruction à la prudence civile de cette sorte de lettres des grands hommes, traitans les affaires des grands Princes, étant certain que de toutes leurs actions il n'y en a point de plus serieuses, ny qui soient plus remarquées que les lettres qu'ils escriuent aux Roys & Princes qui les envoient, ou à leurs principaux ministres. Car elles ont plus de naïveté que les harangues, qui sont ennuyeuses pour leurs prefaces pleines de fard & d'artifice. Le bon ordre aux raisons y est exactement observé, les considérations viennent comme à la foule sur le papier, & avec plus de jugement qu'aux conférences & aux audiences, pour la plupart non preueuës, ou plutôt interrompuës, selon l'humeur des Princes avec lesquels l'on traite. Par cette sorte d'escrits l'on donne l'ame à l'histoire, & particulièrement à la nôtre, les secrets de laquelle n'ont esté cogneus depuis quelques années que d'un seul, qui en a esté si jaloux, qu'il a souffert que nos histoires soient sorties au jour de nuees de leurs essentielles circonstances, sans se relâcher tant soit peu de son austerité. Et certes il faut avouer qu'il importe peu de sçavoir la fin des affaires & des traittez, si l'on ne sçait les raisons & les causes de leur conclusion, qui ne se treuvent ailleurs qu'aux despêches des ministres & des Ambassadeurs. Ce n'est pas toutesfois que l'on vueille dire que les secrets de l'Estat doivent estre diuulguez, & profanez; rien moins. Le secret est tellement nécessaire, que quand il n'y est pas c'est trahison, c'est la ruine inévitable des

Estats. Mais apres vne si longue fuite d'annees , apres vingt-cinq ou trente ans, peut on dire qu'il y a vn secret d'Estat de ne pas diuulguer des lettres , qui ne contiennent autre chose que des affaires du tout terminez , qui n'ont rien de commun avec ce qui se traite aujourd'huy ; bref des interest tous differents. Et ne faut pas que ceux qui possible se trouueroient touchez dans quelques vnes de ces lettres les lisent comme si elles estoient escrites aujourd'huy ; mais qu'ils pensent à ce qui lors estoit en question , à leurs entreprises , & à nostre legitime deffence , & puis ils seront contraincts d'auouer qu'il n'y a rien qui n'aye deu estre escrit , & que l'affection & preud'homme du Cardinal d'Ossat ne pouuoient produire d'autres effects , ny d'autres eslanemens d'esprit.

Reste maintenant de rendre quelque raison de l'ordre obserué en ce liure , & de la correction. Pour l'vn , il n'a pas deu estre autre que par la suite des temps , & a esté trouué bon d'en faire autant de liures comme il y a d'annees ; les vns mieux fournis que les autres , selon l'employ qu'auoit lors Monsieur le Cardinal d'Ossat. L'on n'a pas pensé y deuoir mettre , comme l'on le pouuoit , plusieurs autres lettres de cét Auteur escrites à quelques particuliers, pour n'auoir rien de public , ny rien d'important , tant l'on a désiré que ce liure fust du tout vtile & du tout public. Pour la correction , il faut sçauoir qu'elle est telle qu'elle s'est peu faire par vn travail assez exact , & tel qu'il se trouuera peu de fautes aux noms propres , le plus souuent corrompus en toutes les coppies. Le sens peruertey & embarrassé en diuers lieux par l'ignorance des copistes , qui a esté restitué & remis, soit par conjectures, ou par la conference de plusieurs

siens liures. Sur la fin du volume il se trouuera nombre de lettres & d'escrits hors l'ordre du temps , & plusieurs additions pour inserer en l'une & l'autre partie. Cela ne s'est pû faire qu'avec vn long & penible labeur , employé en la conference de diuers exemplaires. Si l'on en eust eu communication à temps , ces pieces eussent esté mises en leur lieu , & eussent donné plus de grace à l'ouurage : mais l'on a trouué plus à propos de les adjouster ainsi , que de les supprimer. De là le Lecteur iugera quel soin & quelle diligence l'on a apporté pour rendre cét ouurage accompli.

Aurestel'on conuie & coniuire tous ceux qui peuuent adjouster quelque chose à ceste collection, de le vouloir faire; mais avec autant de diligence, sincerité, & fidelité que l'on a fait en ceste edition : dequoy toutesfois ils ne doiuent pas esperer , comme l'on ne fait pas aussi, autre gloire , que d'auoir bien fait, & désiré profiter au public; qui est la seule & vraiment solide satisfaction que peut souhaiter vn homme de bien.








TARQVINI GALLVCII S. I. P.

# ORATIO IN FVNERE

ILLVSTRISSIMI ET REVEREN-

dissimi Arnaldi Cardinalis Ossati, Episcopi Bajocensis,  
habita Romæ in Ecclesia sancti Ludouici xv. Kal.  
Aprilis. M. DC. IIII.



*Em obnoxia communi mortalitati natura, hem aqua sum-  
morum infunorumque condicio. Aliud ex alio ducendum  
vobis est funus, Illustrissimi Principis, & nescio quo pacto  
vilia hoc tempore capita mors aspernata, ad vnum agere  
videtur, ut in purpura vestra triumphet. Quare cum ita  
sæpè ad ornanda lugubri pompa ordinis amplissimi insta conveniatis, esset  
orationi meæ molliendus hic aditus, nisi ista frequentia, nisi omnium in  
extinctum vestri Senatus amplissimum Patrem Arnaldum Ossatam ar-  
dor ac studium, audientiam mihi nihilominus facilem polliceantur Excus-  
ram igitur, quoniam ita iubetis, hoc campo. Sed quia per obiecta mi-  
hi spatia longius enagri neque tenuitas mea, neque publicæ occupationes  
vestra patiuntur, per compendia potius iterum quam per viam. Initium  
itaque faciam ab ea parte, quam alius fortasse, velut impedimentum  
cause, callida declinatione defugeret. Habent enim plerique quod ipso  
statim initio magnificè dicant, de patria, de natalibus, deque illius clari-  
tate quem orant: quo equidem in genere omnino laborare me fateor; sed  
ita, ut hoc ego summum cause præsidium putem, & quasi fontem unde  
mihi sit ducenda laudatio. Nulla ergo fuerit Arnaldo Ossato in splendidissimo*

*Ille Galliae regno clara & nobilis patria, nulla imagines, nulli rituli, nulli maiores. Quid hoc aliud est, nisi fabrum fuisse fortunae suae quid aliud nisi laudis suae nullum habere participem? cum ex ea neque patria claritas, neque gentis antiquitas, neque parentum imitatio possit sibi quidpiam usurpare. Haud scio an optabilius sit ita nasci, ut solus tibi lucere possis, quam ortum nancisci maiorum nobilitate, hoc est aliena luce, per illustrem. Certè sapientissimus hic vir auditus est saepe cum diceret quasi per locum, & gloriās, sibi puero ex patrimonio libellam irā exilum & gracile obuenisse, ut dix fuertis satis persolvendū iustis, & cōponendo parenti. Sic igitur ille miseris obscurisque genitoribus progenitoribus nullis Cassanaberij in Auscorum Aquitania Conuenarū ignobili pago, magnorum fluminum instar, ex parvis initis ortus, ad gloriam, virtutis via, honestaque contentione, grassatus paulatim amplificatusque est, atque ad honorem summo proximum in hac urbe tandem aliquando peruenit. Et quantam quidem virtutem quam exag geratam fuisse necesse est, Amplissimi Patres, quae in vestro quasi mortalium Deorum concilio comprobata, is hoc augustissimum honoris templum, corona insignis & purpura, est introducta? Gloriosissimum est apud omnes nationes huic imperio, tam multos velati Reges facere posse, & Regibus pares habere senatores: sed simul illud intelligat vniuersi, qui sine veteri nobilitate, sine opibus, sine clientelis, sine ulla commendatione fortunae in istum Senatum adlegatur, cum excellentissima sapientia spectatissimaque virtute munisum esse oportere. Illis igitur aduentitiis externisque desituntis adminiculis Arnaldus, quantum habuerit ad honorem quem consequutus est in virtute praesidium ita facile intelligemus, si alius eius vitae rationem ac studia repetamus.*

*Amo dum adolescens, ac penè puer, utroque parente orbatum, incredibile dictū est quantopere ipse per sese, & quadam inductione naturae, pietatem, verecundiam, temperantiam, castimoniam, omnemque morum integritatem amavit, quantaque cum animi corporisque patientia litteras persequutus. Quibus non mediocriter instructus, ad Parisiensem primum, deinde ad Bituricensē academiam profectus, Iacobum Cujacium, scriptis famaque per celebrem iuriconsultorum illum disertissimum, disertorum quae facile consultissimum, & multum & diligenter audire. Tum reversus Parisios, omni disciplinarum genere, imprimisque inoffensis, singulariter insitutus, multo sanè tempore in foro est indicissimè versatus. Sed admonitus tandem à Paulo Foxio Archiepiscopo Tolosano, clarissimo viro atque doctissimo, uti concertatoriano*

illam indicialemque palastram, tam pio videlicet ingenio reclamantem repugnantemque, relinqueret, paruit saluberrimo hominis consilio, ab eoque & in familiaritatem domi, & in studiorum consuetudinem est receptus. Interea Foxius Romam ad Pontificem Legatus à Rege decernitur. Quo in obeundo munere, cum idoneum hominem habere cuperet quo videretur à secretis, ea gratia Romam adduxit in ea legatione Ossatum, quem & fidelem, sapientem, & gravem diuturna consuetudine comperisset.

Hic enim verò egregia Ossati virtus idoneum nata theatrum, coepit agere partes suas pro dignitate. Coluerat ille antea semper in omni vita parte, aque adeò iam inde à puero, innocentiam ac probitatem, dederat exquisita doctrina, ingenij, consilij, que specimen singulare. Sed nescio quomodo illa gloria semina, velut in solo maligno, non respondebant, tantaque, ac tam ample magnificaque virtutes tanquam in recessu ac solitudine premebantur. Hic ad maturitatem perducta illa gloriæ fruges, hic illa virtutum lex aperta ac libero cælo diffusa, incidit in honestorum hominum oculos, venitque in predicationem nobilitatis. Habet hoc enim Roma, Urbium Regina, majestatis & gloriæ domicilium, ut nulli convenarum infensa non itati sit, hospitali quasi iure omnem virtutem, quantumvis peregrinam, amplexa, in suo eam lumine collocet, hoc est in foro atque theatro terrarum. Quodius quanta cum fidelitate reddiderit Arnaldo Ossato, communia de illius virtute populi præconia testificantur. Quotus enim quisque non prædicat hominis tanti prudentiam, iustitiam, benignitatem; cæteraque moderati animi lumina, quæ alio fortasse loco velut in obscuro delituisse? In ore omnium est, tantam tamque præclaram ei eruditionem fuisse atque doctrinam ut non modò iuris prudentissimus esset, quam ipse facultatem profitebatur, verum etiam Theologiæ, Philosophiæ, Mathematicæ, humanitatisque ita intelligens ac peritus, ut excellens in singulis haberetur. Dantur alij quasi quodam instinctu ad solam scientiam iuris civilis, alij tantum ad eloquentiam, alij solum ad divinarum rerum cognitionem, alij ad naturalium investigationem inquisitionemque causarum, sic prorsus ut cum illa veri cupiditate, quæ nos vehementissime rapit ac trahit ad se, hoc etiam haurisse malignius à natura videamur, ut nemo queat pluribus disciplinis excellere. Huic ita pariter ad omnia versatile fuit ingenium, ut, quod de Portio Catone scribitur, natum ad id unum putares quodcumque facere aggrederetur. Si ius consuleres, peritissimus; si dicendum esset, eloquentissimus; si de divinis humanisque rebus disputandum, longè videbatur omnium scientissimus. Et extitit profectò avo-

*In mirificatam variae multiplicisque doctrinae approbatio Patres Amplissimi, à quibus sapientissima eius in senatu responsa cum adfensu atque admiratione suspiciebantur. Extitit egregium Pontificis de tanta sapientia testimonium, cum cum ad gravissimas illas de Tridentino Concilio, cæque librorum delectu consultationes, honorifico sanè iudicio cooptavit. Neque enim reipublicæ sterilis erat illa Ossati cognitio, sic ut desides Philosophos imitaretur, qui discendi studio à rebus agendis abducti, quos iuvare deberent eos desertos esse patiuntur. Ita enim solitudine ille atque commentatione doctrinae delectabatur, ut quod eo labore pararet conferreret in medium ad publicas utilitates. Cumque probe nosset omnem virtutis vim actione contineri, coniunxerat cum ea mentis agitatione omnia animi ornamenta quæ vel ad divinum cultum, vel ad aliena commoda referuntur.*

*Inter summas gravissimarum rerum occupationes, nihil unquam illi prius aut antiquius fuit, quam ut Deum castè coleret ac veneraretur. Nam præter sanctissima sacra, quibus sapientissimè litabat, statas solemnesque domi preces instituerat, quibus ipso quasi præcunte omnem circa familiam assuam adesse volebat: neque in illo pietatis officio porterat quissimè domesticis imponere desiderari. Vsu receptum in Gallia est, ut plerique iuvenes ex ipso flore nobilitatis Romam, ad belli pacisque perdiscendas artes, accedant, quo de genere multi sæpè in urbe atque assiduè commorantur. Hi diebus festis animo vacuo soliti erant ad Arnaldum, quasi ad morum magistrum, immò velut ad oraculum, convenire. Quibus ille benigne ac perhumaniter acceptis, inebat primum sacris interesse, quæ ipsemet ritè purèque, ac summa cum religione faciebat. Tum ad eos reuersus, multa de Deo, multa de rerum humanarum fluxu atque interitu, multa de Christiani hominis officio differebat, ut erat omni genere antiquitatis eruditissimus, suos cuique maiores, omnibus antiquissima Gallia decora commemorabat, imprimisque universos ad fidem erga regem, ad pietatem erga patriam hortabatur: quibus illi facibus, ut est illa natio apparentissima gloriæ vehementer exercitati, difficile dictum est quam tùm ad omnem honestatem & laudem accenderentur. Ita ille homines suæ vigilantia minimè demandatos instituebat: ex quo facile posset intelligi quantoperè laboraret in suis.*

*Ex litteris quippè optimi viri, qui eius in Gallia Baiocense sacerdotium opera vicaria procurabat, accepimus, tantum in ea provincia Ossato Antistite intra quattuor annos factam esse divini cultus accessum quantam ne intra quadraginta quidem superiores facere potuerunt. Libenter in hoc eius*

ornando ergà diuinum cultum ardore longius immorarer, nisi alia orationem ad se traherent, quæ quia pertinent ad plures, faciliorem habent ab omnium ad sensu laudationem.

Nam quid ego primum dico de solertia, deque publicæ priuatæque gerendæ rei arte mirabili ac dexteritate? Intellectum est supericribus annis in multis, maximèque cum perturbata distractæque res Galliæ fuerant Pontificia potestate componendæ. Cum enim fuisset à Foxio Legato, uti supra narraui, delectus à secretis, atque in hanc urbem lucem expositus, tum consilio suo, tum hausta iam Romæ disciplina, ita suas partes impleuit, ut à Nicolao Aillaroo, intimo Regni Consiliario, artiumque ciuiliū peritissimo, habitus sit admirabilis opifex rerum agendarum. Quapropter eum absens, & quem nunquam de facie nouerat, ita cœpit amare, magnificisque apud Regem quotidie verbis extollere, ut extincto in ea legatione Foxio Arnaldus decretus sit Regius Romæ procurator, ad quem legationis mandata deuoluerentur: quæ illo sanè tempore administrauit salus, & postea semper, tum à Regni tutoribus, tum à Legatis, publicæ Galliæ negotia summa cum laude participauit. Et quidem quam grauiā, quam difficilia Deus immortalis! Non multo post cœpit tota Gallia primò seditionum motibus agitari, deinde grauisimo bello percuti, ad extremum caso Rege, quasi ruente fastigio conquassari. Quid inde consecutum sit luctuosius est quam ut debeas hoc loco commemorari. Ciuium cædes, amicorum disidia, cognatorum infidelitates: contempta religio, rapta profana, secura profanata.

Rerum tandem aliquando potius est Henricus quartus, inuictissimus bello Rex in cuius hodie sinu Gallia conquiescit. Videbatur ex summa victoria summa pax consequuta: sed priore bellorum turbine omni diuino iure conuulso atque peruerso, nisi religio constitueretur, seniores in dies ex hac nube procellæ metuebantur. Statuit ergo fortissimus victor huic quoque periculo prouidere, ac petenda publicè à Pontifice Venia triumphum suum memorabili pietatis exemplo nobilitate. Arduum hoc erat, & quod naum hominem cui res mandaretur, summaque prudentia præditum postularet. Quare Rex, cui ut summa belli peritia, ita incredibilis est interno scendo cuiusque ingenio prudentiæque calliditas, cum Iacobo Perronio Ebriocensi Episcopo, humani diuinique iuris peritissimo, desertissimoque in paucis, negotium dedisset vii Romam profectus ageret in senatu de reconciliatione, deque veteri religione restituenda, multis in Gallia prætermisus viris, alioqui sapientissimis, Perronio collegam Arnaldum Ossatum, qui Romæ erat, suo iudicio

designauit. Is quanta cum prudentia significatione in hoc præcipuo laudum suorum actum versatus sit, recordamur vniuersi. Implicitum sanè, inuoluntumque negotium illud fuit: Erant multa inter se distracta, atque pugnantia, ex multorum sententia componenda. In ea tamen reperagenda ita se ipse traiecit, ut Pontifici satisfecerit, & Regi summopere placuerit, & Christianæ reipublicæ pepererit, pacato nobili regno, tranquillitatem.

Quæ res illi meritò & in Gallia commendationem honorabilem attulit, & Romæ regio postulatu dignitatem ac purpuram maturauit: quam ipse propterea in omni sermone, ut erat animi voluntate gratissimus, acceptam omni Regi Gallia referebat. Ac ne idcirco venundatum eius suffragium, eoque beneficio ad æqua adiniqua iam obstrictum atq; oppigne ratum putaremus, dicere solitus erat, scire se Regem suum non nisi iuste flagitaturum: si tamen ea tempora inciderent, quibus temporibus aliter id eueniret atque ipse putaret, tamen enim uerò numquam adduci se posse ut eius rogatu, vel angustissimum unguem, recti lineas transiliret. Nulla in eo fallaciæ, nullus facus, admirabilis animi candor incredibilis æquitatis iustitiæque tenacitas, recti amor ac studium in auditum: ex quo fonte modestia quadam ac moderatio fluxit, omni posteritati memoranda. Viginti amplius annos Romæ fuit, & bonam quidem partem in Principum rationibus procurandis: quo toto tempore nullas unquam opes, nullas sibi copias comparauit: ita uidelicet in hoc sanctissimo foro simpliciter ac more maiorum, sine cupiditate atque auaritia versabatur. Sacerdotium in Galliæ, & honestum, opinor, & opulentum, à Rege superiore sibi oblatum, bona fide acceperat: sed quia suboriri cœpit in ea possessione aliqua disceptatio, illo se statim abdicauit, libero iure Pontifici Ecclesiæque remisso. Munera, tanquam libertatis humanae pretia, animique corruptelas, neque unquam accepit ipse, neque accipi à suis est passus: è quibus unum, cum nonnihil in eo genere aliquando peccasse cognouisset, illicò reddere iussit accepta, & luctu iacturam compensauit de suo, ut simul existimationi sue consulere, simul aliena cupiditati moderetur. Tenent plerique memoria quam carus esset Arnaldus Ossatus Esensi Cardinali superiori, Principi celeberrimo maximoque. Is cum extrema iam valetudine testamentum conderet, Arnaldo, qui pro necessitudine atque officio aderat, quattuor aureorum millia legauit: cumque perueniret ne vir moderatus ac bonus difficile à testamenti procuratoribus eam summam extorqueret, pergrandem illi clarissimamque gemmam, quæ viginti aureorum mil-



libus æstimabatur, in manus contecit, ut eam veluti prædæ haberet quoad legata persolverentur. Erat Arnaldo eo tempore, ut postea semper, res familiaris angusta, conditio minimè iniqua videbatur, res expetibilis, & quæ facile cupiditatem alliceret: nunquam tamen ille neq; rei magnitudine, neque amicorum hortata, neque precibus optimi Principis, qui hoc etiam atq; etiam vehementissimè contendebat, adduci potuit ut eo pignore videri vellet, vel parum alienæ fidei credere, vel ex amicitia facere mercaturam. Per multos, opinor, quos de temperantia laudare solemus, vixit hac animi moderatione Ossatus, sed sunt alia in quibus videtur ipsum se significatione modestiæ superasse. Tantam de illius fide atq; prudentia Rex superior opinionem animo consignarat, ut de eo ad se recipiendo cogitaret, quo & ab intimo consilio videretur & à secretis. Cum ergo ei tam amplum honorificumq; munus per nuntium obtulisset, constantissimè recusavit homo bonus ac temperatus, maluitque in mediocri fortuna securitatem, quam ruinæ periculum in suprema.

Asperum aliquis hominem ac severum putabit, quò opes, quàm manera, quàm gratiam, tanta cum elatione repudiaret. Fit enim sæpe ut homines observare iusti supraq; modum cupiditate inuicti, incommodo sint ingenio, innocentia rigida probitate quodammodo peracerba. Nihil profectò minus in hoc homine deprehenderes; immò dicere solitus erat, æquum & bonum latius patere debere, quam ius: atque adeò Catonem facete reprehendebat, quod servos venderet ubi consensissent. Quare clarissima illa animi decora nullam unquam severitatis macula contaminavit: quin etiam è magnis eius plurimisque virtutibus, nulla erat quæ plus extaret eminereque suprâ ceteras, quàm benignitas, mansuetudo, facilitas, aliaque animi ornamenta leniora. Nemo unquam ad eum accessit officium petiturus, quem benignè non exciperet foveretque, & quibuscumque posset rebus adiuvaret: atque ut haberet quo miserorum ogestati consuleret, multa sibi de breui suo censu curiaque suppellectile detrahebat. Quid quod ea vir dignitate libellos etiam supplices calamitosos desistentisque dictabat, eorumque negotia in se recipiebat ut sua, & tanta cum vigilantia curaque tractabat, ut Regiam procuratorem diligentius tractare non posset. In quo genere, nisi longiudinem, fugerem non pratermitterem officia quæ plerique Religiosorum ordines gratissima testificatione commemorant: ut enim ab exposita illa sua liberalique voluntate neminem unquam arceret, libentius tamen atque impensius, uterat religiosus ac pius, talium causas & negotia procurabat. Intelligit quid à me dicam.

Dicit

*Dni Bernardi familia, intelligunt & Franciscana atque Dominicana in Gallia ij, qui veteri vtuata disciplina, auctoritate, vitæ modum rationemque sequuntur: ac ne singulos enumerando percerseam, intelligimus omnium maxime nos, quicumque huic Iesu Sodalitati nomina dedimus. Quibus si gloriosum est hoc tempore toti Gallia regno, summa bonorum gratulatione, restituit tanta gloria, nisi eam sibi totam liberalissimus Rex vindicaret, nonnihil in hunc primum atque officiosissimum Principem referenda esset, qui ne requisitus quidem, quantum postea compertum est, sedulo studioseque per litteras cum Rege hac de restitutione transigit.*

*Nimium quantum, nescio quid immensum, bellicosissime ac religiosissime Rex Henrice, debemus tibi, qui cum in iracundia facile modum habeas de nobis bene merendi, finem inuenire non potes. Parum videlicet erat istius animi prolixitati tua nos gratia reconciliare, nisi etiam obrueres beneficio quos ornaret. In nobis ista tua clementia & liberalitate fecisti ut optabilius esset eregno tuo, hoc est, antiquissimo Religionis asylo, cum ignominia infamiaque depelli, quam hoc honorifico iudicio tuo, quam hac publica virtutis commendatione gloriæque carere. Debemus, inquam, tibi, quantum explicare non possumus: sed patere ut etiam Arnaldo Ossato hac officij commemoratione gratissimus, quem tu, nisi tuo tantum iudicio ac voluntate beneficus in nos esse voluisses, vocasses perfectio in aliquam tanti beneficii societatem.*

*Redeo ad ipsum Ossatum: immo verò non redeo, sed nunc ipsum breuissima hominis commendatione perorabo. Habent in eius interitu quod delectant vniuersi: senatus, qui consultissimum virum; tribunalia, quæ sanctissimum iudicem; eruditi, qui presidem; illiterati, qui patrocinatorem; Religiosorum ordines, qui tutorem ac parentem carissimum amiserunt. Sed nemo maius quam Gallia ex hoc eius obitu vulnus atcepit, cuius consilio difficillimis temporibus conseruata est, cuius sapientia, inter varias distractasque perfidiosorum hominum opiniones ac sectas, in veteri officio, hoc est, in Romani Pontificis imperio ac potestate reuincta est.*

*In vobis tantum, Clarissimi Principes Gioiosa Cardinalis atque Beathanus orator, amisso iam communis tutela collega, regnum illud amplissimum respirabit, vestrum auxilium implorat, vestras respicit manus, in vos sunt omnium preces supplicationesque conuersæ, Si, quod eo vincto, cellata opera faciebat, aduocationem illi regno vestram atque presidium soli commodabit, si eorum quos Ossatus tanta cum charitate complectebatur inopiam subleuandam, hereditario quasi iure ad vos*

*transmissam esse, & officii occasusse vestris existimabim; erit cur  
Gallia lenius equisque incluram feras, erit cur minus nos de tanto  
nobis sublato presidio doleamus.*



# EPITAPHE DE MONSIEVR le Cardinal d'Ossat.

D. O. M.

ARNALDO. OSSATO. GALLO. S. EVSEBII. PRESBITERO.  
ACARDINALI. EPISCOPO. BAIOCENSI. QUI. OMNIUM.  
PER. MULTOS. ANNOS. GALLICANORVM. IN. VRBE. NEGO-  
TIORVM. CONSILIORVMQVE. PARTICEPS. ET. ADMINI-  
STER. RARISSIMÆ. IN. REGES. SVOS. FIDEI. EGREGIORVM.  
QVE. MERITORVM. TESTIMONIO. SACRA. PURPURA. OR-  
NATVS. AMPLISSIMI. ORDINIS. DIGNITATEM. EA. SAPIEN-  
TIÆ. INTEGRITATISQVE. FAMA. EAQVE. OFFICIORVM.  
IN. OMNES. PROPENSIONE. CVMVLAVIT. VT. SVI. DESI-  
DERIVM. EXTERI. QVOQVE. NATIONIBVS. CVM. ADMIRA-  
TIONE. RELIQUERIT. VIXIT. ANNOS. LXVII. MENSES. VI.  
DIE. XX. DECESSIT. PRIDIE. IDVS. MARTII. CL. I. C. IV.  
PETRVS. BOSSV. LVGDVNENSIS. CVBICVLI. PRÆPOSITVS.  
A. SECRETIS. ET. RENATVS. CORTIN. ANDEGAVENSIS. A.  
CVBICVLO. ITEM. ET. SECRETARIVS. EX. TRIENTIBVS.  
HÆREDES. PATRONO. OPTIMO. ET. INDVLGENTISSIMO.

S. P. P. G.

*Roma iacet in Ecclesia S. Ludovici.*



# **H A R A N G V E F V N É B R E S V R L E T R E S P A S**

*de Mefiue Arnauld Cardinal d'Oſſat Eueſque de Bayeux , prononcée à Rome en l'Egliſe de S. Louys le XVIII. Mars*

*M. DC. LIII. traduit de Latin en*

*François.*



## **RINCES TRES-ILLVSTRES,**

Il n'y a rien en la nature qui ne ſoit ſujet à la mort , & la condition des grands n'eſt pas autre que celle des petits. Vn deüil n'eſt pas pluſtoſt fini, qu'il faut que vous en recommenciez vn autre, & ſemble que maintenant la mort meſpriſant les perſonnes baſſes , n'aye autre deſſein que de triompher de voſtre pourpre. Et partant les ſuiets de charger le deüil pour ceux de voſtre College eſtans ſi frequens , il y a apparence que ie me deuerois ſeruir d'une telle matiere pour l'entree de mon diſcours , ſi d'ailleurs la grandeur de cette aſſemblee, & l'affectiſon que vous teſmoignez tous à la memoire de l'Illuſtriſſime Cardinal d'Oſſat, ne me promettoient vne audience aſſez favorable. Sa perſonne donc me ſeruirra comme d'un champ dans lequel ie me donneray carrière : mais d'autant que ſon eſtenduë eſt ſi grande, que ny la foibleſſe de mon eſprit ny la grandeur de vos occupations ne me permettent d'en parcourir tous les lieux, il faut qu'en quittant le grand chemin ie me reſtreigne dans le ſentier. Je commenceray par vn endroit que quelque autre que moy auroit parauanture euité comme nuifible à ſon deſſein : car la pluſpart de ceux pour qui l'on fait des harangues funebres donnent ample ſujet de parler magnifiquement de leur patrie, de la grandeur de leur extraction, & de leur parenté; choſes deſquelles ie me trouue entierement deſpourueu. Mais ie ne laiſſe pas pourtant d'eſtimer que ce deſſaut m'eſt tellement auantageux, que ie ne dois faire difficulté d'en vſer comme d'une ſource, d'où ie face eſcouler par apres tout le reſte de mon diſcours. Car qu'il ſoit arriué que dans ce grand & fleuriffant Royaume de France Arnauld d'Oſſat n'aye peu rencontrer ny le lieu de ſa naiſſance celebre, ny rien en toute ſa maiſon ny en toute ſa parenté qui peult annoblir ſon origine, ie le tiens à grand bon-heur; d'autant que par ce moyen il a eſté luy-meſme l'auarier de ſa fortune, n'ayant par conſequent à partager ſa gloire avec perſonne, & ce qu'il s'eſt acquis de loüange eſtant tellement ſien, que ny l'excellence de ſa patrie, ny l'antiquité de ſa race, ny l'imitation de ſes progeniteurs ny peuuent rien pretendre. Je ne ſçay ſ'il eſt point plus deſirable de naiſtre ſi baſſement que toute noſtre claieté vienne de nous meſ-

més, plustost que d'estre illustré de la noblesse d'autrui, c'est à dire, d'une lumiere empruntée. Certes on a ouy bien souvent ce grand homme, qui disoit en riant qu'il s'estimoit glorieux de ce que son patrimoine avoit esté si petit, qu'à peine avoit-il esté suffisant pour fournir à la despence des obseques de son pere. La pauvreté doncques & la bassesse de la condition de ceux dont il tiroit son origine, & le lieu de sa naissance, qui est vn miserable village aupres d'Auch en Guyenne appellé Cassagnabere, ne luy donnant aucun aduantage dont il se peust preualoir, il luy arriva comme aux grands fleuves dont la source est fort petite; car d'un commencement tres-foible il s'achemina de telle sorte par le moyen de sa vertu & de sa dexterité à l'honneur & à la gloire, qu'apres s'estre acquis peu à peu plusieurs dignitez, il obtint en fin en cette ville celle qui est la plus proche de la plus grande qui soit au monde. Et combien grand pensez-vous, Messieurs, qu'il a fallu qu'ait esté ce merite, lequel ayant esté premierement approuvé dans vostre Consistoire, qui est comme vne assemblée de Dieux, a esté par apres introduit avec les ornemens de pourpre dans le temple auguste de l'honneur. Ce qui rend cét Empire grandement glorieux parmy les nations estrangeres, est que ses Senateurs sont comme autant de Roys: mais chacun sçait que ceux qui sont admis dans ce Senat sans que l'ancienneté de leur noblesse, ou la grandeur de leurs richesses, ou les autres auantages de la fortune les ayent rendus considerables, il faut qu'ils ayent esté doüez d'un vertu extraordinaire, & d'un merite tres éminent. Or Monsieur d'Ossat ayant esté entierement destitué de tout secours exterieur & estranger, si nous voulons sçavoir au vray quels moyens il a employé pour paruenir là où en fin il est arriué, il est necessaire que nous reprenions de plus haut le cours de sa vie & la suite de ses actions.

Son pere & sa mere estans morts lors qu'il estoit encor fort ieune, & presque enfant, il ne se peut dire combien grande fust l'inclination qu'il eust à la pieté, à la modestie, à la temperance, à la continence, & bref à toutes sortes de bonnes & honnestes mœurs: & ne sçauroit on exprimer avec quelle ardeur, & avec combien de constance il s'adonna à l'estude des lettres; auquel ayant fait vn profit non vulgaire, il s'en alla premierement à Paris, & de là à Bourges, où estoit Iacques Cuias le plus docte & eloquent Iuriconsulte de cét aage, sous lequel il apprist le droit Civil assez long-temps, & avec soin. De là estant retourné à Paris avec bonne prouision de toutes les sciences, & principalement de celle de la Iurisprudence, il se mit au barreau, & y fut assez longuement. Mais Monsieur de Foix, Archeuesque de Tolose, & personnage eminent en doctrine, luy ayant conseillé de quitter cét exercice plein de debat & de contention, & si contraire à la douceur de son naturel, il condescendit volontiers à vn aduertissement si salutaire, & fut admis en la famille de ce Prelat, & à la participation & communication de ses estudes. Cependant Monsieur de Foix ayant esté destiné pour Ambassadeur à Rome, & desirant d'auoir quelque habile homme pour luy seruir de Secretaire en cette charge, il se resolut d'y employer Monsieur d'Ossat, auquel il auoit reconnu par lon-

gue, experience vne grande fidelité & vne singuliere prudence.

La valeur de ce personnage ayant rencontré vn si digne theatre comme est celuy de la Cour de Rome, elle commença à se produire & à se faire cognoistre. Il auoit bien auparauant des s'attendre ieunesse fait particuliere profession d'innocence & de probité en toutes ses actions, & auoit rendu assez de preuues de sa grande doctrine, de la viuacité de son esprit, & de la solidité de son iugement : mais ces semences de gloire, comme si elles eussent esté jettées dans vne terre sterile, ne produisoient aucun fruit, & ces vertus si rares & si eminentes, comme si elles eussent esté releguées en quelque desert & en quelque solitude, demeuroident obscures & sans lustre. Mais à Rome cette gloire paruint à sa maturité, & la splendeur de ces vertus s'espandit & esclata de telle sorte, qu'elle attira soudain la faueur & l'applaudissement de tous les honnestes hommes & de toute la noblesse. Car Rome, qui est comme la Roynie de toutes les villes, & le siege & le domicile de la gloire & de la Maiesté, a cela de propre, que tant s'en faut qu'elle porte enuie à la valeur des estrangers qui s'y viennent habiter, qu'au contraire elle en embrasse les vertus comme par droit d'hospitalité, les met en leur iour, & les expose au theatre de l'Vniuers. Or qu'elle ait conserué de droit avec beaucoup de fidelité à Monsieur d'Ossat, l'estime que le peuple vniuersellement a fait de son merite le tesmoigne assez. Car qui est celuy qui ne louë la prudence, la iustice, la debonnaireté, & les autres ornemens de l'esprit de ce grand homme, lesquels eussent à l'auanture esté enseuelis ailleurs dans des tenebres tres-obscures. Chacun auouë que sa doctrine estoit si grande, que non seulement il estoit tres-excellent Iuriconsulte, qui estoit sa principale profession, mais qu'il auoit encores vne si parfaite cognoissance de la Theologie, de la Philosophie, des Mathematiques, & des lettres humaines, qu'il sembloit estre arriué à la perfection de chacune de ces sciences. Il y en a aucuns lesquels poussés de certain instinct s'appliquent seulement à l'estude du Droit Civil, d'autres à l'eloquence, d'autres à la Theologie, & d'autres à la recherche des causes naturelles : comme si la nature excitant en nous le desir de la verité, dont les charmes & les attraitts sont tres-puissans, n'auoit voulu permettre à vn seul homme de posseder plusieurs sciences ensemble. Mais l'on peut à bon droit dire de Monsieur d'Ossat, ce que l'antiquité a admiré au vieil Caton ; qu'il auoit l'esprit si souple, qu'il sembloit estre gay pour tout ce à quoy il s'adonna. Car es consultations de droit, es disputes des choses diuines & humaines, & en ses harangues, il se monstroit tres-docte & tres-eloquent. Et vous Messieurs, auez souvent monstré l'estime merueilleuse que vous faisiez de la solidité & variété de sa doctrine, lors que dans le Consistoire ses opinions estoient receuës de vous avec vne singuliere approbation. Et le Pape mesme tesmoigna bien l'opinion qu'il auoit de son sçauoir, quand il le mist dans la Congregation où se traictent les questions qui regardent les choses du Concile, & des liures qui doiuent estre receus ou censurés. Car la doctrine de Monsieur d'Ossat n'estoit point sterile, & ne ressembloit pas à ces Philosophes qui allechez de la douceur de l'estude s'loignent de manimer des affaires, & abandonnent ceux

qu'ils deuroient assister de leur secours : là où il ne se proposoit autre but de sa retraite & de sa contemplation, que d'employer pour l'utilité publicque tout ce qu'il y apprenoit. Et cognoissant tres bien que toute la force de la vertu consiste en l'action, il avoit conjoint ensemble avec vn excellent temperament, tant les sciences qui n'ont pour but que le seul exercice de l'esprit, que les arts dont l'exercice se refere au culte diuin, & au service public.

Parmy les plus grandes & plus graues occupations, son principal soin estoit de servir Dieu avec vne grande pureté : car outre la Messe qu'il celebroit tres souvent, il avoit destiné certaines heures du iour pour les prieres, auxquelles il vouloit que toute sa famille se trouuast avec luy, & n'y auoit aucun de ses domestiques qui s'en peust exempter pour quelque pretexte que ce fust. C'est la coustume que les ieunes gentils-hommes François viennent à Rome pour y apprendre les exercices, & y en voit-on ordinairement vne grande quantité. Toute ceste Noblesse alloit ordinairement les iours des festes visiter Monsieur d'Ossat, pour s'instruire sous vn tel maître aux bonnes mœurs, & recueillir ses preceptes comme des oracles : & luy apres les auoir recens avec toute sorte de courtoisie, il les faisoit assister à la Messe qu'il celebroit, après laquelle il les entretenoit des choses diuines, de la misere humaine, & du deuoir du vray Chrestien. Et comme il estoit grandement versé en la lecture des histoires, il representoit à la pluspart d'eux la valeur & la vertu de leurs ancestres, & à tous generalement les grands hommes qui auoient esté autrefois l'ornement de la France ; & sur ce les exhortoit à ne se departir iamais de la fidelité qu'ils deuoient à leur Roy, ny de l'amour qu'ils estoient obligez de porter à leur patrie. Et c'est merueille combien ces discours enflammoient le couraige de ces jeunes gens à entreprendre toutes choses honnestes & glorieuses, à quoy cette nation est de soy-mesme naturellement portee. Par où l'on peut voir le soin qu'il deuoit auoir des siens, puis qu'il l'auoit si grand de ceux qui n'estoient point sous sa charge.

Nous auons appris par les lettres de celuy qu'il auoit commis à l'administration de son Euesché de Bayeux, que pendant les quatre années qu'il en a esté Euesque, le culte diuin y auoit receu plus d'augmentation & d'ornement qu'on n'y en auoit sceu faire par l'espace de quarante ans auparavant. Je m'arresterois tres-volontiers plus longuement à celebrer ceste ardeur qu'il auoit au service de Dieu, si ie ne me sentoie pressé d'employer mon discours à des choses, lesquelles estans publiques, & plus iointes avec l'interest de plusieurs, en meriteront aussi d'autant plus de faneur & d'applaudissement.

Car que diray ie premierement de son industrie & de sa dexterité à manier les affaires, tant publiques, que particulieres : laquelle il a fait cognoistre en tant de choses ces annees passees, & particulierement quand il fallut accommoder les troubles de la France par le moyen de l'auctorité du Saint Siege. Car estant Secrétaire de Monsieur de Foix pendant son Ambassade à Rome, comme i'ay dit cy-dessus, & partant exposé à la veüe de toute ceste ville, il exerça si dignement sa charge, par le moyen



de sa prudence, & de l'instruction qu'il receut en pratiquant les plus habiles de cette Cour, que Monsieur de Villetoy Conseiller du Roy de France en son Conseil secret, & tres-entendu es affaires d'Estat, jetta les yeux sur luy comme sur vne personnetres-capable & tres-digne d'un grand employ. Et partant, quoy qu'il ne l'eust iamais veu, & qu'ils fussent si fort esloignez l'un de l'autre, il commença à l'aimer de telle sorte, & à faire, quand l'occasion s'en presentoit, vn si honorable recit de son merite deuant le Roy, que Monsieur de Foix estant mort en cette Ambassade, on luy adressa soudain toutes les despeschés, & luy fut commise l'administration des affaires de sa Maiesté auprés du Pape, lesquels il negocia seul pendant ce temps-là, & tous les Ambassadeurs de France qui sont venus depuis ont tousiours eu charge de luy communiquer leurs instructions, & de ne rien traiter sans son aduis. Son estree au maniemment des affaires arriva au temps le plus miserable & le plus calamiteux de la France, laquelle fut soudain apres agitée des flots de sedition, & puis grandement tourmentée par vne cruelle guerre, & en fin presque abbattue & terrassée par la mort de son Roy. Ce qui suiuit apres est trop funeste pour estre recité en cette compagnie: la mort de tant d'hommes, la dissension des amis, la perfidie des parens, le mespris de la Religion, le vol des choses profanes, la profanation des sacrees.

Henry III. ce valeureux Prince, estant en fin paruenu à la Couronne, il sembloit que ses victoires deussent estre l'affermissement de la paix: mais la Religion ayant esté grandement corrompue & violée par les guerres precedentes, il estoit à craindre que si elle n'estoit bien restablie il n'en arrivast quelque tempeste plus grande. Ce Roy victorieux pour obuier à ce danger, voulut estre absous de l'heresie par le Pape, & enrichir par mesme moyen ses triumphes avec vn exemple si memorable de pieté. C'estoit vne chose grandement difficile, & qui ne pouuoit estre traitée que par vn homme tres-habile & tres-prudent; & partant le Roy, qui comme il est tres-entendu aux affaires de la guerre, ne l'est pas moins aussi à reconnoistre & discerner les qualitez de l'esprit d'un chacun, ayant choisi Monsieur du Perron Euesque d'Eureux, personnage tres-sçauant & tres-eloquent, pour l'enuoyer icy traiter de sa reconciliation, & du reestablisement de la religion, il luy donna pour compagnon en cette charge Monsieur d'Osat, quoy qu'il y eust en France assez d'habiles hommes pour estre employez en vne telle commission. Il n'y a pas vn d'entre vous qui ne se ressouuienne avec combien de dexterité & de prudence il se comporta en cette action, qui a esté comme le principe de toute la gloire qui s'est acquise. L'affaire estoit de soy fort embrouillée, & en laquelle il se trouuoit beaucoup de choses contraires, qui deuoient estre accommodees par l'aduis de plusieurs. Il la traitta neantmoins de telle sorte, qu'outre que le Pape en receut de la satisfaction, & le Roy du contentement, la Chrestienté mesme en acquist la paix & le repos qu'elle ne pouuoit esperer si les troubles de France eussent continué: ce qui non seulement le rendit recommandable à tous les François, mais luy fist encor tant plus tost obtenir la dignité de Cardinal à la requisition du Roy. Et luy qui estoit tout  
remply

simply de gratitude & de recognoissance, ne manquoit iamais aux occasions qui s'en presentoient d'auouer franchement qu'il estoit entierement obligé à la grace du Roy de l'honneur qu'il possedoit: mais afin que l'on ne creut pas qu'en acceptant ceste faveur steust vendu sa liberté, & qu'il fust pour prostituer son suffrage à toutes les demandes de celuy qui estoit l'auteur d'un si grand bien fait, pour iniustes & déraisonnables qu'elles fussent, il auoit accoustumé de dire qu'il estoit assuré que tous les desirs de son Roy estoient iustes & equitables, mais que s'il arriuoit iamais qu'ils fussent autres qu'il ne pensoit, il ne se relascheroit iamais pourtant iusques à luy complaire contre la raison. C'estoit vn homme sans fard & sans tromperie, candide, equitable, & grand amateur du droit & de l'equité, d'où procedoient ceste modestie & ceste moderation qui reluisoient en luy, dignes eues de la memoire de toute la posterité. Il a demeuré à Rome vingt ans & plus, sans que pour cela il en soit deuenu plus riche, faisant profession de l'antique probité, & de viure sans cupidité & sans auarice. Henry troisieme luy ayant donné en France vn benefice de qualité assez honneste, & de grand reuenue, comme ie croy, il l'auoit accepté de bonne foy: mais estant arriué quelque contestation sur la possession, il en quitta soudain la poursuite, & le laissa en la libre disposition du Pape & du saint Siege. Il ne receuoit aucuns presens, & ne permettoit que les siens en receussent, estimant qu'on ne les peut accepter sans vendre sa liberté, & sans engager son esprit à vne euidente corruption. Tellement qu'ayant recogneu que quelque vn de ses domestiques s'estoit relasché en ce point, il le contraignit de rendre ce qui luy auoit esté donné; & à fin de le dédommager il le recompensa du sien, garantissant par ce moyen sa propre réputation & l'intérêt d'autrui. Il y en a encor plusieurs qui se resouuenent combien Monsieur d'Ossat estoit aimé du vieux Cardinal d'Este. Ce grand & tres celebre Prince estant alié de la maladie dont il mourut, & faisant son testament, il donna à Monsieur d'Ossat qui estoit present quatre mille escus. Mais craignant que sa bonté & sa modestie ne l'empeschassent de retirer aisément ceste somme d'entre les mains de ceux qu'il auoit déclaréz executeurs de son testament, il luy voulut bailler vne pierre precieuse de la valeur de vingt mille escus, pour luy seruir de gage iusques à ce qu'il eust esté payé du legs qu'il venoit de luy faire. Monsieur d'Ossat estoit necessiteux en cecy, là, comme il l'a presque tousiours esté depuis, & sembloit que Poëtre qui luy estoit faite meritoit d'estre recherchée & receüe: mais ny vn auantage si grand, ny la sollicitation de ses amis, ny les istantes prieres de ce Prince, n'eurent point le pouuoir de le faire condescendre à se preualoir d'une telle gratification, qui eust peu faire soupçonner, ou qu'il se fust deslié de la preud'homme d'autrui, ou qu'il eust voulu faire trafic de l'amitié qu'il portoit à son maistre. Il a sans doute surpassé plusieurs de ceux qui sont celebres en la memoire des hommes pour la moderation de leurs esprits, mais il semble qu'il se soit encor surmonté soy-mesme en la pratique de ceste vertu. Car Henry troisieme, qui auoit conceu vne tres-grande opinion de sa fidelité & de sa prudence, s'estant resolu de l'appeller auprès de luy, & de luy donner vne charge de Secrétaire d'Etat, & luy en ayant

mesme fait faire l'offre, il s'excusa, & s'opiniâtra à la refuser, préférant la seureté en vne mediocre fortune, au danger de la ruine en vne plus grande.

Quelqu'un à l'avanture jugera qu'un refus si altier des peuples, des richesses, & des faueurs, prouenoit d'un naturel par trop austere & rigide; car il arriue souvent que ceux qui sont si exactement iustes, & entierement impenetrables à toutes cupiditez, sont aussi grandement importants, & leur innocence si severe est tres-incommode à la société ciuile. Ce qui n'estoit nullement en ce Prelat; ains il auoit accoustumé de dire que l'estendue de l'equité estoit bien plus grande que celle du droit, & blamoit plaisamment Caton, qui vendoit ses esclaves quand ils estoient deuenus vieux. Par ainsi, tant s'en faut qu'il ait iamais souillé les beautés esclatantes de son ame avec aucune tache de seuerité, qu'au contraire entre les rares & eminentes vertus dont il estoit orné, il n'y en auoit aucune qui fust plus specieuse & plus apparente que la benignité, la mansuetude, & la douceur. Personne ne l'alloit requerir de quelque faueur qu'il ne le receuillist tres-amiablement, & qu'il ne l'assistast de tout son pouuoir. Et à fin qu'il eust le moyen de fournir aux necessitez de ceux qui imploroient son secours, il estoit contraint de soustraire aux siennes propres autant que son peu de reuenu le pouuoit supporter. Mais n'estoit-ce pas vne merueille, qu'un homme d'une telle dignité prist la peine de dresser les requestes de ceux qui pressés de quelque affliction estoient abandonnez de tout le monde, qu'il se chargeast de la sollicitation de leurs affaires, & s'y employast avec autant de soin & de vigilance comme s'il eust eu à negotier ceux-là mesme du Roy. Que si ie n'auois desseigné de ne m'estendre pas beaucoup, ie pourrois sur ce suiet représenter les bons offices qu'il a faits à plusieurs ordres de Religieux; car comme il ne rejettoit personne qui eust besoin de luy, aussi s'employoit-il plus volontiers & plus soigneusement pour les Congregations qui font particuliere profession de pieté. Les Feuillans, les Recolets, les Iacobins reformez sçauent bien ce que ie dis; & pour ne parler des autres, nous qui sommes enroulez en la Compagnie de Iesus le sçauons mieux que tous. Car si ce nous est un tres-grand honneur d'estre remis par toute la France au gré & au contentement de tous les gens de bien, Monsieur d'Os-  
sar pourroit à bon droit prendre vne grande part à la gloire de ce retablissement, pour lequel il s'est employé enuers le Roy avec ardeur, & mesmes sans en estre requis, si ce n'estoit qu'elle appartient toute à sa Maiesté, & qu'il nous est plus seant de luy en auoir toute l'obligation.

Nous vous sommes infiniment redevables, ô tres-vailant & tres-religieux Roy, de ce que vostre cholere estant si aisée à appaiser, vous ne pouuez trouuer aucune fin aux faueurs qu'il vous plaist de nous départir. Ce n'estoit pas assez à vostre generosité de nous reconcilier à vous; elle a voulu non seulement nous remettre en nostre premier estat, mais nous accabler encor de nouueaux bien-faits. Vostre clemence & vostre liberalité sont qu'il nous est plus souhaitable d'auoir esté chassés avec honte & ignominie de vostre Royaume, qui a tousiours esté l'asyle de la religion, que d'estre priuez de cet honorable resmoignage de vostre Maiesté, & de l'appro-

lation publique que vous faites de la valeur de nostre Societé. Nous vous sommes, dis-je plus redevables qu'il n'est en nostre pouvoir de l'exprimer; mais permettez-nous, ie vous supplie, de nous monstrez aussi recognoissans envers Monsieur d'Ossat, en publiant les bons offices qu'il luy a pleu de faire pour nous; puis que nous ne devons point douter que si vous ne nous eussiez voulu gratifier de vostre propre mouvement, & de vostre franche volonté, vous luy eussiez très volontiers permis d'avoir part à l'obligation éternelle que nous avons à vostre Maïesté.

Mais ie reviens à Monsieur d'Ossat; ou pour mieux dire ie vais finir mon discours avec ce peu de paroles qui me restent à dire à sa louange. Sa mort donc est vn suiet de douleur à chacun. Le sacré College a perdu en luy vn tres-habile homme, les tribunaux de la Justice vn Juge tres-innocent & incorruptible, les gens sçavans vn de leurs chefs, les ignorans leur défenseur, les Religieux leur vateur & leur pere. Mais la France est celle-là qui reçoit par ce trespas la plus cruelle playe, puis qu'au temps le plus proche de sa ruïne, elle a esté conservée par sa prudence, & que monobstant les divisions des diverses sectes & opinions, il l'a maintenue par son industrie en son ancien devoir sous l'obeyssance du saint Siege.

Desormais le salut de ce grand Royaume depend entièrement de vous, Messieurs de Loyeuse & de Berhune, apres la mort de celui qui vous assistoit à le conserver; il implore d'oresnavant vostre secours & vostre ayde, & les vœux & les prieres de tous les bons François s'adressent à vous pour cela. Que si vous le protegez à l'advenir, comme vous avez esté par cy devant sa defence conjointement avec Monsieur d'Ossat, & qu'avec cela vous estimiez chose digne de vostre soin de soulager la misere de ceux qu'il luy a pleu de favoriser d'une amitié tres-estroite; & lesquels il semble avoir commis à vostre protection comme par droit hereditaire, la France aura beaucoup de suiet de supporter sa perte avec plus de patience, & nous moins d'occasion de déplorer le malheur qui nous prive d'un si grand support.

# ELOGIVM ILLVSTRISS.

VIRI ARNALDI CARD.

OSSATI, EX LIBRO CXXXI.

HISTORIARVM V. C. I. AVGVSTI THVANL



*Leinus memorabilis Arnaldus Ossatus, nulli horum post habendus; iam multoties à nobis perhonorifice appellatus; ut minime emortualem diem expectari importaverit, ut memoria eius celebraretur, sicut in plerisque aliis curis, qui nullum aliqui partem in historia faciunt; eoque licet pauciora de tanto viro dicenda occurrant, insula tamen vel amicitiae ergo, quae mihi artificum cum eo intercessit, cum aliqua grati animi celebratione persolvenda sunt.*

*Lein Nonum papalonia vestra pago intra Augustam Ansciorum ignobilibus, obscuris adde natalibus, ut cognatis & adfines profus ignoraret, & pauperes ac domesticos, nullas praeterea brachides habuerit; sed donis inguam, doctrina, pietate, morum probitate, & insita prudentia à Deo largissime cumulatus, facile natalium defectum tanta accessione supplens, ut Roma in amplissima orbe ibeato ceteros omnes natalium splendore, & alijs fortunae praesidijs illustres aequaret, plerisque superaret, aequabilis irreprehensibilis, vita tenore omnium auctorem & admirationem promeritisque in illa aula totiv xxxj. annis se gessit, ut nominis bene sententiam dubium reliquerit, quin si peccati originem, quod vulgo vocant, foverem obstricisset, quae moderatissime maximos honores in ea civitate ambitionem deterrerat, eodem in studio pergens ad summum Ecclesiasticae potestatis fastigium inoffensa pede vadit. Vixit annos lxxvj. menses vj. dies xx. ad B. Ludonici sepultus.*

TRADUCTION EN FRANCOIS DE L'ELOGE

de Monsieur d'Ossat tiré du cxxxj. livre de l'histoire de Monsieur le

Président de Thou.



'Ay reserué Arnould d'Ossat pour le dernier des hommes remarquables qui sont morts ceste année, quoy qu'il n'y aye aucun de ceux que i'ay recitez qui merite de le preceder. L'honorable mention que i'ay desia faite fort souuent de luy dans ces liures, monstre assez que ie n'auois que faire d'attendre le temps de sa mort pour celebrer sa memoire, comme il arriue de ceux qui ne font aucune part en l'histoire. Et quoy qu'il m'en reste peu à dire, neantmoins l'estroite amitié que nous auons eu ensemble a exigé de moy que pour tesmoigner ma gratitude ie luy fisse icy ses obseques. Il n'asquit en Guyenne dans vn petit village auprès d'Auch, &

estoit d'extraction si vile & si basse, qu'il ne cognoissoit aucun de ses parens, en sorte que les pauvres & les domestiques furent ses heritiers. Mais Dieu l'auoit enrichy si abondamment des dons de l'esprit, de doctrine, de pieté, de probité & de prudence, qu'il suppléa par leur moyen le defect de son origine avec vn tel auantage, que non seulement il se rendit esgal à tous ceux qui pour l'antiquité de leur race ou pour les autres faueurs de la fortune estoient illustres à Rome, ce grand theatre de l'Vniuers, mais il en surpassa mesme plusieurs, & par le cours de sa vie irreprehensible & conduite d'une mesme teneur, il s'acquit & l'amour & l'admiration d'vn chacun; se comportant de telle sorte en cette Cour-là par l'espace de trente & vn an, qu'il n'y a aucun de ceux qui iugent nettement des choses, qui doute que sans l'ostacle du peché originel, qu'ils appellent, il ne fust pour arriuer vn iour au suprême degré de la puissance Ecclesiastique, par la mesme voye qu'il auoit conduit à ceste grande dignité qu'il possédoit. Il a vescu soixante sept ans, six mois, & vingt iours, & est enterré à saint Louys à Rome.

EX ELOGIS CLARORVM VIRORVM  
S. C. SAMMARTHANI, ARNALDV.  
Offatus Cardinalis.



*E*D & hanc sacri ordinis aureum florem, ocellum vestre Gallie, sui denique seculi nonum fidus Arnaldum Offatum quo nunc pinculo pretereantur is humilis apud Auscos ortus loco, sed nobili & excelsa prædiant indote, postquam in umbratilibus Rhetorum & Philosophorum scholis aliquandiu proficundo latuisset, foroque deinde se comparasset, ad alia studia se transulit, Romanque mox in Pauli Fexij Legati Regij comitatus profectus, & postea sublati in Cardinalis Atestini rerum Gallicarum patroni familiam ascitus, crepit se ad grandiora, exantandisque magni momenti negotijs id paulatim affluens, ut in hoc laudis genere paucum hæc atas haberet procul dubio ueniam. Itaque Henricus III. omnis euegie uiridis liberalissimus admirator, cum vltro in Galliam renouare consiliauit, ut de epistolis interioribusque consilijs eius fideli opera & industria dubijs temporibus uestiretur, Sed cum sepius irritatus esset, id munus, tanquam sua professione aliquam, modeste repudiavit. Nec de fuero qui hoc eius factum sic interperarentur, quasi Romanæ celestem affluens, & ardentis fortune sibi conscius ad ea se distingeret, quæ Roma postea consecutus est, longe maioris ampliorisque dignitatis ueniam. Cuius enim Henricus III. potata inuictis armis Gallia, cum summo quoque Pontifice pedire in gratiam statisset. Offatum & alios delegit, qui vna cum Ebroisensi Episcopo. Lucio Danilio Petrato Regali doctore & uir, uano amplissimo Cardinale, Romanæ iudicium Legationis illud opus conficeret, pacem quæ ante ha-

*bore partam aliquanto firmiore presidio vinceres ac stabilires. Quo demum negotio felicitate & ex animi sententia transacte, vir eximius commendante Regi illustrem sacre partem & bonorem à grato & amico Pontifice facite talis: eoque facilius, quod insignis candor & probitas, amabilisque moris cum summa eruditionis & prudentie opinione coniancti, omnium fere Cardinalium animos iam dudum promeruisse, sibi qui conciliassent. Obiit in eo fortuna splendore felicissima senex, nobisque vel addita iam operi coronide novum nec opinatum Elogij conscribendi argumentum obijcit. At vos in quorum gratiam hæc sacra paravimus, à celeberrimis tot virore beati manes esse boni: nec enim dignitas ea peragi sanè poterant quam si ad extremum tanto nomine appellato rite conveniementerque scilicet aremus.*

## TRADUCTION DE L'ELOGE

### PRECEDENT.



E ne puis sans crime outrepasser Arnould d'Offat, quel'on pent à bon droit & nommer la fleur du Consistoire des Cardinaux, l'œil de la France, & vn nouvel astre en nostre siecle. Il estoit né d'un fort bas lieu près la ville d'Auchien Guyenne, mais dōuë en recompense d'un très riche & tres genereux naturel. Ayant demeuré quelque temps dans l'obscurité & dans les tenebres de l'Estat de Professeur, & leu publiquement la Rhetorique & la Philosophie, il se mit par apres à l'estude de la Iurisprudence, de laquelle il quitta depuis l'exercice pour suivre Monsieur de Foix qui alloit en Ambassade à Rome pour sa Maieité, lequel estant mort en cette charge, il entra au service du Cardinal d'Este qui estoit protecteur de France, là où il commença d'aspirer à des choses plus grandes qu'il n'avoit encore fait, & s'accoutuma tellement au manientement des affaires d'importance, qu'il n'y a eu personne de son temps qui en cela aye peu esgaler son industrie & sa dexterité. Tellement que Henry troisieme, qui a esté toute sa vie grand admirateur des personnes qui ont esté éminentes en quelque sorte de perfection & de vertu, se resolut de le rappeler en France, pour le faire de son Conseil, & luy donner la charge de Secretaire d'Estat, au temps auquel les choses branloient fort dans son Royaume. Mais sa modestie luy fist refuser cette offre, comme contraire à la profession Ecclesiastique dans laquelle il estoit engagé. Ce qui fist iuger à plusieurs qu'à cause de l'habitude qu'il avoit prise à Rome, & de l'esperance qu'il auroit conceüe que la fortune qui commençoit à luy rire luy seroit en son plus fauorable, il s'estoit reserué à de plus hautes & de plus amples dignitez: lesquelles luy sont arriuees depuis selon sa conjecture. Car Henry le Grand apres avoir dompté la France avec ses armes invincibles, s'estant resolu de se mettre bien avec le saint Siege, & envoya à Rome Monsieur du Plessis Evêque d'Evreux, qui des

puis a esté Cardinal, afin qu'il se joignit avec Monsieur d'Ossat, & que tous deux en qualité d'Ambassadeurs traitassent avec le Pape de sa reünion à l'Eglise, à fin d'affermir par ce moyen & consolider la paix qu'il auoit acquise avec des trauaux & des labeurs indicibles. Cette negotiation ayant succedé heureusement & selon le desir de sa Maiesté il fut aisé à Monsieur d'Ossat d'obtenir de sa Sainteté, de laquelle il estoit aimé & chery, la dignité de Cardinal à la nomination du Roy. Ioint que sa candeur, sa probité, la douceur & facilité des ses mœurs, & l'estime que l'on faisoit de sa doctrine & de sa prudence, luy auoient long-temps auparauant concilié la faueur & la bien-venillance presque de tous les Cardinaux. Il est mort vieil & tres-heureux dans la splendeur de cette fortune, & comme i'auois déjà acheué cét ouurage, il m'a fourny contre mon attente d'un nouveau sujet d'Eloge. Mais vous, ô bien-heureuses ames, à la memoire de qui i'ay dressé ce tombeau resiouissez vous; car ie ne pouuois plus dignement y apporter la derniere main, qu'en y adjoustant vn nom si grand & si celebre.

## L E T T R E S









# LETTRES DE MESSIRE ARNAVLD CARDINAL D'OSSAT.

AU ROY HENRY LE GRAND,  
ET A MONSIEVR DE VILLEROY.

*Recueillies selon l'ordre des dates.*

---

A MONSIEVR DE VILLEROY.

I.

**M**ONSEIGNEUR, Je ne me ferois ingeré à vous  
escrire, si vous ne me l'eussiez commandé par la lettre  
qu'il vous plut m'escrire le 16. d'Octobre: mais pour  
vous obeir, outre la response que ie fis à vostre lettre du  
4. Nouembre par vn extraordinaire qui s'en alloit par  
delà, ie vous eserui encores depuis par l'ordinaire de  
Lyon le 9. Et à present par cét autre ordinaire qui doit partir demain,  
comme depuis long temps ils ne vont plus que de mois en mois. Depuis  
ma dernière donc, le Seigneur Jean François Aldobrandin, duquel ie  
vous faisois mention, partit pour Espagne leudy premier iour de ce mois,  
suisant le chemin de Ciuita-Vecchia pour là s'embarquer. Quant à sa  
charge, ie me suis confirmé tousiours de plus en plus en ce que ie vous en  
escriuois, et entre autres choses, qu'il a commission de tirer du Roy d'Es-  
pagne à quelles conditions il voudroit faire paix ou trefue avec nous,  
pour puis après les faire accorder par le Roy auant que luy donner l'ab-  
solution. Sur lesquelles m'ayant esté parlé par quelques vns de ceux qui

hantent ledit Seigneur Iean François, & qui ont cét honneur de parler souuent de telles choses avec nostre saint Pere, & avec Messieurs les Neueux, ie leur ay respondu en honime qui ne presume point de respondre du fait du moindre de mes égaux, me remettant tousiours à qui il touche, tant s'en faut que ie voulusse respondre des choses publiques qui dependent du Roy. Toutesfois estant pressé par eux de leur dire ce que i'en pensois, & eux estans de tel respect que ie ne leur pouuois refuser cela honnestement, ie leur ay dit librement ce que i'ay estimé estre de la verité, & du seruice & reputation de sa Majesté, inclinant à leur faire de nostre costé les choses plustost difficiles qu'autrement, afin qu'ils n'en promissent à autrui ny à eux mesmes plus qu'ils ne doiuent, & nous estimassent plus qu'ils ne font; & afin aussi que si en fin ils obtiennent du Roy quelque chose de plus, ils en sachent plus de gré à sa Majesté, qu'ils n'auraient contentez de choses qu'il pouuoit, & pour son particulier deuot possible faire de moins.

Premierement donc ie leur ay dit, qu'à propos du Roy & les Princes & Seigneurs de son Conseil n'endureroient qu'au fait de l'absolution on messast aucun traité de paix ou de trefve avec le Roy d'Espagne, ny avec ce qui reste de la Ligue de France: comme aussi n'est-il point raisonnable attendu la diuerse nature & condition des choses & des personnes, estant l'absolution vne chose pure spirituelle, & la paix ou trefve pures temporelles, & les choses spirituelles ne deuant estre vendues & achetees avec le prix & l'intérest des temporelles. Et quant aux personnes, le Roy recognoit le Pape pour Vicaire de Iesus Christ, & Pere commun des Chrestiens, & au fait de l'absolution veut proceder enuers sa Sainteté comme deuot fils avec toute humilité & obeïssance filiale, & ce volontairement, librement & franchement, sans qu'il se puisse dire qu'il y ait esté contraint par le Roy d'Espagne, ny par la Ligue, ny par aucune autre puissance temporelle du monde; & tout de mesme croit il que sa Sainteté doive correspondre à ceste sienne reuerence & submission en vray pere, & luy donner l'absolution avec penitence, qui soit imposée à sa personne, & non à son Estat, & qui soit au salut de son ame, & à la satisfaction & edification de nostre mere sainte Eglise, & non au gré & aduantage des Espagnols, & des derniers obstinez. Mais avec le Roy d'Espagne le Roy de France veut traiter du pair pour le moins, & se comporter enuers son second, selon que le second se comportera enuers son premier. Et quant à ce qui reste de la Ligue, sa Majesté y veut proceder en Roy & Maistre, & leur departir de sa clemence & bonté autant qu'ils luy rendront d'obeïssance & de fidelité: bien croy-ie que donnée que sera l'absolution, & à la façon qu'il appartient entre pere & fils spirituel, sans y mesler l'intérest temporel du tiers, sa Majesté sera tousiours presté à recevoir les bons & saints records de sa Sainteté, soit pour Espagne ou pour Ligue, ou pour quelque autre que ce soit, & à y deférer autant que son honneur & reputation, & le bien de ses affaires & de son Royaume le pourront comporter: Mais si sa Sainteté vouloit mesler les interésts temporels d'autrui avec le sien spirituel de l'absolution, il seroit à craindre que outre qu'elle ne feroit rien pour Espagne, ny pour la Ligue, elle

estimeront encores vne faulſſe opinion, que la plus-part du peuple François a concené, Que tout ce que la Saincteté a fait iusques icy, & est pour faire à l'aduenir en oes choses icy, elle l'a fait & fera à discretion & bon plaisir du Roy d'Espagne & des Espagnols, & qu'elle pend & dépend de ce costé-là en tout & par tout; & gasteroit ses propres affaires & du ſainct Siege, le Roy & les siens se passans avec l'absolution qui luy fut donnée le 25. Iuillet de l'année passée, & la Saincteté & le ſainct Siege demeurans prinéz de l'obeïſſance accoustumée du Royaume de France, & l'Eglise de Dieu diuisée & deschiée par le schisme qui ja l'a destruite & ruinée plus qu'on ne sent pas encores.

En ſecond lieu ie leur ay dit, que quand apres l'absolution il ſera temps que le Pape procure la paix ou trefve entre ces deux grands Roys, le Roy de France, à mon aduis, en voudra eſtre requis auſſi ſormellement & auſſi honorablement comme le Roy d'Espagne: & qu'on ſe troyoit fort ſi l'on penſoit enuoyer vne Ambaſſade honorable en Espagne, pour y prendre l'oracle & bon plaisir de ſa Maieſté Catholique, & puis le faire ſçauoir au Roy par vne ſarbarane, & le ſecondre de s'y accorder, & encores bien aise que le ſourcil Eſpagnol ait daigné ſe bailler iusques à luy faire la loy. Et j'ay dit que ie leur recogneuſſe que le Pape ſe portant enuers le Roy comme il a fait iusques icy, ne pouuoit pour ceſte heure (auant l'absolution) luy enuoyer de meſme qu'il vouloit faire à l'autre, ſieſt-ce que ie me ſeruois de la meſme raiſon pour monſtrer que ſa Saincteté deuoit donc pour ceſte occaſion meſme, outre tant d'autres qu'il en auoit, donner au pluſtoſt l'absolutiō au Roy, afin de pouuoir puis apres faire les choses avec l'equité & decence qu'il doit, & avec la dignité & ſatisfaction d'une part & d'autre, & avec le fruit & bon ſuccez, qui ſe doit attendre de telles negociatiōs.

En troiſieſme lieu ie leur diſois, qu'alors meſme que tous les reſpects & honneurs ſeroient gardez & rendus de part & d'autre, encores ne voyoye point qu'il ſe peult faire paix entre ces deux Roys, pour ce que l'un ne voudroit point rendre le Royaume de Nauarre, & que ce ſeroit choſe iniuſte & honteuse que l'autre le quittast. Quant à vne trefve, ie ne voulois pas dire qu'elle ne ſe peult faire pour quelque brieſ temps; mais ie voulois bien qu'ils ſceuſſent que l'on n'y trouueroit point de noſtre costé ſi grande facilité comme ils croyent, & qu'il n'y auoit que trop de raiſon de n'en faire point du tout, ſi le Roy auoit vne fois remis ſes ſubjects en ſon obeïſſance, quand ce ne ſeroit que pour contenir les François en paix entr'eux, & les garder de retourner aux guerres ciuiles; à quoy il y aura trop à faire quine les occupera en quelque guerre eſtrangere. Car il a eſté obſerué de tout temps, que nul grand & puiſſant Eſtat ne peut eſtre long temps en repos, & que ſ'il n'a la guerre au dehors, il ſe la fait au dedans, comme il ſ'eſt veu principalement és François, non ſeulement depuis trente & tant d'ans, mais auſſi és ſiecles pazez: & ſi iamais les François, de leur nature fretillās & guerriers, eurent difficulté à tenir leurs mains, il leur ſera quaſi impoſſible maintenant qu'ils ſont tous aguerris & compoſez d'humeurs ſi diuerſes, & bigarrees de tant de factions, & qui ſortans d'un trouble qui leur a laiſſé vne infinité d'inimitiez particulières, pour les iniures en particulier receues les vns des autres, entrent en vne ſorte de paix, neceſſaire à la ve-

riété, & très-solidaire en la personne du Roy ; mais telle cependant, qu'elle leur cause une autre infinité de jalouses, & de mauvaises satisfactions. Et pour ce que la France a enduré, & est pour endurer plus de mal en un seul iour de guerre civile, qu'elle n'eust soue & ne scauroit auoir fait en cent ans de guerre étrangère, il se trouuera plusieurs hommes de sain iugement, qui seulement pour euitier le soupçon d'une sedition & trouble intestine, concluront tousiours à la continuation de la guerre contre l'étranger.

L'accordoys à ces gens icy qui croyent, ou font semblant de croire, que tout aussi tost que le Roy d'Espagne aura dit, ouy, soit pour paix ou pour trefve, nous la deuons accepter incontinent, & la prendre à grande grace & faueur. Je leur accordoys, di-ie, que la France auroit besoin de repos pour prendre haleine, & pour se refaire de tant de maux & misères qu'elle vient de souffrir, & pour bien s'affermir, & bien assicurer les jointures auparavant desfondées, qui viennent d'estre remises, & ne sont encores bien consolidées, & que tout auantement de guerre quel que ce soit, luy est mauuais.

Je leur accordoys aussi, que le Roy auoit encores besoin de mieux s'establiir, & qu'il nous manque beaucoup de choses pour faire la guerre de Couronne à Couronne : mais ie leur repliquois, que si à faute d'occuper en quelque guerre étrangère, tant de gens aguerris qui se veulent peu de bien, tant de desbauchez, tant de picoteurs, tant de hargneux & mutins, nous rechevons aux guerres civiles (comme il y a danger pour les raisons susdites) nous n'aurions aucuns de tous ces susdits biens, & retomberions en tous ces maux là, & en un abyisme de misères, en danger de n'en releuer oncques plus. Là où la guerre étrangère en comparaison de civile, seruiroit d'un grand soulagement à la France, qui ne semble point encores estre capable d'un sain & entier repos, & a besoin de ce moyen de guerre étrangère, pour passer d'un extrême trouble, dont elle sort, à un extrême tranquillité. Et quant à l'establisement du Roy, qui considerera bien son naturel & inclination, & sa grande valeur & bon-heur aux armes, iugera aisément que sa Majesté est pour conseruer & accroistre son autorité parmy ses subjects, & sa reputation amies les estrangers, aussi bien, & possible mieux en temps de guerre, qu'en temps d'une paix absolüe.

Que si nous auons faute d'argent, de poudres, & de quelques autres choses, l'Espagnol a ces defauts encores plus grands, estant luy-mesme en sa personne vieil, cassé, & moribond, inhabile à toutes factions de guerre, & à toute sorte de rauail, soit de corps ou d'esprit ; & le Prince son fils encores enfant, sans force, sans experience, prudent comme un chat. Dauantage, il n'a pas un seul Capitaine pour conduire une armée royale : de soldats Espagnols il n'en a, & n'en peut auoir que fort peu, & la plupart de ce peu se sont depuis quelque temps rendus fort desobeissans & mutins. Tous ses peuples sont tres-mal contents de luy, non seulement au Milannois, au Royaume de Naples, en Sicile, & au Pays-bas ; mais aussi dans les Espagnes, en Portugal, en Aragon, en Catalogne, & ailleurs. Et l'Ordre Ecclesiastique particulièrement, comme le plus foule, est aussi le plus mal satisfait, comme nous l'auons icy par les plaintes qu'il en fait faire souuent au Pape. Aussi tous les Princes estrangers (si ce n'est quelques-uns de ses

plus proches parens) sont en défiance de luy, luy veulent mal, & voudroient le voir bien abbaisſé. Par ainſi nous ne ſçaurions perdre en ceſte guerre, & y pouuons gagner beaucoup: & quand nous n'y ferons autre conqueſte que conſeruer la paix entre nous, & nous preſeruer de ſedition & de troubles, nous y aurôs aſſez gaigné, & ſerons bien recompencez de la peine que nous y aurons priſe, & de la deſpenſe que nous y aurons faite. Il y a encores vne conſideration que ie leur mettois au deuant; C'eſt que ſ'il nous falloit rompre vne paix que nous euſſions avec le Roy d'Eſpagne, & luy commencer vne guerre, il nous faudroit mieux penſer: mais la guerre eſt toute ouuerte long temps y a, & ne fait que la continuer. Et c'eſt luy qui l'a commencée, ayant mis le feu aux quatre coings, & au milieu du Royaume, & qui encores, outre la Nauarre, tient de la France la Fere, la Capelle, & Blamér, & qui encores ſous le nom de ſa fille non ſeulement pretend la Bretagne, mais a voulu embler la Couronne, & abolir la Loy Salique: & ne l'ayant pû empieter, cherche encores aujourd'huy de la démembrer & dépiccer, excitant ceux qui reſtent de la Ligne à ſouſtenir & faire la guerre plus que iamais, & à partager la France avec luy, leur offrant que tout ce qu'ils prendront de leur coſté & luy du ſien, ſera & demeurera aux preneurs. Auquel propos ie diſois que la continuation de la guerre avec l'Eſpagnol apporteroit encores ce profit à la France, qu'elle ſe pourroit par ce moyen aſſeurer de ceux qui ont eſté par trop vnis avec luy, qu'ils ſ'en ſont wayement & à bon eſcienſt diſtraits & ſeparez, & qu'ils ne veulent plus riē tenir de luy, & n'ont moins de volōnté & de courage de luy faire la guerre que les autres: là où la trefue ſuruenū inconſinēt apres ſ'eſtre remis avec les autres François, & auant que d'auoir fait preuue de quel pied ils marchent contre les Eſpagnols, pourroient laiſſer quelque ſoupçon de quelque reſte de ſecrete intelligence avec ſa Maieſté Catholique.

Or comme la guerre eſt toute ouuerte, auſſi leur diſois-je que la commodité de la continuer à qui l'a nous a commencée y eſt facile & preſte du coſté des Pays-bas, & de la Franche-Comté, & du coſté de Breſſe, Sauoye, Piedmont, & Duché de Milan: car avec l'Eſpagnol ie mets encores ſon gendre, lequel tant par ſon inclination, que pouſſé & encouragé par ſon beau-pere, continue à la France l'outrage qu'il luy fit, lors qu'elle tenant ſes Eſtats, il luy prit de gayeté de cœur le Marquiſat de Saluſſes: & apres auoir failly depuis à occuper toute la Prouence, Dauphiné & Lyonois, y tient encores des places, & vexé ceux qui recognoiſſent le Roy par où il en a le moyen, en Prouence, Dauphiné & Lyonois.

Ladiouſtois que pendant la trefue qu'on vent de nous, il y a danger que nous ne perdions tout ce que nous auons à preſent d'occafion & d'auantage, & que les Eſpagnols ne les recourent. Les François (dont Dieu nous garde) pourront ſ'entrer en guerre entr'eux, ou ſe rendre pareſſeux, & vne grande partie fondre en delices, iuſques à ne plus vouloir de guerre eſtragere, ny autre; meſmes apres la tréue les choſes de Flandres ſe pourroient accommoder ou changer; la Royné d'Angleterre mourir, ou ſe diſpoſer autrement; le Roy d'Eſpagne faire prouiſion d'argent, attirer à ſon ſeruiſe des plus excellents Capitaines; & quand bien il mourra, le Prince ſon Fils ſera cependant deuenū grand, & les mauuiſes ſatiſfactiōs

que les subiects ont contre le pere pourront cesser en luy, qui ne peut mais du mauuais traitement qui leur a esté fait par le passé, & qui les pourra mettre en l'esperance de l'auoir meilleur de luy à l'aduenir.

Pour vne seconde condision, nous estions d'aecord que le Roy d'Espagne voudroit aussi comprendre son gendre en ceste trefve, & que le Marquisat de Salusses, Berre, Saint Paul, Exilles, & le reste que Monsieur de Sauoye tient, luy demeurassent semblablement : mais m'asseurois que non seulement le Roy ne l'accorderoit, mais aussi que nulle personne, non interessée ny passionnée, ne le trouueroit raisonnable. Et qu'il deuroit bien suffire à vn Duc de Sauoye, que le Roy de France le receust à paix, en remdant ce qu'il atrop mal pris du Royaume, sans l'en bien chastier comme il meritoit, & comme il seroit fort aisé, luy estant comme au safran, pour les mal-fondees. entreprises, & extremes despensés qu'il a accoustumé & continué de faire depuis la mort de Monsieur son pere ; & ayant tous les subiects destruits & ruinez, & les plus mal contents de leur Prince, que peu-ple qui soit auourd'huy sur la terre. Auquel propos ie vous diray, à vous, Monseigneur, que la plus grande difficulté que ces disconteurs trouvent en ladite trefve qu'ils minurent entre France & Espagne, c'est le fait du dit Marquisat de Salusses, d'autant qu'ils iugent que le Roy d'Espagne faisant trefve, ne voudroit laisser son gendre en guerre ; & entendent d'ailleurs dire que Monsieur de Sauoye ne veut en forte du monde rendre le dit Marquisat, & cependant recognoissent par vne infinité de bons respects que le Roy ne le luy doit laisser à condition aucune. Este iour deuant que ledit seigneur Jean François partist pour Espagne, il demanda fort soigneusement à vn Gentilhomme François, quand & comment le Marquisat de Salusses estoit venu à la Couronne de France. Et ce Gentil-homme me l'ayant demandé à moy, ie fis responce, qu'outre les autres droicts que la Couronne y pouuoit auoir, (que ie ne sçauois point) j'auois appris que le Marquisat de Salusses de toute ancienneté estoit fief du Dauphiné, & que les Marquis en prenoient inuestiture des Dauphins de Viennois, & leur en faisoient hommage & serment de fidelité : auxquels droicts auoient succédé les Roys de France, lors que le Dauphiné leur fut acquis. Et partant estant depuis faillie la ligne des Marquis de Salusses, ledit Marquisat par là, comme tous fiefs, seroit de luy-mesme retourné aux Roys de France, comme Dauphins de Viennois, quand il n'y auroit eu autre acquisition precedente. Mais au commencement des guerres de Piedmont, regnant le Roy François premier en l'année 1535. ou 36. le Marquis d'alors, appelé François, qui estoit vassal de la Couronne (comme direct) & qui encores combattoit à vne armée que le Roy payoit, s'en alla proditoirement servir Charles quint contre la France, avec ladite armée soldoyée par le Roy, & endommagea infiniment les affaires du Royaume, & de la Majesté, qui pour ceste si insigne felonnie & trahison se saisist du dit Marquisat, comme retourné à luy par les droicts & coustumes des fiefs, & ne le laissa occupé depuis. Outre les susdits deux titeres, des Roys qui ont regné depuis ont eu des freres puînez, du dit Marquis François, qui n'ont point laissé d'en faire, & ont fait don, cession & transport, aux uns, quebes feins serois, de ne les laisser, si qu'ils pouuoient, & prétendent au dit Marquisat. Qui sont tels :

titres bons & valables, outre les autres qu'on pourroit appréhendre d'ailleurs. A quoy j'adjoustay d'abondant que les Ducs de Sauoye auoient autresfois pretendu audit Marquisat: pour autant que quelques Marquis de Salusses, estans mal, & en guerre avec les Dauphins leurs Seigneurs directs, auoient par dépit, & pour s'acquiescir d'auant de protection, pris inuestiture des Ducs de Sauoye. Mais outre que cela ne peut auoir preiudicié aux Dauphins vrais Seigneurs (non plus qu'aujourd'huy preiudicieroit au droit de la Couronne de France, si Monsieur de Mayenne recognoissoit du Roy d'Espagne le Duché de Bourgogne, ou ce qu'il y occupe) les choses estoient depuis retournees en leur premiere nature, & les Marquis auoient recogneu leur premier & vray Seigneur, & les Ducs de Sauoye aussi auoient plusieurs fois depuis, & par diuers actes, recogneu qu'ils n'auoient rien audit Marquisat, & n'y pretendoient rien. Et pour ne parler de plus loing, nous auons veu qu'en la dernière paix faite avec Espagne & Sauoye, qui se fit par mesmes traités en 1538. le Marquisat nous demeura, & feu Monsieur de Sauoye perdit de cestuy-cy, apres la mort du Marechal de Bellegarde, rendit tout ce qu'il en auoit pris, sur l'occasion du trouble que ledit Marechal y auoit apporté avec les ministres du Roy d'Espagne à Milan. Et quand le Duc d'à present se fut emparé dudit Marquisat en l'an 1588. il fit dire par ses Ambassadeurs à tous les Princes, qu'il l'auoit pris pour le conseruer & rendre au Roy, & gardet que les Heretiques du Dauphiné ne s'en emparassent, comme il auoit esté auerty qu'ils vouloient faire.

Pour vne troisieme condition de ladite trefue projectee, on me disoit que non seulement le Roy d'Espagne, mais aussi le Pape, voudroient que le Roy entrast en la ligue contre le Turc, & enuoyast des forces en Hongrie pour la defense des Chrestiens. Sur quoy ie leur disois, que le desir de nostre saint Pere estoit en soy tres-saint & tres-loüable, & vouloir voir les Princes Chrestiens vnis à la defense de la Chrestienté, & que le Roy seroit tousiours prest à faire pour ladite defense de la Chrestienté tout ce que deuoit vn Roy Tres-Chrestien: mais auant que pouuoit defendre autrui, il falloit s'asseurer soy-mesme. Que ceux-là mesmes qui desiroient telle chose de la Majesté, auoient suscitè le ciel & la terre contre luy, & faisoient encores aujourd'huy tout ce qu'ils pouuoient pour l'empescher d'auoir le sien, & pour le ruiner. Qu'il estoit encores sur la defensiue, non assuré ny estably, & partant il seroit excusé deuant Dieu & les hommes, s'il ne se desfaisoit des forces par lesquelles il s'estoit defendu & conserué, & par lesquelles il se deuoit encores establir & assurer d'auantage. Ceux qui scauent comme les choses sont passees, scauent tres-bien qu'il n'y a que deux choses au monde pour lesquelles on commence à penser de laisser sa Majesté en paix, dont la premiere est le bon succez de ses affaires en France; la seconde, la peur qu'on a du Turc, contre lequel on est contraint de tourner les forces & les moyens qu'en vain on consume en France contre ladite Majesté. Que si ceste peur tourne tant à son aduantage, à son salut, conseruation, & establissement, il aura grande occasion de n'estre point des premiers à courir pour la faire cesser. Je laissois ce peu d'intelligence que ses predecesseurs Roys de France luy auoient laissé avec le grand Seigneur, de laquelle nosdits Roys ne s'estoient preualus qu'au soulagement & con-



seruation d'une infinité de Chrestiens de toutes nations, qui autrement eussent esté oppressez, ruinez & massacrez en diuers endroits de l'Orient: comme il me souuient d'auoir veu que les Papes auoient chargé les Ambassadeurs de France residans près d'eux, de remercier de leur part nos Roys, des bons offices que leurs Ambassadeurs faisoient à la porte dudit Seigneur pour plusieurs Euesques, & infinis autres Chrestiens. Et encores aujourd'huy il seroit possible plus vile à la Chrestienté pour sa preservation, où plusieurs occasions se presentent que le temps pourroit apporter, que le Roy continuast cestetelle quelle intelligence, que non pas qu'il sonnist, & qu'il ne restast plus à la Chrestienté aucun moyen de quelque accommodement, si la force, grandeur, puissance, & heur des Ottomans nous y contraignoient. Que ie sçauois bien que les Espagnols auoient mal parlé de ceste intelligence, mais i'esçauois bien aussi quelle ne leur a point esté si odieuse, qu'ils n'aient cherché de l'auoir & gagner. Et ce Roy Philippes, depuis deux ou trois ans en ça, a mis toutes les cinq sens de nature pour y faire recevoir pour son Ambassadeur le Seigneur Noger de Marillan Millanois, qui trempa si longtemps à Raguse, attendant quel effect produiroient les bons offices que pour la reception faisoit le Sieur de Lenosseme, qui s'en estoit trouué tres-mal. Auquel propos i'aduois vne autre consideration qui retardoit le Roy de rompre avec ce Seigneur. C'est que nous ne nous pouuons point promettre que la Ligue que nostre saint Pere procure soit pour estre bien tost faite, de longue dures, & de grand fruit, pour poursuivre vne guerre vnanimement & longuement, comme il seroit besoin pour bien rembarre le Turc, & luy causer quelque notable affoiblissement. Ains comme il s'est fait les autres fois que le Turc a pris ceste route là, ceux de la maison d'Autriche feront le plus tost qu'ils pourront la paix avec luy, & le Roy d'Espagne sera le premier à la conseiller, s'il ne l'a desja fait. Et il seroit, rependunt, bien aisé d'auoir fait declarer le Roy contre le Turc, & par cemoié, en faisant puis apres la paix, gagner auprès de ce Seigneur le lieu que la Majesté y a maintenant. Comme le Turc auroit à la verité plus d'occasion de se doubter du Roy, que du Roy d'Espagne, qui auroit en iste occasion de défendre ses plus proches parens, & la maison & pays d'Autriche d'où il porte le nom, & enest l'aîné. Et ainsi le Roy n'auroit rien fait pour la Chrestienté, & se seroit priué luy-mesme de eét aduantage, & l'auroit laissé prendre au Roy d'Espagne, qui s'estant assuré de ce costé là, s'en preuandroit puis apres à l'oppression de la France, & à l'usurpation de la Monarchie, à laquelle il aspire long temps ya.

Outre les susdites conditions, ces genscy me parlent encores de quelques autres, & disoient quel'on voudroit que le Roy respondist pour la Royne d'Angleterre, & pour le Comte Maurice, qu'ils ne molesteroient point les Estats du Roy d'Espagne pendant le temps qu'il seroit occupé contre le Turc; & s'ils le faisoient, que sa Majesté se vult contr'eux. Et voudroit-on aussi de plus, que le Roy donnast encores des secrettes luy-mesme, de garder toutes les susdites conditions, & autres qui seroient accordées avec luy. Sur quoy ie leur respondis, qu'à mon aduis le Roy en cas de trêue ne voudroit respondre que de soy, & de ses subiects, ny pour gar-

des les pays du Roy d'Espagne, qui luy detiēt le sien, & luy a vouſu & voudroit encores aujourdhuy oſter la Couronne de France, l'honneur, & la vie, ſe ruer contre ceux qui luy ont aidé & luy aident tous les iours à ſe defendre de luy. Que ſa Maieſté ſe faiſant Catholique, a bien renoncé aux erreurs paſſées, & en cela ſ'eſt ſeparé de la Roynie d'Angleterre, du Comte Maurice, & de tous autres qui errent comme eux : mais il n'a renoncé à ſa gratitude, à la loyauté, & à l'humanité. Et comme le Royaume de France ne ſ'eſt pour ſa conſervation eſſoigné d'Angleterre, Zelande, Holonde, & autres lieux, auiſi les traittez, les affaires, & le beſoin mutuel que ces Princes voiſins ont les vns des autres, quant au temporel, ne ſont changez en ſorte que le Roy leur doſne faire ſa guerre, & ſeruir le Roy d'Espagne cōtr'eux. Que le Roy d'Espagne meſme voudroit eſtre auiſi bien avec la Roynie d'Angleterre, & auoir vn Ambaſſadeur près d'elle, & qu'elle en euſt vn près de luy, comme nous auons veu qu'ils auoient il n'y a pas long temps. Quant à donner des ſeuretez ; Premièrement ie leur diſois, qu'il y a quelque repugnance à vouloir que le Roy ſe rende caution pour d'autres, & qu'il donne encores caution luy-meſme. Secondement, qu'outre que notre Roy ne manqua iamais de parole à perſonne, les Roys de France en tels traittez n'ont accoustumé de donner autres ſeuretez que leur parole, leur ſeig, & leur ſeau. Troiſiement, qu'il ſeroit tres-mal ſeant à la grandeur, & à la brauerie & vanerie Eſpagnole, de demander à vn Prince de Bearn (qu'ils appellent) ſeuretez qu'il ne ſeroient ſera point. Que telles ſeuretez ſont ordinairement demandees par gens foibles, & qui ont peur. Que ie m'aſſeuroidis que le Roy de ſa part eſt ſi genereux, que ſ'il entroit en traité de trêſve, il ne demanderoit de ſon coſt au Roy d'Espagne aucunes ſeuretez extraordinaires. Ains ſi quelque vn de ſes ſeruiteurs luy vouloit ramener ouir d'en demander, il reſpondroit ; Non, non, nous auons des ſeuretez avec nous : qu'ils y viennent quand ils voudront, ie leur rompray la teſte ſi ſeulement ils en approchent.

Voila, Monſeigneur, ſommairement les principaux propos qui ont eſté tenus plus longuement par deçà, & à pluſieurs fois, entre les ſuſdits & moy : eſquels (comme ie vous ay predit cy-deuant) i'ay touſiours incliné à la negatiue, pource qu'il me ſembloit non ſeulement qu'il y auoit plus de verité & de raiſon, mais auiſi que l'humour de ces gens icy, qui penſent auoir trop bon marché de nous, & le ſeruite & reputation du Roy ſe requeroient auiſi. Et que tant plus que nous leur accroiſſons les difficultez, tant plus en ſçaura en fin de gré à ſa Maieſté de ce qu'elle aura ce nonobſtant accordé. Au demeurant, ie n'entens point que vous receuiez ce que deſſus, ſinon que par forme de particularitez & occurrences que l'on eſcrit d'un pays loir ain à vn autre. Auiſi ſont-ce à la verité les nouuelles de deçà qui nous touchent le plus, & qui ont eſté les plus promenees depuis vn mois ou ſix ſepmaines, par les eſcrits & diſcours des plus curieux de ceſte Cour. & pourra eſtre que de nouuelles & diſcours qu'elles ſont à preſent icy, elles deuieront vraye negociation & traité près de vous, quant qu'il ſoit trop long temps, & ne ſ'en faudra gueres que les Ambaſſadeurs de Veniſe, qui ſont par voyage, n'en touchent quelque choſe directement ou indirectement auant qu'ils partent d'aupres du Roy : eſtant certain que le Duc de

B.

Sesle a familiarisé extraordinairement avec l'Ambassadeur de Venise icy, depuis que les affaires de sa Majesté commencent à aller bien. Et pouvant estre que le Pape, qui pour sa reputation ne peut point encores enuoyer vne Ambassade vers le Roy, comme il fait vers le Roy d'Espagne, auroit desiré & procuré sous main que lesdits Ambassadeurs suppléassent à ce défaut, commandez par leurs Seigneurs, qui en fissent parler comme d'eux-mesmes. Et pource que ceste lettre n'est desia que trop longue, ie mettray le reste des nouuelles à vne autre, & la finiray en cét endroit, en priant Dieu qu'il vous donne, Monseigneur, en parfaite santé, tres-longue & tres-heureuse vie. De Rome, ce 25. Decembre, 1594..

*Vostre tres-humble, tres-obeyssant & tres-obligé seruaueur, A. D'OSSAT.*

## A MONSIEVR DE VILLEROY.

### I.

**M**ONSEIGNEVR, Ie vous escriuis hier vne longue lettre, touchant ce qui se dit & se discourt icy de la paix ou trefve qu'on y minute entre le Roy, & le Roy d'Espagne. Ceste-cy sera comme vne continuation, pour acheuer de vous dire les autres occurrences, qui eussent trop chargé lad. lettre d'hier. Les Espagnols donc, pendant qu'ils sont apres à faire souz-main & sous noms empruntez parler d'accord & de suspension d'armes, continuét tousiours leurs mauuais offices aupres du Pape & des Cardinaux; & le Duc de Sesse qui est fort accort, & qui voit que le vent luy est contraire, s'y accomodant, comme il sçait bien faire, dit que si le Pape se pouroit aiseurer que le Prince de Bearn, qu'il appelle, fust vrayement Catholique, qu'il seroit luy-mesme d'aduis, comme Duc de Sesse, non comme ministre du Roy d'Espagne, que sa Sainteté luy donnast l'absolution; mais que tant s'en faut que lad. Sainteté s'en puisse aiseurer, qu'il n'y a que trop d'argumens & preuues euidentés au contraire. Et là dessus il deploye tout ce qu'on luy a extrait des sermons de Bouchet, & qu'on a pu inuenter de mensonges & calomnies, pour faire douter de la sincerité de la conversion du Roy. Ayant posé ce fondement, il bastit là dessus, que le schisme qu'on craint tant maintenant, le Roy le fera apres l'absolution, avec plus grande facilité, & avec plus grande ruine de la religion; qu'il ne manquera point d'autre pretexte, & outre ceux qu'il fera naistre de iour en iour, qu'il en a desia vn tout fait & formé, & prest à mettre en ouure tout aussitost que l'absolution luy sera donnée. C'est qu'il veut demander dispense de repudier sa femme, & se remarier à vne autre; ce que ne luy estant accordé, comme sa Sainteté ne l'aceordera iamais, voila le schisme tout fait, & luy cependant Roy absolu, au moyen de l'absolution que le Pape luy aura donnée. Dont il conclud, qu'il vaut donc beaucoup mieux luy dénier tout à plat l'absolution, & luy continuer la guerre par le Pape, le Roy d'Espagne, Sauoye, & ce qui reste de la Ligue en France. Epparce qu'il s'est trouué quelques Cardinaux qui luy ont respondu à ses coniectures; si bien qu'il n'a point eu de repliques; il est reuenu plusieurs fois à dire qu'il n'a point

Faudroit-il bailler par le Roy de bonnes seuretez pour la Religion Catholique. Souz lequel pretexte de seureté, il pense accrocher l'affaire du tout, ou pour le moins en tirer quelque profit & aduantage pour son maistre.

Cependant on ne laisse pour tout cela de demander, quand viendra Monsieur du Perron, & n'y a pas vne personne de qualité, depuis le plus grand iusques au moindre de tous, qui ne s'informe fort soigneusement pourquoy il demeure tant, & dans combien de temps il pourra estre icy; qui est chose de grande consolation & plaisir aux bons François, & fideles seruiteurs & subjects du Roy, de voir aujourd'huy ceux que sa Majesté enuoye, ou veut enuoyer, autant desiréz ou attendus en Rome, comme par cy deuant ils ont esté rejettez & esloignez. Quand il n'y auroit eu autre occasion, il n'a point esté mauuais d'attendre que l'appetit leur en vint & accreust.

Monsieur le Cardinal Sèga, autrement Plaisance, arriua en ceste ville vn Dimanche au soir 17. Nouembre, eut son Consistoire public Mardy 15. a depuis esté fait de la Congregation de France; & a parlé de nos affaires selon l'humeur de ceux avec qui il se rencontre. A vn Prelat de ceste Cour Italien, & cogneu pour bien affectionné au seruice du Roy, a dit que si le Pape ne donne l'absolution au Roy, le schisme estoit tout à fait en France; sans qu'il y eust aucun remede: mais quand apres l'absolution le Roy retourneroit à son premier erreur, comme quelques-vns craignoient, il s'y pouoit trouuer remede, comme seroit la mort, la resistance que luy feroient les Catholiques, & d'autres choses. S'il en auoit autant dit au Pape, il n'en demanderoit pas dauantage de luy. Il a dit aussi beaucoup de bien de Monsieur du Perron au mesme Prelat, & confesse qu'autrefois il en auoit escrit mal, mais qu'alors il en auoit escrit ce qu'on en auoit dit auant qu'il l'eust veu, & qu'à présent qu'il l'auoit veu, il en disoit le bien qu'il en auoit cogneu: & a raconté, comme il auoit ainsi respondu à Monsieur le Cardinal de Gondy, qui luy parla de ce qu'il en auoit escrit autrefois.

Depuis les dernières lettres que ie vous cottay de Monsieur de Mayenne, il en vint icy d'autres il y a enuiron 15. iours: mais ie ne vous puis pas assurer de ce qu'il y auoit comme des precedentes, à cause qu'une personne de qui ie le scauois tres-bien n'est plus à Rome. Bien trouuay-ie assez vray-semblable ce qui m'en a esté dit; à scauoir que ledit Sieur de Mayenne n'ayant pû obtenir du Roy ce qu'il demandoit, auoit par lesdites lettres voulu persuader au Pape, que depuis les precedentes, avec lesquelles il auoit enuoyé les articles, dont ie vous donnay aduis, les Espagnols luy auoient donné quelque plus grande satisfaction, & que les affaires du Duché de Bourgogne, où il venoit d'arriuer, & de la France, se pourroient bien porter pour la Religion Catholique, s'il plaisoit à sa Sainteté mettre la main à la bourse, & luy aider à bon escient. Mais le Pape ne luy croit plus, & ne luy aidera d'un sold, pource, entre autres causes, que les affaires du suppliant se portent tres-mal, & celles du Roy tres-bien, & que sa Sainteté ne veut point acheter son propre dommage, & la perte de l'obeissance de toute la France. Dimanche au matin 4. de ce mois, arriua icy le Secretaire Vincent, enuoyé par ledit Sieur de Mayenne.

& qu'il a passé vers Monsieur de Sauoye, & demeuré pres de son Altesse quatre iours. Il n'a point encores en audience, & ne peut-on s'asseurer de la charge qu'il a. Mais vous qui sçavez si son maistre est en voye d'accord ou non, deuineriez à peu près ce qu'il a à dire & demander. De ma part, apres auoir ouy le rapport de deux ou trois hommes de bon esprit ses amis, qui ont separément entretenu assez longuement ledit Secretaire Vincent, i'en collige en moy-mesme, que Monsieur de Mayenne n'ayant pu obtenir ses hautes demandes par le moyen du President Iannin, & n'esperant plus du Pape aucun secours, comme ie sçay qu'il en a esté resolu d'icy, entant qu'il l'a pu sçauoir auant que faire partir ledit Secretaire, & voyant que des Espagnols il n'en peut auoir sinon qu'autant comme il luy en faut pour s'acheuer de ruiner, il a d'un costé prié Monsieur le Baron de Senecé d'aller en Cour, où il vouloit desia aller sans cela pour luy-mesme, & de tascher le plus courtoisement & discrettement qu'il pourroit, de renouier son traité d'accord, & de penetrer iusques au finfondz de ce qui se pouoit obtenir du Roy, en remonstrant à sa Majesté les moyens que ledit sieur de Mayenne a encores de auire, & le danger qu'il y auoit de le desesperer. Et ne s'asseurant point de ce que ledit sieur Baron pourra obtenir, il a en mesme temps depesché par deçà ledit Secretaire, pour en tout euenement supplier le Pape, que si sa sainteté ne luy aide des moyens du saint Siege, comme il en auoit grand besoin, & comme la sainte cause qu'il soutient le requerroit, au moins elle tienne bon, & ne donne point l'absolution au Roy, quelque submission qu'il luy enuoye faire, que premierement sa Majesté n'ait baillé les seuretez necessaires pour la Religion Catholique, & accordé la paix ou trefue avec le Roy d'Espagne, & autres Princes Catholiques, qui avec sa sainteté, & sous son autorité ont fait la guerre pour ladite Religion Catholique. Et ainsi il desseigne d'auoir par le moyen du Pape & du Roy d'Espagne, ce qu'il ne pourra immediatement auoir du Roy, & retenir tousiours la dependance d'eux qu'il a eue iusques icy: comme aussi il donne à l'un & à l'autre à entendre, que pour son particulier il seroit long temps y a d'accord: mais qu'il n'a voulu accorder pour soy, qu'ils n'eussent la satisfaction qui leur est due.

Depuis la venue de l'ordinaire de Lyon, il court par icy vn certain escrit, intitulé, *Sommaire des raisons pour lesquelles Monsieur de Guise s'est accommodé avec le Roy*, lequel vous deuez auoir eu plustost par delà. Tant y a que ie le trouue mieux fait pour le seruice du Roy, que pour l'union de l'oncle & du nepueu.

Il y a grand different entre Monsieur le grand Maistre de Maîtré & vne partie des Cheualiers de ceste Religión, comme il y eut du temps du dernier grand Maistre, pretendans lesdits Cheualiers que mondit sieur le grand Maistre aye dissipé les deniers du tresor, & en aye fait ses liberalitez à qui il luy a pleu, & mesmes au Roy, s'il se peut croire; & qu'il tient bien equippees deux galeres qu'il a propres à luy, sans se soucier des quatre de la religion; & qu'il commande trop rudement: qui sont les trois chefs dont on l'accuse. Et la chose en est allée si auant, qu'il a fallu que le Pape aye commandé qu'on enuoyast par deuers luy d'une part & d'autre: & sont arriuez depuis peu de iours des principaux, tant pour que contre ledit sieur grand

*Maistre, qui mesmes a enuoyé ses comptes, par lesquels il appert que ledit tresor luy est redevable de plus de cent mille escus: & son principal peché, à ce que disent les plus equirables, est qu'il vit trop, comme faisoit son predecesseur, & que les Cheualiers aiment à changer souuent de grand Maistre. Ceux qui se sont plus declarez contre luy, sont les Italiens, à tous lesquels, pour estre en trop grand nombre, il n'a pû complaire de routes les Commandes qu'ils luy ont demandees; & ainsi il y a plus de mal-contents de ceste nation, que des autres.*

*La Coadjutorerie de l'Archeuesché de Toledé avec future succession, fut expedice dernièrement en faueur du Cardinal d'Autriche Albert, neveu du Roy d'Espagne, & qui est prés de la personne de sa majesté Catholique, & luy fut assignee pension de vingt mille ducats par an sur les fruiçts dudit Archeuesché tandis que l'Archeuesque viura: apres la mort duquel, le Roy d'Espagne s'est reserué de pouuoir disposer de ladite pension en faueur de qui il luy plaira; laquelle reseruacion ie croy auoir esté par luy faite, non tant pour priuer de ladite pension sondit neveu, que pour alaitter de ceste esperance vn bon nombre de Cardinaux de ceste Cour, & par ce moyen les rendre encor plus propres à ses intentions. Ledit Seigneur Coadjuteur fut quant & quant dispesé de se faire pouruoir aux Ordres, comme telle Coadjutorerie l'y astraignoit. Nostre S. Pere vient de faire publier vn iubilé, pour exciter tous Chrestiens Catholiques à prier Dieu pour la Hongrie & Germanie, & pour la France, dont vous trouuerez vn exemplaire imprimé avec la presente, à laquelle ie feray icy fin, en priant Dieu qu'il vous doint, Monseigneur, &c. De Rome ce 26. Decembre 1594.*

## A V R O Y.

## III.

SIRE,

*Je receus le 7. de ce mois à vne heure de nuict la depesche qu'il pleut à vostre Majesté me faire de S. Germain en Laye le 9. Nouembre, & eus audience du Pape le 15. en laquelle i'expolay à sa Sainteté tout ce que vostre Majesté me commandoit de luy dire, & obtins de luy ce que vostre Majesté en desiroit pour ceste fois; ayant sa Sainteté pris en bonne part le retardement de Monsieur du Perron, & déclaré vouloir aussi admettre & ouyr les autres deux que vous vouliez enuoyer avec luy. Mais pource qu'il importe au contentement de vostre Majesté d'entendre particulièrement comme toutes choses s'y sont passees, & mesmes que par plusieurs particularitez vous pourrez plus aisément iuger de la disposition du Pape, c'est aussi de mon deuoir de vous déduire par le menu comme ie m'y suis conduit, ce que i'ay dit, & ce qui m'y a esté respondu. Premièrement donc apres que i'eus déchiffré & bien considéré ladite depesche, & resolu en moy-mesme, pour les considerations que ie diray cy-apres, de rendre la lettre que vostre Majesté escriuoit à sa Sainteté, i'estimay que pour tenir*

la chose secrette, comme il falloit, ie devois demander l'audience au nom de la Royne douairiere, pource que l'on scait icy que i'ay de long temps charge d'elle de faire instance de sa part vers le Pape, qu'il luy pleust faire faire en sa Chappelle pour l'ame du feu Roy les obseques publiques que les Papes ont accoustumé d'y faire pour les Roys de France apres leur mort, & ay eu autresfois des audiences pour ce fait, & encôres dernièrement au mois d'Aoust. Et ainsi ayant dit au Maistre de la Chambre dès le Mardy 13. de ce mois, que j'auois à parler au Pape de la part de lad. Dame Royne, il m'y eut moyen d'auoir audience de tout ce iour là, ny le lendemain, pour les occupations que ie voyois moy-mesme que le Pape auoit. Le leudy sur le soir, après que le Pape eut donné en sa chambre quelques audiences secrettes à des Cardinaux & autres, il sortit en vne salle qui est tout aupres de sa chambre, pour donner audience publique à vn peu de nombre qui auoient esté introduits iusques à là; entre lesquels i'estois, encôres que ie sceusse bien que l'affaire que i'auois à traiter n'estoit de ce lieu-là. Ce neantmoins pource que là mesme l'on n'est ouy que du Pape seulement, ie ne voulus perdre ceste occasion de parler, laissant à sa discretion de m'expedier là mesmes, ou de me remettre à quand il seroit retourné en sa chambre, comme ie pensois qu'il seroit. Je luy dis donc que i'auois dit à son Maistre de Chambre que i'auois à parler à sa Sainteté de la part de la Royne douairiere de France, pource qu'il estoit vray que i'auois la charge de solliciter auprès de sa Sainteté l'affaire qu'elle scauit, & que par le dernier ordinaire i'auois receu lettres de ladite Dame Royne, par lesquelles elle me commandoit de continuer ceste instance, toutesfois qu'il n'y auoit que quatre iours que i'auois escrit à ladite Dame, que Monsieur le Cardinal de Loyeuse, auant que partir de ceste ville, y auoit fait tout fraichement vn grand effort, & qu'il ne seroit de la dignité de sa Majesté, ny de l'vtilité de l'affaire d'en retourner à parler firost à sa Sainteté, & qu'il la falloit laisser en repos pour quelques mois: Et partant ce n'est mon intention tres-sainct Pere, dis-je, de vous requerir de rien pour ceste heure touchant ladite affaire; toutesfois ie vous ay voulu toucher ce mot, pource qu'il est vray que le commandement m'en a esté renouellé, pour me trouuer veritable en ce que i'ay dit à vostre Maistre de Chambre, & aussi pour pouuoir dire avec verité là où besoin sera que ie vous en ay parlé: mais en en effect ie me suis voulu seruir de ceste couuerture, pour cacher & tenir secret vne autre affaire que i'auois à traiter avec vostre Sainteté, & pour la preseruer de la fâcherie & importunité que ie scauois que les Espagnols & certains autres vous donnoient, tout aussi tost qu'ils descouurent que vous auez receu quelque chose de France. Apres ce commencement, ie luy dis que la commission que i'auois estoit de la part de vostre Majesté. Alors il me dit tout bas, Leuez vous, & ie vous expedieray tout à ceste heure en la chambre. Quand il eut acheué de donner lad. audience publique, comme il se retireroit en sa chambre il me fit signe de la main, & me dit que ie le suivisse, n'attendant point à me le faire dire par vn de ses Chabriers quand il seroit entré. Estant donc en sa chambre ie continuay, & luy dis que ce que i'auois à luy dire de la part de vostre Majesté estoit, que vous ayant en-

~~uoyé par Monsieur le Cardinal de Gondy, après le retour par delà du cour-~~

sieur Valerio, que sa Sainteté se contentoit d'admettre & ouïr le Prelat que vous luy vouliez enuoyer, vous en auiez esté tres-aise, & l'auiez receu à grand' faueur & grace, & luy en baissiez tres-humblement les pieds. Que vous eussiez fait partir incontinent ledit Prelat, pour d'autant plustost recevoir de sa Sainteté l'absolution tant desirée pour le salut de vostre ame, consolation de tous vos bons subjects, & bien de vos affaires : mais que vous auiez estimé deuoir rendre ceste ambassade encore plus honorable & plus celebre, pour rendre tant plus de respect & de reuerence au saint Siege, & à la personne de sa Sainteté. Et pour ce auiez delibéré d'enuoyer, outre ledit Prelat, deux autres personages notables, l'un de vostre Conseil, & l'autre de vostre Cour de Parlement. Qu'à faire ceste demonstration de plus grande reuerence, vostre Majesté s'estoit mené de sa propre inclination, & aussi pour auoir entendu que par deçà quelques-vns auoient parlé de la premiere deputation autrement que ne meritoient les rares vertus & merites de la personne nommée, & sa piété & deuotion enuers le saint Siege & sa Sainteté ; laquelle deuotion estoit si grande, que si vostre Majesté pouuoit elle viendroit volontiers en personne aux pieds de sa Sainteté, pour recevoir elle mesme en personne la grace qu'elle en desire & espere : & pour tesmoignage & assurance que la volonté enuers elle ne vous estoit diminuee ; ains, comme il pouuoit iuger par ce que ie luy venois de dire, accruë & augmentee, vostre Majesté luy enuoyoit vne lettre escrite de sa propre main. Et sur ce point ie luy baillay ladite lettre, & me teus, voulant auoir response à ce que dessus deuant que luy dire le reste de ce que vostre Majesté m'auoit commandé.

Il me respondit que le Prelat & les deux autres aussi seroient bien venus, & bien veus, & qu'il les admettroit & ouïroit volontiers : Qu'en ces affaires de France il ne s'estoit iamais proposé que la conseruation de la Religion Catholique, & de l'Estat, & en appelloit Dieu à tesmoin. Que plusieurs qui ne sçauoient le fonds de ses intentions, & iugeans par quelques apparences exterieures, auoyent pensé de luy tout autrement, & qu'il fust Espagnol : mais que qui voudroit bien considerer la personne qu'il soustenoit, & l'estat auquel les choses estoient quand il fust leu Pape, iugeroit aisément qu'il n'auoit pu faire de moins que ce qu'il auoit fait, pour le regard de ce qui auoit déplu par delà. Que lors de son assumption au Pontificat, il trouua qu'il y auoit vne armer du saint Siege par delà : Qu'il ne pouuoit alors faire autre chose que ce qu'il fit, s'il n'eust voulu (& icy il hesita) & apres auoir attendu vn peu, ne luy venant à la langue rien de meilleur, il acheua par ces mots, qui furent, *Renuerser le monde sens-dessus-dessous*. Que nonobstant il fit des choses dont tous autres auoyent plustost à se plaindre que vostre Majesté, & les vostres, lesquelles il me diroit, me tenant personne discrete, qui n'en yseroit sinon en bien. Que premierement, & tout incontinent il reduisit la somme que les Papes donnoient à quinze mil escus par mois : & puis la premiere occasion qui se presenta il licentia les Suiſſes ; & depuis à vne autre occasion il acheua de renuoyer tout le reste de ses forces. Que s'il estoit licite de monſtrer les choses qu'il auoit escrites & çà & là, & les responses qu'il en auoit receuës, il pourroit faire voir tout le contraire de ce qu'on a pensé. Et puis estendant son bras



droict, & l'empoignant au dessus du coude avec sa main gauche, il dit avec grande affirmation, que si avec ce bras là il pouvoit remettre le Royaume de France en l'estat auquel il estoit du temps de Henry I. il le donneroit fort volontiers, & en appelloit derechef Dieu à tesmoin, regardâ un Crucifix qui estoit à un bout de la chambre. Et apres avoir esté un peu de temps, adionsta qu'il prioit Dieu pour la Frée tous les iours, & qu'il vous fist bon Catholique, & vous inspirast toutes bonnes choses. Et en cét endroit ouvrant la lettre que ie venois de luy bailler, dit qu'il ne scauroit ce qu'elle contenoit, & que ie le pouvois scauoir. Je luy respondis que vostre Majesté n'en auoit enuoyé copie, & luy en dis le sommaire, & comme elle estoit en creance sur moy. Alors il me repliqua que ce qu'il venoit de me dire seruiroit donc de responce, & au demeurant qu'il vous y respondroit volontiers par un brieif s'il pouoit: mais s'il ne vous traittoit en Roy il vous offenseroit, & de vous traiter en Roy il ne pouoit, iusqu'à ce que les choses qui auoient à precéder fussent faites. Mais qu'il se resoudroit de faire escrire à Monsieur le Cardinal de Gondy, qui vous dist comme il auoit receu vostre lettre, & puis s'en remettrait sur luy.

Quand ie vis qu'il n'auoit plus rien à dire sur ce premier point, ie luy dis que vostre Majesté, & tous les Princes, Seigneurs & Gentils-hommes qui se trouueroient près d'elle seroient grandement consolez de ceste si bonne & benigne responce, & seroient d'autant plus confirmez en leur deuotion vers le saint Siège & la Sainteté. Et passant au second point (car i'auois en moy-mesme party en quatre points ce que i'auois à luy dire, avec intention de tirer quelque responce sur chacun) ie luy dis comme vostre Majesté m'escriuoit de plus, que ne pouuant elle-mesme venir en personne, elle eust très-volontiers enuoyé un des premiers Princes de sa Cour, n'eust esté qu'à cause de la guerre que le Roy d'Espagne vous continuoît, vous en auiez besoin. Et sur cela ie luy exposay comme ledit Roy d'Espagne auoit de nouveau dressé une armée sur la frontiere de Picardie, atereu les forces qu'il auoit en Bretagne, outre ce qu'il faisoit du costé de Piedmont & Saouye; & comme vostre Majesté pour sa defense & reuanche estoit contrainte de se seruir entre autres de ceux des Estats du Pays-bas, & supplioit la Sainteté d'imputer ceta à l'opiniastreté des agresseurs, & croire que de quelques forces que vostre Majesté s'aidast, & quoy qu'elle fist, elle ne declineroit iamais tant soit peu de la Religion Catholique, d'où Dieu vous auoit fait la grace de faire profession. Il ne me respondit rien à cecy, mais prit seulement le premier mot de *PAR VOUS*, duquel ie m'estois serui pour lier ce grand propos avec le premier; & me dit qu'il n'estoit point de besoin de Princes pour ceste heure, & qu'une Ambassade de la façon que vous l'avez attestée, estoit plus sortable & plus propre à ce dont il s'agissoit à present. De là ie passay à luy dire que vostre Majesté atoit encores voulu luy rendre compte comme iusques icy vous vous echiez tousiours tenu sur la defenſue, & qu'encores que les Espagnols eussent fait la guerre ouverte en tous les endroits du Royaume où ils auoient pu, ce neantmoins vous n'auiez point voulu permettre à vos subjects de courir sur les pays du Roy d'Espagne: mais à present voyant que lesdits Espagnols abusoient de vostre patience, & en deuenoient plus insolents, & pressé par les plaintes & cri-

meurs.

morts de vos subjects qui n'en pouuoient plus endurer, vous estiez contraint de laisser faire à autrui le mesme traitement qu'on vous faisoit, n'estoit soursfois, sans quelque regret, considerant que la Chrestienté n'en auoit point besoin, maintenant qu'elle est assaillie & enuahie par les Turcs, & autres infideles ses communs ennemis. Non (dit alors le Pape) elle n'en auoit besoin, ains requerroit que tous les Princes Chrestiens fussent bien vn ensemble pour la defendre. Et pource que ie suis aduertie que par delà ils sont entrez en supçon, qu'avec le fait de l'absolution ie voulusse conjoindre vn traité de paix ou de trefve entre ces deux Couronnes, ie vous diray que si ie pouuois en faisant l'vn faire l'autre, ie penserois faire office de bon Pape, & enséble chose vtile à ce Prince icy, de luy pacifier le Royaume dedans & dehors. Mais au fort, quand i'y auray fait mon deuoir, ie vous diray à vous comme i'ay dit au Duc de Sesse mesme, que si ie ne puis conduire ces deux affaires conjointement, ie les separeray, & ne lairray de faire ce qu'un bon Pape doit faire.

Ie ne pensay rien auoir à repliquer à cela, puis, que la Saincteté d'elle mesme se mettoit à la raison. Bien fins-je aise d'estre assensé par ceste siene responce de ce que i'auois d'ailleurs entédu, que les Espagnols luy faisoient instance qu'elle moyénast la paix ou trefve avec vostre Majesté; & de voir que la Saincteté ne s'y arrestoit plus que de deuoir. Et passant outre au quatriesme ou dernier point, ie luy dis ce que vostre Majesté m'auoit écrit touchant Monsieur de Guise, & le Gouvernement de Prouëce, Monsieur de Mayenne, & tous autres qui se rendront dignes de la bonne grace de vostre Majesté. A quoy le Pape me respondit deux choses; l'une fut par forme d'interrogatoire sur ce mot de *Gouuernement de Prouëce*, me demandant en soupirant, que fera-on du Duc d'Espernon? A quoy ie ne respondis autre chose, sinon que vostre Majesté y trouueroit quelque bon expedient. L'autre chose qu'il me respondit fut, qu'il scauoit qu'on auoit aussi pris ombre par delà de ce qu'on auoit opinion qu'il voulust procurer avec l'absolution l'accommodement de ceux qui restorent de la Ligue. Qu'il vouloit bien me dire qu'il ne pouuoit faire de moins que de les recommander, puis qu'ils auoyent soustenu la cause de la Religion Catholique. Et pource qu'il n'adjoûta rien de semblable à ce qu'il auoit auparauant adjoûté pour le regard de la paix ou trefve avec les Espagnols, ie luy repliqui que vostre Majesté auroit toujours en grande veneration, ses saints records, tant pour tous ceux de la Ligue, que pour tous autres; comme vous vous assurez aussi qu'il ne voudroit point mettre telles choses entre les conditions de l'absolution. A quoy il ne repliqua rien. Et pource que sur cela ie m'estray de m'en vouloir aller, il me retourna à dire ce qu'il m'auoit delà dit de la responce qu'il feroit voloniers prescrite à vostre lettre s'il pouuoit, & de l'expedient qu'il vouloit prendre d'escire à Monsieur le Cardinal de Gondy. Je luy demanday à qui i'auois à m'adresser pour auoir la dite lettre qui deuoit aller audit Seigneur Cardinal de Gondy; & il me dit que ie parlasse au Seigneur Cardinal Aladobrandin. Je luy demandai de plus s'il vouloit que ie disse audit Seigneur Cardinal, ce que ie luy auois dit à luy, & il me respondit qu'ouy, & que ie luy disse tout. Je m'en allay de ce pas à l'appartement où demeure ledit Seigneur Cardinal Aldobrandin, lequel

ie ne trouuay point chez luy ; & comme i'en sortois , vn estaffier du Pape appelé Hypolite, qui autrefois estoit au feu Cardinal d'Est , courant après moy m'attaiguit , & me dit que le Pape me demandoit. Arrivé que ie fus deuant sa Sainteté, il me dit qu'on pouuoitinger de l'intention qu'il auoit eue en ces affaires, pource que Monsieur de Neuers s'en allant, & luy ayant dit qu'on ne remueroit onc plus de France vers luy, il auoit incontinent fait venir à Rome Monsieur le Cardinal de Gondy, pour ne rompre point, ains tenir ce filer attaché. Qu'aussi n'auoit-il point dit à Monsieur de Neuers qu'il vous admettroit iamais, au contraire il auoit dit que vous donnassiez des signes de penitence, & fassiez de vostre côté ce qui estoit en vous, & puis il feroit ce qu'il deuroit. Et ledit Duc de Neuers ayant demandé de quels signes de penitence, il auoit respondu que vostre Majesté fist ce que dit saint Gregoire, que les choses contraires sont guaries par leurs contraires. Que ledit seigneur de Neuers luy auoit porté vne lettre, par laquelle estoit porté qu'il venoit luy prester obédience, comme on auoit fait pour les autres Roys Pres-Christiens, sans parler d'absolution, ni de rien qui se rapportast vostre vie passée. Que si alors il vous eust donné l'absolution, chacun eust dit qu'il auroit esté cause du succez des choses qui sont depuis aduenües, & qu'il vous auroit fait Roy. Mais à present que Dieu l'a uoit fait, il ne pouuoit estre repris de faire ce que Dieu a fait. Adioustez que l'on s'estoit offensé de ce qu'il auoit fait dire au Marquis de Pisani, lors qu'il s'en venoit en ça, mais ils firent, dit-il, vne faute (qu'ils me pardonnet) car tout aussi tost que ie me fus laissé donner à entendre que Monsieur de Neuers pouuoit venir, le Cardinal de Gondy, & ledit Marquis s'en vindrent l'un apres l'autre sans me demander congé, comme si i'eusse fait declaratiõ publique de vouloir receuoir ce Prince ; ce qui me contrainoit d'vser de ceste rigueur, non pour aucune mauuaise affection que i'aye eue vers les François, aussi ne ferois-je d'où elle me pourroit venir. L'Abbé de Plainpiéd me fouloit dire ; *Interroga me ipse tuos, & dicem tibi* pource qu'il scauoir que tous mes majeurs auoient tousiours tenu le party de France. Le Pape me nomma ledit Abbé de Plainpiéd, se souuenant que la premiere connoissance que i'eus de luy, lors qu'il estoit Auditeur de Rote, fut par le moyen dudit Abbé, qui me mena plusieurs fois vers luy, pour l'informer des merites d'un procez que la Roynie mere du Roy auoit en Rote, contre feul Madame de Parme, & les creanciers du feu Cardinal Hypolite de Medici, duquel procez ledit Abbé estoit sollicitateur.

Volta, SIRE, comment se passa l'audience ou audiences que j'eus du Pape ledit iour 25. de ce mois. Le lendemain au matin ie fus trouuer Monsieur le Cardinal Aldobrandin, qui me donna audience en vn lieu plus retiré, & plus secret que n'est la Chambre où il donne les autres audiences. Et afin que ie luy parlasse en toute confidence, il me monstra la lettre de vostre Majesté que j'auois rendue au Pape, & me dit que sadite Sainteté l'auoit enuoyé appeller le soir apres que i'euz parlé avec elle, & luy auoit dit ce que ie luy auois exposé, & ce qu'elle m'auoit respondu. Toutefois qu'il se soit bien aisé d'entendre ma charge encor de moy-mesme, pour en estre d'autant mieux instruit, & seruir d'affaire en tout ce qu'il pourroit. Je luy dis de ces mesmes choses que i'auois dit au Pape, & en mesme termes,

afin qu'ils n'y peussent remarquer aucune variété: & n'y eust aucune diffé-  
 rence, sinon que ie luy dis à luy tout d'une mesme teneur, ce que i'auois di-  
 uisé en quatre parties en parlant au Pape. Par les responses qu'il me fit, ie  
 cogneus bien que le Pape l'auoit instruit; & luy auoit ordonné de me dire  
 choses parties oubliées, partie remises à luy, comme mixtes seantes en sa  
 bouche, qu'en celles de sa Sainteté, combien que ledit seigneur Cardinal  
 me dit qu'il me disoit le tout comme de soy-mesme. Il commença donc  
 par me dire, qu'il espyroit que j'auois bien noté les responses que le Pape  
 m'auoit faites, & qu'il n'estoit besoin de me faire redire ce que par icelles  
 i'auois peu cognoistre de la bonne intencion de sa Sainteté, non seulement  
 pour le present & pour l'aduenir, mais aussi pour le passé. Que sad. Sain-  
 teté n'auoit iamais eu autre mire que la conseruation de la Religion Ca-  
 tholique & de l'Estat de France. Que la rigueur dont elle auoit vsé auoit  
 esté pour bonne fin, & tourneroit au grand profit, non seulement du saint  
 Siege, pour la conseruation de son autorité & reputation, mais aussi de  
 vostre Majesté, pour plus grande prouue & demonstration de vostre hu-  
 milité, & de la verité & sincerité de vostre conuersion, & du respect & re-  
 uerence que vous voulez rendre au saint Siege. Qu'aussi en ce qui se pre-  
 sentoit maintenant, la Sainteté estoit disposée, non seulement à ouïr tous  
 ceux que vostre Majesté voudroit enuoyer, mais aussi à faire toutes choses  
 qui seroient pour le bien de la Religion & de l'Estat. Qu'il ne se pouoit  
 desirer vne meilleure volonté que celle en laquelle le Pape estoit. Et com-  
 me ie luy auois dit que vostre Majesté viendrait volontiers en personne, si  
 elle pouoit, aussi m'asseuroit-il que pour mettre la France en repos, le Pa-  
 pe s'y transporteroit volontiers s'il luy estoit possible; & qu'il luy auoit ouy  
 dire plusieurs fois à diuers propos, que vous estiez disposé pour venir par  
 deçà, & le Pape pour aller par delà, vous estiez d'accord tous deux prests à vous  
 approcher l'un de l'autre, & à vous joindre de près; que de ceste confor-  
 mité de volonté, luy Cardinal, en receuoit vne ioy plus grande qu'il ne  
 scauroit exprimer, & en conceuoit vne grande esperance pour la satisfa-  
 ction de tous deux, & pour le bien de la Chrestienté, comme vostre Maje-  
 sté deuoit attendre du saint Siege, non seulement absolucion, qui estoit le  
 moindre quant au monde, & le plus grand quant à Dieu; mais aussi toutes  
 autres choses qui vous pourroient tourner à grandeur & gloire: mais que  
 pour receuoir le fruit de la bonne volonté de nostre saint Pere, il falloit  
 qu'on s'aidast de par delà. Et pource qu'il me dit, & redit plusieurs fois ce-  
 la mesmes, qu'on se deuoit aider, & qu'il ne le disoit qu'en termes gene-  
 raux, sans rien specifier, & que le desirois en tirer le plus que ie pourrois de  
 particularitez, sans rien specifier, ie le suppliai, que s'il auoit quelques re-  
 sords particuliers à me departir sur ce qui luy sembloit qu'on deust faire, il  
 luy pleust me les dire, & que ie m'asseurois qu'ils seroient bien receus, &  
 fort estimez par delà: mais il n'y voulut point entrer, & me dit, qu'il en au-  
 uoit autrefois touché quelque chose au sieur Alexandre d'Elbene, & que  
 pour ceste heure il n'estoit besoin de rien particulariser, & que ces particu-  
 laritez viendroient plus après en lieu & temps: bien me vouloit-il dire en  
 general, qu'il estimoit que ce seroit vne chose tres-vtile & expediente, que  
 ceux qui seroient enuoyez procedassent avec toute humilité, & qu'ils

apportant avec eux tous bons signes & témoignages de vraye édification, & toutes bonnes conditions, qui tendissent au bien & seurété de la Religion Catholique pour l'aduenir : & qu'il n'estoit point besoin d'envoyer un Prince pour ceste heure : & qu'à l'autre fois il eust esté meilleur qu'il n'eust point enuoyé de Prince, pource que iusques à ce que ce qui est à faire soit fait, on ne peut recevoir & honorer comme Ambassadeurs ceux qui seroient enuoyez. Quant à ce que ie luy auois dit, que vostre Majesté estoit contrainte de se servir des gens des Estatz des Pays-bas, il me dit qu'il scauoit que les miseres de la France portoient beaucoup de choses, qui n'estoient selon les regles : mais qu'il seroit bien fait, que comme vostre Majesté s'estoit separée de telles gens par la profession qu'elle auoit faite, qu'aussi es autres choses elle n'eust affaire avec eux que le moins que faire se pourroit, pour ôster tout soupçon & matiere de mal parler. Et là dessus il vsa de la similitude de la baguette courbée, laquelle on ploye de costé contraire pour la faire deuenir droite. Quant à faire courir sur les pays du Roy d'Espagne, s'il se fust pu faire de moins, c'eust esté plus à son souhait, pour n'accroistre les difficultez de la paix, qui seroit necessaire entre ces deux Couronnes, pour le bien vniuersel de la Chrestienté. Que c'estoit le deuoir d'un bon Pape de la procurer. Que nostre S. Pere auoit l'exemple de Paul tiers, qui estoit allé à Nice, pour moyenner la paix entre l'Empereur Charles V. & le Roy François I. Que le Pape mesme d'aujourd'huy estant Cardinal, auoit esté en Allemagne & en Polbigne, pour faire la paix entre les Impériaux & le Roy de Pologne. Que la paix estoit vile tant à vostre Majesté qu'au Roy d'Espagne : toutesfois qu'en cela le Pape ne pouuoit sinon que prier & exhorter : & chacune des parties demeureroit en liberté de faire ce qui luy plairoit.

Et pour le regard du traitement que ie disois que vostre Majesté vouloit faire à ceux de la Ligue, le Pape ne leur pouuoit mâquer de sa recommandation, puis qu'ils auoient defendu la cause de la Religion Catholique. Qu'il croyoit bien qu'il y auoit quelque faute de leur part, mais que ce seroit bien faire de leur pardonner, & en vser comme vostre Majesté auoit commencé, & comme elle disoit vouloir continuer. Apres auoir ainsi respondu à tous les points, il me retourna dire qu'il m'auoit dit tout cela de luy-mesme, & desiroit que le tout fust pris en bonne part, comme il parloit d'un cœur bon & entier. Que nostre S. Pere me pouuoit auoir parlé avec plus de solidité, & d'efficace, comme il le surpassoit en scauoir, expérience, prudence, bonté & sainteté, non moins qu'en dignité, mais qu'il n'auoit voulu pour cela laisser à me départir ce peu qui estoit en sa petite ampoule (car il vsa de ceste façon de parler) comme il ne vouloit ceder à personne en bonne affection, & mesmemet au bien de ceste affaire, qui luy sembloit tres-bien acheminée pour reüssir à l'honneur de Dieu, & au bien du saint Siege & de la France : que de son costé il y apporteroit non seulement son vœu & opinion, quand il en seroit temps, & ses bons offices aupres du Pape, pour le lieu qu'il y tenoit, mais aussi son sang & sa propre vie, si elle pouuoit seruir : qu'il s'y offroit de toute son affection, & en tout ce à quoy on l'estimerà bon. Me demandant si ie voulois luy ramener quelque autre chose qu'il eust à faire. Et sur ce, après l'auoir tres-humblement re-

mercé, & d'ice grand contentement que ie m'affleurois que vostre Majesté en recoitroit, & l'esperance que i'auois qu'elle le pourroit vn iour recognoistre enuers luy & les siés, ie luy parlay de la lettre que le Pape m'auoit dit vouloit escrire à Monsieur le Cardinal de Gondy, & il me dit, qu'il en prendroit le commandement de sa Sainteté, & que ie retournaïsse vers luy le Mardy qu'il venoit à estre le 20. de ce mois: ie n'y suis retourné que ce iourd'huy matin, deux iours apres ledit iour prefix, & il m'a dit que la lettre n'estoit encores faite, & qu'on estoit apres à la faire, & m'a remis iusques apres la premiere feste (car, c'est ainsi qu'il a parlé) qui est à dire iusques au lendemain de Noel. I'y retourneray alors, & cependant ne laissant d'acheuer ceste lettre, qui est desia bien longue, ie remettray le reste à vne autre. En tout ce que dessus ie n'ay employé autre personne que moy, tant pource qu'il n'en a point esté besoin, qu'aussi pour obeyr au commandement tres-exprés qui me fut fait de la part de Monsieur le grand Duc de Toscane, lors que le paquet de vostre Majesté me fut rendu, que ie ne communiquasse de ceste dépêche à personne, & que si audit paquet il y auoit lettres pour autres que pour moy, ie ne les rendisse point, sur tant que i'auois de zele & de deuotion au seruice de vostre Majesté. Aussi n'y a-t'il personne qui sçache que i'aye receu lad. dépêche, sinon celuy qui me l'apporta de nuit, & le Pape, & Monsieur le Cardinal Aldobrandin, sinon que quelqu'un leur ait dit: A tant, &c. SIRE, &c. De Rome, ce lundy 22. Decembre 1594.

## A V R O Y.

## IV.

SIRE,

Par la lettre que i'escris hier à vostre Majesté, ie vous rendois compte de l'audience que i'auis eue du Pape le 15. & de Monsieur le Cardinal Aldobrandin le 16. de ce mois: par ceste-cy y obeyray aux commandemens qu'il vous a pleu me faire de vous escrire franchement mon aduis sur les considerations qu'il vous a pleu me conser. Premièrement dont il me semble que vostre Majesté a grande occasion d'apprehender la negociation qui aura à se faire par deçà, sur l'absolution qu'elle desire obtenir de nostre S. Pere: car l'affaire de foy est difficile & scabreux: & quand bien le Pape sera maintenant & tousiours à l'adueni tel en son cœur comme vostre Majesté a entendu par ma lettre précédente qu'il s'est déclaré de parole, & par l'organe dudit seigneur Cardinal son neuet, toutesfois il ne fera rien en cecy sans l'aduis de plusieurs. Et en ceste Cour ils sont fort formalistes, & longs en toutes choses, mesmement d'importance, & particulièrement en celles de la Religion. Aussi leur estant tombé es mains vn sujet si haut & eminent, il ne faut douter qu'ils n'en vueillent tirer tout ce qui se pourra, pour l'affermissement & accroissement de leur autorité, quand au reste tous seroient vuides de haine & de mal-veillance, & que

d'ailleurs il n'y auroit point d'opposition, ny de contradiction. Mais il y en a encores quelques-uns si transportez de haine, qu'ils ne voudroient que ceste grace vous fust accordée iamais à quelque condition que ce fust, & quelque grand dommage & meschef qui en deust reuenir à la Chrétienté. Outre que les Espagnols, & ceux qui resteront de la Ligue, vous y donneront toutes les trauerses qu'ils se pourront imaginer. Je serois trop ignorant & simple si i'en pensois autrement, & trop desloyal, & indigne de la charge dont il vous plaist m'honorer, si ie vous en escriuois contre ce que i'en pensois. C'est pourquoy dès que j'en eus ouï qu'apres tant de deniers où vous vous estes mis, & apres auoir receut tant de mauuais traitemens des hommes, & tant de faueurs & graces de Dieu, l'on vous faisoit rechercher de renuoyer icy, ie fus d'aduis que premierement on procurast de conuenir secrettement des conditions sous lesquelles vostre Majesté deuroit renuoyer & estre receüe, & le dis, & l'escriuis par delà à temps. Et comme alors i'estois de cét aduis, pour les considerations susdites, aussi me semble il maintenant que vostre Majesté a fait vne tres-sage & necessaire resolution, de fortifier Monsieur du Perron des autres deux personages qu'elle veut enuoyer quant & luy, & qu'il est encores besoin que tous trois viennent bien préparez, & fournis de raisons & moyens, de responses & repliques, & de partis & expediens sur les propositions dont vostre Majesté a esté aduertie, & dont elle fait mention en sa lettre, & sur d'autres encores qui pourront estre mises en auant, dont il n'a point encores esté parlé.

Mais comme ie louë la susd. apprehensio de vostre Majesté, afin que par delà soit vſé de plus grande preparatiō, precaution, & prouision de toutes choses propres à diminuer les longueurs & difficultez d'icy, aussi me semblera-t'elle excessiue, si elle s'estendoit v auant que vostre Majesté en laiffast d'enuoyer à Rome, & d'acquitter la promesse double qu'elle en a faite, & d'vſer de la douceur & benignité présente de nostre S. Pere, qui a ia par deux fois déclaré vouloir admettre & ouïr la personne & les personnes que vous luy voudrez enuoyer. Car i'estime que nonobstant tout ce. que dessus, vostre Majesté peut seurement & hardiment enuoyer quand il luy plaira. Et me fonde non tant sur l'equité de vostre cause, ny sur le deuoir auquel vous vous estes mis & vous mettez, d'accepter & subir toutes choses raisonnables & faisables, ny pareillemēt sur les expressees declarations de bonne volonte que le Pape & Monsieur le Cardinal Aldobrandin m'ont faites, comme ie me fonde sur ce que vous tenez & possédez, & plaidez faisi, tout ainsi comme vous feriez si vous plaidez vn sieſiense quelqu'un de vos vassaux. Je me fonde aussi sur ce qu'on n'a plus aucun moyē de vous contraindre à faire chose qui soit contre vostre dignité, ny contre vostre profit, ny contre vostre grē. Vostre Majesté, si elle a nonobstant les censures & les armes d'icy, est en possession du Royaume, & peut bien dire à bon escient qu'elle le tient de Dieu, & de l'esper, comme ont acoustumé de dire les Roys qui n'ont point osé quia comme vous avez.

Vostre Majesté est aussi en possession de la Religion Catholique, ayant esté receue en l'Eglise, & admis à la sainte Communion & au sacre; & à tout ce que l'Eglise Catholique a de plus saint & sacré, & de plus beau & meilleur.

Vostre Majesté aussi donne les Euefchez & Abbayes, & ceux à qui elle les donne en iustifient, & au reste ille fait & peut tout ce qu'ont fait & pu les Roys Tres-Chrestiens ses predecesseurs. Le Pape cependant en tout cela demeure dessous, & son auctorité tant spirituelle que temporelle y gist par terre. Et par le refus qu'il a fait de vous admettre, il demeure de fait exclus luy mesme du premier Royaume de la Chrestienté, & n'y peut r'entrer que par vostre mercy & absolution. De façon qu'il ne s'agist pas tant aujourdhuy si vostre Majesté sera admise reellement & de fait à l'Eglise & à la Couronne, comme si le Pape recouvrera en France l'auctorité qu'il y a perdue. Et horsmis le point de la conscience, le Pape quant à toutes autres choses a plus de besoin que vous receviez son absolution que vous-mesmes. Les choses donc estans en c'estat, il est aisé à iuger qui perdroit le plus au refus de son absolution. Et bien qu'il y en aye encores icy quelques vns à qui la passion a osté le sens, & qui ne pourroient donner lieu à aucune raison, lesquels on cognoist par nom & surnom, si est-ce que la plupart cognoissent bien combien leur cousteroit ce refus. Et comme j'ay dit qu'on est icy fort formaliste & long, aussi puis-je dire avec verité qu'ils y ayment le profit, & y craignent de perdre autant qu'en lieu du monde. Par ainsi vostre Majesté tenant, comme dit est, & d'ailleurs se soumettant à la raison, comme elle veut faire, ceux-là mesmes qui ne seroient nullement d'avis de l'absolution, si ils pouvoient faire du moins, en seroient neantmoins d'avis pour l'amour d'eux mesmes, & pour eviter le dommage qui leur adviendrait s'ils opinoient autrement. C'est pourquoy la grandeur & hauteur des demandes qu'on pourra faire du commencement ne m'estonne point. Car quand vos Ambassadeurs auront dit de bonne foy tout ce que vostre Majesté pourra faire, & rendu bonnes & valables raisons pourquoy ce qu'on desirera de plus ne se peut faire, il faudra bié qu'on se contente de raison, Que si on s'opiniastroit par trop contre raison, & que vosdits Ambassadeurs (apres avoir dit & redit les iustes causes & necessitez que vous avez de ne le faire point, & apres avoir endure avec toute modestie & patience) n'en pouvant plus endurer, leur dissent qu'il ne s'en fera rien, & qu'on ne s'y attende point, que vous feroient-ils quel moyen ont-ils de vous contraindre? se font-ils reserver quelques forces, ou quelques artifices, qu'ils n'ayent desja employez & vainement consommés à l'encontre de vostre Majesté? Quant aux longueurs, combien qu'on n'en viendrait jamais là que de laisser partir vosd. Ambassadeurs mal-contrais, mais je parle au pis aller, mais estant que vostre Majesté entend que vosd. Ambassadeurs endurent patiemment toutes celles qui viendront de la nature de l'affaire, & du respect & reverence qui est due à la dignité, occupations, volonté & bon plaisir de nostre S. Per le Pape. Et quant à celles qui pourroient venir de la malignité Espagnole, ou autre telle, je diray icy comme j'ay dit tantost de l'absolution, à sçavoir qu'il est aisé à iuger au dommage de qui ces longueurs retourneront, si ce sera de vostre Majesté, qui cependant tient, & va toujours en acquerant & s'establisant, & à qui il reste mesme fort peu à acquerir en la France, ou du Pape, qui va toujours y perdant si fort, qu'il ne luy reste plus gueres à perdre. Et quand ceux d'icy qui ont le moins de passion auront bien pensé au preiudice que



les longueurs leur apportent à eux-mêmes, ils devront aussi chercher eux-mêmes de les tetrencher. Que s'ils ne le faisoient, ils meritoient que les vostres eludassent ceste sorte de longueur avec vne patience encore plus longue, & esprouassent à qui durera plus le temps, à ceux qui sont dans le fort à couuert à leur aise deuant vn bon feu, ou à ceux qui sont dehors, derriere la haye, au vent, à la pluye, à la gresle, tremblans le grelot. En somme, SIRE, si ceste negociation est conduite de bonne foy selon Dieu & raison tant d'une part que d'autre, vostre Majesté qui à bonne intention, & qui est presse à faire tout ce qui se deura & pourra faire, n'a rien à craindre, & toutes choses seront faites bien & à temps. Que si on y procedoit de mauuaise façon, le blasme & la honte ensemble avec le dommage tomberoit sur ceux qui en auroient mal vsé. Et quand tous les autres se voudrôit perdre eux-mêmes (ce qu'ils ne feront point) vostre Majesté ne peut rien perdre en enuoyant par deçà, & acquittant sa parole. Et quand il ne luy en aduendroît autre bien, vostre-dite Majesté auroit tousiours acquis d'autant plus grande iustification deuant Dieu & le monde, avec loüange encôres, & reputation de Prince vrayement conuertý, & de Roy Tres-Chrestien, qui apres tant de mauuais traitemens receus en vostre aduersité, n'auriez laissé de r'enuoyer à Rome, & de rendre le respect & reuerence au saint Siege, lors que vous en auiez moins de besoin, & estiez au comble de vostre prosperité. Ce sont, SIRE, les considerations qui me rendent hardý, quelque desiance que j'aye au selbst, & qui ont fait que ie n'ay crainct de rendre au Pape la lettre que vostre Majesté luy estriuoit.

Après auoir escrit en general à vostre Majesté ce que Dieu m'a inspiré sur la deputation de vost. Ambassadeurs, & sur les longueurs & euenemens de la negociation future, ie toucheray quelque chose des conditions particulières dont vostre Majesté fait mention en sa lettre. Desia on vous a donné intention, comme ie voy par la mesme lettre, qu'on ne vous voudra obliger à chose qui trouble vostre Royaume, outre ce que ie viens de dire qu'on ne pourra vous faire chose que vous ne vouliez; & par ma lettre d'hier vostre Majesté aura veu comme le Pape de soy-mesme est entré à vous ôster des scrupules, & retardemens qu'il a entendu que vous auiez. Et confessant ingenuement qu'il auoit volenté de procurer un accord entre vostre Majesté & le Roy d'Espagne, & ce qui est resté de la Ligue, & neantmoins déclaré que ce ne seroit que par voye d'exhortation, & de re-commandatio; & qu'en cela vostre Majesté demeureroit en liberté de faire ce qu'il luy plairoit, & que sa Sainteté ne laisseroit de passer outre à faire ce qu'un bon Pape deuroit. Et outre ce qu'il a dit de cela, j'adjouste encore cecy pour le regard de toutes les autres choses que les Espagnols pourront faire ou dire en ceste negociation, que sa Sainteté ne peut ignorer les interets propres & particuliers qui meunent le Roy d'Espagne, & s'aime plus soy-mesme & le saint Siege, qu'il n'aime quelqu'autre Prince ou Estat quel qu'il soit; & pour seruir aux cupiditez d'autrui, il ne voudra se ruiner soy-mesme, & ses affaires. Aussi ayant le Pape veu que le Roy d'Espagne, qui n'a rien en France; & neantmoins veut enuahir, & par armes, & par pratiques, sous le nom de son Infante & autres, ie ne puis comprendre comment sa Sainteté, & qui en offre & presente ce Royaume pour y commander

mander comme ont fait ses predecesseurs, vueille refuser la rehabilitation de son autorité, pour ne deplaire àquin'y a nul interest iuste.

Quant aux trois conditions de Bearn, Concile de Treate, & de Monsieur le Prince de Condé, vostre Majesté est d'accord de les faire au plustost qu'elle pourra. Et à la mienne volonté, SIR, qu'elle les peult faire dès ce heure. Car outre le bien qu'il y auroit en chacune, cela fermeroit la bouche aux mesdisans, osteroit ou diminueroit la desiance à ceux qui craignent de l'avenir, armeroit & enhardiroit le Pape contre l'importunité des Espagnols, faciliteroit & aduanceroit cét affaire, & tourneroit à plus grande louange de vostre Majesté, quand elle l'auroit fait de son propre mouvement, & auant la main. Ioinct que la dernière importe tant à l'assurance & repos de l'Estat, qu'il m'est aduis qu'elle ne pourroit estre faite trop tost, & que vostre Majesté la faisant, aura pour la seconde fois conserué & garany la Couronne, & assésuré la France dorepos; & du fruit de tant de travaux que vous venez de prendre, & de tant de dangers auxquels vous vous estes exposé pour la deliurer de la gueule des estrangers, & d'une horrible dissipation qui estoit ja fort aduancée.

Par ainsi des propositions contenues en la lettre de vostre Majesté, il ne reste que celle de la rehabilitation, qui est à la verité le point le plus difficile de toute ceste affaire : & si ceste negociation auoit à finir mal, ce feroit par là. Vostre Majesté par ses lettres me monstre assez à quoy elle en est pour son regard, & ie me l'imaginois assez de moy-mesme. Et quant à ceste Cour, ils entendent la donner auant que iamais vous recognoistrez pour Roy, quelque absolution prealable qu'il y eust d'icy mesme. Et cōme le commun des hommes est ordinairement plus tenant des choses qui leur sont reuocques en doute, que des autres; aussi estimay-je qu'icy on quitteroit plustost quelque chose de l'absolution que de la rehabilitation. En esconfié donc de dispositions contraires de part & d'autre, i'auois pensé ce qui s'esfuit. Premièrement, que vostre Majesté demandant l'absolution seulement, si on vous la donna sans rehabilitation, comme de sa nature elle doit proceder, vous auriez ce que vous voulez. Secondement, si on ne vous veut donner rien là sans ceste-cy, comme il est bien vray-semblable qu'ils ne le voudront point, pour l'opinion qu'ils ont que hors de Rome l'absolution seule vous manderoit pour les deux, qui auisi a esté le plus grand pretexte qu'on a eu cy-deuant de vous refuser l'absolution; en ce cas qu'on ne voult separer l'une de l'autre, i'auois pensé que vōs Ambassadeurs apres auoir insisté sur la separation des deux, & trouué le Pape resolu & adheurté à ne les separer point, pourroient dire qu'ils n'ont point charge de V. M. de demander rehabilitation; & qu'ils sçeuient bien qu'elle ne seroit traitée bonnair en France au vostre Conseil, ny és Cours de Parlemens & autres compagnies, & mesmement si elle estoit fort pressée. Mais si la Sainteté pour quelque fauore intention la veut donner resoluement, qu'ils la supplient pour l'amour de la Sainteté mesme & du S. Siege, de la faire conceuoir de façon qu'elle puisse passer & estre receut en France. Et là dessus pour uoir un peu de temps expedient, ou d'autres meilleurs qui seront aduises, qu'elle soit faite talement, non expressement, & comprise en vne seule & brésée clause, comme seroit, & apres les clauses de l'absolution le

Pape en adjoûtoit vne, par laquelle il declarast vouloir & entendre que la Bulle de Sixte V. du 9. Septembre 1584. de laquelle la tenetur soit tenuë pour exprimee, ne vous puisse en rien preiudicier, non plus que si elle n'a-uoit iamais esté faite. Ce qui pourroit aucunement suffire au Pape pour sa pretentiõ, & ne nuïroit de rien à V. M. ny ne seroit pris de personne pour rehabilitation; ains l'absolutiõ avec ladite clause vaudroit mieux que sans icelle. En troisieme lieu, si apres que vosdits Ambassadeurs auroient cour fait ce qu'ils auroient pû pour la faire reduire à des termes, & remonstéré que c'est le profit du Pape mesme & du S. Siege que la clause soit de ceste façon, on y retenoit neantmoins quelque mot qui vous déplaist, & qu'on ne voulust ôster pour aucune raison qu'on alleguast, Il m'estoit en ces cas venu en pensément que vosdits Ambassadeurs monstrent de s'en contenter; & que sans aulsi en faire autre bruit, ils pourroient prendre & emporter avec eux l'expedition telle qu'ils l'auroient pû obtenir: & V. M. l'acceptant en ce qui luy seroit besoin, & ne disant rien quant au reste, vostre Procureur General (apres que V. M. auroit establi icy vn Ambassadeur residant, & auroit esté recogneuë pour Roy) pourroit sur quelque occasion qu'on feroit naistre, ou qui se presenteroit d'elle-mesme, demander à voir la Bulle, & sur les mots qui luy auroient déplu se pourvoir à la Cour de Parlement, laquelle y ordonneroit ce qu'elle verroit bon estre, soit secrettement ou publiquement, selon qu'il seroit trouué meilleur & plus expedient. Et si on vouloit encores quelque chose de plus que ce que ladite Cour y auroit fait, on pourroit en la premiere assemblee d'Estats generaux qui se tiendront, faire encore là dessus telle declaratiõ qu'on voudroit. Ce troisieme expedient, SIRE, n'est pas selon mon humeur: mais s'estant présenté à ma pensée, ie n'ay voulu laisser de le mettre icy à toutes aduantes, pource qu'en choses si intriquées, & où les parties ont volontez & pretensions du tout contraires, l'on est contraint de s'aider de pires expediés que cestuy-cy ne seroit. Et à la verité, SIRE, comme V. M. scait trop mieux, il y a beaucoup de choses en ce monde qui dependent de l'humeur des personnes; comme en cecy il y pourroit auoir tel Roy brusqué, qu'il ne voudroit entendre à aucun expedient, quelque faue & grand besoïn qu'il en deust auoir vn iour en des occasions que le temps peut apporter: il y en pourroit auoir aussi de si caute, qu'il ne voudroit omettre vn seul poinct de ce qui luy pourroit seruir à ôster tout scrupule aux simples, & tout pretexte aux malins, & à se bien assurer & aduantager de tout poinct: & pourueu qu'il sortist d'un mauvais pas, & fist les affaires bien & seurement, ne s'arresteroit à des formalitez & apparence.

Oltre les susdites particularitez portees par les lettres de V. M. l'ay depuis vn mois donné aduis à Monsieur de Villeroi comme l'Ambassadeur d'Espagne va disant aux Cardinaux qu'il croit de proposer à l'absolutiõ, qu'il faut pour le moins vous faire préalablement donner de bonnes assurances pour la Religion Catholique, comme aussi toutes les lectrës du Duc de Mayenne ont tousiours cõteffrein de s'arrestez.

Quant au Confesseur, lors que le Pape en a parlé pas deux fois, que ie scay, il n'a pas dit purement & simplement qu'il vous le vouloit enuoyer, mais il a dit que V. M. le luy deuoit auoir demandé, & le deuoit deman-

dr. Et cela il le dira à Monsieur le Cardinal de Gondy en la dernière audience qu'il eut de sa Sainteté, & depuis au sieur Delbebene ou à Monsieur Lomelin, lors que le comurier Valerio estoit icy, enuoyé par ledit seigneur Cardinal de Gondy : & croy qu'encores à ceste heure il soit en la mesme volonté : Mais V. M. en sera quitte en ne le demandant point : car autrement ie ne pense pas qu'on le vous enuoya.

Iusques icy ie pense auoir respondu à tout ce qu'il auoit pleu à V. M. me commander, & y ay respondu de mon creu, n'en ayant pû communiquer à personne ; mais par le commandement lequel sur la fin de ma lettre precedente ie vous ay escrit m'auoir esté fait par Monsieur le grand Duc, qu'aussi pour tenir la promesse que i'ay faite au Pape, & à Monsieur le Cardinal Aldobrandin, de ne rien dire à personne de la despesche que j'auois receüe de vostre Majesté, & pour fonder aupres d'eux ceste creance qui ne les trompera iamais, que ie suis veritable & secret, & qu'ils me pourrônt tousiours cy-apres parler avec toute confiance & assurance comme ils ont fait à ceste fois. Mais si à l'aduenir i'apprens quelque chose de meilleur pour le regard de toutes les choses susdites, ie ne faudray de le vous escrire. Cependant i'adiousteray deux ou trois autres choses qui me semblent appartenir au bien de ceste legation. Et premierement ie mettray en consideration à vostre Majesté, si elle trouuera bon que chacun des trois qu'elle veut enuoyer ; outre les commandemens que vostre Majesté leur donnera, aye encore charge de parler & apposter lettres de creance de la part du corps ou compagnie dont vostre Majesté le prendra ; comme celui de la Cour de Parlement, de la part de lad. Cour ; celui de vostre Conseil, de la part des Princes & Seigneurs de vostre Conseil ; & Monsieur du Person de la part des Prelats qui se trouveront à vostre suite lors qu'il partira. Et afin qu'en cela il n'y eust rien qui ne fust de la dignité de vostre Majesté, ie pense qu'il se pourroit faire en ceste façon ; Que ladite Cour de Parlement pourroit dire qu'elle ayant sceu que vostre Majesté enuoyoit à sa Sainteté vn de leur corps, a supplié vostre Majesté de trouuer bon qu'elle luy commist de baiser les pieds à sa Sainteté de leur part, & luy remonstrier certaines choses concernant le fait dont il s'agit : & ainsi de chacun des autres deux, comme vostre Majesté aduisera trop mieux ; la suppliant tres-humblement de pardonner au zele que i'ay à son seruice, qui me fait tomber en ces indiscrétions de dire choses superflues. Cependant ce surcroist de charge me sembleroit à moy de grande efficace, non seulement de monstre. Car en ceste occasion on peut dire plusieurs belles & bonnes choses sous le nom & de la part des Princes & Seigneurs de vostre Conseil, & du Clergé, & de la Cour de Parlement : & mesmes es disputes & alterations qui se feront icy sur ceste affaire, plusieurs choses à mesure qu'on verra estre besoin se pourroient dire franchement & librement sous tels noms, qui ne seroient bien seantes en la bouche d'un penitent qui demande absolution. Et iacoit que quelqu'un pourra soupçonner icy que vostre Majesté face faire telle chose ; toutes fois ce ne sera que soupçon, sans aucune certitude ; & mesmes qu'on sçait bien icy que par delà les meilleurs Catholiques, portant plus impatiemment le refus & longueurs precedentes que vostre Majesté en use, comme aussi sçauent-ils bien que les Cours

de Parlemens donnent bien souuēt des Arrests qui sont non seulement contre les prétentions de la Cour, mais aussi peu agréables aux Roys mesmes; & de ces es meilleurs temps, & plus estoignez de toute desobéissance.

Il y aura encores vne autre chose à considérer de par delà, à sçauoir en quelle façō il faudra que les Ambassadeurs quand ils seront icy demandēt l'absolution au nom de V. M. & en quels termes deura estre cōcēte la procuration que V. M. leur passera: si ce sera purement & simplement, ou autrement. Quand Monsieur de Neuers fut par delà, on demanda les commandemens de l'Eglise, & de sa Sainteté, comme il falloit faire alors; ensuiuant ce qui vous auoir esté enjoint par les Prelats de delà à S. Denys le 25. de Iuillet de l'année passée; & entant que besoin seroit, & pour plus grande seurētē de vostre conscience on demandera aussi l'absolution. A present l'estime, sans meilleur aduis, qu'il ne faut plus demander lefd. commandemens, & qu'en les demandant on prejudicieroit à l'absolution obtenue audit iour & lieu, laquelle il faut tenir à present pour accomplie en tous ses points, ayans les Prelats fait ce qui estoit en eux, & V. M. ayant aussi obey de son costé, & enuoyé à Rome, & demandé lefd. commandemens de l'Eglise & de sa Sainteté, & n'ayant tenu à V. M. qu'elle ne les aye receuz & exécutez. Et ainsi il ne reste plus rien à faire quant à lad. absolution de S. Denys; & retourner maintenant à demander lefd. commandemens, ce seroit confesser qu'elle pendencores, & qu'il n'y a rien d'acheué. Loins qu'il sembleroit que nous ne souissions qu'une chanson: & d'ailleurs ce seroit temps & peine perdue, pour ce que la Sainteté n'en feroit rien, & si s'en offenserait. Je penserois donc qu'à present il seroit meilleur demander absolution purement & simplement, en sorte neantmoins que ceste demande pure & simple s'entende tousiours estre faite sans renouer, ny en rien prejudicier à la premiere absolution, ains seulement en tant que besoin seroit, & pour accumuler droit sur droit. De laquelle siens intention V. Majesté, s'il luy semble bon, & en touteuement, pourroit faire retenir vn acte secret par delà auant que de faire partir lefdits Ambassadeurs, lesquels n'auroient besoin d'exprimer icy ceste leurdite intention (entant que besoin seroit) & suffiroit qu'ils l'entendissent. Ceste façō de demander purement & simplement sera plus agreable icy, & de plus briefue expedition: & ne derogera rien au droit ja acquis, estant entendu comme i'ay dit cy-dessus, & V. M. Payant ainsi déclaré par ledit acte auant que lefdits Sieurs Ambassadeurs partent d'auprès d'elle. Je n'escriis à V. M. sans quelque honte de ces actes, & de telles choses qui semblent tenir de la chiquane, recognoissant de combien elles sont estoignees de la rondeur, franchise, & sincerité & pīe de vostre nature & intention; & de vostre grandeur & magnanimité Royale. Mais quand on a affaire à des gens capiteux, cōme il y en aura quelques uns de ceux par les mains de qui il faudra passer, on est cōtrainct de se prēmair & seruir de telles façōs. Et en cōsequence de ce que dessus, je croy qu'en ladite procuration que V. M. passera, & es lettres qu'elle escriira au Pape, elle n'a point à craindre d'vser de ce mot d'*Absolution*, l'entendant tousiours en la façō susdite. Lesquelles lettres, sans y parler de prestre l'obedience, demandent tousiours estre fort honorables, comme le requiert l'honneur de son Altesse, & l'affaire, &

la mauuaise satisfaction qu'on eut, & monstre-t-on d'auoir encore de celles qui furent baillées à Monsieur de Neuers.

Atant ay-je escrit ce qui m'est venu en l'esprit touchant vostre seruice. Quant à ce qu'il a pleu à V. M. m'escrire de moy sur le commencement & sur la fin de sa lettre, l'en baise en toute humilité les mais à V. M. m'en sentant par trop fauorisé & honoré, & ne veux de ma part regarder ny penser sinon qu'à bien seruir mon Roy, & ma patrie, en ce peu que ie pourray, comme Dieu & la nature, les loix & ma propre inclination & accoustumance de plus de vingt-cinq ans m'y obligent, me remettant au reste au bon plaisir de vostre Majesté, à laquelle ie prie Dieu qu'il doint, &c.

I'ay oublié cy dessus vne chose que j'adiousteray icy. C'est que ie ne voy point que V. M. pour son regard aye besoin de se hâter d'enuoyer, si ce n'est que cét affaire trainast longuement. Ce Pape (comme les choses de ce monde sont faictes) pourroit mourir, auquel cas, ie pense que V. M. y perdrait, & que nul autre Pape ne vous expedieroit si tost, ny si fauorablement comme celuy-cy pourra faire. Car ce Pape a ja vsé de toutes les longueurs, remises, rebuts, & rigueurs qu'il a esté possible, & en cela a non seulement satisfait à ce qu'il estimoit estre de la dignité & Majesté du saint Siège, mais aussi a saoulé le cœur & l'ambition, haine & malice des Espagnols, en tant que saouler elles se peuuent, de façon que quoy qu'il face à l'aduenir ils ne se pourront plaindre de luy, & il pourra avec plus de iustification & de hardiesse faire ce qu'il doit; comme desia il se void que sa sainteté reconnoissant en auoir fait trop, en est maintenant en foyce & crainte, & fait ce qu'il peut pour adoucir & excuser les choses passées, & pour vous asseurer & encourager d'enuoyer de nouueau vers luy, comme V. M. aura veu par ma lettre d'hier: aussi est-il ja tout préparé & comme cuitiue par les offices qui ont esté faits auprès de luy, & en faueur de vostre expedition, & par l'information qui luy a esté donnée de ce qui se peut faire, ou qui ne se peut point faire par V. M. & en a ja tiré diuerses promesses & intentions: & i'entends d'ailleurs que luy voyant qu'il en faut passer par là, il va preparant les Cardinaux à vostre expedition, dès qu'il eut entendu que V. M. vouloit enuoyer Monsieur du Perron. Là où si le Pape mouroit, encores que les prosperitez de V. M. & le trop grand intérêt dudit saint Siège, soient tousiours pour venir à bout de ceste affaire, ce neantmoins ce ne pourroit estre si tost. Car premierement vn autre Pape pourroit demeurer long temps à estre fait. Secondement le sort pourroit tomber sur quelqu'un des plus contraires; comme les Espagnols qui sont tres-puissans au Conclaué y feroient tous leurs efforts. En troisieme lieu, quel que fust le Pape nouueu, il ne pourroit auoir cognoissance telle des choses qui se sont passées en ceste affaire; ny tant d'experience des artifices & tromperies des Espagnols & de ceux de la Ligue, que cestuy-cy. Comme aussi tous les offices cy deuant faits seroient perdus, & retiendroient aucun lieu à l'endroit d'un Pape nouueu, lequel encores pour n'auoir quant à luy vsé d'aucune rigueur ny longueur enuers V. M. n'auroit aussi le soing qu'à cestuy-cy de racourcir le passé, ny tant d'occasion ny de hardiesse de diligenter & aduancer les affaires: ainsi voudroit encores luy tenir de sa part quelque gratitude, & marcher en vne telle affaire posément & lentement, de peur qu'il

ne semblaſt auoir trop peu de zele à la Religion Catholique, & à la dignité du ſainct Siege. Auſſi n'ayant quant à luy donné aucune ſatisfaction au Roy d'Eſpagne, il ne pourroit faire de moins que d'attendre encores quelque temps pour le reſpect de la Maieſté Catholique, & omnipotente, iuſqu'à ce que V. M. Tres-Chreſtienne, eſtante reconciliée avec le S. Siege (& par ce moyen de tous recogneüe) aya par ſa valeur & bon-heur reduit ce Colofſe au petit-pied, & tourné les yeux & les eſperances de ceſte Cour vers la France, comme elles y ont auyresfois eſté dreſſées, & en ont tous iours receu leur principal ſupport & accroiſſement. A tant, &c. S. A. S. De Rome, le Vendredy 23. Decembre, 1594.

## A V R O Y.

S I R,

Après que i'eus eſcrit à V. M. mes deux lettres des 22 & 23. Decembre, ie ne penſois auoir plus rien à eſcrire pour ceſte fois, & euſſe enuoyé leſdites deux lettres au Seigneur Hieronimo Gondy dès le ſoir dudit iour 23. pour vous les faire tenir, ſi i'eufſe eu la lettre de Monſieur le Cardinal Aldobrandin, que le Pape vouloit eſtre eſcrite à Monſieur le Cardinal de Gondy, pour laquelle i'auois eſté remis iuſqu'au lendemain de Noël: mais il me vint bien toſt occaſion d'eſcrire de nouveau. C'eſt que le 24. au ſoir, veille de Noël, furēt rendus aux ſieurs Lomelin & Delbene des lettres de Monſieur le Cardinal de Gondy, par leſquelles eſtoit porté que V. M. m'auoit fait vne dépeſche de laquelle ie leur ferois part. Ils en eurent auſſi de Monſieur de Neuers, qui en contenoient autant de façon que leſdits ſieurs Lomelin & Delbene eſtans aduertis par ce moyen que V. M. m'auoit eſcrit, & eſtans perſonnes d'honneur, & tres-affectionnez au ſeruite de V. M. & d'ailleurs mes bons Seigneurs & amis, i'auois grande ocaſion de leur confeſſer ce qui en eſtoit, & leur en communiquer partie, & meſmes en ayant permiſſion de V. M. Mais de l'autre coſté, i'auois le commandement de Monſieur le grand Duc, le plus expreſ qu'il eſtoit poſſible, que ie ne communiquaſſe rien de ladite dépeſche à perſonne, & auois promis au Pape & à Monſieur le Cardinal Aldobrandin de n'en parler à perſonne viuant; & ſuiuant ledit commandement & promeſſe, en 15. iours qu'il y auoit deſia que i'auois ladite dépeſche, i'auois reſpondu pluſieurs fois aux ſieurs Lomelin & Delbene que ie n'auois point de lettres non plus qu'eux. Par ainſi me trouuant entre deux reſpects & extremitez, ie penſay eſtre plus tolérable d'emprunter & prendre ſur mes amis, que ſur les Princes, & ſur voſtre ſeruite, auquel ie me fuſſe rendu inutile, ſi apres ſi expreſſe promeſſe i'eufſe donné ocaſion au grand Duc, & audit ſieur Cardinal Aldobrandin, de me tenir pour homme vain & léger, & qui ne ſeuſſe rien faire, & meſmes apres m'y eſtre ſi expreſſément obligé. C'eſt pourquoy leſdits ſieurs Lomelin & Delbene m'eſtans venu trouuer ſeparément le 25. dudit mois, iour de Noël, & m'ayans monſtré leurſdites lettres, ie fus contraint

de continuer à leur dire comme l'auois fait tous les 15. iours precedens. Mais il y eut encores pls. C'est que lesdites lettres, & autres, qui deuoient estre renduës au Pape mesme, & à Monsieur le Cardinal Aldobrandin, portoient que ie deuois traicter avec sa Sainteté de certaines choses de grande importance, & d'autre nature que n'estoient celles dont i'auois parlé à sa Sainteté, & audit fleur Cardinal son nepueu; dont i'entray en vne vifue crainte que sa Sainteté ne soupçonnast par là, & ne creust que V. M. ne procederoit rondement avec elle, ou que ie fusse vn homme lasche, qui ne luy eusse voulu ny osé dire ce que i'auois en charge. Mais Dieu me fit la grace que ie ne me perdis point, & ne tarday gueres à me resoudre, & à prendre vn bon & prompt expedient. Et ce que la fortune sembloit me presenter de la main gauche, ie le pris de la droite, en vsant de ceste trauesse en sorte que non seulement elle ne nuisoit de rien à vostre seruite, ny à la bonne opinion qu'on deuoit auoir de moy, mais au contraire qu'elle y ayda & seruit autant comme si dès le commencement & de propos deliberé elle y eust esté dressée & destinee. Je m'en allay donc trouuer Monsieur le Cardinal Aldobrandin dès le lendemain de Noël, incontinent après dîner, auant que lesdits fleurs Lomelin & Delbene luy eussent parlé, & luy dis comme lesdits fleurs auoient receu lesdites lettres, où il me faisait mention de la depesche que V. M. m'auoit fait, & comme ce nonobstant i'auois gardé, & voulois perséuerer à garder la promesse que i'auois faite à sa Sainteté & à luy. Ce que ledit Cardinal loua fort, & me dit qu'il en feroit de mesme, & en aduertiroit aussi le Pape. Après cela ie luy dis que lesd. fleurs Lomelin & Delbene tiendroient des propos à sa Sainteté & à luy, & leur donneroient à tous deux des lettres, par où ils auroient inste subject de penser que i'eusse receu commandement de V. M. de traicter autres choses que celles que l'auois traitees. Que sur ce ie le voulois assurer de nouveau, que ie leur auois exposé fidelement & entierement tout ce qui m'auoit esté commandé, & que ie ne leur auois rien dit de moins ny de plus que ma charge porroit. Et quand i'eusse eu quelques autres choses à leur dire, ie n'y eusse point manqué, telles qu'elles eussent esté. Sachant bien que sa Sainteté estoit Prince équitable & modéré, qui entendroit trop mieux que les subjects & seruiteurs ne se pouuoient poinr eux mesmes former les charges & instructions de leurs Souuerains, & qu'il faut qu'ils les recoiuent & exposent telles qu'elles leur sont enuoyees. Outre que sa Sainteté & luy pouuoient assurer que V. M. auoit le Siege, & la personne de sa Sainteté en telle reuerence, qu'elle ne commettrait iamais à moy, ny à autre, de dire chose à sa Sainteté, qui ne se peust dire avec tout le respect & humilité qui est due à sa Sainteté: mais que pour l'elclaircir du doute qu'il pouuoit auoir de cela, ie luy voulois dire en verité & avec toute confiance, d'où ie pensois qu'estoit venu à ces deux Seigneurs, l'opinion que i'eusse à traicter avec sa Sainteté d'autre chose que ce que ie leur auois dit. C'estoit que V. M. m'auoit fait vne bien longue & ample depesche, par laquelle outre le commandement que vous me faisiez de dire à sa Sainteté ce que ie luy auois dit, vous me disiez à moy plusieurs choses en confiance, touchant les doutes & scrupules que quelques vns vous auoient voulu donner des choses de Rome, & mesme des intentions de sa Sainteté.





toutesfois outre la contrainte que i'auois eüe de sortir ainsi de ce mauuais pas, il me sembloit qu'en cela ie ne faisois rien contre l'intention de V. M. & moins contre vostre seruice, ne pouuant cét offre tourner qu'à vostre aduantage, & grand esclarcissement de leurs intentions, soit qu'ils y voulussent entrer ou non; & quelques responses qu'ils fissent y entrans, puis que vos Ambassadeurs n'estoient encores partis, ny ne deuant partir auant qu'auoir response d'icy, toutes choses seroient encores en vostre main. Ie deliberey donc d'attendre, & d'escouter pour quelques iours, auant que retourner vers ledit sieur Cardinal, & à la premiere fois que i'y retournerois ne luy parler que de la lettre qu'il auoit à me bailler pour Monsieur le Cardinal de Gondy, si de luy-mesme il ne monstroit le souuenir de l'offre que ie luy auois faite, & desirer que ie l'accomplisse. Cepédant i'estois bien aise que les sieurs Lomelin & Delbene parlassent, comme ils firent, au Pape & à luy, & leur disient, comme ils m'auoient dit vouloir faire, ce qu'ils auoient en leurs lettres, & que le paquet principal qui venoit à moy s'estoit perdu, d'autant que par là le Pape & ledit sieur Cardinal verroient que ie leur tenois promesse, & pourroient mieux penser à la response qu'ils auroient à me faire, quand ie leur déployerois routes vos doutes & scrupules, comme i'estois resolu de faire; & V. M. de sa part pourroit aussi faire d'autant plus grand estat des responses qu'ils m'auroient faites apres qu'ils y auroient pensé. Cecy estoit le Lundy lendemain de Noël 26. Decembre apres disner. Et s'estant depuis passé le Mardy, Mercredy & Ieudy, le soir du Ieudy à deux heures de nuit vint à moy vn ieune homme, qui m'apporta vn billet bien cacheté de la part du seigneur Canobio, principal Secretaire du Pape sous Monsieur le Cardinal Aldobrandin: par lequel billet il m'escruiuoit, que ledit sieur Cardinal luy auoit commandé de me faire sçauoir que le lendemain au soir y auroit bonne commodité de parler à luy. Ie fus tres-aise de voir qu'on me recherchoit, & m'en allay trouuer led. sieur Cardinal Aldobrandin le Vendredy au soir 30. de Decembre comme il faisoit nuit. Et d'arrivée il me dit que le Pape auoit vn peu la goutte qui luy estoit suruenüe en vne main, & qu'il ne pouuoit donner audience, de quelques iours (aussi auons nous veu qu'il ne s'est trouué en la Chappelle aux Vespres de Samedy veille de la Circoncision, ny à la Messe le iour de la Circoncision.) I'entendis incontinent que cela vouloit dire, & qu'il falloit que ie disse à luy ce que ie m'estois offert; qu'il seroit meilleur ainsi, que si ie le disois à la Sainteté directement & immédiatement; aussi ne fis-je point le relif: ains voyant qu'il se dispoisoit à me donner bonne audience, ie commençay par luy ramenteuoir sommairement & brieffuement ce que ie luy auois dit le Lundy apres disner, & à quoy nous en estions demeurez. Et puis luy dis que suiuant l'offre que ie luy auois faite, ie luy dirois tous les doutes & scrupules que V. M. m'auoit confiez par sa dépesche. Qu'en faisant neantmoins vne telle chose sans commandement, ie voulois bien auant toute autre chose luy dire que si n'eust esté la contrainte que i'auois eüe de leuer au Pape & à luy le scrupule qu'ils eussent peu auoir, que ie ne luy eusse fait mention de toutes ces particularitez, & qu'encores avec tout cela ie ne les luy dirois point, si ie pensois en seruant sa Sainteté, preiudicier tât soit peu au seruice de V. M. Que ie desirois bien estre tenu par eux pour tres-

deuot seruiteur du saint Siege & d'eux, & qu'ils ne seroient iamais deceus de ceste bonne opinion: mais que ie desirois bien aussi qu'ils metinssent pour homme de bien & loyal au reste enuers toutes sortes d'hommes, & qui pour complaire à qui que ce fust, ne voudrois auoir manqué de foy & de loyauté, ie ne dis pas à mon Roy, mais à la moindre & la plus estrange personne du monde qui se feroit en moy. Mais que i'auois pensé que comme il tourneroit à grand seruice à la Sainteté d'estre informee des scrupules qu'on auoit par delà, & de luy donner moyen de les oster par vne bien seure & honneste façon; aussi seroit-ce chose de grand' vtilité & assurance à V. M. que l'information que i'auois à vous donner des choses de deçà, fust prise du Pape mesme & du sieur Cardinal, qui scauoit l'interieur de sadite Sainteté: & que tous scrupules & défiances ostées, vous enuoyassiez au plustost ceux que vous auiez destinez, & füssiez toutes autres choses qui seroient de vostre deuoir, & que la conjunction du S. Siege & de la Couronne de France, tant desirée de tous les gens de bien, & tant nécessaire pour le bien de la Chrestienté, s'en ensuiussent au plustost que faire se pourroit.

Après ce commencement ie vins au point, luy disant que cōme auprès du Pape se faisoient tous les iours de mauuais offices contre V. M. aussi n'y auoit-il faute de gens qui en faisoient auprès de V. M. contre le Pape, & toute ceste Cour. Et encores que V. M. ne voulust croire de sa Sainteté sinon ce qui se doit croire du Vicair de Iesus Christ, & du Pere commun de tous les Chrestiens; ce-neantmoins les artifices des hommes estoient si grâds, & les rigueurs passées si recentes, qu'il ne se pouuoit faire que cela n'engendrast quelque scrupule en l'esprit de V. M. & de vos principaux Conseillers, au moins pour desirer d'estre informez de ce qui s'en disoit, & en vouloit auoir aduis de vos seruiteurs de deçà. Que tout premierement on vous auoit voulu donner à entendre & vous persuader que le Pape n'auoit aucune volonté de vous donner l'absolution; & que ce qu'il vous auoit fait faire par Monsieur le Cardinal de Gondy quand il s'en retourna par deçà, n'auoit esté que pour empescher que sur le refus rapporté par delà par Monsieur de Neuers, vous ne prüssiez quelque resolution en vos affaires, & au fait des Eueschez & Abbayes, & autres choses Ecclesiastiques, qui sont en grand desordre & confusion. Je luy disois ainsi cruëment, SIRE, tout exprés, afin d'obliger le Pape à declarer qu'il vouloit vous donner l'absolution.

En second lieu, ie luy dis qu'encores qu'on vous eust donné quelque intention que sa Sainteté ne voudroit vous obliger à chose qui fust pour troubler le Royaume, ce neantmoins plusieurs vous donnoient à entendre que sa Sainteté demandoit que vous füssiez la guerre aux heretiques, & renonçassiez aux confederations d'Angleterre, & d'autres Potentats nō Catholiques: mais que V. M. faisant profession de la Religion Catholique, cōme elle y vouloit viure & mourir, elle desiroit aussi que tous ses subjects füssent Catholiques, & que la diuersité de religion füst ostée, pour estre contraire à l'honneur de Dieu, & seureté de l'Estat. Que vous feriez tout ce que vous pourriez pour reduire les deuoyez, & n'aurez iamais plein & entier contentement, iusques à ce que vous veüssiez tous vos subjects remis en la

Religion Catholique sous l'oüeyssance du S. Siege : mais que de leur faire la guerre, outre qu'il ne se pouuoit, les choses estans comme elles sont, ce feroit mesmes contre le bien de la Religion Catholique. Qu'au reste vous n'auiez ny vouliez auoir, quant au spirituel, aucune alliance avec la Royne d'Angleterre, & autre Potentat non Catholique : mais que pour le temporel, vous auiez trouué ces deux Couronnes allies & confederées, & les mesmes causes qui auoient meu vos predecesseurs Roys Tres-Chrestiens & Tres-Catholiques à accorder & garder lesdites alliances & confederations, vous contraignoient aussi à les continuer. Que le Roy d'Espagne mesme, qui estoit tenu pour si grand Catholique, les recherchoit bien, & qu'il n'y auoit pas plus de dix ans qu'il tenoit vn Ambassadeur près de la Royne d'Angleterre, & y en auoit aussi vn d'elle près de luy, & voudroit bien encores à present qu'il y fust tout de mesme.

En troisieme lieu, ie luy dis qu'on vous auoit dit & redit, que sa Sainteté auant que vous donner l'absolution, vouloit pour signe de penitence que V. M. fist publier le Concile de Trente, reestablist l'exercice de la Religion Catholique au pays de Bearn, & retirast des mains des Huguenots Monsieur le Prince de Condé, pour le faire esleuer & instruire en la Religion Catholique. Sinon, si V. M. ne le faisoit, sadite Sainteté entendoit fonder sur cela vn refus nouveau, ou vn delay tres-long & sans fin. Que ces trois choses estoient desirées par V. M. qu'elle y estoit toute resoluë, & les feroit au plustost qu'elle pourroit, quand bien sa Sainteté ne les demanderoit point : mais qu'elles estoient plus difficiles que l'on ne pensoit icy, & qu'il falloit du temps pour y preparer les choses & les personnes : de façon qu'elles ne pouuoient estre faites si tost comme il seroit de besoin pour les faire preceder l'absolution : au moins si sa Sainteté la vouloit donner à tēps, pour preuenir non tant aux necessitez du Royaume, mais autant ou plus aux desordres de l'Eglise, & au reestablisement de l'autorité du S. Siege, qui s'alloit tous les iours auilissant à faute d'auoir admis V. M.

En quatriemes lieu, ie luy dis qu'on vous auoit aduertie de plusieurs endroits, que sous l'esperance de l'absolution sa Sainteté auoit intention de vous engager à vne negociation & traité avec le Roy d'Espagne, & avec vos subjects qui restoient de la Ligue, & ne lascher ladite absolution, iusques à tant que vous auriez accordé au dessusdits tout ce qu'on auroit voulu. Mais que ie ne luy disois ce quatriemes poinct sinon que pour luy faire scauoir qu'il estoit vn des scrupules qui m'auoient esté escripts. Car au reste nostre saint Pere & luy Cardinal, d'eux-mesmes m'y auoyent satisfait desia si expressement & si amplement, que ie n'en desirois autre nouvelle ny plus expresse declaration.

Le cinquiemes poinct fut de la rehabilitation, de laquelle ie fus en quelque doute si j'en parleroie, pource que c'estoit la chose la plus chatoüilleuse de toute ceste affaire, & que mal-aisément deduiroit-on tout à fait, sinon lors que l'on viendrait du tout au fait & au prendre. Toutesfois ie ne me voulus arrester en si beau chemin, & me resolus de dire tout, quand ce ne seroit que pour donner moyen à V. M. de leur faire dire vn iour avec verité par les Ambassadeurs, lors qu'ils viendront icy en contestation, que sa Sainteté auoit esté aduertie par moy de ce poinct, aussi bien que

de tous les autres qui ne se pourroient faire, ou du tout, ou si tost, ou ainsi qu'on voudroit icy.

Le luy dis donc, que le cinquiesme & dernier point estoit, qu'on vous auoit dit & asseuré que le Pape voudroit contraindre V. M. à prendre vne rehabilitation. Que pour le regard de vostre personne en particulier, vous ne feriez difficulté de prendre absolution & rehabilitation, & s'il y auoit encores quelque autre chose au dessous de celle-là; & recouriez le tout à plus de seureté & auantage pour vous: mais que la dignité de Roy de France qui estoit annexee à vostre personne, & qui vous estoit deuoluë & deferee par la loy Salique, sans la prendre mesme de vos predecesseurs; la préeminence aussi de ceste Couronne, qui au temporel n'a iamais reconnu autre que Dieu par dessus elle, comme il est mesme tesmoigné par les Papes au Droit Canon, les declarations encores faites autresfois és Estars generaux, & autres assemblees du Clergé & de l'Eglise Gallicane, les Arrests des Cours de Parlemens, les iugemens de toutes autres Compagnies qui ont autorité au Royaume, & la voix & consentement vniuersel de tous les François, repugneroient à l'application de ce remede, & requerroient sur ce quelque bon expedient.

Après auoir dit aud. sieur Cardinal tout ce que dessus aux mesmes termes que ie viens de vous reciter, i'adjoustay que c'estoient là tous les doutes & scrupules qui m'auoiët esté escripts: & cōme iem'estois librement offert de les luy cōmuniquer, aussi les luy auois-je exprés fidelement & de bōne foy declarez, sans en rien obmettre: suppliant sa Saincteté & luy de prendre le tout en bonne part, & m'apprendre & commander ce que i'auois à y respondre.

Ledit seigneur Cardinal Aldobrandin me respondit aussi doucement & amiablement, comme il m'auoit attentiuement escouté. Et tout du commencement me dit qu'il me respondroit comme de soy, en sorte neantmoins qu'il ne me diroit chose qu'il n'estimast estre de l'intention de sa Saincteté. Et quant au premier point des cinq, le Pape, comme il m'auoit dit autrefois, n'auoit iamais eu en ces choses de France, autre mire que l'honneur de Dieu, & le bien de la Religion Catholique. Que d'ailleurs sa Saincteté estoit Prince veritalé & real, qui ne souloit ny voudroit donner paroles, & n'auroit r'attaché ceste negociation, s'il ne l'eust voulu acheuer & conduire à bonne fin. Que sa Saincteté recognoissoit qu'en ceste reconciliation il ne va pas seulement de l'interest de V. M. & du Royaume de France, mais aussi de celuy du S. Siege: & qu'en vous déniaut l'absolution, il feroit contre son profit. Pourquoi donc (disoit-il en son interrogation) voudriez vous qu'il ne donnast l'absolution? qu'on face seulement de delà ce que l'on doit, & qu'on y procéde par les termes conuenables, & qu'on de doute point que le Pape ne donne l'absolution. Que si on n'y apporte empeschement ou retardement de delà, l'absolution est toute certaine & asseuree. C'est iustement la response qu'il me fit au premier point. Au second, de faire la guerre aux Huguenots, & de renouer aux alliances d'Angleterre, & autres telles; il me respondit, que le Pape vouldoit en general toutes choses qui estoient pour rouirner à l'honneur & gloire de Dieu. Et si en France on pouoit extirper les heresies par guerre, ou autrement, il en

seroit tres-aïse, mais s'il ne se pouuoit faire, la Sainteté ne demandoit iamais choses impossibles, & se contenteroit tousiours de ce qui se pourroit faire. Qu'il me disoit le mesme pour le regard des alliâces & eöfederatiöns.

Autroisieme, du Concile, Bearn, & Prince de Condé, il me respondit qu'à la verité il s'estoit autrefois parlé de ces trois choses là: mais que ç'auoit esté seulement en discourant ce qui seroit bon de faire: mais qu'on n'en estoit iamais venu iusques là, qu'il fallust absolument que ces choses precedassent l'absolution, & que si elles n'estoient prealablement faites on ne vous la donneroit point. Qu'il seroit tres-bon qu'elles precedassent, si faire se pouuoit, ains seroit meilleur qu'elles fussent desia faites, comme il auoit esté dit vne fois que V.M. auoit donné ordre à ce qui concernoit ledit Prince de Condé: & seroit chose de trop grand preiudice, & vn trop mauuais presage, si V.M. permettoit que celuy qu'elle tient pour le plus habile à luy succeder quant à present, fust esleué en l'heresie. Mais si lesd. trois choses, ou quelqu'une d'icelles, ne pouuoient preceder, il faudroit se contenter qu'elles suiussent. Quand ces Seigneurs que V.M. enuoyera seroient icy, on verroit ce qui se pourroit faire, ou non; & que le Pape se contenteroit tousiours de toutes choses raisonnables & possibles, & n'obligeroit iamais personne à chose qui ne se peut faire.

Au quatriesme, du traité avec le Roy d'Espagne, & avec ce qui restoit de la Ligne, il dit qu'il n'estoit besoin de m'y faire aucune responce, puis que i'en estois demeuré satisfait es audiences precedentes.

Au cinquiesme & dernier poinct, touchant la rehabilitation, il me respondit que ce point concernoit l'autorité du S. Siege, & estoit de plus profonde consideration, qu'il ne m'en pouuoit parler si hardimét comme des autres. Que se trouuant vne priuation enuoyee du S. Siege, il sembloit donc qu'il y fallust vne rehabilitation, autrement que ce seroit obliquement nier l'auctorité du S. Siege, qu'on disoit vouloir recognoistre. Qu'il scauoit bien qu'en telles choses les Princes & leurs Conseillers auoient des maximes qui ne respondoient pas tousiours au respect qui se deuoit au S. Siege. Que si la rehabilitation se deuoit donner, & vous estoit necessaire, V.M. ne deuoit faire difficulté de la prendre: que si elle ne se deuoit prendre par V.M. le Pape ne deuoit pretendre de la vous donner. Quand ceux qu'on vouloit enuoyer seroient icy, on verroit ce qui se deuroit ou ne se deuroit point faire, & la Sainteté entendroit tousiours la raison tant d'un costé que d'autre. Et ny en ce poinct ny en aucun autre il ne voudroit sinö ce qui seroit raisonnable, & de la façon qu'il se deuoit faire. Qu'en telles difficultez il se trouuoit mille téperamens, & ne pensoit pas que ce poinct fust pour accrocher ny retarder l'affaire non plus que les autres. Que le Pape feroit tout ce qu'il pourroit faire avec l'honneur de Dieu, & avec la dignité du saint Siege. Ce sont, *SIRE*, les responses que ledit sieur Cardinal Aldobrandin me fit à chacun des poincts, & en tout ce que ie viens de vous dire il n'y a pas vn mot de plus. Ie puis bien auoir oublié quelque chose, mais ie n'ay mis vn seul mot qu'il ne m'aye dit, comme aussi n'ay-je fait en toute ma lettre du 22. Decembre, qui vous rend compte de l'audience que i'auois eüe du Pape, & dudit sieur Cardinal. Apres qu'il m'eut ainsi respondu à chacun poinct, il me dit qu'il auoit parlé tout de mesme

que i'auois dit vouloir faire à luy, véritablement & rondement, & comme il croyoit estre de l'intention du Pape. Qu'au reste il ne luy plairait point trop que le penitent voulust enter en paction avec le confesseur. Je luy dis qu'on ne pensoit à cela: & comme ie luy auois dit, & comme il pouuoit auoir obserué, il estoit aduenü par cas fortuit que i'auois esté contrainct m'ouurir à luy de ceste chose. Il me repliqua, qu'outre cela il auoit encores égard à la malignité du temps, qui engendroit diuers doutes, scrupules & soupçons es esprits des homes, & mesmemet en vn affaire si fort trauersé & agité come cestuy-cy; qu'aussi ne trouuoit-il pas mauuais que V. M. regardast aucunement à quelque reputation du mode: mais qu'il falloit encores qu'elle considerast qu'il estoit raisonnable que le Pape & le S. Siege considerast la sienne, & ce tant plus que la dignité Pôtificalle estoit spirituelle, & la royale, temporelle: & que l'autorité d'un Roy estoit comprise en un royaume, où celle d'un Vicaire de Ies. Christ s'estendoit par toute la Chrestienté. Qu'il estimoit qu'il n'y auoit rien de mieux seant ny de plus cōuenable à l'affaire dont il s'agissoit, ny qui l'abregeast & facilitast d'auantage que l'humilité. Quand V. M. s'estudieroit à faire non seulement les choses qui sont de précepte, mais aussi celles qui sont de conseil, ce seroit le plus court chemin pour paruenir là où vous desirez, & de rendre vaines toutes les detractions & trauerses de ceux qui vous sont contraires. Qu'il croyoit bien qu'il se faisoit de mauuais offices de delà, & icy, mais sa Sainteté scauoit bien les interets & passions des homes, & les mauuais offices ne pourroient rien enuers elle. Qu'il desiroit qu'il en fust autant du costé de V. M. Que ces longueurs & retardemens d'enuoyer, & de faire le reste qui se deuoit, ne pouuoient toutner à profit, ny à plaisir, sinon de ceux qui ne vouloient point la conjunction du S. Siege, & de la Couronne de France.

Sur ce, apres que ie luy eus monstré de demeurer fort satisfait de ses responses, ie luy dis que ie retournerois par deuers luy, pour scauoir si apres qu'il auroit parlé au Pape, il auroit à me commander quelqu'autre chose. Il me respondit, que s'il en estoit besoin il me le feroit scauoir. Je luy repliquay, que tousiours faudroit-il que ie retournaisse vers luy pour auoir la lettre qu'il vouloit escrire à Messieurs le Cardinal de Gondy. Il me dit que le malin Pape retardoit un peu ceste lettre, & que ie retournaisse apres le premier iour de l'an. Et sur ce il se leua de sa chaire, en me disant que s'il ne m'auoit satisfait en tout ce que i'eusse desiré, que i'excusasse son aage. Je luy dis que ie voyois en luy verifié ce que disoit vn ancien, que le cours de la vertu estoit plus viste que celui de l'aage, & qu'il estoit vn de ceux en qui la vertu auoit deuiaté les ans. M'adjousta encores apres celà, qu'il m'auoit respondü sur le champ: Et ie luy dis que quand il y auroit pensé vn mois, ie ne voyois pas qu'il m'eust seu respondre plus sagement, ny plus raisonnablement; que pour mon regard j'en demeuerois grâdemment consolé & edifié, & croyois que V. M. prendroit aussi le tout à grâde cōsolation & contentement. Et ainsi, Sans, tout ce propos d'une matiere difficile & chatouilleuse, & de poincts si sensés, se passa avec autant de douceur, qu'auoit peu faire le plus facile & equitab le sujet du monde. De façon que ie ne me puis repentir de la facon que i'ay faict d'auoir pris la hardiesse de parler de ces subtils choses sans commander, si en entens que V. M. pour quelqu'un

me occasion que ie ne puis deuiner, l'aye desagreable. Auquel cas, & en tout autre, ie la supplie tres-humblement qu'il luy plaise me pardonner.

Au demeurant, j'ay entendu que ledit iour de Vendredy & autres, recedens, ledit sieur Cardinal auoit esté longuement en conseil avec Messieurs les Cardinaux Toletto & Morosin séparément, & ay opinion que c'estoit pour ces choses cy, partie desquelles ledit sieur Cardinal Aldobrandin auoit odoré sur les lettres de Monsieur le Cardinal de Gondy, partie sur autres venuës de Florence. Ainsi ie ne suis retourné que ce iourd'huy apres dîner, pour luy demander la lettre pour Monsieur le Cardinal de Gondy, & pour sçauoir s'il auoit à me commander quelque autre chose outre ce qu'il me dit dernièrement. Et quant à la lettre, il m'a dit qu'elle estoit faite; mais que le Pape luy auoit dit qu'il y vouloit encores donner vne œillade: & qu'à cause de la goutte que sa Sainteté auoit encores en vne main, il ne la luy auoit point montrée. Et quant au reste, il n'auoit autre chose à me dire, sinon que le Pape auoit la meilleure volonté qu'on sçauoit desirer par delà, si on en vouloit vser. Je luy ay dit qu'il se pouoit asseurer qu'on en vouloit vser, & qu'on en vseroit. Il a repliqué qu'on estoit entré en nouuelle défiance sans cause, & que possible le voyage du seigneur Jean François l'auroit accruë: Je luy ay dit que cela pourroit estre, luy allant en vn lieu d'où sont venus tant de maux à la France, & vers vn Prince qui s'estoit montré si ennemy de la personne de vostre Majesté, & tout le sang royal de France. Alors il m'a dit, qu'il me vouloit dire en confiance que le seigneur Jean François alloit pour les choses de Hongrie, afin de pouruoir à la grande nécessité en laquelle la Chrestienté se trouuoit. Que sa Sainteté estoit le moins interessé que Pape qui fut iamais: qu'il y en pouoit auoir eu d'aussi saints & plus que luy; mais de moins interessez, non. Et que par delà on deuoit auoir ceste maxime, qu'où qu'il enuoye & quoy qu'il face, il ne vied à aucun interest particulier, & refere tout à la gloire de Dieu, & au bien commun de la Chrestienté, & n'en prendre point de défiance ny ombre aucune. En somme, SIRE, ie voy que ceux qui veulent oster le soupçon & la crainte aux autres, ont grand peur eux-mesmes, & croy que le premier qui les aduertira du partement de vos Ambassadeurs, les osterà d'une grande peine & soucy. Et cela mesmes qui leur fait craindre à present, fera qu'ils se rendront plus traittables en la negociation, quand vos Ambassadeurs seront icy, & qu'ils ne les lairront iamais aller sans ce pourquoy ils y seront venus. Et avec ce bon augure ie finiray la presente, en priant Dieu, SIRE, vous donner, &c. De Rome ce Mardy 4. iour de Ianuier, 1595.

## A MONSIEUR DE VILLEROY.

### VI.

**M**ONSEIGNEUR, Les trois lettres que j'escriis au Roy sur la Médépêche que sa Majesté me fit le 9. Nôuembre, requeroient d'estre escrites en chiffre, mais il m'eust fallu vn bon mois pour chacune. Vous



voyez ceste petite lettre en laquelle i'ay acoustumé d'escrire, combien elle est alienee des caracteres de chiffre, à chacune desquelles il me faudroit deliberer. Je ne dis pas pourtant que ie n'escriue en chiffre cy-apres ce qui sera necessaire: mais ie vous supplie tres-humblement de me pardonner pour ceste fois, par laquelle ie me suis dispensé avec plus de cōfiance, pour ce que ceste depesche sera portee par vn homme exprés que le seigneur Girolamo Gondy vous depeschera, comme il s'y est offert, & ie l'en prie. Et quant à vous, Monseigneur, vous ne lairrez, s'il vous plaist, de m'escrire en chiffre tout ce qu'il vous semblera. Par ce que i'escriis au Roy vous verrez pourquoy ie n'ay peu rendre les lettres de sa Majesté à Messieurs Serafin, Lomelin, & Delbene, ny leur communiquer rien de ce qui m'estoit escrit. Je vous supplie donc leur faire escrire d'autres lettres, & dire vn mot du motif à Messieurs les Cardinaux de Gondy & de Neuers, afin qu'ils ne trouuassent mauvais ce que i'ay esté contraint d'en faire, qui a grandement pleu au Pape. Et en fin de compte, il se trouuera qu'il a esté meilleur ainsi pour le seruice du Roy, que ie traitasse secrettement de la part de sa Majesté, & Monsieur Delbene d'autre costé de la part de Monseigneur de Neuers, & Monsieur Lomelin de la part de Monseigneur le Cardinal de Gondy: & par la comparaison que vous ferez des responses faites par le Pape & Monsieur le Cardinal Aldobrandin à nous trois séparément, vous puissiez voir plus clair au fonds des intentions de sa Sainteté. Quant à ma negociation, vous pourrez voir que la hardiesse ne m'a manqué non plus que la fidelité, & au reste en quoy ie pourrois auoir failly, i'espere en demeurer excusé enuers le Roy, & enuers vous, Monseigneur, qui m'avez fait honorer par sa Majesté de ses commandemens, comme vous fistes par le feu Roy apres le decté de feu Monseigneur de Foix. De quoy, & de tant d'autres faueurs qu'il vous a plu me faire, & qu'il vous plaist m'offrir encores à l'aduenir, ie vous rends en mon cœur toute la gratitude dont vne bonne ame est capable, & m'efforceray toute ma vie de le reconnoître enuers vous & les vostres par tres-humble seruice.

Je suis attendant l'aduis qu'il vous plaira me donner de la reception de celles que ie vous escriuis les 5. & 6. de Decembre, qui estoient bien longues, & quasi toutes sur le sujet de celle du 10. de Nouembre, à laquelle vous respondes par la vostre du 16. Decembre. Sur le contenu de laquelle ie vous diray briueuement, que ie loué grandement la defiance qu'il vous plaist me signifier du voyage du seigneur Jean François Aldobrandin, & pouruoyance dont vous y voulez vsér. En n'y a rien qui soit plus de mon humeur, que prendre tousiours les choses au pis, & ne commettre à la fortune rien où la prudence puisse arriuer. Et mesmes ie croy qu'une des causes du desplaisir qu'on a icy du retardement de Monsieur du Perron, est, que lors que l'on fit partir ledit seigneur Jean François, on pensoit que ledit sieur du Perron fust ja par les chemins, comme il en fut ja bruit, & s'attendoit-on que selon ce qu'il rapporteroit de vos quartiers, & selon la docilité qu'on y trouueroit pour les choses que l'on luy proposeroit icy, on escriroit d'icy audit sieur Jean François en Espagne, de demander & de conclurre cecy ou celz, de plusieurs cordes qu'on peut auoir en l'art, pour tirer selon la posture en laquelle on verra sa Majesté. Toutefois quand ie

confidere

considere la necessite de la Chrestienté en cet assaut du Turc, & le soupçon & crainte qu'on a icy, & le peu de moyen & d'esperance qu'on a de depos-  
 seder le Roy, & le naturel du Pape, qui n'est pas d'entreprendre choses im-  
 possibles, & le grand interest que sa Sainteté & le S. Siege d'ailleurs a de  
 ne point perdre l'obeissance de la France, ie n'estime point que ce soit tout  
 fable ny finesse ce qu'on a dit & discouru du desir que le Pape auoit de  
 moyenner vne paix ou troise entre ces deux Couronnés. Dequoy il s'est  
 tant laissé entendre luy-mesme depuis l'entree du Roy à Paris, qu'il vous a  
 contrains vous-mesmes de desà à escrire par deçà que n'en vouliez ouïr  
 parler en sorte du monde, si premierement l'absolution n'estoit donnee.  
 Et ne fandra sa Sainteté non plus à vous inuiter à la guerre cōtre le Turc  
 en temps & lieu, comme il s'en est desà laissé entendre quelque chose à  
 vns & autres, ne le pouuant faire pour encores directement, iusques apres  
 la reconciliation du Roy avec le S. Siege. Et quant à ceste reconciliation,  
 & absolution, quoy que le sieur de Maluaisie aye dit, ie ne reuoque rien  
 de ce que j'ay deduit par ma lettre du 23. iour. Lequel Maluaisie a dit  
 qu'il croyoit, ou ce qu'il pésoit deuoit estre agreable, & pouuoit tenir lieu  
 de quelque chose, à ceux qui demandoient forces & argent. Mais en ma-  
 dite lettre j'ay dit ce qui est, & ce que vous voyez & oyez tousiours par de-  
 là, qui est de telle importace au S. Siege, que si au lieu de Maluaisie le Pape  
 mesme (pour ainsi parler) auoit dit qu'il ne donneroit point l'absolution,  
 ie ne voudrois laisser de croire qu'il soit pour la donner, le Roy durant en  
 sa prosperité, & faisant de son costé ce qu'il doit, comme il veut faire, & à  
 sa Sainteté demeurant le sens commun seulement, sans les vertus & gra-  
 ces que nous deuons presupposer en vn Pape. Je tiens bien encores, com-  
 me j'ay tenu tousiours auparavant, qu'on ne la donnera pas volontiers, &  
 que si on pouoit faire de moins, on ne la donneroit iamais: mais ie croy  
 neanmoins qu'on la donnera, non pour l'amour de nous, mais pour l'a-  
 mour d'eux-mesmes, & du saint Siege. J'ay grand'enuie de dire à Mon-  
 sieur le Cardinal Aldobrandin ce que ledit Maluaisie a dit, & croy que ie  
 m'y refoudray. Quelqu'un a écrit de Paris, qu'un des trois Ambassadeurs  
 qui deuoient venir, seroit Monsieur de Maille, sur quoy, encores que ce-  
 la ne responde point à ce qu'on m'a fait dire au Pape, j'ay pensé de vous  
 dire que comme ie le tiens pour vn tres-digne personnage, aussi luy a-on  
 fait icy de tres-mauuais offices pendant qu'il a esté à Venise, & n'est point  
 par deçà en la bonne conception que ses vertus & sa pieté meritent, que  
 principalement ceste premiere deputation requeroit. Le gentil-homme  
 de Monsieur le Cardinal de Loyeuse de retour à Gennes, où est à present  
 ledit Cardinal, a écrit par deçà que Monsieur de la Cliche partit de Paris  
 le 10. Nouembre pour venir à Rome, où on l'enuoyoit pour s'esclaircir de  
 certaines choses. Ce qui a augmenté les soupçons de Pile: & le bruit a cou-  
 ru par Rome, qu'on enuoyoit au Pape pour pactionner avec sa Sainteté.  
 Mais j'ay dit à Monsieur le Cardinal Aldobrandin, que ie pensois & ose-  
 rois affeurer que le sieur de la Cliche ne vient point à Rome, & que vous  
 m'en auriez fait quelque peu de mentiō en vos lettres des 3. & 16. Decem-  
 bre. Quant aux autres, ie ne leur ay point leuē l'opinion de sa venue, mais  
 bien de telle charge. Ains me suis seruy du bruit de ladite venue, pour cou-

urir, & tenir d'autant plus secrette ma negociation, & pour me deliurer de plusieurs demandes indiscrettes & impertinentes que d'ancuns me faisoient, lesquels i'ay tous remis à quand ledit seigneur de la Chelle seroit icy, & qu'on auroit veu ce qu'il apporteroit.

Je vous auois escrit ce que dessus ce matin, & ceste apres-disnee i'ay esté vers M<sup>o</sup>sieur le Cardinal Aldobrandin, pour la lettre qui doit aller à M<sup>o</sup>sieur le Cardinal de Gondi, avec deliberation, s'il retardoit encores à me la donner, de luy dire ce que Monsieur Maluaise auoit dit que le Pape ne receuroit point le Roy, & le reste de l'article qui concerne Rome en la lettre surprise qui alloit à Monsieur de Mayenne. Ce que i'ay fait sans luy en rien celer; qui a esté vn autre trait hardy. Je le scauois bien, & en auois long temps deliberé en moy-mesme: mais en fin ie m'y suis resolu, & ne m'en repens point: parce que outre qu'il n'en est succedé aucun mal, ie l'ay fait à plusieurs bonnes fins. La premiere & la plus proche, afin de leur donner tant plus d'occasion d'entrer en quelque promesse ou declaration plus ample & plus expresse, en la lettre qu'ils vouloient escrire à Monsieur le Cardinal de Gondi, & que vous eussiez ceste assurance de plus, outre ce qu'on m'auoit dit de bouche. La seconde, afin de leur faire voir que si par delà vous auiez des soupçons & desiances au temps de la depesche du 9. Nouembre, que les causes vous en estoient encores augmentees, par la surprise de ces lettres qui estoient du mesme mois de Nouembre: & qu'il ne falloit point imputer telles desiances à ceux qui escriuent de Rome en France, comme on les soupçonne, & comme il a esté escrit mesme de France, ny au Roy, ou à son conseil; mais aux ministres mesmes du Pape, desquels on peut presumer qu'en telles choses ils scachent les volontez & intentions de sa Sainteté. La troisieme, afin que si pour quelque occasion le Roy n'en-uoyoit si tost les Ambassadeurs, ils l'imputent à eux & aux leurs mesmes, qui au mesme temps que sa Sainteté enuoye vn Ambassade si signalee vers le plus grand ennemy que la France aye, disent d'un autre costé que sa Sainteté ne recevra point le Roy, ains donnera forces & moyens aux rebelles de sa Majesté, quand l'Espagnol aura sur la frontiere de Prouence vne armée aussi puissante & aussi grosse comme le Duc de Sesse luy a promise. La quatrieme, afin qu'ils instruisent mieulx leurs ministres, & s'ils ont bonne intention, leur defendent de tenir tels propos, qui entretiennent les subjects du Roy en leur rebellion, & fomentent les Espagnols en leurs pratiques & menees. La cinquieme, à fin de leur donner à cognoistre à eux-mesmes, que le Roy a les mains longues, & voit & oit de fort loing, & que s'ils ne marchent droit en son affaire eux-mesmes, sa Majesté le pourra scauoir, & pouruoirra à ses affaires sans eux. La sixieme & la derniere, afin de leur monstrier confiance de ma part, en choses qui d'ailleurs ne pouuoient à mon aduis nuire au serulce du Roy, & luy profiter en tant de façons, & d'estre tant plustost creu d'eux quand ie leur diray la verité, & autres choses qui seront pour le bien dudit saint Siege, & pour le seruice de sa Majesté, comme ie n'ay & n'auray iamais intention de les tromper, ny de faire ou dire rien qui soit à leur preiudice: laquelle bonne conscience me rend aussi plus hardy en leur endroit. Ledit seigneur Cardinal Aldobrandin a aussi pris le tout en fort bonne parr, & m<sup>o</sup>stre m'en scauoir gré;

& ce reste m'a dit purement quant à ce qui concernoit la lettre qu'on disoit auoir esté escrete à Maluaisie, qu'il voudroit en auoir la minure, ne pouuât point se souuenir precisément des paroles dont il auoit vsé, & qu'il pouuoit bien estre qu'il eust escript que nostre S. Pere n'approuuoit point le proceder des ministres du Roy d'Espagne à l'endroit du Duc de Mayéne, duquel lesdits Espagnols monstrent se vouloir seruir, & neantmoins ils l'offençent en plusieurs façons. Qu'il pouuoit aussi encores estre qu'il y eust cela, que led. Maluaisie fit bon office au Duc de Mayenne, lequel estoit reduit en vn estat qui pouuoit faire compassion encores à d'autres qu'au Pape, lequel m'auoit dit à moy-mesme, qu'il ne pouuoit manquer de le recommander au Roy mesme. Que par l'article mesme que ie luy auois leu, il se voyoit qu'on refusoit forces & argêt au Duc de Mayenne : de façon qu'on n'auoit pas par là grande occasion de trouuer mauuais le reste que cestuy-là disoit auoir veu en la lettre de luy Cardinal qui parloit. Quant à ce que Maluaisie pouuoit auoir dit de foy, le Pape n'en pouuoit mais. Que luy Cardinal scauoit bien que telles choses ne luy auoient iamais esté escrites; & que si ie voulois voir dedans le registre des lettres qui auoyent esté escrites and. Maluaisie depuis 6. mois, il s'offroit de le bailler. Que ce n'estoit la premiere faute que ledit Maluaisie auoit faite; qu'il en auoit fait encores d'autres, & enuers d'autres : & possible vouloit-il à cause de cela monstrier de pencher à present de leur costé. Que les ministres des Princes font quelques fois bien de lourdes fautes, & disent des choses qui sont du tout esloignées de l'intention de leurs Princes, comme estoit ceste chose icy de l'intention du Pape, qui vouloit donner l'absolution, & la donneroit quand le Roy feroit de son costé ce qu'il deuroit. Qu'il desiroit qu'on ne creust point à telles choses : mais qu'on s'arrestast à ce que le Pape disoit ou faisoit dire. C'est ce qu'il m'a respondu en tout. Et quant à la lettre pour Monsieur la Cardinal de Gondy, il s'est encores excusé sur l'indisposition du Pape, & m'a dit que ie l'aurois apres demain. Cependant ie ne lairray d'acheuer la presente, pour fin de laquelle ie prie Dieu qu'il vous doint, Monseigneur, &c. De Rome ce Dimanche 11. Ianuier 1595.

Depuis la presente escrete, j'ay estimé deuoir escrire à Messieurs le Cardinal de Gondy & Duc de Neuers, sur la secretesse dont i'ay esté contraint d'vsar: aussi bien auois-je à respôdre à des lettres que i'auois receuës d'eux. Je mettray avec la presente les lettres que ie leur escriis, & les enuoyeray à cachet volant, afin qu'il vous plaise passer l'œil par dessus.

## A V R O Y.

## VIL.

SIRE,

Si eusse enuoyé à V. M. la responce à la dépesche qu'il vous plent me faire de S. Germain en Laye le 9. Novembre, si on m'eust baillé icy la lettre pour Monsieur le Cardinal de Gondy, qu'on me promit dès le commen-

cement, & qu'on m'a toujours fait attendre. Je retournay hier apres-dinner vers Monsieur le Cardinal Aldobrandin pour l'avoir, & il me dit qu'il le seroit presté ce iour d'huy; & me demanda si ie voulois parler au Pape qui avoit commencé à donner audience. Je luy dis que ie n'avois autre chose à dire à sa Sainteté, si luy Cardinal ne me commandoit d'y parler. Il me dit qu'encores que le Pape ne luy en eust rien dit, il trouvoit neantmoins bon que ie veisse sa Sainteté, si elle ne me voudroit rien commander. Je luy dis donc que j'irois tres-volontiers, & luy baisois tres-humblement les mains de ce bon conseil, & si il luy sembloit j'irois en partant d'avec luy. Il me dit que le Pape ayant tenu consistoire le matin, & n'estant encores bien remis de son indisposition, il seroit bon de différer iusques à ce iour d'huy apres dîner; & que cependant il auroit parlé au Maistre de chambre, afin que j'eusse tant plustost audience. Je m'en retournay bien aise d'avoir occasion de tirer du Pape encore quelque chose de plus, & avec quelque opinion que c'estoit luy-mesme qui avoit voulu que ie retournasse vers luy pour me dire quelque chose d'avantage. Toutesfois ie croy à present que s'il y a pensé, ce n'esté que pour me donner ceste satisfaction de plus; car il ne m'a pas dit grand'chose, encores que du commencement ie l'en aye mis en chemin, luy disant qu'y ayant vn mois que j'avois eu audience de sa Sainteté, & s'estant passé plusieurs choses depuis, j'estois venu par devers elle, pour sçavoir si elle me voudroit commander quelque autre chose, avant que ie fermasse mon paquet, qui n'attendoit plus rien que la lettre pour Monsieur le Cardinal de Gondy, & ses commandemens. Il m'a respondu qu'il n'avoit autre chose à me dire, sinon à me confirmer ce qu'il m'avoit dit dernièrement, & que luy ne pouvoit vous escrire, pour les raisons qu'il m'avoit dites: Que le Cardinal Aldobrandin me bailleroit la lettre adressante au Cardinal de Gondy. Qu'au demeurant si l'on faisoit par delà ce qu'on devoit, on trouvoit que l'Eglise Romaine est mere & non marastre, & ne ferme son giron à personne. Et pour ce qu'il ne disoit rien plus, apres que ie l'eus assuré de la bonne volonté de V. M. & du devoir auquel elle se veut mettre, ie luy ay dit que ces iours passez pendant son indisposition il m'estoit venu occasion, & quasi necessité de dire à Monsieur le Cardinal Aldobrandin certaines choses de grande importance. Et sur cela, sans attendre que j'eusse acheminé, & craignant possible que ie ne voulusse encores les luy dire à luy-mesme, il m'a dit qu'il les avoit entendus. Et moy incontinent ay adiousté, que ie n'en voulois plus importuner ses oreilles, tenant ce que j'avois dit à Monsieur le Cardinal son neveu, comme si ie l'avois dit à sa Sainteté mesme, & les responses aussi que m'avoit faites ledit sieur Cardinal, comme si sa Sainteté mesme me les avoit faites de bouche; & il m'a répondu par deux fois *C'est è, C'est è*, il est ainsi, il est ainsi: & j'ay esté encores plus aise que parauant, de luy avoir par ce moyen fait ratifier les responses que ledit seigneur Cardinal me fit, quand ie luy dis tous les doutes & scrupules que V. M. & son Coseil avoient, laquelle ratification ie m'estois aussi proposée avant que partir de mon logis, pour le sçavoir le plus certain de l'audience à laquelle j'allois.

En sortant du Pape ie suis allé vers Monsieur le Cardinal Aldobrandin pour avoir lad. lettre, qui m'a dit qu'il me l'envoyeroit demain au matin

sans faulx; tout aussi tost que ie l'auray ie fermeray mon paquet, & l'en-  
uoyeray au sieur Girolamo Gondy. Ledit seigneur Cardinal m'a demandé  
ce que j'auois fait avec le Pape, & comme i'estois content, & si ie voulois  
luy rien commander de plus (car c'est ainsi qu'il parloit à chacun) desquel-  
les demandes i'ay respondu la verité, & ce que i'ay pensé estre de la ciuili-  
té requise, & du respect & reuerence qui est deuë à sa dignité, & au lieu  
qu'il tient auprès de nostre saint Pere le Pape. A tant, ie prie Dieu, &c.  
De Rome ce 12. Ianuier 1595.

## A MONSIEVR DE VILLEROY.

## VIII.

**M**ONSEIGNEVR, La nouuelle de l'accident suruenu au Roy  
le 27. Decembre, arriua à Rome leudy au matin 19. de ce mois,  
par la voye de Venise & de Florence, & causa vn grand espouuement  
& horreur aux bons François, & grâde indignation à tous les gens de bien  
de quelque nation qu'ils fussent, & donna matiere de parler & discourir à  
toute sorte de gens; & mesme sur ce qu'il fut par mesme moyen publié que  
le traistre auoit esté suborné & instigué par vn Iesuite son Regent, appelé  
le Pere Guignard: dequoy toute Rome fremissoit & fremit encores. Le  
Vendredy 20. au soir à vne heure de nuict ie receus vostre lettre dud. iour  
27. Decembre, avec le memoire duquel vous me commandiez faire part au  
Pape. Mais pource que sa Sainteté & toute Rome en estoit desia aduer-  
tie, & qu'on luy auoit desia parlé dud. Pere Guignard, duquel n'estoit rien  
porté par ledit memoire, ie fus en quelque pensément de n'en parler point  
du tout, & laisser dire aux autres, qui ne disoient rien de pis quant à la san-  
té du Roy, & cependant asseuroient d'autres choses que ie ne pouuois as-  
fermer, ausquelles neantmoins, pour l'emprisonnement qu'on disoit auoir  
esté fait des Iesuites, ie ne voulois point deroger, n'en disant moins que les  
autres. Toutesfois apres y auoir bien pensé & repensé, il me sembla qu'il y  
auoit quelque bien à en donner aduis au Pape de la part du Roy, & quel-  
que moyen aussi de ne diminuer rien pour cela de ce qui auoit esté dit &  
escri par d'autres. Par ainsi, apres auoir traduit en Italien ledit memoire,  
ie m'en allay Dimanche 22. l'apres-disnée à Monsieur le Cardinal Aldo-  
brandin, auquel ie dis que j'auois reccu vne lettre de vous escrete inconti-  
nent apres la blessure du Roy, avec vn memoire qui en auoit à l'heure  
mesme esté enuoyé par tout le Royaume, pour inforimer chacun de la ve-  
rité, & pouruoir à ce qu'on ne fust surpris par quelque faux bruit, & qu'il  
nes'en ensuiuiust aucune nouueauté. Que vous me commandiez de la part  
de sa Majesté d'en rendre compte au Pape: mais pource que ladite lettre  
& memoire estoient venus trop tard, & auoient esté escripts auant qu'il y  
eust rien de descouuert des complices de cet assassinat, & que sa Sainteté  
en scauoit desia plus que ie ne luy en pouuois dire, j'auois esté en termes  
de ne venir pas mesmes vers luy Cardinal, tant s'en falloit que ie voulusse

aller au Pape. Que toutesfois ie m'estois en fin resolu de venir vers luy, & luy porter vne copie en Italien dudit memoire, à ces deux fins. L'une, à ce que le Pape & luy sceussent qu'à l'instant mesme que le Roy auoit pensé estre tué, & enuoyoit par tout son Royaume pour la conseruation de ses villes & sujets en son obeysance, il s'estoit souuenu de Rome, & auoit voulu commander expressement qu'il fust rendu compte à sa Saincteté de cet accident. Que ie ne scauois combien, ny si cela seroit estimé d'autres: mais quant à moy ie faisois grand cas de ce que le Roy en ceste heure là, & en ce grand tumulte, & en ceste necessité & haste de pouruoir aux villes & à tous ses bons subjects, eust eu ceste souuenance, & le soin d'ordonner que nostre saint Pere en fust aduerty par mesme moyen. L'autre fin estoit, à ce que si le Pape sur ceste oecurrence auoit à me commander quelque chose que ie peusse escrire par delà pour la conseruation de sa Majesté, sa Saincteté en eust d'autant plus d'occasion & de moyen. C'est ce que ie dis du commencement audit Seigneur Cardinal Aldobrandin: lequel apres auoir escouté le tout bien attentiuement, leur ledit memoire en Italien: & puis me respondit que i'auois bien fait d'y estre allé, & qu'il recognoissoit qu'à la verité c'estoit chose de grande consideration, que le Roy en vn tel accident, & en l'instant mesmes auquel il falloit penser de donner ordre à tant de choses, se fust souuenu du Pape, & que cela monstroient deuotion vers le saint Siege. Au demeurant, que le fait auoit grandement dépleu à sa Saincteté, & à luy qui parloit, & à toute la Cour, & mesmement qu'il fust aduent en vn temps auquel il se parloit d'enuoyer par deça pour l'absolution. Que de telles entreprises n'en pouuoit arriuer sinon que du mal: mais il falloit que le Roy en tirast ce bien, que de recognoistre ce bien que Dieu luy faisoit de le preseruer, pour luy donner temps & moyen de se reconcilier avec le saint Siege, & de sauuer son ame: & que cela luy denoit seruir d'ocasion & d'admonition d'enuoyer d'autant plustost, & de s'humilier d'autant plus vers le saint Siege, & mesmes d'autant qu'apres auoir obtenu l'absolution, toutes ces conspirations & attentats cesseroient. Apres que ie l'eus tres-humblement remercié de sa bõne responce, ie commençay à luy repliquer par là où il auoit acheué, & luy dis qu'à la verité ceux qui estoient les principaux & premiers auteurs de ces assassinats, n'auroient point apres l'absolution si grande commodité de corrompre des hommes, pour les rendre ministres & instrumens de leur meschance, encorcs qu'alors mesmes ils ne laisseroient de calomnier le Roy, en disant que le Pape auoit esté trompé en luy. Mais quant à la volonté de procurer la mort du Roy, elle leur augmenteroit apres l'absolution, tant s'en faut qu'elle leur diminuast. Et tant meilleur Catholique il seroit, tant plus ils luy porteroient de haine, & chercheroient de l'enuoyer en l'autre monde: comme il se voyoit qu'à present qu'il est Catholique, ils se montrent plus aspres & plus acharnez qu'ils ne faisoient auant sa conuersion, monstrant euidentement qu'ils ne croient ny au Pape, ny en Iesus Christ. Qu'au demeurant il m'auoit dit tres-sagement & tres-sainctement, que de tels attentats il n'en pouuoit aduenir rien de bon. Car à vn Prince conuertý à la Religion Catholique, qu'il falloit conforter & edifier en toutes façons, c'estoit luy donner grand scandale & degoust des Catholiques, quand on

qui se disoient estre le soustien de la Religion Catholique, cherchoient ainsi de le faire assassiner: là où s'il y auoit aucun lieu de tels assassins, ce seroit aux Heretiques à les pourchasser ou executer, qu'il a quittez & abandonnez, & qui auroient à se craindre de luy. Et toutesfois ils n'ont rien attenté de tel, ny contre luy, ny contre aucun des cinq Roys ses predecesseurs, quelque boucherie que leurs Majestez ayent fait desdits Huguenots. Que si l'effect que l'on desiroit d'un tel assassinat s'en fust ensuiuy, c'eust encores esté pis. Et non seulement le Royaume en eust esté ruiné pour iamais: mais aussi il en fust aduenue vne perte irreparable & ruine à la Religion Catholique, & au saint Siege, tant au spirituel qu'au temporel. Ce que ie luy fis toucher au doigt, par un brief discours que ie luy fis de la multiplie des partis qui eussent esté en France, & de ce qui s'en fust necessairement ensuiuy: & me recogneut que tout ce que ie luy venois de dire estoit vray: Et puis pource que le General des Iesuites auoit eu audience de luy immediatement auant moy, il me parla des Iesuites, me disant que s'il se trouuoit quelcun de coupable, qu'il seroit raisonnable de le punir: mais de se préder à tout l'Ordre pour la faute d'un ou de deux, il n'y auoit point de raison. Le luy dis que le nonnoire que ie luy auois donné, & qu'il auoit leu, auoit esté fait incontinent apres la blesseure du Roy, & qu'on ne scauoit encores rien des complices de cet assassinat; & partant ie ne luy en pouuois rien dire, & ne voulois aussi parler de ce que ie ne scauois point. Aussi m'en teus-je de propos delibéré, pour ne consumer point ce qui sera mieux dit & mieux pris quand sa Majesté commandera d'en parler sur ce qui aura esté trouué & iugé desdits complices. Sur la fin en prenant congé de luy, ie luy dis que ie retournerois pour scauoir s'il me voudroit commander quelque chose apres qu'il auroit parlé au Pape; Il me dit, que s'il auoit quelque chose à me dire il me le feroit scauoir: & depuis ie n'en ay point ouy parler. A tant, &c. Monseigneur, &c. De Rome, ce 25. Ianuier 1595.

## A MONSIEVR DE VILLEROY.

## IX.

**M**ONSEIGNEVR, Ceste lettre m'est demeurée en main avec vne autre que ie vous escriuis le lendemain, iusques à ce iourd'huy 28. du mesme mois au soir, sur lequel Monsieur le Cardinal Aldobrandin m'a enuoyé querir, & dit qu'il auoit referé au Pape ce que ie luy auois dit sur le sujet cy-dessus, & ce qu'il m'y auoit respondy, & que sa Sainteté luy auoit dit que si ie voulois parler à elle, j'y pouuois aller pour entendre plus amplement son intention d'elle-mesme. Je ne faudray donc d'y aller demain, ou pres demain, & puis vous donner aduis de tout ce qui s'y sera passé. Cependant j'vsferay de la commodité de ce courrier, & enuoyeray la presente avec l'autre au sieur Girolamo Gondy, pour les faire tenir à la premiere commodité. De Rome ce 28. Ianuier 1595.



## A MONSIEUR DE VILLEROY.

## X.

**M**ONSEIGNEUR, Par vn proscrit du 28. de ce mois, que i'ad-  
moustay à la lettre que ie vous auois escrite le 25. vous auez veu com-  
me ledit iour 28. Monsieur le Cardinal Aldobrandin m'auoit comme in-  
uité d'aller parler au Pape. I'y allay donc dès le lendemain 29. & n'ayant  
pû auoit audience, i'y retournay hier 30. & dis à sa Saincteté que ces iours  
passez ayant receu lettres de vous touchant l'accident suruenu au Roy en  
Paris le 27. Decembre, & commandement d'en rendre compte à sa Sain-  
cteté, le m'estois neantmoins contenté de le dire à Monsieur le Cardinal  
Aldobrandin, pource que ledit aduis m'estoit venu tard, entré que sa Sain-  
cteté le scauoit desia; & pource aussi que ledit aduis ayant esté escrit Incon-  
tinent apres la blessure du Roy, il contenoit encores moins que d'autres  
aduis qui auoient esté mandez depuis: Que mondit seigneur le Cardinal  
son neveu m'y auoit respondu, de façon que j'en estois demeuré grande-  
ment edifié, & esperois que par delà on feroit encores consolé & content.  
Ce nonobstant j'auois pensé pour plus grande satisfaction du Roy, & de  
vous tous, de venir encores aux pieds de sa Saincteté, non pour luy dire le  
frict qu'il scauoit desia; mais pour voir comme le Roy en la mesme heure  
qu'il auoit esté blessé, & qu'il enuoyoit par tout son Royaume, s'estoit sou-  
uenu de Rome, & auoit expressement commandé d'en rendre compte à sa  
Saincteté; il plairoit aussi à sadite Saincteté correspondante à la deuotion  
du Roy, me commander de sa propre bouche quelque chose que ie peusse  
escrire par delà, pour la conseruation de sa Majesté.

Nostredit sainct Pere, tout aussi tost que ie commençay à luy parler, jet-  
tay vn grand soupir du profond de son cœur, & se mit à pleurer: & apres  
que j'eus acheué ce peu de mots, me dit quasi les mesmes choses que m'a-  
uoit dit Monsieur le Cardinal Aldobrandin: & mesmement qu'il auoit esté  
tres-marry de ce qui estoit aduenü; & que s'il pouuoit remedier à tels des-  
ordres avec son propre sang, il ne l'espargneroit. Que le Roy deuoit re-  
mercier Dieu, & le louer de ce qu'il l'auoit preserué, & prendre de là occa-  
sion de le seruir d'autant mieux, & de faire aussi iustix en toutes autres  
choses à l'aduenir. Apres cela il me dit, qu'il estoit aussi tres-marry d'vn  
Arrest qu'auoit donné la Cour de Parlement, par lequel il se voyoit que le  
mal-faicteur n'auoit rien dit qui eust chargé les besuices du cas particulier;  
& neantmoins lad. Cour chassoit ses Peres de tout le Royaume, & defen-  
doit mesmes sur peine de crimine leze Majesté à tous François, d'aller  
où leurs leçons hors le Royaume. Et depuis lad. Cour auoit déclaré here-  
tique cette proposition; Que le Prince ne deuoit estre receu & reconnu s'il n'a-  
uoit l'absolution du saint Siège. Voyez, dis-il, (me nommant par mes nom) si  
c'est le moyen d'accorder les choses, comme nous desirons, & comme  
elles estoient tres-bien ardemment. Et puis me mis à soupirer, & demor-  
re

requ'il en estoit marry infiniment, sans au reste laisser sortir de sa bouche aucune parole plus aigre que cela. Je ne pensay point d'entrer en defense de la Cour, ny en accusation des Iesuites, tant pource que ie ne scauois que c'estoit dudit Arrest, que pource aussi qu'en ces commenceiens que les douleurs sont encores crues & sanglantes, on ne prend pas si facilement la raison en payement, comme apres que ces premieres inpetuositez sont rallenties. Et luy dis seulement que ie ne scauois rien de cet Arrest, ny combien falloit croire à l'aduis qu'on en auoit donné à sa Sainteté. Il me dit que l'aduis estoit vray, & que ledit Arrest auoit esté donné le 29. Decembre, & que ledit Cardinal Aldobrandin en auoit vne copie, & me la monstroit: Je luy dis que la Cour de Parlement ne souloit en ce temps là entrer qu'apres les Roys. Il me respondit tres-bien, qu'en vn cas si extraordinaire que cestuy-cy elle seroit entree.

Je luy recognus que ie ne faisois plus de difficulté quant au temps: mais ie le priay de ne croire pas tout ce qu'on luy pouuoit auoir dit, & attendre qu'il en fust venu aduis de la part du Roy, comme ie tenois sans doute qu'il en viendrait: & s'il y auoit eu quelque Arrest, sa Sainteté trouueroit en fin qu'une compagnie si grande, signamment si honorable & si Catholique comme estoit la Cour de Parlement, n'auroit fait rien d'injuste, ny mal à propos, & moins auroit ordonné chose qui fust estra l'auctorité du saint Siège, & de sa Sainteté. Et en tout cas, quand elle auroit excédé quelque chose, comme il estoit mal-aisé d'exceder contre vn cas si horrible & de tel danger à tout le Royaume & à toute la Chrestienté, ce ne seroit point la faulte du Roy, qui ne laisseroit aussi pour cela d'enuoyer ses Ambassadeurs, & faire avec sa Sainteté toute autre chose qui seroit de son deuoir. Et ne repliqua sinon que ces deux mots, *Dix le vaill.* De là ie m'en allay à l'appartement de Monsieur le Cardinal Aldobrandin, que ie ne trouuy point chez luy, & y estant retourné ce iourd'huy, & luy ayant dit ce peu qui s'estoit passé en l'audience que i'auois eue du Pape, il ne m'a rien parlé touchant ladite clause de l'Arrest que le Pape m'auoit dit auoir esté declaré heretique par la Cour de Parlement. Mais il m'a parlé seulement des Iesuites, me disant que de chasser ainsi tout vn Ordre hors du Royaume, seroit vn trop grand scandale, & en France, & aux nations estrangeres, & mesmement aux temps que l'on pouloit de se reconseiller avec le saint Siège, & d'obtenir l'absolution du passé. Que ces Peres auoient seruy beaucoup à la conseruation de la Religion Catholique, & par tout où ils estoient esté, le seruice diuin y auoit esté maintenu & conserué. Que tels Ordres estoient des soutiens de la Religion, le saint Siège seroit contraint de prendre la protection & de fandre de ses membres. Que si quelque desordres estoit aduenu, il estoit raisonnable qu'il fust puny, mais de chasser tout vn Religion pour le peché d'un ou de peu, il ne seroit trouué bon de personnes. Que toutesfoiz il recognoistroit qu'on ne pouuoit point encores bien asseurer la verité des choses, encor que les aduis y estoient, & qu'il auoit vne copie de l'Arrest qui en disoit auoir esté donné, mais qu'il estoit possible qu'il se fust fait erreur de ce qui seroit esorté de cela, & s'esmerueillant mesmes de ce que Monsieur le Cardinal de Gendy n'en auoit rien dit. Et luy disant en ce temps là Monsieur le Cardinal Aldobrandin m'a dit. Et l'ay

touſiours demeuré ferme à ne vouloir entrer en conteſtation juſques à ce que i'euffe leu la copie de l'Arreſt, & qu'il fuſt venu quelque aduſ de voſtre part: & luy ay repliqué ſeulement en termes généraux conformément à ce que i'auois dit au Pape, & l'ay loſſé de ſon équité & moderation, en uſ qu'il trouuoit raſſonnable ( auant que iuger de ces choſes ) d'attendre ce qu'on eſcriroit de delà, & comment tout y ſeroit paſſé à la verité.

En ſortant du Palais i'ay trouué l'Auditeur d'un Cardinal qui auoit la copie dudit Arreſt en François, & cherchoit quelqu'un qui le luy expliquaſt en Italien pour le traduire à ſon maître, à qui Monſieur le Cardinal Aldobrandin l'auoit preſté. Je luy ay fait ce plaſiſir, & l'ay receu moy-mesme, & ay cependant remarqué la clause dont le Pape m'auoit parlé, laquelle eſt conceüe vn peu autrement, en ces trois termes: *Que le Roy Henry III. à preſent regnant n'eſt en l'Egliſe, inſques à ce qu'il ait l'approbation du Pape.* Sur quoy me ſont venues ces conſiderations que ie diray aux plus prochains pour les faire courir. Premierement, qu'on ne peut aſſurer que les copies qu'on monſtre, reſpondent en tout au vray original de l'Arreſt, elles ayans eſté produites par perſonnes intereſſées, paſſionnées & ennemies. Secondement, quand lad. propoſition ſeroit conceüe auſd. termes, on pourroit encores dire que ces mots de l'Arreſt qui ſont plus bas, *Et condamnez comme heretiques par les ſaincts Docteurs*, ne ſe referent point à lad. propoſition, ains à la precedente, *Qu'il eſt permis de courir les Roys.* Entroïſieme lieu, quand ils s'y refereroient encores, que la condamnation que la Cour en fait ſe pourroit ſouteſtenir, parce qu'il ſe peut bien faire en quelque façon qu'un homme qui aura eſté excommunié pour vn cas reſerué au S. Siege ſoit en l'Egliſe, ſans auoir l'approbation du Pape: & au contraire qu'un homme ait l'approbation du Pape, & neantmoins qu'il demeure excommunié enuers Dieu, Auquel propos ie viens tout maintenant de me reſaiſſir la meſmoire d'une Decretale du Pape Innocent III. en laquelle il dit que le iugement de Dieu eſt touſiours fondé ſur la verité, laquelle ne trompe ny n'eſt trompée, mais le iugement de l'Egliſe ſuit quelquefois l'opinion, laquelle trompe ſouuent & eſt trompée. Ce qui ſe doit entendre des ſaincts iugemens particuliers des hommes en particulier: car c'eſt choſe générale qui appartient à la foy & c's morurs, l'Egliſe n'eſt point. Et pour ce eſt le meſme Pape auſd. lieu: Il acquint quelquefois que celui qui eſt lié enuers Dieu, eſt abſous enuers l'Egliſe: & que celui qui eſt libre enuers Dieu eſt lié par ſentence de l'Egliſe. Auſſi viens-je de lire vn Canon pris de S. Hieroſme, qui dit que quelquefois celui qui eſt enuoÿé dehors par ceux qui commandent en l'Egliſe, eſt dedans, & celui qui eſt dehors, qu'il ſemble eſtre retenu dedans. Lesquels paſſages, ſans pour ceſſe nous nous allet de l'abſolution donnee à S. Denis, ſe peuvent appliquer très-bien au ſuſcit d'un Prince conuerty, qui par leſpace de quatre ans en vain recherché le Pape de luy vouloir enſeigner & ordonner les moyens qu'il doit tenir en ſa correction, à laquelle il eſtoit reſolu: & le Pape n'en ayant tenu compte, & luy ne voulant ny ne deuant plus long temps demeurer en erreur, y a renoncé publiquement, & fait profeſſion de la Religion Catholique en la façon que luy ont enſeigné les Prelats de France au reſus du Pape, & encores depuis a recherché & recherché encores à pouſſer l'approbation & l'abſolution de

la Sainteté. Et s'y pouvoient lesdits passages appliquer d'autant plus que lad. Decretale passant outre, dit que celui qui s'est humilié, tant d'obeyer au mandement de l'Eglise, & en qui ont précédé signes de pénitence, il doit estre estimé absous envers Dieu, encores qu'il ne le soit point envers l'Eglise, laquelle en tel cas le doit absoudre mesmes apres sa mort, si elle ne l'a fait en sa vie. En quatriesme lieu, quand la Cour auroit voulu dire ce que les Espagnols crient: ce n'est point chose de quoy il faille aujourdhuy tant s'esmerveiller & crier, puis que lad. Cour, & la Sorbonne, & quasiment le Clergé, Noblesse, & villes de France font profession d'obeyr au Roy, & de le tenir pour Catholique, encores que le Pape ait refusé de l'accepter. Que s'il y auoit du mal il seroit en lad. profession, dont ceste condamnation n'est qu'une consequence. Et la Cour, faisant ce qu'elle & le reste de la France fait, ne pouvoit iuger ny dire autrement. En cinquiesme lieu, si eust trouué vn malheureux qui a bien osé attaquer de near le Roy, & de soustenir encores son execrable attente sous le pretexte d'une telle proposition, la Cour pour obvier à tels inconveniens & ruines qui pourroient arriver tous les iours par le moyen d'autres de mesme forge, a esté en nécessité d'en condamner lad. proposition, & mesmes d'exceder, en vn peril si eminent de la ruine de l'Estat, de la Religion, & iustice, ordre & police de toutes bonnes choses en iceluy. Les Espagnols & leurs adherents ont fait, & font vn grand vacarme de cet Arrest. Les autres en parlent diuersement selon la variété de leurs dispositions, humeurs, opinions & affections. Quant au Pape, il n'en pouvoit parler plus modestement qu'il a fait à moy. Et à mon aduis on fera plus sagement & vtilement icy, d'interpreter ainsi benignement, & prendre en bonne part le dire de la Cour, que non pas se fantasier sur mesmes vne iniure faite par lad. Cour au S. Siege, & se mettre en nécessité d'en demander réparation, & en danger plus que certain de ne l'avoir jamais, & de mettre leur autorité en dispute & en compromis, d'y laisser de leur reputation, & accroistre & corroborer de plus en plus le schisme, qui n'est desia que trop aduancé. A tant, j'attédrai ce qu'il vous plaira me commander là-dessus, & prieray Dieu qu'il vous donne, Monseigneur, &c. De Rome ce 31. Ianvier, 1595.

A V R O Y.

XL

SIRE,  
Par trois lettres que j'ay escrites à Monsieur de Villeroy des 25. 26. & 31. de Ianier, & enuoyées à N. pour les luy faire tenir, sur le memoire qu'il m'auoit enuoyé le 27. Decembre, ie luy ay rendu compte de ce que j'auois negocié, & estimé deoir faire sur le contenu dudit memoire, dont ie ne fuy point icy de retour. Le 5. de ce mois à vne heure de nuict ie reçeus vne duplicata de la deposche qu'il m'euat à V. M. me faire le 9. Ianvier, avec laquelle de Monsieur de Villeroy du 24. Et m'ayant semblé, apres auoir

bien considéré lad. dépêche qu'elle ne contenoit rien qui pout iustement  
 offenser le Pape, ains que le tout y estoit si bien, que ie n'en deuois point  
 perdre vn seul mot en parlant à luy; ie reselut en moy mesme que lors  
 que l'aurois audiee, ie le supplerois de la vouloir oïr lire. Et encores que  
 ce ne soit chose accoustumee, ny qui se doïus faire aisement, & laquelle ie  
 voudrois faire moins que tout autre, si est-ce que pour ceste fois, & l'anster  
 à consequence, j'estimay le deuoir faire ainsi, non seulement pour n'ou  
 blier rien d'une dépêche si importante, si iustifiée, & si bien faite; mais  
 aussi pour estre mieux creu du Pape quand il verroit dequoy, & pour luy  
 ôster tout soupçon, que j'y adioustaie rien de mien, & que le fusse poussé  
 de quelque mauuaise affection que ie portasse aux Iesuites: & aussi donner  
 moins de prise à ceux, qui ayans l'audace de faire assassiner les Roys sous  
 pretexte de pieté, & de vouloir encores faire passer en doctrine & sectes  
 telles enormitez, pourroient aussi bien par mesme zele se prendre à perse  
 cuter icy vos bons & fideles subiects, & seruitours, quand ce ne seroit que  
 pour nous ôster le moyen de rendre à vostre Majesté le tres-humble &  
 tres-fidele seruice que nous vous deuons. Et d'autant que le iour suiuant  
 estoit le Lundy gras, ie pensay qu'il ne seroit aisé d'auoir audience du Pa  
 pe: & voulant neantmoins que la Sainteté fust au plustost aduertie du  
 complot que V. M. luy auoit voulu rendre, ie m'en allay ledit iour de Lun  
 dy 5. de ce mois vers Monsieur le Cardinal Aldobrandin, en deliberation  
 de luy dire à luy aussi ladite dépêche, pour les mesmes considerations: &  
 luy dis que suiuant ce que i'auois predict au Pape & à luy, V. M. auoit escrit,  
 & me commandoit de rendre compte à sa Sainteté & à luy de ce qui s'e  
 stoit passé sur l'accident venu à V. M. le 27. Decembre, & touchant l'Ar  
 rest de la Cour de Parlement qui s'en estoit ensuiuy. Que d'aller au Pape  
 en ces iours là, i'auois pensé ne le deuoir point faire, ains venir vers luy  
 pour ceste heure-là, & puis aller à sa Sainteté en autre temps plus oppor  
 tun, si luy Cardinal en estoit d'aduis. Mais d'autant qu'on s'estoit efforcé  
 de rendre icy ceste chose fort odieuse pour vn regard, & qu'en France elle  
 estoit encores plus odieuse pour vn autre, & que ie voulois eulx qu'on  
 peust dire en France que l'eusse omis de remonstrer rien de tout ce qu'on  
 vouloit estre remontré, ny icy me calomnier que j'y eusse rien adjousté de  
 mien, ie le suppliois de vouloir oïr lire la dépêche de V. M. Il me respon  
 dit qu'il l'oïroit bien volontiers. Et apres que ie luy eus monstré la datte,  
 & le seing de V. M. & le contreseing de Monsieur de Villeroy, ie luy leus  
 toute ladite dépêche de mot à mot sur le François original, avec vn ton  
 qui n'estoit rien de la vigueur de la lettre. Il l'escouta fort attentiuement  
 sans mot dire, sinon que sur la fin de la seconde page, là où V. M. dit qu'el  
 le ne doute point que ses ennemis ne s'efforcent de faire trouuer mauuais  
 de ce que l'on s'est pris à tout l'Ordre ensemble, sans s'arrester à punir les  
 particuliers qui ont esté trouuez coupables, qu'il dit seigneur Cardinal dit  
 que c'estoit cela voirement qu'on trouuoit mauuais: & ie luy dis qu'il or  
 roit la response incommodant apens laquelle oïre, & trouuer la lettre acheuée  
 de lire, il demeura esbahy sans pouoir rien dire, sinon qu'il confessa inge  
 nuement qu'il ne pouoit répondre sur le champ à vne lettre si gracie, & de  
 telle importance, & qu'il y falloit penser bien loüable le respect de V. M.

vers le saint Siège, & le soin de tenir sa Sainteté aduertye & informée de telles choses : & puis me demandâ si ie luy voudrois bailler vn extrait de ledite lettre pour soulagement de sa memoire. Je n'en fis point de difficulté pour ceste fois, & sans aussi tirer à conséquence en autres choses; & luy respondis que s'il luy plaisoit ie luy traduirois tout ce qui parloit du fait principal, & luy en bailleerois la traduction entiere. Il dit qu'un extrait sommaire suffiroit, lequel ie luy fis pour le Mardy au matin, tel que ie n'y oubliay rien de ce qui appartenoit à la iustificacion de ce qui auoit esté fait, ny à l'apprehension que ie voulois que le Pape eüst de la conséquence & des maux qui estoient pour ensuiure, si la Sainteté n'y appliquoit bien tost le remede necessaire, comme V. M. le met sur la fin de ce propos. Depuis, ie laissay passer ledit iour de Mardy gras, & le Mercredi des Cendres, auquel le Pape va à sainte Sabine, & le Ieudy qui estoit la feste de la coronation de sa Sainteté: & auant que vouloir aller au Pape, ie retournay le Vendredy 10. vers ledit sieur Cardinal, pour sçauoir s'il luy plaisoit me commander quelque chose sur la lettre que ie luy auois leuë dernièrement, & sur l'extrait que ie luy en auois donné; Il me dit qu'il n'auoit rien à me dire pour encores, & ce d'autant plus que ie luy auois dit que ie voulois parler au Pape. Je luy repliquay que ie n'affectois nullement de parler au Pape, & meismement puis que sa Sainteté auoit esté par luy informée de vne voix & par escrit: outre que tout ce que ie luy disois à luy, ie le tenois comme dit au Pape, & neantmoins s'il luy sembloit j'irois vers sa Sainteté. Il me dit que ie ferois bien d'y aller: & qu'apres cela on verroit de faire la response, & que ie laissasse passer le lendemain Samedi, qui estoit iour fort occupé d'audiëces, & y allasse le Dimanche ou Lundy.

I'y allay dès le Dimanche, & y retournay le Lundy: mais ie ne pûs auoir audiëce iusques au Mardy. Et pour ce que i'y allois plus pour ouyr ce qu'il me voudroit dire, que pour parler moy-mesme, ie ne luy dis du commencement autre chose, sinon que i'auois dernièrement leu à Monsieur le Cardinal Aldobrandin la lettre que j'auois eüe de V. M. sur l'accident aduenü à vostre personne le 27. Decembre, & sur l'Arrest de la Cour de Parlement du 19. & ledit seigneur Cardinal m'en ayant demandé vn extrait, ie le luy auois donné. Que ie ne pensois point estre besoin & decent de donner à sa Sainteté la peine d'ouïr de nouueau les mesmes choses, combien que i'auois porté avec moy la lettre, si sa Sainteté la vouloit ouïr lire: mais que i'estois venu seulement pour sçauoir ce qu'il luy plairoit me respondre, & commander là dessus. Il me dit qu'il en auoit ouy le rapport que luy en auoit fait le Cardinal, & ven l'extrait que ie luy en auois donné. Que cet accident luy auoit déplu infiniment, & en auoit senty vne extrême douleur en son coeur, non seulement pour le fait en soy, mais aussi pour la personne, vers laquelle il n'auoit eu iamais aucune mauuaise affection. Qu'il auoit bien hay l'erreur, mais la personne non: ains auoit prié & prioit Dieu qu'il luy inspirast la verité, & tous bons conseils, & toutes bonnes actions, Qu'il luy auoit encores déplu, parce qu'incontinent qu'il entendit que ces-là luy auoit esté escolier des Iesuites, il pensa bien qu'on pourroit faire quelques raisons contre eux, attendu l'animosité que quelques-vns avoient jectée en leur endroit: mais qu'il n'eust iamais pensé qu'on fust

venu à vne telle exorbitance que de chasser tout l'Ordre du Royaume. Que de se prendre aux coupables, bien : & si contre les coupables on en eust eu quelques vns de suspects, on le luy devoit offrir : & il les eust fait vuidier de là. Que l'on auoit esperé que V. M. modereroit la rigueur de la Cour, & feroit surseoir l'exécution de l'Arrest. Que outre les merites de cet Ordre quant au general de l'Eglise ; il estoit luy-mesme témoin des bons offices qu'ils auoient faits en l'affaire particuliere de vostre réconciliation avec le saint Siege, & entr'autres le Pere Commolet qui estoit icy, & que c'estoit vne espee d'ingratitude de chasser ainsi indifferenment tous ceux de cet Ordre. Qu'il se disoit encores qu'on vouloit chasser les Capucins tout de mesme. Qu'il n'eust point aussi iamais pensé qu'on eust condamné pour heretique ceste proposition, qu'il ne falloit vous obeir iniques à ce que vous eussiez l'approbation du saint Siege. Et d'autant qu'il fit icy vne pose, j'eus occasion de parler : mais pource que ie m'estois proposé de n'entrer en contestation avec la Saincteté, & que telle m'auoit dit les susd. choses sans monstrer aucune colere ny aigreur, & aussi amiablement que la matiere le pouuoit caporter : le luy dis seulement que j'auois ja dit à Monsieur le Cardinal Aldobrandin qu'au fait des Iesuites ie n'y voulois rien mettre du mien : mais que la lettre de V. M. & l'extrait aussi, auoient preneu l'obiection qu'on pouuoit faire de ce qu'on s'estoit prins à tout l'Ordre, & y auoient respondu suffisamment ; & que telles rigueurs n'estoient sans exemples & anciens & modernes, que ie laissois, pour ne l'ennuyer point. Que la mesme lettre & extrait rendoit aussi les raisons pourquoy V. M. auoit esté contrainte de souffrir l'exécution de l'Arrest. Que des Capucins ie n'en auois point qu'y parler, & ne la croyois point. Quant à la proposition, quelle estoit en l'Arrest vn peu autrement qu'on ne luy auoit referé. Et apres la luy auoir dite en la façon qu'elle est couchée en l'Arrest, ieta schay à l'adoucir par vne equitable & benigne interpretation, employant les quatre dernieres raisons qui sont portées par la lettre que i'escriuis à Monsieur de Villeroy le dernier de Ianuier. Et en fin ie luy dis qu'un desordre en ameneroit vn autre, voire plusieurs ; & que ceux qui en tel assassinat mettoient le nom de la Saincteté, luy faisoient vn grand desseruice & au saint Siege. Il ne me repliqua rien à ce que dessus : mais me dit que ce n'estoit pas en cela seulement, mais aussi en autres choses qu'il se voyoit que vous n'estiez point bien conseillé ; & qu'en la declaration faite sur l'accord de Monsieur de Guyse on y disoit que les prouisions des benefices faites par les Legats & par le Pape demeureroient nulles, & que l'on en prendroit prouision de V. M. Je respondis que quant aux Legats ie ne m'en esmerueillois point, ated du qu'il y auoit ja vn Arrest de la Cour de Parlement : mais pour le regard de la Saincteté, il faudroit que ie visse l'article pour en respondre, & que ie ne me pouuois imaginer comme cela seroit aduenü ; scachant bien que nos Roys és benefices eleués ont bien droit de nomination, mais ils ne pretendent point d'en faire les prouisions : & és collatifs ils ne pretendent point de collation, ny de nomination. Il me dit que ie visse l'article, & que ie trouuerois qu'il s'y parloit de prouision. Je respondis que ie le venrois, & qu'en tout euement i'aurois esté vn coup de plume qui seroit allé de travers, dont V. M. ne pouuoit mais,

non plus que la Saincteté si en la dacterie il estoit eschapé un mot pour au-  
 antre outre que le diluorç qui estoit entre le S. Siege & ceste Couronne do-  
 noit occasion à plusieurs desordres, qui ne cesseroient iamais que par vne  
 bonne reconciliation entr'eux deux. Apres cela, comme la Saincteté auoit  
 cōmentcé par propos doux & gracieux, aussi voulut elle finir de mesme, &  
 me dit que possible se resoudroit-elle d'escrire à M. le Cardinal de Gondy:  
 que cependant il me vouloit dire que pour tout cela il n'auoit point changé  
 de volōté; qu'il n'est de là ce qu'on deuoit, & que de son costé il ne faud-  
 roit point à faire ce qui seroit de son denois: qu'il desiroit de tout son  
 cœur la cōseruation, le repos, & la grandeur de la France. Qu'il scauoir &  
 recognoissoit que ceste Couronne auoit tousiours esté le bras droit de l'E-  
 glise & du S. Siege. Que Dieu luy estoit tesmoin de sa bōne affectiō enuers  
 ce Royaume; & combien de prières il auoit faites & faisoit à sa diuine bōté;  
 & combien de larmes il en auoit espanduës, & espandoit ordinairement.  
 Que V. M. deuoit faire son profit de la grace que Dieu vous auoit faite de  
 vous preseruer de tant de dangers, & penser que ceux qui prodiguēt ainsi  
 leur vie pour auoir la vostre, ne le font point pour esperance d'aucun bien  
 temporel, duquel ils scauent biē qu'ils ne pourront iouir apres leur mort;  
 & que c'est zele de Religion qui les pousse, & l'opinion qu'ils ont d'estre  
 par ce moyen santez en l'autre monde. Que vous n'ayiez moyen de fer-  
 mer ceste porte, que par vostre reconciliation avec le S. Siege; & que tout  
 aussitost que vous seriez reconcilié, toutes ces choses cesseroient de façon  
 que quand vous ne vous mouuiez point par cōscience, vous deuriiez vous  
 mouoir par la cōseruation de vostre personne, & par raison d'estat, &  
 pour tout autre interest temporel: & pour fin de son propos tourna à dire  
 qu'il desiroit à la France tout repos & tout bien. Et posant la main à sa teste  
 & levant son bonnet à moitié, dit que les choses estans accommodees, il  
 estoit peut faire voir au monde, si Dieu luy en presentoit l'occasiō, qu'il n'y  
 eut iamais Pape qui voulast plus de bien à la France que luy. Il y auoit quel-  
 que chose à ce que dessus à quoy i'eusse peu repliquer, comme le fis à Mon-  
 sieur le Cardinal Aldobrandin en semblable propos: mais i'eusse commis  
 vne trop grande indiscretion apres des propos si amiables; & me conten-  
 tay de luy dire que l'on seroit grandement consolé & content par delà de  
 la declaration si expresse qu'il luy faisoit faire de sa bonne volōté, & que  
 ie la suppliois de se souuenir aussi avec combien d'instance, & par combié  
 de personnes, & combien de temps M. M. auoit recherché la bonne grace  
 de la Saincteté, & la reconciliation de la Couronne avec le saint Siege: &  
 croire que V. M. persueueroit tousiours au mesme desir, & ne faudroit  
 d'enuoyer, & de faire toutes autres choses qui seroient de son deuoir, &  
 que la bonté, generosité, valeur & bon-heur de V. M. me faisoient encores  
 esperer de plus, que venant occasion le saint Siege & sa Saincteté estoient  
 pour en receuoir autant de support, secours & seruice, que d'aucun autre  
 Roy de France qui iamais eust esté.

Hier Mercredi 15. de ce mois ie fust trouuer Monsieur le Cardinal Al-  
 dobrandin, lequel aduertty desia de l'audiēce que i'auois eue le iour aupar-  
 auant, & de ce que le Pape m'auoit dit, me dit qu'il ne scauoir qu'adjou-  
 ster à ce que sa Saincteté m'auoit dit. Qu'il escriroit par le commande-



ment de sa Sainteté une lettre à Monsieur le Cardinal de Gondy, & croyois encores que sa Sainteté luy escriroit un brief, & possible encores un autre à Monsieur de Nevers, & qu'il m'enverroit le tout pour la satisfaction. J'ay veu l'article dont le Pape m'auoit parlé, qui est le 7. de la déclaration faite par V. M. sur la réunion de Monsieur de Guyse: lequel article à la verité est conçu en termes que pour le regard du Pape ne se peussent soutenir icy, & ne respondent point aux droicts & costumes que j'ay tousiours veu garder en France; ny à la poursuite que V. M. fait icy, & aux propos que par son commandement ie tiens à Sainteté. En cherchant ledit lieu, j'ay trouué tout au premier article de la déclaration comme V. M. defend tres-expressement de ne molester ny inquieter les Ecclesiastiques en la iouissance de leurs benefices, & de tous autres droicts & devoirs qui leur appartiennent. Ce qui m'a fait souvenir & donner hardiesse de supplier V. M. en ce lieu, possible peu convenable, qu'il vous plaise commander que moy, qui auant qu'estre honoré de vos commandemens, & auant vostre aduenement à la Couronne, & avec danger de ma personne vous ay seruy de tout ce que j'ay pu penser, dire, escrire, & faire pour vostre seruice, soist traité comme vn de ceux de la ligue, venus les derniers à vostre obéissance; & interposer vostre autorité de quelque bonne façon enuers le sieur de la Reiniere Gouverneur de Bellesme, qui depuis qu'il est là, quoy que V. M. luy ait escrit par cy devant en ma faveur, n'a cessé de prendre le plus beau & le meilleur du revenu de mon Priuré du vicil Bellesme, & de me faire consommer le reste en reparations & en procez, qu'il m'a sursis pour me contraindre à resigner mon benefice à qui il voudroit, & depuis le mois de Decembre dernier cherché encores de m'oter le siltre de mon Priuré, qu'il m'auoit seul laissé de résistances là, dont j'escris plus amplement à Monsieur de Villeroy, pour raccroître ceste mienne incivilité vers vostre Majesté, à laquelle ie prie Dieu qu'il doint, Si a en parfaite santé, rtes-longue & tres-heureuse vie. De Rome, ce lundy 16. Feurier 1595.

## A MONSIEUR DE VILLEROY.

### XII.

**M**ONSEIGNEUR. Sur la lettre de memoire, qu'il vous plent de m'enuoyer le 27. Decembre, ie vous fis vne dépesche, qui contenoit trois lettres à vous adressées des 23. 26. 30. Januier; lesquelles j'enuoyay au sieur Hierosme de Gondy pour les vous faire tenir: & deprinçipallement celle que vous m'escrivistes le 14. Januier; & fut le duplicata de la dépesche du Roy du 9. du mesme mois de Ianuier, & sur vne autre lettre du 28. Novembre, que ie receus au mesme temps, ie vous fis vne autre dépesche contenant deux lettres, l'une au Roy, l'autre à vous, du 16. Feurier, outre vne autre lettre, & un telap, pour mon particulier, & lequel est sous enuoyé, par le telap, pour que ie vous en ferois un double, & un duplicata de

de ceste dernière depesche. Quant à ladite depesche du Roy dudit iour 9. Ianuier, ie ne l'ay point receüe, ny autre chose depuis ladite vostre du 14. Ianuier, qui accompagnoit le duplicata de lad. depesche du 9. Par ainsi, n'ayant aucune response à vous faire, ie vous escriray les occurrences d'icy, dont la premiere sera que le Pape & tous ceux de ceste Cour, qui ont du sens avec quelque poil de honte, attendent avec bonne deuotion ceux que le Roy doit envoyer, & ont receu vne ioye incroyable quand ils ont entendu par lettres de Lyon du 26. Feurier, & de Paris des 13. 14. 15. & 16. que Monsieur du Perron deuoit partir en bref avec deux autres, desquels on a mesmes nommé vn, à sçauoir Monsieur de Sillery : & ceste ioyeuse nouvelle leur a fait oublier les déplaisirs qu'on auoit receus de l'Arrest donné contre nos Iesuites, & de certaines choses qui s'estoient dites depuis ledit Arrest, de son execution. Mais tant plus grande a esté la ioye du commun, tant plus les Espagnols en ont esté & sont marries. C'estoit l'estat auquel les choses estoient à Rome touchant les affaires, Mais ces iours passez on y a tenu tant de mauvais propos, & fait tant de mauvais offices, que de les vous représenter il seroit impossible, & mesmes en plusieurs endroits, impertinents : Iene feray donc que passer vne partie d'iceux. Vn Vendredy 25. Feurier vindrent nouuelles à l'Ambassadeur d'Espagne & au General des Iesuites, que les Iesuites de Paris auoient vuidé la ville & le Royaume, & estoient arriuez en Lorraine, & qu'enre ceux-là estoit Iean Gueret, qu'on pensoit estre celui qui auoit esté prisonnier, & que luy & le Recteur de leur College de Paris estoient ja arriuez à Milan, s'en venans en ceste ville, où ils arriueront bien tost. Et sur cela fut fait grande clameur en iustification desdits Iesuites, & en blâme de la Cour de Parlemēt & du Roy, & de tout son Conseil, & fut dressé vn escript en Latin, qu'ils firent courir, tel que vous verrez par la copie que ie vous enuoye. Le Ieudy suivant 2. de ce mois, arriuerent en ceste ville lesdits Recteur & Gueret, & l'on recommença à crier plus fort qu'auparauant : & outre & par dessus ledit escript, on dit au Pape & aux Cardinaux, que le bannissement des Iesuites n'estoit que commencement de l'execution d'vne resolution faite & iurée en l'assemblée de Montauban. En mesme temps on assura au Pape, & supposa-t-on des lettres, cōme si elles eussent esté escrites de Reims, que le Duc de Bouillon au Duché de Luxembourg, faisoit saccager toutes les Eglises des lieux où il entroit tant de gré que de force, & se faisoit porter la Custode pour sa part, & fouloit luy-mesme aux pieds les saint Sacrement, prenant cela pour l'vn des plus grands fruiets de ses victoires & conquestes. Et à peu de iours de là on fit encores courir vn nouveau bruit, qu'après les Iesuites on chassoit de toute la France encores tous les Chartreux, tous les Minimes & tous les Capucins : & commençoit-on mesmes à en chasser d'entre les laïques, voire ceux qui auoient toujours tenu pour le Roy, pource qu'ils auoient nom d'estre vn peu plus tollerables Catholiques que les autres, & pour exemple alleguoient Monsieur l'Aduocat Seguier, qu'ils disent auoir esté priuē de son estat, & chassé de Paris, pour auoir esté d'aduis qu'on annullast les prouisions faites par les Legats, ny qu'on chassast les Iesuites. Au bout de cela on adioustoit, qu'on verroit de passer en faueur des Heretiques l'Edit de l'an 1577. lequel ils faisoient cōte-

fois plus ample qu'il n'est : bref que la France s'en alloit quant à la Religion, en pire estat que l'Angleterre.

Pendant que toutes ces choses se broüilloient ainsi, ie fus aduertty par Monsieur le grand Duc, que le Duc de Sauoye estoit apres à obtenir, ou auoit ja obtenu pour soy du Pape les decimes que sa Sainteté deuoit leuer sur l'Estat dudit Duc à l'occasion de la guerre contre le Turc, comme sa Sainteté en leue de tous les Estats d'Italie, pour en aider l'Empereur : & que pour couvrir ce don, la leuee desdites decimes se deuoit faire par le Nonce du Pape, & non par les Officiers dudit Duc. Et estimant ne me deuoir taire en ceste occasion, ie me resous d'en aller parler à Monsieur le Cardinal Aldobrandin le Ieudy 9. de ce mois, & par ce mesme moyen luy parler de quelques vnes desd. choses, afin qu'elles ne fissent impression en l'esprit du Pape, ny dudit Cardinal & d'autres qui sont auprès de sa Sainteté, & qu'ils ne se laissassent aller à faire ny dire chose qui peust empêcher ou retarder la reconciliation du S. Siege & de la Couronne de France, qu'ils desirerent encores plus que nous mesmes. Je luy remonstray donc dès le commencement la fausseté & impertinence de la pretendue resolution en l'assemblée de Montauban, tenuë dix ou douze ans auant cet attentat fait à la personne de sa Majesté, & cinq ou six ans auant la mort du feu Roy, auquel temps on n'auoit peu deuiner les choses futures contingentes, ny penser à faire cet Arrest des Iesuites, ou autres choses semblables. La fausseté aussi & impertinence dudit escrit, en ce qu'il dit que le Preuost de l'Hostel, qui est cognu à Paris plus que nul autre officier public à Rome, aye pensé d'estre pris pour Iean Chastel Parisien, & de fait aye esté pris pour vn Prestre Confesseur, & en plusieurs autres choses que les auteurs dudit escrit, ignorans la texture & les formes de la pratique criminelle de France, ont inuentees de leur teste, & affermees fausement, comme ceux qui scauent lad. pratique le recognoissent aisément. Et ie luy en specifiai quelques particularitez, luy remarquant cependat la bonté & facilité des Iuges, qui auoient ouuert la porte des prisons aussi tost audit Gueret, comme à tout autre : combien que si en Italie ou en Espagne il eust autant esté soupçonné d'auoir entendu à l'assassinat du moindre gentil-homme, il n'en fust sorti de plusieurs annees. Et de fait j'en ay oy icy plusieurs qui se moquoient, & d'autres qui se courrouçoient de ceste facilité.

Quant au Marechal de Bouillon, ie luy dis que si bien il n'estoit point encores Catholique, neantmoins il estoit & auoit esté tousiours des plus moderez de la secte, & n'auoit iamais fait telle chose auant que le Roy eust fait profession de la Religion Catholique, ny lors mesmes que la guerre s'y faisoit contre eux pour la Religion. Qu'il estoit homme de grand entendement, & cognoissoit tres-bien ce qui pouoit profiter & nuire à l'entreprise apres laquelle il estoit. Qui ne vouloit encourir l'indignation du Roy, ny mescontenter les Catholiques qui estoient en son armée, & leur donner occasion de s'en aller & l'abandonner, ny se rendre ses conquestes plus difficiles, en apportant horreur & obstination à ceux du pays où il estoit, qui sont Catholiques. Que ce mensonge estoit exprés inuenté pour rendre odieuse enuers le Pape la guerre offensive que la France auoit esté en luy contrainte de commencer contre les Espagnols, pour embarquer sa Sainté.

Esté en ceste guerre avec eux, comme si elle estoit faite à la Religion Catholique, & non à eux, & rendre implacable le differend qui est aujourdhuy entre le S. Siege & la Couronne de France, & par ce moyen assubiection & afferuir pour iamais les Papes à toutes les passions Espagnoles, sans auoir où recourir. Je ne voulus luy parler des autres choses, attendant qu'il m'en parleroit luy-mesme, & vins à ce pourquoy principalement j'y estois allé: & luy ayant nuement exposé la chose comme ie l'auois entendue, ie luy remonstray comme ledit Duc de Sauoye auoit fait la guerre au Royaume plus qu'au Roy, & pour son profit particulier, non pour le bien de la Religion Catholique, & auoit de gayeté de cœur & sans occasion precedente commencé à démembre la Couronne du vivant du feu Roy, & auant le fait de Blois, & lors que les Estats generaux de France y estoient assemblez, & tousiours depuis auoit continué ses efforts d'enuahyr ou démembre le Royaume. Que cét escorne fait au Roy tres-Chrestien, & au premier Royaume de la Chrestienté, l'auoit rendu odieux à tous les François qui auoient quelque zele à l'honneur & reputation de leur nation, & à la conseruatiō de la Couronne en son entier, & luy auoit encores causé l'enuie de plusieurs Princes estrangers. De façon que de tous ceux qui s'estoient meslez de nos guerres, & qui mesmes auoient mis la main aux fleurons de la Couronne, il n'y en auoit pas vn ( non pas l'Espagnol mesme ) de qui la cause fust si odieuse & dedans & hors la France, comme de ce Prince icy, qui denoit à la bonté de nos quatre derniers Roys defuncts tout ce qu'il auoit en ce monde. Que si en vne guerre si iniuste de sa part, & qu'il s'est fuscitee luy-mesme pour son plaisir, nostre saint Pere venoit à luy donner secours contre ceux qui sont apres à recouurer le leur, ie luy laissois à penser comment cela seroit trouué, en France mesmement, & si ce seroit le moyen d'oster les méfiances du passé, & accommoder les choses, comme on estoit sur le point, & comme ils monstroient eux-mesmes le desirer, & comme tous les gens de bien le souhaittoient, & moy en particulier, qui pour cela principalement auois pris la hardiesse de luy en venir parler: & le suppliois tres-humblement de le remontrer à sa Sainteté, afin que la bonne volonté que ie scauois que le Roy auoit d'enuoyer de nouveau par deçà ne fust refroidie ny retardée.

Ledit seigneur Cardinal me respondit qu'à la verité la rigueur qui auoit esté tenue aux Iesuites auoit grandement dépleu à nostre saint Pere: Qu'il se pouuoit faire aussi qu'eux qui auoient receu dommage & honte, excusassent en parlant de leur fait propre: mais que sa Sainteté, quelque chose qui luy fust dite par qui que ce fust, ne lairroit de donner tousiours lieu à la verité quand elle luy seroit monstree. Que si le Duc de Bouillon faisoit ce qui s'en estoit dit & escrit, ce seroit vne chose par trop horrible, & vn prodige par trop abominable. Que neantmoins de gens heretiques comme toutes choses estoient croyables, aussi pouuoient elles estre inuentees sans qu'elles eussent esté faites. Que le Nonce de par delà n'en auoit rien escrit: mais que le Roy seroit mieux de ne se seruir de telles gens, ny en paix, ny en guerre, que le moins qu'il pourroit. Que depuis que le Roy auoit fait profession de la Religion Catholique, le Duc de Sauoye n'auoit fait ce qu'il luy auoit en uelcun denier du Pape, & n'en auroit à l'adue-

nir, pourueu que du costé de France on rendist au saint Siege le respect qui luy estoit deu. Bien vray est (dit-il) que Sixte V. accorda audit Duc de Sauoye certains subsides sur les Ecclesiastiques de son Estat, & Gregoire XIII. les confirma, & le Pape n'a pu faire moins que de laisser les choses comme il les a trouuees. Or que ceste chose s'appelle subside ou decimes, c'est tousiours la mesme chose : & soit-elle leuée & prise par le Nonce, ou par les Officiers de ce Prince, cela ne change rien non plus en la chose, qui demeure tousiours mesme, sinon qu'on a estimé que les Ecclesiastiques seroient tousiours mieux traictez & soulagez par le Nonce, que par les Officiers d'un Prince seculier. A quoy ledit seigneur Cardinal adiousta sur la fin, que c'estoit la pure verité, & qu'il n'y auoit & n'y auroit autre chose, & que nous fissions de nostre costé ce que nous deuions. Que quant au Pape, sa Sainteté auoit tousiours les bras ouuerts pour nous receuoir & embrasser toutes les fois que nous nous mettrions en nostre deuoir.

Et sur ce propos de deuoir, il me parla desdits Chartreux, Minimes, & Capucins, & me donna occasion de luy respondre que personne n'auoit pensé de les chasser de France, comme il se disoit icy : ains encore que ces Religieux fissent publique profession de ne prier pour le Roy, & de ne le recognoistre pour tel, sa Majesté & son Conseil auoient dissimulé ceste partialité & desobeissance par vn si long temps comme il s'estoit passé depuis sa conuersion, pour le respect qu'on portoit à l'habit, & pour l'esperance qu'on auoit que tout s'accommoderoit par la benedictio de sa Sainteté. Mais quand on auoit veu que sur telle contumace de gens de Religion, & sans attendre la resolution de sa Sainteté, ains contre la bonne inclination que sa Sainteté a monstree & declaree en plusieurs façons, on prenoit opinion, occasion & hardiesse d'assassiner le Roy, d'où s'ensuiuroit la ruine de l'Estat, & de la Religion mesme qu'on prenoit pour pretexte, & de toutes bonnes choses en la France : on n'auoit peu faire de moins que d'admonester ces Religieux à prier Dieu pour le Prince qu'ils voyét estre assisté & favorisé de Dieu, tant en guerre ouuerte, qu'en toutes les embusches qu'on luy auoit dressées, & sous l'autorité & protection duquel ils viuoient en toute seurreté de leurs personnes & biens, & faisoient en toute liberté & avec toute commodité leurs deuotions & contemplations, études, & tout ce qui leur venoit à gré : ou s'ils ne se pouuoient plier à luy rendre ce deuoir & ceste gratitude, & à se conformer à la volonté & prouidence de Dieu, qu'ils cessassent de donner scandale & soupçon d'eux à tout le reste de la France, qui estoit lassée & ruinée de si longues & cruelles guerres, & vouloit meshuy viure en paix & repts, & se retirassent où bon leur sembleroit. Or si aprs cela ils aimoyent mieux s'en aller hors du Royaume, que obtemperer à vne si amiable admonition, & si raisonnable denonciation, ce seroit eux qui se banniroiét d'eux-mesmes, & non le Roy, ny son Conseil, ny sa Iustice. A quoy ledit seigneur Cardinal ne repliqua rien.

Il ne me parla point aussi de l'Edit de l'an 1577. comme de chose de laquelle (à mon aduis) ils ont passée leur duell, ny du reste. Je n'estimay point aussi luy en deuoir parler. Cecy estoit (comme i'ay déjà notté cy-dessus) vn lundy 9. de ce mois, & le lundy suivant 13. ledit seigneur Cardinal m'en uoy appeller, & me dit qu'il auoit rapporté au Pape ce que le luy auoit

dit: & qu'outre ce que luy Cardinal m'auoit respondu de luy-mesme, sa Sainteté luy auoit ordonné de me cōfirmer les mesmes choses de sa patt, & en outre que sa Sainteté auoit commandé au General des Iesuites de pouruoir à ce que ses Religieux n'vissent d'aucune mesdisance ny de traction, & d'enuoyer mesme hors de Rome ces deux qui estoient venus traguores de France. Et de fait i'ay depuis sceu que ledit General les a enuoyez à Frescati, où ils sont à present, en attendant qu'on leur aye assigné quelqu'autre lieu plus loin. Aussi c'est chose vraye que sa Sainteté a depuis permis aux susdits trois Ordres de Chartreux, Minimes & Capucins, de prier Dieu pour le Roy, sans toutesfois leur en bailler rien par escrit: mais elle l'a dit de viue voix à leurs Protecteurs, pour leur faire sçauoir; qui sont le Cardinal Cajetan des Chartreux, le Cardinal Castrucci des Minimes, & le Cardinal de S. Seuerin chef de l'Inquisition des Capucins.

Au demeurant, le 19. de ce mois arriva icy vn courrier d'Espagne, enuoyé par le seigneur Iean François Aldobrandin, qui rendoit compte au Pape comme il estoit arrivé à la Cour d'Espagne le 26. Ianuier, & auoit eu audience le 5. Feurier, laquelle n'auoit esté que de complimens. Et le 12. de ce mois arriva vn autre courrier, qui portoit que ledit seigneur Iean François auoit eu vne seconde audience, & esperoit se dépescher avec vnetroisieme, & que le Roy d'Espagne estoit plus obstiné que iamais à la guerre de France. Il y en a qui disent l'auoir ainsi entendu de la bouche du Pape. Aussi dit-on que par vn courrier que le Pape dépescha dernièrement audit seigneur Iean François, sa Sainteté luy ordonnoit de s'en venir au plus tost, & en alleguent deux raisons. L'une pour ôster le soupçon & l'ombre qu'on estime que ceste Ambassade donne à plusieurs, & mesmement au Roy, qui en pourroit enuoyer d'autre plus tard ses Ambassadeurs par deçà. L'autre, pour enuoyer ledit seigneur Iean François en Hongrie contre le Turc, à la conduite de huit mille hommes de pied & mille à cheual, que sa Sainteté y veut enuoyer, & payer. Et est vray que ledit seigneur Iean François a esté publié pour general des forces à enuoyer en Hongrie, & le Pape l'a ainsi dit à deux Ambassadeurs qu'il y a icy de l'Empereur, appelez l'un, *Laurenzio Madrucci*, l'autre *Adolfo Coraducci*, lesquels en venant ont requis du secours en vne partie des Printes d'Italie, & le second en s'en retournant requerra le reste, demeurant le premier pour Ambassadeur residant près de sa Sainteté.

Encores que le Conestable de Castille Gouverneur de Milan fust ces iours passez party dudit Milan, & eust publié qu'il s'en alloit en Frante; si est-ce qu'on ne croyoit point qu'il deust passer les monts. Toutesfois il est venu aduis qu'il estoit ja au delà de Thurin, & s'en alloit passer le mont Senio. Ce qui a donné occasion icy à ceux qui aiment la France, & qui neantmoins sont exempts de l'imperfection que la plus-part des hommes ont de dire leur aduis des guerres qui se font loin, ausquelles toutesfois ils ne voyent rien, de dire que les François eussent mieux fair d'enuoyer plus de forces en Piedmont, & y tenir occupé ledit Gouverneur de Milan, & autres, sans leur laisser le moyen de passer en France: & quoy que le Roy face & entreprene ailleurs, selon qu'il verra estre plus commode pour son service & pour la grandeur, qu'il ne doit laisser neantmoins d'auoir toujours

en Piedmont vn bon nerf (comme il parlent icy) qui occupe le Duc de Sa-  
uoye & les Espagnols, qui sont plus jaloux de ce pays là & du Duché de  
Milan voisin, que de tout le reste des Estats d'Espagne. De façon que ceux  
d'icy ont opinion qu'un soldat en Piedmont, vaudroit tousiours autant au  
Roy comme dix ailleurs. Et i'ay parlé à homme qui m'a dit auoir ouy dire  
au Duc de Sesse depuis peu de temps, que ce que plus il craignoit, c'estoit  
que les François se ruassent sur le Piedmont, où les choses estoient fort mal  
ordonnees & mal pourueüs. Et cestuy-cy mesme a opinion que c'est pour  
cela que ledit Gouverneur de Milan s'est aduancé de passer les monts, afin  
d'arrester les François & la guerre chez eux, ou le plus loin dud. Piedmont  
& du Milanois que faire se pourroit. A tant, &c. Monseigneur, &c. De  
Rome ce 21. Mars 1595.

## A V R O Y.

## XIII

SIRE,

La dépesche qu'il pleut à vostre Majesté me faire le 8. Mars par le cour-  
rier Valerio, me fut renduë le 30. sur le soir: & le lendemain au matin pour  
ce que le Pape ayant la goutte ne donnoit audience, ie m'en allay à Mon-  
sieur le Cardinal Aldobrandin, & apres luy auoir exposé comme i'auois  
receu lad. dépesche par courrier exprés, & la grande consolation, & con-  
tentement que V. M. auoit receu des bonnes responses qui auoient esté  
enuoyees d'icy, ie luy dis la resolution que V. M. auoit prise d'enuoyer pour  
l'absolution sans plus differer, & d'enuoyer seul Monsieur du Perron, pour  
d'aurant plus vous conformer ausd. volötez & intentions de nostre saint  
Pere, & garder plus d'humilité enuers sa Sainteté, & luy monstret plus  
de fiance, & de faire partir ledit sieur du Perron sans faute pour tout le mois  
de Mars. Ledit seigneur Cardinal monstra estre fort aise de ceste nouuelle,  
& me la fit redire deux ou trois fois, m'interrogeât sur la venue dud. sieur  
du Perron seul, & sur le temps de son partement, & sur la date de lad. dé-  
pesche, & si le courrier auoit esté mandé exprés pour porter ceste nouuel-  
le, encores que dès l'entree ie luy auois dit tout cela de moy-mesme. Mais  
ie voyois qu'il le faisoit tant plus pour l'en asseurer luy-mesme, que pour  
le plus seurement affermer au Pape. Il ne me dit rien touchant la redu-  
ction des trois Ambassadeurs à vn seul: mais i'ay depuis sceu qu'il l'a for-  
louée en parlant à d'autres. Quant au temps du partement il luy sembla  
long, & me dit qu'on ne deuoit point tant tarder, & que pendant ceste di-  
lation il pourroit aduenir quelque détourbier. Adiousta que nostre saint  
Pere estoit disposé à faire toutes choses qui seroient expedientes pour le  
bien de la Religion Catholique, & du Royaume. Dont ie pris occasion de  
luy dire que V. M. aussi de sa part vouloit rendre à sa Sainteté toute la re-  
uerence & obeyssance filiale qui luy estoit due, & faire toutes choses qui  
pourroient tourner à la grandeur & aduantage du saint Siege, mais que  
V. M. estoit tres-bien aduerty des faulx bruits que nos ennemis faisoient

courir de vos intentions, & des mauuais offices qu'ils continuoient à vous  
 faire incessamment aupres de sa Sainteté, & ne doutoit point qu'en ceste  
 occasion ils ne fussent pour troubler & multiplier leurs calomnies &  
 importunité plus que iamais. Et partant V. M. supplioit sa Sainteté de  
 ne croire point à ceux qui par leurs passions particulieres recherchoyent  
 d'apporter empeschement ou retardement à la propre grandeur de sa  
 Sainteté & du saint Siege, & à la seureté, restauration & amplification  
 de la Religion Catholique, & au bien commun de toute la Chrestienté : &  
 s'asseurer que vostre Majesté a & aura tousiours ses intentions conformes  
 à la profession qu'elle a faite de la Religion Catholique, & au deuoir de  
 Roy Tres-Chrestien & Tres-Catholique que vous estes, & voulez estre de  
 cœur & de fait encor plus que de nom toute vostre vie. Ledit seigneur  
 Cardinal m'a respondu, que c'estoiét tous bons & saints propos, & prioit  
 Dieu qu'il vous fist la grace de les effectuer. Qu'il m'auoit dit autre fois, &  
 me disoit encores, que le Pape ne regardoit qu'à l'honneur de Dieu, & au  
 bien de la France, de laquelle il ne desiroit ny villes, ny autres choses, sin on  
 que Dieu y fust bien seruy & honoré, & qu'elle soit en repos, & florissante  
 en toutes sortes de biens. Qu'au demeurant sa Sainteté recognoissoit tres-  
 bien les interests & les passions du monde ; & que nuls mauuais offices ne  
 destourneroiént iamais ses bonnes intentions, ny l'empescheroient d'en-  
 tendre & recevoir la verité quand elle luy seroit remonstree. Apres ceste  
 sienne response, ie luy dis que ie n'auois autre chose à luy dire touchant le  
 Pape : mais qu'il me restoit à luy dire ce qui m'estoit recômandé pour son  
 regard de luy Cardinal. Que lors de la negociation à laquelle ie venois de  
 recevoir la réponse de vostre Majesté, il luy pleust d'offrir pour la reco-  
 ciliation du saint Siege & de la Couronne de France non seulement son  
 vœu & opinion comme Cardinal, & ses bons offices aupres du Pape pour  
 le lieu qu'il y tenoit comme nepueu : mais en tout ce qui seroit en luy, ius-  
 ques à son propre sang, & sa vie, si elle y pouuoit seruir. Que sur ce V. M.  
 m'auoit commandé de luy dire, qu'elle faisoit grande estime de ceste sien-  
 ne courtoisie & faueur, & l'en remercioit de toute son affection, le priant  
 de vouloir continuer, & l'asseurer qu'outre tout le bien qu'en cela il feroit  
 au saint Siege & à toute la Chrestienté, V. M. le recognoistroit enuers  
 luy & enuers tous ceux de sa maison en toutes les occasions qui s'en pre-  
 senteroient ; lesquelles ne manqueroient point, Dieu aidant ; apres que les  
 choses seroient icy accommodees : comme aussi alors V. M. luy represen-  
 toit plus particulièrement, & plus expressément ceste sienne volonté par  
 ses lettres, desquelles pour ceste heure elle auoit estimé ne le deuoir em-  
 pescher. Ledit seigneur Cardinal rougit vn peu en cër endroit ; & me dit  
 qu'il n'auoit rien offert qu'il n'accomplist encores plus volontiers ; & qu'il  
 s'offroit encores de nouueau, desirant de tout son cœur ceste affaire con-  
 duire à la bonne & heureuse fin qu'il s'en promettoit. Et sur ce, auant que  
 partir d'auec luy ie luy demaday si ie ne pouuois pas rendre les lettres que  
 j'auois pour d'autres ; apres qu'il auroit veu les siennes que Monsieur le  
 Cardinal de Gondy luy escriuoit ; & il me dit que ie pourrois les faire ren-  
 dre : ce que ie fis le mesme iour l'apres-disnée ; commençant par celles qui  
 s'adressoient à Messieurs Lomelin & Desbene. Je demaday aussi audit



Seign. Cardinal si le courrier Valerio, qui estoit demeuré à Pise, ne pourroit pas venir, & il me respondit que ouy. C'est tout ce qui se passa pour ceste fois-là avec ledit seigneur Cardinal, ledit iour Vendredy au matin dernier de Mars. Depuis, j'attendis que le Pape se guerist à son aise, n'estimant point que puis que ie luy auois fait sçauoir ma charge par ledit seigneur Cardinal, il fust besoin que ie me hastasse de demander audience. Mais ayant veu que le Ieudy 6. de cemois sa Sainteté auoit tenu la Congregation de l'Inquisition, & le Vendredy 7. Consistoire, ie retournay vers ledit seigneur Cardinal ledit iour Vendredy 7. apres disner, pour sçauoir s'il me vouloit rien commander sur ce que ie luy auois dit la dernière fois, & s'il luy sembleroit que ie deusse aller au Pape. Il me dit qu'il auoit rapporté à sa Sainteté ce que ie luy auois dit, & ce que mondit seign. le Cardinal de Gondy luy auoit escrit en conformité, & que sadite Sainteté s'en estoit esioüie, & en auoit loué & remercié Dieu de tout son cœur, & attendoit en bonne deuotion celuy qui deuoit venir. Que ie pouuois aller vers sa Sainteté quand ie voudrois, & que ie trouuerois qu'elle me donneroit toute satisfaction. Apres cela il me demanda s'il n'y auoit point encores nouvelles que Monsieur du Perron fust parry: Je luy respondis que ie croyois qu'il fust parry, puis que le mois de Mars estoit passé: mais que ie n'auois point encores entendu qu'il y eust lettres de son partement. Il me repliqua qu'il seroit bon qu'il fust desia icy. Outre ce que ledit seigneur Cardinal me dit que le Pape auoit esté aise de ceste nouvelle, & en auoit loué Dieu, ie sçay que ledit seigneur Cardinal l'a dit plus expressement à vne personne confidente, à sçauoir que lors qu'il fit rapport au Pape de ce que ie luy auois dit, & de ce que Monsieur le Cardinal de Gondy luy auoit escrit, le Pape luy demanda si cela estoit vray, & si la chose estoit bien assurée que V. M. enuoyeroit: & luy Cardinal l'assurant qu'ouy, & luy en redisant les particularitez, sa Sainteté leua les yeux & les mains jointes au ciel, en remerciant & loüant Dieu.

Depuis ledit iour Vendredy 7. iusques au Mercredy ensuiuant 12. le Pape fut fort occupé pour beaucoup de choses qui estoient demeurees en arriere pendant son indisposition: de façon que ie ne pûs auoir audience plustost que dudit iour Mercredy 12. & encores le Maistre de la chambre, qui ne respecte pas tant comme il deuroit le nom de la Royn. douairiere de France, que ie continué à y interposer tousiours, attendis à me la faire donner iusques à ce que le Pape sortist en la salle pour donner audience publique. Mais son inciuilité fut bien punie: car apres que i'eus laissé parler trois ou quatre des plus hastez, & me fus présenté aux pieds du Pape, & luy eus dit deux mots, se leuant de sa chaire quitta là tout, & entrant en sa chambre me dit que ie le suis: faisant encor plus que la première fois qu'il me dit que i'attendisse qu'il eust fait là, & puis il m'expedieroit en la chambre. Je luy dis donc que i'auois dit dernièrement à Monsieur le Cardinal Aldobrandin le contenu en la dépesche que i'auois receuë de V. M. par courrier expres, & luy en retouchay sommairement les principaux points, & les plus agréables: luy demandant sur la fin s'il luy plaisoit me commander quelque chose là dessus me reservant à luy dire le reste quand i'aurois eu l'honneur de le voir. Et me dit que le Car-

dinal

final Aldobrandin luy auoit rapporté ce que le luy auois dit, & qu'il en  
 auoit senty vne grande ioye en son cœur. Que maintenant il n'auoit autre  
 chose à me dire, sinon qu'il estoit attendant avec grand desir ce Prelat qui  
 deuoit venir. Que la porte estoit ouverte. Qu'il portoit la France en ses  
 entrailles. Qu'il scauait combien de larmes elle luy coustoit. Qu'en toutes  
 ces choses icy il n'auoit iamais eu autre mire quel honneur de Dieu, & le  
 bien du Royaume. Que Dieu luy en estoit tesmoin. Et adionsta ce qu'il  
 m'auoit dit autresfois, qu'il bailleroit volontiers son bras droit à couper. Si  
 avec cela il pensoit pouuoir remettre la France au bon estat où elle estoit  
 du temps du Roy Henry II. Et aptes cela ne pensant pas que ie luy vou-  
 lusse dire autre chose, il me demanda comme on estoit demeuré satisfait  
 par delà des responses d'icy, & par ce moyen me donna luy-mesme occa-  
 sion de luy dire la premiere des deux choses que ie m'estois proposees; qui  
 estoit de le remercier de la parole V. M. Il luy respondis doncques, que  
 la premiere chose que j'auois dite à Monsieur le Cardinal Aldobrandin,  
 c'auoit esté la grande consolation & contentement que V. M. apoit receu  
 de la bonne disposition & inclination que sa Sainteté auoit monstree à  
 faire tout ce qui seroit pour le bien de la France conjointement avec celuy  
 de la Religion Catholique, & que ie m'estois reserué à luy dire quand ie  
 serois à ses pieds, comme V. M. m'auoit commandé de luy en rendre gra-  
 cestres-humblement, & luy en baïser les pieds de sa part, & le supplier d'y  
 perséuerer, & s'asseurer que V. M. luy vouloit estre, estoit, & seroit toute sa  
 vie fils tres-deuot & tres-obeïssant. Et comme en ceste occasion V. M.  
 s'estoit resoluë d'enuoyer de la façon qu'elle auoit entenduë estre la plus  
 approchante de l'intention de sa Sainteté, comme la plus humble & la  
 plus conuenable à l'acte dont il s'agissoit, & à la grace que vous vouliez  
 obtenir: aussi desiroit V. M. se conformer puis après aux volontés de sa  
 Sainteté en toutes autres choses à vous possibles. A quoy il respondit,  
 qu'il prioit aussi Dieu pour V. M. & vous desiroit le salut de vostre ame  
 premierement; & puis toute grandeur: duquel mot il n'auoit iamais vſé es  
 autres audiences, ny d'aucun autre qui se peult referer au temporel, com-  
 me ie l'ay tousiours soigneusement obserué. Aptes cela ie luy dis, qu'on  
 auoit preuue par delà que les ennemis de V. M. & du Royaume recom-  
 menceroient sur ceste occasiō à faire leurs mauuais offices plus que iamais  
 premierement en disant & controuuant des choses fausses & calomnieu-  
 ses, qui ne sont, ny ne furent, ny seront oncques. Secondement, en sugge-  
 rant à sa Sainteté de demander des choses qu'ils scauront ne se pouuoir  
 faire, afin de destourner, ou pour le moins retarder, la reünion de la Cou-  
 ronne de France avec le saint Siege. Surquoy m'auoit esté commandé de  
 supplier sa Sainteté de vouloir considerer les fins & intentions de telles  
 gens, qui pour vn poil de leur interest ne se soucieront que sa Sainteté  
 & le saint Siege perdît l'obeïssance de toute la France, & que la Religion  
 Catholique souffrist vne grande diminution, & toute la Chrestienté vn  
 dommage irreparable. Qu'il luy pleust aussi se souuenir, que tout autant  
 de choses qui seroient dites & faïtes pour empeschet ou retarder ceste re-  
 conciliation, si necessaire, seroient autant de mauuais offices faïts contre  
 sa Sainteté, & contre le saint Siege, contre la Religion Catholique, &

contre l'Eglise vniuerselle, & le bien commun de la Chrestienté. Il me respondit qu'il scauroit combien ceste reconciliation importoit, & cognoissoit aussi les interets des vns & des autres, & n'y auroit Espagne ny Angleterre (ce sont les propres mots) qui le gardassent de faire ce qui seroit expedient pour le bien de la Religion & de la Chrestienté.

Voilà, SIRE, ce peu que j'ay fait avec Monsieur le Cardinal Aldobrandin, & avec nostre saint Pere, sur la dépesche dudit huietiesme de Mars. Mais l'amiableté que la Sainteté monstroït en son visage & en ses gestes, ne se peut représenter. Au demeurant, ie louë Dieu de ce qu'il a pleu à V. M. prendre en gré le deuoir auquel ie me mis d'exécuter les commandemens dont il vous auoit pleu m'honorer par vostre dépesche du 9. Novembre, & me prepare à l'exécution de ceux qu'elle me veut departir par Monsieur du Perron, pour y seruir V. M. sous luy de toutes les forces de mon ame. En quoy la fidelité, l'intégrité & le zele ne me manqueront iamais, ny (quelque difficulté que j'y apprehende) la hardiesse non plus, Dieu aidant, lequel ie prie qu'il vous donne, &c. De Rome ce 14. Avril 1595.

## A MONSIEUR DE VILLEROY.

### XIV.

**M**ONSEIGNEUR, Avec la lettre du 8. Mars ie receus la vostre du mesme iour, de laquelle j'ay vsé de la façon que vous auez aduisé, l'ayant monstree à Messieurs Lomelin & Delbene, qui ont eux mesmes leu ce qui leur touchoit, avec tout le reste; outre que ie leur ay rendu celles qui alloient à eux. J'ay aussi visité & salué Monsieur Serasin de la part du Roy, & vostre, l'assurant de la bonne affection de sa Majesté, & de vostre amitié en son endroit, dont il s'est grandement honoré, & s'est offert en tout ce qu'il pourroit faire pour le seruice de sa Majesté, & pour le vostre particulier, comme d'ailleurs ie sçay de longue-main qu'il y est tres-affectionné. J'ay aussi notté tout ce qu'il vous a pleu m'écrire par ladite lettre, & me suis aidé & m'aideray cy apres des raisons y contenües, pour répondre à ceux qui reprennent les vns de ce qu'ils n'entendent point, les autres, de ce qu'ils sçauent eux-mesmes estre necessaire. Aussi ay-ie fait part à ceux qu'il a esté plus à propos, de tant de prosperitez qu'il plaist à Dieu enuoyer au Roy en diuers endroits mentionnez en vostre lettre, dont nous loüons & remercions sa diuine bonté, la priant de continuer & paracheuer l'œuvre entierement. Quand nous serons aduertis du parlement & approchement de Monsieur du Perron, nous pouruoyons à son logis, & Monsieur Delbene y trauaille desia fort. Cependât ie vous remercie tres-humblement & de toute mon affection, de ce qu'il vous a pleu faire trouuer bon au Roy ce peu de seruice que ie luy auois fait, & me procurer le bien & honneur que ie vois tant par les lettres de sa Majesté, que par les deux signes en chiffre qui sont à la fin des vostres, recognoissant le tout de la bonté du Roy; & de la faueur & protection qu'il vous plaist me departir

suprès de sa Majesté, & priant Dieu qu'il me face la grace de faire au Roy & à vous service proportionné à la gratitude que j'en conserve dans mon ame. Des choses d'icy, la principale & celle qui plus nous touche, est la disposition & inclination que l'on voit en la plus grande part de ceste Cour, à la reconciliation du Roy avec le saint Siege: & parce qu'il y a quelques Cardinaux à ce contraires, qui sont ou ja partis de Rome, ou prests à partir, comme Ascoli, Sfondrat, Alexádrin, & quelques autres; on dit que c'est pour ne se tromner à cet acte, pour auquel assister ils desiroient retourner à Rome s'ils en estoient absens. Que s'il est vray qu'ils ayent mauvaise intention, & soient marries de ce dont les Anges se resioüissent au Ciel, ie ne seray marry qu'ils aillent fort loing, & retournent fort tard. Monsieur le Cardinal de Joyeuse arrivera ce jour d'huy en ceste ville retournant de Genes. On prépare à Naples huit gros Gallions, comme l'on dit, pour les envoyer au secours de la flotte qui doit venir; & quelque quantité de Galeres, pour garder les mers de deçà contre les Corsaires. Cependant ce sera à nous à les garder desdits Gallions & Galeres en ces costes de Prouence & Languedoc. Je laisse des choses qui n'importent gueres, entr'autres, que la Marquise d'Urfé est en ceste ville depuis environ trois sepmaines, venuë, comme elle dit, par devotion, après avoir esté à Nostre Dame de Laurette, & demeuré quelque mois à Parme chez vne sienne belle-sœur qui y est mariee. A tant, &c. Monseigneur, &c. De Rome le 14. Avril 1595.

## A MONSIEVR DE VILLEROY.

## XV.

**M**ONSEIGNEUR, La lettre qu'il vous pleut m'escire le 9. Mars, me fut renduë le 5. du present, & m'a tesmoigné de plus en plus la continuation de la bonne affection dont il vous plaist m'honorer; conformément à la tres-humble seruitude que ie vous rends. La resolution que le carrier Valerio a portee par deçà du breshpartement de Monsieur du Perron, y a esté tres-agreable, & i'espere que tout ira bien, non seulement pour ce que le devoir y est, mais aussi pour ce qu'il y a encor de la nécessité & force beaucoup. De ma partie recognois assez ma foiblesse, & ay accoustumé d'apprehender la pesanteur quasi de tous affaires, non seulement de ceux de quelque importance: mais parce que Dieu aide aux bonnes intentions, i'espere qu'entant qu'on voudra se servir de moy il m'inspire, moy qui en ceste affaire ne me proposeray jamais autre chose que son honneur & gloire, & le service du Roy, & vne parfaite reconciliation du saint Siege & de la Couronne de France, avec la conservation de la dignité & des droits de l'un & de l'autre conjointement. A tant, &c. Monseigneur, &c. De Rome le 12. Avril 1595.

## A MONSIEUR DE VILLEROY.

## XVI.

**M**ONSEIGNEUR, Par une dépêche que je vous fis Vendredy 14. de ce mois, je respondis à celle du Roy & vostre du 8. Mars; & enuoyay ma responce à N. pour vous la faire tenir. A present je vous fais ce petit mot pour accompagner le duplicata de madame de pasche, & respõse dudit iour 14. que je vous enuoye par l'ordinaire de Lyon, qui partira ce soir. Depuis ma dernière ie n'ay rien appris qui importe, si n'est que Monsieur le Cardinal de Loysse arriva en ceste ville le 14. comme ie vous auois escrit qu'il deuoit faire. A cẽt, &c. De Rome ce 18. d'Auril 1595.

## A MONSIEUR DE VILLEROY.

## XVII.

**M**ONSEIGNEUR, Je receus le 17. d'Auril le duplicata de la lettre du Roy, & vostre du 8. Mars, avec la vostre du 16. du mesme mois de Mars, qui accompagnoit ledit duplicata. Je receus encores le mesme iour & par mesme moyen la vostre du 30. Mars. Et quant audit duplicata, ie n'ay autre chose à vous dire, ayant fait responce à la dépêche premiere dudit iour 8. Mars dès le 14. d'Auril. Mais sur le contenu de vos lettres des 16. & 30. Mars, ie m'en allay dès le lendemain matin 18. Auril trouuer Monsieur le Cardinal Aldobrandin, & luy dis comme vous m'escriuiez par la vostre dudit 30. que vous vous en aliez faire la dépêche de Monsieur de Perron, & qu'il feroit bien tosticy, & que sa charge apporteroit tout contentement à nostre saint Pere, & que le Roy partiroit aussi pour Lyon dans huit iours apus. Je commençay exprimer par là, sçachant que c'estoit ce que principalement il desiroit sçauoir; & puis luy dis le contentement qu'on auoit receu par delà des responses faites icy apres la nouuelle de la blessure du Roy, & del' Arrest donné contre les Iesuites: & mesmement de ce que le Pape auoit dit que pour chose qui fut aduenue il n'auoit point changé de volonté, dont sa Majesté en bailloit les pieds à sa Sainteté. Il sur ce que j'auois escrit par delà de la plaine que nostre saint Pere auoit fait de ce qu'on chassoit les Iesuites, & des termes dont on auoit vûe en certain Edit ou Declaration; ie luy dis que vous luy respondiez tres-amplement, & tres-pertinamment; & luy en recitay sommairement les principaux poincts: rejeant en fin la resolution & execution dudit Arrest, principalement sur la force & necessité du temps, & des choses qui n'auoient permis d'en vser autrement; & le reste sur la nature du diuorce qui est depuis cinq ou six ans entre le saint Siege & la Couronne de France,

pendant lequel tels desordres ne se pouuoient eniter, ains estoit pour en aduenir de beaucoup pires. Comme aussi la reconcilliation suruenant, remettoit toutes choses en bon ordre, & reestablissoit l'autorité du S. Siege & de sa Sainteté en toute la France. Ledit seigneur Cardinal me respondit, qu'il estoit tres-aïse de la dépesche de Monsieur du Perron, comme seroit aussi nostre saint Pere, qui ja l'autre fois s'en estoit resiouy, & en auoit loüé Dieu, quand le courrier expres en eut porté la nouuelle. Que sa sainteté estoit tousiours attendante, & en bonne volonté de l'expedier fauorablement autant comme nous mesmes le scaurions desirer. Qu'elle y alloit tousiours preparant les choses. Que cét affaire s'expedieroit, encores qu'on deust icy y laisser quelque chose du sien, pourueu que l'auctorité du saint Siege demeurast sauue. Qu'il vouloit croire que la chose des Iesuites estoit pourueüe de grands soupçons que le temps & aucuns particuliers d'entr'eux auoient apportez. Qu'avec le temps aussi telles défiances pourroient passer, & leurs affaires s'accommoder. Qu'il recognoissoit aussi la nature du diuorce dont ie luy auois fait mention estre telle, que pendant iceluy ne se pouuoit faire rien de bon; & que la reconcilliation seroit celle là qui l'accommoderoit & redresseroit tout. Que pour cela mesme il voudroit que ce Prelat qui deuoit venir fust desia arriué. Que cependant il s'offroit pour le fait de ladite reconcilliation en tout ce qu'il pourroit, cōme il m'auoit ja dit autrefois. Que tous ceux de sa maison auoient quelque instinct François. Que lors qu'il luy seroit permis d'escrire, & de faire plus ample déclaration de sa volonté, il ouuriroit encores plus son cœur, & montreroit plus euidentement le desir qu'il a de seruir la France.

Les choses demeurèrent en ce bon estat par l'espace de quelques dix iours. Mais le 29. iour d'Auril, comme nous attendions d'heure à autre l'aduis que ledit sieur du Perron fust party, voicy arriuer en ceste ville vn Capitaine du seigneur Virginio Vrsino de Lamentane, qui dit qu'il estoit party de Lyon le 19. d'Auril, & que peu auant son partement y estoient arriuees lettres de la Cour à Monsieur le Cōestable du 14. dudit mois d'Auril, esquelles ne s'y parloit point que le Roy fust party pour Lyon, ny Monsieur du Perron pour Rome; mais bien qu'ils estoient prests à partir. Et pource que ledit Capitaine n'alleguoit aucune cause de ce retardement, on commençoit par tout Rome à croire & à dire que le Roy n'yroit point à Lyon du tout, & n'enuoyeroit non plus Monsieur du Perron par deçà, & qu'il ne falloit plus s'y attendre, & force autres choses à ce propos: & l'entendis qu'au Palais mesme on tenoit semblable langage pres du Pape, dōt ie les tres-marry: mais ie n'y scauois que faire, sinon que me tenir coy, & attendre en patience ce que vous pourriez escrire de ce retardement. Et cinq iours après, c'est à scauoir le 4. de ce mois de May iour de l'Ascension au soir, m'arriuerēt bien à propos vos lettres du 13. d'Auril, & le lendemain de bon matin ie m'en allay vers Monsieur le Cardinal Aldobrandin, & luy dis comme i'auois receu les susdites lettres, qui contenoient la cause pourquoy le 14. d'Auril le Roy n'estoit encores party pour Lyon, ny Monsieur du Perron pour Rome. Et là dessus ie luy deduisis tout ce qu'il vous auoit plu m'escrire de l'eschéque qui estoit suruenü au Roy avec fièvre, lors que sa sainteté estoit sur le point de partir, elle pour Lyon, & de faire par-

tir ledit sieur du Perron pour icy, & de l'esperance que vous me donniez du bref partement de l'un & de l'autre, & l'esclaircissement que sa Majesté auroit eu, comme il n'auoit tenu à nostre saint Pere que le Roy d'Espagne n'eust pris vne autre resolution pour le regard de la France, que celle à laquelle il s'opiniastre. Et sur la fin ie suppliy ledit seigneur Cardinal ne s'arrester à ces faux bruits qui couroient par Rome, & d'asseurer le Pape que la resolution d'enuoyer ledit sieur du Perron estoit vraye, ferme, & seure, & que nous en attendions bien tost l'exécution, le priant encores de remarquer à sa Sainteté le soin que vous auiez par delà de l'entendre aduertie: & comme vos lettres du 8. Mars ayans porté que ledit sieur du Perron partiroit pour tout le mois de Mars, & ne s'estât peu faire, vous n'auiez oublié d'en escrire le 30. & n'estant encores ledit sieur du Perron pour partir au temps signifié par vos lettres dud. 30. vous n'auiez failly d'en escrire la cause par vos lettres dudit 13. Aueil. En somme ie le renis & le laissay assez bien persuadé, comme il me semble. Mais ie voy bien aussi que si le partement dudit sieur du Perron alloit gueres plus à la longue, sans cause qui leur fust manifestee, ils ne pourroient plus croire à paroles qu'on leur sceust dire: & cōme ie courray volontiers à leur porter la nouuelle de son partement quand i'en seray aduertiy, aussi ne pensay-je pas que ie peusse désormais accepter aucune excuse qui ne leur fust d'ailleurs cogneuë & certaine. Quant au surplus de vos lettres, i'en auois ja employé partie de moy-mesme, comme vous aurez veu par la mienne du 21. Mars, en ce qui concerne le refus que faisoient les Capucins & Minimes de prier Dieu publiquement pour le Roy; partie i'en ay employé en ce qui s'est présenté avec diuerses personnes, comme ie feray le reste aux occasions qui se presenteront: vous suppliant de croire que de tous les commandemens qu'il vous plaist me departir, ie n'en obmets pas vn, que ie n'exécute en temps & lieu, au mieux que ie scay, & puis: aussi m'aiday-je des particularitez & occurrences de delà qu'il vous plaist me toucher, pour tenir icy en reputatiō les affaires du Roy & de la France. Monsieur Delbene a pourueu à ce que Monsieur du Perron soit bien logé & accommodé, de façon qu'il n'a esté besoin que moy ny autre s'en trauaillast. Je vous remercie tres-humblement de la protection en laquelle il vous plaist prendre mon Prieuré de S. Martin du vieil Bellesme, dont ie vous auois escrit par ma lettre du 17. Feurier. Je ne vous supplieray iamais que de chose iuste, & encores sera-ce avec la reserue & retenuë que requiert la modestie dont i'ay toute ma vie fait profession auetours, & le particulier respect & reuerence que ie dois non seulement à vostre grade & occupations, mais aux obligatiōs que ie vous ay deües. Les choses d'icy sont quasi au mesme estat où elles estoient lors de mes dernieres lettres. Les Espagnols sont les premiers à crier que Monsieur du Perron ne viendra point; & cependant de laissent de faire tout ce qu'ils peuvent, en eas qu'il vienne, pour empêcher la reconciliation de la Couronne de France avec le S. Siege. Outre les liures qu'ils ont fait composer long temps y a; ils en ont fait faire de nouveau pour mettre scrupule & peux en l'ame du Pape, & de tous ceux qui inclinent à l'absolution; disant soudainement, que le Pape non seulement ne la doit, mais ne la peut donner, & que s'il la donne, au lieu qu'il pense s'offrir au respect de la France,

de, il perdra l'Espagne, & tout ce qui obeyt à sa Majesté Catholique. Il me souvient de vous auoir escrit autrefois que les vingt mil escus de pension qui auoient esté reseruez sur les fruiçts de l'Archeuesché de Toledé, seruiroient vn iour de leurre en Cour; ie voy & touche maintenant les effects de mad. pronostique. Ils en vont presentant à des Cardinaux, à vn mil, à vn autre deux mil; à condition qu'ils diront contre l'absolution tout à fait, ou pour le moins qu'ils ne seroient point d'auis de la donner, si le Prince de Bearn de son costé ne donne de bonnes seuretez pour la Religion Catholique; lesquelles cependant ils disent sçauoir qu'il ne donnera point: & n'y a pas faute de Cardinaux qui se vendent, & de ceux-là mesmes qui ont par cydeuant parlé ouuertement & publiquement pour l'absolution: c'est chose qui se sçait par tout Rome, & les cognoist-on par nom & par surnom. Et pource que lesdits Espagnols sçauent que la prosperité du Roy luy est suffrage plus puissant que toutes les brigues & menees, ils se distilent le cerueau aprez des inuentions, pour persuader au Pape & au mode qu'il n'est point iour à midy, & que les affaires du Roy se portent en France plus mal qu'ils ne firent iamais, & qu'il ne fut oncques si facile de venir à bout de luy, si sa Saincteté se veur de nouveau declarer, & contribuer des forces contre luy. Ils apostèrent dernièrement vn courrier comme venant de Flandres de la part du Comte de Fuêtes, avec des memoires & instructions, qui portoient que le party de la Ligue estoit encor tres-fort en France; & que le Prince de Bearn n'auoit moyen aucun d'aller à Lyon, non pas mesmes de vestir ses gardes. Qu'outre ceste faute d'argent, luy Comte de Fuentes luy donnoit encores trop d'affaires par delà, avec les belles & grandes forces qui estoient ja entrees en la Picardie. Qu'il enuoyoit encores d'vn autre costé le Colonel Verdugo, avec d'autres grandes forces pour assieger Sedan, principal nid du Duc de Bouillon, lequel seroit bien battu, s'il entreprenoit de l'aller secourir. Que la Royné d'Angleterre estoit lasse de tant aider ledit Prince de Bearn, & prestoit volontiers l'oreille aux propos qui luy auoient esté tenus d'vne trefve avec le Roy d'Espagne. Que ceux de la Ligue qui s'estoient mis du costé du Prince de Bearn estoient tous prests à le quitter, comme auoit desia fait Monsieur de Guyse, qui estoit ou seroit bien tost à Nancy; & comme feroient encores les Catholiques mesmes qui l'auoient tousiours suiuy, pourueu que sa Saincteté se declarast; laquelle declaration du Pape est le but à quoy ils tendent.

Mais le Pape les cognoist meshuy trop, & est d'ailleurs trop bien aduertypour se laisser ainsi tromper par eux. Aussi sçait-il bien tous les marches qui se sont faits icy, & a par compte les voix qui sont pour, & contre son intention, & est tout prest de ce qu'il a à faire; & comme ils se sont trompez en tant d'autres choses, dont il leur est aduenue tout le cōtraire de ce qu'ils pretendoient: ainsi toutes ces brauades & menaces, & tant de malicieuses & importunes inuentions, ne peuuent engendrer en vn bon cœur sinon qu'vne grande allienation d'eux & vn grand desir de se deliurer & s'affranchir de leurs façons tyranniques. La reduction de Vienne leur est en ces entrefaites venuë fort mal à propos, & les a merueilleusement faschez, & j'espere que la suite & consequence les faschera encor plus. Les nouvelles aussi qui en mesme temps sont venuës de Piedmont, que le François



y courut iufques aux portes de Thurin, ont fort galté leur myftere. Ils ont depuis quelques iours fait courir vne rēponſe à la publicatiō de la guerre faite en France: ſi ceſte rēponſe a vrayement eſté publiee és Pays-bas, cōme la darte le ſignifie, vous l'aurez deſia veuë par delà. Mais pource qu'il pourroit eſtre qu'on l'auroit compoſee icy, comme l'on fait aſſez d'autres choſes, ie la vous enuoye à toutes auantures.

Il y a icy lettres de Monsieur de Mayenne, eſcrites de Chaalons le 2. Auril, par leſquelles il ſe plaint de la lōgueur des Eſpagnols, qui ne luy ennoient des forces pour ſecourir le chasteau de Beaune, qui auoit tenu 7. ſepmaines; ſe confeſſe reduit en tel-eſtat, qu'il ne peut faire ny iuſtement la paix, dit-il, ny vtilemēt la guerre (ce ſont ſes mots) vouloit ſ'aboucher avec le Conneſtable de Caſtille dans 5. iours, & prendre quelque bonne reſolution avec luy: promet d'eſcrire plus amplemēt quand il aura fait avec led, Conneſtable. Pendant deſiroit fort ſçauoir ce qu'aura fait le ſeign. Iean François Aldobrandin en Eſpagne: declare vouloir dépendre des volōtes & cōmandemens du Pape: ſupplie que ſi ſa Sainteté ſe laiſſoit aller à l'abſolutiō, cōme les ennemis ſ'en vantēt, & cōme ces peuples-là le cōmencent à croire, ce qui nuit grandemēt à leur ſaincte cauſe, que ſa Sainteté le face au moins avec la iuſtice qu'elle doit, pouruoyant à la ſeureté de la Religio, & de ceux qui ont ſi liberalement mis leur vie pour la cōſeruation d'icelle.

Ledit ſeigneur Iean François Aldobrandin partit de la Cour d'Eſpagne le premier d'Auril, & arriva en ceſte ville le 16. de ce mois. On dit que ce Roy là, & le Prince ſon fils, & l'Infante, luy ont voulu faire de grands dōs à ſon partemēt: mais qu'il ne les a voulu prendre, & que le Pape le luy auoit ainſi commandé quand il partit d'icy. On dit de plus que ledit Roy luy a donné eſperance d'enuoyer en Hongrie huit mil hommes de pied ſouz la conduite dudit ſeigneur Iean François; mais qu'on ne fait pas grand fondement ſur ceſte promeſſe, pour n'en voir rien de preſt, & pource que les Eſpagnols ont accouſtumé de promettre l'eaucoup, & de tenir peu ou rien. Du reſte de la charge dudit ſeigneur Iean François, on en a dit ja par cy-deuant ce qu'on a voulu eſtre ſceu, à ſçauoir que le Roy d'Eſpagne auoit reſpondu ne vouloir point de paix avec le Roy, & ie l'ay deſia eſcrit par delà. Mais outre que cela meſme n'eſt point ſi certain qu'on n'en puiſſe d'outer, ſi la rēponſe à la publication de la guerre eſt vrayement faite par ſon commandement, vous y pourrez obſeruer, que quelque artiſcielle & malicieuſe qu'elle ſoit, elle ſignifie aſſez qu'en cas d'abſolution il aimeroit mieux paix que guerre, & ſeroit preſt à dire qu'il n'a point entēdu & n'entend point auoir la guerre avec le Roy de France.

Il ſe fait quelque plus grande diligence aux leuees publiques long temps, y a pour Hongrie, qu'on ne faiſoit la dernière fois que ie vous eſcriuis. On dit qu'elles ſeront de dix mil hommes de pied, & mil à cheual. Ledit ſeigneur Iean François en eſt déclaré chef, & le ſeigneur Paul Sforce ſon Lieutenant general: ils ne ſçauoient marcher que nous ne ſoyons bien auant au mois prochain. Le Pape a de nouveau enuoyé vers les Princes & Potentats d'Italie pour les exhorter à contribuer chacun ſelon ſes moyens. à ceſte guerre: & pour ceſſeſt partirent d'icy au commencement de la ſeigneurie de l'Abbe de la Congue, & l'Eueſque d'Amelia, enuoyez par

sa Sainteté. On ne sçait encores que se promettre de la poursuite qui se fait auprès du Roy de Pologne, pour le faire entrer en ligue cõtre le Turc.

Il se fait leuee au Duché d'Urbain de trois mil hommes de pied pour le Roy d'Espagne, qui seront commandez par le seigneur Alfonso d'Auola, & dit-on que le Duc d'Urbain permettant ceste leuee, a mis en ses conditions que ces gens ne passeroient point en France. L'Euesque de Toul, qui avn differend avec le Chapitre de son Eglise, est arriué depuis huit iours; & dit-on qu'en partant il a eu charge de Monsieur de Lorraine de faire de sa part avec le Pape pour l'absolution du Roy.

L'annee passée au mois de Iuin Monsieur le Cardinal de Joyeuse obtint pour son frere la translation de l'Ordre des Capucins à l'Ordre de S. Jean de Hierusalem, pour y estre en lieu & rang de Prestre non de Chualier, comme ils vouloient; avec permission neantmoins de pouoir pendant la guerre se vestir de court, porter l'espee, commander aux gens de guerre, & gouverner ceste Prouince là. Maintenant au commencement de ce mois de May, il a de plus obtenu, que son dit frere, nonobstant ledit lieu & rang, pour toute sa vie, en tout temps tant de paix que de guerre, pût aller vestu de court, porter l'espee, tenir gouuernemens, & tous honneurs & dignitez seculieres, tant militaires que ciuiles. Cecy est certain, mais ie ne sçay si ie dois croire ce qui m'a esté dit, que le remuémēt qui fut fait à Toloze l'orizisme d'Auril, fut en partie pource que ledit frere n'auoit encores telle dispense, & croyoit-on qu'il ne l'obtiendrait point s'il auoit laissé crier, *Vive le Roy*, auant que l'auoir. On luy a dépesché d'icy pour luy faire sçauoir qu'on l'a, & luy en enuoyer vne coppie collationnee. Avec cela, si le Roy donne ordre en ceste derniere saison, que le menu peuple de Toloze, qu'on a seduit, aye faute de pain & d'autres commoditez, ie ne doute point que de gré ou de force sa Majesté ne se face bien tost recognoistre en ladite ville. Arant, &c. Monseigneur, &c. De Rome le 20. May 1595.

## A MONSIEUR DE VILLEROY.

## XVIII.

MONSIEUR, Par le commencement de la lettre qu'il vous Ma pleu m'escire du 20. Mars, ie voy qu'on aduançoit par delà le partant de Monsieur du Perron, & ie vous puis asseurer qu'icy on s'en enquiert plus que d'aucune autre chose, & qu'on le desire outre mesure: mais avec le desir, il s'oppressionne à y auoir du soupçon & de la défiance, à cause du long retardement. On a eu quelquefois opinion qu'on ne le feroit partir de là, iusques à ce que le seigneur Jean François Aldobrandin fust de retour d'Espagne. Or est-il de retour maintenant, & arriua en ceste ville le 16. de ce mois, & s'est fait mille discours là dessus, & contraires les vns aux autres, selon la diuersité des humeurs des discourans. Ceux-là mesmes qui l'ont accompagné, ne s'accordent de ce qu'ils peuvent auoir veu & observé. Les uns disent, qu'il luy a esté fait grand honneur en ceste Cour là; les

autres, qu'il luy en a esté fait trop peu : les vns, qu'il s'en est retourné fort content, les autres, que non: qu'il a obtenu la plus part de ce qu'il demandoit; qu'il n'en a obtenu rien en effect : que ce lieu voyage aura seruy de retarder nos affaires; qu'au contraire il les auancera plustost de ma part, en ces extremitez ie me tiens partie à la raison, qui n'a pas tousiours lieu; partie à la force & necessité, qui l'emporte le plus souuent : & croy qu'on se soit contraint de l'honorer, autant que la granité & le fourcil d'Espagne s'est pû abbaïsser, pour le besoin qu'ils ont du Pape, mais que ce n'a pas esté tant comme il desiroit, ny comme le respect de sa Sainteté, & la parenté & alliance qu'il a avec elle le requeroit. Que comme sage qu'il est, il aye montré en apparence toute satisfaction, mais qu'au dedans il estime des choses selon qu'il les a trouuees, à son goust, ne se déguisant rien à soy-mesme. Qu'il aye obtenu paroles generales & ambiguës, & promesse conditionnée à la plus part de sa charge principale, mais que les effects en sont fort incertains, & ; quoy que ce soit, fort loing. Que pour nostre regard, on ne se sera point feint, en faisant tous offices enuers ledit seigneur Iean François, à ce que l'absolutio ne fust iamais donnée, ou pour le moins qu'elle fust différée iusques au dernier soupir du dernier de la Ligue : ains à ce que le Pape entrast de nouueau en guerre ouverte contre ce Prince de Bearn, & coniointement avec sa Majesté Catholique tournast toutes ses forces & pensees à la defense de la Religion Catholique, & de la Couronne de France, dont sadite Majesté a plus de soin & de soucy que de toutes les autres choses du monde: mais qu'on sçait bien de quel esprit il est poussé, & de combien il importe au saint Siege, & à la Religion Catholique, Apostolique & Romaine, de perdre le premier Royaume de la Chrestienté. Ainsi il me semble concilier assez doucement les susdites opinions si contraires, & ne metropelloigner de la verité. Toutes les autres particularitez sont par trop incertaines, & partant ie n'y respondray point. De Rome en 22. May 1595.

---

## A MONSIEVR DE VILLEROY.

### XIX.

**M**ONSEIGNEVR, Ceste-cy sera pour accompagner le duplicata de la lettre que ie vous fis il y a deux iours, & pour y adiouster quelques choses qui m'estoient oubliées, & que j'ay apprises ou pensées depuis. Ramelez donc oublié entre les menaces & brauades des Espagnols, à vous dire qu'ils se vantent d'auoir toute preste vne protestation qu'ils veulent faire au Pape, & la publier en cas qu'il vueille absoudre le Roy. Sa Sainteté le sçait, & ne s'en estonne point. Aussi auois-je oublié entre tant inuencions, pour agrair leurs affaires, & diminuer celles du Roy, qu'ils disent que la paix s'en va faite es Pays-bas, & que les Hollandois & Zelandois da desirer infiniment, & qu'il n'y a que le Comte Maurice, & quelques autres qui

Impes chérissables que les peuples s'en feront croire, ne pouuans estre forcez par ledit Côte, & autres. En quoy ils disent en partie vray, que ces peuples voudroient la paix voirement, mais ils taisent malicieusement, que c'est à condition que les peuples s'accorderont entr'eux, sans qu'il y soit aucunement parlé des Espagnols, desquels ils ne veulent point d'une façon ny d'autre ainsi que j'ay veu par une lettre écrite à Bruxelles le 22. Avril, incontinent apres le retour de ceux qui estoient allés en Zelande & Hollande pour parler d'accord. Et puis que ie suis tombé sur le propos de ladite lettre, ie vous diray, avant que de passer outre, qu'il y avoit de plus ce qui s'ensuit. Qu'on faisoit estat d'envoyer au Duché de Luxembourg le Colonel Verdugo tout aussi tost qu'il seroit guéri d'une maladie qu'il avoit audit Bruxelles, & le Prince de Cimay, pour faire l'entreprise du Castell, avec les forces qu'ils avoient en Picardie & au pays de Liege. Mais quant à la guerre ouverte vous les verrez venir. Ce qui s'ensuit doit estre plus secret, comme ie le tiens aussi pour plus dangereux: c'est que le Gouverneur de Han estant auparavant demeuré d'accord avec les ministres du Roy d'Espagne de leur livrer la place pour vingt-cinq mil escus il estoit à Bruxelles lors de ladite lettre, pour toucher lad. somme: mais qu'ils diseroient à la luy payer, & il estoit pour s'en retourner mal content d'eux. Ce sont les mots de celui qui écrit, & est personne qui a moyen de le sçavoir. Si d'aventure vous n'en estiez adverty d'ailleurs, & que le traitre n'eust point achevé sa trahison quand ceste cy parviendra à vous, l'advis vous pourra servir pour y pourvoir d'une façon ou d'autre. Voilà quant à lad. lettre. Audemourant, sur le retour d'Espagne du seigneur Jean François, on dit icy, qu'avec les huit mil hommes de pied que le Roy d'Espagne luy a promis pour Hongrie, il y a encorres mil chevaux: que ledit Roy a dit de plus qu'ils seroient prests aussi tost que ceux de la Sainteté, pour estre tous ensemble conduits & commandez par ledit seigneur Jean François. Mais quand bien on trouveroit tant de gens à lever en Italie, à quoy il y aura bien affaire, si est-ce que n'y ayant encorres aucun commencement, ny rien de prest pour ceste nouvelle levee de huit mille hommes de pied, & mil à cheual, elle ne sçauoit estre faite en temps qu'elle peust arriuer en Hongrie pour y servir de ceste année. Qui nous doit faire soupçonner, que si elle se fera, ce sera pour quelque autre fin & intention. Sur quoy nous devons aussi croire comme si nous l'avions ouy de nos propres oreilles, que le Roy d'Espagne ayant le seigneur Jean François près de luy, a fait enuers luy tous les offices possibles pour luy persuader au Pape de se déclarer de nouveau contre le Roy, & d'en voyer de commun accord toutes leurs forces en France contre luy, tout ainsi que les ministres ne cessent autre chose tous les jours aux oreilles de la Sainteté, & resistent à toutes leurs inventions & pensées. Et encore que le Pape sera mieux conseillé que cela, si est-ce que le Roy d'Espagne ny les ministres n'en quitteront la poursuite, tant qu'il leur en restera une goutte d'esperance. Par ainsi il pourroit se servir de ceste promesse d'envoyer en Hongrie pour se attendre que ses forces se levent, retarder cependant celles du Pape mesme, comme afin qu'elles aillent toutes ensemble sous la conduite dudit seigneur Jean François, & par ce moyen faire plus la façon de les envoyer pour ceste année en Hongrie, & puis faire

naistre occasion de presser de nouveau la Sainteté d'enuoyer le tout en France, & mesmes si le Roy n'auoit enuoyé par deçà, ou ne vouloir faire vne partie de ce qu'on voudroit. Que si la Sainteté ne voulant tant attendre pour son regard, auoit plustost enuoyé ses forces en Hongrie, le Roy d'Espagne se pourroit alors seruir des siennes pour intimider icy la Sainteté, & la détourner de donner l'absolution; où en tout euénement se seroit cependant seruy de ce pretexte de leues pour Hongrie, pour courir sa vraye intention de les enuoyer en France seules, s'il ne peut avec celles de la Sainteté. Mais de toutes ces choses qui consistent en conjectures, vous en iugerez trop mieux, prenant les choses au pis, pour n'en demeurer à la mercy d'autrui. Cependant il n'y a rien meilleur contre tout cela, que d'auancer par delà la reduction de ce qui reste, & verser bien de la prospérité que Dieu donne au Roy. Tant mieux les affaires iront, tant moins de cœur & de moyen auront ses ennemis d'entreprendre contre luy & contre son Royaume, & tant moins ils trouveront qui condescende à leurs mauuaises intentions. Je ne brouilleray point icy le papier de certaine Principauté de Rossane au Royaume de Naples, qu'on dit auoir esté promise au Seigneur Iean François, pour la moitié de ce qu'elle vaut : car toutes telles choses sont fort incertaines : combien que ie croye fort facilement que les Espagnols voudroient bien qu'il y employast deux ou trois cens mil escus pour auoir autant de gages de luy & des siens, & se l'assubiection par ce moyen. Mais outre qu'il ne les a point, & que le Pape use mieux du reuenue du saint Siege, ie croy que l'on cognoist assez les intentions des promoteurs. Et au pis aller ie reuiens toujours à mon refrain, que les affaires du Roy se faaisent en France, se fassent toujours en Espagne mesmes, non seulement à Rome, & ailleurs. A tant, Monseigneur, &c. De Rome ce 22. May 1595.

## A MONSIEVR DE VILLEROY.

## XX.

**M**ONSEIGNEVR, La lettre qu'il vous pleut m'escrire le 4. May me fut renduë le 8. de ce mois, avec vne de Monsieur de Believre du 25. dudit mois de May : par laquelle entr'autres choses il m'escriuoit qu'il en auoit receu vne de vous du 19. escrete à Montereau-faur-Yonne, & qu'à l'heure qu'il escrinoit le Roy pouuoit estre à Troyes, s'en allant en Bourgogne. Et pource que ie scauois que chez le Pape on estoit en peine, pour n'auoir aucune certitude du partement de Monsieur du Perron, & encores en défiance s'il viendroit, ou non, ie m'en allay incontinent vers Monsieur le Cardinal Aldobrandin, & luy dis ce que vous m'escriuiez au commencement de vostre lettre, que vous estiez sur le point de faire partir ledit sieur du Perron, & ce que Monsieur de Believre m'auoit escrit de plus. Dequoy ledit sieur Cardinal monstra estre bien aise, mais non pas d'une pleine & entiere ioye, pour autant qu'encores que par le contenu de la lettre de Monsieur de Believre il eust assurance que le Roy estoit party &

Fontainebleau, & s'estoit acheminé en Bourgogne, toutesfois il n'y auoit point de certitude que Monsieur du Perron fust parry d'auec le Roy. Et medit ledit seigneur Cardinal, que nostre S. Pere ayant declaré sa bonne volonté en tant de façons, la raison vouloit que par delà on y eust correspondu, en enuoyât vers luy en plus grande diligence & promptitude qu'on n'auoit fait. Outre qu'en tardant tant, on donnoit temps & opportunité à ceux qui ne vouloient ceste reconciliation, de faire mauvais offices, & susciter nouuelles difficultez. Que ce nonobstant sa Sainteté persueuroit tousiours en la mesme bonne volonté; & auoit les bras ouuerts pour embrasser qui seroit ce qui estoit deu à elle, & au S. Siege. Je le priay de s'asseurer que la correspondance de bonne volonté y estoit toute telle qu'il la scauroit desirer, & de se souuenir des causes du retardement, que ie luy auois exposees à diuerses fois par le passé, & croire que quand bien Monsieur du Perron auroit fait quelques iournees avec le Roy, pendant que le chemin de Lorraine & de Bourgogne leur auroit esté commun (qui estoit tout le pis qu'on pouuoit peser en cecy) ce neantmoins il ne pourroit auoir esté longuement à la suite de sa Majesté, & nous entendriôs bien tost qu'il seroit passé à Nancy. Quant au remuement aduenû à Tolose, dont il vous plaist m'aduertir, ie le sceus en ceste ville le propre iour que vous escriuistes vostre lettre du 4. May, & par ce moyen d'une lettre escrite de Tolose le 13. d'Auril, laquelle estant tombée entre les mains de Monsieur de Believre à Lyon, me fut par luy enuoyee avec vne sienne du 18. du mois d'Auril, & par moy icy receuë le 4. May. Et comme des deux autres personages, outre Monsieur de Joyeuse que vous me nommez à ce propos, ie ne veux point pleiger le premier; aussi ay-jé eu du second le mesme soupçon que vous, & en ay de bons tesmoins, à qui ie l'ay dit auant que vostredite lettre m'arriuast. Monsieur de Joyeuse depescha par deçà vers Monsieur le Cardinal son frere le 18. May vn sien, qui arriua icy le premier de ce mois, & en part ce soir renuoyé par ledit sieur Cardinal, qui monstre auoir grande apprehension de l'issuë dudit remuement, cognoissant que son frere n'a point de quoy maintenir vne telle entreprise faite hors de toute saison; & que comme que ceste nouueauté se termine, la haine des principaux de la ville leur en demeurera a toute leur vie: outre que pendât que son frere fera ainsi & demeurera separé du Roy, nul du costé de sa Majesté ne se pourra fier de luy Cardinal, en chose qui concerne le public de la France, comme il m'a recogneu luy-mesme lors que ie luy ay dit avec la franchise dont i'ay accoustumé d'vser enuers luy, & avec le respect cependant que ie luy dois. Aussi m'a il assuré que par ledit homme qu'il renuoye, il exhorte & conuiesort son frere de s'accorder au plustost, & en toutes façons; ce qui est croyable, pour ce que c'est leur plus grâd profit. Qui est tout ce que i'auois à vous dire sur le sujet de vostredite lettre du 4. May.

Au demeurant, quelque chose que nous scachions dire, & quelque aduis qu'on aye d'ailleurs de la venue de M. du Perron, toutesfois on n'ostera la desface qu'il est entrée au Palais, & partout Rome; & en sont venus iusques là, que de deliberer ce qu'il faudroit que le Pape fust, en cas que le Roy n'enriroyast point; & s'y est-on trouué fort perplex, sans le pouuoir refoudre à rien. Et y proceder par rigueur; & retourner à faire la guerre au Roy con-

jointement avec le Roy d'Espagne, & enuoyer en Frâce les forces destinées pour la Hongrie contre le Turc, cōme les Espagnols voudroient, & en font instance; il leur semble qu'oultre la perte d'autant d'hommes & d'argent qu'ils y mettroient, ils n'auroient en fin fait qu'acheuer la desobeyssance & separation du Royaume de Frâce pour iamais: & de laisser là les armes temporelles, & fulminer nouvelle excommunication & priuation, ils ont experimenté cōbien peu d'efficace elles ont eu cy-deuāt, lors qu'il y atoit trop plus d'apparece qu'elles deussent seruir. De recourir à la douceur, & enuoyer vers le Roy, pour l'inviter & exhorter à renuoyer par deçà, cōme il se trouue qu'ils seroient de cēt aduis, il leur semble que ce ne seroit de la dignité du S. Siege. Et de laisser aller les choses d'elles-mesmes sans y rien faire, ils n'estiment le deuoir faire, à cause mesmemēt des desordres qu'ils entendent s'augmenter de iour en iour par la France es choses spirituelles & Ecclesiastiques, & en particulier de certains Oeconomats spirituels, dōn on a eu auis depuis peu de tēps que le Roy despeschoit, & le sieur Guebrard Archeuesq; d'Aix qui est à Marseille, a enuoyé icy copie de celui qui auoit esté expédié pour son Archeuesché, avec des lettres qu'il a escriptes à M. le Card. Borromee, portant entr'autres choses, que par iceluy le Roy se declaroit chef de l'Eglise au spirituel en France, comme fait la Roynie d'Angleterre en son royaume, & que tout estoit perdu, si par l'auctorité du Pape tous les bōs Catholiques de tous les endroits de la Chrestienté ne se croiset pour luy courir sus. Ainsi ceux qui se défient de la venue du sieur du Perrō, se trouuent icy reduits à telle extremité, qu'ils ne peuuent abandonner cēt affaire, & si ne sçauent qu'y faire. Et ceste perplexité se rengre toutes les semaines en façon d'une fièvre, aux iours de Mercredy & leudy, que les courriers ordinaires de Venise, Milan & Genes ont accoustumé de venir, & qu'on ne trouue es lettres qu'ils ont apportées aucun certain aduis du parlement dudit sieur du Perrō d'auant le Roy, cōme iusques icy ne s'y en est point trouué qui ne laissast à douter. Tout de mesme quand l'ordinaire de Lyon est venu, & à tous les extraordinaires qui arriuent de ce costé là, ce sont autāt d'accès, & de pareilles figures qui prennent les mesmes personnes desistées. Les Espagnols continuent tousiours leurs mauvais offices, tant en deractant du Roy, & importunāt le Pape d'enuoyer en France les forces qui ont esté leuées pour Hongrie, qu'en briguant pour empescher l'absolutiō, en say qu'on la vienne demander. Et outre ce que ie vous en ay escrit cy-deuāt, ils se sont laissez entendre, que lors que l'on sera sur le point de donner l'absolutiō, si on en vient si auāt, ils veulent demander de la part de leur Roy d'estre puis, & par ce moyē la differer, s'ils ne peuuent l'empescher du tout. I'ay dit à ceux qui m'en ont aduertī, qu'en matiere d'absolutiō nous n'auōs affaire qu'au Pape: qu'il est vray qu'avec les Espagnols nous aurōs guerre, puis qu'ils l'ont ainsi voulu mais proces nō. S'ils veulent plaider ou estester avec le Pape, ce sera à luy à se defendre d'eux; qui neantmoins ont desja esté tant ouïs, & ont tāt dit & redit en tāt d'années, que ie ne sçay cōme sa Sainteté les pourra plus escouter, & ne croy pas que pour chose vieille ou nouuelle, qu'ils luy puissent dire, ils soient pour luy persuader de refuser un si grand & si puissant Royaume qu'on luy vient offrir, & de quel ils se font moustrer si cupides. Mais cōme par ceste mesme cupidité & ambition ils ont fait les fautes du Roy, ainsi

seroient-ils en cecy, tendant l'absolution de sa Majesté plus authentique & plus honorable par la contradiction qu'ils y ont apportée, & par la victoire que le Roy aura obtenüe sur eux sans coup frapper : ou quand elle ne s'obtiendroir, acquiesçant à sa Majesté & à toute la France vne excuse contre le Pape mesme qui auroit fait à leur mode, & vne iustification trop grande de tout ce qui pourroit ensuiure du refus, & se chargeans eux-mesmes du vitupere, & maledictions de tous les siecles à venir, pour la perte & ruine qu'ils auroient causee au S. Siege, à la Relig. Catholique, & à toute la Chrestienté.

Nostre saint Pere benit & bailla au seigneur Jean François Aldobrandin le baston de General, & l'estendart pour la guerre contre le Turc, le Dimanche 4. iour de ce mois, en l'Eglise sainte Marie Major, & ledit seigneur Jean François partit de ceste ville pour Hongrie le Vendredy 16. faisant le chemin de nostre Dame de Laurette, & deuant passer à Mantouë, Trente, & Isprouc au Comté de Tirol, & faire monstre, & embarquer son infanterie en vne ville appelée Hal, près ledit Isprouc sur le fleuve Oenus qui se va rendre dans le Danube, lequel les portera à Vienne en Autriche, & de là en Hongrie. Le seigneur Mathency, qui alla commissaire en France avec le Duc de Monte-Marciano nepveu du feu Pape Gregoire, va commissaire avec ledit seigneur Jean François. On assure que la leuee des gens de pied est de seize mil hommes, afin qu'estans arrivez en Hongrie, ils soient douze mil accomplis : mais on dit que les gens à cheval ne passeront pas 800. Les heritiers du feu Marquis du Guast voulans vendre le Duché du Mont saint Jean aux confins du royaume de Naples, & ayans passé procuration à Monsieur le Cardinal d'Arragon pour ce faire, le seign. Ioseph Iustinian depositeaire de nostre saint Pere l'acheta pour & au moyen d'une personne qu'il nommeroit en temps & lieu, & pour le prix de cent soixante mil escus. Et incontinent on commença à dire par Rome, que le Pape l'auoit fait acheter pour le seigneur Jean François : mais la Saincteté declara au Consistoire qu'elle tint le Lundy 12. de ce mois, qu'elle l'auoit acheté & acquis au S. Siege, dõt les Espagnols ont esté fort marries, ne voulans point que le S. Siege s'estende, mesmement de ce costé-là, & ces lieux estans forts, & aisez à fortifier encores plus. Cependant la Saincteté est grandement louée de ceste action, & mesmes d'autant qu'il n'y auroit pas gueres plus d'un mois que le Cardinal de Come en auoit acheté pour autant de somme audit royaume de Naples pour vn sien nepveu. Aussi dit-on que par l'acquisition de ce Duché il sera deormais plus facile à la Saincteté de preseruer son Estat des incursions & voleries des bannis du royaume de Naples, qui passoient là aupres. Mais ce n'est pas ceste acquisition seule que la Saincteté a faite au S. Siege, ayant ja auparauant acheté des Colonnes la terre & seigneurie de Nettuno pour quatre cents mil escus.

Par vne particularité que ie vous adiousteray icy, vous verrez que Rome mesme ne se peut exempter des scandales des heretiques. Il n'y auoit pas plus de trois semaines qu'on y auoit bruslé tout vif au camp de Fleur, vn heretique Flamand, qui ne se voulut jamais conuertir, quand vn Anglois âgé d'environ 30. ans, natif de Londres, s'en alla le Ieudy 15. de ce mois en l'Eglise de sainte Agathe, tiltre de Monsieur le Cardinal de Lorraine, où l'on mettoit l'oraison des 40. heures : & ainsi comme l'on sortoit del'Eglise



se portant le S. Sacremēt en procession, il donna vn grand coup à la custode, & la fit cheoir des mains du Prestre qui la portoit, criant que c'estoit vne idole; dont le Mardy apres 20. de ce mois il eut le poing & la langue coupez au mesme lieu, & puis fut bruslé tout vif au camp de Fleur; outre que par tout le chemin, pendant qu'on le menoit, on le brusloit avec des torches ardantes. Monsieur l'Archeuesque d'Ambrun qui estoit à ladire procession, & qui porta au Pape la nouvelle de ce cas si enorme, m'estoit venu trouuer l'onzieme de ce mois, & me dit le deuoir qu'il auoit fait faire par delà auprès du Roy, par le sieur de Lambert Archidiaque de son Eglise, s'offrant à moy, si ie pensois qu'il peust faire quelque chose icy où ailleurs pour le seruice de sa Majesté; dont ie le remerciai, & luy dis que ie ne ferois faute de vous faire entendre ceste declaration de sa bonne volóté. Monsieur le grand Maistre de Malte mourut le 4. May, & en son lieu fut esleu le 8. vn Espagnol appellé Frere Marrin Garcez Castellan d'Emposte, Arragonnois; & ainsi est finy le differend qu'une partie des Cheualiers auoit avec ledit feu seigneur grand Maistre, qui à sa mort a bien monstré qu'il estoit meilleur mesnager & meilleur Religieux qu'ils ne disoient, ayant par son testament laissé à la Religion du bien vallant vn demy million d'or, dont il pouoit disposer en faueur de qui il luy eust pleu, par la faculté de tester qu'il auoit du Pape. Et n'en reste aux Grands-Croix, qui estoient venus icy solliciter contre luy, sinon que la honte de se voir démentis par sa belle fin, & disposition de derniere volóté, & le regret de n'auoir esté à la nouvelle election, où chacun d'eux presume qu'il auroit esté esleu, ou pour le moins auroit par sa voix obligé le nouveau grād Maistre, & acquis grā de part en sa bonne grace. A tant, Monseign. &c. De Rome le 23. Iuin 1595.

## A M O N S I E V R D E V I L L E R O Y .

### X X I .

**M** O N S E I G N E V R , Par la lettre que ie vous escriuis le 23. de ce mois, vous verrez le soucy & perplexité où l'on estoit icy, pour n'auoir aucun aduis certain que Monsieur du Perron fust party d'auprès du Roy pour venir en çà; & par là pourrez iuger cōbien est arriuee à propos la depesche qu'il vous apleu me faire de Troyes le dernier de May, comme vous estiez sur le point de monter à cheual pour aller à Dijon: laquelle depesche ie receus le 24. de ce mois au matin, consistant en deux lettres, l'une du Roy, & l'autre vostre. Et pource que la nuit d'auparauant estoit suruenu au Pape vn peu de goutte, ie fus trouuer incontinent Monsieur le Cardinal Aldobrandin, & luy dis comme ledit iour dernier de May, le Roy partant de Troyes pour Dijon, ledit sieur du Perron partit aussi pour Rome, & prit le chemin de Lorraine & des Suisses; & que le Roy par ses lettres dudit iour, me commandoit d'en donner aduis au Pape. Apres cela i'excusay le retardement du passé de la façon qu'il estoit porté par la dite lettre du Roy, remettant le reste à la venue dudit sieur du Perron, qui leur

leur en droit d'avantages; & puis huy dis le contentement que le Roy avoit eu de la bonne & gracieuse réponse que le Pape, & huy Cardinal m'avoient faite sur la dernière despêche portée par Valeris, & comme sa Majesté en baïsoit à sa Sainteté les pieds. Ledit seigneur Cardinal fut très aise de cette nouvelle, & ne s'en cela point; mais son visage & sa contenance en monstroient encores plus de beaucoup qu'il n'en disoit. Ses propos furent à l'accoustumee très gracieux & amiables; mais pource que ce sont redites d'autres réponses qui m'ont esté faites par cy devant tant par le Pape, que par luy, & que suivant ma coutume ie vous les ay escrites tousiours fort particulièrement, ie n'en feray point icy pour ceste heure autre repetition; & vous diray seulement, que sur la fin, comme en conscience, & plus pour le faire parler qu'autrement, ie luy dis comme quelques vns avoient voulu persuader au Roy, que le retour d'Espagne du seigneur Jean François auroit apporté icy quelque changement; mais que le Roy n'en avoit rien creu, & ne s'y estoit aucunement arrêté. A quoy il me respondit, que le seigneur Jean François n'auroit voulu, & n'auroit pu apporter aucun changement aux bonnes intentions du Pape: Que Dieu & le monde sçavoient l'occasion de ce voyage: Que le seigneur Jean François n'avoit, & ne vouloit avoir dependance que de sa Sainteté, & l'avoit ainsi montré tant en Espagne, qu'icy apres son retour; n'ayant tenu propos ny là, ny icy, qui ne tendist au bien commun, & au repos de toute la Chrétienté. Qu'aussi le Pape n'est point pour se departir de ses bonnes & saintes résolutions à la suggestion de personne; ains il me pouvoit dire en vérité, qu'en toutes ces choses de France, sa sainteté ne s'estoit iamais changée, ains avoit tousiours eu vne mesme volonté, & vne mesme fin. Quand il avoit usé de rigueur, il l'avoit fait pource qu'il iugeoit qu'il estoit ainsi expedient pour le bien de la Religion Catholique; & maintenant où il prenoit autre voye, il le faisoit aussi pource qu'il estimoit qu'il est ainsi bon & utile à la mesme Religion. Or les voila donc maintenant hors d'une grande peine, de laquelle ie ne vous ose escrire tout ce que l'on m'en a dit, pour ce que ie ne sçay si j'en dois tant croire. Au demeurant, ie m'estois desia enquis fort soigneusement dudit changement, que quelques vns craignoient apres le retour dudit seigneur Jean François, mais ie n'en ay trouvé rien de verifié: outre que le Roy continuant à bien faire, & prosperer comme il fait, il ne faut point craindre qu'on se change icy. Au contraire, j'y trouve que la plus-part de ceux qui ont fait ledit voyage, s'en sont retournés fort mal edifiez des choses d'Espagne, n'ayans point veu en ceste Court toute la splendeur, frequency & majesté qu'ils s'estoient imaginez; & ayans trouvé un Roy cassé & moribond, à qui la vigueur du corps & d'esprit manque tousiours à veüe d'œil, à ce qu'ils disent; & ne sçait plus ce qu'il veut, & n'entend pas mesme les affaires de France, à laquelle il est si absent; & si est en défiance de son propre fils, auquel il ne communique rien, & ne luy laisse rien faire. Aussi at'on entendu depuis le retour dudit seigneur Jean François, qu'il avoit esté fort malade, & pour mourir. On a encores escrit d'Espagne qu'il vouloit envoyer Gouverneur aux Pays-bas le Cardinal Albert son nepveu, qui passerait icy en allant. Sur quoy il y en a qui s'imaginent que ce Roy se prive du service & soulagement que

ce Prince, qu'il a tousiours monstré aimer & estimer beaucoup, luy apporté te près de sa personne : & pense que ce soit vn faux bruit que l'on fait courir, afin que les Flamands louz ceste esperance portent cependant plus patiemment le mal-agreable gouvernement du Comte de Fuentes ; ou bien qu'il y a quelque chose, outre ledit gouuernement, pourquoy il s'esloigne de luy ; & commence-t'on desia à dire, que c'est pource que le Prince d'Espagne ne voit pas de bon oeil ledit Cardinal. Je ne veux oublier vne chose entre autres, que i'ay appris de ceux qui sont retournez dudit voyage, c'est qu'en toute la Cour d'Espagne on y dit encores auourd'huy grand mal de Monsieur de Mayenne, qui en cela reçoit vn digne payement des serui-ce qu'il leur a faiz. En somme par ledit retour que quelques-vns auoient redouté, les choses d'Espagne estoient icy plustost rabaissees qu'autrement. Surquoy est venuë la nouuelle de tant de millions que l'on dit que la flotte a apportez, qui les a aucunement releuees. Les Espagnols cherchent tousiours de les appuyer avec leurs mensonges ; mais la verité se descounturant bien tost apres, elles en deuiennent plus ruineuses & décriees : comme dernièrement ils fernerent icy le bruit que le 6. de ce mois au Duché de Bourgogne le Connestable de Castille auoit gaigné vne grosse bataille, où le Marechal de Biron & plusieurs autres auoient esté tuez, & le seigneur Alphonse Corse pris prisonnier avec plusieurs autres, & le Roy mis en fuite vers Paris avec ce peu qui luy estoit resté, dont les petits enfans se moquent à present, & les monstrent au doigt. Et j'espere que d'icy à peu de temps Dieu nous donnera encores plus dequoy à refuter leur vanité, comme ie l'en prie de tout mon cœur, & qu'il vous donne, &c. Monseigneur, &c. De Rome ce 27. Iuin 1595.

A MONSIEVR DE VILLEROY.

XXII.

**M**ONSIEVR, Ceste-cy ne sera que pour accuser la reception des lettres du Roy des 9. May & 19. Iuin, & des vostres du dernier May, 10. & 21. & Iuin ; pour vous dire que Monsieur du Perron arriua en ceste ville le 12. de ce mois, & le soir mesme fut admis à baiser les pieds du Pape, & les mains de Messieurs ses deux neueux, sans entrer en affaire, ny autre propos que de complimens ; & le Lundy 16. eut audience de sa Sainteté, & luy exposa sa charge : & depuis a visité & informé tous les Seigneurs de ce sacré College, de tous lesquels, & de la Sainteté mesmes, il a receu tout le bon accueil qui se pouuoit desirer. Comme aussi par commandement du Pape il fut acompagné de bone escorte de gés à cheual depuis qu'il entra en cet Estat, jusqu'aux portes de Rome, pour soupçon des bannis, & d'autres mauuais gens, qui souz pretexte de voleurs luy eussent peu faire quelque mauuais tour. Sa negociatio est desia fincée, que nous en esperons toute bone expeditio dás peu de iours, à la gloire de Dieu, au contentement de sa Majesté, & de tous les gens de bien, honnorant les importunes

Violentes oppositions qu'y font ses ennemis plus que iamaïs, & tant qu'ils s'en rendent odieux à tous ceux qui ont quelque moderation, & ainsi aident à nos affaires en nous voulans nuire; comme il leur est aduenü par cy-deuant en plusieurs autres occurrences. Quand nous aurons vne entiere resolution, nous depescherons vers sa Majesté vn courrier exprés, qui tiendra vn chemin plus seur que ne fera cét ordinaire, & vous rendrons compte par le menu de toute la negociation; & ie respondray par mesme moyen à ce que ietrouuieray esdites lettres auoir besoin de response. Cependant nous n'auons point estimé vous en deuoir dire d'auantage par ceste voye peu seur, & en laquelle, si ie ne me trompe, nos lettres seront à ceste foistres-curieusement cherchées & recherchées. Depuis là venuë de Monsieur du Perron, toute Rome par exprés commandement du Pape est en deuotion, faisant tous les iours des processions & continuelles prieres à Dieu, qu'il luy plaise inspirer à sa Sainteté de faire ce qui fera le meilleur en cét affaire, si important à la Religion Catholique, & à toute la Chrestienté; dequoy aussi ie prie en cét endroit sa dñe bonté, qu'il vous donne, &c.

Monsieur du Perron s'excusant de ce qu'il n'a encores escrit en chiffre, a voulu que ie vous escriuisse qu'il a esté aduertý que N. qui est par delà, a commission d'icy de prendre garde aux actions du Roy, & d'en donner aduis par doçà. Item de s'occuper par le point de la rehabilitation, & telles autres choses, si par delà on seroit plus liberal que nous ne serons icy. Et partant il seroit besoin de me luy donner matiere d'escrire de sa Majesté chose qui puisse desplaire icy; & moins leur donner esperance de plus que ce que nous leur aurons accordé. Monseigneur, &c. De Rome ce Samedi 29. Iuillet 1595.

## A V R O Y.

## XXIII.

SIRE,

SA l'arrüee de Monsieur du Perron en ceste ville i'ay receu la lettre qu'il a pleu à vostre Majesté m'escrire par luy de Fontainebleau le 9. May; & depuis en ay receu deux autres escrits de Dijon les 10. & 19. Iuin. Par la premiere, & parce que ledit sieur du Perron m'a dit de bouche, & par l'instruction qu'il m'a communiquée, i'ay veu comme il a pleu à vostre Majesté que ie la seruisse avec luy en l'affaire pour laquelle elle l'a enuoyé. En quoy, comme ie cognois l'honneur que V. M. me fait en la fiance qu'elle a en moy, aussi outre le deüoir de tres-fidele subiect, auquel ie suis d'ailleurs obligé, j'eustueray toutes les forces de mon ame pour respondre, et à ce qu'en moy sera, à ce que V. M. s'en promet, & n'obmettray rien de tout ce dont ie me pourray aduaiser qui puisse seruir à obtenir bonne & briefue expedition dudit affaire, comme ie l'espere telle à l'honneur & gloire de Dieu, au contentement de V. M. & au bien commun de toute la Chrestienté. Aussi ay-je appris par ladite premiere lettre, comme il plaisoit à V. M. qu'après l'expedition de cét affaire, ie la seruie icy, en attendant qu'elle enuoye vn Ambassadeur pour y residre, & m'enuoyer deux mil

escus pour m'y preparer, & m'ameublir. Ce que ie prens pour accroissement du bien & honneur qu'elle m'a desfa fait, & du soin & diligence que d'ailleurs ie deuois & voulois apporter au seruice de vostre Majesté, comme i'ay desia receu & commencé à employer ladite somme. Les autres deux lettres contiennent partie des prosperitez qu'il a pleu à Dieu vous donner en Bourgongne, tant contre l'armee des Espagnols, que pour la reduction de vos subiects, & les genereux desseins de V. M. pour le regard de ce qui reste: ie louë Dieu de la benediction qu'il donne à vos travaux & bonnes intentions, & le supplie de continuer à faire prosperer à l'aduenir toutes vos entreprises & actions, & particulièrement obtenir vtre pleine & entiere obeissance de tous vos subiects, & victoire sur tous vos ennemis; & vous donner, &c. S. R. S. &c. De Rome ce 29 Iuillet 1595.

## A MONSIEVR DE VILLEROY.

### XXIIII.

**M**ONSEIGNEVR, Par ma derniere lettre qui estoit du 29. Iuillet, ie vous escrivis sommairement ce qui s'estoit fait iusqu'à ce iour là en l'affaire du Roy, depuis que Monsieur du Perron estoit arriué en ceste ville. Le lendemain qui estoit vn Dimanche 30. dudit mois de Iuillet, nous eusmes de nostre saint Pere la seconde audience, où nous dismes à sa Sainteté comme nous auions acheué de visiter & d'informer les Cardinaux suiuant son commandement, & luy presentasmes la requeste par escrit, en laquelle estoit contenuë la demande de la Majesté, que sa Sainteté auoit aussi voulu auoir par escrit. Sa Sainteté leut ladite requeste, & nous dit qu'il la considereroit, & puis nous feroit appeller. Apres cela il nous fit plusieurs interrogations & difficultez sur ceste affaire, auxquelles nous respondismes. Et le Mercredy ensuiuant second iour de ce mois d'Aoust, nostre saint Pere assembla tous les Cardinaux en vne congregation generale, & leur proposa ledit affaire, leur dict tout ce qui s'y estoit passé depuis le commencement de son Pontificat iusques à ce iour là, & leur cottant toutes les rigueurs qu'il y auoit eue, & comme elles n'auoient de rien seruy, estant le Roy allé tousiours en prosperant, & s'establisant au Royaume, nonobstant toute la resistance qu'on luy auoit pu faire. Que sa Sainteté s'estant en fin laissé entendre à Monsieur le Cardinal de Goudy, qu'elle escouteroit celui qui seroit enuoyé de nouueau; le Roy auoit enuoyé Monsieur du Perron, qui luy auoit porté deux lettres de la Majesté, dont l'une estoit de sa main; & présenté la requeste par escrit. Que c'estoit le plus grand affaire que le saint Siege eust eu depuis plusieurs centaines d'annes. Qu'il les prioit, exhortoit, & contraindoit d'y vouloir bien penser, & mettre à part toutes sortes de passions & interets humains, & ne regarder qu'à l'honneur de Dieu, & la conservation & amplification de la Religion Catholique, & au bien estant de toute la Chrestienté. Qu'ils se souuissent qu'il n'y avoit icy d'un homme qui

né qu'on tienne prison, mais d'un très-grand & très-puissant Prince, qui commandoit à des armées & à plusieurs peuples; & qu'il ne falloit pas tant regarder à sa personne, comme à tout le Royaume qui le suivoit, & dependoit de luy; ny tenir si grande rigueur en absolvant des censures, comme en absolvant des pechez. Qu'à quatre ou cinq iours de là il les feroit appeler les vns apres les autres, selon leur rang & ordre, pour venir luy dire leurs aduis en sa chambre chacun à part, & qu'ils s'y preparassent. Apres avoir ainsi parlé, il fit lire en ladite assemblée les deux lettres du Roy, & la requeste par escrit que nous auions presentee. Le lundy ensuiuant 7. de ce mois, il commença à oïr les aduis desdits seigneurs Cardinaux; & pour la longueur, qui est comme naturelle à Rome, & pour n'avoir pû la Sainteté laisser les affaires ordinaires de ceste Cour, il n'acheua de les oïr que le Mercredy 23. de ce mois. Il y en a eu plus de trois quarts qui ont esté d'avis que sa Sainteté donnast l'absolution. En ces huit iours qui sont passez depuis que le Pape eut acheué d'ouyr lesdits aduis, nous auons sollicité & traité des conditions de la future absolution, & en sommes demeurez d'accord; pour le moins leur auons nous dit & baillé par escrit tout ce que nous pouvions leur accorder, sans nous rien reserver; & leur auons déclaré ne pouvoir y adjouster autre chose. Et jaçoit qu'ils montrèrent de vouloir encores d'autres choses, si est-ce qu'ils n'auront plus rien de nous; & ne lairrons de passer outre à l'expédition de l'affaire, comme nous en suppliâmes nostre dit saint Pere en la troisieme audience que nous eûmes de sa Sainteté Lundy 28. de ce mois, faisans à sa propre personne la susdite declaration de ne pouvoir plus adiouster autre chose aux conditions par nous auparavant accordees. Aussi ce iourd'huy sa Sainteté a tenu le Consistoire, & en iceluy a déclaré aux Cardinaux, comme ayant recueilly leurs voix, il a trouvé que presque tous avoient esté d'avis de donner l'absolution; & suivant cela il s'estoit resolu de la donner, & avoit ja aduisé avec les Procureurs des conditions d'icelle, desquelles il leur a dit les principales & les plus importantes; adioustant qu'il tascheroit d'en tirer encores d'avantage, si faire se pouvoit: & ce qui ne se pourroit obtenir à present, il verroit puis apres de l'avoir par le moyen d'un Legat qu'il enuoyeroit, & des Nonces qu'il tiendroît près le Roy, & des Ambassadeurs que sa Majesté tiendroît aussi par deçà. Maintenant il reste que nous signions lesdites conditions & promesses arrestees & convenues, & que sa Sainteté face & publie le decret de l'absolution. Cependan on est apres à dresser la forme de l'abjuration & profession de foy qu'il nous faudra faire icy au nom du Roy, & la forme de la bulle de l'absolution; dequoy on nous donnera copie; & sera convenu avec nous avant que rien s'y face. Cela fait, sa Sainteté prendra un iour, auquel sera faite publiquement la solennité de ladite abjuration & profession de foy, & de l'absolution qui sera donnée quant & quant, & d'une mesme teneur; & auons esperance & quasi assurance que ce sera le iour de la Natiuité de nostre Dame, 8. du mois prochain; & puis sera ladite Bulle grossoyée, signee, & plombée, pour estre portée au Roy, & publiée en France, & par toute la Chrestienté.

Je ne vous particularise point icy les susdites conditions, ny rien des negociations qui se sont faites, pour le peu de secreté qu'il y a par les chemins

que le courrier ordinaire de Lyon, qui portera la présente, aura à tenir; remettant le discours plus ample quand nous dépêcherons vn courtier exprés, suivant ce que ie vous escriuis par ma precedente. Cependant vous pouvez croire, & en assurer le Roy, que nous n'auons point excédé, & n'excederons nostre pouuoir, & que toutes choses s'y sont passées, & passeront avec la dignité de sa Majesté, & de la Couronne Tres-Chrestienne: comme aussi n'auons nous iamais pensé à refuser rien de tout ce qui appartenoit à la dignité du S. Siege, & de nostre S. Pere, entât que nostre pouuoir s'est peu estendre. Voila, Monseig. quant à nostre affaire, tant pour le passé & present, que pour l'auenir en ce qui reste; à quoy appartiennent encores en certaine façon les brigues & menees que les Espagnols, & autres ennemis du Roy & de la France ont continuées sans cesse en diuerses façons.

L'Ambassadeur d'Espagne a persisté tousiours ouuertement à soutenir que le Roy estoie impenitent, & qu'il ne le falloit point absoudre en sorte du mode. Et cependât il a eu vn grâd nôbre de supposts qui l'ont serui souu main, ta châs sous autre pretexte à faire que l'absolutiō ne se donast iamais ou le plus tard que faire se pourroit. Dôt les vns faisoiet tout ce qu'ils pouuoiet pour faire encherir les conditiōs, & souz pretexte d'asseurer la Religiō Catholique en Frâce, & de cōseruer la dignité du S. Siege, mettoiet en auât des demâdes qu'ils sçauoiet qu'il ne s'obtiendroiet iamais: & cependât affermoiet au Pape cōtre leurs consciences, que le Roy auoir si grâd besoin de l'absolution, & mesme pour des respects & interests tēporels, qu'il l'accepteroit à telle condition que le Pape voudroit, pourueu que sa Sainteté tint bō, & ne se laissast point aller à la peur qu'on luyfaisoit du schisme, cōme ils disoiet. Autres qui voyoiet la force de la necessité, & la cognoissance que le Pape peut auoir de ce qui se peut obtenir, ou non, seruoiet aud. Ambassadeur d'Espagne d'vne autre façon, en mettât en auât que pour certaines consideratiōs le Pape ne deuoit point dōner l'absolutiō à Rome, mais la deuoit faire dōner en France par vn Legat qu'elle enuoyeroit pour cēt effect: esperâs de trouuer moyé que le Legat ne partirot de quelque tēps; & qu'il seroit longuemēt par les chemins; & qu'auât qu'il fust venu en Frâce, il pourroit suruenir des choses, qui feroiet que l'absolution ne se donneroit iamais. Et nous auōs eu bien grand affaire à nous defendre de ces derniers: mais à la fin nous en sommes venus à bout, & auons obtenu que l'absolution se donneroit à Rome en la façō que ie vous ay predic cy dessus. Or tant plus ces malins esprits s'estudioiet d'empescher ou retarder vn si grâd bien, tât plus nostre S. Pere a fait cōtinuer par Rome les prieres publiques & priuees de tous les gens de bien; & tant plus luy-mesme a esté & est assidu à prier & inuoyer la grace & inspiration du S. Esprit: & outre ses deuotions ordinaires, qui en tout tēps. sont grandes, le Samedy 5. de ce mois feste de la dedication de sainte Marie des neiges, accompagné d'vn petit nombre de ses seruiteurs, il alla tout pieds nuds sur l'aube du iour depuis son Palais de Monte-Cauallio iusques à sainte Marie Major; & là fit vne tres-longue oraison, & y dit la Messe tousiours pieds nuds: & apres vne autre longue oraison, s'en retourna encores pieds nuds en son Palais, tousiours pleurant & tenant la teste basse, sans donner la benediction. ny

regarder personne: & le iour de l'Assumption de nostre Dame. 15. de ce mois retourna en la mesme heure en la susdite Eglise aussi pieds nuds, & y fit longue oraison, & y dit la Messe aussi pieds nuds, & puis y tint la Chapelle de ce iour là, assisté des Cardinaux, qu'il y attendit plus de deux heures, apres auoir acheué les deuotions susdites. Et comme il fait tous les iours quelque nouuelle demonstration de sa deuotio & pieté enuers Dieu, aussi en l'audience que nous eusmes de sa Sainteté ledit iour de Lundy 28. de ce mois, il nous rendit vn tres-grand & insigne tesmoignage de l'estime qu'il fait du Roy, & de la France, & de la paternelle affection enuers l'un & l'autre, comme il vous sera déclaré en temps & lieu plus seur. Apres sa Sainteté, ie ne dois & ne puis taire les bons offices qu'aupres du Pape & ailleurs a fait au Roy & à la France, ou pour mieux dire à la Religion, à la Chrestienté, & en particulier au saint Siege, Monsieur le Cardinal Tolet, par les bons conseils, instructions, & courage qu'il a donné & continué par vn long espace de temps à sa Sainteté, & à d'autres. Tellement qu'il se peut dire avec verité, qu'apres Dieu, qui a fait prosperer le Roy, & inspiré le Pape, ledit seigneur Cardinal a plus fait, & pu aupres de nostre saint Pere, que tous les autres hommes ensemble, pour la fiance que sa Sainteté a en sa doctrine, prudence, integrité, fidelité, & bonne affection enuers elle. Et est chose émerueillable, voire œuvre de Dieu, que du milieu d'Espagne, d'où est issuë toute l'opposition & contradiction à vn œuvre si saint & si necessaire à toute la Chrestienté, Dieu aye suscité vn personnage de si grande autorité, pour procurer, solliciter, acheminer, aduancer & parfaire ce que les Espagnols abhorrent le plus. Il y en a qui ont opinion qu'il ira Legat en Frâce: quand ainsi seroit, les choses ne s'en porteroient que mieux, luy estant personnage de grand entendement, de doctrine eminente, & d'insigne prudence, vertu & valeur, qui cognoistra incontinent la raison, & la prendra en payement, & passera par dessus beaucoup de petites choses, auxquelles vn autre de moindre capacité s'arreteroit & feroit difficulté. Quelques vns, pource qu'il est nay en Espagne, & a esté Iesuite, pourroient penser qu'il voudra procurer quelque chose pour le Roy d'Espagne & pour les Iesuites; mais outre qu'il est homme de bien, & des plus raisonnables, & ne fera que selon l'instruction qui luy sera donnée, il n'a moyen d'enchanter, ny de forcer le Roy ny son Conseil à faire, ny conseiller chose qui ne soit iuste & expediente. Aussi bien tout autre qui sera enuoyé par delà aura les mesmes instructions que luy, & neantmoins ne les executera possible avec tant de discretion & de respect que luy; & ne se contentera pas si tost de raison, & ne fera pas par deçà rapport si favorable des choses de delà, comme luy qui s'y est engagé, & affectionné par vne infinité de bons offices qu'il a faits pour l'acheminement & entiere expedition de cét affaire.

Le 5. de ce mois ie receus la lettre qu'il vous pleut m'escire de Giury pres Chaalons le 16. de Iuillet, avec la copie de la demande de Monsieur de Mayenne, & de la responce qui luy auoit esté faite. Du contenu de laquelle dépêche ie me suis seruy là où il a esté à propos, & vous en remercie tres-humblement. L'affaire du Roy occupe si fort nos esprits, qu'il n'y a place pour y receuoir les autres occurrences de deçà; & partant ie ne vous en



escriray point pour ceste fois: aussi n'y a il pas chose d'importance qui mérite d'estre adioustee à vn affaire si graue, qui requiert nostre soin tout entier. Il ne s'est trouué commodité de vous escrire plustost; & de vous enuoyer courrier exprés, nous n'en auons eu iusques icy assez d'occasion, & ne l'auons deu faire pour les considerations que vous sçaurez avec le reste de nostre negociation: mais nous sommes sur le point d'en auoir occasion dans peu de iours, avec l'entiere resolution & execution de toute l'affaire. Cependant ie prie Dieu qu'il vous donne, &c. Monseigneur, &c. De Rome le Mercredi 30. Aoust 1595.

## A M O N S I E V R D E V I L L E R O Y .

X X V .

**M**ONSEIGNEVR, Comme cét ordinaire estoit sur son partement, est arriué ce matin vn extraordinaire qui nous a rendu vostre dépesche du 20. d'Aoust; par laquelle i'ay veu, comme vous n'auiez receu aucunes lettres de moy depuis celles des 23. & 27. Iuin, & quant & quant en ay cogneu la cause, par la detention que vous m'escriuez auoir esté faite del'ordinaire dernier entre Chambery & Lyon. Que s'il est deliuré avec ses lettres, vous en aurez des nostres du 29. Iuillet; & en tout enuement ie vous ay desia emuoyé le duplicata de celle que i'escriuois à vous, & en mettray avec ceste-cy de celle que i'escriuois au Roy. Au demeurant outre ce qu'il vous a pleu m'escrire, i'ay veu ce que vous auiez escrit à Monsieur du Perron, & vous assure que quelque instance & poursuite qui nous ait esté faite, nous auons eu l'un & l'autre coniointement le soin que vous nous recommandez, de ne passer les bornes de nostre pouuoir au preiudice de la dignité & reputation de sa Majesté, & de la tranquillité de ses subjects; ainsi que vous verrez par les conditions qui ont esté accordees, & que nous vous enuoyons lors que nous vous depescherons vn courrier exprés, auquel me reseruant, ie ne vous feray ceste-cy plus longue, que pour prier Dieu qu'il vous donne, Monseigneur, &c. De Rome ce premier Septembre 1595.

## A M O N S I E V R D E V I L L E R O Y .

X X V I .

**M**ONSEIGNEVR, Cen'a pas esté si tost comme on nous auoit dit, mais ç'a esté ce matin que l'absolution a esté donnee au Roy par nostre saint Pere le Pape, avec toute la solemnité & allegresse publique qui se pouuoit desirer. Et pour vous apporter ceste nouvelle, nous vous depeschons Baptiste Mancini, auquel nous auons ordonné d'aller par chemins seurs, & de ne se traicter pas tant à aller tost, comme de pouuoir ar-

riuer

riuerseurement : & mesme d'aurant qu'outre les lettres que nous vous escriuons à present sur ceste occasion , il vous portera le duplicata des deux precedentes, depesches , la copie de la requeste par escrit que nous presentasmes au Pape, les articles qui ont esté accordez pour obtenir l'absolution, & ceux qui ont esté par nous refusez. Et partant si ledit Mancini n'arriue si tost, il ne luy en faudra rien imputer. Depuis mes lettres du 30. d'Aoust & premier de Septembre, nous auons eu bien à contester & travailler pour conuenir de la forme d'une plus briefue demande qu'on a desirée de nous , & du decret de l'absolution que nostre Sainct Pere auoit à faire de l'abiuration, & profession de foy qu'il nous a fallu faire ce matin immediatement auant l'absolution. Mais en fin tout s'y est passé conuenablement à la dignité de la Couronne tres-Chrestienne, & à la tranquillité qui est necessaire à la France si affligée des guerres ciuiles passees, qui ont esté les deux fins que nous nous sommes proposees en toute ceste negociation, apres l'honneur & gloire de Dieu. Maintenant il reste à faire mettre en forme lesdits actes, & expedier la bulle de l'absolution ; à quoy nous travaillerons en toute diligence, afin que le Roy aye le tout au plustost ; & que sa Majesté & la France en recoient le fruit attendu le plustost qu'il sera possible. Au demeurant les Espagnols ne se sont iamais rendus, et core que le Pape eust déclaré en Consistoire estre resolu de donner l'absolution : & quand ils ont veu ne pouoir plus empescher qu'elle ne se donnast, & à Rome mesme à leur veüe, ils ont fait tout ce qu'ils ont pû pour au moins la retarder ; & puis pour empescher qu'elle ne se donnast en public, & que le Chasteau S. Ange n'en tirast, & qu'il n'en fust fait aucune allegresse publique ; iusques à ce que, disoient-ils, l'ont eust ratifié en France les conditions, & envoyé par deçà vn Ambassadeur, auquel tēps ils estoient d'aduis que ledit Chasteau pourroit triter. Mais il a tiré ce matin, dont ils ont mal aux oreilles ; & se feront à ce soir d'autres signes de resiouissance qui leur feront mal aux yeux. Par ma lettre du 30. d'Aoust, ie vous disois qu'en l'audience que nous auons eüe de nostre S. Pere le 28. d'Aoust, il auoit rendu vn grand tesmoignage de l'estime qu'il faisoit du Roy & de la France, & de sa paternelle affection enuers l'un & l'autre. C'est que sans espargner sa personne, ny la grande depense qu'il luy faudroit faire, ny ses Estars d'Italie qu'il luy couiendrait laisser, il nous offrit de s'en aller en personne en Auignon, & si le Roy se vouloit fier de luy & y venir, luy donner l'absolution en ladite ville ; & quand sa Majesté ne voudroit aller en Auignon, sa Sainteté iroit là où le Roy voudroit, & luy donneroit l'absolution en tel lieu qu'il aduieroit. Nous le remerciasmes tres-humblement & tres-affectueusement de tant d'honneur qu'il vouloit faire à S. M. mais pour la longueur du tēps qui y iroit, & pour infinis accidens qui pourroient suruenir & empescher ce bon voyage, & pour les soupçons & defiances que les choses passees auoient causees, & pourroient renouveler sur ceste occasion es esprits de plusieurs, nous le suppliasmes de vouloir reseruer ceste bonne volonteé à quelqu'autre occasion que le temps pourroit apporter pour quelqu'autre bien general de la Chrestienté ; & donner au plustost à sa M. l'absolution qu'on pensoit estre ja donnée en France à l'heure qu'il parloit. L'esperance que lors que le Roy escriura à sa Sainteté pour la remercier, il

sera bon que sa M. fasse particuliere mention de cét offre de sa Sainteté. Par la mesme lettre du 30. d'Aoust ie vous disois, que nous ne vous auions dépesché Courier exprés pour certaines considerations, dont l'une des principales est, qu'à chaque fois que nous refusions de promettre quelque chose d'importance dont on nous pressoit, & nous excusions sur ce que nostre pouuoir ne s'estendoit iusques-là, on nous disoit que nous enuoyassions vn Courier exprés au Roy; & nous repliquions que pour euitier toutes longueurs, il nous auoit esté deffendu par l'instruction d'enuoyer aucun Courier exprés, iusques à ce que nous enuoyerions l'entiere resolution de toute l'affaire. Le Legat qui ira d'icy n'est point encores resolu, que nous sçachions. Il s'est fort parlé de M. le Cardinal Toletto: soit qu'il aille, ou non, il sera bon que lors que le Roy escriira au Pape pour le remercier, il escriue aussi audit seigneur Cardinal Toletto d'une façon particuliere & propre; & qu'entre autre chose il luy dise qu'apres Dieu & le Pape, il reconnoist tenir l'absolution de luy: vous assurant, Monseig. qu'en cela le Roy n'escriira rien qui ne soit vray; & que sa M. ne pourra iamais le remercier tant, que ce ne soit beaucoup au dessous de son merite; & ie ne vous escrirois cecy avec tant d'assurance si ie ne le sçauois bien. Messieurs les neveux de sa Sainteté y ont aussi fait tout bon office, & mesmement M. le Cardinal Aldobrandin, qui est aussi nommé pour aller Legat vers le Roy. Il s'est aussi parlé de M. le Cardinal Aquaiua, pource qu'il y est quasi tout porté; d'ailleurs est Cardinal fort noble, & doué aussi de qualitez fort nobles. Des autres Cardinaux ceux qui plus ont porté l'affaire de sa Majesté, sont Arrigon, Paleotto, Florence, Verone, Gallo, Sarnano, Morosino, Camerino, Giustiniano, Monte, Montalto, Sasso; & meritent tous quelque clause particuliere. A tant, &c.

Monseigneur, &c. De Rome ce Dimanche 17. Septembre, 1595.

## A MONSIEVR DE VILLEROY.

### XXVII.

**M**ONSEIGNEVR, Par nos dernieres lettres que vous porta Baptiste Mancini dépesché exprés, vous aurez sceu l'absolution donnée au Roy le 17. Septembre: depuis n'est party aucun ordinaire pour Lyon, pour le mauuais traitement qu'on a fait à quelques-vns en Sauoye; & nous n'auons deu vous enuoyer aucun extraordinaire par autre chemin, iusques à ce que nous eussions la Bulle de ladite absolution pour la vous enuoyer. Maintenant qu'on est r'entré en esperance que le passage des Courriers sera cy-apres plus seur & libre, & qu'on est apres à dépescher vn des ordinaires pour Lyon, ie vous escriray sommairement la suite des choses depuis ladite absolution. Et premierement, que comme le temps auoit fort duré à toute ceste Cour & à tout ce peuple, auquel estoit aduis que ce bon iour ne viendrait iamais assez tost, aussi la ioye en fut incroyable; & ne pense pas qu'en ville du Royaume

on en aye esté plus aise que dans Rome. A peine auoit le Pape acheué de prononcer les derniers mots de l'absolution ledit iour 17. de Septembre; que ses trompetes & tambours commencerent à sonner en sa presence, & tout aupres de luy, & l'artillerie du chasteau saint Ange; & s'ouïrent incontinent cris & exclamations de ioye de toutes sortes de gens, par toutes les places & ruës; & veit-on mettre les armoiries de France sur les portes de plusieurs maisons. Il n'y auoit pas iusques aux plus pauvres, qui à peine auoient du pain à manger, qui n'achetassent vn pourtrait du Roy, dont-on auoit auparauant imprimé grande quantité, pour les mettre en lumiere ce iour là. Parmy ceste grande ioye on n'oublia de rendre graces à Dieu: car incontinent apres l'absolution fut chanté *Te Deum*, en l'Eglise saint Pierre mesmes, & y furent faites plusieurs oraisons, & nommément pour le Roy, avec vn si grand concours de peuple qu'il se peut dire. Et cōme Monsieur du Perron & moy sortions de ladite Eglise saint Pierre, Monsieur le Cardinal de Loyeuse, qui nous auoit attendu expressément, nous prit en son coche, & nous mena à saint Louys Eglise des François, où fut chanté vn second *Te Deum*, & dites plusieurs oraisons, semblablement pour le Roy, officiant Monsieur l'Archeuesque d'Ambrun. Et le soir du mesme iour nous allasmes encores à la Trinité du Mont, Conuent des Minimes François, où fut chanté vn troisiésme *Te Deum*, avec plusieurs oraisons aussi pour sa Majesté, faisant l'office Monsieur l'Euesque de Lisieux. Et parrans delà, comme il se faisoit nuit, nous fusmes encores au salut à saint Louys; où le lendemain Lundy 18. fut celebré encores vne Messe en Pontificat, pour la mesme action de graces, officiant ledit sieur Archeuesque d'Ambrun; comme aussi le Ieudy 21. s'en celebra vn autre en Pontificat audit Conuent de la Trinité du Mont, faisant l'office ledit sieur Euesque de Lisieux: à toutes lesquelles deuotions & actions de graces assisterent non seulement les Prelats & Gentils-hommes François, mais aussi bon nombre de Prelats & Gentils-hommes Romains, & vne infinité de peuple, qui en monstroient sentir grande ioye. Aussi à la fin de tous ces actes, il y auoit vne bonne quantité d'artillerie qui tiroit, & les trois premiers soirs force feux de ioye par les ruës, & des lumieres aux fenestres. Le Dimanche 24. qui estoit l'octaue du iour de l'absolution, Monsieur du Perron & moy, & ceux de sa famille, avec quelques Gentils-hommes François, ouïsmes la Messe du Pape, & receusmes de la main de sa Sainteté le corps de nostre Seigneur Iesus Christ, à quoy sa Sainteté nous auoit inuitez trois ou quatre iours auparauant par le Pere Cesare Baronio son Confesseur. Voila vne partie des actions de graces que nous rendismes à Dieu. Nous ne manquasmes aussi de remercier le Pape; & pour cet effect fusmes à l'audience dès le lendemain de l'absolution Lundy 18. Septembre; comme aussi l'allasmes nous remercier le Mardy 26. dudit mois, de l'honneur qu'il nous auoit fait de nous donner à communier de sa propre main. Le Dimanche 24. du mesme mois, en allant à ces audiences, nous fusmes accompagnés des Archeuesques d'Ambrun, & d'Arles, & des Euesques de Lisieux, de Lauaur, & de Grasse, & de tous les Gentils-hommes François qui estoient en Rome, & encores de plusieurs Prelats, Seigneurs, & Gentils-hommes Romains, & autres resplandans en ceste Cour, avec vn grand

nombre de coches. Outre ces deux audiences, nous en eûmes encor<sup>es</sup> vne troisieme depuis l'absolution le 6. Octobre à Frescati, où le Pape alla dès le 28. Septembre pour prendre l'air, & se recreer vn peu de tant de peine qu'on luy auoit donnee pour cét affaire, & mesmement les Espagnols. En chacune de ces trois audiences nostre S. Pere nous tint quasi mesme propos, & la plus grande part sur vn nouveau soucy, auquel il disoit estre entré depuis auoir mis fin à cét affaire, à sçauoir, comme le Roy receuroit ceste grace, & respondroit de sa part à la bonne volonté qu'il auoit trouuee en luy, & au College des Cardinaux, & comme sa Majesté se comporteroit à l'aduenir es choses de la Religion; disant sa Sainteté, que les hommes iugeroient de ceste sienne action selon l'euenement; Que si le Roy receuoit ceste absolution avec la recognoissance & gratitude conuenable, & alloit perseuerant de bien en mieux en la Religion Catholique, on diroit que sa Sainteté auroit bien fait de l'absoudre. Que si sa Majesté faisoit autrement, chacun blasmeroit sad. Sainteté d'auoir mal fait en l'absoluant; & luy mesme en auroit si grande honte & regret, qu'il seroit pouren mourir: comme si en ceste occasion de vacance de Mareschal de France, le Roy l'eust donné à l'EsdiGUIERES, comme il l'a donné à Alphonse Corse, ie serois, disoit-il, tombé à terre mort. Et à ce propos il fit vne longue enumeration des causes & occasions pour lesquelles le Roy se deuoit tousiours porter de plus en plus en Roy Catholique & Tres-Christien, à sçauoir pour la gloire de Dieu, pour le salut de son ame, pour son honneur & reputation, & la profession qu'il faisoit d'estre Prince veritable, & gardant les promesses à qui que ce soit, pour la conseruation de son autorité, & del'obeyssance qu'il desiroit de ses subiects tant à luy qu'à ses enfans, pour le repos & seurété de sa personne, pour la tranquillité de ses subiects, pour la grandeur de sa Couronne, pour le contentement de ses amis hors le Royaume, qui ont tousiours bien dit de luy, & on ont toute bonne esperance, & pour la honte & confusion de ses ennemis, qui ont tant detracé de luy, & qui ne laissent encor d'en mesdire. Nous taschames de luy oster ce soucy, l'assurant que le Roy receuroit le bien que sa Sainteté luy auoit fait avec toute la gratitude qu'elle en sçauoit desirer; & feroit tel deuoir de Roy Catholique & Tres-Christien, que sa Sainteté auroit toute occasion de s'en resioiyr, & de louer Dieu de la resolutio<sup>n</sup> qu'elle auoit en fin prise & executee: & luy remonstrasmes, qu'entre ce que nous sçauions de la sincerité & fermeté du Roy, les mesmes raisons que sa Sainteté nous auoit allegues pour lesquelles sa Majesté deuoit faire ce que sa Sainteté desiroit, luy deuoient aussi faire croire que sa Majesté le feroit, puis qu'elles estoient fondees sur toutes sortes d'interests spirituels & temporels, & que nul ne se vent perdre soy-mesme. Il nous repliqua que quand il auoit parlé de gratitude, il n'auoit entendu parler d'aucun profit sien, ny de personne des siens. Qu'il ne veut rien de particulier de sa Majesté pour sa personne, & ne vouloit aussi qu'aucun des siens prist rien de Prince du monde: mais qu'il desiroit seulement que sa Majesté tint ce qu'elle auoit promis, fust bon Catholique, & correspondist à la bonne volonté qu'il auoit trouuée au S. Siege. Il fut tres-aise de ce que nous luy dismes à Frescati le 6. de ce mois, que le mesme iour qu'il donnoit l'absolution à Rome, le Roy faisoit chan-

l'envoyé de Lyon, pour la nouvelle que sa Majesté avoit receüe de la declaration que sa Sainteté avoit faite en Consistoire d'estre resolu de luy donner l'absolution. Et ne sçauoit sa Sainteté recevoir plus grand plaisir en ce monde, que d'entendre que le Roy a fait quelque chose de bon Catholique : comme au contraire il s'affligeroit extrêmement s'il en entendoit quelque chose de sinistre ; luy estant aduis depuis qu'il a donné l'absolution, que toute la louange & vitupere depend & dependra toute sa vie des comportements de sa Majesté envers la Religion Catholique.

Sur la fin de la premiere audience, il nous dit que nous serions bien d'aller remercier les Cardinaux, qui s'estoient quasi tous monstrez bien disposez en cét affaire. Ce que nous fîmes durant la premiere semaine entre le Dimanche de l'absolution, & le prochain suivant. Lesdits seigneurs Cardinaux, come s'ils eussent tous parlé ensemble, & consulté ce qu'ils auoient à dire, se resiouyrent tous avec nous du bon succez de l'affaire, & monstre-  
rent avoir grande esperance que Dieu en tireroit vn grand fruit pour son honneur & gloire, & pour le bien de la Religion Catholique ; & au reste, s'entendirent comme auoit fait le Pape, en exhortations à la perseuerance, s'offrans de servir le Roy en tout ce qu'il plairoit à sa Sainteté leur commander. Aussi le Pape se laissa entendre envers les Cardinaux, qu'il auroit agreable qu'ils visitassent Monsieur du Perron ; & de fait il a esté visité par cinq, outre Monsieur le Cardinal de Joyeuse qui l'a visité plusieurs fois, non seulement depuis, mais auant l'absolution ; à sçauoir par Messieurs les Cardinaux Morosin, Paleotto, qui est l'un des six Cardinaux Euesques, Toletto, Florence, & Sega : & croy que la plus-part des autres y fussent venus, s'ils n'eussent entendu qu'il n'estoit encores pour partir.

Nous n'auons encores pû auoir la Bulle ; mais nous l'aurons, & la vous enuoyons par homme exprés, auant qu'il se passe huit iours, en estant la minute arrestee avec nous, & se grossoyant en cahyer & en forme de liure. Les causes de ce retardement sont, premierement vne certaine longueur, qui est passée en nature à Rome ; leur estant aduis qu'il n'y auroit rien de bien fait, s'il n'estoit fait lentement & pesamment. Secondement, ils vou-  
loient entendre comment on auroit receu par delà la nouuelle de l'absolution, & des articles accordez, auant que lâcher la Bulle. Pourroit estre encores que le Pape, qui est de nature fort douce, & voudroit contenter tout le monde, & qui a donné au Roy ce que sa Majesté desiroit, a pensé pouoir encores gratifier d'un mois ceux qui par delà estoient après à faire leurs accords, auant que saisir sa Majesté de la Bulle de son absolution. Mais nous, apres auoir vn peu dissimulé, nous en sommes laissez entendre, si bien que nous ne pouons faillir à l'auoir bien tost.

De Legat, il n'y en a point encores de déclaré ; & le Pape nous a dit luy-mesme qu'il n'en veut point declarer iusques à ce qu'il aye receu lettres du Roy, écrites apres auoir receu la nouuelle de l'absolution, & des articles accordez. Possible voudra-t'on attendre à en enuoyer iusques à ce que le Roy ait presté l'obedience ; & cependant sans monstrier que ce soit pour cela, on s'excusera sur l'hyuer qui approche fort, & possible aussi sur le vieil  
age de celui qui deura estre enuoyé. De Nonce, il n'y en a de nommé non plus, sinon que sa Sainteté s'est laissez entendre non pas avec nous, mais

auec d'autres, que pour ceste premiere fois il n'en vouloit point enuoyer, qui ne fust ne subiect d'autre Prince que du Pape mesme. A tant, &c. De Rome ce 22. Octobre 1595.

I'auois escrit ceste lettre, auec intention de la bailler à l'ordinaire de Lyon, qui partit le 27. Octobre: mais pource que nous estiōs si près du parlement de Monsieur d'Elbene, j'estimay la deuoir reseruer pour la vous enuoyer par luy, qui encores pourra suppleer à beaucoup de choses que i'ay obmises, ou dites trop briuelement. Il a tousiours monstré vn grand zele au seruice du Roy: & de fait a seruy sa Majesté en tout ce qui luy a esté possible, & mesmes a fait grande & honorable despense à la venuë, reception, & logement de Monsieur du Perron, comme pour mon particulier il m'a honoré de son amitié.

En toutes les audiences que nous auons eues du Pape depuis l'absolution, sa Saincteté nous a parlé des Iesuites, monstrant vn grand desir qu'ils fussent remis, & que c'estoit vn des plus grāds plaisirs que le Roy luy sceust faire. Surquoy ie n'ay à vous dire autre chose, sinon que si à la chaude ils eussent esté mis hors le Royaume tous, sans qu'il en fust resté vn seul, il n'en eust esté non plus que de ceux qui en furēt lors enuoyez. Mais si maintenant apres vn an, & apres ladite absolution, on mettoit hors le Royaume ceux qui y sont restez iusques icy, les ennemis du Roy en feroient leur profit, & sa saincteté en receuroit vne grande affliction, & en entreroit en quelque desespoir de l'aduenir. A tant, &c. Monseigneur, &c. De Rome. ce 5. Nouembre. 1595.

---

## A MONSIEVR DE VILLEROY.

### XXVIII.

**M**ONSEIGNEVR, Dans 4. ou 5. iours partira Monsieur Delbene, qui vous portera la Bulle de l'absolution, & par luy aussi nous vous escriuons de toutes choses bien amplement, & plus seurement que n'ira ceste-cy, qui sera donnée à l'ordinaire de Lyon, qu'on est apres à despescher. Hier au matin Monsieur le Cardinal Aldobrandin nous chargea de la part du Pape d'escrire au Roy de 4. choses. La premiere est, que sa Saincteté auoit receu aduis pour la seconde fois, que le Roy faisoit presser Monsieur le Cardinal de Lorraine par le sieur de Sancy, de se departir du droit qu'il a en l'Euesché de Strasbourg en faueur de celui de Brédebourg, qui pretēd led. Euesché. Que ceste presse faite au preiudice d'vn catholique & en faueur d'vn heretique, dōnoit vn scandale par delà, & ne respondoit point à la profession que sa Majesté fait de Roy Catholique & tres-Christiē, ny à l'acceptatiō & admissiō que sa Saincteté en a faite depuis vn mois. Que sa Saincteté prioit dōc & exhortoit sa Majesté de ne le faire point, ny autre telle chose qui peut tourner au dommage de la Relig. Cathol. & à l'aceroissement des heresies. Nous luy dismes (comme nous auions fait vne autre fois qu'il nous en parla auant l'absolution par forme de plainte, sans nous parler d'en escrire) que nous n'auions rien entendu de cela, & ne le

trouyons point; ains auions eu des aduis au contraire venus de chez Monsieur de Lorraine mesme; que neantmoins nous ne lairrons d'en escrire suivant l'intention de sa Sainteté, & dudit seigneur Cardinal: cependant nous le supplions de n'en rien croire d'eux non plus. Je vous supplie donc, Monseigneur, nous vouloir escrire ce que nous aurons à respondre là dessus: car outre que les ennemis du Roy continuent tousiours à inuenter des calomnies contre sa Majesté, il pourroit estre encores, que ceux qui pour leur profit desseignent de faire certaines choses qu'ils pensent ne deuoir estre trouuees bonnes à Rome, se voudroient descharger d'une partie de l'enuie sur sa Majesté, comme si elle les y auoit contrainsts.

La seconde chose dont ledit seigneur Cardinal Aldobrandin nous charge de la part du Pape, fut, de prier le Roy d'auoir pour recommandé Monsieur l'Euesque de Carcassone, à ce qu'il iouysse des fruiçts tant dudit Euesché, que d'une Abbaye qu'il a en Champagne; adioustant led. seigneur Cardinal, que sa Sainteté recognoissoit ledit sieur Euesque & le seigneur Horace Rucellay son frere pour ses amis, & pour auoir esté tousiours amis de sa maison, & bien affectionnez à la France. Et quant à ce dernier point, ie vous puis tesmoigner qu'ils sont tenus d'un chacun par deçà pour François de cœur & d'affection, & que i'ay veu moy-mesme ledit seigneur Horace Rucellay (auec qui i'ay plus conuersé qu'avec l'autre) faire, dire & escrire plusieurs choses d'importance pour le seruice du Roy à present regnant, depuis & auant sa conuersion; & qu'en temps bien dangereux il m'a excité, poussé, & encouragé moy-mesme à escrire, & faire des choses, que possible n'eussé-je point escrites alors, sans la presse & sollicitation qu'il m'en faisoit. Ce que i'ay pensé deuoir adiouster icy sur ceste occasion, pour luy rendre ce tesmoignage de verité, sans en estre requis de personne.

La troisieme chose fut, que le Pape desiroit que le Roy conseruast à l'Euesque d'Orange une Abbaye en Prouence, dont ledit seigneur Cardinal ne nous pût dire le nom, de laquelle ledit Euesque auoit esté pourueu il y a trois ans à la recommandation de Monsieur de Mayenne, & en ayant mesme vn breuet de sa Majesté: & neantmoins depuis peu de temps vn d'Auignon en ayant obtenu vn nouveau breuet, auoit depossédé de ceste Abbaye ledit Euesque, qui meritoit compassion pour estre chassé par les heretiques desla cité, & pour ne s'estre autrement meslé des affaires d'Estat en tous ces troubles. Ce sont les mots dudit seigneur Cardinal.

La quatrieme fut, qu'à nostre saint Pere prioit le Roy de vouloir auoir en particuliere recommandation la Religion de Malte, & tenir la main à ce qu'elle iouisse de ses biens, droiçts & priuileges, tant pour la iustice, que pour la noblesse & merites de ceste Religion, & pour les grandes pertes qu'elle auoit souffertes en France durant les troubles. Surquoy nous asseurames ledit seigneur Cardinal de l'estime que le Roy faisoit de cet Ordre, & de la bonne iustice qu'il leur faisoit administrer, tant en demandât, qu'en defendant, contre les pretentions mesmes de son Procureur general & de ses autres Officiers, quand ils poursuiuoient quelque chose au nom & pour l'intrest de sa Majesté; comme il s'estoit veu dernièrement au faict du grand Prieuré de Champagne.

Le Cardinal d'Autriche Albert est depuis peu de iours arriué d'Espa-



gne en la coste de Gennes, en vn lieu du Prince Doria appellé Saono; dont il a enuoyé icy à baïser les pieds du Pape en son nom le fils aîné du feu Prince d'Orange, qu'on a si long temps detenu en Espagne; & à present le dit Cardinal le meine avec soy aux Pays-bas; pour l'opposer au Comte Maurice son frere: auquel neantmoins il est plus tenu de ceste telle quelle liberté dont il iouit à present, & possible de sa vie mesme, que non pas à ceux-là mesmes qui se glorifient de la luy auoir donnée. Le scieur dudit sieur Cardinal en ceste coste-là, & les allées & venuës de plusieurs galeres sous son occasion, sont suspectes à plusieurs, non pour les choses d'Italie, mais pour la France, & particulièrement pour Marseille; attendu l'estat auquel elle est au dedans. Le Cheualier Delfin venu résider Ambassadeur pour la Seigneurie de Venise, arriua en ceste ville le lundy 19. de ce mois. Et me remettant à vous escrire le surplus des autres choses par ledit sieur Delbene, ie finiray icy la presente, en priant Dieu qu'il vous donne, &c. Monseigneur, &c. De Rome ce 25. Octobre 1595.

## A V R O Y.

## XXIX.

S I R E,

SEn la premiere audience que nous eusmes de nostre saint Pere apres l'absolution, qui fut le lendemain d'apres l'absolution vn Lundy 18. Septembre: la Sainteté nous dit entre autres choses, que Monsieur le Cardinal de Ioyeuse auoit fait de tres-bons offices en cét affaire, & que lors que son tour vint de dire sa voix & opinion, non seulement il fut d'aduïs que la Sainteté vous donnast l'absolution; mais aussi il l'en pria tres-instamment, & de le faire au plustost: adioustant qu'il n'estoit pas si ignorant qu'il ne sceust bien que l'absolution donnée presentement frapperait vn grand coup contre son frere, qui porteroit les armes, & se pourroit ruiner avec toute leur maison, & neantmoins il recognoissoit que l'absolution estoit si necessaire au bien de la Religion Catholique, & de la France, & de toute la Chrestienté, qu'au hazard mesme de son propre frere, & de toute leur maison, il supplioit la Sainteté de la donner, sans plus différer. Ce que la Sainteté nous recita ainsi de mot à mot, & l'affirma & iura, en appellant Dieu à tesmoin; & nous dit de plus, qu'il n'y auoit eu rien qui plus l'eust fait resoudre à donner l'absolution promptement, que de voir que celui qui auoit si grand interest à la retarder en tant qu'il pourroit, iusques à ce que son frere fust accommodé, supplioit neantmoins pour l'aduancement & prompte expedition d'icelle, & tesmoignoit vn grand besoin & necessité que la Religion & le Royaume en auoient.

Et depuis en la troisieme audience que nous eusmes le 6. de ce mois à Frescati, où nostre saint Pere estoit allé pour prendre l'air, il rendit le mesme tesmoignage audit sieur Cardinal de Ioyeuse; duquel aussi plusieurs Cardinaux, & mesmes Monsieur le Cardinal Tokio, nous ont as-

seurez

Sçavez qu'il auoit fait semblable office en leur endroit, les informant des choses de la France, & du grand besoin que la Religion Catholique auoit que l'absolution fust donnée au plustost. Aussi fut-il le premier à en chäter le *Le Te Deum* à saint Louys incontinent qu'elle fut donnée, & à dresser les armes de vostre Majesté sur la porte de son Palais, & à faire les feux de ioye & tous autres signes d'allegresse; & à toutes les audiences que nous auons eues depuis, il nous a enuoyé trois de ses coches, entre lesquels estoit son premier, & tous les plus apparens de sa famille pour nous accompagner, & mesmes les Euesques de Lauaur & de Grasse qu'il a logez chez luy: outre que dès le commencement quand le sieur du Perron arriva en ceste ville, il m'enuoya son carrosse, & de ses gens au deuant, m'offrit son logis, & tout ce qu'il pourroit pour le bien de l'affaire, & pour le seruice de vostre Majesté, m'a honoré plusieurs fois de sa uisitation en mon logis, & traité au sien, & donné de bons aduertissemens. Ce que nous auons estimé deuoir par ceste lettre à part tesmoigner à vostre Majesté, à laquelle nous prions Dieu qu'il donne, Sire, en parfaite santé tres-longue & tres-heureuse vie. De Rome ce dernier Octobre 1595.

## A V R O Y.

## XXXV.

SIRE,

Monsieur le Cardinal de Toledo s'est laissé entendre plusieurs fois, que s'il plaisoit à vostre Majesté escrire au Pape de faire Cardinal Monsieur du Perron, sa Sainteté le feroit volontiers à la premiere promotion qui se fera à ces quatre temps du mois de Decembre prochain; adioustant de plus, qu'il scauoir bien ce qu'il disoit, & qu'il ne parloit point sans fondement; & m'en parlant à moy-mesme, m'a exhorté d'en escrire à vostre Majesté. Et pour ce qu'il est Cardinal tres-graue, ie ne puis penser qu'il aduance telle chose sans le consentement du Pape, qui luy en doit auoir tenu propos, & s'en estre déclaré à luy. Par ainsi obeyssant au commandement dudit sieur Cardinal, & conforté par la vertu & doctrine eminente de mondit sieur du Perron, & par sa singuliere deuotion & zele à vostre seruice, que j'ay veu en nostre commune negociation, i'ay pris la hardiesse de faire scauoir à vostre Majesté ce que ledit sieur Cardinal m'en a dit. A quoy ie n'adiousteray autre chose, sinon qu'outre qu'au iugement de tous ceux de deçà ceste dignité seroit tres-bien colloquée en vn si rare personnage, il semble que ce soit vn present que nostre saint Pere face à vostre Majesté, à la grandeur & reputation de laquelle il semble appartenir, que sa commission aircellé tant vltimes de ce saint Siege, que celui qui a esté le principal instrument de son instruction, & qui est venu demander, negocier, & impetuer vostre absolution, aie esté honoré & récompensé par led. saint

N

Siege de la dignité la plus grande que le Pape puisse donner. Que si i'estois tel que mes priores deussent trouver grace enuers V. M. ie les adiousterois icy tres-volontiers, pour la grande estime & admiration en laquelle i'ay les vertus & le sçauoir de mondit sieur du Perron. Comme aussi si ie pensois auoir en lad. negociation fait chose, dont V. M. me deust sçauoir quelque gré, ie le presterois volontiers, ains le donnerois tout à mondit sieur du Perron, pour le voir d'autant plus tost honoré de l'intercession de vostre Majesté, & de la dignité qui luy en doit aduenir. A tant, &c. De Rome ce 4. Nouembre 1595.

## A MONSIEVR DE VILLEROY.

### XXXI.

**M**ONSEIGNEVR, Il y a assez long temps que ie vous donnay m'auoir faite de sa bonne affectio au seruice du Roy : depuis il a toujours continué en ceste bonne volonté, & fait tout ce qu'il a pû pour le seruice de sa Majesté. Maintenant il se plaint d'un trouble qu'on luy fait en la iouissance de l'Abbaye de Mont-majour lez Arles, & d'une euocation qui a esté accordée ces iours passez à sa partie aduersé, pour transferer la cause du Parlement, qui estoit son vray siege, au grand Conseil; & a desiré que ie vous en fissé entédre ses raisons, estimât possible qu'elles en seroient mieux prises; ce que ie n'ay pû ny deu refuser. Il dit doncques, qu'ayant vâqué ladite Abbaye par le decez de Monsieur Cornalby Archeuesque d'Auignon, il en fut pourueu par nostre saint Pere le Pape, comme estant l'Abbaye assise au pays de Prouence, non compris es Concordats, & n'ayant le Roy indult pour nommer aux Eueschez & Abbayes dudit pays de Prouence; & ne le pouuoit alors auoir, pource qu'il n'auoit encores alors fait profession de la Religion Catholique. Qu'en vertu de ladite prouision, & par auctorité du Parlement d'Aix il a pris possession de ladite Abbaye, & l'a continuée bien pres de trois ans, & y a esté maintenu par arrest de lad. Cour, à laquelle iugement en appartenoit. Que lad. euocation & poursuite qui se fait audit grand Conseil, est non seulement contre les ordonnances, mais aussi contre l'esperance qui est donnée au Pape de contenter sad. Sainteté en tout ce qui se pourroit, touchant les prouisions faites par sad. Sainteté pendant les troubles passez, & de laisser cependât les choses en l'estat. C'est le sommaire qu'il dit touchant le droit en fonds, & la formalité & procédures. Au demeurât il adioute qu'il est gentil-homme de fort bonne part, & descendu de parens qui ont scrui nos Roys & le publicen l'une & l'autre robbe tres-dignement. Qui a encores ce honneur d'auoir esté Conseiller des deux derniers Roys, & d'estre vn des plus anciens Prelats non seulement de la France, mais aussi de toute la Chrestienté. Qu'en quelque part qu'il ait esté pendant le mauvais temps, qui a couru depuis six ou septuain,

il ne se trouuera qu'il aye iamais fait, ny conseillé, ny dit rien de violent, ny d'aigre; ains qu'il a toujours tendu à vne bonne paix & concorde. Que pour ces considerations & autres il a occasion d'esperer tout bien & honneur de la bonté de sa Majesté, non de craindre qu'il luy soit osté ce qui luy est iustement acquis. Qu'aussi n'a-il voulu, & ne veut recourir à l'intercession de nostre saint Pere, orés qu'il soit tout porté sur les lieux, & qu'il luy seroit fort aisé d'obtenir de sa Sainteté toute la recommandatiō qu'il en scauroit desirer; ains attend la conseruation de son bon droit, & l'empeschement de toutes voyes induës de la iustice & equité de sa Majesté, & de vostre bonne entremise. A quoy ie n'adiousteray autre chose, sinon que i'estime la personnedigne de toute faueur, n'y ayant iamais veu que tout bien & honneur; & qu'il est expedient pour la reputation du Roy, en ces quartiers mesmement, que tels Prelats & autres personnes Ecclesiastiques soient conseruez & maintenus en leurs biens & droicts, & que vous, Monseigneur, en ce que vous pourrez y tenir la main, comme vous auez toujours fait & faires en toutes choses bonnes & loüables. A tant, &c. De Rome ce 4. Nouembre 1595.

## A MONSIEUR DE VILLEROY.

## XXXIV.

**M**ONSEIGNEUR, ie ne pense deuoir rien adiouster icy à la Lettre que j'escri au Roy, sur ce que Monsieur le Cardinal Tolet m'a dit touchant Monsieur du Perron, pour ne paroistre presomptueux, & ensemble déliant de la protection en laquelle vous auez toujours eu les personnes de merite; sinon que ledit seigneur Cardinal m'a dit de plus, que voulant le Roy entendre à ceoy, il fera bon qu'outre la lettre qu'il plaira à sa Majesté escrire au Pape, il luy en fois escrit aussi à lay vn mot, pour en prier sa Sainteté, & encores vn autre mot à Monsieur le Cardinal Ando brandin à mesme fin; & que les trois lettres soient icy à temps pour tout le 7. iour du mois de Decembre prochain. Il y a encores vne chose à considérer, c'est que si le Roy n'escriuoit à ceste fois pour mondit sieur du Perron, sa Majesté n'auroit aucune part en la prochaine promotion: Car de ceux de delà mal-aisement en ferait le Pape, avant que s'en eust bien informé, ny possible avant que le Roy ait presté l'obedience. Mais sa Sainteté fera mondit sieur du Perron, pour estre icy present, & ja cognen, & estimé, & pour y auoir fait ce qu'il a fait, outre ce que ledit seigneur Cardinal Tolet m'a dit. A tant, &c. Monseigneur, &c. De Rome ce 4. Nouembre 1595.

## A V R O Y.

## XXXIII.

SIRE,

Vostre Majesté recevra par le sieur Delbene la Bulle de son absolution, qui est la dernière chose que nous avons à procurer en cét affaire. De façon qu'à présent il ne nous reste à y faire autre chose qu'à louer & remercier Dieu, comme j'ay fait de tout mon cœur, de la bonne issue qu'il luy a plu vous donner, conformément à ce que j'en avois prédit il y a dix mois, lors que vostre Majesté me commanda de luy en écrire ce que j'en pensois; & à prier encores sa divine bonté, qu'il luy plaise vous faire la grace d'en recevoir, tant en vostre personne, qu'en vostre posterité, le fruit que tous les gens de bien vous en desireront, & qu'il vous donne, &c. de Rome ce 5. Novembre 1595.

## A MONSIEUR DE VILLEROY.

## XXXIV.

MONSIEUR, Avec la Bulle de l'absolution du Roy que Monsieur Delbene vous porte, vous aurez des memoires sur le contenu d'icelle, & sur ce qu'il semble qu'il faudra faire par delà, & sur certaines choses qu'on s'est laissé entendre desirer par deçà. J'avois encores à vous envoyer plusieurs escritures qu'il nous a fallu faire & bailler au Pape pendant nostre négociation, pour vaincre certaines difficultez: mais pour ce qu'elles ne sont encores traduites d'Italien en François, & qu'à present nous avons la fin desirée pour laquelle elles se faisoient, ie n'en ay voulu charger le paquet. Or la Bulle estant expédiée, & à nous consignée pour la vous envoyer, ce grand affaire est achevé par deçà; ce sera maintenant à vous de delà à y faire ce qui reste de vostre costé. Loué soit Dieu, qui a conduit tout si bien, qu'il ne m'en reste aucun scrupule. Bien pourroit-il estre que par delà toutes choses n'auroient esté trouvez bonnes de nous; comme il y en a eu par deçà de nos amis qui se sont offensés outre mesure, principalement contre moy, de la secrettesse dont nous avons esté contraincs d'vler, telle, que tous nos articles estoient accordez, avant que nul de nos plus intimes sceust que nous eussions commencé d'en traiter; tant s'en faut que le Pape ny les siens ayent jamais pu d'escouter, comme ils estoient apres, ce que nous avions, pouvoions, ou desseignions; ny que les Espagnols, qui estoient tousiours aux aguets, ayent pu penetrer ce qui se traitoit en particulier; desquels il y eut deux Cardinaux, qui le matin du Consiistoire du Mercredi 30. d'Aoust, auquel le Pape declara qu'il estoit

resolu d'absoudre le Roy, dirent à Monsieur le Cardinal Tolet, avant que le Pape descendist au Consistoire, que c'estoit grand cas, que nous ne voulions recevoir aucun mandement ny penitence; ains disions que le Pape nous donnaist l'absolution s'il vouloit, sans autre chose, autrement nous nous en irions. Et à demie heure de là, au lieu mesme où ils auoient dit telles choses, ils ouïrent le Pape recitant toutes les conditions dont nous estions demeurez d'accord. Ceste secretesse entre autres choses a esté le salut de l'affaire, qui autrement ne se fust faite, ou non si tost, ny à si bonnes conditions. Par ainsy, ecores que l'emie en soit tombee toute sur moy, ie ne m'en puis repentir. Il se presentera d'autres negociations, dont on pourra faire part aux amis, comme ie sçay qu'il est expedient qu'on le face par fois, quand ce ne seroit que pour monstrer d'en tenir compte, & pour les retenir en bonne affection: mais ceste-cy pour infinis respects ne pouuoit estre tenuë trop secrette en pas vne de ses parties. Je louë Dieu encores vne fois de tout, & le prie qu'il vous donne, Monseigneur, &c. De Rome ce 5. Novembre 1595.

A MONSIEUR DE VILLEROY.

XXXV.

**M**ONSEIGNEUR, Le septiesme de ce mois Monsieur Delbene partit d'icy pour aller porter au Roy la Bulle de l'absolution, & nous pensâmes qu'il arriueroit près sa Majesté pour tout ce mois: mais nous auons entendu depuis son partement, qu'il n'auoit pû faire toute la diligence que nous esperions, & que luy-mesme desiroit. Nous n'auons receu aucune lettre du Roy, ny de vous, depuis celle que vous nous escriuistes de Lyon le 24. Septembre; dont le Pape, & Messieurs les neveux, & tout le Palais, ains toute ceste Cour s'esbahissent, & mesmes d'autant qu'ils sçauent d'ailleurs que le Roy receut la nouvelle de son absolution dès le premier d'Octobre, & ne peuvent comprendre comment il s'est pû faire, qu'en ces deux mois le Pape n'ait redonné au moins vne petite lettre de remerciement de sa Majesté: sur quoy les Espagnols & leurs adherents trouvent des propos conformes à leur ancienne malice. Nous respondons, que sur la nouvelle que le Roy receut à Lyon de la declaration que sa Sainteté auoit faite en Consistoire d'estre resolu à l'absoudre, sa Majesté monstra avec combien elle estimoit sa benediction, par l'action de graces qu'il rendit & fit rendre à Dieu de ceste resolution par tout son Royaume, & par celle qu'il nous commanda d'en rendre à sa Sainteté: & en outre de faire enuoyer elle, & enuoyer tous autres à qui il appartiendroit, tous complimens & offices, en la meilleure façon dont nous pourrions nous aduiser, comme nous fîmes. Or lors qu'il receut à Paris la nouvelle de l'absolution, il en fit de nouueau chanter vn *Te Deum* en toutes les parroisses de Paris, & par tous ailleurs. Qu'il ait esté, si sa Sainteté n'a pour encores receu de ses lettres, il ne s'en faut point esmeruiller, puis qu'on sçait aussi que lors que

les courriers qui porterent ceste nouuelle arriuerent, la Majesté ne vous auoit point auprès d'elle, vous estant demouré à Lyon apres son parlement; pour y acheuer certaines affaires. Que la Majesté estoit fort pressée pour le secours qu'elle s'apprestoit de donner aux siens qui estoient dedans Cambray, & que pour sçauoir quoy & comment escrire, elle auroit iuste occasion d'attendre la Bulle de l'absolutiō, que nous-luy auions escrit que nous luy enuoyerions dans peu de iours: & mesmement la Majesté n'ayât receu aucun brief ny lettres de la Sainteté, ny de Messieurs ses nepueux, en response des siennes, ny autrement; qui sont raisons tres-pertinentes. Toutesfois il ne s'en veut contenter. Monsieur le Connestable en escriuit dernièrement vne tres-bonne lettre de remerciement au Pape, laquelle donna grand contentement à la Sainteté, & a aidé à soustenir vn peu l'attente de celles de la Majesté. Au reste toute ceste Cour, excepté les Espagnols, continuent à monstrier grande inclination aux choses de France, & au bien des affaires du Roy, & ont porté aussi mal-aisément la perte de Cambray, comme on sçauroit auoir fait dans Paris. Apres auoir esté vn fort long tēps sans pouuoir croire quelques nouuelles & lettres que les Espagnols y fissent courir, on y a esté aussi en fort grand soucy de Marseille, iusques à depuis 3. ou 4. iours, qu'il vint nouuelles de Gennes, non encores certaines, que Gasan y auoit esté tué, & la ville assurée au Roy. Aussi y a icy lettres de Malte, qui portent que le Grand-maistre, combien qu'il soit Espagnol de nation, & toute la Religion en corps, ont fait grande allegresse pour l'absolution du Roy, & ont chanté le *Te Deum*, célébré vne Messe solennelle du S. Esprit, tiré de l'artillerie, fait des feux de ioye & député des Ambassadeurs, pour aller de la part de tout l'Ordre s'en conioiūr avec S. M. & luy offrir tout seruice. Le Cardinal d'Autriche est party de la coste de Gennes, où il s'est entretenu long temps; & s'est acheminé vers Thurin pour s'en aller par la Saouye & par la Franche-Comté en son gouuernement du Pays-bas. Des gens qu'il meine, & de la quantité d'argent qu'il fait conduire avec soy, on en parle fort diuersement: mais puis qu'il a à passer si près du Royaume, vous en pourrez estre mieux aduertis de là mesme, & possible l'en descharger d'une partie. Il a esté, & est fort visité là où il sejourne, & par là où il passe, de personnes de grande qualité: quelques-uns appellēt cela abouchements, pour parler, & conspirations contre la France, & particulièrement contre Marseille. Mais cōme plusieurs se peuuent mouoir à faire tels complimens avec luy par seule courtoisie, & par le respect & reuerence qu'ils portent à sa maison & à sa dignité, autres pour submissiō, obligatiō, & seruitude qu'ils ont au Roy d'Espagne; aussi bien se peut dit & assuré vne fois pour toutes, que les Espagnols & leurs adherents, tant séparément que coniointement, p. sent tousiours à nous mal-faire, & qu'il se fait continuellement garder d'eux, lors mesme qu'on ne voit rien de telles allées & venues. Si M. d'Espéron s'est bouché à Antibes avec le sieur Ioseph de Cugno Ambassadeur du Roy d'Espagne près de M. de Saouye, comme il a esté escrit de Gennes, vous en aurez esté plus tost, & mieux aduertis par delà. Le sieur de Glezenou Secrétaire de M. de Lorrains est arrivé icy depuis le jour, pour rendre cōpte au Pape d'accord de morid, sieur de Lorrains avec le Roy, & de M. le Cardinal son fils avec celui de Brandebourg son oncle.

rent en l'Euesché de Strasbourg. Peu auparavant estoit arriué l'Euesque de Plosquen en Pologne, venu seulement, comme l'on dit, pour s'acquitter de l'obligation que par certaines Bulles les Euesques ont de venir de temps en temps visiter le saint Siege, & rendre compte au Pape de leur administration : & peu apres cestuy-cy arriuerent deux Euesques de Russie, enuoyez par le Clergé de ce pays-là, qui ayans iusques icy vescu à la Grecque à la Religion Chrestienne, se veulent cy-apres assubiecir à l'Eglise Latine, & se souzmettre au Pape. Monsieur le Duc de Mantouë est de retour chez luy de son voyage de Hongrie. Le Pape a esté en quelque deliberation d'en appeller le seigneur Iean François Aldobrandin; mais en fin il s'est resolu de le laisser hyuerner en ce pays-là, afin qu'il se trouuast plus près, & plus prest à faire quelque chose de bon au Printemps prochain, si l'occasion s'en presente d'ailleurs. Cependant le seigneur Paul Sforza Lieutenant dudit seigneur Iean François, & les Seigneurs Ascanio Sforza, & Marco Pio s'en retournerent. Le Comte de Mirande Viceroy de Naples est prest à s'en retourner en Espagne, & le Comte Oliuares luy succede, venant de faire la mesme charge de Viceroy en Sicile, où il fut enuoyé partant d'icy, où il auoit esté long temps Ambassadeur residant. Monsieur le Cardinal Sforza, qui a esté long temps absent de Rome, est à present de retour depuis Mardy au soir 28. de ce mois. Quand Monsieur du Perron passoit à Bresse en venant icy, ledit seigneur Cardinal luy escriuit, & luy fit parler par vn seigneur du pays, s'offrant à luy en tout ce qu'il pourroit faire pour l'expedition de l'affaire pour laquelle ledit sieur du Perron venoit, mesmes de venir à Rome expressement, & laisser là toutes ses affaires; & depuis il nous en escriuit autant à tous deux. Cela merite vn particulier remerciement du Roy, outre le commun que sa Majesté fera à vns & autres du College des Cardinaux. Monsieur du Perron a vn peu de mal d'yeux; & pour ce i'ay seul visité ce iourd'huy ledit seigneur Cardinal Sforza, & l'ay de nouveau remercié au nom du Roy de cét affaire, & de la bonne affection qu'il monstre au seruice de sa Majesté, & au bien de la France; outre que respondant à ses lettres, nous l'en auons ja remercié. A tant, &c. Monseigneur, &c. De Rome ce 30. Nouembre 1595.

## A MONSIEVR DE VILLEROY.

## XXXVI.

**M**ONSEIGNEVR, Depuis le partement de Monsieur Delbene, qui s'en alla porter au Roy la Bulle de son absolution, ie vous escriuis par l'ordinaire de Lyon le 30. Nouembre; & estant arriué le courier Valerio le premier iour de ce mois enuiron midy, ie vous escriuis le soir mesme, vous aduertissant de sa venuë, & de l'audience que Monsieur du Perron & moy auons eue, & de la ioye que vostre dépesche auoit causee au Pape, à tout le Palais, & à tout ce peuple. Maintenant pour continuer à vous rendre compte de ce qui est ensuiuy depuis, ie vous diray qu'au premier Consistoire que nostre S. Pere tint apres, qui fut le Lundy 4. iour de ce mois, il fit lire la lettre que le Roy luy auoit escrete de sa main, laquelle



fut trouuée merueilleusement belle, & apporta vn contentement infiny à tout le College, & ferma la bouche à ceux qui auoient commencé à mal parler, & à mal prognostiquer de ce que le Roy auoit tant tardé à escrire. Aussi à la verité il ne se pouroit faire vne depesche plus à propos, ny plus accomplie que celle qu'apporta ledit Valerio, tant pour le regard du Pape & des Cardinaux à qui le Roy a escrit, que de ce qui a esté mandé au Euesques du Royaume, pour les exhorter à faire rendre graces à Dieu. Laquelle seule lettre ainsi enuoyee aux Prelats, aura sans autre chose seruy de publication de l'absolution du Roy, que nous disions, par les memoires que vous a portez Monsieur Delbene, qu'il seroit bon de faire faire par toutes les parroisses du Royaume; & ne sera plus besoin d'en faire autre publication. Le contentement qu'eurent les Cardinaux d'oüir lire la lettre du Roy au Pape, a esté augmenté, parce que depuis nous les auons tous visitez de la part de sa Majesté, & par l'aduiz mesme de sa Sainteté les auons remerciez, excusé enuers eux le retardement de cet office, promis la continuation & accroissement de la deuotion du Roy à la Religion Catholique, Apostolique & Romaine, & à ce saint Siege, rendu compte de la deliurance de Monsieur le Prince de Condé des mains de ceux qui l'instruisoient en l'heresie, pour le faire nourrir & esleuer en la Religion Catholique, & offert à chacun d'eux tout ce que sa Majesté pourroit, tant pour le general de tout le College, que pour le particulier d'un chacun d'eux; outre que nous auons rendu les lettres à ceux à qui le Roy escrivoit. Tous lesd. Seigneurs Cardinaux ont receu ce compliment avec grande demonstration d'aise, de l'honneur que le Roy leur faisoit, & de l'esperance qu'ils disoient recevoir de sa Majesté pour l'aduenir, en toutes choses qui appartiendroient au bien de la Religion Catholique, & du saint Siege, & de toute la Chréienté; avec offres aussi & promesses tres-expresses de seruir sa Majesté en tout ce qui se presenteroit. Outre l'audience que nous eumes du Pape & de Messieurs les neueux, le iour mesme que Valerio arriua, laquelle ne fut que sur la gratitude avec laquelle le Roy auoit receu l'absolution, dont nous mesmes à sa Sainteté tous les tesmoignages que nous en auôs, nous eumes vne autre audience le Vendredy ensuiuant 8. de ce mois, en laquelle nous rendismes particulier compte au Pape de la malice & violence des Espagnols en toutes ces choses, dont le Roy nous escriuoit par sa lettre du 17. Nouembre, & puis, comme de nous mesmes, nous mismes en consideration à sa Sainteté, s'il ne luy sembloit pas bon de faire faire quelque office de sa part enuers Monsieur d'Espernon, & ceux de Marseille, par Monsieur le Cardinal Aquauina; & luy fismes bien sentir l'intérest que toute l'Italie y auoit, & luy particulierement. A quoy sa Sainteté nous dit auoir ja fait quelque chose, sur la priere que nous en auons faite de nous mesmes au Cardinal Aldobrandin, plus d'un mois auant que led. courrier Valerio arriuaist, & qu'il verroit encores ce qui s'y pourroit faire cy-apres: cependant nous disoit, qu'il luy sembloit qu'il n'estoit bon de trop presser le Consul Casau, de peur que cela ne le fist precipiter à quelque inconuenient irremediable. Nous fussions retournez à l'audience Vendredy dernier 15. de ce mois: mais le Mercredy auparavant la goutte suruint au Pape, laquelle luy dura encores. Au departant, j'ay dit au seigneur Giulio Gualtero

sero maistre des postes du Pape, ce qu'il vous pleut m'escrire par vostre lettre du 18. Nouembre; lequel me sembla en demeurant content, en attendant que le Roy aye plus grande commodité. Quant à l'estat de Maistre des courriers de France, dont il vous plaist m'escrire par vostre autre lettre du 17. ie ne sçay bonnement que vous en dire. D'un costé le courier Baptiste Mancini est fort affectionné au seruice du Roy, & a beaucoup travaillé; & pour recompense de ses seruices a obtenu le premier cét office, & a breuet & lettres. D'autre costé, à la recommandation de Monsieur le Duc de Toscane en a esté obtenu vn breuet par le sieur François Paul Sancti Florécin, que ie ne cognois point; mais on m'en a fait fort bon rapport: & le seigneur Hierosme de Gondy m'escriuit au mois d'Aoust dernier fort exprellément & amplement, dont i'ay encores la lettre, que le grand Duc prédroit en fort mauuaise part, si ce qui auoit esté accordé pour son respect n'auoit effect; & mesmes d'autant qu'on pretend que ledit Sancti est personnettes-bien qualifié pour dignement gérer ceste charge; & que Mancini ne l'est point, pour ne sçauoir pas seulement escrire & faire registre qui seroit necessaire; & que pour cela il a mesme delibéré quand cet estat luy sera assuré, d'en prendre recompense de quelqu'un, à qui il espere le resigner sous le bon plaisir du Roy: par ainsi ie m'en remets au temperament qu'il vous plaira y prendre, apres que vous aurez pesé toutes ces considerations de part & d'autre. Monsieur du Perron fut pouruen de l'Euesché d'Eureux à la nomination du Roy au Consistoire du Lundy 11. iour de ce mois. Le Pape proposa son affaire luy-mesme, avec termes d'honneur, & de grande louange; & tous les Cardinaux sans aucun contredit furent d'avis non seulement de la prouision, mais aussi de la remise de tous les droits qui leur viennent tant à eux qu'aux autres, avec grand applaudissement de tout le College ensemble: & ainsi le Roy est entré en possession de nommer, & le Pape de pouruoir aux benefices Consistoriaux de France. Il n'y a point encores de Legat déclaré pour France: mais en l'audience que nous eumes du Pape le 8. de ce mois, il nous dit qu'il feroit bien tost la declaration d'un Legat ou Nonce, car ainsi parla-il. Et nous luy respondimes ce que le Roy nous auoit escrit; qu'il sera bon d'attendre que M. d'Eureux fust arrivé par delà, afin qu'à l'arrivée dudit Legat toutes choses s'y trouuassent en meilleur estat: à quoy la Saincteté ne repliqua rien. Cependant j'incline à croire que pour peu qu'on entende que Monsieur le Cardinal Aquauia vous soit agreable, on l'enuoyera luy plustost que tout autre, pour la facilité qui se trouuera en luy plus grande que nul autre.

Le Pape est encores en pensément d'enuoyer vn autre Legat en Pologne, & en Transilvanie, pour composer quelques differens qui sont entre ces deux Princes, & les bien venir ensemble contre le Turc, duquel les affaires vont fort mal en ces pays là, & sont tousiours fort mal allees depuis son aduenement à cét Empire. On a icy dessein d'exciter tous les Princes Chrétiens contre luy, & mesme le Roy; & pour cela on desire procurer vne suspension d'armes entre le Roy & le Roy d'Espagne la plus longue que faire se pourra; pour autant qu'on estime qu'il y auroit trop d'affaire à mettre vne paix entr'eux. Et pource qu'il seroit fort mal-aisé de faire conuenir & d'écarter en vne ligue tous les Princes Chrétiens, on a desseigné de persuader

aux Princes confins avec le Turc, de luy faire tous la guerre en mesme temps, chacun neantmoins de son costé, & à son profit, prenant ce qu'il pourra, & d'exhorter les autres Princes qui ne confinent point avec ledit Turc, d'aider ausd. confins: à prester lequel secours & aide, le Pape sera luy mesme le premier pour donner exemple aux autres. Il y a icy nouvelle comme le Cardinal Albert d'Austriche arriua à Thurin; & se trouue mes- huy aussi près de vous que de nous icy; de façon que vous en pouuez sçauoir autant ou plus que nous. Le soupçon & la crainte de Marseille s'est renou- uellée par deçà, depuis qu'on a entendu que la nouvelle qui auoit couru de la mort de Casau n'estoit point vraye. Les deux Euesques de Russie, dont ie vous escriuis dernièrement, sont tousiours icy, & vacque-t'on à la reconci- liatio du Clergé de ce payslà avec le S. Siege. Mōsieur d'Ambrac qui vous rendra la presente, est vn fort hōneste personnage, & mon bon seigneur & amy, qui s'en va par delà. Nous auons vſé de ceste commodité pour vous escrire, tant plus volōtiers que l'ordinaire pour Lyon ne sçauoit estre de- pesché de 15 iours, n'estât encores arriué celuy qui deuoit venir de Lyon il y a 12. iours. Led. sieur d'Ambrac a esté long temps par deçà à la poursuite d'un procez que M. l'Euesque de Rhodéz son frere a cōtre la ville de Rho- dez, ou pour mieux dire cōtre ceux qui y ont commandé pendant les der- niers troubles. Et pource que ce differend particulier n'est qu'une depen- dante ou accessoire du trouble vniuersel qui a infecté tout le Royaume, & qu'à present tāt led. sieur Euesque, que lad. ville recognoissent le Roy, souz l'autorité & protection duquel ils peuēt meshuy viure ensemble seure- ment & paisiblement, i'estime que le Roy feroit vne œuvre digne de sa Ma- jesté de faire à ce qu'ils s'entre-compaissent ensemble, sans plus quereller entr'eux, ny plaider hors le Royaume, & que chacun retournast à son de- uoir: ne pouuant y auoir entr'eux, quoy qu'il y ait, vn plus grand differend que tant d'autres qui se sont composez en la France depuis deux ans, & en- tre parties de plus grande qualité qu'ils ne sont; ayant le Roy mesme de sa part englouty tant de choses, que nuls de ses subiects ne se peuēt meshuy excuser de viure en paix entr'eux, & de s'entr'accorder, de choses mesme- ment aduenues par occasion des troubles passez. Aussi croy-ie que vous trouuerez la chose digne d'y tenir la main en tantqu'il sera en vous, comme vous auez accoustumé de favoriser & aider tousiours à toutes choses bon- nes & louables. I'oublois à vous escrire que nostre S. Perene feroit point de Cardinaux à ces quatre temps prochains, comme on s'attendoit; & nous a-t-on dit que sa Sainteté ayant donné l'absolution au Roy, a estimé ne de- uoir faire promotion en laquelle sa Majesté n'eust sa part; & que pour dō- ner tēps à sad. Majesté d'auiser quels personnages elle voudroit estre pro- meus, sa Sainteté differe la promotion iusqu'à la Pentecoste. C'est bien chose toute assuree qu'il a esté fait office enuers sa Sainteté, à ce qu'elle differast pour led. respect de sa Majesté. Si le Roy continuē aux occasions d'escrire comme il a cōmencé avec demonstratio de tous respects & gra- titude, il obtiendra de ceste Cour la plus-part de ce qu'il en desirera. A tāt, &c. Monseig. &c. De Rome ce 18. Dec. 1595.

## LIVRE SECOND.

ANNEE M. D. XCVI.

A MONSIEVR DE VILLEROY.

XXXVII.

**M**ONSEIGNEVR, Le 23. Decembre ie recens la lettre qu'il vouspleut m'escire le 29. Novembre, & le 5. de ce mois receus celle du 12. Decembre. Monsieur d'Eureux & moy auons dit à Monsieur le Cardinal Aldobrandin les responses qu'il vous a plu me faire aux 4. poincts dont ie vous auois escrit par mandement dudit seigneur Cardinal touchant l'Euesché de Strasbourg, & les Euesques de Carcassonne, & d'Orange, & l'Ordre de S. Iean de Hierusalem; desquelles responses ledit seigneur Cardinal est demeuré fort content. Et sur l'occasion du premier poinct concernât l'Euesché de Strasbourg, nous l'auons supplié de iuger par là de la malice des ennemis du Roy, qui inuentent telles calomnies contre sa Majesté, & se garder de leur adiouster foy apres, & de vouloir encores tenir la main en tant qu'en luy seroit, à ce que nostre S. Pere ne fust circonuenue par eux; ce qu'il a promis de faire. Aussi auons nous fait office à ce que le Pape ne trouuast mauvais que le Roy entretinst & employast ses anciens amis au grand besoin qu'il en a à ceste heure. Sur quoy vous iugerez assez de vous mesme qu'il ne faut s'attendre que le Pape l'approuue par paroles expresse: mais il l'excusera tousiours en son cœur, pourueu qu'au reste le Roy, en ce qui concerne la Religion, face toutes choses conformément à la profession de Catholique qu'il fait, & au tiltre de Roy tres-Chrestien qu'il porte; & qu'en ce qui appartiendra au respect & dignité de sa Sainteté & du S. Siege, sa Majesté se monstre memoratiue & recognoissante du benefice de l'absolution receu du S. Siege Apostolique. Au demeurant, sa Majesté ne doit faire difficulté d'employer en ceste guerre si iuste toute sorte de gens, pour la defense de sa personne, & de son Royaume; & de penser autrement, seroit non seulement simplicité en matiere d'Estat, mais encores superstition en matiere de conscience: puis que les Theologiens les plus scrupuleux qui ont escrit des cas de conscience, tiennent qu'un Prince Chrestien en guerre iuste, & en cas de necessité, peut licitement & sans peché s'aider pour la defense du secours des infideles. Quant à ceux qui murmurent par delà contre la forme qui a esté tenuë en la reconciliation du Roy & du Royaume avec nostre S. Pere, & avec le S. Siege, & qui ne voudroient pas mesmes

qu'on eust recherché ny accepté aucune absolution du Pape, pour le préjudice qu'ils prétendent y avoir esté fait à l'autorité & liberté de l'Eglise Gallicane, & à la dignité de nos Roys & de la Frâze, si tout le monde croioit comme eux, ou si le Pape eust voulu faire à leur mode, ou si ce peu de nombre qu'ils sont, eust pû garantir au Roy & à ses enfans leur vie, leur Majesté & leur Royaume, & restituer à la France son repos, son vnion, & son ancienne force, grandeur, splendeur & dignité, ils pourroient estre escrits parmy gens qui mettans la conscience à part, mesüreroient toutes choses au temporel de ceste vie : mais puis qu'ils ne sont qu'une poignée de gens, en comparaison de tant de milliers d'amis & d'ennemis François & estrangers, qui croient tout autrement qu'eux; & que le Pape ne l'eust iamais fait d'autre façon, & qu'ils n'ont moyen de persuader vne infinité de gens, & moins de les forcer à recognoistre le Roy & sa posterité, ny de faire cesser les troubles & la destruction de la France, ny les coniurations & attentats qui se faisoient contre la vie du Roy, il les faut prier que se reseruant à eux ceste si haute sapience, & generosité extraordinaire, qui en lieu de remedier à tant de maux, les prolongeient & empiroient, ils nous permettent à nous gens d'une capacité & courage ordinaire, de nous accommoder à la plus grâde & à la plus forte partie, & au temps mesme, & à la nécessité, & d'embrasser le seul moyen qu'il y auit d'oster tout pretexte aux malins, & tous scrupules aux simples, & d'asseurer la vie & l'Estat au Roy, & aux siens, & de preserver & restaurer le Royaume, & de rendre en particulier meilleure la condition de tous gens de bien, & de ceux-là mesmes qui se plaignent: & qu'ils nous excusent si au lieu de leurs paroles magnifiques & braves, nous auons mieux aimé la substance & la verité, & la realité du salut, seureté & grandeur du Roy & de sa lignee, & de l'Estat & Couronne de France; laquelle sçaura & pourra beaucoup mieux se defendre de toute yfuration contre qui que ce soit, & maintenir ses prerogatiues & preéminences, quand par le moyen qui a esté tenu, elle sera remise, asseuree, & renforcee, qu'elle n'eust fait si souz de beaux mots & specieux elle se fust opiniastrement laissée consommer & fondre, estant nécessaire pour braver avec effect & avec dignité, d'estre premieremêt, de viure, & d'auoir santé, force & vigueur. Que si en tout temps, & en quel estat qu'on setrouue il faut tousiours demeurer sur la rigueur, pourquoy auons nous donc traité & capitulé avec tant de nos propres subiects? ou pourquoy ces censeurs le dissimulent-ils? Et si ils conuiuent à ce que nous auons flechy enuers nosdits subiects au temporel mesme, pourquoy monstrent-ils porter si impatiemment que le Roy ait plié au spirituel enuers le Pape, à qui tous Roys & Empereurs Catholiques se souzmettent spirituellement? & qui n'a demandé au Roy que toutes choses honnestes & saintes, & vtils à sa Majesté mesme, à laquelle encores coustera, ou a cousté plus la moindre composition faite avec vn seul de ses subiects, que ne fera l'entier accomplissement de toutes les œuvres pies, & penirences que sa Sainteté luy a enjointes. Il n'est besoin de particuliere responce à ce qu'ils disent de l'autorité & liberté de l'Eglise Gallicane; puis que c'est chose toute notoire que pendant le diuorce de la Couronne avec le S. Siege, la pauvre Eglise Gallicane a esté si miserablement vilipendee & gourmandee, depredée & asseruie par

les autres deux Estats, & s'en alloient du tout ruines, sans qu'il y eust aucun moyen de la releuer & affranchir que celuy que l'on a suivy. Tellement qu'elle a plus d'occasion non seulement de ne s'en plaindre point, mais aussi d'en rendre graces à Dieu, que nulle autre partie du Royaume. Mais que diront-ils, quand ils entendront comme ils murmurent encores plus icy de ce qu'elle nous a esté donnée, & peu s'en faut qu'ils n'entagent de ce que nous en auons eu si bon marché; & vont disant qu'elle ne se devoit donner iamais, & quand il l'eust fallu donner vn iour, que ce ne devoit estre encores de long temps, ny à conditions si legeres, & qu'il falloit que le Roy eust preallablement extorminé les Huguenots de la France, & fait plusieurs autres choses que ie scay estre impossibles, & blasment le Pape de s'estre trop prejudicié, & d'auoir ravalé l'autorité & dignité sienne, & du saint Siege. Mais ces murmureurs d'icy, non plus que ceux de delà, ne sont pas vn pour cent de ceux qui se sont résionys de nostre absolucion; & n'auoient non plus de moyen de maintenir au Pape & au S. Siege son autorité en Frâce, ny d'arrester le schisme ra fait & formé, & vnt infinité de desordres & inueniens qui s'en ensuiuoient, & pulluloient tous les iours. Aussi le Pape mieux conseillé par le plus grand nombre, & par les plus sages, & inspiré de Dieu, a preferé l'vniou del'Eglise, & la conseruation de son autorité & du S. Siege, dans le premier Royaume de la Chrestienté, aux vapeurs & fumées de ce petit nombre de gens, qui sous le nom de l'autorité du S. Siege, l'alloient perdant & aneantissant. De laquelle resolution la Saincteté se trouue bien, & se trouuera encores mieux de iour en iour, ne se souciant plus de ce qu'on en dit au contraire. Aussi se trouue desia bien le Roy d'en auoir vsé comme il a fait, & s'en trouuera encores mieux tant plus auant il ira, & nous tous, qui deuons auoir plus de contentement en nous mesmes d'auoir bien fait, & d'en recevoir le fruct désiré, que de des-plaisir de mal ouyr, quand bien ce seroit la plus-part qui en parlast. Mais Dieu soit loüé, de ce que la plus grande & meilleure partie nous en sçait gré, & nous en benira d'icy à longues années. Cependant ie loüe grandement ce que vous dites, que ces murmureurs neantmoins doivent faire iuger au Pape qu'il est necessaire de conduire ces choses avec moderation & prudence, & nous nous en preuaudrons à ceste fin enuers la Saincteté en temps & lieu, comme i'espere aussi que le Roy y procedant de bonne foy, & faisant realement ce qu'il pourra, la Saincteté se contentera tousiours de la raison, & l'excusera au surplus.

Ie viendrois maintenant au faict de Marseille, dont vous parlez en l'vne & en l'autre de vost. deux lettres, mais il faudra que ie vous en face vne lettre à part en chiffré. Le mal de M. d'Eureux, dont on auoit escrit par delà, ne fut pas grande chose, graces à Dieu, & il en fut bien tost guery, & se portetres-bien, Dieu l'y maintienne. Depuis la prouision de l'Euesché d'Eureux, dont ie vous donnay aduis, il fut consacré en l'Eglise de S. Louys le iour & feste de S. Iean l'Euangeliste, par Monsieur le Cardinal de Joyeuse, assisté de Messieurs les Archeuesques d'Ambrun, & Euesque de Lisieux. Ledit sieur Cardinal de Joyeuse partit de ceste ville pour aller trouver le Roy le second iour de ce mois; & Monsieur le Cardinal Sarano, qui estoit tres-bien affecté au Roy à la Frâce, mourut le 4. d'ap. de Decembre. Les deux Eues-

ques de Russie, dont ie vous ay escrit cy deuant, apres estre tombé d'accord de toutes choses avec ceux que le Pape auoit deputez pour traiter avec eux, firent l'abjuration de leurs erreurs Grecques, & professiō de foy selon l'Eglise Romaine le 23. Decēbre, en la presence du Pape & des Cardinaux, Papresdisnee en la salle de Constantin: de sorte que tout le Clergé de ceste Prouince là, qui par cy-deuant recognoissoit le Patriarche de Cōstantinople pour leur chef au spirituel, recognoistra desormais le Pape & le S. Sie-ge, cōme nous faisons. A quoy a grandement aidé le Roy de Polongne, auquel ils sont subiects au temporel, cōme est ceste Russie là. Ce que i'ay dit cy dessus touchant ceux qui murmurent par delà contre l'absolution, ie l'ay dit en m'accommodant à leurs humeurs & à leurs opinions, & comme presupposant que le point de droit & la rigueur fust pour eux, & que nous n'eussions pour nous sinon que l'equité, & le salut & l'vtilité publique, laquelle neantmoins nous suffiroit: & ay voulu monstrier que posé mesmes que leurs maximes fussent vrayes à les prédire à la rigueur, & en tēps libre, & hors de tout dāger & soupçon: ce neantmoins en ce tēps si suspect & si dāgereux, & en l'estat auquel sont à present les choses, tāt dedans que dehors le Royaume, le Roy n'a eu que trop de bōnes & solides raisons de faire ce qu'il a fait. Mais ie n'entēs pas pour cela leur conceder que leurs opinions soiet catholiques ny vrayes, & ils seroiēt fort empeschez à les soutenir, s'il en falloit venir là. A quoy i'adiousteray, qu'ils ont à se prédre garde qu'en monstrent de parler pour le Roy & pour la Royauté, ils ne les reuoquent vne autre fois en doute, & ne leur facēt vn trop grād préiudice tant dedās que dehors le Frāce, s'ils pouuoient tant d'empescher la ratification, ou l'ex-ecutiō de ce qui a esté promis au nom du Roy: comme aussi le Roy de sa part en examinaēt leurs cōseils, a à cōsiderer si tous ceux qui seront de ceste opi-niō s'enuēt d'un vray zele enuers sa Majesté, & enuers le Royaume, & si en leur fait propre & en leurs affaires particulieres ils ont toute leur vie fait ceste professiō Stoïque, de ne se soucier aucunemēt de leur propre grā-deur, ni de leur profit, nimesme de la seureté de leurs personnes, & de leurs enfans, ains de tousiours referer toutes leurs actiōs à ce qui estoit de la biē-saance, de la dignité, de l'honneur & reputation de leurs noms. & de leurs charges; & trouuāt sa Majesté, qu'ils luy dōnent cōseil du tout contraire à ce qu'ils ont tousiours fait pour eux mesmes, elle aura occasion d'estimer que c'est quelque passion ou interest particulier qui les fera ainsi parler, & nō le zele dōt ils se targuent. Le Pape mesme nous dit le 12. de ce mois, que M. le Chancelier estoit vn de ceux qui plus crioierēt cōtre l'absolutiō. Si ain-si est, ie crains que ce ne fust en vengeance de ce que l'on refusa icy de faire son fils Cardinal, lors qu'on en fit instance incontinent apres que l'absolu-tion fut donnée au Roy; qui fut vne demande trop precipitée, quand bien au reste elle auroit esté la plus ciuile & la plus iuste du mōde: & neantmoins pour ce qu'elle fut refusée, le sieur Bouchiani, qui l'auoit faite pour ledit fils & pour vn autre, se parra d'icy tout dépitē, & en grand' haste, sans pré-dre lettre ny songé de sa Saincteté, ny de Messieurs ses neueux, qui fut vne grosse inciuilité que ie n'eusse attenduē de luy, que ie tiens pour vn fort honneste homme, & bien affectiōné au seruice du Roy, & digne des biens-epiōs de sa Majesté. Et ne vous enuēz jamais escire ce que dessus, n'estoit

qu'en ceste occasion de l'opposition qu'on fait à l'absolution, il importe trop au service du Roy, & au bien public de la France, que sa Majesté & vous sçachiez de quel esprit quelquefois les hommes sont poussez: car au reste ie ne dis iamais les fautes d'autrui que par force, & ne veux contre-rooller personne que moy-mesme. Du faict de la requeste trop precipitamment faite, que ie ne sceus qu'apres le partement dudit sieur Bouchiani, vous pourra tesmoigner Madame la Marquise de Pisani, si vous vous rencontrez avec elle, & l'en mettez en propos, sans luy faire mention de moy: aussi vous en dira Monsieur d'Eureux quand il sera par delà.

Il y a enuiron vn mois qu'il fut porté à la douane de ceste ville vne tres-belle rapissierie qui fut du Roy François premier, comme il se voit par les armoiries qui y sont aux quatre coins: elle a esté apportée des Pays bas, & adressée icy à vn certain Edoardo Paulo Portugais, pour la vendre. Il y a trop grande apparence qu'elle ait esté desrobée à la Couronne pendant ces derniers troubles: & partant Monsieur d'Eureux & moy l'auons fait arrester à ladite douane, en attendant que vous nous en mandiez la volonté du Roy. A tant, &c. Monseigneur, &c. De Rome ce 16. Ianuier 1596.

## A MONSIEUR DE VILLEROY.

### XXXVIII.

**M**ONSEIGNEUR, Ceste lettre sera sur lesaict. de Marseille, dont vous m'auiez escrit par vos deux dernières lettres des 29. Novembre & 12. Decembre, & qui est auioird'huy le plus grand soucy que la France & l'Italie ayent. Outre donc les bruits qui en auoient couru auparavant, nous eusmes aduis de Gennes le 23. Decembre, que le Prince Doria tenoit tous prests enuiron cinq cents hommes pour les y enuoyer, & les mettre en vn nouveau fort, que Casau. & le Viguiier y ont fait faire pour maistriser le port. Avec cela se disoit d'ailleurs que led. Casau & le Viguiier moient accordé deliurer, ou de recognoistre du Roy d'Espagne la ville, moyennant pour chacun d'eux la somme de cinq cents mil escus vne fois payez, & vingt mil escus de reuenu en fonds de terre au Royaume de Naples, pour la communauté de lad. ville vn million d'or vne fois payé, & permission d'enuoyer tous les ans deux nauires aux Indes, pour y trafiquer à la façon des Espagnols naturels. Ces aduis, jaçoit que le dernier n'estoit certain, causerent grande émotion es cœurs de toute ceste Cour, non seulement de Monsieur d'Eureux & de moy. Les Ambassadeurs de Venise & de Toscane en furent faschez sur tous les autres; & nous fusmes chez l'un & chez l'autre pour deliberer de ce qui se pourroit faire. Tous conuenions en l'importance de la chose non moins à l'Italie qu'à la France, & au besoin qu'il y auoit d'y apporter promptement quelque remede; & qu'il n'y auoit point de meilleur ny de plus prompt moyen que celui du Pape; mais nous ne nous accordions pas sur ce dont il falloit requerir la Satisfaction.



Monsieur Lomelin, qui se trouua avec nous chez l'Ambassadeur de Tosca-  
ne, mit en auant que nous deuions requerir la Saincteté de deux choses; l'v-  
ne, d'escrire au Prince Doria qu'il différast iusques à ce qu'il eust nouveau  
mandement du Roy d'Espagne: l'autre, d'envoyer querir l'Ambassadeur  
du Roy d'Espagne residant en ceste Cour, & de luy remonstrer ce qu'il sem-  
bloit à sa Saincteté là dessus, & le charger d'escrire de sa part au Roy d'Es-  
pagne son maistre, qu'il se départist de ceste entreprise, pour les considera-  
tions que sa Saincteté auoit representees audit Ambassadeur d'Espagne.  
Ceste proposition estant rapportee à l'Ambassadeur de Venise, ne fut trou-  
uee bonne par luy, disant que le Pape ne seroit aucune de ces trois choses  
là; & quand il les feroit, le Prince Doria ne lairroit d'exécuter les comman-  
demens qu'il auoit d'Espagne; & moins le Roy d'Espagne lairroit perdre  
vne telle occasion, pour exhortatiō que le Pape luy sceust faire. Mais d'au-  
tant que le peuple de Marseille est abusé par ceux qui luy donnent à enten-  
dre que le Roy n'a point esté absouz par le Pape, & en tout euenement que  
l'absolutiō n'est valable, le Pape ayant esté trompé; led.ieur Ambassadeur  
de Venise estoit d'aduīs, que le Pape sans monstrier de vouloir faire rien cō-  
tre le Roy d'Espagne, ny pour le Roy, ains seulement pour son propre in-  
terest, & pour la conseruatiō de son auctorité, & pour le salut des ames des  
habitans, qu'il est tenu de pourchasser, enuoyast vn Prelat à Marseille avec  
vn Bref à la communauté, pour les aduertir comme le Roy est absouz, &  
bien absouz; leur remonstrer avec combien de longueur, de conſpection,  
cognoissance de cause, & maturité, sa Saincteté a procedé à ceste absolu-  
tion, & les admonester de ne faire point de schisme avec le S. Siege, & ne  
se damner point; ains comme bons Catholiques qu'ils ont tousiours pro-  
testé vouloir estre, se conformer aux decretz & determinations du S. Siege  
& de nostre mere sainte Eglise, & sauuer leurs ames & consciences. Ad-  
ioustoit leditieur Ambassadeur de Venise, que c'estoit chose de laquelle  
le Pape ne pouuoit honnestement s'excuser, ne le Roy d'Espagne s'en plain-  
dre, & qui neantmoins auroit le mesme effect que les deux moyens propo-  
sez, & encors beaucoup plus grand & meilleur. Et quand Casau ne vou-  
droit permettre que le Prelat qui seroit endoyé par le Pape parlast à la cō-  
munauté, ny qu'il leur rendist le Bref de sa Saincteté, ce refus mesme nous  
seruiroit, & tourneroit à la haine, confusiō, & ruine dudit Casau. Monsieur  
d' Eureux & moy recognoissons le naturel du Pape si retenu, pour ne dire  
simile, que facilement nous adiouſtions foy audit Ambassadeur de Venise;  
en ce qu'il disoit que sa Saincteté n'escriroit audit Doria, & n'envoyeroit  
querir le Duc de Seſſe pour luy dire ce que dessus; & accordions aussi que le  
Roy d'Espagne ne se libertoit de ceste entreprise par la seule exhortatiō  
du Pape, quand bien sa Saincteté s'induiroit à la faire, & trouuastres bon  
que ledit Prelat fust enuoyé, & que sa Saincteté en fust suppliée. Mais desſi-  
rans qu'il fust fait encors quelque chose de plus, nous diſiōs deux choses:  
la premiere est, qu'il faudroit trouuer moyen que le Pape, qui cognoissoit  
aussi bien que null'autre de combien importoit à l'Italie, & à luy en parti-  
culier, l'irruption de Marseille, & qui n'auoit moins de volōté de la con-  
ſeruer, & de la pacifier, avec auctorité parler au Duc de Seſſe, & faire offrir  
au Roy d'Espagne, & que l'office que sa Saincteté seroit eust tant de

de force, qu'il donnast à penser au Roy d'Espagne, & le retardast, ou des-  
 tournast de ceste vsurpation, comme seroit, disions nous, si la Seigneurie  
 de Venise & le grand Duc offroient à sa Sainteté leurs forces & moyens,  
 & mesme de se liguier avec elle pour la defense de la liberté d'Italie, & en  
 consequence pour la conseruation ou recouremet de Marseille. De sorte  
 que sa Sainteté, tant en son nom, que desdits Princes & Potentats, peust  
 requerir & exhorter le Roy d'Espagne de se desister de l'vsurpation de Mar-  
 seille; & en cas qu'il ne desistast, luy denoncer qu'ils employeroient toutes  
 leurs forces & moyens pour garder qu'il n'acquist, ou ne possedast l'égue-  
 ment ce moyen de paracheuer de subjuguier l'Italie. Secondement nous  
 disions, qu'ouure cet office que le Pape feroit avec l'Ambassadeur d'Espa-  
 gne, & pourroit encores faire faire par son Nonce qu'il a en Espagne, il  
 nous sembleroit bon que sa Sainteté fist encores traiter avec Casau, qui  
 auoit tousiours fait contenance de vouloir en certaine façon dépendre de  
 sa Sainteté, & que le Prelat qui seroit enuoyé aux fins que led. sieur Am-  
 bassadeur de Venise auoit dites, pourroit encores seruir à cet effect, selon  
 qu'il trouueroit les choses disposees. Et quand bien les gens que le Prince  
 Doria vouloit enuoyer seroient receus dans Marseille, ils ne suffiroient  
 pour la subjuguier: & sa Sainteté pourroit estre à temps pour faire ledit  
 office avec fruit, & pour conseruer ceste ville. Pendant que nous delibe-  
 rions ainsi, le Pape auoit la goutte, & ne donnoit audience à personne. Les  
 Ambassadeurs de Venise & de Toscane l'auoient demandé chacun à part,  
 & nous aussi; mais ne l'auions pu auoir. Monsieur le Cardinal de Joyeuse  
 qui estoit sur son partement pour aller trouuer le Roy, & n'attendoit au-  
 tre chose pour partir, que parler au Pape, l'auoit aussi demandé; & le Pape  
 se contraignit de la luy donner pour ne regarder son partement. Et le 30.  
 iour de Decembre au matin, comme nous entendismes que ledit seigneur  
 Cardinal deuoit aller à l'audiencel'apres-dinnee, il vint en pensement à  
 M. d'Eureux, qu'il seroit bon que nous le priassions de parler au Pape pour  
 ledit fait de Marseille; & nous sembla que son entremise seroit fort à pro-  
 pos en ce point qu'il deuoit auoir sa dernière audience du Pape; qui pour  
 cela, & pour l'estime que sa Sainteté fait de luy, le prendroit bien de luy,  
 & avec plus d'attention & d'effect, en ce point aussi qu'il deuoit s'en aller  
 tout droit vers le Roy, auquel il en voudroit porter bonnes nouuelles, &  
 raporter les choses passées, & estre d'autant mieux venu enuers sa Majesté.  
 De ce commencement nous passâmes outre, & iugeâmes que led. Seign.  
 Cardinal de Joyeuse seroit bon non seulement pour esmouuoir le Pape à  
 embrasser la conseruation de Marseille, mais aussi pour luy en seruir de  
 moy & de mediateur, & encores pour s'employer luy-mesme de son effect  
 enuers Casau, avec lequel il a grande cognoissance, pour estre passé à Mar-  
 seille, & luy auoir parlé pendant ces troubles, & pour luy auoir escrit plu-  
 sieurs lettres, & en auoir receu de luy, comme ledit seigneur Cardinal en-  
 uoyoit à son frere de ses gens, qui ont tousiours passé par Marseille. Outre  
 que son d. frere estoit Capucin, sur par plusieurs fois à Marseille pendant  
 ces troubles; & qui ne peut auoir esté sans que luy & Casau se soient veus,  
 & parlé ensemble plusieurs fois, & mesme du fait desd. troubles. Il nous  
 sembla donc que led. seigneur Cardinal s'en allant en Cour, auroit belle oc-  
 P

casion d'envoyer deuant & au plustost à Marseille vn sien gentil-homme, & d'escrire par luy aud. Casau de fauoriser le passage dud. gentil-homme, & s'offrant à luy s'il le pouuoit seruir en Cour où il va, & par ce moyē faire entrer doucement led. gentil-homme en traité avec led. Casau, tant au nom de luy Cardinal, que du Pape : & en porter luy mesme nouuelle au Roy quand il arriueroit près sa Majesté: pource que led. seigneur Cardinal allant à petites iournees, sond. gentil-homme auroit du temps assez, pour, apres auoir esté negociier à Marseille, attendre led. seig. Card. auant qu'il arriuaſt en Cour. Nous proposasmes donc la chose aud. ſieur Card. & le priaſmes de se disposer à l'vn & l'autre de ces deux offices, ſçauoir enuers le Pape, & enuers Casau, & luy remonſtraſmes là deſſus ce que Dieu nous inſpira; & entr'autres choses le ſuppliaſmes particulieremēt, qu'apres qu'il auroit perſuadé le Pape d'entendre à bon eſciant à la conſeruatiō de Marſeille, il luy en facilitast les moyens, en s'offrant d'y ſeruir ſa Saincteté enuers Casau, avec qui il auoit lad. cognoiſſance, & d'y enuoyer vn des ſiens diſcret & ſecret cognu dud. Casau, ſouz le pretexte de l'enuoyer à ſon frere. Ledit ſieur Card. fut tres-aïſe que nous luy euſſions fait ceste ouuerture de ſeruir le Roy & la France, & prit la chose fort à cœur, & s'y eſchauffa grandement; & en ſon audience dud. iour 30. Decembre fit vn tres-bon office enuers le Pape, pour faire que ſa Saincteté embrastaſt la conſeruatiō de lad. ville: & obtint que ſa Saincteté, comme elle meſme nous a dit depuis, qu'outre ce que led. seig. Card. pourroit faire de luy-meſme enuers ledit Casau, il employast encores le nom & l'auctorité de ſa Saincteté enuers le meſme Casau, & autre que beſoin ſeroit. Ledit Seig. Card. vous en dira luy-meſme les particularitez, eſtant party le 1. de ce mois, en deliberation d'enuoyer au premier iour vn de ſes gentils-hommes cognu dudit Casau, pour traiter avec luy, tant de ſa part, que celle du Pape. Et m'ayant demandé vn peu d'inſtruction ſur la façon d'accorder ce diable d'homme qui menace de tuer ceux qui luy parleront de recognoiſtre le Roy, j'en dreſſay vn petit mot que ie luy enuoyay par ſon argentier, qui partit d'icy vn iour apres. Ledit Seig. Cardinal eſtant parti le matin, nous euſmes ce iour là l'apres diſnee vn autre aduis de Gennes, portant qu'il y eſtoit arriué vne tartane enuoyee en grande diligence par Casau, pour aduiſer le Prince Doria, qu'à la tour de Bouc, & à l'isle de Martigues, on auoit crié, *Vne le Roy*, & que la ville de Marſeille eſtoit fort preſſee; & pour prier ledit Doria d'enuoyer viſtement le ſecours qui auoit eſté promis; & que ſur cēt aduis ledit Doria auoit fait partir le 26. Decembre au ſoir. 4. galeres, qui portoient de quatre à cinq cents hommes, & faiſoit mettre d'autres galeres en ordre pour y porter encores d'autres gens de guerre. Cēt aduis fit que nous commençasmes de nouueau à auoir audience; & meſmes afin de ne donner à penſer au mōde que nous nous fuſſions pourueu d'ailleurs, ſi nous ne nous en fuſſions remuez: les Ambaſſadeurs de Veniſe & de Toſcane la demanderent auſſi. Monſieur d'Eureux & moy l'eufmes des premiers le 3. de ce mois; & du commencement ayans dit au Pape les aduis que nous auions de Gennes touchant Marſeille, luy repreſentaſmes le grand intereſt, & urgentes occaſion, que ſa Saincteté auoit de pourueoir à ce que l'Eſpagnol n'empietaſt ceste place, & les inconueniens qui s'en enſuiuiroient s'il en

mesaduenoit. Nostre S. Pere nous dit qu'il auoit consideré toutes ces choses là, & encores vne autre de plus, que nous ne luy auions exprimee, à sçauoir que les François pour recouurer ceste ville, pourroient faire venir le Turc en ces mers; qu'il auoit la mesme volenté que nous, mais ne sçauoit qu'y faire, & se trouuoit plus empesché qu'en autre affaire qui se fust presentee iusques icy. Nous luy proposasmes lors les trois moyens dessusd. que Monsieur d'Eureux & moy auions approuuez, & luy dismes que sans depouler la personne de pere commun que nous voyons qu'il vouloit garder, il pouuoit pour son propre interest, & pour celuy des autres Princes d'Italie, s'interposer pour ceste place particulièrement: & pour l'encourager, adioustasmes que nous estimions que la Seigneurie de Venise, & le grand Duc de Toscane, & possible encores d'autres Princes d'Italie se joindroient avec sa Sainteté pour vne chose qui leur importoit tant; & que nous auions mesmes entendu qu'ils luy offriroient à ceste fin leurs forces & moyens. Alors il nous dit, que ces Princes voudroient prendre le serpent avec la main d'autrui. Que s'ils disoient & parloient à bon escient, il pourroit parler aux Espagnols d'une façon, sinon il leur faudroit parler d'autre. Et quant à faire office enuers Casau, nous dit qu'il l'auoit desia fait, mais il n'en auoit tenu compte, ains auoit parlé irreueremment de sa Sainteté, & du S. Siege: ce neantmoins le Cardinal de Ioyeuse luy ayant dit qu'il auoit quelque connoissance & moyen avec luy, sa Sainteté luy auoit permis d'employer son nom & son auctorité à l'endroit dudit Casau, & d'autre où besoin seroit. Qu'il escriroit encores en Auignon, & y feroit tout ce qu'il pourroit. Quant à enuoyer vn Prelat, il craignoit qu'on ne luy fist quelque affront, avec indignité du S. Siege; & neantmoins il y penseroit, & feroit tout ce qu'il pourroit, ayant la chose à cœur autant que nous mesmes. L'Ambassadeur de Toscane eut son audience incontinent apres nous, & nous rapporta qu'il auoit eu les mesmes responses: mais ne nous dit pas qu'il eust fait aucun office, combien qu'il nous eust esté dit par quelcun qu'il en auoit charge. L'Ambassadeur de Venise n'eut l'audience que deux iours apres, à sçauoir le 5. de ce mois, lequel nous dit aussi qu'il auoit eu responses semblables, & qu'il auoit dit à sa Sainteté que la Seigneurie demeureroit tousiours vnie avec sa Sainteté; qui ne sont pas les mots substantiaux que nous desirons, quand bien ils auroient esté dits. En somme, tant le Pape qu'eux apprehendent assez la perte de ceste ville, & voudroient la destourner: mais ils n'osent y proceder à descouvert ny avec effect, & ne peuuent se resoudre de faire en temps & avec aduantage, ce qu'ils seront contraincts de faire apres temps & avec defauantage, si les Espagnols viennent à bout de ce dessein. Le Secretaire du Cardinal Aquaiua est venu voir M. d'Eureux, & luy a dit qu'il s'en vouloit retourner vers Monsieur le Cardinal son maistre, & passeroit par Marseille. Nous auons quelque opinion que le Pape le veut enuoyer pour le fait de Marseille au lieu dudit Prelat, souz pretexte que le Secretaire s'en va trouuer son maistre, & ne fait que passer par Marseille, chemin accoustumé à ceux qui vont d'icy en Auignon par eau. Aussi n'a sa Sainteté rien dit à personne de M. le Cardinal de Ioyeuse, sinon qu'à nous, & encores ce petit mot seulement que i'ay mis cy-dessus. Ce que sa Sainteté ne s'en remouuantement, ne doit point estre pris pour

indice de mauuais volôré en nostre endroit, comme vous m'escriuez que quelques-vns le soupçonnent par delà, attendu que de luy-mesme il a assez d'intereſt pour s'en remuer, ſans autres conſiderations que de nous: mais bien peut eſtre pris pour argument de quelque rimidité & irrefolution, qui luy ſont comme naturelles: outre qu'à la verité il n'a point de forces ny moyens pour s'en faire croire, & que le brauer ſans forces eſt choſe vaine. Il ne faut croire non plus qu'en donnant la benediſtion, il ait penſé à nous mettre en défiace avec nos amis, pour fortifier noſtre ennemy; mais bien a-il en partie regardé à ſa commodité, & à celle du S. Siege, comme ceux-là creurent. Et jaçoit qu'il n'ait point eſté pouſſé de la ſeule conſideration de l'intereſt, ſi eſt-ce que ie ne tiendray iamais pour ſoupçonneux, ains pour homme qui inge des choſes comme elles ſont, celui qui croira que ſans le grád intereſt que le S. Siege auoit à la reconciliation de la France, nous n'euffions iamais obtenu l'abſolution, quoy que nous euſſions ſceu dire & faire. Mais avec tout cela, ie croy que le Pape a de ſa nature plus d'incliaaion à la France qu'à l'Eſpagne, & que depuis l'abſolution il aime la perſonne du Roy, & deſire ſa proſperité, comme eſtimant luy auoir fait vn tres-grand bien, & en attendant toute la graatitude pour le bien de la Religion Catholique, & le tenant pour Prince d'une rare bonté & generoſité, & ſe ſentant auoir offenſé les Eſpagnols en lad. abſolution, & ſe déſiant d'eux pour ſon regard tant qu'il viura, & pour les ſiens apres ſa mort. Mais côme vous ſçauéz, ces affectiones de Prince à Prince vont iuſqu'à vn certain terme, & ont leurs effets limitez, & en faut prendre ce qui s'en peut auoir.

Marſeille ne faite ſouuenir du Duc d'Eſpernon, duquel ceux de Lyon eſcriuent qu'après la priſe de Ciſteron il auoit enuoyé au Roy pour ſe ſoumettre à ſon deuoir; mais ils ne ſçauent pas qu'en meſme temps il enuoya à Thurin à Monſieur de Sauoye; & à Milan au Conneſtable de Caſtille; duquel Conneſtable il a obtenu ſoixante mille eſcus, à ſçauoir cinq mille comptans, dont on luy achete à Milan des armes & des cheuaux, & cinquante-cinq mille en vne lettre de change pour les prendre à Genes, & dit-on que c'eſt pour aduancee de deux mois d'une penſion de trente mille eſcus par mois qu'on luy donne pour eſtre bon François, comme il eſcrit par deçà qu'il ſera toute ſa vie: & fait dire que l'argent qu'il prend à Milan eſt argent qu'il auoit en banque; comme ſi cela meſme d'auoir ſon argent en banque en vne ville du Roy d'Eſpagne, quand ainſi ſeroit, & l'y tenir pour bien aſſeuré, n'eſtoit pas en ce temps vn grand ſigne de n'eſtre gueres bon François. Ceux qu'il a enuoyez à Thurin & à Milan s'appellét l'un des Monts, l'autre Caumeni, ou d'un nom ſemblable. Il y a ja pluſieurs iours qu'il court vn bruit par deçà qu'il a promis Bolôgne aux Eſpagnols, ce que ie conioints avec la nouuelle que nous auons par deçà long temps y a que le Roy d'Eſpagne fait vne armee de mer en Portugal & en Biſcaye. Il eſt homme pour ſur ceſte occaſion faire luy-mesme courir ce bruit pour extorquer du Roy ce qu'il veut; mais comme ces troubles ont en grande partie commencé par luy, & à cauſe de luy, auſſi peut-il eſtre que Dieu les veut finir en luy, & avec luy, & par ce moyen donner aux gens de bien deux grandes ioyes enſemble. Cependant vous auez à vous garder non ſeule-

meur de luy, mais aussi de celui qu'il a mis à Bologne, qui pourroit sans luy faire avec les Espagnols ce qu'on auoit commencé à faire de Han. Je ne sçay pourquoy desormais les supposts voudront plustost seruir luy que le Roy, sa Majesté s'y aidant, attendu que la iustice & l'honneur y est, & qu'elle pourrestre recueillie plus grande du Roy, que de luy. A tant, &c. Monseigneur, &c. De Rome ce 17. Ianvier 1596.

## A MONSIEUR DE VILLEROY.

## XXXIX.

MONSIEUR, j'ay fait réponse au memoire & à la lettre Monqu'il vous pleut m'escire le 17. Decemb. par trois lettres des 25. 26. & 31. Ianvier, que j'enuoyay à N. pour les vous faire tenir. Depuis ie receus le 3. de ce mois la lettre qu'il vous pleut m'escire de Pontoise le 28. Nouëbre, & le 5. ensuiuant ie receus celle que vous m'escruiſtes de Paris le 14. Ianvier, avec duplicata de celle du Roy du 9. l'ay respondu audit duplicata par vne que ie viens d'escire à sa Majesté. Quant aux vostres, la principale & quasi seule chose à laquelle i'ay à respondre, est celle qui concerne le Cardinal de Loyeuse. Sur quoy auant que passer outre, ie vous raméteuray comme lors que la Protection luy fut donnee par le decez de Monseigneur le Cardinal d'Este, le feu Roy, & vous me commandastes de seruir sa Majesté près de luy, à quoy j'obeïs, & il me traitta tousiours avec toute la douceur & honneur possible, & auant qu'il fust six mois me donna le Prieuré de S. Martin du vieil Bellesme; & apres la mort du feu Roy s'en estant retourné en France, encores qu'il se mist du parti auquel estoit son pere, frere, & la ville de Toloze, dont il est Archeuesque, toutesfois il n'a laissé de me monſtrer en son absence la mesme affection, ny de se fier de moy en ce qui estoit de son particulier, & qui ne touchoit la querelle publique; & de ma part ie luy ay aussi tousiours rendu toute la gratitude & reuerence possible, & seruiſe aussi en son particulier quand il s'en est présenté occasion: c'est pourquoy mon tesmoignage pourra maintenant estre estimé de peu de poids, auquel aussi ie ne m'ingererois sans vostre commandement. Et neanmoins ie vous iure en foy d'homme de bien, que si ie ſçauois qu'il fist quelque chose contre le seruice du Roy, & cõtre le bien public du Royaume, ie ne le vous celerois point, pource que mon premier deuoir & sermẽ, apres Dieu est au Roy & à ma patrie; mais Dieu m'est tesmoin que de toutes ces choses qu'il vous a pleu m'escire qu'on soupçõne de luy, ie n'en sçay rien, encores que ie croye bien qu'il aura fait tout ce qu'il aura peu pour faire auoir à son frere les meilleures conditions qui se pourroient. Au contraire, ie puis & dois en ceste occasion luy porter tesmoignage de verité, que depuis qu'il airt luy à Rome il y a vn an, ie luy ay tousiours ouy tenir son bon propos de pais & d'accord, & qu'il m'a tousiours fait bonnes lèg

raisons que ie luy alleguois pour le bien & repos de la France, a plusieurs fois demandé, & monstré de suivre mon aduis de ce qu'il deuoit faire & dire au Pape: & s'estant Monsieur de Mayenne plaint à luy par lettres, iusques à taxer son integrité, de ce qu'il y auoit de ses deputez, & de son frere & de la ville de Toloze à la Cour, il me communiqua la lettre qu'il luy rescriuoit, & me commanda de luy minuter vne partie de sa response, par laquelle il me disoit luy vouloir persuader de s'accorder luy-mesme. Ce que ie fis de fort bon encre, pource que cela tournoit au seruice du Roy & du public. Et encores dernièrement auant que i'eusse receu la copie qu'il vous a pleu m'enuoyer de la lettre que le Roy luy escriuit le 28. Novembre, il m'en auoit enuoyé de Gennes l'original par son Medecin, appelé mōsieur Mercier, afin que ie disse audit sieur Mercier, qui auoit à parler au Pape d'autres choses dudit Cardinal, ce qu'il me sembleroit qu'il en deuroit dire à sa Sainteté: ce que ie fis, & le luy baillay parescrit en Italien, comme il me sembla qu'il le deuoit dire pour plus grand contentement de sa Sainteté, & seruice de sa Majesté. Et n'a pas esté que ie n'aye plusieurs fois pensé, & regardé si ces choses se feroient à l'autelle, pour couvrir d'autres desseins, mais en vn fort long temps, & en vne grande varieté de choses & de rencontres, ie ne me suis iamais pû appercevoir qu'il y eust rien qui allast de trauers. Aussi m'ayant dit plusieurs fois led. Card. auant que partir d'icy, qu'il faisoit bon office auprès du Pape & d'autres pour l'absolution du Roy, ie l'ay creu non pas simplement pource qu'il me le disoit, mais pource que ie sçay bien qu'il a de l'entendement beaucoup, & qu'il cognoist tres-bien en quoy consiste son profit & son honneur, & qu'il voyoit bien, depuis la reduitio de Paris mesmemēt, qu'il en falloit passer par là, & qu'il estoit necessaire aussi pour son particulier que luy & son frere s'accorderassent, souz peine d'estre ruinez: & estimoit qu'il luy seroit plus d'honneur & de reputation par deçà, & auprès de ceux qui restent de leur party, si leur reconciliation particuliere estoit couuerte de la publique du Roy. avec le S<sup>r</sup>. Siege. C'est pourquoy ie l'ay creu alors, & estime encores à present qu'un homme si accort & si caute comme il est, n'aura pû dequis entēdre à ces choses irreuisibles & par trop dangereuses, mais bien à toutes conditions auantageuses, & seures pour son frere, & leur maison, & qu'une grāde partie de ce qu'on en dit pourroit bien prouenir de la desiance ou haine qu'on a encore du passé, ou de desir de luy faire succeder quelqu'autre en la charge de Protecteur. Si on luy doit laisser la Protection ou non, ie m'en remets à ce que le Roy & nous en iugerez trop mieux: mais puis qu'il vous a pleu en sçauoir mō aduis, ie vous diray premierement que la façō de sa reduction me sembla fort cōsiderable: car tout aussi tost que le Roy l'eut honoré d'une siene lettre qu'il me cōmuniqua, il luy escriuit, & le recogneut pour son Roy, se souzscrivant son tres-humble & tres-deuot sujet & seruiteur, sans aucune capitulatio ny paction preallable. Ce qu'il fit nō par simplicité ny par inaduersté, mais, cōme ie sçay tres-bien avec qu'il en delibera par certaines assurances, qu'il prit de la generosité & magnanimité du Roy, qu'il ne le traiteroit point moins fauorablement que ceux qui auoient voulu capituler, & auoir des seuretez auant que faire la deuē reconnaissance. Au demeurant, il me semble estre pour seruir le Roy aussi bien qu'autre que ie

ſache, ayant de la prudence & dextérité autant que ſon aage le peut porter, & eſtant fort aimé & eſtimé du Pape. Et de ſa volonté, ie ne voy point qu'on ait à ſ'en douter apres l'accord de ſon frere: outre qu'ils ne ſont que deux Preſtres, qui ne peuuent fonder aucun deſſein ſur leur poſterité; cōme au contraire ſi on luy oſte la Protection, ie croy qu'il ſera mal contēt toute ſa vie, ſe ſouuenant de n'auoir peu avec ſa prompte recognoiſſance retenir ce que le feu Roy luy auoit donné, là où d'autres moindres que luy ont par leur opiniaſtré & obſtinatiō extorqué ce qui auoit eſté donné à d'autres, & comme eſt le naturel des hommes, luy, ſon frere, & leurs amis & ſerviteurs ſeront plus martis de ceci qui leur aura eſté oſté, qu'ils ne ſçauront de gré au Roy de tout le reſte qu'il leur aura laiſſé. Dauantage, luy eſtāt oſté la Protection, il y en aura pluſieurs qui la deſireront, & ſe feront recomander par diuers; dont il aduiendra qu'on en meſconſeillera encore d'autres qui auront eſté poſtpoſez au Protecteur nouveau; & deſplaira-t'on encores aux Princes & Seigneurs qui les auront recommandez: là où ſi elle demeure à ceſuy qui l'auoit deſia, outre que luy & les ſiens demeurerōt contents, perſonne des autres n'aura à ſe plaindre qu'on l'aye laiſſée là où le feu Roy l'auoit colloquée. Ie ne veux mettre icy en ligne de compte qu'il eſt deſia tout rempli de biens, & pourra ſeruir le Roy ſans auoir beſoin de l'importuner pour ſoy ny pour les ſiens, au lieu qu'il faudra réplir vn nouveau, & ſes parens, amis, & ſerviteurs. Cela n'eſt pas fort conſidérable en vn ſi grand Roy, qui a tant de moyens de bien faire. Mais ie conſidere bien au piſ aller la facilité grande qu'il y a de ſe défaire d'vn Protecteur: quād il ne ſe porteroit bien, ou qu'il ne ſeroit plus agreable, eſtant choſe qui ſe peut faire à toutes les fois que l'on veut avec vne ſeule lettre, par laquelle le Roy luy eſcriue qu'il ne ſe meſſe de ſes affaires, & en ne luy eſcrivant plus auſſi. Ie conſidere auſſi que la fonction principale de Protecteur eſt en matieres Conſiſtoriales, auſquelles il ne peut rien alterer, & que les Ambaſſadeurs qui ont la direction des affaires d'Eſtat, ne leur en font part, ſinon de celles que le Roy commande, ou qui bon leur ſemble. Il eſt vray qu'au Conclauē, c'eſt le Protecteur qui conduit le party du Roy; mais auſſi ne vois-ie pas pourquoy Mōſieur le Cardinal de Loyeuſe, & tout autre Cardinal François qui n'a rien hors de Brāce, ne doiuē ſuiure au Conclauē l'intention du Roy, auſſi bien qu'vn Cardinal Italien, qui aura ſes biens & ſes parens, amis & allicz, & toute ſa fortune en Italie, & ſes deſſeins particuliers pour l'agrandiſſement de ſa maiſon; voila, Monſeigneur, ce que ie vous puis reſpondre: de quoy tant ſ'en faut que i'attende aucun gré du perſonnage, ny d'autres, qu'il ne ſçaura iamais par moy que i'ay eſcrit tout cecy, & craindrois pluſtoſt que d'autres, qui ne ſeront de cōſeils, m'en pourroient ſçauoir mauvais gré; outre que ſi la Protection luy demeure, ie preuoy qu'il pourra auoir quelque meſcontentement de moy, pour ce qu'en ce cas il voudroit poſſible m'artiter chez luy comme j'y ay eſté autrefois, & ie ſuis reſolu de n'entrer meſluy plus au ſeruiſſe dōmeſtique de luy ni d'autres. A tant, &c. Monſeigneur, &c. De Rome ce 16. Feurier 1596.



A V R O Y.

XL.

SIRE,

L'Euesché de Rennes dont il a plu à vostre Majesté m'honorer, est une dignité qui surpasse par trop mon mérite, & la façon dont il vous a plu me le donner, m'oblige encores autant, ou plus que la chose mesme. Aussi ne scaurois-je trouver paroles pour vous en remercier, qui répondant à beaucoup pres à la gratitude que ie vous en rends en mon ame. Mais ce que ie ne puis faire à present par lettres, ie m'efforceray de le faire par continuelles actions tant que ie viuray, me proposant de faire de tout le cours de ma vie, vn perpetuel remerciement & vne perpetuelle action de graces à vostre Majesté, premièrement, en bien vsant de vostre bien-faict, & le dressant à ce pourquoy telles dignitez sont instituées; à scauoir à l'honneur & gloire de Dieu, à l'édification de son Eglise, & au salut de nosmes, à l'obeissance & fidelité qui est due à vostre Majesté par ses subjects, à la concord & charité qu'ils se doiuent entr'eux, & au repos & tranquillité de tout le Diocèse. Secondement, en employant pour le service de V. M. & de vostre Estat, tout l'honneur, authorité, commodité & moyens qui me reuiendront à moy en particulier, du bien qu'il vous a plu me faire, avec tout le reste que Dieu m'a donné & donnera en caronde. Outre qu'à toutes occasions ie prieray Dieu, comme ie fais en cét endroit, qu'il vous donne,  
Sta 1, Inc. De Homo, cq 201. Feurier 1596.

A MONSIEUR DE VILLEROY.

XLI.

MONSIEGNEUR, Le Roy me donnant l'Euesché de Rennes, m'a honoré & agrandi non seulement par dessus mon mérite, mais aussi par dessus mon desir: ce qui accroist d'autant plus l'obligation que j'en ay à sa Majesté. Aussi n'en fais-je pas si aise pour mon particulier, comme pour les lozanges qui en ont esté, & sont encores tous les iours données à sa Majesté par toute ceste Cour, & iusques aux plus infimes du peuple Romain, qui celebrent la libéralité & bonté de Roy envers vne personne que la plupart d'eux ne cognoist point, & se le vont disant les vns aux autres, ne scauans le plus souuent de qui ils parlent. Par la lettre que i'escris à sa Majesté, vous verrez les graces que ie luy en veux rendre toute ma vie. Quant à vous, Monseigneur, ie recognois qu'apres le Roy ie vous dois ce bien-faict, comme tout le passé; car outre ce que vous auez fait en cecy mesme, c'est vous qui me fistes employer dès le temps du feu Roy, & in-

continent

continent apres le decez de feu Monseigneur de Foix, & qui auez recom-  
 mé-  
 cétout aussi tost que vous auez esté prés le Roy à present regnant. C'est  
 vous encores qui auez mis au iour ce peu que i'auois fait à l'obscur, & qui  
 en outre auez donné prix & credit, & procuré recompense à mon labeur, &  
 à ma fidelité & zele au seruice du Roy & du public. De sorte que ie vous  
 tiens, apres Dieu, pour autheur de ma fortune, & pour tel ie vous reue-  
 reray & seruiray toute ma vie. C'est vne recognoissance que ie dois & fais  
 vous seul, & qu'autre n'a onques eue & n'aura de moy: cōbien que ie rēds &  
 rendray très volōties graces, & encore plus volōtiers seruice à chacun, selō  
 la proportion de ses merites enuers moy. Ce qui fait que i'ay d'autant plus  
 grand regret, qu'enuers vous, Monseigneur, à qui ie dois tout, ie ne pourray  
 iamaiz faire ny dire chose qui me contente. De Rome, ce 20. Feurier 1596.

## A MONSIEVR DE VILLEROY.

## XLII.

**M**ONSEIGNEVR, Par autres miennes lettres i'ay remercié le  
 Roy & vous de l'Euesché de Rennes qu'il a pieu à sa Majesté me dō-  
 ner: par ceste-cy i'adiousteray que moy en ayant receu l'aduis par les let-  
 tres du Roy, & les vostres, & de Monsieur de Gesvres, & sçachāt la preten-  
 tion particulière que le sainct Siege a aux Eueschez & Abayes de Bretagne,  
 & de Prouence, dont le Roy n'a point d'Indult pour encores; & voyant  
 combien de fois ceste pretention a esté icy ramentuë & inculquee au Pape  
 en ces derniers troubles, aux occasions des vacantes aduenues ausdits pays;  
 & me souuenant encores de la promesse solennelle & fresche que le Roy a  
 faite de garder les Concordats, & de ne les outrepasser, i'estimay que nous  
 deuions estre les premiers à dire au Pape ce bien que sa Majesté m'auoit fait,  
 & luy en parler vn peu plus eautement que si ledit Euesché eust esté en  
 pays de Concordats. Qui fut cause que le Lundy douziēme de ce mois,  
 auant ce que Monsieur d'Eureux & moy en auions arresté ensemble, il en  
 commença le propos à la fin del'audience, disant à sa Sainteté, que le Roy  
 auoit monstté & monstroit encores tous les iours en plusieurs sortes com-  
 bien il estimoit la benediction de sa Sainteté, & entr'autres, parce que sa  
 Majesté m'auoit donné à moy vn Euesché, en cōsideration du seruice que  
 luy auois fait en cēt affaire. Le Pape respondit plusieurs fois qu'il en estoit  
 bien aise, & que le Roy auoit bien fait. Apres que sa Sainteté eust ainsi en  
 general approuué & loüé ce bien fait du Roy, ie vins au particulier, luy &  
 dis que c'estoit l'Euesché de Rennes en Bretagne, & que i'esperois que sa  
 Sainteté ne l'airoit de le trouuer aussi bon en ce pays là cōme en vn autre. Il  
 respondit qu'il le trouuoit bon encores ainsi, mais qu'il faudroit aduiser à la  
 façon de la prouision, laquelle ne se pouoit faire à la nomination du Roy,  
 pour auant que la Bretagne n'estoit comprise és Cōcordats, & que le Roy  
 n'en auoit point d'Indult pour encores. Surquoy ie luy proposay vn expē-  
 dent, à sçauoir que sa Sainteté pourroit dès à present donner l'Indult, cō-

me nous l'en supplions, & puis on datteroit lettres de ma nominatiō de date  
 re posterieure à l'Indult que sa Sainteté auroit donné. Sa Sainteté repli-  
 qua que lors que tels Indults auoient esté donnez aux Roys de France, leurs  
 Majestez aussi de leur costé auoient donné aux Papes des lettres patentes  
 pour la conseruation des droicts du saint Siege en Bretagne & Prouence;  
 & que luy estant Dataire de Sixte V. lesdites patētes auoient esté veuës &  
 cōsiderees, sur l'occasion de la demāde que l'Euesque de Paris n'estā enco-  
 res lors Cardinal, car ainsi parloit-il, faisoit de semblables Indults pour le  
 feu Roy. Je luy dis que du temps de Sixte V. l'Indult fut donné au  
 Roy Henry III. sans prendre aucunes lettres patentes de sa Majesté; &  
 que nous esperions que sa Sainteté ne voudroit traiter le Roy d'à present  
 moins fauorablement que Sixte V. auoit traité le feu Roy. Et sur ce que  
 sa Sainteté monstra douter que cēt Indult eust esté ainsi expédié, ie luy as-  
 seureray qu'il estoit ainsi comme ie luy disois, & que ie l'auois veu expedier en  
 la façon que ie venois de luy dire. A quoy sa Sainteté respondit qu'on le  
 verroit. Je retournay à dire que cēt expedient de dōner au Roy l'Indult dés  
 à present, sembloit le meilleur & le plus doux: tant pour sa Sainteté que  
 pour le Roy. Mais si la cōcession de l'Indult alloit en long, qu'il y auoit vn  
 grand expedient dont j'auois veu vser en semblables differēs, & mesmes pour  
 les Monasteres des Religieuses, qui estoit de mettre aux Bulles ( *Q U O R O R A X C H R I S T I A N I S S I M V S S C A I P S I T* ) au lieu de dire *Q U A R E*  
*R E X C H R I S T I A N I S S I M V S N O M I N A V I T*. Le Pape dit qu'il y pōseroit;  
 & que ie serois pourueu dudit Euesché selō la volonté du Roy: mais que de  
 la façō de la prouision on y aduiserait. Je feray chercher aux Registres d'i-  
 cy le susdit Indult, qui fut donné au Roy Henry III. par Sixte V. mais pour-  
 ce qu'il pourra estre qu'on ne m'en voudra donner copie, ie vous prie de fai-  
 re chercher le Bref mesme par delà, & m'en enuoyer vne copie pour m'en  
 preualoir: estant besoyn d'obtenir tel Indult au plustost, non tāt pour l'Eues-  
 ché de Rennes, comme pour tous autres Eueschez & Abbayes qui ont vac-  
 quē & qui vacqueront cy apres esdits pays de Bretagne & de Prouence; à  
 chacun desquels, quād se viēdroit à la prouisiō, on renouellerait la mesme  
 difficulté & nous nous trouuerions tousiours en mesme peine. Ledit Brief  
 fut expedie en l'annee 1586. & se trouuera parmy les despesches de ceste an-  
 nee là. Ce fut feu Monseigneur le Cardinal d'Este qui le fit expedier, moy  
 estant lors près de luy; & me souuiens que nous dismes à lors, que ç'auoit  
 esté vn grand coup d'auoir obtenu ledit Indult sans les patentes que les au-  
 tres Roys auoient tousiours donnees en receuant semblable Indult, & que  
 c'estoit vne ouuerture & moyen d'auoir cy-apres tels Indults sans plus dō-  
 ner lesdites patentes; desquelles il me souuiens aussi qu'il vous fut enuoyé  
 copie par feu Monsieur de Foix long temps auant ledit Indult sur la plainte  
 que le Pape Gregoire XIII. faisoit de ce que le feu Roy n'auoit encores  
 lors demandé tel Indult.

Je vous adjousteray icy vne circonstance, qui vous pourra reduire enco-  
 res mieux en memoire le temps auquel ledit dernier Indult fut obtenu: c'est  
 que Monsieur le Cardinal de Pellican s'y estant oppose lors qu'il en parloit  
 en Consistoire, cela fut cause que le feu Roy luy fit saisir les fruits des le-  
 nefices qu'il auoit en France. Ne faudra laisser de m'enuoyer cependant les

lettres de nomination, en la façon que les Roys ont accoustumé de les enuoyer pour les Eueschez des autres Prouinces du Royaume : & n'y auroit point de mal de laisser en blanc la dattte des lettres de nomination, comme l'on fit celle de la nomination de Monsieur d'Eureux; afin de les datter de dattte postérieure à l'Indult, en cas que le Pape le voulust donner auant qu'expédier la promission de l'Euesché. Je feray valoir lesdites lettres tout ce qu'il sera possible, & pour le moins obtiendray le second des susdits deux expédiens; comme aussi crois-je que le Pape, auant mesme qu'auoir donné l'Indult, pouruoirra tousiours ceux que le Roy nommera tant en Bretagne, & Prouence, qu'ailleurs, pourueu que les nommez ayent les qualitez requises par les Concordats. Mais ie crains que iusques à ce que sa Majesté aura obtenu l'Indult, le Pape ne vaudra dire dans les Bulles de prouision, que le Roy les aye nommez, ains qu'il aye escript pour eux : qui est vn temperament, auquel, quand tout sera bien considéré, les Roys ont la chose & l'effect pour eux, & encores la verité des paroles, puis que celuy qu'ils nomment est pourueu; & les Papes n'y ont pour eux qu'une façon de parler au lieu d'une autre : de façon qu'en effect ce sont tousiours les Roys qui donnent les Eueschez & Abbayes aussi bien en Bretagne & Prouence, comme ailleurs. Cependant il est besoin, comme vous scauez, de deputer vn Oeconome pour regir & administrer le temporel de l'Euesché : & d'autant que ie n'y cognois personne, & que vous y pouuez tout ie vous supplie très-humblement d'adiouster encores ceste obligation à tant d'autres, que d'en commettre vn tel que vous iugerez pour le mienx; & m'excuser de ceste inciuilité plustost que presumption, & encores inciuilité prouenant de ce que ie n'ay à recourir qu'à vous qui m'auiez ainsi mal accoustumé. Au demeurant Monsieur d'Orbais me bailla hier vne lettre de Monsieur de Fay frere de feu Monsieur de Rennes du 30. Ianuier, avec vne coppie d'un breuet expédié en faueur dudit sieur de Fay le 12. pour vne pension de deux mil lires par an sur les fructs de l'Euesché dudit Rennes. Surquoy ie vous dis à vous, que si le Roy veut à bon escient que ie paye ceste pension, ie la payeray, non tant pource qu'il luy faut obeir necessairement, cōme pour ce que ie ne veux auoir iamaïs sinon autant & en la façon qu'il plaira à sa Majesté, non seulement es choses qui prouiendront de sa pure libéralité, comme ceste-cy, mais encores en toutes autres, d'où qu'elles me puissent venir. Mais si le Roy n'a autrement la chose à cœur & se contente de nous remettre à la iustice, ie pense auoir assez de raison pour m'en desfendre; car le breuet est conçu de façon, que quand ie consentirois icy à la creation de la pension, il ne seroit aisé de la faire creer par le Pape de la façon portee par ledit breuet, encores que ledit Euesché fut en autre pays que Bretagne; outre que la pretension du Pape en Bretagne, iusques à ce que le Roy ait l'Indult, est telle qu'il pourra dire, qu'il ne veut qu'il soit imposé pension sur cet Euesché; on s'en faut imposer, qu'il la veut mettre luy, & en gratifier qui luy plaira. Cependant, & en attendant que ie sois plus expressement informé de la volonté du Roy, ie responds audit sieur de Fay negatiuement, en la façon qu'il vous plaira voir par la copie que ie vous enuoye de la response que ie luy fais, qui vous pourra mesmes sentir d'excuse par delà enuers luy si on trouue bon de s'en

excuser. Car au reste si le Roy veut, ou si vous seulement voulez que ie sùblisse ceste charge, ie seray toujours à temps à contenter ledit sieur de Fay, & le feray sans aucun regret, sinon que ladite charge diminuera autant de l'applaudissement & de la louange qui a esté, & est encores tous les iours donnée en ceste Cour à sa Majesté, pour le bien & honneur qu'il luy a pleu me faire. Apres auoir escrit ce que dessus, l'ay fait regarder aux Registres du Consistoire, pour sçauoir iustement le temps auquel il fut parlé du susdit Indult pour le feu Roy: & ay trouué qu'un Lundy 17<sup>e</sup> iour du mois d'Octobre 1586. fut ordonné par le Pape Sixte V. qu'il seroit concedé Indult à sa Majesté de nommer aux Eueschez & Abbayes de Prouence, & de Bretagne, en la façon que l'auoient eu les Roys ses predecesseurs. Par où ie coniecture que ledit Indult peust estre arriué en Cour sur la fin du mois de Nouembre 1586. qui vous pourra seruir pour le faire trouuer plustost, A tant, &c. Monseigneur, &c. De Rome ce 22. Feurier 1596.

---

A MONSIEVR DE VILLEROY.

## XLIII.

**M**ONSEIGNEVR, Nous auons demeuré plus long-temps à vous escrire que de coustume, pource que le dernier ordinaire qui est venu de Lyon ayât tardé à venir plus qu'il ne souloit, celui aussi qui deuoit aller d'icy à Lyon a plus demeuré à partir qu'il n'auoit accoustumé, & d'ailleurs nous n'osons gueres rien commettre aux extraordinaires qui sôt dépeschez par autres, & plus suiets à estre foiuillez: toutesfoi ie me delibere d'en vsér cy apres quelquesfoi, & plustost hazarder quelque chose, que demeurer plus si long temps à vous escrire; & cependant tascher de mettre quelque ordre plus stable au parlement des ordinaires. Vos lettres du 29. Decembre nous furent rendûes le 24. Ianuier, avec copie de la declaration du Roy sur les provisions de Rome, comme aussi copie de la lettre de Monsieur le Comte des Boissons au Roy, & de la réponse de sa Majesté audit Seigneur Comte, avec l'extrait du libelle que les Espagnols on fait imprimer, pour sous pretexte de l'absolution du Roy, & des faulx conditions qu'ils ont supposées, soustraire à sa Majesté ses amis, alliez, & confederéz: & le 10. de ce mois nous furent rendûes les lettres du Roy & la vostre du 16. Ianuier, avec la copie des articles de la paix projecttee par les deputéz du Roy & de Monsieur de Sauoye au Roy, & de la réponse de sa Majesté à son Altesse.

Par l'une & l'autre de ces deux dépesches nous auons appris l'arriuee en Cour de Monsieur Delbene avec la Bulle de l'absolution, & le contentement que le Roy auoit de nostre negotiation, dont nous louons & remercions Dieu, qui a conduit le tout, & sa Majesté de ce qu'il daigne prendre en gré le seruire que ses seruiteurs luy rendent. Deux iours apres auoir receu la premiere des susdits deux dépesches, à sçauoir le 26. Ianuier, nous fusmes à l'audience, & dismes à nostre saint Père ce que vous nous auiez escrit de l'arriuee dudit sieur Delbene, de ladite declaration du

Roy, & d'un personnage de qualité que sa Majesté vouloit enuoyer pour remercier sa Sainteté, & les Seigneurs de ce College, & du commandement que sa Majesté auoit fait à Monsieur de Maiffé, sur la contention qu'il auoit avec le Nonce résident à Venise. De toutes lesquelles choses sa Sainteté fut tres-aïse, & mesme d'autant que cela luy estoit vne confirmation de ce qu'en mesme tēps luy auoit escrit Monsieur le Cardinal de Gondy, qui luy auoit donné aduis de ladite déclaration, & emoyé copie de la lettre que le Roy luy auoit escrite sur l'instruction & conuersion de Monsieur le Prince de Condé à la Religion Catholique. Lesquelles déclaration & lettres du Roy à mondit sieur le Cardinal de Gondy sa Sainteté fit lire au premier Consistoire qu'elle tint le Lundy ensuiuant 29. Ianuier, dont tous les Cardinaux & toute cette Cour sentirent vne tres-grande ioye, & en firent grande commemoration plusieurs iours apres. En cette audience mesme dudit iour 26. Ianuier nous parlâmes aussi à sa Sainteté de Marseille, & entre autres choses la suppliâmes que lors que les Ambassadeurs des Princes d'Italie le prieroient de pouruoir au fait de ladite ville, il luy pleust exhorter leurs maîtres, en parlant à eux, de prester argent au Roy, pour faire promptement des gens, & ranger ladite ville à la raison, auât que les Espagnols y eussent plus grande part. Et il nous dit qu'il le feroit auant qu'il se passast vingt-quatre heures: ce qu'il disoit pour ce que nous luy parlions le Vendredy au soir, & que le lendemain Samedy au matin l'Ambassadeur du grand Duc deuoit auoir audience, comme il eut; & puis confessa que le Pape luy auoit enjoint d'en escrire à son Altesse.

Le Vendredy 9. Feurier nous retournâmes à l'audience, pour tousiours ramenteuoir & recommander à sa Sainteté les choses de Marseille; qui nous dit qu'il y faisoit tout ce qu'il pouuoit: mais que si Cazan estoit mauvais, le Vignier estoit encore pire; ce neantmoins il sembloit que les choses alloient en meliorant plustost qu'en empirant, & qu'il esperoit que Dieu conserueroit ceste ville, & l'en prioit tous les iours. Nous le trouuâmes tout joyeux pour deux lettres qu'il auoit receuës de son Nonce qu'il a prés Monsieur de Sauoye, lesquelles contenoient le recit qu'auoit fait en deux fois audit Nonce le President Rochette retourné de la Cour prés Monsieur de Sauoye sur les cōportemens du Roy; dont il parloit avec tant d'honneur & de loüange, que ie ne sçay seruiteur du Roy qui en eust peu dire d'auantage, soit pour la verité de sa conuersion, & deuotion à la Religion Catholique, soit pour sa clemence & bonté, soit pour son inclination à la paix avec tous les Princes Chrestiens, & à la defense de la Chrestienté contre l'ennemy commun, ou pour toutes autres choses bonnes & loüables. Sa Sainteté prit la peine elle-mesme de nous lire les dites deux lettres; & nous entendit depuis qu'elle les auoit encores monstrees à d'autres. Aussi nous auôs coëgneu d'ailleurs par vne infinité de choses, qu'il ne sçauoit recevoir en ce monde plus grand plaisir que de voir que le Roy fait biē, que sa Sainteté ne s'est point trompé en bien esperant de luy, & luy donnant l'absolution. Et come nous sortions de ceste audience; nous trouuâmes le sieur Hieronime Giliago qui fait ioy les affaires de Monsieur de Ferrare, & lors allâmes à Bapudiance; & nous monstra come il tenoit en sa main la lettre que le Roy auoit écrite audit Seigneur Duc de Ferrare son maître, qui luy

auoit ordonné d'en rendre compte à sa Sainteté, & l'auy lire. Et parée que le lendemain de ceste audience 10. iour de ce mois nous receuismes l'autre despesche dudit 16. Ianvier, & que le Pape deuoit aller à Neptune, comme de fait il partit de ceste ville le 14. & fut de retour le 21. mais n'attendismes point à retourner à l'audience iusques au Vendredy, ains y retournasmes dès le Lundy 12. & dismes à sa Sainteté qu'il nous escrivoit sur l'arrivée de Monsieur Delbene par delà, & l'enuoy de Monsieur de Luxembourg par deçà, & sur autres choses, mais principalement sur ce qui s'estoit passé entre les Deputez du Roy & de Monsieur de Saubye, au sujet de la paix par eux négociée, & luy en demandasmes son aduis de la part du Roy, avec la prefacé, & en la façon que sa Majesté nous auoit prescrite. Et sa Sainteté fut d'aduis que sa Majesté deuoit acheuer le traité encommencé, quand bien ce seroit sur les articles arrestez par lesdits Deputez, & signez par Monsieur de Saubye, comme Monsieur d'Eureux l'escrit plus amplement, auquel je ne mets. Apres son retour de Neptune nous fumes à l'audience le Vendredy 27. de ce mois, pour luy baïser les pieds, & luy faire tousiours souvenir de Marseille. A quoy il nous fit la mesme response qu'auparantant, & nous dit qu'il auoit receu aduis qu'un certain personnage auoit parlé à Cazau, luy remontrant qu'il n'y auoit plus de pretexte apres l'absolution donnée par le Pape, & qu'il feroit bien de s'en remettre à sa Sainteté qui luy procureroit toutes bonnes conditions, & luy respondroit de ce que le Roy luy auoit promis: & que Cazau auoit respondu que le Pape estoit plus grand hérétique que celui qui auoit esté absous par luy. Apres cela, il nous dit qu'il y auoit aduis que Monsieur de Luxembourg venoit pour resider icy Ambassadeur, & qu'il ne feroit beau voir qu'on enuoyast un Ambassadeur pour resider, auant qu'auoir enuoyé pour presber l'obedience; & qu'il desiroit que les choses se fissent avec ordre, & avec dignité, & mesmement à ces commémorations, afin que ceux qui s'estoient monstrez si contraires à l'absolution ne prissent occasion de dire qu'on n'en tenoit tel compte qu'il appartenoit, & qu'il auoit esperé. Nous luy respondismes que sa Sainteté s'asseura que ny à ce commencement, ny à l'aduenir ne feroit obmis rien de ce qui seroit de la dignité du S. Siege, & de la gratitude de sa Majesté, & que toutes choses se feroient dignement au gré & contentement de sa Sainteté.

Voilà sommairement ce qui s'est passé en quatre audiences que nous aurés eues depuis les dernières lettres que nous vous escriuismes; & pour acheuer de respondre au reste de vos lettres, je vous diray qu'il est vray que l'Escollois dont vous faites mention est venu par deçà, & a traité avec le Pape par le moyen de Monsieur le Cardinal Aldobrandin. De vous dire précisément le sujet & la fin de sa négociation, nous ne pouuons; bien pensay-je ne me tromper de guesses en croyant constant le fait, qu'il est icy pour rascher à induire le Pape hors le prétexte accoustumé de la Religion Catholique, à favoriser de son autorité & moyens quelque dessein que ceux qui l'enuoyent ont en ces pays là; duquel dessein, & de ceux qui l'ont enuoyé il nous est venu deux opinions en l'esprit; de l'une & de l'autre desquelles nous auons quelques soupçons. Je vous proposeray icy ces deux opinions pour vous mettre en chemin de les coustir vous mesme que de plus claires, avec la cognoissance que d'elles ont ou n'ont, & pour en tirer ce que vous iud-

gande cy-après des choses d'Escoffe. La premiere opinion doncques est, qu'il pourroit estre que le Roy d'Escoffe l'envoyast, ou pour mieux dire certains Catholiques d'Escoffe ses seruiteurs à son sçeu, & de son consentement; car cet homme n'a point apporté lettres du Roy, que nous sçachions. Et si c'est le Roy ou ses seruiteurs Catholiques qui l'envoyét, il est vray semblable que leur dessein soit tel. Le Roy d'Escoffe pour les pretensions qu'il a, aspire au Royaume d'Angleterre apres la mort de la Reyne: en quoy il prevoyt d'un costé, que le Conseil & autres heretiques d'Angleterre luy pourroient estre contraires, de peur qu'il ne venge sur eux la mort de la feuë Royne sa mere; & d'autre costé que luy estant de Religion contraire à la Catholique, les Catholiques ne s'y voudront fier, & que le Pape pourroit en tas de mort de la Reine d'Angleterre, luy porter grand empeschement, & mesmes avant le cas advenu le declarer excommunié, & descheutier de son Royaume d'Escoffe, que du droit successif à celuy d'Angleterre; comme il y en a qui disent sçavoir que le Roy d'Espagne (qui outre qu'il aspire à la Monarchie de la Chrestienté, pretend encores particulièrement audit Royaume d'Angleterre, en vertu de certaine pretendüe donation à luy faite par la Royne Marie sa femme peu de temps avant sa mort) poursuiroit telle declaration contre ledit Roy d'Escoffe du temps de Sixte V. par le moyen du Cardinal Allan, & d'un certain Anglois appellé Hugues Ven, que ledit Roy d'Espagne envoya lors à Rome expressement pour en faire instance, laquelle ledit Roy d'Espagne faisoit faire non tant pour exclure ledit Roy d'Escoffe du Royaume d'Angleterre, comme pour avoir pretexte d'enuahir cependant l'Escoffe mesme, par où les Espagnols tiennent qu'il faut assaillir l'Angleterre, & que par ailleurs on ne sçauoit bonnement y entrer à main armée. Il pourroit doncques estre que ledit Roy d'Escoffe craignant ce que dessus, comme on dit qu'il craint fort, commençast dès à present à faire ses preparatifs pour acquerir la faueur des Catholiques, par le moyen desquels il esperast d'estre aydé & porté à la Couronne d'Angleterre, plustost que par les heretiques; & qu'il fist dire au Pape qu'il veut estre Catholique, & l'est desia en son cœur, & desire remettre en temps & lieu la Religion Catholique non seulement en Escoffe, mais aussi en Angleterre, & qu'il prie sa Sainteté de luy departir son bon advis & conseil là dessus; & qu'il luy face encore tenir tels autres propos qui peuvent servir à la susdite intention, & l'esperance que ledit Roy d'Escoffe a d'euitier par ce moyen que le Pape ne decerne, & ne face rien contre luy, & encores obtenir que sa Sainteté luy soit propice & fauorable. Cét Escoffois doncques peut avoir esté envoyé par ledit Roy ou par ses seruiteurs à ceste fin; & c'est la premiere de nos deux opinions. La seconde opinion est, que ledit Escoffois ne soit point envoyé par ledit Roy d'Escoffe, ny par ses seruiteurs, encore qu'il l'aye dit là où il a persé, qu'il en seroit mieux vœu, ains par quelques Seigneurs Catholiques de ce pays-là, mal contents du dit Roy, qui sous pretexte d'aider à la Religion Catholique se veulent venger de luy, & de ceux qui sont bien près de luy, aux despens du Pape, & du Saint Siège, & de la Religion mesme, dont ils se targuent. Ces Seigneurs Catholiques outre le Comte de Bothwell, peuvent estre les Comtes d'Angus, d'Arbol, &c. & d'autres qui furent condamnés es Estats d'Escoffe pour avoir



conittre contre la Couronne, & eu intelligence avec le Roy d'Espagne, & depuis ont à découuert porté les armes contre leur Roy. Nous auons quelque coniecture que ces Escossois icy demande que le Pape decerne vn monitoire, par lequel il admoneste le Roy d'Escoffe de laisser aux Catholiques l'exercice libre de la Religion Catholique, comme les heretiques l'ont de la leur, le menaçât au cas qu'il ne le face, de l'excommunier, & de doner le Royaume d'Escoffe au premier occupant, & de le priver de tout droit successeur à la Couronne d'Angleterre. Et pource qu'il est mal aduenü de telles résolutions choses de France, & que le Pape n'a aucune inclination à choses hazardées & dangereuses, ledit Escossois luy donne à entendre, que le Roy d'Escoffe non seulement ne s'offensera point de tel monitoire, mais en sera bien aise, come ayant la de luy-mesme ce desir de remettre en son Royaume la Religion Catholique, & donner cet arre de sa bonne volonté à la Sainteté, & ce contentement aux Catholiques non seulement d'Escoffe, mais aussi d'Angleterre, qu'on dit estre en grand nombre tant dedans que dehors le Royaume, desquels il espere recevoir vn iour faueur & ayde; & voudrât aussi le dit Roy d'Escoffe se seruir de tel monitoire & comminations pour excuser envers les heretiques, auxquels il pourra dire qu'il est contraint de permettre aux Catholiques l'exercice libre de leur religion, de peur que le Pape ne fulmine contre luy vne excommunication avec priuation de son Royaume, & des droits qu'il a à celui d'Angleterre. D'ailleurs on nous a dit que ce mesme Escossois apres auoir traité icy, est allé à Naples, qui montre, quand bien il n'y seroit allé que pour la ville & le pays, qu'en vn temps si suspect, & auquel vn estranger a à se doubter de toutes choses, il ne se craint gueres des Espagnols; de l'instigation desquels pourroit aussi estre que tout cecy se fait, pour auoir la couleur par eux tant desirée d'attêter sur l'Escoffe, & par là se faire voye à la conqueste de l'Angleterre, & par ce moyen tenir le Royaume de France assiégé de toutes parts. Aussi y a-il de par deçà depuis quelque temps vn Iesuite Escossois appellé Pere Gordon, qui est oncle dudict Comte de Montlé, & estoit en Escoffe avec le susdit Comte au dernier port d'armes qu'il fit contre le Roy deux ans y a, & y dépendit pour luy la somme de dix mille escus que le Pape luy fit bailler es Pays-bas par le sieur de Maluaise lors son Commissaire, & Nonce à Bruxelles, que nous sçauons d'ailleurs auoir en grande intelligence avec les susdits Comtes, & avec le susdit Pere Gordon Iesuite; de sorte que l'Enuoy de cet Escossois pourroit estre vne suite de choses des lors tramées entr'eux à Bruxelles parmy les Espagnols, & neantmoins aucunement déguisées selon que les choses se sont chargées depuis, & que l'on voit l'inclination du Pape. En effet, de ces deux opinions i'encline plus à ceste dernière me remettant neantmoins à ce que vous en iugerez trop mieux par le cours que vous verrez des choses d'Escoffe. Fât y a que quelle qui soit la vraie, il y a beaucoup à dire en chacune; & pourroit aduenir aux vns & aux autres tout le contraire de ce qu'ils cherchent, comme il est aduenü en France. Cependant à ce propos de succession au Royaume d'Angleterre, je vous ramenteuray vne chose que vous sçavez trop mieux, & que neantmoins ie ne puis omettre; c'est que comme ils nous viennent mal à propos pour encores, en l'estat que nous sommes, que la Roynie d'Angleterre étant vaine, le Roy fust surchargé de nouueaux cailloux, lesquels il ne pour-

roit bonnement faire ny laisser; aussi ne seroit-il gueres à souhaitter pour la repos & grandeur de la France, que les Royaumes d'Angleterre & d'Escolle fussent conioints & vnus en la personne d'un mesme Roy, puis que les Roys de l'Angleterre seule ont par le passé vexé la France plus grièvement & plus longuement que tous les autres Roys estrangers ensemble. Et moins seroit il expedient à la France que ceste conionction & vnion des fudits deux Royaumes aduint à la persône du Roy d'Escolle à present regnant: que d'un costé il a l'alliance d'un des plus grands Roys du Septentrion, & d'autre costé a paréte si estroite avec toute la maison de Lorraine, qui vient de causer tant de trauaux à nos Roys & à tout le sang Royal, & tant de maux & miseres à la France, & n'a point encores du tout cellé, & reste tousiours si grande dans le Royaume.

A tant ay-ie respondu à vos lettres. Quant aux occurrences de deça, ie ne pourrois commencer par vne meilleure que ceste-cy, que le Samedi vingt quatriesme de ce mois arriua icy la nouuelle de la reduction de la ville de Marseille en l'obeyssance du Roy aduenue le 17. les Espagnols furent mesmes ceux qui l'enuoyerent par un courrier dépesché en toute diligence de Gennes à Naples, pour contremander quelques vaisseaux qui deuoient porter des bleds, & des hommes & munitions de Naples à Marseille. Cette bonne nouuelle a apporté vne ioye incroyable, tant aux Italiens qu'aux François, & a redoublé l'allegresse & passe temps de ces iours gras; il s'est trouué mesme des Espagnols qui en ont esté bien aises: auquel propos il me souuient que dernièrement nous fut môstré vne lettre escrite d'Espagne à Monsieur le Cardinal Tolet par un grand & ancien Theologien Espagnol, qui loüoit ledit seigneur Cardinal de ce qu'il auoit esté d'aduis de l'absolution, & de ce que par son autorité il y auoit porté plusieurs autres Cardinaux; & adioustoit que cela luy auoit grandement augmenté sa reputation en Espagne parmy la Noblesse, & es Vniuersitez. Le seigneur Virginio Vrsino de Lamentane est venu iusques à Florence, & de là, sans venir à Rome, est allé à Mantouë, où le seigneur Fabio son frere l'est allé trouver, avec intention de s'en aller ensemble vers le Roy. L'Abbé Cornac enuoyé, comme il nous a dit, par Monsieur de Mayenne au Pape pour rendre compte à sa Sainteté de son accord, & de tous ses deportemens depuis le commencement de nos dernieres guerres ciuiles, arriua en ceste ville le 11. de ce mois, & eut son audience le 25. Il nous vint voir dès le commencement, & en ce que nous auons peu voir iusques icy, s'est comporté modestement; il nous monstra vne lettre à luy escrite de la main dudit Seigneur de Mayenne, par laquelle il se loüoit fort de la bonté du Roy, qu'il non seulement luy tenoit ce qu'il luy auoit promis, mais le luy augmentoit, & faisoit beaucoup d'honneur au fils qu'il auoit près de sa Majesté. Ledit Abbé visitant tous les Cardinaux, & ne nous a point celé d'auoir visité l'Ambassadeur d'Espagne residant icy.

La Seigneurie de Venise a fait gentil homme Venitien le seigneur Jean François Aldobrandin qui est en Hongrie, & les deux Cardinaux nepueux du Pape, sa Sainteté enuoyé Nonce resider près ladicte Seigneurie le sieur Griziano Enesque d'Amelia, qui n'est pas Espagnol come celuy à qui il succede, & pour cela, & pour autres considerations plaira à ces Seigneurs là au-

tant comme cét autre leur a déplu. Aussi enuoya dernièrement sa Sainteté l'Euesque de Casette vers le Roy de Pologne & le Prince de Transilvanie pour tascher d'accorder quelques dñfrens qu'ils ont ensemble, & persuader au Roy de Pologne d'entrer en ligue avec l'Empereur pour la deffense de la Chrestienté contre le Turc; & par vn sien Camerier d'honneur appelé le Comte d'Anguisciola, enuoya audit Prince de Transilvanie l'espee & le chapeau benits.

On tient icy pour chose seure que l'Empereur a requis Monsieur le Duc de Ferrare d'accepter la charge de son Lieutenant general en ceste guerre de Hongrie; & que ledit Seigneur Duc l'accepteroit volontiers, si le Pape luy vouloit donner l'inuestiture de Ferrare pour le Seigneur Don Cesar d'Este son cousin germain. Mais sa Sainteté n'est pas pour la luy dñner de long temps, à cause d'une Bulle du Pape Pie V. qui y est contraire; & que ledit Seigneur Duc estant venu luy-mesme en personne à Rome pour cét effet du temps de Gregoire XIV. en fut refusé non tant par ledit Gregoire, qui inclinoit à le gratifier, comme par le College des Cardinaux qui s'y opposerent, non sans quelques especes de brauades faites à sa Sainteté. Vous aurez ia sceu la mort de Monsieur le Cardinal Morosin, & comme son Euesché de Bresce a esté donné au sieur Marino Zorzo son neveu, qui estoit Nonce près Monsieur le grand Duc de Toscane. Il vous plaira prendre encores par forme de nouuelles ce que j'adiousteray icy: car aussi est ce histoire vraye, & que ie ne vous escriray rien qui ne m'ait esté dit à bon escient, & par personnes de grand entendement, & de grande preud'homme, & nullement passionnez. Quelque chose que le Pape nous ait respondu sur le projet de la paix entre le Roy & Monsieur de Sauoye, ie trouue que tous autres estiment que le Roy ne doit laisser à Monsieur de Sauoye le Marquisat de Salussés en sorte du mode. La principale raisõ est, que le Roy le luy laissant perdrait beaucoup de sa reputation, qui est celle par laquelle les Roys & Princes se maintiennent plus bien souuent, que par toutes leurs forces & moyens; & m'ont vsé de ces mots: Le Roy, disent-ils, s'est tousiours monstré fort magnanime & genereux; mais on attend à iuger de sa magnanimité & generosité par la conclusion de ce traité: & s'il quitte le Marquisat au Duc de Sauoye, il donnera occasion de penser qu'il n'a point tant de cœur comme on a creu, ou bien que ses affaires sont en beaucoup pire estat qu'on ne peut sçauoir: la clemence mesme dont il a vsé enuers ses subiets, qui maintenant est louée de tous, sera reuouee en doute, si elle est procedee d'une vraye magnanimité ou non. Cela m'a donné fort au cœur, de faõ que ie me suis resolu de le vous escrire à quelque prix que ce fust. Ils adioustent que quand ce seroit de pair à pair, la nature de la paix est que chacun recouure le sien: & en plus forts termes; que le Roy Henry II. rendit bien au Duc de Sauoye pere de cestuy-cy toute la Sauoye & le Piémont, que le Roy François I. & ledit Roy Henry II. auoient conquis en bonne & juste guerre plusieurs fois denoncee; & pourquoy doncques, disent-ils, le Duc de Sauoye ne rendra-il au Roy & à la Couronne de France le Marquisat qu'il a usurpé en pleine paix si iniustement? Que si le Roy ne peut r'auoir le sien des mains d'un Duc de Sauoye ruiné, & qui est contraint de le luy quitter, comment recourra-il d'un Roy d'Espagne le

Royaume de Nauarre, la Cappelle, Dourlans, & Blauet ? Et quant à vne somme d'argent, qu'on a entendu que ledit Duc de Sauoye promet-  
roit, ils disent que quand elle seroit bien paye, dequoy cependant ils dou-  
tent il n'y a point de recompense ny de proportion entre vn Estat fort, &  
de l'argent; & qu'une somme de deniers, pour grande qu'elle fust, ne pour-  
roit iamais recompenser à vn Roy de France le Marquisat de Salusses, &  
la grande quantité d'artillerie qui y est; outre l'indignité qu'il y a de vendre  
par force à l'usurpateur vne chose qu'il a usurpee, & qu'il tient encores de  
fait & de force; indignité que les anciens Romains n'ont peu tolerer en la  
vente d'un esclave qui s'en seroit fuy de son maistre, ayans expressement  
defendu de vendre, ny de donner vn serf pendant qu'il seroit en fuite, &  
declarans nulle la vente & la donation qui en seroit faite, iusques à ce que  
ledit serf seroit retourné en la puissance de son maistre: & outre encores  
l'exemple de la consequence que d'autres en pourront tirer, de prendre &  
usurper cy apres sur la Couronne de France d'autres terres & seigneuries,  
sous esperance qu'en fin elles leur demeureroient, au moins en payant, ou  
promettant quelque somme d'argent. Toutes ces choses m'ont esté dites  
plusieurs fois auant la reduction de Marseille; mais depuis cette prosperité  
du Roy, qui luy assure toutes les precedentes, ils les ont inculquees avec  
plus de vehemence qu'auparauant, finissans ordinairement par l'ingrati-  
tude de ce Prince-là enuers le feu Roy, & enuers la Couronne de France,  
es comportemens duquel ils ne voyent rien digne de gratification, quand  
bien le Roy le pourroit gratifier de telle chose sans indignité, & sans y lais-  
ser tant de sa reputation, & de l'honneur & grandeur de la Couronne.

I'oubliais à vous escrire deux particularitez, qui neantmoins ne vien-  
dront trop mal apres ce que dessus. L'Ambassadeur de Venise nous a dit à  
Monsieur d'Eureux & à moy séparément, qu'il a lettres d'Espagne, par  
lesquelles on luy escrit que le Roy d'Espagne & les principaux de son  
Conseil se sont plaints au Nonce du Pape resident près de luy, de ce que  
le Pape ne s'interposoit pour la paix entre le Roy & luy, & de ce que sa  
Sainteté ne l'auoit fait ensemble avec l'absolution. Et l'Abbé Cornac nous  
a dit que Monsieur de Sauoye visité par luy en passant de la part de Mon-  
sieur de Mayenne, luy a fort loué l'accord dudit sieur de Mayenne, & qu'il  
se vouloit accorder luy-mesme, à quelque condition que ce fust. Par où se  
peut voir que comme nous auons nos difficultez, aussi les autres sentent  
les leurs; & que si nous auons vn peu de patience, nous obtiendrons tous  
deux raisonnables. Si Monsieur d'Eureux & moy n'en eussions usé ain-  
si, l'absolution nous eust cousté au double de ce qu'elle a fait. A tant, &c.  
Monsieur, &c. De Rome ce dernier Feurier 1596.

## A MONSIEVR DE VILLEROY.

## XLIV.

**M**ONSEIGNEVR, Cette lettre sera toute sur le memoire en chiffre, que vous m'enuoyastes à part avec & dedans vostre lettre du 16. Ianuier; sur laquelle ie me trouuay aucunement empesché, & ne me pouuois bonnement refoudre si i'en deuois parler à Monsieur le Cardinal Aldobrandin ou non, me venans plusieurs raisons en l'esprit pour & contre. Et la difficulté estoit d'autant plus grande, qu'elle ne me donnoit point de temps, pour autant qu'apres auoir dit au Pape ce que le Roy auoit arresté touchant la protection, il falloit dire bien tost audir Cardinal Aldobrandin le contenu dudit memoire, ou ne luy en parler point du tout. En fin ie me resolus à le luy dire, pour des considerations qui me semblerent estre de plus grand poids que les autres. A quoy il me respondit, qu'il se tenoit fort honoré de la bonne affection qu'il plaisoit à sa Majesté luy declarer, & de la confiance qu'elle monstrois auoir en luy; Que sa Majesté ne se trompoit point: car il luy estoit tres-humble, tres-affectionné, & tres-fidelle seruiteur, & le vouloit estre toute sa vie; Qu'en ce fait, ny en autre d'importance, il ne pouuoit ny vouloit rien faire, sinon autant comme le Pape trouuerait bon, Que ce qu'il me pouuoit dire de luy-mesme estoit que sa Majesté auoit bien fait, ce luy sembloit de laisser la Protection à Monsieur le Cardinal de Loyeuse, Qu'il scauoit que ledit Cardinal de Loyeuse auoit fait de tres-bons offices en l'affaire del'absolution, & que d'ailleurs il estoit estimé & aymé en ceste Cour, & pour y bien seruir sa Majesté autant que nulle autre; Que le Roy ayant ledit Cardinal pour Protecteur de ses affaires, il en auroit deux, pour autant que luy Cardinal Aldobrandin y apporterait de sa part la mesme affection & soin en tout ce qui se presenteroit, là où si on retirait la protection des mains dudit Cardinal de Loyeuse, il ne voudroit plus resider en ceste Cour, & ainsi sa Majesté n'y auroit plus qu'un Protecteur; Que le Cardinal de Loyeuse, à qui il desiroit longue vie, venoit à mourir, ou pour quelque cause ne pût seruir la Protection, alors ce seroit vne autre chose; Qu'il luy sembloit au reste qu'il ne falloit parler de cecy à personne, non pas mesme au Pape. Ce sont iustement les mesmes mots qu'il me respondit; en quoy ie notay qu'il ne se laissa rien entendre si le Pape l'auroit agreable ou non. A tant, &c. Monseigneur, &c. De Rome ce dernier Feurier 1596.

## A MONSIEUR DE VILLEROY.

## XLV.

**M**ONSEIGNEUR, Je receus le cinquiesme de ce mois vostre lettre du 5. Feurier, avec la coppie. d'une lettre du Comte de Fuentes au Cardinal d'Autriche & d'un aduis que vous avez eu du passage dudit Cardinal par la Lorraine, & avec une lettre pour Monsieur d'Eureux, auquel ie la baillay incontinent, & communiquay tout le reste. l'ay veu l'apprehension que vous auiez eue du voyage de Monsieur le Cardinal de Joyeuse, laquelle ie deuois auoir preuenue: & vous auoir predict qu'il alloit par delà de luy-mesme, & pour ses affaires particulieres, & non pour aucune negociation concernant le public, ny enuoyé du Pape; mais ie ne m'aduisay point de le vous escrire, encore que ie vous donnasse aduis de son parlement. Ledit seigneur Cardinal estoit en doute si le Roy luy confirmeroit la Protection, ou non, & pensa qu'en faisant le voyage à la Cour pendant qu'on ne faisoit icy gueres d'affaires, en attendant que le Roy enuoyast prestre l'obedience, il pourroit la conseruer, & au pis aller euteroit vn peu de honte que ce luy eust esté, si luy estant à Rome, le Roy y eust declaré vn autre pour protecteur. Il desiroit aussi mettre ordre à plusieurs de ses affaires, qui sont demeurees en arriere pour occasion des troubles passez, & sur tout purger enuers le Roy le passé, & donner à sa Majesté toute assurance de sa fidelité pour l'aduenir. Ces choses, & autres telles qu'il vous aura dites luy mesme, furent cause de son voyage, & nō aucune charge publique qu'il eust du Pape, qui ne luy donna pas mesme aucunes lettres à porter par delà. l'ay veu encore l'apprehension que vous avez de plusieurs choses qui se passent dans le Royaume, & les ay bien nottees, avec autres semblables que vous m'avez mandees par vos depeschés precedentes, dont ie me seruiray en temps & lieu enuers le Pape, & autres qui pourroient trouuer mauuais les moyens dont le Roy pourra estre contraint d'user pour la conseruation de son Estat. Et encore hier que Monsieur d'Eureux & moy fusmes à l'audience, il nous vint occasion de dire au Pape les artifices des Espagnols, qui n'ayans pū empescher l'absolution, taisent maintenant d'en faire leur profit, & d'assoibler le Roy par là; ce que nous fimes conformément à ce qui est porté par vos lettres, & que nous voyons estre de vostre intention, & ie continueray aux occasions d'en informer sa Sainteté, ou de la preuenir, & preparer en tout euenement, vous donnant aduis du tout, & de ce que Dieu m'inspirera sur les considerations portees par vosdites lettres, que ie recognois estre tres-grandes & tres-importantes. En l'audience que nous eusmes hier, nous dismes aussi à nostre saint Pere, ce que nous iugeasmes estre à propos des autres particularitez, qu'il vous auoir plu m'escrire, & il nous dit qu'il s'esmeruilloit de ce qu'on demuroit si long temps à enuoyer par deça apres auoir receu la Bulle de l'absolution, & que tout aussi tost qu'on auroit enuoyé, il declarer

roit vn Legat , & l'enuoyeroit en France. Nous luy exposâmes les causes de ce retardement; & entre autres celle que m'escrîuez du Cardinal de Loyseuse, qu'on auoit estimé deuoir ouyr, auant que dépescher personne par deçà. Il nous dit en outre, qu'il vouloit enuoyer vn courtier à son Nonce en Espagne, pour faire exhorter le Roy d'Espagne d'armer par mer, & enuoyer son armee par deçà pour la seureté de ceste coste, puis que le Turc armoit par mer, & qu'il y auoit apparence qu'il enuoyeroit en ceste mer pour infester la Sicile comme il auoit fait n'aguères; mais que sa Sainteté craignoit qu'en temps de guerre, on arrestast le courrier par la France. Nous luy asséurâmes que tout courrier qui a passe-port de sa Sainteté, en quelque part qu'il allast, passeroit seurement & libremēt par où sa Majesté seroit obeye, & en outre luy fut offert passe-port de la part de Monsieur d'Encreux, encores qu'apres celuy de sa Sainteté il deust seruir de peu ou de rien. Monsieur le Cardinal Aldobrandin, chez lequel nous allâmes en sortant d'auec le Pape, nous en parla aussi, auquel fut fait pareille response. Ledit Seigneur Cardinal nous parla encores de l'ordinaire d'Espagne, qui souloit venir tous les mois pour les expeditions de Ceste Cour, & la nourrissoit en partie, & sa Sainteté desiroit qu'o luy donast passage libre par la France en consideration du saint Siege, & de ceux qui y seruent à l'Eglise de Dieu. Nous luy respondîmes que le Roy se trouueroit tousiours disposé à complaire à sa Sainteté, & à gratifier toute ceste Cour de tout ce qu'il pourroit: mais que nous auîos ouy plusieurs personnes d'entendement qui accusoient la facilité des François, de ce qu'ils enduroient que le Roy d'Espagne enuoyast par la France tous les mandements, assignations, & autres prouisions qui se faisoient contre la France mesme, & que sans ceste commodité que nous mesmes luy donnions, il n'auroit moyen de nous vexer à beaucoup préstant comme il fait, & ses affaires demeureroiēt le plus souvent en arriere, & les nostres s'aduanceroient. Il nous repliqua qu'il ne parloit point des courriers extraordinaires, par lesquels telles choses se portoient, mais des ordinaires, qui viennent pour les expeditions de Rome: nous dismes que nous en escriuions en Cour. Maintenant ce sera à vous à aduiser si la recommandation de sa Sainteté doit plus pouuoir enuers vous pour permettre le passage aux ordinaires d'Espagne, ou le dommage qui en peut aduenir à la France pour le refuser. Je ne doute point que la recommandation de nostre saint Pere ne soit faite de cœur & à fort bonne intention, & que du passage libre desdits ordinaires pour France, n'en reuienne grande commodité à la Datairerie de nostre saint Pere, & à toute ceste Cour, mais il pourroit bien estre aussi que l'Ambassadeur d'Espagne, & autres de ceste nation eussent prié sa Sainteté d'y interposer sa recommandation, lesquels apres la reduction de Marseille ne sçauent plus cōme rien recevoir d'Espagne ny par mer ny par terre, & sont en danger de souffrir beaucoup. S'il n'y alloit du public & del'Estat, ie serois tousiours d'aduis qu'on leur permist de iouyr de ceste commodité, pour le respect de ceste Cour, & de la recommandation de sa Sainteté: mais si c'est chose qui preiudicie à l'Estat & combien, ie m'en remets à vous qui en pouuez iuger trop mieux. Monsieur le Cardinal saint George qui a en main les affaires d'Allemagne, nous requiert d'un autre costé descrire au Roy en faueur de l'Euesque du

Liege, à ce que luy ny les siens ne fussent molestez au diocese du Liege, par Monsieur le Duc de Bouillon, ny par autres sujets & seruiteurs de sa Majesté: & nous representa comme ledit Euesque du Liege meritoit de faueur de sa Majesté, non seulement pour Prince d'origine telle qu'il sçauoit, mais aussi pour estre personnage de grâde valeur en soy, comme sa Sainteté l'auoit trouué par experience au maniemment & conduite de plusieurs affaires de grande importance, & pour auoir moyen de seruir vn iour sa Majesté comme Archeuesque de Cologne, & Electeur de l'Empire qu'il est: & mesme que sadite Majesté deuoit penser à estre encores autre chose que Roy de France, pour pouoir encores mieux employer sa valeur à la deffense de la Chrestienté, comme son incomparable prouesse, & autres vertus Royales, & les souhaits & vœux des plus entendus, & des plus gens de bié l'y destinoient: outre cela luy Cardinal qui parloit, s'en sentiroit grandement obligé en son propre nom à sa Majesté, & luy en rēdroit tres-humble seruice en tout ce qu'il plairoit à sa Majesté luy commander. Nous luy respondismes que nous en escriirions tres-volontiers, & cependant luy asseurions, que pour toutes les considerations susdites, & particulièrement pour la recommandation qu'il en faisoit, le Roy seroit tout prest non seulement à garder de l'injure des siens ledit sieur Euesque du Liege, mais aussi à le fauoriser & gratifier en toutes occurrences: mais qu'il falloit prendre garde que les Espagnols ne se seruissent des gens, & des moyens dudit sieur Euesque, & que la neutralité fut par luy fidellement gardee; car autrement il seroit mal-aisé, voire impossible de cōtenir les François de se renncher, & estoit vray-semblable que si les François auoient fait quelque chose contre les Liegeois, qu'ils y eussent esté prouoquez; puis que le Roy & les siens n'ont fait la guerre qu'en deffendant, pour la conseruation de ce qui appartient à la Couronne de France. Ledit Seigneur Cardinal confessa que les Espagnols tenoient quelques places dudit sieur Euesque: mais que c'estoit malgré luy, & vn tort qu'on luy faisoit, dont il estoit plus marry que personne. Au demeurant ces quatre temps des cendres se sont passez sans promotion, comme ie vous auois escrit, mais on croit qu'il s'en fera aux prochains de la Pentecoste. Deux des Ambassadeurs que le Grand Maître & l'ordre de S. Iean de Hierusalem enuoyent au Roy, sont arriuez en ceste ville, à sçauoir vn Pisan, & vn Portugais: le troisieme que l'on auoit eleu de la nation François, qui estoit le nepueu du defunt Grand Maître, a esté contraint de s'excuser pour deffendre l'honneur de la memoire de feu son oncle, que quelques vns veulent dénigrer par certaines reuisions de comptes qu'ils demandent; au lieu duquel nepueu on a substitué le sieur Chamusson Prieur de Champagne qui est en France, & avec ces deux ira vers sa Majesté pour faire le compliment à eux enjoint, & puis resider Ambassadeur vers sa Majesté pour ladite Religion. A tant, &c. Monseigneur, &c. De Rome ce 9. Mars 1596.



## A MONSIEUR DE VILLEROY.

## XLVI.

**M**ONSEIGNEUR, Je viens d'entendre tout maintenant comme Monsieur le Duc de Mercœur ayant enuoyé demander au Pape pour l'Euesque de Vannes l'Abbaye de saint Sauveur de Rocan de l'Ordre de saint Benoist au diocèse de Vannes, vacante par la mort du dernier possesseur, sa Sainteté la luy a refusée, & l'a destinée à Monsieur Serafin lequel en a grand-besoin, & est de tel mérite que vous sçavez, & affectionné au service du Roy & au bien de la France autant qu'il est possible, en ayant fait profession au temps le plus difficile & dangereux, de sorte que chacun s'est promis que sa Majesté luy feroit du bien; comme aussi le tenons nous pour Cardinal à la première promotion qui se fera, pour auoir serui le S. Siege plus de trente ans, & estre singulierement aimé & estimé de sa Sainteté, & de tous les bons de ceste Cour. Au demeurant ie sçay qu'il est si modeste, que quand il pourroit, il ne voudroit auoir ceste Abbaye ny aucun autre bien qu'au gré de sa Majesté: & partant i'estime que ce soit chose non seulement bonne, mais aussi en certaine façon necessaire que la volonté du Roy conuienne avec celle du Pape en ceste vacance; & que si le Roy a donné ladite Abbaye à quelqu'autre, comme il n'y aura eu faute de demandeurs, sa Majesté contente cestuy-là de quelqu'autre chose pour n'entrer en debat avec le Pape à ces commencemens, sur le sujet mesme d'un personnage si qualifié, & qui a tant de mérite. Et au surplus nous regarderons par deçà de trouuer moyen que les droits de nomination du Roy y soient le moins offenzés que faire se pourra, & qu'il y soit pris quelqu'un des expediens dont ie vous ay escrit par ma lettre du 22. Feurier; & principalement quel l'Indult pour le Roy soit obtenu au plustost que faire se pourra, afin que nous ne soyôs tousiours à recommencer, & que les nominations de sa Majesté soient acceptées & attendues sans aucune difficulté. A tant ie prie Dieu qu'il vous donne, Monseigneur, en parfaite santé tres-heureuse & longue vie. De Rome ce 10. Mars 1596.

## A V R O Y.

## XLVII.

SIRE,

Monsieur d'Eureux qui s'en retourne vers vostre Majesté vous rédra compte de toutes les choses de deçà, tant passées depuis l'auenue, que presentes:

& partant ie n'entreprendray de vous en rien dire pour ceste heure. Il lai-  
 se vn grand regret de soy à toute ceste Cour, pour les rares qualitez que  
 Dieu a mises en luy, cogneuës de vostre Majesté long temps y a. Outre la  
 prudence, fidelité, zele, & bon-heur qu'il a porté au seruice de vostre Ma-  
 jesté, il a encores par son sçauoir fait honneur à nostre nation, en toutes les  
 compagnies des grands & sçauans personages où il s'est trouué: aussi a-il  
 fait vne grande & honorable depense, receuant & appellant ordinairement  
 à sa table tout ce qu'il y a eu de plus docte & poly en Rome. Et pour mon  
 regard, de plusieurs faveurs & honneurs qu'il a pieu à vostre Majesté me  
 faire, ie luy suis principalement obligé pour m'auoir associé en vn si grand  
 affaire avec vn si grand personnage, duquel ie confesse auoir beaucoup ap-  
 pris non seulement en matiere de sciences & lettres, mais aussi d'affaires  
 d'Estat. A tant, &c. De Rome ce 28. Mars 1596.

## A MONSIEVR DE VILLEROY.

## XLVIII.

**M**ONSEIGNEVR, S'en retournant Monsieur d'Eureux vers  
 le Roy, ie ferois vne trop grande faute de ne vous escrire point par  
 luy, & de vous escrire par luy des choses de deça, qu'il sçait mieux que moy  
 ce seroit de moy vne trop grande presumption ou inaduertâce. Ie ne vous  
 escriray donc qu'un mot de luy, que mon deuoir ne me permet de taire:  
 c'est que comme l'affaire pour lequel il a esté enuoyé par deça, a esté par luy  
 fait & parfait prudemment, fidèlement, & heureusement, aussi a-il mon-  
 stré en plusieurs autres choses comme il est excellent, non seulement en sça-  
 uoir, enquoy il est incomparable, mais aussi à traiter & negotier affaires  
 d'importance. De façon que i'estime que le Roy fera beaucoup pour son  
 seruice, & pour le bien de son Royaume s'il continuë à l'employer cy apres  
 aux affaires & occasions qui se presenteront; & vous, Monseigneur, si vous  
 l'y poussez & aduancez par les moyens que vous en auez. Aussi ne vey-je  
 oublier icy vne des qualitez que i'ayme le plus en luy, à sçauoir qu'il esti-  
 me infiniment vostre vertu & valeur, & l'a fait sonner icy de fort bonne  
 façon aux oreilles du Pape & des principaux de cette Cour. Qui sera l'en-  
 droit où ie finiray la presente, en priant Dieu qu'il vous donne, Monsei-  
 gneur, &c. De Rome ce vingt huitiesme Mars mil cinq cens nonante six.

## A MONSIEVR DE VILLEROY.

## XLIX.

**M**ONSEIGNEVR, Hier apres dîner Monsieur d'Eureux, par-  
 t de ceste ville pour s'en retourner vers le Roy, laissant grand re-

gret de soy à toute cette Cour pour ses rares qualitez que Dieu a mises en luy. Aussi outre qu'il a dignement seruy le Roy, tant en l'affaire principal pour lequel il estoit venu, qu'en tout le reste qui s'est présenté; il a encores pour son éminent sçauoir fait honneur à la France en toutes les compagnies des grands & sçauans personages où il s'est trouué: comme aussi a-il fait tousiours vne fort belle & honorable depense, receuant & appellant ordinairement à sa table les plus doctes hommes de Rome. Au demeurant, il veut voir vne partie de l'Italie en s'en retournant; & de Lorette, où ils'en va tout droit, pense retourner à Florence, & de là aller à Venise par Bologne & Ferrare: de Venise il fait estat d'aller à Gennes par Mantouë & Parme; & de Gennes passer à Saoune & à Thurin, s'il peut obtenir passe-port de Monsieur de Sauoye: tellement qu'il ne pourra arriuer à vous qu'à la fin de May ce que ie vous ay voulu mettre icy, afin que vous pensant qu'il y deust arriuer plustost, ne prissiez de là occasion d'attendre iusques à sa venue à enuoyer par deçà; où l'on s'emesueille de ce que le Roy a tant demeuré à enuoyer après auoir receu la Bulle de l'absolution, & le bref de sa Sainteté. Aussi y a-t-il des choses que le Pape desire faire, & voudroit estre desia faites, comme d'enuoyer vn Legat; ce qu'il luy semble ne deuoir faire que sa Majesté n'ait enuoyé luy presser l'obedience.

Les autres choses de deçà sont au mesme estat qu'elles estoient lors que ie vous escriuis mes lettres des dernier Feurier, & neuuesme de ce mois; & n'ay qu'y adiouster, sinon que le seigneur Dom Pietro de Medicis frere du grand Duc de Toscane arriua en ceste ville venant d'Espagne le dixhuitiesme de ce mois, & est logé chez l'Ambassadeur d'Espagne. Il vient, à ce que chacun dit; pour auoir raison de certaines grandes pretentions qu'il a en la succession du feu Duc François son frere, touchant les meubles & autres choses qui ne suiuent l'Estat du grand Duché, esquelles il veut comprendre le thresor, & plusieurs autres choses que le grand Duc pretend appartenir à l'Estat, auquel luy seul a succédé. La commune opinion d'icy est, que les Espagnols fomentent ce different des deux freres, & animent le puîné contre l'aîné; auquel aîné pour consolation est nay depuis peu de iours, encores vn fils: mais reculant l'oncle d'autant, A tant, &c. Monsieur, &c. De Rome, ce vingt neuuesme Mars mil cinq cens nonante six.

## A M O N S I E V R D E V I L L E R O Y .

L.

**M** O N S E I G N E V R, Par vne lettre que ie vous escriuis le 29. Mars. ie vous donneay aduis comme monsieur d'Encrey estoit party de ceste ville le 28. pour s'en retourner vers le Roy.

Le 30. ie receus la lettre qu'il vous pleust m'escrire du camp de Seruez près la Fere le 24. Feurier, à laquelle ie respondray par l'ordinaire de Lyon que nous despescherons bien tost. Cependant j'ay estimé de uous faire aduancer cette cy par autre voye pour vous aduertir comme au Conseil

re qui fut tenu Mercredy dernier troisieme de ce mois, nostre saint Pere declara Legat pour France Monsieur le Cardinal de Florence, qui est de la maison de Medecis, & appelle Cardinal de Florence, par ce que lors qu'il fut fait Cardinal en l'an mil cinq cens quatre vingt deux il y en auoit vn autre qui s'apelloit Cardinal de Medicis, qui est auourd'huy le grand Duc de Toscane. Il est aagé de soixante ans, tenu pour fort homme de bien, sage & moderé, franc & rond, aymé & estimé du Pape, & a tousiours fait bon office pour l'absolution du Roy, n'ayant dépendance que du saint Siege, & de sa Sainteté; confident neantmoins dudit seigneur grand Duc comme parent, & comme ayant seruy ceste maison d'Ambassadeur à Rome dix ou douze ans, & estât paruenü à la dignité de Cardinal en partie par son intercession, & par celle du feu grand Duc François son frere. Chacun loue ceste election, & espere-t'on qu'elle tournera à l'honneur de Dieu, au bien de la Religion Catholique, au contentement du Roy, & au repos du Royaume. Il ne partira d'icy qu'apres Pasques, & passera par Florence, où il arrestera quelques iours, en quoy se passera tout ce mois d'Auril pour le moins, & pourra arriuer à vous emiron la saint Jean. Et encores que l'on eust icy desiré & estimé raisonnable que le Roy eust enuoyé prester l'obediëce auât que le Pape enuoyast Legat par delà, si est-ce que sa Sainteté voyant que l'on tardoit tant du costé de de là n'a estimé deuoir regarder à tout cela, ny retarder le bien qu'une telle Legation peut apporter. Apres ledit seigneur, on enuoyera pour resider Nonce près le Roy l'Euesque de Mantouë, qui est de la maison de Gonzague, & parent du Duc de Mâtouë, & de Monsieur de Neurs. Il a esté autresfois en France & à Paris, lors General des Cordeliers; & vous pourrez vous souuenir de l'y auoir veu.

Letroisieme iour de ce mois au mesme consistoire, nostre saint Pere declara encores Legat pour Pologne Monsieur le Cardinal Caetan: qui est tout ce que ie vous escriray pour ceste heure, priant Dieu, Monseigneur, &c. De Rome ce cinquieme d'Auril mil cinq cens nonante six.

## A MONSIEVR DE VILLEROY.

L L.

**M**ONSEIGNEVR, Par vne lettre que ie vous escriuis le 29. Mars, ie vous donnay aduis comme Monsieur d'Eureux estoit party de ceste ville le 28. pour s'en retourner vers le Roy. Par vn autre que ie vous escriuis le 9. de ce mois, ie vous aduertis cōme le 3. nostre saint Pere auoit declaré Legat pour France Monsieur le Cardinal de Florence; & enuoya ceste lettre par Gênes, & encores vn duplicata par Venise. Par vne troisieme bien longue que ie vous escriuis hier, qui sera avec la presente, ie respondis à la vostre du vingt quatrieme Feurier, que i'auois receuë le 30. de Mars. Ceste-cy sera pour vous faire scauoir certains particularitez: & premierement que ie fus à l'audience le Védredy cinquieme d'Auril, &

S. 2.

remerciay nostre saint Pere de la declaration qu'il auoit fait dudit Legat deux iours auparauant: & puis dis à sa Sainteté de ce qui estoit porté par vostre dite lettre du 24. Feurier, ce qui s'en deuoit dire. Sa Sainteté se plaignit à moy de ce que le Roy demeueroit tant à enuoyer quelqu'un: ce que i'excusay par les moyens que i'ay mis au commencement de madite lettre d'hier. Sa Sainteté se plaignit encores d'un Arrest de la Cour de Parlement donné contre les prouisions de Rome, disant que ces gens là qui deuoient faire tout ce qu'ils pourroient pour oster la memoire du diuorce qui a esté entre le saint Siege & la Couronne, faisoient au contraire tout ce qu'ils pouuoient pour la rafraischir & renouueller. Il entendoit l'Arrest du 25. Iuin dernier, par lequel est defendu de confirmer les prouisions obtenues en Cour de Rome depuis les deffenses d'y venir, lequel Arrest j'auois veu auparauant aller à l'audience: & bien me seruit pour en pouuoir mieux respondre. Je luy respondis doncques; que c'estoit chose que la Cour auoit faite sans le sçeu du Roy, comme elle fait d'autres Arrests, & sur vn fait particulier qui s'estoit présenté, auquel le Seneschal d'Aniours auoit validé vne prouisiõ obtenue par deçà, depuis que lesdites deffenses d'y venir auoient esté faites; Que j'eusse desiré que la Cour n'eust point fait telle chose, & mesmes pour la consideration qu'il auoit pleu à sa Sainteté me dire: mais qu'il n'y auoit point si grand mal en cet Arrest, comme l'on disoit; d'autant que ladite Cour n'auoit point ordonné que lesdites prouisiõs obtenues depuis lesdites deffenses ne fussent point tenues pour bonnes, ains qu'elles ne fussent point validees par les iuges qui estoient au dessous d'elles; & ne voudroit dire ladite Cour, sinon qu'ayans les Cours de Parlement fait les deffenses de venir à Rome, il n'appartenoit aux iuges inferieurs de valider les prouisions obtenues contre lesdites deffenses; & que si elles denoient estre validees, c'estoit ausdites Cours de Parlement, & au Roy à les valider. Et au pis aller ladite Cour, sans toucher à l'autorité du S. Siege, puniroit seulement par ledit Arrest la desobeyssance de ceux qui estoient allez contre leurs prohibitions. Nostre saint Pere ne repliqua rien à ceste responce; mais adjousta vne autre plainte, de ce qu'on n'auoit encores rien fait touchant la publication du Concile de Trente, & le retablissement de la Religion Catholique au pays de Bearn. Je luy dis que pour publier le Concile de Trente, il falloit non seulement que le Roy fut déchargé du siege de la Fere, & de telles autres factiõs de guerres si vrgentes, mais aussi qu'il eust vsé de grands preparatifs pour y faire condescendre les Cours de Parlement, les Chapitres des Eglises Cathedrales, & plusieurs autres opposans: & qu'encores avec tout cela il y auoit bien à faire; Que le pays de Bearn estoit le plus loing de la personne du Roy de tous ceux qui luy obeyssent: & partant ne s'y estoit point encores peu faire tout ce que sa Majesté eust desiré; & qu'il estoit besoin d'y vser encores de grands preparatifs. Depuis i'ay veu vne lettre escrete d'Auch le 2. Ianuier par vn Iesuite de là; à vn Iesuite de ce pays là résident aujourdhuy à Rome, en laquelle lettre sont ces mots (La Messe en Bearn & à Pau on espere que tout ira mieux.) Je la porteray avec moy apres demain que j'iray à l'audience, & apres l'auoir lue au Pape, luy diray qu'il peut voir comme le Roy par son biẽ faire surpasse l'expectatiõ de ses propres seruiteurs: mais que nous ne sommes pas si

*Illegens à faire sçauoir à sa Sainteté les vrayes & bonnes choses que nous faisons, comme sont les Espagnols & leurs adherents à inuenter & suggerer à sa Sainteté des calomnies.*

Le Dimanche des Rameaux 7. iour de ce mois, Monsieur le Cardinal Aldobrandin m'envoya appeller, pour me dire qu'en certaines valles du Piemont suiettes à M<sup>rs</sup> de Sauoye, où il y a force heretiques depuis vn fort long temps, le Pape auoit enuoyé pour leur cōuersion plusieurs Iesuites & Capucins qui auoient desia fait grand fruit, & s'esperoit on qu'ils le feroient encores à l'aduenir plus grād: mais qu'il y auoit certaine sorte de gés qui s'y vouloient opposer, & appeller le sieur de Lesdiguieres pour empescher vn si bon ouure: sur quoy le Pape auoit ordonné à luy Cardinal Aldobrandin de me dire que i'escruiſſe au Roy, que Sainteté le prioit d'escire audit sieur de Lesdiguieres, qu'il n'allast n'y enuoyast au secours de ceux qui vouloient destourner la cōuersion des heretiques. Je luy dis que i'obeirois au commandement de sa Sainteté; mais qu'il falloit aduiser que Monsieur de Sauoye ne couurist quelque fin deſſein contre nous, sous ce pretexte d'enuoyer faire la guerre en ces valles contre ceux qu'on disoit destourner la cōuersion des heretiques. Le mesme Seigneur Cardinal Aldobrandin me dit, qu'on auoit r'apporté au Pape certaines choses qui trauiilloient sa Sainteté, à sçauoir, que le Roy auoit donné l'Abbaye d'Espernay au sieur de Vignoles heretique & Gouverneur de ladite ville, lequel aussi tost auoit introduit le presche des heretiques en ladite Abbaye; Que le Roy auoit separé l'Abbaye de saint Remy de Reims, d'auec l'Archeuesché de Reims, laquelle a esté vnice par le saint Siege, & l'auoit donnée au Marechal de Bouillon heretique, sous la confidence d'vn certain Prestre, lequel estant mort depuis peu de iours, ladite confidence auoit esté baillee à vn heretique de Sedan, qui receuoir au iourd'huy les fruiçts de ladite Abbaye pour ledit Marechal heretique. Je luy respondis, que de tout cela ie n'en sçauois & n'en croyois rien, & que c'estoient des malignes & maudites inuèctions pour denigrer l'honneur & repuration du Roy, & donner traual & vexatiō à sa Sainteté, & les remettre tous deux en mauvais mesnage de nouveau, si on pouuoit. Mais que ie le suppliois de ne croire à telles calomnies, & s'asseurer de la bonne & sincere intention du Roy, mesmuy assez verifiées & tesmoignées par tant de bons effects, que les gens de bien n'en pouuoient plus douter: semerçant cependant sa Sainteté & luy de l'aduis qu'il luy auoit plu m'en donner & le priant de continuer à m'aduertir quād tels rapports leur seroient faits, ou bien ne les escouter point ny luy ny sa Sainteté. Ces faux rapporteurs sont lies & ordures restés de la Ligue, qui en leur cœur ne seront iamais paiz avec le Roy, ny avec les bons François, ny avec eux mesmes; & ne s'apperçoient point qu'ils font vn grand déplaisir au Pape, partie pource qu'il ne les croit point, partie pource qu'il ne sçauoit qu'y faire. L'en cognois icy quelques vns par nom & par surnom; mais ie n'en veux point souiller le papier, non plus maintenant que i'ay fait cy-deuant qu'il ne m'en manquoit point d'occasion, pource qu'ils ne le valent pas, & qu'ils se punissent eulx-mesmes, languissant & secheans de douleur & de despit de ce dont ils se deuient resouyr le plus, s'ils auoient quelque bon & quelque sens. Quand ie vous donnavois

nis de la declaration que le Pape auoit faite du Legat pour France, ie vous escriuis par mesme moyen qu'il vouloit enuoyer avec ledit Legat l'Euesque de Montouë pour resider Nonce près du Roy. Depuis il me fut dit trois choses dudit Euesque : la premiere qu'il auoit esté page du Roy d'Espagne, & qu'estant en la Cour du Roy il se fit Religieux. La seconde, qu'il a eu & tenu l'Euesché de Cifalu en Sicile à la nomination du Roy d'Espagne, & qu'il a encores aujour'd'huy quelque pension sur ledit Euesché de Cifalu ; outre que le Pape luy auoit donné l'Euesché de Parme, comme à personne de qui les Espagnols se fioient. La troisieme, qu'un sien frere appelé le Ferrante Gonzaga a seruy long temps le Roy d'Espagne aux Pays Bas, & est encores aujour'd'huy au seruice de l'Empereur ; qui est comme vne continuation de seruice audit Roy d'Espagne. Je pensay ne deuisir mettre cela à nonchaloir. Et parce que nous estions en la semaine sainte, auquel temps on ne demande point l'audience au Pape, ie m'en allay pour le dire à Monsieur le Cardinal Aldobrandin, & à Monsieur le Cardinal Toletto, & les prier de bien considerer ces choses, sans prendre avec eux conclusion plus formelle. Monsieur le Cardinal Toletto, que ie trouuay le premier, me dit que toutes ces choses auoient esté considerées quatre ou cinq mois auant que le Pape s'y resolut ; mais qu'on auoit trouué ce Prelat icy le plus à propos, pour estre d'extraction fort noble, & homme de bien, qui ne voudroit faire chose indigne de sa Noblesse, & de la profession d'homme entier & craignant Dieu, qu'il auoit fait toute sa vie. Que d'ailleurs il estoit obligé au Pape, & ne feroit que ce qui luy seroit ordonné par sa Sainteté, qui s'en fioit grandement ; Qu'il estoit aussi parent & confidant du Duc de Mantouë, duquel nous n'auions point d'occasions de nous deffier ; outre qu'il auoit des parens en France, & y auoit esté autres-fois fort bien venu & caressé par le feu Roy ; Que tout ce qu'on alleguoit contre luy, n'auoit point de force enuers un homme de bien, pour luy faire faire vn acte si lasche & meschant ; Que le Pape Paul IV. auoit esté Page du Roy d'Espagne, & neantmoins il luy fit la guerre, & le vouloit depousseder du Royaume de Naples, & de tout ce qu'il a en Italie ; Qu'il ne falloit pas seulement considerer que ledit Euesque auoit esté page du Roy d'Espagne ; mais aussi qu'il y auoit esté fort peu, & qu'il aime mieux se faire Religieux, que de demorer long tēps en ceste Cour là. Tout de mesme si l'on cōptoit qu'il auoit eu l'Euesché de Cifalu, il falloit aussi cōpter qu'il l'auoit laissé, & n'auoit peu comporter la subjection en laquelle sont les Euesques de Sicile ; Que si aucuns de ses parens seruoient le Roy d'Espagne, il auoit aussi des parens qui seruoient le Roy ; & si l'auoit vn frere au seruice de l'Empereur, n'estoit pas à dire pour cela que son frere mesme fut attaché au Roy d'Espagne : car l'Empereur n'estoit pas fort content du Roy d'Espagne luy mesme, comme c'estoit chose notoire, & vn frere n'a pas tousiours les mesmes affections & interests que l'autre ; Que luy Cardinal Toletto estoit nay, & auoit des freres & sœurs, & autres parens en Espagne, & neantmoins nous auions veus qu'il auoit laissé de faire son deuoir pour le respect du Roy d'Espagne ; Qu'auant il me vouloit bien aduertir que ledit Euesque de Mantouë seroit Cardinal sans doute s'il viuoit ; Que si nous le receussions comme Espagnol, il pourroit s'en ressentir, & se porter pour tel côté nous toutes la vie.

Que ce seroit mieux fait à nous de le nous acquérir avec ceste occasion comme il seroit facile au Roy, qui a de si belles & bonnes parties pour gagner les hommes : Que lors que le Pape voulut enuoyer Nonce à Monsieur de Sauoye l'Archeuesque de Barri, qui y est à present, ledit sieur Duc fit prier le Pape pour son Ambassadeur fort instamment que ce ne fust point luy, & ledit Ambassadeur en parla à luy Cardinal Toletto, qui luy cōseilla de le laisser aller, & de ne le contraindre point ; dont il est aduenu que le Duc de Sauoye n'a point auourd'huy vne personne plus confidente que ledit Archeuesque de Barry, qui tient près de luy lieu non seulement de Nonce, mais de premier & plus intime Conseiller qu'il aye : Qu'outre cela on ne scauroit changer ledit Euesque de Mantouë qu'on n'empirast, comme on auoit bien pensé à tous ceux qui semblent estre dignes de ceste charge : Qu'il pouuoit estre que ceux qui parloient ainsi de luy, ne se mesussent pas tant par crainte qu'ils eussent qu'il nous en aduint mal, comme pour desir de faire place à quelque autre qu'ils aimeroient mieux pour leurs desseins particuliers : Qu'au pis aller ce n'estoit point vn mariage, ny vne profession de Religion, & que ledit Euesque iroit avec le Legat, & s'il ne satisfaisoit au Roy, le Pape au moindre mot que sa Majesté luy en feroit dire, le changeroit. Voila donc ce que me dit Monsieur le Cardinal Toletto. Monsieur le Cardinal Aldobrandin m'en parla en ce sens mesme, mais plus sa cōtente s'arresta principalement sur la grande disette de personne qui fust digne de ceste charge, disant qu'on auoit fait vn examen fort exquise de tous ceux qu'on auoit pensé y estre propres, & auoit on trouuë que les vns dependoient trop de quelque Prince ou Potentat : aux autres manquoit ou la Noblesse, ou la doctrine, ou l'integrité, ou la moderation, ou quelques autres qualitez requises : que l'Euesque de Mantouë auoit esté nommé de luy où il y auoit le plus à redire : Que ce n'estoit point du Roy d'Espagne qu'il auoit esté page, ains du Duc de Parme dernier decédé qui le mena en Espagne, qui n'estoit lors que Prince de Parme : & si cet Euesque auoit quelque obligation au Roy d'Espagne, il estoit encores plus obligé au Pape, & en attendoit chose plus grande : Que le Pape le connoissoit bien, & se fioit fort de luy, & si la Sainteté le tenoit pour dependant d'Espagne, elle ne luy commettrait point le maniemēt de ses affaires. Ledit Seigneur Cardinal Aldobrandin apres cela me dit, qu'il y auoit vn Pere Iesuite Espagnol appellé le Pere Alphonse Carillo, qui auoit esté enuoyé au Pape par le Prince de Transiluanie, pour luy demander secours contre le Turc, & deuoit passer en Espagne pour mesme fin ; qu'il y pouoit aller & retourner encores à Rome par mer : mais, qu'il pourroit aduenir que par quelque tempeste il seroit ietté en la coste de France, où à force de grand uaisseau seroit contraint d'aller terre à terre le long de la coste, ou possible de faire quelques iournees par terre ; & que pour estre ledit Espagnol on luy pourroit faire quelque desplaisir : & partant nostre saint Pere desireroit qu'il pleust au Roy faire expedier vn passe-port pour ledit Carillo, & deux Gentils-hommes de Transiluanie qui l'accompagnent, appelez Michel Bostkai, & François Caranchenes, & vn sergent, & enuoyer ledit passe-part au Nonce que la Sainteté a en la Cour d'Espagne, pour seruir audit Carillo à son retour, attēdu que la presse qu'il



auoit de partir tost pour Espagne ne luy permettoit d'attendre icy ledit passe-port pour l'aller. Je luy dis que i'en escrirois, & que ie croyois que sa Majesté commanderoit ledit passe-port; mais que de l'envoyer au Nonce qui est en la Cour d'Espagne, il seroit mal aisé, attendu la guerre qui est entre les deux Roys. Que ie pensois que le Roy pourroit enuoyer son passe-port au gouverneur de Bayonne, ou de quelque autre ville de ceste frontiere-là, qui l'enuoyeroit au Gouverneur de la plus proche ville d'Espagne, & que cestuy-cy l'enuoyeroit à la Cour d'Espagne audit Nonce; comme les Gouverneurs ont souuent occasion & moyen d'enuoyer à la Cour de leur Roy. Ledit seigneur Cardinal Aldobrandin me dit qu'il m'enuoyeroit ledit Pere Iesuite pour communiquer avec moy; & que cependant il me recomman- doit cét affaire comme chose que nostre saint Pere auoit à cœur. Ledit Pere Iesuite estant depuis venu chez moy, trouua bon cét expedient que ie luy proposay d'enuoyer ledit passe-port, n'en sçachant point de meilleur: & me dit que le Prince de Transiluanie auoit en grande estime & reuerence le Roy, & en autre temps en eut attendu plus de secours que de nul autre: mais sçachant que sa Majesté venoit de sortir d'une mer d'affaires, auoit estimé ne deuoir point l'importuner d'aucun secours pour ceste heure. Surquoy ie ne vous diray autre chose, estimant qu'il lussit de vous auoir exposé le desir de nostre saint Pere; & la façon dont il m'en a parlé.

Au demeurant, les Espagnols continuent icy tousiours leurs mauvais offices enuers le Roy, disant que les choses de la Religion Catholique vont tres-mal en France, & que sa Majesté n'y marche de bon pied: & taschent d'imprimer ceste opinion en l'esprit du Pape, & des seigneurs de ce College, allans des vns aux autres pour cét effet: mais ils sont & seront démentis par les actions de sa Majesté. On a escrit de Milan qu'on y a arrêté prisonnier l'Agent que Monsieur d'Espèrnon y tenoit: & de Gennes que ce beau Docteur Mendosse qui fut enuoyé d'Espagne à Paris pour enseigner aux François que c'estoit que la loy Salique, estoit destiné par le Roy d'Espagne pour Ambassadeur residant à Venise. Les Chanoines & Chapitre de Cambray ont enuoyé par deçà l'élection qu'ils firent apres la mort de leur Archeuesque, de la personne du sieur Diego Campo principal Camerier du Pape natif de ce Diocèse là: & prient le S. Pere de le vouloir confirmer. Je vous enuoye vn Bref que nostre saint Pere escrit au Roy en recommandation de l'Archeuesque de Cologne, & Euesque du Liege, dont ie vous escriuis par ma lettre du 9. Mars, sur la recommandation qu'en auoit faite Monsieur le Cardinal S. George au nom du Pape. On m'a fort recommandé d'eschire que le Pape en desire response, & voudroit qu'elle fut enuoyée audit Archeuesque: & mesme que le Roy escriuist sur ceste occasion audit sieur Archeuesque, de la bonne volonté que sa Majesté aura de faire selon le contenu dudit Bref. A tant, Sec. Monseigneur, &c. De Rome ce 17. Avril 1626.

## A MONSIEUR DE VILLEROY.

## LII.

**M**ONSEIGNEUR, Quand les deux Ambassadeurs de Malte, qui alloient pour faire la vœuerence au Roy, & se conjouir avec la Majesté de la part de Monsieur le grâd Maistre, & de toute cette Religion, passerent icy, il fut dit que le grand Prieur de Champagne, qu'ils deuoient prendre avec eux en passant, & qui deuoit faire le troisieme, resideroit puis apres Ambassadeur près du Roy pour ladite Religion. Ce neantmoins Monsieur le Commandeur de Viuiers, qui vous rendra la presente, m'a dit s'en aller par delà pour y resider : ce, qui m'a esté confirmé par l'Ambassadeur de Malte resident icy près nostre saint Pere. M'estans venus visiter eux deux ensemble, ils m'ont requis de vous escrire en recommandation dudit seigneur Commandeur, & des affaires qu'il aura à traiter avec le Roy & avec vous. Mais outre que ie ne presume pas volontiers d'vser de recommandations envers mes Seigneurs, il me semble qu'elle seroit encore mesleante pour vne personne publique, qui porte sa recommandation avec soy, & puis envers vous qui devous mesme avec pour recommander toutes choses dignes de recommandation. Et partant ie n'adionstera y autre chose à ce que dessus, que la priere acoustumee à Dieu, qu'il vous donne, Monseigneur, &c. de Rome ce 5. May 1596.

## A MONSIEUR DE VILLEROY.

## LIII.

**M**ONSEIGNEUR, Ce iourd'huy en Consistoire le Pape a donné la Croix à Monsieur le Cardinal de Florence, qui s'en va Legat en France vers le Roy, & partira demain de ceste ville pour s'y acheminer. Il s'arrestera quelques jours à Floréce, & fera l'office en son Eglise le iour de l'Ascension, & apres cela s'en ira tout droit sans autrement se détourner, ny s'arrester en aucun lieu, que fort peu, au moins il l'a ainsi delibéré & arrêté en soy-mesme; & pourra arriuer à Paris pour tout le mois de Iuillet. De ceux qui l'accompagnent, & d'autres choses appartenantes à ceste Legation, ie vous en escriray plus amplemēt par l'ordinaire de Lyon, que nous depescherons dans cinq ou six iours; cependant j'ay voulu vous aduancer celle cy par la voye de Gênes, dont l'ordinaire partira ceste nuit. Par ledit ordinaire de Lyon ie vous escriray aussi de tout le reste, & en particulier respondray à vostre lettre du dixseptiesme Mars, que ie receus le premier de ce mois, & à celle du vingt troisieme Avril, que j'ay receüe ce iourd'huy mesme avec les autres que l'accompagnent : entre lesquelles la coniecture

par la datte de ceste derniere que vous en auiez encores quelques autres que vous n'avez eu le cœur d'adiouster; dont non seulement ie vous excuse, mais ie compâtiſ avec vous plus que ie ne vous ſçauois exprimer. Le Comte de Fuentes, depuis qu'il eſt arriné à Milan, il a dit publiquement qu'il ſçauoit tres-bien que toutes les places de la fontiere de Picardie eſtoient dégarnies d'hommes, de viures, de munitions, & d'argent; & quelle ville que l'Archiduc Albert attaquaſt, il la prendroit ſans doute; dont nous auons vne trop dure experiance. Dieu nous vueille aider, & vous donne, &c. Monſieur, &c. De Rome ce Vendredy dixieſme May 1596.

## A V R O Y.

## L I V.

S I R E,

L'Egliſe de S. Jean de Latran eſt la Cathedrale de Rome, & la premiere de la Chreſtienté; & ouure que pour ceregardelle merite vn particulier reſpect & reuerence de tous les Princes Chreſtiens; les Roys de France, predeceſſeurs y ont eu grande deuotion, & luy ont fait du bien en diuerſes occaſions, & à pluſieurs fois. Auſſi les Chanoines, & Chapitre d'icelle Eglise ont toujours eu vne ſinguliere affection vers la Couronne & les Roys tres-Chreſtiés, & en ont eu particuliere ſouuenance en leurs prieres & oraiſons: ce qu'ils teſmoignent encores auourd'huy non ſeulement par leurs dites prieres, mais auſſi par les armes de voſtre Maieſté qu'ils tiennent continuellement ſur leur grande porte de ladite Eglise, avec celles du Pape & de l'Empereur, ſans y en auoir d'aucun autre Roy. Et maintenant ſur ceste occaſion de Monſieur le Legat qui ſ'en va en France, ils enuoyent en ſa cōpagnie vn ou deux de leur Corps pour faire tres-humble reuerence à voſtre Maieſté, & ſe conioiür avec elle de la grace que Dieu luy a faite d'auoir reünny quaſi tous ſes ſujets en ſon obeyſſance; Au demeurant il ne m'appartient d'yſer à l'endroit de voſtre Maieſté d'aucune recommandation; ie ſuis trop aſſeuré qu'il n'en ont point de beſoin pour les conſiderations ſuſdites, & partant ie n'adiouſteray autre choſe à ce que deſus que ma priere accoutumee à Dieu qu'il vous donne, &c. S I R E, &c. De Rome cel 12. May 1596.

## A M O N S I E V R D E V I L L E R O Y.

L I V. Monſieur le Legat, ie vous ſouhaitte bon voyage, & de ſa Legation, maintenant ie vous eſcriray des autres choſes que l'ay

reseruees, pour ne faire ma lettre d'hier trop loque. Et premierement vous accuséray la reception de deux de vos lettres, l'une du 17. Mars, qui me fut rendue le premier May, avec vn aduis de ce qui estoit aduenu à Ferrare le quatorzième Mars, l'autre du vingt troisième Aupil, que ie receus le 10. de ce mois, avec trois copies de diuers aduis. Par la premiere, que i'ay comme Monsieur le Cardinal de Ioyeuse auoit esté vers le Roy, & en estoit party pour Tolose, & de là deuoit venir par deçà, & comme vous auiez enuoyé querir à Paris Monsieur Delbene pour l'enuoyer aussi par deçà: sur la fin vous monstrez m'auoir escrit du succez de Marseille; & ceste-cy est du dit iour 17. Mars. Par la seconde, à sçauoir par celle du 23. d'Aupil escripte chez vous à Villeroy, i'ay appris comme vous auiez laissé ledit sieur Delbene près le Roy, prest à partir pour retourner en deçà; par lequel vous deuez respondre aux lettres que ie vous auois escriptes en Feurier & Mars. Surquoy ie n'ay à vous dire autre chose, sinon que i'attends ledit sieur Delbene, & ce qu'il portera; priant Dieu qu'il nous porte de meilleures nouvelles que celles qui courent depuis sept ou huit iours. Au demeurant ie fus à l'audience le Vendredy 19. Aupil, & remerciai le Pape de l'honorable accueil qu'il auoit fait faire à Monsieur d'Eureux par toutes les villes de l'Estat Ecclesiastique, comme ledit sieur d'Eureux s'en retournoit vers le Roy. Je luy monstray aussi, comme ie vous auois escript que ie ferois, la lettre d'un lesuite qui escriuit d'Auch en Gascongne que la Messe estoit en Bearn, & à Pau, dont sa Saincteté fut tres aise: & le priay d'observer la difference qu'il y auoit entre nous & les Espagnols; en ce que nous n'estions si diligens à luy faire sçauoir le bien que nous faisons, & que nous sçauions qu'il desiroit, comme les Espagnols à inuenter, & luy dire le mal que nous ne faisons point, & qui luy donnoit à luy grand travail & peine. Et luy parlay encores de l'Abbaye de saint Symphorien de Mers, pour le fils de Monsieur de Prailon premier Escheuin de ladite ville de Mers suivant vne lettre du Roy du 8. Feurier, qui m'auoit esté rendue la semaine sainte; & sa Saincteté m'accorda tant ladite Abbaye, que la dispense d'aage pour ledit fils dudit sieur de Prailon. Je priay de plus sa Saincteté de vouloir faire voir l'Indult qui auoit esté donné au feu Roy, pour nommer aux benefices Consistoriaux de Bretagne & de Prouence, & de m'en faire donner vne copie, afin de voir le moyen d'en faire expedier vn acte pour le Roy à present regnant; & sa Saincteté me dit qu'elle le feroit. Mais ie n'ay point autrement sollicité la copie depuis, pour n'y auoir eu rié qui pressast, & pour ne leur donner ombrage. Sa Saincteté me parla de la conuersion des heretiques en certaines valles de Piemont, dont ie vous auois escrit que m'auoit ia parlé Monsieur le Cardinal Aldobrandin de sa part: & me chargea sa Saincteté de nouveau d'écrire au Roy, qu'il prioit de descendre au sieur de Lesdiguières d'y aller, & d'y enuoyer pour détourner vne si bonne œuvre. Me dit en outre que l'on tardoit beaucoup à enuoyer quelqu'un de la Cour; & que nonobstant il feroit partir le Legat, dans peu de iours: ce qu'il me redit de nouveau le troisième de ce mois en autre audience que i'eus de luy, en laquelle ie luy rendis compte de ce que vous m'auiez escrit touchant ledit sieur Delbene par vostre lettre du 17. Mars.

Quant aux occurrences de deçà, la nouvelle de la prise de Calais y fut publiée le huitiesme de ce mois, avec tant d'admiration & d'étonnement d'un chacun, qu'il seroit impossible de l'exprimer. Aussi ne vous scauroit on représenter le grand déplaisir que ceste nouvelle a apporté à ceste Cour, ny les propos que nos amis & ennemis en tiennent au desavantage de nos affaires. Sur tout l'insolence des Espagnols est incomprehensible, lesquels encores se vantent qu'on verra dans peu de temps des choses bien plus grandes & admirables que ceste-cy, & parlent déjà de prédre Mets & Marseille; & de fait qui a pris Cambray & Calais en si peu de temps, pourroit bien prendre & Mets & Marseille si on n'y donnoit autre ordre. Et ces bruits sont à negliger d'autant moins, que le dessein de Calais se disoit icy publiquement un mois auant qu'il ait esté executé par delà. D'ailleurs ie vous ay desia escrit comme le Comte de Fuentes disoit à chacun en Milan, que nos places de frontiere de Picardie estoient dégarnies d'hommes, viures, munitions, & d'argent; & que le Cardinal Archiduc prendroit à force toutes places qu'il attaqueroit. I'ay grand peur que les autres frontieres ne soient gueres mieus gardees: combien qu'il se dise, qu'au milieu du Royaume tout est plein de garnisons, & qu'il se paye plusieurs millions sous ce nom de garnisons. Quelquesvns pensent que le Comte de Fuentes soit venu en Italie, où il est encores, pour y executer quelque leur dessein sur la France du costé de deçà. Autres ont dit qu'il deuoit passer en Portugal, pour y prendre l'armee nauale que le Roy d'Espagne dresse en la coste de l'Océan, pour la mener vers le Cardinal d'Austriche: comme il se pourroit faire qu'ils eussent concerté cela ensemble avec le dessein de Calais, auant que se separer. Il y a ja quelques iours que le Pape escriuit à son Nôce à Cologne qu'il allast resider Nonce près ledit Cardinal d'Austriche: lequel n'a point voulu qu'une personne si confidente du Pape, comme est le sieur Diego Campo son principal Camerier, fust esleu Archeuesque de Cambray, comme il s'estoit dit qu'il auoit esté esleu; ains ledit Cardinal a fait ou veut faire eslire vn certain Abbé d'Arras. Il m'a esté dit que les Espagnols d'icy s'ont jaloux & marris de ce que le Pape enuoye vn Legat en France, & font instance qu'il en enuoye vn autre en Espagne. Le Cardinal Caetan receut la Croix de la Legation de Pologne le Mercredy vingt quatriesme d'Auril, & part le lendemain pour s'y acheminer. L'Euesque de Lisieux partit d'icy pour s'en retourner en France le vingt neufiesme d'Auril, & l'Abbé Cornac le 10. May: le Commandeur de Viuiers est party aussi depuis peu de iours pour aller resider pour Ambassadeur de Maître pres le Roy. L'on a escrit de Paris que le Roy vouloit demander au Pape pour ceste premiere fois la grace de tous les benefices Cōsistoriaux qui vacquent en France; à quoy, & à plusieurs autres choses que j'entends tous les iours, il se voit qu'on ne tient par delà les choses si secretes comme il seroit besoin. I'ay douté en moy si ie vous deuois escrire vne particularité qui s'ensuit, mais en fin ie m'y suis resolu. L'Abbé d'Orbais me vint dire le vingt sixiesme d'Auril au matin, qui estoit vn Vendredy auquel nous auons accoustumé d'auoir audience l'apres disnee, qu'il auoit receu lettre ce matin là du premier d'Auril, d'un qui estoit fort confident de Monsieur le Comte de Sions, par laquelle ce tel, qu'il ne me nomma point, luy

escriuoit, que ledit Seigneur Comte auoit grand desir d'estre employé en la guerre de Hongrie contre le Turc, & qu'il iroit tres-volontiers s'il plaisoit au Pape l'en rechercher : & que luy Abbé d'Orbais feroit grand plaisir audit Seigneur Comte s'il en vouloit ouuir le propos à sa Sainteté : & apres ce narré adjousta ledit Abbé d'Orbais, qu'il se garderoit bien de parler au Pape de telle chose. Je luy dis qu'il feroit bien de n'en point parler, que ne luy, ne autre ne doit porter telle parole à sa Sainteté, sans permission & expres commandement du Roy; comme ie voulois aussi croire que ledit Seigneur Comte ne voudroit entendre à telle chose qu'avec le gré, & congé de sa Majesté. Vous aurez entendu la surprise de la ville de Clisse sur le Turc par les Vlscoques aux confins de la Dalmatie, de laquelle prise on fait grande estime; pour estre ceste place imprenable par force, & qui commande à vne grande estenduë de pays. Toutesfois les Venitiens n'en ont esté fort aises, craignans que cela leur apporte la guerre du Turc en la Dalmatie, & autres lieux qu'ils ont là aupres. On a opinion qu'à ces quatre temps de Pentecoste le Pape fera promotion de Cardinaux, mais qu'elle sera toute pour ceste Cour seulement, sans y cōprendre personne à l'instance des Princes, d'autant que du costé du Roy ne luy a esté enuoyé personne depuis l'absolution, ny s'est fait aucune instance; & adiousté-on que ladite promotion fera de six seulement. Le Portugais à qui fut adressée de Flandre la tapisserie du Roy François premier, dont ie vous ay escrit autresfois, poursuit icy la main leuee de la faïence que Monsieur d'Eureux & moy en fismes faire à la douane de ceste ville, & i'attends la response qu'il vous plaira m'y faire. Monsieur d'Eureux vous fit tenir la coppie d'une attestation qu'on a enuoyée des Paysbas, par laquelle est porté que ceste tapisserie appartenant à la Couronne de France, fut par le commandement de Monsieur de Mayenne enleuee de l'hostel de Bourbon à Paris, & portée & vendue à Anuers. Et par ce moyen est prouué par eux ce que nous eussions à prouuer. I'adiousteray icy à ce que ie vous ay escrit cy dessus de l'insolence des Espagnols, qu'un homme me vient de dire auoir veu en banque vn Espagnol prendre dix escus, & donner caution d'en rendre cent, si pour tout le mois de Iuliet prochain le Roy d'Espagne n'a pris Marseille. Et de fait l'on tient que Marseille n'est pas si forte du costé de terre, que Calais, ny au reste mieux fournie de viures & de munitions. Et de la façon que les Espagnols serrent & estonnent vne place avec tant d'artillerie & de vistesse, il n'y a rien qui soit à craindre, & qui ne puisse aduenir. La verité est qu'outrée qu'ils pourront faire venir d'Espagne par mer, ils font leuee de gens au Royaume de Naples, & au Duché de Milan, & grand amas de galeres sous pretexte de vouloir descendre ceste coste de l'invasion des Turcs, qui n'y pensent point pour ceste heure. Le Prince Doria fait aussi venir vers Gennes grande quantité de bleds de Sardaigne; & le Côte de Fuentès séjourne en Italie sans qu'on sçache pourquoy: d'ailleurs le succez de Cabray & de Calais leur a tellement enflé le cœur, qu'ils ne pensent plus à rien de petit, & n'y a rien qu'ils n'osent, & mesme avec la cognoissance certaine qu'ils se vantent d'auoir, qu'il n'y a pas vne place en toute la France qui soit bien fournie de ce qu'il faudroit; & ce dont ils nous auoient aduertis cy deuant pour le regard

de Cābray & Calais long-temps auant le coup, & nous aduertissent à present de Marseille & de Mets, il faut que nous le pensions de nous-mêmes pour Narbonne, Bayonne, & telles autres clefs du Royaume; & que nous y pouruoyons de bonne heure. Et me pardonnez ie vous supplie si il m'en mesle si auant, & de si loing. I'escris à Lyon à Monsieur de la Guiche du fait de Marseille afin que pendant que ceste-cy ira à vous il en escriue à Marseille, & là où il faudra. Les six que l'on pense que le Pape fera Cardinaux sont Messieurs Ferratin, Seraphin, Cesar Baronio, l'Auditeur de la Chambre, & l'Archeuesque Savelli, & l'Euesque S. George. A tant, &c. Monseigneur, &c. De Rome le 14. May 1596.

## A MONSIEVR DE VILLEROY.

LVI.

**M**ONSEIGNEVR, Les Chanoines & Chapitre de saint Ieart de Latran enuoyent deux des leurs en la compagnie de Monsieur le Legat pour faire enuers le Roy les complimens qu'ils vous diront; & apres auoir eu de moy vne lettre à sa Majesté ils en ont encores desiré vne autre à vous, de qui ils espèrent non seulement addresse & moyen de parler au Roy, mais aussi toute ayde & fauoir là où besoin sera. Ce que ie leur ay pres-volontiers accordé, pour autant que outre que i'ay amitié avec quelques-uns d'eux, c'est vne compagnie si venerable, que chacun luy doit grand respect & tous bons offices; & les François en particulier, pour l'affection speciale qu'elle a à la France, & aux Roys Tres-Chrestiens. Ce qui m'assure aussi que la bonté & courtoisie, dont vous auez accoustumé d'vser enuers les particuliers, vous la departirez tant plus à vn corps de tant de preeminence & de tant de bonne volonté enuers nous. A quoy si ma tres-humble priere peut adiouter quelque chose, ie vous supplie tres-humblement qu'il vous plaise luy aider, & fauoriser, en ce qu'il se presentera; & outre l'obligation que vous acquerrez sur le premier Chapitre de la Chrestienté, ie vous en demeureray obligé moy-mesme, à vous rendre tres-humble seruite en tout ce qu'il vous plaira me commander, comme sans cela i'y suis desja pour autres occasions sans comparaison plus grandes tres-obligé & tres affectionné. A tant, &c. Monseigneur, &c. De Rome cevingt-deuxiesme May mil cinq cens nonante six.

## A MONSIEVR DE VILLEROY.

LVII.

**M**ONSEIGNEVR, I'ay esté requis par les Religieux de S. Benoist de la congregation du Mont Cassin, durement de S. Iustine de

Padouë, de vous escrire en recommandation d'un leur fait qu'ils m'ont dit estre tel. **Que Leon Pape X:** avec le consentement du Roy François I: auoit vny à ladite Congregation l'Abbaye de saint Honorat en Prouence; & que ladite vnion fut verifiée & approuuée par la Cour de Parlement de Prouence, & lesdits Religieux mis en possession de ladite Abbaye, & des appartenances & dependances; **Que** depuis, sans qu'ils sçachent comment, ladite Abbaye a esté tenuë en cõmande, & possedee par quelques Commendataires successiuelement iusques à feu Messire François de Belicrs Euesque de Frejus dernier Commendataire d'icelle; apres la mort duquel lesdits Religieux obtindrent du Pape à present seant confirmation de la susdite vnion, & en tant que besoin seroit nouvelle vnion. Maintenant ils desirent qu'il plaise au Roy trouuer bonne ceste vnion, & commander que ils soient reintegrez en la possession de ladite Abbaye, & qu'en ce vbus les vueilliez ayder & fauoriser auprès sa Majesté. Surquoy ie n'ay à vous dire autre chose, sinon que les Religieux de ladite Congregation sont fort reformez, & de tres-bonne reputation, & que i'en cognois plusieurs tres-bien affectionnez au Roy, & à la France. **Que** d'ailleurs ils ont l'oreille du Pape, & de plusieurs Cardinaux de ceste Cour. De façon que si apes que l'on aura par delà bien veu & considéré leur bon droit, le Roy & vous faites quelque chose pour eux elle sera preschee & celebree par tout Rome, & par tout l'Italie, & ailleurs fort loing. A tant ie prie Dieu, &c. Monseigneur, &c. De Rome ce vingt neufiesme May mil cinq cens nonante six.

## A MONSIEVR DE VILLEROY.

## LVIII.

**M**ONSEIGNEVR, Nous ne pouuons nous faire les occurren-  
ces & euenemens ny les suiets de nos lettres comme nous voudrions,  
ains fait que nous les prenions & employons tels qu'ils se rencontrent.  
C'est pourquoy la mauuaise du suiet de la despesche qu'il vous plust me  
faire d'Abbeuille le 27. d'Auril, doit estre attribuee à la mauuaise for-  
tune. Mais la courtoisie dont il vous a pleu m'honorer est toute vostre, &  
ie vous en demeure grandement obligé. Je vous estois desja seruiteur tres-  
humble & tres-affectionné pour vos rares vertus, & pour le rang que vous  
tenez auprès du Roy, & le seruice que vous rendez au public, enuoies qu'il  
se le soit présenté ou casu de vous déclarer ceste mienne affection. Mainte-  
nant que vous m'avez adiousté ceste obligation de plus, ie vous offre mō tres-  
humble seruice, vous priant de me departir aux occasions vos commande-  
mens, desquels ie me sentiray toujours grandement fauorisé & honoré, &  
y obéiray de cōte ma puissance & affection. Je vous ay fait ceste cy en hat  
& sans y ouïr siuoir d'une promotion de Cardinaux que le Pape vient de faire,  
laquelle en fauorable à rien de plus agreable, que l'obseruance  
ce sur laquelle vous m'avez escrit, & pour ce pourroit auoir esté cause de  
partir. A tant, &c. Monseigneur, &c. De Rome, ce 5. iuin 1596.



## A V R O Y.

## LIX.

SIRE,

Par l'ordinaire de Lyon qui arriva icy le trentième May ie receus la lettre qu'il plût à vostre Majesté m'escire d'Abbeville le 27. Avril sur l'eue-  
nement de Calais, avec le memoire comme les choses s'y estoient passees;  
& dès le huitième dudit mois de May, nous en auons icy la nouvelle:  
surquoy j'escris lors, & depuis à Monsieur de Villeroy ce que i'estimay  
estre à propos, qui sera cause que par la presente ie n'en diray autre chose,  
& prieray Dieu seulement, que comme il vous a donné le courage de porter  
cét accident constamment, & de vous résoudre à tascher d'en auoir la re-  
manche, il luy plaise aussi faire prosperer vos genereux desseins, & ren-  
ger vos ennemis au devoir & à la raison. Le lendemain que ie receus ladite  
lettre & memoire, ie fus à l'audience de nostre S. Pere, & leus à sa Sainteté  
la lettre, & luy baillay vne copie du memoire, que i'auois traduit en Italien,  
& luy rendis compte des autres occurrences que ledit courrier ordinaire  
auoit apportees, & apres auoir vsé d'un peu de peface, ie luy parlay sur la  
promotion des Cardinaux qu'on disoit se deuoir faire à ces quatre temps  
de la Pentecoste, & luy dis que les grandes & continuelles affaires que vo-  
stre Majesté auoit eues depuis l'absolution, & auparavant, estoient notoï-  
res à chacun non seulement à sa Sainteté, qui en pouuoit estre mieux ad-  
uertie, que tout autre; Que l'importante presse & violente desdites affaires  
auoit retardé quelques devoirs dont vostre Majesté desiroit s'acquitter en-  
uers sa Sainteté, & par mesme moyen la tres-humble requeste que vous  
luy vouliez faire touchant certains personages que vostre Majesté desiroit  
estre promus à la dignité de Cardinal. Comme la France n'auoir que deux  
Cardinaux en tout, j'ajoutay qu'elle fust vn bon tiers de la Chrestienté, considéré  
l'estat auquel les choses estoient pour lors reduites hors l'Italie & Espagne  
pour le regard de la Religion Catholique, & le grand nombre & qualité  
des Catholiques qui se trouuent en France, Princes, Seigneurs, Gentils-  
hommes, Prelats, Chapitres, Couvents, Colleges, Vniuersitez, Cours  
de Barlement, & autres corps semblables, Cités & autres Commu-  
nitez, & Peuples; Qu'au contraire il se trouuoit, que dans le College  
des Cardinaux le Roy d'Espagne seul y en auoit 14. qui estoient mais ses su-  
jets, à sçauoir trois Espagnols, Deux de Castille, Tolet & quatre Neapoli-  
tains, Gualdo, Aragone, Sanseverino, Aquaviva: vn Sicilien, Terrasouas,  
de Milence; Comoy, de Sandrino, Sfondraco, Cusano, Borromeo, & Pia-  
ra; Qu'entre ces 14. suies naturels, le Roy d'Espagne auoit enuoyé dans  
ledit college trois par ses proches à sçauoir les deux Cardinaux d'Autriche,  
Albert, & André, & Farnese; Qu'entre les dix-sept il y auoit encore cinq  
autres Cardinaux qui faisoient profités comme d'estre seruiteurs du Roy  
d'Espagne.

d'Espagne; à sçavoir les deux Colomnes vieux & ieune, Madruccio qui avoit le secret & le maniement du Conclave, Caetano, & Paravicino; Que outre ces vingt-deux Cardinaux, qui estoient certains, & avoient obligation, & quelque espee de necessité de tenir tousiours pour Espagne contre France, là où il s'agiroit de l'intereſt temporel des deux Roys, on disoit encore que ledit Roy d'Espagne avoit dans ledit College d'autres Cardinaux ses seruiteurs, & pensionnaires, cachez, qu'on nommoit mesmes par nom & surnom, à quoy neantmoins ie ne voulois entendre: Que le devoir, l'honneur, & le profit du saint Siege requeroient que les choses fussent balancees, & que la iustice distributive de telles dignitez fust gardee: & partant ie suppliois sa Sainteté, de vouloir différer la promotion dont le bruit couroit, iusques à ce que vostre Majesté qui en avoit plus de besoing eust eu tēps & commodité de luy faire sa requeste, laquelle ne pouvoit gueres plus tarder; Que ce peu de temps n'osteroit à sa Sainteté rien de son authorité, & liberté de faire qui plus luy plairoit, & si luy apporteroit plus de maturité, & de moyen de faire vne promotion de plus grande edification & fruit à l'Eglise de Dieu, & de plus grande satisfaction aux Princes, & de plus grande reputation & contentement à luy mesme. Nostre saint Pere qui ne se laisse quasi iamais entendre des choses futures, & mesmement quand elles dépendent de luy seul, comme celle-cy, ne respondit que ces mots (nous serons tousiours à temps à faire des Cardinaux) lesquels mots il dit par 3. fois, à quoy ie ne pensay à rien repliquer: mais ayant vsé d'un autre petit exorde, ie luy dis qu'il se disoit que sa Sainteté pourroit faire vne petite promotion des plus anciens & mieux meritez Prelats de ceste Cour, sans y comprendre pour certe fois ceux qui estoient recommandez par les Princes: auquel cas on avoit estimé que Monsieur Serafin seroit des premiers, pour estre Doyen de la Rote, & y avoir seruy le saint Siege par l'espace de trente & tant d'annees, & pour estre d'ailleurs de vertu & valeur éminente, & seruiteur ancien & estimé de sa Sainteté. Ce nonobstant les Espagnols depuis quelques iours se vantoient de l'avoir fait exclure, auquel cas l'avois estimé estre de mō devoir de dire à sa Sainteté que vostre Majesté & la nation Françoisse auroit occasion de prendre telle exclusion à grande defaveur, attendu les longs services, & merites dudit personnage, & la bonne volonté que sa Sainteté luy avoit tousiours monstree: que nul pourroit croire qu'il eust esté persecuté par les Espagnols pour une chose, que pour estre François de grande vertu & valeur, versé dès long temps es choses de Rome, & pouvant y servir son Prince, & sa nation, comme il s'y estoit tousiours monstté affectionné, Que c'estoit vne chose intolérable, que les Espagnols qui avoient ia tant de Cardinaux, ne se contentassent d'en demander plusieurs autres, mais voulussent encore exclure, & inclure les François à leur appetit, & prescrire quels & combien de François il falloit faire ou non faire Cardinaux: Que les François n'avoient oncques vsé, & n'vseroient iamais de telle presumption, de s'ingérer en la promotion des Cardinaux, Que nos Roys avoient tousiours demandé modestement ceux qu'ils desiroient estre promotez à telle dignité: mais qu'ad auourd'huy la Sainteté voudroit promouvoir le sieur Pegnax Audirent de Rote Espagnol, qui s'estoit tant distillé à écrire contre vostre Majesté pour empêcher

l'absolution, avec tant d'ardeur, qu'il auoit escrit plusieurs heresies, & s'en estoit fait mettre à l'inquisition, ce nonobstant vostre Majesté ny pas vn de ses ministres, ne voudroit auoir ouuert la bouche pour l'empescher; Que ie suppliois donques sa Sainteté que pour la malignité des Espagnols, elle ne laissast de faire ce à quoy sa bonne volonté, & les longs seruices de Monsieur Serafin l'inclinoient. A quoy sa Sainteté ne me respondit rien du tout: tellement qu'apres auoir attendu vn peu, ie chageay de propos, luy presentant vne lettre que la Royne doüairiere luy escriuoit. En partant de sa chambre ie m'en allay vers Monsieur le Cardinal Aldobrandin, & luy dis toutes les mesmes choses que i'auois dites au Pape, tant pour la dilation de la promotion en general, que pour le particulier de Monsieur Serafin, & comme il vouloit commencer à me respondre, on luy vint dire que le Pape vouloit partir pour s'en aller de Monte-Cauallo où il estoit, à saint Pierre, où il alloit pour tenir les Chapelles de la Pentecoste: de façon que ledit sieur Cardinal ne me dit autre chose, sinon qu'il estoit marry de quoy il n'auoit du temps pour me respondre comme il desiroit, mais que nous nous reuerriions, cependant me vouloit dire qu'il estoit expedient pour le seruice de vostre Majesté qu'il se fist promotion, sans autrement m'expliquer comme il l'entendoit. Je scauois bien que ie ne luy ferois point plaisir de parler de différer la promotion, estant luy neuueu du Pape, & tenant à grâdeur d'auoir au plustost grand nôbre de creatures de son oncle, mais ie ne voulus luy môstrer de desiance, en luy celant vne chose qu'il eust tousiours sceüe du Pape mesme. Le lendemain Samedy veille de Pêtecoste le premier iour de ce mois, ie fus vers Monsieur le Cardinal Toletto sur le soir pour luy en dire autant, mais y ayant trouué Monsieur le Cardinal Montalto qui ne faisoit que d'y entrer, & estant heure desia tarde, ie remis à luy parler le lendemain, comme de fait ie luy parlay l'apres disnée, & lui dis tout ce que i'ay mis cy-dessus auoir dit au Pape, & à monsieur le Cardinal Aldobrandin. C'est vn seigneur qui s'ouure plus que les deux precedents, & me respondit qu'il estoit vray que le Pape feroit promotion, & que lui Cardinal Toletto estoit marry de ce qu'on n'auoit fuiuy son aduis, quand il nous dit ia auant les Cendres à monsieur d'Eureux & à moy, que pour ceste fois là le Pape ne vouloit point faire de promotion, pour auant qu'il vouloit donner temps à vostre Majesté de pouuoir demander tels qu'il vous plairoit: mais qu'à la Pentecoste il y auroit promotion, & qu'il falloit qu'alors vostre Majesté eust enuoyé son intention là dessus, Que la Pentecoste estoit venue, & toutesfois vostre Majesté n'auoit encore rien déclaré de sa volonté touchant cela; Que la promotion se feroit, & puis apres quand vostre Majesté auroit escrit: elle seroit gratifiée de 2. ou 3. Cardinaux: Quant à Monsieur Serafin, qu'il auoit tant d'oppositions, que le Pape ne le pouuoit faire Cardinal, dont sa Sainteté mesme estoit marrie, & Monsieur le Cardinal Aldobrandin, & luy Cardinal Toletto qui en parloit, & disoit auoir fait pour le sieur Serafin plus que pour nul homme du monde; Que les Espagnols pourroient bien auoir fait, & dit quelque chose pour l'exclure, & seroient bien aises de son exclusion: mais ils n'en eussent eu aucune puissance, sans ces oppositions qui ne se pouuoient dire, & le Pape n'eust laissé pour eux de le faire Cardinal quelque chose qu'ils eussent sou fait, & dire. l'entendis d'ailleurs que

le Pape. vouloit faire promotion non seulement de certains Prelats de ceste Cour, comme l'on auoit creu iusques-là, mais aussi de deux Espagnols, & d'un François, qui auoit esté de party contraire à vostre Majesté, ce que ie trouuay fort estrange, & ne pouuois croire que sa Sainteté fust pour faire à vostre Majesté tant de griefs en vn seul acte de promotion, comme premierement d'exclurre Monsieur Serasin, d'auec les Prelats de ceste Cour: secondement, contre les tres-humbles & tres-equitables remonstrances que i'auois faites à sa Sainteté, n'attendre point à faire la promotion pour les Princes, iusques à ce que vostre Majesté, qui en auoit plus de besoin, luy eust exposé son desir & entrouiesmelieu, ce que ie trouuois encore plus dur, faire Cardinal vn vostre subiet regnicoles, sans que vous l'eussiez demandé: & encore vn subiet qui venoit de tenir party contraire à vostre Majesté. Toutesfois encore que cela ne fust vray-semblable, ie ne voulsus rien mettre à nonchaloir, & ayant à retourner vers Monsieur le Cardinal Aldobrandin, pource qu'il n'auoit eu temps de me respondre quand ie luy auois parlé apres mon audience du Pape; le Vendredy au soir dernier iour de May ie me resolu, non seulement de tacher de tirer de luy quelque response sur ce que ie luy auois déia dit, mais aussi de me plaindre à luy viuement des susdits griefs, & mesmement du dernier touchant ce François. Je fus doncques vers luy Vendredy au soir troisieme de ce mois, & le trouuay comme il vouloit aller au Pape, ce qui luy seruit de couurir aucunement la briefuete du peu de propos qu'il vouloit tenir avec moy: & apres que ie luy eus dit que i'estois venu vers luy pour receuoir ses commandemens, à cause que la derniere fois que ie luy auois parlé il n'auoit eu du temps de me le départir; il me respondit qu'il n'auoit non plus de temps alors, pour ce qu'il falloit qu'il allast au Pape; mais qu'il me diroit cela en passant, qu'il s'estoit fort émerueillé que nous François, qui auions le plus besoin de promotion, parlussions de la differer. Il luy fis souuenir des causes que nous en auions, & que ie luy auois ia dites, & pour ne perdre le temps, ie passay outre à ce que i'auois entendu de la promotion qu'on vouloit faire de certains Espagnols, & mesmement du susdit François, luy remontrant que ce seroit vne espece d'affront fait à vostre Majesté & à luy, alleguant plusieurs raisons pour lesquelles sa Sainteté ne le deuoit faire, ny luy Cardinal Aldobrandin le luy conseiller; sur quoy il ne me dit autre chose, sinon qu'il en parleroit au Pape, vers lequel il alloit. I'y retournay encore le Mardy au matin, pour luy inculquer encore mieux les raisons pour lesquelles on ne deuoit point faire de Cardinal François, sans luy parler d'autre chose. Il me dit qu'il l'auoit dit au Pape & que sa Sainteté y pensoit, & de ma part i'adionstasse que ie détournerois vn bon ouure. Je luy dis que ie cherchois de détourner vne chose qui pourroit trop coustir au saint Siege, pour le zele duquel ie ne me mouuois pas moins en cela, que pour le service de vostre Majesté. De là ie m'en allay chez Monsieur le Cardinal Tolero, le prier de nous ayder à euites cet affront, de la promotion de ce François non demandé par vostre Majesté. Il me dit que ie ferois bien d'en escrire vn memoire au Pape. Je m'en allay faire ledit memoire, & l'enuoyay à sa Sainteté souscrit de ma main, & cacheté, de la teneur que vostre Maie-

sté verra par la copie que ie luy en enuoye , où elle trouuera sommairement touchées les raisons que ie leur ay plus amplement déduites de vne voix. A ce matin la Saincteté a fait la promotion que vostre Majesté verra par la liste qui sera avec la presente lettre , laquelle liste monstre euidentement que la Saincteté a voulu faire l'affrôt tout entier sans en rié rabbatre ; outre que de treize Cardinaux Italiens qu'il y a , il n'y en a pas vn duquel on se puisse asseurer qu'il ait aucun nerf ou veine Françoisé , qui est vn mal en soy , mais encore signe de pis , comme vostre Majesté pourra trop mieuz iuger. A tant , &c. S I R E , &c. De Rome ce Mercredy des quatre temps de Pentecoste 5. Iuin 1596.

## A M O N S I E U R D E V I L L E R O Y .

## L X .

M O N S E I G N E U R , Par la lettre que i'escris , & la liste que i'enuoye au Roy , vous verrez la promotion que le Pape vient de faire , & le deuoir , auquel ie me suis mis pour la faire différer , & puis pour obtenir que nous n'y receussions point d'affront que le moins que faire se pourroit. Tout ce que i'ay sceu remonstrer de parole , ou par escrit , n'y a de rié seruy ; qui est vn signe plus mauuais que la chose mesme. Ie n'ay temps de vous en dire dauantage pour cette heure , & suis contraint de finir icy en priant Dieu , Monseigneur , &c. De Rome , ce cinquiesme Iuin mil cinq cens nonante-six.

## A V R O Y .

## L X I .

S I R E ,

I'escris à vostre Majesté le 5. de ce mois sur la promotion de seize Cardinaux que le Pape venoit de faire , & à la fin de ma lettre ie vous disois que de treize Cardinaux Italiens qu'il auoit faits , il n'y en auoit pas vn de qui on se pût asseurer qu'il eust aucun nerf ou veine Françoisé ; en quoy ie persiste encores à present : mais i'adiouste que les Espagnols ne se peuvent non plus promettre qu'il y en ait aucun d'assuré pour eux. Et de fait apres les auoir bien considerez de moy mesme , & m'en estre enquis d'autres , ie trouue que le Pape en la promotion de ces treize s'est proposé de faire personnes neutres & non partiaux pour France ou pour Espagne , & par ce moyen contrepeser le grand nombre des Cardinaux que le Roy d'Espagne a à s'adeuotion en ce College , & rompre & dissiper les pratiques & menées qu'ils auoient ia faites pour le Conclaué futur apres la mort du Pape , & fortifier le party de

ceux qui desirerent la conseruation, ou pour mieux dire le recouurement de la liberté des elections des Papes que les Espagnols auient captiuee & asseruie. Il a encores voulu se rendre fort par le moyen de ces treize, pour pouoir mieux faire ce qu'il iugera estre meilleur, & resister à qui besoin sera és occasions que le temps pourroit apporter de son viuât, & par mesme moyé a possible pensé encores à agrandir ses neueux, & toute sa maison, en leur donnant autant de personnes & familles obligées & dépendantes, non seulement par le moyen de ces Cardinaux nouuellement faits, mais aussi par la substitution de trois nouueaux Auditeurs de Rote, & d'un Auditeur de la Chambre, d'un Tresorier general, & d'un Clerc de Chambre qu'il faudra faire. Ce contrepoids, SIRE, encores qu'il ne soit fait en faueur & consideration de vostre Majesté, ains de la liberté Ecclesiastique de cette Cour, vous tourne neantmoins à profit, en ce qu'il rabbat autant de la puissance de vostre ennemy, & luy oste autant de moyen de vous mal faire par la voye de ceste Cour, pendant que vous serez bien avec le Pape. Et s'il eust pleu à sa Sainteté en prenant de ceux de la Rote faire Monsieur Serafin, qui est estoit le Doyen, & sans cela l'a mieux merité de tous, & attendre à faire Monsieur de Lisieux iusques à ce que vostre Majesté y eust consenty, nous n'auions à nous plaindre de ceste promotion, ains à nous en louer beaucoup. Car au reste de n'auoir attendu à la faire iusques à ce que vostre Majesté eust nommé ceux qu'elle vouloit, cela est toujours reparable, en les faisant quand vous les luy aurez nommez. Tous lesdits treize Cardinaux Italiens sont honnestes hommes, & dignes de l'honneur qui leur a esté fait. Le Patriarche Sauelli qui est tout le premier, est personnage de tres-illustre noblesse, nullement soupçonné d'estre Espagnol. Le Patriarche de Venise, & l'Euésque de Treuise Venitiens, & Mantica, Auditeur de Rote qui est du Frioul, & nay sulet de la Seigneurie de Venise, n'en doiuent estre soupçonnez non plus. Quant à l'Archeuesque d'Auignon qui est sujet du grand Duc de Toscane, c'est vn bon vieil homme, qui penseroit estre damné s'il estoit Espagnol ou François, ny autre que bon Ecclesiastique. Quant à Bandini, il s'en est parlé pendant les derniers troubles, mais ie sçay qu'il a beaucoup plus d'occasion d'incliner vers France que vers Espagne; & espere qu'il le fera, comme ie vous en escriray vne lettre à part. De l'Euésque saint George, il ne se peut dire autre chose, sinon qu'il a eu, & a encores des freres au seruice du Roy d'Espagne, au reste il est sujet du Duc de Mantouë, & Seigneur fort moderé, qui ne dependra que du Pape, & de ses Neueux à qui il doit son exaltation, & est d'aage pour commencer à penser d'estre vn iour Pape (comme tous y pensent depuis qu'ils ont certain aage) & ne voudra offencer personne, ny gaster ses esperances. Le Pere Cesar Baronio est à la verité sujet du Roy d'Espagne, nay à Sore au Royaume de Naples, mais il est homme de bien, & craignant Dieu, & escriuit en faueur de vostre absolution auant qu'elle se donnast, étant lors Confesseur du Pape, comme il a toujours esté depuis, & personnage de sçauoir éminent, & qui a composé, & fait plusieurs beaux & bons liures, & bien merité de la Religion Chrestienne, & de l'Eglise Catholique. Le Borghese, Auditeur de la Chambre, est gentil-homme Romain, originaire de Siene, personnage de grande integrité & probité, en qui ne peut

tomber soupçon d'aucune faction Espagnole, si on ne vouloit dire que pour auoir fait vn voyage en Espagne par le commandement du Pape deux ans y a, il fut deuenu Espagnol. Monsieur Biancheti, qui estoit Auditeur de Rote, a par quelques vns esté soupçonné d'incliner vn peu à Espagne; mais c'a esté pour auoir esté le Cardinal Caëran en France: au reste il est Bolognois; subien du Pape & son pere estoit icy Agent de feu Monsieur le Cardinal d'Armaignac, & luy-mesme a esté esleué au seruice, & auprès de la personne de Monsieur le Cardinal d'Armaignac, sans iamais auoir receu aucun bien des Espagnols.

Le Thresorier general qui estoit, est Romain, de la maison de Celis, laquelle au temps passé a tenu plus pour France que pour Espagne, & à ceste heure n'a au Roy d'Espagne aucune deuotion, ny obligation particuliere que ie sçache. L'Arrigonsio, qui estoit Auditeur de Rote, est nay à Rome, mais originaire de Milan, & quand il faisoit profession d'estre Aduocat il estoit Aduocat du Roy d'Espagne; c'est tout ce qui s'en est dit, & qui s'en peut dire: mais il est tres-honneste personnage & fort affectionné à la maison Aldobrandine, ayant esté instruit, & guidé à la profession d'Aduocat par le pere de Monsieur le Cardinal Aldobrandin, frere du Pape, qui le fit Auditeur de Rote, & à present vient de le faire Cardinal, de façon que la Sainteté & ses Neueux s'assurent qu'il ne despandra que d'eux. Quant au Cardinal Perreti, qui est le dernier de la liste, c'est vn ieune Seigneur de grande esperance, & a esté fait Cardinal à la requeste de Monsieur le Cardinal Montalto, & en contemplation du sang dont il appartenoit au feu Pape Sixte cinquieme qui fit Cardinal celuy qui auourd'huy est Pape, & ne despandra que de la Sainteté, & dudit seigneur Cardinal Montalto.

Des suffits treize Cardinaux Italiens, il y en a icy onze de presens, tous lesquels dès le lendemain qu'ils furent promotez, furent vizitez par les Ambassadeurs, & autres ministres des Princes, suivant l'ancienne coustume; & i'estimay y deuoir aller comme les autres, & me conioiis avec chacun d'eux au nom de vostre Majesté, de la dignité à laquelle ils venoient d'estre exaltez pour leurs vertus & merites, lesquels ie particularisois diuersement selon la diuersité des qualitez & fonctions qu'ils auoient auant leur promotion, priant Dieu qu'elle leur fust heureuse; & entre autre chose, qu'il leur fist la grace de la gerer à son honneur & gloire, à l'edification de son Eglise & au bien de toute la Chrestienté, & leur recommandant en particulier les affaires de vostre Majesté, & de la France, les assurant qu'elles se trouueroient tousiours accompagnées de raison, & de iustice & conjointes d'interest avec celles du saint Siege, & que vostre Majesté ne les rechercheroyt iamais de faire tort à vn tiers en sa faueur, ains se contenteroit tousiours qu'on ne luy fist point de tort à elle, & qu'on ne luy refusast ce qui seroit iuste & raisonnable pour complaire à ses ennemis adioustant encores sur la fin audit nom de vostre Majesté les offres & faueur de vostre ayde, en ce où eux ou les leurs en pourroient auoir besoin à l'aduenir, & leur assurant que vostre Majesté seroit bien aise de leur exaltation, & ratifieroit par ses lettres, & par les effects cette mienne congratulation, & tout ce que ie venois de leur dire en son nom. Tous mon-

frans de seruir vostre Majesté de tout leur pouuoir en toutes les occasions qui s'en presenteroient; & quelques vns d'entr'eux m'ont enuoyé des lettres pour vostre Majesté, lesquelles se trouueront avec la presente. Je fus en doute si j'irois à l'audience du Pape le Vendredy septiesme de ce mois, pour ce que j'estois fort piqué de l'exclusion de Monsieur Serafin, que la raison de la iustice distributive appelloit au Cardinalat auant tout autre Auditeur de Rote, & de ce que le Pape auoit passé par dessus toutes mes remonstrances de paroles & par escrit, en faisant Cardinal Monsieur de Liffleur, sans requisition ny consentement de vostre Majesté: & pource que d'ailleurs ie n'auois rien à traiter avec sa Sainteté, si ie ne voulois entrer au fait de la promotion, & me plaindre d'une chose ia faite, à laquelle il n'y a plus de remede, ou me monstrier inconstant ny flatteur, en loiant vne chose que j'auois voulu empescher auant qu'elle se fist, & dont j'estois demeuré fasché apres qu'elle auoit esté faite: mais à la fin ie me resolu d'y aller comme les autres, pour n'apprestier à rire aux Espagnols, en leur donnant à penser que ie fusse trop dépité ou estonné, & pour voir ce que sa Sainteté me diroit, & decourant tousiours Pays, & vous reseruant toutes choses en entier, ne rien gaster cependant; comme il me semble qu'il n'est point auiourd'huy temps de faire tout le ressentiment que le cœur nous diroit. Au reste ie me deliberay de tremper tellement ce que j'auois à luy dire, que ie ne deffaillisse point au compliment que tous les autres ministres des Princes faisoient, & que cependant sa Sainteté ne me peust estimer ny inconstant ny flatteur. Je luy dis dōc ledit iour septiesme de ce mois, que depuis que j'auois esté à ses pieds huit iours y auoit, ie n'auois à luy rendre compte d'aucun occurrence de delà, pour n'auoir receu aucunes lettres ny nouuelles de France, Quē moins auois-je à traiter d'affaires avec luy, ne m'en estant venu aucun commandement: mais que sa Sainteté ayant fait vne promotion si grande, & si notable, qui estoit vne des plus grandes actions qu'il eust faite depuis qu'il seioit au S. Siege, & se pouuoit dire la secōde en importāce apres l'absolution de vostre Majesté; & venans tous les autres ministres des Princes & Potentats à s'en conioiūr avec sa Sainteté, & l'en remercier, j'auois estimé ne deuoir estre le seul qui s'en teust, ains que ie deuois aussi faire quelque compliment comme les autres, trouuant mesmement en ladite promotion dequoy me resiouyr; & dequoy encores remercier sa Sainteté; Que moy luy ayant auparavant fait trois requētes, dont j'auois esté refusé, il pourroit penser que la congratulation que ie luy voulois faire procedast de quelque inconstance ou flatterie, mais ie la priois de croire que ce n'estoit ny l'un ny l'autre; & que ce n'estoit point inconstance, pource que ie n'auois changé d'aduis ny de volonté depuis que j'auois parlé à luy, & que ie luy auois escrit: & ne me repentois point des inconstances que ie luy auois faites, ains si j'auois à les faire, & que la chose fut en son entier, ie les luy ferois encores, quand bien i'en scaurois l'exclusion toute certaine, non pour autre chose que pour ma descharge, & pour ne manquer au deuoir auquel ma charge m'obligeoit. Quant à la flatterie, ceux qui me connoissent; scauent que ie n'estois rien moins que flatteur; & que j'estois plus franc & libre, que ne comportoit la dissimulation & corruption de ce temps; Que mesme ie pensois auoir sa Sainteté pour tesmoi-



de ma frâchise & liberté, & craignois qu'és negociatiôs passées, & en des es-  
critures que i'auois baillées, ie l'eusse quelquesfois offensé, en y parlant pos-  
sible trop librement; Que ie venois doncques à me cōiōir avec sa Sain-  
cteté sans inconstance, sans flatterie, de la promotion qu'il auoit faite, en  
ce qu'elle estoit de personnes de grande vertu & merites, & de qui nous  
pouuions esperer qu'ils vseroient de ceste dignité & honneur de Dieu à l'e-  
dification de son Eglise, à la reputation du saint Siege, & au bien commun  
de toute la Chrestienté; Que du commencement on m'auoit dit que sa  
Sainteté meditoit vne promotion toute Espagnole, mais que ie voyois  
qu'il auoit fait choix de personages neutres, & nullement partiaux, & par  
ce moyen auoit rompu, & dissipé les pratiques & mēees que quelques  
vns auoient dé-jà faites pour le Conclauē futur, & ietté quelques fondemēs  
de la neutralité, & liberté qui deuoit estre en ce College, Senat non d'Es-  
pagne, mais de l'Eglise vniuerselle, dont ie conceuois vne grande esperan-  
ce de plusieurs biens qui en prouenoient, & reuiendroient à toute la Chre-  
stienté, de laquelle la France estant vn membre tres-noble, & principal, il  
ne se pouuoit faire qu'elle n'y eust aussi sa bonne part, & mesmement d'au-  
tant que toutes lesdites brigues tendoient principalement à sa défaueur, &  
ruine & partant i'en baïsois tres-humblement les pieds à sa Sainteté au  
nom de vostre Maïesté & de toute la France, priât Dieu qu'il luy fist la gra-  
ce de voir le fruit qu'il attendoit d'vne si noble action, & d'en iouyr à lon-  
gues annees, & quand le besoin de l'Eglise le requerroit en faire d'autres  
aussi bonnes ou meilleures si faire se pouuoit; Que ie rendrois compte de  
tout à vostre Maïesté, & s'il plaïsoit encores à sa Sainteté me commander  
quelque chose sur ce qu'en cette occasion il auoit iugé deuoir faire ou lais-  
ser de faire, ie l'escrirois aussi tres-fidèlement à vostre Maïesté. Je m'ap-  
perceus fort euidemment que ie luy ferois tres-grand plaisir en luy tenant  
le propos que dessus, car l'ayant trouué tout rechiné quand i'arriuy à ses  
pieds, ie vis que pendant que ie luy parlois son visage luy deuint peu à peu  
riant & gay. Et quand i'eus acheué de dire, il me respondit que par plu-  
sieurs cōsideratiôs grandes, il auoit esté induit à faire ceste promotiō; Qu'en  
la faisant il auoit regardé à cela principalement que les Cardinaux Italiens  
ne fussent point partiaux, & n'eussent de dépendance que du S. Siege. Qu'aus-  
si lors qu'il leur donna le bonnet en sa chambre, il leur recōmanda sur tout  
qu'ils fussent Cardinaux Ecclesiastiques, & non partiaux de ce Prince ou  
de cesty là; & se souuinssent qu'ils n'estoient obligez de leur promotion  
qu'au saint Siege, qui n'auoit pû faire de moins que de promouoir deux  
Espagnols, lesquels demouroient en Espagne, & estoient auez l'un de  
septante ans, & l'autre de soixante tant; Que faisoit des Cardinaux pour  
Espagne, il auoit estimé en deuoir faire pour France, pour maïster au mon-  
de qu'il tenoit comte de ce Roÿaume; Qu'il auoit choisi l'Euesque de Li-  
siens, pour ce qu'il l'auoit tousiours recogneu fort homme de bien & mo-  
déré, & scauoit qu'il estoit d'extraction fort noble & illustre & que vostre  
Maïesté l'auoit receu en sa bonne grace, & que ses parens vous auoyent  
mes-bien seruy, & mesmement vn sien neveu de grand valeur qui estoit  
mort à vostre seruire; Que dès lors que Monsieur de Nevers estoit icy,  
ledit siens Euesque auoit esté d'auis que vostre Maïesté fut cōsolée de l'abs-

solution.

solution, pour laquelle mon dit sieur de Nevers avoit esté en voyés & avoit  
 tousiours depuis dit & asseuré qu'il n'y auroit aucun autre moyen de met-  
 tre fin aux troubles de France, qu'en vous accordant l'absolution; Que  
 vostre Majesté s'assurast, qu'il n'y avoit autre chose qui eüst meu sa Sain-  
 cteté à le faire Cardinal, & que ie le vous escriuisse aussi, & qu'il en escriroit  
 à Monsieur le Legat pour vous en asseurer encores d'avantage, & que ie  
 n'en fusse point en peine moy-mesme, & qu'il prenoit sur soy d'en rendre  
 vostre Majesté satisfaitte. Quant à Monsieur Serasin, il l'aymoit tendre-  
 ment & le portoit dans son cœur, & estoit plus marry de ne l'avoir peu  
 faire Cardinal, que Monsieur Serasin mesme; Que ledit sieur Serasin ne  
 fut point passé pour du tout François, y ayant du sang Italien meslé pa-  
 rmy. Aussi n'estoit il point de si noble extraction à beaucoup près, comme  
 ledit sieur Euesque de Lisieux: de façon qu'en faisant Cardinal ledit sieur  
 Serasin, on n'eust point monstré tenir tant compte de la noblesse Françoisse,  
 comme en faisant ledit sieur Euesque de Lisieux. C'est tout ce qu'il me dit  
 d'une teneur. Et apres cela il me parla en particulier d'une grande partie  
 des Cardinaux Italiens qu'il avoit promeus, comme voulant descou-  
 vrir quelle opinion l'en avois, & me la donner bonne, & mesmement des  
 Cardinaux Bandini, Borghese, Bianchini, & Arigiano; monstrant les  
 aymer & estimer particulièrement & me parlant au reste plus familiè-  
 rement & plus priuement qu'il n'avoit jamais fait, comme s'il eust voulu  
 montrer le mecontentement qu'il pensoit me pouvoir estre demeuré, de  
 ce qu'il ne m'avoit accordé les requestes que ie luy avois faictes. En par-  
 lant d'avec sa Sainteté ie vis les deux neveux, comme c'est la coustume,  
 lesquels ie trouvoy aussi tout miel, & fuyre: & Monsieur le Cardinal Al-  
 dobrandin me dit entre autres choses sur le propos de Monsieur de Lisieux  
 que du commencement il leur avoit esté suspect d'estre de vos adhérens,  
 pour ce qu'il ne leur preschoit jamais autre chose si ce n'est qu'il vous falloit ab-  
 soudre. Ils font tout ce qu'ils peuvent pour justifier leur fait apres le coup,  
 & ie les voulois mettre en chemin de le raconter à aucunement; leur con-  
 seillant d'envoyer son Bonnet non à luy, comme droit, mais à vostre Majesté  
 premierement, avec un brief de nostre saint Père, qui contint les belles  
 paroles qui seroient trouées à propos, & convenables au sujet comme  
 à sa Sainteté vouloit que Monsieur de Lisieux tint de vostre Majesté le  
 Cardinalat. Et de fait ayant attendu qu'ils estoient prest à despêcher le sieur  
 Inacio Viskomiti Camerier du Pape pour luy porter ledit Bonnet, ie fus  
 trouver Monsieur le Cardinal Aldobrandin Mercredi, au matin d'oursel-  
 me de ce mois, & luy proposay cest expedient avec les raisons pour les-  
 quelles il me sembloit qu'ils en devoient user ainsi: mais ie ne peus le luy  
 persuader, & à grande peine entray ie qu'il en parleroit au Pape, il me fai-  
 soit grand fondement sur ce que le Camerier qui seroit despêché en Espa-  
 gne, qui seroit le Seigneur Luca Caralcanti aussi Camerier du Pape, por-  
 teroit les Bonnets aux Cardinaux promeus, & non au Roy d'Espagne. Et  
 ie luy dis qu'il seroit encores mieux de procurer que ces deux Bonnets aussi  
 fussent enugyez premierement au Roy d'Espagne, & mesmement puis  
 qu'il avoit demandé ces deux Cardinaux comme l'avois veu que le Pape  
 Gregoire treiziesme ayant fait les Cardinaux de Vendôme & de Joyeux

se, en enuoy les Bonnets au feu Roy. Et pource qu'ils ont icy trop de peur de preiudicier à leur autorité, ie leur adionstay que telles honnestetez & ciuillirez dont les Papes vsent enuers les Roys, non seulement ne diminuent point l'autorité du saint Siege, mais la maintiennent & augmentent. Je ne scay ce qu'ils en feront, si non que ie pense qu'ils feront tout autrement qu'il ne me semble à moy qu'ils deuroient faire, ou qu'ils prendront vne voye moyenne, qui sera d'enuoyer ce Bonnet à Monsieur le Legat. Cependant ie n'ay laissé de dire à ceux qui sont icy pour ledit sieur de Lilioux, comme i'estimois qu'il en deuoit vser luy de son costé, & en tant que i'ay sceu & peu, ie voulu moyenner que vostre Majesté s'accommodant au temps, & vsant de sa bonté & magnanimité plus que Royale, passe par dessus telles inciuillitez, qui en substance & en effets ne montent gueres, & n'y a que la façon, à laquelle les hommes donnent pris plus ou moins, selon la foiblesse ou vigueur de leur ame.

Pour le regard de Monsieur Serasin, le Pape ne me parla point d'aucune opposition qu'il eust, comme auoit fait Monsieur le Cardinal Tolet, & quoy qu'il y eust, ce ne pourroit estre grand chose. Car lors qu'il voulut estre Auditeur de Rome, il eut des cōcurrēts & compētiteurs en cet Office, qui luy opposerent tout ce qu'ils peurent pour l'en faire debouter, & estre preferez à luy, & neantmoins il surmonta toutes difficultez, encores qu'il fust alors nouveau icy, & sans aucun appuy, & depuis a exercé cet estat trente & tant d'annees, à la venue des Papes & de toute cette Cour. De façon que son plus grand peché est, qu'en ce qu'il a peu il a tenu pour vostre Majesté & pour la Couronne au temps le plus difficile & dangereux, & qu'il est François de sçauoir éminer, & de grande vertu & valeur, & a expérience de cette Cour, & moyenn'y seruit vostre Majesté & la patrie plus que ne voudroient les Espagnols, & possibles d'autres encores. Tous les meilleurs & plus sages de cette Cour disent que vostre Majesté pour son seruice & pour la reputation, lors qu'elle demandera des Cardinaux le doit demander luy, & luy faire du bien, & quand la malignité des hommes pourroit tant sur la vertu & sur la raison, que mesmes à vostre requeste il ne fut fait Cardinal, que vostre Majesté le doit retirer d'icy, & l'appeller près de soy avec quelque belle & honorable occasion, comme seroit en luy domant quelque Euesché, & l'honorant encores d'autre façon, selon qu'elle l'estimeroit digne, comme à la verité il est. J'estois icy de cette lettre, prest à la finir, quand j'ay receu à ce matin celle qu'il vous a pleu m'adresser le 21. May de la résurrection de la Feste de laquelle bone nouvelle nous auons esté tous consolez, tant pour l'importance de la place en soy, que pour ce que vostre Majesté degagée d'un si long siege pourra desormais disposer plus librement de soy & de son armée à reprimier ou rembarer la violence de ses ennemis. J'ay esté ce soir en donner aui à Monsieur le Cardinal Aldobrandini, qui a montré en estre fort ioyeux, & m'a dit qu'il s'en alloit le dire au Pape. Aussi ai-je esté bien aise de ce qu'il a pleu à vostre Majesté me mander son intencion sur le contenu des mes lettres des 16. & 17. Auiil, dont ie feray mon profit pour vostre seruice par deçà. Quant au parlement de Monsieur le Cardinal de Florence, qui s'en va Legat en France, & à la charge qu'il peut auoir, & aux Prelats qui l'accompagnent, ie prie

de moy-mesme, qu'il importoit à vostre seruice, & à vostre affection de le  
 sçavoir; & pour ce ie vous en escriuis à temps & amplement par mes let-  
 tres des dixiesme, vnziesme & treiziesme de May. Au demeurant j'atten-  
 dray le sieur Alexandre Desbène qui n'est point encores arriué par deça; &  
 prieray Dieu qu'il vous donne S I R E, En parfaite santé tres-heureuse, &  
 tres-longue vie. De Rome ce seiziesme de Iuin mil cinq cens nonante six.

## A MONSIEUR DE VILLEROY.

LXII.

**M**ONSEIGNEUR, Le Roy m'escruiue en vostre absence vne  
 lettre d'Abbeuille, le 27. d'Auril, à laquelle respondant par vne mien-  
 ne du cinquiesme de ce mois, ie luy donnay comme par mesme moyen de ce  
 qui s'estoit passé icy touchant la promotion des Cardinaux que le Pape fit  
 ledit iour cunctiesme. Maintenant ie luy en escriis la suite comme vous ver-  
 rez: & pour n'y ser point derredie, ie vous diray seulement que lors  
 que j'ay fait instance icy qu'on ne fit point de Cardinal François qui ne  
 fut demandé par le Roy; j'en ay tousiours parlé en termes genetaux sans  
 jamais nommer Monsieur de Lisleux. J'ay tousiours parlé de luy avec tout  
 honneur & reuerence, declarant que ie l'estimois tres-digne de la dignité  
 de Cardinal, & que ie luy estois tres-humble seruiteur, comme il est vray,  
 mais que pour le denoir de ma charge ie ne pouuois faire de moins que de  
 supplier la sainteté de porter ce respect au Roy, que de ne faire point  
 Cardinal yn sien suiet, mesmement regnicole, sans participation de sa  
 Majesté, & quand i'eusse eu l'honneur d'appartenir de sang ou de quel-  
 que fort estroite obligation à mondit sieur de Lisleux, ie n'eusse laissé de  
 faire la mesme charge: vous priant tres-humblement d'en respondre ainsi à  
 ceux qui vous en pourroient parler, comme tout est auourd'huy plein de  
 calomnieux, & de mesdisans. Quand cette dépêche arriuera à vous Mon-  
 sieur le Legaty pourqa estre arriué aussi, & vne des premieres choses dont il  
 recherchera le Roy sera de sçavoir de qui a esté fait icy par les Procureurs  
 de la Majesté, comme il est tres-raisonnable: surquoy i'oullay à vous es-  
 crire dernièrement en la dépêche que ie vous en eus sur cette Legation, que  
 lors que l'on proposa icy à Monsieur d'Eureux & à moy l'article de la ra-  
 tification, on y auoit mis que le Roy ratifieroit de nouveau l'abjuracion,  
 & profession de foy entre les mains du Legat, ou autre Ministre de la  
 sainteté, par mondit sieur d'Eureux & moy ne voulusmes passer cela,  
 & le fismes effacer. A la facon de fois qu'on nous proposa ledit article de la  
 ratification, on y auoit mis qu'en ces lettres patentes de la ratification, que  
 le Roy, seroit, seroient inserées au long & de mot à mot l'abjuracion, & pro-  
 fession de foy que nous ferions au nom du Roy: mais ne voulusmes pas-  
 ser cela non plus, & le fismes effacer comme mondit sieur d'Eureux s'en  
 pourra souuenir. Et pour ce qu'il pourroit estre que nonobstant tout

cela ledit fleur Legat vous demanderoit encorres aujourdhuy quelque chose, comme ils n'en auront jamais assez, ie vous en ay voulu aduertir, combien que mondit fleur d'Eureux estant par delà cet anis vous seruira de peu. Tant y a que le Roy pour satisfaire à l'article de la ratification, comme il fut passé par nous, & comme il se trouue couché dans la Bulle de l'absolution, n'aura à faire autre chose, qu'à prendre en sa main les lettres parentes de la ratification expediee en la façon portee par les memoires qui vous furent par nous enuoyez avec ladicte Bulle, & dire audit fleur Legat qu'il a ratifié & approuué, ratifié & approuuetout ce qui a esté fait à Rome par ses Procureurs au fait de son absolution, & a fait expedier les lettres parentes de sa ratification en forme probante, & authentique, lesquelles il luy baille & consigne, le priant de les enuoyer à nostre saint Pere. C'est la forme la plus courte, & la plus simple, & qui suffit. Que si ledit Legat y vouloit plus de façon, le Roy le pourroit le contenter en faisant lire en la presence d'eux deux lesdites lettres parentes de sa ratification, ou par vn des Prelats de sa Cour, ou par tel autre qu'on aduiserait, & suivant ses paroles de l'article de la ratification, que sa Majesté bien aduertie & informée de tout ce qui s'est fait à Rome sur le fait de son absolution, & en ayant veu, & considéré toutes les actes, ratifié & approuué l'aburation & detestation des heresies & erreurs, & la profession de la foy Catholique, & toutes, & chacune des autres choses faites, & promises en son nom par tel, & tel, ses Procureurs au fait de son absolution le 17. Décembre dernier, & accepte & reçoit les mandemens, & penitences de sa Majesté enjoindres par la Sainteté. De laquelle sienne ratification, approbation, & acceptation ladicte Majesté a fait expedier ses lettres parentes en forme probante & authentique, qu'elle baille à Monsieur le Legat pour enuoyer à nostre saint Pere, & au saint Siege Apostolique. Et sera bon que desdites Lettres parentes on prene vn receu dudit Legat, ou qu'il soit retenu acte de ladicte consignation par devant Notaires, & sermons. Mais le m'oublie derechef en vous escriuant choses superflues.

Par vne lettre du Roy du 12. May que ie yens de recevoir, ie voy que Monsieur Delbene est par les chemins venant en ça, & qu'il porte la ratification. Que si non obstant icelle Monsieur de Legat vouloit encorres que le Roy ratifiast entre ses mains, comme l'article le porte, j'estime que sa Majesté n'en doit faire difficulté ny de bailler encorres autres lettres parentes, & que celle se pourroit faire en la façon que j'ay ditte cy dessus, en adioustant qu'encorres que sa Majesté eut desiré l'absolument ratifié & enuoyé ses lettres de ratification de son nom à nostre saint Pere le Pape, ce neantmoins recherchée par Monsieur le Legat de ratifier entre ces mains ladicte Majesté pour le plus grand contentement de ladicte Sainteté, & dudit fleur Legat, & pour monstres de plus en plus la sincerité & fermeté de sa bonne intention, a deuoultay en tant que besoin seroit ratifié & approuué, ratifié & approuué, &c. A tant &c. Monseigneur, &c. De Rome ce 16. Juin. 1596.

A V R O Y.

LXIII.

SIRE,

Par ma lettre d'hier, j'escriuois à vostre Majesté que ie luy ferois une lettre à part touchant Monsieur le Cardinal Bandinice lors la presente. Le lendemain doncques de sa promotion que ie me fus conioiuyt avec luy au nom de vostre Majesté, comme ie fis avec tous les onze qui estoient presents en ceste Cour, il me dit que luy & les siens auoient tousiours esté seruiteurs de la Couronne de France, & y auoient depeudu de leur bien & de leur sang; Qu'il continuoît, & vouloit tousiours continuer en ceste affection & deuotion, combien que quelques vns. qui ne luy vouloient gueres de bien l'eussent depeint par delà tout auurement, comme s'il estoit vn grand Espagnol: surquoy il m'appelloit à desmoin de l'occasion qu'il auoit d'aimer les Espagnols, puis que ie me pouuois souuenir, comme de fait il m'en souuenit, que le Comte d'Olivarez Ambassadeur du Roy d'Espagne, luy ostâ le Darariat que le Pape Gregoite X I V. luy auoit donné au commencement de son Pontificat; Qu'il auoit escrit à vostre Majesté de Fermo, dont il est Archeuesque, & vous auoit enuoyé l'Abbé son frere pour se conioiur avec vostre Majesté, & vous assurer de sares humble affection à vostre service: Qu'il vous en escriroit encore sur l'occasion de sa promotion, & desirois que iayons en assurance encores de plus en plus, & que ie le visse vne autre fois auant que l'ordinaire reparsist pour Lyon. Cela fut cause que i'y retournay le Vendredy quatorziesme de ce mois. Les propos qu'il me tint ceste seconde fois, outre la repetition des premieres, sepeurent reduire à deux chefs, dont le premier contient les iustificacions sur les imputations qu'on luy auoit faictes sur le second concernoit le sieur Mario Bandini son frere devenu prisonnier à Loches par Monsieur d'Espernon pour certaines dettes: Les imputations estoient, que lors qu'il estoit Gouverneur & Vicelegat à Bologne pour le Pape en l'an 1593. il eust fait deux choses contre vostre service: l'une, qu'après Monsieur le Marquis de D'Elany y fut passé, il luy enuoya vn courier exprès à ceue ledit sieur Marquis ne vint point à Rome, & sortit de l'Etat Ecclesiastique la plus tost qu'il pourroit: l'autre, que Monsieur de Noyers y estant passé sur rauona en venant à Rome, & luy ayant dit certaines choses touchant sa legation, il les auoit rapportées au sieur Pirro Maluezzi partizan d'Espagne, pour les offrir au Duc de Sesse Ambassadeur pour le Roy d'Espagne par ce poste siuict Pere. Quant à la premiere, disoit ledit sieur Cardinal, qu'il n'auoit peu faire de moins que de faire sçauoir, ardis sieur Marquis le commandement qu'il auoit receu du Pape: Qu'il auoit esté tres-vorry que le Pape luy eust fait ce commandement, mais il auoit esté contraint d'y obéir, & en y obéissant il apprit yse enuers ledit sieur Marquis de tout lozesploit qu'il auoit pu, luy enuoyant la copie de la lettre mesme qu'il en auoit re-

ce de Monsieur le Cardinal Aldobrandin, & luy en esclariant vne sienne, par laquelle il luy tesmoignoit de plaisir qu'il en auoit, le supplioit de ne le prendre en mauuaise part, comme il n'en pouuoit mais; en quoy il n'y auoit rien dont personnes equitables & non passionnees, peussent coniecturer aucune mauuaise volonté enuers vostre Majesté ou la France: Quant à la seconde, disoit ledit seigneur Cardinal, qu'il estoit vray que lors que Monsieur de Neuers passa à Bologne venant de Rome, mondit sieur de Neuers luy dit plusieurs bonnes choses pour luy monstrier premierement que l'acconfection de vostre Majesté estoit vraye & sincere, sans aucune faulxion ne dissimulation; & que vostre Majesté estoit & seroit toute sa vie bon & vray Catholique: secondement, que vostre Majesté estoit plus forte qu'on ne pensoit à Rome, & que tant qu'elle viendroit on ne pourroit establir en France autre Roy qu'elle; & que c'estoit vanité de penser faire un autre Roy; Que le Pape ne pourroit mieux faire pour la Religion Catholique, & pour la pacification des troubles de France que de vous donner l'absolution pour laquelle il venoit à Rome; Que si le Pape ne vous la donnoit, les Citez, & les Peuples qui estoient las de la guerre, & qui auoient veu le deuoir auquel vostre Majesté se seroit mise, ne laisseroient de vous reconnoistre pour Roy, & se ranger à vostre obéissance, & que pour toutes ces considerations le Pape vous devoit absoudre, & tous les gens de bien le desirer, & procurer entant qu'ils pourroient; Que deux ou trois iours après ce passage de Monsieur de Neuers par Bologne, il vint occasion de faire certaine congregatiō des principaux de ladite ville par deuant luy pour la police, & apres que ladite congregatiō fut tenue, & qu'on eust arresté ce qui sembla estre bon, cinq ou six d'entre eux succederent à parler des choses de France, & du voyage de Monsieur de Neuers; & luy en demanderent à luy, & il leur recita candidement vne grande partie de ce que Monsieur de Neuers luy auoit dit; Que parmi lesdits cinq ou six estoit le seigneur Pierro Malvezzi, qui à ce qu'on dit l'escriuit puis apres à Rome au Duc de Sesse Ambassadeur d'Espagne. Qu'il ne recita point lesdites choses ausdits cinq ou six personages, ainsi qu'elles ne fussent écrites à personne, & moins à l'Ambassadeur d'Espagne, avec lequel il n'eut jamais aucune participation ny communication: Qu'entre les choses susdites il n'y auoit rien qui d'eust estre tenu secret. Quant les recitans n'estimoient faire rien contre le seruice de vostre Majesté, ainsi qu'il ne pouoit nuire qu'à vostre grand aduantage, profit, & reputation, & que ce n'estoit pas que cela eust esté public, & creü par tout l'vniuers, comme Monsieur de Neuers le publia depuis, & le fit imprimer apres son retour de Rome: Que à les Ministres d'Espagne mesme l'eussent bien entendu, & y eussent adionsté soy dès lors, comme ils l'ont depuis veu par experience, il leur en eust esté mieux à eux-mesmes, & à vostre Majesté, & à vous la France, & à toute la Chrestienté; de façon qu'en tout cela il n'y auoit rien dont les malicieux peussent faire leur profit pour le preiudice de vostre grace de vostre Majesté, laquelle il desiroit de tout son affection, & vous estre seruiteur toute sa vie. A quoy j'adionste de moy mesme, SIRE, que ledit seigneur Cardinal estant né à Rome, & subiet du Pape, & lors officier & ministre de sa sainteté, & le Pape vous faisant lors la guerre continuellement avec le Roy d'Espagne quand bien il auoit

Johnes lors des aduertissemens contre vous, aux Espagnols mesmes, pour la continue interion de son maistre, & d'eux ensemble, ce ne seroit point chose que vostre Majesté luy deust ny voulust imputer auourd'huy qu'il vous offre son seruice, puis que vostre Majesté n'impute pas mesme à ses propres subiects & officiers de la Couronne qui se recognoissent, tant d'actes d'hostilité qu'ils ont commis contre l'Estat, & leur patrie, & contre vostre personne propre. Voila quant au premier chef desdits propos à moy temus par ledit Seigneur Cardinal Bandini, à la seconde fois que ie le fus voir apres sa promotion. Quant au second chef qui concerne le sieur Mario Bandini son frere; il me dit comme sondit frere estoit detenu prisonnier sept ans y a par Monsieur d'Espernon, pour debtes que sondit frere n'auoit peu, & ne pouuoit encore auourd'huy payer, à cause qu'il n'auoit esté dressé de plusieurs sommes, dont il auoit accommodé le feu Roy en son besoin pour le seruice du public; Que s'il en estoit dressé, il auroit dequoy payer le sieur d'Espernon, & tous autres à qui il peut deuoir; Que ce seroit vn acte de iustice, lequel neantmoins il prendroit à tres-grande grace, s'il plaisoit à vostre Majesté faire donner audit sieur Mario assignation, ou valider les assignations que le feu Roy luy auoit données, pour les sommes à luy bien & loyalement deuës par sadite Majesté, & en ce faisant luy donner moyen d'asseurer audit sieur d'Espernon, la dette pour laquelle il est detenu, & de sortir d'une si longue captiuité. Que vostre Majesté auroit à present plus de facilité & de moyen de pouruoir à la deliurance dudit Mario, & d'y faire condescendre ledit sieur d'Espernon, pource que Monsieur le Legat en feroit instance de la part du Pape, & que Monsieur le Connestable qui est près de vostre Majesté vous y seruiroit, pour le bien qu'il veut à ceste maison à cause du Colonel Bandini leur frere, qui mourut pour vostre seruice sous mondit sieur le Connestable en procurant la reduction de la ville de Narbonne à vostre obéissance, & que ledit sieur d'Espernon se trouueroit aussi dans peu de temps près de vostre Majesté pour plus promptement receuoir vos commandemens, & les executer avec plys de respect, & de reuerence, & ensemble deferer à l'intercession de Monsieur le Legat, & de mondit sieur le Connestable; Que la conservation & propagation de la maison des Bandini dependoit de la deliurance dudit Mario, les deux autres freres estans de profession Ecclesiastique; Que pour la deuotion, & tres-humble seruice que ledit sieur Cardinal auoit voué, & vouoit à vostre Majesté il ne desiroit point pour ceste heure autre faueur ny bien d'elle, que la liberation de son frere, encore que pour le sang respandu par les siens, pour la Couronne de France, & pour le seruice de vostre Majesté il se pût promettre d'autres gratifications de vostre generosité, & bonté; Que tous les autres biens & faueurs qu'il pourroit receuoir d'elle, quelques grands qu'ils fussent, ne seautoient tant importer à son affection comme ceste-cy seule; Que outre que vostre Majesté feroit vne action vraiment Royale, en releuant par sa main secourable vne maison affligée, elle obligeroit à soy encore plusieurs parents, allies, & amis qu'ils ont en diuers endroits de l'Italie de bien grande qualité, comme Cardinaux, & autres, & seroit chose agreable à nostre saint Pere, & à d'autres Princes qui leur font



cet honneur de les aimer, & d'avoir soin de leur bien, & qui tousjours à honneur, & profit, & service de vostre Majesté. C'est, S I R E, le sommaire de ce qu'il me dit plus amplement, avec tant d'assurance & d'efficace, que j'en demeure persuadé & ému, & croy fermement que l'acceptation qu'il vous plaira faire de sa bonne volonté, & du service qu'il vous offre, & la diligence de son dit frere, dont il vous supplie avec tant d'affection, vous sera utile & profitable, augmentant de plus en plus vostre bon nom, & vous acquérant de nouveaux serviteurs. A tant, &c. S I R E, &c. De Rome, ce 17. Juin, 1569.

## A M O N S I E U R D E V I L L E R O Y.

L X V I I

M O N S I E U R ; Ceste cy sera en response de la vostre du virge-duxiesme May, laquelle je receus seulement avant-hier au matin, & tout aussitost que je l'eus lue le Penedix à Monsieur Botereau expeditionnaire, avec vn paquet de Monsieur de Linet de Lyon à luy adressant touchant les Prieurez dont vous m'écriuez, lequel Botereau en dressa incontinent la supplication, & la fit signer par Monsieur de Sars qui a le commandement, qu'on appelle, & depuis en si peu de temps, elle a passé par toutes les mains, & retouttes les façons, que le Rile & courtoisie de ceste Cour requeroient: de façon que je sçayens de voir, & tenir en mes mains du tout expedie, & n'ay point de souvenance d'en avoir veu une autre despeschée avec tant de promptitude: mais nous avons fait tout ce qui s'est pu pour vous la pouvoir envoyer par cet ordinaire comme elle sera. Ledit sieur Botereau m'envoie à Lyon au sieur Liuet, qui vous la fera tenir. Le maître des Courriers de Lyon par vne sienne lettre du dernierme de ce mois, m'escrit que dès le vingt sixiesme May il m'avoit envoyé vn courrier exprès, mais le courrier n'est point arrivé par deçà, & ladite signature a esté expediee sur vn duplicata que ledit maître des courriers m'a envoyé par la voye de Gènes, avec vne sienne lettre du premier de ce mois: mais grâces à Dieu, nous n'avons point esté prévenus, & jusques icy nous sommes non seulement les premiers, mais seuls, comme il en a esté fait diligente perquisition. Au demeurant ie n'ose toucher à la grande perte que vous venez de faire, pour ne rengreger vostre douleur, & celle que j'en ferois moy-mesme, vous estant si obligé & debot serviteur, que l'estime milennes toutes vos prosperitez & advenances: mais nous sommes mestier d'aage pour avoir appris qu'il n'y a si belle ny si bonne couple que en fin la mort ne decouple, tellement que ce que vous venez de souffrir, est chose ordinaire qui se voit tous les jours: mais d'avoir duré trente & tant d'années ensemble, c'est une grace particuliere que Dieu vous a fait, & donne à fort peu de gens. A tant, &c. Monsieur, &c. De Rome, ce 28. Juin 1566.

CETTE

CETTE LETTRE N'EST ESCRITE A MONSIEVR  
DE VILLEROY.

## LXV.

**M**ONSEIGNEUR, Comme apres la reduction de le Fere, vous me fistes de meilleur cœur la dépesche du vingt deuxiesme May, que vous ne m'auiez faite la precedente, aussi l'ay-ie receuë avec toute aurre disposition & sentiment que la premiere, & en ay remercié & loué Dieu de toute mon affection. Les Espagnols ne peuvent croire ceste reduction : & encore qu'ils ayent sceu que i'en auois receu lettres, ce neantmoins ils n'ont laissé & ne laissent de gager de bonnes sommes qu'il n'en est rien, tant ils presument de leurs forces & bon heur : mais i'espere que Dieu les humiliera bien tost, donnant moyen au Roy bien tost de faire quelque bel exploit sur eux. Je vous remercie tres-humblement de la responce qu'il vous a plu faire à mes lettres du seiziesme & dixseptiesme d'Auril : & pour ce que vous m'écruissies que le Roy appelleroit en bref Monsieur de Villeroy ie luy adresse mes dépesches à l'acoustumée. Que s'il n'estoit encore en Cour lors qu'elles y arriueront, il vous plaira tenir pour dit à vous-mesmes tout ce que ie luy escriis à luy. Cependant ie vous baise tres-humblement les mains des courtoisies & offres qu'il vous plaist me continuer, & vous supplie de croire que comme ie les tiens à grand'honneur, aussi feray-ie vos commandemens en toute matiere qu'il vous plaira me donner de vous rendre le tres-humble seruice que ie vous dois, & que ie vous ay voué. A tant &c. Monseigneur, &c. De Rome ce 18. Iuin. 1596.

## A V R O Y.

## LXVI.

**S**IRE,  
La dépesche qu'il plent à vostre Majesté me faire d'Abeuille le dix septiesme Iuin, me fut renduë par courier exprés enuoyé de Lyon le sixiesme Iuliet au matin, & l'apres-disnee sur le soir ie fus à l'audience, & dis à nostre saint Pere comme i'auois receu ce iour là mesme des lettres de vostre Majesté pleines d'excuses, de ce qu'on auoit tant tardé à enuoyer hommes exprés, & rescrire au Bref que sa Sainteté auoit enuoyé avec la Bulle de l'absolution, & par ce moyen commençay à luy exposer lesdites excuses, finissant par les causes qui auoient meü vostre Majesté à enuoyer le sieur Alexandre Delbene au deuant de Monsieur le Legat, au lieu de l'enuoyer par deçà, comme il auoit esté escrit par cy deuant, & en attendant que vostre Majesté fust partir iceluy qui deuoit venir prester l'obediencce, escrit cependant à sa Sainteté les lettres que ie tenois en main, & que ie luy baillay, en cet endroit. Nostre saint Pere ne respondit point ausdites excuses. autrey

ment que par vn doux soufrire, qui monstroit qui les prenoit en bonne part. Mais quand ie luy eus baillé la lettre, me demanda ce qu'elle contenoit; adioustant que ie le deuois ſçauoir, pour ce que la couſtume des Princes eſtoit d'enuoyer touſiours à leurs miniſtres la copie des lettres qu'ils eſcriuoient aux Princes près leſquels ils reſidoient. Ie luy dis que i'en auois copie, & l'auois ſur moy, & que s'il plaſoit à ſa Sainteté ie la luy lirois en Italien ſur le texte François, ce qu'il trouua bon: & ainſi ie la luy leus toute, & il monſtra y prendre tres-grand plaſir, comme à la verité elle eſt tres-belle, & tres-digne de voſtre Maieſté & de ſa Sainteté. Il me dit qu'il la feroit lire au premier Conſiſtoire, comme il ſit hier Lundy 15. de ce mois, au grand contentement de tous les Cardinaux, qui en eſtiment & ioüent voſtre Maieſté grandement. Apres qu'il euſt bien ſauouré laditte lettre; ie luy dis particulièrement & par le menu l'ordre que voſtre Maieſté auoit donné, à ce que Monsieur le Legat fuſt receu, & accompagné par tout le Royaume le plus honorablement qu'il ſeroit poſſible, & accommodé & ſeruy de tout ce qui ſeroit beſoin: & puis j'aſſeuray ſa Sainteté que tout auſſi toſt que ledit ſieur Legat ſeroit arriué à voſtre Maieſté vous feriez partir celuy qui deuoit venir preſter l'obedience ſans plus differer. Ie luy rédis auſſi compte de ce que voſtre Maieſté auoit commencé à expedier des lettres de nomination pour l'expedition des Eueſchez & Abbayes en cette Court de Rome: à quoy particulièrement il monſtra prendre grand plaſir, & me le ſit redire, me demandant qui me l'eſcriuoit. Ie luy reſpondis que c'eſtoit Monsieur de Villeroy qui me l'eſcriuoit par voſtre commandement & adiouſtay que iuſques à ce point-là ie ne luy auois rien dit, qui ne fut expreſſément porté par les lettres de voſtre Maieſté ou de mondit ſieur de Villeroy, & que ma couſtume eſtoit de ſeparer touſiours ce qui n'eſtoit eſcrit par voſtre Maieſté & ſon Secretaire d'Eſtat, d'avec ce que d'autres m'eſcriuoient, & de le retourner nommément à ſa Sainteté & luy propoſer à part, ſans iamais y entre-meller aucune occurrence en autre choſe que i'eufſe apriſ d'ailleurs. Auquel propos d'expedition, ie prie voſtre Maieſté de croire, que ie garderay fidellement, & tres-eſtroitement, le commandement qu'il luy a plu me faire touchant les gratis d'icelles, comme auſſi tous autres qu'il vous plaira me départir en toute ma vie. Sur la fin de ladite audience, ie luy dis comme i'auois eu reſponſe à vn aduis que ie vous auois donné des deſſeins que les Eſpagnols faiſoient encore ſur Marſeille, & des gageures qu'ils auoient faites qu'ils l'auroient pour tout ce mois de Iuillet; & que voſtre Maieſté me reſpondoit, que outre l'ordre qu'elle y donnoit, elle s'aſſeureroit que ſa Sainteté auſſi de ſa part empêcheroit ce deſſein de tout ſon pouuoir; cognoiſſant bien qu'en cela elle feroit vne choſe, non ſeulement iuſte en conſeruant à vn chacun le ſien, mais auſſi tres-vtile, & tres-importante, à ſoy-meſme pour la liberté d'Italie, & des Eſtats temporels qu'elle y auoit, & particulièrement de l'Archeueſché d'Avignon, & du Comtat de Veniſſe, qui eſtoient encore plus près du danger. Il me reſpondit là deſſus qu'il ne croyoit point que les Eſpagnols penſaſſent pour ceſte heure à prendre Marſeille par guerre ouuverte, & que l'amour de gens & de gateres dont on parloit tant, s'eſtoit fait à ſon exhortation, pour aller au deuant de l'armet de mer du Turc, & qu'il y auoit long temps qu'il en

auoit fait presser le Roy d'Espagne par le Norce qu'il auoit auprez de luy. Et de fait, S<sup>r</sup> R. E., le Prince Doria avec lesdites galeres est passé de Gènes à Naples, & de là doit passer en Sicile : mais chacun dit que nous auons à craindre le retour, & mesme d'autant que peu auparauant que ledit Doria partist de Gènes, le Comte de Fuentes y arriua venant du Milanois & sejourne à present avec les Ducs de Feria & de Pastrana, en vne maison aux champs dudit Doria appelé Pirri, & est vray semblable qu'ils y couuent quelque mauvais dessein contre la France. Ils font dire pour vn pretexte de leur seiour audit lieu que les Ducs de Feria & de Pastrana y attendent commodité de passer en Espagne, où ils doiuent retourner, & que ledit Comte de Fuentes y attend la prouision de Viceroy de Sicile que le Roy d'Espagne luy doit enuoyer, n'y ayant aujourd'huy en la Sicile aucun Viceroy, depuis que le Comte d'Oliuarés en partit, & vint Viceroy à Naples, & estant ledit Royaume de Sicile gouverné par vn qu'on appelle President & non Viceroy. Mais vn qui peut scauoir telles choses, m'a dit que ce n'est point le Comte de Fuentes qui doit aller Viceroy en Sicile, ains celuy qui est aujourd'huy Viceroy en la Catalogne : par ainsi le plus seur est d'estre sur ses gardes, & de prendre toutes choses au pis, & mesmement des Espagnols, & en cetenps-cy auquel il leur est aduis que rien ne leur est impossible, pour les prosperitez qu'ils ont eues depuis quelque mois. En partant du Pape i'allay à monsieur le Cardinal Aldobrandin, & puis à monsieur le Cardinal saint George, neueux de sa Sainteté; & à chacun d'eux fis les mesmes excuses, & rendis les lettres que vostre Majesté leur escrinoit les priant d'aider à faire trouuer bonnes lesdites excuses enuers nostre saint Pere, & en cela, & en toutes autres choses où besoin seroit vous y conuinuer leurs bons offices accoullumez, & en contres eschange faire estat pour eux & les leurs de tout ce qui dépendroit de vostre Majesté. L'un & l'autre respondirent tres-gracieusement qu'ils vous estoient tres-humbles seruiteurs, & se sentoient grandement honorez des lettres de vostre Majesté, & des honnestes propos qu'il vous plaisoit leur faire tenir, & qu'au fait desdites excuses, & en toutes autres occasions ils seruiroient vostre Majesté de toute leur puissance. Le Cardinal Aldobrandin m'adionta que sans en estre requis il auoit plusieurs fois excusé ledit Reuerendement auprez du Pape, & qu'il scauoit que la Sainteté n'en estoit pas tant en peine pour soy, comme pour ceux qui prenoient de là occasion de dire, qu'il voyoit bien que nous ne tenions point tel compte de l'absolution comme la Sainteté s'estoit promis, & qu'ils luy auoient bien predit auant qu'elle la donnast. Ces trois audiences me furent données à Montecauallo, où le Pape & mesieurs ses neueux sont à present. Le lendemain ie fus à saint Pierre, où loge monsieur le Cardinal Tolet, & fis enuers luy le mesme compliment, & luy baillay la lettre que vostre Majesté luy escrinoit, laquelle il oturit incontinent; & voyant qu'elle estoit en François, me la fit lire en Italien, & fut tres-aise du contenu, s'enquistant au reste fort seigneurusement de la santé de vostre Majesté. Je ne feray plus longue lettre pour le present, reseruant le reste à vne autre lettre que j'escriray à Monsieur de Villeroy, en priant Dieu, SIRE, &c. De Rome ce 16. Iuliet 1604.

## A MONSIEUR DE VILLEROY.

## LXVII.

**M**ONSEIGNEUR, Je viens de répondre à la lettre du Roy du dix septiesme Iuin, maintenant ie respondray à la vostre du mesme datte, sans faire redite de ce que i'ay dit en celle que i'ay escrite à sa Majesté & sans toucher aussi à tous les points en particulier, ains à ceux seulement que i'estimeray auoir besoin de particuliere responce: vous disant en general que i'ay esté tres-aïse de voir que vous estiez retourné au prez du Roy, & de recevoir vne si ample depesche; du contenu de laquelle en tous les chefs, qui sont en grand nombre, iem'aideray pour le seruice de sa Majesté en plusieurs occasions qui s'en pourront presenter, comme ie m'en suis desia aidé non seulement enuers le Pape, & Messieurs ses neueux, & Monsieur le Cardinal Toledo; mais aussi enuers d'autres où il a esté besoin: & venant au particulier ie commenceray par la crainte que vous auez du succez de la charge que nostre saint Pere peut auoir donnée à Monsieur le Legat, & vous diray que si vous en craignez l'euement par delà, on le craint autant & plus par deçà, où l'on a encore pire opinion des Parlemens, & moins d'esperance de nostre reformation, qu'il n'y en a d'occasion, & pourueu que nous nous disposions à bien faire pour l'aduenir, & à recevoir, & favoriser la restauration de l'ordre & discipline Ecclesiastique, en ce qui aura à se faire cy-apres, comme Dieu & le salut de nos ames, & l'honneur du monde; la grandeur du Roy & la reputation de la Couronne, le bien public du Royaume, & le particulier d'vn chacun nous y conuient & obligent, i'ay opinion qu'on ne se formalisera gueres par deçà, ny le Legat par delà, pour les desordres passez, & qu'on passera à peu près par où vous voudrez, comme aussi n'a t'on point de moyen de nous contraindre; & taschant de tirer ce qui se pourra, on comtera neantmoins en pur grain tout ce que vous leur accorderez. Vous auez seulement à vous garder de certains race de gens, qui pour sauuer, par exemple vn méchant deuolu qu'ils auront emblé pendant vos troubles, en surprenant le Pape, & circonuainant les officiers de la Datairerie, crieront aux oreilles du Legat en France, & du Pape à Rome, que si leurs surreptions & obreptions ne leur sont faites bonnes & s'ils ne reçoient profit de leur malice, l'autorité de sa Sainteté, & du saint Siege demeurera conculquee, la Religion Catholique abolie, & le monde renuersé sans dessus dessous: ne se soucians eux-mesmes que tous ces maux publics auinssent, pourueu que leur auarice, & ambition particuliere fust assouuie. Car quant au Pape & à son Legat, en eux mesmes, ils ne regarderont point tant à certaines particularitez passees, & faites en temps de trouble comme à establir en temps de paix vn bon ordre public en toute l'Eglise Gallicane pour tousiours à l'aduenir, & vous auez trouué en ma lettre du treiziesme May que le Legat auant que partir d'icy me dit quasi cela mesme, & ie scay vn conseil que le Cheualier Dalfin Ambassadeur & present de la Seigneurie

de Venise près nostre lain& Pere, & qui entend fort bien l'Estat de la France, leur a donné entre autres, & qu'ils ont trouué bon. Vous pourriez encore si dextrement negocier, & donner esperance si certaine de l'aduenir, qu'on vous pourroit accorder des choses autrement impossibles, comme la confirmation des collations, prouisions, & autres dispositions faites par delà en vertu des Arrests des Cours de Parlement & du grand Conseil, dont est parlé en l'escriit de Monsieur de Bellieure, que vous m'auiez emoyé; lequel est à la verité tres-docte, & digne du personnage qui l'adressé. Et entre autres choses est expedient de demander ladite confirmation dont il s'est auisé, sur vn exemple semblable du temps du Roy Charles septiesime tres à propos pour acheuer de mettre fin à nos diuisions, & paix aux cōsciēces d'une part & d'autre. Mais sur les abus qui peuuent auoir esté commis esdites prouisions & dispositions, contre le deffaut de puissance des collateurs, & sur vne Bulle particuliere, & deputation d'un notable Prelat assisté de deux Conseillers Ecclesiastiques, que l'auteur dudit escriit desireroit & dont il parle au dernier fueillet dudit escriit; ie vous prie de considerer vous & luy, s'il ne seroit pas aussi bon, & plus facile à obtenir, que la confirmation generale qu'on demandoit au Pape, ne fust autre chose que suppleer ledit deffaut de puissance en ceux qui ont conferé, & au reste laissât en la disposition du droit commun les obreptions & subreptions qui peuvent auoir esté commises par les impetrans, lesquelles pourroient estre debatues en la mesme façon, qu'on procede es prouisions & dispences emanées du Pape mesme; sinon que vous voulussiez mettre fin à toutes sortes de procez pour les prouisions passées. Tant y a que par ce moyen que ie dis il semble que la seule Bulle generale de la confirmation suffiroit, & qu'il ne seroit point besoin de l'autre Bulle particuliere, ny de la deputation. Aussi bien quand le Pape auroit à deputer quelqu'un en telles choses, il ne deputeroit point autre que son Legat, tant qu'il y aura Legat par delà: comme aussi à mon aduis ne fera desormais sa Sainteté rien en ces choses de France, que par son entremise ou aduis: de façon que de toutes telles choses que vous voudrez desormais obtenir par deçà, il vous en faudra parler audit Sieur Legat, & le luy persuader en luy faisant voir à l'œil, & toucher au doigt, le besoin & necessité qu'il y aura des choses que vous desirez du saint Siege; outre qu'à telle fois il pourra auoir la faculté de faire luy mesme ce dont vous aurez besoin.

I'ay aussi esté tres-aise de la copie qu'il vous a pleu m'enuoyer de l'Indult qui fut accordé par le Pape Sixte V. au feu Roy en l'année mil cinq cens quatre vingt six touchant les Eueschez & Abbayes de Bretagne, & Prouence, & ce d'autant plus que l'ayant moy demandée à Monsieur le Cardinal Aldobrandin, & au Pape mesme, ils auoient differé à me la faire bailler; disans qu'il n'éstoit encore tēps & qu'en tēps & lieu ils me la feroient donner. Auquel propos d'Indult, ie vous diray icy qu'en l'audience que i'eus du Pape Vendredy dernier 12. de ce mois, ie rememoray à sa Sainteté vne particularité que ie luy auois dite le iour que i'auois receu vostre dépesche du seiziesme iuin; à sçauoir que vous auiez commencé à expedier des lettres de nomination, & adioustay que vous me vouliez à la premiere commodité entoyer les miennes touchant l'Euesché de Rennes, & m'auiez ce-

pendant enuoyé copie dudit Indult, & le suppliy de se disposer à en faire expedier vn semblable pour le Roy à present regnant, à fin d'éuiter les differens, mauuaises satisfactions, que des vacances qui pourroient cependant aduenir esdites deux Prouinces pourroient causer de part & d'autre, & afin aussi que moy mesme peusse estre expédié avec satisfaction commune de sa Sainteté & de sa Maiesté il me dit qu'il ne refusoit point de donner ledit Indult, mais qu'il falloit attendre iusques à ce que le Legat eust parlé au Roy, & que le Roy eust fait entre ses mains la ratification qu'on attendoit de sa Maiesté, & que lors que la nomination seroit venuë, on verroit de faire mon expedition en la meilleure forme que faire se pourroit.

Si le Roy eust peu seconder la volonté du Pape touchant l'Abbaye de Redon en la personne de Monsieur Serasin, outre que son bien fait eust esté tres-bien colloqué, il en eust receu vne infinité de louanges & benedictions de toute ceste Cour, comme il fera encore plus, à toutes les fois que vacant quelque chose par delà, il se souuendra d'en gratifier ledit sieur Serasin, sans que le commencement en soit venu du Pape. Vostre réponse touchant la tapisserie de la Couronne que Monsieur d'Eureux & moy fismes saisir icy, est venuë bien à propos, & en temps que le Portugais, à qui ladite tapisserie fut adressee d'Anuers pour la vendre, se pleignoit fort de nous, & presentoit forces requestes pour en auoir main-leuee. Je crois qu'en fin il nous faudra la rachepter pour le prix qu'elle fut vendue à Anuers; car en l'Edit du Roy, sur les articles accordez à Monsieur de Mayenne, le sixiesme article porte, que ledit sieur de Mayenne & ceux qui l'ont suiuy demeureront quittez & deschargez de toutes recherches, pour princes & ventes de biens, meubles, bagues, ioyaux, soit d'Eglise, de la Couronne, Princes ou autres: & le XX. article porte, que d'une part & d'autre, les meubles qui se trouueront en nature, pourront estre repetez par ceux à qui ils appartenoient, en payant le prix pour lequel ils auront esté vendus. Ledit Portugais a esté aduertiy de ces articles, & s'en fortifie; aussi en est-il fait quelque mention en l'attestation qu'on luy enuoya d'Anuers, dont il nous donna coppie: mais en ladite attestation ne se fait aucune specification du prix de la vente, & sera mal-aisé de le sçauoir au vray; car quand bien ils le nous diroient, nous ne les en croirions point. Tant y a qu'elle fut vendue à Anuers à l'encan, comme chante l'attestation, sans coter le iour, ny le mois, ny l'année de ladite vente, & est vray semblable que le prix de la vente ait esté enregistré en des liures de la ville d'Anuers, d'où vous le pourrez mieux sçauoir, & par le moyen mesme des gens de Monsieur de Mayenne. Celuy, qui transporta ladite tapisserie & autres meubles de la Couronne de Paris à Anuers, & qui la vendit, & en receut l'argent, est dans ladite attestation appelé le sieur Vissallier qualifié Tresorier de France. Ce sont les points de vostre lettre qui m'ont semblé auoir besoin de respõse particuliere; les autres que ie ne particularise point, ne laissant de m'estre en aussi grande, ou encore plus grande estime & recommandation, selon l'importance d'iceux: mais il me suffit de vous dire en general, que ie les ay bien tous notez pour mon instruction, & que j'en pratiqueray le contenu aux occasions, vous en remerciant tres-humblement, & de toute mon affection, comme ie fais de l'expedition que

vous me voulez enuoyer touchant l'Euesché de Rennes & du renouellement d'Oeconomat, & recommandation qu'il vous a pleu faire pour moy à Monsieur Preuost Thresorier del'Eglise de Rennes.

Depuis enuiron huict iours court icy vn bruit de la mort ou extremite de vie du Roy d'Espagne, mais cela a esté tant de fois dit, & trouué faux, qu'on ne le croira point lors mesme qu'il sera vray, si on n'en voit & touche la certitude. Atant, &c. Monseigneur, &c. De Rome, ce 16. Iuillet 1596.

## A MONSIEVR DE VILLEROY.

## LXVIII.

**M**ONSEIGNEVR, l'ay esté fort aisé de voir par vostre depesche du vingt-cinquiesme Iuin, que vous ne vous estiez émeu de la promotion plus qu'il ne falloit : aussi auez vous veu par mes lettres du 16. que c'estoit mon desir & mō aduis. Vous auez tres-bié colloqué au cōmencement de la lettre du Roy les causes, pour lesquelles on n'eut tel esgard à sa Majesté qu'il conuenoit, aussi laissay-ie en mes lettres ceste partie, pource qu'elle consistoit en coniectures, que vous sçauriez trop mieux voir de vous mesme, & pource qu'en disant tout ce que i'en pensois, i'eusse peu aigrir les matieres, ce que ie ne voulus point, mais seulement vous rendre compte du deuoir que i'y auois fait. Vous auez veu aussi en ma depesche du seiziesme Iuin, ce que i'estime des causes de l'exclusion de Monsieur Seraphin & par celle que ie viens d'escrire presentement au Roy, vous verrez ce que luy & Monsieur Lomelin estiment eux-mesmes que sa Maïesté puisse faire pour eux, & partant ie ne vous en diray icy autre chose. Monsieur le Legat par la lettre qu'il a escrete de Lyon au Pape s'est plaint à sa Sainteté de ce qu'on auoit escrit en France contre luy, & contre ceux de sa suite; ie ne pense pas que cela s'adresse à moy, encore que le Pape mesm'en ait parlé par forme de recit. Tant y a que ie n'ay escrit d'eux à personne qu'à vous; & vous sçavez si i'ay dit mal de personne : ie n'en sçauois point, & quand i'en eusse sceu, ie n'en eusse point dit sinon que c'eust esté qui fut pour prejudicier au seruice du Roy : mais cestuy-cy, ie l'eusse dit premierement icy, comme ie fis ce qui m'auoit esté dit de l'Euesque de Mantouë, duquel ie vous escriuis de bonne foy toutes les excuses que luy-mesme, & le Pape, & autres m'en auoient dites. Au demeurant ie ne sçay si ie vous ay escrit par cy-deuant, pour le moins me souuient-il bien de l'auoir dit à Monsieur d'Eureux, qu'il seroit bon d'enuoyer avec celuy qui viendra prester l'obediencé; quelque honneste homme pour faire l'oraison, & que ladite oraisō fut par luy dressée par delà, & puis receüe par quelques Seigneurs du Conseil du Roy; & on ne lairroit pas de luy donner encore vne presse pour le regard des choses qui ne pourroient point icy estre de mise. Cependant ie vous diray en passant que pour le regard des cho-



ses de l'action passée, elle ne sçauroit estre trop modeste ny humble, combien qu'en toutes autres choses la dignité Royale doive tousiours estre gardée. Atant, &c. Monseigneur, &c. De Rome, ce 19. Iuillet 1596.

## A V R O Y.

## LXIX.

SIRE.

Le seiziesme de ce mois apres auoir escrit à vostre Majesté la lettre de ce iour là qui sera avec la presente, ie receus celle qu'il pleut à vostre Majesté m'escrire d'Abbeuille le vingt-cinquiesme Iuin, apres qu'elle eut receu ma dépesche du 5. touchant la promotion des Cardinaux que le Pape venoit de faire, & communiquay à Messieurs Serafin & Lomelin le regret que vostre Majesté auoit de ce qu'ils auoient esté laissez en arriere, & le desir qu'elle auoit de sçauoir ce qu'elle pourroit faire pour l'un & pour l'autre & les pria y d'y aduiser eux-mesmes, & me le dire, afin que i'en auraisse vostre Majesté suivant le commandement qu'elle m'en faisoit. Ils se sentirent fort honorez, & obligez à vostre Maieité de ceste sienne bonne volonté enuers eux, & me dirent que si elle leur vouloit faire tant de bien & d'honneur ils ne voyoient qu'elle pût faire rien de meilleur pour eux, que de les faire demander affectueusement par deça au Pape, & d'en parler elle mesme par delà au Legat, afin qu'il tesmoignast par ses lettres à sa Sainteté l'affection que vostre Maieité y auoit, & la presse qu'elle en faisoit. Le dix-septiesme qui estoit vn Mercredy, ie fus vers Monsieur le Cardinal Tolet, & luy demanday, si vostre Maieité demandant au Pape le chapeau pour quelques-vns de ses seruiteurs & subjets capables, elle en seroit gratifiée hors temps. J'y allay expressément ledit iour le Mercredy au soir, pour ce que le lendemain Iendy au matin il deuoit se trouuer avec le Pape à la congregation de l'Inquisition, & qu'apres ladite congregation il en eut pû dire vn mot à sa Sainteté, & puis m'en respondre avec plus de fondement, & neantmoins comme de luy-mesme, pour la bien seance qui doit estre gardée; Il me dit qu'il vouloit seruir vostre Maieité, & en parler au Pape, non ledit iour du lendemain Iendy, mais à la plus grande commodité: cependant me vouloit dire de luy mesme, qu'il tenoit pour chose toute assuree, que le Pape feroit des Cardinaux à vostre instance, mais non pas plustost que des quatre temps du mois de Decembre. Le Iendy au matin qui fut hier, ie fus vers Monsieur le Cardinal Aldobrandin, & luy fis la mesme demande, ayant choisi ce iour pour luy donner temps d'en parler au Pape, comme il en a moyen à toutes heures, & m'en respondre ce iourd'huy. Vndredy apres disnar que i'irois à l'audience. Il ne prit point de temps pour en deliberer, ny pour en parler à sa Sainteté, ains me fit sur le champ vne, à mon aduis, belle, sage, & amiable response, autant qu'autre qu'il m'aye faite depuis que ie traite avec luy; qu'en telle chose le Pape estoit fort retenu, & ne s'en lairroit entendre quand bien on la mettroit en propos: Que de luy mesme

mesme il me pouuoit dire que si auant la promotion vostre Majesté eust demandé des Cardinaux, la Sainteté s'en eust contentée; Qu'il croyoit aussi que vostre Majesté en demandant cy apres, la Sainteté luy en feroit en temps & lieu: mais d'en faire hors des quatre temps mal-aisément y condescenderoit-il, & mesme apres vne promotion si nombreuse, comme estoit celle qu'il venoit de faire, sinon qu'il suruint occasion, qui apportast quelque besoin & necessité d'en faire hors temps, comme il s'estoit fait quelques fois au temps d'autres Papes; Qu'il me diroit neantmoins en confiance ( & en cela passeroit les termes de Ministre du Pape ) que vostre Majesté pourroit demander qu'on luy en fit sans attendre les quatre temps, pourueu que ce ne fust point avec resolution & presse telle, qu'elle monstrat d'en vouloir ainsi absolument, & en toutes façons; mais en monstrant que vostre Majesté l'aimeroit mieux ainsi, si c'estoit le bon plaisir de la Sainteté; Qu'il n'y auoit point de mal à faire telles instances à bonne heure, & de loing, & que le Pape les alloit puis apres digerant, & résolvant meurement pour venir à l'exécution à temps & en saison; Que pour faciliter les choses, & pour tous autres bons respects, il seroit bon que vostre Majesté proposast des personnes qualifiées, de mérite & de bon nom, & bons Ecclesiastiques: Que le Roy d'Espagne en auoit ainsi fait, & en cela auoit donné grande satisfaction à la Sainteté, & l'auoit pareillement receu d'elle: Que si vostre Majesté recommandoit quelques vns de la Cour de Rome, il falloit y proceder d'autant plus considerément que le Pape les cognoissoit tous, & scauoit toutes leurs humeurs & qualitez bonnes ou mauvaises: Que lors qu'on presentoit des subiets bons & agreables, les deux tiers de la partie estoient ia gaignez, (ce sont ses mots) Qu'il desiroit seruir vostre Majesté, & la pourroit mieux & plus promptement seruir si elle en vsoit ainsi: ou que qu'il recognoissoit en soy-mesme, que de telles promotions il ne luy pouuoit venir à luy que tout bien & honneur. C'est la response qu'il me fit: à quoy j'adiousteray ce mot; que si le Pape se propose de gratifier seulement vostre Majesté apres qu'elle aura ratifié & presté l'obedience, sans y comprendre ceux qui ia auant la premiere promotion auoient esté recommandez par autres Princes que par le Roy d'Espagne, qui a esté le premier party, il le pourra faire tost, & hors les quatre temps, & le feroit avec moins d'enuie, & de mecontentement de ceux qui auroient esté obmis, & des vieux Cardinaux encore, qui au contraire ne trouvent bon que l'on face souvent de si grandes promotions: mais s'il a inténion de se seruir de l'occasion de vostre Majesté pour gratifier encore lesdits Princes, & pour promouuoit des Noces qu'il a en diuers endroits, dont on parle déja, il ne le fera point plus tost que des quatre temps de Decembre. De ce dernier aduis seront Messieurs ses neveux, & autres qui desireront auancer des leurs, & s'acquiescer support de plus en plus, de quoy ils penseront pouuoir tant plus facilement venir à bout quand il y aura plus de distance de la precedente promotion à la suivante. Ce iourd'huy apres dîner l'ay esté à l'audience du Pape, & ay dit à la Sainteté le contenu de la lettre du Duc de Sesse, surprise & déchiffrée, touchant le Roy d'Escoce; à quoy la Sainteté n'a rien respondu, sinon qu'alors que ie luy ay demandé s'il vouloit que vostre Majesté luy enuoyast la lettre originale, il a respondu qu'il n'estoit point besoin. Il est ainsi retenu à parler en

telles choses, afin qu'on ne puisse recognoistre de quel costé il panche, ni decourir rien de ses intentions. Apres cela ie luy ay parlé du fait de Marseille, non sans en auoir premieremēt deliberé long-temps avec moy-mesme pour la difficulté que ie faisois de dire ces gros mots, & mesme apres le dāger passé de guerre ouuerte pour quelques mois, les galeres s'en estahsallees du costé de Sicile, & apres encore ce qu'il m'auoit respondu en ma derniere audience que vostre Majesté verra par ma depesche du seiziesme de ce mois qui sera avec la presente: mais comme i'estois en ceste deliberatiō, vindrēt hier lettres de Genes qui portoiēt qu'on auoit decouuert à Marseille vne intelligēce que les Espagnols auoiēt sur le chasteau d'If; & que le Côte de Fuentes s'estoit arresté à Genes pour cela; & sur ce ie me resolus de luy dire tout ainsi que vostre Majesté me l'escriuait, sans y rien changer ny rabbattre vn seul mor, afin qu'il y pensast mieux, & y fit tout ce qu'il pourroit, & qu'en tout euenement il ne pust dire vn iour qu'il ne luy auoit point esté predit; ioint qu'il est de nature timide, & quelquesfois gagné par là. Je me resolus donc non seulement de luy dire la chose cōme elle estoit, mais aussi pour plus grande expression, & pour ma décharge aussi d'extraire l'article de chiffre de la lettre de mot à mot, & de luy lire, ce que i'ay fait tantost depuis ces mots (mes ennemis leuent aussi des forces en Italie) iusques à ces mots (m'escruiiez la responce qu'elle vous fera.) Je me suis apperceu qu'il a changé de couleur, & m'a dit là dessus que vostre Majesté feroit bien de laisser toute alliance avec le Turc, & se recommander à Dieu, qu'il luy ayderoit; Qu'il ne falloit point penser à telle chose, laquelle apporteroit plus de dommage à l'Italie, & à la Chrestienté, que de profit à vostre Majesté; Qu'il falloit mesme s'abstenir de tels propos, qui vous rendroient odieux à tous ceux qui en oyroient parler, mesmement auant le danger present. Je luy ay dit & repliqué que la necessité n'a point de loy; Que vostre Majesté n'en parloit que par contrainte, & à luy seul comme pere, & afin qu'il procurast en tant qu'il pourroit qu'il n'en fallust point venir là, de quoy si le malheur aduenoit vous seriez plus marry que personne, & que de ma part ie ne l'auois dit qu'à luy seul, & ne le dirois pas mesmes à Messieurs les neueux, s'il luy sembloit ainsi. Il m'a respondu que ie ferois bien de ne leur en parler point. Apres cela il m'a demandé s'il estoit vray d'une ligue faicte avec la Reyne d'Angleterre; & moi qui m'en estois i'a préparé, lui dis qu'ouï, comme ie croyois, & que ce n'estoit point tout ce qu'on en disoit; Que cela ne touchoit en rien, ny pour rien à la religion, en quoy vous ne vouliez iamais auoir aucune conjunction avec la Royne d'Angleterre, ny avec autre de sa secte; Que ce n'estoit qu'un renouuellement de la confederation ancienne de ces deux Couronnes voisines pour leur conseruation, contre vn commun ennemy qui veut tout enuahir; Que vostre Majesté estant recherchée de renouveler ceste alliance long temps y a, n'y estoit neantmoins voulu venir qu'à l'extremité & en la grande necessité qui n'est que trop notoire à tout le monde, & mesmes depuis la prise de Calais, & Ardres. Qu'en tel cas de necessité, il est loisible mesmes en termes de Theologie, de s'allier avec qui que ce soit; Que si les Princes Catholiques eussent montré en vostre endroit la charité qu'ils deuoiēt en telle occasion, vostre Majesté eust mieux aimé s'allier de ceux qui

foet de la Religion: mais ne s'en estant trouué pas vn qui seulement l'air voulu secourir d'un escu, il a fallu s'estraindre avec ceux qui estoient la conjoinctz d'interests & d'alliance avec vostre Majesté: Que ceste confederation faite pour la conseruation de la Couronne, & du Royaume de France que l'Espagnol veut acquerir ou ruiner, tourne au bien commun de la Chrestienté, & de ceux-là mesmes qui murmurent, parce que la Couronne de France ruinée, il seroit fort aisé de venir à bout des autres Princes & Potentats, & les subjuguant tous, & le saint Siege mesme, paracheuer la Monarchie, à laquelle on aspire si long-temps y a: Que le Roy d'Espagne mesme qui a fait tant le Catholique, cherche long-temps y a ceste mesme alliance de la Royned'Angleterre, & la prédroitres-volontiers, s'il la pouuoit auoir aussi bié que son peres'allia avec le Roy Héry VIII. d'Angleterre, apres qu'il fut déclaré heretique, & excommunié par le saint Siege, & mesme à son instance & pour suite. Sa Sainteté ne m'a plus dit mot, & i'ay pris congé là dessus, comme ie feray icy fin de la presente, pour expedier d'autant plustost l'ordinaire de Lyon que i'ay entreteu ce iour de plus, pour pouuoir par luy rendre response pleine à vostre dite depesche du vingt-cinquiésme Iuin. Atant &c. De Rome ce 19. Iuillet 1596.

## A V R O Y.

## L.XX.

SIRE,

L'ordinaire de Lyon arriua en ceste ville le dernier de Iuillet, ie receus par luy la depesche touchant la nomination de Messire René Potier à l'Euesché de Beaumais, & vne autre lettre à part, par laquelle vostre Majesté me commandoit de m'employer à ce qu'il obtinst gratis l'expedition dudit Euesché. Ce iour là mesme qui estoit vn Mecredy, ie mis l'expediature, qu'on appelle, sur les lettres de nomination, & les rendis au solliciteur à qui on s'estoit adressé pour en faire les diligences, & le Vendredy ensuiuant 2. iour de ce mois ie fus à l'audience, à la fin de laquelle ie demanday ledit gratis à nostre S. Pere, qui me l'accorda fort volontiers, apres que ie luy eus dit les bonnes qualitez dudit Potier, & le merite de ceux à qu'il appartenoit, & que c'estoit le premier commandement que vostre Majesté m'auoit fait de ceste sorte. Et pource que ie n'auois autre chose à traiter en ladite audience avec sa Sainteté, ie luy rendis du commencement compte de ce que i'auois appris des choses de France, par lettres que ledit ordinaire m'auoit apportées; & apres cela me dit qu'il estoit bien aise de me voir, & qu'il vouloit dire quelque chose en confiance: & me mena en vne autre chambre où il couche, plus en dedans que celle où il donne ordinairement les audiences, & commença à me dire qu'il auoit entendu que la derniere promotion de Cardinaux qu'il auoit faite auoit esté tres-mal prise en vostre Cour, & que vostre Majesté mesme en auoit esté si indignee, qu'elle n'auoit daigné recevoir vne lettre que l'Euesque de Lisieux vous auoit escrete sur ce sujet pour

170  
**LETTRES DE MONSIEUR LE**  
demonstrer qu'il vouloit tenir le Cardinalat de vostre Maiesté, & pour vous supplier de luy départir vos commandements là dessus; Que outre ce vous auez reuouqué tous les commandements qu'auparauant vous auez faits de receuoir, & honorer le Legat par tout où il passeroit, & qu'il n'y auoit plus d'esperance que ledit Legat peut rien faire en France, de tout ce pourquoy il auoit esté enuoyé: & sur ce il tourna à me dire les causes & occasions qu'il auoit eues de faire la promotion, & de faire ledit Euesque de Lisieux, en la mesme sorte qu'il me les auoit dites apres la promotion & que ie les auois escrites à vostre Maiesté, & y en adiousta encore vne pour le regard dudit sieur de Lisieux qu'il ne m'auoit dite auparauant: c'est que ledit sieur de Lisieux luy parlant au temps de la ligue de la part de Monsieur de Mayenne, de faire Cardinal l'Archeuesque de Lyon, sa Sainteté qui n'auoit gueres bon rapport dudit Archeuesque, ny aucune inclination à le faire Cardinal, auoit demandé audit sieur de Lisieux, pourquoy Monsieur de Mayenne faisoit instance pour luy de Lisieux, & que possible feroit on quelque chose, & que par tel propos il se trouua comme engagé enuers ledit sieur de Lisieux. Le luy respondis que ie n'auois rien entendu du ressentiment qu'on pretendoit auoir esté fait par vostre Maiesté enuers ledit sieur de Lisieux, & que ie ne le croyois pas ainsi crud, comme on auoit dit à sa Sainteté: i'adioustay neantmoins qu'il ne faudroit pas beaucoup s'émerveiller, quand vostre Maiesté en auroit ainsi usé enuers vn sien subiect, le soupçonnant d'auoir recherché telle chose sans participation de son Roy. Alors sa Sainteté, sans attendre que ie luy eusse dit le reste, me dit que ledit sieur de Lisieux ne luy en auoit iamais tenu propos, & que c'estoit sa Sainteté mesme qui de son propre mouuement l'auoit fait pour les causes susdites.

Après cela ie continuay, luy disant qu'au reste ie ne voulois point luy celer ny dissimuler que vostre Maiesté n'eust plustost désiré que sa Sainteté se fust abstenuë de faire Cardinal sans precipitation ledit sieur de Lisieux, & que vostre Maiesté n'eust aussi bien esté marrie, de ce que Monsieur Serafin personnage de si grand merite, apres 30. & tant d'annees de seruice fait au saint Siege, auoit esté laissé en arriere ( ie pensay qu'il estoit expedient pour plusieurs respects que ie luy disse ainsi la verité ) mais que vostre Maiesté auoit le naturel si doux & moderé, qu'en la lettre qu'il luy auoit pleu m'en escrire, elle mesme faisoit les excuses pour sa Sainteté, & reiectoit sur soy tout ce qui s'y estoit passé à son des-advantage, l'imputant au peu de moyen qu'elle auoit eu de s'acquiter en temps & lieu vers sa Sainteté de plusieurs deuoirs qui deuoient estre payez long-temps y auoir, & au demeurant vostre Maiesté auoit tel sentiment de l'obligation qu'elle auoit au saint Siege, & à la personne de sa Sainteté, que ie m'asseurois que ladite pretendue reuocation de vos commandemens, & de tout le reste qu'il y adioustoit estoit faux, & que sa Sainteté en entendroit bien tost les effects du tout contraires à ce qu'on luy en auoit rapporté. Il me dit que ie vous escriuissse de nouveau les susdites occasions qui l'auoient meu à faire ce qu'il en auoit fait, & qu'il vous aymoit & estoimoit particulièrement, & vous desiroit toute prosperité & grandeur, & que s'il pouuoit faire quelque chose pour vostre satisfaction & contentement, il le feroit tres-volon-

tiers: & ainsi ie le laissay, nō du tout persuadé qu'il n'y eust eu par delà quel-  
 que plus grand mescontentement que ie ne luy auois dit. Qui fut cause  
 que deux iours apres, à sçauoir le Dimanche quatriesme de ce mois, moy  
 ayant receu & bien considéré vos lettres du quatorziesme Iuillet, ie m'en al-  
 lay ce iour mesme au soir, sans attendre le Vendredy iour ordinaire de l'au-  
 dience, trouuer sa Sainteté, & luy dis d'entree, que ce iour là mesme i'auois  
 receu lettres de vostre Maiesté du quatorziesme Iuillet, esquelles se parloit  
 expressement & formellement des choses que sa Sainteté m'auoit dites le  
 Vendredy auparauant, & que pour cela ie venois luy en rendre compte,  
 sans le differer au iour de mon audience ordinaire. Alors sans attendre  
 que ie lui disse ce que ie voulois, lui qui est tres-patient & froid de sa na-  
 ture, & par accoustumance; me demanda neantmoins si les choses con-  
 tenues esdites lettres estoient bonnes; à quoy ie cogneus de plus en plus  
 qu'il en auoit encores beaucoup de marrel. Ie lui respondis qu'elles  
 estoient si bonnes, qu'en les lisant, & me souuenant de ce qu'il m'auoit dit  
 en l'audience precedente, les larmes m'en estoient venuës aux yeux d'aïse,  
 (enquoy ie ne luy disois que la verité) & afin, luy dis-je, que vostre  
 Sainteté voye elle mesme ce que ie ne luy sçaurois si bien représenter par  
 cœur, i'ay apporté la lettre mesme du Roy, que ie vous liray es endroits où il  
 se parle des choses susdites, & ainsi sur le François ie luy leus en Italien cer-  
 tains lieux de ladite lettre que i'auois marquez expressement en marge: &  
 premierement à l'endroit où vostre Maiesté parle dudit sieur Euesque de  
 Liseux, assez près du commencement, disant que pour le bon tesmoignage  
 querend sa Sainteté dudit Euesque, vostre Maiesté se relaschera du mes-  
 contentement qu'elle auoit de luy, & pour le respect aussi de sa Sainteté  
 luy feratout le bon traitement qu'il doit desirer de son Prince. De là ie des-  
 cendis à l'endroit où vostre Maiesté parle de l'honneur qui auoit esté fait à  
 Monsieur le Legat en Dauphiné, à Lyon & par tout où il auoit passé, non  
 avec tant de splendeur & magnificence comme vostre Majesté eust desiré,  
 mais de tres-bon cœur & que vostre Maiesté outre ce qu'elle luy auoit en-  
 uoyé au deuant Messieurs de Mets, du Mans, & d'Eureux, puis Monsieur le  
 Cardinal de Gondy, vouloit encore elle mesme en personne l'aller trouuer  
 en poste auant qu'il entrast à Paris & pnisle faire receuoir en ladite ville de Pa-  
 ris par Monsieur le Prince de Condé, & ne luy estât permis à elle de faire cét  
 office en personne, & en fin le receuoir elle mesme publiquement avec les  
 ceremonies conuenables: & combien que ce fut sans exemple des Roys ses  
 predecesseurs, qui auoient accoustumé d'attendre & receuoir les Legats en  
 leurs Palais Royaux sans aller au deuant d'eux; neantmoins comme vostre  
 Majesté estoit plus reueuable au saint Siege, quē nul de ses predecesseurs,  
 aussi vouloit-elle rendre plus d'honneur à son Legat, & luy môstrer plus de  
 priuauté & de confiance que n'auoient fait les autres Roys tres-Chrestiens.  
 Ie luy leus aussi tout de suite le lieu, où il se parle des facultez du sieur Le-  
 gat sur lesquelles vostre Maiesté auoit incontinent fait despescher ses lettres  
 d'attache adressantes à la Cour de Parlement, & portant commandement  
 à vos Procureurs & Aduocats d'en requerrir l'enterinement & publication;  
 & estoit resoluë de vaincre toutes les difficultez que ceux de ladite Gour y  
 pourroient faire. Et apres tout cela ie vins à l'article où vostre Maiesté di-

auoir déchargé les habitants de la ville d'Auignon & Comtat de Venisse de six mil escus, qu'ils souloient payer par chacun an à vos subiects de Dauphiné faizans profession de la Religion prétendue reformée : & toutes lesquelles choses sa Sainteté fut si aise que ie ne le scaurois exprimer, & ay opinion que c'est vn des plus grands plaisirs qu'il receut oncques en sa vie, pour le grand soupçon, & crainte qu'on luy auoit donnée du couraïre. Il ne me pût dire autre chose, sinon que vostre Maïesté s'honoroit soy-mesme en honorant l'Eglise, qui estoit vostre mere. Et comme ie tournay à luy dire ce que ie luy auois dit au commencement, que ie n'auois voulu attendre à luy porter ces bonnes nouuelles, iusques au iour de l'audience ordinaire; il me respondit que ie luy auois fait très-grand plaisir, & m'embrassant me tenant serré vne assez bonne piece, & puis me demâda la copie des articles de ladite lettre que ie luy auois leus, laquelle ie luy fis en Italien, & l'euoyay le lendemain au matin à Monsieur le Cardinal Aldobrandin. Aussi visitay-ie Monsieur Seraphin le mesme Lundy au matin, & luy leus ce qu'il auoit pleu à vostre Majesté m'escrire de luy, qui en fut grandement cōsolé & encouragé, & s'en sent infiniment honoré & obligé, croissant tousiours en deuotion de vous faire toute sa vie tres-humble & tres-fidelle seruite. Ie fus voir aussi Monsieur le Cardinal Bâdini, & outre que ie luy baillay la lettre que vostre Majesté luy escriuoit, ie luy leus encore l'article qui le concernoit en celle que vostre Majesté m'escriuoit à moy, dont il est entré en grande esperance de la deliurance du sieur Mario son frere, avec vn infinité de promesses & assurance de vous demeurer toute sa vie tres-fidelle, & tres-deuot seruiteur. Les autres lettres aux dix autres Cardinaux nouueaux qui sont en ceste Cour, ie les rendis aussi en deux iours, & parlay à chacun desdits Cardinaux conformément au contenu desdites lettres, qui pour ce auoient esté laissées à cachet volant, leur offrant de vostre part tout ce que vostre Majesté pourroit faire pour eux, & pour les leurs. Tous me respondirent fort honnestement avec ample demonstration de desirer faire seruite à vostre Majesté aux occasions qui s'en presenteroient, & en particulier le Cardinal Cornaro, qui entre plusieurs choses me dit, qu'il tiendroit à honneur & grandeur d'estre reputé & recogneu pour seruiteur de vostre Majesté, & qu'il s'y offroit apres y auoir bien pensé, & l'auoir mesme consulté avec l'Ambassadeur de Venise residant icy, m'ordonnant expressément de le vous escrire. Il a particulier mescontentement des Espagnols, parce qu'au temps du Pape Gregoire treiziesme qui fit vne petite promotion de quatre Cardinaux, le Comte d'Oliuarez lors Ambassadeur d'Espagne luy offra le Cardinalat, qui luy estoit assuré par promesse que le Pape en auoit faite à l'Ambassadeur de la Seigneurie, & pour lauoir ia escriue en la liste pour le faire le lendemain avec lesdits quatre; ce qu'il n'oublia pas à me dire avec ce que dessus. I'estime qu'il sera à propos qu'il plaise à vostre Maïesté luy escrire, & monstrier d'estimer ceste offre. Des deux autres lettres qui restoienc pour lesdits Cardinaux nouueaux, i'en ay enuoyé l'une à Monsieur le Cardinal Priuli à Venise, & enuoyeray l'autre par cet ordinaire à Monsieur le Cardinal Taruggien Auignon, & s'il se presente occasion de faire quelque chose, dont Monsieur le Cardinal Aquauina & les siens puissent cognoistre la souueraince que vostre Majesté a de ses bons deportemens, & la bonne

affection qu'elle luy porte, ie ne la lairray point passer, ains l'embrasseyay autant que ie pourray & sçauray, suivant ce qu'il plaist à vostre Maiesté me commander par sadite lettre du 14. Iuillet, à laquelle i'ay respondu iusques icy.

Audemeurant, la chose dont il s'est parlé le plus icy depuis enuiron tris semaines, & qui a fait surseoir quasi tout autre propos, est la prise de la ville & l'Isle de Calis par l'armée nauale d'Angleterre, dõt vostre Maiesté aura esté trop mieux aduertie : aussi n'entends-je en parler pour vous donner aduis de ce qui a esté fait, mais pour vous tenir aduertý de ce qu'on en a dit & discouru par deçà. La nouuelle en arriua icy le dernier de Iuillet par courrier exprés, & lettres de marchands, mesmement Geneuois, qui escriuoient non seulement ladite prise, & le domage déjà aduenu pour la perte d'un bon nombre de galeres, galions, & grandes nauires chargees de marchandises pour aller à la nouuelle Espagne, mais aussi la crainte de pis qu'on y auoir, comme que partie de ladite armee Angloise allast tout le long de la coste d'Espagne, y perdant, ou bruslant, ou gastant tous les vaisseaux de guerre qui s'y trouueroient, dont s'en suiuroit vn grand affoiblissement à tout cét Estat-là & que ceux-là qui demeureroient audit Calis, allassent à Seuille depourueü de toutes choses de guerre, & riche à merueille, fissent souleuer les Morisques de l'Andalousie, & du Royaume de Grenade là auprès, & fissent encore passer les Maures de Barbaris en Espagne, dont ils profageoient l'entiere ruine de celle si grand Monarchie (qui sont les propres mots de certaines lettres venuës d'Espagne) Ceste nation cy, & ceste Cour mesmement qui ayme à discourir, & en prend volontiers toutes les occasions qui se presentent, entra incontinent en discours là dessus faisant premierement des obseruations sur la foiblesse qu'ils disoient s'estre par là découuerte, tant de ce Prince-là, qui estant aduertý long-temps y auoit de ladite armee nauale qui se preparoit, & qui nommément le menaçoit, n'auoit toutesfois pü, ou sceu parer au coup, & pouruoir à la seureté de ses places maritimes ; Qu'aussi de ceste tant renommee & redoutee Monarchie, de laquelle les bras & iambe, comme les Pays-bas, le Milannois, Naples, & Sicile estoient armez, & couuerts de fer blanc, & neantmoins la teste qui estoit l'Espagne estoit comme nue, ou couuerte de rasetas, ou de quelque autre soye legere, sans armes, poudres, boulets, ny mesme artilerie ny garnison de grande consideration en la coste où les Anglois estoient descendus, ny là aux enuiron, comme portoient les lettres escrites sur les lieux que l'ay veües moy-mesme. A quoy ces disconteurs adioustoient qu'en Espagne y auoit peu de gens, tant pour n'estre ceste nation si seconde, comme celles qui sont moins mentionales, que aussi pour ce qu'on en tiroit des gens de temps en temps pour la conseruation de tant d'Estats loingtuins que ce Roy là en diuerles parties du monde ; Que ce peu d'Espagnols qui restoient n'estoient point aguerris, ny bons soldats, comme ceux qui ont esté appris & disciplinez au King, Que de Chefs de guerre il y en auoit aussi fort peu ; sous vn Roy siel & de crepire, & vn Prince sans experience, dont ils concludoient que les Anglois, & autres qui auoient proieuré ceste entrepryse, l'auoient euee bien enuieüe à celle fois assaillant ceste Monarchie par où il impo-



toit le plus, & où il y avoit plus de facilité, & moins de danger pour les assaillans; & qu'en incommodant & pressant le Roy d'Espagne en l'Espagne mesme, on l'incommodoit & pressoit en tous les autres Estats, & c'estoit comme le prendre à la gorge, & mesmement en ces endroits de Calis & de Seville, où aborde tout l'or, & autres moyens qui viennent des Indes, & de là puis apres sont distribuez à la conservation & entretenement des autres Estats que ledit Roy a loing, lesquels quand ceste source leur manqueroit, demeureroient à sec, & se perdroient d'eux mesmes. De ces observations lesdits discoureurs viennent aux pronostiques, prenoyans que pour ceste année la flotte qui estoit prestée à partir de ces quartiers-là pour aller aux Indes, ne partiroit point; & que celle qui devoit venir des Indes ne viendroient point, ou venant feroit prise par les Anglois; Que cet empeschement desdites flottes, tant pour l'aller que pour le venir, durerait puis apres aussi longuement que les Anglois tiendroient ladicte Isle; dont s'ensuiroit que le Roy d'Espagne n'auroit plus de credit parmy les bourgeois, & marchands, & ne pourroit faire aucun party avec eux, ny par consequent payer ses armées, où l'on se mutinoit de-là à cause de payement, ny les garnisons, & pensionnaires qu'il a en divers endroits, tant s'en fandoit-il qu'il eust moyen de corrompre les Gouverneurs des villes & places des autres Princes & Estats, comme il souloit; que outre la perte desdits moyens, il perdrait en core par l'adécouverte de sa foiblesse, la reputation & l'autorité qu'il avoit loing parmy les autres nations, & enseroit mieux à tous les autres Princes, desquels les subjets ne regardans plus à luy, & ne faisant plus estat de sa protection, se dispoieroient d'obeyr à leurs Princes naturels, & à ne dépendre que d'eux; Que la chose pourroit encore venir si avant que les propres subjets, dont la pluspart ne luy obeyraient par force, se départiroient de son obeyssance, non seulement hors l'Espagne loing de luy, mais aussi dans l'Espagne mesme, où d'on sca voit qu'il y a des Provinces entieres mal contentes de luy, comme le Portugal, l'Arragon, la Catalogne, & possible encores d'autres; & se plaisoient tant plus ces gens-cy en leurs discours, qu'ils s'attendoient que les Anglois ne seroient pas seuls de la partie, ains que vostre Majesté à son temps enverroient avec des forces en Espagne, fust en ces quartiers mesme de Calis, ou en quelque autre endroit plus près de la France. Mais pendant que l'on observoit & pronostiquoit telles choses par discours, soit venant nouvelles que les Anglois avoient quitté ladicte Isle, dont les mesmes discoureurs se sont mis à les blâmer d'avoir laissé perdre une si belle occasion, & abandonné un si beau commentement, d'affoiblir & ranger à la raison une puissance dont on abuse si tyranniquement; ramenant ces discoureurs plusieurs exemples de ces nations Septentrionales; qui au temps passé ont bien eu la force, & l'imperuosité pour conquérir loing, mais non pas la patience, ny la constance & prudence de conserver; & disant que si les Espagnols ne sentoient cet avantage sur eux, ou sur autres, ils ne l'eussent pas quitté de la sorte, & ne l'eussent bien autrement seou faire leur profit. Vous assurant, Sire, que excepté les Espagnols & quelques autres incertains, avec les Indes qu'ils y perdoient, & excepté encore la dévotion de la Religion dont les Rois d'Espagne font profession, tout estoit en vain.

le que ce grand follegio Espagnol fust humilié, & recogneust qu'il est aussi bien exposé aux dangers comme les autres, & apprist se contenter du sien, & à laisser en paix ses voisins. Maintenant ceste Cour ne parle d'autre chose que de l'accueil & honneur extraordinaire que vostre Majesté a fait à Monsieur le Legat, dont il a escrit luy-mesme au Pape, & les Prelats qui sont près de luy à leurs amis de deçà, & la Sainteté fit lire en Consistoire Lundy douziésme de ce mois les lettres dudit sieur Legat. Chacun en louie & benir vostre Majesté; & vn petit nombre de mécréoyans qui ont tousiours mal-dit, & mal presagé des choses de France, & des intentions de vostre Majesté, demeurent conuaincus & confus en eux-mesmes ne sçachans plus que dire, & ne se trouuant plus aussi personne qui les voulast écouter. A tant &c. SIRE, &c. De Rome ce quinziesme Aoust mil cinq cens nonante six.

## A V R O Y.

## L X X I.

SIRE,

L'adiousteray à la lettre que i'escris à vostre Majesté le quinziesme de ce mois, que ie fus à l'audience le lendemain Vendredy seiziesme pour sçauoir si le Pape me voudroit commander quelque chose : & il me dit que depuis qu'il ne m'auoit veu, il auoit receu lettres du Legat, par lesquelles il auoit veu l'effet de ce que ie luy auois ptedit en ma dernière audience, qu'il en demouroit fort consolé, & m'ordonnoit de vous escrire qu'il en remercioit vostre Majesté, & la suppliois de continuer, & croire qu'elle trouueroit tousiours en luy toute bonne correspondance d'amitié, & de tous bons offices, outre que cela vous tourneroit à plusieurs autres biens & aduantages, premierement enuers Dieu, auquel il falloit principalement regarder, & puis enuers le monde, & particulièrement enuers vos subjets, auxquels par ce moyen vous offriez tout ce qu'il y pouuoit estre de reste de dé fiance, adiousta qu'en autres choses le Legat luy auoit escrit qu'il auoit esté d'avis que Monsieur de Liseux ne vint en vostre Cour que premiere-ment ledit Legat n'eust parlé à vostre Majesté, & qu'en vne heure & demie qu'il auoit esté avec vostre Majesté il s'estoit parlé dudit sieur de Liseux, & vostre Majesté luy auoit dit que pour l'amour de la Sainteté vous oublieriez toutes choses, & luy feriez tout bon traictement. Et pource qu'il auoit semblé audit sieur Legat que vostre Majesté eust en quelque soupçon que ledit sieur de Liseux eust esté recommandé pour le fait de sa promotion, la Sainteté m'ordonnoit de vous escrire que ny le Duc de Mayenne, ny la ligue, ny les Espagnols n'auoient en aucune part en ceste promotion, non plus que le grand Turc (ce qu'il repeta deux ou trois fois) & s'il y auoit en du mal, c'estoit luy seul qui auoit failly, & vous pouoit de l'oublier, & tourne encore à me dire ce qu'il m'auoit dit aupar-

rauant de l'instance qui luy auoit autresfois esté faite de faire Cardinal l'Archeuesque de Lyon, & du peu d'inclination qu'il y auoit, dont il me specifica deux causes; l'une pour le mauvais rapport qui luy auoit esté fait de la vie dudit Archeuesque en matiere de femmes, & l'autre pour ce que pendant que le Duc de Mayenne d'un costé faisoit solliciter sa Saincteté de faire Cardinal ledit Archeuesque, Monsieur de Nemours son frere d'autre costé estant à Lyon le faisoit rechercher de trouuer quelque moyen que ledit Archeuesque sortist de la ville de Lyon. Aussi ay-je eu response depuis ma dernière lettre de Monsieur le Cardinal Toletto, qui m'a dit auoir demandé au Pape, si vostre Majesté, faisant instance à sa Saincteté de luy faire des Cardinaux hors les quatre temps, elle en seroit gracieuse, & que sa Saincteté luy auoit respondu, qu'il ne dist comme de luy mesme, que selon que seroient les personnes que vostre Majesté luy nommeroit, ainsi feroit sa Saincteté. Que tels luy pourriez vous nommer, que sa Saincteté les feroit Cardinaux, sans attendre les quatre temps, & tels aussi que non: mais ledit sieur Cardinal me dit que ie ne vous l'escriuisse pas ainsi ouuertement, ains que ie vous disse, qu'il m'auoit ainsi respondu comme de luy-mesme, & que ie croyois neantmoins qu'il en eust parlé au Pape, & que ceste response fust de l'intention de sa Saincteté. A tant ie prie Dieu qu'il vous donne, &c. SIRE, &c. De Rome, ce 18. d'Aoust 1596.

---

### A MONSIEVR DE VILLEROY.

#### LXXII.

**M**ONSEIGNEVR, Par l'ordinaire de Lyon qui arriua icy le quatriesme de ce mois, ie receus la lettre qu'il vous plut m'escrire d'Amiès le ving-sixiesme Iuliet, & vous remercie tres-humblement de l'aduiz qu'il vous a pleu me donner du tres-honorable accueil, & traitement que le Roy. a fait & continué tousiours à Monsieur le Legat, & de l'assemblée qui se deuoit faire à Compiègne, & des autres choses portées par vostre lettre. Quant à ce qui s'est dit ou qui s'est escrit par delà que l'armée de mer que les Espagnols ont menée en Calabre & Sicile, deuoit au retour aller fondre sur les Sicnois, en faueur de Dom Pietro de Medicis, plustost qu'en Prouence, cela n'est pas impossible en nature, & sera bien fait que le grand Duc prenant les choses au pis, use de toute la precaution & preuoyance qui sera possible: mais il me semble neantmoins que vous iugerez tres-bien en ne craignant point telle chose, non que les Espagnols ne haïssent le grand Duc, & qu'ils ne le voudrassent auoir ruiné s'ils pouuoient, & principalement à cause de Marseille: mais il y a quinze bons iours que ie sçay que le Roy d'Espagne ne craint rien tant qu'une guerre en Italie pour quelque cause ou occasiō que ce soit, & dissimule beaucoup de choses, & fera tousiours tout ce qu'il pourra pour y conseruer la paix, & pour ce des le temps du Pape Gregoire XIII. il fit tout ce qu'il put pour faire vne ligne deffensue pour l'Italie entre le Pape, luy & les autres Princes & Potentats d'Italie, de laquelle toutesfois il ne put venir à bout. Ie sçay bien que

tous lesdits Potentats d'Italie se craignent de luy, & que s'il en attaquoit l'un, ils se rallieroient tous ensemble : il sçait aussi que tous ses subiects de l'Italie sont mal contents de luy, & ne luy obeyssent que par force, & par faulte d'un chef qui les souleue, & conduise en leurs reuoltes. Il a encores d'autres affaires ailleurs, & si peu de iours à viure, & un fils si icure, si delicat, & si peu expérimenté, qu'il ne pense à rien moins qu'à susciter maintenant une guerre en Italie. Le pretexte puis apres du Seigneur Dom Pietro seroit trop grossier, attendu que le grand Duc & luy se sont remis de leur differend au Pape, & produisent tous les iours des escritures pardeuant luy, qui prend la peine de les voir comme quand il estoit Auditeur de Rote. Et ceux qui vous ont voulu donner à entendre que ceste partie se iouë du consentement du Pape, ignorent le naturel, la prudence, & la bonté de sa Sainteté, ou se veulent seruir de ce faux aduis à quelque leur dessein particulier, pour faire que le Pape consentist à mettre le feu en Italie, & si près de sa maison, & en ce temps que le Turc est en campagne en propre personne, il faudroit que le grand Duc, qui se comporte avec sa Sainteté avec tout le respect & reuerence possible, & qui a iusques icy plus employé d'hommes & d'argent contre le Turc que tous les Princes d'Italie ensemble, fit comme le Turc mesme. Des lettres interceptes qui vous en font coniecturer quelque chose, ie ne vous en sçauois que dire, sinon que ce pourroit estre un artifice pour vous diminuer à vous le soing de Prouence, où les Espagnols visent, & pour intimider le grand Duc, à ce qu'il soit plus large enuers son frere, & à eux moins contraire. Quant à celuy qui vous a escrit que la dernière promotion de Cardinaux a esté faite telle en desdain du grand Duc : ie le tiens pour homme moins informé des choses d'icy, & vous assure que le grand Duc est demeuré tres-content de ceste promotion, comme il en a tres-grande raison, y ayant esté compris plusieurs de ses amis, pour ne dire seruiteurs, & entre autres trois de ses suiets ; à sçauoir l'Archeuesque d'Avignon qui est de Monte Pulciano en Toscane, le Borghese Auditeur de la Chambre qui est Sienois, & le Bandini Florentin ; si bien les deux derniers sont nez à Rome. Et sur ce ie vous diray vne chose tres-vraye, & fort secrette, qui neantmoins m'a esté confee par l'Ambassadeur du grand Duc, que trois ou quatre iours auant la promotion, le Pape luy dit qu'il auoit quelque intention de faire Bandini Cardinal, mais pource que le Bandini estoit Florentin, il vouloit sçauoir si le grand Duc l'auroit agreable, & partant que ledit Ambassadeur depeschast promptement un Courrier vers son Altesse, pour en sçauoir la volonté, & qu'il n'en dist rien à personne, non pas mesme à Messieurs les Cardinaux ses neueux. Le Courrier retourna en grande diligence avec le consentement du grand Duc, & ainsi ledit Bandini fut fait Cardinal, qui autrement ne l'eust point esté. Au demeurant ie ne veux pas dire que le Pape & le grand Duc s'entr'ayent comme deux freres gemenx, & vous sçavez ce que c'est que des amitez des Princes : mais ie vous prie de croire qu'ils se défont beaucoup l'un à l'autre, & s'entre-font des courtoisies, & des plaisirs iustes, que peu de gens sçauent, outre la profession publique qu'ils font d'estre bons voisins ensemble, & le grand Duc d'estre tres-humble fils & seruiteur de sa Sainteté. C'est ce que j'auois à respondre à vostre lettre,

depuis laquelle ie n'en ay receu aucune ny de vous , ny d'autres de Messieurs les Secretaires d'Estat : & toutesfois il eust esté bon que quelqu'un de ceux qui sont auprès du Roy m'eust escrit de ce qui concernoit ceste charge , pource qu'il pouvoit respondre au Pape quand il m'en demanderoit , comme il fait ordinairement : & m'en parla particulièrement & expressément le Védredy sixiesme de ce mois , ainli que vous verrez par vne lettre à part que ie vous escriis là dessus : outre lequel propos concernant la ratification , il me dit encore qu'il seroit tres-bon de faire vne paix ou vne trefue entre France & Espagne. Je luy respondis que ie croyois que la paix seroit bonne , mais que ces deux Princes auoient tant de choses à demeller ensemble , qu'il falloit des annees pour les traiter & arrester. Quant à la trefue , si elle estoit pour peu de mois , ne suffiroit pour traiter la paix , ny pour apporter aux peuples le repos qui leur seroit necessaire , & de la faire pour quelques annees , ie l'estimerois fort difficile , depuis la prise de Calais & d'Ardes : pource que les François d'un costé estimeroient y laisser trop du leur , & quasi renoncer à l'esperance de les auoir oncques plus apres vn si long tēps , pendāt lequel elles auroient esté fortifiees , & les Espagnols d'autre costé ne voudroient les rendre pour vne trefue , ny possible pour vne paix , tant qu'ils sont tenans de ce qui leur tourne à compte : Que la mesme prise de Calais & d'Ardes apporteroit encores vne autre difficulté tant à la trefue , qu'à la paix , pour ce que le Roy en telle necessité , ayant esté contraint de se joindre plus estroittement qu'il n'estoit auparauant avec les Anglois & Hollandois , ie ne scaurois si auourd'huy il pourroit faire ny paix ny trefue sans eux. S<sup>r</sup> Saincteté me dit là dessus que les Princes scauoient tousiours trouuer leurs excuses , pour colorer ce qui leur tournoit à profit. Je luy repliquay que le Roy estoit Prince de parole : & que ce renouvellement de confederation estoit si frais , que ie ne pensois point que sa Maiesté fust pour venir au contraire , mesmement si tost : ioint que ce n'estoit point son profit que pour se rafraischir quelque temps , il donnast moyen à vn si puissant ennemy de ruiner cependant ses alliez & confederes , & puis venir avec toutes ses forces vnies contre luy seul. Le Pape me dit sur cela , que les Anglois estoient plus grands ennemis des François que les Espagnols. Je luy respondis qu'ils l'auoient esté voirement au temps passé , mais que les Espagnols l'estoient à present , & qu'il falloit regarder à l'estat present des choses qui auoient conioint les François & les Anglois contre vn commun ennemy , pour vn commun interest , qui estoit le plus fort & le plus seur lien qui peust estre entre les Estats. L'eus au bout de la langue , qu'il seroit possible bon de procurer vne trefue entre ces deux Roys , en laquelle entrast aussi la Roynie d'Angleterre , & les Estats des Pays bas ; mais ie me retins , estimant qu'il seroit tousiours à temps à dire s'il estoit bon de le dire. Monsieur le Cardinal saint George qui a les affaires d'Espagne en main , me tint les mesmes propos , & me fit les mesmes repliques que le Pape ; ce qui me fit d'autant plus penser que ç'auoit esté de propos delibéré , & non par cas fortuit , qu'on m'en auoit parlé , & qu'il pourroit estre que les Espagnols mesmes les en eussent sollicités , afin de n'auoir à faire à tant d'ennemis ensemble , & de venir à bout des uns apres les autres. De faire la trefue generale , en laquelle entrassent aussi les Anglois & les Estats

des Pays-bas, ( qui seroit obuier à ce dessein des Espagnols ) le Pape ne se rendroit point fauorable, si ce n'estoit point à ma condition, ou pour le moins avec esperance qu'une partie de toutes ces forces fussent tournées contre le Turc, comme en tel cas que le Roy d'Espagne, qui y est plus obligé que nul autre, y pourroit enuoyer grande partie des siennes.

Monsieur le Duc de Ferrare continué à s'offrir d'y aller en personne, & pour ce, outre le Seigneur Gilioli qui reside icy pour son seruice, il a enuoyé vers nostre saint Pere depuis vn mois le sieur de Monte Catino, vn de ses principaux Conseillers d'Estat, qui ne demâde plus l'inuestiture de Ferrare ouuertement, comme on a fait par cy deuant, mais seulement qu'au cas que son Altesse mourust en ce voyage pour le seruice de la Chrestienté, le Duché de Ferrare ne soit tenu pour vacant, & deuolu au saint Siege par l'espace de cinq ans.

Monsieur le Cardinal Toletto deceda Samedy quatorziesme de ce mois enuiron le Soleil couchant, en quoy l'Eglise a perdu vne tres-grande lumiere, le Pape son principal Conseiller, & le Roy & la France vn personnage affectonné. Le iour de la nostre Dame d'Aoust il partit de grand matin de saint Pierre, où il logeoit, & s'en alla à pied à sainte Marie Maior si loin, & y celebra la Messe tout chaud & suant comme il estoit arriué: depuis auoir fait cét excez en temps si chaud, & tout vieux & replet qu'il estoit, il ne se porta oncques bien, encore que huit iours apres il sembla estre guery: mais luy estant depuis suruenu vne fièvre tierce, le pourpre apparut, & ladite fièvre l'emporta au septiesme accez. Tout le long de sa maladie il a esté en grande deuotion, conformément à tout le reste de sa vie, & par son testament il a laissé tout ce qu'il auoit à l'Eglise de sainte Marie Maior, & à ses seruiteurs domestiques. Quand il se sentit atteint du coup de la mort, il fit prier le Pape de luy enuoyer sa sainte benediction, comme c'est icy la coustume des gens de qualité quand ils se trouuent en telle extremité: & sa Sainteté sans exemple qui se soit veu de nostre tēps, partit de Monte Cauallo où elle logeoit, & la luy alla dōner en personne, s'entretenant avec luy enuiron demy'-heure, le consolāt, & pleurāt tendrement, & en fin prenant congé de luy le baissa au front, & apres sa mort luy a fait faire de tres-belles obseques publiques. Je vous mettray icy en consideration s'il ne seroit pas bon que le Roy luy fist faire vn seruice en la principale Eglise de la ville où il se trouuera quand il entendra ceste nouuelle, ou à nostre Dame de Paris, ou en toutes deux. I'ay opinion que cela luy accroistroit son bō nom par deçà, & par tout ailleurs, tāt pour la grāitude, que pour la qualité d'office pour les morts; & si n'estoit que ie desire que sa Majesté seule en ait la louange, ie luy en eusse fait faire vn en l'Eglise de saint Louys: mais ie n'en ay parlé, ny n'en parleray iamais à ame viuante, afin que chacun croye que cela soit venu du propre mouuement de sa Maiesté. Je fus expédié de mon Euesché de Rennes au Consistoire que nostre saint Pere tint le Lundy 6. iour de ce mois: sa Sainteté me fit cét honneur de me proposer elle mesme, & avec termes surpassans tout ce que ie scaurois iamais meriter; mais elle voulut en cela honorer le Roy que ie sers; tellement que ie dois à sa Maiesté

non seulement l'Euesché, mais aussi l'honneur de la proposition, & la grace de l'expédition. Quant à vous, Monseigneur, ie recognois aussi la bonne part qu'après sa Maiesté vous auez en tous les biens & honneurs que i'ay receus de sa Maiesté, pour m'auoir dès le commencement dépeint au Roy, non pour plus fidelle & deuot, mais bien pour plus habile seruiteur & subiect que ie ne suis. Monseigneur le Cardinal Bandini desire grandement que l'affaire de la deliurance du sieur Mario son frere soit ramenteuë au Roy, & dit que s'il ne la peut impetrer par l'intercession d'autrui, il ira en France la solliciter luy mesme, tant il a la chose à cœur, en quoy sa charité fraternelle est fort à estimer, & merite faueur. A tant, &c. Monseigneur, &c. De Rome, ce dixseptiesme Septembre 1596.

## A MONSIEVR DE VILLEROY.

## LXXIII.

**M**ONSEIGNEVR, Cette lettre sera toute sur la ratification que le Roy a à faire, dont nostre S. Pere me parla en l'audience que i'eus de sa Sainteté le Vendredy sixiesme iour de ce mois; me disant, après m'auoir commandé de n'en dire rien à personne, que lors que Monsieur le Legat partit d'icy, il luy baillauit forme de ladite ratification, dans laquelle auoit esté insérée l'abiuration, & autres actes appartenans à l'absolution, laquelle forme auoit esté refusée par de là, pour des choses que i'auois escrites d'icy au contraire, & qu'il estoit bien marry que lors qu'il pensoit receuoir l'instrument de la ratification, il auoit eu la nouuelle du refus: & ne voudroit pour chose du monde que les Espagnols le sceussent: & pour ce m'ordonnoit derechef de n'en rien dire à personne. Je luy respondis que ie n'en dirois rien: & au demeurant que i'estois marry de ce que la ratification n'estoit ia faicte, & m'assurois qu'il n'auoit tenu au Roy qu'elle ne fust faicte, pour autant qu'outre l'assurance que i'auois de la parole & foy de sa Maiesté, ie scauois que plus de quatre mois auant que Monsieur le Legat arriuaist près d'elle, les lettres patentes de la ratification auoient esté dressées, & eussent esté portées à sa Sainteté par le sieur Desbene, sans les empeschemens qui luy auoient esté dits & redits autres fois: Que ie ne m'emuerellois point que l'on n'eust voulu par de là que l'abiuration fut insérée dans la ratification, ains m'esbahissois que d'icy on eust requis telle chose, attendu que lors que Monsieur d'Eureux & moy traitions du point de la ratification avec Messieurs les Cardinaux Toletto & Aldobrandin, nous demeurâmes d'accord que l'abiuration n'y seroit point insérée: & sur cela ie priay sa Sainteté de se vouloir ressouuenir, comme les choses s'estoient passées pour ce regard; & luy rednifisen memoire que la premiere fois qu'on nous proposa de sa part l'article concernant la ratification que le Roy auroit à faire, on

auoit mis que le Roy ratifiant, abiureroit de nouveau entre les mains du Legat, ou du Nonce, ou d'autre Ministre Apostolique, & nous requis-  
mes que cela fust osté, attendu qu'il auoit abiuré en personne à saint Denys, en la presence de plusieurs milliers d'hommes & qu'on vouloit encorés  
que nous abiurassions icy en son nom publiquement, & que tant d'abiura-  
tions pourroient faire venir à desdain & contre-cœur vn acte de soy  
bon & saint, & pour vne fois necessaire; Que cela doncques estant osté  
à nostre requeste, on nous proposa pour la seconde fois ledit article tou-  
chant la ratification, & nous suppliasmes que cela fust encore osté d'autant  
que selon le stile de France la ratification auroit à se faire par lettres pa-  
tenes du Roy, qui ne s'escriuoient en autre langue que François, & que  
d'insérer en des lettres escrites en François vn acte en Latin fort long, & de  
matiere de soy ennuyeuse, & aucunement honteuse, seroit chose mal-ai-  
lee à impetrer, & presque impossible; ouure qu'il n'en estoit point  
de besoin, se pouuant la ratification faire suffisamment sans cela; à quoy  
ont eue encorés égard, & furent aussi ostées ces paroles, & ledit article con-  
geu en la façon qu'il se trouue inséré dans la bulle, où il est dit que sa Ma-  
iesté ratifiera suffisamment & legitiment; Que ie confessois auoir escrit  
cela mesme en France, comme i'estois tenu de rendre compte au Roy de  
ce qui s'estoit passé par delà en son affaire. Apres que i'eus ainsi ramentu  
à sa Sainteté tout ce que dessus, (à quoy il ne repliqua rien, cognossant  
tacitement que ie luy disois la verité) i'adioustay que si on se fust aduisé de  
me dire quelque chose de la forme de la ratification qu'on vouloit en-  
uoyer, ie leur eusse rememoré ce que dessus, & dit à peu près ce qui pour-  
roit estre admis ou refusé par delà, où l'on procedoit plus simplement,  
sans vser de tant de formalitez comme l'on faisoit icy; Que ie m'asseurois  
qu'en la ratification, ny en aucune autre chose, le Roy ne refuseroit rien de  
ce qui seroit essentiel, & qui importeroit à la verité d'icelle; Que ce se-  
roit aussi chose digne de la sapience & bonté de sa Sainteté d'escire à son  
Legat, tant pour le regard de la ratification, que pour toutes autres choses  
à l'aduenir, qu'il se contentast de la substance & realité des choses, sans s'ar-  
rester à des formalitez qui ne sont necessaires, & cependant donnent plus  
de peine, & apportent plus de desgoust à ceux avec qui l'on a à faire, que  
les choses mesmes. Alors le Pape me dit que ie dressasse l'acte de la rati-  
fication, de la façon que ie penserois qu'elle seroit acceptée par delà. Je  
luy dis que ie le ferois très-volontiers pour luy obeyr; & par forme d'aduis,  
ne pouuant au reste plus rien promettre, tant pour ce que ie n'estois qu'un  
des deux que nous étions, qu'aussi pource que le pouuoir de l'un & de l'autre  
estoit desia expiré. Esincontinent que ie fus au logis, ie prins auant  
moy les choses l'article concernant la ratification, & le transcriuis de mot à  
mot au commencement comme il estoit couché dans la Bulle & puis sui-  
uant ledit article minutay les clauses de la ratification qui me semblerent  
estre essentielles, & suffisantes tant pour le Pape que pour le Roy, & les mis  
en Latin afin qu'elles fussent entendues icy; & en François comme ie pen-  
sois qu'elles pourroient estre couchées par delà à peu près (sauf tousiours  
le stile qui a accoustumé d'estre gardé en Cour, auquel vous accommode-



rez le tout.) Le lendemain au matin Samedi septiesme iour de ce mois, ie portay cette miéne minute, tant en François qu'en Latin, à Monsieur le Cardinal Aldobrandin, & luy dis que quand il iroit de tout le patrimoine de saint Pierre, i'estimerois qu'une telle ratification suffiroit, luy ayant premierement ramentu comme les choses s'estoient passees, lors que nous arrestasmes ledit article de la ratification, ainsi que ie l'auois dit au Pape le iour auparauant. A quoy il ne me replica non plus que le Pape auoit fait, & me dit seulement qu'il feroit voir ladite minute au Pape, & puis m'aduertiroit de ce que sa Sainteté luy auroit dit. Trois iours apres, à sçauoir le Mercredi 10. iour de ce mois, le sieur Cosme Angelio Assesseur del'Inquisition, qui dressa tous les actes qui furent faits en l'absolution du Roy, vint vers moy, & me dit que sa Sainteté auidit veu la minute que i'auois faite, & sur icelle en auoit fait dresser vne autre, qui ne contenoit que cela mesme, mais estoit vn peu plus selon le stile de Rome, & pour donner plus grand contentement à sa Sainteté, qu'il desiroit que ie la visse, & en disse mon aduis; afin que toutes difficultez ostées, la chose passast par delà le plus doucement, & le plus promptement qu'il seroit possible. Je luy dis ce que i'auois dit au Pape mesme, que comme Procureur ie n'y pouuois rien faire, mais par forme d'aduis ie disois ce qu'il m'en sembleroit; ayant leu ensemble ledit sieur Cosme & moy par trois fois ceste seconde minute qu'il auoit portee avec soy, ie luy dis qu'il me sembloit qu'il y auoit des choses à quoy l'article de la ratification contenu en la Bulle n'obligeoit point le Roy: toutesfois ie pensois que sa Majesté s'arresteroit à peu de chose, & la pourroit passer de ceste façon, pourueu qu'on en ostant certains mots que ie luy cottay. Il me dit qu'il croyoit que sa Sainteté trouueroit bon que ces mots fussent ostés, & ainsi s'en alla, remportant avec soy ladite minute qu'il m'auoit apportee; & le lendemain Mercredi vnziésme il m'en entoya vne copie sans lesdits mots que i'auois dit qu'on denoit oster, avec vn petit mot de lettre par lequel il me prioit de la mettre en François, & puis donner coppie de ma traduction à Monsieur le Cardinal Aldobrandin, afin que se trouuant que mon François s'accordast avec leur Latin, nous enuoyassions copie de l'un & de l'autre, à sçauoir eux à Monsieur le Legat, & moy au Roy. Je la traduisis doneques en François, & portay ma traduction audit sieur Cardinal, qui me dit qu'il la montreroit au Pape. Vous aurez avec la presente la minute que ie dressay par commandement de sa Sainteté, & celle que sa Sainteté a fait faire depuis, & dont i'ay fait oster certains mots, & aurez l'une & l'autre tant en Latin qu'en François; & si entre-cy & le parlement du courier on me recherche de quelqu'autre chose touchant cecy, ie vous l'escriiray au pied de cette lettre. Cependant ie vous diray briuelement ce qu'il me semble de cette minute que le Pape a fait dresser apres la mienne. Premierement le narratif ne contient rien qui à mon aduis ne se doive passer aisément, estant vray, court, & simple, au lieu que vous leur en eussiez fait vn plus beau, & plus honorable, comme aussi en ma minute ie l'auois laissé en blanc à ceste fin: Quant au dispositif, ie vois bien que les choses y sont non seulement plus particulièrement specifiees ( en quoy n'y a aucun mal, )

mal,) mais aussi qu'on a voulu gagner en quelque chose de plus qu'il n'y avoit en la mienne. Le gain est en ce que l'on fait que le Roy non seulement ratifie ce que ses Procureurs ont fait, & accepté en son nom, (ce qui est le propre d'une ratification) mais aussi qu'il approuve le decret que le Pape fit sur l'absolution de sa Majesté, & l'absolution mesme que sa Sainteté luy donna; & cecy à mon avis ils le font pour la clause d'annulation de l'absolution donnée à saint Denys, laquelle clause est au decret, & pour le mot; *PEINES ECCLESIASTIQUES*, qui est tant au decret qu'en l'absolution. Mais outre que le Roy ne seroit tenu pour absous s'il refusoit d'accepter le decret par lequel le Pape declara que sa Majesté devoit estre absous, ny pareillement, & en plus forts termes, s'il refusoit d'accepter l'absolution, l'acceptation que sa Majesté fera dudit decret & absolution, s'entendra en tant que ledit decret & absolution sont conformes à la demande faite par ses Procureurs, & en vertu de sa procuration.

Davantage vous aurez veu avec les memoires qui vous furent envoyées avec la bulle de l'absolution, (auxquels ie me remettray, pour ne faire cette cy plus longue) que le Roy gagne plustost qu'il ne perd en ladite annulation, puis que tous les actes de religion faits en consequence de l'absolution donnée à saint Denys, qui ne pourroient estre faits au Roy, ny par le Roy, si on que luy estant absous, sont par le Pape validez, tout ainsi que si dès lors sa Majesté eust esté absous par sa Sainteté mesme; & quant à ce mot *PEINES ECCLESIASTIQUES*, il est amplement & clairement démontré esdits memoires qu'il n'y a aucun mal, ains plusieurs biens pour le Roy & pour le Royaume, & que le Pape fist plus pour nous que pour soy de l'y mettre: & partant Monsieur d'Eureux & moy fîmes tres-vtilement de coniuier, & fermer les yeux à ladite annulation: & audit mot *PEINES ECCLESIASTIQUES*, iajoit qu'on nous proposast les choses routes esté duës au long & de mot à mot. Aussi croy-ie que le Roy en ce brief & petit sommaire qu'on luy propose: doit & peut beaucoup plus aisément môstrer de ne s'appercevoir de l'intention du Pape, & mesmes que si on vouloit oncquess'è prenaïr à l'aduenir, sa Majesté & tout autre Roy son successeur pourroit interpreter son acceptation en la façon que j'ay dit cy dessus, à sçavoir en tât que l'absolution & le decret sont conformes à la demâde: & dire de plus, que sa Majesté a entendu ratifier de bonne foy & d'un franc cœur tout ce à quoy il estoit tenu, touchant l'article de la ratification accordé par ses Procureurs, avec les autres articles; & pour contenter le Pape auquel il estoit tant obligé, n'a trop scrupuleusement voulu peser chacun mot, & chaque syllabe; mais au reste n'a jamais pësé à telles subtilitez qu'on voudroit mettre en auât ny en intention d'approuver telle consequence qu'on voudroit tirer de sa franche & reale procedure. Cependant tant plus le Roy ratifiera à present au gré du Pape, en ce qui se peut dissimuler, tant plus il assurera son absolution & ses affaires, & le bon nom qu'il a acquis en ceste Cour; à laquelle quand il auroit donné toutes ces satisfactions du monde en toutes autres choses, il n'auroit rien fait s'il manquoit en ce qui appartient à la ratification, qui est la principale de toutes choses, & laquelle ils ont tât à cœur qu'ils ne s'apperçoivent pas qu'en certaine façon ils se font quelque tort à eux-mesmes, de demander que le Roy ratifie & approuve le decret que le

Pape a fait, & l'absolution que sa Sainteté luy a donnée, choses émanées de l'autorité du Pape comme supérieur au spirituel, & non par luy faites au nom du Roy, qui en cet affaire spirituel estoit inférieur & penitent, ce qui pourroit encores vn iour estre allegué avec ce que dessus, pour monstrier que le Roy n'a deu penser que le Pape ait voulu, ny entendu telle chose. En somme, puis que les Procureurs ont sinon expressément, au moins tacitement accepté la bulle de l'absolution en toutes ses parties ainsi qu'elle est, & qu'en toute ladite Bulle à la bien prendre, n'y a rien qui touche au temporel le Roy, ny la Couronne; & qu'en toutes façons qu'on la voudroit prendre, il ne résulte aucun mal, ains plusieurs biens pour la sécurité de l'Estat, & de la personne du Roy, & de sa prospérité, & que, comme dit est, l'acceptation du decret, & de l'absolution est nécessaire, si le Roy veut estre tenu pour absous, & pour recevoir vne bonne & equitable interpretation & limitation en tant que ledit decret, & absolution se rapportent & conuiennent à la demande faite par ses Procureurs, ie ne voy point que le Roy se preiudicie, en ratifiant de la façon que le Pape desire par ceste seconde minute, que sa Sainteté m'a fait voir, corriger, & traduire: ains me semble qu'outre que sa Maesté donnera ce contentement à sa Sainteté, elle oste toute matiere de calomnie à ses ennemis, & fait beaucoup pour sa sécurité, pour la tranquillité de son Royaume, & pour sa lignee, s'il plaist à Dieu luy en donner. Vous assurant que si lors que Monsieur d'Eureux & moy demeurâmes d'accord avec les Deputez du Pape des articles contenues en la bulle, sa Sainteté se fut apperceuë de nous faire convenir encores de la forme de la ratification, ie n'eusse pour mon regard fait difficulté de la passer de la façon que ceste-cy est couchée; & à present serois tant plus d'avis que sa Maesté la passast, qu'il pourra estre que desdits articles il y en aura qui ne se pourront executer, ny de la façon qu'on desiroit, comme par maniere d'exemple celuy du Concile de Trente; & qu'il importe à la reputation du Roy & au bien de ses affaires, que dès maintenant en ce qui dépend de sa seule volonté, comme est la ratification, il monstre sa bonne foy, & sa promptitude, & pouruoye à ce qu'à l'aduenir, si tout ne se peut executer comme l'on voudroit, on n'en puisse soupçonner aucun defaut de bonne volonté en luy, qui aura ratifié, & fait toutes autres choses qui dépendent de luy seul en la façon que le Pape aura voulu. Ils auoient mis à la fin de leur minute des témoins en blanc, comme font les Notaires, mais ie leur ay dit que comme les Papes ne mettent point de témoins en leurs bulles, aussi ne font nos Roys en leurs lettres patentes, & ay rayé cet endroit de leur minute. A tant, &c. Monseigneur, &c. De Rome, ce 18. de Septembre 1596.

## A MONSIEUR DE VILLEROY.

## LXXIV.

**M**ONSEIGNEUR, Hier au soir le seigneur Ferdinando Vinta Secrétaire du grand Duc me vinttrouuer, & me dit qu'il venoit de receuoir vne despêche dudit grand Duc par homme aposté, en laquelle y auoit vne lettre à luy de son Altesse, & vne minute de lettre de son Altesse à Monsieur de Guise, lesquelles ledit sieur de Vinta me monstra.

Ladite minute contenoit aduertissement d'un dessein que le Prince Doria & les Espagnols ont sur le port & isles d'iteres en Provence, & des moyens que mondit sieur de Guise deuoit tenir pour y obuier. Par la lettre qui s'adressoit audit sieur Vinta, ledit seigneur grand Duc escriuoit, qu'après auoir minuté ladite lettre adressante à Monsieur de Guise, il auoit aduisé pour plusieurs considerations, qu'il seroit meilleur que ce fust moy qui escriuisse ledit aduertissement à mondit sieur de Guise, que non pas luy, & que ie l'escriuisse comme de moy-mesme; & comme l'ayant sceu icy à Rome; & partant queluy Vinta me laissast ledit memoire, pour en prendre ce qu'il me plairoit, & escrire là dessus à mondit sieur de Guise, & puis qu'il se fust rendre par moy ledit memoire, & de plus qu'il me chargeast de la part de son Altesse de n'en dire rien à personne, & d'expedier incontinent Courier exprés tant vers Monsieur de Guise, que vers le Roy, pour les aduertir au plus tost de tout ce que dessus. Je remerciay son Altesse en la personne de son Secrétaire, & dis que i'escrirois tant à Monsieur de Guise qu'à sa Maiesté, & que ie ne luy dirois point de qui ie tenois l'aduis, mais qu'au Roy i'estois de serment de ne luy dire iamais vne chose pour l'autre; aussi ne voyois ie pas que son Altesse par la lettre qu'il escriuoit à son dit Secrétaire, voulust que ie le celasse à sa Maiesté: mais que i'estimois qu'il ne seroit point besoin d'enuoyer Courier exprés; pour ce que quant à Monsieur de Guise, auquel nous le deuons faire sçauoir au plus tost, pour estre sur les lieux & y donner ordre, il se presentoit vne occasion seure, plus secrette & plus prompte que ne seroit d'un Courier exprés, d'autant que dans deux iours dequy partir vn gentilhomme Arragonois Camerier secret du Pape, que sa Sainteté enuoyoit en Espagne pour lequel ledit Sainteté auoit demandé vn passe-port, & deux lettres de recommandation, l'une à Monsieur de Guise, & l'autre aux Consuls de Marseille, auquel Camerier ie bailloerois par mesme moyen la lettre que i'escriuois à Monsieur de Guise touchant ledit aduertissement. Quant au Roy, que i'enuoyerois mon pacquet à Genes, afin que de là à la premiere commodité il fut enuoyé à Lyon, d'où il seroit enuoyé à sa Maiesté. Incontinent que ledit Secrétaire fust party d'avec moy, ie me mis à faire ladite lettre à Monsieur de Guise, de laquelle vous aurez copie avec la presente, & en icelle verrez toutes choses, sans qu'il soit besoin que ie vous en dise icy autre chose.

Je n'ay peu ny deu faire de moins, que d'obeyr audit seigneur grand Duc.

Bb 2.

en escriuant, pour plusieurs respects. Au demeurant vous conseillerez là dessus au Roy ce que vous iugerez estre à propos & sa Majesté se resoudra à ce qu'elle estimera le meilleur. Je feray desdites lettres comme i'ay dict cy dessus, au reste ie n'ay autre chose à adiouter, sinon qu'estant retourné voir ledit sieur Secretaire, ie luy ay monstré ce que i'auois escrit à Monsieur de Guise, & l'ay prié de rechef de remercier son Altesse, & luy rescrire de ma part que i'esperois toutes bonnes choses du bon cœur de Monsieur de Guise : mais que ie craignois que les moyens de fournir aux frais ne luy defaillissent, & partant si son Altesse le vouloit accommoder pour faire ce qu'il conseilloit, il seroit le bien entier, & on luy auroit la totale obligation. A tant, &c. Monseigneur, &c. De Rome, ce vingt-quatriesme Septembre mil cinq cens nonante six,

LETTRE ESCRITE A MONSIEVR DE  
GVISE, DE LAQUELLE EST FAICT MEN-  
TION EN LA PRECEDENTE.

LXXV.

**M**ONSEIGNEVR, Si ie n'eusse trouué la commodité de ce gentil-homme qui s'en va en diligence, & doit passer vers vous, il eust fallu que ie vous eusse enuoyé vn courrier exprés, pour vous aduertir d'une chose qui importe au seruice du Roy, & au bien du Royaume, & particulièrement au repos de la Prouence, & à vostre reputation & grandeur. Il y a long-temps qu'il s'est dit que les Espagnols vouloient s'emparer du port & isles d'Ieres, & y faire vne forteresse, & la bien munir de toutes choses necessaires pour de là infester toute la Prouence, & espier les occasions d'auoir vn iour Marseille qu'ils couuoient si fort, & qu'ils ont n'aguères pensé tenir en leurs mains, de laquelle (sans vous Monseigneur) ils seroient auourd'huy les maîtres ; mais ie viens à present d'en auoir la certitude de si bon lieu qu'il n'en faut plus douter. Le Prince Doria fist ce dessein de s'emparer du port & isles d'Ieres tout aussi-tost que vous eustes chassé son fils, & ses galeres & gens de ladite ville de Marseille ; tant pour reparer la honte qu'il venoit de recevoir, que pour se vanger de vous & de tous ceux qui vous auoient seruy, ou qui y auoient pris plaisir : & ayant enuoyé vers le Roy d'Espagne pour luy proposer cette entreprise, vn certain Quinones qu'il auoit tenu à Marseille ; ledit Roy non seulement approuua, mais aussi commanda ladite entreprise, donnant des moyens, & toute autorité pour ce regard audit Doria, lequel a ia fait faire à Genes de l'artillerie, qu'il veut mettre en la forteresse qu'il desseigne de faire aux isles susdites, si forte, si capable, si bien munie, que les François ne puissent iamais, & n'osent pas mesme entreprendre de la forcer. Or il n'a guères plus à demeurer es quartiers de la Sicile où il est, & vray semblablement il en partira enuiron la my-October, ou possible plustost, estant

L'armée Turquesque de mer si foible qu'elle sera contrainte de se retirer de bonne heure ; & ledit Doria n'ayant pour le iourd'huy autre penſement plus grand que de s'en retourner à Genes au pluſtoſt, & s'aller emparer du dit port & iſles d'Ieres , & y baſtir ladite forterreſſe : à quoy il pourra vacquer tant plus librement , maintenant que l'armée de mer d'Angleterre s'eſtant dé-ià retirée de la coſte d'Eſpagne , & ayant deliuré les Eſpagnols de la peur qu'ils en auoient , il ne ſera plus beſoin qu'il aille avec ſes galeres en Eſpagne, comme quelques vns auoient dit qu'il pourroit faire.

Son deſſein eſt, comme on a découuert , de s'en venir avec trente ou quarante galeres, & avec trois ou pour le moins deux mille ſoldats ; & d'arriuee occuper le port deſdites iſles ( à quoy il ne penſe deuoir trouuer aucune reſiſtance, ou bien petite ) & ſe ſeruir des forçats pour le baſtiment de ledite forterreſſe. Vous iugerez par voſtre prudence, Monſieur, de quelle importance ſeroit de laiſſer perdre ledit port & iſles d'Ieres, & y ſouffrir baſtir par les Eſpagnols vne telle forterreſſe, qui bride-roit & vexeroit continuellement la Prouence, & la France ; & ſeruiroit d'occaſion & de moyen de ſurprendre & voir forcer avec le temps Tholon, Marſeille, & toutes les meilleures places de ceſte coſte là ; choſe qui ne ſeroit pas moins contre voſtre reputation & grandeur, que contre le ſeruice du Roy, & contre la liberté, ſeureté, & repos de la Prouence, & dignité & authorité de la Couronne ; comme auſſi en l'empeschant, vous comble-rez l'honneur & gloire que vous y auez acquiſe, aſſurez la ville de Marſeille, que vous auez recouuree & reduite en l'obeiſſance du Roy, & la paix & le repos que vous auez eſtably en toute la Prouence. Quant à ce qu'il eſt beſoin de faire pour empeschier le deſſein dudit Doria & les Eſpagnols, vous le ſçauriez trop mieux aduiſer que nul autre, & ſeroit preſomption à moy d'en vouloir parler, & meſme d'autant que ce n'eſt point de ma profeſſion : mais ie penſerois auſſi faire contre mon deuoir, ſi ie ne vous recitois & expoſois fidellement ce que m'en a dit & diſcoursu celui qui m'a aduertie de ce que deſſus ; lequel eſt perſonnage de grande qualité, qui ſçait tres bien la verité dudit deſſein, & tres-affectonné au ſeruice du Roy, & au bien de la France, & s'entend tres-bien au fait de la guerre, comme c'eſt auſſi ſa profeſſion : au reſte il ne vous peut de rien nuire d'entendre l'aduiſ d'un tel perſonnage. Il iugera doncques eſtre à propos que vous, Monſieur, preuinſſiez ledit Doria, & fiſſiez iuſtement, & avec preuoyance, ce qu'il veut faire iniuſtement, & avec malice, que vous munifiſſiez bien le port, & fiſſiez en grande diligence baſtir eſdites iſles vn ou deux forts, ſelon que vous iugerez eſtre beſoin pour la ſeureté deſdites iſles, & que la ſituation des lieux le pourra comporter. Pour ce faire il penſe que vous deurez incontinent faire leuee de trois ou quatre mille pionniers, & de deux mille ſoldats, & faire prouiſion d'artillerie, de feux artificiels, de corſelets, & piques, ſans monſtrer que ceſte prouiſion ſe faiſe pour ledit port & iſles d'Ieres, ains ſuppoſer quelque autre cauſe & deſſein que vous aduiſerez, afin de ne donner occaſion audit Doria d'y aller plus fort qu'il ne ſera ſ'il penſe vous prendre à l'impourueu ; & quand vous aurez vos choſes preſtes & en ordre, & vous en aller ſoudainement audit

port ou isles d'Ieres, & y faire bien munir ledit port, & faire bastir ledit fort, ou forts, en y faisant travailler diligemment & incessamment, pour les mettre en defense au plustost que faire se pourra; & n'en bougeant vous mesmes que ledit fort, ou forts ne soient acheuez, pour ce que sans vous il a opinion qu'il ne s'y fera rien, tost, ny bien, mais que vous y estant tout s'y fera bien, & à temps. Et afin que ledit Doria n'en puisse rien decouvrir, & qu'il meine tant moins de gens, il estime que pour vn mois vous devez tenir les passages fermez, tant par mer que par terre, pendant que vous ferez travailler ausdits forts; ce que i'estime neantmoins estre fort difficile. Quand la forteresse sera faite y mettre vn bon Capitaine experienté, sage, fidelle, vaillant, d'autorité & reputation, & des soldats vieux & patriens, & de l'artillere assez, & lesdits feux artificiels, corselets & piques sur tout pourvoir à ce que les galeres dudit Doria arrivans là, ne puissent entrer au port, auquel cas elles seront contraintes de s'en retourner bien tost, sans s'opiniâster à combattre, & forcer ledit port, estant la saison la fort avancée, & elles ne pouans estre longuement à la mercy de la mer, & n'ayant aucun port amy que fort loing de là. Quand ceste premiere impetuosité dudit Doria sera par vous surmontée, il croit que l'hiver venu vous pourrez diminuer la garnison & les frais, & au Printemps la renforcer, selon que vous verrez estre à faire, & selon les aduis que vous receurez cependant, & mesmement que vous ayant en vostre faveur la terre ferme qui est fort près, vous en pourrez tirer promptement toutes commoditez pour la securité & conservation de la forteresse que vous aurez fait bastir, & dudit port & isles. Aussi pense-t'il que ce soit le pays de Prouence qui à vostre exhortation doive payer ladite garnison, & contribuer à la depense qu'il faudra faire en tout ce que dessus, puis qu'il y va de leur liberté, securité, & repos; autrement il faudroit dire que Dieu leur auroit osté le sens, & les vouldroit tous ruiner & perdre. Il a encores opinion, que quand vous aurez fait faire ladite forteresse, vous pourrez faire habiter & cultiver lesdites isles, & qu'il s'en pourroit retirer vn bon & gros revenu; & qu'on y pourroit mettre quelque dace qui suffiroit, ou aideroit à payer la garnison necessaire, comme les Espagnols ne feroient pas si leur dessein leur reüssoit. En somme il dit qu'en faisant ce que dessus la ville de Marseille, & toute la Prouence demeurera assurée pour iamais; & si cela ne s'y fait, vous y aurez perdu tout ce que vous y avez fait & mis iusques icy. Quant à moy, non seulement ie ne m'excuse point de ne vous avoir escrit, mais ie penserois estre grandement coupable si j'y auois failliy, ne me souciant pas mesme, là où il y va de tant de tomber en quelque indiscretion en parlant hors des choses de ma profession, pourueu que ie serue de quelque chose au Roy & au Royaume & à vostre susdite grandeur & reputation. Atant, &c. Monsieur, &c. De Rome, ce 24. Septembre 1596.

## A MONSIEUR DE VILLEROY.

## LXXVI.

MONSIEUR, La dépesche qu'il vous plut me faire de Monceaux le dixiesme, vnziesme, & douziesme Septembre, me fut renduë le premier de ce mois par l'ordinaire de Lyon. Elle contient plusieurs chefs que j'ay bien notez, & que j'ay esté tres-aise de sçavoir, & dont ie me suis déjà seruy, & me serviray encores cy apres pour le seruice du Roy: mais ie n'ay qu'à respondre à certaine partie, pour ce que j'y ay satisfait par mes lettres precedentes. Premièrement doncques, quant aux lettres dont vous me parlés tout au commencement, j'ay receules vostres que vous m'y cottes, comme vous aurez veu les miennes des mois d'Aoust & Septembre. Quant à ce que vous m'en receuez si souuent d'icy comme de Venise, la cause en est que l'ordinaire de Venise n'a laissé pour les troubles passés de garder ses interualles & sa forme ancienne d'aller & de venir de Lyon à Venise, & de Venise à Lyon de quinze en quinze iours; mais l'ordinaire de Rome, qui auant les troubles obseruoit les mesmes termes & la mesme distance que celui de Venise, n'a pendant lesdits troubles peu aller & venir d'icy à Lyon que de mois en mois, pour ce que cessans icy les expéditions des matieres de France, les courriers ne pouuoient en si peu de temps que de quinze iours, trouuer à porter pour fournir aux frais qu'il leur falloit faire en leur voyage: encores n'eussent-ils sceu aller de mois en mois, n'eust esté qu'ils portoiert l'ordinaire d'Espagne, qui ne va & ne viét que de mois en mois: tellement qu'à Rome, aussi bien qu'en plusieurs lieux de France, il a fallu que les pauures François ayent pour ce regard dansé au son & à la mesure des Espagnols. Ie m'attens bien qu'estant venu Monsieur de Luxembourg, & le cours des expéditions de France ayant repris, comme il fait, sa route ancienne, il s'y establira vn Maistre des courriers de France, que Sixte V. osta, & que lesdits courriers iront & viendront tous les quinze iours: mais si pour les causes que vous m'escrivez, les courriers ont à faire désormais vn autre chemin que par le Piémont & Sauoye, il sera mal-aise qu'ils aillent & viennent en si peu de temps; ouure qu'il reste encores à sçavoir, si vous entendez que lesdits courriers changeans de chemin, aillent & viennent de Lyon icy, & d'icy à Lion, ou qu'au lieu de Lyon il soit destiné vn autre lieu, comme Paris ou autres. Si vous destinez vn autre lieu, vous abolissez cet ordinaire: car cet ordinaire de Lyon a esté institué & entretenu par les banquiers & marchands de Lyon & de Rome, sous l'autorité du Roy neantmoins, & excepté l'estat que le Roy souloit donner au Maistre des courriers, qui sont payez de leurs voyages sur les lettres & expéditions que lesdits Banquiers & Marchands leur baillent à porter, tant de Lyon à Rome, que de Rome à Lyon: de sorte qu'en prenant vne autre ville que Lyon, il faudroit que le Roy payast les voyages de tous les cour-



riers, si on ne trouuoit moyen d'instituer en cét autre lieu semblable ordinaire; ce qui seroit trop difficile, pour n'y estre la banque, ny autres telles occasions d'euoyer & receuoir tant de depesches comme à Lyon. Que Lyon demeure pour vn des bouts de ceste carriere, comme il a esté iusques icy, il faut trouuer vn autre chemin que le Piémont & la Sauoye pour aller & venir de Lyon icy, & d'icy à Lyon: nous le pourrons apprendre de ceux qui ont fort voyagé. De ma part ie n'en sçay pour ceste heure que d'vn costé, qui est s'embarquer à Genes, & aller surgir en l'vn des ports de Prouence. Mais outre que les voyages par mer sont fort incertains & Inégaux, on auroit à passer auprès du Prince Doria, & de Monsieur de Sauoye, ce qui seroit d'autant plut dangereux, que le partement du courrier, tant de Rome que de Lyo, ne se peut celer, & se sçauroit tousiours, de façon que le courrier pourroit facilement estre guetté, & pris au passage. De l'autre costé, ie ne sçay que le chemin par les Suisses, & par la Lorraine; sinon que l'on voulust que les courriers entraissent du pays des Suisses en la franche Comté, à la mercy de la neutralité; en laquelle pour ce regard i'estime qu'il ne seroit gueres bon se fier. Que si on trouuoit bon que les courriers pour aller à Lyon arrivassent iusques en Lorraine, on pourroit establir vers Langres, en tel lieu qu'on aduiserait, vn certain officier, qui auroit charge de prendre & enuoyer les paquets qui s'adresseroient à Paris, & le courrier passeroit outre vers Lyon avec ceux qui s'adresseroient audit Lyon, & le Maître des courriers d'icy separeroit des icy les paquets qui iroient à Paris, d'avec ceux qui iroient à Lyon, à fin qu'il y eust moins de retardement quand les courriers seroient arrivés audit lieu vers Langres. Cependant j'ay pensé ne deuoir rien dire au Pape pour ceste heure de ce que vous projettez par delà, sans attendre ce que vous en aurez ordonné, & ce qu'il me dira là dessus. Il y a long-temps que i'auois euy parler de ceste commodité que le Roy d'Espagne tire de nostre facilité, non seulement pour les paquets qu'il enuoye & reçoit des pays dont vous estes appertus, mais aussi de Genes, Milan, Rome, Naples, & Sicile, & non seulement pour ses autres affaires esdits endroits, mais aussi pour nous faire la guerre à nous-mesmes; & croyez vous en auoir escrit autrefois quelque chose. Auquel propos ie ioin-dray, que ce qu'on vous a dit de faire & armer certain nombre de galeres, me semble tres-bon en soy; & ie me suis plusieurs fois émerueillé de ce que nos anciens Roys en ont tenu si peu de compte, ayant vn si beau & si grand Royaume, flanqué de deux mers quasi tout de son long: là où ie vois que ces petits Princes d'Italie, encorés que la pluspart d'eux n'ayent qu'vn poulce de mer chacun, ont néanmoins chacun des galeres en son Arcenal naual. Vous sçavez comme le Roy d'Espagne, à cause mesmement de nos seditions & miseres, est auourd'hui tant pour le coq de la Chrestienté; nous auons encorés mieux senty, & sentons tous les iours, comme il nous est ennemy, & quelque paix on trefue qu'on se eust faire, il nous en voudra tousiours, & y aura tousiours de l'emulation & de la ialouse, & quelque chose à demesler entre ces deux Couronnes. Or la France a cét aduantage par sa situation naturelle, que le Roy d'Espagne ne peut aller ny enuoyer en aucun lieu de l'Europe, ny aussi ne peut-on aller ny enuoyer à luy d'aucun autre lieu de l'Europe sans passer la France, si c'est par terre, ou au-deuant, & à la veüe,

& à la mercy de la France, si c'est par mer, de sorte que si nous auions des vaisseaux de guerre pour l'une & l'autre mer nous luy pourrions empescher & rompre toute entreprise qu'il eust contre autrui, & aider à celles qu'on auroit contre luy, & empescher encores qu'il n'enuoyast à ses autres Estats qu'il a en l'Europe hors l'Espagne, & que desdits Estats en n'enuoyast aussi vers luy, au moins qu'il ne luy coustast dix pour vn: comme aussi pourrions nous luy aider & fauoriser en toute grande entreprise quand il s'addonneroit à bien faire, & qu'il nous plairoit. Par ainsi il seroit tres-bon que non seulement nous eussions des galeres sur la mer Mediterrance, mais aussi d'autres vaisseaux de guerre sur l'Ocean proportionnees à cette mer-là, quand ce ne seroit que pour le regard dudit Roy d'Espagne; outre que d'ailleurs cela tourneroit à profit, & commodité, à la seureté, grandeur, & reputation de la Couronne.

Or si pour dresser & entretenir lesdites galeres & autres vaisseaux & leur equipage, il faudra prèdre les frais sur le Clergé, c'est à vous par delà à voir ce que ledit Clergé pourra porter apres tant de calamitez qu'il a souffertes, que s'il le pent, ie trouue honnelle pour le regard des galeres qu'on voudroit faire à Marseille, le pretexte dont vous faites mention, de tenir ceste coste-là libre & nette des corsaires Turcs, qui l'infestent tous les ans; pour en le representant au Pape, obtenir de sa Sainteté la permission d'imposer pour cet effet certaine somme sur ledit Clergé; comme aussi trouue-je, que l'offre & promesse d'en seruir sa Sainteté, & le saint Siege aux occasions, seroit fort à propos; & si vous pouuez dire pour le regard des vaisseaux qu'il faudroit dresser & armer sur l'Ocean, que vous les employeriez contre les heretiques de ces quartiers là, ce seroit encore vn grand moyen pour l'obtenir icy; mais vous ne le pouuez pour cette heure ny faire ny dire: iacoit, que pour le regard des Pirates vous le puissiez & promettre & garder comme les Venitiens, quelque paix qu'ils ayent avec le Turc, ils ne souffrent point que les Turcs viennent courir sur la mer Adriatique. Et vous diray que c'est aduis qu'on vous a donné, a esté pris sur vne semblable concession qui fut faite par le Pape Pie quatriesme au Roy d'Espagne: car premierement ledit Roy d'Espagne en l'an 1560. au mois de Decembre, obtint faculté de leuer sur le Clergé d'Espagne la sòme de trois cents mille ducats par chacun an, pour le tẽps & espace de cinq ans, sauf à le proroger cy apres si bon sembloit: & ce pour armer cinquante galeres qui s'appelleroient du Clergé d'Espagne, & seroient employees seulement contre les infidelles & heretiques, & à la charge que ledit Roy dans deux ans dresseroit & armeroit à ses despens quatre vingt autres galeres, outre les susdites cinquante Ecclesiastiques: & puis en l'an mil cinq cents soixante deux au mois de Mars, ledit Roy obtint augmentation desdites galeres Ecclesiastiques, iusques au nombre de soixante, & dudit subside, iusques à la somme de quatre cẽs vingts mille ducats sur ledit Clergé, & diminution du nombre des galeres qu'il deuoit equipper & entretenir à ses despens, iusques au nombre de 40. seulement: de façon que lesdites galeres, tant siennes qu'Ecclesiastiques, fussent eues en tout. Mais comme cet exemple pourroit estre par vous allegué pour obtenir vne chose semblable, aussi la façon dont le Roy d'Espagne en a abusé pourroit detourner le Pape de l'accorder. Car le Roy d'Espa-

gne n'a depuis cette concession augmenté le nombre des galères qu'il auoit auparauant, & ses mers ont esté infestées plus des Turcs que iamaïs, & il a tousiours leué & leuera non seulement lesdits quatre cents vingt mille ducats par chacun an, mais encores iusques à la somme de cinq à six cens mille sous ce seul pretexte : outre que par autre concessions à luy faictes par les Papes, auparauant, & depuis cette-cy, il prend sur le Clergé trois millions de ducats d'or en or par chacun an, & n'y a Clergé en toute la Chrestienté plus greué, ny plus malcontent de son Prince que celuy d'Espagne. Pour cela doncques, & pour d'autres respects; le Pape se voudra monstrier plus difficile à vous accorder telle chose, mais quand il en aura entendu les raisons, & l'vtilité, & necessité, il se pourra aussi rendre: ioint qu'on luy offrirait de subir en cela toutes conditions honestes & raisonnables; & qu'il aymeroit mieux que les choses se fassent moderémēt & réglément sous son autorité, que non pas qu'à son refus on y procedast par autorité seculiere & temporelle. Cependant, si en ces beaux reglements que vous ferez en cette assemblée qui se doit tenir, le Roy aduisoit de soulager son peuple de quelques charges, il ne seroit possible pas mauuais de conuertir vne partie de ce soulagement, en l'armement & entretenemēt d'un nombre de galeres, pour quelques annees. Par ce moyen son peuple soulagé d'ailleurs porteroit plus volontiers cette charge, pour ce qu'elle auroit changé de nom & de nature, & ne seroit pour tousiours: & le Clergé puis apres voyant que le peuple en porteroit sa part, auroit tant moins d'excuse de refuser à en porter la sienne. C'est ce que ie puis vous dire pour cette heure sur ce propos; s'il me vient cy apres quelque chose de meilleur en l'esprit ie le vous escriray.

Quant au bruit qui auoit couru par delà que le Pape eut excommunié le Duc de Ferrare, il n'en est rien, ny mesme du pretexte qu'on alleguoit, & quand ie ne vous escriis rien de telles choses publiques, qu'un homme de ma sorte ne peut ignorer, vous pouuez croire qu'il n'en est rien. D'ailleurs le Pape ne va pas si viste, & auant qu'il eut lancé ses foudres, non seulement nous icy qui en sommes si prés, mais aussi en eussiez vous ouy le tonnerre, & veu les esclairs plusieurs iours & mois auparauant. Dumescōtétemēt que le Roy d'Espagne a du grand Duc, ie vous ay escrit par mes dernieres iusques où ie pensois qu'il s'estendit, & n'ay point changé d'aduis depuis, ains m'y suis confirmé de plus en plus; aussi le frere du grand Duc s'en retourne en Espagne au premier iour.

Quant à la déposition de frere Charles d'Auenes, i'eusse fait quelque difficulté d'en parler au Pape, & mesme au temps qu'il venoit de recevoir vostre ratification, & qu'il ne falloit luy troubler son aise: mais vous m'ayant escrit que l'on auoit aduisé par de là de faire voir la lettre à Monsieur le Legat, à fin de l'en faire iuge & tesmoin tout ensemble; ie me resolus non seulement de luy en parler, mais aussi de luy bailler ladite deposition traduite par moy de François en Italien, comme ie fis en l'audience que i'eus le Vendredy 4. de ce mois. Sa Sainteté en ce qui concernoit le sieur Maluaisie, n'y adiouta aucune foy, & dit que ce Prelat auoit tousiours incliné à la France, & eu intelligence avec Monsieur le Marquis de Pisani, & fait tous bons offices pour le Roy, & qu'il n'en pourroit monstrier les depesches. De ma part ie trouue des choses en cette disposition peu vray-sem-

blables, toutesfois il a couru vn tel temps, & le monde est si déguisé & si méchant, & corrompu que ie ne voudrois iustifier personne pour le regard du passé, ains serois d'aduis que le Roy se gardast plus que iamais pour l'aduenir, non seulement de ces deux assassins qui sont rommcez en ladite deposition, mais en general de toutes autres personnes non cogneuës, & de ce delateur mesme, qui sous couleur d'estre soigneux de la vie du Roy, & d'estre venu pour l'aduiser, pourroit luy mesme estre aposté pour y attêter. Il a vn habit suspect, sous lequel le feu Roy fut assassiné; il vient d'un lieu encores plus suspect; il broüille & mescle en son dire forces choses, qui ne s'entretiennent gueres bien en la pluspart, ou en tout: il confesse luy-mesme qu'on a eu telle fiance en luy dès le commencement, qu'on luy a fié la conspiration de tuer le Roy, & l'a ton choisi pour interprete & truchement de cette sainte & religieuse entreprise: ce qui ne peut-auoir esté fait, sans qu' auparauant on eut cogneu en luy des signes de tres-mauuaise volonté contre sa Majesté: joint que ce lieu dont il est, à ce qu'on peut coniecturer par son dire, doit estre vne pepiniere de tels assassins: aussi a-il pris, & employé quasi le mesme pretexte de parler au Roy, qu'il appelle mot du guet, qu'il dit auoir esté pris par Pierre Herfolle, & pourroit estre que son Pere Prouincial aye dit vray, que ledit Herfolle fut allé en Hollade, à scauoir pour tuer le Comte Maurice, ou en Angleterre pour tuer la Royne, (dequoy ie croy que vous auez donné aduis esdits lieux) & que cestuy eust esté enuoyé en France pour en faire de mesme au Roy. Ie ne serois pas d'aduis qu'on luy vst d'aucune rigueur, s'il n'estoit conuaincu tout à fait: car on ne trouueroit personne puis apres qui osast vous aller aduertir des vrayes entreprises qui pourroient auoir esté faites; mais ie ne voudrois pas aussi qu'on se fust en luy en sorte du monde: ains qu'on prist bien garde à luy, & qu'on apostast des personnes, pour obseruer tout ce qu'il fait, & avec qu'il frequente ou parle, comme vous entendés trop mieux qu'il faut faire. Ie remettray vne autrefois le Pape sur ce propos, apres qu'il aura veu & considéré la deposition, & verray s'il me vouldra dire quelque chose de plus pour le vous escrire.

Ie luy parlay aussi en l'audience du quatriesme de ce mois, du voyage que le Roy alloit faire à Roïen, & luy dis les causes que vous m'en escriuez, y adioustant que sa Maïesté, outre lesdites occasions, aimoit mieux pour le respect de Monsieur le Legat & du saint Siege, prendre la peine de faire ces trois ou quatre iournees de plus, que de souffrir que cet Ambassadeur d'Angleterre vint à Paris ou en autre lieu pres de là où estoit la persōne dudit Legat. Ie luy dis aussi la perplexité où vous nous trouueriez, sur ce que Monsieur le Legat auoit proposé de faire passer l'Euesque de Mantoue vers le Cardinal d'Autriche, pour scauoir ce que la Sainteté m'en diroit. Et me dit qu'il voyoit biē que vous aymeriez mieux qu'il enuoyast vn rout droir icy, sans le faire passer par la Frâce, & que possible s'y resoudroit il. Il y en a qui pensent que ce soit chose plus honorable, plus seure, & plus briefue, que la Sainteté fist traiter ce qu'elle veut pour ce regard avec le Roy d'Espagne mesme, que non pas avec ledit Cardinal d'Autriche, qui n'a possible pas tout le pouuoir qu'il faudroit, de ce qu'il auroit promis, le Roy d'Espagne n'en tiendrait que ce qu'il luy plairoit: outre

que ce qui traittera avec ledit Cardinal, se faisant comme aux yeux de la Royne d'Angleterre, & des Estats des Pays-bas, cause plus de jalousie & de soupçon. Vous y penserez de vostre costé, & l'en pourray dire vn mot à sa Sainteté. Au demeurant ledit Roy d'Espagne aenuoyé à distribuer en cette Cour pour enuiron vingt mille escus de pension ; à sçauoir à Messieurs les Cardinaux Aldobrandin & saint George neueux du Pape trois mille escus à chacun : au Seigneur Iean François Aldobrandin, quatre mille escus : mais nostre saint Pere ne veut point que les dessusdits en prennent riē, ny d'aucun autre Prince : au Cardinal Santiquattro neveu du Pape Innocent IX. deux mille escus, aux Cardinaux Gallo, Paraucino, & Piatta, mille escus à chacun : à l'Euesque de Pistoia, huit cēs escus : à l'Abbé Lipoman, cinq cēs escus : à l'Auditeur du Cardinal Lancelot, appelé Alexandre Gratien, frere d'Ottauio Gratien qui estoit porte-manteau du feu Roy, cent ou deux cēs escus. Le reste, qui sont enuiron quatre mille escus, on dit que l'Ambassadeur d'Espagne a commission de les distribuer à qui bon luy semblera pour le seruice de son maistre.

Erric Monsieur de Lorraine, Euesque de Verdun, vient d'arriuer en cette ville ; ie l'ay esté visiter en sō logis, en quoy i'ay eu plus d'égard à ce qu'il estoit frere d'vne douairiere, & cousin de Monsieur de Lorraine, & Euesque d'vne ville subiette au Roy & luy-mesme comme tel vassal du Roy, que non pas à ce qu'il estoit frere à Monsieur de Mercœur, qui n'a encorcs recogneu le Roy. Il m'a dit qu'il estoit tres-humble seruiteur du Roy, & qu'il n'estoit venu à Rome sans permission de sa Majesté, & qu'il auoit vn de ses freres Monsieur le Comte de Chaligny aupres d'elle. Outre le Marchand Allemand resident à Lyon, qui sert le Roy d'Espagne pour les paquets que ledit Roy enuoye en Flandre, & qu'il reçoit, i'ay esté aduertuy qu'vn marchand Geneuois appelé Spinola, resident à Lyon à la Iuifuerie près le Change, sert encorcs ledit Roy, non seulement pour Flandre, mais aussi pour Genes, Milan, Rome, Naples, Sicile, & Sardaigne, & à telles fois reçoit mesme, & enuoye des Courriers qui n'entrent point en Lyon, ausquels il enuoye des passe-ports de hors, & en somme fait à present pour le seruice du Roy d'Espagne tout ce que faisoit le vieux Balbani au temps que Lyon estoit pour la Ligue. On m'a dit de plus qu'Orlandini Maistre des courriers s'entend encorcs avec eux, & leur sert. Mais comme le croy dudit Spinola, aussi ne sçay-ie que croire dudit Orlandini. Je ne voudrois pas que mon dire luy preiudiciast, & sans ce que vous m'en auez mis en propos par vos lettres, ie ne vous en eusse point parlé du tout, estimant que ie ne pouuois sçauoir de telles choses rien que vous ne sceussiez trop mieux ; & l'autrefois que ie ne vous en escruiis en general, ie fis aussi sur autre occasion que i'en eus, & nom de mon propre mouuement. A tant, &c. Monseigneur, &c. De Rome ce 16. Octobre 1596.

## A MONSIEUR DE VILLEROY.

## LXXVII.

MONSIEUR, Comme par le precedent ordinaire ie vous es-  
criuis vne lettre à part touchant la ratification que le Roy auoit à  
faire, aussi maintenant, apres auoir hier respondu aux autres chefs de vostre  
lettre du vnziesme du mois de Septembre, ie respondray par cette-cy se-  
parément à celuy qui concerne ladite ratification. Vous m'escriuez le diffé-  
rent qu'il y auoit entre Monsieur le Legat d'un costé, & les Deputez du  
Roy d'autre, sur la forme de la ratification, & comme ledit sieur Legat ne  
voulant rien rabattre de sa premiere demande, vous estiez en fin condescen-  
dus à ce que la Bulleentiere de l'absolution fust inserée dans l'acte de la ra-  
tification: mais s'estant depuis ledit sieur Legat déclaré plus auant, de vou-  
loir encores que le procez qu'on auoit fait icy sans aucune participation de  
Monsieur d'Eureux & de moy y fust inseré, vous estiez resolu de n'en  
rien faire. Je demeuray fort esmerueillé des demandes de Monsieur le Legat,  
& encores de vostre facilité à consentir à ladite insertiō, par dessus l'article  
de la ratification qui vous régloit, & contre les conuentions que Monsieur  
d'Eureux & moy auons faites icy qu'il n'y en auroit point, & contre l'ad-  
uertissement exprés que ie vous en auois donné à temps par ma lettre du 16.  
Iuin. Ce neantmoins ie ne m'en mis point en peine, me souuenant que vous  
receuriez bien tost ma precedente depesche des 16. & 17. Septembre, &  
Monsieur le Legat aussi celuy du Pape de mesme temps, lesquelles vous met-  
toient d'accord à beaucoup meilleur marché pour vous. C'estoit le premier  
iour de ce mois que i'auois receu vostre lettre cōme ie vous ay dé-ià escrit  
par ma respōse d'hier, & leudy au soir troisieme de ce mois estant arriué vn  
courrier extraordinaire enuoyé par Monsieur le Legat, le bruit s'espādit in-  
continent par tout Rome que ce courrier auoit apporté la ratification en la  
forme que Monsieur le Legat auoit voulu. Je pensay à lors en moy-mesme,  
suivant ce que vous m'auiez escrit, que Monsieur le Legat se seroit contenté  
de l'insertion de la Bulle, sans celle du procez verbal: mais le lendemain Vé-  
dredy 4. moy estant allé à l'audience, le Pape me dit qu'il auoit receu la ra-  
tification, où estoit inseré ledit procez verbal ensemble avec la Bulle. L'en-  
fus fort estonné en mon interieur, sans toutesfois en mōstrer rien au dehors;  
& puis que la chose estoit faite, & qu'il n'y auoit plus de remede, ie fis de ne-  
cessité vertu, & dis à nostre S. Pere qu'à cela sa Saincteté pouuoit cognoi-  
stre combien estoit grande la bonté du Roy, & sa deuotiō vers le sainct Sie-  
ge, & vers la personne de sa Saincteté, puis que sçachant qu'il n'estoit tenu à  
aucunes de ces insertions, & en ayant esté aduertiy depuis n'agueres, il les  
auoit neantmoins soufferts pour complaire à sa Saincteté & à Monsieur le  
Legat: & que ie le suppliois de bien remarquer cette bonté & deuotion,  
& s'en souuenir quand les ennemis de sa Majesté vseroient à l'aduenir

de leurs calónies accoustumées auprès de sa Sainteté ; à quoy l'adionstoy que tant s'en falloit que sa Majesté fust pour s'en repentir quand elle auroit receu la dernière dépesche, qu'au contraire de tant moins sa Sainteté se vouloit contenter, tant plus aise seroit sa Majesté de luy en auoir plus donné. Je luy dis de plus, qu'il feroit ainsi désormais beau voir sa Sainteté & sa Majesté, faisant entr'eux à qui donneroit plus de satisfaction l'un à l'autre. Il me sembla que ie deuois ainsi parler d'une chose la faite, & desirer qu'on en aye parlé de mesme par delà apres que ma precedente dépesche y sera arrivée, puis que la demonstration de s'en repentir ne seruiroit que de diminuer le gré de ce qui a esté si liberalement donné. Aussi tant plus le Roy en a fait, tant plus il a donné de contentement au Pape & à toute ceste Cour, & tant plus se trouuent démentis ceux qui ont dit par cy-devant & ont voulu donner à croire qu'il ne ratifieroit point du tout.

Mais ie vous prie de me permettre icy de vous rendre cõpte pour ma décharge seulement ; & non à aucune autre fin, pourquoy j'estois d'autre aduis. Premièrement ie pensois qu'es choses si chatouilleuses qui importent à l'aüthorité & dignité, & mesmement d'un Roy & d'une Couronne, c'estoit assez de faire ce à quoy on estoit tenu. Or est-il que le Roy en ratifiant, n'estoit tenu sinon à ce à quoy l'obligeoit l'article de la ratification contenu dans la Bulle de l'absolution ; lequel article, comme un chacun des autres, fut fait & refait, contesté & débattu par plusieurs fois, & en fin accordé & arresté comme il est dans ladite Bulle, entre les Deputtez du Pape & du Roy apres plusieurs disputes, & nommément apres que les Deputtez de sa Sainteté se furent contétez que certains mots qu'ils y auoient mis par lesquels estoit porté que l'acte d'abiuration seroit inseré en la ratification, fussent rayez, comme ils les rayerent eux-mesmes. Je vous cõte l'acte d'abiuration, parce qu'ils ne parloient alors que de cettuy-là, & ne se soucioient point que les autres y fussent inseréz, & le Roy satisfaisoit au contenu dudit article, en declarant sans aucune insertion, qu'il ratifioit & approuuoit l'abiuration & detestation des heresies & erreurs, & la profession de la Religion Catholique & toutes & chacunes les autres choses faites & promises par ses deux Procureurs en l'affaire de son absolution, & qu'il acceptoit & receuoit les commandemens & penitences à luy enjointes, & en enuoyant, & faisant de faire configner au Pape & au saint Siege les lettres patentes de telle ratification & approbation, ainsi qu'il est porté par ledit article, & que ie l'auois dernièrement minuré sur le mesme article, lors que le Pape me commada d'en faire une minute, comme vous auez veu par ma precedente dépesche. Aussi le mot mesme, & l'effet de ratification ne s'estend plus outre qu'à ce que les procureurs ont accordé, fait & geré, promis, & accepté au nom du ratifiant. De façon que par cõvention faite avec le Pape, & par le droit commun, vous n'estiez pas tenus de laisser inferer en la ratification, ny la Bulle, ny aucune des parties d'icelle. Outre que pour eüiter telles insertions & pour contenter ceux qui en font instâce, lors mesme qu'ils en ont quelque iuste occasion, il y a le remede de tenir pour exprimees & inserées les choses que l'on demande estre escriptes au long de mot à mot, & i'en auois ainsi & se en madite minute pour le regard de la Bulle seulement, & le Pape s'en estoit contenté par

si minute qu'il fit faire apres la même, sans aucune insertion, non pas même des choses qui estoient dans ladite Bulle, bien que concertée & arrestée entre les Deputez de sa Sainteté & Monsieur d'Eureux & moy. Quant au proces verbal, qu'ils appellent icy l'instrument, ie n'eusse iamais pensé qu'il leur deust venir en l'esprit d'en demander l'insertion en la ratification, ny que vous y deussiez iamais condescendre. Car cét instrument fut par eux fait sans nous, comme il leur sembla bon pour leurs fins & intentions : & quand ils le firent ils ne pensoient pas seulement que nous le deussions iamais voir, tant s'en faut qu'ils pensassent lors à le faire inserer dans la ratification. Mais apres qu'ils nous eurent liuré la Bulle ( qui ne fut que six semaines apres l'absolution ) nous dismes que nous voulions auoir encores les actes que nous auions arrestez & signez avec les Deputez du Pape. Lesquels actes nous demandâmes pour en pouuoir tât mieux rendre compte au Roy, & pour y auoir recours vn iour si besoing estoit, & aussi à fin qu'il n'y fust ni varié. Et particulièrement nous les voulusmes auoir pour môstrer quâd besoin seroit, qu'endressant la Bulle de l'absolution ils auoient adiousté à l'article qui parle du Concile de Trente ces mots, *IN REGNO FRANCIE ET TUIS DOMINIIS*, qui n'estoiet point es articles signez par nous. Eux qui auoient déjà enfilé tous ces actes en cét instrument ; penserent que nous demandassions copie dudit instrument, & iugeans ne nous pouuoir honnestement refuser lescdits actes. que nous auions arrestez & accordez avec eux, nous donnerent en fin copie dudit instrument, apres plusieurs delais, refus, & remises. Quand Monsieur d'Eureux & moy l'eusmes veu, nous trouuâmes que ceste piece, iacoit qu'elle contint lescdits actes, estoit neantmoins cōtraire à certaines choses que nous auions expressément protestées & obtenues en traitât : mais quis que nous auions la Bulle en la forme que nous l'auions passée & accordee, & que Monsieur Delbene, qui deuoit apporter au Roy ladite Bulle, estoit prest à partir ( car on différa à nous bailler lescdits actes iusques à ce que ledit sieur Delbene fut sur le point de son parlement ) nous estimâmes ne deuoir point entrer en nouuelle contestation avec le Pape ny avec ses gens, pour vne chose qui ne faisoit aucune partie de nostre negotiation, qu'ils auoient fait entr'eux de la façon qu'il leur auoit plu, comme ils pouuoient en auoir fait, & en pourroient encore faire d'autres sans nous. Et pour cela même nous ne baillâmes point ledit instrument au dit sieur Delbene, & adioustâmes qu'il suffiroit que Monsieur d'Eureux le portast quand il s'en retourneroit.

Au reste de plusieurs choses qui nous déplurent en cét instrument, ie vous en coteray trois, La premiere qu'en cét instrument l'Inquisition y resonoit & retentissoit par tout. Car en nommant les six Cardinaux qui estoient de la Congregation de l'Inquisition, il leur bailloit expressément tant de fois la qualité d'Inquisiteurs generaux contre les heresies, aussi faisoit-il expresse mention des Confesseurs de l'Inquisition, & du Commissaire del'Inquisition & de son compagnon, & des autres Officiers de l'Inquisition qui auoient esté presens à la solemnité de l'absolution, & de l'Assesseur de l'Inquisition qui auoit esté employé à lire le Decret, & les mandemens & penitences eniointes au Roy par le Pape, & du Procureur fiscal de l'Inquisition qui auoit requis la confession dudit instru-



ment, & du Notaire de l'Inquisition qui l'auoit receu, & des tesmoings qu'il auoit auparauant qualifiez tous officiers de l'Inquisition, & en fin du sceau de ladite Inquisition, dont ledit instrument auoit esté seellé. En somme cét instrument estoit vn instrument tout de l'Inquisition. Il estoit encores fait métion expresse du Cardinal grand Penitencier, & des Penitenciers de S. Pierre qui auoient assisté à la solemnité. Or est-il qu'encores que ce Tribunal de l'Inquisition soit tressainct, tres-venerable, & tres-necessaire pour la conseruation de la foy & Religion Catholique, & que la Penitencerie soit aussi sainct, venerable, & necessaire pour le salut de nos ames, si est-ce que pour plusieurs bons respects l'intention de Monsieur d'Eureux & de moy ne fut iamais d'y submettre le Roy ny la Couronne de France. Il y a bien d'auantage que es minutes de la demande, & de l'abiuration & profession de foy que nous auons à faire au nom du Roy, y ayant mis les deputez du Pape que nous comparoissions, & faisons telles choses & telles en la presence de sa Sainteté & du College des Cardinaux, nous fismes oster ces mots, (du College des Cardinaux) disans que comme nous ne voulions empescher que le Pape en cét acte si solennel de l'absolution ne s'accompagnast de qui luy plairoit, aussi en toute cette action nous ne voulions nous adresser à autre qu'à luy, ny parler à autre qu'à luy, ny cognoistre autre que luy. Auquel propos ie vous diray, qu'en cent autres façons, outre ce qui vous en fut escrit par nos memoires, l'autorité & dignité du Roy, & de la Couronne furent par nous ménagées avec vn tres-grand soing, & épargne merueilleuse, & ne se trouua point qu'en toute la Bulle qui fut dressée, & arrestée avec nostre participation & consentement, ils'y fassent mention d'aucun Penitencier: l'Inquisition n'y est non plus nommée sinon vne seule fois, & celle là pour vne occasion; à sçauoir quand le Pape nomme le Seigneur Cosmo de Angelis qui recita le Decret de sa Sainteté, & le qualifie Assesseur de l'Inquisition: laquelle qualité dudit Seigneur Cosmo nous ne sçauions point lors que l'absolution fut donnée, ains l'apprismes lors que la minute de ladite Bulle nous fut monstrée, vn bon mois apres l'absolution, & lors qu'il ne s'y pouuoit plus faire autre chose, & que nous ne pouuions honnestement refuser de passer vne qualité laquelle vraiment le Seigneur Cosmo auoit. Que si nous eussions sceu ladite qualité à temps, ce mot mesme qui n'est qu'une fois en ladite Bulle, & pour autre occasion, n'y seroit point du tout: combien qu'il n'importe par qui le Pape aye fait reciter son Decret, puis qu'il n'y a que sa Sainteté qui parle, sans qu'il soit fait aucune mention d'autre iuge, ou Conseiller. La seconde chose qui nous deplut en cét instrument de l'Inquisition fut la trop grande & hyperbolique expression qu'il faisoit, en disant que lors que les Chanciers chantoient le Pseaume *Miserere* de *David*, le Pape à chacun verset, *Venerabat et seruebatur* *numerus praeuatorum, et civilium iurum, ut* *viaga quam in manibus habebat*. C'est vne ceremonie qui est au Pontifical, laquelle nous ne sentions non plus que si vne mouche nous eust passé par dessus nos vestemens ainsi vestus comme nous estions, & neantmoins à vne nostre estour, vous diriez qu'il nous en estoit d'auant toutes les marques sur les espauls. Or la Bulle qui fut faite avec nostre

participation

participation, comme dit est, passé cela sous silence, ne disant autre chose sinon que le Roy fut absous en la forme accoustumée par l'Eglise. Encores n'eussions nous pas suby ladite ceremonie, n'eust esté pour oster aux Espagnols, & autres esprits malins, l'occasion de dire que le Roy n'auoit pas esté bien absous, & que son absolution seroit nulle, pour n'auoir ses Procureurs voulu souffrir vne des principales façons & ceremonies contenues audit Pontifical : mais il a esté très-bien dit par les anciens que les choses par trop exprimees sont de mauuaise grace, & nuisent bien souuent.

Ces deux choses precedentes que i'ay dit nous auoir lors depleu, estoient tolerables quand ils se fussent contentez de tenir ledit instrument es Archives del'Inquisition, pour la conseruation de leurs droits & pretensions, sans demander que le Roy l'insérast en sa ratification : mais la troisieme que i'ay à dire ne se peut, à mon aduis, excuser en aucune façon. C'est que contre nostre protestation expresse faire aux Deputez du Pape, de ne vouloir accepter l'annulation de l'absolution donnée à saint Denys, mais seulement y conuiuer, & ne nous y opposer point, pourueu que le Pape y adjoûstast la clause de la validation de tous les actes de Religion faits au Roy & par le Roy, tout ainsi que si ladite absolution eust esté donnée par sa Sainteté; ledit instrument dit qu'apres que le Decret du Pape fut leu, Monsieur d'Eureux & moy dismes que nous auions entendu ledit Decret, & l'acceptions, & les choses en iceluy contenues & y voulions obeyr & satisfaire, combien que nous ne dismes iamais mot, ains nous tenmes faisant semblant de n'auoir rien entendu de ladite annulation, ainsi que nous auions arresté avec les Deputez du Pape, & qu'ils s'en estoient contentez. Et outre que ie m'asseure que vous croirez Monsieur d'Eureux & moy, & qu'il vous fut ainsi escrit par les memoires qui vous furent enuoyez avec la Bulle de l'absolution, lors que la memoire en estoit encores fresche; ie vous en mettray icy trois argumens pris de leurs pieces mesmes, par lesquelles vous apparoitra clairement qu'il ne fut iamais, & n'est rien de ladite pretendue acception. Le premier argument sera pris de la Bulle de l'absolution, laquelle ne dit point que nous acceptasmes ledit Decret, ains dit seulement qu'apres auoir ouy le Decret, nous voulans obeyr aux commandemens du Pape, & satisfaire à la Sainte Eglise abiurasmes, &c. promismes, &c. & fismes la profession de Foy Catholique pour & au nom du Roy. Que si nous eussions lors expressement accepté ledit Decret, ladite Bulle en eut esté chargée, cōme ils n'auoient garde de laisser passer sous silence rien qui fit pour eux, ains plustost cherchoient toujours en tous actes d'y glisser quelque parole de plus à leur aduantage. Le 2. argumēt sera pris du mesme instrument dont nous parlōs, lequel, s'il eust esté vray que nous eussions expressement accepté ledit Decret, ne se fut contenté de le dire & narrer simplement comme il a fait, ains apres l'auoir dit & narré, eut inferé le mot **EXPRESS** dont nous eussions vsé, & eut mis nos seings & soubscriptions, comme il a fait en tout le reste, voire deux fois, ne se contentant pas de les mettre vne seule fois. Car tous les mots que nous auions à dire au iour & acte de l'absolution, auoient auparauāt esté accordez, & arrestez entre les Deputez du Pape, & nous, & auoient esté redigez par escrit, & par nous soubserits & signez. Or ledit instrument ne met point les paroles dont on

vouloit pretendre que nous eussions vſé en acceptant ledit Decret, ny en ſouſcriuant & ſignant: auſſi n'eust-il peu les mettre, puis que nous n'en proferasmes point du tout, ains auparauant auions proteſté expreſſément du contraire, & s'en eſtoit-on contenté, comme dit eſt. Le troiſieſme argument ſera pris de l'acte meſme de la ratification qu'on vous a offert & preſenté par delà, & que vous auez paſſé: au narratif duquel on s'eſt bien gardé de dire que nous eussions accepté ledit decret, (de peur poſſible de vous reueiller, & de vous donner occaſion d'y mieux penſer, & d'y contre-dire, & de n'en rien paſſer) comme ils ont dit neantmoins que nous auions accepté les mandemens & penitences eniointes au Roy par le Pape, comme de fait elles furent par nous expreſſément acceptees. Que ſi nous euſſions accepté ledit Decret, comme nous acceptasmes ledit mandement & penitence, ils ſe fuſſent bien gardez de l'obmettre audit narratif, là où ils ſe ſont contentez de dire qu'en executiō & accompliſſement dudit Decret nous abiurasmes & fiſmes profeſſion de la foy Catholique. Par ainſi vous voyez la verité de ce que ie vous ay affirmé cy-deſſus, qu'il n'y eut iamais de noſtre part acceptation expreſſe dudit Decret. Et pour ces cauſes & autres, ie n'eusse iamais eſté d'aduis qu'en la ratification on euſt ſouffert l'inſertion de cét instrument de l'Inquiſition, quand bien on ſe fuſt laiſſé aller à inſerer la Bulle ny ledit instrument, ny partie d'iceux fuſt inſeree en la ratification, ie leur fis oſter le mot d'instrument, tout autant de fois qu'il y eſtoit, n'eſtimant raſonnable qu'il en fut fait aucune mention en la ratification ny pres ny loing, mais ſeulement de la Bulle, dont ils s'eſtoient auſſi contentez, comme vous auez veu.

Vous dites à ce propos qu'on fit vne grande faute par deçà de ne m'auoir communiqué la minute qu'ils vouloient bailler à Monsieur le Legat, & de n'en eſtre tombez d'accord avec moy, ce qui eſtoit vray ſi vous euſſiez tenu bon: & vous auez veu par ma dépeſche precedente que la meſme penſee m'eſtoit à moy venue en l'eſprit, & que i'en auois touché quel que choſe au Pape lors qu'il m'en parla, mais à preſent que vous n'auiez peu attendre que le Legat euſt reſponſe de Rome, vous voyez qu'ils firent ſinement & vtilement pour eux de ne m'en rien communiquer. Auſſi me cognoiſſent ils pour homme qui en traitant & negociant, accorde dès le premier mot tout ce que ie cognois eſtre iuſte & raſonnable: mais auſſi qu'apres cela il n'y a plus rien à gagner ſi c'eſt pour autrui que ie traite, quand ce ne ſeroit pas meſme pour le Roy & pour la Couronne.

I'oublieſvne autre conſideration ſur laquelle ie n'eusse oncques conſenty à telles inſertions: c'eſt que ie ſçay que le Pape a eſté marry que vous n'auiez publié la Bulle par delà, & a tousiours eu grād deſir qu'elle fuſt publicce pour la iuſtification de ſon abſolution, par laquelle il penſe auoir offenſé beaucoup de gens, & voudroit que ceux là viſſent toute la procedure dont il y a vſé, & toutes les ſubmiſſions que le Roy a faites. Or ne pouuoit-il ſeulement la publier auant voſtre ratification, & ſi voſtre ratification euſt eſté preſſee, & ſerree comme i'eusse penſé qu'elle deust eſtre, ſans toutesſois y obmettre rien de ce qui euſt eſté eſſentiel & neceſſaire, il euſt encores eſté retenu à la publier apres la ratification: Maintenant que vous auez laiſſé inſerer & la Bulle, & l'instrument de l'Inquiſition, & que par telle inſertion

vous auez fait le tout vostre, il en cōtentera plus aisément son desir; & pour-  
ra dire qu'il n'a rien publié du sien, & qu'il n'a fait que laisser voir vostre ra-  
tification, pour faire sçauoir au monde la bonne foy & deuotion du Roy; &  
que comme l'on est desireux de telles choses, quelqu'un aura trouué moyē  
d'en auoir copie, & l'aura puis apres dōnee à autres, & en fin se sera trouué  
encores quelque Imprimeur, qui pour le desir que telles gens ont de gai-  
gner, l'aura recouree & imprimee. En somme ie seray bien trompé si quel-  
que chose qu'on vous ait promise, le tout ne se publie auant qu'il soit gueres  
long temps, soit d'une façon ou d'autre. Car outre le susdit desir du Pape de  
iustifier ses actions, & mesmement ceste-cy qui a esté si fort contredite, vous  
auez donné si grand aduantage à l'Inquisition en acceptant & inserant son  
instrument en vostre ratification, qu'il sera tres-mal aisé qu'on se passe de le  
faire voir au monde, pour tousiours establir & agrandir de plus en plus leur  
autorité & puissance.

Quelqu'un pourra dire que ie suis vn facheux, de parler mesbuy de cela  
apres que s'en est fait: mais outre que i'en ay dit mon aduis la chose estant  
encores en entier, ie n'en parle à present, comme i'ay protesté dès le com-  
mencement de ce propos, que pour m'excuser d'auoir esté d'autre aduis, &  
pour vous rendre compte d'une partie de ce qui me mouuoit. Aussi auez-  
vous veu cy dessus comme i'ay fait mon profit de la ratificatiō du Roy pour  
son seruice enuers le Pape: ie l'ay encores fait avec plusieurs autres, & le fe-  
ray cy apres encores de plus en plus, Dieu aidant. Cependant au Consistoi-  
re que nostre sainct Pere tint le Lundy septiesme de ce mois, il fit lire tout du  
long en la presence de tous les Cardinaux la ratification faite par le Roy, &  
leur dit combien volōtiers sa Majesté l'auoit passée & signee, sās auoir vou-  
lu qu'on luy apportast vne tablette pour appuyer sa main, disant qu'il ne fai-  
soit point de faut serment, & partant la main ne luy trembloit point: qui est  
vn mot qui court icy par la bouche d'un chacun, & que tous louent grande-  
ment, comme à la verité il est digne de sa bonté, & de sa promptitude & vi-  
uacité. Atant ie prie Dieu qu'il vous donne, Monseigneur, &c. De Rome,  
ce 17. d'Octobre 1596.

## A MONSIEVR DE VILLEROY.

## LXXVIII.

**M**ONSEIGNEVR, Je fus hier à la ville pour presenter au Pape  
la lettre que le Roy luy escriuoit en faueur de Monsieur de Sagreuil-  
le neveu de Monsieur le Cardinal grand Maistre, & pour traiter avec sa  
Sainteté de cēt affaire, comme ie fis bien amplement, & en rapportay bon-  
ne esperance que sa Majesté seroit gratifiée de sa demande; aussi est-elle  
tres-iuste, & sa Sainteté ne la pourroit honnestement refuser: ie vous don-

neray aduis de ce qui en succedera. Outre, ie retouchay auec nostre saint Pere certain point de mon audience precedente, pour tirer quelque chose de plus de sa Sainteté; laquelle quant au voyage de l'Euesque de Mantouë qui vous auoit esté proposé par Monsieur le Legat, me dit plus clairement & plus affirmatiuement, que si le Roy persistoit en cette volonté, la Sainteté en enuoyeroit d'icy vn autre qui ne passeroit point par la France, combien qu'il y oust grande faute d'hommes, qui sceussent & voulussent bien faire vne telle negociation. A ce propos ie luy mis en consideration s'il seroit mieux qu'il fust traiter telles choses avec le Roy d'Espagne mesme, comme ie vous auois predit par ma lettre du seiziesme de ce mois que ie ferois: & luy qui de telles choses à venir en parle mal volontiers, & quand il en dit quelque chose en parle briuevement & obscurément, me dit; laissez-moy conduire cét affaire: en Espagne on a certaine façon de negocier les grands affaires, il les faut dégrossir.

Le lennis aussi en propos de la déposition de frere Charles d'Auennes, pour sçauoir s'il m'en diroit autre chose apres l'auoir veüe & consideree: & il tourna à me dire les mesmes choses qu'il m'auoit dites la premiere fois touchât le sieur de Maluaisie, & adiousta que vous pourriez vous en informer de Monsieur le Marquis de Pisani, & que sa Sainteté auoit esté contrainte de le rauoquer de ce pays-là à l'instance du Duc de Feria, tant il leur déplaisoit. Le luy demanday encore la responce qu'il luy plairoit me faire touchant la grace de l'Archeuesché de Sens pour Monsieur de Bourges, dont le Roy luy auoit escrit, & ie luy en auois rendu les lettres l'audience precedente: & il me dit qu'il ne s'en estoit peu resoudre pour encores, mais, comme ie vous ay déjà escrit, il fait difficulté sur la translation mesme de l'vne Archeuesché à l'autre, estant mal persuadé de ce Prelat pour les mauuais offices qui par le passé luy ont esté faits aupres de sa Sainteté.

Il y a vn certain Archidiacre del'Eglise de Vannes, lequel apres la mort du dernier Euesque de Vannes s'est fait eslire en Euesque par les Chanoines & Chapitre del'Eglise, & puis a obtenu des lettres de Monsieur de Mercœur, pour faire confirmer par nostre saint Pere ladite election, on se faire pournoir dudit Euesché. I'en fus aduertty incontinent que lesdites lettres en furent arriuees, & deffendis à l'Expeditionnaire auquel on s'estoit adressé, de s'en aider & de parler de telle chose, & puis en parlay au Cardinal Vice-Protecteur, afin qu'il n'en proposast rien, & qu'il n'acceptast lesdites lettres, & hyer i'en parlay au Pape, & luy dis entr'autres choses; que sa Sainteté pouuoit iuger par cela combien ce Prince estoit mal conseillé de mettre la main à telles choses, & mesmement si long temps apres l'absolution donnee par sa Sainteté. Quand le Roy n'auroit aucun droit de nommer aux Eueschez & Abbayes de Bretagne (lequel neantmoins nos Roys auoient tousiours pretendu depuis les Concordats, iacoit qu'ils en ayent pris Indult des Papes) ce neantmoins ce Prince ne deuoir, ny pourroit nullement compéter avec le Roy en telles choses: car les Roys estoient Ducs de Bretagne, ce qu'il n'estoit pas: les Roys estoient encores Roys & souverains de Bretagne, ce qu'il n'estoit pas: les Roys estoient encores souverains des autres Prouinces de France, ce qu'il n'estoit pas: les Roys estoient encores en possession d'auoir Indult pour telles nominations, ce

qu'il n'auoit pas. Et partant ie n'asseurois, non seulement que sa Sainteté n'en feroit rien, mais trouueroit tres-mauuaise ceste procedure comme le reste. Le Pape aimoient mieux m'accorder tout ce que ie luy disois en se taisant, qu'en y adioustant rien du sien. Auquel propos ie ne veux obmettre à vous dire, que l'estime que vous feriez bien de dire à tous ces Banquiers de Paris, qui font estat d'enuoyer à Rome pour expéditions de benefices, qu'ils se gardent d'enuoyer commission par decà d'expedier aucun Euesché ny Abbaye de Bretagne, sans en auoir lettres de nomination de sa Majesté.

Il se dit par Rome que le Comte de Vaudemont est allé à la Cour avec dessein d'auoir en mariage l'heritiere qui doit estre de la maison de Lorraine, combien qu'il s'estoit dit cy-deuant que Monsieur de Mayenne l'auoit demandée & obtenuë pour vn de ses fils. Et sur cette nouuelle les discoureurs disent que le Roy ne le deuroit endurer, & que c'est chose dangereuse de laisser planter sur la frontière d'Espagne vn Prince de la maison de Lorraine, quel qu'il fust, & mesme cestuy-cy cousin germain de l'Infante d'Espagne, Que la maison de Lorraine a son principal bien autour de Narbonne, & iusques à Locate dernière place de France riant en Espagne; Que si le Roy ne craint pour soy, ce seroit chose digne de sa prudence de pouruoir pour ses successeurs. Et puis nous n'auons encore fait avec cette maison, & sommes encore en guerre avec elle, outre qu'en paix elle n'est ia que trop grande, & trop pesante au Royaume; & que ce seroit mal faire nostre profit des choses passées, & presentes, si nous la laissions encore prendre pied en lieu si ialoux & si suspect: & ce d'autant plus que ceux de Lorraine mirent à ce que la partie du Gouvernement qu'ils ont vsurpé vienne au gendre apres le beau-pere, & mesme quand ce sera vn Prince: Que nos anciens Roys ont eu telles considerations, & s'en sont bien trouuez, comme sont encore au iourd'huy tous les autres Princes hors la France: & depuis que nous auons negligé telles choses, & autres semblables, tout est allé en decadence & en ruine, dont nous ne nous pouuons releuer.

Le Seigneur Dom Pietro de Medicis estoit ia party de Rome, lors que par ma lettre du seiziesme de ce mois ie vous escriuis de son prochain partement pour Espagne. Nous verrons bië tost que ce sera des choses qui se sordites & escrites par cy deuant: de ma part ie ne me repens point de l'aduiss dont i'ay esté iusques icy en cet endroit. Je prie Dieu qu'il vous donne, Monsieur, &c. De Rome le 19. d'Octobre 1596.

## A MONSIEVR DE VILLEROY.

LXXIX.

**M**ONSEIGNEUR, Je viens de chez Monsieur Lomelin, lequel me gardant le lit pour quelque indisposition qu'il a, m'a enuoyé prier de l'aller trouuer, & m'a dit qu'un Iesuite sien parent homme d'entendement, & qui frequente avec plusieurs grands qui scauent des affaires du monde, & qui autrefois luy auoit donné de bons aduis, luy venoit de dire qu'il y auoit

des gens à la suite du Roy pour attenter à la personne de sa Maïesté: que le-  
dit Iesuite ne sçauoit neantmoins qui ils estoient, & estant huy Ecclesiastique  
ne pouuoit nommer ceux qui les y tenoient pour vn tel esier: & a adiousté le-  
dit sieur Lomelin qu'il seroit bõ d'en escrire à sa Maïesté, & mesme à ce soir  
par la voye de Genes. Et encores que cét aduis est trop general, & nud des  
circonstances & particularitez qui seroient requises, & que i'estime que sa  
Maïesté & ses bons seruiteurs qui sont près d'elle, soient meshuy assez ad-  
uertis, & persuadez des damnable desseins de ses ennemis, & serient pour  
dit vne fois pour toutes, & que sans nouveau aduertissement ils ayent con-  
tinuellement le soin de sa vie qu'il conuient; ce neantmoins ie n'ay voulu ob-  
mettre ny differer de vous escrire la chose tout ainsi qu'elle m'auoit esté di-  
te, pour ce qu'en telles choses on ne peut estre trop credule, ny trop soi-  
gneux, & que bien souuent vn aduis venu peu de temps auparauant, peut  
sauuer d'un grand incoñuenient. Et n'estant la presente à autre fin, ie la fini-  
ray icy, priant Dieu qu'il vous donne, Monseigneur, &c. De Rome ce 8.  
Nouembre 1596.

## A MONSIEVR DE VILLEROY.

LXXX.

**M**ONSEIGNEVR, La dépesche qu'il vous plut me faire le ving-  
t vniesme Septembre me fut renduë le premier de ce mois, qui estoit  
vn Vendredy iour ordinaire de l'audience des seruiteurs du Roy: mais pour  
ce que c'estoit la feste de Toussaincts, & qu'en ce iour le Pape fait deux fois  
Chappelle, & que ie n'auois rien de pressé ny de nouueau, ie differay de de-  
mander audience iusques au Vendredy ensuiuant. Cependant il suruint vne  
indisposition au Pape la nuit d'entre le Mardy 5. & le Mercredy 6. qui l'a  
empesché de donner audience depuis. Et le Iendy 7. ie receus autre dépes-  
che du 14. Octobre, avec lettres que le Roy escriuoit au Pape, à Messieurs  
les Cardinaux ses neueux, & au Seigneur Iean François Aldobrandin sur la  
mort de Monsieur le Cardinal Toletto. Le Vendredy 8. pour ce que le Pa-  
pe ne pouuoit donner audience, ie fus vers Monsieur le Cardinal Aldobran-  
din, & luy baillay les lettres qui s'adressoient tât au Pape qu'à luy, & fis avec  
luy l'office de condoléance que le Roy me commandoit, & luy dis aussi les  
honneurs que sa Maïesté auoit commandé estre faits à la memoire, & pour  
l'ame dudit Cardinal Toletto, ranten l'Eglise de Paris, qu'en celle de Rouë,  
où sa Maïesté s'en alloit; le priant de considerer & coniecturer par là com-  
bien le Roy feroit pour les viuans, quand l'occasion s'en presenteroit, & par-  
ticulierement pour luy, qui auoit obligé sa Maïesté au mesme besoin & en-  
droit que ledit feu sieur Cardinal de Toletto. Ledit sieur Cardinal Aldobran-  
din me dit, que par les lettres que le Pape auoit receues de Monsieur le Le-  
gat le soir auparauant, il auoit ia seen l'honneur qu'il auoit pten à sa Maïesté  
faire à la memoire dudit sieur Cardinal Toletto, dont sa Sainteté auoit sen-  
ty tres-grande consolation & aise, & auoit loué la generosité, bonté, & pie-

té de sa Maïesté. Quant à luy, outre l'honneur que sa Maïesté luy faisoit par cet office, & par ses lettres, & par la declaration de sa bonne volonté, il se sentoient encores particulièrement honoré par celuy que sa Maïesté faisoit à la memoire du defunt, & luy en rendoit tres-humble seruice. Apres cela ie luy dis sommairement vne partie de ce qui estoit porté par la dépesche du 21. de Septembre, comme le contentement que le Roy auoit de Monsieur le Legat, & le commandement particulier de remercier le Pape du bõ choix que sa Sainteté auoit fait en luy, les choses que ledit sieur Legat auoit traitées en l'audience du 20. Septembre, & les responses que sa Maïesté luy auoit faites. Quant à ce que vous m'escriuez, tant en l'une qu'en l'autre dépesche, touchant Monsieur le Duc de Sanoye, ie le reserueray pour la premiere audience que ie pourray auoir du Pape. Je dis aussi audit sieur Cardinal comme ledit iour 20. Septembre vous auiez baïsé les mains à Monsieur le Legat qui vous auoit donné ses lettres, & ensemble le bref de nostre saint Pere, & tout le reste que vous m'avez escrit à ce propos. Ce que ledit sieur Cardinal Aldobrandin eut tres-agreable, & me dit qu'il rapporteroit le tout à sa Sainteté. Je fus aussi rendre les lettres du Roy, & faire le mesme office de condoléance à Monsieur le Cardinal George, & au Seigneur Iean François Aldobrandin; qui me responderent aussi fort honnestement, adioustant sur la fin qu'ils escriroient à sa Maïesté.

Auant tout cela, j'auois déja rendu à Monsieur le Cardinal Cornaro la lettre que le Roy luy escriuoit sur ce qu'il m'auoit fait escrire à sa Maïesté, & luy auois dit de bouche ce que sa Maïesté me commandoit. Ledit sieur Cardinal me respõdit qu'il se mouuoit à vouloir estre seruiteur de sa Maïesté, par iustice, & par sa propre inclination. Par iustice, dit-il, pource que la Couronne, & les Roys de France ont tousiours aidé à l'Eglise & au saint Siege, & qu'il n'y a aujourd'huy que sa Maïesté en son Royaume qui puisse contre-peler la puissance, qui semble vouloir tout vsurper, tant au spirituel qu'au temporel. Quant à ce que ie l'auois prié au nom du Roy de perséuerer en cette sienne bonne volonté; il me respondit qu'il me tournoit à dire encores de nouueau, tout ce qu'il m'auoit dit auparauant de son affection, & que non seulement il perséuereroit, mais qu'il augmenteroit encores s'il le pouoit faire.

Aussi auois-je monsté à Monsieur Serafin ce que le Roy m'escriuoit de luy, qui en demeura grandement consolé; & attend la venue de Monsieur de Luxembourg en bonne deuotion, & avec desir que Dieu luy presente occasion de môstrer par quelque bon seruice la gratitude qu'il red à sa Maïesté.

J'auois aussi dit à Monsieur le Cardinal Bandini l'office que Monsieur le Legat auoit fait pour la deliurance du sieur Mario Bandini son frere, & la bonne response que le Roy luy auoit faite. Lequel sieur Cardinal Bandini s'en sent tres-obligé à sa Maïesté, & m'a dit depuis qu'il a receu lettres de l'Abbé son frere qui est par delà, & luy escrit qu'il a fait compte avec Monsieur d'Espernon pour & au nom de son frere Mario, y assistant le sieur Zamet, & qu'il se trouue que le Roy doit audit sieur Mario beaucoup plus grã de somme que celle que ledit Mario doit à Monsieur d'Espernon: lequel en outre a déclaré qu'il deliurera ledit sieur Mario, pourueu que le Roy luy donne assignation pour estre payé dans quelque temps de ce que ledit Ma-



rio luy doit. Surquoy ledit sieur Cardinal Bâdini supplie le Roy, qu'il plaise à sa Maïesté donner l'assignation audit sieur d'Espernon, comme elle en a donné à luy, & à d'autres pour autres choses, qui au sieur Cardinal Bandini ne semblent plus iustes, ny plus fauorables que ceste cy. Si vous oyez avec quelle affection & efficace ledit sieur Cardinal en parle, vous en auez compassion, & aimeriez la grande charité & pieté qu'il a enuers son frere, & à la propagation de sa maison. Il y a aussi les Cardinaux Mattei, & Pinielli, & Iustinien qui sont leurs alliez, & plusieurs autres leurs amis & parés, & le Pape mesme, & Messieurs les neueux qui desirent grandement l'elargissement dudit sieur Mario, comme chose qui importe à la conseruation, & à la restauration de ceste maison de Bandini, à tous lesquels sa Majesté donnera grand contentement, qui luy tournera encores à quelque réputation & louange, & au bien & profit de ses affaires & seruice par deçà, & ledit sieur Cardinal Bandini dit qu'il semblera que le Roy luy aura non seulement deliuré & donné son dit frere Mario, mais aussi que sa Maïesté luy aura resuscité le Cheualier son autre frere, qui est mort au seruice & pour le seruice de sa Maïesté. Il a encores grande esperance que vous, Monseigneur, luy aiderez enuers le Roy de tout ce que vous pourrez, dont il vous supplie de toute son affection, comme ie vous en supplie encores de toute la mienne, avec assurance que vostre intercession qui a tousiours esté exposée à tous les gens de bien, sera très-bien employée en cet endroit, pour infinis respects que vous supplierez de vous mesme.

I'ay veu que par l'une & l'autre de nos deux lettres des 21. Septembre & 14. Octobre vous m'avez escript touchant la ratification, qu'il n'y auoit que la Bulle de l'absolution qui y eust esté inserée, mais pour ce que le Pape m'auoit dit que l'instrument & toute la Bulle y estoit, soit qu'il ne l'eut encores veu tout du long, car il ne l'auoit receu que le soir auparavant, ou que par l'instrument il entendist l'acte de l'abjuration, dont nous auons autrefois contesté, ie m'en suis voulu encores mieux esclaircir avec celuy qui dressa tous ces actes lors de l'absolution, & qui dernièrement recita toute la ratification du Consiatoire du d'Octobre, & il m'a confirmé qu'il n'y auoit eu que la Bulle qui y eust esté inserée, dont i'ay esté consolé le plus que ie ne vous scauois exprimer, vous assurant que si le procez verbal y eust esté encores adionsté i'en eusse porté dueil au cœur toute ma vie: car il me sembloit déjà qu'à cet affaire de si grande importance, qui par la grace de Dieu auoit esté heureusement conduit, estoit aduenu sur la fin, & à son dernier acte, comme à vn bel homme & bien formé, qui auroit receu ne trop laide balafre en son visage, laquelle l'auroit tout difformé.

Il reste maintenant, comme vous dites très-bien, à executer les choses promises, sur quoy nous deuons auoir en particuliere recommandation la publication du Concile de Trente, chose non seulement pie & sainte, mais aussi vile au Roy & au Royaume: & outre que sa Majesté est tenue & obligée par le deuoir commun de Prince Catholique, & Roy tres-Chretien, & par promesse & serment particulier, il n'y a rien qui plus demente & afflige les Espagnols, & autres ennemis de sa Maïesté, ny qui luy apporte plus de bienveillance du Pape & du saint Siege, & de tout l'ordre Ecclesiastique, que sera ceste action. Apres la publication, l'observance dudit

Concile

Concile s'introduira & s'establira peu à peu. Nostre saint Pere & tous les hommes sages & moderez scauent bien qu'un si grand Royaume, apres vne si grande & si longue débauche, ne se peut remettre & reformer tout à vn coup. A Rome mesme ledit Concile ne se pratique pas en tout & par tout, & à toute rigueur, quelque grand soin que les Papes en ayent eu, & mesme-ment cettuy-cy, que Dieu a doué d'une particuliere sainteté, zele & sollicitude. I'espère que le Roy ne trouuera tant de contradiction à cette publication, comme possible l'on craint. Le Clergé de France, à qui il touchera particulièrement d'observer ledit Concile, toutes les fois qu'il s'est assemblé en a demandé la publication. Ceux de la Ligne, lors qu'elle estoit en pied, ont tousiours fait profession de la desirer, & outre la publicati<sup>o</sup>n qu'ils en firent à Paris sous le nom d'Estats, ils en ont fait faire d'autres en particulier, & en diuers lieux où ils commandoient. Les Catholiques qui ont tousiours suivi le Roy, auront horreur de ceder en deuoti<sup>o</sup>n & pieté à ceux qui ont esté du party contraire; & ceux qui pretendoient que le Concile preiudicioit aux droits Royaux, & aux libertez de l'Eglise Gallicane, se trouueront bien empeschez quand on les sommerá de dire & specifier en quoy, & quand ils rencontreroient quelque chose, vn sauf & modification remedieroient à cela. Quant aux Huguenots, cette publication ne leur touche en rien, ny pour rien, puis qu'ils ont l'Edit de l'an 77. & que l'exception que Monsieur d'Eureux & moy fismes apposer à l'article que nous promismes icy touchant ledit Concile, pouruoit assez pour ce regard à la tranquillité du Royaume. Apres tout cela, ie compte la volonté resoluë que le Roy en montrera, pour vn tres-grand & puissant moyen de surmonter tout ce qui pourroit y rester de difficultez: de façon que i'en espere tout bien.

Vous m'escriez que vous avez pris par lettres interceptes que les Espagnols scauent plus mauuais gré au Pape de l'habilitation de M<sup>seigneur</sup> le Prince de Condé, que de la propre benediction qu'il a donnée au Roy. Ten'ay point encores seuu que le Pape ait habilité monditz seigneur le Prince: bien est vray que Monsieur le Cardinal Iustinien m'a dit autrefois & bien souuent, qu'il seroit bon qu'on en prist vne, & si le Roy n'en vouloit faire instance, qu'on la fist demander par quelque autre: mais ie n'y voulus iamais entendre, ny en escrire par delà, pour ce que ie cognoissois qu'on mettoit cela en auant, plus pour s'autoriser l'oy, que pour le bien dudit seigneur Prince. Toutesfois s'ils l'ont enuoyee, soit d'eux-mesmes, ou apres qu'elle a esté demandee, cela seruira audit seigneur Prince pour fermer la bouche à qui luy voudroit opposer la rigueur des Canons sur sa premiere nourriture & erreur auquel son pere est decedé: combien qu'au reste on laisse par là prendre possible trop de pied à cette Cour sur la Couronne & le Royaume.

Ie ne voudrois point que vous vous remissiez au Pape de ce dont vous estes en débar avec le Duc de Sauoye, pour ce que sa Sainteté s'est desia assez declarée de desirer & estre d'aduiz que le Roy s'accordast avec ledit Duc de Sauoye à quelque condition que ce fust, & a trop grande peur que la guerre ne s'attache en Italie: & neantmoins la plus grande raison qu'elle ait allégué de ce sien aduis, a tousiours esté qu'elle craignoit que le Duc de Sauoye ne pourrant subsister contre le Roy & la France, mist & le Marquisat, & les

places du Piémont és mains des Espagnols : Et de fait il m'a esté rapporté depuis trois iours , que les Sauoyars & Piémontois ont dit , que puis que le Roy ne vouloit laisser le Marquisat de Salusses, son Altesse le vendroit & liureroit au Roy d'Espagne. Mais ie pense que c'est vn bruiet que les ministres de son Altesse font courir expressement , non pour intention qu'il aye de ce faire, mais afin que cela venant aux oreilles du Roy, sa Maiesté cõdescende plus facilement à luy laisser ledit Marquisat. Car à iuger les choses par la raison , Monsieur de Sauoye vendant ledit Marquisat qui n'est à luy, feroit vn acte indigne d'un Prince, & dont il seroit blasmé par tous gens de bien , & autres non interessez ny passionnez. Mais pource que auourd'huy les Princes ne se soucient plus de tels blasmes , qui neantmoins leurs nuisent plus qu'ils ne pensent, i'adiousteray qu'il n'asseureroit pas par là le Marquisat en sa maison, mais l'acquerroit de fait aux Espagnols, qu'il peut sçauoir n'estre de rien meilleurs voisins que les François , comme aussi apres le Roy son beau-pere, qui doit affection à ses descendans , il ne s'en peut pas promettre autant de son beau frere , & faudroit par mesme moyen , & encores à plus forte raison , que son Altesse vendist aux Espagnols tous ses Estats qui sont plus près de la France que n'est ledit Marquisat , par la vente duquel il se mettroit en peril certain & euident de perdre tost ou tard la Bresse, & la Sauoye, & possible le Piémont : comme autresfois pour moindre occasion son ayeul & son pere s'en sont veus despouilleez : & tiroit sur soy & sur ses enfans vne trop grande ruine. Que si la Couronne de France auoit à estre priuee du Marquisat de Salusses, outre qu'il luy importeroit peu à qui il demeurast, il y auroit tousiours moins de hôte pour nous, quand cela seroit arriué par la faute d'un sien, mauuais voisin , que si c'estoit par le consentement de son Roy propre. Aussi seroit-ce moins de honte quand nous ne pourrions de quelque temps recouurer ledit Marquisat d'entre les mains d'un tres-grand , & tres-puissant Roy , que non pas si nous le laissions pour iamais à un Duc , qui n'a quasi rien que nous ne luy ayons rendu , & qui n'auroit auourd'huy rien , si nous eussions vsé enuers son pere pour tous ses Estats , de la façon qu'il veur vser enuers nous pour ledit Marquisat.

Je suis de vostre aduis en ce que vous estimez que si le Prince Doria attentoit quelque chose cõtré vous en Prouence, il ne seroit assisté des galeres du Pape ny de celles du grand Duc. Aussi furent-elles licentiees les premieres, lors que ledit Prince se voulut partir de ces quartiers de la Sicile pour retourner vers Genes. Au reste ie vous prie ne vous confier en la saison ny en autre telle chose, car la nauigation de N. n'est pas si longue, qu'en toutes saisons on n'en puisse trouuer les occasions, & subir le hazard.

I'ay veu ce qu'il vous a pleu m'escrire touchant le gratis que chacun veut auoir ; & encõres que ie prenoye que cela me causera vne grande enuie & haine de tous ceux qui ne seront seruis à leur appetit , ce neantmoins ie feray du mieux que ie pourray. Quant à la pension sur l'Euesché de Beauuais, puis que Roy le veut ainsi, & que les parties en sont d'accord, i'en lairray faire les officiers , & ay monstré & laissé au sieur Paulin Soubs-dataire la lettre que sa Maiesté m'en a escrite.

I'ay baillé à Monsieur Bottereau la lettre que vous m'avez emroyée

pour luy, qui s'en sent fort honoré, & vous est tres-humble seruiteur, comme il vous escrira luy mesme. Je ne m'esmerueille point que le Roy & vous ayez esté bien aysez de ce que ie fus bien fauorablement expédié en Consistoire del'Euesché de Rennes; puis que tous excellents ouuriers se resioüssent ordinairement de voir reüssir leurs ouurages. Je fus consacré Euesque vn Dimanche 17. d'Octobre en l'Eglise Saint Marc, par Monsieur le Cardinal de Veronne, qui a son tiltre & son habitation audit saint Marc: de sorte qu'à present il ne me manque aucune de toutes les formes requises pour estre Euesque, ie pourray desormais en signant prendre cette qualité comme font les autres, & toutes les fois que ie souscriray ie me souuiendray de l'obligation que i'en ay au Roy & à vous. Restera de faire le deuoir d'un bon Euesque, dont Dieu m'a donné la volonté, & espere qu'il me fera la grace d'en faire vne partie, & de n'estre negligent. Auquel propos ie vous diray, que lors que Monsieur de Luxembourg sera venu & installé, le deuoir d'Euesque voudra que i'aïlle à la résidence. Aussi a-t'on accoustumé icy tous les ans vn certain temps de faire vn Edict; pour que tous les Euesques, & autres qui ont cure d'ames aillent à la résidence: que si le Roy vouloit que ie demeurasse icy quelques mois apres la venue de Monsieur de Luxembourg, il faudroit que sa Maïesté en escriuit au Pape, & ordonner à Monsieur de Luxembourg de luy en parler de sa part. Car au reste comme ie ne voudrois pas que le Pape pensast icy que ie ne me soucirois point de mes diocésains, ny du deuoir d'Euesque; aussi voudrois ie encores moins que le Roy estimast par delà, que tout aussi tost qu'il m'a fait du bien ie pense à me retirer, vous assurant que ny en cela ny autre chose, ie n'ay & ne veux auoir autre volonté que celle qu'il plaira à sa Maïesté, pourueu que ce soit avec sa bonne grace; & avec son contentement, & que ie puisse rendre raison de mon fait, ie ne me soucie point où ie demeure, ny où que i'aïlle.

A tant ay-ie respondu aux points de vos lettres, qui m'ont semblé en auoir quelque besoing. Quant aux choses de deçà; ie commenceray par l'indisposition de nostre saint Pere, qui luy commença, comme i'ay dit cy dessus, la nuit d'estre le Mardy & le Mercredi 9. de ce mois. Ce sôt douleurs de flancs; qu'on estima d'abord commencement estre colique venteuse: mais l'opiniastreté du mal qui ne cedoît aux remedes, a depuis fait croire que c'estoit colique pierreuse, & qu'il auoit quelque pierre aux conduits qui portent l'vrine des reins à la vessie: laquelle pierre estant partie des reins, ne trouuant le chemin assez large pour descendre en la vessie, s'estoit arrestée là, & luy causoit ces douleurs. Et de fait, l'on l'a pensé, & le pense on encores amourd'huy comme ayant vn tel mal, & entre autre chose on luy a ordonné des bains d'huile. Il ne pouuoit demeurer longuement couché ny assis, & se lassoit de cheminer & demeurer debout; de façon qu'ayant esté travaillé de ces douleurs enuiron dix iours, & ne pouuât prendre son repos ny sa refectiion comme il souloit, ie ne m'esmerueille point de ce qu'on dit qu'il s'en montre vn peu extenué. Maintenant on dit qu'il se trouue mieux, & qu'il a Messé depuis deux iours. Toutes fois il n'a depuis le commencement de son mal tenu Consistoire ny Congregation, ny donné audience à pas vn Ambassadeur, i'ajoit que quand il est sain il travail-

le fort volontiers. Vous sçavez la coutume de Rome, on commence déjà à parler du Conclave futur, & fait-on son compte que depuis qu'il est sujet à ce mal qui a accoustumé de retourner, & que dès le premier accèz il en a esté si mal traité, encores qu'il en soit échappé pour cette fois, il ne pourra aller gueres loin. Dieu vueille qu'ils se trompent, & qu'il viue sainement & longuement, comme il est besoin pour le bien de la Chrestienté, & particulièrement de la France, à laquelle il viendroit tres-mal de perdre vn Pape si bien affectionné, & en temps qu'elle en a plus besoin, & n'a point vn seul Cardinal à Rome pour aider à en faire vn qui ne fust point du tout Espagnol.

Après l'indisposition de nostre Saint Pere, il n'y a rien de quoy il se parle icy tant comme de la prise que le Turc a fait ces iours passez de la ville d'Agria en la Hongrie superieure, & de la bataille qu'il a depuis gagnée sur l'Empereur & sur les Princes de Transylvanie, & de la crainte qu'on a que ces maux n'entraient apres soy encores pis. Cela mesme fait quel'on blasme d'autant plus le Roy d'Espagne, de ce qu'il a abandonné son sang & sa maison aux Turcs, s'estant opiniastré apres la France, au lieu & temps qu'il deuoit auoir secouru les siens, & la Chrestienté contre les Infidelles.

Les Cardinaux Priuli & Taruggi arriuerent en cette ville le 27. Octobre, & ie les fus visiter le lendemain au nom du Roy au seruice duquel ils se disent affectionnez : & m'a esté dit de fort bon lieu que le Cardinal Taruggi Archeuesque d'Avignon, a fait bonne relation au Pape de la personne de sa Majesté, & des choses de la Frâce, & en a respondu de mesme à l'Ambassadeur d'Espagne qui le mettoit en chemin d'en dire mal.

Les Cardinaux Alexandrin & d'Ascoli, qui ont esté absens de cette Cour vne bonne piece de temps, sont retournez depuis la venue des deux precedens, & i'ay aussi visité celui d'Ascoli. Quant à Alexandrin, ie ne l'ay point visité, pour la prohibition que le Roy nous en fit à Monsieur d'Eureux & à moy, par l'instruction que Monsieur d'Eureux apporta, combien que i'ay veu vne lettre escrete de Tolose le vingt-huictiesme Septembre par le nepueu de feu Monsieur le Cardinal Reumans, que le Roy a nommé à l'Euesché de Bayonne, à vn des Solliciteurs de cette Cour appelé Oliuier l'Euesque, auquel il a commis la sollicitation de l'expedition dudit Euesché; en laquelle lettre sont escripts ces mots : *En quoy ie vous supplie me vouloir tenir la main. & entretenir Monseigneur le Cardinal Alexandrin en sa premiere donation. Auquel i'escriis outre autres choses, qu'il luy plaise me faire ce bien & honneur, que de vouloir adionner soy en la grace que ie vous donne, ne l'ayant voulu inserer en la lettre que ie luy escriis, & pour cause. C'est Monsieur, qu'il luy plaise prendre en bonne part si i'ay eu mandement du Roy de l'imiter à son amitié, tenant pour ensevelies & assoupies toutes choses passées au traité de son absolution. Vous le pourrez en outre assouuer que c'est vn bon Prince, fort Catholique & bien redoublé. I'ay promis à sadite Majesté d'en escrire audit sieur Cardinal, & assure qu'il luy sera fort deuot à l'advenir : dequoy i'en desirois recevoir tant soit peu d'assurance & responce, pour en pouoir rendre certains à sadite Majesté. Ledit solliciteur m'a demandé s'il le deuoit dire audit sieur Cardinal Alexandrin; & ie n'ay point estimé l'en deuoir destourner : pour ce qu'encores que ie fisse quelque doute si le Roy auoit donné telle commission ou non, toutes-*

fois elle me plaisoit d'elle mesme , & me sembloit digne de la prudence, moderation , & generosité du Roy ; & de condamner de mensonge & de vanité entre personnes de si grande qualité, vn homme nommé par sa Majesté à vn Euesché clef de la France , l'ay estimé que ce seroit à moy trop de dureté. Depuis ledit solliciteur m'a rapporté auoir parlé audit sieur Cardinal Alexandrin , & luy auoir leu , & laissé par escrit lesdits mots ; & que ledit sieur Cardinal luy auoit dit là dessus qu'il respondroit à l'autre , & cependant luy disoit à luy qu'il n'auoit iamais eu inimitié avec le Roy , mais n'auoit peu ny deu le recognoistre pendant qu'il estoit heretique, mais qu'estant Catholique il luy estoit pres-humble seruiteur. l'attens à en voir vne responce plus certaine , & ay conseillé audit solliciteur , que si ledit sieur Cardinal luy fait à luy responce de bouche sur cet article pour l'escire à l'autre , comme il pourra faire , attendu que l'autre ne luy en a point escrit à luy , qu'il le prie de la luy faire bailler par escrit sans signer , comme il luy a baillé copie de ce que l'autre luy auoit escrit , ou qu'il le luy die , afin qu'il n'y aye chose de telle conséquence, & entre personnes de si grande qualité ; il ne mette plus ny moins. Je l'ay fait pour ce que ie cognois tant la portee de ce mediateur , que ie ne me puis fier de sa memoire.

Erric Monsieur de Lorraine Euesque de Verdun fait ses visites, qu'il aura tantost acheuees , & il luy a plu de m'y comprendre , pour l'honneur que l'ay de seruir le Roy. L'Euesché de Cortonne en Toscane ayant vacqué dernièrement par le decz du dernier Euesque , le Pape l'a donné à l'Euesque de Mascon Florentin de la maison des Allemans , de façon que par la translation audit Euesché de Cortonne celui de Mascon vacquera , s'il ne se trouue premierement resigné. Le Roy est grandement loué par deça des honneurs funebres faits à la memoire & à l'ame de feu Monsieur le Cardinal Tolet : les Espagnols du commencement ne le vouloient croire , & y en a d'entre eux qui ont aposté des personnes de ma cognoissance , pour scauoir de moy si cétte nouuelle estoit vraye , auant que l'escire en Espagné. A tant, &c. Monseigneur , &c. De Rome ce dixneufiesme Nouembre mil cinq cens nonante six.

## A MONSIEVR DE VILLEROY.

## LXXXI.

**M**ONSEIGNEUR, Le Pape se porte mieux , apres auoir ietté du sable gros parmy son vrine, & encores que possible il n'en sera autre chose si est-ce que parmy les plus grands de Rome on tient pour fermé & stable que le Pape n'est plus pour viure longuement : nos amis mesme m'en sont venus donner l'alarme , comme il estoit pour mourir chaque mois , & chaque semaine , & chacun iour , & m'exhortent de prier le Roy de faire venir vistement non seulement Monsieur de Luxembourg , mais aussi Messieurs les Cardinaux de Joyeuse , de Gondy , & de Giury. Et encores que ceux qui m'en pressent le font autant & plus

pour leur interest que pour le nostre, & pour l'esperance qu'ils ont de paruenir à leurs intentions par nostre aide; si est-ce que ie ne laisse de reconnoistre que leur interest est conioint avec le nostre, & qu'ils ne veulēt point de Pape Espagnol, non plus que nous, & la verité est que bien souuent on le gagne, on le perd par vne seule voix de plus ou de moins: comme aussi est il vray que nous ne pouuons quasi rien auourd'huy de nous-mesmes, & auōs besoin de nous conioindre avec ceux qui craignent aussi bien que nous de tomber en vn Pape Espagnol; comme le Cardinal Aldobrandin, les Venitiens, le grand Duc, & possible Montalto, & s'il y en a quelque autre de mesme. C'est pourquoy les sollicitations qu'on nous fait ne sont pas à negliger, & est tousiours bon d'vser de preuoyance, & de faire prouision en tout euenement, & mesme que quand le cas seroit aduenu, il seroit trop tard de faire partir nos Cardinaux. Monsieur le Cardinal de Loyeuse a non seulement pretexte, mais deuoir de venir pour faire son office de Protecteur. Monsieur le Cardinal de Giury en ptenant le bonnet à iurē de venir prendre le chapeau dans vn an, qui luy seruira tousiours de pretexte pour bien tost qu'il vienne, & possible demeureroit icy aussi volontiers comme en France. Quant à Monsieur le Cardinal de Gondy, ie le desirerois icy autant que tous les deux autres; mais outre que vous en pouuez auoir besoin par delà, ie ne sçay quel pretexte vous luy pourriez donner, afin qu'il ne semblast au Pape qu'on l'enuoyast pour estimer sa Saincteté moribonde. Je m'en remets à vous comme de tout le reste; priant Dieu, &c. Monseigneur, &c. De Rome le dix-neufiesme Nouembre 1596.

---

A MONSIEVR DE VILLEROY.

LXXXII.

**M**ONSEIGNEVR, Je receus le dix-neufiesme Nouembre la Lettre qu'il vous pleust m'escire du dixiesme, par laquelle i'ay sçeu l'arriuee & entree du Roy à Roüen, & ce qu'il y auoit fait avec l'Ambassadeur d'Angleterre, & l'ouuerture de l'Assemblée, & autres choses qu'il vous a pleu m'escire, dont ie vous remercie tres-humblement, & particulièrement de trois copies qui accompagnoient vostre dite lettre à sçauoir ce que le Roy auoit dit à ladite ouuerture, & de la forme de sa promesse en prenant l'ordre de saint George, dit de la Jarretiere, & de sa Lettre à Monsieur de Sauoye. Le lédemain que i'eus receu vostre dite lettre, à sçauoir le Samedy dernier de Nouembre, le Pape ne donnant encores lors audience, ie fus trouuer Monsieur le Cardinal Aldobrandin, & luy dis par forme d'aduis vne partie de ce que vous m'avez escrit, que i'estimay estre le plus à propos, & puis luy parlay du fait de Madame l'Admirale, le priant de la part du Roy qu'il luy pleust faire pour elle les bons offices dont vous m'avez escript qu'il me promit de faire. Et partant d'avec luy i'allay trouuer Monsieur le Cardinal saint George, auquel ie dis les mesmes aduis.

que i'auois dit à Monsieur le Cardinal Aldobrandin, sans luy parler de Madame l'Admirale ; & pource qu'il m'interrogea de l'Ordre de la Jarretiere que le Roy auoit pris , & de la paix de Sauoye ( ce que n'auoit fait Monsieur le Cardinal Aldobrandin ) ie luy dis ce qui en estoit, & luy leus la copie de ladite promesse , & de la lettre que le Roy auoit escrite de sa main à Monsieur de Sauoye , que i'auois portee avec moy pour les pouuoir montrer si on me demandoit de ces choses là.

Le Vendredy sixiesme iour de ce mois nostre saint Pere se portant bien, graces à Dieu, & s'estant remis aux affaires, i'eus audience de sa Sainteté ; & pour ce que ie n'auois parlé à luy depuis le dix - huiſiesme d'Octobre, ie le fus trouuer à Frescati, comme ie vous ay escrit par cy deuant. Je commençay par vn petit mot de coniouſſance de ce qu'il auoit pleu à Dieu le remettre en santé luy representant l'aïse que le Roy en auroit, & toute la Frâce qui luy estoit si obligee, & auoit besoin que Dieu le conseruast longuement, & en prioir sa diuine bonté deuotement. Apres cela, ie luy dis que i'auois rendu compte à Monsieur le Cardinal Aldobrandin de ce qui m'auoit esté escrit de la Cour pendant son indisposition, & que ie ne luy en ferois point de redite, bien en voulois- ie retoucher & luy ramentéuoir deux ou trois particularitez seulement ; en cét endroit ie luy dis le grand contentement que le Roy auoit de Monsieur le Legat, & le commandement que sa Maïesté m'auoit fait de baisser les pieds de sa Sainteté de la bonne election que sadite Sainteté en auoit faicte. Le Pape me respondit que le Roy auoit raison d'estre content du Legat, & que le Legat faisoit aussi toute bonne relation de sa Maïesté, & luy en donnoit toute bonne esperance ; que d'ailleurs le Legat estoit homme de bien, franc, & rond, qui ne tromperoit iamais sa Maïesté, ny autre. Apres cela ie luy dis comme vous auiez receu le Bref dôt sa Sainteté vous auoit honoré, & adioustay les choses qu'à ce propos vous m'auiez escrites par vostre lettre du 22. Septembre ; & sa sainteté me dit que Monsieur le Legat se loüoit aussi fort de vous, comme aidant à faciliter toutes choses bonnes en tout ce que vous pouuiez : & puis se prenant à la derniere partie de vostre propos, me dit qu'il m'auoit dit plusieurs fois, & me le vouloit encôres dire, & qui ie vous escriuisse qu'il ne vouloit rien du Roy ny de vous tous ny pour soy ny pour les siens, & n'en desiroit autre chose que ce qui seroit pour l'honneur de Dieu, & pour le bien commun du Royaume, & pour la réputation & grandeur du Roy. Cela fait ie luy dis de Monsieur de Sauoye ce que i'en auois desia dit à Messieurs ses Neueux, & de plus ce que i'auois reserué pour la personne de sa Sainteté touchant la presumption de l'homme, de vouloir qu'il fust son choix de marier l'vne de ses filles à Monsieur le Prince de Condé sans y engager Marguerite. Sa Sainteté ne s'ouurit rien là dessus, & ne me dit autre chose sinon qu'il auoit creu que le Roy & luy fussent d'accord long temps y a. De là ie passay au fait de Madame l'Admirale, iacoit que i'en eusse parlé auparauant à Monsieur le Cardinal Aldobrandin, & luy dis ce que vous m'auiez escrit de la part du Roy, le suppliant de ne permettre point qu'il luy fut fait iniustice, puis qu'elle estoit remise à son Noncé. Il me respondit qu'elle n'y auoit point esté remise autrement, mais qu'elle estoit imputee de crime, dont la cognoissance appartient à l'Inquisition priuatiue.



ment à tous autres : & neantmoins Monsieur de Sauoye vouloit qu'au procez assistast vn de ses Senateurs , & auoit iusques à present retenu par deuers soy toutes les informations; ce que sa Sainteté ne trouuoit bon.

Au demeurant qu'elle estoit imputee de sorcellerie, & de magie , d'auoir inuouqué, adoré, & enuensé les diables, d'auoir fait endiabler vne fille qu'elle auoit de feu Monsieur de Saudye pere de cestuy-cy , & de faire telles autres choses ; qu'il ne permettroit point qu'il luy fust fait iniustice , mais que les imputations estoient si atroces, qu'on ne pouuoit de moins que de voir que c'estoit.

Je parlay encôres à sa Sainteté pour la seconde fois du fait du baillif de l'Aigle neuue de feu Monsieur le Cardinal Grand Maistre, & pour d'autres particularitez en matière d'expedition de benefices , & dispenses , & en eus bonne & fauorable response.

Après que ie luy eus dit tout ce que ie voulois, il me demanda de plusieurs choses; à sçauoir de l'Assemblée; de ce qui s'y traitoit; & si on ne résoudroit pas la publication du Concile de Trente ; si la mere de Monsieur le Prince de Condé ne se declareroit point Catholique bien tost , comme il auoit esté dit; si Madame sœur du Roy n'en feroit pas autant. A toutes lesquelles demandes ie respondis conformément à la bonne esperance que i'auois des choses susdites. Il me demanda pourquoy Monsieur le Grand Escuyer n'auoit voulu venir prêter obediencce. Je luy respondis que ie ne pensois pas qu'il l'eust refusé, au contraire i'estimois qu'il eust tenu ceste charge à tres-grand honneur: mais qu'il y deuoit auoir eu des occasions pourquoy il n'auroit peu venir , ou que Monsieur de Luxembourg auroit esté iugé plus propre. Quoy qu'il en fust, Monsieur de Luxembourg estoit plus grand seigneur, & d'extraction plus illustre, & le sainct Siege n'en feroit que plus honoré. Il me demanda encôres quel mouuement estoit-ce que les Huguenots faisoient par le Royaume. Je luy respondis qu'il ne m'en auoit esté rien escript , mais que ie sçauois bien que depuis la conuersion du Roy , ils estoient entrez en de grands soupçons & déliances, mesme depuis la reconciliation de sa Majesté & de la Couronne avec le sainct Siege; Qu'au reste i'auois entendu dire par Rome, qu'ils auoient présenté au Roy vne requeste fort insolente, & que si leur auoit respondu que s'ils ne se contentoient aux termes de l'Edit , & troubloient le Royaume & ses affaires, il s'accorderoit avec le Roy d'Espagne, & employeroit toutes ses forces contr'eux , s'aydant encôres de celles dudit Roy d'Espagne , & qu'il sçauoit bien comme il les falloit auoir , & qu'ils n'en auoient point si bon marché comme ils auoient eu de ses predecesseurs.

Vendredy 13. de ce mois ie retourmay à l'audiencce, & parlay à sa Sainteté pour la quatriesme fois de l'expedition gratuite de l'Archeuesché de Tours pour Monsieur de Cerisy, & en tiray quelque mör de plus que ie n'auois fait auparauant, de façon que l'esperance que i'en ay tousiours en eü m'en est accrüe: mais ie n'en veux asseurer autrüy ny moy-mesme, iusques à ce que le **MOTU PROPRIO** en soit signé. Je luy parlay de la dispence de Charles de Bourbon frere naturel du Roy nommé à l'Archeuesché de Roüen, & en eus tres-bonne response. Je luy presentay aussi les lettres que le Roy luy escriuoit de ceste expedition gratuite pour cét Archeuesché: à quoy nous n'aur

pas grande difficulté, pour l'honneur que ce Prince a d'appartenir si près à sa Maïesté. Je luy rendis encores vne lettre que Monsieur de Bourges luy escruiroit, pour la seconde fois, & ne le trouuay de rien mieux disposé qu'au parauant.

Sa Sainteté me demanda encores des choses de delà d'aupres du Roy, & ie luy dis ce qui en auoit esté escrit par des particuliers, & ce que ie pensois qu'il trouueroit bon, sans toutesfois luy asseurer chose dont ie ne sois assuré. Sur la fin il me parla de deux Arrests qui auoient esté donnez au grand Conseil, l'un contre Monsieur l'Archeuesque d'Ambrun, touchant l'Abbaye de Mont-Maiour les Arles, l'autre contre Mesire François Isarny touchât l'Abbaye de S. Aphrodise de Beziers, se plaignât des affronts (car ainsi parloit-il) qui se faisoient au S. Siege par delà, & m'enchargeât d'en escrire tres-expressémēt au Roy, & le prior de sa part de n'endurer point tels scandales. Le fait est, que ladite Abbaye de Mont-Maiour ayant vacqué par la mort du Seigneur Grimaldi Archeuesque d'Avignon, le Pape la donna audit sieur Archeuesque d'Ambrun, comme étant ladite Abbaye en Prouence pays d'obedience, qu'on appelle, & le Roy n'ayant encore Indult pour y s'ômer, & n'en pouuant lors auoir, pour ce qu'il n'estoit encores conuertý. La Cour de Parlement d'Aix receut ledit sieur d'Ambrun à la possession de ladite Abbaye, & Py a maintenu depuis, comme on a donné à entendre au Pape. Le Roy a donné ladite Abbaye au sieur Alphonse Corle, lequel sous le nom d'un sien appellé Cuillaume Corti soldat, qui n'a aucune prouision de ladite Abbaye, a fait euoquer la cause au grand Conseil, & ledit grād Conseil a adingé la possession audit Corti, & condané ledit sieur Archeuesque à la restitution des fruiçts, & aux dépens, dommages & interets. Quant à l'autre, l'Abbaye de sainct Aphrodise vacqua *IN CVRIA*, au temps de Gregoire XIV. qui la donna audit sieur François Isarny, lequel en prit possession à la façon accoustumee, & depuis, vn appellé Riues en ayant obtenu lettre d'œconomat du Roy, & puis lettres de nomination au nom d'un Dominique Resiguier Prestre, a poursiuy ledit Isarny au grand Conseil, & obtenu semblable condamnation contre luy. Lesdits sieurs Archeuesque & Isarny sont icy qui s'en plaignent au Pape, & luy disent qu'il y a trop de son autorité & de celle du sainct Siege, pour ce que le grand Conseil ne se fonde sinon que sur vn Arrest donné pendant les troubles, qu'on n'auoit aucun esgard aux prouisions de Rome. Et à la verité il semble que le grand Conseil vïe vn peu licétieusement dudit Arrest en toutes choses indifferemment, pour le temps où nous sommes à presēt que l'absolution est donnee si long temps y a. L'Abbaye de sainct Aphrodise, qui mesme n'est pas proprement Abbaye, vacqua de vray *IN CVRIA*; ie l'ay veu moy-mesme; & n'est que de mille liures de reuenu par chacun an, & ainsi ne vaut pas le parler, & moins le desplaisir qu'on en donne au Pape: c'est pourquoy entre autres choses ie ne voulus point entrer en contestation avec la Sainteté comme i'eusse peu, & luy dis seulement que ces arrests dont elle se plaignoit, estoient des fruiçts & des festes de nos troubles passez & du diuort qui auoit esté entre le sainct Siege & la Couronne, d'ôt la Sainteté pouuoit iuger combien sagement & vtilement elle auoit fait pour l'autorité du S. Siege de donner l'absolution au Roy, & mettre fin à tels de-

sordres; Qu'au demeurant le Roy ne pouuoit mais de telles choses; Que ces Cours souueraines & autres iugeoient sans luy en demander aduis & sans qu'il en sceut rien. Aussi quand vn Seigneur luy venoit demander pour vne personne Ecclesiastique vne Abbaye vacquante, le Roy ne pouuoit scauoir toutes les vacations, ny tous les tenans & aboutissans de telles choses, & entendoit donner telles dignitez à personnes bien qualifiees, comme on les luy dépeignoit tousiours tels; Que ces Cours souueraines estoient fort opiniastres à soustenir les Arrests qu'elles auoient vne fois donnez, comme que ce fut, & le Roy n'y pouuoit ront ce que l'on penseroit bien, & mesme apres vn si grand trouble, pendant lequel elles disoient auoir deffendu le Roy, & les droits & préeminences de la Couróne, & que tels Arrests n'ont par elle esté donnez à autre fin, & que sa Maiesté leur est bien tenuë.

Au demeurant ie prendray garde à ce que vous m'ordonnez par vostre dite lettre du dixiesme Nouembre, touchant l'oraison qu'on a fait faire à la prestation de l'obedience; & louë que pour la deffense de Prouence vous aschiés à faire de vous mesme tout ce que vous pourrez, comme vous m'escriuez, sans attendre secours d'ailleurs, au moins d'icy: car le Pape ne voudroit en nous aidant offenser le Roy d'Espagne, comme aussi tiens ie pour aussi certain, ou plus, qu'il ne voudroit aider aux Espagnols contre la France, & taschera plustost comme pere commun, de mettre paix entre ces deux Couronnes. De l'armee de mer qui se faisoit à Lisbonne, nous auons entendu icy qu'estant partie sur la fin d'Octobre elle auoit couru grãde fortune, & qu'il s'en estoit submergé 12. ou 13. vaisseaux, & que 30. auoient esté emportez çà & là sans scauoir où, & que le reste s'estoit sauué à la Corogne tout mal accoustré, & que l'Adelantade qui la commandoit estoit malade à l'extremité: mais vous deuez auoir sceu tout ce qui en est, & plustost & mieux que nous. De Monsieur de Mercœur ie ne sçay qu'en esperer, attendu qu'il a esté escrit par deçà à ceux qui sont icy pour luy, que nonobstant qu'il eut enuoyé vers la Roïne, il ne scauoit quel accord se pouuoit faire, ne voyant encores aucune seurété pour la Religion Catholique, & les Huguenots brauants auourd'huy plus qu'ils ne faisoient mesmes auant la conuersion du Roy; & fait on courir par Rome la pretenduë requeste presentee au Roy par les Huguenots, dont on a extrait certaines phrasés, que ceux qui tiennent encores le party de la ligue ont tousiours à la bouche, & les ont apprises aux Espagnols, & entre autres celle-cy; que nous Catholiques n'auons que le corps du Roy, mais les Huguenots ont l'ame & l'affection, qui se rengera tousiours de leur costé, & est tousiours avec eux. Il me vient quelques fois en l'esprit de soupçonner que telles choses ayant esté forgoes par ledit sieur de Mercœur; combien que parmi les Huguenots il y en a d'assez fols pour auoir escrit cela. Tât y a qu'on s'en a de desin de faire douter de la verité & sincerité de la conuersion du Roy.

Ie receus le premier de ce mois vne lettre du Roy du 27. Septembre en faueur des Chanoines & Chapitre de Verdun, touchant vn procez qu'ils ont emuers leur Doyen, qui est celuy destrois faits auxquels ie vous ay escrit cy deuant que ie ne pouuois employer sans scrupule; & partant i'en ay parlé au Pape ia deux fois, & à certains des Cardinaux de la Congregation des Eueques, en laquelle se traite ce differens, & en parleray encores à toutes les

fois qu'il faudra. Le quatriesme de ce mois ie receus encores vne autre lettre du Roy du 18. d'Octobre en faueur de Monsieur le grand Prieur de Champagne, contre quelques Venitiens avec qui il vous a dit auoir procez à Rome: c'est vn fait semblable aux deux premiers desdits Chanoines & Chapitre de Verdun, en ce que ie ne m'y puis employer sans en auoir premiere-ment informé le Roy, & eu nouveau commandement de sa Maiesté & de vous. Il vous plaira doncques sçauoir, que ce different qu'il appelle procez, n'est pas cõtre certains Venitiens particuliers, ains cõtre la Seigneurie de Venise, & n'est pas pardenant vn inge particulier, ains pardenant la per-sonne du Pape, & ne se traicte point aussi au nom du grand Prieur, mais au nom de tout la Religion de Malte. Et le fait est, que ladiète Religion de Malte tant en general par le moyen de quelques Galeres qu'elle a en com-mun, que les Commandeurs & autres particuliers qui ont moyen d'auoir & equipper quelque vaisseau de leur propre, s'en vont ordinairement cou-rrir sur mer, prenans quand ils peuuent les vaisseaux chargez de marchan-dises des marchans Turcs & des Iuifs de Leuant: & vn temps a esté que lors qu'ils auoient fait leur butin, ils se retiroient és ports & plages que les Venitiens ont és isles de ces quartiers là. Dequoy le Turc s'estant plaint plusieurs fois à la Seigneurie, & luy denonçant la guerre s'ils receuoient plus en leurs dits ports & plages lesdits Cheualiers qui couroient ainsi sur ses subiects; la Seigneurie fist remontrer par plusieurs fois à ceux de Malte, qu'elle n'entendoit empescher qu'ils n'allassent & courussent là où ils vou-droient & pourroient, pourueu qu'ils ne vinsent en ses ports & plages, lors mesmement qu'ils seroient chargez du butin des Turcs, autrement qu'ils ne trouuassent mauuais, si pour euitier vne trop perilleuse guerre, dont elle estoit menacee, elle en faisoit tel ressentiment que la necessité requeroit. Ceux de Malte ne laisserent de continuer, nonobstant toutes les remon-strances & dénonciations de ladite Seigneurie, entre autres ledit seigneur grand Prieur, qu'on appelloit lors le Commandeur de Chaumussou, enuoya en course vn sien vaisseau, lequel ayant fait butin de bleds & d'autres choses sur les Turcs, se retira en vn de ces lieux que les Venitiens ont en ces quar-tiers-là, où il luy fut v'sé de la rigueur dont il se plaint; comme peu de temps apres furent aussi prises & fort mal traictees pour semblables causes, 2. ga-leres de ladite Religion, par ceux de ladite Seigneurie de Venise: & de là est venu le procez qu'il appelle; s'estans ceux de Malte plains au Pape Sixte V. & sa Saincteté s'estant interposée vers les Venitiens, & ayant voulu estre informée de part & d'autre; combien que la Seigneurie de Venise n'a oncques voulu bailler rien par escrit, ny subir iurisdiction; ains pour la reuerence qu'elle doit au Pape, & pour luy rendre raison de son faict, luy a fait dire seulemēt de bouche par ses Ambassadeurs cõme la chose s'e-stoit passée, ainsi que ie l'ay narree cy-dessus. Adioustant ladite Seigneurie que courir ainsi és mers, & prédre les marchadises & vaisseaux des particu-liers, n'estoit point faire la guerre au Turc, cõme les Cheualiers de Malte se vitoient; Que le Turc n'en deuenoit aussi de rien plus foible, mais biē plus irrité & plus cruel; Qu'aussi n'en deuenoit aucun bien à la Chrestienté en-commun, ains en pouroit venir grand dommage & ruine, si le Turc se-mouuoit à faire la guerre comme il menaçoit & pouuoit; Que pour recel-

Il y a  
icy quel  
que  
desse-  
Enofie

ler & recepter le butin de ceux de Malte, il n'estoit raisonnable qu'elle se ruinaist; & si lesdits Cheualiers ne faisoient leurs courses & retraites en autres endroits loing de ses ports & plages, elle seroit contrainte d'en faire à l'aduenir de mesme, tant s'en faut qu'elle deust estre blasmee de ce qu'elle tourne à leur demander iustice contre ladite Seigneurie de Venise. Les Venitiens respondent tousiours de mesmes, & apres que les Papes ont tenu vne Congregation ou deux sur cela, ils ne scauent plus qu'y faire, & tout demeure là; comme à present il y a bien près de deux ans qu'il ne s'en est parlé. Ie vous laisse maintenant à iuger si le Roy à la requeste d'un particulier (quoy que son subiect) doit réueller vn tel différent qui dort, & l'espouser contre la seigneurie de Venise, qui luy est bien affectionnee, & qui semble auoir raison. Et de fait la guerre que le Turc fait auourd'huy contre l'Empereur & la Chrestienté, & qui est pour couster trop, a esté suscitée par vn fait semblable, de certains qu'on appelle icy Vïscoqui, subiects de l'Empereur, ou de l'Archiduc Charles, aux limites de la Croatie sur la mer Adriatique, lesquels alloient ainsi courants sur les Turcs particuliers, dont le Turc s'estoit plaint plusieurs fois, sans que l'Empereur les aye voulu ou peu contenir, dont il est auourd'huy au danger que vous scauez. Ie penserois que lors que cette affaire se remettroit ius par les parties mesmes, sa Majesté pourroit avec plus de dignité, & plus de satisfaction desdictes parties s'interposer comme amy commun de ladite Seigneurie & de la Religion, & les exhorter à quelque bon accord entre elles, & supplier le Pape d'y trouuer quelque bon expedient comme pere commun. Et quand sa Majesté estimeroit deuoir faire à present quelque office en faueur de ce particulier sien subiet, i'estimerois qu'elle le feroit avec plus de fruit dudit sieur grand Prieur, & avec moins de degoust des Venitiens, quand il luy plairoit s'en adresser à la Seigneurie mesme par voye d'intercession & de priere: me remettant neantmoins à ce que sa Majesté & vous en aduiserez trop mieux, & estant prest à faire tout ce qu'elle vous me commanderez apres auoir considéré ce que dessus. Quant aux occurrences de deçà, la meilleure que ie vous puisse escrire, est que nostre saint Pere se porte fort bié, graces à Dieu, & depuis le commencement de ce mois il est retourné à faire toutes sortes d'affaires qu'il auoit accoustumé de faire auant son indispositiō: mais pour ce que la goutte qui auoit accoustumé de luy venir de temps en temps, ne luy vient plus, il y en a qui craignent qu'au Printemps prochain il ne luy viēne vn autre accez de mal semblable à celui qu'il a eu ces iours passez, de quoy Dieu le vueille preseruer, & le nous conseruer longuement. Il se trouue fort empesché à ces choses de Hongrie: l'Empereur luy fait grande instance de grand secours, & il luy voudroit donner, mais il ne peut plus, y ayant desia dépensé beaucoup & d'argent & d'hommes, & le tout en vain; bien employe-r'il toute son autorité pour vrir les Princes Chrestiens, & les exhorter & encourager à la desfence de la Chrestienté, comme pour cette fin il laissera encores pour quelque temps le Cardinal Caetano en Pologne, mais ils ne semblent pas y estre gueres disposez.

Le troisieme de ce mois arriuerent icy diuers courtiers, portans aux marchands la nouuelle de la suspension des payemens, & reuocation des assignations que le Roy d'Espagne auoit faite pour les marchands & negocia-

teurs qui auoient à receuoir de luy , & comme en outre il auoit retenu tout l'or & l'argent des particuliers qui auoit esté porté en la dernière flotte arrivée depuis que les Anglois auoient quitté ceste costé-là. Je vous enuoye la copie de l'ordonnance touchant ladite suspension, encores que ie croye que vous l'avez eue plustost d'ailleurs. Tous les marchands & banquiers de ces quartiers en sont fort troublez , & le maudissent. On pense qu'il s'en ensuiura plusieurs banqueroutes, & la ruine de plusieurs particuliers, qui ont baillé tout ce peu qu'ils auoient aux marchands qui ont fait parry avec luy. Ceux qui parlent plus modérément de ce fait , disent qu'il l'a fait pour ce que les Anglois ayants empesché, & en grande partie gasté & ruiné la flotte qui deuoit aller aux Indes, le Roy a preueu que d'un long-temps il ne viendrait point de flotte , & qu'il ne receuroit rien desdites Indes , & que cependant il pourroit auoir faute de finances, pour la grande dépense qu'il lui conuient supporter en plusieurs endroits ; & partant a esté contrainct d'en vser comme il a fait. A quoy se voit de quelle importance eust esté que l'on se fust arresté & fortifié à Calis , & la belle occasion qui s'est perdue d'humilier ce Prince, & de le reduire au point de la raison. Ce manquement de foy luy fera perdre credit pour long temps , & mesmes que c'est pour la seconde fois, en ayant fait autant en l'an 1575. & dit-on qu'il ne pourra plus faire payer argent en Flandres par voye de lettres & de marchands, comme il faisoit auparavant avec assez de facilité & de promptitude ; & qu'il faudra qu'il l'y fasse porter en especes , avec long temps & grandes dépenses, & mesmement si c'est par terre. Il est vray-semblable que pour la Commodité qu'il a presente de Calis il s'attend de l'y faire porter par mer : mais si vous & les Anglois estiez vigilans en ce détroit-là , il en pourra demeurer pour vous, ou il faudra qu'il luy couste bon, & qu'il l'enuoye avec vne armee, & en ce cas vous les verrez encores mieux venir. Et ainsi se voit de plus en plus combien il importeroit que nous eussions des vaisseaux de guerre de ce costé-là, comme aussi des galeres sur la mer Mediterranee, ainsi qu'il a esté dit & escrit autrefois.

La leuee des quatre mil hommes, dont ie vous escriuis dernièrement , ne s'aduance gueres , combien que pour trouuer plus facilement des soldats qui ne vont volontiers faire la guerre contre la France, les Espagnols firent courir le bruit ces iours passez que le Roy estoit malade , & puis qu'il auoit eu l'extreme Onction , & en fin qu'il estoit mort , & que Monsieur le Legat auoit enuoyé vn courier exprés au Pape. Et quand la fausseté de ceste nouvelle a esté conuaincuë, ils en ont forgé vne autre , qu'il ne falloit plus craindre Monsieur le Marechal de Biron, ny la Caualerie Françoisse, car elle auoit esté taillée en pieces par le Cardinal d'Autriche , & à peine ledit sieur Marechal s'estoit sauué à la fuite dans Amiens avec 5. cheuaux seulement.

Je vous escriuis dernièrement ce que le sieur Ruemanus nommé à l'Euesché de Bayonne, auoit escrit par deçà à Oliuier l'Euesque solliciteur d'expedition en ceste Cour, pour dire à Monsieur le Cardinal Alexandrin de la part du Roy, & le conseil que i'auois donné audit Oliuier d'en retirer response par escrit , ce qu'il a fait. Et ledit seigneur Cardinal ayant escrit vne lettre audit sieur Ruemanus sur ce fait à part, en a fait bailler audit Oliuier

la copie mesme que ie vous enuoye, sur laquelle i'en ay fait faire vne autre que ie tiens par deuers moy: vous aduiserez ce qu'il plaira au Roy commander là dessus.

De plusieurs occasions qui se sont dites pourquoy Erric Monsieur de Lorraine Euesque de Verdun estoit venu à Rome, ie treuve en fin que cette cy est la plus vraye, qu'il y est venu pour impetrer du Pape qu'il le décharge de l'Euesché, & luy permette de se rédre Iesuite; dequoy il a parlé deux fois à sa Sainteté, qui s'y rend difficile. Cependant celuy qui commandoit à sa chambre, qui estoit vn Chanoine de Toul appelé la Bastide, & vn sien page de la maison d'Anglure l'oat preuenu, s'estans rendus Iesuites sans auoir eu besoin de permission, pour n'estre Euesques comme luy: aussi vn Gentilhomme Lorrain qui est venu avec luy s'y est rendu.

Le differant du Cardinal Borromee Archeuesque de Milan, & du Connestable de Castille Gouverneur, continué tousiours pour le regard de leurs iurisdiccions. Cependant la puissance seculiere s'en fait croire, comme celle qui a la main forte; aussi ne me semble elle pas auoir si grand tort comme l'on croit icy. Au Duché de Milan l'experience a monstré que semer trop grande quantité de riz apportoit deux maux; l'un, que l'air en deuenoit mal-sain, dont s'ensuiuoit plusieurs maladies; l'autre, que la terre qui denoit seruir à porter du bled estoit par les particuliers employée à porter du riz, auquel ils gaignoient plus le faisans transporter au loing. Pour ces considerations le Connestable, suiuant l'exemple d'autres Gouverneurs ses predecesseurs, fit dernièrement vn Edict qu'on n'eust point à semer du riz es terres qui fussent bonnes à porter du bled, froment, ou seigle, ny à certain espace près des villes & des chemins publics: le Cardinal Borromee Archeuesque de Milan pretendait que cet Edit n'obligeoit en rien les champs & terres des Ecclesiastiques, & leurs fermiers & laboureurs, quoy que seculiers & laïques, fit vn autre Edit tout semblable pour lesdits champs & terres Ecclesiastiques, & leurs fermiers & laboureurs; ce que le Connestable ne trouua bon, & le Roy d'Espagne en estant aduert y, l'a trouué encores plus mauuais. Et s'estât trouué desdits fermiers & laboureurs qui contre l'Edit auoient semé du riz es chāps & terres des Ecclesiastiques, ledit Connestable a fait proceder cōtre lesdits fermiers & laboureurs par les iuges & officiers du Roy: dequoy ledit Cardinal Archeuesque offensé fit publier vn monitoire contre ledit Connestable, & excommunia quelques vns desdits officiers, disant qu'ils n'ont rien que voir sur les biens des Ecclesiastiques, ny sur leurs fermiers & laboureurs, & que c'est à luy seul que la iurisdiction en appartient. Le Connestable & officiers du Roy au contraire disent, que les loix du Prince faites pour le bien public, & pour le salut commun de tous, & qui ne blessent l'immunité & liberré de l'Eglise, doiuent estre aussi gardees par les Ecclesiastiques en leurs biens temporels, & que c'est au Roy seul qui a la direction & conduite du bien public, & toutes sortes de personnes en sa protection, à faire tels Edicts, qui concernent le bien commun de tous les Ecclesiastiques & autres; & au reste les personnes layes, & d'autre nature subiette à la Iurisdiction Royale, ne sont point exemptes pour estre fermiers ou laboureurs des biens temporels des Ecclesiastiques. Voila tout le differant au vray, lequel vous auriez bien,

est iugé en France , ains il n'y auroit point de differant.

A ce matin le Pape a fait vn seul Cardinal , à sçauoir le second fils du Duc de Bauieres , & a donné au troisieme la coadiutorerie de l'Archeuesché de Cologne que tient son oncle frere dudit Duc. A tant ie prie Dieu, Monseigneur , &c. De Rome ce Mercredy des quatre temps 18. Decembre 1596.



# LIVRE TROISIEME.

ANNEE M. D. XCVII.

A MONSIEVR DE VILLEROY.

LXXXIII.



MONSIEVR , La lettre qu'il vous a pleu m'escrire le 24. Nouembre me fut renduë le 22. Decembre, deux ou trois iours apres que nostre ordinaire fut party pour Lyon. le vous remercie tres-humblement de la diligente responce que vous auez fait à tout ce dont ie vous auois escrit auparanant, & de la part qu'il vous a pleu me faire des choses qui se passioient par delà. La principale chose à laquelle i'ay à respondre est des Cardinaux Sforza & Aquaiua, desquels vous a esté escrit que le premier auoit pris le party d'Espagne, & que le second en vouloit faire autant. Ceux-là mesmes qui le vous ont escrit me le firent dire à moy en mesme temps, & j'en ouïs encores parler à d'autres. Mais en chose qui ne presse point, & où il n'y a aucun danger d'attendre vn peu pour s'en esclaircir, ie n'ay point accoustumé à me haster à vous en escrire, & mesmement s'il s'agit de vous donner mauuaise impression de personnes d'honneur, & de vous mettre en allarme. le m'enquis dès le commencement d'où pouuoit venir ce bruit, & n'en trouueray aucun solide fondement. Le Cardinal Sforza qui est de noble & illustre extraction, courageux & genereux à merueilles, entendu en affaires d'Estat autant ou plus qu'autre que ie cognoisse par deçà, & qui porte fort impatiemment la tyrannie des Espagnols, auoit conceu grande esperance qu'elle seroit abaissée en Italie par le moyen du Roy, y eust volontiers contribué tout ce qu'il eust peu, & ne s'en celoît point: mais quand il vid que nous auions perdu du costé de delà Calais & Cambray, & du costé de deçà Briqueras & Cauors, & qu'il se parloit encores de laisser le Marquisat de Salusses au Duc de Sa-



uoye, il conclut en luy-mesme que nous ne pouuions, & que possible nous ne voulions point entendre aux choses d'Italie; & perdant l'esperance qu'il en auoit conceüe, il ne parla plus contre l'Espagnol si librement comme il souloit, & monstroit faire plus cas de leurs caresses qu'il ne faisoit auparavant; & en somme tourna à sa premiere dissimulation, laquelle est familiere; & necessaire à ceux qui oppriment de plus puissans qu'eux, n'ont où recourir: de là vint ce bruit qu'il auoit pris le party d'Espagne. Je l'ay veu quelquesfois depuis, mais ie le trouue tout tel qu'auparauant, & fort marry de nostre aduersité: & la derniere fois que ie le vis; qui fut le huitiesme de ce mois, il medit entre autres choses, que tant que le Roy feroit la guerre au Roy d'Espagne à boutades, & avec la Cauallerie seule, il ne feroit grande chose; & seroit en danger que lors qu'il se seroit retiré, les Espagnols ne luy emblassent ores vne ville ores vne autre, comme ils auoient fait cy-deuant: mais que sa Majesté deuoit tenir sur la frontiere des bays-bas vne armee durable & permanente tout le long de l'an, & composee de bonne infanterie ensemble avec la caualerie, & vne quantité telle qu'il en peust continuer la depense, comme seroit de dix ou douze mille bons hommes de pied, & d'environ deux mille cheuaux; avec laquelle armee ainsy entretenue, & de temps en temps remplie, sadite Maiesté pourroit recouurer le sien, & prendre sur l'ennemy beaucoup, & le rengier à la raison. Le Cardinal Aquauina est aussi fort noble & genereux, & a peu sentit d'autant plus la pesanteur de la domination Espagnolle, qu'il est nay & a esté esleué sous icelle, & y a tous les siens; de sorte qu'ayant esté enuoyé Legat en Auignon, il est vray semblable qu'il a esté bien aise de trouuer l'interest du saint Siege conjoint avec celui de la France, & qu'en bien seruant le Pape qui l'auoit enuoyé, & en faisant le deuoir de bon Cardinal, il peult par mesme moyen & en consequence aider à la conservation de la Couronne tres-Chrestienne, qui seule pouoit seruir de contrepoids aux choses de la Chrestienté, & de refuge à ceux qui se trouueroient opprimez par ceste nation orgueilleuse, à laquelle rien ne suffit, & qui veut tout vsurper. Les Espagnols qui veulent que tout le monde serue à leur ambition & cupiditez, & mesmes ceux qui sont nays sous leur domination, ne pouuant comporter ce deuoir d'homme de bien & de Cardinal moderé, non seulement en parloient mal, principalement apres la reduction de Marseille, mais aussi maltraittoient ses freres au Royaume de Naples d'où ils sont. Dequoy luy aduertiy en escriuit au Roy d'Espagne en homme courageux, & qui sçauoit en sa conscience n'auoir rien fait pour l'offenser, ny pour autre consideration que du seruice du saint Siege, & du bien de la Chrestienté: & le Roy d'Espagne luy escriuit bien prudemment vne fort honneste lettre, & commanda au Viceroy de Naples que ses freres ne receussent pire traitement que les autres Gentils-hommes & Seigneurs de leur qualiré. Cela, avec la prudence & discretion dont ledit Seigneur Cardinal sçait vser enuers tous Princes, & mesmes envers le sien, a donné occasion à quelques vns de penser & dire de luy ce qui vous a esté escrit. Mais ie ne trouue point que pour cela se doie conclurre que ledit seigneur Cardinal se soit changé; car comme auparavant il n'a iamais fait ny deu faire profession d'inimitié contre le Roy d'Espagne, duquel il est nay subiet, ains s'il l'auoit faite, sa prudence & son

amitié

amitié mesme en seroit moins à estimer de nous & de tous autres; aussi pour avoir demandé & obtenu iustice de son Roy, & auoir fait office envers luy pour ses freres, il n'a point renoncé à la bõne intelligence que pour le bien commun du saint Siege & de la France, il a eue durant sa charge avec le Roy & ses ministres en ces quartiers d'Auignon; & moins a-il renoncé à sa preud'hommie, à sa constance & generosité, de façon que s'il retourne en Auignon il ne face tout ce qui tournera au bien de la France, entant qu'il sera conioint avec le service du Pape son maistre, & avec l'autorité & grandeur du S. Siege, auquel il se proposera de seruir premieremēt & principalement, comme il a tousiours fait cy-deuant. Et seroit simplicité à nous de penser que ce qu'il a fait iusques icy, il l'eust fait pour plaire à nous, ou pour desplaire aux Espagnols; car à la verité il ne l'a fait sinon pour ce qu'il a estimé le deuoir faire, & qu'en ce faisant il faisoit le bien & profit du Pape, & du saint Siege, & de la Chrestienté; & l'eust fait plus volontiers, si la chose eust peu plaire encores au Roy d'Espagne. Toute sa louange en cela, & tout le grē que nous luy deuons sçauoir, consiste en ce que jaoit qu'il fust nay sujet du Roy d'Espagne, & qu'il sçeust qu'il luy feroit tres-grand desplaisir, & qu'il s'en pouuoit ressentir contre luy & les siens, ce neantmoins il n'a laissé de faire ce qu'un homme de bien, un bon Cardinal, & bon Legar doit faire; dequoy pour mon regard ie l'estime beaucoup plus, & luy sçay autant de grē que s'il l'auoit fait pour quelque particuliere affection qu'il nous portast, & me fierois d'autant plus de luy à l'aduenir. Et de fait puis que le Roy a toute bonne intention & deuotion à la Religion Catholique, & ne veut que choses raisonnables, & conjointes d'intcrest avec le saint Siege, il me semble que sa Majesté a occasion de bien esperer de ce personnage, duquel l'integrité, constance, & resolutiõ est mesluy esprouuee & asseuree. Pour cela mesme i'eusse estimé faire quelque desseruire à sa Majesté, si sans quelque bon fondement ie luy eusse donné à penser mal, & à se deffier de luy, & de l'autre precedent: & mesme que ie craignois que par delà on ne s'en laissast entendre quelque chose qui peust paruenir à leurs oreilles, & qu'il n'y a chose dont eux qui sont genereux & magnanimes s'irritassent plüstost, que s'ils se voyoient mescreus & mescongneus de vous & de moy pour autres qu'ils ne sont. De vous escrire les choses qui se disent, que ie ne croy point, ou que ie sçay estre faußes, & vous en demander les refutations, ce ne seroit iamais fait; car il n'est iour du monde que ie n'en aye les oreilles battues. Ledit Seigneur Cardinal Aquauina arriva en cette Cour le 21. Decembre, & ie le fus visiter le lendemain, & fus peu avec luy, pource qu'il y auoit grand nombre de Cardinaux, & autres qui le visitoient les vns sur les autres. Depuis i'y retournay le 9. de ce mois, & fus une bonne piece avec luy. Il se dit estre tres-affectionné & tres-obligé seruiteur du Roy, & ne ceder en affection à seruiteur que sa Majesté aye, non pas mesmes aux François, car ainsi me parla t'il; se bouë fort de tous les Ministres de sa Majesté, avec lesquels il a eu affaire, & des Huguenots mesme, iusques à dire qu'il a receu plus de courtoisie & de respect en eux, qu'en beaucoup de Catholiques en Italie.

Le Pape ne disposera de l'Euesché de Vannes sans participation & lettres du Roy, & ne fera rien qui puisse troubler le dessein que vous m'escriuez

qu'ont les gens de bien , de si bien réunir le Roy & le Royaume avec le S.<sup>r</sup> Siège & avec la Sainteté que ce soit chose inseparable. Sadite Sainteté de sa part vous prie, exhorte, & coniure de vous en garder aussi vous mesmes par delà, & entre autres de ne vous laisser aller à l'importunité de ces deputez de la Religion pretenduë reformee, dont il m'a parlé ia plusieurs fois, & en est en grande peine. Je luy ay assuré; en tant que ie pouuois, que le Roy ne leur accorderoit rien de plus que le feu Roy leur auoit accordé par l'Edit de l'an 1577. Et à la verité on ne scauroit faire pour le iourd'huy rien par delà, qui plus affligeast la Sainteté, & resoluist les Espagnols, que d'amplifier la licence que ces gens ont déjà. La pension sur l'Euesché de Beauuais fut constituée par Bulles à part, apres que le Roy' & vous m'en eustes escrit, & plus d'un mois apres que les Bulles de l'Euesché furent expédies & enuoyees par delà.

L'Archeuesché de Tours fut preconisé en Consistoire le 18. Decembre, qui fut le dernier consistoire denant les festes de Noël, & eust esté proposé & expédié le 8. de ce mois, auquel iour se tint le premier Consistoire depuis les festes, n'eust esté vn differend, ou ciuilité trop grande qui est entre Messieurs les Cardinaux Iustinian & Aquaiua sur la Vice-protection. Quand Monsieur le Cardinal de Ioyeuse s'en alla d'icy en France quelque temps apres la creation de ce Pape, il laissa pour Vice-protecteur Monsieur le Cardinal Aquaiua, lequel estant enuoyé Legat en Auignon en l'absence de Monsieur le Cardinal de Ioyeuse, il substitua en sa place de Vice protecteur Monsieur le Cardinal Iustinian. Cela a esté cause qu'estât dernièrement retourné Monsieur le Cardinal Aquaiua en cette Cour, ledit sieur Cardinal Iustinian luy a renuoyé les expeditionnaires & sollicitateurs des matieres de Frâce, disant que c'estoit Monsieur le Cardinal Aquaiua qui l'auoit laissé Vice-protecteur quand il s'en alla en Auignon, & que la Vice-protection cessoit par le retour & presence en Cour dudict sieur Cardinal Aquaiua. A quoy repliqua Monsieur le Cardinal Aquaiua, que depuis qu'à son depart de Rome il eust substitué Vice-protecteur Monsieur le Cardinal Iustinian, Monsieur le Cardinal de Ioyeuse Protecteur en chef retourna à Rome, & y demeura vn an, seruant luy-mesme en personne la Protection de France, & ainsi cessa la Vice-protection qui auoit esté laissée par ledit sieur Cardinal de Ioyeuse à luy Cardinal Aquaiua. Et ledit sieur Cardinal de Ioyeuse s'en allant depuis en France il y a vn an, laissa Vice-protecteur Monsieur le Cardinal Iustinian, qui par ce moyen tint la Vice-protection de Monsieur le Cardinal de Ioyeuse mesme, & non de luy Cardinal Aquaiua, & partant c'est au Cardinal Iustinian de continuer & exercer ladite Vice-protection, & d'expedier les matieres de France, & non à luy Cardinal Aquaiua: lequel adiouste d'abondant, qu'il est icy pour peu de temps, & qu'il luy faudra retourner en Auignon dans peu de iours, & par ainsi n'y auroit propos de recommencer vne charge, qu'il luy faudroit laisser incontinent apres. Voila la ciuilité de l'un & de l'autre, par laquelle ledit Archeuesché de Tours a esté retardé; avec quelques autres matieres de France. De ma part, i'estimay en moy mesme dès le commencement que Monsieur le Cardinal Aquaiua auoit raison, & neantmoins que Monsieur le Cardinal Iustinian faisoit honnestement &

ciement d'enverser comme il faisoit, pourveu qu'en fin il se laissast vaincre, & que nos matieres ne demeurassent en arriere. Ce neantmoins ie n'ay point voulu monstrier ce que i'en estimois, & moins leur donner à penser que i'en desirasse vn plus que l'autre, & leur en ay laissé faire entr'eux, sans leur en parler ny à l'un ny à l'autre, iusques à ce que i'ay veu que ce jeu dureroit trop. Et alors les estant allé trouuer, ie leur ay tenu à chacun vn mesme langage; à sçauoir que ie ne me voulois point ingerer d'en prier l'un plutôt que l'autre; que le Roy les tenoit tous deux pour confidens, & pour ses bons amis, & que chacun d'eux honoreroit la Vice-protection: mais que ie les suppliois bien tous deux d'en vouloir parler ensemble, & de s'en accorder & accommoder entr'eux, afin que la prouision des Eueschez & Abbayes ne fut plus retardee. Et pource que avec tout cela ils continuoient en leurs rennois de l'un à l'autre, i'en parlay au Pape en l'audience que i'eus de sa Sainteté le Vendredy 10. iour de ce mois, & luy dis cela mesme que i'auois dit à chacun d'eux, suppliant sa Sainteté de leur ordonner de s'en accorder, & de mettre fin à cet excez d'honnesteté, qui preindicoit au public, ce que sa Sainteté me promit de faire: & ie m'attendois qu'il le feroit au Consistoire du Lundy 17. de ce mois, toutesfois elle ne l'a encore fait, & lesdits Cardinaux persistent encores à s'entre r'enuoyer ceste charge. J'en parleray derechef à sa Sainteté demain, Dieu aidant, & tout aussi tost que l'un ou l'autre de ces deux Cardinaux proposera, l'Archeuesché de Tours sera expédié le premier.

Nous ferons aussi dépescher bien tost apres celuy de Roüen pour Charles Monsieur frere naturel du Roy, quand la dispense, dont il a besoin pour n'estre nay de mariage, sera expédiée. Nostre saint Pere, apres que ie luy en eus parlé, voulut que la chose fut veüe en la congregation des matieres consistoriales, pour instruction & information de laquelle ie fis vn memoire en Latin, contenant les causes pour lesquelles sa Sainteté deuoit accorder ceste dispense, & estre bien aise de l'occasion qui se presentoit. Aussi la congregation, apres auoir veu ledit memoire, ny fit aucune difficulté comme le consistoire ne fera non plus difficulté sur le gratis de l'expedition des Bulles, pour l'honneur que ce Prince a d'appartenir de si près au Roy. Quant à l'Archeuesché de Reims, vous iugerez assez de vous mesme, que venant impettrer le gratis des Eueschez de Beauuais & de Rennes, & de plusieurs Abbayes pour vns & pour autres; & pendant encores au iourd'huy le gratis de l'Archeuesché de Tours & de Roüen qui ont esté demandez les premiers, comme les commissions m'en sont venuës les premieres, ie n'ay deu pour encores faire instance de celuy dudit Reims. Bien ay-je resolu en moy-mesme long temps y a, que ce seroit le premier gratis d'Eueschez ou Archeueschez que ie demanderois; & auois desleigné si Monsieur de Luxembourg venoit à temps, de faire en forte que ce fust la premiere grace qu'il demandast, pour l'obtenir plus facilement; car il y a plus à faire qu'on ne pense par delà. Les Eueschez ne se peuuent expedier qu'en Consistoire, & le gratis auoit accoustumé d'en estre aussi demandé & obtenu en Consistoire par l'aduis des Cardinaux, comme les plus grands droits appartiennent aux Cardinaux; & ainsi fut consistorialement accordé le gratis de l'Euesché d'Eureux, & depuis celuy de Rennes, & le sera vn

de ces iours celuy de Roüen. Quant à celuy de Beauuais, nostre saint Pere nous fit ce bien de faire proposer & expedier cét Euesché en Consistoire, sans parler rien du gratis, & comme si on eust deu payer en tout & par tout, & puis en sa chambre nous signa vn *MOTU PROPRIO*, pour estre dépesché gratis par voye secrette; ce qui ne s'estoit encore fait pour aucun Euesché: & m'a sa Sainteté donné intention d'en faire de mesme pour l'Archeuesché de Tours, apres luy en auoir parlé quatre fois, & employé tous les lieux de persuasion qu'il m'a esté possible. Outre la difficulté qui prouient de tant de graces demandees coup sur coup, & à grandes peines obtenues, on fait de mauuais offices par deça & contre la personne de Monsieur de Nantes, & contre l'expedition de l'Archeuesché de Reims en sa personne, & à ce que cét Archeuesché ne s'expediaist iamais sans l'Abbaye de saint Remy, la des-vnion de laquelle d'avec l'Archeuesché est secrettement empeschée par deça, par ceux-là mesmes, qui ont fait semblant de s'en contenter par delà. Qui sont toutes difficultez sur difficultez pour le gratis que nous desirons, auquel nous aurions tousiours beaucoup à faire quand il n'y auroit autre empeschement.

Quant à l'Archeuesché de Sens pour Monsieur de Bourges, i'en feray vne lettre à part, soit au Roy qui m'en a escrit de sa main, soit à vous: comme il faudra aussi que ie face encores d'autres lettres à part pour autres affaires, lesquelles seront partie avec la presente, partie en vn paquet à Monsieur de Gesvres, qui m'a escrit touchant vn affaire du Clergé de Mets & du pays Messin, & touchant l'Abbaye de saint Nicolas des prez de Verdun dont il a pleu au Roy me faire don, auquel ie ne doute point que vous n'ayez eu bonne part, encores que vous n'en fassiez le semblant, & que pour cela mesme vous m'obligiez d'autant plus. Mais comme ie me sens tres-obligé de cette grace au Roy, & à vous, & à mondit Seigneur de Gesvres, & la tiens à singuliere faueur & honneur, aussi vous supplai-ye, le Pape l'ayant donnée à Monsieur Serafin, qui en auoit enuoyé les Bulles en Lorraine long temps auant que ma dépesche en arriuaist icy, qu'il vous plaise de prendre en bonne part qu'en ma cause & interest propre, ie suiue l'aduis que ie vous ay donné autrefois en d'autres personnes pour semblables graces que le Pape auoit faites audit sieur Serafin; lequel outre ses louables qualitez, & le zele qu'il a au seruice du Roy, en est d'autant plus digne, qu'il m'a offert de s'en deporter, & requis vser de la grace que sa Majesté m'auoit faite, ne voulant en cela ny en autre chose contreuenir à rien qui soit de l'intention de sa Majesté.

Et puis que ie me trouue icy en matiere d'expedition, ie vous diray, combien que ce soit hors les termes de vostre dite lettre à laquelle ie responds, & neantmoins pour choses dont le Roy m'a escrit, que ie parlay au Pape le Vendredy 10. de ce mois, de pouruoir sans Angelique d'Estree de l'Abbaye de Montbuisson avec retention de l'Abbaye de Bretencourt qu'elle a déjà. Et combien que ce soit chose non accoustumee, & defendue par les Canons, que les personnes & Religieuses, & mesmement femmes, tiennent deux Abbayes; ce neantmoins apres auoir entendu qu'il importoit à la conseruation dudit Monastere de Bretencourt, qu'il demeurast en main de personnes si bien apparetee comme est ladite d'Estree, sa Sainteté mo-

donna intention de la luy bailler pour quelques années, & depuis a envoyé au Dataire le memoire que ie luy en auois laissé par escrit. Ceux de la Datairerie ont accoustumé de se monstrier rigoureux en telles choses, & donnent le temps fort court: nous tascherons à l'auoir le plus long que nous pourrons, & puis auant qu'il soit finy trouuerons moyen de le prolonger, Dieu aydant.

Ie suis aussi apres à faire expedier frere Seraphin Banchi, qui donna au Roy l'aduis de l'attentat de Pierre Barriere, & en ay parlé au Pape ià trois fois, & baillé le memoire par escrit. On est sur la forme de l'expedition, laquelle ie procureray la meilleure qu'il me sera possible; comme ie feray aussi pour le regard du Bailly de l'Aigle neuue de feu Monsieur le Grand Maître, l'affaire duquel i'embrasse de tant plus grande affection, qu'il me semble appartenir à toute l'Nation Françoisé plus qu'à luy-mesme.

Le marchand Portugais est fort apres moy pour auoir la resolution que vous me promettez pour la tapisserie; qui est tout ce que i'auois à répondre à vostre dite lettre du 24. Nouembre.

Au demeurant le 10. de ce mois deux heures auant qu'aller à l'audience, ie receus lettres de Monsieur le Conestable, & de la fille de Madame l'Amirale: i'en parlay au Pape conformément à leur desir; mais sa Sainteté ne peut faire grande chose pour elle, que premierement le point de la iurisdiction ne soit décidé, lequel Monsieur de Sauoye va embrouillant tousiours de plus en plus. Car du commencement il ne demandoit sinon qu'un de ses Senateurs assistast au procez avec le Nonce de sa Sainteté; & maintenant il pretend que ses iuges en doiuent cognoistre seuls sans ledit Nonce, n'estant question que de simple sortilege sans inuocation du diable, comme ils disent à present, combien qu'auparauant ils en ayent dit tous les maux que ie vous escriuis par mes lettres du mois passé. Par où vous voyez que du commencement pour donner à sa Sainteté mauuaise impression de cette pauvre Dame, ils ont dit tout le pis qu'ils ont peu, & mesme qu'elle estoit heretique relapse, sans s'appercevoir que par là ils fondonent la iurisdiction dudit Nonce; & maintenant pour pouoir disposer à leur aise d'elle & de ses biens sans empeschement dudit Nonce, ils se reduisent à simple sortilege, lequel encores doit estre aussi peu vray que le reste donc ils se dédisent. Laquelle obseruation ie presentay à sa Sainteté, & pris de là occasion de la supplier de ne leur croire rien cy-apres d'elle, & d'auoir pitié de ceste pauvre Dame, qui n'estoit trauaillee que pour l'enuie qu'on auoit de son bien, & de le faire seruir de partage à vn tas de petits louueurs qui se nourrirent au pied de ces monts, d'où l'on escrit qu'on y arreste les courriers de France comme vous l'avez entendu d'ailleurs.

Ie vous ay escrit cy-deuant les propos qui s'estoient passez entre Monsieur le Cardinal de S. George & moy, sur le desir qu'il a de voir vne paix ou suspension d'armes pour long-temps entre France & Espagne, iusques à la dernière fois qu'il m'en auoit parlé le 13. Decembre. A la premiere fois que i'y retournay, qui fut le 20. ensuiuant, il ne faillit de me remettre sur le mesme propos: & apres que ie luy en eus dit sommairement ce qu'autrefois ie luy en auoit dit plus au long, il me confessa luy-mesme que

le Roy d'Espagne deuroit racheter la suspension d'armes pour dix ou douze ans avec la reddition de Calais & d'Ardres pour le moins, & m'en allegua luy-mesme cette raison; Que ne se faisant point de paix, ny longue suspension d'armes entre France & Espagne, l'Empereur de son costé ou continuera la guerre de Hongrie, ou s'accordera avec le Turc. S'il continuë la guerre, il est en grand danger d'estre ruiné avec les siens, qui seroit vn grand deshonneur & dommage au Roy d'Espagne, d'auoir mieux aimé laisser ruiner la Religion Chrestienne en ces pays là, & sa propre maison, & ses parens plus proches, que de s'accorder à condition raisonnable avec les Chrestiens ses voisins. Outre que quand le Turc auroit ruiné l'Empereur & ses freres, il se seroit encores ouuert le chemin à la ruine du Roy d'Espagne mesme. Que si la paix se faisoit entre l'Empereur & le Turc, ledit Turc, qui est vn jeune Prince enorgueilly de son bon-heur, la voudra aduantageuse, & apres l'auoir extorquee telle, ne pouuant demeurer coy, ne se tournera contre personne plus volontiers que contre le Roy d'Espagne, auquel suruenant cette grande tempeste avec tant d'autres affaires & ennemis qu'il a déjà, il pourroit estre réduit à fort mauuais party, & se repentir trop tard de s'estre opiniastré à prendre & retenir l'autrui. Auquel propos de la guerre de Hongrie, ie vous diray que nostre saint Pere en est en grand soucy, preuoyant qu'au Printemps prochain le Turc est pour y faire vn grand effort, & ne voyant point du costé de l'Empereur & d'autres Princes Chrestiens, grands preparatifs ny esperances pour luy resister comme il faudroit. Sa Sainteté en fait faire souuent des Congregations & Consultations; mais on ne trouue point de quoy fournir au grand secours qu'elle voudroit donner à l'Empereur, & ne sçait on bonnement quel conseil luy donner, pour obuier au grand mal qui est à craindre, sinon que chacun dit qu'il faudroit moyenner ceste longue suspension d'armes entre France & Espagne; & ie ne trouue icy personne qui ne la voulust voir déjà faite aux despens de nostre reputation & de nostre Royaume, tenans les Espagnols ce qu'ilstiennent de la France. En fin j'entends que le Pape s'est resolu d'enuoyer vers l'Empereur le seigneur Iean François Adobrandin avec quelques Capitaines de marque, pour conferer avec l'Empereur, & voir de plus-pres l'estat des choses de delà, & penser ce que l'on y veut & peut faire, pour selon l'information & aduis qu'il en enuoyera au Pape, estre prise resolution plus certaine par sa Sainteté de la qualité & de la quantité de secours qu'elle aura à donner. Aussi m'a esté dit que sa Sainteté a mandé au Cardinal Caëtan qui est en Polongne & voudroit retourner en çà, qu'il patiente par delà; estimant sa Sainteté que quand bien ledit Cardinal ne pourra impetrer que les Polonois entrent en ligue avec l'Empereur contre le Turc, neantmoins le séjour dudit Cardinal par de là fera aller plus retenu ledit Turc, lequel par le parlement dudit Cardinal estant fait certain que ladite ligue ne se feroit plus, seroit plus hardy à attenter tout ce que bon luy sembleroit.

Le disserend de iurisdiccions Ecclesiastiques & seculieres dure tousiours à Milan, & de ceste ville capitale s'est estendu aux autres du Duché, comme à Pauie, Tortone, & autres, où les Eueques & les Magistrats du Roy d'Espagne s'entreheurtent, & s'entrebrauent chacun en sa sorte, & con-

me il peut : mais en la voye de faire , les armes & les forces ont & auront toujours le dessus. Nostre saint Pere s'en trouue fort empesché , & a en cela vne autre matiere de Congregation & de Consultation , toutes les deux parties ayants enuoyé à la Sainteté des personnes qui parlent & escriuent fort opiniastrément les vns contre les autres , chacun donnant à son party la raison & le bon droit , & soustenant tout ce qui a esté fait par ceux qui l'ont enuoyé. La puissance temporelle , à qui le champ est demeuré , & qui tient & possède , ne demande qu'à gagner temps & entretenir les choses en l'estat qu'elles sont , & cependant par l'Ambassadeur d'Espagne donne icy de belles paroles , & fait de tres-grandes reuerences & soubmissions en apparence , & en fin de compte ie me doute qu'elle gaignera , & qu'on n'en aura autre chose.

On m'a dit qu'à Naples le Viceroy y assemble les principaux du Royaume , pour obtenir d'eux quelques notables subsides pour le Roy d'Espagne , & qu'on y fait leuee de gens de guerre , soit pour enuoyer aux Pays-bas , comme ie vous ay cy-deuant escript qu'on y en vouloit enuoyer quatre mille , ou comme d'autres disent à Monsieur de Sauoye , en cas qu'il n'aye ny paix ny trefue avec le Roy.

La suspension des payemens faite en Espagne apporte grande incommodité en cette Cour aux Espagnols mesmes , qui ne trouuent plus aucun credit , & ne sont pas mesmes payez des lettres de banque qu'on leur enuoye , & par ce moyen ne peuvent faire expedier leurs matieres , ny poursuivre leurs procez , n'y s'entrenenir. L'Ambassadeur d'Espagne mesme n'est pas , à ce qu'on dit , payé des assignations , disans les marchans qu'ils n'ont moyen de payer , pource qu'on ne les paye point.

Si Monsieur le Cardinal Aquaiua retournera en Auignon ou non , il n'y a encores rien de certain. De ma part , delors mesmes qu'il estoit encores en Auignon i'ay toujours fait difficulté de croire qu'il y dût retourner , mais le temps nous en esclarcira. Il y en a qui disent que le Cardinal Maruggi Archeuesque d'Auignon ne retournera non plus par de là , & qu'il resignera l'Archeuesché à vn sien nepueu qui est icy Commandeur du saint Esprit , fort honneste homme & digne ,

Pource que la santé du Pape me semble meshuy bien assuree , quoy qu'on en aye dit ces iours passez , ie ne vous parle plus de sa disposition , par laquelle i'eusse commencé à vous escrire des choses de deça s'il eust esté autrement. Dieu le nous conserue longuement , & vous donne à vous ,  
Monseigneur , &c. De Rome ce 16. Ianuier 1597.



## A V R O Y .

## L X X X I V .

S I R E ,

J'ay receu la lettre qu'il pleust à vostre Maïesté m'escire le 9. Nouembre, touchant l'Abbaye de S. Iean près Iosselin Diocese de S. Malo, me commandant de tenir la main à ce que Messire Pierre Cirano, à qui vostre Maïesté l'auoit premierement accordee, en soit pourueu par deçà, & non vn nommé Cotignon qui en a depuis obtenu don par surprise; à quoy i'obeiray, & à toutes autres choses qu'il plaira à vostre Maïesté me commander. Iusques icy ne m'ont esté presentees les nominations de l'vn ny de l'autre; & si on me les commande cy-apres, ie ne soumiendray du commandement de vostre Maïesté, comme aussi en aduertiray-ie Monsieur de Luxembourg quand il sera venu, afin qu'il n'y soit point surpris, & suiue l'intention de vostre Maïesté. Le 13. Decembre ie receus les lettres de nomination de Messire Guillaume Aubert à l'Abbaye de S. Cyprian de Poictiers ordre de saint Benoit, vacante, tant par le decez de Messire Barthelemy Aubert son oncle, que autrement en quelque sorte que ce soit; & sont lescdites lettres de nomination dattees de Rouen le 15. Nouembre dernier passé, & contresignees, Ruzé. Huiet iours apres, à sçauoir le 21. Decembre, ie receus autres lettres de nomination d'autre personne à la mesme Abbaye de S. Cyprian, à sçauoir de la personne de Messire Henry Louys Chastaignier; & sont ces secondes lettres dattees de Rouen le 22. Nouembre dernier passé, & contresignees, Potier. Si és lettres posterieures vostre Maïesté eust fait mention des premieres, & déclaré que nonobstant lescdites premieres elle vouloit que ledit Chastaignier posterieur en datte fust pourueu de ladite Abbaye, ie l'eusse fait expedier: mais vostre Maïesté ne faisant és secondes aucune mention des precedentes, i'ay estimé en ceste varieté de nomination, ne deuoir mettre L'EXPEDIA TV R pour l'vn ny pour l'autre, ains en aduertir vostre Maïesté, & attendre ce qu'il luy plairoit me commander là dessus.

Il y a encores vn autre fait appartenant aussi aux expeditions de deçà, mais vn peu dissemblable, & cependant tel que ie dois attendre la resolution de vostre Maïesté: le 26. Decembre ie receus les lettres par lesquelles vostre Maïesté nommoit à l'Euesché de Montpellier Messire Guitar de Ratté, l'vn de vos Aumosniers ordinaires & Conseiller en la Cour de Parlement de Tolose, par resignation de Messire Antoine de Subject: ces lettres sont du 15. Iuillet, & contresignees, Forget. Au mesme temps qu'elles me furent baillées, il me fut dit que ledit Subject Euesque qui vouloit resigner estoit mort; ce qui fut cause que ie superseday à mettre L'EXPEDIA TV R, ne pouuant faire expedier ledit Ratté par mort, d'autant que vostre Maïesté l'auoit nommé par resignation seulement & non par mort, & que le cas de resignation ne comprend point le cas de mort, comme il est

face,

face, pource que bien souuent ils permettent aux Euesques & Abbez de resigner en faueur de tels, à qui leurs Maiestez ne donneroient les Eueschez ou Abbayes si elles vacquoient par mort. De faire expedier ledit Ratté par resignation, ie ne pouuois non plus, & quand ie l'eusse fait, la provision n'eust rien valu, d'autant que la procuration que l'Euesque auoit passée pour resigner estoit expirée par son decez, & qu'un mort ne peut plus resigner, & quand on passe pour resigner procuration, on ne resigne point, comme quelques-uns parlent abusiuement, mais donne t'on seulement pouuoir & mandement de resigner en Cour de Rome, où telles resignations se font par les procureurs nommez esdites procurations, & s'admettent par nostre saint Pere, ou par ceux qui en ont faculté de la Sainteté. Il est donc besoin que vostre Maiesté nomme audit Euesché, par mort, soit ledit Ratté, ou autre qu'elle aduifera; Cependant sion ne deperist en pas un de ces affaires pour les derniers nommez, & ainsi sans leur faire torti'ay estimé de uoir garder de surprise, & donner temps à vostre Maiesté de s'interpréter & declarer sa volonté. A tant, &c. S. J. R. 2. Dec. De Rome le 17. Iannier, 1587.

A V R O Y.

LXXXV.

SIRE,

La nouuelle de la vacance de l'Abbaye de saint Nicolas des Prez Diocèse de Verdun estant arrivée à nostre saint Pere, la Sainteté l'a donnée à Monsieur Serafin; qui en fist expedier les Bulles, & enuoya procuration sur les lieux pour en faire prendre possession; & disoit-on alors que cette Abbaye estoit es terres de Monsieur de Lorraine, qui fut cause que ie n'y faisois chose. Depuis, à sçauoir le vingt-deuxième Decembre, ie reçus le breuet par lequel il auoit plu à vostre Maiesté me donner ladicte Abbaye, & les lettres de nomination par lesquelles vostre Maiesté me nommoit au Pape; & que ie tiens à tres-grande faueur & honneur, & m'en sens de plus en plus obligé à vous rendre toute ma vie le tres-humble & tres-fidelle seruice que d'ailleurs ie vous dois, & vous en rends graces tres-humble de toute mon affection: vous suppliant neantmoine en toute humilité de prendre en bonne part que ie n'en face autre poursuite, & que ie en laisse iouir paisiblement ledit sieur Serafin, pour plusieurs considerations qui me mesme concernent vostre seruice: Premièrement ledit sieur Serafin est François natif de Lyon, éminent en vertu & doctrine, & en l'auanture au seruice de vostre Maiesté, & au bien de la France; il y a vingt-trois ans qu'il est Auditeur de Rote, sans auoir receu aucun bien de nos Roys, combien que tous les Auditeurs Espagnols ayant esté par leurs Roys exalzés de grandes dignitez apres auoir seruy quelque temps en ladite Rote; ainsi de plusieurs honneurs que les Papes ont donné audit sieur Serafin en France.

H h

il ne luy en est demeuré iamais pas vn, ayant tousiours esté enpesché par ceux qui les auoient obtenus par de là, quelque recommandation qu'il aye eue des Protecteurs, & Ambassadeurs de France residens en ceste Cour, comme encores dernièrement en l'Abbaye de Redon en Bretagne que le Pape luy auoit donnee: d'ailleurs nous sommes luy & moy bons amis ensemble. Et comme il ne seroit beau voir que par delà on fist comme profession & coustume de ne luy laisser rien de ce que les Papes luy donnent, aussi ay-je estimé à present estre chose digne de l'aduis que i'ay en telles occasions donné & escrit par delà en sa faueur, de trouver bon moy-mesme en ma propre personne, ce que ie conseilloy pour le regard d'autres; & ce d'autant plus, que ledit sieur Seraphin ne voulant contreuenir à aucune de vos volontez, m'a offert de se departir de ladite Abbaye, & requis de m'en faire pouruoir. Outre le respect dudit sieur Seraphin, i'ay encores estimé pour celuy du Pape, n'estre expedient à vostre seruice, puis que i'ay à traiter avec sa Sainteté, que i'entraisse en contestation avec elle pour mon propre interest, & n'estant le droit de nomination trop clair, pour estre ceste Abbaye en pays qu'on appelle d'obedience, & reduit sous la protection de vostre Couronne depuis les Concordats, & n'estre située ladite Abbaye dans la ville close, dont la jalousie plus grande peut fauoriser & rendre plus aduantageuse la nomination de vostre Majesté: à laquelle nomination ne sera pourrât fait aucune préiudice pour l'aduenir pour ces mesmes considerations, & que ledit sieur Seraphin retiendra ladite Abbaye plus par tolerance de vostre Majesté, & par mon consentement, que par la concession du Pape mesme. Aussi pourray-je cy-apres debatre avec sa Sainteté, & soustenir vos droits en occasion semblable, & en toutes autres, avec plus de liberté & fermeté, & avec moins d'offense sienne, & avec plus de fruit & de bon succez pour vostre seruice, quand i'auray fait preuue en son endroit que ie ne me meus point de mon interest propre, & que ce que i'en feray ne sera que pour le deuoir de ma charge. Ce fait icy, entre autres, me donne occasion d'aduertir vostre Majesté, qu'il sera bon lors qu'on demandera au Pape l'Indult pour Bretagne & Prouence, de le demander aussi pour le pays Messin qui est sous vostre protection. A tant, &c. Sire, &c.  
De Rome ce 19. Ianuier 1597.

---

### A MONSIEVR DE VILLEROY.

LXXXVI.

**M**ONSEIGNEVR, Je reçeus le 29. Decembre vne lettre de la main du Roy du 29. Nouembre, & vne vostre du 1. Decembre, pour l'expedition de l'Archeuesché de Sens en la personne de Monsieur l'Archeuesque de Bourges, & encores vne autre lettre écrite de la main du Roy à monsieur le Cardinal Aldobrandin à mesme fin: & comme cette grande diligence a peu seruy eue vers le Pape & ledit Seigneur Cardinal Aldobrandin, pour leur faire connoistre combien sa Majesté s'efforce de

Fait, aussi pour mon regard il n'en estoit point de besoin, estant plus que suffisant le premier commandement que sa Majesté m'en fit, ains le seul commandement de Monsieur de Bourges, sur vne simple lettre duquel i'en parlay mesmes la premiere fois à sa Sainteté vn Vendredy 13. de Septembre, & en rendis compte à mondit sieur de Bourges par vne mienne lettre du 19. du mesme mois, & luy escriuis en seruiteur fidelle ce que ie pensay estre de mon deuoir, & de son seruice, comme il s'en peut souuenir. Depuis ayant rectu lettre du Roy tant au Pape, qu'à Messieurs les Cardinaux ses neueux, & à moy, ie rendis à sa Sainteté, & à mesdits sieurs ses neueux les leurs le 4. d'Octobre, & fis office enuers eux tous de la part de sa Majesté pour l'expedition gratuite dudit Archuesché de Sens; & le 18. du mesme mois d'Octobre estant allé à la ville, où sa Sainteté estoit à prendre l'air, ie luy en demanday response. Et sur son troisieme refus ou delay, non seulement du gratis, mais aussi de l'expedition en foy de la translation à l'Archuesché de Sens, ie luy parlay de tout ce fait amplement & plus librement que ie n'auois encores fait, & plus que ie ne vous auois escript à vous mesme. Et entre autres choses, ie luy dis que ce personnage tenant ja en l'Eglise vne dignité plus grande que celle à laquelle il demandoit estre transféré, & estant vn des plus anciens Prelats de l'Eglise, & des premiers Conseillers de la Couronne, & personne de grand entendement, doctrine faconde, experience, & autorité, il sembloit qu'il n'estoit ny iuste ny expedient au saint Siege, de luy refuser la translation & grace qu'il demandoit, & que tel refus ou delay ne pourroit à la longue estre interpreté, que pour auoir luy tenu le parti du Roy & de la Couronne, & y auoir esté le plus eminent entre les Ecclesiastiques, dont non seulement sa Majesté, mais aussi tous les Princes, Prelats, Seigneurs, & Gentils-hommes qui l'auoient suiue s'offensoient; & mesmes d'autant qu'à la verité & en effet ils auoient plus fait pour le bien de la Religion Catholique, & pour l'autorité du saint Siege, en ramenant le Roy où il se trouuoit aujourd'huy, que n'auoient fait ceux qui s'y opposant auoient mis la Religion Catholique & ladite autorité du saint Siege en danger d'extreme ruine; & sembleroit qu'il resteroit encores aujourd'huy en l'esprit de sa Sainteté quelque memoire & trace des offenses & rancunes passees, contre les beaux exploits de volontaire oubliance que le Roy monstroir tous les iours enuers ceux qui l'auoient persecuté en son Estat, en son honneur & en sa vie & en sa personne propre. Ce que ie luy disois non tant comme ministre du Roy, & par voye de supplication de la part de sa Majesté, que comme seruiteur tres-deuot de sa Sainteté & du saint Siege, & par forme d'avis de ce que i'estimois estre utile pour le seruice du saint Siege, & de la personne de sa Sainteté.

Après tout cela mondit sieur de Bourges m'ayant adressé vne sienne lettre au Pape, ie la rendis à sa Sainteté le Vendredy 13. Decembre, & luy parlay encores de ce fait pour la quatriesme fois. Tous lesdits offices auoient doncques esté déja faits, & i'en auois rendu compte sommairement à mondit sieur de Bourges par madite lettre du 19. Septembre, & par deux autres que ie luy escriuis le 19. d'Octobre, & 18. Decembre, quant sont venues les lettres du Roy, & les vostres que ie vous ay accusées sur commandement

cement de la presente, à l'occasion desquelles ie fis enuers sa Sainteté le cinquiesme office le Vendredy 10. de ce mois, & luy dis comme i'en auois receu vne lettre escrete de la main du Roy, qui me commandoit de la lire à sa Sainteté. Et comme ie commençois à desployer ladite lettre, sa Sainteté me dit; ie vous prie ne me la lisez point. Là dessus ie ne pensay point me deuoir opiniastrer à la luy lire contre son gré, mais ie luy en dis le contenu que ie sçauois tres-bien, & n'en obmis rien, sinon ce qui est sur la fin, que sa Maiesté n'auoit pas deliberé d'escrire plus pour aucun que ledit sieur de Bourges ne fut despesché, d'autant que ie pensay que nous serions tousiours à temps à le dire s'il le falloit, & que la lettre que le Roy escriuoit de sa main à Monsieur le Cardinal Aldobrandin pourroit auoir plus grande efficace: & quand tels mots sont vne fois eschappez à vn grand Prince, il faut ou les maintenir & faire valloir au detrimement de plusieurs particuliers ou du public, ou y contenenir avec peu de reputation: ioint que le Pape ne refuse pas le gratis seulement, mais aussi l'expedition, & ainsi ne s'expediroient plus aucuns Eueschez ny Abbayes de France. Et neantmoins avec tout cela si le Pape m'eust laissé lire la lettre, ie luy eusse leu ceste clause aussi bien que les autres. Sa Sainteté ne répondit au contenu de ladite lettre, sinon que cette affaire ne passeroit iamais en Consistoire, & que les Cardinaux s'y opposeroient, & encores en prendroient-ils occasion de penser mal du Roy mesme. En partant d'avec sa Sainteté j'allay trouuer Monsieur le Cardinal Aldobrandin, & luy baillay la lettre que le Roy luy en escriuoit de sa main, & lui parlay conformément au contenu de ladite lettre, dont on m'auoit enuoyé copie, & dis audit sieur Cardinal cela mesme que ie vous ay escrit ci-dessus auoir dit au Pape estant en la ville, le 18. mesme que ie vous ai escrit. Ledit Seigneur Cardinal me dit qu'il en parleroit à sa Sainteté. Et Vendredi dernier 17. de ce mois ie retournai vers ledit Seigneur Cardinal, pour sçauoir la response qu'il auoit eue du Pape, & pour lui faire souuenir de r'escrire au Roy. Il me dit qu'il en auoit parlé au Pape, mais que sa Sainteté ne s'y pouuoit resoudre. Quand à r'escrire au Roy, que sa Maiesté luy faisoit trop d'honneur, mais qu'il ne sçauoit qu'elle response luy faire. Et comme ie luy eus dit que le refus ou delay si long qu'on faisoit à vn personnage si qualifié seroit trouué fort mauuais, il me dit, comme vn grand secret, que les relations que l'on en faisoit n'estoient bonnes auéunement. Je luy repliquay que ie le tenois bien déjà pour dit, & que dès le commencement i'auois tousiours pensé que les difficultez ne prouenoient que de mauuais rapports, qui n'estoient fondez sur autre chose que sur ce que ce Prelat auoit tenu le party du Roy, & seruy à la Religion Catholique, & à l'autorité du saint Siege par vne voye plus briefue & plus vtile, que n'auoient ceux qui en pensant les conseruer les eussent ruinées tout à fait, & ils en eussent esté creus. Et de fait, Monseigneur, le pis que ie voy en cecy est, que si les calomnies, & mauuais offices qui se font sous main le gaignent en la personne de Monsieur de Bourges, on vous trauersera par mesme moyen cy-apres tous les meilleurs seruiteurs que le Roy aie euen lestranx, comme on a ia commencé Monsieur de Nantes; & nous reconstruons à ce bon temps là, auquel j'ay veu du temps du feu Roy

que le feu Cardinal de Pellevé, & certains autres acariastres de delà, ennemis de tous les hommes sages & moderez, faisoient estat de faire admettre ou exclurre ceux qui poursuivoient icy quelque expédition, selon que les poursuivans estoient conformes ou dissemblables à l'humeur de ces beaux Critiques. Pour faire que la raison soit superieure, ie ne voy point de meilleur moyen que celuy que j'ay pris, & que ie dis au Pape à la ville, & avec le respect qu'il conuient, & sans engager sa parole à chose qui soit pour preiudicier au public, faire dire par delà à Monsieur le Legat, & icy au Pape par Monsieur de Luxembourg, que le Roy, les Princes, Prelats, Seigneurs, & Gentils-hommes qui ont serui le Roy n'en peuuent penser autre chose puis qu'ils voyent que le Prelat qui estoit le plus apparent du party du Roy, ne peut obtenir par l'intercession de sa Majesté vne chose moindre que celle qu'il a desia, & que celuy qui estoit icy le plus cogneu de la ligue, a esté fait Cardinal sans aucune participation de sa Majesté. A tant. &c. Monseigneur, &c. De Rome ce 19. Ianuier 1597.

## A MONSIEUR DE VILLEROY.

LXXXVII.

**M**ONSEIGNEUR, Par vne mienne lettre du 18. Ianuier, ie vous escriuis ce que le Pape m'auoit dit en l'audience que j'auois eue de sa Sainteté le iour auparauant 17. dudit mois; & vous disois comme sur le propos qu'il m'auoit tenu de la paix, d'Angleterre, ie m'estois reserué en mon cœur à luy en respondre plus amplement à ma premiere audience: ce que ie fis le Vendredy ensuiuant 24. dudit mois, & le fis de façon qu'il ne s'apperceut point que ce fust de propos deliberé, ains seulement pour luy rendre compte comme j'auois escrit au Roy ce qu'il m'auoit commandé. Aussi decourus-je de ses opinions & intentions sur lesdites choses plus que ie ne m'attendois; de façon que si ce que j'ay fait n'aura seruy d'autre chose, pour le moins nous en restera-il celà, que nous aurons veu plus clair en ses desirs, esperances, & opinions. Ie dis donc à sa Sainteté dès l'entree de mon audience ledit iour 24. Ianuier, que j'auois fait ce que sa Sainteté m'auoit commandé, ayant escrit au Roy de l'Abbaye de saint Honorat en Prouence, & de la paix: mais qu'en escriuant & considerant de plus près ce second point de la paix, la doute que j'auois eue tousiours auparauant m'estoit de nouveau accreue, à sçauoir que le Roy qui faisoit particuliere profession de tenir sa parole, ne pourroit si tost se desuelopper de ceste alliance; qui ne faisoit que venir d'estre renouuëe & iuree. Le Pape me dit, que le sermēt auoit esté à vn heretique, & que sa Majesté auoit fait vn autre sermēt à Dieu & à luy Pape; & puis adiouta ce qu'il m'auoit dit autrefois, & en l'audience precedente que les Roys & autres Princes souuerains se permet-

toient toutes choses qui tournoient à leur profit, & que la chose en estoit venue si auant, qu'on ne leur imputoit point, & ne leur en scauoit-on point de mauuais gré, & allegua vn dire de Francesco Maria Duc d'Vrbain, qui souloit dire que si vn simple Gentil-homme ou vn Seigneur non souverain manquoit de sa parole, il en seroit deshonoré & blasmé d'un chacun, mais les Princes souverains, pour raison d'Estat pouuoient sans autre grand blafme faire des traictez & s'en departir, prendre des alliances & les laisser, mentir, trahir, & toutes telles autres choses. Je n'auois que trop à repliquer à tout cela, mais ie n'estimay me deuoir arrester en vn lieu si glisfant & si mal sentant, ains passant outre à ce que ie me proposois, & neantmoins comme parlant sur son propos, & sur l'occasion qu'il m'en donnoit, ie luy dis qu'il ne sembloit point vtile au Roy ny, à son Estat, de faire luy seul vne suspension d'armes pour long temps, d'autant que le Roy d'Espagne qui aujourdhuy ne pouuoit faire grand mal à ceux qui demeuroient vnis ensemble, si par ceste suspension d'armes il est deliuré de nostre Roy, il pourroit ruiner ou fort affoiblir nos alliez & confederez; & puis avec ses forces entieres, & avec les aduantages & commoditez que les nouvelles conquestes luy auroient apportées, il se rueroit contre nostre Roy, & contre la France. A quoy il respondit que si le Roy d'Espagne estoit belliqueux & ieune, venant d'entrer tout freschement en ses Estats, on pourroit soupçonner qu'il eust ce dessein; mais ledit Roy ne s'est iamais pleu à la guerre, & ne l'auoit oncques faite que forcé, & est à present si vieil & si caduc qu'il n'y auoit occasion de croire telle chose; & quand il y penseroit, il n'y auroit tant de danger en cela pour le Roy & pour la France, comme il y auroit de bien à l'establissement que le Roy pourroit faire cependant de la iustice, & de son autorité propre, & de l'obeyssance que tous ses fujets luy doiuent, laquelle ne seroit iamais bien assuee au dedans du Royaume, iustques à ce qu'il auroit paix dehors; Que pour bien establir & assuer la dite autorité & obeyssance au dedans du Royaume, il n'y auroit soupçon ny danger que sa Majesté ne deust subir au dehors, & mesmes d'autant que sa Sainteté estoit bien aduertie que toute la France desiroit la paix; & si l'on voyoit qu'il tint au Roy qu'elle ne se fist, & que ce fust vn caprice sien, il y auroit danger qu'on ne fust vne autre sedition, & qu'on ne se souleuaist de nouveau. Je luy repliquay, que comme le Roy auoit cy-deuant contenté ses fujets souleuez, ainsi faisoit-il maintenant profession publique de vouloir la paix avec tous ses voisins à conditions raisonnables, & que non seulement son peuple & toute la France, mais aussi tous les estrangers, & sa Sainteté la premiere, en doiuent estre meshuy certains & assurez, & qu'il le feroit encores voir par effect à toutes les fois que lesdits voisins se mettroient à la raison. Au demeurant, ce que sa Sainteté ne croyoit du Roy d'Espagne pour sa grande vieillesse, nous auions à le craindre du Prince son fils, lequel pendant vne longue suspension d'armes croistroit, & pourroit succeder à son pere, & lors nous serions aux termes que sa Sainteté disoit peu auparauant d'un Prince ieune nouvellement venu à la Couronne. Que si au lieu d'une longue suspension, la Sainteté procuroit & faisoit la paix, nous aurions moins à craindre & à soupçonner ce que desormais soit du pere ou du fils, & nostre Roy s'il auoit à s'accorder seul avec le

Roy d'Espagne sans ses alliez, en seroit beaucoup plus excusable envers eux, & envers tous autres. Le Pape laissant tout le reste print ce dernier point, & dit que de la suspension d'armes on viendroit à la paix; mais qu'il falloit commencer par la suspension, pendant laquelle on traitteroit la paix; Qu'il auoit esperance que la paix se feroit, quelque difficulté qu'on y presupposast: Que lors que l'on traittoit la dernière paix entre le Roy Henry II. & ce Roy d'Espagne; il s'y presentoit tant de difficultez, que chacun croyoit qu'elle ne se feroit point, & toutesfois elle se fit; Qu'infinites autres choses qui du commencement sembloient estre impossibles, s'estoient neantmoins faites; & si on ne les eust point commencees de peur de n'en venir iamais à bout, le monde seroit priué du fruit qui en est prouenu: ainsi falloit-il maintenant commencer à traiter; Que Dieu ouueroit les moyens d'acheuer; Qu'il y auoit vne Infante, & se pourroient faire des choses qu'on n'auroit iamais pensees. Je louay grandement ce cœur & cette bonne esperance que sa Sainteté auoit de la paix, & luy dis qu'elle ne seroit guere plus difficile que la suspension d'armes pour longues annees, d'autant que le Roy n'accorderoit iamais cette longue suspension, sans que le Roy d'Espagne luy rendit les places qui auoient esté prises sur la France en cette dernière guerre; à laquelle reddition le Roy d'Espagne feroit plus de difficulté, que si l'on faisoit tout à fait vne pleine & entière paix. Et pource qu'il ne me respondit autre chose sinon que cela mesme se verroit en traittant, ie passay à l'autre point de l'Angleterre, dont il m'auoit parlé en l'audience précédente, & lui dis que i'auois aussi escrit au Roy ce que sa Sainteté m'en auoit dit, & qu'en escriuant, il m'auoit semblé meilleur & plus necessaire de penser à nous deffendre du Turc, qui pouuoit en peu de temps subiuiger des Royaumes entiers, qu'à conquerir d'Angleterre, laquelle ne pouuoit sinon qu'égratigner quelque frontiere. A quoy le Pape respondit, qu'il ne faisoit plus si grand estat du Turc, & auoit opinion que quand le Turc scauroit que les Roys de France & d'Espagne seroient d'accord, cela suffiroit seul pour l'arrester, & le feroit demeurer coy, quand bien ils ne feroient autre chose contre luy; Qu'il se voyoit que le Turc n'estoit pas fort bellicieux, ny tout ce qu'on en auoit pensé; Qu'il n'auoit sçeu, on n'auoit peu vser de l'occasion qu'il auoit eue ces iours passez; Que sa retraite à Constantinople ressembloit plus à vne fuite qu'à vn retour. Je luy dis qu'une puissance si grande & si vnie comme estoit celle du Turc, estoit tousiours fort à craindre, & qu'il seroit plus aisé au Turc de conquerir ce qui luy restoit de la Hongrie, & toute l'Austrie, & plusieurs autres pays apres ceux-là, que ne seroit aux Espagnols d'equahir d'Angleterre; Que la Couronne d'Angleterre auoit plus de vaisseaux de guerre par l'Ocean, que nul autre Potentat du monde; Que les Espagnols auoient fait grande perte de tels vaisseaux, & d'hommes, de munitions, & de tous equipages de guerre maritime: Que le destroit d'Angleterre estoit ordinairement si agité, que si on ne pouuoit prendre port bien tost, il falloit s'en aller delà, ou perir; Que l'Angleterre estoit abondante d'hommes vaillans par mer & par terre, & ennemis des Espagnols. Le Pape me respondit, que tout cela estoit vray, mais que l'Angleterre auoit esté conquise autrefois, & qu'elle le pourroit bien estre à present qu'elle estoit



peu vnüe en soy pour la diuersité de la Religion , & regie par vne femme vieille , sans mary , & sans successeur certain ; Que ceste femme deuoit estre meshuy au fond de ses finances ; ayant fait plusieurs depenses ; Que d'ailleurs il auoit obserué que les femmes qui auoient regné longuement , & aimé le deduit en leur ieunesse & en la vigueur de leur age , deuenoient puis apres en leur vieillesse mesprisées de ceux là mesmes à qui elles s'estoient abandonnées : & m'allegua deux Roynes de Sicile qu'il disoit auoir vescu de mesme , desquelles l'vne en sa vieillesse enduroit d'estre souffritee par vn qui l'auoit entretenuë en sa ieunesse ; qu'aussi croyoit-il que ceste-cy deuroit estre desormais peu estimée de ceux là mesmes qui l'auoient autrefois aimée & prisee ; Que luy & moy n'estions pas si vieux , que pour ces considerations il n'esperast que nous la pourrions voir vn iour subjuguée. Le luy dis que quant à la personne de ceste femme , le me souciois fort peu quoy qu'il en aduint , mais que le Roy auoit grand interest que l'Angleterre ne tombast entre les mains des Espagnols , qui par ce moyen acheueroient d'environner & comme assieger la France , & la trauailleroient incessamment ; Que nous auions plus de moyen de leur empescher cette conqueste qu'ils ne disoient , & qu'on ne croyoit en cette Cour , non seulement en assaillant leurs villes par terre , & destournant leurs forces à conseruer le leur , mais aussi en retardant directement ceste mesme entreprise d'Angleterre , les molestant & incommodant pendant qu'ils seroient apres du costé de Guienne , Poitou , Bretagne , Normandie & Picardie qui respoient à l'Angleterre , en laquelle nous pourrions encores enuoyer gens de guerre , & les y faire passer en six ou sept heures. Sa Sainteté respondit à cela , qu'il se trouueroit quelque moyen d'ister ceste jalousie à nostre Roy , & de faire conuenir ces deux Roys en vn tiers , qui seroit Roy d'Angleterre & amy de tous deux : & au defaut d'autre moyen ils se pourroient partir le Royaume entre eux : & m'allegua derechef ce qu'il m'auoit dit en la precedente audience , du partage que les François & Espagnols firent entr'eux du Royaume de Naples au temps du Roy Louys XII. Le luy dis que les Espagnols nous auoient alors trompez , & chassiez de tout ce Royaume là : & il repliqua que quoy qu'ils eussent fait alors , ils auoient à present plus grande occasion de craindre d'estre supplantés par nous , qui estions plus près de l'Angleterre qu'eux. L'eusse peu repliquer à cela , comme à plusieurs autres choses , mais ie ne voulus point parler le dernier , tant pour garder la ciuilité & reuerence qu'il appartenoit , & mesmes en tēps où il ne se decidoit rien , qu'aussi à fin de luy conseruer ceste facilité de se communiquer & laisser entendre ses intentions , que i'y auois trouuée plus grande que oncques auparavant.

Par ce que dessus , vous voyez comme encores que le Pape n'aye aucune mauuaise affection enuers le Roy , ny aucun amour vers le Roy d'Espagne , & que d'ailleurs il aye l'amé bonne , neantmoins la haine qu'il porte aux heretiques le transporte si auant , qu'il se laisse eschapper de la bouche , bien que sous le nom d'autrui , des maximes pernicieuses , & indignes de tout homme de bien ; & pour la mesme haine s'est laissé persuader par les Espagnols tout ce qu'ils ont voulu , soit pour luy diminuer la crainte du Turc , contre lequel ils ne veulent point aller encores qu'il brulle leur maison , soit pour luy accroistre l'esperance de la conqueste de l'Angleterre , à la

quelle

quelle pour cette heure ils ont dressé toutes leurs pensées, leur semblant qu'il n'y a que le Roy qui les en puisse détourner. Et sa Sainteté trouue bonnestoutes façons de separer sa Maesté d'avec ses alliez, pource qu'ils se sont Catholiques, & ne recognoissent le saint Siege, encores que lesdites façons fussent infames & dommageables à sa Maesté & à son Royaume; & peurueu que la separation s'en ensuiue, ne se soucie de l'auantage & accroissement qui est pour en aduenir au Roy d'Espagne, ny du deshonneur, danger, & diminution qui en peut resulter au Roy & à toute la France, quand les Espagnols se serbient rendu maîtres de l'Angleterre. Par ainsi, comme ie suis d'avis que nous excusions sa passion, aussi me semble-il que nous deuions nous en tenir d'autant plus sur nos gardes. A tant, &c. Monseigneur, &c. De Rome ce premier iour de Feurier 1597.

## A MONSIEVR DE VILLEROY.

LXXXVIII.

**M**ONSEIGNEUR, Par ma lettre du premier de ce mois ie vous May rendu compte de ce que ie decouurois des esperances, intentions, & opinions du Pape en mon audience du 24. Ianuier, & mesmement sur les choses d'Angleterre, ausquelles il me semble que luy & les Espagnols soient pour le iourd'huy plus ententifs qu'à nulle autre, combien que les Espagnols pourroient auoir autre dessein, & le couurit de ce pretexte, comme il y en a qui pensent que leur armee de mer qui sortit au mois d'Octobre dernier, n'estoit pas tant pour Angleterre ou pour Irlande, que pour Bretagne, Calais, & Pays-bas. Et quand ils tendroient vraiment à l'Angleterre, l'ay pensé depuis que possible ne seroit-ce pas la pire chose pour nous qu'ils scauoient faire, d'autant que i'estime que cette entreprise ne leur reussira point, & mesmes pource qu'outre la resistance que serbient les Anglois alles faaisans d'euxmesmes, vous y pouruoieriez encores de vostre costé en tant que vous pourriez: & ainsi lesdits Espagnols perdront autant de temps, d'hommes, d'argent, & de munitions, qu'ils pourroient trop vilement employer contre nous; outre qu'un troisieme naufrage les pourroit engloutir, & donner moyen aux Anglois d'employer à l'offensue, les forces qu'ils auroient preparees pour la defensiue, & à vous aussi moyen de vous prouoir de leur perte, & affoiblissement. Par autre lettre mienne du neuuesime de ce mois, vous aurez veu que sa Sainteté me dit en l'audience du dernier iour de Ianuier, sur ce que vous m'avez escriit par vostre lettre du 21. Decembre, touchant le lieu où vo' estimiez que la paix se deuoit traiter, & verrez encores tout ce que i'ay traité avec sa Sainteté & Messieurs ses neueus, en l'Audience du 7. de ce mois touchant ladite paix, & le lieu où elle se deuoit traiter, & l'Euesque de Mantouë sur ce que le Roy m'en auoit escriit par la lettre du 26. Decembre. Ceste-cy commandra ce qui se passa en l'audience que j'ens Vendredy 24. de ce mois, sur la conclusion de la lettre que vous m'eschriustes le 20. Ian-

uier. Ie dis donc à nostre saint Pere, que par ceste dernière lettre j'auois appris, comme le Roy en mesme temps auoit esté deliuré de la sieure quarte, & aduertit de la pleine & entiere conualescence de sa Saincteté, & s'en resioüissoit comme de la sienne propre, & prioit Dieu qu'il la maintint longuement saine & heureuse, pour le bien vniuersel de toute la Chrestienté, & pour le particulier de la France; ne commandant de m'en conioüir en son nom avec sa Saincteté, & de luy baiser les pieds de sa part. Nostre dis saint Pere me respondit, qu'il remercioit sa Majesté, & luy desiroit santé, & toute prosperité & grandeur, & à la France aussi toutes sortes de grâces & benedictions, sans attendre de sa Majesté ny de son Royaume, sinon ce qui tourneroit à l'honneur de Dieu, au bien de la Religion, & de sa Majesté, & de ses subjects.

Après, cela, ie luy dis qu'auât que d'entrer aux affaires qui m'estoient commandées par ladite dernière lettre, i'auois estimé la deuoir supplier, comme ie faisois tres-humblement, de se souuenir de ce dont ie l'auois suppliée en mon audience précédente, & en particulier, si elle vouloit acheminer quelque traité de paix, que ce fust à Rome, & non en Flâdres ny ailleurs loing d'elle. Et là dessus ie luy fis vne recapitulation des raisons que ie luy auois alleguées, & des repliques que ie luy auois faictes en ladite audience dernière. Sa Saincteté me dit qu'elle ne cesseroit de procurer la paix entre les Princes Chrestiens, l'estimant necessaire à toute la Chrestienté, & vtile à chacun desdits Princes en particulier. Et quand il n'y auroit autre consideration que celle de la Religion, qui pâtit trop en temps de guerre, il continueroit à promouoir la paix par tous les moyens dont il se pourroit aduiser. Qu'au reste il ne me disoit point que ce seroit à Rome ny ailleurs; ains qu'il tascheroit que ce fust en lieu & temps, auquel ladite paix se pourroit traiter & faire plus facilement, & par les moyens que Dieu luy donneroit, & montreroit estre plus réüssibles. Ie croy qu'il ne s'en peut résoudre qu'il n'ait sondé les Espagnols là dessus, & que selon qu'il les trouuera disposez, il en pourra respondre aux Roys diuersement.

Ce point estât vuide, ou pour mieux dire ainsi suspendu, ie luy dis que par ladite lettre on m'écriuoit que Monsieur le Legat auoit eu audience du Roy le 15. Ianuier, & entre autres choses qui s'y estoient passées, il auoit rendu à sa Majesté vne lettre de la main de sa Saincteté, à laquelle lettre sa Majesté respondoit par vne autre aussi de sa main. Et en ce point ie luy baillay la lettre du Roy que vous m'auiez enuoyée avec ladite lettre du 20. Ianuier; & continuant, luy dis que sa Saincteté par sa lettre exhortoit sa Majesté d'enuoyer au secours de la guerre de Hongrie vn bon nombre de gens; ce que sa Majesté feroit tres-volontiers si elle pouuoit; mais qu'elle ne le pouuoit faire. Premièrement sa Majesté n'estoit gueres bien establie, n'y ayant encores que trop de mal contents en son Royaume: les vns, pour n'auoir qu'en gouuernement vne partie de ce qu'ils s'estoient vsuré, & destiné en propre: les autres pour voir ceux-là recompensez de plusieurs aduantages qu'ils pensent auoir meritez eux seuls, qui faisoit que le Roy ne deuoit esloigner de soy ceux qu'il cognoissoit luy estre bons sujets & seruiteurs, & amateurs de leur patrie; & ne pouuoit se promettre que les autres eussent de bon cœur si loing, puis qu'ils se voyoient si loing de defendre

leur propre patrie. Et outre ce mal intestin, & autres, le Royaume estoit assailly de diuers endroits par armes à découuert, & par toutes sortes de fraudes & de malices en cachette. Le Roy d'Espagne auoit vne puissante armee du costé de Picardie, & faisoit encores de tres-grands preparatifs pour enuahir la France de ce costé-là, & les aduis qui estoient venus d'Espagne deux iours auparauant cette audience, portoient qu'on y faisoit roolles de tous ceux qui estoient pour porter armes, & y auoit-on depesché des commissions à vn grand nombre de Capitaines; destiné pour leur General le Comte de Fuentes, pour assaillir encores la France du costé de Languedoc & de Gascogne. Le Duc de Mercœur pratiqué par le Roy d'Espagne, au lieu de recognoistre son Roy, & de deferer à l'absolution de sa Sainteté, ce que tout bon Catholique doit, venoit denoncer la guerre à son Souuerain, qui luy auoit offert vne tres-aduantageuse, & tres-honorable paix pour lui. Le Duc de Sauoye sous belle apparence de desirer la paix avec sa Majesté, & d'obtenir du Roy d'Espagne congé de la faire, non seulement se dedisoit des conditions par luy accordees, selon que son beau pere lui prescriuoit de les faire reformer, & puis appelloit les François deloyaux, & perfides; mais faisoit dire tant à luy, qu'à l'Imperatrice, au Prince, Infante, & autres Seigrs. de la Cour d'Espagne, que le Roy d'Espagne n'ayât personne au mode si propre: pour esfondre la France que son Altesse, si on se resolt de lui doner vne bone armee à conduire, cōme celle de Flandres, ils verront si son Altesse de sa part, le Cardinal de la fienne, & le Duc de Mercœur d'autre, feront croire en Dieu le Roy de France: & son Altesse d'autant plus, qu'outre les forces de sa Majesté Catholique, elle a elle-mesme dequoy aider à ses desseins, & faire venir les François à toutes sortes de conditions. Que pour toutes les considerations susdites, sa Sainteté voyoit qu'un Prince, & un Estat assailly de tant d'endroits, & contre lequel on machinoit tant de maux; ne deuoit, ny ne pouuoit enuoyer si loing vn secours, qui luy estoit si necessaire pour sa defience & conseruation, quand bien ledit secours lui seroit demandé pour ses parens les plus proches, & pour les amis les plus fidelles & intimes qu'il eust.

Mais la Sainteté pour vn second chef, auoit à considerer pour qui le secours estoit demandé; Que c'estoit pour la maison d'Autriche, qui estoit celle qui auoit conjuré la ruine du Roy, & de la France; Que le Roy d'Espagne chef de ladite maison, estoit aussi chef & le premier mouuement tant de la guerre ouuerte, que des conspirations secretes qui se faisoient contre la personne du Roy & de son Estat, soit dedans ou dehors la France; Que la presumption des Ducs de Sauoye & de Mercœur, dont il auoit esté parlé cy-deuant, n'estoit fondee qu'en lui & par luy. Que le Cardinal Albert, qui estoit de ladite maison d'Autriche, auoit oublie & abandonné, oublioit & abandonnoit son deuoir d'Archeuesque & de Cardinal qu'il estoit, pour se rendre executeur de la volenté & haine enragee dudit Roy d'Espagne contre le Roy tres-Christien, & contre le premier Royaume de la Chrestienté, pendant que le Turc Mahometain abolit au pays dudit Archeuesque & Cardinal la Religion Chrestienne, honoit l'honneur de ses trones, captiue, & reduit en miserable seruitude leurs Estats, pays, & subjets; Que l'Empereur, qui a le plus specieux tiltre, qui soit en leur dite maison

d'Austriche, & qui est assailly en son foyer par le Turc, se priuoit luy mesme des forces qui luy sont necessaires à se defendre dudit Turc, pour fournir au Roy d'Espagne de quoy forcer & ruiner la France, luy permettant expressement par lettre parentes, de leuer vne legion d'hommes es terres de l'Empire, & tacitement, par conuenance, & souffrant autant qu'il en voudra & pourra leuer de plus, afin que toutes ces leuees tournent le dos aux Turcs qui l'assailent, & leurs visages & armes contre les Chrestiens, auxquels il fait demander aide & secours; Que si on vouloit dire que le secours estoit demandé premierement & principalement en faueur de la Chrestienté, & non de la maison d'Austriche, la responce y estoit toute preste; Que la France, de la conseruation de laquelle il s'agissoit, est Chrestienté, & le plus noble Royaume de la Chrestienté; Qu'il y auoit d'aussi bons Catholiques qu'il y eust au monde, & sans controuersie, de beaucoup meilleur aloi que ne sont ceux de Hongrie, Boheme, & d'Allemagne, dont est sorty le venin de l'heresie qui a empoisonné vne bien petite partie des François, en comparaison des Catholiques, qui y sont mille pour vn, & qui s'y trouueroient auourd'huy seuls, sans l'ambition de ceste maison d'Austriche & de ces adherents, qui sous pretexte de vouloir extirper l'heresie, l'ont accruë & fortifiée.

Qu'apres auoir consideré ceux pour qui le secours estoit mandé, ie suppliois sa Sainteté pour vn troisieme chef, de tourner vn peu sa pensee vers celuy contre qui on le demandoit, Que c'estoit à la verité vn infidelle, contre lequel le Roy tiendroît son secours bien employé, ains reputeroit à grand honneur d'exposer sa propre personne, & espandre son sang pour la defence de la Chrestienté, & auoit grande honte de ce que les Chrestiens s'en estoient laschement fuis deuant ce Payen. Mais tout infidelle & Payen que le Turc estoit, il auoit paix avec les François, & ne procuroit aucun mal à la France, comme faisoit ladite maison d'Austriche, ains se rencontroit qu'il faisoit la guerre à ceux qui la faisoient à la France; Que le Roy n'auoit recherché ceste paix, & ne la rechercherait si elle estoit à faire: mais il l'auoit trouuee faite avec ses predecesseurs, par lesquels elle luy auoit esté transmise avec les autres droits de la Couronne; Que lesdits Rois ses predecesseurs n'estoient seuls entre les Princes Chrestiens qui auoient en paix avec la maison des Ottomans; Qu'il y en auoit auourd'huy d'autres qui l'auoient, come il n'estoit descendu d'auoir paix avec les infidelles, pourueu qu'on ne participast à leur infidelité; Que ceux-là mesmes de la maison d'Austriche l'auoient eue, & apres l'auoir perdue l'auoient recherchée, & la recherchoient encores auourd'huy, & la prétendoient toutes les fois qu'elle leur seroit donnée: Que le Roy d'Espagne l'auoit desirée pour soy-mesme, & pour chasser sur toutes les choses du monde, & de tenir vn Ambassadeur à la Porte, & ne l'ayant peu obtenir, auoit corrompu des Ambassadeurs & Consuls de France pour luy servir; Que les Rois de France n'auoient oncques vsé de ceste paix sinon pour se maintenir, & se defendre de cette trop ambitieuse maison d'Austriche, & pour le soulagement, & conseruation des Chrestiens qui sont en ce pais-là, & que les Papes y enuoient de temps en temps. Que i'estois tesmoin moy-mesme que les Papes auoient bien souuent fait remercier nos Rois, des bons offi-

ces que les Ambassadeurs de France à ladite Porte auoient faites, & faisoient, ordinairement en faueur des Chrestiens, & de plusieurs Euesques: que leurs Saintetez y enuoioient; Que les choses estant ainsi, quand bien le Roi ne seroit assailli, comme il est; & quand la maison d'Autriche ne luy feroit point la guerre, comme elle fait à toute ouurance, ce ne seroit point à luy à secourir cette maison contre ceux avec qui la paix, mais ce seroit au Roi d'Espagne, qui cōme chef y est obligé plus que nul autre, & qui a tant de moïens, & de qui le Turc est ennemy; & toutesfoiſ ledit Roy n'y auoit enuoyé, & n'y enuoyoit vn seul homme, ains tiroit de ces pays là tout ce qu'il pouuoit pour faire la guerre à la France, & afin que sa Sainteté ne trouuast cela si mauuais, luy donnoit à entendre que c'estoit peu de chose que de ce Turc icy, & qu'il n'estoit point pour faire grande chose; Qu'il y auoit encōres vne autre consideration de grande importance; c'est que si le Roi rompoit à present la paix qu'il a trouuee avec le Turc, ceux d'Autriche venans à faire paix avec la maison Ottomane, comme ils y sont apres, le Roi, sans auoir rien profité à la Chrestienté, se trouueroit surchargé de ce puissant ennemi de plus, & le Roy d'Espagne occuperoit enuers le Turc la place que le Roi y tient à present, qui seroit la pire chose qui peust aduenir à la Chrestienté, d'autant que le Roy d'Espagne qui est ja si puissant, transporté de son extrême ambition, & conforté & enhardi de l'amitié & alliance du Turc, se rueroit encōres avec plus d'impudence sur les Princes Chrestiens. Tellement que ces deux Turcs symbolisans en plusieurs choses, & n'ayans point plus grande difference entr'eux, que l'apparence exterieure de la Religion, se partageroient la Chrestienté entr'eux; sinon par contract, au moins en effet, l'asservissant & captiuant l'vn d'vn costé, & l'autre d'vn autre, iusques à ce que se venans à rencontrer ils s'entrechoquassent ensemble, & fissent en fin entr'eux deux ce qu'ils auroient auparauant fait à tous les autres.

Que de tout ce que dessus resultoit, que le Roy n'estant encōres bien establi, & ne sçachant bonnement de qui se garder, & assailli ouuertement de tant d'endroits, ne deuoit enuoyer du secours, dont il auoit grand besoin & necessité luy-mesme, à ceux qui luy faisoient la guerre, contre ceux avec qui il estoit en paix; à la ruine de sa Majesté, & de son Estat, & de toute la Chrestienté: mais quand la France seroit reintegree de ce qu'on lui detiect, & bien reunie en paix dedans & dehors, & que chacun se mettroit en deuoir d'aider à la Chrestienté, & mesmes ceux qui y ont le plus d'interest & d'obligation; & lors sa Sainteté verroit qu'il n'y auroit respect aucun qui peust tant à l'endroit de sa Majesté, comme feroit celuy de la Religion Chrestienne, & de la liberté, grandeur, & reputation de la Chrestienté, & l'exemple de ses predecesseurs Roys, qui pour auoir tousiours prés & loing protégé, & amplifié la Religion Chrestienne & Catholique, luy ont laissé le nom & tiltre de tres-Chrestien.

Nōſtre. S. Pere escōura fort patiemment ce que dessus, sans autrement y respondre; comme auſſi ne s'y pouuoit-il faire response au contraire, qui fust pertinente, & de louer le refus de ce qu'on a demandé, peu de gens le feroient, & moins le Pape qui est de peu de parole; lequel à mon aduis n'entendoit autre chose. Auſſi pour contraindre celle femme taciturnité, & pour

luy verifiet ce que i'auois dit des Ducs de Sauoye & de Mercœur, & de l'Empereur, ie tiray de ma poche les copies que vous m'auiez renuoyees des lettres de l'Ambassadeur de Sauoye pres du Roy d'Espagne & du fleur de Saintotange Gouverneur de Rochefort, & des demandes de l'Admiral d'Arragon, & des responses del'Empereur, & des lettres de l'Ambassadeur d'Espagne pres ledit Empereur, & les luy leus par ce mesme ordre, au moins les lieux principaux que i'auois remarques, luy cotant ce qui faisoit le plus à propos, & qui plus monstroient leur mauuais foy, & leur tort, & y faisant les protestations qui m'y sembloient propres & conuenables. Le Pape à mesure que se li disoit quelques mots par cy & par là, qui importeroient peu; & voyant qu'en la lettre de l'Ambassadeur de Sauoye, son Nonce y estoit nommé trois fois, au propos de la commodité que ledit Nonce donnoit audit Ambassadeur, de recevoir & d'envoyer lettres, par la France contre le service du Roy & le bien du Royaume, il me dit de luy-mesme qu'il y donneroit ordre. Iene me luy dis point le changement du chemin des courriers que vous voulez faire, pour ne luy donner occasion de me commander d'escrire par de là au contraire.

Aussi ne me mis-je en peine de luy remonstrer que le Roy ne deuoit ny pouuoit demander la paix au Roy d'Espagne, pour ce que i'ay opinion que sa Sainteté par sa lettre, quand ibdit, *OSCAR DI PACIFICATORI*, &c. n'a point entendu que le Roy recherchast de paix ledit Roy d'Espagne, mais seulement qu'il se disposast à la paix, & aduisast & pourueust aux moyens de la faire, pendant que sa Sainteté feroit office de pacificateur & modérateur entre eux deux. Et ce sans s'accorder mieux avec le propos que Monsieur le Legat tint au Roy de la paix le 24. Decembre, qui sont contenus en la lettre que sa Maiesté m'escriuit le 26. en l'article qui commence: *DE GE PROPOS LEDIT SIEVR LEGAT BAT ENTRE EN CELUY DE LA PAIX.*

Le luy parlay tout à la fin de Madame l'Amirale, comme i'auois fait en mes audiences des 24. & dernier de Ianuier, conformément à ce que ie vous en ay escrit par cy-deuant; & il me fit les mesmes responses qu'il m'y auoit ja faites. Le point de la Iurisdiction est, encores pendant & indecis, & comme les choses sont grandement longues à Rome, il y a danger que cela ne traîne trop longuement. J'ay conseillé à ceux qui m'en ont escrit de Thurin, qu'ils demandassent qu'elle eust la maison pour prison, au moins en baillant caution, pendant ce conflit de Iuridictions, qui pouuoit aller trop à la longue. En sortant du Pape i'allay à Messieurs ses neveux, comme est la coustume, & leur dis les mesmes choses que i'auois dites au Pape, de quoy ils monstrent de demeurer satisfaits plus par contenance cōme le Pape, que par paroles, estans fort retenus à l'exemple de sa Sainteté, & mesmement en ce qui touche les Princes. Monsieur le Cardinal Aldobrandin me dit qu'il auoit escrit aux Nonces, & leur escriroit de nouveau, qu'ils ne chargeassent leurs paquets de lettres d'autrui; mais il est fort malaisé qu'ils s'en gardent, & mesmement celuy qui est en Espagne, frere du Cardinal Caetano, dont toute la maison fait profession d'estre obligé & mesme deuote au Roy d'Espagne; & croy que ledit Cardinal Aldobrandin ne mesme auroit trop de peine à refuser de mettre en son paquet va par

quel du Duc de Sesse pour Espagne, quelque déplaisir que ledit Ambassadeur luy fit de l'en rechercher, comme ie croy à la verité qu'il en seroit marry. A tant, &c. Monseigneur, &c. De Rome ce 18. Feurier 1597,

## A MONSIEUR DE VILLEROY.

LXXXIX.

**M**ONSEIGNEUR, Cette lettre sera comme vne continuation de ma lettre du premier de ce mois, estant sur mesme sujet, & contenant la suite des propos de paix, ou suspension d'armes, commençant par cy devant par nostre saint Pere le Pape, & depuis par moy continué, sur l'occasion que vous m'en auez donnée par vos lettres. Je receus le 25. Ianvier vostre lettre du 20. Decembre, par laquelle; entre autres choses, il vous auoit plu m'escrire le propos de paix que vous auoit tenu l'Euesque de Mantouë, & la responce que vous luy auiez faite. Et d'autant que le tout se tenoit avec les dernieres choses qui s'estoient passees entre le Pape & moy es deux audiences precedentes, l'estimay pendant que la memoire en estoit fraiche, & que sa Sainteté estoit en bonne humeur, en deuoir traiter en la prochaine audience, comme i'eus Vendredy dernier iour de Ianvier; & apres luy auoir dit, comme depuis auoir esté à ses pieds i'auois receu lettres de vous, où se parloit des choses dont il auoit plu à sa Sainteté me parler es deux dernieres audiences, ie luy exposay le contenu de l'article de vostre dite lettre, lequel commence, *L'AY VIV L'EVESQUE DE MANTOUE EN PARTICULIER*. Nostre S. Pere approuuant le reste fut grande difficulté sur ce que vous desirez que la paix se traite icy, & dit qu'il auoit choisi le lieu de Flandre pour le plus commode, & le meilleur pour les uns & pour les autres; Qu'en la Cour de Rome il y auoit tant de sortes de gens si curieux & si penetrans, que mal-aisément cét affaire y pourroit estre tenu si secret comme vous desiriez: & que pour remedier à ce que vous craigniez, le Legat pourroit enuoyer en Flandre au lieu de l'Euesque de Mantouë, quelque personne positive, qui n'eust autre qualité ny monstre. Je repliquay que la curiosité regnoit voirement en ceste Cour auxant que nulle autre chose, mais quand les parties voudroient tenir le traité secret, & que sa Sainteté leur enjoindroit étroittement, les residens icy auoient leurs audiences ordinaires à certain iour toutes les semaines, & que personne ne se pourroit asseurer qu'ils parlassent de paix plutost que d'autres choses; Que pour positive que fust la personne que le Legat enuoyeroit de France en Flandre, cela seroit seu bien tost apres par nos allies, se faisant si pres d'eux, & comme à leur veü, & eux en ayant ja en l'alarmé, par le bruit qu'en auoient espandu ces iours passez les Espagnols, qui encores le publioient eux-mesmes; Que sa Sainteté desirant la paix entre ces deux Couronnes, & l'estimant necessaire pour le bien de la Chrestienté, deuoit prendre la premiere bonne occasion qui s'offriroit de la traiter, sans s'arrester à ces preludes & formalitez de lieux, ou autres qui ne luy importoiert à luy ny aux Espagnols, & nous importoiert à nous.



pour cause de nosdits allies; Que bien souvent en telle chose de peu, se perd  
 doit plus de temps qu'il n'en faudroit à traiter ni conclurre tout l'affaire  
 principal, & partant ie le priois d'y penser. Il me dit qu'il y penseroit, &  
 nous en demeurâmes en ces termes. Le lendemain, à sçavoir le Samedi  
 premier iour de ce mois, ie receus la lettre du Roy du vingt-sixiesme De-  
 cembre, où ie trouuay qu'il se parloit de cela-mesme encôres plus ample-  
 ment, dont ie fus tres-aïse, me semblant que i'auois receu vn grand con-  
 fort pour la prochaine audience, laquelle ie dis à sa Sainteté, com-  
 me depuis la dernière audience i'auois encôres eu d'autres lettres du Roy,  
 où i'auois trouué la résolution de plusieurs choses que sa Sainteté desiroit  
 sçavoir, par où elle verroit la rondeur & franchise du Roy, & la bonne foy  
 dont il procedoit, & le respect & reuerence qu'il luy portoit, & l'entiere &  
 parfaite fiance qu'il auoit en elle. & adioustay que sa Sainteté seroit pos-  
 sible plusieurs mois, pour ne dire années apres les Espagnols, auant qu'elle  
 peulst trier de leurs intentions, autant comme le lui dirois de celles du Roy  
 en vn quart d'heure. Apres ceste petite entrée, le luy exposay tout ce qui  
 estoit en ladite lettre du Roy touchant ledit propos de paix, & suspension  
 d'armes, & n'en voulus faire à deux fois, tant pour luy donner plus à co-  
 gnoître la bonté & bonne foy du Roy, qu'afin qu'il y vîst plus clair, & ne  
 s'abusast ni perdît temps en vne dépesche, apres laquelle ie sçauois qu'il  
 estoit pour Espagne; & pour Monsieur le Legat, & qu'il la vouloit enuoyer  
 par courriers exprés. En premier lieu de ceques, ie luy dis que sa Sainteté  
 ayant par son Legat exhorté le Roy à la paix, sa Majesté outre la response  
 faite sur le champ audit Legat, me commandoit d'asseurer sa Sainteté  
 qu'il la vouloit & desiroit, comme Chrestien, & comme tres-deuot à sa  
 Sainteté qu'il l'y exhortoit; & encôre pour plusieurs occasions qu'il n'é-  
 toit besoin de dire, puis que les volôtez de sa Sainteté & de sa Majesté se  
 rencontroient en cela. Secondement, que comme sa Majesté estoit disposée  
 & prestée à faire la paix, aussi ne pouuoit-elle entendre d'aucune suspensio d'ar-  
 mes, sinon en vn seul cas, à sçavoir si sa sainteté pouuoit tant faire, que le  
 Roy d'Espagne redîst à sa Majesté les villes qu'il auoit vsurpees sur la Fra-  
 nce en ceste dernière guerre autrement ledit Roy d'Espagne demeurant faïst  
 desdites places, il les feroit fortifier à son aïse, & les rendroit imprenables.  
 Dauantage, le Roy perdroit ses allies & confederes, qui ne feroient de  
 rien moins jaloux & mal contents de telle suspension, qu'ils feroient de la  
 paix, ains auroient occasion de l'estre dauantage. Aussi le Roy sans s'assé-  
 rer soy-mesme, les auroit abandonnez en proye au Roy d'Espagne, lequel  
 apres auoir fait avec eux, se rüeroit sur la France avec toutes les forces, les-  
 quelles maintenant il estoit contrainct de tenir dispersées çà & là pour se  
 garder de tous ses allies ensemble. A quoy s'adioustois, qu'en ce cas n'auoit  
 lieu la maxime qui dit, que la suspension d'armes est vn preparatif à la  
 paix, & vn moyen pour la traiter & conclurre, d'autant que les Espa-  
 gnols tenans trop du nostre & n'ayans rien à recouurer du leur, quand la  
 suspension d'armes seroit vne fois faite, ne se soucieroient plus de faire la  
 paix, ny d'en traiter, puis que par le moyen d'icelle il fandroit qu'ils ren-  
 dussent sans rien recouir. Mais si la guerre continuant sans intermission,  
 auoient que nous fassions pour leur vñt par force ce qu'il nous de-  
 uient.

fément, & possible leur oster autāt du leur, alors pour crainte de pis il leur  
 pourroit prendre envie de faire la paix, & de faire semblant de rendre ce  
 qu'ils ne pourroient retenir. Par toutes ces considérations doncques, le  
 Roy ne pourroit entendre à la suspension d'armes, qui seroit vne pure per-  
 te pour luy, & vn pur gain pour le Roy d'Espagne. Car quand au soulage-  
 ment & amendement que la trefue pourroit apporter à la France, cela estoit  
 assez recompensé parce qu'il en aduiendroit autant, ou plus à l'Espagnol  
 pour establir & affermer son fils, & redresser & r'accômoder ses affaires de  
 toutes parts. En troisieme lieu, que sa Majesté desiroit que la paix se trait-  
 ast pres sa Sainteté, & par elle, & non en Flandre, ny ailleurs qu'à Rome;  
 pource que les parties, pour le respect de la Sainteté, y procederoient  
 plus fondement, & de meilleure foy, & avec moins de cauillations, subter-  
 fuges, delais, & longueur: & quelque vne desdites parties se deuoit du  
 chemin de sa raison, la Sainteté la pourroit corriger & r'adresser, & ayant  
 elle les Nonces pres les deux Rois, pourroit par le moyen d'iceux faire en-  
 tendre ausdits Rois, ce qui luy déplairoit en la procedure de leurs Am-  
 bassadeurs & ministres; comme aussi les deux Rois qui auroient leurs Am-  
 bassadeurs pres d'elle, pourroient avec plus de commodité & de secrettesse  
 traiter ladite paix, comme ie luy auois dit en l'audience precedente, & les-  
 dits Ambassadeurs, par le moyen des courriers ordinaires qui sont tous  
 dressés à Rome, & qui vont & viennent de temps en temps, pourroient  
 sans donner subçon d'aucun tel traitté, tenir aduertir leurs Majestez, &  
 en recevoir nouvelles commissions & mandemens, selon que besoin se-  
 roit; outre que de Rome on peut & a t'on acoustumé de despescher des  
 extraordinaires sous diuers pretextes, plus que de nul autre lieu de la Chre-  
 stienté; Qu'aussi estoit-il meilleur pour le contentement, autorité, & re-  
 putation de la Sainteté, que la paix se traitast en sa presence, & par son  
 moyen, d'autant qu'elle seroit la premiere à sçauoir toutes choses, ne se-  
 roit en doute ny en suspens de ce qui se passeroit, comme il est necessaire  
 qu'elle soit des choses qui se font loing d'elle, verroit par ses yeux, enten-  
 droit par ses oreilles, & ne pourroit estre deceuë par faux rapports des  
 parties, ny de ses ministres partiiaux, & seroit mediatrice & arbitre de tou-  
 tes choses; en somme la paix se feroit par ce moyen, & plustost, &  
 mieux. En quatrieme lieu, quant aux conditions de la paix, le Roy se con-  
 foit tant en la iustice & droicture de sa Sainteté, qu'il la feroit tousiours  
 iuge de ses droits & pretentions; outre qu'il luy feroit entendre sa volonté  
 par Monsieur le Legat, quand ledit sieur Legat s'en retourneroit vers sa  
 Sainteté. En cinquieme lieu, le Roy pour monstrier d'autant plus sa bon-  
 ne & prompte volonté, ne s'arristeroit point là, ains passans outre, indic-  
 queroit à sa Sainteté par où il luy sembloit qu'il fallust commencer cette ne-  
 gotiation, & luy mettoit en consideration s'il ne feroit pas bon de sçauoir  
 auant toutes choses la volonté du Roy d'Espagne, & en retirer sa parole, &  
 s'en assurer: de commander aussi à l'Euesque de Mantouë d'aller en Flan-  
 dres vers le Cardinal Albert, & les Ministres du Roy d'Espagne, qui luy as-  
 sistent, pour entendre leurs intentions, & les rapporter à la Sainteté, sans  
 repasser par la France pour les causes cy-dessus & plusieurs fois aupara-  
 vant dices.

Le Pape fut bien aise d'entendre ce que dessus, & loüa la bonne disposition du Roy, & la rondeur dont sa Majesté ysoit : mais quant au lieu où la paix se deuoit traiter, ie trouuay qu'il n'auoit point changé d'avis depuis l'audience precedente, ains qu'il sembloit s'estre préparé pour me monstrier qu'elle se deuoit traiter en Flandres & non icy. Ses raisons furent, que le Cardinal Albert estant celuy qui commandoit à l'armée du Roy d'Espagne par de là, & qui sçauoit mieux l'estat des affaires que nul autre, & qui d'ailleurs estoit si proche parent du Roy d'Espagne, auroit plus d'autorité & de credit aupres de luy pour luy persuader la paix, & ce qu'il faudroit accorder ou non, que n'auroit vn Ambassadeur à Rome, auquel ledit Roy n'enuoyeroit pas vn pouuoir si ample & si libre, comme il pourroit faire audit Cardinal; Qu'en la Cour de Rome, outre la curiosité, dont il m'auoit ja parlé le Vendredy auparauant, qui feroit que la chose ne se pourroit tenir secrette, il y auoit encores des Cardinaux, & des Ambassadeurs & ministres de diuers Princes, qui auoient diuers interests, fins, & intentions, & les vns voudroient la paix, les autres non: & de ceux qui la voudroient, les vns la voudroient d'une façon, les autres d'une autre: & tous ceux-cy non seulement broüilleroient les affaires, mais aussi escriroient en France & en Espagne, & feroient de mauuais offices aupres de ces deux Roys, & leurs partiroient le cerueau, de façon qu'il ne se pourroit faire chose bonne. Je repliquay, que ie recognoissois que ce que la Sainteté disoit du Cardinal Albert estoit vray: mais comme ie croyois que ledit Cardinal tenoit ordinairement aduertie le Roy d'Espagne de l'estat de ses Pays-bas, & du besoin qu'ils pouuoient auoir de la paix, ou de suspension d'armes, aussi quand la paix se traiteroit à Rome, il ne lairroit pas de faire sçauoir audit Roy d'Espagne son aduis sur la paix, & sur les conditions qu'il estimeroit deuoir estre accordees, & le Roy d'Espagne ne lairroit de luy croire tout autant.

Aussi ne falloit-il penser que ledit Roy donnast plein pouuoir à personne, sinon que possible en apparence, ny qu'il se remist des conditions de la paix audit Cardinal, ou autre, quelque proche parent qu'il fust, ains les voudroit prescrire luy-mesme à ses ministres par bonnes instructions, avec commandement de ne les outrepasser, mais bien d'en rabbatre & gagner tout ce qu'ils pourroient, & de l'aduertir bien souuent, & de point en point, de tout ce qui se passeroit en la negociatiō, pour receuoir là dessus ses commandemens, & ne rien conclure d'importance sans iteratifs commandemens de luy; de sorte que par ce moyen il y auroit peu de difference entre ledit Cardinal & l'Ambassadeur de Rome pour ce regard. Au demeurant, ie recognoissois aussi tout ce qu'il auoit pleu à la Sainteté me dire de la curiosité, & de la diuersité des interests, fins, & intentions de tant de grands qui residioient à Rome: mais les curieux n'en pourroient point descouvrir, plus qu'en sçauoient les Espagnols mesmes qui negotieroient, en l'arbitre & discretion desquels seroit tousiours d'en dire ou taire autant que bon leur sembleroit, voire de supposer, & inuenter, & publier ce qui n'auroit esté fait ny dit, ainsi qu'ils estoient coustumiers de faire, & qu'ils feroient encore, quand bien on ne traiteroit iamais. Tellement que les courtisans curieux n'estoient pastant à craindre, comme les Espagnols mes-

mes qui traitteroient, s'ils auoient mauuaises intentions, comme il s'en falloit tousiours douter. Mais il y auroit tousiours ceste difference entre traiter la paix en Flandres & icy, que si elles se traittoit en Flâdre à la veuë de nos alliez, les curieux & les Espagnols en seroient creus, ains sans qu'ils en parlassent nosdits alliez le verroient assez d'eux-mesmes, nous n'aurions le moyen ny l'audace de le nier: mais la paix se traittant icy loing, les Espagnols ny les curieux n'en seroient si tost creus, & nous pourrions tousiours dire à nos alliez que les Espagnols nous veulent diuiser & separer d'auec eux, & ne mentirions point. Quant aux brigues & mauuais offices qui pourroient estre faits par destiers qui ne voudroient la paix, ou qui la voudroient d'une autre façon qu'elle ne se deuroit ou ne se pourroit faire, i'en disois autant comme i'auois fait des curieux, c'est, que ces tiers fussent Cardinaux, ou Princes, ou leurs Ministres; ne scauroient en toute leur vie briguer, brouïller, & faire de mauuais offices, tant comme feroient les mesmes Espagnols qui negocieroient; Qu'il n'y auoit Cardinal, Prince, n'y Ambassadeur de Prince, qui voulut plus, ny tant de mal à la France & aux François, ny qui voulust moins la paix avec nous que le Roy d'Espagne mesme, ny qui s'il falloit venir à paix avec nous, en desirast les conditions plus aduantageuses pour luy, que luy mesme, & ses ministres qui negotieroient; Que iamais il ne feroit la paix qu'à grand regret & par force, pour éviter vn plus grand mal, & avec les conditions les plus aduantageuses qu'il luy seroit possible. Par ainsi comme il n'y auoit puissance n'y animosité si grande, qui ne fust en fin contrainte de ceder à la necessité, aussi me falloit-il craindre que tous les mauuais offices que ces gens tiers nous pourroient faire aupres dudit Roy & de ses ministres, les peussent empirer, tant ils estoient deja d'eux mesmes mauuais & animez contre nous. Et quand lesdits curieux & malins, & autres choses qui auoient esté dites à ce propos, seroient de quelque consideration, toutesfois cela seroit fort peu, en comparaison des raisons qui suadoient de traiter la paix à Rome & non en Flandres. A quoy sa Majesté estoit si resoluë, qu'elle m'escriuoit ces propres paroles. Que si sa Saincteté n'y mettoit la main elle mesme, & pres d'elle, il estoit impossible de seulement commencer cette negociation; tant s'en falloit qu'elle püst estre acheminee; par ainsi ie priois sa Saincteté de s'y resoudre elle-mesme.

Elle me dit comme à la fin de la precedente audience, qu'elle y penseroit. Apres cela ne me restoit de ce que ie m'estois proposé de luy dire sur ceste matiere, sinon ce qui concernoit l'Euesque de Mantouë, laquelle chose i'eusse volontiers differee à vne autre fois, pour le desplaisir que ie scauois que nostre saint Pere en receuroit, & pour n'entremettre cette amertume avec & apres ces choses precedentes, qui ne pouuoient estre que douces & agreables: mais ie scauois qu'ils estoient apres à despescher vn Courrier comme i'ay dit cy-dessus, avec les lettres pour Espagne, & pour Monsieur le Legat. Et partant afin que sa Saincteté n'escriuist, & n'ordonnast choses contraires au desir de sa Majesté touchant ledit Euesque, ie me resolus de luy dire, apres auoir vsé d'un peu de preface pour l'adoucir, & le luy distout sans en rien obmettre. Sa Saincteté changea de couleur, & deuint pensif, & apres auoir demeuré vn peu sans parler, me dit qu'il pourroit estre que le-

dit Euesque n'eust pas tant de patience comme d'autres , ny possible comme il seroit besoin pour l'Estat des choses de delà ; mais qu'il voulust faire quelque chose pour le service du Roy d'Espagne contre la France , il ne le croyoit point : aussi ne seroit-ce pas le chemin de paruenir à ce qu'on disoit qu'il desiroit; Que ledit Euesque luy auoit escrit, le suppliât de luy permettre des'en venir quand le Legat s'en retourneroit. C'est tout ce qu'il m'en dit, & apres luy auoir parlé de quelques autres choses particulieres, comme du Clergé de Mets, & pays Mellin, de Frere Serafin Banchi, & du Bailly de l'Aigle, ie luy demanday sur mon partemēt ce que i'auois à escrire touchant ledit Euesque; & sa Sainteté me respondit , que ledit Euesque demandoit son congé pour s'en retourner en ça & n'y adiousta vn seul mot de plus.

Et partant d'avec le Pape i'allay trouuer Monsieur le Cardinal Aldobrandin , & puis Monsieur le Cardinal saint George , ausquels ie dis les mesmes choses que i'auois dites à sa Sainteté. Et quant au lieu où la paix se deuoit traiter, ils me dirent separément l'vn & l'autre les mesmes choses que m'en auoit dit sa Sainteté. A quoy ie recognus que sa Sainteté & eux en auoient parlé ensemble , sur ce que ie leur en auois dit en l'audience du 31. Ianuier , apres auoir receu vostre lettre du 21. Decembre. Mais quant à l'Euesque de Mantouë, Monsieur le Cardinal Aldobrandin monstra particulièrement en estre marry , & dit qu'il sçauoit bien que ledit Euesque estoit homme de bien , & que le Pape l'auoit enuoyé pour le meilleur qui se fust alors trouué en tous ces quartiers icy , & que Monsieur le Legat s'en contentoit comme de l'Amaltheo ; mais que c'estoient des mauuais offices qu'on faisoit audit Euesque ; Que luy qui parloit sçauoit bien dire qui; Qu'il n'en falloit point sçauoir mauuais gré au Roy ny à ceux de sa Cour , où cecy n'estoit point nay : mais qu'il desireroit bien que sa Majesté fust aduertie de se prendre garde de ceux qui luy donnoient mauuaise impression de certaines personnes, non pour mal qui fut en elles, mais pour ce qu'ils ne les aimoiēt point. Je cogneus par là que i'auois bien fait de m'en adresser au Pape tout droit & le premier, & que si i'eusse parlé audit Seigneur Cardinal Aldobrandin premierement , i'en eusse trouué le Pape plus aigre, & qu'il luy eust vsé de toute autre preface, que n'auoit esté la mienne quand ie commençay à en parler à sa Sainteté. I'entendis très-bien de qui ledit Seigneur Cardinal entendoit parler , sans toutesfois que i'en fisse aucun semblant, ains auant que leur en parler ie deuinaay qu'ils soubçonnoient Monsieur le Grand Duc: & quand i'en eusse tant sçeu , i'eusse toujours peu cognoistre que Monsieur le Cardinal Aldobrandin entendoit parler de quelque grâd, car il m'en parloit avec quelque crainte, & me pria de ne dire à personne rien de ce qu'il m'en disoit. Je croy que ledit Seigneur Cardinal se mouuoit, de ce qu'il croit la chose comme il me la disoit: mais ie croyois bien aussi que cela le poignoit autant & plus, que luy qui veut faire faire des Cardinaux le plus qu'il pourra, peut auoir fait estat de cestuy-cy, comme d'vn de ceux qui pourra plus aisément obtenir du Pape pour sa noblesse, & pour ses autres qualitez. Et l'euénement de tout cecy pourra estre, que le Pape fera retourner ledit Euesque par deçà, suiuant la requeste dudit Euesque, & le desir du Roy, & qu'à la premiere occasion on le fera Cardinal, pour recompense de ce qu'il n'aura esté Nonce par delà , comme il

auoit esté dit qu'il seroit. Voila pourquoy il sera bon qu'il se parte de là le moins mal-content qu'il sera possible; outre que sans cela il seroit tousiours meilleur ainsi. Je remis ledit sieur Cardinal, en luy disant que le Roy auoit particulièrement fiance en luy, & m'auoit mesme commandé de luy dire ce-cy à luy le premier, & dernièrement en quelque autre occasion m'auoit es-crit qu'il vouloit tousiours estre ioint à luy, & qu'il disposast de route la part que sa Majesté auroit iamais par deçà. Alors il se changea tout, & me dit qu'il estoit marry de quoy sa Majesté ne l'auoit plus grande, & qu'il luy estoit tres-deuot seruiteur, & la seruoit en toutes occasions comme il auoit fait par le passé, ainsi que ie luy en estois tesmoin; & sur celame parla de Monsieur le Cardinal de Giury, m'assurant qu'il auoit esté fait Cardinal à bonne fin, & qu'il auoit tousiours incliné au repos de la France, & à l'absolution du Roy, & que sa Maieité en seroit bien seruié, & qu'il la supplioit de faire quelque bien audit Scigneur Cardinal de Giury, afin qu'il se peust entretenir honorablement par deçà, & que si luy Cardinal Aldobrandin auoit en cela autre fin que le seruice de sa Maieité, il prieroit plustost le Pape de luy faire quelque bien, afin qu'il s'en sentist obligé à luy. Monsieur le Cardinal saint George prit ceste chose de l'Euesque de Mantouë plus doucemét, disant neantmoins plusieurs choses à la louange dudit Euesque, & pour monstrier que nostre saint Pere l'auoit choisi comme personne qui deust estre agreable par delà, pour y auoir des parens de tres-grandes qualitez, outre les bonnes parties qu'il y apportoit d'ailleurs. Je respondray au reste de vostre lettre du 21. & de celle du Roy du 26. Decembre, par l'ordinaire que nous depescherons d'icy à peu de iours, & encores à vostre autre lettre du 20. Ianuier que ie receus hier; cependant vous aurez ces deux, es-quelles ie n'ay voulu mettre que ce qui appartenoit au fait principal que dessus. A tant, &c. Monseigneur, &c. De Rome ce 19. Feurier 1597.

## A MONSIEVR DE VILLEROY,

LXXX.

**M**ONSEIGNEVR, Depuis la depesche que ie vous fis au mois de Ianuier, i'en ay receu trois des vostres: la premiere du 21. Decembre, qui me fut renduë le 25. Ianuier; la seconde du 26. Decembre, renduë le premier de ce mois; & la troisieme du 20. Ianuier, renduë le 8. de ce mois. J'ay déjà respondu à la principale partie de leur contenu, laquelle consistoit en negotiation, par mes lettres des 9. & 17. de ce mois, vous rendant compte de ce que i'en auois traité avec le Pape, & Messieurs ses neueux, en mes audiences des dernier de Ianuier, 7. & 14. de ce mois, outre la lettre que ie vous escriuis le premier de ce mois, touchant l'audience que i'auois eue le vingt-quatriesme Ianuier. Par ceste-cy ie respondray au reste de vosdites trois depeschés qui me semblera auoir besoin de response: ayant au demeurant noté le tout, dont ie me suis ia seruy, & me seruiray cy-apres pour le seruice du Roy.

Premierement, ie loüe Dieu de ce qu'il a si tost deliuré le Roy de la fièvre double-ouarte qui luy estoit suruenü, & prie la dñuine bonté qu'il luy plaïse le conseruer en santé, & luy donner viêtres-longue & heureuse, pour la restauration de la France, & pour le bien, reputation, & ornement de toute la Chrestienté. La deuotion que sa Majesté a monstree en ces festes de Noël, la conuersion de M. la Princesse de Condé, la confirmation de Cesar Monsieur, l'honneur fait à Monsieur le Legat, & autres choses semblables, dont le Pape fit part aux trois Cardinaux au Consistoire du Mercredy 29. Ianuier, retentissent par deçà à loüange de sa Majesté, & au desplaisir des Espagnols, qui se faschent de toutes les choses bonnes & Sainctes que sa M. fait, comme estans autant démentis pour eux, qui ont tousiours mesdit, & mal auguré de luy. La conuersion de Madame sœur du Roy, que nous esperons à ces Paques prochaines, leur sera cōme vn coup de massüë sur leurs testes, & la publication du Concile de Trente, qui se fera en temps & lieu, les assommerá du tour. Je n'adiousteray autre chose à ce que ie vous-ay escript autresfois de ladite publication, sinon vn mot que me dit vn iour le Cardinal Bandini; Que jaçoit que le fruiët du Concile consisté principalement en l'obseruation d'iceluy, & qu'il soit à desirer, & à procurer qu'il s'obserue au mieux qu'il sera possible, ce neantmoins pour le gré, loüange & reputation du Roy enuers le saint Siege, & enuers tous les Catholiques, la publication sans l'obseruation pourroit plus, que l'obseruation sans la publication. La promesse que le Roy a faite de faire publier ledit Concile, & la corruption du temps où nous sommes, rend ce dire veritable, qui autrement ne feroit receuable. Et quand tout sera bien considéré sans passion, il se trouuera fort peu ou rien d'importance, dequoy les Cours de Parlement ny autres se puissent plaindre, & à ce qui y pourroit estre sera facilement remedié par, vn fauf, de deux, ou trois lignes.

Si on metourne à parler des Abbayes de Mont-Majour, & de saint Aphrodise de Beziers, l'en respondray au mieux que ie pourray sans aigrir les matieres, autrement ie n'en parleray point du tout; aussi bien le Pape qui a tant d'autres affaires en teste, n'y pense point, sinon quand on luy en fait souuenir.

On n'a point commencé pour encores l'expedition de l'Euesché de Bayonne, & ne s'y fera rien sans nouueau commandement du Roy; bien auois-je ia demandé au Pape & obtenu le gratis de ceste expedition. Du Cardinal Alexandrin, qui eut audience le matin au Consistoire du Vendredy 24. Ianuier, de la réponse dudit Cardinal au neuueu du feu Cardinal Ruemanus, ny de rien qui se soit passé entr'eux, ie n'ay monstté à personne d'en sçauoir rien, & moins d'en auoir donné aduis à sa Majesté.

L'Archeuesque de Tours fut proposé & expédié au Consistoire le Vendredy 7. iour de ce mois, sans y faire aucune mention de la grace de l'expedition, ains comme si on eust deu payer en tout & par tout; & puis le *MOTU PROPRIO* pour le gratis fut signé par le Pape en sa chambre, suiuant l'intention qu'il m'en auoit donnée auparauant, la nouuelle instance que ie luy en fis. On en dépesche maintenant les Bulles, & n'a t'on donné esperance qu'elles pourront estre enuoyees par cet ordinaire; quoy qu'il en soit, s'enuoyent elles ou non, c'estoit vn des affaires que l'auois

plus à cœur de voir expédié. Le premier que ie feray dépescher sera l'Archeuesché de Rouën pour Monseigneur Charles de Bourbon frere naturel du Roy, pour lequell la dispense est ja obtenüe, & espere que par le premier ordinaire qui partira apres cestuy-cy ie vous donneray aduis comme il auroesté dépesché, & gratuitement. Apres cét affaire ie mettray en auant ce-celuy de Monsieur de Nantes pour l'Archeuesché de Reims pourueu, que l'on soit d'accord de la forme de l'expedition, & que ce que ie feray à descouuert on ne me defface en cachette, comme ie sçay qu'on a preueu & mal-informé le Pape, & autres par les mains desquels nous auons à passer, & à destourner vn gratis, & à retarder quelque expedition que ce soit, il y a fort peu à faire.

Ie fis enuers Monsieur le Cheualier Delfin de la part du Roy, & vostre, le compliment que vous me commandiez tout à la fin de vostre lettre du 21. Decembre, sur ce qui auoit esté fait au Senat de Venise, lequel s'en sentit fort fauorisé & honoré, auec tres-expressse declaration de la deuotion qu'il a au seruice du Roy, & au bien de l'Estat, pour les faueurs & honneurs qu'il auoit receus de sa Maiesté, & du feu Roy, & de tous les Princes & Seigneurs de ceste Cour, & pource qu'il sçait que le bien & prosperité du Roy & de la France importe à toute la Chrestienté, & principalement à la Seigneurie de Venise, qui obserue & reuere singulierement sa Maiesté & la Couronne tres-Chrestienne, & en attend toute faueur & confort aux occasions que le temps pourroit apporter. Aussi me declara-t'il fort amplement la grande estime qu'il fait de vostre personne, & le desir qu'il a de vous seruir, comme ie sçay d'ailleurs qu'il a tousiours fait de bons offices au Roy, & a parlé au Pape & à d'autres quand l'occasion s'en est presentee tres-honorablement; en quoy il a beaucoup de concurrens, mais peu de telle autorité & credit que luy.

En l'audience que i'eus le Vendredy dernier iour de Ianuier, qui fut la premiere apres auoir receu vostre dite lettre du 21. Decembre, ie dis au Pape l'obstination du Duc de Mercœur, & le priay d'en parler à l'Euesque de Verdun son frere, & mesmes d'autant que ledit Euesque s'en deuoit retourner en Lorraine de la à peu de iours, & que les derniers propos qui se disent sur les adieux, sont ordinairement ceux qui descendent & s'impriment le plus auant au cœur. Sa Saincteté me dit qu'elle le feroit, & ie croy qu'elle l'aura fait: mais ie tiens tout cela pour perdu, & que cét homme n'en fera rien pour le Pape, lequel il ne reuere sinon qu'autant que son profit l'y induit, & trouuera tousiours ses eschappatoires enuers sa Saincteté, ains pretendra qu'elle luy soit encores bien tenuë de ce qu'il differe à recognoistre le Roy. Le vray remède, à ce que chacun pense, seroit que sa Maiesté, si elle n'a en main quelque plus grande entreprise reüssible, laissant la frontiere de Picardie bien munie, allast en personne en Bretagne auec le plus de forces qu'il pourroit, & fauorisé de la Royned'Angleterre par mer & par terre; ce que vous voyez & entendez trop mieux par delà, mais trop de zele m'a fait souuent dire choses superflües.

Monsieur l'Euesque de Verdun partit de ceste ville pour s'en retourner en Lorraine à son Euesché le 12. de ce mois, prenant son chemin par la Toscane, où il deliberoit passer les iours gras auec le grand Duc & la gran-



de Duchesse. Le Pape n'a point voulu qu'il se fist Ieiuite ; & plusieurs Seigneurs de ce College luy ont remonstré qu'il pourroit plus seruir à Dieu & à l'Eglise, & faire plus de Societé du nom de Iesús demeurant Euesque & Prince comme il est, que s'il entroit en ladite Societé. Tellement que s'il est resolu de n'y penser plus, & de s'estudier du tout à faire le deuoir d'un bon Euesque. Il s'en retourne moins accompagné qu'il n'estoit venu, pour ce que outre les trois dont ie vous escriuis qui s'estoient rendus Iesuites, il s'en est encores rendus d'autres de sa suite iusques au nombre de huit, outre deux qui luy sont morts.

Ie n'aurois que vous respondre à ce que vous m'escriuez touchant Monsieur de Sauoye par vostre ditte lettre du vingtiesme Ianuier, outre ce que ie vous en ay touché par ma lettre d'hier, n'estoit que vous y dittes que c'est avec la France seule qu'il peut faire fortune pour luy, & pour les siens; ce qui m'a donné occasion de vous dire, à la peine d'estre indiscret vne autresfois en disant ce que vous & vn chacun de delà scauez trop mieux, que comme ie desirerois qu'il eust déjà fait sa paix avec nous à conditions iustes & honorables pour le Roy & pour la Couronne, aussi ne voudrois-je pas qu'en la paix, ny apres la paix, il fust autre fortune avec la France pour soy ny pour les siens, ne pouuant oublier combien cher couste à la maison Royale & toute la France la fortune qu'ont fait avec elle ceux de la maison de Lorraine, qui n'ont fait la guerre à nos Roys & à leur Estat, sinon qu'avec les principaux gouuernemés, estats, & dignitez, tant seculiers qu'Ecclesiastiques, que la trop grande facilité & peu de preuoyance de nos Roys ont mis en main de tant de Princes estrangers & voisins, & d'une mesme maison, contre toutes raisons d'Estat, lequel auroit aujourd'huy plus grand besoin de chercher à s'affranchir de ces gens icy petit à petit à mesure mesme qu'il en mourroit quelqu'un, ou que quelque bonne occasion s'en presentast, comme celle qui semble s'offrir aujourd'huy de débarquer le Duc de Mercur, & de donner le gouuernement de Bretagne à vn François, que non pas de le surcharger de ces petits bouueteaux de Safoye, qui ne nous promettent pas d'estre en rien meilleurs que leur pere, & qui s'entremangeront vn iour si nous les laissons en leurs montagnes & tanières, sans nous donner aucun trauail: sinon autant que nous leur en donnerons le moyen. De ma part ie ne voudrois pas qu'on leur donnast seulement vne compagnie d'hommes d'armes : & prenez garde s'il vous plaît quelles charges & quels biens leur ayeul propre leur donnera au Duché de Milan, & comme il se comporte aujourd'huy avec leur pere son gendre. Ce qui n'est point mauuais traitement, ainsi que vous autres l'appellez par delà, ains preuoyance, & cognoissance certaine que le beau-pere a des humeurs de son gendre, & qu'il luy auroit peu de seureté à luy siervne armée ou autre charge d'importance. Mais ie m'oublie, de façon toutesfois que ie ne seray marry que le Roy voye ceste mienne impertinence, qui ne prouient que du zele que i'ay à son seruice, & à la seureté & repos de ma patrie.

Quant aux postes que vous voulez dresser sur le chemin de Toul à Brest, ie ne scaurois que s'adresser au dessein que vous m'en auiez enuoyé, sinon que ie vous prie de vous souuenir de ce que ie vous respondis à vn propos semblable par ma lettre du 16. d'Octobre, où ie vous disois, entre au-

tres choses, que si l'ordinaire de Lyon qui est entretenu par les expeditionnaires & marchands, sans que les voyages des Courriers coustent rien au Roy, se rompoit, il faudroit que le Roy payast les Courriers tant en allant qu'en venant, sinon que les paquets fussent enuoyez de poste en poste par estat faitte aux despens des maistres des postes. Et comme vous pouruoyez au chemin d'icy à Paris, il faudroit pournoir à celuy d'icy à Lyon, en ordonnant vn de ces lieux, qui se trouuent en ce nouueau chemin d'icy à Paris vers la Lorraine, où se fit la separation des paquets qui iroient d'icy à Paris d'auec ceux qui iroient d'icy à Lyon, si on ne trouuoit meilleur que les paquets qui iroient d'icy à Lyon, allassent iusques à Paris, & de là par la poste fussent portez à Lyon, & ainsi des paquets qui seroient enuoyez de Lyon icy.

Monsieur de Luxembourg n'est point venu, & à ce que ie puis entendre par vn sien, que i'ay chez moy, & qui arriva icy le 14. de ce mois, pour luy arrester vn Palais, & faire autres preparatifs, il ne sera icy de deux mois. Et le Pape n'a aucune occasion de faire promotion de Cardinaux de long temps, si le Roy qui n'a eu sa part ne le requiert. Qui est tout ce que i'ay estimé deuoir respondre à vosdites trois depeschés.

Des occurences de deça, ie vous escriuis le 16. Ianuier la dispute qui estoit entre Messieurs les Cardinaux Iustinian & Aquauiaua touchant la Vice-protection de France qu'ils s'entre-renuoyent par trop de ciuilité & de respect qu'ils se portent l'vn à l'autre, & ce que i'y auois fait: Le 18. ie vous escriuis comme i'en auois parlé le 17. pour la seconde fois au Pape, qui m'auoit respondu qu'il leur ordonneroit de s'en accorder ensemble; ce qu'il fit au Consistoire qu'il tint le 24. Ianuier au matin, ainsi que luy-mesme me dit en l'audience que i'eus l'apresdinee, & m'apprit vne raison que ledit Cardinal Iustinian luy auoit alleguee, laquelle ie ne scauois point, c'est que lors que l'on entendit que Monsieur le Cardinal Aquauiaua venant d'Auignon s'approchoit de Rome, l'Agent de Monsieur le Cardinal de Ioyeuse luy estoit allé dire, qu'avec son congé il diroit aux expeditionnaires & solliciteurs François qu'ils se retirassent désormais vers ledit Seigneur Cardinal Aquauiaua pour les matieres consistoriales de France qu'ils auoient à faire expedier; ce que ledit sieur Cardinal Iustinian auoit pris comme chose venante de la part de Monsieur le Cardinal de Ioyeuse: & cela mesme fit que le Pape montra d'incliner à ce que ladite Vice-protection fust exercee par ledit sieur Aquauiaua, afin de l'engager par ceste declaration à estre des leurs & des nostres, pour les libertez Ecclesiastiques contre la tyrannie des Espagnols, car c'est vne des meilleures & plus fermes testés de ce College. Je le fus remercier de ce qu'il auoit accepté ladite Vice-protection, & il me dit qu'il la tenoit à honneur, & n'y auoit fait difficulté que pour les raisons qu'il m'auoit dites. J'entends qu'il fait tousiours quelque bon office au Roy enuers le Pape, & luy mesme m'adit qu'il auoit dit à sa Sainteté qu'elle seroit bien de pacifier la France, & qu'aduenant la mort du Duc de Ferrare, & par consequent la deuolution de cet Estat là au saint Siege; sa Sainteté ne pouuoit ny deuoit attendre secours que de sa Maiesté; d'aurant que les Princes d'Italie ne voudroient que le saint Siege s'aggrandist, & le Roy d'Espagne, qui y tient le Duché de

Milan, & les Royaumes de Naples & de Sicile, le voudroit encores moins que tous les autres; Qu'en lisant l'histoire de France, il auoit obserué que nos Roys n'auoient point esté addonnez à rauer & prendre le bien d'autrui, ny à l'intérest, comme font ordinairement les grands Princes qui sont éminens par dessus les autres, ains avec grande generosité & bonté auoient fait les expéditions & entreprises aux pays lointains pour la justice & pour la Religion, & pour l'honneur & reputation de la Couronne, & particulièrement pour la restitution des Papes, & pour la conseruation & amplification du saint Siege, & que ce Roy sembloit auoir passé tous ses predecesseurs en generosité & bonté, & faisoit profession de se sentir fort obligé à sa Saincteté & au saint Siege.

Les leuees que le Cardinal Albert vouloit estre faites en Italie pour luy estre enuoyées, ne s'aduancent point, & quasi ne s'en parle plus, n'ayant peu le Prince Doria, ny le Connestable de Castille, ny le Viceroy de Naples, ny tout tant de Ministres que le Roy d'Espagne a en Italie trouuer cent mille escus, à cause de la suspension des payemens faits en Espagne, & de sa des fiance & banquerouttes qui s'en sont ensuiuies, & ensuiuent de iour en iour.

La nouuelle de la prise du Galion par ceux de Marseille arriua en ceste ville ce 30. Ianvier, qui donna grand plaisir & contentement à plusieurs, lesquels destinerent incontinent par leurs desirs & opinions toute ceste proye, qu'on a publicee fort grande, à la construction & armement d'un bon nombre de Galeres en ceste coste-là. Peu de temps apres, à sçauoir le huitiesme de Feurier, on publia icy que la ville de Han auoit esté vendue au Cardinal Albert par celuy qui y commandoit. l'espere qu'il ne sera point vray, ne s'estant plus confirmé depuis: mais ie vous prie d'aduiser que ce ne soit quelque commencement de traitté, comme i'ay veu aduenir bien souuent, & se trouua vray de ceste mesme ville de Han, ce que ie vous en escriuis, auant que le recouurement ou assurance nous en cousta si cher comme elle fit.

Ie vous escriuis dernièrement comme Monsieur le Cardinal Aldobrandin m'auoit parlé de Monsieur le Cardinal de Giury, sans que le propos s'y addonnast: i'en ay depuis sceu la cause; c'est, que ledit sieur Cardinal de Giury fait prier le Pape de luy prolonger le temps dans lequel il doit venir prendre le chappéau, remonstrant n'y pouuoir venir à faute de moyens, pour n'auoir plus l'Euesché de Lisieux, qu'il dit auoir perdu par arrest, dût il a enuoyé copie par deça, que ie n'ay peu voir, & pour estre au reste ruiné en ses autres biens, qui ne s'afferment à vn quart de ce qu'ils souloient; Que deux petites Abbayes, qu'on luy doit bailler pour recompense dudit Euesché, ne valent quasi rien; Que de la pension promise par le sieur de Feruacques, il ne s'attend point d'en estre iamais payé, ny gueres mieux de celle que le Roy a prise sur soy. Et en somme qu'il n'a dequoy fournir à son voyage, & moins dequoy s'entretenir icy quand il y seroit.

Le Roy d'Espagne ayant esté aduertty que le Pape n'auoit voulu que Messieurs ses neueux, ny le Seigneur Iean François Aldobrandin acceptassent les pensions dont ie vous ay escrit autrefois, a de nouueau fait prier la Saincteté de leur permettre de les accepter, avec toute la plus artificieuse

Rhetorique dont on s'est peu aduifer : mais sa Sainteté est demeurée fermée en la premiere resolution de ne vouloir qu'ils prissent rien.

Ledit Seigneur Jean François partit pour l'Empereur le 3. de ce mois, & est passé chez le grand Duc de Toscane, qui l'a extraordinairement honoré. Il doit passer encores chez quelques autres Ducs d'Italie, non seulement pour les exhorter de la part du Pape d'ayder audit Empereur contre le Turc, mais aussi pour voir si en passant on pourroit appointer entre les Ducs de Mantouë & de Parme vn grand differend & inimitié qui va longtemps y a s'augmentant entr'eux, & encores vn autre differend qui est entre ledit Duc de Mantouë & le Marquis de Castillon, pour vn lieu fort appelé Castel Giussiré, que le Duc de Mantouë tient, & qui par Arrest de l'Empereur, à ce qu'on dit, a esté adingé audit Marquis de Castillon. Pour executer ledit Arrest, le Connestable de Castille enuoya dernièrement quatre à cinq cens Espagnols audit Castel Giussiré dont ils furent repoussés par ceux du Duc de Mantouë lequel reçoit encores d'autres desplaisirs des Espagnols : car pour vn cheualier appelé Cornazano qui fut nagueres tué à Parme, ils luy font son procez à Milan, le chargeans d'auoir fait assassiner ledit cheualier, & menaçans de luy confisquer quelques fief qu'il a en l'Estat de Milan. Aussi est le Roy d'Espagne apres à achepter de quelques parens dudit Duc de Mantouë vne tres-forte place, appelée Sabionera, qui seroit à Mantouë comme vne paille en l'œil. On dit encores que le Roy d'Espagne a achepté d'un bastard de la maison de Correggio vn tiers que ledit bastard pretendoit audit Correggio, en laquelle place le Duc de Mantouë auoit ja par testament la part d'un des deux freres legitimes qu'il y auoit en ceste maison, lesquels ont tousiours pretendu & soustenu que ledit bastard n'y auoit rien;

Il est dit & escrit ces iours passés, que le Duc de Bauieres est venu à nostre Dame de Laurette par Venise, sans autrement se donner à cognoistre. Le differend des Iurisdicions de Milan n'est point encores appointé, & neantmoins fort refroidy, & en deuiendra ce que ie vous en ay predit cy-deuant.

L'ay oublié cy-dessus à vous respondre à ce que vous me demandiez pourquoy Monsieur le Cardinal saint George me parloit de Hongrie, & de telles autres choses, & Monsieur le Cardinal Aldobrandin non. Cela prouient à mon aduis de trois causes, dont la premiere & principale est, que les deux neueux ayans leurs charges separees, ledit Cardinal saint George a en sa charge l'Allemagne, Hongrie & autres pays de delà, & tout ce qu'il m'a dit de reste, a esté en consequence de ladite guerre de Hongrie, & pour la desfence de la Chrestienté. La seconde cause est, qu'il est de la nature plus qu'auert, & se plaist plus à discourir que l'autre. La troiesme, qu'il n'est si chargé d'affaires, & a plus de loisir de s'enquerir, & d'oïr & repliquer. Atant, ie prie Dieu, &c. Monseigneur, &c. De Rome ce 19. Feurier 1597.

## A M O N S I E V R D E V I L L E R O Y .

## X C I .

**M**ONSEIGNEUR , Je viens de l'audience , où i'estois allé encores que ie n'eusse quasi rien à negotier pour le seruice du Roy. Du commencement i'ay dit à nostre saint Pere , comme la derniere fois que i'auois esté à ses pieds, en m'en retournant en mon logisi'y auois trouué vn Gentil-homme que Monsieur de Luxembourg auoit enuoyé pour luy arrester vu Palais, & les prouisions & preparatifs nécessaires; Que ledit sieur de Luxembourg m'ordonnoit par les lettres que ce Gentil-homme m'auoit apportées (ie dis ainsi de moy-mesme encores qu'il n'en fust rien) que ie baissasse de sa part tres-humblemēt les pieds à sa Sainteté, & luy disse qu'il s'en venoit delibéré de seruir sa sainteté & le saint Siege, avec la mesme affection & fidelité que le Roy mesme & la Couronne de Frâce. Le Pape m'a respondu qu'il le verroit tres-volontiers , & qu'il auoit le mesme desir & soing du bien du Roy & de la Couronne de France , que de celuy du saint Siege mesme; & sur ce propos il a pris occasion de me dire, qu'il auoit delibéré en soy-mesme s'il me deuoit dire vne chose , ou non, mais à la fin il estoit resolu de me la dire, afin que nous ne fussions surpris, & qu'il n'y eust point de dispute quād ce viendrait à faire l'obediēce; Qu'il estimoit que ledit sieur de Luxembourg venoit avec deliberation de prester l'obediēce au nom du Roy , tant pour le Royaume de Nauarre que pour celuy de France. Quant à celuy de France il n'auoit rien à me dire: mais quant à celuy de Nauarre, il me vouloit dire que les obediēces qui auoient esté prestées par les predecesseurs du Roy , auoient esté receuës par les Papes sans preiudice des droits que le Roy d'Espagne y pouuoit auoir, & qu'il falloit que luy Pape la receust tout de mesme, ne voulant rien adjoûster ny diminuer à ce que les predecesseurs auoient fait; qu'il en feroit extraire les actes, & me les feroit donner. Le luy ay respondu , que sa Sainteté auoit en cela, comme en toutes autres choses, iugé tres-ptudemment & équitablement, en se resoluant de m'aduerter de cecy, afin qu'il n'y eust point de surprise , & aussi que la chose non preuenüe par nous ne nous donnast occasion de faire ou dire sur le lieu quelque chose mal à propos; Que i'en remerciois tres-humblement sa Sainteté, & luy en baïsois les pieds; Que ie verrois tres-volontiers les actes des obediēces passées, & puis luy en dirois ce que Dieu m'en inspireroit, tant pour le respect de sa Sainteté, que pour l'intrest de sa Majesté; Que cependant ie luy voulois dire que comme nous ne pourrions tollerer qu'il suruint rien es façons de recevoir l'obediēce du Royaume de Nauarre, aussi nous ne nous effroucherions point de choses qui fussent ja receuës & passées en coustume, & qui en substance ne donnent ny n'ostent rien aux parties. Je verray ce qu'il me fera monstrier, & ce qu'il y faudra faire ou subir, & vous rendray compte de tout.

Après cela il me dit qu'il me vouloit dire vne autre chose en confiance; c'est que Monsieur Lomellia auoit enuoyé au Palais deux lettres, l'une d'un sien frere ou autre parent qui estoit en Cour, l'autre de vous; Que celle de son frere portoit entre autres choses, que vous autres de delà auiez opinion que l'entreprise que le Roy d'Espagne faisoit sur l'Angleterre, se faisoit à l'instigation de luy Pape; Que la vostre ne disoit pas cela; mais parlant aussi d'Angleterre, disoit que la conqueste de ce Royaume-là n'estoit pas si facile comme l'on pensoit; Que luy Pape s'émerueilloit fort, qu'en vostre Cour il y eust des gens qui estimassent que ayant la Roynie d'Angleterre l'esté passé enuoyé en Espagne vne armee de mer qui y auoit fait les maux que chacun scauoit, si le Roy d'Espagne ne fust assez aiguillonné de l'appetit de vengeance, & de sa propre reputation, sans auoir besoin que luy Pape ny autre l'y instigast; Qu'il me vouloit bien dire qu'il desiroit la reduction d'Angleterre à la Religion Catholique, & ne détournoit aucun de qui il peust esperer ladite reduction, mais d'instigation il n'en auoit fait aucune. Et sur cela il a pris occasion de dire, qu'il y auoit des gens qui escruiuent, & disoient ce qu'ils ne scauoient; d'autres qui pour leur interest propre, & pour paruenir à quelque leur fin, ne se soucioient point de faire & dire des choses qu'ils pensent engendrer mauuaise intelligence entre le saint Siege & la France, & estre dommageables à l'un & à l'autre; Que luy Pape se garderoit de sa part de croire à tout esprit, & desireroit que le Roy en fist de mesme, & ne creust de sa Saincteté sinon que toutes choses concernantes l'honneur de Dieu, le bien de la Religio Catholique, & de sa Maiesté, & de tout son Royaume; n'ayant sa Saincteté, comme elle m'auoit dit plusieurs autrefois, miré en toutes ses actions que cela, & ne desiroit rien du Roy ny de la France pour son particulier, ny pour aucun des siens. l'ay eu soubçon que ceste queuë fust vne suite de ce que Monsieur le Cardinal Aldobrandin m'auoit dit sur le propos de l'Euesque de Mantouë le 7. de ce mois, dont ie vous ay rendu compte cy-deuant; & ay commencé à luy respondre par la fin de son propos, luy baissant vne autre fois tres-humblement les pieds de ceste sienne bonne & sainte intention & affection, & des bons records qu'il donnoit au Roy; Que ie m'asseurois que sa Majeité les observeroit, non seulement pour la reuerence & gratitude qu'il rendoit à sa Saincteté, mais aussi pour ce que c'estoit son profit & interest propre; Que i'auois autrefois supplié sa Saincteté de chose semblable de la part du Roy, qui auoit esté & estoit plus exposé aux calomnies des malins que n'estoit sa Saincteté; Quant à la pretenduë instigation, qu'il y pourroit auoir tel qui eust ceste opinion, comme vne grande Cour est composée de gens de diuerses humeurs: mais ie m'asseurois que le Roy, ny les principaux, ny autres gens d'entendement de la Cour, ne pensoit point que le Roy d'Espagne eust besoin d'instigateur contre l'Angleterre, pour les mesmes raisons que sa Saincteté venoit de me dire, & pour plusieurs autres; Qu'on ne m'escruiroit point à moy telle chose; Que moins pouuoit-on en auoir eu telle information de moy, puis que i'auois sa Saincteté pour tesmoin, que ie luy auois dit n'y a pas long-temps que les Espagnols luy donnoient à entendre contre verité plusieurs choses de la facilité, & autres circonstances de ceste entreprise d'Angleterre pour le tems

perer, afin que sa Sainteté ne trouuast mauuais qu'ils abandonnassent l'Empereur & la Chrestienté au Turc, pour aller contre l'Angleterre. Au reste, ie n'ay voulu entrer plus autant en la difficulté de ceste entreprise, pour ce que ie la tiens pour irréussible: & quiconque y ait bien pensé, l'ayme beaucoup mieux que les Espagnols s'aillent perdre là, que s'ils venoient gagner sur nous, comme ie vous ay escrit n'agueres, & comme il s'en faut toujours douter, & nous tenir sur nos gardes. Mais quand i'ay veu que sa Sainteté ne disoit plus rien, ie l'ay mis tout doucement sur le propos de la réponse que le Roy luy auoit faite de sa main directement, touchant le secours de Hongrie; & tout aussitost que i'en ay ouuert la boueche, il m'a dit qu'on s'estoit equiuoqué par delà, en pensant qu'il eust exhorté le Roy à demander la paix au Roy d'Espagne, & m'a interpreté son dire, en la mesme façon que ie le vous ay expliqué par vne de mes dernieres lettres. Apres cela ie luy ay parlé du Clergé de Metz, & présenté quelques memoires pour des particuliers; & apres auoir veu Messieurs ses neueux, m'en suis venu vistement escrire cecy, pour le donner à l'ordinaire qui est sur le point de partir. A tant, &c. Monseigneur, &c. De Rome ce 21. Feurier à quatre heures de nuict, 1597.

---

## A MONSIEUR DE VILLEROY.

### XCIIL.

**M**ONSEIGNEUR, Par ma lettre du 21. Feurier, ie vous escruiis. Me que le Pape m'auoit dit de ce iour là touchant l'obediencé du Royaume de Nauarre; à sçauoir que par cy-deuant elle auoit esté receüe sans prejudice des droits & prétentions du Roy d'Espagne; & qu'il m'en feroit voir les actes, & faudroit qu'il la receust de mesme. Aussi auez-vous veu par ma dernière lettre ce que ie luy respondis sur le champ, en attendant que i'eusse veu lesdits actes. Le Vendredy ensuiuant 28. de Feurier ie retournay à l'audience, & le mis en propos de ladite obediencé, pour voir ce qu'il me diroit desdits actes. Il me dit qu'il ne s'en estoit souuenu: mais que i'en parlasse à Monsieur le Cardinal Aldobrandin, afin qu'il luy en fust souuenir; ce que ie fis incontinent apres estre sorty d'auec sa Sainteté. Et deux iours apres, à sçauoir le Dimanche 2. iour de ce mois, ledit sieur Cardinal, par commandement de sa Sainteté, me fit voir deux registres des actes du Consistoire, reliez in folio, en veau noir, desquels deux registres l'un commençoit en l'an 1559. & finissoit en l'année 1597. inclsuement. Au feuillet 33. y auoit, comme en l'année 1560. vn Samedi 14. Decembre auoit esté prestée l'obediencé au Pape Pie IV. pour le Roy de Nauarre, au nom du Roy Anthoine & de la Royne Ieanne, & qu'à la harangue faite au nom desdits Roys & Royne, respondit le Secrétaire du Pape appelé Florebellius, & à la fin de la réponse adjousta ces mots: ACTA SINT HAC SINE OPVS QVÆ PRÆIUDICIO, ET PRÆSENTIM RÆIS CATHOLICI.

L'autre registre commençoit en l'annee 1568. & finissoit en l'annee 1583. inclusiuement, & au feuillet 6. de l'annee 1573. vn Mardy 10. iour de Feurier, le sieur de Duras presta l'obedience au Pape Gregoire XIII. pour & au nō de Henry & Marguerite Roy & Roynne de Nauarre, & qu'à la harangue faite par lesdits Roy & Roynne respondit Buccapalidius Secretaire du Pape, & à la fin de la response dit; *SANCTITATEM SVAM ACCIPERE HVIVSMODI OBEDIENTIAM SINE CVIVSQUE, ET PRÆSERTIM SERENISSIMI REGIS CATHOLICI, PRÆIUDICIO.* l'obseruay que le tout estoit escrit d'une mesme main & encre, sans apparence ny soubçon d'aucune mauuaise façon, outre que en personne de qualité il ne peut tomber aucun soupçon; & demanday au sieur Cardinal Aldobrandin s'il auoit encores quelques autres actes où fussent apposez tels mots. Il me respondit, qu'il ne s'en estoit trouué autre chose. le remerciay tant luy, qu'en parlant à sa personne, le Pape de ce qu'il leur auoit pleu me faire voir lesdits actes en leurs propres originaux, & luy dis que i'en remercirois sa Sainteté à la premiere audience, & luy dirois ce qu'il m'en sembleroit, apres y auoir bien pensé. Depuis ie pensay; & apres auoir bien considéré d'un costé, que les deux derniers actes auoient ces clauses, [*SANS PRÆIUDICE*] & qu'elles n'ostent ny donnent rien à l'un ny à l'autre des parties, & d'autre costé le naturel du Pape, & la grandeur & puissance du Roy d'Espagne, qu'il craindroit d'offenser, en obmettant vne chose ia receüe, ie iugeay en moy-mesme que quelque instance & presse que nous sceussions faire, sa Sainteté n'accepteroit iamais autrement qu'avec ladite clause, comme il me l'auoit aussi déclaré ja deux fois; & la contradiction & opposition que nous y pourrions faire, ne seruiroit que de faire scauoir au monde ce que la pluspart ignorent, & ce à quoy plusieurs ne prendront garde: & quand nous nous y opiniastrerions, outre le trouble que nous causerions en l'esprit du Pape, & en nos affaires, sa Sainteté pour s'en lauer les mains, remettroit ceste affaire à vne Congregation de Cardinaux, en laquelle nous le perdriens sans doute, & de ce qui en soy n'est rien, nous en aurions fait vne grande chose, & aurions donné occasion aux Espagnols de se vanter, quoy que faussement qu'ils auroient eu vn Arrest en leur faueur contre le Roy, touchant le Royaume de Nauarre. Auquel propos il me souuiet qu'ils se repentirent de l'instance qu'ils firent du temps de Sixte V. à la Canonisation d'un saint Espagnol, dont il vous peut souuenir, à ce que leur Ambassadeur y assistast, & que pour ce iour là le nostre ne s'y trouuast point. Car eux en estans deboutez (comme ils furent) telle poursuite ne leur seruit que d'inculquer au monde de plus en plus le droit de préseance que nous auons sur eux, & de nous en faire obtenir comme vn nouveau iugement. Que si pour éuiter ceste clause, qui en effet ne nuit de rien, nous prestions l'obedience pour le Royaume de France seulement, sans faire mention de celui de Nauarre, les Espagnols prendroient cela à leur aduantage, & pour vne tacite confession que nous n'y aurions rien, & s'en voudroient preualoir à l'aduenir. Par ainsi il me sembla, & me semble tousiours de plus en plus que nous deuions dissimuler cela. Et quand le Secretaire respondant pour le Pape dira lesdits mots, *SANS PRÆIUDICE*, faire semblant de n'en rien ouïr; & mesmes si quelqu'un nous en par-



loit, comme nous en voulant aduiser; respondre que cela ne nuit de rien, & que nous ne nous en soucions pas. A la premiere fois qu'on y voulut apposer ceste clause, c'estoit lors qu'il s'y falloit opposer, & n'endurer qu'on y innoïast rien, si toutesfois on a oneques receu ladite obediencia sans telle clause, depuis que les Espagnols enuahirent le Royaume de Nauarre: car il pourroit estre que l'on l'auoit tousiours mise, comme il pourroit estre aussi que l'obediencia n'eust esté prestee depuis ladite inuasion faite en l'an 1512. iusques à ce que lesdits Anthoine & Jeanne la presterent en l'année 1560. En l'une & l'autre de ces deux sortes est d'autant plus vray, semblable, que l'occupation dudit Royaume, fut faite sous pretexte d'une excommunication jettée par le Pape Iule II. contre le Roy Louys XII. & ses adherans, entre lesquels on comptoit le Roy Iean de Nauarre qui estoit lors, & fut spolié de sondit Royaume. Mais quoy qu'il soit de cela, nous viendrons au iourd'huy trop tard à demander qu'on n'vse de la susdite clause, dont on a ja vsé deux fois immediatement. Le premier des susdites actes, ne cōtient point le nom de l'Ambassadeur qui en l'année 1560. presta l'obediencia pour le Roy & pour la Royne Jeanne: mais ie trouue dans l'Oraison que Muret en fit alors, laquelle est imprimée, que ledit Ambassadeur s'appelloit Pierre d'Albert. Et au second acte, vous aurez noté qu'en l'année 1573. on presta l'obediencia aussi bien au nom de la Royne Marguerite, qui n'y auoit que faire, comme au nom du Roy, jaçoit qu'il estoit, & est Roy de Nauarre de son chef, & non de par sa femme, comme l'estoit toutesfois le Roy Anthoine son pere. Le 7. de ce mois ie remerciai le Pape, de m'auoir fait voir lesdits actes originaux: & luy m'ayant dit pour la troisieme fois, qu'il ne pouuoit changer le stile qu'il trouuoit auoir esté gardé par deux de ses predecesseurs, ie luy dis que ie pensois que Monsieur de Luxembourg se disposeroit à dissimuler ladite clause, sans monstrier d'auoir ouy les mots que le Secretaire de sa Sainteté diroit, & que le recouurement de ce que les Espagnols tiennent du Royaume de Nauarre ne seroit pas empesché par ces deux ou trois mots, quand les choses y seroient disposees, comme aussi l'obmission d'iceux ne seroit pas que nous le recouvrassions d'une minute d'heure plustost.

Et pour ce que entre la precedente audience du dernier de Feurier, & de ceste-cy du 7. de ce mois, à sçauoir le 5. de ce mois, i'auois receu vos deux lettres escrites l'une à Escouï le 7. & l'autre à Pontoise le 6. de Feurier, ie dis à sa Sainteté ce que vous m'auiez escrit de la fin de l'Assemblée de Roïen, & en termes generaux, des resolutions qui y auoient esté prises, & de la trefue accordee à Monsieur de Mercœur pour tout ce mois, & du Brieuf de sa Sainteté en faueur de Monsieur l'Archeuesque de Vienne, que le Roy auoit receu par les mains de Monsieur le Legat. Apres cela, sa Sainteté me demanda s'il auoit esté fait quelque chose en faueur des heretiques, & que tant que ceste Assemblée auoit duré, il auoit tousiours eu continuelle peur qu'on ne leur accordast aucune chose de plus que ce qu'ils auoient déjà. Je luy respondis qu'il n'auoit esté fait pour eux rien de nouveau, que ie sceusse, mais bien auoit-il fallu pour la necessité du temps, & pour maintenir la paix entre les François, publier au Parlement de Roïen l'Edit de l'an 1577. comme il auoit esté receu es Parlemens de Paris & ailleurs.

leurs. Le Pape changea de couleur & de contenance, & dit qu'il voudroit que le Roy n'eust point fait cela, qu'ad ce ne seroit que pour le respect de sa Majesté mesme qui en seroit blasmee. Je m'estois preparé pour respondre à telles choses, & luy dis; que le Roy auoit le mesme desir que sa Sainteté, à sçauoir, de voir tous ses suijs réunis à l'Eglise Catholique avec luy, premierement pour l'honneur de Dieu, & le salut des ames, & puis pour l'interest qu'il auoit à la seureté, repos, & grandeur de son Estat, & à la conseruation de son autorité, & de l'obeyssance qui luy est deuë par tous sesdits sujets, & feroit sa Majesté tout ce qu'elle pourroit pour y paruenir, comme il s'y faisoit & aduançoit tous les iours quelque chose, par la reduction de plusieurs personages qui se conuertissoient de iour en iour: mais pour cela mesme, & infinis autres occasions, il estoit besoin & necessaire que la France fust en paix, pour le moins au dedans quand aux siens, si elle ne le pouuoit estre au dehors avec les estrangers; Que sans vn tel reglement, qu'on appelle Edict de Pacification, ceste paix ciuile & interieure ne se pouuoit auoir, & n'auoit esté en France depuis 35. ans; Que la date de cet Edict de l'an 1577. monstroit assez que ce n'estoit ce Roy qui l'auoit fait, ains le feu Roy, douze ans auparauant sa mort. Que ledit feu Roy, & le Roy Charles son predecesseur & frere, n'auoient fait tels Edicts de Pacification de leur bon gré & franche volonté, ains y auoient esté contraincts par la necessité, pour le bien mesme de la Religion Catholique, & de l'Estat, apres auoir cogneu par experience de plusieurs guerres faites & refaites contre les heretiques, qu'elles n'auoient seruy que d'abolir en plusieurs lieux la Religion Catholique, & quasi toute la discipline Ecclesiastique, la iustice, & tout ordre & police, & d'y fortifier l'heresie, & introduire l'atheisme, avec suite de toute sorte de sacrileges, parricides, incestes, rapt, trahisons, cruantez, & de toutes autres méchancetez, & de disformer & ruiner le Royanme en toutes ses parties, & principalement l'Eglise, en ses personnes & biens, tant spirituels que temporals; Que lors que les susdits Roys furent contraincts à faire tels Edicts, ils estoient neantmoins obeys de tous les Catholiques, & en paix avec tous les Princes estrangers, & mesme aydez & secourus pareux contre les heretiques; Que de tous les Edicts de pacification, cestuy-cy de l'an 1577. donnoit le moins aux huguenots: & sous iceluy la France viuoit en paix, & l'heresie alloit se consumant & tarissant, lors que la Ligue en l'an 1585. le fit rompre, & nous mit bien tost apres en l'horrible confusion de toutes choses où nous nous sommes trouuez, & particulièrement au danger euidet de voir ruiner la Religion Catholique, & la Frâce perduë pour le saint Siege, si la valeur & la bonne fortune du Roy n'eussent esté suivies de tant de bonté, docilité, & de bonnairété; Que sa Majesté desobeyd'vne grande partie des Catholiques, & assaillie de plusieurs Princes estrangers, & par conséquent contraincte en plus grande necessité que n'auoient esté sesdits predecesseurs, n'auoit neantmoins fait en cery autre chose que suivre l'aduis des meilleurs Catholiques de son party, qui luy conseilloyent de remettre les choses en l'estat où elles estoient auparauant ces derniers troubles, & de souffrir cet Edict, qui estoit le plus tolerable de tous; & par lequel l'exercice de ceste religion se restreignoit à certains lieux de moindre importance, & la Religion

Catholique, & les Ecclesiastiques se restituoient en tous les lieux dont ils auoient esté bannis ; Que tous les plus clair-voyans auoient pris pour vn grand aduantage , que les Huguenots , apres auoir occupé cinquante bonnes places de plus que ce qu'ils auoient auant que la ligue fist rompre cét Edict, & apres auoir tant contribué à la conseruation de l'Estat contre les Espagnols & leurs adherans , se fussent contentez du susdit Edit , en vn temps auquel le Roy auoit tant d'autres affaires , & qu'ils pouuoient plus extorquer de sa Majesté, laquelle estoit loüable d'auoir en cela si bien mesnagé les choses de la Religion Catholique , & en tout euenement plus excusable de la tolerance de cét Edit , que ses predecesseurs , Que outre que la necessité n'a point de loy , en quelque suiet & matiere que ce soit , nostre Seigneur Iesus Christ nous enseignoit en l'Euangile de tolerer l'yuraye en nostre champ , quand il y auoit danger d'arracher & gaster ensemble le bon bled; Que les autres Princes Catholiques en vsoient ainsi , desquels toutesfoiſ on ne parloit point; Que le Duc de Sauoye, tout grand zelateur qu'il se fait de sa Religion Catholique , toleroit neantmoins les heretiques en tous leurs exercices en trois vales d'Italie dont il est Seigneur ; à ſçauoir és valles d'Angrogne, de Luſerne, & de Perose ; Que le Roy de Pologne en faisoittout autant ; non seulement au Royaume de Suede , mais aussi en celuy de Pologne ; Que tous les Princes della maison d'Autriche, qu'on celebre pour colonnes de l'Eglise Catholique , en faisoient autant , non seulement és villés de l'Empire , mais aussi és Estats qui leur sont propres, comme en Autriche mesme , dont ils portent le nom , en Hongrie, Boheme , Morauie, Silesie, Lusace, Stirie , Carinthie , & Croatie ; Que Charles le Quint pere du Roy d'Espagne , auoit esté celuy qui auoit appris au Roy de France & aux autres Princes , de ceder à telle necessité , en faisant L'INTERIM que chacun ſçait , apres auoir mesmes debellé les Protestans d'Allemagne ; Que son fils le Roy d'Espagne d'aujourd'huy , qui est tenu pour Archicatholique , & qui soustient l'Eglise & la Religion Catholique tout ainsi qu'Atlas le Ciel , toleroit encores aujourd'huy en ses Royaumes de Valence & de Grenade les Morisquees avec leur Mahometisme , & faisoit offrir à ceux de Zelande, Holande, & autres heretiques des Pays-bas, l'exercice libre de leur religion pretenduë , s'ils veulent le recognoistre & obeyr au reste.

Le Pape en cét endroit me dit, qu'il se souuenoit d'auoir entendu par cy-deuant qu'à Roüen on auoit long temps y a refusé de verifier cét Edict , & me demanda quel besoin il estoit de les y contraindre. Je luy respondis, qu'il y auoit certaine sorte de choses que les Cours de Parlement , pour bonnes considerations , ne reçoient point à la premiere fois , encores qu'elles voyent bien qu'il faut passer par là, & veulent sembler y auoir esté tirees par pluralité de iussions ; au demeurant il n'y auoit point en cécy de contrainte autre, que la susdite necessité publique , à laquelle il auoit fallu que ce Parlemēt cedast aussi bien que les autres, comme chacun des membres d'un Estat se doit accommoder à ce qui est necessaire pour le repos, ſeureté, & conseruation du public , auquel tous participent. Que si le Roy se trouuant en Normandie , & ayant sejourné vn long-temps en la ville capitale, s'en fust allé sans que cét Edict y eust esté receu , comme il s'estoit

fait ailleurs, les Huguenots de ce pays-là qui à tumultuoient, se plaignans de n'auoir iustice ny seurte en leurs personnes & biens, fussent entrez en desespoir de iamais plus vois publict cét Edict, & tout le corps de cette secte, qui se tient beaucoup plus vnie que nous ne faisons pas, & qui estoit ja fort offensee du refus ou delay de ceste publication, s'en alloit susciter vn nouveau trouble & guerre ciuile; & mesme d'autant plus, que la conuersion du Roy, & la reconciliation de sa Majesté avec le saint Siege, & la venuë & le sejour en France de Monsieur le Legat, les auoient ra mis auparavant en grande des fiance & en alarme, laquelle estoit encores augmentee par les plus factieux d'entre eux, qui ne font iamais si bien leurs affaires particulieres comme en temps de guerre, & augmentee encores par les artifices des Espagnols mesmes, & autres ennemis du Royaume, lesquels pourueu qu'ils le ruinent, ne se foucient point par qui n'y comment, ny que ce soit à la ruine mesme de la Religion Catholique, comme le danger y seroit tuncertain & enident, si maintenant avec la guerre estrange, il suruenoit vn nouveau trouble & guerre ciuile entre les François. Car outre le mal que feroient les Espagnols d'un costé quãd les François s'entredeseroient eux-mesmes, ceste race de gens d'autre s'estant de longue main fortifiee en plusieurs bonnes villes, n'auoit faute de forces & de moyens, ny de valeur & de ruse, & les secours d'Angleterre & d'Allemagne ne leur defaudoient non plus que les autres fois. Tous les mal-contés, tous les endetez & sastaniers, tous les desbauchez & vagabonds, tous les voleurs, & autres criminels qui doiuent la teste à la iustice, de quelque Religion ou opinion qu'ils fussent, auoient accoustumé en temps de troubles de se mettre avec eux, & faisoient plus de mal à l'Eglise, & à la Religion, & aux bonnes mœurs, & à l'Estat, en vn iour de guerre, qu'ils n'en scauroient faire en cent autres de paix; laquelle au contraire minoit peu à peu, & mattoit les plus malins & hautains d'entre-eux. De sorte que pour leur oster l'occasion de soufleuer & endurcir tout le corps, il n'y auoit meilleurs moyens que de l'asseurer par vn tel Edict, & luy oster toute des fiance, & d'ailleurs se monstrier desieux du salut de leurs amies plus que de leur sang, les faisant admonester de leur salut, exhorter, enseigner, & resoudre leurs doutes: comme aussi ceste sorte de mal, qui s'est avec vn long temps introduit & enraïné es esprits & en la persuasion des hommes, ne se pouoit guarir qu'avec le temps, & en leur monstrant qu'ils se trompent; Que par ce moyen il estoit à esperer que ceux qui pour ceste heure ne pouoient estre contrains par force, suiroient volontairement tous, ou la plus part, l'exemple du Roy, lequel avec ses meilleurs Conseillers estime que si sa Sainteté voyoit les choses des prés comme il fait, & auoit à commander à la France en l'estat auquel le Royaume se trouue à present, elle mesme ne pourroit faire de moins en cela que ce que fait sa Majesté. Le Pape ne me reплика autre chose & dit seulement qu'il verroit ce que Monsieur le Legat en escriroit. Et ie fus bien aise d'auoir esté le premier à luy dire ladite publication de l'Edict, laquelle ne pourra plus mes huy luy apporter grand des plaisir & mescontentement quoy qu'on luy puisse dire ou escrire. Monsieur le Cardinal Aldobrandin me dit ce iour-là, & encores huit iours apres, qu'ils n'auoient point de lettres de Monsieur le Legat depuis ceste publi-

cation d'Edict au Parlement de Roïen. Mais pour vous rendre compte de toute l'audience dudit iour 7. de ce mois, i'adiousteray icy, que ie dis encores au Pape que i'auois aduis comme Madame l'Admirable estoit tombee malade en prison, en danger d'y laisser la vie, si sa Sainteté n'auoit compassion d'elle; Que ie le priois d'auoir esgard à son aage, sexe, & dignité, & fust par voye de iurisdiction, ou d'intercession emuers Monsieur de Saouye, interposer son autorité à ce que la maison que ladite Dame a à Thurin luy fust donnee pour prison, au moins en baillant caution, si l'imbecillité de son sexe & de son âge, avec tant de biens innumerables qu'elle a, n'estoient caution assez suffisante pour assurer la iustice. Sa Sainteté se meut à compassion, & medit que ie luy en donnasse vn memoire, & qu'il en parleroit à la premiere Congregation il entendoit la congregation del'Inquisition. Je fis le memoire, & le portay à Monsieur le Cardinal Aldobrandin, auquel encore ie recomanday cét affaire de toute mon affection, & qu'il me promit d'y faire tous bons offices. Mais pource que ce iour là mesme suruint la goutte au Pape, qui s'en ressentoit ja lors de mon audience, il ne tint point la Congregation de leudy ensuiuant. Je ne faudray de le r'amenteuoir à sa Sainteté, & d'y faire tout autre deuoir.

Quant aux occurrences de deça, ie commenceray par la disposition de sa Sainteté, & mesmes estant ja entré à en parler à l'occasion de ce que dessus. Il y auoit quatorze ou quinze mois que le Pape n'auoit eu la goutte qu'il souloit neantmoins auoir deux ou trois fois l'an, & au lieu de ladite goutte, luy suruint l'automne passée la douleur des flancs & de reins dont vous fustes aduertis; ce que plusieurs prindrent pour vn mauuais signe, Mais ledit Vendredy dernier iour de Feurier la goutte luy retourna, tant aux pieds comme aux mains, dont on prend toute bonne coniecture & esperance qu'il en viura dauantage. Il n'en auoit eu que pour quelques dix iours, mais s'estant voulu trouuer à la Chappelle qui se fit le Dimanche seiziesme iour de ce mois, auant que ses pieds fussent bien fortifiez, la goutte luy est retournée.

Monsieur de Luxembourg est venu plustost que ie ne pensois lors que ie vous escriuis ma derniere lettre. Il couchera de soir à Monte-Rose, à trois postes d'icy, & demain au soir arriuera dans Rome, sans toutesfois se laisser voir par ville, comme vous sçavez qu'il ne peut iusques à ce qu'il ait fait son entree publique, & presté l'obedience; ce qui ne pourra estre qu'apres Quasimodo, tant pource que les choses ne sont encores en ordre, & que le Pape est indisposé, qu'aussi pource que ces iours où nous allons entrer ne se font point avec ceste sorte de Pompes. Je m'en vais le trouuer demain au matin, Dieu aidant, & espere qu'apres son arriuee il vous escriira auant que cét ordinaire parte, comme aussi esperay-ie de vous escrire encore vn autre lettre. Il y a environ huit iours que nous eussions aduis que les deux Cardinaux Espagnols qui furent creez aux quatre temps de la Pentecoste derniere, estoient arriuez à Ville franche de Nice avec huit cens soldats Espagnols portez en huit galeres du Prince Doria, avec vn million d'or destiné pour les Pays-bas. On parle fort à present des leues de Naples & du Milanois, desquelles ne se parloit quasi plus il y a vn mois: & m'a esté assuré de bon lieu qu'en chacun de ces deux lieux on

fiere huit mille hommes, dont l'une moitié est pour les Pays-bas, & l'autre pour l'Espagne; & qu'on fait ceste grande leuee de huit mille hommes pour chacun desdits lieux; afin d'en auoir quatre mille bons. J'ay de la peine à en croire tant, toutesfois il nous est expedient d'en croire plustost plus que moins, afin de nous preparer d'autant mieux de nostre costé.

Monsieur le Cardinal Taruggi Archeuesque d'Avignon partit d'icy sur le commencement de ce mois, enuoyé par le Pape pour voir d'appointer ceste grande querelle qui est entre les Ducs de Mantouë & de Parme, & quelques autres differents que ledit Duc de Mantouë a avec quelques vns de ses parens, dont ie vous escriuis dernièrement. Il y en a qui pensent qu'il pourroit aller iusques à Thurin, toutesfois ils se trompent en l'occasion qu'ils en alleguent, disans que c'est pour moyenner la paix entre le Roy & Monsieur de Sauoye.

Le cinquiesme iour de Mars enuiron quatre heures de nuict y eut tremblement de terre en ceste ville, & aux enuiron, mais il ne fut gueres grand en la ville, A tant, &c. Monseigneur, &c. De Rome ce Mercredy au soir 19. Mars 1597.

## A MONSIEVR DE VILLEROY.

## XCIII.

**M**ONSEIGNEVR, Ie vous escriuis le 19. de ce mois, & sur la fin de ma lettre ie vous en promettois encore vne autre, qui sera ceste-cy. Le lendemain donc ie m'en allay au deuant de Monsieur de Luxembourg, lequel me fist cét honneur de venir descendre & loger chez moy, en attendant que son Palais fust en ordre. Ie luy ay rendu deux lettres du Roy que vous m'auiez enuoyees, & il m'en a rendu vne de sa Majesté du cinquiesme, & vne autre du 23. Decembre. Par l'une & par l'autre il m'est commandé de le seruir; ce que ie feray de toute ma puissance & affection, non seulement pource qu'en sa personne ie seruiray le Roy, mais aussi pource que de luy-mesme il est si grand Seigneur, & si digne, que ie tiendrois tousiours à grande faueur & honneur ses commandemens, quand bien le respect de sa Majesté n'y seroit point. Ie luy ay rapporté ce que le Pape m'auoit dit & fait voir touchant l'obedience du Roy de Navarre, & mon aduis là dessus, tout ainsi que ie le vous ay escrit. A quoy il a fait quelque difficulté, pource que par delà ne luy a esté rien ordonné touchant le Royatme de Navarre; toutesfois il n'en a encores rien resolu, & aura encores trois semaines ou vn mois pour y penser. Ie luy feray voir ma lettre precedente & ceste-cy, avant que ie les ferme, comme aussi luy ay-je mis en main les dernieres depeschés que i'auois receutés de vous, afin qu'il les vist à son aise. Il luy a plect commencer à me communiquer ses instructions; mais pour la presse que nous auons tous d'expedier l'ordinaire, il n'y a esté fait gueres grand progres.

Au demeurant le Pape a encores la goutte, & ne donna point d'audience hier Vendredy : mais ie fus vers Messieurs les neveux à l'accoustumee, & lesquels ie ne traittay que de la venue de Monsieur de Luxembourg, & ils auoient ja enuoyé visiter, comme ont fait aussi plusieurs Cardinaux, le Pape mesme ce iourd'huy par le Maistre de la garderobbe. Bien est icy que ie fis souuenir à Monsieur le Cardinal Aldobrandin du fait de Madame l'Amirale, & il me dit qu'à cause de l'indisposition du Pape il ne estoit peu rien faire, non plus que pour le Clergé de Mets, & pays Messin, & pour le Bailly de l'Aigle. La mesme indisposition du Pape a esté cause que sa Sainteté n'a tenu Consistoire, & que l'Archeuesché de Rouen, qui auoit esté preconisé, n'a peu estre proposé & expédié : mais toutes choses sont prestes pour le premier Consistoire qui se tiendra. Le gratis de l'abbaye de Vaux le Roy pour le frere de Monsieur de Sillery a aussi esté tenu par Monsieur le Cardinal Aldobrandin, sur la lettre du Roy que ie presentay de la part de sa Majesté, & sur remonstrance que ie luy fis de ses qualitez & merites de mondit sieur de Sillery, & du moyen qu'il auoit seruir le saint Siege & sa Sainteté au Conseil du Roy, & en la Cour Parlement, & ailleurs; dont ie concluois, que comme le Pape auoit cyuant gratifié d'autres qui tenoient les premiers lieux près le Roy, & en l'ite Cour, aussi estoit-il expedient d'obliger encores cestuy-cy. Apres expedition gratuite de l'Archeuesché de Rouen, ie voulois mettre en avant celle de Reims pour Monsieur de Nantes, comme ie vous ay escrit deuant, & Monsieur de Luxembourg estoit venu bien à propos pour mander ceste grace la premiere, comme i'auois desseigné de l'en supplier, en cas que sa venue rencontraist avec l'opportunité de cette pouruite : mais les parties veulent les choses d'une façon telle, que quand on demanderoit point au Pape l'expédition gratis, toutesfoiz elle nous se feroit refuser. On veut qu'à vn Archeuesque en entrant en son Archeuesché il baillie pour coadiuteur vn ieune Prince de treize ans : en quoy il y a de vaines choses mal à propos; l'une, de demander coadiuteur à vn qui conuance, là où les coadiuteurs en vne charge, se donnent à ceux qui l'ont enguement serui, & pour vieillesse ou pour autres accidents qui leur sont suruenus, ne peuvent plus faire le deuoir requis en telle charge. Et auant, que s'il se deuoit bailler coadjuteur à vn qui entre en vn Archeuesché, il ne luy faudroit bailler vn coadjuteur de treize ans, qui par les Concordats ne peut estre Euesque encores de 14. ans, à compter depuis la fin de treize. Et toutesfoiz il est necessaire que le coadjuteur d'un Euesque soit Euesque, & ne s'en fait iamais d'autres; ains avec la coadiutorerie, on a toujours accoustumé de pouruoir le coadjuteur d'un titre de quelque Euesché. **FIN DE LA PART DES INFIDELIUM.** & puis le consacrer Euesque; autrement ne pourroit faire les fonctions Episcopales, comme donner les Ordres, confirmer, & faire telles autres choses qu'autre qu'un Euesque ne peut faire, ainsi ceste seconde difficulté a encores de l'impossible. Outre ce que dessus, les parties ne veulent se contenter que la promission de l'Archeuesché de Reims soit faite sans l'abbaye de saint Remy vnüe neantmoins dudit Archeuesché de Reims par authorité du saint Siege, & à l'instance de nos Roys; & l'une d'elles pretend que ladite Abbaye ne peut estre desfi-

vnique avec cognoissance de cause, & par autorité de qui l'a vnique; & a ja donné ordre à ce que le Pape n'expediast l'Archeuesché sans ladite Abbaye, & n'aura pas eu grande peine à persuader à sa Sainteté vne chose à quoy elle a grand interest, pour la conseruation de son autorité, & de l'ordre qui doit estre gardé en l'Eglise. Par ainsi il est besoin que les parties, par l'aduis de banquiers, ou autres versez en telles matieres, conuiennent par delà de toutes choses, en façon qu'elles puissent estre expediees par deçà, & puis qu'on demande le gratis: car en vain demanderions nous aujourd'huy qu'on nous expediast gratis d'vne chose, qui ne se peut expedier quand bien on offriroit de payer les droits de l'expedition à toute rigueur.

Par l'ordinaire de Genes venu auant hier, on a entendu que les deux Cardinaux Espagnols de la nouuelle promotion estoient arriuez avec les huit cens Espagnols, & le million d'or dont ie vous ay escrit par ma derniere lettre, A tant, &c. Monseigneur, &c. De Rome ce 22. Mars 1597.

Ceste lettre m'est demeuree en main iusques à ce iourd'huy 23. Cependant Monsieur de Luxembourg a acheué de me communiquer ses instructions & memoires, où l'ay veu la mention qu'il a pleu au Roy y faire de moy en plusieurs endroits, & à diuers propos; dont ie remercieray sa Maesté & vous par le prochain ordinaire, cestuy-cy qui portera la presente ayant ja esté retenu trois iours plus que de coustume, & estant prest de monter à cheual.

## A V R O Y.

## XCIV.

SIRE,

Sur ce qu'il a plen à vostre Maesté m'escire par la lettre du septiesme Mars que Monsieur le Duc de Mercœur vse de toutes sortes de ruses & intentions pour couvrir ses desseins, qui tendent à l'vsurpation de la Bretagne, sous pretexte de sa reconciliation dont il continuë à traiter, j'ay estimé vous deuoir par ceste lettre à part aduertir d'un propos, qui me fut tenu à moy mesme vn Mercredy 12. de Mars par vn confident dudit Duc de Mercœur. C'est que sans que le Duché de Bretagne auoit esté vny à la Couronne de France ledit Duché appartenoit sans doute à Madame de Mercœur, & que encores pourroit on dire contre ceste vnion, qu'elle n'auoit peu estre faite au preiudice d'un tiers, qui n'y auoit consenty: & au reste les choses tenuës par force & violence ne se prescriuoient point, pour bien long temps qu'on les eust tenuës & possedees. Je me scandalisay fort de ce propos au dedans de moy-mesme, mais ie n'en monstray rien au dehors, pour ne perdre l'occasion de descourir plus auant ceste belle prentention. Et moy luy ayant demandé tout doucement d'où viendrait ce droit à Madame de Mercœur; il me respondit qu'elle descendoit en droite ligne de Ieanne la Boiteuse, & luy auoit succédé au Comté, à present Duché de Ponthieure, qui fut baillé à ladite Ieanne la Boiteuse, en recompense du tort qu'on luy faisoit dudit Duché de Bretagne qui luy appartenait.



c'est tout ce qu'il m'en sceut dire. Je luy respondis seulement au point de l'vniõ du Duché de Bretagne à la Couronne, qui auoit esté faite au temps du Roy François premier, par l'aduis & à la requeste de tous les Estats de Bretagne, pour le bien commun tant dudit Duché que de la Couronne, & auant qu'aucun droit fust acquis à personne, & que les personnes qui y voudroient auourd'huy pretendre fussent nees. De façon que par ladite vniõ ne fut fait preiudice à aucun, ains vn tres-grand bien à tous ceux dudit Duché, & à tout le Royaume: & qu'en vertu de ladite vniõ auoient esté Ducs de Bretagne, & de leur chef, & comme Roys de France, Henry II. François II. Charles IX. Henry III. auquel vostre Majesté auoit succédé, rât audit Duché vny à la Couronne, qu'à tout le Royaume; & ny Madame de Mercœur, ny l'Infante d'Espagne, ny le Marquis du Pont, ny la Royne mesme, ne pouuoient rien pretendre audit Duché de Bretagne. C'est ce que ie luy respondis alors. Depuis ie voulus voir l'origine de cecy, & retrouuay en nos hystoires, qu'au temps du Roy Philippes de Valois, & en l'an 1340. Iean Duc de Bretagne troisiésme de ce nom estant mort sans enfans, il y eut vn procez pour raison dudit Duché de Bretagne entre ladite Ieanne la boiteuse (que quelques vns appellent Claude) fille d'un second frere dudit Duc Iean, & decedee auant ledit Duc Iean, mariee à Charles Comte de Blois, d'une part, & Iean Comte de Montfort troisiésme frere dudit Duc Iean deffunt, d'autre. Ladite Ieanne la boiteuse disoit que les femmes estoient habiles à succeder audit Duché de Bretagne, elle representoit son pere, qui estoit nay auant ledit Iean Comte de Montfort. Au contraire ledit Iean Comte de Montfort disoit qu'il estoit masle, & frere du deffunt, & par consequent d'un degré plus proche dudit deffunt que n'estoit ladite Ieanne, qui n'estoit que niepce. Ledit Roy Philippes de Valois audit an 1340. seant au Parlement adiugea ledit Duché à ladite Ieanne la boiteuse: mais ledit Iean Comte de Montfort estimant qu'il luy estoit fait tort, ne voulut quitter ce qu'il tenoit déjà dudit Duché de Bretagne, & pour suiuir de conquerir le reste par voye de fait & d'armes. De façon qu'il y eut guerre bien aspre entre lesdits Comtes de Blois & de Montfort, laquelle dura long temps; pendant lequel il y eut plusieurs propos d'accord, qui ne reüssirent point sur le commencement du Roy Charles le Quint en l'annee 1364. lesdits Comtes s'entredonnerent vne furieuse bataille, eu laquelle Charles Comte de Blois mary de ladite Ieanne la boiteuse fut vaincu & tué. Ledit Roy Charles V. enuoya son frere Louys, pour reprendre les derniers erremens des propos d'accord auparauant cette bataille tenus entre lesdits Comtes de Blois & de Montfort. Lequel frere du Roy fit tant, que ladite Ieanne la boiteuse, veufue dudit Charles Comte de Blois mort en ladite bataille, & ledit Iean Comte de Montfort victorieux (ou son fils comme d'autres escriuent) tomberent d'accord, que ledit Duché de Bretagne demeureroit audit Comte de Montfort, & aux siens, & que à ladite Ieanne veufue, & à ses enfans, seroit baillé le Comté de Renhieure, avec quelques autres choses. Cét accord fut approuué & authorisé par le Roy Charles le Quint. En quoy est à noter, que ledit Loys Duc d'Anjou frere du Roy, qui moyenna ledit accord, auoit espousé la fille dudit feu Charles Comte de Blois & de ladite Ieanne la boiteuse, & par consequent

consequent auoit grand interest que la Duché de Bretagne demeurast en la maison de Blois, à laquelle sa femme pouuoit succeder, plustost qu'en la maison de Montfort, dont il ne tenoit rien. De là en auant donc le Duché de Bretagne ne fut plus tenu par force par ledit Montfort, ains par la transaction solemnelle, & par le consentement de ladite Ieanne la Boiteuse, & de ceux qui y auoient le plus grand interest, & par l'interposition de l'autorité du Roy, qui auoit aussi occasion de favoriser à son dit frere & à ses alliez de la maison de Blois, plustost qu'à ceux de Montfort. Par tout ce que dessus, il se void que quand tous pretendans seroient auourd'huy receuables à proposer leurs pretentions, & qu'il en fallust venir par deuant iuges, & iuger le tout par points de droit, ils n'auroient rien au Duché de Bretagne. Cependant vostre Majesté par sa prudence iugera à quoy tendent lesdits propos que les confidens dudit Duc de Mercœur tiennent depuis quelque temps, & combien dangereuse chose est de fier les gouuernemens des grandes prouinces, & des principaux membres du Royaume, à gens qui ont de ces pretentions, pour vieilles, rances, & moïsses qu'elles soient. Avec cela ils continuent tousiours à dire icy, que le principal but & intention dudit Duc de Mercœur a tousiours esté, & est, qu'en tout le pays de Bretagne n'y ait exercice d'autre religion que de la Catholique, & qu'au contraire vostre Maïesté luy fait demander par ses deputez, qu'és lieux mesmes qu'il tient, il y ait exercice de la secte Caluiniste, & qu'aux heretiques soient baillées des Eglises & des heresices, & qu'aux Ministres soient assignez les reuenus Ecclesiastiques, pour dresser & entretenir des colleges & des seminaires, pour y eleuer & instruire les enfans en ladite secte. Depuis quelques iours ils ont encores controuué que l'on auoit atteté à sa vie, & qu'on cerchoit de le faire mourir. Tous lesquels propos se tiennent, pour colorer la longueur & obstination de sa rebellion, comme s'il auoit affaire à vn Roy de qui il ne peult se fier, & comme il ne faisoit que desferre le sien & la Religion Catholique tout ensemble, & pour donner à penser à tous bons Catholiques, que quand bien il n'y auroit le droit qu'il y a, tousiours seroit il plus expedient que le Duché de Bretagne demeurast à vn Prince lizelé à la Religion Catholique, qui ne souffrira iamais aucune erreur, que non pas qu'il fust soumis à vn Roy qui y veut establir l'heresie. Aussi verra vostre Maïesté que ce qu'il fait dire par deça, aussi bien que ce qu'il fait demander par de là, tend tout à ladite usurpation. A tant, &c. Je prie Dieu qu'il vous donne, SIRE, Victoire sur tous vos ennemis, & en parfaite santé tres-longue & heureuse vie. De Rome ce 20. d'Auil 1597.

A MONSIEUR DE VILLEROY.

XCV.

**M**ONSEIGNEUR, Avec les lettres du Roy des 7. & 12. de Mars, qui me furent rendus le 28. j'ay reçu les vostres des 8. & 12. & le dernier ie receus celle que vous m'escriuistes de Pontoise le treiziesme. Je m'ayday de celle du huitiesme en l'audience que j'eus du Pape le Vendredy douziesme de ce mois, & sur ce que ie luy dis que ie croyois que sa Sainteté auoit déjà esté aduertie de la procession generale qui s'estoit faire à l'ouerture du Iubilé à Paris le premier de Mars, & comme le Roy y auoit assisté; il me dit que Monsieur le Legat le luy auoit escrit, & qu'il auoit esté tout consolé de la deuotion du Roy; & me conta vne particularité que ledit sieur Legat luy auoit escrite; c'est que pendant que le Roy marchoit en ladite procession, il inuita ledit sieur Legat à regarder la grande multitude de gens qui marchaient deuant & apres eux, & à considerer que l'on faisoit par delà plus grande estime des pardons & Indulgences qu'on ne pensoit à Rome. Je luy dis aussi que j'estimois que Monsieur le Legat luy auroit rendu compte de l'audience qu'il auoit eue du Roy le 7. Mars; & à ce propos luy retouchay les raisons que ie luy auois autrefois desdites, pour lesquelles le Concile de Trente n'auoit encores peu estre publié, & luy fis toucher au doigt, que ce que Monsieur le Legat auoit demandé que les lettres patentes que le Roy en expedieroit ne fussent adreesées aux Parlements, estoit non seulement contre les anciens ordres du Royaume, mais aussi contre la fin & intention de sa Sainteté, & contre le bien & le fruit qu'elle se promettoit de ladite publication. Aussi luy ramentûs ie ce que ie luy auois dit autrefois, qu'il n'estoit encores teps de parler du r'appel des Iesuites, & le disposay à auoir patience, & à reseruer ceste instance à vn autre temps. Quand aux autres choses que ie dis à sa Sainteté, j'en ay fait mention en la lettre que j'escris au Roy, selon que le propos s'y est addonné en respondant aux poincts dont sa Majesté m'auoit escrit. Au demeurant ie ne scaurois que vous dire sur le sujet de vostre derniere lettre escrite à Pontoise le 13. Mars, sinon que tous les bons François, & les bons Italiens encores, ont vne extrême melancholie & colere de ce qu'une ville de si grande importance & consequence que celle d'Amiens, s'est perduë si pauurement & si laschement. Les Espagnols se vantent encores d'auoir Mets, & y a ia trois sepmaines que ceste nouvelle court icy par les gazettes & par les bouches des hommes: ie ne le croy point neantmoins. Bien vous diray je qu'il m'a esté assuré par personne qui disoit le scauoir bien, que le Cardinal Albert auoit vn traité sur Mets, & esperoit de l'auoir bien tost par argent, dont ie n'ay peu tirer autre particularité. Je prie Dieu qu'il nous soit en garde, & qu'il vous donne, Monseigneur, &c. De Rome ce 20. d'Auril 1597.

## A MONSIEUR DE VILLEROY.

## XCVI.

**M**ONSEIGNEUR, Entre plusieurs honnestes hommes de ceste Cour qui sont affectionnez au service du Roy & au bien de la France, le sieur Cosimo Camajano natif de Toscane, referendaire de nostre S. Père, est éminent en ceste affection & deuotion, comme d'ailleurs il est aussi personnage de noble extraction, & de grande intégrité & doctrine. Quand Monsieur d'Eureux s'en alla d'icy, ledit sieur Camajano luy bailla des lettres pour le Roy & pour vous, auxquelles n'ayant eu aucune response en si long-temps, ny mesmes à l'arrivée de Monsieur de Luxembourg, il est entré en quelque soubçon que ses lettres n'ayent esté rendues, & que son zele auprès sa M. n'ait esté représenté, & ne soit sceu par delà. Je l'ay consolé, l'assurant que le Roy estoit bien informé de luy, que sa Maiesté s'en estoit souuenuë en fort bon endroit, que ie ne pouuois néanmoins luy particulariser pour ceste heure : en quoy vous sçavez que ie luy ay dit verité, comme c'est mon naturel & costume de n'abuser personne. Il a voulu escrire de nouveau à sa Maiesté & à vous, & m'a baillé les lettres que vous trouuerez avec la presente. Je vous prie qu'il aye vn petit mot de response, tant du Roy que de vous, vous assurant que son affection enuers le Roy & la France est superabondante, & ne sçauroit estre trop recognüë.

Aussi m'a dit le sieur Marco Cellini gentil-homme Florentin, Maistre d'hostel de Monsieur le Cardinal Aldobrandin, que lors que Monsieur d'Eureux s'en alla d'icy il fut prié non seulement par luy Cellini, mais aussi par ledit Seigneur Cardinal Aldobrandin, qu'il procurast auprès du Roy, que ledit Cellini fust honoré par sa Majesté de l'Ordre de saint Michel, & Monsieur d'Eureux luy en donna toute bonne esperance : mais n'en ayant eu depuis aucune response, ledit sieur Cellini m'a requis de vous m'escire; ce que ie fais de tres-bon cœur, pour ce que ce gentil-homme est de fort honneste origine, comme il m'a esté assuré d'age de 40. ans, de fort bon entendement, de tres-belle & honorable presence, de fort bonne reputation, fort affectionné au service du Roy & à toute la France, & qui s'y est employé en tout ce qu'il a peu, & d'ailleurs fort aimé & estimé de Monsieur le Cardinal Aldobrandin son maistre, auquel le Roy fera plaisir. Il vous plaira m'en faire response.

Le Seigneur Comte Hercule Estense Tassone, qui estoit la principale persöne que feu Monsieur le Cardinal d'Este eust près de luy, & qui a toujours retenu de l'ancienne affection vers la France, est Maistre d'hostel du Pape & depuis enuiron vn an a esté par sa Sainteté fait Patriarche Latin de Constantinople; & voulant faire son deuoir de bon Patriarche, & améliorer la condition de la Religion Chrestienne & Catholique en ces quartiers, & autant qu'il luy sera possible, il desireroit enuoyer ou faire enuoyer par

le Pape à Pera 5. ou 6. Peres Iesuites, comme il en fut enuoyé du temps du Pape Gregoire XIII. & que lesdits Peres soient aydez & fauorisez par l'Ambassadeur du Roy à Constantinople & par celuy de Venise, comme furent les autres antemps dudit Pape Gregoire, & sur ce il m'a requis d'en escrire à Monsieur de Breues. I'ay loué le soin qu'il auoit, & son zele: mais au reste ie luy ay dit que ie ne pouuois escrire de telle chose sans permission du Roy, & quand i'en aurois escrit ledit sieur de Breues n'y deuroit rien faire, sans en auoir premierement sceu la volonté de sa Majesté; Que ie luy voulois dire de plus, que ces gens, fut à droit ou à tort, estoient grandement suspects d'adherer au Roy d'Espagne; & que le Turc ayant à present guerre avec la maison d'Austriche, ils ne seroient gueres aggrez par delà. Il m'a repliqué qu'il les prendroit tous de l'Estat de Venise, ou d'autre lieu non suspect, & leur feroit commander par leur General, & par le Pape, de ne se meller de rien que du spirituel, me priant d'en vouloir escrire en Cour, pour en sçauoir la volonté du Roy: il vous plaira m'y faire quelque response. Je serois d'aduis que si on ne luy peut complaire, qu'on ne le refusast point tout à plat, mais qu'on le priast de différer iusques à ce que le temps soit plus propre, & que sa Maieité puisse avec plus de facilité luy cōplaire en cela, cōme elle desire de faire en plus grande chose, pour ses vertus & dignitez, & pour la memoire de feu Monsieur le Cardinal d'Este, de qui il a esté tant aymé & estimé, & duquel il a imité l'affection vers la Couronne de France. Atant, &c. Monseigneur, &c. De Rome ce 20. Aueil 1597.

## A V R O Y.

## XCVII.

SIRE,

Le 28. Mars ie receus deux lettres de vostre Majesté des 7. & douzième du mesme mois, en response de celles que i'auois escrites à Monsieur de Villeroy les 15. 17. 18. & 19. Iannier, & les 21. & 22. Feurier. Ces deux miennes dernieres furent portees par vn courrier extraordinaire qui alloit en diligence, c'est pourquoy elles arriuerent vers vostre Maieité plustost que d'autres precedentes que i'auois escrites les premier, huit, neuf, & dixiesme de Feurier, qui furent portees par l'ordinaire, comme sera encores ceste-cy, laquelle sera plus briefue, pour ce que Monsieur de Luxembourg vous veut enuoyer vn courrier expres dans peu de iours, & par autre chemin plus seur, & que lors ie pourray escrire plus amplement, s'il faudra que i'escrive encores quelque autre chose, comme de-formais il n'en sera plus besoin, puis que Monsieur de Luxembourg, non seulement est arriué, mais aussi a déjà commencé à faire sa charge d'Ambassadeur resident, auquel ie diray cy-apres ce que i'apprendray, & ce que i'eusse peu escrire quand il n'y eust eu icy autre pour vostre seruice. Je luy ay communiqué lesdites deux lettres de vostre Majesté, & il est en

tres-bonne deuotion de faire toutes les choses que vostre Maieſté y commande, comme auſſi toutes autres qu'il cognoiſtra eſtre pour vostre ſeruiſſe, & pour le bien du Royaume. Entre autres choſes il meſnagera la faueur de Meſſieurs les Cardinaux Aquauina & Sforza, comme vostre Maieſté commande, & de tous autres deſquels vostre Maieſté pourra tirer quelque ſeruiſſe & ſoulagement en ſes affaires. Quant à Monſieur le Cardinal Aldobrandin, vostre Maieſté a occaſion d'auoir la principale fiance en luy aupres du Pape; car i'eſtime qu'il veut, & ſçay qu'il peut plus pour vostre ſeruiſſe aupres de ſa Sainteté que l'autre Cardinal neueu: mais de tenir ceſtuy-cy pour Eſpagnol ie ne penſe pas qu'il y ait occaſion, & croy fermement qu'il deſire vostre proſperité, & qu'il eſt fort marry quand il entend que les Eſpagnols gagnent quelque aduantage ſur la France.

Quant aux pourſuites que faiſoient aupres de vostre Maieſté ceux de la Religion pretenduë reformee, & au propos de paix ou ſuſpenſion d'armes que l'on m'auoit tenus icy, auſquels deux points vostre Maieſté m'a reſpandu tres-amplement, ie louë Dieu de ce que i'en ay touſiours reſpondu de moy-meſme conformément à ce que vostre Maieſté m'en a commandé, comme elle aura veu par mes dépeſches precedentes; & Monſieur de Luxembourg eſt bien reſolu de reſpondre de meſme, à toutes les occaſions qu'on luy en donnera, comme auſſi d'informer bien le Pape des façons de proceder de Monſieur de Sauoye, tant en ce voyage du ſieur de Iacob qu'il auoit enuoyé vers vostre Maieſté, qu'autrement. Du Duc de Mercœur i'en feray vne lettre à part qui ira avec ceſte-cy.

Pour le regard de Madamel' Amirale, le Pape par l'aduiſ de Meſſieurs les Cardinaux de l'Inquiſition a iugé que la cognoiſſance luy en appartient & a commis la cauſe à ſon Nonce pres Monſieur de Sauoye; & pour auoir aucunement eſgard au deſir de monditz ſieur de Sauoye, s'eſt contenté que l'Archeueſque de Thurin y interuint avec Monſieur le Nonce. Mais nous auons depuis entendu que Monſieur de Sauoye veut nommer celuy qui deura interuenir avec ledit ſieur Nonce. Cependant la pauvre Dame paſſiſt en priſon, & comme j'ay cy deuant eſcrit à vostre Maieſté nous ſommes touſiours apres à luy faire bailler ſa maiſon de Thurin pour priſon: & Monſieur de Luxembourg s'eſt apperceu d'une choſe qui ſeroit fort bonne pour ceſte pauvre affligée, ſi on la pouoit obtenir, à ſçauoir que le Pape mandast qu'on la luy enuoyast icy, pour en cognoiſtre luy-meſme: mais auant qu'en rien dire par deçà, nous auons eſcrit à Thurin pour en ſçauoir l'aduiſ de ladite Dame, ou au moins de ſa fille.

Vostre Maieſté aura ſceu par mes precedentes, comme les affaires de la Vice-protection furent accommodees: & depuis mes dernieres furent propoſez en Conſiſtoire par Monſieur le Cardinal Aquauina le 26. Mars les Archeueſché de Rouën, & Eueſché de Montpellier, & expediez l'un & l'autre gratis. Le premier, à ma pourſuite, & pour le reſpect de vostre Maieſté; le ſecond, par l'interceſſion de monditz ſieur le Cardinal Aquauina, avec lequel vint d'Auignon en ceſte ville vn nepueu de Monſieur Ratté, qui a tres bien & tres-heureſement ſollicité l'expedition de cét Eueſché pour ſon oncle. Quant aux Archeueſchez de Reims & de Sens, j'ay rendu

compte cy-déuant à vostre Maïesté des empeschemens que les parties mesmes mettent à l'expedition du premier, & des difficultez que le Pape fait sur le second. Et comme il est besoïn que les parties s'accordent par delà, quant à celuy de Reims d'une façon qui puisse passer icy; aussi quant à celuy de Sens, Monsieur de Luxembourg est delibéré d'en parler à sa Sainteté, comme porte son instruction & les dernières lettres de vostre Maïesté, auxquelles ie responds par la presente.

Et afin qu'il n'aduienne cy-apres comme il est aduënu de l'Abbaye de saint Nicolas des prez lez Verdun, que le Pape donne sans nomination de vostre Maïesté, les benefices electifs qui sont es lieux de vostre protection, Monsieur de Luxembourg a trouué bon avec l'Indult de Bretagne & Prouence, de demander encores celuy de Mets, Toul, Verdun, & de tout ce pays-là qui est en vostre protection, & demander le tout à la première audience qu'il aura de sa Sainteté. Des Abbayes de Josselin au diocèse de saint Malo, & de saint Cyprien lez Poitiers, sera fait comme vostre Maïesté commande: & quant à celle de N. Diocèse de Reims, Monsieur de Luxembourg a à vous remontrer quelque chose, dont ie me remets à luy.

Ie dis à nostre saint Pere l'onzième de ce mois, comme vostre Majesté auoit commandé à son Conseil de contenter les Religieux de l'Abbaye de S. Honorat en Prouence, & de les conseruer en l'union de la Congregation de Mont Cassin, & le reste que vostre Majesté m'escriuoit à ce propos, dont sa Sainteté fut très-aïse, & me commanda de prier de sa part vostre Maïesté de perséuerer en ceste bonne volonté. Aussi fis-je les excuses enuers Monsieur le Cardinal S. George touchant la Preuosté d'Ora, en la façon que vostre Majesté me commandoit, dont ledit sieur Cardinal demura très-content. Et pour le regard du sieur Camille de la Croix, qui sert vostre Majesté à Venise depuis vn si long-temps, outre que Monsieur de Luxembourg a veu & tenu les lettres que vostre Majesté m'auoit escrites, ie luy ay baillé l'extrait de cet article avec certains autres, & il a bonne enuie d'aider à ce pauvre homme, pour lequel ie ne l'airray de solliciter encores à toutes les occasions qui s'en presenteront de luy procurer quelque commodité, pour le soustenement & soulagement de sa vieillesse.

Quant à la clause SANS PREIUDICE DV ROY D'ESPAGNE, dont les Papes vsent en acceptant l'obedience pour le Royaume de Nauarre, i'en feray à vostre Maïesté vne lettre à part, soit par cet ordinaire, ou par le courrier que Monsieur de Luxembourg vous depeschera: cependant vostre Maïesté se peut aïssurer que cela mesmes s'est passé de façon que vostre Maïesté en receura contentement.

Ledit iour 11. de ce mois ie dis au Pape ce que vostre Maïesté m'auoit commandé luy respondre à la plainte qu'il m'auoit faite, sur ce qu'il auoit esté escrit de delà qu'on y auoit opinion qu'il instiguoit le Roy d'Espagne à l'entreprise d'Angleterre; de laquelle response sa Sainteté demeura fort satisfaite, & mesmes de ce que vostre Maïesté veut entendre de ladite Sainteté mesme, & de ses ministres, tout ce qu'il luy plaira que vostre Maïesté sçoye de son intention aux affaires publiques, & me dit qu'il en feroit auant de son costé pour le regard de vostre Maïesté.

Ainsi ny le respondit aux poincts des lettres de vostre Maieſté que l'ay estimé en auoir beſoin. Quant aux occurrences de deçà, nostre S. Pere, lors que l'escriuis ma dernière lettre, auoit encore la goutte, mais bien tost apres il en fut deliuré, & le iour de l'Annonciation de nostre Dame 25. Mars alla à la Minerue; comme est de couſtume tous les ans en tel iour; mais ce fut en ſi-tiere. Le lendemain 26. il tint Conſiſtoire; & le 27. au ſoir Monsieur de Luxembourg luy alla baiſer les pieds, auquel ie laiſſé à vous rendre compte du bon accueil & caresses que ſa Saincteté luy fit. Et pource qu'en la ſemaine ſainte, en laquelle nous allons entrer, ny en la ſemaine de Paſques ne ſe fait point d'entrees; ny de Conſiſtoire, mondit ſieur de Luxembourg ne fit ſon entree que le Mercredy 16. de ce mois, & le lendemain 17. luy fut donné le Conſiſtoire public où fut preſtee l'obedience, & prononcee l'Oraiſon de la part de vostre Maieſté; & tant en ladite entree, qu'en l'acte de ladite obedi-  
 dence, toutes choſes y paſſerent avec grande dignité, n'y ayant eſté rien oublié, ny de la part de vostre Maieſté, ny de celles du Pape, de tout ce qui eſtoit deu & conuenable à l'antiquité, grandeur, & merites de la Couronne tres-Chreſtiéne, & à la Maieſté & reputation d'un ſi grand Roy. Et ſa Saincteté a bien monſtré qu'il ſçauoit rendre l'honneur que l'on faiſoit à ſes Legats; dont ie lairray à Monsieur de Luxembourg à vous aduertir plus particulièrement, comme auſſi de la premiere audience qu'il eut de ſa Saincteté Vendredy 18. de ce mois.

Sadite Saincteté s'en va faire vn petit voyage hors de Rome pour dix ou douze iours, à voir vn pont qui ſe fait ſur le Tybre au Bourguet, & à voir encores quelques autres lieux. Et d'autant que depuis peu de iours quelques troupes de bannis ſe ſont mis en campagne vers Aſcoli, & en la Romagne, ſa Saincteté crea deux Legats au Conſiſtoire qu'elle tint le 14. de ce mois, à ſçauoir le Cardinal Bandini pour la Marque, & le Cardinal ſaint Clement pour la Romagne, tous deux ſes creatures. Sa Saincteté s'eſt reſoluë d'enuoyer ſecours à l'Empereur pour la guerre de Hongrie contre le Turc, & commença-t'on à ſonner le tambour dans Rome meſme le 14. de ce mois. On dit qu'il y enuoyera huit mille hommes de pied, & enuiron mille ou douze cens à cheual, qui ſeront commandez par le Seigneur Iean François Aldobrandin, lequel eſt déjà près l'Empereur: combien qu'il y en a qui eſtiment qu'un de ces iours bien toſt, le Pape aura nouuelles que l'Empereur & le Prince de Tranſſylvanie auront fait leur paix avec le Turc, & meſmes d'autant qu'on n'eſpere plus que le Roy de Pologne ſoit pour entrer en ligue avec eux contre ledit Turc.

Les deux Cardinaux Eſpagnols de la nouuelle promotion, d'Auila, & Guera, arriuerent en ceſte ville le 27. Mars, & le 29. firent leur entree & prindrent le chappeau. Les huit galeres qui les auoient accompagnéz iuſques à Ciuita Vecchia, paſſerent incontinent à Naples pour aider à porter des ſoldats qu'on y auoit leuez, deſquelles s'en eſt perdu trois, & encores d'autres vaiſſeaux au port meſme de Naples, par violence d'une tempeſte qui ſe leua la nuit d'entre le 11. & 12. de ce mois. On continue tousiours tant audit Naples comme à Milan à leuer gens: Monsieur de Sauoye auſſi & le Prince Doria ſont de grands preparatifs; & encores qu'il ſe diſe que les leues que fait le Roy d'Eſpagne, ſoient pour enuoyer partie au Cardinal



Albert , partie en Espagne : si est-ce qu'il y en a qui soupçonnent qu'il aye quelque dessein sur la Prouence , dont Monsieur de Guyse a esté aduertý de Gennes mesme , & vostre Maiesté y pouruoirra s'il luy plaist , en tant qu'elle pourra de si loing , & ayant les affaires qu'elle a ailleurs . On nous repretend par deçà de ce qu'on a laissé passer à Lyon vn courrier venant d'Espagne , qui portoit aux Foueres d'Allemagne , les mandemens & prouisions touchant vn party que le Roy d'Espagne a fait avec eux , pour faire tenir argent audit Cardinal Albert , qui en estoit en tres-grande necessité . Et si on eust retenu ledit courrier à Lyon , outre que vostre Maiesté eust veu & esté ce qu'il portoit , les affaires du Roy d'Espagne contre la France en eussent esté retardées de deux bons mois : dequoy vostre Maiesté sçait trop micul l'importance .

Le Seigneur Paul Sforza qui estoit vn des meilleurs Capitaines qui fussent en Italie , & qui autrefois auoit esté en France , mourut le iour du Ieudy sainct dernier .

Le Cardinal Taruggi Archeuesque d'Avignon apres auoir esté à Mantouë est allé à Parme , mais on n'entend point encores qu'il ait rien aduancé en la reconciliation de ces deux Princes , pour laquelle principalement il fut enuoyé , Atant , &c. S I R E , &c. De Rome ce 20. Avril 1597.

## A M O N S I E U R D E V I L L E R O Y .

## X C V I I I .

**M** O N S E I G N E U R , Je vous escriuis le vingtiesme d'Avril par l'ordinaire ; depuis ie n'ay receu aucunes lettres de vous , ny de Monsieur de Luxembourg non plus ; & la dernière que i'ay receüe de vous est celle que vous m'escriviistes de Pontoise le treiziesme Mars . Nous auons besoin de receuoir bien tost quelque bonne nouuelle de delà , pour releuer vn peu nostre reputation , fort decheuë par la perte d'Amiens , & par tant de mauuaises humeurs & maladies secretes qui depuis se sont descouuertes par delà , dont les Espagnols qui les ont causees font icy leur profit aussi bien que de delà , & entre autres choses blasment le Roy , de ce que la Cour de Parlement ne trouue bon que tous François leur aident à ruiner la France . Mais ie croy que pour peur de ce que les Espagnols pourront dire icy ou ailleurs , vous ne vous laissez point assassiner par eux , ny par leurs adherens , ains tant plus grande est leur malice & meschanceté , rant plus vigilans vous serez , comme vous cognoissez trop mieux que l'Estat ayant vne si grande corruption au dedans , & vn si puissant ennemy au dehors , ne se peut conseruer sans vn grand & continuë soing & vigilance du Roy , & des gens de bien consentans & conspirans avec sa Majesté à la conseruation du public . Et comme le Roy sçait tres-bien que les Royaumes & Empires se conseruent avec les mesmes vertus , qu'ils ont esté acquis , aussi doiuent penser les particuliers , qu'au public leurs fortunes sont contenues , & qu'en vain sont-ils si soigneux d'elles .

A la fin de la lettre que ie vous escriuis le 23. Mars, ie vous disois que ie remercirois le Roy & vous de la mention qu'il auoit pleu à sa Majesté & à vous de faire de moy es instructions & memoires qui auoient esté baillez à Monsieur de Luxembourg. Ie suis tres-assuré que c'est vous qui m'avez procuré cét honneur, comme tous les autres que i'ay receus iusques icy: aussi vous priay- ie croire qu'apres Dieu, & sa Maieité, ie m'en sens du tout redevable à vous, pour vous en rendre tant que ie viuray toute la gratitude qu'un bon cœur peut comprendre en soy, & tout le tres-humble service qu'il me sera possible, quel qu'en puisse estre l'éuenement: auquel, pour me confesser à vous, ie suis disposé si indifferemment, que comme ie ne dois faire rien pour empescher ce que le Roy & vous estimez estre bon pour son service, aussi ne seray- ie vn pas, ny dépendray vne parole, pour auoir ce que ie ne merite point, & qui est trop disproportionné à ma condition. Vous assurant cependant, que tant moins i'y apporte de merite & de desir, tant plus grande i'en recognois l'obligation, & tant plus ie me sens eschauffé à vous en honorer, reuerer, & seruir toute ma vie. Et remettant des autres choses à Monsieur de Luxembourg, ie finiray icy la presente, en priant Dieu qu'il vous donne, &c. Monseigneur, &c. De Rome ce 8. May 1597.

A V R O Y.

XCIX.

SIRE,

Par la lettre que Monsieur de Luxembourg me porta de la part de vostre Majesté, & par les memoires & instructions qu'il m'a communiquées, j'ay veu le contentement qu'il a pleu à vostre Majesté auoir de ce peu de service que ie me suis efforcé vous rendre; ce que i'attribuë à la grace de Dieu, & à la bonté de vostre Majesté, plustost qu'à aucun mien merite, comme ie fais encores beaucoup plus la mention qu'il vous a pleu faire de moy parmy tant de grands personages, au moindre desquels ie ne suis à comparer. Sur quoy ie ne puis dire autre chose, sinon que vostre Majesté peut bien m'augmenter le pouuoit de la seruir, mais la fidelité & deuotion ne scauroit plus croistre. Aussi n'entray ie à rendre action de graces, ne trouuant point de paroles qui respondent à vne si grande obligation, ny à la gratitude que ie vous en rends dans mon cœur; & d'ailleurs ayant long temps dédié pour iamais, apres Dieu, au service de vostre Majesté tout ce que ie pourray faire, dire, penser, & ma propre vie, tout remerciement apres ce- la me semble fort petit. Je continueray doncques à vous seruir de toutes les forces de mon ame, &c. SIRE, &c. De Rome ce 8. May, 1597.

## A MONSIEVR DE VILLEROY.

C.

**M**ONSEIGNEVR, Je receus le 2. de ce mois les deux lettres qu'il vous pleut m'escrire le 25. d'Auril, & 10. de May; & fus tres-aise d'y voir comme vous auez receu les miennes des premier, 9. 18. & 19. Feurier, & des 19. & 22. Mars. Aussi demeuray-ie grandement consolé de nos calamitez publiques, par le courage & genereuses resolutions du Roy qu'il vous a pleu m'y représenter, dont ie congoy grande esperance de ressource en ses affaires; comme apres Dieu le principal moyen à mon aduis, & quasi seul, de recourir le nostre, & de releuer la reputation de ceste Couronne & de nostre nation, consiste en la valeur, vigilance, & preuoyance continuelle de sa Majesté, & en l'assistance & persuerance de ses bons suiets & seruiteurs. Je ne puis rien adiouter à ce que Monsieur de Luxembourg vous escrit, comme aussi quand i'aurois quelque chose, ce seroit à luy que ie voudrois & deurois m'en adresser. Outre les susdites deux lettres, i'en ay receu encores deux autres de vous, en faueur, l'une du fils de Monsieur le Comte de N. pour l'expedition de l'Abbaye de Tironneau, & de dispence d'aage; l'autre de Monsieur l'Abbé de Montemar neuu de Monsieur de Nantes pour l'Euesché de saint Malo. I'en ay encores receu du Roy mesme, en faueur des Cheualiers de Malte de la nation François, à ce qu'il ne soit rien innoué es dignitez qu'ils ont accoustumé de tenir en l'Ordre de saint Iean de Hierusalem; en recommandation aussi de Monsieur des Chasteliers, pour le gratis de l'Euesché de Bayeux, & de Messieurs de Vic, pour le gratis de l'Abbaye du Bec, & de frere Estienne Paumel Religieux de Cluny, pour le gratis de l'Abbaye de saint Denis de Rheims, & du Capitaine Ioly pour estre dispensé de se pouoir marier, nonobstant qu'il ait pris l'Ordre du Subdiaconat & Diaconat. Desquelles choses comme c'est à Monsieur de Luxembourg à en porter la parole au Pape, aussi ne faudray-ie à luy en dire mon aduis, & y seruir le Roy, & vous, & les parties, de tout ce qu'il me sera possible. Bien vous diray-ie pour le regard des gratis, qu'il sera mal-aisé de les obtenir desormais de tout en tout; & que pour les benefices de petite taxe, il faudra payer le tout; & quant à ceux de haute taxe, il faudra se contenter de quelque honneste moderation, comme à la moitié. Aussi tiens ie la dispense que ledit Capitaine Ioly desire, pour fort difficile à obtenir, si on n'a escrit de delà à l'expeditionnaire qui a la sollicitation de cét affaire, d'autres causes de la dite dispense que celles qu'on nous a dites. A tant, &c. De Rome ce 20. Iuin 1597.

## A MONSIEVR DE VILLEROY.

CI.

**M**ONSEIGNEVR, Depuis la presente escrite, j'ay veu ce jour d'huy 23. Iuin l'Indult que le Pape a concedé au Roy touchant la nomination aux Eueschez & Abbayes de Bretagne & Prouence, lequel est conforme à celuy de Sixte V. pur & simple, sans aucune de toutes ces charges & conditions que les autres Papes auoient enointes aux autres Roys; dont ie me conioys avec vous, non seulement pour cette fois mais aussi pour tousiours à l'aduenir. l'ay eu quelque peur que ce Pape ne voulust à ce commencement de regne retourner à faire de telles pactions, & à demander & retirer des lettres patentes semblables à celles que nos Roys, pour obtenir tel Indult, ont expedies autresfois en faneur du saint Siege & des Papes; comme à la verité le Pape l'eust fait si ses Officiers l'eussent ramenteu tant soit peu. Mais outre qu'ils sont nouueaux, ils ont trop d'autres choses à faire pour se souuenir de ceste-cy. Et puis qu'en ceste fois, & en ceste saison, nous l'auons obtenu purement & simplement ie ne crains plus qu'à l'aduenir on y retourne plus: & l'ayant ia deux Papes concedé purement & simplement par deux fois consecutiues, & apres tant de choses qui se sont passees parmy, ceux qui viendront apres nous l'obtiendront tousiours de mesme, sans autres charges ny conditions. Je vous enuoye copie du memoire que i'en dressay, qui fut présenté par Monsieur de Luxembourg le 9. May, où i'auois compris les Eueschez de Mets, Toul, & Verdun, & les Abbayes qui sont en tout ce pays-la de la protection du Roy; mais le Pape ne l'a voulu accorder. C'est chose neantmoins qui se pourra encôres demander, & obtenir aussi, en s'y aydant par delà en deux façons; l'une, en ostant au Pape le pretexte qu'on allegue de son refus, disant que nos Rois vsent mal de la faculté de nommer aux Eueschez & Abbayes; l'autre, en ne laissant prendre possession aux personnes qui n'auront esté proposees par le Roy, mesmement suspectes. De Rome ce 23. Iuin 1597.

## A MONSIEVR DE VILLEROY.

CIE

**M**ONSEIGNEVR, Depuis vous auoir escrit ma lettre precedente, qui vous sera rendue avec ceste-cy, j'ay receu vne lettre de Thyrin de la fille de Madame l'Amiralle du 14. de ce mois, avec laquelle elle m'a enuoyé vn feuillet escrit des deux costez de la main de ladite Dame Amiralle; où par forme de dialogue sont entreueës les interrogations

que le President Vualdo, qui a esté nommé par le Duc de Sauoye par decret du Nonce pour assister au procez de ladite Dame Amirale, luy fit le 6. Iuin, & les responces qu'elles luy rendit. La lettre V. signifie ledit President Viualdo, qui a esté nommé par le Duc de Sauoye, & la lettre A, signifie ladite Dame Amirale. Je vous enuoye ladite feuille; vous y verrez comme vn des plus grands crimes que ceste pauvre Dame ait commis, est d'auoir Antremont place forte en Dauphiné, que Monsieur de Sauoye luy veut extorquer, pour s'en seruir contre le Roy, & contre la France. Ladite fille me recommande que la chose soit tenuë fort secrette: mais en vous enuoyant ledit escrit, comme Monsieur de Luxembourg l'a trouué bon, il ne se fera rien contre son intention. Cette lettre, toute la depesche de Monsieur de Luxembourg, vous sera portee & renduë par le sieur d'Ambourg, Secrétaire de mondit sieur de Luxembourg, & fort honneste homme, & tres-affectionné & tres-fidelle au seruice du Roy, comme ie l'ay cogneu depuis dix ans en ça. Si en quelque chose il a besoin de vostre faueur & protection, vous ferez chose digne de vostre bonté accoustumee enuers tous les bons seruiteurs de sa Maiesté, de la luy departir. A tant, &c. Monseigneur, &c. De Rome ce 28. Iuin 1597.

---

## A MONSIEVR DE VILLEROY,

### CIII.

**M**ONSEIGNEVR, l'eus ces iours passez vne fièvre continuë qui ne dura que quatre iours; mais l'abstinence, medecine, & vne petite saignée, avec les grandes chaleurs qui regnent à present par deça, ont fait que ie n'ay point encores recouuré mes premieres forces; c'est pourquoy la presente ne sera gueres longue. Aussi bien aurez-vous tout ce qui concerne le public, par les lettres que Monsieur de Luxembourg a escrit au Roy; & quant au particulier, ie n'ay qu'à respondre à la lettre qu'il vous pleut m'escire le 24. May, laquelle a eschappé la rigueur dont on a vlsé à Thurin au dernier ordinaire qui venoit de Lyon icy, auquel on a pris toutes les lettres qui n'estoient pour expedition de benefices. Vostre dite lettre s'est sauuee, pource qu'elle estoit au paquet d'vn de ses sollicitours & expeditionnaires de ceste Cour; duquel moyen, ou autre semblable de marchands, seroit possible bon d'vser aussi pour les depeschés des affaires publiques, pendant que ce mauuais temps durera. Iagoit que l'ordinaire que nous depeschons à present d'icy à Lyon iro par le pays de Suisse, & que ie croye que celuy qui viendra de Lyon icy fera desormais le mesme chemin, en attendant que les postes soient dressees par le chemin, que vous auez cy-deuant projecté, si est-ce que deux precautions vaudroient tousiours plus qu'une seule pour la soureté de vos depeschés, & mesmes d'autant que i'entends que le chemin que l'ordinaire s'en va tenir est en partie par la Franche-Comté, sous esperance de la naturalité, à laquelle ie ne sçay combien nous deuons nous fier, en matieres si importantement de paquets de lettres.

Mais pour respondre à vostre dite lettre du 24. May, qui touche l'expédition de l'Abbaye de la Chaife-Dieu en la personne de Monsieur l'Abbé de Choisi, vostre frere, le Pape a tres-volontiers accordé, & ja signé que ladite expedition se feroit gratis, & qu'avec ladite Abbaye de la Chaife-Dieu l'interprant pourra retenir celles de Choisi, Mozac, & de saint Vandrille, & le tout pour vostre respect sans autre consideration. Monsieur de Luxembourg qui en a point la parole à sa Sainteté, vous y a seruy de toute son affection, & ie n'ay fait autre chose que dire à mondit sieur de Luxembourg mon aduis sur la façon de porter ladite parole; mais vostre nom seul y estoit suffisant, & a tout fait. Je vous remercie tres-humblement de la souvenance que vous avez eu de me commander en ceste occasion, & vous supplie de n'en laisser passer aucune qui se presente de me donner matiere de vous monstrier vne partie de la gratitude que ie conserue en mon cœur de tant de biens & faueurs qu'il vous a pleu & plaist tous les iours me faire; & sur ce, &c. De Rome ce 26. Iuillet 1597.

## A MONSIEUR DE VILLEROY.

## CIV.

**M**ONSEIGNEUR, Par la lettre qu'il vous a pleu m'escrire le 10. Iuillet, qui me fut rendu le 9. de ce mois, i'ay esté affecté de la bonne santé du Roy, & vostre, dont ie loué Dieu, & le prie qu'il la vous conserue & accroisse de bien en mieux, & en particulier qu'il preserve la personne de sa Majesté & la vostre de tout incontinent de guerre. Outre vostre lettre susdite i'en ay receu vne du Roy du 2. Iuin, en recommandation de Monsieur de Nantes pour l'expédition de l'Archeuesché de Reims; deux du 16. & 20. du mesme mois, en faueur de Monsieur Valgrand pour l'expédition de l'Archeuesché d'Aix; vne autre du 27. dudit mois, pour vn ieune fils de Monsieur de Beauuais Nangy & deux Gentils-hommes, qu'on veut estre receus en la Religion de S. Jean de Hierusalem en leur absence, & nonobstant leur trop bas age. Tous lesquels ie serviray auprès de Monsieur de Luxembourg, & ailleurs où i'en auray le moyen. Mondit sieur de Luxembourg parla hier au Pape de mondit sieur de Nantes, comme il vous escrira, & i'espere que nous aurons bonne issue de ceste affaire, estant mesmes contenté Madame de Guise, comme elle a écrit par deçà, & ordonné à ceux qui sont pour elle qu'on n'empeschast point l'expédition, le 20. d'Auristie vous escravis vne lettre à part pour trois personnes, & pour trois diuerses affaires, dont ie n'ay eu response. Le ne sçay si vous me l'auriez ja mandée, & qu'elle eust esté perdue à Thurin, où le Courrier ordinaire despesché à Lyon en Iuin fut deualisé. A toutes aduantures ie vous enuoye vn duplicata de madite lettre, vous suppliant d'y mectre de response à chacune desdites trois affaires, afin que i'en puisse respondre à ces trois personnages qui m'en ont demandé plusieurs fois.

Monsieur l'Archeuesque d'Ambrun, qui sçait que ie vous suis seruiteur

tres-obligé & tres-affectionné, m'a montré vne lettre à luy escripte par Monseigneur de Mompensier, qu'il luy mande que le Roy luy auoit accordé la permission de resigner son Archeuesché à vn sien neveu, mais quand c'estoit venu à en faire la despesche cela auoit esté destourné: & apres la lecture de ladite lettre, m'a requis de vous prier de luy vouloir estre aidant à obtenir la permission. Je n'entreprends volontiers telles recommandations qui sont par dessus ma qualité & merite, & contre ce que ie me suis tousiours proposé d'eniter toute presumption: mais ie n'ay peu refuser cet office à vn personnage de telle qualité, lequel m'a semblé marcher de bon pied aux affaires du Roy, depuis que sa Maiesté eut l'absolution du Pape, & n'ay point entendu que depuis ledit temps il aye fait chose contraire à la profession qu'il fait d'estre son suzer & seruiteur de sa Maiesté. Le Chapitre de S. Jean de Latran m'a aussi requis de vous prier de fauoriser vn des leurs qu'ils ont par delà près Monsieur le Legat, en certain affaire qu'ils ont près le Roy. C'est vne vieille pretention, pour laquelle ie leur dis qu'il n'estoinencores temps d'enuoyer vers sa Maiesté: mais ils ne voulurent laisser perdre l'occasion d'enuoyer leurs gens avec Monsieur le Legat. De deux que ledit Chapitre enuoya, vn s'en est retourné, l'autre est demeuré près ledit Legat, & s'appelle Giacobbo Varnaro. Ledit Chapitre est vne compagnie fort venerable, & affectionnée à la France. Toute la satisfaction que l'on leur pourra donner tournera à l'honneur & réputation du Roy & de la Couronne. A tant, &c. Monseigneur, &c. De Rome ce 28. d'Aoust. 1597.

## A MONSIEUR DE VILLEROY.

G V.

**M**ONSEIGNEUR, Par vne habitude que i'ay faite long temps y Ma de seruir plustost autrui que moy mesme, i'oubliois à vous escrire qu'on m'a enuoyé de Rennés la copie d'un Arrest de la Cour de Parlement de ladite ville, donné à la requeste du Procureur general le 23. May; par lequel Arrest est ordonné à tous Euesques, Abbez, Recteurs & Curez qu'ils aient à resider en leurs benefices en personne, sur peine de saisie de leur temporel. On m'a aussi enuoyé l'exploit de la signification dudit Arrest, fait aussi à la requeste dudit Procureur general à mon grand Vicaire, afin qu'il eust à m'aduertir de faire la residence. Surquoy ie vous supplie tres-humblement qu'il vous plaise moyenner que le Roy face entredre audit Procureur general qu'il metient icy pour son seruice, & luy despendre de passer outre pour mon regard, ou bien que sa Maiesté me permette d'obeyr audit Arrest, & d'aller resider; car pouruen que sadite Maiesté soit contente ie seray fort aise d'aller faire mon deuoir. A tant, &c. Monseigneur, &c. De Rome ce 23. d'Aoust 1597.

## A MONSIEUR DE VILLEROY.

## CVI.

**M**ONSEIGNEUR, La lettre qu'il vous pleut m'écrire l'onzième Aoust me fut renduë le dernier au matin par le Courrier Vallerio qui l'apporta, arrivé la nuit auparavant. Vous avez tres-bien fait d'apporter quelque moderation à l'excès de tant de gratis que l'on demandoit quasi pour toutes sortes de gens ; chose qui caufoit plus de peine & de faste aux ministres du Roy, & plus d'importunité au Pape que tout le reste de la charge de ceste Ambassade. L'indult pour les Eueschez & Diocèses de Mets, Toul, & Verdun nous sera accordé tost ou tard, pourueu que les affaires du Roy prosperent de delà, & que sa Maiesté vſe bien de la faculté de nommer qu'il a déjà. Car outre que lors on ne luy pourra honnestement refuser, attendu mesmement le grand interest que sa Maiesté a de remettre en ceste frontiere là gens dont il se puisse fier, il sera toujours en luy de s'en faire croire par le moyen que ie vous ay touché cy-deuant. La prise d'Amiens, dont vous nous donnez esperance, seruira à cent mille autres choses plus grandes, mais elle aidera entores beaucoup en ceste-cy, & à toutes autres que vous voudrez obtenir à Rome, où les affaires du Roy iront toujours selon qu'on les verra aller en France & aux environs ; maximement veritable, & par sa nature & humeurs de ceste Cour infaillible. Baptiste Mancini a composé, sous le bon plaisir du Roy, de son office de Maître des Courriers avec un jeune homme de Poitiers appelé Antoine Rabi, qui est à Rome depuis environ seize ans, ayant toujours demeuré avec Monsieur Hatton Lorrain, luy seruant au commencement, & long temps apres, en matiere d'expedition de benefices ; & depuis sept ou huit ans en l'Agence que ledit sieur Hatton a de Monsieur de Lorraine, s'estant démis de la sollicitation des benefices. L'espere que ledit Rabi seruira bien le Roy ; mais si ledit office eust esté à donner comme la raison, & le service du Roy, & la reputation de nostre nation par deçà le voudroit, nous eussions trouué à le remplir de personnes qui l'eussent grandement honoré & annobly, comme tels offices du Pape & du Roy d'Espagne sont tenus par personnes de qualité, qui les font priser & estimer. Le sieur Giulio Pamphili gentilhomme de grande vertu & valeur, qui fait icy les affaires de Monsieur le Connestable, & est capable d'administrer ceux de tout grand Prince, & eust acceptés volontiers, pour auoir entrée au service du Roy, comme il est tres-affectionné de longue main, suivant l'exemple d'un son oncle decédé, qui s'appelloit Cesare Pamphili, dont vous aurez ouï parler. Tant y a, qu'encores qu'il se soit perdu vne belle occasion de mettre cet office en reputation, ledit Rabi ne doit rien à Antoine Vestimi dernier Maître de nos Courriers, ains il a quelque chose de plus. Au demeurant, ledit Rabi desire estre assigné de ses gages en la façon que vous estimerez la meilleure. L'ay veu le temps qu'on mettoit l'assignation du Maître des



Courriers avec celle de l'Ambassadeur : vous sçavez trop mieux ce qui s'y peut faire. Ceste lettre vous sera rendue par Valerio, qui est depesché par delà par Monsieur le Cardinal Aldobrandin. J'espere que le Roy sera bien seruy de luy en ce qu'il a entrepris touchant le port des despêches de sa Majesté, & que vous aurez tout contentement d'avoir aidé à vne œuvre si bonne & nécessaire pour ce temps. A tant, &c. Monseigneur, &c. De Rome ce 9. Septembre 1597.

## A V R O Y.

## CVIA

SIRE,

J'ay receu la lettre de la France qu'il a pleu à vostre Majesté m'envoyer par le sieur d'Embourg Secrétaire de Monsieur de Luxembourg du sixiesme Septembre, sur ce qu'il vous a pleu m'honorer d'une place en vostre Conseil d'Estat. A quoy ie recognois de plus en plus vostre bonté, qui se contentant de sa fidelité & bonne volonté de ses serveurs & subiers, les honore & exalte par dessus leurs merites. Aussi prens-je de nay par ce nouveau bien fait, pour vne nouvelle & une estreinte obligation de servir, apres Dieu toutes mes actions & penées au service de vostre Majesté, & au bien de l'Estat; sçachant mesmement que tels lieux à la verité & en effort ne sont pas tant places d'honneur & dignité, comme de loin, assiduité, vigilance, diligence & labeur, & d'autres tels devoirs, lesquels ie tâche ay de rendre à vostre Majesté & au Royaume, autant que les forces de mon ame se pourront estendre, & en quelque part que ie me trouue toute ma vie. Et attendant que ie le puisse de plus près, ie serviray vostre Majesté & la France icy près Monsieur de Luxembourg, comme il vous plaît me le commander, & comme ie l'ay tousiours fait depuis qu'il est par deçà, desirant recognoistre les biens & honneurs que ie recois de vostre Majesté, plus par gratitude interieure, & par service & amour & essentiel, que par remerciement de paroles; outre que ie prieray Dieu tant que i'en auray, & le prie icy de tout mon cœur qu'il vous donne, &c.

Nous venons d'entendre comme vostre Majesté par sa vertu & valeur a recouvert la ville d'Amiens, que l'ennemy avoit emblee par astuce & fraude, dont ie loue & remercie Dieu, le suppliant qu'il vous fasse la grace de pourvoir à ce qu'il ne souffre cy apres aucune telle surprise, & de motiver en bien tost le reste qui est injustement detenu par les Espagnols & leurs adherans. A tant, &c. Sire, &c. De Rome ce 10. d'Octobre 1597.

2. 10. 11. 12. 13. 14. 15. 16. 17. 18. 19. 20. 21. 22. 23. 24. 25. 26. 27. 28. 29. 30. 31. 32. 33. 34. 35. 36. 37. 38. 39. 40. 41. 42. 43. 44. 45. 46. 47. 48. 49. 50. 51. 52. 53. 54. 55. 56. 57. 58. 59. 60. 61. 62. 63. 64. 65. 66. 67. 68. 69. 70. 71. 72. 73. 74. 75. 76. 77. 78. 79. 80. 81. 82. 83. 84. 85. 86. 87. 88. 89. 90. 91. 92. 93. 94. 95. 96. 97. 98. 99. 100. 101. 102. 103. 104. 105. 106. 107. 108. 109. 110. 111. 112. 113. 114. 115. 116. 117. 118. 119. 120. 121. 122. 123. 124. 125. 126. 127. 128. 129. 130. 131. 132. 133. 134. 135. 136. 137. 138. 139. 140. 141. 142. 143. 144. 145. 146. 147. 148. 149. 150. 151. 152. 153. 154. 155. 156. 157. 158. 159. 160. 161. 162. 163. 164. 165. 166. 167. 168. 169. 170. 171. 172. 173. 174. 175. 176. 177. 178. 179. 180. 181. 182. 183. 184. 185. 186. 187. 188. 189. 190. 191. 192. 193. 194. 195. 196. 197. 198. 199. 200. 201. 202. 203. 204. 205. 206. 207. 208. 209. 210. 211. 212. 213. 214. 215. 216. 217. 218. 219. 220. 221. 222. 223. 224. 225. 226. 227. 228. 229. 230. 231. 232. 233. 234. 235. 236. 237. 238. 239. 240. 241. 242. 243. 244. 245. 246. 247. 248. 249. 250. 251. 252. 253. 254. 255. 256. 257. 258. 259. 260. 261. 262. 263. 264. 265. 266. 267. 268. 269. 270. 271. 272. 273. 274. 275. 276. 277. 278. 279. 280. 281. 282. 283. 284. 285. 286. 287. 288. 289. 290. 291. 292. 293. 294. 295. 296. 297. 298. 299. 300. 301. 302. 303. 304. 305. 306. 307. 308. 309. 310. 311. 312. 313. 314. 315. 316. 317. 318. 319. 320. 321. 322. 323. 324. 325. 326. 327. 328. 329. 330. 331. 332. 333. 334. 335. 336. 337. 338. 339. 340. 341. 342. 343. 344. 345. 346. 347. 348. 349. 350. 351. 352. 353. 354. 355. 356. 357. 358. 359. 360. 361. 362. 363. 364. 365. 366. 367. 368. 369. 370. 371. 372. 373. 374. 375. 376. 377. 378. 379. 380. 381. 382. 383. 384. 385. 386. 387. 388. 389. 390. 391. 392. 393. 394. 395. 396. 397. 398. 399. 400. 401. 402. 403. 404. 405. 406. 407. 408. 409. 410. 411. 412. 413. 414. 415. 416. 417. 418. 419. 420. 421. 422. 423. 424. 425. 426. 427. 428. 429. 430. 431. 432. 433. 434. 435. 436. 437. 438. 439. 440. 441. 442. 443. 444. 445. 446. 447. 448. 449. 450. 451. 452. 453. 454. 455. 456. 457. 458. 459. 460. 461. 462. 463. 464. 465. 466. 467. 468. 469. 470. 471. 472. 473. 474. 475. 476. 477. 478. 479. 480. 481. 482. 483. 484. 485. 486. 487. 488. 489. 490. 491. 492. 493. 494. 495. 496. 497. 498. 499. 500. 501. 502. 503. 504. 505. 506. 507. 508. 509. 510. 511. 512. 513. 514. 515. 516. 517. 518. 519. 520. 521. 522. 523. 524. 525. 526. 527. 528. 529. 530. 531. 532. 533. 534. 535. 536. 537. 538. 539. 540. 541. 542. 543. 544. 545. 546. 547. 548. 549. 550. 551. 552. 553. 554. 555. 556. 557. 558. 559. 560. 561. 562. 563. 564. 565. 566. 567. 568. 569. 570. 571. 572. 573. 574. 575. 576. 577. 578. 579. 580. 581. 582. 583. 584. 585. 586. 587. 588. 589. 590. 591. 592. 593. 594. 595. 596. 597. 598. 599. 600. 601. 602. 603. 604. 605. 606. 607. 608. 609. 610. 611. 612. 613. 614. 615. 616. 617. 618. 619. 620. 621. 622. 623. 624. 625. 626. 627. 628. 629. 630. 631. 632. 633. 634. 635. 636. 637. 638. 639. 640. 641. 642. 643. 644. 645. 646. 647. 648. 649. 650. 651. 652. 653. 654. 655. 656. 657. 658. 659. 660. 661. 662. 663. 664. 665. 666. 667. 668. 669. 670. 671. 672. 673. 674. 675. 676. 677. 678. 679. 680. 681. 682. 683. 684. 685. 686. 687. 688. 689. 690. 691. 692. 693. 694. 695. 696. 697. 698. 699. 700. 701. 702. 703. 704. 705. 706. 707. 708. 709. 710. 711. 712. 713. 714. 715. 716. 717. 718. 719. 720. 721. 722. 723. 724. 725. 726. 727. 728. 729. 730. 731. 732. 733. 734. 735. 736. 737. 738. 739. 740. 741. 742. 743. 744. 745. 746. 747. 748. 749. 750. 751. 752. 753. 754. 755. 756. 757. 758. 759. 760. 761. 762. 763. 764. 765. 766. 767. 768. 769. 770. 771. 772. 773. 774. 775. 776. 777. 778. 779. 780. 781. 782. 783. 784. 785. 786. 787. 788. 789. 790. 791. 792. 793. 794. 795. 796. 797. 798. 799. 800. 801. 802. 803. 804. 805. 806. 807. 808. 809. 810. 811. 812. 813. 814. 815. 816. 817. 818. 819. 820. 821. 822. 823. 824. 825. 826. 827. 828. 829. 830. 831. 832. 833. 834. 835. 836. 837. 838. 839. 840. 841. 842. 843. 844. 845. 846. 847. 848. 849. 850. 851. 852. 853. 854. 855. 856. 857. 858. 859. 860. 861. 862. 863. 864. 865. 866. 867. 868. 869. 870. 871. 872. 873. 874. 875. 876. 877. 878. 879. 880. 881. 882. 883. 884. 885. 886. 887. 888. 889. 890. 891. 892. 893. 894. 895. 896. 897. 898. 899. 900. 901. 902. 903. 904. 905. 906. 907. 908. 909. 910. 911. 912. 913. 914. 915. 916. 917. 918. 919. 920. 921. 922. 923. 924. 925. 926. 927. 928. 929. 930. 931. 932. 933. 934. 935. 936. 937. 938. 939. 940. 941. 942. 943. 944. 945. 946. 947. 948. 949. 950. 951. 952. 953. 954. 955. 956. 957. 958. 959. 960. 961. 962. 963. 964. 965. 966. 967. 968. 969. 970. 971. 972. 973. 974. 975. 976. 977. 978. 979. 980. 981. 982. 983. 984. 985. 986. 987. 988. 989. 990. 991. 992. 993. 994. 995. 996. 997. 998. 999. 1000.

## A MONSIEUR DE VILLEROY.

## CVIII.

**M**ONSEIGNEUR, Le fleur d'Embourg Secrétaire de Monsieur de Luxembourg arriva en ceste ville le 14. de ce mois, & me rendit le paquet que vous luy auez baillé pour moy, où estoient les lettres du Roy & vostre du 6. Septembre, avec le Breuet par lequel il a pleu à sa Maiesté me retenir pour l'un de ses Conseillers d'Etat. C'est le plus grand honneur que ie scaurois oncques meriter, & d'autant plus grande aussi est l'obligation que i'en ay à sa Maiesté, & à vous qui m'avez procuré ce bien & honneur, comme tous les autres que i'ay eueus iusques icy, lesquels ie recognoistray toute ma vie de vous, pour vous en rendre toute gratitude & reuerence en mon ame; & tout le tres-humble seruice qui me sera possible, & pour en vser en homme de bien au seruice du Roy & du public, m'assurant que vous estes si genereux, & si amateur de vostre Prince & de vostre patrie, que ceste-cy est la principale recognoissance que vous desirez que ie vous rende de la protection & faueur qu'il vous a tousiours pleu me departir auprès de sa Majesté; & du feu Roy son predecesseur.

La nouvelle du recouurement de la ville d'Amiens, que nous venons de receuoir, a réjoüy tous les gens de bien. De ma part ie ne vous scaurois exprimer la moindre partie de l'aïse que i'en ay receu, pour vne infinité de biens qui en reuiendront au Roy & au Royaume, tant dedans que dehors la France, & pour tant de maux dont nous auons esté preferuez, qui fussent aduenus si le malheur eust porté que ceste place n'eust point esté reprise, comme vous scauez trop mieux. Dieu soit loué; & nous face la grace de faire bien nostre profit de tout cét euenement. Aussi'esperay-ie que nous serons plus vigilans & pouruoyans à l'aduenir; nous representans deuant les yeux que la cent-millesme partie de soin & de la peine que ceste ville a coûté à recouurer, eust suffi pour conseruer & elle & toutes les autres, & que la despense qui a esté faite en ce siege eust basté à fortifier, munir & rendre imprenable a toutes les villes de ceste frontiere-là, & encores d'autres.

Monsieur de Luxembourg est fâché de ce qu'on a retransché à la moitié l'assignation qu'on luy auoit donnée. Il sera bon de luy donner contentement, tant pour le zele qu'il porte au seruice du Roy, & pour ses autres qualitez & merites, que pour la réputation du Roy & de la France, laquelle il ne pourroit soustenir icy, s'il n'auoit de quoy faire la grande despense qu'il luy conuient faire. Atant, &c. Monseigneur, &c. De Rome ce 28. Octobre 1597.

## A M O N S I E U R D E V I L L E R O Y .

## C I X .

**M**ONSEIGNEUR, Hier vint à moy le Pere General des Iesuites, qui est vn personnage tres-honorable de la maison d'Aquaiua, & oncle de Monsieur le Cardinal d'Aquaiua; & m'apporta vn Arrest de la Cour de Parlement, imprimé à Paris, & donné le 21. iour d'Aoust dernier, par lequel est ordonné, que l'Arrest du vingt neufiesme Decembre 1594. contre lesdits Iesuites sera executé selon sa forme & teneur; & en consequence de ce, sont faites inhibitions & defenses à toutes personnes, corps & communautéz des villés; Officiers, & particuliers de quelque qualité & condition qu'ils soient, de receuoir ny de souffrir estre receus aucuns des Prestres ou Escoliers de ceste Société, encores qu'ils ayent renoncé au vœu de profession par eux fait, pour tenir Escoles publiques ou priuees, ou autrement, pour quelque occasion que ce soit. Et sur ledit Arrest, ledit Pere General avec grande modestie, comme il est tres-sage & moderé, me remonstra l'instance que nostre S. Pere auoit fait faire enuers le Roy par Monsieur le Legat, & par autres, à ce que ceux de ceste Société esquels ne tomberoit aucun mauuais soubçon fussent remis en France, pour le fruiet qui en pourroit prouenir à l'Eglise de Dieu, au seruice du Roy, & au bien du Royaume; & maintenant non seulement ne complaire point à sa Sainteté en sa demande, mais tout au contraire ordonner que ledit Arrest de l'année 1594. seroit executé selon sa forme & teneur, estoit chose qui deplairoit grandement à sa Sainteté, & à toutes personnes moderees, & donneroit beaucoup à dire aux ennemis du Roy & de la France; me requerant d'en escrire au Roy, & supplier sa Majesté d'empescher que les choses ne passassent outre. Il me cotta encores, outre la substance dudit Arrest, quelques mots, comme A B I R A T I O N , S E C T E , & certains autres qui luy sembloient estre iniurieux contre ceste Société, & monstra qu'on les traite comme heretiques. Je leus ledit Arrest en sa presence, & puis luy dis; premierement, que i'en estois marry, & que i'eusse voulu qu'il n'eust point esté fait; mais que ie l'asseurois que le Roy n'y auoit aucune part; Que la Cour de Parlement faisoit des Arrests sans en demander congé ny aduis à sa Majesté, & quand le Roy eust esté dans Paris mesme il n'en eust rien sceu auant que ledit Arrest eust esté donné; beaucoup moins l'auoit-il peu sçauoir en estant loing, & en vn siege de telle importance, & ayant vne armée ennemie si pres dont il auoit à se garder. Secondement, qu'encores que cet Arrest donné au mois d'Aoust fust mauuais, & me despleust pour plusieurs raisons, si est-ce qu'il ne s'en falloit pas tant esmerueiller, pour ce que l'Arrest de 1594. estant encores sur pieds, & n'ayant point esté reuocqué, la Cour sur les remonstrances qui venoient de luy estre faites, n'auoit quasi peu faire de moins, que d'ordonner ce qu'elle auoit ordonné; Que tout le mal qui estoit en cecy estoit au

premier Arrest; mais iceluy demeurant en sa force & vigueur, il falloit par vae consequence necessaire que les autres iugemens de ceste Cour s'en ensuiuissent de mesme. Entroisiesme lieu, ie luy dis qu'en ce dernier Arrest ie ne voyois autre mal que la continuation de la rigueur & dureté de la Cour de Parlement enuers eux, mais au reste il n'en viendroit à leur Societé autre dommage : car comme le premier Arrest auoit esté executé au ressort de ce Parlement & non des autres, aussi n'auoit ladite Societé rien plus à perdre au destroit du Parlement de Paris; & les autres Parlemens obeïroient encores moins à ce second Arrest qu'ils n'auoient fait au premier. Et iagoit que parmy les autres Parlemens il y en pouuoit auoir qui n'aimoient gueres ceste Societé, si est-ce qu'ils ne feroient rien contre elle, pour ne donner à penser au monde que le Parlement de Paris eust quelque pouuoir & autorité sur eux; & à ce propos ie luy promis d'en escrire comme il desiroit.

Quand aux mots plus picquants qu'il m'auoit cottez, ie luy dis que de personnes mal persuadees d'eux, & irritees contr'eux, il n'en falloit point attendre paroles douces; & neantmoins que le mot de S e c r e t n'estoit point en l'Arrest de la Cour, mais seulement en la remonstrance à elle faite par le Procureur general. Et pour conclusion de mon dire, ie le priay de ne laisser pas de bien esperer pour ce dernier Arrest, adioustant que le Roy estoit doux & clement, & sans aucun fiel, & sans aucun desir de vengeance, enuers ceux-là mesme qui luy auoient fait le pis qu'ils auoient peu, comme il se voyoit en tout le cours de sa vie, & partous ses deportemens; Que la nation Françoisé aussi en general ne tenoit point son cœur si longuement comme l'on fait par deça, & en Espagne, & en quelques autres nations; Qu'ils estoient ia desitez d'une grande partie de la France; Qu'aussi depuis l'absolution du Roy, les causes de desiance qu'on auoit d'eux, estoient cessees; Que i'esperois de les voir vn iour consolez tous, & remis en leur premier estat: cependant ie louois la moderation dudit Pere General, & de ses Religieux, le priant d'y perseverer, & se garder d'aigrir les matieres auprès du Pape & des Seigneurs de ce College; Que ceste moderation & patience estoit non seulement tres-seante à gens de leur profession, mais aussi le vray moyen pour venir à bout de leur intention, & degaigner le cœur du Roy & de tous les François; Qu'il ne falloit s'esmerveiller s'ils n'auoient si tost obtenu ce qu'ils desiroient, les choses estans encores creuës & vertes; Que i'auois moy-mesme dit au Pape, quand sa Sainteté m'auoit autresfois parlé de leur r'appel, que la chose n'estoit encores meure, & qu'il estoit meilleur de differer ceste instance, iusques à ce que Monsieur le Legat auroit obtenues les choses qui estoient d'obligation, & qui auoient esté promises lors de l'absolution du Roy; Que si la paix, dont on parloit tant par Rome & ailleurs, se faisoit, cela leur aideroit beaucoup, d'autant que ceux qui les auoient accusez de fauoriser aux Espagnols, ne pourroient plus se seruir si bien de ce pretexte pour les reculer & tirer loing. Et sur ce propos nous nous mismes à parler de la paix, & des grands biens qu'elle apportoit, & d'autres choses de la France; & ainsi peu à peu nous nous esloignasmes du premier propos trop melancolique & facheux, tant que ledit Pere General me sembla tout consolé; & mesme d'auant

que sur la fin, comme il s'en vouloit aller, ie luy promis de nouueau d'escrire, & l'asseuray derechef que pour ce dernier Arrest ils n'auroient point plus que ce qu'ils auoient eu iusques icy, & que nuls de ses Religieux, qui estoient demeurez és ressorts des autres Parlemens, ne seroient point contrains de partir, & que toutes choses demeureroient en l'estat auquel elles estoient auant ce dernier Arrest.

Aussi vous assurey-ie qu'on ne scauroit faire pis par delà pour le seruice du Roy, quant aux choses de Rome, & particulierement quant à la bonne grace & amitié que sa Majesté doit attendre du Pape, que si maintenant apres vn si long temps on vouloit chasser ceux qui sont demeurez iusques icy; car cela irriteroit infiniment la Sainteté, & toute ceste Cour, & leur osteroit toute bonne esperance des choses de France, & donneroit grand aduantage aux ennemis du Roy & de son Royaume. De remettre ou ne remettre point les Iesuites au ressort du Parlement de Paris, & autres lieux dont ils furent chassez en vertu du 1. Arrest, ie ne vous en parle point; ie m'en remets à tout ce qu'il vous plaira en faire, combien que i'en aye deubé parler audit Pere General, & à tous ceux de par deça de la façon que i'ay fait, & luy en donner esperance, afin de les conuertir tousiours, & les garder de faire & dire pis; & serois d'aduis que par delà vous en parlassiez de mesme, leur donnant esperance, & à Monsieur le Legat semblablement, qu'ils seront vn iour remis; mais vous excusant sur ce qu'il n'est pas encore temps, & que la Cour de Parlement n'y consentiroit pointencores. Mais vous ne deuez permettre en sorte du monde que ceux qui sont demeurez iusques icy, soient chassez apres vn si long temps, auquel le Pape demande & espere que ceux qui furent autrefois chassez soient remis.

Ce matin i'ay esté chez Monsieur de Luxembourg, comme i'y vois tous les matins pour scauoir s'il a rien à me commander pour le seruice du Roy, & pour le sien particulier, & luy ay monstré & leu ledit arrest que ledit Pere-General m'auoit laissé, & luy ay dit aussi tout ce que ledit Pere General m'auoit remonstré, & ce que ie luy auois respondu, afin que si le Pape luy en parloiten sa prochaine audience de demain, comme il pourra faire, & Messieurs ses neueux, il fut préparé pour la responce, & pour mettre le Roy hors de presse, & monstrer que ce n'est pas vn si grand mal comme il semble de prime-face, & que pour cela les choses n'en passeroient point outre, & ceste Societé n'en aura point pis qu' auparauant, A tant, &c. Monseigneur, &c. De Rome ce 23. d'Octobre 1597.

---

### A MONSIEUR DE VILLEROY.

CX.

**M**ONSEIGNEUR, Il vous pourra souuenir comme ie vous ay mescrit autresfois que le Pape m'auoit commandé d'escrire au Roy, que sa Sainteté le prioit de vouloir maintenir l'union jadis faite, & par la dite Sainteté confirmée du Monastere de l'Isle de Lernis en Prouence à la Congregation du Mont-Cassin de l'Ordre de saint Benoist,

& que se faisant, la Sainteté se contentoit que ledit Monastere fust compris au Roy pour vn de ceux que sa Maiesté devoit faire bastir, & qu'elle fust deschargée d'autant. A quoy sa Maiesté me respondit, qu'elle auoit ordonné aux Seigneurs de son Conseil de voir de donner contentement aux Religieux qui poursuuoient la conseruation de ladite vnion. Ce que ie feray au Pape, dont la Sainteté fut tres-aïse; & les Religieux de ladite Congregation conceurent dès lors esperance certaine de toute bonne issuë de cét affaire. Maintenant ils disent que nonobstant tout cela, & que pour se redimer de vexations ils ayent en outre voulu bailler vne grosse pension à vn certain gentil-homme qui pretend auoir obtenu don de ladite Abbaye, neantmoins ils n'ont encores peu auoir iustice, & m'ont requis de vous en escrire à leur recommandation. A quoy ie n'ay pû manquer, tant pour y estre ja engagé par la susdite negociation passée, que pour ce qu'il me semble qu'il n'y a que trop de raisons pour les consoler & contenter. L'vnion qu'ils desirent estre conseruee fut faite par le Pape Leon X. & par le consentement & à la Requeste du Roy François premier, & de l'Abbé Commendataire qui lors estoit en l'an 1515. auant la nomination accordée des Eueschez, & Abbayes & Prieurez electifs par le saint Siege à nos Roys. La mesme vnion a esté confirmée, encores qu'il n'en fust point de besoin, par les Roys Henry II. & Charles IX. Le Pape d'à present l'a encores confirmée, & desire, & prie le Roy que sa Maiesté maintienne les Religieux en leur droit d'vnion. Et encores qu'en cela la Maiesté ne fera que iustice, neantmoins la Sainteté veut recompenser ceste iustice, en comptant à sa Maiesté ce Monastere pour vn de ceux qu'elle doit faire bastir, & la deschargeant d'autant. Dauantage, les Religieux sont reformez, & Dieu sera mieux seruy audit Monastere en ceste façon qu'en l'autre. De plus, ces pauvres gens se saignent eux-mesmes, & contrainsts par maniere de dire d'acheter le leur, condescendant à donner vne grosse pension à celuy qui les moleste, & qui n'a rien audit Monastere, qui estant vny n'estoit plus impetrable. Si avec & apres toutes ces choses, ces pauvres Religieux ne pouuoient obtenir vne chose si iuste, outre que nous ferions chose indigne de nous, cela nous donneroit vn mauuais nom par deça, & ailleurs, & le Pape qui les voit & les oyt volontiers & souuent, en receuroit grand déplaisir, non seulement pour se voir refusé d'une chose si raisonnable, qu'il offre neantmoins de recompenser, mais encores beaucoup plus pour vne certaine défiance, & quasi desespoir qui luy entreroit en l'ame de voir iamais les choses de la Religion Catholique, & mesmement des Prelatures, en quelque estat tolerable en France. De façon que ie croy qu'en faisant iustice à ces Religieux, nous ferons plus pour nous-mesmes que pour eux. Aussi m'affeuray-ie que si vous en estiez creu; ils l'auroient long-temps y a. Et ne vous escriis point cela pour opinion que i'aye qu'il en soit besoin pour vostre regard, mais requis par ces bonnes gens, qui desirent qu'il vous plaise aider à ce que les autres qui peuuent quelque chose en cét affaire ayent la mesme disposition & inclination que vous, ou pour le moins qu'ils souffrēt que la iustice aye lieu en chose si raisonnable, & qui importe tant à nostre reputation, & particulièrement enuers la personne de nostre S. Pere le Pape duquel nous auons tant de besoin, & obtenons tous les iours tant de graces, A tant, &c. Monseigneur, &c. De Rome ce 24. d'Octobre 1597.

## A MONSIEUR DE VILLEROY.

## CXI.

**M**ONSEIGNEUR, Valerio arriva icy le 28. d'Octobre, & l'eus par luy la lettre qu'il vous pleut m'escire de Pas en Artois le 6. dudix mois, en laquelle i'ay trouué responce à ce que ie vous auois eserit par cy-deuant touchant Monsieur Camajano, le sieur Marco Celleni, le Comte Hercule Tassone, Monsieur d'Ambrun, & le sieur Iacobo Vernaro; desquelles responses ie vous remercie tres-humblement, & les ay fait sçauoir à ceux à qui elles touchent, & rendu à Monsieur Camajano la lettre que le Roy luy a escrete, n'ayant point receu la vostre, dont vous m'escruez l'auoir accompagnée. Aussi vous remerciay-je de toute mon affection de la tres-bonne lettre du Roy qu'il vous a pleu faire en ma faueur au Procureur general de sa Majesté au Parlement de Rennes, & de la copie qu'il vous a pleu de m'en enuoyer. Au demeurant, pour ce que ie vous escriuis naguères par le dernier ordinaire, & que Monsieur de Luxembourg escrit amplement de toutes choses de deça, ie ne vous feray ceste-cy plus longue que pour prier Dieu, &c.

Le porteur de la presente sera le mesme Valerio, auquel plusieurs Courriers & Maistres d'iceux portent enuie de la charge qu'il a prise de faire tenir les dépesches du Roy. Toutesfois i'espère que sa Majesté en sera bien seruie, & que vous en receurez tout contentement, & mesme d'autant qu'il fait bonne responce, & a offert prompt remede à tout ce que nous luy auons eueu objecter sur la seureté desdites dépesches. De Rome ce 10. Novembre 1597.

## A V R O Y.

## CVII.

**SIRE,**

Nostre S. Pere enuoye vers vostre Majesté le Seigneur Dom Pietro Orsino Euesque d'Auersa pour vous informer de la deuolution du Duché de Ferrare au S. Siege, & de la resolution qu'il a prise là dessus, afin de recouurer ce qui luy appartient, & pour vous prier de ce que sa Sainteté a estimé estre à propos sur cette occurrence. Chacun s'attend que vostre Majesté recevra ce Prelat conuenablement à la dignité du Pape qui l'enuoye, & à l'occasion pour laquelle il est enuoyé, & à la courtoisie & benignité qui a toujours reluit es Roys de France par dessus les autres Roys de la Chrestienté, & à la particuliere deuotion qu'ils ont toujours monstré vers le S.

Siege. Mais ie ne dois obmettre, que celui qui est enuoyé merite encores de luy mesmes quelque honneur particulier, pour estre non seulement Prelat ancien & tres-digne, mais aussi tres-noble, & de la tres-illustre maison des Vrsins, fils, frere, & oncle du Duc de Graignes au Royaume de Naples: & me suffira d'auoir en peu de mots dit ses qualitez, sans presumer d'y adiouter aucune recommandation; & mesmes d'autant que ie sçay que les susdites vertus, & courtoisie & benignité enuers tous, & deuotion vers le saint Siege, qui ont esté comme propres à nos Roys, sont encore plus eminentes & en plus haut degré en la personne de vostre Maiesté, laquelle ie prie Dieu, &c. SIR E, &c. De Rome ce 24. Nouembre 1597.

## A MONSIEVR DE VILLEROY.

CXIII.

MONSEIGNEVR, Le Seigneur Dom Pietro Orsino Euesque d'Auerfa qui vous rendra la presente, est enuoyé au Roy, & par le Pape, & pour affaire tres-grand & tres-fauorable. Il est d'ailleurs Prelat ancien & tres-digne, & d'une des plus nobles & illustres maisons d'Italie, laquelle mesme est renommee pour auoir es guerres passees adheré au saint Siege & à la Couronne de France contre les ennemis de l'un & de l'autre. Par ainsi il me semble que ce seroit vne grande indiscretion à moy de le recommander à vous, qui sçaez mieux que tout autre ce que lefdites circonstances importent & requierent, & qui auez l'ame dressée & accoustumee à tout ce qui concerne le seruice du Roy, & la reputation de la Couronne, & le bien du Royaume, & l'honneur & contentement de tous les honnestes hommes qui ont affaire en Cour, & particulièrement des ministres des Princes estrangers, qui y ont des affaires fauorables à traiter. Ceste-cy ne sera donc que pour accompagner ce Seigneur d'une mienne comme il a désiré, & comme c'est de mon deuoir de luy faire tout agreable & tres-humble seruice. A tant, &c. Monseigneur, &c. De Rome ce 25. Nouembre 1597.

## A V R O Y.

CXIV.

SIRE,

Le courrier Valerio arriva en ceste ville Dimanche au soir quatorzième de ce mois, & ie receus par luy le lendemain au matin la vostre qu'il pleust à vostre Maiesté m'escire le vingt neuvième Nouembre, par laquelle il m'est commandé de vous escire confidemment & librement mon aduis sur ceste guerre de Ferrare, & entre autres choses si i'estime qu'elle soit pour durer,



ou pour finir bien tost par quelque accord; qu'elle est l'inclination en general & en particulier des Princes & Potentats d'Italie sur ladite guerre; qu'elle vultitude vostre Maïesté en peut tirer, & par quel moyen avec tout ce qui vous deura estre représenté sur ce suiet pour vostre seruice. A quoy iacoit qu'il ait esté desja satisfait par les lettres que vous a ey-deuant escrites Monsieur de Luxembourg, qui est tres-fidele, & tres-diligent à vostre seruice, ce nonobstant pour obeyr au commandement de vostre Maïesté, ie vous en escriray ce que i'en ay appris, & que Dieu m'en inspirera.

Premierement doncques, ie n'estime point que ceste guerre soit pour se terminer par accord, au moins du viuant du Pape, si le Seigneur Dom Cesare d'Este ne quitte la ville & Duché de Ferrare au saint Siege: car nostre S. Pere l'a ainsi dit & protesté plusieurs fois en diuerses congregations de Cardinaux, & parlant aux Ambassadeurs des Princes, & à d'autres personnes de grande qualité, iusques à dire qu'il y mettroit iusques au dernier calice des Eglises, & mesmes qu'il iroit mourir aux fosses de ladite ville de Ferrare avec le saint Sacrement entre ses mains. Et tous les Cardinaux de commune voix l'en ont loué, & l'y ont encouragé & conforté, & en sont venus si auant qu'ils disent eux-mesmes ne pouoir plus donner iamais aucune inuestiture audit Seigneur Dom Cesare, ny faire aucun accord avec luy sans la restitution de ladite ville du Duché de Ferrare. Aussi pensent-ils auoir raison d'en vser ainsi, tant pour la iustice qu'ils estiment estre claire de leur costé, que pour la reputation du S. Siege & du Pape, & de tout le College, & pour la consequence qui est telle, que s'ils s'accommodoient à ceste usurpation que vent faire ledit Seigneur Dom Cesare d'Este, & n'employoient le verd & sec pour r'auoir le Duché deuolu au S. Siege, d'autres voudroient non seulement en faire autant pour le Duché d'Vrbain, qui est le plus prest à retourner au S. Siege, & de celui de Parme & de Plaisance, & des Royaumes de Naples & de Sicile, quand telles reuersions & ouuvertures de siefs escheroient, mais aussi presumeroient d'oster au S. Siege ce qu'il a déjà en sa main & possède paisiblement. Par ainsi ie croy que le S. Siege n'est réintégré en ce qui luy appartient, il ne se fera aucun accord, si ce n'estoit apres quelques années que chacun crieroit à la faim, & qu'on auroit expérimenté les autres miseres & calamitez de la guerre, dont on n'a rien senty en ce pays long-téps; y a; comme vostre Maïesté sçait, que quelque resolution qu'on aye faite, on y persiste, ou s'en depart avec le temps, selon que les choses s'addonnent, & que le bon-heur dit, ou que la necessité presse.

Quant à l'inclination des Princes d'Italie en general, vostre Maïesté sçait la jaloussie qui a accoustumé de regner parmy les Princes. A grand peine s'en trouue t'il vn à qui plaise l'accroissement de son voisin, si ce n'est que ce qui accroist à l'un, tourne à la diminution d'un autre plus grand, duquel on soit encores plus jaloux. Ceste jaloussie & enuie possède principalement les Princes d'Italie, & sur tout la pluspart ne voudroient point que le Pape s'agrandist plus au temporel, & disent qu'il est souverain au spirituel pas toute la Chrestienté, & que par le moyen de la puissance spirituelle, & des censures Ecclesiastiques, avec son estole seulement, sans autres armes temporelles, il a rangé d'autres fois d'autres grands Princes, Roys & Empereurs. Plus qu'il n'a que ne sont tous les Princes d'Italie à present ensemble, & craignent

estaignent que si à la souveraine puissance spirituelle, qu'ils disent estre déjà formidable, s'adjoint vne insigne puissance temporelle, comme il se pourra faire avec le temps par le moyen de tant de reuersions de siefs que le S. Siege peut esperer, ils ne puissent plus resister au Pape quand il se voudra prendre à eux. Confessent neantmoins que la plus-part des Papes sont bons & saints: mais adioustent qu'il s'en trouue quelquesfois qui ont de l'homme; & à ce propos rememorent les guerres particulieres que quelques Papes ont eues autresfois avec diuers Princes & Republiques d'Italie. Disent de plus qu'il ne manquera iamais occasion ny matiere de differens entre les Papes & les Princes d'Italie, quand ce ne seroit que pour la iurisdiction Ecclesiastique, à raison de laquelle le Pape se plaint ordinairement de tous, & aujourdhuy principalement des Espagnols au Duché de Milan, & encores plus aux Royaumes de Naples & de Sicile.

Aussi pour venir au particulier desdits Princes; c'est le Roy d'Espagne qui seroit le plus marry que le Pape. s'accroist au temporel, seachant en sa conscience, que comme il tient le plus beau & le meilleur d'Italie, & confine particulièrement avec l'Estat Ecclesiastique, aussi est ce luy qui fait tous les iours plus de tort au saint Siege, tant en la iurisdiction, qu'en autres droicts Ecclesiastiques. C'est luy encores qui seul de tous les Princes estrangers, a pour le iourd'huy des Estats en Italie, & de qui les Italiens endurent mal volontiers la domination & le voisinage, & craint particulièrement la grandeur temporelle du Pape, qui sur tous autres peut moyenner son abbaissment, & la liberté d'Italie que les Espagnols oppriment, comme ont autrefois voulu faire quelques Papes, & d'assez fresche memoire Paul & Pie quatriesmes, & Sixte-cinquiesme s'il eust vescu plus longuement. Aussi le Seigneur Don Cesare d'Este le demande au Pape pour iuge, & prie sa Sainteté de se remettre de leur different à sa Maiesté Archieuescopolique.

Après le Roy d'Espagne, les Venitiens, à mon aduis, sont ceux qui moins voudroient que le Duché de Ferrare retournast au saint Siege, tant pource qu'ils sont des plus sages mondains, & des plus jaloux de leur Estat, & regardans de plus pres à tout ce qui leur peut profter ou nuire de pres & loin, qu'aussi pource qu'ils aimeroient mieux pour voisin vn simple Duc de Ferrare, qu'un Pape Duc de Ferrare, & Seigneur de tant d'autres Estats. Il y a encores vn autre interest particulier qui les pousse; c'est qu'ils ont usurpé autresfois sur les Ducs de Ferrare, & tiennent encores aujourdhuy le Comté de Rouigo, & quelques autres terres qu'on dit deuoir retourner au saint Siege ensemble avec ledit Duché de Ferrare. De façon que si la dernière reversion s'effectuë pour le regard dudit Duché, ils ne se pourroient empêcher d'en excuser de restituer aussi à l'Eglise ce qu'ils en detiennent.

Le grand Duc redoute autant ou plus l'accroissement & agrandissement du saint Siege que nul autre Prince d'Italie, pource qu'il ne confine pas seulement avec le saint Siege, mais a quasi tout son Estat enclaué dans les terres de l'Eglise. Et outre que le Duché de Florence n'est pas si ancien que les memoires des Republiques de Florence & de Sienne soit encores effacés de l'esprit de plusieurs, ny possible du Pape mesme, & qu'il y

en a qui remarquent certaine deffiance entre ces deux Princes voisins, le sainct Siege a pretention sur quelque lieu del'Estat de Toscane, desquels le Borgo san Sepolcro en est vn. D'ailleurs, le Seigneur Dom Cesare d'Este a pour femme vne sœur dudit grand Duc, & a desia des enfans de ce mariage, qui sont neveux dudit grand Duc: de façon qu'encores pour ce respect, plusieurs croyent qu'il veuille plustost le Duché de Ferrare pour son beau frere & pour les neveux, que pour les Papes.

Le Duc de Mantouë cōsine avec le Duché de Ferrare, & à alliance avec la maison d'Este, avec ledit grand Duc, sa sœur ayant esté femme, & estant demeuree veufue du deraier Duc de Ferrare, & luy-mesme ayant pour femme vne niece dudit grand Duc. Sa mere en outre estoit de la maison d'Autriche, tante de l'Empereur, & cousine germaine du Roy d'Espagne: toutesfois on m'a asseuré qu'il s'est offert au Pape contre Dom Cesare, & qu'il a ja attenté de surprendre vne place du Duché de Ferrare appelée Bressel; sur les confins du Duché de Mantouë. Aussi, outre qu'il y pourroit auoir d'autres choses & pretentions, le feu Duc de Ferrare n'a laissé à ladite veufue sœur du Duc de Mantouë que quatre mille escus par an durant la vie d'icelle veufue.

Le Comte de Mirande est voisin de Ferrare & de Mantouë, & a pour femme vne sœur dudit Seigneur Dom Cesare, & y en a qui disent qu'il s'est ia déclaré pour luy: mais il n'est vray-semblable qu'il se soit tant hasté, puis qu'il y pourra estre à temps, & qu'il attend des graces du sainct Siege, & de la personne de ce Pape mesme, tant pour soy que pour le Seigneur Alexandre son frere; & viens d'entendre tout maintenant qu'il a fait déclarer au Pape vouloir estre neutre.

Le Duc de Parme, & de Plaifance n'a point de volonté que celle du Roy d'Espagne, & d'ailleurs confinant avec l'Estat de Ferrare, ne voudroit auoir le Pape son Seigneur direct si prés; & mesmes qu'il peut auoir ouy dire que le Pape Iules troisieme, sans attendre autre ouuerture de fief, voulut retirer à soy Parme & Plaifance, & les oster au Duc Octauius ayeul de cestuy-cy. Et, comme le monde est fait, se souuiendra beaucoup mieux de cela, que son pere & son dit ayeul ne se sont souuenus de ceux qui les defendirent & protegerent en leur grand besoin & nécessité.

Du Duc de Saouye ie ne sçay qu'en dire, aussi ne sçait-il pas possible luy mesme à quoy il en est, tant il a d'affaires chez luy. Si n'estoit la discipline que vostre Maiesté luy fist donner par Monsieur de Lesdiguières, ie penserois qu'il auroit si bonne opinion de soy, qu'il ne se soucieroit pas beaucoup qui auroit Ferrare, & penseroit la pouuoir oster à qui que ce fut, aussi bien, comme il osa prendre le Marquisat de Saluzzes sur vn Roy de France, lors mesme qu'il tenoit les estats de son Royaume, montrant son Altesse par là, qu'elle n'estimoit pas vn bouton sa Maiesté Tres-Chrestienne, & toute la France ensemble, dont le chastiment & l'exemple a esté par la providence de Dieu reserué à la valeur & bon-heur de vostre Maiesté.

Ie ne parleray point icy du Duc d'Vrbain, pource qu'encores que le Seigneur Dom Cesare soit son neveu fils d'une sienne sœur, & que ledit Duc ait pour femme vne sœur du feu Duc de Ferrare, toutesfois pour la diuine qui est si long temps y a entre luy & sa femme, cette alliance a pluost

causé diminution qu'accroissement d'amitié & de bonne intelligence entre ces deux maisons. Et luy se voyant le dernier de sa race, & qu'après luy son Duché reuiert au saint Siege, il s'est plus adonné à l'estude & à la contemplation, qu'à l'action, & semble qu'il ne pense plus qu'à paracheuer sa vie doucement. Cependant i'ay sçeu de bon lieu, qu'en la responce qu'il a faite aux lettres que Dom Cesare luy escriuit apres la mort du dernier Duc de Ferrare, il ne luy a point donné de l'Altesse, ny qualité de Duc de Ferrare: aussi est-il trop près de son Seigneur direct, pour oser luy faire preiudice quand bien il voudroit.

Je ne parle non plus de la Seigneurie de Gennes, pour ce que outre que sa puissance n'est pas fort grande, elle est composee de gens qui sont plus soigneux de leur particulier que du public, & qui estans interressez avec le Roy d'Espagne, ont occasion partie de le craindre, & de ne faire chose qui luy desplaise, partie, aussi pour les torts qu'il leur fait, de desirer la grandeur & accroissement de ceux qui le peuvent raualler, & leur aider à auoir raison de luy, & à se deliurer de sa tyrannie: & aussi monstrent-ils de fauoriser aucunement aux desirs de sa Sainteté.

Luques est si peu de chose qu'elle ne peut estre mise en grande consideration, & a crainte de tous ses voisins, & les mauuais traitemens qu'elle a receus du Duc de Ferrare en leurs confins, ne luy laissent aucunement occasion de craindre d'empirer par le voisinage de l'Eglise. En somme, tout ce qui est de plus fort & de plus puissant en Italie defauorise le Pape: bien est vray que ce peu qui par deuotion ou par autre respect sera pour la Sainteté, le fera à decouuert, mais ceux qui fauoriseront Dom Cesare (i'entens des Princes Italiens) ne s'en oseront descouvrir si ce n'estoit les Veniciens pour la reuerence du saint Siege, & de la iustice de sa cause, & pour crainte de l'excommunication. Et en fait de guerre ouuerte, vostre Majesté n'a que trop expérimenté elle mesme, que les amis couverts qui n'osent ou ne veulent ayder d'hommes ny d'argent, ne seruēt pas beaucoup. Au demeurant vostre Majesté pour estre vn si grand & si puissant Roy, & pour auoir son Royaume loin du saint Siege, & ne posseder auioird'huy rien en Italie, n'est point sujette à toutes les considerations, tant generales que particulieres, qui donnent scrupule & crainte à ces Princes d'Italie, & sans redouter ce qui pourroit aduenir d'icy à mille ans, peut hardiment regarder, & s'appliquer à l'vtilité presente ou prochaine.

Le viens doncques au troisieme point, touchant l'vtilité que vostre Majesté peut tirer de ceste guerre. Premièrement, il semble que ladite guerre sans y inain mettre tournera aucunement au soulagement de vos affaires & de vostre Royaume, pource que le Roy d'Espagne, qui est merueilleusement jaloux de ses Estats d'Italie, n'en pourra plus tirer d'hommes pour les envoyer aux Pays bas contre vostre Majesté & la France, ny en Espagne pour ce desfendre de ceux qui l'y assaillent, & faudra encors qu'il se mette en nouuelle despenſe pour leuer gens & les tenir armez en sesdits Estats d'Italie, pour la defenced'iceux & en tout auenement, comme il s'y en leuedra. Aussi pourra le grand Duc par ceste guerre estre plus retenu en ses entreprises du Chasteau d'Is & de l'Isle de Pomegues, & le Duc de Sanoye sera encors ceste affaire de plus, comme tous les Princes d'Italie en cet-

te occasion ont besoin de faire quelques preparatifs & depenses , pour pouruoir à ce qu'il pourroit aduenir : outre qu'il ne se peut faire vne guerre en Italie, qu'elle ne serue tousiours de quelque diuersion & decharge à celle de France. Que s'il aduient que vostre Maiesté soit requise de secourir le saint Siege , elle aura encores moyen de décharger son Royaume de plusieurs gens qui poissent à la France, n'y pouuans demeurer en repos , n'y y laisser les autres ; & sans vous desnuier de vos meilleurs & plus fidelles seruiteurs , n'y vous priuer des moyés de faire par delà quelque bone entreprise, tirer la guerre loin en vn pays où pour ceste heure vostre Maiesté n'a que perdre, & y peut gagner selon que les occasions s'en presenteront , & selon les ouuertures que le temps , & le succez des choses pourra faire. Aussi l'obligation que vostre Maiesté acquerra sur le saint Siege pour vn bien fait si signalé, ne luy peut tourner qu'à grand profit : car outre que par ce moyen on ne vous imputera point certaines choses, qui de leur nature sont tres-deplaisâtes à ceste Cour, & qu'on croira la verité, que c'est là necessité du temps qui les extorque contre vostre gré , ce secours donné si à propos, & par vostre Maiesté seule , donnera encores au Pape & à tout le College des Cardinaux vn grand desir des'en reuâcher, & de faire tout ce qui pourra tourner au bien & exaltation de vostre Maiesté. Outre que ce sera vn grand moyen de tirer des grates de sa Sainteté , & de rehausser à Rome les fleurs de Lys , & y remettre sus le party de France , non seulement pour le reste de vostre vie, mais aussi pour vos successeurs.

Mais la reputation & gloire que vostre Maiesté en rapportera , est ce qui plus importe à vn Roy si genereux & magnanime : aussi est-ce de là que viennent puis apres tous les vray profits & vtilitez qu'un Prince peut desirer. Il ne se pourroit exprimer combien de bien veillance , ny combien de loüanges & benedictions de toutes sortes de gens , grands & petits , & moyens, vous a déjà acquis la seule offre que vostre Maiesté a commandé à Monsieur de Luxembourg de faire à nostre saint Pere. Il ne se parle d'autre chose à Rome , & semble que les forces du saint Siege en soient multipliees , & celles de Dom Cesare raualees. L'execution de ceste offre, quand elle sera acceptee, renouellera en la personne de vostre Maiesté les beaux exemples, & la gloire des anciens Roys de France ; qui iadis employeroient leurs armes & leur puissance, non à l'oppression des autres Princes, & des patures peuples, comme font aujourd'huy les Espagnols ; mais à la protection de la iustice pres & loing, & particulierement à la deffense & amplification du saint Siege. Comme sans aller plus loing , le fait de Ferrare mesme, dont il est question ; nous en fait souuenir ; laquelle ville faisant partie de l'Exarcate de Ravenne, depuis appellé Romaigne , que le Roy Pepin en l'an de nostre Seigneur 755. donna au saint Siege, apres auoir pour la seconde fois passé les monts avec armes pour la defense d'iceluy, & pour remettre le Pape en son throsne dans la ville de Rome, dont il auoit esté dechassé par les Lombards : & est ceste donation le premier titre & droit que le saint Siege eut iamais en Ferrare, & en toute la Romaigne. Laquelle donation faite par Pepin, fut depuis confirmée par Charlemagne son fils, estant à Rome , en l'an 773. & depuis par le Roy Louys Debonnaire fils de Charlemagne, en l'an 817. De façon qu'en prestant se-

cours au Pape pour Ferrare, vostre Maïesté aura conserué & reconuté au S. Siege le bien que vos predecesseurs luy ont fait autresfois. Ce qui fera encores creuer de dépit tous vos ennemis, & particulièrement lesdits Espagnols, non seulement pour l'enuie & jalousie qu'ils auront de voir par vostre Maïesté deslendu & accru le S. Siege, qu'ils ont tousiours oppugné, & cherché de diminuer, mais aussi pour se voir si apertement démentis de leurs calomnies, en ce qu'ils disoient auant l'absolution, qu'après que vous l'aurez obtenüe, le S. Siege & l'Eglise n'auroit point vn pire ennemy que vostre Maïesté. Resteront qu'après auoir respondu aux trois poincts spécifiés par vostre lettre, i'adioussasse d'autres choses appartenantes à ce sujet, & mesme le fait & le droit de tout ce different de Ferrare, ce qui seroit aussi moins esloigné de ma profession. Mais pource que ie n'ay pû encores voir les inuestitures, & autres documens où le fait s'apprend au vray, & dont le droit dépend, & que vostre Maïesté entendra les prentions & raisons des parties, par ceux qui vous seront enuoyez de part & d'autre, ie differeray ce point, iusques à ce que i'auray veu lesdits esclritures & enseignemens. Cependant pour n'ouyr icy personne qui doute du bon droit du Pape, & pour le voir luy qui est tres-iuste, paisible, moderé, & retenu, si resolu & si prompt & aspre à ceste guerre, i'estime que la iustice soit de son costé. Dequoy, & d'autres choses que i'apprendray sur ceste matiere, i'escriray cy-apres à vostre Maïesté, Dieu aydant, lequel ie prie qu'il vous donne, S I R E, &c. De Rome ce 20. Decembre 1597.

## A MONSIEUR DE VILLEROY.

C X V.

**M**ONSEIGNEUR, Ceste-cy ne sera que pour accompagner vn duplicata que ie fais au Roy par cet ordinaire, d'une lettre que i'escriuis à sa Maïesté le 20. de ce mois, par la voye qu'a dressée le courier Valerio; aussi n'est suruenü depuis chose qui me fournisse de matiere, sinon que l'excommunication, anathematisation, & malediction du seigneur Dom Cesare d'Este, qui fut faite, publiee, & solemnisee le Lundy 22. de ce mois: mais Monsieur de Luxembourg en-escriit si amplement, qu'il ne s'y peut rien adiouster. Aussi enuoye-t'il la copie imprimee de la Bulle de ceste fulmination. Ie ne doute point que la rigueur des clauses qui y sont, ne donne occasion à la comuoitise d'aucuns de demander au Roy les biens que le feu Duc de Ferrare laissa dernièrement par son testament audit Seigneur Dom Cesare en France, & voudroient eux en tirer le profit, & laisser à la Couronne & au Royaume le preiudice d'un tel exemple, & à sa Maïesté le blasme & le deshonneur. Mais ie m'asseure d'autre part que sa Maïesté en considerera l'importance près & loïn, & vous aussi avec ses autres bons Conseillers; & partant ie n'en diray autre chose, ains feray fin de la presente, en priant Dieu qu'il vous donne, Monseigneur, &c. De Rome ce 29. Decembre 1597.

*Fin du troisieme Livre.*

# LIVRE QUATRIESME.

ANNEE M. D. XCVIII.

A MONSIEVR DE VILLEROY.

CXVI.



MONSIEUR, Par la dépesche que Monsieur de Luxembourg vous a faite, vous verrez comme l'affaire de Ferrare s'est accommodee, le seigneur Dom Cesare d'Este ayant condescendu à quitter au S. Siege le Duché de Ferrare. Vous aurez occasion de ne vous émerveiller par delà de ce que cela s'est fait si tost & aussi y en a s'il y a qui s'en émerveillent icy mesme, & peu de gens l'esperoient. Mais outre que Dieu a beny la bonne cause, & les saintes intentions de nostre saint Père, & a disposé le cœur de cet autre Prince, il s'en peut encores remarquer des causes secondes : comme du costé du Pape, outre les moyens & l'autorité du saint Siege, qui est grande en Italie, & qui en ce fait a esté grandement augmentee par l'offre du Roy, laquelle a donné grande reputation & vigueur aux affaires du S. Siege, & l'a diminué à ceux de Dom Cesare, & contenu en office les Princes d'Italie qui luy fauorisoient; nous pouvons noter pour vne grande cause la resolution & promptitude de la Sainteté, qui dès le commencement ne s'est iamais laissée donner paroles, & n'a laissé mettre la chose en dispute, ny en aucune longueur, ains tout aussi tost qu'il eut entendu la mort du feu Duc de Ferrare; & que Dom Cesare s'estoit fait eslire & couronner Duc, se mit à leuer gens de guerre, & amasse en moins de deux mois environ seize mille hommes, & apres les procédures prealables, vint incontinent à fulminer l'excommunication: Et du costé de Dom Cesare sont les causes qui ensuiuent; le peu d'expérience qu'il a des choses qui sont de la guerre, & quasi de toutes autres, ayant toujours esté tenu fort bas par le feu Duc, sans participation d'aucunes affaires, & sans iamais estre trouué en aucun exploit de guerre; le peu d'assurance qu'il avoit des peuples greuez & malcontens, des impositions passées, & esperans d'estre mieux sous l'Eglise, & cependant intimidéz par les censures, & par la terreur des armes qu'ils eus-

font eus à soustenir rai d'un costé que d'autre, le peu de fidelité de ses Conseillers mesmes, qui partie pour son peu de resolution, partie pour auoir des rentes & autres biens en l'Estat de l'Eglise, & esperer & craindre plus du S. Siege que de luy, regardoient autant ou plus vers le Pape & ce Collège que vers luy; la façon de le secourir des Princes d'Italie, desquels il ne se pouuoit promettre que des souhaits, des conseils & aduertissemens pour craindre d'encourir l'excommunication, & en la depredation qui s'en fust peu ensuiure, & d'attirer en Italie, & sur eux-mesmes les armes estrangeres; la particuliere conuoitise des Espagnols, qui sous beau semblant de vouloir estre pour luy, & de conseruer l'autorité & droits de l'Empereur sur Reggio & Modena, siefs Imperiaux, desseignoient déja d'empieter pour eux-mesmes ces deux places, qui estoit le plus clair & le plus certain bien qu'il eust.

Toutes ces choses, & autres, ont aydé à faire que ledit seigneur Dom Cesare laschast prise si tost, & se contentast de beaucoup moins: ce qui a esté vn bon-heur au Pape & à tout l'Estat Ecclesiastique, qui eust eu beaucoup à faire & à souffrir si ce Prince se fust obstiné comme eussent fait plusieurs de nos sedicieux de France; & comme il n'auoit faite de prétentions, ny de pre-textes colorez, & mesmement que la ville de Ferrare est tres-forte, & tres-bien munie de toutes choses, & ne pouuoit estre attaquée de près encores de trois ou quatre mois, & que du costé de deça n'y auoit point vn chef de guerre qui fust pour conduire vne telle entreprise, ny la prouision requise d'armes, de poudres, & d'autres choses nécessaires. Dieu soit loué de tout. C'est Monsieur le Cardinal Aldobrandin qui a fort sagement & heureusement conduit à fin ceste negotiation, sans auoir cependant iamais voulu entendre à aucune suspension ou retardement des armes, ny de l'excommunication, comme il en estoit requis. Il sera bon que le Roy s'en conioyffe particulièrement avec luy, avec le compliment qu'il plaira à sa Majesté faire avec le Pape sur ceste occurrence.

Les Espagnols demurerent fort confus de cet accord, tant pour voir agrandir le S. Siege, auquel ils se sont monstrez contraires, comme aussi pour luy & à celuy pour lequel ils sembloient estre, que pource que leur Roy, qui se tient pour arbitre & moderateur des choses d'Italie, ny aucun de ses ministres n'a eu aucune part ny sentiment de cet accommodement, iusques à ce que tout a esté fait & public, & que quant à la personne dudit Roy, on n'a encores entendu rien par deçà comme il entendoit ce différent, ny de quel costé il panchoit; si n'est que chacun croit allez que quoy qu'il eust dit, il n'eust voulu l'accroissement du S. Siege, ny obmis aucune occasion de s'emparer de ce qu'il eust peu sous vn pretexte ou autre. Au contraire ce mouuement d'Italie a melioré de beaucoup la condition de nostre Roy en ces quartiers; par l'offre que sa Majesté a faite au Pape dont il est loué & beny par toute ceste Cour, & par tout le peuple qui luy attribue vne grande partie du recouurement que ledit S. Siege a fait d'un si grand & principal membre. Aussi chacun luy desire, & augure vn heureux succez du voyage que nous entendons qu'il va faire en Bretagne, avec ferme esperance que sa presence & valeur, & le bon-heur de ses armes feront dans peu de temps, ce que tant de longues negotiations n'ont peu, & que 25. ans d'etels autres ne scauroient faire.



La Maïesté a fait beaucoup pour les Religieux de S. Honorat de l'Isle de Lerins en les expediant ainsi fauorablement; mais j'oséray bien dire qu'elle a fait encores plus pour elle mesme, à cause du bon hon & gré que cela luy a apporté enuers nostre saint Pape, & enuers les premiers & plus grands de ceste Cour, & parmy tous ces Ordres, & Religions, & Clergé de deça. Autant, & c. Monseigneurs, & c. De Rome ce 24. Ianuier 1598.

## A MONSIEUR LE CHANCELIER.

## CXVII.

**M**ONSEIGNEUR, C'est à effe vne grande faueur & grace qu'il vous aye plus auancer ma reputation en la place que le Roy m'a donnée en son Conseil, par la commission que vous auez trouuée bon que sa Maïesté enuoyast à Monsieur de Luxembourg, pour en vostre lieu recevoir le serment que ie deuis faire entre vos mains, dont ie vous ay tres-grande obligation, laquelle encoré vous auez grandement augmentée par la tres-courtoise lettre qu'il vous a plu m'écrire sur ce du 7. Septembre, digne de vostre bonté & humanité plus que d'aucun mien merite; si par la même bonté vous me vueillez compter & m'alloier la tres-humble reuerence & fermeté que ie rends à vostre dignité, & à tant de rares vertus & loüables qualitez dont Dieu vous a décoré, & aux grands labeurs & travaux que depuis vn si long temps vous auez pris, & prenez pour le seruice du Roy & de la Couronne, & pour le bien de toute la France, au fruit desquels ie participe comme vn du Royzume. Et comme cela se peut & doit obliger tous bons François à vous rendre tres-humble seruice, iem'y sens encoré particulièrement obligé par les graces speciales & faueurs particulieres qu'il vous plait me faire. Aussi vous supplay-je de croire, qu'en toutes les occasions qui se presenteront de le recognoistre par tres-humble seruice enuers vous & les vostres, ie m'efforceray de le vous rendre, non seulement comme au premier & plus haut Magistrat de iustice, qui a bien merité de l'Estat & de tous les François en comun, mais aussi comme à mon particulier seigneur & bien-faicteur, & en ceste deuotion ie finiray icy la presente, apres vous auoir tres-humblement baïsé les mains, & prie Dieu qu'il vous donne, Monseigneur, & c. De Rome ce 24. Ianuier 1597.

## A MONSIEUR DE VILLEROY.

## CXVIII.

**M**ONSEIGNEUR, Par la commission du Roy, & de vostre Maïesté, ie vous ay écrit cy-deuant deux lettres touchant les affaires de

Ferrare; ausquelles i'adiousteray ceste troisieme pour vous obeyr de plus en plus. Apres donc que lesdites choses de Ferrare furent accommodées, chacun pensoit que le Pape n'iroit plus en ces quartiers là, comme il auoit dit auparauant qu'il y voulut aller: mais l'accord ne fut pas plustost entendu par de ça, que sa Sainteté recommença à parler de faire ce voyage plus fort qu' auparauant, & quand la nouuelle fut venue que Monsieur le Cardinal Aldobrandin auoit pris possession de ladite ville & Duché de Ferrare, & qu'il y estoit le maistre pour le saint Siege, sadite sainteté se resolut du tout d'y aller, & s'en laisser entendre avec chacun, & mesme qu'il le diroit au College des Cardinaux au premier Consistoire qu'il tiendrait, afin qu'ils preparassent leur équipage, & se missent en ordre pour l'accompagner, voulant mener la Cour quant & soy. Ce qui donna occasion à plusieurs de parler, & discourir que sa Sainteté ne deuoit point faire ce voyage, comme n'en estant plus besoin, & ne pouuant tourner qu'à grand prejudice & dommage en ceste ville de Rome, qui seroit prinée de la presence du Pape & de la Cour par l'espace de six à sept mois, & à grande incommodité, peine, & dépense de tous les courtisans, & des villes mesmes & lieux par où l'on passeroit, outre les grands frais que le saint Siege mesme auroit à faire. Que les Papes auoient bien acoustumé d'aller prendre l'air aux enuirs de Rome avec leurs domestiques pour huit, dix, quinze iours, ou pour vn mois; mais d'aller faire de ces longs voyages, & traîner apres soy toute la Cour, le College des Cardinaux, leur suite, les Signatures de grace & de iustice, la Datairerie, la Chambre Apostolique, la Rote, & autres congregations, avec leurs Supposts & Officiers, outre les Ambassadeurs des Roys & des autres Princes, cela n'auoit acoustumé de se faire que pour les causes legitimes, necessaires, & grandement importantes au public, comme pour mettre paix entre des Roys Chrestiens, les liquer contre les Turcs, recouurer vn Estat au saint Siege, & pour autres occasions semblables. Et y auoit mesmes des Cardinaux qui auoient delibéré de luy remontrer ces choses quand il leur en parleroit en Consistoire, & de le supplier de ne point entreprendre ce voyage. Mais luy en ayant presenté quelque chose, venu le iour du premier Consistoire, qui fut Mercredy 11. de ce mois, leur en parla non comme en leur demandant aduis, mais comme y estant resolu du tout, pour causes iustes & necessaires, dit-il, sans toutesfois leur exprimer. De façon qu'ils virent bien qu'ils luy feroient desplaisir d'en parler au contraire, & si n'y aduanceroient rien; qui fut cause que personne n'en parla point.

Or des causes qu'il peut auoir de faire ce voyage si loing & si embrassé, j'en tiens deux pour certaines. L'une est, pour asseurer d'autant plus ladite ville & Duché au saint Siege, en y establisant à ces commencemens vne bonne forme de gouuernement pour l'aduenir, laquelle soit seure pour le saint Siege, & douce & commode aux eitoyens & peuples; & au lieu d'un simple Duc qu'ils ont perdu, les consolant de sa presence, & leur faisant voir par la splendeur & maiesté du saint Siege & de la Cour Romaine, & par la pompe & magnificence des Consistoires & des Chappelles & des recueils & entrees qui se feront aux Princes y visitans sa sainteté, & par sa promotion, & encores vne Canonisation qu'on dit qu'il y vent faire.

leur faisant voir dis-ie, par toutes ces choses qu'ils ont gagné au change, & ont à present vn plus grand maistre qu'ils n'auoient auparauant, & qui a moyen de leur faire gagner mesme en deux mois plus qu'un Duc en plusieurs années. C'est donc la 1. cause du voyage proietté que ietiens pour certaine, laquelle peut encores estre accompagnée d'une circonstance qui est venue en l'esprit de quelques vns, que sa Sainteté vueille encores donner ordre aux grandes inondations que le Po fait bien souuent, qui ont causé par cy-deuant de grands dommages & pertes en ces quartiers là, & de grands differents entre les Ferrarois & les Bolognois, qui cherchoient chacun d'en reietter le desbordement sur leurs voisins, & dès en auant se pourroient mieux accorder à y pouruoir en commun, comme estans à vn mesme maistre. L'autre cause certaine dudit voyage est, que sa Sainteté a cognu par experience de long-temps que le changement d'air, & le mouuement & exercice luy profite grandement à la santé, laquelle depuis vn an a esté en luy peu ferme & peu certaine: qui fait qu'il embrasse tant plus volontiers l'occasion que ceste nouuelle acquisition, & la saison du Printemps qui s'en vient, luy donnent de faire ce voyage. Et comme d'un costé l'amour qu'il a vers son œuvre & facture l'attrie à Ferrare, aussi la douceur de la vie & de la santé qui peut infiniment enuers tous hommes, & mesmemēt enuers les Princes, & accompagnez du bon-heur de la gloire qui procèdent des belles actions, luy fait fermer les yeux à beaucoup de choses qu'on luy voudroit mettre en auant pour le destourner d'y aller.

Outre les susdites deux causes, desquelles ie ne doute point, on fait encore mention de deux lieux qui se trouuent au chemin, que le Pape verra tres-volontiers, à sçauoir nostre Dame de Lorette, à laquelle il a tousiours eu grande deuotion, & où il n'a point esté depuis qu'il est Pape; combien que plusieurs fois il ait monsté desir d'y aller sans autre occasion, & la ville de Fano, où il est nay du temps que ses pere & mere estoient chassez de Florence pour n'adherer au party de ceux de Medicis.

Mais quoy que ce soit de ces deux dernieres, ie ne sçay à quoy me tenir d'une cinquieme qui importe plus, & dont plusieurs ont grand soubçon, à sçauoir du recouurement de la Comté de Rouigo & du Polesin, que la Seigneurie de Venise tient, l'ayant pris autresfois sur ceux d'Este, & ladite Comté faisant partie de ce que le saint Siege leur auoit baillé en sief, auquel cas ladite Seigneurie n'auroit plus aucun droit de le retenir. D'un costé le naturel du Pape ne me semble estre adonné à la guerre & à mouuemens non necessaires, & ladite Seigneurie est forte & puissante, & la ville de Venise fort pres de là: & se dit-déjà qu'elle a fait venir de Zare certain nombre de cauallerie pour la loger en ladite Comté. D'autre costé le Pape, si ainsi est comme on le tient icy, a pour soy la iustice toute manifeste, & peut estimer qu'il luy est en certaine façon necessaire de recouurer le sien. La prosperité recente luy peut aussi auoir haussé le cœur, & accru les esperances avec la reputation & autorité. La facilité encores de prendre ledit Comté, si on ne luy veut rendre quand il demandera, se trouuera fort grande, pour ce que le pays y est tout ouuert, sans aucune forteresse ou autre lieu de resistance: & ceste facilité sera grandement augmentée par la presence de sa Sainteté, qui estant à Ferrare ne sera qu'à demie iour de

dudit Comte, & par la saison du Printemps auquel y arriuera, & ce qui est de principal, par vne armee qu'il a ja toute prestee sans auoir donné congé à pas vn soldat, depuis mesmes qu'il est maistre absolu de Ferrare & de tout ce que ceux d'Este tenoient en ce Duché là, qui est vne suspicion fort violente qu'il veut faire quelque chose de ladite armee, pour la grande des pense que l'entretien & continuation d'icelle luy apporte : & n'y a lieu sur lequel ledit soubçon tombe plustost sur ladite Comté de Rouigo & Polesin, dont la Saincteté, apres qu'on auroit refusé de luy rendre, se pourroit faire ineontinent, & y bastir vne ou deux fortereffes, auant que les Venisiens eussent mis ensemble autant de gens comme il en a déjà de tout prests. Hest vray qu'il y a encores en Toscane Borgo san sepolcro, qui est ville de l'Eglise, & est tenuë par les grands de Toscane par engagement pour quarante ou cinquante mille escus seulement, sous pretexte neantmoins de certaines fortifications qu'ils y ont faites pour trois ou quatre cens mille escus. Mais comme le Pape pourroit penser à ceste entreptise dudit Borgo san sepolcro au retour de Ferrare, & apres auoir eu Rouigo & Polesin; aussi ne pensay-ie pas qu'en allant il soit pour tenter rien de tel, combien qu'il en passera fort pres, & qu'une partie de son armee n'en est déjà gueres loing. En somme, ie ne me puis resoudre sur ceste cinquiesme cause dudit voyage; mais ie tiens bien pour certain que si Dieu donne vie au Pape, & force pour porter le trauail du chemin, il fera le voyage sans doute.

Monsieur de Luxembourg suiura : aussi feray-ie, Dieu aydant n'ayant aucun affaire à Rome que d'y seruir le Roy près de sa Saincteté, & de Monsieur de Luxembourg, & n'y demeurant que par commandement de sa Majesté; combien que ce voyage me vient mal à propos, pour l'accroissement de despence necessaire, & pour n'auoir à beaucoup pres les commoditez qui me feroient besoin. Aussi n'ay-je aucune rente ny reuenu en Italie; & de ce qui me doit venir de mes benefices de France, vne partie m'est rauie par la force & violence des gouuerneurs & gentilshommes, qui changent sur les pauvres prestres, & mesme sur ceux qui sont absens & loing comme moy; vne autre partie m'est emblee par la malice & fraude des fermiers, qui payent en papier, & en article de reparation, de rabais de procez, & de tels autres pretextes; vne autre par la nonchalance & mauuaise foy des Procureurs & administrateurs; & puis ce peu qui eschappe à tout cela, est non seulement decimé par les changes & remises, mais encores diminué à plus de dixhuict & vingt pour cent, à cause des guerres, & autres empeschemens du trafic & commerce. Mais ie feray au moins mal que ie pourray, & toutes autres choses plustost que de faillir à suiure le Pape & Monsieur de Luxembourg pour le seruice de sa Majesté. A tant, &c. Monseigneur, &c. De Rome le 19. Feurier 1598.

## A MONSIEVR DE VILLEROY.

## CXIX.

**M**ONSEIGNEVR, On fait icy grand bruit d'un arrest qui fut donné au Conseil priué du Roy tenu à Paris le 21. Nouembre par lequel est ordonné que les Iesuites vuidront hors la ville de Tournon, & hors du Royaume, dedans trois mois apres la signification qui leur en sera faite sur les lieux. Je laisse à Monsieur de Luxembourg à vous escrire ce que luy en a dit le Pape, qui l'enuoya querir expressément pour ce fait leudy 26. Feurier, sans pouuoir attendre au lendemain Vendredy, qui estoit le iour ordinaire de l'audience de l'Ambassadeur de France. Et apres vous auoir prié de vous souuenir de ce que ie vous escriuis le 28. d'Octob. sur vn semblable arrest de la Cour de Parlement du 21. Aoust, & de la responce qu'il vous pleust m'y faire par vos lettres du dernier Nouembre, ie vous presenteray certaines considerations sur ceste matiere, lesquelles ie soubmets à vostre bon iugement, & d'un chacun de Nostreigneurs dudit Conseil: vous asseurant auant toutes choses, que comme i'ay en singuliere reuerence les arrests de toutes les Cours souueraines de France, & principalement ceux dudit Conseil priué, aussi n'ay-ie aucune particuliere deuotion ny affectiō aux Iesuites, & n'entends pour ceste heure diré rien en leur faueur ou consideration, mais pour le seul seruice du Roy, auquel nuirait grandemēt l'execution dudit arrest, mesmement pour le regard des choses de Rome où nous sommes, & que nous voyons & oyons tous les iours, & dont nous sommes tenus vous aduertir. Et encores qu'à mon aduis le Roy ayela moindre part en tels arrests, toutesfois s'il les executoit à present, c'est luy seul qui en porteroit l'enuie, & toute la haine & le dommage en ses affaires & seruice. Si dès son enfance il eust tousiours esté Catholique, on ne seroit si prompt à soupçonner & mal interpreter ses actions en matiere de religion, mais pource qu'il est venu tard, on prend l'alarme de toutes choses qui puissent faire souuenir du passé, encores qu'elles ne soient faites à mauuaise intention, & principalement d'entendre qu'on veut chasser du Royaume pour la seconde fois indifferemment ceux qui sont tenus pour les plus éminens qui soient auourd'huy en doctrine & instruction de la ieunesse, en confessions & administrations des Sacremens, en la predication & deffense de la Religion Catholique & de l'autorité du S. Siege, & qu'on les veut chasser de sang froid, sans qu'ils en ayent donné aucune nouvelle occasion, trois ans apres le premier arrest qui fut ordonné contr'eux en l'an 1594. & deux ans & demy apres l'absolution donnée par le Pape au Roy, par le moyen de laquelle les causes de soubçon qu'on auoit d'eux cesserent, & encores apres que le Pape a fait instance; que ceux-là mesmes qui auoient esté chassés du ressort du Parlement de Paris, y fussent remis & restitués; & les chasser encores à la face de Monsieur le Legat, qui en a apporté la parole au Roy de

la part de sa Sainteté, & qui prend tant de peine pour le bien des affaires de sa Maïesté & de tout le Royaume, & encores par vn Arrest du Conseil Priué, qui n'y auoit point encores touché, & en auoit laissé faire la Cour de Parlement, sur laquelle nous nous estions excusé iusques à present, & en mettant hors la personne du Roy; de quoy nous ne serions plus creus deormais apres vn arrest du Conseil priué. Et comme toutes ces circonstances sont icy fort exagerees & prises en tres-mauuaise part, le Pape le premier & sur tous autres s'en offense & s'en afflige extrêmement, & prend cela pour vn mespris de son autorité, de ses prieres, & de son amitié, & pour vn affront fait à sa Sainteté & au saint Siege, car c'est ainsi qu'il parle; & qui pis est, il entre en doute & defiance de la verité & sincerité de la conuersion de sa Maïesté, & en crainte de quelque plus grand mouuement en France au fait de la Religion, & qu'outre le dommage qui en viendrait à l'Eglise & au saint Siege, sa Sainteté ne soit particulièrement blasmee & mocquee de l'auoir absous & recognu pour Roy, & mesmement par ceux qui, pour le détourner de l'absolution, luy disoient que sa Sainteté s'en trouueroit trompée. Et iacoit que le Pape pour chose du monde ne deuroit penser telle chose du Roy, qui fera tousiours mentir ses ennemis, & ne se démentira iamais soy-mesme, si est-ce que quand l'on est entré en mauuaise opinion & crainte du Prince, soit à droit ou à tort, il en aduiet puis apres, comme vous sçauéz, que non seulement on laisse de l'aymer, & luy procurer & desirer bien & prosperité; mais aussi qu'on le hait, & qu'on écoute & entend volontiers ceux qui se veulent remuer contre luy. Aussi sçauéz vous que le Pape & la Cour de Rome peut faire beaucoup de bien au Roy, & ayder grandement à luy accommoder les affaires de son Royaume, mais elle luy peut faire encores beaucoup plus de mal. Nous l'auons trop expérimenté sur la fin du regne du feu Roy, & es premiers six ans de celui du Roy d'apresent. Le Roy d'Espagne avec toute sa puissance, & employant toutes ses forces tant par mer que par terre, ne vous peut pas tant nuire comme fait ceste Cour en son seant; de façon que le Roy & vous tous qui estes près de luy, quand vous ordonnez & faites certaines sortes de choses, auez grande occasion de tourner vn peu les yeux vers Rome & ce S. Siege, & considerer comme elles y seront trouuées, & ce qui en pourroit aduenir; Or vous ne sçauriez plus irriter & animer le Pape & toute ceste Cour contre le Roy & ses affaires, qu'en faisant executer l'arrest du 19. Decembre 1594. apres vn si long-temps, & s'estans depuis passées tant de choses qui vous en peuuent & doiuent destourner: & ce courroux & indignation ne pourroit estre contrepesé par les belles & genereuses offres que le Roy fit dernièrement pour Ferrare; ains l'execution dudit Arrest donneroit à penser qu'elles ne seroient prouennës de deuotion ny de gratitude que le Roy eust vers le saint Siege, & la personne du Pape, mais d'un desir d'esloigner la guerre de foy, & de faire quelque profit des trauaux d'Italie.

Iusques icy ie pense aucunement auoir satisfait à vne partie de mon de-  
 uoir, en vous escriuant ce que ie vois, & puis, & pense des propos, opinions,  
 & humeurs, sans qu'il soit besoin que ie sorte hors de Rome: toutesfois  
 le zele que i'ay à la reputation & seruice du Roy me transporte plus loin, &

me fait vous dire de plus , que i'ay opinion que l'execution dudit arrest engendreroit encores les mesmes effets preiudiciables à la bonne renommee & au bien des affaires de sa Maiesté es esprits de tous autres Catholiques , tant dehors que dedans le Royaume , selon la mesure neantmoins & proposition du zele que chacun a là Religion Catholique , & de l'opinion qu'il a de ceux qu'on veut chasser de la France , y peuuent contribuer. Des Princes & Potentats Catholiques estrangers , ceux qui sont bien affectionnez enuers le Roy , & ont conceu bonne esperance de luy & des choses de la France , y dediendroient plus froids & plus lents , & perdroient vne bonne partie de la bonne opinion qu'ils ont de la personne de sa Maiesté & du succez de ses affaires. Au demeurant , le Roy d'Espagne , le Duc de Savoie , & leur adherans , entreroient en nouuelle esperance de pouuoir faire trouuer meilleure leur cause enuers tous ceux là , & de pratiquer & souleuer les subiects de sa Maiesté dans le Royaume mesme , où il y a encores trop de gens , qui d'eux mesmes sans autre suggestion des Espagnols , pourroient faire trop mal leur profit de cette occurrence.

Le Duc de Mercœur , vers lequel on dit que vous allez , penseroit auoir persuadé à ceste Cour & tous autres l'excuse & pretexte dont il a vsé iusques à present pourquoy il ne recognoissoit le Roy , & ne posoit les armes , à sçauoir qu'il ne voyoit point encores la religion Catholique bien asseuree en France. Des autres qui se sont accordez , s'il y en auoit quelques vns qui ne fussent encores reconciliez de cœur & d'affection , ils s'endurceroient en leur rancune de plus en plus ; & tant de bonnes gens , qui ayans esté de la ligue se sont accommodez & habitez à obeir volontiers au Roy , & ont conceu bonne esperance de sa Maiesté , & des choses mesmes de la religion Catholique , se scandaliseroient merueilleusement de ladite execution , & retourneroient à leurs desiances , scrupulés , inquietudes , & troubles d'esprit : & autant comme ils commenceroient à douter & à craindre de luy , autant diminueroient ils de leur affection & bien-veillance enuers la personne de sa Maiesté , comme feroient aussi plusieurs bons Catholiques , qui ont tousiours esté de son party. Quand aux mutins & seditieux , qui ne sçauent & ne peuuent demeurer en paix , & aux ambitieux & mal contentant d'un party que d'autre , ils ne demanderoient pas mieux qu'une telle occasion de se remuer , & de susciter vn nouueau trouble ; ce qui leur seroit d'autant plus facile en ce temps cy , auquel le Roy à l'occasion des guerres & de la necessité du temps est contraint d'exiger sur ses sujets plusieurs subides extraordinaires , que les peuples ne payent iamais volontiers , pour necessaires que soient telles impositions , & moins encores apres tant de pertes & ruines qu'on a souffertes en general & en particulier. Que s'il aduenoit qu'environ le mesme temps le Roy s'ellargist ou se fust ellargy de quelque chose enuers ceux de là Religion pretendue reformee , comme il y en a qui pensent que pour éviter vn plus grand mal il y pourroit estre contraint , le bannissement des Iesuites donneroit d'autant plus belle couleur à ceux qui voudroient faire quelque remuement dans le Royaume , & feroit aussi d'autant plus grande impression en l'esprit du Peuple & de toute ceste Cour , & de tous Princes & Seigneurs Catholiques ,

tant dedans que dehors la France, & ne pourroit-on leur persuader que ledit eslargissement procedast de la necessité du temps, ny leur oster hors de la fantaisie que le Roy n'eust vn mauvais dessein d'accroistre le party des Huguenots, & de diminuer & affoiblir celui des Catholiques.

Auquel propos des Huguenots j'adiousteray encores cecy, que i'açoit qu'ils seroient tres-aïses du bannissement de tout vn ordre qui leur est plus contraire, si est-ce que la condition du Roy en empireroit pour leur regard, tant s'en faut qu'elle en amendast, comme quelques-vns pourroient penser. Car comme les Huguenots de son Royaume verroient que pour cet acte si rigoureuse le Roy se seroit rendu les Catholiques partie ennemis, partie moins affectionnez, & dedans & dehors la France, ils en deviendroient plus rouges & plus fiers, & moins obeïssans à sa Maïesté, la voyant auoir plus de besoin d'eux, & moins de moyens de les chastier & de résister à leurs entreprises : & les estrangers seroient moins prompts à luy donner secours, si ce n'estoit à condition par trop déraisonnable. Pour exemple des premiers, ie vous prie vous souuenir de l'algarade qu'ils donnerent au Roy apres la perte, & pendant le siege d'Amiens, i'açoit que la charité enuers la partie, le peril commun de toute la France, & à la profession des armes & de noblesse qu'il font, les admonestast assez de remettre à vn autre temps leurs demandes, & d'accourir à vn exploit qui importoit si fort à tout l'Estat, & à eux-mesmes en particulier. Et pour cet exemple des seconds, il ne faut que nous reduire en memoire le temps auquel Calais se perdit dernièrement, la Roïne d'Angleterre ayant vne armee toute preste & embarquee, laquelle pouuoit passer en six heures audit Calais, & en autres six heures s'en retourner, & avec la seule contenance sans combattre conseruer à la France vne place si importante non seulement à nous, mais aussi à ladite Roïne mesme. En somme il aduiert de mesme aux Roys & aux grands Estats qu'aux particuliers, querant plus ou moins en moyens & de prosperité ils ont d'un costé, tant plus ou moins aussi d'amis & seruiteurs ils trouuerent d'un autre: de sorte que tant mieux le Roy sera avec les Catholiques & dedans & dehors son Royaume, comme il doit chercher d'y estre le mieux que faire se pourra puis qu'il est Catholique luy-mesme, tant plus d'obeïssance & de seruice trouuera-il és Huguenots de France, & tant plus de secours en ceux des pays estrangers. Au demeurant, il est mal-aïse à croire que ceux qui mettent en auant ce nouveau bannissement, ayant des consideration qui pesent plus que les precedentes. S'ils disent qu'il faut chasser les ennemis du Roy, les corrupteurs de la ieunesse, qui enseignent à trair les Roys, & les espions du Roy d'Espagne, Dieu me garde de m'y opposer, & d'estre iamais negligent en choses qui concernent tant soit peu la personne ou le seruice du Roy. Je vous ay déjà protesté que ie ne voulois nullement parler en faueur des Iesuites, moins veux-je en cet endroit estre leur aduocat de ce qu'ils peuuent auoir fait cy-deuant. Je m'en remets à ce que la Cour de Parlement en trouuera, & à ce que vous en pouuez scauoir. Tant y a, que quoy qu'ils aient fait & dit par le passé, ils l'ont fait parce que le Roy n'estoit encores Catholique, on n'auoit point esté absous par le Pape. Or ces occasions sont cessées long temps y a, par con-



version & l'absolution de sa Maïesté. Cét ordre fait particuliere profession d'obeyr au Pape, & dépendre de ses commandemens, ils n'ont garde de faire contre celuy que le Pape reconnoist pour Roy. D'ailleurs ils sont prudents & accorts, aimans leur seureté & profit, & sçachans très-bien cognoistre où il gist, & se garderont de faire vne escapade, ou extrauagance, ou chose hazardeuse, beaucoup mieux que ne feroient d'autres qui ont moins de sens, & de prudence, & de police qu'eux: & de fait Jacques Clement n'e-  
 Roit point Iesuite. Aussi sont-ils pour le iourd'huy fort humiliez, ayans eu vne bien rude leçon pour en faire leur profit: de façon que tous les artifices qui furent pratiquez contre le feu Roy & contre cestuy-cy, ne suffiroient auourd'huy pour les faire entrer en aucune ligue contre sa Maïesté, ou contre le sang Royal de France; ny à leur faire faire la moindre chose du monde en faueur des Espagnols; ioint que le Pape vous offre d'oster tous les particuliers, dont on aura quelque soubçon, sans autre cognoissance de cause si la suspicion sera bien ou mal fondée.

Chasser donc auourd'huy ce qui reste de ces gens en France, ne seroit pas oster les ennemis du Roy, ains faire infinis ennemis au Roy, & hors & dedans son Royaume, comme il a esté monstré cy-dessus; & non seulement on ne feroit point de déplaisir ou dommage au Roy d'Espagne, mais au contraire on luy feroit choses agreables & rtes-profitables, en ce que le Roy seroit par ce moyen affoibly, demeurant priué de la bonne opinion & affection des plus grands Catholiques, & qui luy pourroient plus profiter & nuire. Et seroit bien plus vtile au Roy, & plus conuenable à la clemence & genereuse procedure dont sa Maïesté a usé cy-deuant enuers tous autres, de laisser en paix ces gens icy qui sont eschappez à la fortune & à l'orage de l'Arrest du mois de Decembre 1594. & se les gagner & acquerir. Aussi ont-ils bien eux seuls plus d'industrialité & dextérité; & de moyen pour contenir les peuples en l'obeyssance & deuotion que les subjets doiuent à leur Roy, que n'ont possible tous les autres ordres & Religions ensemble. Et si on scauoit bien user par delà, ils le feroient, tant pour le deuoir, que pour effacer la notte du passé, & pour l'esperance qu'ils auroient d'obtenir vn iour par ce moyen la restitution de ceux qui furent chassés du ressort du Parlement de Paris: outre que sa Maïesté en ne passant outre à l'exécution dudit Arrest retiendra la bonne opinion & affection du Pape, de toute ceste Cour, & de tous les Catholiques hors & dedans la France. Ce qui ne peut tourner sinon à déplaisir & dommage des Espagnols, & de tous autres ennemis du Roy & de la France.

S'ils disent qu'un Arrest de la Cour de Parlement ne doit demeurer sans execution, moins encores vn Arrest du Conseil Priué, ie prieray Dieu qu'il leur donne vn pareil soin de faire executer tant d'autres arrests qui demeurent icy sans execution, laquelle neantmoins tourneroit au grand bien des particuliers, du Roy mesme, & de tout l'Estat de la France; comme la vraye & seule regle de donner & d'excuter les arrests, est le bien du Prince, du public, & des particuliers. Que si l'exécution d'un Arrest est pour tourner à leur dommage & danger, comme il a esté monstré qu'il aduient de cestuy-cy, il ne le faut point executer. Et puis comment entendent-ils que cet Arrest soit executé? Sera-ce contre le College de  
 Tournon

Tournon seulement, ou contre tous les autres ? Si contre celuy de Tournon seulement, qu'autont-ils gagné ? Tournon n'est point chef de Province, n'a point de Parlement ny Euesché, ny rien d'éminent, & cependant les Catholiques n'en feront de rien moins offencez, & ne laisseront de craindre qu'on en veuille puis apres faire autant des autres ; & quand on ne le fera, ils diront qu'on a osé toucher aux grandes villes, de peur de ny estre obey, & ainsi outre la haine on en rapportera encores du mespris. Que si on entend d'exécuter ledit arrest contre tous les Colleges, comment y procedera-t'on ; Sera-ce contre tous à la fois ; ou si l'on attendra de l'un à l'autre par l'espace de trois ans, comme on a fait de celuy de Tournon ? Si on se prend contre tous à la fois, on court fortune de ny estre point obey, & que les Cours de Parlement se bandent, & que les peuples se mutinent. Je voy par l'arrest du Conseil privé, que seulement pour Tournon, qui est si peu de chose, l'on a craint que le peuple n'empeschast le parlement des Iesuites, en ce que par le mesme arrest il est enioint à Monsieur de Tournon de donner tant de seconrs & ayde, que l'arrest puisse estre exécuté sans aucun empeschement de la part des habitans de ladite ville de Tournon. Aussi me souvient il qu'on ne peust faire vider hors du Royaume les Iesuites qui estoient à Bourdeaux, ou là aupres, lors mesme que l'horrible & execrable attentat de Jean Chastel estoit tout chaud, & la playe enseignoit encores, & jaçoit que ce Parlement la fut pour le Roy, & l'aye tousiours seruy fidellement ; beaucoup moins est-il doncques à esperer qu'on en vienne à bout maintenant qu'il y a si long temps, & que les choses se sont depuis moderees d'elles-mesmes. Ainsi le dernier erreur seroit pire que le premier ; pour autant que les Iesuites demeuroient, & ne scauroit-on au Roy nul gré de ceste demeure, ains il seroit moins aimé, pour ne dire hay, de les auoir voulu chasser, & moins prisé de ne l'auoir peu faire ; & le peuple encores seroit deuenu plus orgueilleux & insolent pour empeschier vne autresfois quelques bonne chose & importante au bien de tout le Royaume. Que si l'on attendoit à les chasser ores d'un College, ores d'un autre, par intervalle de trois en trois ans, comme ou attend de celuy de Tournon, outre qu'à peu pres la mesme difficulté ou impossibilité s'y pourroit trouuer, ce seroit autant de fois r'ouuir les playes ja fermees, & renouveler les mescontentemens, desiances, craintes, & indignations du Pape, & de toute cette Cour, & des autres Princes & peuples Catholiques tant dehors que dedans le Royaume.

Pour toutes ces considerations il semble qu'il vaudroit mieux se contenter de ce qui a esté fait iusques icy, & de ce que l'arrest de la Cour de Parlement a esté exécuté en tout le ressort dudit Parlement. Aussi tels iugemens rigoureux donnez contre toute vne communauté, sans y faire aucune distinction ny difference de personnes, n'ont gueres iamais esté exécutez en tout & par tout, ains on a accoustumé d'en prendre & laisser, & mesmes quand on a eu du temps pour y penser, & pour donner lieu à la moderation & clemence. C'est pourquoy l'Empereur Theodose par le conseil de saint Ambroise fit vne loy, que nous auons encores auourd'huy au Code Iustinian, par laquelle il ordonna que les condamnations plus rigoureuses que l'ordinaire, quand bien elles seroient faites par l'Empereur

mesme, ne s'exécutassent point que trente iours apres. A quoy se peuvent-  
 cores rapporter le conseil que donna le Philosophe Athenodorus à l'Em-  
 pereur Auguste, de ne rien dire ny faire quand il se verroit courroucé, que  
 premierement il n'eust recité les lettres de l'alphabet en soy-mesme. Or  
 vous auez eu par delà plus detrois ans pour vous addoucir, & pour vous  
 donner lieu à la moderation, par laquelle vous éuiterez tant d'inconue-  
 niens qui ont esté cortez cy-dessus. Encores en pourrez-vous tirer du pro-  
 fit pour le Roy, sans que l'autorité ny de la Cour de Parlement, ny celle  
 du Conseil priué y demeuré engagée, en montrant que leurs arrestseus-  
 sent esté executez, sans que le Roy reuoquant tout ce fait à sa personne,  
 pour le respect qu'il porte à nostre saint Pere le Pape, & à Monsieur le  
 Legat, & à leurs remonstrances, arresté l'exécution desdits arrests, en ce  
 qui reste à executer. Aussi est-ce vn precepte de l'ancienne sapience, que  
 les Roys & autres grands Princes doiuent laisser faire à leurs officiers les  
 choses rigoureuses & odieuses, quoy que necessaires, & faire eux-mesmes  
 en personne propre les équitables, plausibles, & fauorables. Le Roy s'est  
 vaincu soy-mesme en tant d'autres choses, il le pourra bien encores faire  
 en ceste-cy, dont pourroient ensuiure tant de maux, comme il a esté dit. Et  
 mesme que sa clemence reluisant par tout ailleurs, s'il tenoit son cœur  
 contre ces gens icy apres vn si long temps, sa rigueur seroit d'autant plus  
 mal interpretée & prise du Pape & d'infinis autres pour vn signe certain  
 d'une haine particuliere contre les plus fermes Catholiques, & encores de  
 quelque mauuais dessein contre la religion Catholique. Par ainsi l'estime  
 que vous, avec ceux qui sont près du Roy des plus sages, moderez, & pre-  
 uoyans, plus amateurs de son seruice & du bien public que de leurs opi-  
 nions & fantaisies, passions, ferez tres-bien & tres-dignement de vous em-  
 ployer à ce que sa Maiesté donne cela à sa reputation; à la verité & sincerité  
 de sa conuersion; au respect, amitié, & prieres de nostre saint Pere le  
 Pape; à la presence & affection de Monsieur le Legat; à tout ce sacré Col-  
 lege; & à tous les Princes estrangers Catholiques; au desir, consolation, &  
 assurance d'infinis Catholiques de son Royaume, qui en sont en tres-  
 grande peine & soucy; à la confusion & affoiblissement des Espagnols &  
 autres ennemis de sa Maiesté; à la repression & abaisement des ambitieux,  
 seditieux, & mal contens; à la necessité du temps, qui contraint de faire  
 des exactions, & autres deplaisirs au peuple, sans qu'il soit à propos d'y  
 adiouter cestuy-cy de plus; à la qualité de l'arrest qui est extraordinairement  
 rigoureux, & au long temps qui s'est passé depuis; à la cessation  
 des causes de telle rigueur, & des desiances; à la difficulté ou mesme im-  
 possibilité, &, quoy que ce soit, importance & grand inconuenient de l'e-  
 xécution; à la tranquillité de la pauvre France conualelescente; dont la santé  
 n'est encores bien asseurée, & qui ne pourroit porter vn nouveau trouble;  
 aux trauaux & dangers que sa Maiesté mesme a soufferts; à son propre re-  
 pos, & preuoyance pour l'aduenir; au bien de ses affaires tant près que loin,  
 & tant dehors que dedans son Royaume; & en fin qui sera pour vn million  
 de raisons à vn Prince si genereux, à sa clemence & bonté incomparable,  
 qui luy a acquis louange & gloire immortelle, Avant ie prie Dieu, &c. Mon-  
 seigneur, &c. De Rome ce 5. Mars 1598.

## A MONSIEUR DE VILLEROY.

CXX.

**M**ONSEIGNEUR, Bien tost apres que Valerio fut party d'icy, qui vous porta vne lettre de moy du 16. Feurier, par laquelle ie vous escriuis que le Pape n'auoit encores enuoyé personne de son armee, nous entendismes qu'il en auoit esté licentié la plus grande partie; de façon qu'il ne reste plus aucun soubçon que la Sainteté pense à rien plus acquerir par force pour ceste fois. Ledit Valerio qui deuoit passer à Ferrare, où estoit, & est encores Monsieur le Cardinal Aldobrandin, vous en aura esclaircis, & aura suppléé ce deffaut de madite lettre qu'il vous portoit. Vn Gentil-homme Venitien m'a dit que la Seigneurie de Venise auoit fait apparoir au Pape, que la Comté de Rouigo, & le Polesin, & Este, & Lignago, & certains autres lieux qu'ilstiennent, auoient esté par eux pris sur la maison d'Este, & ne faisoient point partie de ce que le sainct Siege auoit baillé en fief à ceux d'Este, ny de l'Exercat de Rauenne. Le grand Duc cependant auoit enuoyé renfort d'hommes en la ville & chasteau de Borgo sans Scopolcro. Auec la presente sera vne longue lettre, que ie vous ay faite sur vn Arrest donné au Conseil priué du Roy le 21. Nouembre contre les Iesuites, de laquelle ie ne retracte ny ne reuoque rien par ceste-cy, & mesmement l'ayant sousmise toute à vostre bon iugement, comme ie fais icy de nouveau; vous assurant encores vncoup, que iacoit que ce que ie vous ay escrit tourne aucunement au profit des Iesuites, toutesfois ce n'a esté ma fin ny mon intention de rien dire en leur faueur, ny pour aucune leur vtilité, mais pour le seul seruice du Roy, & le bien de ses affaires, ausquelles i'estime ce nouveau mouvement estre preiudiciable. Mais vous voyez de plus près, & cognoissez trop mieux ce qui luy est expedient, & par mesme moyen si ie me seray trompé ou non. Quand il n'y auroit iamais de Iesuites en France, ou quand ils eussent tous esté chassés incontinât apres l'arrest de la Cour de Parlement du mois de Decébre 1594. ie n'en pleurerois point: mais de les chasser apres vn si long téps, ie voy qu'il déplaîra icy infiniment, & y engendrera de tres-mauuais effects, & crains encore qu'il n'apporte vn grand scandale & mescontentement à infinis Catholiques en France.

Vous auez assez de moyens de les tenir bas, sans vous susciter vne si grande enuie; comme premierement, en ne permettant point que ceux qui ont esté chassés du ressort de ladite Cour de Parlement y soient remis. sans toutesfois leur en oster pour iamais l'esperance, & cependant vous semir de ceste peur que vous venez de faire à ceux qui restent, & de ce que vous ne les chasserez point, pour contenter aucunement le Pape & Monsieur le Legat, qui vous recherchoient de remettre ceux qui ja auoient esté chassés. Secondement en ne leur permettant d'eriger aucun nouveau College en aucun lieu de France, non pas mesme hors le ressort du Parlement. Entroisième lieu, enuoyent hors ceux qui vous seroient particulièrement

suspects, comme le Pape & le General de cét ordre s'y offrent. En quatriesme lieu, en bridant bien ceux qui resteront, par quelque bon reglement que vous y ferez apres y auoir bien pensé, & enioignant aux magistrats des lieux de prendre garde diligemment que ledit reglement soit exactement gardé, & faire autheur dudit reglement & de la restriction que vous leur ferez tout autre plustost que le Roy, afin que l'enuie n'en tombe sur sa Majesté. Et de ce que vous aurez resolu, en faire part au Pape vn peu auant que le publier, & rendre capable sa Sainteté des raisons que vous aurez eues de ce faire, non pour luy en demander congé ny aduis, ny pour attendre sa responce, quand vous verrez que c'est chose qu'il faudra pour vn bien public, mais afin qu'il l'entende premierement par vous, & qu'il le prenne moins mal : comme aussi seroit-il expedient de garder semblable ciuilité enuers sa Sainteté en toutes autres matieres qui concerneront les choses & personnes ecclesiastiques, & qui pourroient estre mal prises par deçà. Nous eusmes hier vostre depesche du premier iour de Février, de laquelle, en ce qui touche mon particulier, ie vous remercie tres-humblement. Monsieur de Luxembourg vous escriira, outre ce qu'il a negoré, comment nostre saint Pere & toute ceste Cour se prepare pour le voyage de Ferrare, & de toutes autres occurrences de deçà : Et ie prie Dieu qu'il vous donne, &c. Monseigneur, &c. De Rome ce 6. Mars 1598.

A V R O Y.

C X V I.

S I R E,

La depesche qu'il pleust à vostre Maiesté me faire à Artenay le 21. Février, me fust renduë le Mercredy saint 18. de ce mois, laquelle ie communiquay à Monsieur de Luxembourg, luy baillant la lettre que vostre Maiesté luy en escrinoit de sa main. Maintenant ie me mets en ordre, pour executer le commandement qui m'y est fait d'aller trouuer le grand Duc de Toscane. Mon partement d'icy se rencontrera au mesme temps que le Pape en partira pour Ferrare, ou ie voulois aussi bien aller sans cela, & y suivre sa Sainteté & Monsieur de Luxembourg. Ce voyage que i'auoij déjà dit vouloir faire à Ferrare, me sert grandement à la secretesse que vostre Maiesté veut estre gardée en cestuy-cy de Florence, & a courrir la commission qu'elle m'a donnée, pource que le chemin ordinaire & le plus court d'icy à Ferrare est par Florence, combien que le Pape fasse celuy de nostre Dame de Lorette, pour la deuotion qu'il a à ce lieu Saint, & pource qu'il ira tousiours sur le sien, excepté vn peu de chemin par l'Estat d'Vrbain, dont encores il est Seigneur direct, & le Duc d'Urbain son feudataire, Ceste mesmerencontre de mon partement avec celuy du Pape m'apporte encores ceste commodité, que ie n'auray pour ceste heure besoin de parler à ladite Sainteté de ladite commission, ny de luy presenter la lettre que vostre Maiesté luy escrinoit, d'autant que luy & chacune pensera que ie

aille pour autre occasion que pour faire ledit voyage de Ferrare, & que ie prenne le chemin le plus droit, comme feront plusieurs autres. Aussi me rendray ie à Ferrare, Dieu aydant, tout aussi-tost que i'auray fait avec le grand Duc; & selon la response que i'en rapporteray, ie pourray employer ou non employer ladite lettre de vostre Majesté au Pape, & parler à sa Sainteté de cét affaire, auquel i'y feray de toute fidelité & diligence à moy possible, & feray la charge que vostre Maieité me commet suiuant la tres-ample information & instruction quelle me donne de tout ce qui s'est passé en ce fait, & de ce que i'ay à y faire, & tiendray vostre Maieité aduertie de tout ce qui s'y passera. Cependant i'ay enuoyé à Lucques la lettre que vostre Majesté m'a enuoyee pour receuoir cinq cens escus. Priant Dieu, &c. SIRE, &c. De Rome ce 28. Mars 1598.

## A MONSIEVR DE VILLEROY.

## CXXII.

**M**ONSEIGNEVR, Ayant receu le 18. de ce mois la depesche qu'il vous a pleu me faire à Artenay le 21. Feurier, i'enuoyay le lendemain à Lucques la lettre que vous m'auiez enuoyee pour receuoir les cinq cens escus, dont ie vous remercie tres-humblement, & en attends la response pour le 3. d'Auril prochain. Cependant ie me prepare pour partir incontinent apres, & aller trouuer le grand Duc. Ie cognois avec vous que l'affaire que le Roy me commet importe grandement à sa reputation, & à la seureté & repos du Royaume; aussi y apporteray-ie Dieu aydant tout le soin & diligence que ceste importance requiert. Et comme vous auez tenu par de là ceste depesche fort secrette, aussifais-ie icy la commission qui m'y est donnee, la courrant, comme i'escri au Roy, du voyage que sans cela j'allois faire à Ferrare, & de ce que le chemin par Florence est le plus court & accoustumé. Si ceux à qui nous auons à faire n'ont perdu l'entendement, j'espere leur faire voir à l'œil & toucher au doigt, que outre la iustice qui est toute pour nous, leur profit & vtilité propre demandant qu'ils contentent le Roy, qui de son costé se met à plus que de raison. Au demeurant i'ay esté bien aise de voir que vous auez receu mes lettres du 29. Decembre & 24. Ianuier, & encores plus de ce que les affaires du Roy alloient si bien en Bretagne, & de la bonne resolution que sa Maieité auoit prise de pouruoir si bien à ceste Prouince, qu'on ne la lui puisse plus troubler. Aussi loué-je Dieu de ce que le traité de paix qui se fait à Veruins estoit si bien acheminé, qu'on en peut esperer bonne yssue, priant sa diuine Maieité qu'il luy plaise disposer & conduire toutes choses à bonne & heureuse fin, & vous donner, Monseigneur, &c. De Rome ce 28. Mars 1598.

## A MONSIEVR DE VILLEROY.

## CXXIII.

**M**ONSEIGNEVR, Par mes lettres du 28. Mars dont ie vous Menuoyeray vn duplicata avec la presente, ie vous donnay aduis comme i'auois receu la depesche du Roy, & vostre du 21. Feurier le 18. dudit Mars, & auois enuoyé à Lucques au sieur Bartholomeo Cerami la lettre que luy escriuait le sieur Carlo Saldagna, pour me faire bailler à Rome la somme de 500. escus qui me furent payez le 6. & ie partis de la ville de Rome pour m'acheminer en ceste ville de Florence le Mercredy 8. de ce mois. Ce mesme iour, comme ie sortis de Bacano ou i'auois disné, pour aller à la couchee à Monterose, vn Gentilhomme de Monsieur de Luxembourg m'atteinait par le chemin, & me donna vne lettre de mondit sieur de Luxembourg de la teneur qu'il vous plaira voir par la coppie que ie vous en enuoye; à laquelle lettre ie respondis tout aussi-tost que ie fus arriué à Monterose, comme il est porté par la coppie que ie vous enuoye aussi de la response que i'y fis. Le 13. au soir, comme i'estois entre les Tauermettes & S. Cassin, ie rencontray Valcrio qui venoit d'aupres de vous, & me rendit la depesche du Roy & vostre du 16. Mars, avec le duplicata de celle du susdit 21. Feurier, & le lendemain au matin 14. de ce mois arriuai en ceste ville de Florence, & allay loger à l'hostellerie de l'Ange, d'où le grand Duc, aduertie de ma venue, m'enuoya leuer par Monsieur le Cheualier Guiciardin, avec toute ma suite & mes cheuaux, & me fist conduire & loger en son Palais de Pitti, où logent leurs Alteesses. Ce iour là mesme on m'inuita à voir Madame la grand' Duchesse, qui auoit accouché du quatriesme fils male cinq ou six iours auparauant, outre deux filles qu'elles a encore; ce que i'acceptay tres-volontiers. Et encores qu'elle me tint vne bonne heure & demie, si est-ce que ie ne me laissay iamais entendre pourquoy i'estois venu, reseruant ma charge entiere pour le grand Duc, pour plusieurs considerations, & principalement pour leur donner à cognoistre, que i'acquit qu'en tout ce qui s'est passé & bien & mal es Isles d'If, Ratoneau, & Pomegues, il ayent interposé le nom de Madame sa femme, & monstré de faire le tout au nom d'elle (ce que i'ay toujours attribué au desir qu'ils ont d'inculquer au monde ces vieilles & rances pretentions de Lorraine sur la Prouence) si est-ce que nous tenons que cet affaire est tout du grand Duc, & entendons nous en adresser à luy seul, sans penser aucunement à elle. Le lendemain Mercredy au matin 15. iour de ce mois i'eus audience du grand Duc, & luy exposay ma charge. Je ne vous diray point icy les particularitez de ceste audience, voulant vous en faire vne depesche bien ample, & possible pour courrier exprés, selon l'issue qu'aura ma negociation. Mais il faudra que i'attende à vous depescher ledit courrier iusques à ce que ie me trouue avec Monsieur de Luxembourg, afin qu'il se puisse seruir de ce mesme moyen pour escrire au

Roy & à vous ce qu'il aura à vous faire entendre. Cependant ie vous fais cette-cy pour la bailler à l'ordinaire, qui doit venir de Rome pour Lyon, & passer icy auiourd'huy ou demain; par laquelle vous sçaurez en somme, que le grand Duc par sa response print temps à delibere, & m'en allegua deux causes; l'une, qu'il falloit qu'il fit renouir plusieurs lettres qui auoient esté escrites en ceste matiere, l'autre, qu'il n'auoit près de soy le Cheualier Vinta son principal Secretaire, qui auoit plus de cognoissance de cét affaire que nul autre, lequel pourroit estre de retour dans deux iours. Ces deux iours expirent auiourd'huy, & ie commenceray dès demain à luy faire souuenir de me respondre. Le mesme iour dudit Mercredy 15. de ce mois apres dîner, Madame la grande Duchesse, à qui le grand Duc auoit dit tout ce qui s'estoit passé entre luy & moy, comme ie m'en apperceus puis apres, m'enuoya dire que si ie la voulois voir il y auoit commodité. I'y allay: & comme elle vit que ie ne luy parlois point du chasteau d'If, elle en ouurit le propos elle mesme; i'en reserue aussi les particularitez à ladite despêche que i'espere vous faire. Tant y a qu'elle mit plusieurs partis en auant, tendans tous à retenir au moins de l'Isle de Pomegues. Mais ie luy respondis à tous lesdits partis en niant, & l'assurant que le Roy ne permettroit iamais que les gens du grand Duc tinssent autre chose que le bas de l'Isle d'If, comme ils faisoient auant l'occupation du chasteau d'If, soit que les forts de l'Isle de Pomegues fussent razez, comme le Roy le desiroit, ou restassent en pied, comme le grand Duc en estoit d'auis. Voila sommairement en quel estat est cét affaire quant à présent, Et ne vous en diray autre chose, sinon que ie croy qu'ils se trouuent fort empeschez; d'autant que d'un costé ils voudroient retenir, & de l'autre ils voyent de quoy il leur y va. Le leur parle rondement & resolument, & neantmoins avec le respect qu'il conuient, autant que ie le sçay cognoistre. Ils ne tireront autre chose de moy, quant à la retention qu'ils voudroient faire, que le bas de l'Isle d'If. Mais pour mettre l'esprit du Roy en repos de ce costé-là, ie m'estendray au reste là où besoin sera: de façon que si l'affaire ne demeure accommodee auant que ie parte d'icy, le tort qu'ils ont déjà sera de beaucoup augmenté, & la cause du Roy en sera tant plus justifiée deuant Dieu & le monde. Au demeurant, il me semble auoir entendu que la fille de l'Archiduc Charles, qui deuoit estre mariee au Prince d'Espagne si elle ne fust morte, a laissé des sœurs, & que ledit Prince en doit espouser l'une. Ce qui me fait aucunement doubter, si le contenu de la vostre, que vous me midez auoir esté escrite d'Espagne en Italie est vraye, Toutesfois il ne faut rien negliger, & ie tascheray d'en decouurir ce qui se pourra. Cependat ie me confirme en l'opinion qui me vint en l'esprit en lisant ladite lettre de Monsieur de Luxembourg; que la peur dont il a parlé soit feinte, & sans apparence de verité; & pourroit estre que ce fut en partie pour nous donner à croire qu'il a besoin de son argent, qui est le seul pretexte qu'il a de vouloir retenir nos forts. I'ay rendu au Cheualier Guiciardin la lettre que vous m'auiez enuoyee pour luy: & loué Dieu du bon succez qu'il a donné au Roy de son voyage de Bretagne. Il y a icy aduis certain, que le Pape partit de Rome pour Ferrare leudy 13. de ce mois, & Monsieur de Luxembourg le iour au parauant par le chemin de nostre Dame de Lorette, selon qu'il auoit ar-



resté ia avant que ie partisse de Rome. Et le leudy auparavant sa Sainteté auoit receu nouuelles certaines de la reprise de l'auarin par les Chrestiens sur les Turcs; c'a esté par sa surprise avec vn petard. Ceste ville, comme vous sçaez, est la plus importante qui fust en ces quartiers là, à cause du voisinage de Vienne, & qu'elle seruoit au Turc de porte pour entrer en l'Austrie & Allemagne, & pour venir en Italie, Atant, &c. Monseigneur, &c. De Florence ce Vendredy 17. d'Auril 1598.

## A MONSIEVR DE LVXEMBOVRG.

## CXXIV.

**M**ONSEIGNEVR, l'ay receu au sortir de Baccano apres disner la lettre qu'il vous a pleu m'escire par Monsieur de Lormeau; & incontinent que i'ay esté arriué à Monterose, ie me suis mis à vous faire cette responce tout chaudement. Premièrement donc ie suis bien aise que ceux à qui nous auons à faire ayent peur: car ils en seront plus dociles, & se rangeront d'autant plustost à la raison; si toutesfois la peur est vraye, & non feinte à quelque dessein, pour nous sonder, ou diuertir nos pensees de quelque chose qu'ils trament possible, & sont apres à faire eux mesmes; car ie ne tiens pas pour vraye la cause de cette peur. Quoy qu'il en soit, ie loue grandement que vous ayez respondu n'estre bon de demander audience extraordinaire pour les causes que vous en auez alleguees, qui sont tres-bonnes. Au demeurant ie ne suis nullement d'aduis qu'il faille faire enuers le Pape l'office dont on vous requiert. Vous auez veu de point en point, & de mot à mot la charge que ie vais executer, à laquelle cet office seroit du tout contraire. Il vous peut souuenir de tant d'actes d'hostilité qui y sont cottez, & comme le Roy les a pris, & ce qu'il demande là dessus, & la resolution qu'il a prise. si on ne luy rend le sien. Comment pourriez-vous dōc aller dire & protester que le Roy desfendra celui, qui sous apparence d'amitié a occupé & detiēt le sien, & auquel le Roy sera possible contraint de faire la guerre auant qu'il soit deux mois d'icy? Le Roy dit que pour sa reputation & pour plusieurs autres causes, il ne peut le laisser en paix s'il ne recouure le sien; & vous iriez dire que le Roy le veut mesme desfendre, & faire à autrui la guerre pour luy? En apres vous sembler'il peu de chose d'aller dire au Pape, que s'il fait la guerre à vn tiers, le Roy la prendra contre sa Sainteté pour ce tiers-là? Quand le grand Duc n'auroit fait ce que dessus, & qu'il auroit tousiours continué comme il auoir commencé, & quand depuis les attentats il auroit tout restitué, encores y faudroit il bien penser, Et si la guerre estoit iuste de la part du Pape; comme il est vray semblable qu'il n'en intenteroit d'autre, le Roy luy deuroit il denoncer la guerre si sa Sainteté ne s'en abstenoit? Et puis conjoignois.

conjoignois ces deux considerations ensemble ; qu'estimeroit le Pape ? que diroit il du Roy ? que luy feroit il si sa Majesté en guerre iuste du costé de sa Saincteté, luy declaroit qu'il vouloit estre contre sa Saincteté, qui est Vicaire de Dieu, & qui l'a absous, & qui tasche par tous moyens à luy pacifier & assseurer son Royaume, en faueur d'un, qui en sa plus grande affliction, & sous beau semblant d'amitié, luy a pris vne de ses principales forteresses, au lieu le plus ialoux de tout le Royaume, & a voulu empêcher que le Roy ne bastist sur le sien, & tasché de prendre le fort que les gens de sa Majesté y faisoient, & occupé vne troisieme Isle, & y construit trois forts contre la volonté de sadite Maiesté, & contre la seureté de son Estat, & au grand mespris de sa Majesté & de toute la Erance ? Au reste, ie ne pense pas que cela interrompist le traitté de paix, comme on veut que vous disiez, ains cela l'aduanceroit plustost, ou seroit signe qu'il seroit ja conclud & arresté. L'Allemagne ne s'en remueroit non plus ; car outre qu'elle a d'autre choses à penser plus prés, l'Empereur sera tousiours plustost pour le Pape & pour le Roy d'Espagne, que pour celuy qui en parle. En somme, sous vostre meilleur aduis, le mien ne seroit point que vous dissiez rien de cela. Bien pourriez-vous, s'il vous sembloit, à vostre audience d'apres demain, dire au Pape, que vous avez entendu qu'il se fait de grandes leuees au Milanois, & que ce n'est pas signe de paix entre les deux Roys, comme sa Saincteté se promet, sans parler de l'autre ny prés ny loing, & par ce moyen tascher de faire parler sa Saincteté : ce qui nous seruiroit d'instruction pour en aduertir le Roy. Et puis vous pourriez dire au sieur Ferdinando Vint'a qui vous a parlé, ce que le Pape vous auroit dit là dessus, & ainsi son maistre auroit vne partie de ce qu'il veut combien que si le Pape auoit icelle inclination qu'ils pensent, il se garderoit bien de vous en rien dire. Au reste, vous pourriez vous excuser de n'auoir point fait au Pape la protestation qu'ils veulent, pour deux causes ; l'une pource que vous ne tenez pas la chose qu'on craint pour vraye ; l'autre, pour ce que quoy qu'il en soit vous avez estimé deuoir attendre qu'elle fin aura vn affaire que sa Majesté m'a commandé de traiter avec son Altesse, de l'issüe, duquel dépendra ce que sa Maiesté aura à faire pour sadite Altesse. Et cecy sera bon, non seulement à vous excuser, mais aussi à donner scrupule au grand Duc, & à luy faire penser, que s'il fait ce qu'il doit enuers nous on fera ce qu'on deura pour luy, sinon que nous le traiterons de mesme qu'il nous fera. Aussi bien ay-je deliberé, si ie n'en ay bonne response, de le luy dire en fin haur & clair. Quant à ce que la lettre que le Roy escriuoit au Pape n'a point esté donnée, il est vray que le grand Duc vous en pourroit sçauoir quelque gré, mais il semble que le Roy ne vueille pas qu'ils sçachent pour ceste heure que sa Majesté en aye escrit, ny seulement fait parler vn seul mot à sa Saincteté, comme elle n'a point fait aussi. Et de fait i'ay pensé de luy dire cela, entre autres comportemens de sa Maiesté, qu'elle n'en a iamais fait parler au Pape ny en mal ny en bien. Toutesfois de cela ie m'en remets à vostre discretion, ny voyant pas au reste grand mal à le dire. C'est tout ce qui pour le peu de temps que ie me suis pris m'est venu en l'esprit, que ie vous ay escrit volontiers, plus pour obeir à vostre commandement, que pour besoin que ie pense que vous en ayez, qui sçaurez mieuz.

juger de quelle consequence seroit de faire l'office qu'on desiré de vous.  
De Monterose ce 8. Aupil 1598.

## A MONSIEVR DE VILLEROY.

## CXXV.

**M**ONSEIGNEVR, Par la lettre que ie vous escriuis hier, qui sera avec la presente, ie respondis à la dépesche que Valerio m'a portée du 26. Mars. ie reseruay neantmoins deux poincts ausquels ie respondray par ceste-cy, dont le premier est, qu'en la susdite dépesche i'ay trouué la copie de la procuration qu'il vous apleu m'enuoyer, & vous en escriray mon aduis, quand ie vous feray l'ample dépesche que ie vous promis par madite lettre d'hier. Cependant, ie vous diray que c'est vn affaire tres-difficile, duquel ie ne sçay comment nous pourrons venir à bout. Quoy qu'il en soit, il faudra faire passer vne autre procuration quand ce ne seroit que pour les mots qui ont esté adioustez à la fin de la main de la personne constituante; lesquels rendent l'acte suspect, qu'elle ne l'aye point fait de son bon gré & franche volonté, comme il est porté par le commencement de ladite procuration, ains par le commandement de personne superieure, à qui ait esté necessaire d'obeïr, Mais de cela mesme, & de tout ce qui concerne au fait de ladite procuration, ie vous en escriray, Dieu aidant, comme i'ay dit cy-dessus. L'autre point reserué pour cette lettre est, que ie vous remercie tres-humblement & de toute mon affection de ce qu'il vous a plu faire ordonner par le Roy que ie fusse employé dedans son Estat pour deux mil quatre cens escus par an, & faire encores executer l'ordonnance de sa Majesté. C'est vn tres-grand bien & honneur adiousté à tant d'autres obligations que ie vous auois déjà : & ce d'autant plus que vous l'avez fait sans en estre requis, comme aussi tous les biens precedents. I'auois à la verité grand besoin de cestuy-cy, mais le fruit & la ioyissance ne m'en sçauroit estre si agreable & honorable, comme est la constante genereuse volonté dont il procede, & comme sera l'occasion de vous en rendre tres-humble & tres-fidelle seruice à vous & aux vostres, quand elle se presentera, & vne donnera moyen de vous faire voir vne partie de la tres-humble & pie gratitude que ie vous en rends en mon ame. I'en remercieray le Roy quand ie luy escriray ; cependant ie prie Dieu qu'il vous donne, Monseigneur, &c. De Florence ce 28. d'Aupil 1598.

## A MONSIEUR DE VILLEROY.

## CXXVI.

**M**ONSEIGNEUR, Vous verrez l'issuë de la commission que le Roy m'a donnée vers Monsieur le grand Duc de Toscane par la lettre que i'en escris à sa Maesté, & par deux copies que ie luy envoie, l'une des articles accordez entre ledit grand Duc & moy, l'autre d'une promesse que ie luy ay faite à part hors lesdits articles; laquelle il a voulu estre ainsi separée, pour les considerations que ie vous diray par ma dépesche plus ample que ie vous feray quand ie seray arriué près Monsieur de Luxembourg à Ferrare. Aussi vous esclaireiray-je mieux de toutes autres choses par ladite dépesche: vous suppliant tres humblement de suspendre cependant le iugement des choses qui vous pourroient sembler autrement, & i'espere vous en rendre un bon compte; vous assurant cependant que ie n'eus iamais tant de peine en affaires qui me soient passées par les mains, & que sans ma grande patience non seulement ie n'eusse obtenu de ces gens icy ce que vous verrez par lesdits articles, mais ie n'eusse pas seulement peu les faire entrer en ce traité avec moy. Je preuoy d'un autre costé, que comme i'ay eu trop affaire icy, ie pourray encor trouuer par de là trop peu d'équitéés iugemens de ceux qui seront recherchez d'entrer en caution pour le Roy, & pour le bien commun du Royaume, & je pensay tres-bien auant qu'accorder cet article; & si i'eusse eu plus de crainte de déplaire à des particuliers, que de zele de seruir au public, & à la seureté de l'Estat, ie me fusse bien gardé de l'accorder. Mais comme i'ay en toute ma vie un grand soin de ne faire déplaisir de moy-mesme aux moindres personnes du monde, aussi la raison & l'expérience m'ont appris, que pour venir à bout d'un grand affaire, & important à tout un Royaume, il ne faut pas s'arrester à ce qu'en pourront dire ou penser ceux qui ne visent point à ce but. Et pourueu que le Roy, & vous, & Monsieur de Belliéure, & vos semblables (dont pleust à Dieu qu'il y en aye beaucoup) n'ayez point desagreable ce que i'en ay fait, i'auray bonne patience quant aux autres. A tant, &c. De Florence ce 5. May 1598.

## A V R O Y.

## CXXVII.

**SIRE,**

Le dix-septiesme Avril, ie donnay aduis à vostre Maesté en es-  
crivant à Monsieur de Villeroy comme ie tois arriué près Monsieur

le grand Duc de Toscane , & luy auois exposé ma charge , & il auoit pris temps à delibérer pour y respondre. Depuis, apres auoir demeuré chez luy trois semaines , & traité plusieurs fois avec luy, & avec Madame la grand<sup>e</sup> Duchesse, & avec Monsieur l'Archuesque de Pise, & avec le sieur Cheualier Vinta son Secretaire d'Estat & principal ministre de ses affaires, ie suis tombé d'accord avec son Altesse, que dans quatre mois, finissans pour tout le mois d'Aoust, il retira tous ses gens, non seulement des forts & Isles de Pomegues, & du chasteau d'If, comme vostre Maiesté vouloit, mais aussi du bas de l'Isle d'If, sans y faire aucune demolition; & pouruant demolir les forts de l'Isle de Pomegues, si bon luy sembloit, sans que vostre Majesté soit tenué de luy payer sinon que la despesse faite pour ledit chasteau d'If, & encores à termes, à scauoir cinquante mille escus par an, & sans aucun interest, qui est plus que vostre Majesté ne m'auoit commandé de luy demander, & tout ce qu'elle pouuoit desirer en cecy.

Pour obtenir de luy ce que dessus, ie luy ay accordé ce que vostre Majesté verra par la copie que ie vous enuoye des articles de l'accord fait entre luy & moy, me reseruant de vous enuoyer l'original que ie tiens signé de la main du Seigneur grand Duc, & sellé du seal de son Altesse, par vn courrier exprés, que Monsieur de Luxembourg, & moy vous despeschons incontinent que ie seray arriué pres ledit sieur de Luxembourg à Ferrare, où ie m'achemine auourd'huy. Le luy ay encores accordé vn autre escrit à part hors lesdits articles: ce que vostre Majesté verra par la copie que ie vous enuoye de l'escriture à part.

Ils s'en trouuera qui diront que i'ay esté bien hardy à promettre l'article des douze respondans ou cautions, ce que ie recognois & confesse moy-mesme; mais outre que sans cela ie n'eusse peu rien faire, i'ay appris qu'es grandes affaires, pour éviter vn grand mal, & obtenir vn grand bien, il faut oser quelque chose, & se refoudre à temps & à point, & sortir d'un mauuais & dangereux passage le plutost & le mieux que l'on peut. Vostre Majesté se peut souuenir du grand desplaisir, apprehension, & soucy que luy ont apporté ces nouueantez du chasteau d'If, & de l'Isle de Pomegues, comme aduenues au lieu le plus jaloux & le plus conuoié des Espagnols, & vn des plus importants de tout le Royaume. Et i'ay pensé qu'en accordant ledit article, & autres, vostre Majesté se deliureroit de ce soucy en tout & par tout, & mettroit son esprit en repos de ce costé-là, & par mesme moyen ostoit à la ville de Marseille, à la Prouence, & à la France ceste espine du pied, ou pour mieux dire ceste chaisne du col, ou ces fers des pieds, & euiroit vostre dite Majesté vne guerre, dont la despesse de peu de iours eust monté à plus que tout ce que i'ay accordé; comme aussi s'en pouuoient ensuiure infinis inconueniens, & entre autres, que vne seule arquebusade tirée de ces rochers, pour ne parler d'autres infinis coups d'artillerie, pouuoit emporter vn des plus grands & meilleurs Capitaines, & des plus fidelles seruiteurs que vostre Majesté aye; duquel seul, outre le hazard de tant d'autres, la perte eust esté dommageable à vostre seruice & au public de la France, beaucoup plus sans comparaison que les cautions que vostre Majesté baillera n'en scauroient recoiure d'inconueniens ou fâcherie en leur particulier pour auoir respondu, outre l'exécration

qu'eussent en vos ennemis & malueillans , de vous voir aux mains avec vn Prince qui vous a secouru en vostre grande necessité , & est hay d'eux pour cela mesme , & d'ouyr publier des choses qui se sont passées secrettement entre vous deux , lesquelles pour infinis respects ne leur doiuent iamais estre descouuertes. Comme au contraire vosdits ennemis seront tresmarris que vostre Majesté ait retiré le sien , & neantmoins conserué l'amitié d'un Prince , qui outre les plaisirs passez , vous peut à l'aduenir faire en secret mille seruices ; quand ce ne seroit que pour le mal qui luy veulent , & pour la crainte qu'il a d'eux. I'ay pensé aussi , que accordant lesdits articles de moy-mesme presentement , sans enuoyer vers vostre Majesté pour en auoir sa volonté & commandement , outre que l'occasion d'accommoder cét affaire se fust peu perdre pendant ce delay , pour les accidens qui peuvent suruenir d'heure en heure , & outre que lesdits quatre mois n'eussent commencé à courir de son temps , vostre Majesté acheptoit encores le temps pour vn autre regard , en ce qu'elle pourroit disposer plus librement de soy-mesmes & du reste de ses affaires , & s'employer à toute autre entreprise qu'elle estimera le plus de son seruice , & pour le bien de seldites affaires & de son Royaume.

Les mesme considerations qui m'ont meu moy à accorder lesdits articles , & eust deuant encores mouuoir les Seigneurs à qui le sort touchera , à entrer pour vne si bonne occasion tant plus volontiers & tant plustost en l'obligation dont il est fait mention , outre qu'ils se mouuoient par le respect & autorité de vostre Majesté qui les en recherchera , & pouruoir à ce qu'il ne soit besoin qu'ils en soient molestez , en donnant les bonnes & valables assignations dont eux mesmes vous ouuriront les moyens , & ne permettant point qu'elles soient destournees à autre vsages , & en tout euenement desdommagera les respondans , de ce qu'ils pourroient souffrir pour auoir fait ce seruice à vostre Majesté & au Royaume. Aussi n'est ce pas hors de raison ny du commun vsage , qu'en matiere d'argent , les subjets respondent quelquesfois pour leurs Princes. I'entends mesmes que cela se pratique assez souuent en des parties qui se sont pres vostre Majesté , & qui n'importent pas possible au public , comme fait le recouurement desdites places , & la seureté de Marseille & de toute la Prouence. Et ie me souuiens d'auoir veu mesme donner des ostages par nos Roys , & les enuoyer hors du Royaume , pour des sommes que leurs Maiestez deuoient à des gens qui n'auoient fait que piller & rauager la France : là où ce Prince ( quoy que ce soit de la nouueauté du chasteau d'If , & de ce qui s'en est ensuiuy ) a seruy auparauant , & aidé à maintenir en partie vostre Majesté en son droit & dignité de Roy , & à conseruer le Royaume en son entier.

Mais pour plus grande iustification desdits articles , & pour vous rendre plus particulier compte de toute ma negociation , & donner quelque peu d'auis sur certaines choses qui y appartiennent , ie feray à vostre Majesté vne bien plus ample depesche quand ie feray arriué à Ferrare , là vous enuoyeray par courriers exprés , comme i'ay dit cy-dessus , qui pourra estre Valerio. Cependant Monsieur le grand Duc , en attendant qu'un Gentilhomme qu'il vous veut enuoyer puisse partir , depesche vers Marseille vn courier , par lequel i'ay estimé vous deuoir donner cét aduis sommaire de ce que

i'ay fait en execution de ceste commission qu'il a pleu à vostre Majesté me donner. Aussi a desiré le Seigneur grand Duc que par ce moyen i'escriuisse à Monsieur de Guyse : ce que i'ay fait de la teneur que vostre Majesté verra par la copie que i'enuoye de ce que ie luy ay escrit. A tant, &c. SIRE, &c, De Florence ce Mardy 5. 1598.

L E T T R E A M O N S I E U R D E G V I S E , D O N T  
E S T F A I T M E N T I O N E N L A P R E C E D E N T E .

C X X V I I I .

**M** O N S E I G N E U R , Par deux dépesches que le Roy m'a faites, l'une du 25. Feurier, l'autre du 26. Mars, sa Majesté m'a commandé de venir vers Monsieur lo grand Duc de Toscane pour le fait du chasteau & Isle d'If, & des forts & Isles de Pomegues. Et apres que i'ay esté par l'espace de trois semaines près son Altesse, ie suis en fin tombé d'accord de toutes choses avec luy ; de façon qu'il ne reste à present sinon que sa Majesté, à laquelle ie viens d'en escrire, ratifie ce que i'ay promis pour & au nom d'elle, comme ie m'assure que sa Majesté fera, & que vous & tous les gens de bien en aurez du contentement. De quoy i'ay estimé vous deuoir donner aduis, pour le lieu que vous tenez en ces quartiers-là & en toute la Prouence, afin que vous en estant aduertý, puissiez aussi par mesme moyen iuger & arrester mieux en vous-mesme ce que vous aurez à faire & à laisser de faire, en attendant que le Roy vous aye mandé sa volonté là dessus, ce qu'il fera bien tost. Et n'estant là presente à autre fin, ie la finiray icy, apres vous auoir baissé bien humblement les mains, & prie Dieu qu'il vous Donne, Monseigneur, &c. De Florence ce 5. May. 1598.

A V R O Y .

C X X I X .

**S** I R E ,

Le 5. iour de ce mois, auquel furent arrestez & signez des articles de l'accord que i'ay fait pour & au nom de vostre Majesté avec le grand Duc de Toscane, touchant le chasteau & Isle d'If, & les forts & Isles de Pomegues, i'en donnay aduis à vostre Majesté par un courier que le grand Duc despescheroit vers les quartiers de Marseille, & vous enuoyay la copie desdits articles, & d'une promesse à part que i'auois faite à son Altesse. Maintenant ie vous enuoye par ce courier exprés l'original en Italien desdits articles escrit de la main de son Secretaire des chiffres, appelé le sieur Marcello Alcolto, & signé de la main de son Altesse, & scellé de son

tachet & armes, avec vne autre copie desdits articles en François, & de ladite promesse à part, & certains memoires que i'en dressay pour plus grande explication & iustification desdits articles & de ladite promesse. Aussi vous enuoyay-je le compte qui m'a esté baillé de la despense qu'on dit auoir esté faite pour le chasteau & Isle d'If, sans qu'il ait esté rien employé de ce que ledit grand Duc a despendu pour les forts & Isles de Pomegues, dont ils vouloient me bailler vn autre compte à part, qui à leur dire eust monté à plus de cent quarante mille escus. Mais ie leur ay soustenu & prouué par viues raisons, que vostre Majesté n'estoit tenuë de leur en rien payer, & n'ay voulu leur en rien alloüer, ny mesme voir leur compte. Si i'eusse peu faire les autres à moins, ie l'eusse fait tres-volontiers, & y ay fait tout ce qu'il m'a esté possible, & mesmes pour n'accorder l'article des cautions & pleiges : mais i'estime tant le prompt recouurement de ces places, pour l'importance du lieu où elles sont, que tout ce que i'ay promis ne me semble rien en comparaison. Aussi la difficulté des pleiges ne sera pas tant en la chose en soy, comme es humeurs & esprits de ceux qui auront à y entrer. Car outre le zele qu'ils doiuent auoir à vostre seruice, & au bien public du Royaume, auquel ils participent tant plus grand ils seront, quand vostre Majesté baillera bonnes assignations, & les fera obseruer, dont eux-mesmes vous ouuriront les moyens, ie ne voy point qu'ils ayent beaucoup à craindre, & mesmes estans leurs personnes & biens en la protection & iurisdiction de vostre Majesté, qui en tout euuenement les peut garantir de la rigueur excessiue des executeurs, si on en vouloit par trop abuser contr'eux. Et quand tout sera bien considéré il se trouuera que ceux qui ont despendu & presté le leur, & vous rendent le vostre sous quelques assurances, quelques accords & fins qu'ils estiment & pensent auoir esté en ce traité, courent beaucoup plus de fortune eux-mesmes que ne feront les pleiges qu'ils vous nommeront, si la bonne foy qui doit regner en l'ame de tous gens de bien, & mesmement Princes, & qui semblent estre particuliere & propre à vostre Majesté, ne les assure d'ailleurs. Et comme Dieu sçait que i'en ay eu intention de tromper personne, aussi m'estimerois-je trop simple, si à faute de promettre lesdites cautions, & pour crainte de la chiquane qu'on a fourré en cet article, i'eusse perdu l'occasion de faire ce bon seruice à vostre Majesté & à la France, que d'obliger le grand Duc à la restitution de ces places, de laquelle doit ensuyure la tranquillité de vostre esprit, & la seureté du Royaume de cecosté-là. A tant &c. S I R E, &c. De Ferrare ce Mardy de Pentecoste 12. May 1598.

---

A MONSIEVR DE VERROY.

CXXX.

MONSIEUR, Par la despesche que ie fais au Roy vous verrez ce qui s'est passé au fait de la commission qu'il auoit l'u



La Maïesté me donner, i'entends quant à la conclusion de l'accord, de laquelle seulement ie me suis proposé de rendre compte sur ceste despesche, sans entrer pour cette heure aux moyens que i'y ay tenus, ny aux choses qui s'y sont faites & dites de part & d'autre; qui seroient trop longues à raconter. Par la presente ie vous escriray quelques particularitez que i'ay estimé ne deuoir différer.

Entre autres pleiges qu'on vouloit auoir, on me faisoit grande instance de la ville de Marseille en corps, & encores de quelques Marchands particuliers de ladite ville, & pourra estre qu'on vous en parlera par delà, comme on m'a requis moy instamment que i'en escriuisse par delà, afin de le faire trouuer bon. Mais outre que ce seroit contreuenir par eux à la clause qui porte qu'ils nommeront de ceux qui se trouueront près la Maïesté, ou à 20. lieuës aux enuiron, ie ne serois point d'aduis que ladite ville, quand bien elle voudroit, ny aucun de ses citoyens, entraissent cautions vers le grand Duc, non seulement pour ce qu'à cause du trafic qu'ils font par mer ils seroient trop exposez aux galleres dudit grand Duc, mais aussi pource que ie pense que nous ne luy deuons donner cy apres aucune occasion de tenir liez les Marseillois, soit par crainte des executions qu'il pourroit faire contre eux, ou par la douceur de la suspension d'icelle, ny auoir plus rien à faire avec eux. Et me sembleroit meilleur si les Marseillois auoient à l'obliger, ou à contribuer quelque chose, que ce fust au Roy.

L'on s'est plaint à moy de ce que les Marseillois venoient courir es mers dudit grand Duc sur ses sujets, comme dernièrement pendant que i'estois à Florence on assaillit près de Grosseto vn vaisseau de Pise qui eut bien à faire à se sauuer, que s'ils continuoient on seroit contraint d'envoyer les galleres sur ces Corsaires, dont on seroit marry pour le respect qu'on porte à la Majesté. Je respondis que ce pourroit estre autres que Marseillois ny François, qui en prissent neantmoins le nom, pour le différent du chasteau d'If & Isles de Pomegues qu'il failloit d'autant plustost accommoder. Quoy que s'en fust, que c'estoit contre la volonté du Roy, qui ne vouloit que ses Sujets courussent, sinon contre ceux avec qui nous auions guerre, & ne trouueroit mauuais qu'on se deffendist des pirates, fussent-ils François ou autres, & que i'en escrirois.

I'ay sceu que ledit grand Duc auoit esté fort aise d'auoir entendu que le Roy le vouloit comprendre en la paix, comme il auoit esté fort marry que du commencement on ne luy auoit fait dire s'il desiroit qu'en cette occasion du traité de paix on fust quelque chose, pour luy ains que depuis on eut mesme empesché le sieur Bonciani d'aller à Vernins. Sur quoy m'a esté remonstré, que comme il a esté très-aise d'estre compris en ladite paix, aussi est-il besoin de la faire de façon qu'on ne luy nuise enuers les Espagnols au lieu de luy profiter, comme sans doute on luy nuiroit, si on l'y faisoit comprendre comme ayant secouru le Roy contre les Espagnols. Qui a esté cause que i'ay demandé à ceux qui m'en parloient, qu'ils me baillassent par escrit l'article comme ils voudroient qu'il fut couché: ce qu'ils ont fait de la teneur qui s'ensuit. Et pource qu'en l'affaire de l'absolution qui fut obtenuë du Pape à Rome les Ambassadeurs ministres de sa Majesté tres-Christienne ont passé par les Estats d'aucuns Princes d'Ita-

le, & particulièrement de la Toscane, & le grand Duc leur a pour un tel effet concédé le passage pour six livres & avec beaucoup de pitié: la Majesté très-Chrétienne desirant que l'establissement de la paix soit perpétuel, & qu'il ne puisse recevoir alteration ou occasion de trouble, par les degousts que pour ladite, ou autre bien plus grande que celle qui a esté exprimée, tant manifeste que fondée sur des seuls soupçons que pourroit auoir aucunes des Cours ou autres de lesquelles la paix s'establie, entend, veur & declare, qu'en ladite paix soit expressément & nommément compris le Seigneur Don Ferdinand de Medicis grand Duc Toscane, & ses enfans & Estats. Je ne doute point que le Roy ne soit pour luy complaire en cela, & en plus grande chose: & m'assure que vous, Monseigneur, le procurerez comme chose digne du Roy, & du danger où il s'est mis pour la Majesté, & de vostre generosité & bonté.

Auquel propos ie vous diray qu'il a quelque opinion que vous ne luy foyez point si propice comme il desiroit, & comme il luy semble qu'estoit feu Monsieur le Renol. Mais ie m'assure qu'il ne scauroit où fonder ceste sienne opinion, si ce n'estoit sur ce que vostre ame genereuse & zele au service du Roy, & au bien & reputation de la Couronne, n'a peu passer par conuenance & dissimulation la nouveauté du chasteau d'If, & des autres choses qui s'en sont ensuiuies; desquelles j'ay esté moy-mesme plus indigné que ie ne vous scaurois exprimer. Mais puis qu'à present il se remet au bon chemin, & qu'il a à présent adués assez de contrition & de honte desdites nouveautez, j'estime que le Roy & vous ferez chose non seulement honneste & noble, mais aussi utile au service de la Majesté, de luy monstrer que l'on se souuiet plustost des bonnes choses qu'il auoit faites auparavant, que de ce mal dernier, & de luy escrire sur ceste occasion des lettres amiables, non seulement au nom du Roy, mais aussi au vostre particulier, dont il demeurera fort consolé & content, & la Majesté en pourra retirer beaucoup de service en des occasions que le temps pourra apporter, quand ce ne seroit que pour ce qu'il craint & hait les Espagnols infiniment.

Il m'a dit qu'on luy auoit offert la forteresse d'Antibe pour de l'argent, & que Monsieur de Savoie y a la mesme intelligence. (ce sont les mors.) S'il l'a dit de dessein ou pour estre vray, je n'en puis point iuger. Tant y a que cela mérité que le Roy y prenne garde.

Aussi m'a-t-il dit qu'il auoit adués d'Espagne que certains du conseil de guerre d'Espagne se desflent qu'après que les François auroient reconuré leurs places, ils ne cherchent occasion de nouvelle guerre, ainsioient mieux que la paix se faicte avec les Anglois qu'avec nous, d'autant que le Roy d'Espagne perd tousiours avec les Anglois, & gaigne avec nous: & conseillent le Roy leur maistré que pour auoir la paix avec lesdits Anglois, il leur baille Calais qu'ils pretendront estre leur, & que par ce moyen il n'aura plus à se soucié de la Royne d'Angleterre avec laquelle il auroit la paix; ny du Roy, qui par ce moyen sera aux mains non seulement avec les Espagnols, mais aussi avec les Anglois desquels il est aidé maintenant. Je ne scay que vous en direz, mais c'est un trait de fort malicieux.

Quand mesme par de Florence, il y auoit un Chaous de la part du

Turc. arrivé depuis moy. Le Seigneur Vinta Secrétaire du grand Duc me dit que c'estoit pour le commerce que son Altesse, desiroit long temps y assurer aux siens en Leuant, & qu'ils auoient appris par ledit Chaour qu'il y auoit à Constantinople vn Iuif qui y traitoit pour le Roy d'Espagne.

Le Cheualier Guichardin qui est à honneste Gentil-homme comme vous l'auiez cogneu, m'a tousiours tenu bonne compagnie pendant que j'ay esté à Florence, & vsé enuers moy de toute courtoisie possible. Ce sera luy que le grand Duc enuoyera. Je vous supplie tres-humblement de luy montrer qu'en vous escriuant i'en ay eu souuenance.

Je n'auray besoin de rendre au Pape la lettre que le Roy m'auoit enuoyee pour la Saincteté sur la commission que ie viens d'exécuter, puis que nous sommes tombez d'accord. Les deux Cardinaux neueux de la Saincteté sachans que i'auois esté trois semaines à Florence & se doutans pourquoy c'estoit, me l'ont demandé, & ie leur ay dit que les ministres du Roi & du grand Duc ne s'estoient point bien entendus iusques ici, & qu'à present tout estoit accordé, & ne suis entré en autres particularitez. A tant, &c. Monseigneur, &c. De Ferrate le Mardi de Pentecoste 12. May 1598.

## A V R O Y.

## CXX XI.

**S**IRE, Le 27. May ie reçeus la lettre qu'il pleut à vostre Maiesté m'escrire le 4. touchant l'office que Monsieur le grand Duc de Toscane desiroit estre fait enuers le Pape de la part de vostre Maiesté, sur l'auis qu'il disoit auoir qu'on luy vouloit faire la guerre. Au contenu de laquelle lettre, & à l'intention de vostre Maiesté portée par icelle, i'auois déjà satisfait de moy mesme par vne lettre que i'escriuis à Monsieur de Luxembourg le propre iour que ie partis de Rome, qui fut le 8. d'Auril, respondant à vne sienne qu'il m'envoya par vn de ses Gentilshommes, ainsi que i'en donnay depuis auis à vostre Maiesté par vne lettre que i'escriuis à Monsieur de Villeroy de Florence le 17. Auril, luy enuoyant la copie de la lettre que mondit sieur de Luxembourg m'auoit escrete, & de la responce que i'auois faite. Et apres la reception de cette lettre de vostre Maiesté, ie demureray tant plus confirmé en ce que i'en auois respondu à mondit sieur de Luxembourg; lequel aussi de son costé auoit le mesme respect de ne faire ny dire rien qui peust offenser le Pape ny des siens contre vostre Maiesté, ny les rendre moins propices au bien de vos affaires. De façon que lors qu'il en parla à sa Saincteté il en dist plustost moins que trop, comme vostre Maiesté verra par le compte qu'il vous en rend par ses lettres.

Au demeurant ie n'ay iamaïs creü que le Pape eust la voloné que le grand Duc disoit, ny mesme que le grand Duc le creü. En quelque cause qu'il ait induit à feindre cette crainte, il n'y a plus perille que gagner enuers le

Pape, en donnant à penser qu'il auoit eü ceste mauuaise opinion de sa Sainteté & se craignoit de ce costé là. Mais pour le regard de vostre Majesté, il se peut estre proposé deux outrois fins: l'une, d'esprouuer ce qu'il en pouuoit promettre à vn besoin; dont il sçauoit en sa conscience qu'il auoit occasion de douter pour le fait du chasteau d'If & Isle de Pomegues. La seconde, pour auoir pretexte de demander l'argent qu'il vous auoit presté, & fonder là dessus la retention de vos places, ou la demande des cautions qu'il vouloit. Ce que ie coniecture de ce qu'il sçauoit que la grande Duchesse me dit vn iour, que si Dom Cesare d'Este eust eu en argent comptant ce que les Ducs de Ferrare auoient presté à la Couronne de France, il n'eust point perdu la ville & Duché de Ferrare. La troisieme fin pouuoit estre, pour vous donner occasion de le comprendre en la paix que vous feriez avec le Roy d'Espagne, comme il desiroit grandement. A tant, &c. SIRE, De Ferrare ce 8. Iuin 1598.

## A MONSIEUR DE VILLEROY.

## CXXXII.

**M**ONSIEUR, La lettre qu'il vous pleut m'escire le 21. d'Auril en response de celle que ie vous auois escrite le 5. Mars touchant l'arrest qui auoit esté donné au Conseil du Roy contre les Iesuites du College de Tournon, me fut rendu le 13. May, dont i'oubliai à vous donner aduis par Valerio. Aussi n'auois-je rien à y relier, sinon que comme lors que ie vous escriuis ie soumis le tout à vostre bon iugement, & à ce que vous en voyez de plus prés, aussi me conformeray-je tousiours à ce que vous iugerez le meilleur. Cependant l'esperance que vous nous donnez de la surseance de l'execution dudit arrest, & de celuy de la Cour de Parlement qui auoit esté donné auparauant, a de beaucoup seruy icy pour consoler & adoucir le Pape, qui en estoit fâché & irrité.

Le 27. May ie receus celles du Roy & vostres du 4. & le lendemain 28. May celle de sa Majesté du 29. d'Auril, & la vostre du dernier, sur le contenu desquelles ie rescriis à sa Majesté, & n'est point de besoin que ie vous en face icy de redite. Si i'eusse receu lors que i'estois à Florence celle qui concerne les marchandises que le Roy veut estre deliurees à Monsieur de Gondy, i'eusse peu mieux seruir ledit sieur de Gondy en presence que par lettres. Toutesfois la lettre du Roy, dont i'ay enuoyé en Italien la copie au grand Duc, est si expresse & claire qu'il eust esté malaisé d'y rien adiouster.

Par la vostre du 4. May ie voy que vous vous en allez à Rennes, & par les lettres qui ont esté escrites à Monsieur de Luxembourg le 11. i'ay veu comme vous y estiez. Si ie m'y fusse trouué ie me fusse mis en deuoir d'y seruir le Roy & vous: & ce d'autant plus que outre le deuoir commun que nous auons tous à sa Majesté, & à ses principaux ministres, ie tiens de la bonté de sa Majesté & de la vostre la premiere dignité Ecclesiastique de cette Cité, la & Diocèse.

Par mes lettres du 5. & 12. May vous aurez veu ce que i'auois fait avec le grand Duc, & entre autres choses comme, ie ne luy voulus rien passer de ce qu'il auoit despendu pour les forts & autres choses de l'Isle de Poniegues, & luy accorday seulement qu'il pourroit desmolir lesdits forts, & emporter ce qu'il voudroit sans deteriorer les lieux. Je conseilloy à son Altesse en parlant à ses ministres qu'il fist vn present au Roy desdits forts, attendu qu'il ne scauroit tirer des ruines aucun profit qui fust de consideration: ie ne scay ce qu'il fera. Surquoy ie vous diray maintenant vne particularité, qui estoit plus considerable lors que nous auions la guerre avec les Espagnols, qu'à présent que nous auions la paix avec eux; toutesfois pource qu'au temps le plus paisible il est tousiours bon de pouruoir à ce qui peut aduenir, ie ne lairray de vous représenter icy que de plusieurs propos qui me furent tenus à diuerses fois à Florence, ie recueillis que l'Isle de Poniegues est plus importante que celle d'If, & que Ratonneau, pour estre plus vers la mer, & plus haute que Ratonneau mesmes, & pour auoir vn port où peuvent sejourner entierement & longuement plusieurs galeres & autres vaisseaux malgré Marseille, comme nous auons veu de celles du grand Duc, non seulement à nostre dommage, & plus grand danger, mais aussi à trop grande honte & vergogne de la premiere Couronne de Chrestienté: laquelle commandant à vn si grand Royaume flanqué des deux mers les plus grandes, n'a point eu prouision de vaisseaux de guerre, ny moyen de se defendre de quatre meschantes galeres d'vn Duc de Florence, ny d'empescher qu'elles n'ayent mis à la France la chaisne au col, & les fers aux pieds. Mais pour vous continuer à vous dire ce que i'appris desdits propos; i'en recueillis aussi que si on ruinoit les forts qui ont esté bastis en ladite Isle, sans par mesme moyen gaster ledit port, il y auroit danger que pour l'importance de ladite Isle, auparauant ignorée & maintenant cogneüe, les Espagnols ne s'emparassent de ladite Isle, & du port d'icelle, & que par le moyen de tant de galeres qu'ils ont, ils ne fissent d'autres forts en moindre temps que n'auoient fait celles dudit grand Duc, & tinssent en subiection les deux autres Isles Ratonneau & If, & la ville de Marseille, & en alarme toute la Prouence, & la France mesmes. Mais si en ruinant les forts, & abandonnant ladite Isle de Poniegues, on gastoit le port, de façon qu'on ne s'en peut seruir, les ennemis ne se pouuans plus preualoir de ladite Isle, ny demeurer seurement autour d'icelle, ils ne s'en empareroient point, & moins y bastiroient aucun fort. Au contraire si le Roy vouloit tenir fortifiée ladite Isle de Poniegues, il faudroit non seulement maintenir, mais aussi meliorer ledit port, lequel d'vn costé de l'entree a vn rocher esbreché, qui donne entree à vn certain vent qui incommode les vaisseaux qui sejournerent audit port. Ie vous escris tout cecy, pource que si le Roy apres auoir fait visiter ladite Isle, forts, & port de Poniegues, trouuoit que ce que dessus est vray, & qu'il seroit expedient de tenir fortifiée cette Isle, afin de tenir les ennemis plus loin, & les siens plus pres des occasions qui se presentent ordinairement sur la mer, il y auroit moyen auant que les forts fussent abbatuz, d'en faire avec le grand Duc, qui ne scauroit, comme dit est, rapporter quasi aucun fruit de ses ruines: comme aussi il y a moyen & occasion à present de gaster ou meliorer ledit port, pour auant

qu'il y a vn grand galion du grand Duc , que son Altesse vouloit faire remplir de pierres , & emboucher ladite brèche qui est à l'entree dudit port , & par ce moyen rendre ledit port plus seur & plus commode. Et comme ce galion ainsi chargé & rempli de pierres estant mis à l'endroit de ladite brèche accommoderoit le port , aussi si on le mettoit de son long , on en bouscheroit toute l'entree du port , & en rendroit on ledit port inutile : & l'une ou l'autre de ces deux choses s'y pourroit faire plus facilement quand le grand Duc enuoyera leuer les gens qu'il a és Isles d'If & de Pomegues par ses galeres , dont les forçats trauiilleroient à ce que dessus. Et au cas qu'il fust trouué bon de garder ladite Isle de Pomegues , on pourroit tenir d'autant moins de garnison au chasteau d'If.

Outre ce que dessus , on me parla fort longuement d'escrire par delà que les Capitaines qu'on mettroit au chasteau d'If & en ladite Isle de Pomegues , fussent mis immediatement par sa Majesté , & ne dépendissent nullement des gouverneurs de Prouence , & que les soldats qu'on y mettroit ne fussent point du païs, ains des autres Prouinces du Royaume. Mais ie ne veux entrer en telles choses qui sont de la preuoiance du Roy & des bons Conseillers que sa Majesté a prés d'elle. Bien crois-je que lors qu'on deliberera quel de ces deux lieux il faudra garder , & par qui, on aura esgard non seulement à ce qui pourroit donner satisfaction presente à ceux-cy ou à ceux-là , mais aussi à ce qui fera de la seureté de l'Estat tousiours à l'aduenir, & à la nature des lieux qui sont frontiers & maritimes, où la raison & l'experience ont monstré que les chasteaux & autres forts sont plus necessaires , & à l'horrible rebellion que nous auons veüe detant de gouverneurs & de villes , & de Marseille mesme qui a si long temps tenu en trauersetout le Royaume , & aux mauuaises humeurs dont la France n'est encore purgée.

Cette lettre vous sera renduë par le sieur de Marquemont , qui est vn de mes bons amis , de fort bon entendement , & de belles & bonnès lettres , & capable d'estre employé en quelque chose de bon.

Le sieur Mario Bandini est arriué en cette Cour depuis enuiron cinq iours , & fait grande demonstration de toute bonne affection au seruice du Roy & au bien de la France , desirant aussi qu'on verifie ce qui luy estoit deub par le feu Roy , suiuant la poursuite qu'en fait en Cour l'Abbé son frere. En quoy on feroit encor grand plaisir à Monsieur le Cardinal Bandini leur frere, lequel outre la dignité de Cardinal qui luy donne grande autorité , est personnage de grand entendement & valeur pour pouoir faire de bons seruices au Roy & à la France , à quoy il a encore toute bonne inclination de soy-mesme. A tant , &c. Monseigneur , &c. De Ferrare ce 8. Iuin 1598.

A V R O Y.

CXXXIII.

S I R E,

Je partis de Florence le 5. May, apres estre demeuré d'accord avec Monsieur le grand Duc de Toscane de ce qui auoit pleu à vostre Maiesté me commettre, comme ie vous en donnay sommairement aduis par mes lettres de ce iour-là. Et estant arriué en ceste ville de Ferrare le 8. de May, ie vous en fis vne plus ample depesche qui a esté portee par le courier Valerio, en datte du 12. May. Depuis ie receus le 19. dudit mois de May la lettre qu'il pleut à vostre Majesté m'escrire le 29. d'Auril, & ensemble le memoire qui accompagnoit ladite lettre, touchant certaines marchandises qui auoient appartenuës aux habitans de Marseille, & est trouuees dans vn nauire appellé sainte Claire, & prises par les galeres dudit Seigneur grand Duc pendant la rebellion desdits habitans. Ce iour-là mesme que j'eus receu ladite lettre de vostre Majesté, ie la traduits en Italien, & en escriuis vne mienne audit Seigneur grand Duc, par laquelle ie respondois à vne sienne du 26. May, qu'il m'auoit escrete sur l'office qu'il vouloit estre fait, duquel i'ay escrit à vostre Maiesté par ma lettre d'hier. Et puis luy escriuis côme i'auois receu ladite lettre de vostre Maiesté du 29. d'Avril, de la teneur qu'il verroit par la traduction que ie luy en enuoyois, le suppliant de me commander la responce que i'auois à faire sur ce à vostre Maiesté: & le lendemain 29. dudit mois de May, duquel i'auois datté la lettre que ie luy escriuois, ie baillay le paequet où estoit madite lettre & traduction à son Ambassadeur, qui luy depeschoit vn courier pour autre chose. Ce iourd'huy i'ay receu vne lettre dudit Seigneur grand Duc du 6. de ce mois, par laquelle il me dit auoir receu madite lettre du 29. May, & replicque à la premiere partie de icelle avec paroles d'honnesteté & courtoisie, mais ne me respond rien à la seconde partie, où ie parlois de la lettre que i'auois receuë de vostre Maiesté touchant lesdites marchandises, & de la traduction que ie luy en enuoyois, & le priois de m'escrire ce que i'auois à respondre à vostre Maiesté. Je m'en suis allé trouuer son Ambassadeur, pour scauoir s'il auroit eu commandement de m'y respondre quelque chose de bouche, mais il m'a dit qu'on ne luy en auoit rien escrit. Ce silence de ladite seconde partie de ma lettre, qui ne peut estre aduenu par oubliance, me donne à penser que ledit grand Duc a trouué quelque chose en ladite lettre de vostre Maiesté qui luy a despleu, & que pour cela il a laissé expressément de m'y respondre. Cela mesme me fait croire qu'il ne veut point vider ses mains desdites marchandises, & possible entend-t'il que ce qui a esté pris par ses galeres en iceste guerre, contre des ennemis communs tant de vostre Maiesté que siens, est à luy, & qu'on n'a deu, ny pû iuger autrement en France, & qu'il n'est point sujet à tel iugement. Je pourray bien luy en escrire, ou bien ~~me faire~~ Vint son Secrétaire d'Estat, plus pour ma descharge, que pour es-

perance que l'aye qu'il en face autre chose, puis qu'il n'y a rien voulu respondre à la premiere fois, & donneray aduis à vostre Maiesté de ce que j'en auray tiré. A tant, &c. SIRE, &c. De Ferrare ce 9. Iuin 1598.

## A MONSIEVR DE VILLEROY.

## CXXXIV.

**M**ONSEIGNEUR, Par vne de vos lettres du 14. May, il vous pleut m'escrire qu'auant que le Roy partist de Rennes, ie serois recommandé à Messieurs du Parlement: outre que vous auiez déjà recommandé mes affaires à Monsieur Preuost, Tresorier de mon Eglise, & mon Vicaire general, dont ie vous remercie tres-humblement, recognoissant le tout de vostre bonté & grace, & de l'habitude que vous auez faite de me protéger & bien faire. A quoy ie rapporte aussi la rescription qu'il vous a pleu depuis faire retirer du Tresorier de l'Espargne, pour la pension que vous m'auiez fait donner par le Roy, & l'aide & secours que vous m'offrez encores pour enestre payé. Ce que ie ressens d'autant plus en mon cœur, que moins i'ay de moyen de le recognoistre par quelque bon seruice: mais il ne m'en manque que l'oecasion, laquelle se presentant, ne me sera moins agreable que tant de bien & d'honneur que ie reçois de vous tous les iours. Nous sommes après à seruir Monsieur de Sancy du gratis de l'expedition de l'Abbaye de Villeloin, dont il vous pleut m'escrire par vne lettre du 28. Mars, laquelle ie receus le 11. Iuin. A tant, &c, Monseigneur, &c. De Ferrare ce 21. Iuin 1598.

## A MONSIEVR DE VILLEROY.

## CXXXV.

**M**ONSEIGNEUR, Par la lettre que j'escriuis au Roy le neuuesiesme Iuin, ie luy donnay aduis, entre autres choses, comme le grand Duc de Toscane ne m'auoit rien respondu à ce que ie luy auois escrit le vingtnuuesiesme May, touchant les marchandises qui furent prises par les galleres sur les Marseillois durant la rebellion de Marseille, lesquelles marchandises sa Maiesté vouloit estre deliurees à Monsieur de Gondy, & adiousteray sur la fin de madite lettre que j'en escrirois de rechef à son Altesse, ou bien au sieur Vinta son Secrétaire d'Estat. Suivant ceste mesme delibération j'en escriuis audit sieur Vinta le 15. dudit mois de Iuin; le priant de scauoir de son Altesse, & m'escrire ce que j'aurois à respondre au Roy, ou pour le moins faire que son Altesse escriuist à Monsieur le Cheualier Guiciardin pour en faire la respôse à sa Majesté. Ledit sieur Vinta me respondit par vne sienne du 20. qu'on auoit escrit audit sieur Cheualier Guiciardin, qu'il aduertiist le Roy de la seception de la lettre que j'auois écrite à son Altesse, & qu'il lui redist cōpte de tout ce qui auoit esté fait des-



dites marchâdises, qui est tout ce qui me restoit à vous escrire sur ce fait-là.

Depuis madite dernière lettre au Roy, j'en ai receu trois des vostres; les deux premières escrites à Rennes le 14. May, la troisième à Paris le 16. Juin. Et quant à la plus grande des deux premières, qui est quasi toute sur le subçon & crainte que Monsieur le grand Duc de Toscane monstroir auoir que le Pape luy fist la guerre, ie pense y auoir satisfait par mes precedentes, auxquelles ie n'ay rien qu'adiouster, persistant plus que iamais en l'opinion que j'ay tousiours eue que ce n'estoit que saintise & simulation, pour quelque fin extrauagante, & si ie ne me trompe, peu aecortement pourpensee, & encores moins heureusement succedee. L'autre lettre du 14. May, qui concerne mon particulier, ie vous y respondray par vne autre mienne que ie vous feray apres cette-cy.

Par celle du 16. Juin il vous a pleu m'escrire que le Roy estoit demeuré content du seruice que ie luy auois fait à Florence, dont ie loue Dieu; comme en toute cette negociation ie ne me suis proposé que le bien de ses affaires, & son contentement. Quant aux cautions, on ne vous en peut demander des estrangeres; car l'article des cautions, qui est le 3. a esté restraint à des François expressement, afin qu'on ne peust demander des estrangers, & encores des François, qui lors de la nomination desdites cautions seroient prés le Roy ou à vingt lieues aux enuiron; & ce pour les considerations par moy desduittes es memoires que ie vous enuoyay par Valerio pour la declaratiõ & iustificatiõ des articles de l'accord, auxquels memoires ie me remis, & mesmement à ce que j'en ay dit sur l'article cinquieme.

Quant à ce que le Roy eust voulu qu'on eust pris autre pretexte que celui des heretiques, vous aurez peu voir par le commencement de mesdits memoires, que ie l'eusse desiré aussi, & que ie fis difficulté sur ce mot d'heretiques, & les causes pourquoy en fin ie le laissay passer. A quoy j'adiouste maintenant sur ce qu'il vous a pleu m'en escrire, que cette clause est en la preface seulement, & non es articles accordez, & sont paroles qu'on appelle narratiues; lesquelles ne decident rien; encores est ce vn narré des choses passées entre le grand Duc & le Capitaine Bosset, à quoy le Roy n'a aucune part, & personne ne peut iustement se plaindre de sa Majesté pour chose que lesdits grand Duc & Capitaine Bosset ayant peu penser, dire, ou faire, sans qu'elle y ait rien mis du sien, & moins peut tel recit preiudicier au seruice fait à sa Majesté par qui que ce soit; pouuant mesme ledit recit estre interpreté contre sa Majesté mesme, eu elgard à ce que lors en l'an 1591. elle n'estoit encores Catholique. Aussi n'estimai-je pas qu'il soit besoin que sa Majesté à present approuue cette narratiue, n'y qu'en y trouue autre expedient, & suffit qu'elle ratifie les articles accordez, ou les promesses que j'en ay fait au grand Duc pour & au nom de sa Majesté, sans parler de la susdite narratiue, ny de la preface, en laquelle mesme n'est point fait mention du Roy ny de moy sinon que sur la fin, où il est dit que sa Majesté a fait demander ces places par moy, & tout ce qui est dit auparauant en ledite preface n'est qu'un caprice du grand Duc, pour se purger enuers les Espagnols de la garnison qu'il enuoya & entretenue en l'ile d'Elbe, laquelle il a employé lesdits desseins, à quoy ie ne voulus m'opiniastier d'aucunage, mais que cela luy profitoit à lui, ou pour le moins le contenoit, & ne nu-

soit

soit de rien au Roi, ny mesme à ceux qui y sont nommez, & me facilitoit à moi ma negociation, & me donnoit tant plus de moyen de luy tenir rigueur en autres poincts qui importoit au service de sa Majesté plus que cela. Au demeurant, ie louë grandement la façon dont ledit Seigneur grand Duc a esté compris en la paix, & me semble qu'il est beaucoup meilleur ainsi pour lui que comme il vouloit: vous assurant que ie le jugeay ainsi de moi-mesme la premiere fois que ie vis icy les articles de la paix, qui courent par cette Cour long-temps-y a; en quoi ie me suis d'autant plus confirmé apres auoir veu ce qu'il vous a pleu m'en escrire. Aussi en la clause que ie vous en manday par ma lettre du 12. May, n'y auoit rien du mien que les mots François au lieu d'autant d'Italiens qu'ils m'auoient baillez par escrit, comme ie vous escriuis aussi par ma lettre. On ne m'a point encores parlé de ce que Monsieur le grand Duc de Toscane vouloit estre nommé auant Monsieur le Duc de Lorraine: si on m'en parle, ie me souuiendray des responses que vous m'avez apprises, A tant &c. Monseigneur, &c. De Ferrare ce 10. Iuillet 1598.

## A MONSIEVR DE VILLEROY.

## CXXXVI.

**M**ONSEIGNEVR, Sur le retour de Monsieur l'Abbé d'Orbais à Paris, i'ai estimé estre de mon deuoir de vous tesmoigner que tout aussitost qu'il fut aduertí de l'accord que Monsieur de Guise auoit fait avec le Roi il me vint trouuer, & se conjoínt avec moi, me disant entre autres choses, que luy ayant esté en sa ieunesse au service de feu Monsieur le Cardinal de Lorraine, & ayant receu beaucoup de bien & d'honneur de luy, if n'auoit peu faire de moins apres la mort dudit Seigneur Cardinal, que de continuer son service à Messieurs ses neveux, comme il auoit fait fort fidellement, Et estans depuis suruenus les partis & les troubles en France, if auoit esté porté avec ces Messieurs au parti de la Ligue, dont il loítoit Dieu qu'il estoit sorti avec eux; Qu'il s'asseuroit qu'ils seroient toute leur vie bons & fidelles subiets & seruiteurs du Roi: mais quand le malheur porteroit autrement, il me protestoit & iuroit que iamais pour quelque occasion que ce fust, il ne s'entreroit plus à aucun parti, & demeureroit tousiours fidelle & obeyssant au Roi, & depuis il m'a plusieurs fois & à diuerses occasions reiteré ce mesme propos, & confirmé par toutes ses actions & deportemens: de quoi ie m'assure que vous l'aimeriez mieux, sans qu'il soit besoin que ie presume d'entrer en autres recommandations pour luy enuers vous. A tant, &c. Monseigneur, &c. De Ferrare ce 11. Iuillet 1598.

## A MONSIEVR DE VILLEROY.

CXXXVII.

**M**ONSEIGNEVR, Me trouuant en ceste ville de Venise au iour qu'on depeschoit l'ordinaire pour Lyon, ie n'ai voulu faillir de vous escrire comme Valerio arriua à Ferrare le 14. de ce mois au soir, & me rendit la depesche du Roy & vostres du dernier de Iuin. 1. 3. & 4. de ce mois. Et d'autant que le Roy me commandoit de venir en ceste ville, & puis aller à Florence pour les occasions portees par ladite depesche, ie partis de Ferrare Samedy 18. de ce mois, & arriuai en ceste ville le Dimanche 19. au matin à heure de disner. Le Lundy au matin 20. ie fis sçauoir au Duc & à la Seigneurie cōme i'estois venu de la part du Roy avec lettres de sa Majesté, & charge de leur rendre compte de la paix que sa Majesté auoit faite avec le Roy d'Espagne, & de m'en conjoindre avec eux, & que à leur commodité ie desirerois aller leur rendre lesdites lettres & exposer ma charge. Ils enuoyerent tout aussi tost vers moy deux qu'ils appellent SAV VIN vn de terre ferme, l'autre DEL LIORDIN; qui me dirent de la part du dit Duc & Seigneurie qu'ils se resioüissoient fort de ma venuë, mais neantmoins de ce qu'ils n'en auoient esté aduertis plustost pour enuoyer au deuant de moy me recevoir & recueillir, & qu'ils auoient commandement de me mener en vn logis que la Seigneurie auoit commandé m'estre preparé. Et combien que ie m'excusasse d'aller audit logis, & les priasse de me laisser en celui où i'estois, ie ne sceus tant faire qu'ils ne me tirassent audit logis, avec tous ceux que i'ay menez avec moy, où nous sommes traictez avec toute magnificence & splendeur. Et quant à l'audience que i'auois demandee, lesdits SAV VIN me dirent que ie l'aurois le lendemain au matin, & l'apres disnee du mesme iour de Lundy le Duc m'enuoya vn de ses Secretaires, me dire que le lendemain au matin il enuoyeroit le Cheualier Duodo avec vn nombre de Senateurs pour m'accompagner à l'audience. Et de fait le lendemain Mardy 21. Iuin, vint ledit Seigneur Duodo avec environ 30. Senateurs vestus de robes rouges, & me conduisirent à Saint Marc en la salle du College, qu'on appelle, où estoit le Duc avec ses Conseillers, & autres qui ont accoustumé de l'y assister. Et ledit Duc m'ayant fait soir à sa droite, ie luy fis des recommandations de la part du Roy, & luy bailay les lettres de sa Majesté, avec vne traduction en langue Italienne, laquelle i'auois faite sur la copie que vous m'en auiez enuoyee; Et apres que ladite traduction eut esté leue à haute voix par vn des Secretaires, ie fis les complimens que le Roy m'auoit commandé au mieux que ie sceus, & au plus près de l'intention de sa Majesté, & m'y fut respondu par ledit Duc tres à propos, & avec grande demonstration du sentiment qu'ils auoient de l'honneur que le Roy leur faisoit, & de l'obseruance & reuerence qu'ils portent à sa Majesté, & du seruice qu'ils desirent luy rendre, ainsi que vous verrez par vn sommaire de ce que ie leur dis, & de ce qui m'y

fut respondu, que ie vous enuoyeray par la premiere commodité ; auquel ie n'entre pour cette heure, de peur de n'auoir assez de temps pour l'acheuer, pour estre le courier sur le point de partir ; & moy fort destourné par des visites & complimens qu'il faut accepter & rendre necessairement, tant pour la reputation du Roy , que pour l'humanité & ciuilité commune.

Et le mesme iour de Mardy 27. apres disner, ie fus visiter le Nonce , & Monsieur le Cardinal Priuli Patriarche de cette ville, & hier ledit Seigneur me rendit la visite, & les Ambassadeurs d'Espagne & de Sauoye me vindrent visiter, comme firent aussi les Agens del'Empereur, & du grand Duc de Toscane, & du Duc de Mantouë, ausquels ie rendray la visite, & commenceray dès aujourd'huy incontinent apres que i'auray acheué d'escire.

L'Ambassadeur d'Espagne s'appelle Dom Inigo de Mendoza, & est frere de l'Amiral d'Aragon que vous auez par delà, & estoit dans Paris lors que le Roy y entra la premiere fois apres sa conuersion, & se louë infiniment de la bonté & clemence dont sa Maiesté v'sa enuers luy, & enuers les autres Espagnols qui se trouuerent lors en ladite ville de Paris, fait profession d'en auoir grande obligation & gratitude à sa Majesté, & de desirer luy rendre tout seruice si iamais il s'en presente occasion. Ie le receus le plus honorablement qu'il me fut possible avec le rochet & mantelet, comme i'auois receu le Nonce, & auois donné ordre que cependant que ledit sieur Ambassadeur & moy serions ensemble, l'on fit vne belle colation à ses gens avec du meilleur vin & force confitures, ce qui fut fait avec grande allegresse & contentement des deux nations, les François inuitans & seruans les Espagnols, & beuuans à eux & à la santé du Roy d'Espagne, & les Espagnols les pleigeans & beuuans à la santé du Roy, & faisans entr'eux à qui plus se feroit de caresses, de bonne chere, & d'offres. Ce qui a esté noté & trouué d'autant meilleur, qu'en la Cour de Rome, où la paix a esté procuree, & où elle a esté plustost sçeuë, les Ambassadeurs de France & d'Espagne ne se sont point encores veus depuis ladite paix; mais la faute en est à celui d'Espagne, d'autant que sans entrer au fait de la preface, Monsieur de Luxembourg est venu resider en ladite Cour de Rome long-temps apres luy, & la coustume est que les derniers venus sont les premiers visitez. Ie me depeschay d'icy le plustost que ie pourray, pour aller à Florence suiuant ce que le Roy m'a commandé. I'ay receu des sieurs Capponi de cette ville, en vertu de la lettre que vous m'auiez enuoyee de Monsieur Zamet, les 500. escus portez par icelle, dont ie remercie tres-humblement le Roy & vous. Ils dresserent eux-mesmes en langue Italienne la lettre double que ie deuois vous en escrire, & la souscriuis en François à l'accoustumee, afin que ma souscription fust mieux cogneuë de vous.

Aussi ie receus par Valerio les quatre cens escus que Monsieur du jardin luy auoit baillez de la pension qu'il vous a pleu me donner par le Roy. I'ay escrit à Monsieur Marechal cy-deuant Secretaire de Monsieur le Cardinal de Gondy, qu'il receust vos commandemens sur ce qu'il auoit à faire pour la sollicitation & recouurement de ce qui en reste en cesle année.

Je suis icy fort assisté des sieurs Camille de la Croix Agent du Roy , & Pierre Vidal maistre des courriers de sa Majesté , tous deux fideles & diligens seruiteurs du Roi vieux & pauvres, pour n'auoir esté payez de leur pension depuis vn fort long-temps à cause de nos miseres. Ils esperent qu'à present que la France sera en repos, & que le Roy n'aura besoin de tant despendre comme il faisoit en guerre, ils seront recogneus de leurs longs seruices, & ont toute leur esperance en la bonté de sa Majesté : & en la protection & faueur que vous auez accoustumé de despartir à leurs semblables, & en particulier à eux mesmes, qui vous sont tres-obligez mesmes de ce qu'il vous pleust dernièrement les faire coucher en l'Estat pour quatre cens escus de pension chacun. Ils desirent & vous supplient, qu'en continuation & accroissement d'autres obligations, il vous plaise tenir la main qu'ils en soient payez, & que l'assignation ne leur en soit point donnée en pais où ils n'ayent point de cognoissance, ains sur la recepte de Paris où il se trouuera tousiours quelqu'un de tant de gens à qui ils ont fait seruice qui en fera solliciter le payement pour eux. Je vous en supplie aussi pour eux de toute mon affection, pour la compassion que i'ay d'eux, & pour ce qu'il me semble qu'il y va de la conscience, & encores aucunement de la reputation de la Couronne, à la veuë mesmement de ceste Seigneurie.

Il y a encores le Seigneur Comte Gioseppe Porto de Vincence, auquel depuis la mort du Comte Leonard son frere il vous pleust expedier deux breuets, l'un d'une pension, l'autre d'une place de gentilhomme, ordinaire de la chambre du Roi, & les lui enuoyer comme vous luy auez escrit cy-deuant; mais le malheur a porté qu'il n'a point receu lesdits Breuets, n'y esperance de les receuoir meshuy apres vn si long-temps; & partant il vous supplie de les lui vouloir enuoyer de nouveau. Je le cognois il y a vngt ans pour affectionné à la Couronne de France, & sçay que toute sa maison a tousiours fait ceste profession. A tant, &c. Monseigneur, &c. De Venise le 23. Iuillet 1598.

---

## A MONSIEVR DE VILLEROY.

### CXXXVIII.

**M**ONSEIGNEVR, l'adiousteray cette-cy à vne autre que ie viens de vous escrire, pour vous asseurer encores vn coup que ie me desespereray d'icy le plustost qu'il me sera possible, & que sans m'arrester à Ferrare, où il faut que ie retourne, ie passeray outre par Florence, pour faire enuers le grand Duc & la grand' Duchesse le compliment que le Roy m'a commandé, à quoy il n'y aura point de difficulté. Mais quand à ce que l'on veut que le grand Duc se départe des cautions qui luy ont esté promises, ie me doute qu'il n'en voudra rien faire, encores que i'y feray ce que ie

pourray pour la briéueté du temps , pour fournir lesdites cautions & en bailler les instrumens pour tout le mois d'Aoust , par ainsi ie vous prie d'y aduiler en tout euenement.

I'ay parlé à Monsieur le Cheualier Duodo des diamans de Monsieur de Sancy , & encores au sieur Paulo Cardo qui les a , lesquels m'ont dit qu'il n'y a point de moyen de faire que la Seigneurie les achepste , & qu'il n'y faut plus penser ; Qu'autresfois ils auoient pensé que le Vaïoude de Moldanie desirant la faueur & intercession du Roy aupres du grand Seigneur les pourroit achepster , pour les donner aux Sultans qui luy auroient aydé à estre remis : mais ie ne sçay comment vn pauvre Prince hors de son Estat , qui , à mon aduis , a bien affaire à s'entretenir , pourroit achepster des bagues de si haut pris ; outre que le Turc auroit bien à faire à le remettre , quand bien il l'entreprendroit. Depuis peu de iours il est arriué à Milan vn de la part du Cardinal Albert , qui cherche des bagues pour donner à l'Infante la future esponse , & ledit sieur Paulo Cardo a baillé vn patron du grand diamant en crystal pour estre porté à Milan , & montré à celuy qui a esté enuoyé par ledit Cardinal , dont ledit Cardo attend responce , qui est tout ce que ie vous puis escrire touchant lesdits diamans.

Le lendemain que Valerio fut arriué à Ferrare , i'escriuis à Rome à Monsieur Serafin pour auoir copie de la dispense de mariage dont vous m'auiez escrit , & en attends responce.

I'iray me licentier demain au matin de ses Seigneurs , Dieu aidant , & partiray apres demain , que nous compterons le 25. Iuillet , pour Ferrare , où ie n'arrestteray que le moins que ie pourray. A tant , &c. Monseigneur , &c. De Venise ce 23. Iuillet 1598.

## A MONSIEVR DE VILLEROY.

## CXXXIX.

**M**ONSEIGNEUR, Ie vous escriuis de Venise le 23. Iuillet, par cette cy ie continueray à vous escrire ce qui ensuiuit depuis. Le mesme iour apres vous auoir escrit, ie rendis la visite à l'Ambassadeur d'Espagne, & à celuy de Sauoye, & le lendemain aux agens de l'Empereur, & du grand Duc, & du Duc de Mantouë. Le mesme iour du lendemain, au matin, à sçauoir le 24. dudit mois de Iuillet, qui estoit vn Vendredy, ie fus prédre cõgé de la Seigneurie, accõpagné de deux Sauij de terre ferme qu'elle m'enuoya : & l'apres disnee vint de leur part vn qui m'apporta la somme de mille escus de leur monnoye , à raison de sept de leur liure par escu , en quatre sacs de toile rouge, & en pieces d'argent de quarante de leurs sols. Ie fis difficulté de les prendre, & les eusse refusez du tout : mais il me fut remonstré, ce que ie sçauois des long temps auparauant , que c'estoit la cou-

stume en tel cas, & que mon refus seroit pris non seulement à incivilité, mais aussi à quelque espece d'affront, & interpreté pour vne prohibition aux Ambassadeurs de ceste Republique de iamaïs rien prédre de nos Roys. Je deuray donc l'occasion de ceste commodité au Roy & à vous, & l'adiousteray à tant d'autres biens & honneurs que i'en reçois tous les iours.

Le Samedi 25. Iullet ie partis de Venise pour Ferrare, où i'arriuy le Lundy 27. & n'y sejourney que le lendemain 28. & en partis le Mercredi 29. pour Florence, où i'arriuy le Samedi premier iour de ce mois d'Aoust au soir. Avant qu'arriuer à Firenzole, qui est le premier logis de Toscane en venant du costé de Bologne, ie fus rencontré le Vendredy au matin dernier iour de Iullet par le Comte Abert Castello Bolognois, bien accompagné, que le grand Duc & la grand'Duchesse m'enuoyerent au deuant. Lequel, arriez que nous fusmes à Firenzole auant disner, me mena au logis du Podesta, où ie trouuy le Fourrier major de son Altesse, avec force officiers & pages, pour le traitement & seruices que leurs Altesces vouloient que l'on me fist. Et de là, apres y auoir disné & reposé, me mena souper & coucher à l'Escarperie, au Palais que le grand Duc y a, & le lendemain au matin premier iour de ce mois d'Aoust disner à Pratolin. En arriuant le soir à Florence, ie trouuy hors la porte de la ville le Seigneur Dom Giuanni de Medicis avec deux carrosses de velours, & grand nombre de gentils-hommes à cheual, qui me receut avec grand honneur, & me conduisit au Palais de Pitti en vn des plus beaux appartemens qui y soient; & à peine y estois-je arriué que le grand Duc m'y vint voir. Je vous dis ces choses, non pour aucun goust particulier que i'y prenne, mais pour ne manquer au deuoir que i'ay de vous aduertir de l'honneur que leurs Altesces font au Roy en la personne de ceux que sa Majesté leur enuoye.

Le Dimanche au matin 2. de ce mois apres la Messe i'eus audience du grand Duc, & luy ayant présenté les lettres de sa Majesté, ie fis le compliment touchant la paix en la meilleure façon que i'ay peu & sceu, comme vous verrez par vn sommaire à part que ie vous enuoyeray par la premiere commodité, & de cé que son Altesse m'y respondit, ne pouuant pour ceste heure m'y estendre d'auantage non plus qu'à Venise, pour les visites que i'ay aujourd'huy à recevoir & rendre, & pour auoir à partir pour Ferrare, & m'en aller coucher à Pratolin apres que ie vous auray fait ceste dépesche, qui vous sera portée par vn courrier que le grand Duc veut enuoyer par delà en grande diligence: dequoy i'ay esté fort aise, pour vous pouuoir aduertir au plutost de ce qui se passe. Je ne luy parlay d'autre chose pour ceste fois là, suivant ce que le Roy me commandoit. L'apres disnée i'eus audience de Madame la grand'Duchesse, & luy rendis semblablement les lettres de sa Majesté, & fis pareils complimens enuers elle sur le fait de la paix.

Et pource que Monsieur le Cheualier Vinta Secrétaire d'Estat de son Altesse, m'auoit aduerty qu'apres que i'aurois parlé à madite Dame le grand Duc viendroient en la chambre de ladite Dame auant que i'en partisse, pour pouuoir deuiser tous trois ensemble, ie vis bien que me trouuans pour la seconde fois avec le grand Duc, il faudroit que ie luy parlasse du fait de

l'accord, & de la ratification, & m'en preparay. Et apres y auoir bien pensé, j'estimay, pour plusieurs bonnes considerations deuoir changer quelque chose de la procedure portee par la depesche du Roy du premier iour de Juillet. Je dis donc à son Altesse du commencement, en la presence de la dite Dame, le contentement que le Roy auoit de la bonne volonté que son Altesse luy auoit monstree au fait du chasteau & Isle d'If, & comme sa Maiesté s'en sentoit obligee à cherir & priser son amitié plus que jamais: Qu'aussi auoit sa Maiesté ratifié purement & simplement, & sans aucune exception, les articles qui sur ce auoient esté accordez, & m'auoit enuoyé les lettres patentes de sa ratification, lesquelles en ce poinct ie tiray de mon sein, & les luy monstray: bien le prioit sa Maiesté, qu'il luy pleust de grace la deliurer & dispenser de la prestation des cautions portee par l'un desdits articles; non que sa Maiesté ne fust disposee & prestee à bailler scldites cautions, & à s'accommoder en tout & par tout à la volonté de son Altesse, mais pour certaines considerations que sa Maiesté le prioit d'entendre, & peser en soy mesme. Premièrement, que la forme desdites cautions & obligations prescrite par ledit article estoit nouuelle en France, non seulement en choses appartenantes au Roy, mais aussi entre les personnes priuees. Secondement, telles cautions seroient prejudiciables à la reputation, & aux affaires du Roy: à la reputation, pour ce qu'il sembleroit que sa Maiesté ne voulust ou ne peust payer vne debte si bien & si loyaument deuë, & fust failly de foy ou de moyens: aux affaires, pour la consequence d'un tel exemple, d'autant que sa Maiesté deuant encores à d'autres, & ayant à contracter à l'aduenir avec plusieurs sortes d'hommes, chacun voudroit & demanderoit deormais pareils cautions apres vne telle ouuerture. Entre autres, il estoit deub de grandes sommes aux Suisses, & falloit de temps en temps renouveler l'alliance avec eux, qui ne faudroient de demander semblables cautions & obligations, puis qu'elles auoient esté demandees & obtenues de son Altesse, & sa Maiesté ne s'en pouuant defendre, s'en trouueroit en grand peine. En troisieme lieu, quand lesdites cautions seroient baillies à son Altesse en la façon portee par ledit article, & qu'il y en auroit mille obligations passees encorres en forme plus rigoureuse, fust ce qu'elles ne luy seruiroient de rien pour l'assurance de sa debte, si le Roy en vouloit suspendre l'exécution; & les Seigneurs du Conseil n'en deviendroient point plus soigneux & diligens d'en faire payer son Altesse, mais en demeureroient oisieux & irrités, & pourroient en trauerser le payement, quand ce ne seroit que pour faire pet de l'ouïe à tous autres de plus demander telles cautions & obligations. Par ainsi, puis qu'elles prejudicioient si fort au Roy, & ne profitoient de rien à son Altesse, ains luy auisoient, & que le tout dependoit de la bonne foy du Roy, sa Maiesté le prioit de s'en departir; laquelle s'en sentiroit fort obligee, & ensemble tous les Seigneurs de son Conseil, & seroient d'autant plus soigneux que son Altesse fust payee & contente en toutes autres choses.

Après cela, je luy dis qu'il y auoit d'autres moyens moins odieux, & plus secrets pour luy; Qui estoient la cognoissance que le Roy feroit de la debte, & de la ratification qui s'en feroit à la chambre des Comptes, sa Maiesté en donneroit bonne assignation sur la recette generale de Lyon, pour en faire



re payer son Altesse à raison de cinquante mille escus par an , & feroit que les receueurs generaux d'icelles s'obligeroient enuers son Altesse de luy payer ladite somme par chacun an des deniers de leurs charges , & que les Seigneurs du Conseil luy promettoient de ne diuertir ny reuocquer l'assignation pour quelque cause que ce fust.

Le grand Duc me fit vne response fort genereuse & heroi'que, de laquelle ie l'estimeray & loueray toute ma vie , aussi me fit-il en cela vn des plus grands plaisirs que i'aye i'ama'is receu , pour la peine que ie voyois où vous estiez. Il me respondit doncques , que la demande que ie luy faisois meritoit bien qu'il pensast à la response , & neantmoins il m'y vouloit bien respondre promptement, & sans plus y penser ; Que quand il n'i'roit que du seul contentement du Roy , il se départiroit desdites cautions : mais il se mouuoit encores particulièrement par la consideration des Suisses , desquels il scauoit combien l'alliance estoit vtile au Roy & à sa Couronne , & recognoissoit qu'ils se pourroient preualoir de telles cautions , & en mettre le Roy en peine : & partant il se departoit volontiers de la promesse desdites cautions , & en quittoit sa Maïesté ; Que si n'estoit le besoin que son Altesse & ses enfans pourroient vn iour auoir des sommes à luy deuës , & que ce seroit indiscretion & presumption de donner à plus riche & plus grand que soy , il remettoit volontiers toute la dette à sa Maïesté. Bien luy garderoit-il fidellement & diligemment tout ce qui en seroit payé cy-apres , pour en seruir sa Majesté à toutes les fois qu'elle commanderoit ; Que si ie voulois ie pouuois rapporter avec moy , & renvoyer au Roy les lettres de ratification , & qu'il se contenteroit de la seule parole de sa Maïesté. Je le remerciai en la meilleure forme qu'il me fut possible , & luy dis entre autres choses, que le Roy se sentiroit autant obligé par ceste sienne, genereuse & vrayement royalle façon de proceder , comme pour les plaisirs mesme que son Altesse luy auoit faits : & que pour mon regard (encoresque ie ne deusse ny peusse estre pour rien compté ) neantmoins ie luy en demeurerois toute ma vie tres-obligé , & tres-deuot seruiteur ; Que ie ne voulois point emporter les lettres de ratification , ains tant moins son Altesse desiroit telles assurances du Roy , tant plus sa Maïesté seroit aise de les luy auoir enuoyees en forme la plus aduantageuse dont on s'estoit pû aduiser. Et sur cela il me dit que ie les baillasse doncques audit sieur Cheualier Vinta. Lequel sieur Cheualier Vinta apres auoir apris de leurs Altesces ce qui s'estoit passé en cecy , & receu leurs commandemens là dessus, me vint trouuer hier apres d'isner , & me dit qu'elles se feroient grandement honorees & obligees par le Roy de la belle façon dont sa Majesté auoit procédé , ratifiant tous les articles purement & simplement , & puis demandant comme en grace ce qu'elle desiroit en estre sabbat pour de tres-grandes & importantes considerations ; Qu'il me conteroit dire de la part du grand Duc , que son Altesse se départoit tres-volontiers de l'article des cautions , & y renouoit , & mesme si ie voulois renvoyer les lettres de ratification son Altesse s'en contenteroit ; Je luy dis que si s'en falloit que ie voulusse les renvoyer , que ie les luy voulois consigner : & de fait les luy consignay. Et encores que ie n'eusse point besoin de prendre contre-luy , puis que le grand Duc se contentoit que le Roy ne donnast point

point de cautions, si est-ce que pour plus grande precaution, i'en parlay audit sieur Vinta; lequel trouua raisonnable que le grand Duc en fist vne, & declarast par escrit ce qu'il m'auoit asseuré de parole, & me dit que ie la dressasse comme ie la voudrois; ce que ie fis incontinent apres qu'il fut party. Vous aurez doncques la contre-lettre avec la presente.

Ledit sieur Vinta me dit de plus, que le grand Duc se contentoit de l'assignation que le Roy luy vouloit donner sur la recepte generale de Lyon, & que les receueurs generaux s'obligeassent de luy payer la somme de cinquante mille escus par an des deniers de leurs charges, & que Messieurs du Conseil promissent de ne diuertir ny reuoker ladicte assignation pour quelque cause que ce fust, & que i'en escriuisse, à ce que cela fust fait au plus tost, & que la debte fust recogneuë par le Roy, & verifiée en la Chambre des Comptes, suivant ce que i'auois dit à leurs Alteſſes de la part de sa Maieſté. Je vous supplie donc de tenir la main que tout ce que dessus soit fait, & que les actes & instrumens en soient deliurez à Monsieur le Cheualier Guisardin au plus tost que faire se pourra, & vous en escrirois plus instamment si ie ne vous cognoissois, & si la chose ne se recommandoit assez d'elle-mesme.

Il me dit encores, que outre la promesse que Messieurs du Conseil feront de ne point diuertir ny reuoker ladicte assignation de Lyon, le grand Duc desiroit que le Roy mesme en fist encores vne promesse par escrit, & ie luy en donneray esperance, croyant fermement que sa Maieſté n'en fera point de difficulté. Me dit de plus que son Alteſſe desireroit que les mesmes promesses se fissent par sa Maieſté; & par les Seigneurs de son Conseil, de ne point reuoker ny diuertir non plus l'assignation donnee sur les parties casuelles, & que i'en rescriuisse. Et ie luy respondis que i'en escrirois, & esperois que son Alteſſe seroit encor contente de cela: & vous supplie d'y tenir la main. Adionsta; que j'aoir que i'eusse dit & affermé en mon premier voyage, que l'assignation donnee sur les parties casuelles deux ans y auoit, eust lieu, & que son Alteſſe en auoit iouy, si est-ce que Monsieur de Gondy auoit escrit qu'il n'en estoit rien touché à son Alteſſe, & me bailla vn extrait de la lettre dudit sieur de Gondy, que ie vous enuoye. Et pource qu'en ces deux ans passez son Alteſſe deuoit auoir receu cent mille escus, & n'a rien eu, elle eust desiré, avec le bon plaisir de sa Maieſté, & sans incommodité de ses affaires, que pour cent mille escus non payez, luy fust donnee vne troisieme assignation, afin qu'il en fust plus tost payé, & püst les garder pour le seruice de sa Maieſté; à laquelle son Alteſſe se remet, & par ce moyen merite d'autant plus qu'on luy complaise si faire se peut.

Audemment, les Chasteau & Isle d'If seront rendus, & sera fait de la part de son Alteſſe tout ce qu'elle a promis par les articles; & à ceste fin enuoye par ce courrier les contreseings, & escrit des lettres expressees au Seigneur Rinuccini qui commande au chasteau & Isle d'If. Et d'autant que la peste est en ces quartiers-là de Marseille & de Provence, desire son Alteſſe que le Capitaine & les soldats qui iront pour receuoir ledit chasteau & Isle d'If, ne soient enuoyez de lieu infecté, de peur qu'ils ne donnaſſent la peste aux soldats Italiens qui sont en ladite Isle, & que les soldats Italiens ne l'apportassent en Italie, à quoy le Roy pouruoirra par vostre moyen, s'il luy

plait; comme il est plus que raisonnable; & pour ledit danger de peste son Altesse n'envoyera point ses galeres, ains fera leuer les gens qu'il a es Mers d'If & de Pomegues par des barques.

Ledit sieur Vinta me vient de dire, que son Altesse desire qu'il plaise au Roy luy donne permission de tirer de Lyon l'or & l'argent qui luy sera payé de ladite assignation que sa Majesté luy donnera sur la recepte generale de ladite ville. Aussi son Altesse desire qu'il plaise au Roy interposer son autorité, à ce qu'elle soit payee de certaine quantité de bleds que ceux de Berre & de Marrigues luy ont pris par cy-deuant, dequoy i'ay demandé encore plus particulier, qu'il me doit enuoyer, & ie le mettray avec la presente s'il me l'enuoye.

Ie vous ay escrit ce que dessus auant que partir de Florence; ce qui s'en suit sera de Pratolin, où ie viens d'arriver. Depuis donc vous auoir escrit les choses precedentes, i'ay eu audience de leurs Altesces, & me suis licencié d'elles estant ensemble. Et quand i'ay veu le grand Duc en sa meilleure & plus douce humeur, ie luy ay parlé de la part du Roy des marchandises que sa Majesté veut estre rendues à Monsieur de Gondy, pour le dédommager en partie du vol que les Marseillois luy firent, & son Altesse, qui n'auoit auparauant respondu à mes lettres, m'a dit qu'il auoit long temps y a député quatre personages pour la vente desdites marchandises, & qu'on les vendoit, & s'en estoit déjà retiré dix neuf mille escus, & qu'il en auoit fait mettre partie à fruit, & que le tout seroit pour ledit sieur de Gondy puis que le Roy le commandoit.

Son Altesse me dit entre autres choses, qu'elle desiroit qu'il pleust au Roy commander à l'Ambassadeur que sa Majesté enuoyera à Venise, qu'il face instance enuers la Seigneurie pour le sieur Comte Ottauiio-Aragadro, à ce qu'il luy soit permis de retourner en sa maison, dont est banny pour choses dont les gens de son Altesse vous informeront.

Leurs Altesces me dirent qu'elles feroient responses aux lettres que ie leurs auois rendues de la part du Roy, par le courrier qui doit estre enuoyé par delà, & enuoyeroient leurs responses à Monsieur le Cheualier Guicciardin.

Aussi le Duc de Venise ne me bailla point de lettres pour sa Majesté, pour ce que ladite Seigneurie veut enuoyer à sa Majesté, pour respondre aux complimens que ie leur ay faits, vn Ambassadeur qui portera les lettres respondues à celles que ie leur rendis. Comme leurs Altesces m'enuoyerent au deuant iusques à Firenzole le sieur Comte Albert de Castello, aussi me font elles accompagner par luy iusques audit lieu, avec les mesmes officiers, pages, & traitement. Aussi m'ont-elles fait accompagner depuis le palais de Pitti iusques hors la ville par le Seigneur Dom Giouanni de Medicis, comme ils m'auoient fait recevoir par luy, ainsi que ie vous ay escrit cy dessus, où i'auois oublié a vous escrire qu'en venant ils me firent encores recevoir en ce lieu par le Prince leur fils aîné qui s'y tient, & m'y a encores receu à ce soir. Ils m'ont fait encores present de cinq pieces de damas cramoisi rouge, qui suffiront pour faire de la tapisserie pour vne chambre, les quelles ie n'ay peu bonnement refuser, n'ayant plus rien à negocier avec leurs Altesces, & toutes choses estans terminees, & ainsi c'est vne commodité dont ie dois l'occasion au Roy & à vous.

Outre plusieurs honneurs que j'ay receus dudit Seigneur Dom Giouan-  
~~ni le~~ <sup>ni le</sup> Seigneur Dom Virginio Vrsino Duc de Bracciano & neuveu du grand  
 Duc m'a encores fort honoré pour le respect de sa Majesté, à qui il escriit  
 vne lettre qui ~~se~~ <sup>est</sup> avec la présente. Ce sont deux ieunes Seigneurs de tres-  
 grande valeur & vertu, & ie ne sçay s'il y en a en Italie deux autres qui le  
 passent. Je m'assure que le Roy fera réponse à ladite lettre. J'ay esté visité  
 à Florence par l'Agent de Venise, & par l'Ambassadeur de Lucques. Le  
 Nonce du Pape en estoit party il y a quinze iours, & n'a point encores de  
 successeur. D'autres Ambassadeurs il n'y en auoit point, si non qu'un du Duc  
 de Modena.

Le sieur Vinta n'a peu en si peu de temps trouuer les papiers touchant les  
 bleds que ceux de Berres & de Martigues doiuent, & m'a dit qu'il en enuo-  
 yeroit le niemoire à Monsieur le Cheualier Guiciardin. A tant &c. Mon-  
 seigneur, &c. De Pratolin ce 4. d'Aoust 1598.

## A MONSIEVR DE VILLEROY.

## CXL.

**M**ONSEIGNEUR, j'adiousteray ce mot à vne autre lettre  
 plus longue que ie viens de vous escrire, & vous diray que Mon-  
 sieur le grand Duc à present se louë infiniment de vous, & en particulier  
 du bon & sage conseil que vous donnastes dernièrement, sur l'office qu'il  
 vouloit estre fait avec le Pape de la part du Roy. A toutes les fois que  
 j'ay esté avec luy, il ne m'a parlé de rien avec tant d'affection comme de  
 vous.

Au demeurant vous verrez par mon autre lettre, que graces à Dieu, mon  
 voyage vers luy n'a esté inutile, ny pour l'article des cautions, ny pour  
 Monsieur de Gondy, j'espere que vous n'aurez pas trop de peine à me ré-  
 mettre aux bonnes graces de ces Seigneurs qui ont eu l'alarme pour les di-  
 tes cautions, puis que j'ay esté encores instrument de les en faire deliurer:  
 mais ie vous diray bien que la France ayant la guerre avec l'Espagne lors  
 que l'aceord du Chasteau & l'Isle d'If fut fait, & les places estant de l'im-  
 portance qu'elles sont, i'eusse encores promis quelque chose de plus pour  
 les auoir, si ie ne les eusse peuraioir à moins. Je vous diray encores d'auan-  
 tage ( & Dieu sçait que ie vous diray vray ) que j'ay tant de zele au bien  
 de la France que si i'eusse eu le moyen de payer du mien la somme entiere,  
 ie l'eusse plustost payee tout comptant, que laisser en tels temps ces places  
 comme elles estoient. A tant, &c. Monseigneur, &c. De Pratolin, ce 4.  
 d'Aoust 1598.

## A MONSIEUR DE VILLEROY.

## CXLI.

**M**ONSIEUR V. R. Par le sieur de Lormeau que Monsieur de Luxembourg vous dépêcha dernièrement, ie vous enuoyay, entre autres choses, vn recueil sommaire des propos que j'auois tenus à la Seigneurie de Venise & au grand Duc de Toscane, & de ce qui m'auoit esté respondu; à la fin duquel recueil ie remis neantmoins à vne autrefois de vous escrire la response que ledit grand Duc m'auoit faite, & certaines autres choses concernantes les affaires de la France qu'il m'auoit dittes; à quoy ie satisferay par la presente. Et quant à sa response qui fut ample & copieuse, il y eut forces choses generales & communes, que presque tous ont accoustumé de respondre en tels complimens, lesquelles sont quasi mesmes en substance, & n'importent pas beaucoup d'estre sceuës, & se peuvent aisément supplier par vn médiocre usage & prudence; & partant ie ne m'y arresteray point, & vous diray seulement & sommairement qu'il louia fort que le Roy eust fait la paix, & qu'il y eust procédé avec tant de prudence, secrettesse, patience, & longanimité à quoy il attribuoit les bonnes & honorables condicions que sa Majesté auoit tirées des Espagnols. Aussi trouuoit il le Roy bien iustificé, pour le regard des alliez & confederez qui n'auoient voulu entrer en la paix avec sa Majesté, apres tant de deuirs qu'elle auoit fait enuers eux pour les y faire condescendre; & adioustoit, que pour raison d'Estat, il n'y auoit point de mal pour les affaires du Roy ny pour le bien de la France, qu'il restast quelque fusée à demeller au Roy d'Espagne; lequel estant en paix avec tous demeureroit trop grand. Disoit de plus qu'il s'asseuroit que le Roy ne presteroit iamais secours au Roy d'Espagne contre la Roynie d'Angleterre, & que sans le secours de sa Majesté, le Roy d'Espagne ne scauroit que faire à l'Angleterre. Lesquelles choses ie vus cote icy, pour ce que outre ce que vous en scaurez d'ailleurs, il m'auoit dit à moy mesme trois mois auparauant qu'il ne falloit point faire paix, & quand il la faudroit faire, que ce ne deuoit point estre sans les Anglois & les Estats. Sur ce que ie luy dis comme le Roy l'auoit fait comprendre en la paix, & la discretion dont ses deputez y auoient vsé pour ne donner aucun ombrage aux Espagnols, il ne se contenta pas de me respondre seulement que le Roy luy auoit fait beaucoup de bien & d'honneur, & qu'il en estoit fort obligé à sa Majesté, mais adiousta qu'il en auoit esté besoin, & qu'il estoit vray que le Pape luy auoit voulu faire la guerre, & qu'il en estoit tres-bien informé, & qu'il n'en falloit point douter. Toutesfois il ne me le persuada point, & iamais cela ne m'est peu entré en pensément, & encores à ceste heure ie suis plus loin de le croire que iamais. Tant y a, qu'il dit auoir vne particuliere & tres-grande obligation au Roy, de l'office que sa Majesté fit faire sur cette occasion par

Monsieur de Luxembourg emuers sa Sainteté : & le sieur Vintafon, Secrétaire d'Estat m'en dis autant puis apres.

A ce que ie luy auois dit, qu'apres que le Roy auroit remis son Royaume en bon estat, il vouloit entendre au bien commun de la Chrestienté, en occasions qui s'en presenteroient au dehors de la France, & d'estre utile à ses amis, & principalement à luy pour les plaisirs receuz de luy, lesquels ie luy rememorerois sommairement, luy faisant des offres de la part de sa Majesté ; il me respondit que d'auoir presté de l'argent c'estoit le moins : mais que le principal estoit qu'il auoit mis en hazard tout son Estat, & toute la fortune sienne & de ses enfans ; Qu'il s'en trouueroit peu qui prestassent de si grosses sommes, mais il s'en trouueroit encores moins qui pour servir à autrui hazardassent tout le leur ; Qu'il me disoit cela pour monstres le zele qu'il auoit eü à l'exaltation & seruice du Roy, & à la conservation de l'Estat de la France, & la consolation qu'il en sentoient son ame ; Qu'il louoit Dieu de ce qu'il auoit si bien succédé, & estoit fort obligé au Roy de la bonne souuenance qu'il en auoit, & de tant d'offres qu'il luy faisoit : & comme il attendroit toute protection de sa Majesté, aussi luy demeurerois tres-humble seruiteur toute sa vie, & eleueroit quatre enfans malles que Dieu luy auoit donnez en ceste deuotion vers sa Majesté & vers la Couronne de France.

Quand aux choses concernant les affaires de la France, le luy donnay occasion d'en parler, ce qu'il m'en dist à deux diuerses fois, doit estre pris pour vne partie de la response au compliment que ie luy auois fait de la part du Roy. Car luy m'ayant dit la premiere fois que i'allay à Florence par le commandement de sa Majesté, qu'il n'auoit cessé de penser tout & nuit aux choses de France, pouuoit donner tousiours quelque bon aduis au Roy, & toutesfois qu'on n'en auoit tenu compte, ains auoit on quelquesfois respondu qu'on n'auoit besoin de conseil, & bien souvent interpreté des choses en mauvais sens, & que pour cela il ne vouloit plus s'en meller n'y y penser, mais s'atquer à ses propres affaires luy, dis-je, m'ayant dit alors tout ce que dessus, i'estimay qu'outre la response que ie luy auois faite deslors pour le mitiguer, il falloit en ce second voyage rabiller cela au mieux que faire se pourroit. Et partant apres que ie luy eus asseuré, suivant le contenu de l'article precedent, que le Roy n'oublieroit iamais les plaisirs qu'il auoit receus de luy, & que sa Majesté feroit tousiours pour luy plus que pour tout autres, i'adioustay que sa Majesté s'asseueroit aussi qu'il luy continueroit sa bonne affection & ses bons recors, & m'auoit commandé tres-expressément de prier son Altesse de luy departir son bon aduis & conseil, tant à present, qu'à l'aduenir quand il s'apperceuroit de quelque bonne chose & expedient pour les affaires de sa Majesté, laquelle entiendoit grand cōpte & tascheroit d'en faire son profit.

A quoi il me respondit, que le Roy luy faisoit trop d'honneur, & puis que sa Majesté le commandoit ainsi il le feroit : & pour commencer, qu'il ne vouloit dire que le Roy d'Espagne n'auoit fait la paix que par pure necessité, comme les siens mesmes le confessoient ; Qu'il croyoit bien que le Roy aussi de sa part auoit en faulte de quelque chose, mais non pas de tout. Que les Espagnols qui estoient eurs, loigneux & pouruoys, ne faudoient

pendant la pais de pouruoir plustost leurs deffauts & necessitez; en tout euenement, qu'il seroit d'auis que le Roy de sa part en fust de mesmes; & qu'an plustost qu'il mist ordre à ses affaires, & redressast les choses qui en auroient besoin dans le Royaume; comme ie luy auois dit; que la Majesté vouloit faire; & que outre & par dessus ce que ie luy auois dit, le Roy en faisant les Estats de la despenſe du Royaume, reseruaſt & mit à part quelque partie de ses finances, pour faire provision d'argent iusques à la somme de trois ou quatre millions d'or, avec laquelle la Majesté s'asseureroit, & se rendroit formidable à qui que ce fust; Qu'il fist aussi provisions de poudres; & encores plus de ſaisettes & de balles en diuans endroits de la France; & particulièrement à Lyon; Qu'il fist construire & entretenir à Marseille vn bon nombre de galeres, comme il estoit necessaire tant pour la ſeureté, que pour la reputation de la Couronne; Qu'il fist fortifier & munir les places des frontieres qui en auoient besoin; Qu'il eust ſoin des choses de Rome; & y rennist les le party de France; se ſouuenant de combien la Cour de Rome peut profiter & nuire, & que bien ſouuent pour vne voix on a, ou faut bien à auoir vn bon Pape; Qu'il ne me diſoit les choses ſuſdites pour deſir qu'il euſt de voir recommencer la guerre, ains deſiroit que la paix fuſt perdurable; mais qu'il estoit digne d'vn grand Roy de pouruoir à ce qui pourroit aduenir, & de se preparer à toutes aduentures, comme les Espagnols n'y fau- droient point; Que chacun ſçauoit que la paix n'auoit eſté faite pour amitié que les deux Roys s'entreportassent, mais qu'ils auoient fait comme deux champions qui apres vn long combat deuenoient las, & n'en pouuant plus estoient contrains de se reposer: comme ceux cy bien ſouuent apres auoir repris haleine recommençoient à leur entreshamailler, ainſi estoit-il à craindre qu'il n'en aduint de ces deux Roys. Quoy que ce fust ils auoient bien pû faire la paix, & poſſible y demeureroient-ils, mais il ne seroit iamais qu'il n'y euſt grande emulation entre ces deux Couronnes ſi grandes & ſi voisines, & entre les quelles s'estoyent paſſées tant de mauuiſes ſatiſſactions. Auquel propos il ne vouloit obmettre à me dire, que les Espagnols eſperoyent & eſ- ſayeroyent par leurs ruses & cauelles de faire des maux à la France par la paix, qu'ils n'auoyent pû luy faire par la guerre; Qu'il ne se pouuoit nier que le ſait des benefices, tant grands que petits & moyens, n'allast fort mal en France, dont le Pape & toute la Cour de Rome, & le Clergé de France; & vne grande partie du peuple François estoient mal-contents, & deſiroient y ybir quelque reformation, à laquelle le Roy n'y pourroit rien perdre, ains y gagneroit beaucoup, comme auſſi estoit-ce chose qui touchoit les Catho- liques ſeulement, & ne donneroit point occaſion aux autres de tumultuer; Qu'outre ce que le Pape en faisoit ou ſeroit bien toſt inſtance de son pro- pre mouvement, comme auſſi de la publication du Concile de Trente, il ſça- uoit que les Espagnols, ſous pretexte de zele au bien commun de la religion Catholique, s'en rendroient inſtigateurs apres de ſa Sainteté, & ſi le Roy s'y rendoit dur, ils procureroient luy cauſer quelque trouble par le moyen de tant de gens à qui tels deſordres deſplaiſoyent, & de ceux encores plus qui ne pouuoient guerir de leur ambition & rapacité, ny de leurs haines & enuies paſſions, ny ſe plaindre à la paix & au repos; à quoy, & à toute occaſion de noble, diſoit-il (ſoit de ſes ſuſſis, ou de haine qu'il ayt contre Monsieur

de Sauoye) les Espagnols n'ont point vn plus propre instrument que le Duc de Sauoye, & la France n'a point à se craindre de perfonnetant que de luy, qui est tres-malicieux, audacieux, & entreprenant: & faudroit bien (disoit-il en continuant) que le Roy face prendre garde à l'Ambassadeur de Sauoye, & à celuy d'Espagne aussi: car ils ont accoustumé de choisir pour Ambassadeurs les plus malings qu'ils ayent.

Il me dit vne autre particularité, laquelle ie tiens pour trop vraye, à sçavoir que les Espagnols faisoient & feroient leur fait propre du Marquisat de Salusses pour Monsieur de Sauoye contre le Roy, & ja ils essayent de courir la reddition des places au Roy & le transport des pays-bas à l'Infant & à l'Archiduc Albert (lesquelles deux actions ils recognoissent leur estre peu honorables) en disant que par la paix ils ont au moins osté aux François le Marquisat de Salusses, & par ce moyen fermé tant ausdits François qu'à l'heresie le passage en Italie; Que le Roy, à present regnant n'auoit point sur ledit Marquisat le droit qu'auoit le feu Roy, lequel a esté le dernier maistre de la famille des Vallois, à laquelle ledit Marquisat auoit esté acquis, si toutesfois il luy auoit esté acquis, car encores ne le confessent-ils point, pour le regard du droit, jaçoit que les Vallois l'ayent tenu du fait; Qu'outre Monsieur de Sauoye qui peut monstrier des investitures dudit Marquisat faites par ses predecesseurs Ducs de Sauoye, ils seront entrenten cause par deuant le Pape l'Empereur, qui pretend de son costé le Marquisat estre fief de l'Empire, & luy estre deuolu en plusieurs façons, & en particulier par la mort du feu Roy dernier maistre de Vallois, si toutesfois il y eut iamais droit; Que le Pape de luy mesme incline, & inclinera tousiours vers Monsieur de Sauoye, de peur que si le Marquisat retournoit aux François, l'heresie ne s'y glissast, comme elle faisoit du temps qu'ils le tenoyent, & de là puis apres auant de l'Italie; Que pour conseruer la Religion Catholique en vn pays, & la preseruer d'heresie, le Pape peut non seulement en vn cas douteux incliner vers vne partie plus que vers l'autre, mais peut encores l'oster au vray Seigneur & possesseur, & le donner à vn autre qui n'y ait rien. De ces propos, & autres semblables tenus par les Espagnols, concludoit ledit grand Duc, qu'il falloit qu'on y aduisast bien par delà, & qu'on fust prouision de tous les titres, raisons & moyens qu'on pourroit amasser, & qu'encores aurions nous bien à faire d'en venir à bout, & qu'en fin il n'y auroit ny raison ny droit qui tant nous aydast à obtenir ledit Marquisat, comme si on voyoit que le Roy fust prest à le prendre par force, au cas qu'on ne luy en fust raison à l'amiable. S'ostroit de plus, & promettoit ledit grand Duc d'aduertir sa Majesté & ses ministres en Cour de Rome, de ce qu'il en apprendroit de plus du iour à le iour.

Ce sont en somme les choses que m'a dit le grand Duc, lesquelles ie vous ay voulu escrire fidellement & simplement, sans entrer en examen si elles me sembleroient bonnes ou non. Et ainsi ai-je acheué tout ce que j'auois à vous rapporter des deux voyages que j'auis faits par le commandement du Roy à Venise & à Florence, & auant, &c. Monsieur, &c. De Ferrare ce 25. Aoust 1598.



## A MONSIEVR DE VILLEROY.

## CXLII.

**M**ONSEIGNEVR, Quand Monsieur de Luxembourg vous despescha dernièrement le sieur de Lormeau, il eut si grande haste de le faire partir, que ie n'eus moyen de vous faire vne autre lettre que ie voulois vous escrire. Outre celle que ie vous fis sur le sujet de la dispence, dont ie vous enuoyay copie, ie voulois vous accuser la reception de la lettre qu'il vous pleust m'escrire de S. Germain en Laye le 12. Iuillet avec les articles de la paix que vous pensiez que ie deusse receuoir à Venise, mais ie les reueus en ceste ville de Ferrare le 10. de ce mois, apres estre retourné mesme de Florence le 8. Je vous remercie tres-humblemens du contenu en ladite lettre, & de l'expedition qui l'accompagnoit du Prieuré ou Abbaye des Religieux de Culicux, en faueur du Religieux pour lequel ie vous auois escrit. Il s'y est trouué quelque erreur en faueur dudit Religieux & en la qualité du benefice; si vous plaist qu'il soit corrigé, on vous en aura d'autant plus grande obligation. Je voulois encores vous escrire, qu'au commencement de ma lettre du 4. de ce mois, où ie vous acheuois d'escrire ce qui s'estoit passé à Venise, j'oubliai que Monsieur la Cardinal Priuli Patriarche de Venise, incontinent qu'il sent que i'estois arriué en ladite ville, m'envoya visiter & offrir son logis: & quand ie l'eus visité, apres auoir exposé ma charge à la Seigneurie, il me vint voir en personne, & en l'habit que les Cardinaux portent lors qu'ils vont au Pape. Ce sont honneurs qu'il veut rendre au Roy, aussi le vous l'escriis-je afin qu'en quelque occasion sa Majesté luy montrât d'en auoir esté aduortie, & de luy en sçauoir gré. Car pour mon regard, encores que ie sois de ma nature fort recognoissant du moindre bien & honneur qu'on me face, en quelque façon & pour quelque regard que ce soit, si est-ce que ie suis si peu conuoitieux & si peu chatouillé de l'honneur de telles ceremonies, qu'il ne m'estoit pas mesmes souuenu de le vous escrire, jaçoit qu'il vint aussi bien à propos lors que ie vous parlois de la visite que i'auois rendue aux Ambassadeurs d'Espagne & de Savoye, & aux ministres des autres Princes.

Baptiste arriva en ceste ville le 26. de ce mois au soir, & le lendemain au matin j'eus la vostre du 17. par laquelle j'entendis, comme ce jour là mesme vous auiez receu ma depesche du 4. dont ie fus trais-aisté, & de ce que mon voyage à Florence ne vous auoit semblé inutile. Je n'ay point cogneu que vous eussiez receu celle que ie vous fis de Venise le 23. Iuillet; aussi n'ay-je point receu celle que vous dites m'auoir fait le 14. de ce mois par la voye de Lyon, en laquelle possible en auiez vous satisfaction. Ladite voye de Lyon est fort bonne depuis que la peste de Savoye est passée au Piémont; de Vostre decouverte à Suze, Rioule, Vigliane, & à Thurin mesme; ce qui a donné telle alarme en tous ces quartiers de deçà, que depuis l'on n'a laissé passer rien qui vint de delà, & mesme sans la commodité qui se presente dudit

Baptiste,

Baptiste, qui s'en retourne par les Suisses, ie ne sçay comme nous vous pourrions enuoyer les lettres que nous vous faisons à present, lesquelles nous ne sçaurions sinon bailler à l'ordinaire de Lyon.

■ J'ay veu la lettre que le Roy a escrite par ledit Baptiste à Monsieur de Luxembourg, & luy ay dit mon aduis sur le moyen que i'estimois qu'il falloit teuir en exposant au Pape les choses que sa Majesté vouloit luy estre dites. Aussi les a sa Sainteté prises assez bien, comme vous verrez par les lettres de mondit sieur de Luxembourg, ausquelles me remettant, ie prie Dieu qu'il vous donne, Monseigneur, &c. De Ferrare ce 29. d'Aoust 1598.

## A MONSIEVR DE VILLEROY.

## CXLIII.

**M**ONSEIGNEVR, A present que la paix est faite, le maistre des courriers d'icy, comme aussi celuy de Lyon, desirent avec le temps faire partir des courriers ordinaires de 15. en 15. iours, & à certain iour de la semaine, comme il se faisoit auant les derniers troubles. En quoy le Roy aura grande commodité pour enuoyer ses dépesches, & pour receuoir celles de ses ministres à poinct nommé, sans pour ce faire aucune dépense. Mais cela ne se pourroit continuer, si par mesme moyen les choses n'estoient aussi reduites à l'ancienne façon pour le regard de l'ordinaire d'Espagne, qui en temps de paix se seruoit des courriers de nostre ordinaire de Lyon à Rome, & de Rome à Lyon; ce qui aidait ausdits courriers à porter les frais du voyage entre ces deux villes, dequoy ils ont à present plus de besoin que iamais, pour ce qu'ils sont ruinez des guerres, & en plus grand nombre qu' auparauant & que leurs staturs ne portent, & pour ce aussi qu'il ne se fait point tant de changes, ni d'expéditions & autres commerces, comme il se faisoit auant les troubles. Ce nonobstant, nous auons appris que les maistres des Postes d'Espagne sont apres à faire que l'ordinaire d'Espagne à Rome ne se serue point des courriers de nostre ordinaire de Lyon icy, & ne passent pas mesme à Lyon, & pensent l'obtenir facilement du Roy & de ses Lieutenans à la faueur de la paix, dont s'ensuiuroit que nostre ordinaire manqueroit dans fort peu de temps: car outre que sans ceste aide du port des lettres d'Espagne nos courriers ne pourroient supporter la dépense de leurs voyages de Lyon à Rome, & de Rome à Lyon, il aduiendroit encores qu'ils seroient priez du port mesme d'une grande partie des lettres de la France, lesquelles seroient donnees à l'ordinaire d'Espagne en passant, sans qu'on les enuoyast plus à Lyon. Car comme il est honneste (maintenant que la paix est faite, & pour la pluspart exécuté) de gratifier les Espagnols de tout ce qui se pourra, aussi ne seroit-il raisonnable que pour complaire à quelques ministres d'Espagne, en choses qui n'importent point au seruice du Roy leur maistreni au peuple d'Espagne, se leur laissât ruiner nostre dit ordinaire, qui est si profitable & necessaire.

à nostre Roi & à tous ses suiets; attendu mesmement que les Espagnols ont tousiours esté par le passé, & seront cy-après aussi bien seruis par nos courriers de Lyon à Rome, & de Rome à Lyon, comme ils sçauoient estre par les leurs, & ne leur en aduient iamais aucun inconuenient; outre que eux ayans necessairement à passer par la France, il ne leur est fait aucun tort de les prier de s'accommoder en ce passage à ce qui nous est expedient, & mesme que cela ne s'entend que pour le regard de leursdits ordinaires seulement demeurant tousiours libre au Roy d'Espagne & à ses suiets d'enuoyer des courriers extraordinaires en poste à Rome quand bon leur semblera. Que si vous trouuez bon ce que dessus, il vous plairay donner l'ordre necessaire, soit en escriuant à ceux qui commandent sur la frontiere aux lieux par où l'ordinaire d'Espagne entre en France, qu'ils luy commandent d'aller tout droit à Lyon, & à ceux de Lyon, qu'ils fassent, qu'ils se seruent des courriers de nostre ordinaire, ou autrement en la façon que vous iugerez la meilleure. A tant, &c. Monseigneur, &c. De Ferrare ce 2. Septembre 1598.

## A MONSIEVR DE VILLEROY.

## CXLIV.

**M**ONSEIGNEVR, Auant que ie partisse pour Venise & Florence, il auoit esté parlé au Pape du gratis de l'exdeditio de l'Abbaye de Ville-loing pour le fils de Monsieur de Sancy, & la supplication touchant la commande de ladite Abbaye, & la dispense d'aage auoit esté ja signee: toutesfois à mon retour ie trouuay qu'il n'auoit encores rien esté fait quant au gratis, n'ayant le Seigneur Paulino soubdsdataire voulu emporter au Pape le *MOTV PROPRIO* pour le signer. Ie fus luy en parler, de telle façon que ledit *MOTV PROPRIO* a esté signé, & le gratis assuré.

Par le rapport que ie vous ay fait des propos qui m'auoient esté tenus par le grand Duc, & par autres particularitez que Monsieur de Luxembourg escrit au Roy, vous verrez les artifices dont on vse enuers le Pape, pour luy faire croire que si le Roy recouure le Marquisat de Salusses les Huguenots y commanderont, & l'heresie y sera introduite, & de là puis apres en tout l'Italie; qui est la pire chose qu'on sçauoit controuuer contre sa Maiesté en faueur de Monsieur de Sauoye. A quoy ie ne voy qu'un remede, à sçauoir s'il plaisoit au Roy faire au plustost declarer au Pape, que sa Majesté n'entend y mettre gouverneur ni garnison que Catholique, car encores que cela pourroit porter quelque preiudice à la liberté qu'il a de mettre en ses terres tels qu'il luy plaira, si est-ce qu'il se preiudicieroit encores plus, si à faute de declarer telle chose il perdoit ledit Marquisat, ou estoit contrainct d'entrer en guerre pour le recouurer, & si encores il donneroit à penser au monde qu'il auroit quelque mauuaise intention au fait de la Religion, attendu mesmement qu'il n'a à se craindre des Catholiques, que il choisira plustost que des autres, & que la crainte du Pape & des autres

Prince d'Italie que l'heresie se glisse en leurs Estats, & soit cause de leur subuersion, est plus que iuste. Je ne m'ingerois à vous escrire cecy, si outre ce que le grand Duc m'en dist, ie ne sçauois que le Pape & toute ceste Cour tiennent, que pour conseruer la Religion Catholique en vn pays, & le preseruer d'heresie, sa Saincteté doit & peut l'oster au vray Seigneur & possesseur, & le donner à tout autre qui n'y ait rien, mais qu'il veuille & puisse mieux y maintenir la foy Catholique. Monseigneur, ie prie Dieu, &c. De Ferrare ce 5. Septembre 1598.

## A V R O Y.

## CXLV.

S I R E,

S I l'ay receu le commandement qu'il a pleu à vostre Maiesté me faire par la lettre du 25. d'Aoust de prendre le soing de ses affaires en ceste Cour de Rome en l'absence de Monsieur de Luxembourg, qui s'en doit l'aller trouuer dans peu de iours; en quoy vostre Majesté me fait trop d'honneur. Aussi n'estimay-je auoir la vie mesme, que pour seruir à Dieu & à vostre Majesté: par ainsi obeyssant à vostre commandement, ie ne faudray de me conduire en vobdits affaires avec toute fidelité & zele, & avec toute la diligence à moy possible. Surquoy ie supplie tres-humblement vostre Maiesté de prendre en bonne part que ie luy dise, que comme à traiter vos affaires s'il n'y a qu'honneur, & ie diray encores plaisir pour la plus part, aussi est-ce vne chose par trop fascheuse, & aucunement honteuse, de demander au Pape tant de gratis, comme font vos ministres depuis deux ans à toutes les audiences qu'ils ont de sa Saincteté, laquelle s'en fasche long temps y a, pour en auoir donné vne fort grande quantité par le passé, & n'y voir aucune fin pour l'aduenir, ains s'en trouuer à present importunee plus que iamais, & pource aussi qu'outre les Cardinaux qui ont quelque part en tels profits, les Officiers de ceste Cour, qui achèptent leurs Offices, & ont leurs émolumens assignez sur les taxes des benefices consistoriaux, luy en font bien souuent de grandes plaintes, & avec le temps sadite Saincteté en verroit moins volontiers vos ministres, qui seuls de tous les Ambassadeurs & Agens qui resident en ceste Cour luy font telles demandes, & n'en receuroit ny escouteroit si bien vos affaires, estans tousiours suiui de ceste amertume & degoust d'importunité. Et partant, comme apres la reconciliation de vostre Majesté & de la Couronne avec le Sainct Siege, ie fus le premier à demander telle grace pour vos sujets, & à disposer sa Saincteté à les accorder; aussi vous suppliay-je maintenant pour le bien de vos affaires, & pour quelque reputation aussi, qu'il vous plaise estre cy-apres fort retenu à commander à vos ministres de faire telles demandes au Pape. A tant ie prie Dieu, S I R E, &c. De Ferrare le 27. Septembre 1598.

## A M O N S I E U R D E V I L L E R O Y .

## CXLVI.

**M** O N S E I G N E V R , Baptiste Mancini qui m'auoit apporté vostre lettre du 17. Aoust partit d'icy le 5. de ce mois au soir , par lequel ie vous enuoyay cinq de mes lettres des 25. 29. & 30. d'Aoust , 2. & 5. de ce mois. Le mesme iour dudit cinquiésme de ce mois apres le partement dudit Baptiste , ie receus par la voye de Lyon les lettres des 8. & 14. d'Aoust , & depuis ie receus par le sieur de Lorraine le 15. de ce mois vne lettre du Roy du 25. & deux vostres du 29. Je respondis à celle du Roy ce qu'il vous plaira voir , qui seruira aussi de response à la premiere partie de l'une des vostres dudit 29. sans qu'il soit besoin que ie vous en face icy de redite : bien vous suppliay-ie de tenir la main , entant qu'il vous sera possible , à ce que i'escris à sa Maiesté touchant les gratis , vous assurant que ie lui en escris beaucoup moins que ie n'en pense , & que ie n'en sçai. Je vous supplie encores de m'estre aidant à ce que la pension qu'il vous a pleu me faire donner par le Roi me soit payee , dont i'aurai tant plus de besoin , que la charge & la dépense m'accroitra par l'absence de l'Ambassadeur.

Au demeurant , l'ay esté fort aisé d'entendre que les dépesches que ie vous fis de Venise & de Florence , & depuis de ceste ville par le sieur de Lormeau , fussent paruenues en vos mains , & de ce qu'il vous a pleu m'y respondre si particulierement , & de ce que le Roi a pris en gré ce peu de seruice que ie luy ay fait esdites deux villes , & l'honneur qui m'a esté fait pour son respect. Aussi me suis-ie resiouy de ce que vous & Messieurs du Conseil auez trouué si bonne la remission des cautions que Monsieur le grand Duc m'accorda , & prie Dieu qu'il me face la grace à l'aduenir de vous contenter & seruir comme ie suis obligé , & comme ie desire. L'ay fait sçauoir aux sieurs Camille de la Croix & Pierre Vidal , & au Comte Gioseppe Porto ce qu'il vous pleut me respondre touchant eux par la vostre du 14. d'Aoust , & ay fait sçauoir au Seigneur Vinta Secretaire d'Estat du Grand Duc , en termes generaux vne petite partie de ce que vous m'auiez respondu par la vostre du 29. d'Aoust ; me remettant du reste à ce que Monsieur le Cheualier Guiciardin leur en escrira plus particulierement. Aussi ay-je enuoyé les lettres du Roy à Monsieur le Cardinal Pepoli , & au Seigneur Dom Virginio Vrsino Duc de Braciano , les accompagnans chacune d'une des miennes en conformité , le mieux que i'ay sceu & peu.

Avec la vostre du 14. d'Aoust estoit la copie de la dispense de mariage que vous auez trouué auant que vous eussiez receu celle que ie vous ay enuoyee d'icy ; sur laquelle ie n'ay rien à vous dire outre & par dessus ce que ie vous en escriuis par ma lettre du 14. d'Aoust , en vous enuoyant la copie qu'on m'auoit baillée icy , & puis par vne autre mienne du 30. du mesme mois , sinon que ie louë grandement ce que m'escririez par celle qui est écrite de vostre main du 29. d'Aoust , qu'auant que rien faire on en veut

implement deliberer par delà , & que vous ne vous estiez point trompé à penser que le mauuais bruit que quelques gens malins ont fait courir par la France est passé en Italie, & s'est fort ancré en ceste Cour , qui fait qu'oultre que sans cela il faudroit tousiours y bien & bien penser , il se faut d'autant plus garder de commencer aucune poursuite par deça, si on n'a quelque moyen de nullité concluant & bien prouué.

Je vous remerciertes-humblement de l'aduis qu'il vous a pleu me donner de toutes les villes rendus par les Espagnols, & du retour de Monseigneur le Comte de Soissons à la Cour : & louë Dieu que quoy qu'il aduienne du Roy d'Espagne, le hasard est pour tomber sur tout autre plustost que sur nous , qui auons recourré le nostre ; & sommes en paix dedans & dehors. Dieu nous y vueille conseruer, & nous faire la grace d'en bien vsfer. A tant, &c. Monseigneur, &c. De Ferrare ce 27. Septembre 1598.

## A MONSIEVR DE VILLEROY.

## CXLVII.

**M**ONSEIGNEUR, l'adjousteray encores ce mot à ma precedente, pour vous dire que vous serez seruy en l'expedition gratuite de l'Abbaye de Fegny : à quoy n'y aura point de difficulté, pour ce que nostre S. Pere se rendra tousiours facile à tout ce qui vous attouchera, comme il est bien informé de vostre probité, vertu & valeur : & du seruice continuel que vous faites au Roy & à tout le Royaume, & de la deuotion que vous auez au S. Siege, & à la personne de sa Sainteté. Vous aurez veu ce que i'escris au Roy touchant ce gratis. Il y a certaines personnes pour lesquelles on les peut demander au Pape sans rougir, & mesme luy repliquer & conseiller de les faire, & luy remonstrer que c'est le seruice du S. Siege & le sien, comme ie l'ay fait autresfois; mais de les demander indifferemment, comme chacun les veut auoir, vn homme qui a quelque modestie & discretion ne le peut ny doit faire, & seroit contre le seruice & reputation du Roy que ses ministres continuassent telle importunité enuers sa Sainteté. C'est pourquoy i'en ay voulu escrire à sa Majesté, sur l'occasion du commandement qu'il luy a pleu me faire de prendre le soin de ses affaires en l'absence d'Ambassadeur, & ay estimé ne deuoir charger ma lettre d'autre chose, afin que si & quand il vous semblera, elle puisse seruir d'excuse au Roy, & à vous mesmes, enuers ceux qui n'estans de ladite qualité importuneront sa Maiesté & vous d'escrire pour telle chose. A tant, &c. Monseigneur, &c. De Ferrare ce 28. Septembre 1598.

## A MONSIEVR DE VILLEROY.

## CXLVIII.

**M**ONSIEUR, S'en allant Monsieur de Luxembourg vers le Roy, ie n'ay eu besoin de faire autre dépesche par lui, qui est luy-mesmes vne viue dépesche, & source des dépesches d'icy, & à la dignité & autorité duquel appartient de tesmoigner le deuoir des autres, comme par toutes les actions il a rendu notoire le sien à vn chacun. Et partant ie bailleray seulement ce mot de lettre à Monsieur Poiteuin, de la fidelité, diligence, & suffisance duquel au seruice du Roy vous ayant escrit dernièrement, j'adiousteray à present ce mot, qu'outre les seruites & merites nous sommes amis ensemble, & que ie veux participer à l'obligation qu'il vous aura de toute la faueur & aide qu'il vous plaira luy départir aupres du Roy & ailleurs. Aussi vous priay-je que les Seigneurs Camajano & Lercaro, qui escriuent au Roy, ayent vn petit mot de response de sa Majesté, pour tesmoignage qu'elle tient compte de leurs personnes, & de l'affection qu'ils ont à son seruice & au bien de la France. Et n'estant la presente à autre fin, ie ne la feray plus longue, que pour prier Dieu qu'il vous donne, Monseigneur, &c. De Ferrare ce 9. d'Octobre 1598.

## A MONSIEVR DE VILLEROY.

## CXLIX.

**M**ONSIEUR, Il m'a esté escrit par le Seigneur Vintà Secretaire d'Etat du grand Duc vne fort longue lettre, par laquelle on se plaint de ce que les Seigneurs du Conseil n'ont point voulu promettre de ne reuocquer ny diuertir ailleurs l'assignation donnee sur les parties casuelles, ny donner la troisieme assignation pour les cent mille escus que le grand Duc deuoit auoir receus en deux ans passez auant l'accord fait avec luy pour le chasteau d'If, & de ce qui se parle de supprimer les parties casuelles. A quoy i'ay respondu sur chacun point, conformément à ce qu'il vous a pleu m'escrire par vostre lettre du 29. d'Aoult, y adioustant ce que d'ailleurs i'ay pensé estre vray, & à propos pour le contentement de son Altesse: mais ie n'ay sceu respondre à vne autre chose portee par ladite lettre; à sçauoir que lesdits Seigneurs du Conseil pourroient au moins promettre de ne reuocquer ny diuertir à autres vsages l'assignation donnee sur les parties casuelles tant que lesdites parties casuelles

dureroient, & de faire que son Altesse y prendroit cinquante mille escus par an, & qu'autant que lesdites parties casuelles fussent esteintes, luy seroit baillé autre assignation dont il s'en contenteroit; ie n'ay sceu, dis-je, respondre à cela autre chose, sinon qu'ils le pourroient faire voirement, & que ie crois que si on leur en eust fait instance qu'ils l'eussent fait, & le feroient quand requis en seroient; comme à la verité ie croy qu'on le doit faire, & desirer qu'on donne contentement à ce Prince. Il y a encores vne autre chose en ladite lettre qui m'a grandement déplu, c'est que le Seigneur Geronimo Gondy a escrit au grand Duc par vne lettre du 10. Septembre, que de penser que les choses reüssissent comme elles auoient esté traittes avec moy, ce seroit errer, & de plus luy auoir fait escrire par quelqu'autre, que si ledit grand Duc n'enuoye par delà, & n'aduançe la somme de cent mille escus, entrant en partie de l'arrentement du sel avec luy & autres, il ne sera iamais pays de ce qui luy est deub, quelque assignation qu'il puisse auoir; dequoy ie voy qu'on s'est alteré à Florence, & dit-on que le grand Duc ne veut point deuenir ny Geronimo Gondy, ny Zamet, quand bien il deuroit perdre non seulement ces deux debtes, mais tout ce qu'il a en ce monde; en quoy il me semble qu'il a raison. Aussi n'ay-je pû respondre à cela, sinon qu'en accusant l'indiscretion de celuy qui l'auoit escrit, & fait escrire contre l'intention du Roy & de tous ses bons Conseillers, qui seroient bien courroucez s'ils entendoient qu'on eust escrit telles choses. Tant y a que sur cela on est entré en grand soubçon de n'estre point payé, & me somme bien & conjure d'escrire au Roy & à vous, que ce qui a esté promis par moy, & ratifié par sa Majesté, soit obserué, & que ce Prince ne demeure point inocqué, car c'est ainsi qu'on parle. Si i'auois à escrire à vn autre que vous, ie me mettrois en deuoir de luy représenter des raisons pour lesquelles on doit contenter ce Prince: mais ie sçay que vous sur tous autres, sçavez & voulez ce qui est de raison & iustice, & de l'honneur & reputation du Roy & de son Conseil, & vous souuenez tres-bien du besoin & necessité en laquelle les deniers à luy deubs ont esté prestez & fraycz, & de l'honneste & genereuse façon dont il s'est departy de la promesse que ie luy auois faite touchant les cautions. Par ainsi ie ne vous en diray autre chose, sinon qu'après la bonté & generosité du Roy, il a toute sa fiance en vous, & en attend toute aide & faueur en ses affaires, en tant qu'ils seront accompagnez de raison & iustice. Et j'ayoit que vous ayez dit à ses gens que vous ne vous empeschiez gueres des finances, si est-ce qu'il dit que vostre autorité s'estend par tout, & que si pour l'amour de luy il vous plaist sortir vn peu hors de l'ordinaire, il vous en fera d'autant plus obligé. A tant, &c. Monseigneur, &c. De Ferrare ce 14. d'Octobre 1598.



## A MONSIEVR DE VILLEROY.

CL.

**M**ONSEIGNEUR, La contagion qui est aduenüe d'Italie du costé de France, est cause qu'on ne peut recevoir ny enuoyer des lettres comme on feroit en temps de santé. De ma part ie n'en ay point receu des vôtres depuis celles que m'apporta le sieur Lormeau du 29. d'Aoust, & crains qu'il ne s'en soit perdu quelqu'une, pour autant que par l'ordinaire de Lyô, qui arriva icy le dixiesme de ce mois, ie n'eus point de lettres du sieur Orlandin maistre des courriers de Lyon, qui a accoustumé de m'escrire par tous les ordinaires : & puis i'ay sceu de Venise qu'il y auoit lettres de vous du sezième Septembre, auquel temps il pouuoit estre que vous eussiez escrit. Et ce qui m'augmente le soubçon est, que le courrier qui part de Lyon ne vient point iusques icy, ains arriué qu'il est en Piémont, on le fait retourner & laisser les valises, & de là vn courrier de Monsieur de Sauoye les porte à Milan, d'où on les enuoye icy par vn troisième courrier, & en tous ces lieux on esuente les lettres & les purge-t-on avec le feu, & pour ce faire on ouure les paquets, & sous pretexte de pouruoir à la santé, on peut contenter sa curiosité, & faire autre chose que vous pouuez bien penser, & mesmes ceux qui peuuent desirer de sçauoir si on escrit quelque chose du Marquisat de Salusfes, ou de quelque autre telle chose qu'ils ayent à cœur. Ce que ie vous escriis, est afin que si vous m'avez escrit depuis ledit 29. Aoust, vous sçachiez que ie n'ay point receu vos lettres, & aussi afin que vous sçachiez le danger qu'il y a pour l'aduenir. Pour mon regard, ie n'ay point trouué aucune commodité de vous enuoyer des miennes depuis le vingt-sept & vingt-huitième Septembre que ie vous escriuis par l'ordinaire de Lyon qui fut dépesché ce iour-là, dont ie vous enuoyay vn duplicata par vn extraordinaire qui partit peu de iours apres ; & vous ayant fait deux lettres dès le 14. & 15. de ce mois sur deux sujets que i'auois & ay fort à cœur, ie n'ay trouué par qui les vous enuoyer, & feront à mon grand regret avec la presente courans vne mesme fortune.

Ce que i'ay à vous escrire de plus est que Monsieur de Luxembourg partit de ceste ville pour la Cour vn Vendredy 9. iour de ce mois, ayant esté traité à dîner le iour precedent par Monsieur le Cardinal Aldobrandin, & par le sieur Iean François Aldobrandin, lequel estoit arriué en ceste ville venant de Rome deux iours auparauant. Et depuis mondit sieur de Luxembourg m'a escrit de Belisone, qui est vn lieu des Grisons aux confins du Duché de Milan le 21. de ce mois, que le 20. comme son bagage passoit sur le lac Major, les voleurs du Duché de Millan le pillerent, & luy emporterent toute sa vaisselle d'argent, & ce qu'il auoit de plus beau & de meilleur dans ses coffres, & tout l'argent qu'il auoit pour faire son voyage, dont il estoit en grand peine. Tout aussi tost que i'eus receu la lettre, ie procuray que nostre saint Pere en escriuist au Connestable de Castille

gouverneur

gouverner le dudit Duché, dont nous attendons la réponse. Cependant ce vola donné à penser à plusieurs, soit ou non, que ce fust vne vengeance de ce que Monsieur de Luxembourg ne fust visiter ledit Connestable lors qu'il estoit en ceste ville. Quoy qu'il en soit, mondit sieur de Luxembourg se pourra souvenir qu'à toutes les fois qu'il me parloit du chemin qu'il vouloit tenir, ie luy disois que ie n'estois point d'aduis qu'il passast par le Milanois, attendu ce qui s'estoit passé entre ledit Connestable & luy, ains qu'il fist le chemin de Bresse qu'on auoit tenu depuis vn si long temps.

Le Vendredy. 16. de ce mois, pource que c'estoit le iour ordinaire de l'audience des ministres du Roy, & qu'il y auoit ja huit iours que mondit sieur de Luxembourg estoit party, j'allois que ie n'eusse rien à traiter avec le Pape, j'allay neantmoins à l'audience que sa Sainteté nous donna le matin en se pourmenant au cloistre des Chartreux de ceste ville. Ie ne luy tins que propos de complimens, conuenables à la charge où i'entrois, & à la premiere audience que j'auois; auquel il me répondit avec toute douceur & courtoisie, & puis me chargea d'escrire au Roy deux choses qu'il disoit luy peser grandement. L'vne des Iesuites, qu'on vouloit chasser du Royaume, disant que c'estoit bien loin de remettre ceux qui en auoient esté mis hors, comme il en auoit requis sa Majesté, & esperé de l'obtenir, quand ce ne seroit que pour l'amour de luy, qui auoit montré par effet la bonne volonté que chacun scauoit enuers sa Majesté; Qu'il ne se pouuoit esmeruëiller assez, qu'après quatre ans que les Iesuites auoient esté tolerez depuis l'arrest donné contre eux, on parlast encores aujourd'huy de les chasser sans aucune nouuelle occasion; & toutes les causes de soubçon qu'on auoit autresfois eues contr'eux estant aujourd'huy cessees, & sa Majesté ayant montré tant de clemence & benignité enuers toute sorte de gens, & enuers les plus capitaux ennemis, & luy ayant esté offert plusieurs fois, comme encores aujourd'huy sa Sainteté l'offroit, de faire sortir tous ceux qui ne luy plairoient; Que telle rigueur, exercee indifferemment sur tout vn Ordre contre toute forme de iustice, offenseroit grandement les Catholiques dedans & dehors la France, & donneroit tres-mal à penser de l'interieur du Roy, & nuïroit infiniment à sa Majesté; Que sa Sainteté l'exhortoit, le prioit, & le conluroit de les souffrir, & qu'on ne leur donnast plus ces alarmes qu'on leur donne de temps en temps.

L'autre chose estoit, qu'il se disoit qu'il y auoit vn Edict en faueur des heretiques, dont il n'estoit encores bien esclaircy; Que cela seroit mauuais en tous temps, mais à present que le Royaume estoit en paix seroit beaucoup pire; Qu'au fait de la religion, le Roy deuoit aller plus retenu que les autres Rois, pour ce qu'à cause des choses passées on penseroit plutost mal de luy que d'vn autre; Que non seulement pour la conscience, mais aussi pour raison d'Estat, & pour son profit & grandeur temporelle, il se denoit abstenir de telles choses; Que cela luy apporteroit infinis dommages, & en sa reputation, & en l'affection des Catholiques, tant ses subiets qu'autres, és moyens de s'agrandir s'il s'en presentoit quelque occasion, comme les choses de ce monde estoient sujettes à changement; Que pour le regard d'Italie, il pouuoit bien s'asseurer s'il faisoit de telles choses qu'il n'y auroit iamais aucune part, & que nul Prince d'Italie n'adhererit ia-

mais au Roy, qui donnast occasion de penser qu'il favorisast à l'hérésie, & à la dilatation d'icelle: & quand à moy, dit-il, quand i'entendis dire telles choses de luy, cela me crucifia; ie vous prie escriuez le lui de ma part.

Voila iustement ces mots, excepté qu'il parloit Italien, & que i'escris en François. Et pource qu'il me le disoit fort amiablement, & qu'il monstroït ne sçavoir pas bien que c'estoit, ie ne pensay pas deuoïr entrer en contestation, ny en grande responce, combien que ie m'en estois appresté, sur ce que Monsieur de Luxembourg m'auoit r'apporté que sa Sainteté lui en auoit dit en son audience dernière; & luy dis seulement que i'esperois qu'il en seroit passé outre contre les Iesuites: mais qu'il ne falloit s'émervueiller, si quand il se presentoit quelque chose qui les concernast par deuant la Cour de Parlement, elle iugeoit conformément à ses arrests precedens: Quand au reste, que ie ne sçauois que c'estoit: mais que ie l'asseurois bien que le Roy n'auoit rien fait que bien à propos & pour le mieux; Que sa Sainteté deuoit meshuy estre assuree de la bonne intention de sa Majesté au fait de la religion, & que ce fondement estant posé, sa Sainteté n'auoit rien à craindre, & deuoit interpreter en bien tout ce qui seroit basti là dessus, & mesmement que chacun desire son bien, & que sa Sainteté disoit elle-mesme, comme il estoit vray, que c'estoit le bien de sa Majesté d'accorder à ces gens le moins que faire se pourroit: Que neantmoins i'escris ce qu'il plairoit à sa Sainteté me commander.

Le Vendredy ensuiuant vingt troisieme iour de ce mois ie ne fus point à l'audience, pour n'auoir rien à negotier pour le Roy: mais hier i'y allay, requis par les solicateurs des expéditions de France, & parlay à sa Sainteté de quelques dispenses, & de deux gratis, dont l'un estoit pour Monsieur le Cardinal de Gondy, qui resigna vne sienne Abbaye au sieur de Pierre Vieu son parent, l'autre pour l'Abbaye de saint Michel de Thireffe, dont, outre le Roy, Monsieur le Marquis de Pisani m'auoit escrit. Il n'y eut autre chose, sinon que ie remerciai le Pape de ce qu'il auoit escrit au Connestable de Castille sur le vol fait à Monsieur de Luxembourg, dont sa Sainteté monstre estre fort desplaisante. Au demeurant la tapisserie de la Couronne, qui auoit esté long temps y a saisie à la douane de Rome, a esté en fin deliurée pour estre restituée au Roy, mais ce n'a pas esté sans grande difficulté; pource que le temps dans lequel nous deuions payer au marchand Portugais les douze cens escus estoit passé, & ledit marchand auoit depuis obtenu iugement que la tapisserie luy seroit baillée; & sans qu'il l'auoit depuis laissée à la douane, pour ne voutoir payer la gabelle qu'on luy demandoit, nous ne l'y eussions plus trouuée, ny possible iamais veüe. Vous ne croiriez les allees & venuës qu'il en fallut faire. Vn marchand Espagnol appellé Diego Valderama, auquel le sieur Antoine Bonuifi de Lucques s'estoit adressé pour payer ladite somme & recouurer ladite tapisserie, y a fait tant, que ie ne pense point qu'aucun François s'y fust peu employer avec plus de diligence, de fidelité, & d'affection. Je l'ay aidé d'icy, luy enuoyant des mandemens qui ont esté nécessaires pour ladite tapisserie. Nonobstant la main leuée qui en auoit esté accordée audit marchand Portugais, ladite tapisserie a esté enuoyée de Rome à Lucques audit sieur Antoine Bonuifi lequel la fera puis apres cōduire en Cour par les voyes qu'il sçait trop mieux.

Il y a environ quatre mois que le sieur de Selincourt Abbé de saint Eustoul, & le sieur de la Bretonniere Secrétaire de Monsieur de Nemours, avec vn President de Saoye sont prés le seigneur Dom Cesare d'Este à Modene, où ils ont conféré avec le conseil dudit seigneur Dom Cesare, & puis baillé leurs raisons par escrit d'une part & d'autre, & à présent sont apres à compromettre à trois Cardinaux du différent qui est entre Madame de Nemours & ledit seigneur Dom Cesare. Lequel différent est; que Madame de Nemours pretend par la mort du dernier Duc de Ferrare son frere, auoir succédé en tous les biens alodiaux qui estoient à ses pere & mere au temps de leur mort, & ledit seigneur Dom Cesare pretend qu'elle n'y a rien du tout. Monsieur le Cardinal Aldobrandin, comme heritier testamentaire de Madame d'Urbain sœur dudit feu dernier Duc de Ferrare & de Madame de Nemours, auoit aussi différent avec ledit seigneur Dom Cesare pour le supplément de legitime: mais ils en ont accordé, par l'entremise de Monsieur le Cardinal Bandini, à la somme de soixante & dix mille escus, outre & par dessus quatre vingts dix mille escus qu'il s'est trouué qu'elle en auoit receu en sa vie. Mais il reste encores à voir en quoy lesdits soixante & dix mille escus seront payez. Ledit Seigneur Dom Cesare en voudroit payer partie en des maisons qu'il a en ceste ville & aux environs, partie en debtes qu'il pretend que la Couronne de France luy doieue. Sur lesquelles debtes m'ayant demandé aduis ledit Seigneur Cardinal Aldobrandin, ie luy ay dit qu'il me sembloit qu'il ne deuoit point accepter de ces vieilles debtes que personne ne paye volontiers; outre que Madame de Nemours, & ses enfans qui estoient grands, pretendoient tout ce qui estoit de cette succession, & mesmement en France. L'estimay luy deuoir respondre ainsi, tant pour la verité, que pour crainte que i'auois que s'il auoit à demeller avec le Roy quelque chose d'intérêt pecuniaire, & qu'il n'en fust dressé si bien & si tost comme il voudroit, cela ne luy apportast en fin occasion de se mescontenter & aliéner de nous.

Le sieur d'Allegre a esté icy quelques iours auant que Monsieur de Luxembourg en partist, & estant apres allé à Padouë, il est repassé par icy pour s'en aller, comme l'on dit à Rome. Le Pape ayant entendu pourquoy il estoit absent de France; ne le voulut point admettre à baiser ses pieds. Tout ce que i'ay entendu de luy, c'est qu'il a intention d'aller en Hongrie servir l'Empereur en la guerre qu'il a contre le Turc.

Le Mardy treizieme iour de ce mois, furent par le Pape faites les funérailles du feu Roy d'Espagne, qui ne furent autre chose qu'une Messe haute de Requiem, chantée par le Cardinal d'Aquila Espagnol, où aslista le Pape, les Cardinaux, Euesques, & autres Prelats de ceste Cour, avec le Lieutenant, & les versets & l'oraison qu'ils disent apres la Messe. Il n'y eut point de chappelle ardente, ny plus grand nombre de chandelles qu'en vne autre Messe; bien y eut-il vne harangue funebre à la louange dudit Roy defunct, prononcée par l'Euesque de saint Sepulchre avec la chappe & la mitre. Ladite harangue fut modeste, & sans détraction de personne, & assez belle; aussi est ledit Euesque domestique dudit sieur Cardinal Aldobrandin. L'Ambassadeur d'Espagne ne se trouua point à rien de tout ce qu'il y auoit d'Ambassadeur de France qui l'eust précédé. Tous

les autres Ambassadeurs s'y trouuerent, comme ils ont accoustumé d'affister aux autres chappelles que le Pape tient. Ce iour-là mesme vn estafier du Vice-Legat de ceste ville, qui est le Seigneur Centurion clerc de chambre & Archeuesque de Gennes, donna des coups de baston au cocher de Monsieur le Cardinal saint George neuueu du Pape, pource qu'il n'auoit voulu retirer son coche vuide pour laisser passer celuy du Vice-Legat qui y estoit en personne; desquels coups de baston s'estans ledit Seigneur Cardinal saint George plaint au Pape, & luy semblant que sa Saincteté ne prenoit tant la chose à cœur comme il pensoit qu'il deust faire, s'en alla le soir à deux heures de nuit hors de ceste ville & de l'Estat du Pape, & se trouue maintenant à Vincence, n'estant point voulu retourner, encores que sa Saincteté luy ait enuoyé diuerses personnes pour le faire venir. Chacun croit qu'il auoit quelqu'autre mal au cœur, à sçauoir la jalousie de ce que Monsieur le Cardinal Aldobrandin gouerne & fait tout aupres de nostre saint Pere le Pape, & pour lequel ledit Seigneur Cardinal saint George se partit vne autresfois l'esté passé, & fut absent de ceste Cour enuiron deux mois. Ce sont des fascheries domestiques; que le Pape, qui est de nature douce & tendre, porte impatiemment, & avec quelque honte: toutefois il est en bonne santé, graces à Dieu, que le prie le nous conseruer longuement.

Monsieur le Cardinal de Florence n'est point encores arriué par deçà, ayant fait, ou faisant encores vne espee de quarantaine au Duché de Milan, pour estre passé en des lieux infectez ou suspects de peste. De Monsieur le Cardinal de Ioyeuse, on pense qu'il soit vers Gennes, & que possibles'en irat'il droit à Rome sans venir en ceste ville de Ferrare, s'il entend que le Pape vueille retourner à Rome dans peu de temps.

Toute ceste Cour est en attente de ceste Princesse d'Autriche, qui doit estre espousee icy par la main de sa Saincteté au ieune Roy d'Espagne. Il y a assez long temps qu'elle est partie de Gratz pour s'acheminer en ça: toutesfois tant plus nous allons en auant, tant plus on dit qu'elle arriuera tard. Ce qui fasche tous ces Courtisans, qui craignent que le Pape ne s'en puisse retourner à Rome si tost apres ceste ceremonie faite, si elle se fait trop tard dans l'hiuer. Ils apprehendent encores vn autre plus grand mal, d'autant que la peste estoit à Gratz quand ceste Princesse en partit. L'Archiduc Albert s'est fait attendre longuement auant qu'arriuer à elle, aussi dit-on qu'en passant par l'Allemagne, il a brigué ces Princes pour estre fait Roy des Romains. On vient d'entendre qu'il est arriué à Trente, où la Princesse l'attendoit, d'où ils doiuent venir icy ensemble. Ledit Archiduc, à ce que l'on dit, vient fort accompagné, & entre autres de Monsieur d'Autmale, & du Seneschal de Montelinar.

Le Pape fait de grands apprests pour les recueillir & traicter, voulant les défrayer par tout cet Estat de Ferrare, & y aura icy grand concours de toute l'Italie. Toutesfois il y en a qui disent que quelques vns des Princes d'Italie ne s'y trouueront point, pour n'estre d'accord de leurs rangs, mais on n'est pas mesme bien resolu icy quel lieu l'on donnera à ceste Princesse en l'Eglise, & encores moins l'Archiduc Albert en la chappelle du Pape, par ce qu'ils demandent plus haut qu'on ne voudroit leur donner, & que le

Ilure des ceremonies ne permet. Aussi font ladite Princesse & l'Archiduc encores difficulté de donner aux Cardinaux les tiltres d'Illustrissimes & Reuerendissimes, & de leur faire les autres honneurs accoustumez. Le Cardinal Cusan Milanois est mort depuis dix iours en çà à Milan. Il y en a qui disent que le grand Maistre de Malthe est aussi mort, ou griefuement malade; toutesfois on en attend plus grande certitude. Le Duc de Parme a esté bien près de mourir ces iours passez, mais à present il est hors de danger.

Au mois de Septembre le Cical General de mer du Turc passa en la coste de Sicile avec cinquante galeres pour aller en Barbarie, & estant à la veuë de Messine, d'où il est natif, enuoya prier le Viceroy de luy enuoyer sa mere pour la voir; ce qu'apres quelques difficultez luy fut accordé, & il la renuoya bien tost apres avec plusieurs presens. En quoy ie notte que ce renegat qui a renié son Dieu, n'a pû renoncer à l'affection naturelle enuers sa mere.

Vous aurez veu auant que ceste lettre arrine à vous la nouuelle de la prise de Bude en Hongrie sur le Turc: toutesfois il restoit encores aux Chrestiens quelques forts à prendre, qu'ils esperoient d'auoir bien tost comme ne pouuans estre secourus. Il y a encores icy quelques nouuelles du Royaume de Suede, mais, si elles sont vrâyes, vous les aurez sceuës par delà plustost que nous icy. A tant, &c. Monseigneur, &c. De Ferrare ce dernier d'Octobre 1598.

## A MONSIEVR DE VILLEROY.

## C L I.

**M**ONSEIGNEVR, Nous pensions que l'ordinaire deust partir pour Lyon le dernier Octobre, duquel iour est aussi ma dernière lettre: mais il est encores icy, pour n'auoir assez de lettres pour fournir aux frais qu'il luy faut faire en son voyaye. Cependant i'ay recoüré la copie du Bref que le Pape a escrit au Connestable de Castille gouverneur de la ville & Duché de Milan, sur le vol qui fut fait à Monsieur de Luxembourg sur le lac Major le 20. d'Octobre, & la vous enuoyeray avec la presente. Sa Sainteté a parlé avec grande affection au Duc de Sesse Ambassadeur pour le Roy d'Espagne, luy recommandant d'en escrire audit Connestable, auquel sa Sainteté en parlera encores quand il sera icy auec la future Royne d'Espagne: au deuant de laquelle est ellé Monsieur le Cardinal Aldobrandin des le troisiésme de ce mois, & l'attend-t'on luy pour ce iourd'huy: mais elle ne doit arriuer que d'icy à huit iours. Monsieur le Cardinal de Florence arriua en ceste ville Vendredy au soir sixiesme de ce mois, & ie luy fis la reuerence comme il descendoit de son carrosse, & saluai tous les Prelats de sa suite, qui se loient tous grandement du Roy, & de vous, & de toute la France: ie les verray plus amplement, & en apprendray d'auantage.

On nous donne esperance qu'apres les ceremonies des espoufaillies de ladite Royne d'Espagne nous nous en retournerons à Rome, où nous nous desirons tous. Mais auant que tout soit acheué icy, nous serons si auant vers l'hyuer que ie ne m'en puis assseuer, & mesme que cependant il pourroit arriuer au Pape quelque accez de goutte, dont Dieu le garde.

Monsieur le Cardinal Aldobrandin vient de retour de ladite Royne, & dit qu'elle arriuera Mercredy au soir onzième de ce mois à quatre milles d'icy, en vn lieu appellé l'Isle, & le douzième sera faire l'entree en ceste ville. A tant, &c. Monseigneur, &c. De Ferrare ce neuuiesme Nouembre 1598.

## A V R O Y.

## CLIX.

SIRE,

Le Pape m'a enuoyé querir ce iourd'huy, & m'a dit que pour le fait des Iesuites qui le trauailloit grandement, & dont il m'auoit parlé dernièrement, il vouloit enuoyer vers vostre Maiesté, l'Archeuesque d'Attria nommé par vostre Maiesté à l'Archeuesché d'Arles; Que ceux de ceste Societé desiroient aussi y enuoyer vn des leurs, à sçauoir le Pere Lorenzo Magio, personnage fort sage & moderé, subiet de la Seigneurie de Venise, lequel fut autresfois en France du temps du feu Roy, auquel il donna toute satisfaction & contentement; Qu'il loüoit leur desir: mais ne vouloit qu'aucun d'eux y allast sans passe-port de vostre Majesté; pour des inconueniens qui s'en pourroyent ensuiure, & aigrir d'auantage les matieres; Qu'il m'auoit fait appeller pour me dire cela, & que i'en escriuisse à vostre Majesté, & la suppliasse de sa part qu'il vous pleust enuoyer vn passé-port pour ledit Pere Lorenzo Magio; Qu'il s'en pourroit trouuer auprès de vostre Maiesté qui n'en seroient point d'aduís: mais qu'il sçauoit bien que vous faisiez profession de luy vouloir complaire, comme il vous aymoit de tout son cœur, & que vous estiez d'un naturel si bon & genereux, qu'il penseroit bien obtenir de vous vne chose plus difficile; Qu'il vous prioit doneques de faire cela pour l'amour de luy, & ne luy refuser point vne chose qui ne vous obligeroit à faire plus ny moins, & qui s'accordoit mesmement à des ennemis en temps de guerre ouuerte. Ie ne suis point voulu entrer à luy faire des difficultez mal à propos & sur le champ, & en chose qu'il monstroît auoir fort à cœur, & qu'il me disoit avec tant d'expression & de bonhaimeté: mais ie luy ay respondu seulement que i'obeyrois à son commandement. Apres cela, il m'a demandé si i'auois veu Monsieur le Legat; & ie luy ay respondu qu'ouy, aussi tost qu'il fut descendu de son carrosse à son arriuee; & il m'a dit qu'il estoit tout François, & qu'il disoit tres-grand bien de vostre Majesté, à laquelle ie prie Dieu qu'il donne, SIRE, &c. De Ferrare ce 9. Nouembre 1598.

## A MONSIEVR DE VILLEROY.

## CLIII.

**M**ONSEIGNEVR, Par le lettre que j'escriuis au Roy, vous vertez comme le Pape desire qu'il plaise à sa Maieité enuoyer vn passe-port pour le Pere Lorenzo Magio Iesuite, qui fut en France & en Cour en l'an 1587. duquel vous vous pourrez souuenir, comme feront aussi Monsieur le Cardinal de Gondy, Monsieur le Marquis de Pisani, & Monsieur de Gondy. Et à la verité on ne pouuoit faire election de personne plus discrete & plus moderee, ny de pays moins suspect, & de qui le Roy & vous tous puissiez demeurer plus satisfaits. Le Pape m'a commandé d'en escrire non seulement au Roy, mais aussi à vous. J'ay mis en la lettre de sa Majesté purement & simplement ce qu'il m'auoit dit. Quant à vous ie n'ay point autre charge particuliere de sa Sainteté que simplement de vous en escrire, & ne sçachant que vous en dire, ie m'en remets à vostre bon iugement. Bien crois-je, qu'outre les raisons que le Pape m'a alleguees, il y auroit plus de mal à luy refuser ce contentement, qu'il demande avec tant d'affection, & qui en fin ne vous oblige à rien, que n'y en sçauroit auoir à le luy accorder; ains si vous auez à tolerer ceux de ceste Societé qui sont demeurez au Royaume hors le destroit du Parlement de Paris, comme ie ne puis croire autrement, & en ay esté tousiours d'aduis, & le vous ay escrit diuerses fois; pour la reputation & pour le bien des faires du Roy, & non pour aucune particuliere affection que ie leur porte, il me semble que vous pouuez vous seruir, & deuez estre bien aisé de ceste requeste qu'on vous fait, & du voyage qu'on desire faire vers vous, comme d'un moyen de monstrier puis apres au Pape que ce sera pour son respect seul, & à son instance, que vous vous serez en fin résolu à ceste tolerance, & que sans le desir que le Roy aura eu de luy complaire, il en seroit allé autrement. Ledit Pere Magio est âgé de 68. ans, & a pour compagnon vn qui en a 61. & pour des infirmités qui pourront suruenir à l'un & à l'autre ils ont besoin d'un tiers qui entende & parle François; par ainsi on desire que ledit passe-port soit pour ledit Pere Magio, & pour trois autres. Et d'aurant qu'il pourroit estre que l'Euesque d'Attria, dont est fait mention en la lettre du Roy; & ledit Pere Magio ne pourroyent partir en mesme temps, où iroient par diuers chemins, on desire aussi que le passe-port soit conceu de façon qu'il puisse seruir audit Pere, soit qu'il aille en compagnie dudit sieur Euesque, ou autrement. Au demeurant, ledit passe-port pourra estre baillé par delà à l'Abbé Bandini, qui l'enuoyera au Pape, ou me pourra esté enuoyé à moy, qui le bailleray à sa Sainteté. A tant, &c. ie prie Dieu qu'il vous donne, Monseigneur, &c. De Ferrare ce 9. Nouembre 1598.



## A MONSIEVR DE VILLEROY.

## CLIV.

**M**ONSEIGNEVR, l'auois desia fait ma dépesché par l'ordinaire de Lyon, & baillée au maistre des courriers, quand i'ay receu trois de vos dépesches ce iourd'huy apres disner par vn extraordinaire venu de Lyō; desquelles il y en auoit deux à moy, & vne à Monsieur de Luxembourg. Les miennes contenoient vne lettre du Roy du 4. & trois vostres, deux du huiſt & vne du vingt-douxième d'Octobre, avec vne de sa Majesté pour le grand Duc de Toscane. Celle de Monsieur de Luxembourg contenoit deux lettres à luy, vne du Roy, du quatrième, & vne vostre du septiesme du mesme mois d'Octobre, avec vne pour le seigneur Mario Bandini, vne pour Monsieur Poicteuin, vne pour le maistre des courriers, vn paquet pour Monsieur l'Euesque de Volterre, & des lettres Royaux touchant l'Abbaye S. Honorat de Lerins en Prouence, & encōre vn petit paquet de quelque particulier à Monsieur de Luxembourg. I'ay ouuert la lettre du Roy & la vostre à mondit sieur de Luxembourg, suivant le commandement que sa Majesté & vous m'en faisiez par celles qui s'adressoient à moy; & vous respondray sommairement à ce qui aura besoin de response, tant des vnes que des autres dépesches, pour bailler cette-cy audit courier ordinaire auant qu'il parte.

Premierement doncques, ie remercie & loue Dieu de tout mon cœur, de ce qu'ayant permis que le Roy ait eu trois iours la fièvre, il luy a plu l'en deliurer si tost, & le remettre en bonne santé, & le prie qu'il la luy maintienne & accroisse de bien en mieux, & nous le conserue longuement, pour son honneur & gloire, pour le salut de la France & bien de toute la Chrestienté, & pour l'ornement & décoration de ce siecle: & ie ne faudray de faire part de ceste bonne nouuelle à ceux de ceste Cour à qui i'estimeray que elle apportera plus de plaisir.

Au demeurant i'ay esté bien aise d'estre deliuré du soubçon que i'auois qu'on m'eust emblé quelqu'une de vos dépesches comme vous verrez par ma lettre du dernier d'Octobre, & esperes aussi que celles que ie vous fis des 27. & 28. Septembre vous auront esté rendues. I'ay bien noté, & rēuerray encor mieux le contenu des susdites dépesches, tant à Monsieur de Luxembourg qu'à moy adressees, & m'en ayderay pour le service du Roy aux occasions qui s'en offriront, & représenteray à nostre saint Pere en temps & lieu tout ce qui est pour estre traité, avec sa Sainteté, & vous en rendray compte. Bien luy tairay-je, iusques à ce que i'aye response de vous à celle-cy, que le Roy se veut accommoder au vouloir de sa Sainteté touchant les Iesuites (desquels mots i'ay bien noté la finaison que vous y avez apposé en marge de la lettre de vostre main à Monsieur de Luxembourg) & ay estimé le deuoir ainsi faire à cause de l'Abassade qu'on vous veut enuoyer, & du passe-port qu'on vous demande, comme vous

verrez

irez par mes lettres au Roy & à vous du 9. de ce mois sur ce propos. Car si ie disois à present ce-y, on ne lairroit de vous enuoyer la mesme Ambassade, à cause qu'en toutes façons il faut que l'Euesque d'Arria aille au Roy, pour luy prestier serment de fidelité pour l'Archeuesché d'Arles, duquel il sera pourueu auant qu'il parte de ce pais, & luy baillera-on pour charge principale de demander que les Iesuites qui ont esté chassez du ressort du Parlement de Paris y fussent remis. Là où à present l'ay descouvert qu'on ne vous parlera de cela sinon du commencement, pour venir puis apres à ceste demande, qu'au moins ceux qui sont restez au Royaume y soient tollerez; & lors vous contenterez la Pape & eux de cecy, qui estant dit par moy dès à present ne vous tiendroît lieu de rien, & rendroit toute leur Ambassade vaine, & pleine de mécontentement. Et si vous aurez fait un grand plaisir à sa Sainteté, d'auoir à sa requeste donné le passe-port pour le Pere Magio, duquel vous pourriez encor vous seruir, pour mettre en execution le triage que vous voulez faire de ceux qui auront à estre tollerez. En tout euenement, quand vous ne voudriez point que ceste Ambassade se fit, tousiours serez vous à temps de vous laisser entendre & de cecy & de cela, quand vous me respondrez à ceste-cy, & à madite despesche du 9. Nouembre, & dire qu'il n'est point besoin qu'on prenne ceste peine, & que pour le respect du Pape vous voulez faire telles choses & rien plus quand bien on enuoyeroit qui que ce fust. Combien que, puis qu'il vous donnent d'eux-mesmes ce delay, il sembleroit que vous le deuriiez prendre, & attendre ladicte Ambassade, & mesmes d'autant que vous auez à publier cet Edit touchant ceux de la religion pretendue reformee, & qu'il sera bon de reseruer ceste concession iusques apres ladicte publication, pour y seruir de quelque leniement & adoucisement. Et plust à Dieu que vous y puissiez adiouster la publication du Concile de Trente, comme le plus bel emplace qui s'y peust appliquer.

I'enuoyeray au grand Duc la lettre que le Roy luy escrit, & luy feray part de ce que vous m'auiez escrit touchant luy, autant comme i'estimeray estre à propos. Cependant s'il faut payer les despens de la garnison du chasteau & Isle d'Is depuis le mois d'Aoust, comme ie croy qu'on le voudra, il vous plaira vous souuenir de ce qu'à la fin des comptes qu'on me bailla, il n'y auoit pour les derniers quatre mois que mille quatre cens soixante & dix-sept escus par mois, qui est la plus moderee & douce raison de tous lesdits comptes, pour les causes contenues à la fin desdits comptes & qui vous espargnera beaucoup de peine, & possible encor de frais.

I'enuoyeray à Monsieur l'Euesque de Volterre son paquet, & donneray lesdites lettres Royaux au procureur de la Congregation du Montcassin, & feray tenir le reste à chacun à qui il s'adresse. Et louë grandement que le Roy soit en deliberation d'enuoyer par deçà Monsieur de Silley, duquel l'honneur & reuerer les vertus & valeur & le seruiray de tout mon pouuoir, non seulement pour le respect du Roy, mais aussi pour celuy de sa personne. Il est besoin qu'il vienne bien muni pour le regard du Marquisat de Salusses, car i'entends que Monsieur de Sauoye nous taille beaucoup de besongne par voye de disputes, & de raisons & moyens outre que tout les artifices qui se pourroient imaginer par deux nations les plus

çatures & les plus fines du monde y seront employez. Et quant à l'autre fait, ie vous prie de bien considérer ce que ie vous ay escrit de huis & cas de la pureté spirituelle par Baptisme ou Confirmation, car vn de-ceux-là nous suffiroit, & seroit la voye la plus douce qu'en scauroit treuuer pour paruenir là où nous desirons.

Quant à Monsieur le President de Villiers, ie luy rendray aussi tout le seruice qui me sera possible, estant lóg-temps y a bien informé de ses bonnes & rares qualitez : aussi lui ay-je escript, & offert mondit seruice tout aussi tost que i'ay entendu qu'il approchoit de Venise, & en attents response pour toute ceste semaine : & suis bien aise que vous ayez escript par luy à Monsieur le Cardinal Priuli, comme aussi du bon ordre que vous auez donné au fait des courriers de l'ordinaire d'Espagne, & de la resolution du Roy pour le regard de Madame l'Amiralle & sa fille, qui n'ont moins besoin de la protection de sa Majesté à present qu'auparauant, comme i'entends par les aduis qui viennent de ce costé-là.

Nous auons icy les mesmes nouuelles d'Espagne, & de Transsylvanie, & de Suede que vous par delà, excepté qu'on tient icy que le ieune Roy d'Espagne veut garder ce que son pere a fait touchant la cession & transport des Paysbas à l'Infante & l'Archiduc Albert. Je desire qu'il perseuere constamment en ceste resolution. La Roynes future d'Espagne arrive à ce soir à quatre mille d'icy, & doit faire son entree en ceste ville demain. A tant, &c. Monseigneur, &c. De Ferrare ce 11. Nouembre 1598.

A MONSIEVR DE VILLEROY.

CLV.

**M**ONSEIGNEVR, le tiens à grande faueur & honneur l'aduis qu'il vous a pleu me donner du petit fils qui vous est nay, & m'en conioiys avec vous de tout mon cœur, priant Dieu qu'il l'accroisse, & le benisse de toutes sortes de benedictions. C'est vn Seigneur de plus que i'auray en luy, pour exercer, si Dieu me donne vie, vne partie de la gratitude que ie vous rends pour tant d'obligation que ie vous ay. Je n'ay point encor eu grand moyen d'entretenir Monsieur le Cardinal de Florence depuis qu'il est arriué: mais l'Ambassadeur du grand Duc m'a dit qu'il se loue grandement du Roy & de vous, & qu'il n'est possible de parler d'homme avec plus d'honneur & loüange qu'il fait de vous. Aussi l'a-t-il bien fort asseuré de vostre bonne affection envers le grand Duc son maistre, comme il le veut dire plus amplement à son Altesse mesme, ayant delibéré d'aller faire les fetes de Noël à Florence sa patrie & son Archeuesché. Je vous remercie tres-humblement de ce qu'il vous a pleu faire pour le Procureur general de l'Ordre de Cisteaux, touchant le prieuré des Doulours; & prie Dieu qu'il vous donne, Monseigneur, &c. De Ferrare ce 11. Nouembre 1598.

## A MONSIEUR DE VILLEROY.

## CLVI.

**M**ONSEIGNEUR, Par l'ordinaire de Lyon qui partit d'icy le douziesme de ce mois au matin ie vous escriuis plusieurs lettres: maintenant par vne commodité qui se presente d'un extraordinaire, ie vous enuoye vn duplicata, & vous diray que la Princeesse d'Austrie avec l'Archiduc Albert n'arriua point à l'Isle le vnziesme comme il auoit esté dit, mais bien le 12. qui estoit vn leudy. Le lendemain Vendredy 13. elle fit son entree sur le soir, & luy allerent au deuant tous ceux de cette Cour, & mesmes les Cardinaux sortirent en corps & en Pontificat iusques hors la porte de la ville, & l'accompagnerent iusques à la grande Eglise & au Palais, où le Pape la receut en Consistoire public, sans bouger de son siege, & sans mot dire, comme ie le sçay pour l'auoir veu de fort près. La ceremonie de cette reception fut fort courte: car apres qu'elle eut baissé les pieds & la main, on la mit à deux pas pres du Pape sur la main gauche toute debout: & puis l'Archiduchesse sa mere baissa semblablement les pieds & la main, & la mit-on au costé gauche de sa fille aussi debout. Apres elles l'Archiduc Albert baisa tous de mesme les pieds & la main, & fut embrassé du Pape, & baissé en l'une & l'autre iouë, & le mit-on de l'autre costé du Pape vis à vis del'Archiduchesse. Cela fait le Pape, se leua & donna à vn chacun la benediction, & s'en alla ladite Princeesse, l'Archiduchesse sa mere & l'Archiduc Albert demourerent en la place où on les auoit colloquez, pres la chaire du Pape, entretenus par les Cardinaux qui auoient mené ladite Princeesse aux pieds de sa Sainteté, & par autres Cardinaux Diacres; & comme le Pape fut hors la salle du Consistoire, & la presse y n'peu passer, on mena ladite Princeesse à l'appartement où elle deuoit loger avec l'Archiduchesse sa mere, & puis ledit Archiduc au sien. Le Samedi 14. ladite Princeesse, & l'Archiduchesse sa mere, & l'Archiduc Albert, ayrent la Messe du Pape & dînerent avec sa Sainteté. L'apres-dinnée ils receurent les visites, & ie fis faire le compliment enuers tous trois comme seruiteur du Roy. Elles auoient vn truchement qui leur disoit en Allemand ce que ie leur auois dit en Italien, & me respondit à moy en Italien ce qu'elles luy auoient dit en Allemand. L'Archiduc n'auoit point de truchement, & me respondit en Espagnol. Le Dimanche 15. le Pape celebra la Messe en Pontifical, & apres l'offertoire espousa de sa main ladite Princeesse au jeune Roy d'Espagne, & tenant lieu dudit Roy l'Archiduc Albert, fondé de lettres de procuration, laquelle fust leuë auant que commencer l'acte des espousailles. Et apres que ladite Princeesse, deuenüe par ce moyen Roynne d'Espagne, fust ramenee en sa place, le Pape espousa aussi de sa main l'Archiduc Albert à l'Infante d'Espagne, representee par le Duc de Sesse son procureur, duquel aussi la procuration fut leuë auant que proceder à ces espousailles. Apres la communion de la Messe, le Pape

donna à communier à la Roïne, à l'Archiduchesse sa mere, & à l'Archiduc Albert, & audit Duc de Sesse: & quand la Messe fut finie, sa Sainteté donna à ladite Roïne la rose que les Papes ont accoustumé d'enuoyer aux grandes Princesses quand elles se marient. Au demeurant, ny ladicte Dame Roïne, ny ledit Archiduc n'eurent point de lieu au cœur pendant que la Messe se celebroit, ainse estoit ladite Dame Roïne avec l'Archiduchesse sa mere environ six ou sept pas hors le chœur, en pareille hauteur neantmoins, en vn petit tabernacle ou cabinet qu'on leur auoit fait du costé du bout de l'Aurel où l'on dit l'Euaigile, d'où elles voyoyent dans le chœur, & estoÿt veuës de ceux qui estoÿent audit cœur: & l'Archiduc Albert estoit en vn autre semblable cabinet du costé du bout de l'Aurel où se dit l'Epistre. Le Duc de Sesse qui est icy résident Ambassadeur pour le Roy d'Espagne, le Connestable de Castille, & autres tels Seigneurs n'auoyent point de rang, & se tenoyent debout aupres du lieu où estoit l'Archiduc, comme les Dames estoÿent aupres de celui où estoÿent la Roïne & l'Archiduchesse sa mere. Les Ambassadeurs de l'Empereur & de la Seigneurie de Venise estoÿent en leurs lieux accoustumez, aupres de la chaire du Pape tout debout. Les Agens n'ont point de rang: mais comme Euesque assistant au Pape ie seois avec les autres Euesques assistans. Et Deuant ladite Dame Roïne estre encensee par l'vn des assistans, il toucha à moy à luy donner l'encens: ce qui fut pris pour vn bon augure que la paix faite entre France & Espagne durerait, & que ces deux Couronnes & nations viuroÿent desormais en bonne concorde & amitié. A l'Archiduchesse & à l'Archiduc fut donné l'encens par le Seigneur Adorno, qui estoit n'agueres en France avec Monsieur le Legat, à cause d'vn office de Soudiacre qu'il a en la chappelle du Pape. Le soir du Dimanche il y eut bal chez la Roïne. Hier Lundy au matin Monsieur le Cardinal Aldobrandin luy donna à dîner, avec l'Archiduchesse, & l'Archiduc, & aux principaux Seigneurs qui les accompagnoÿent. L'aprèsdisnée il y eut vne representation & forme de Tragedie de l'histoire de Iudith, iouïee par les escoliers des leuires de ceste ville. On a tenu iusques icy que ladite Dame Roïne partiroit demain: maintenant on parle de quelque delay plus long. Chacun se louë de la modestie & courtoisie de ladite Dame Roïne, & de sa mere, & de l'Archiduc, qui se sont contentez des honneurs qu'on leur a voulu départir, & se sont bien volontiers accommodez à ceux qu'on desiroit d'eux. Mais le Connestable de Castille a encores fait des siennes, ayant appelé insolent Monsieur Visconte Euesque de Ceruë, vn des deux Euesques Nonces que le Pape auoit enuoyez à l'Isle pour y recevoir & seruir ladite Roïne, & ayant encor voulu en ladite entree precéder le College des Cardinaux. Et pource qu'on ne luy voulut souffrir, s'en est allé, & fait aller les autres Seigneurs qui marchoyent avec luy, sans accompagner la Roïne leur maistresse en vn acte si solennel. Arant, &c. de Ferrare ce 17. Nouembre 1598.

## A MONSIEUR DE VILLEROY.

## CLVII.

**M**ONSEIGNEUR, La dernière lettre que ie vous ay escrite estoit du 17. de ce mois; ceste-cy seruira pour continuation des choses que ie vous escrinois. Le lendemain doncques, qui estoit le Mcredy 18. la Royne d'Espagne partit de Ferrare du matin, pour s'acheminer vers Milan. Monsieur le Cardinal Aldobrandin alla avec elle, pour l'accompagner non seulement tant que l'Estat du Pape durerait, mais aussi iusques à ladite ville de Milan. En ceste solemnité des espousailles de ladite Dame Royne ne s'est trouué aucun Prince d'Italie, excepté le Duc de Mantouë comme incogneu, sans se laisser visiter, ny mesme voir, sinon que le moins qu'il a pû, ayant suivy ladite Dame Royne depuis Mantouë, où il l'auoit receuë & traitée deux iours & demy quand elle venoit à Ferrare.

Par mes lettres precedentes, ie vous auois escrit comme Monsieur d'Autmale accompagnoit en ce voyage l'Archiduc Albert. S'il eust esté reconcilié avec le Roy, ie le fussé allé visiter comme Prince vassal & subiet de sa Maiesté: mais ne s'estant remis en la bonne grace de sa Maiesté i'estimay: ne deuoir point aussi faire semblant de sçauoir qu'il fust en ceste troupe. Mais le mesme iour de Mardy dixseptiesme, apres que ie vous eus escrit & enuoyé la vostre dont ie vous ay fait mention au commencement de ceste-cy, il me vint voir, pour auoir sceu comme il me dit luy-mesme, que ie faisois les affaires du Roy, & pour la reuerence & deuotion qu'il disoit rendre à sa Maiesté. Il fut enuiron vne heure avec moy. Tous les propos qu'il metint furent fort sages & modestes, & la pluspart en declaration du grand desir qu'il disoit auoir d'estre receu aux bonnes graces du Roy, & de sa tres-humble affection & deuotion enuers sa Maiesté, & du tres-fidelle seruice qu'il luy vouloit rendre toute sa vie. Au demeurant il s'excusoit des choses passées, & du voyage mesme qu'il alloit faire en Espagne avec ladite Royne & Archiduc, & s'efforçoit de monstrier qu'il n'auoit point esté des pires de la ligue; Se plaignoit de ce que la Cour de Paslement auoit procedé contre luy avec plus de rigueur & d'animosité que contre aucun autre de sa qualité; Disoit auoir enuoyé vn sien gentilhomme vers le Roy, pour exposer à sa Maiesté le desir qu'il auoit d'estre receu en sa bonne grace, & de luy rendre tout le plus humble & le plus fidelle seruice qu'il pourroit; Qu'il sembloit que sa Maiesté luy donnast esperance d'accepter sa bonne volonté, sous condition, s'il obtenoit certaines graces pour le sieur Antonio Perez, plustost que purement & simplement; Qu'il vouloit bien faire pour ledit sieur Antonio Perez tout ce qui seroit en sa puissance: mais qu'il luy sembloit que comme sa qualité & sa cause estoit fort differente de celle dudit Perez, sa condition aussi ne deuoit dépendre de celle dudit sieur Perez; Qu'il vouloit enuoyer de nouveau ledit gentil-

homme vers sa Majesté, pour luy remonstrier ce que dessus, & esperoit que sa Maïesté vferoit enuers luy de la mesme clemence & bonté dont elle auoit vsé enuers tant d'autres qui n'en estoient plus dignes que luy: cependant me requeroit de faire entendre à sa Majesté ceste sienne bonne disposition & deuotion. Je luy respondis le mieux que ie püs pour sa consolation, & pour la conseruation & accroissement de sa bonne volonté: luy promettant d'auertir le Roy del'honneur qu'il luy auoit rendu en ma personne, & les bons propos qu'il m'auoit tenus: & le lendemain au matin ie fus en son logis pour luy rendre sa visite, mais il en estoit ja party à cause que la Roynie estoit sur son partement, & ie fus le trouuer chez ladite Roynie, & luy dis comme ie venois de son logis, & fis avec luy compliment conuenable à l'occasion qu'il m'en auoit donnée le iour auparauant.

Vn Gentil-homme Italien appellé le Colonel Orfeo, enuoyé par Monsieur de Lorraine, me vint trouuer le Dimanche au soir quinziesme de ce mois, & m'ayant rendu vne lettre de mondit sieur de Lorraine, par laquelle son Altesse me recherchoit de m'employer au fait de la dispense pour le Mariage de Monsieur son fils & de Madame sœur du Roy, ie dis audit Colonel qu'il n'y auoit aucun moyen d'obtenir ladite dispense, si madite Dame n'estoit point résoluë pour encotes à se faire Catholique, & que cependant si ledit Prince ne l'esposoit bien tost, le Roy se tiendrait pour affronté, & se feroit la guerre à Monsieur de Lorraine, & ruyneroit tous ses pays & subiects, & qu'il falloit que le Papeust esgard à cela. Je vis bien que c'estoient des inuentions qu'on enuoyoit dire au Pape, & semer en ceste Cour, pour ietter sur le Roy toute l'enuie & haine de ce mariage entre parens, sans dispense, & entre personnes de diuerse religion, sans respect de ce que les Princes Lorrains se sont tousiours dits les pilliers de la religion Catholique. Qui fut cause que le lendemain Lundy matin 16. iour de ce mois ie m'en allay trouuer Monsieur le Cardinal Aldobrandin; auquel ledit Colonel m'auoit dit vouloir parler, & par luy estre introduit au Pape, & luy decouuris cét artifice, & le priay d'en aduertir le Pape vers lequel il alloit, & de s'en garder luy-mesme. Le Ieudy au soir 19. i' enuoyay demander audience pour le lendemain Vendredy, afin de le dire moy-mesme au Pape, & luy parler des choses contenues en vostre dépesche du 8. d'Octobre; mais ie ne la püs auoir, ni aucun des ministres des Princes, d'autant que le Pape estoit las, & auoit vn peu de goutte, pour la peine qu'il auoit prise le iour des espousailles de la Roynie d'Espagne.

Et d'autant que le partement de sa Sainteté de Ferrare estoit publié pour le Lundy ensuiuant 23. de ce mois, & qu'il y a trop à faire à Paris avec vn Pape, ie me mis deuant le Samedi 21. & le vins attendre en colle ville de Bologne, où l'arriuy le Dimanche 22. Sa Sainteté toutes fois ne partit de Ferrare que le Ieudy 26. & arriua est ceste ville le Vendredy 27. le Samedi 28. donna audience aux Seigneurs & Gentils-hommes Bolognois, hyer Dimanche au matin fit la chappelle du premier Dimanche de l'Aduent, & apres diuers courtois de donner audience. Je fus parlen à Monsieur de Maistre de la Chambre, pour scauoir s'il y auoit moyen d'auoir audience pour tout ce que de Cour auant que sa Sainteté parût de ceste ville, & il

me respondit que sa Sainteté partiroit demain, & que n'ayant plus qu'un jour à demeurer icy, si la chose dont i'auois à parler n'estoit fort pressée, il estoit d'auis que ie la differasse quand nous serions à Rome, & aussi l'ay-ie fait. Sa Sainteté partira demain, voulant arriuer à Rome auant les festes de Noël. Ie la suiuray de près, & tascheray de la denancer sur les chemins, & d'arriuer à Rome auant elle, & de là ie vous escriray plus amplement.

Monsieur le Cardinal de Florence fait de tres-bons offices au Roy enuers le Pape, & enuers les Seigneurs de ce College, & enuers toute ceste Cour. Ie l'ay entretenu quelquesfois depuis la dernière que ie vous escriuis: il se louë infiniment de sa Maiesté & de vous, & de Monsieur de Bellière.

Quand le Connestable de Castille gouverneur de la ville & Duché de Milan estoit à Ferrare dernièrement, il dit à Monsieur d'Aumalle que deux des voleurs qui auoyent volé le bagage de Monsieur de Luxembourg auoyent esté pris prisonniers, & qu'on auoit recouuré la moitié des choses qui auoyent esté volees. S'il est vray ou non, ie m'en remets à ce qui s'en trouuera à la fin. Aussi a t'on escrit de Bresse qu'il estoit arriué quelques-uns qui portoyent à vendre des choses qu'on estimoit estre de celles-là: & le sieur d'Embourg Secrétaire de Monsieur de Luxembourg y est allé, pour faire arrester lesdites choses & les hommes. Arant, &c. Monseigneur, &c. De Bologne, ce Lundy dernier Nouembre 1598.

## A MONSIEUR DE VILLEROY.

## CLVIII.

**M**ONSIEUR LE SEIGNEUR. Les dernières lettres que ie vous ay mesrites sont de Ferrare du 17. & de Bologne du dernier de Nouembre, en continuation desquelles ie vous diray que le Pape partist de Bologne le Mardy premier iour de ce mois, comme ie vous auois escrit qu'il deuoit faire; & i'en partis le Vendredy ensuiuant 4. de ce mois. Le iour auant qu'il en partisse, ie receus vne dépesche de Monsieur le grand Duc de Torsane, qu'il m'enuoyap par vn courtier exprés, de la teneur qu'il vous plaira voir par la copie que ie vous enuoye. La somme de ladite dépesche est, que ledit Seigneur grand Duc monstroist estre fort marry de ce que la tour S. Ieand de l'Isle de Pomegues n'auoit esté démolie, & desiroit que i'écriussie à Monsieur de Guise qu'il la fit demolir. Ie n'estimay point deuoir tant presumer, que de requerrir mon dit sieur de Guise qu'il la fit demolir, pour plusieurs raisons, & ny aussi deuoir refuser son Altesse tout à plat, attendu que i'auois fait l'accord avec luy au nom du Roy, & partant ie me résolus sur toutes manieres, d'escrire à Monsieur de Guise vne lettre de la teneur portee par la copie que ie vous enuoye, & la manday à Monsieur



le grand Duc à cachet volant afin qu'il la vist ; ne voulant point luy donner à entendre vne chose pour autre , & luy escriuis que ie ne l'auois peu faire mieux que de la sorte que ie la luy mandois : & m'effargissant d'auantage en la response que ie fis à Monsieur le Cheualier Vinta son Conseiller & Secretaire d'Etat , ie luy escriuis que quelque promesse qu'eust fait Monsieur de Guise , il ne pouuoit plus faire demokir ladicte tour sans nouveau commandement du Roy , puis que Monsieur de Piles s'en trouuoit saisi au nom de sa Majesté , & quand Monsieur de Guise le commanderoit , l'estimois que ledit sieur de Piles ne luy obeiroit sans commission du Roy.

Par la lettre que ledit sieur Vinta m'escriuit , vous verrez comme il m'eramentouoit le fait du Seigneur Comte Ottauio Anogadro , dont ie vous auois escrit de Florence sur l'instance que son Atesse m'en auoit faite. Si d'auanture le commandement n'en auoit esté donné à Monsieur le President de Villiers à son parlement pour Venise , ie vous prie le luy faire faire par la premiere depesche que vous luy ferez apres la reception de cette-cy. Car outre qu'il est bon de complaire au grand Duc , vous sçanez combien il importe au service & reputation du Roy de s'obliger des personnes de telle valeur & estime qu'est le Seigneur Comte Ottauio Anogadro.

Au demeurant , apres que ie fus party de Bologne ledit iour 4. de ce mois , ie m'en vins par ce chemin de la Romaine , & fistelle diligence que ie deuauçay le Pape à Senigaille , & arriuay vn iour deuant luy à Lorette , où ayât fait mes deuotions , j'en partis auant que sa Sainteté y arriuaist , & continuant mon voyage ie me rendis en cette ville de Rome le 15. de ce mois.

Le lendemain au matin 16. de ce mois entre 15. & 16. heures qui pouuoit estre au compte de Paris entre 9. & 10. heures du matin , ie receus la depesche du Roy & la vostre du premier de ce mois , portee par vn courier expres , depesché de Lyon par le sieur Orlandin , avec vne sienne lettre à moy du 5. de ce mois à minuit. Ce iour que ie la receus estoit le Mercredy des quatre temps , & le Pape estoit en voyage , n'ayant avec soy que trois Cardinaux , Baronio , Cesis , & Aldobrandin : lequel Aldobrandin retournant de Milan , où il estoit allé accompagner la Roynes d'Espagne , comme ie vous ay escrit cy-deuant , auoit atteint le Pape à Lorette , où l'on dit qu'il a chanté la premiere Messe. Par ainsi , quand ladicte depesche m'eust esté renduë plutost , sa Sainteté n'en eust fait autre chose , puis que les Cardinaux ne se font par les Papes qu'en Consistoire , & qu'avec trois Cardinaux seulement il ne se fait point de Consistoire , outre que sa Sainteté ne veut point faire de Cardinaux que le plus tard qu'elle pourra , & crois qu'il a tant plus volontiers disposé du temps de son parlement de la façon qu'il a fait , afin que lors que les quatre temps escherroient il se trouuaist en voyage , & sans nombre competant de Cardinaux , & que cela luy seruist d'excuse , & le preseruast mesme de l'importunité qu'on luy fait quand on approche des quatre temps. I'ay opinion qu'il veut gagner l'annee sainte 1600. & outre la marque qu'elle aura du Iubilé , la remarquer encor d'une promotio nombreuse , & mesme qu'il pourra mourir des Cardinaux entre cy & là , comme il y a déjà onze lieux vacans du nombre de septante presz par la Bulle de Sixte V. & y a encor deux ou trois Cardinaux qui sont fort malades , & ne promettent d'eux gueres longue vie.

Ledit

Ledit iour de Mercredy des quatre temps 16. de ce mois que ie receus ladite depesche, le Pape faisoit le chemin de Foligno à Spoleto, & le lundy apres fit celuy de Spoleto, à Narny; le Vendredy de Narny à Civita Castellana à Castelnuovo, le Dimanche 20. de ce mois de Castelnuovo à Rome, où il arriva en bonne santé. Je n'estimay point deuoir commander audience hier Lundy, ny ce iourd'huy Mardy, luy ne faisant qu'arriuer, & moy n'ayant chose qui presse, & y a plusieurs personnes, & mesmes tous les Cardinaux qui n'ont peine fait le voyage de Ferrare, qui ont à luy baisser les pieds, & à railler quelques choses de sa Saincteté. Mais pource que le iour & feste de Noel se rencontre au Vendredy prochain, & qu'il n'y auroit propos de demander lors audience, ry de quelques iours apres, ie regarderay si ie la pourray auoir demain, & quand ie l'auray, soit demain ou vne autre fois, ie croy que ie me resoudray de luy bailler la lettre que le Roy luy escruiroit par cette derniere depesche. Car encor que la saison en soit passée, & que sa Saincteté n'en fera autre chose pour ceste heurt, si est-ce que cela pourra seruir à luy faire cognoistre le soing que sa Majesté a de la future promotion, & l'estime qu'elle fait des sujets pour qui elle escrit, & à y disposer & preparer sa Saincteté de bonne heure pour l'aduenir. Rendant celle de sa Saincteté, ie rendray aussi celle que le Roy escrit à Monsieur le Cardinal Aldobrandin, & retiendray celle qui s'adresse à Monsieur le Cardinal de Florence iusques à ce qu'il soit en cette ville, où il se rendra bien tost apres les festes, qu'il est allé faire à Florence, comme il me dit luy-mesme à Bologne qu'il ne tarderoit gueres à se rendre par deçà, à cause que le Pape l'a fait chef de la Congregation des Euesques, au lieu du feu Cardinal Alexandrin qui y presidoit.

Si l'ay audience demain, ie vous en feray vne autre lettre à part. Cependant ie loüe grandement le soing que le Roy a eu d'escrire pour le Seigneur Alexandre Pico, & l'eslection que sa Majesté a à faire de la personne de Monsieur de Sillery, que ie seruiray de toute ma puissance & affection, & suis tres-aise de ce que Monsieur de Luxembourg est arriué sain & sauf. Depuis mes dernieres ie n'ay rien appris du fait de son bagage, qui luy fut volé sur le lac Major aux confins du Duché de Milan, & attens ce qu'aura fait à Bresse le sieur d'Embourg son Secrétaire.

Ie n'ay point encore receu la lettre que vous dittes m'auoir escrete le 8. de Nouembre en responce à la mienne du 16. Septembre; & eusse esté bien ébahi d'entendre que cette mienne dudit iour 16. Septembre estoit la dernière que vous eussiez receüe de moy, n'eust esté que ledit Orlandin m'a escrit auoir receuës le premier iour de ce mois vne depesche mienne du mois d'Octobre & de Nouembre, où vous aurez trouué huit de mes lettres, vne au Roy, & les autres à vous; & suis bien aise de ce qu'auant le partement de Monsieur de Sillery vous aurez receu celle qui parle de la dissolution qu'on desire faire du mariage; vous priant de bien considerer les huit cas de la cognation spirituelle dont ie vous escriuios, comme les plus aisez & les plus probables moyens qu'on scauroit trouuer.

Le Chanoine de l'Eglise de Verdun qui auoit esté mis en prison, a esté enfin mis hors, apres y auoir esté detenu quasi tout le temps que nous auons esté absens de Rome. Aussi espia-t'on le temps que Monsieur de Luxem-

bourg ny moy n'y fussions pointz pour executer leur vengeance contre & c.  
 honnesto homme , en haine de ce qu'il a tousiours defendu courageuse-  
 ment les droits de son Eglise , & de ce que le Chapitre a eu recours au Roy  
 pour le preseruer de l'oppression qu'on leur fait , & imploré la protection  
 que sa Majesté leur doit. Je ne me puis assez émerueiller de la violence de  
 ces gens , qui leur oste mesme la cognoissance du tort qu'ils font à leur re-  
 putation , & à leurs affaires encor , s'ils auoient à faire à des gens qui eus-  
 sent autant de soin de se garder d'eux , comme ils donnent occasion , &  
 comme ils continuent en leur cupidité d'enjamber tousiours sur autrui , &  
 vsurper ce qui ne leur appartient point. Si le Roy s'en plaint ouuertement ,  
 comme vous m'escriuez , il a trop de raison , & i'ay bien de la peine à me re-  
 tenir de vous en dire tout ce que i'en pense. Mais j'espere que ce iour ne  
 passera point que ie n'aye parlé audit Chanoine , & seu de luy les particu-  
 laritez de ceste procedure. Et pour peu que i'y reboue la chose disposée , ie  
 m'en plaindray au Pape en ma premiere audience , de telle façon qu'ils  
 n'aient pas beaucoup gagné en ceste poursuite ; & feray cy apres toute  
 autre chose que i'estimeray estre pour le soulagement dudit Chanoine , &  
 pour le bien dudit Chapitre.

A tant ay-je respondu à vostre dite depesche du premier de ce mois.  
 Quant aux autres choses d'icy , il se dit que Monsieur de Sauoye , qui n'a  
 pas visité le Pape tandis que la Saincteté estoit à Ferrare , le veut venir voir  
 icy vn de ces iours incogneu , & faire comme s'il n'auoit de liberté que de  
 venir payer vn vœu à nostre Dame de Lorette , & puis par occasion don-  
 ner iusques icy : mais qu'en effet & à la verité il n'a autre fin que de s'infir-  
 muer de plus en plus aux bonnes graces du Pape , & le charmer en tant  
 qu'il pourra pour l'induire à luy adiuger le Marquisat de Salusses. Tou-  
 tesfois i'estime que la Saincteté aura plus d'égard à la verité & solidité des  
 raisons qui luy seront allegues , qu'à la vanité des flatteries & calomnies.  
 Pendant que le nouveau Roy d'Espagne a esté par delà en danger de ma-  
 ladie ces iours passez , la Roynne son espouse l'a esté à Milan du feu qui se  
 prit en sa chambre pendant qu'elle & sa mere dormoient , par la negligen-  
 ce d'vne de ses femmes de chambre , qui oublia d'esteindre vn bout de  
 chandelle qu'elle auoit attaché à vn aiz , dont la chambre estoit fourree ;  
 & fallut emporter en bien grande haste ladite Roynne hors de sa chambre  
 toute nuë. Il se dit , que pour tout le mois de Ianuier prochain elle ira s'em-  
 barquer à Genes , pour passer en Espagne.

Monsieur le Cardinal de saint George l'a visité à Milan , & continué  
 en sa premiere resolution de s'en aller tenir en vne sienne Abbaye pres de  
 Salerne , sans retourner en ceste Cour. Il ne fut point vray que le grand Maî-  
 stre de Malte fust mort , bien a s'il esté malade , & est fort viel & caduc.

Il y a au Palais si grande presse d'audiences de Cardinaux & d'autres  
 que moy n'ayant rien de pressé , i'ay estimé mieux faire de différer à de-  
 mander audience iusques apres ces premieres festes. A tant , &c. Monsei-  
 gneur , &c. De Rome , ce 22. Decembre 1598.

L E T T R E A M O N S I E U R D E G V E S E ,  
de laquelle il est fait mention en la precedente.

CLIX.

**M**ONSEIGNEUR, Je viens tout presentement de recevoir vne lettre de Monsieur le Grand Duc de Toscane, par laquelle il se plaint de ce qu'on a induit le Capitaine Rinuccini à consigner entièrement la tour saint Jean à Monsieur de Piles, & me recherche de vous escrire à ce que ladite tour soit démolie, suivant ce qui fut conuenu lors que l'accord fut fait entre le Roy & luy, moy traitant pour & au nom de sa Majesté, & suivant aussi ce que vous avez promis vous mesme par vn escrit que vous avez fait deliurer audit Capitaine Rinuccini. Sur quoy ie vous diray, Monsieur, que ie ne veux entrer en rien qui puisse estre de vostre cognoissance ou iugement, dequoy ie me remets à vous: mais hors cela, ie vous certifie & atteste en foy & parole d'homme de bien & de Prelat, que par les articles qui furent accordees entre son Altesse & moy, traitant pour le Roy, comme il est dit, il fut dit & accordé que mondit Seigneur le grand Duc pourroit faire démolir tous les forts qu'il auoit fait bastir en l'isle de Pomegues, & que cela avec tous les autres articles accordez eust esté ratifié par le Roy, & que j'en portay à son Altesse les lettres patentes de ratification de sa Majesté au mois d'Aoust dernier, & qu'il est iuste & raisonnable que cela soit obserué; & que ie croy aussi que telle soit la volenté du Roy, & que pour mon regard ie desire que son Altesse soit contente de cela, & de toutes autres choses conuenues & accordees. A tant, &c. Monseigneur, &c. De Bologne la grasse, en mon voyage de Ferrare à Rome, le 3. Decembre 1598.

*Fin du quatriesme Livre.*

CCC.

# LIVRE CINQUIESME.

ANNEE M. D. XCIX.

A MONSIEUR DE VILLEROY.

CLX.



MONSIEUR, Les dernieres lettres que ie me treuve de vous sont des 8. & 22. d'Octobre, & du premier de Decembre. Celle que vous m'auiez escrite le huitiesme de Novembre, comme il est porté par celle du premier de Decembre, ne m'a point esté tendue, & ie n'espere plus de la recevoir. Par ainsi il sera bon de m'en enuoyer autant, s'il vous en est resté quelques choses. Quant aux miennes dernieres, elles sont des dix-septiesme, & dernier de Novembre, & du vingt-deuxiesme Decembre.

I'eus audience de nostre sainte Pape le premier iour de l'an, & dis à sa Sainteté ce que le Roy commandoit à Monsieur de Luxembourg, de luy dire par sa depesche du quatriesme d'Octobre, touchant l'Ambassadeur Catholique que sa Maiesté auoit enuoyé en Angleterre, & l'instruction qu'elle luy auoit donnée, & touchant la calomnie que ceux de Sanoye & Piémont auoient bastie sur le peu de profit qu'auoient fait les Capuchins qu'ils auoient enuoyez au Marquisat de Salusses. Et sur ce dernier propos ie donnay au Pape de la part du Roy, la parole que sa Maiesté vouloit estre donnée à sa Sainteté; que sadite Maiesté s'entrant au Marquisat n'en donneroit le gouvernement qu'à personne Catholique. Sa Sainteté montra estre bien aisé de tout ce que dessus, & d'en scauoir bon gré au Roy, & me dit qu'il auoit encores parlé à Monsieur de Luxembourg de l'écriture à sa Maiesté, à ce qu'elle fit office avec ceux de Geneue, qu'ils permissent en leur ville l'exercice de la Religion Catholique. A quoy ie respondis; qu'il me souuenoit d'auoir veu la response que le Roy y auoit faite; qui estoit que le M. feroit volentiers telle chose, & toute autre qui pourroit tourner au bien

de la Religion Catholique ; & contentement de sa Sainteté ; mais que ces gens estoient tels qu'on ne pouvoit esperer qu'ils condescendissent à vne telle demande ; mais en deuiendroient plus soupçonneux & obstinez ; ce néantmoins si sa Majesté voyoit tant soit peu d'apparence, elle ne manqueroit de s'y employer de toute son affection. Il me repliqua, que quand il n'en prouuiendroit autre chose, tousiours tourneroit-il à grande reputation au Roy, quand on scauroit qu'il auroit fait vn tel office.

La luy dis aussi la belle commission qu'auoit le Colonel Orsée enuoyé, par Monsieur de Lorraine, de laquelle ie vous escriuis par ma lettre du dernier Novembre ; & priay sa Sainteté de se garder de tels artifices, & s'il se faisoit quelque chose mal à propos, attribuer à chacun sa coulpe, non pas charger les vns de celles des autres. Depuis i'en ay treuvé qui m'ont dit que ledit Colonel leur auoit dit à Ferrare qu'il estoit venu pour prier le Pape de vouloir détourner ce mariage, duquel ceux de Lorraine ne vouloient point, mais que c'estoit le Roy qui les y forçoit : ce qui ne se rapporte trop mal à ce que ie vous en escriuis qu'il m'auoit dit, & à l'intention que i'en decouuris. Ledit Colonel estoit à Florence, ces iours passez, & n'ay point encores entendu qu'il soit venu iusques à Rome. Apres les choses surdites, ie parlay au Pape des Festes dont le Roy auoit escrit à Monsieur de Luxembourg par ladite lettre du quatriesme Octobre, dequoy ie feray vne lettre à part à sa Majesté, & la mettray avec la presente.

En cinquiemesme lieu, ie parlay à sa Sainteté de la depesche du Roy du premier Decembre, que i'auois receuë par vn courrier exprés, & luy baillay la lettre que sa Majesté luy escruiroit de sa main : surquoy nous n'eusmes pas grands propos, pour estre alors passée l'occasion de ce pourquoy le Roy luy escruiroit ; non plus que Monsieur le Cardinal Aldobrandin & moy, vers lequel ie fus en sortant de chez le Pape, & luy baillay aussi la lettre que le Roy luy escruiroit de sa main. Monsieur le Cardinal de Florence n'est encores venu à Rome, mais il ne peut plus gueres tarder. Quand il sera arriué, ie luy bailleray aussi la sienne.

Le 8. de cemois ie retournay à l'audience, & euz de sa Sainteté la response touchant les Festes, que vous verrez en la lettre à part que i'escriray au Roy apres cette-cy. Le luy parlay de confirmer à l'Hospital des Quinze vingts de Paris les priuileges qui luy ont esté donnez par les anciens Papes, & en particulier la faculté d'enuoyer chercher les aumosnes par le Royaume, & luy rendis vne lettre que le Roy luy en escruiroit, avec vn memoire qui auoit esté dressé sur des instructions enuoyees de Paris. A quoy sa Sainteté me respondit qu'il verroit & considereroit ladite lettre & memoire, & complairoit au Roy, & consoleroit ledit Hospital de tout ce qu'il pourroit. Depuis il a enuoyé cét affaire à la Congregation du Concile pour en voir leur aduis, & i'espere que la Congregation inclinera à vne œuvre si bonne & pie, & donnera à sa Sainteté aduis conforme à nostre desir.

En troisiemesme lieu, ie le priay de vouloir expedier mesmuy l'Archetresché de Sens en la personne de Monsieur de Bourges, & luy en laissay vn memoire. Il ne me respondit autre chose sinon qu'il verroit. Et depuis i'ay entendu qu'il a respondu à Monsieur le Cardinal Aldobrandin, auquel

i'en auois aussi parlé, & auquel il auoit renuoyé ledit memoire que le Roy auois laissé, qu'il falloit attendre que le Cardinal de Florence fust venu.

Après cela, ie le suppliy de commander qu'en protegez, que l'Eglise de saint Louys a avec quelques particuliers fust expedie, & qu'il fust administré à ladite Eglise bonne & briefue iustice. De là ie vins à le prier de quelques dispenses que les expeditionnaires d'icy auoient à faire depefcher pour les François, & en eus benigne response.

Nous auons accoustumé en sortant de chez le Pape d'aller à Monsieur le Cardinal Aldobrandin, pour l'informer des choses traitées avec sa Sainteté, & le prier de s'y rendre favorable & propice. Et quelquefois il se presente telles choses, qu'il est expedient d'en parler à luy plustost qu'au Pape, pour sonder sa disposition & inclination & en prendre son aduis, & par ceste confiance on l'oblige aucunement à favoriser l'affaire. C'est pourquoy m'ayant Monsieur l'Abbé de Fiesque requis & encouragé le commandement que le Roy auoit fait à Monsieur de Luxembourg de prier le Pape d'accepter ledit sieur Abbé pour son Camerier secret, i'en veylas parler premierement audit Seigneur Cardinal, & luy presentay ledit sieur huietiesme de ce mois la lettre que le Roy luy en escrivoit, & le treuuy assez enclin à seruir sa Majesté en cela, & à favoriser ledit sieur Abbé.

Et Vendredy dernier, quinziesme de ce mois, i'en parlay au Pape mesme, & luy baillay les lettres de sa Majesté. Il me dit qu'il s'informerait de la qualité dudit sieur Abbé, & le treuuant qualifié de la façon requise, il complairoit volontiers à sa Majesté. Le luy parlay aussi de dispenser vn fils de Monsieur le President Seguiet Cheualier de l'Ordre de saint Iean de Hierusalem, pour tenir le Prieuré de Paluan, & le treuuy fort remuant du commencement. Mais apres que ie luy eus dit la qualité & merites de la maison des Seguiers, & les grands seruices par eux faits, non seulement à la Couronne de France, mais aussi à la Religion Catholique, il sembla d'y incliner, & receut le memoire que ie luy en donnay. Toutesfois ie ne m'en assuray point encores, & en attends la derniere resolution. Je n'auois encores receu les lettres que le Roy escrit à sa Sainteté, lesquelles ont esté portées par ce dernier ordinaire qui arriua hier. seizeiesme de ce mois ie les employeray à faire vn dernier effort en ma premiere audience. Je s'en encores office enuers sa Sainteté pour quelques particuliers, comme il est quelquesfois besoin pour acquerir des seruiteurs au Roy, maintenir aucunement icy la reputation de sa Majesté pourueu que ce soit avec distinction des personnes & matieres, & avec la discretion requise, sans importuner sa Sainteté, ny le presser iamais de chose qui luy soit à contraindre, ou qui puisse tourner en offense d'autres qui soient de plus grand respect que ceux pour lesquels on fait.

Voila ce que i'ay negocié avec le Pape & Monsieur le Cardinal Aldobrandin, depuis mes dernieres du 25. Decembre. Au demeurant on me sollicite tousiours du costé de Florence de vous faire souuenir de l'office que Monsieur le grand Duc desire estre fait par le Roy. enuers la Seigneurie de Messine, avec qu'il soit permis au Comte Ottanio Agliagadro de retourner en sa Maison & pais, dont il a esté banny pour la cause que vous

Tira Monsieur le Cheualier Guicciardin , & Monsieur de Gondy aussi. Monsieur le President de Villiers dit qu'il n'a eu aucun commandement de faire ledit office, ny lors qu'il partit, ny depuis. Et quand ie m'excuse enuers ceux de Florence , ie leur dis qu'ils se pouuoient souuenir que ie leur dis que i'en escrirois en Cour : mais que pour bien faire ledit office, il falloit qu'ils vous fissent informer par de là de la cause pour laquelle auoit esté fait ledit bannissement , & du temps qu'il y auoit qu'il estoit fait , & que ie me doutois que vous n'en ayez point esté informez , & qu'il a tenu à cela que ledit commandement n'ait esté fait. Mondit sieur le President de Villiers tient cette grace fort difficile à obtenir. Toutesfois quand le Roy y aura fait ce qui sera en luy , Monsieur le grand Duc ny autre ne se pourra plaindre de sa Majesté, laquelle encore pourra faire demander ceste grace, de façon que ces Seigneurs ny demeurent offensez, ny sa Majesté de moindre authorité enuers eux , & faire mesme demander aduis à l'Ambassadeur de la Seigneurie qui reside près sa Majesté de ce qui s'en peut espérer , & du moyen qu'il y faudroit tenir en tout cas.

Quant aux choses d'icy, la plus insigne est le débordement du Tibre, qui l'auant-veille, la veille, & le iour de Noël dernier auint, & fut plus grand qu'aucun autre d'oïl soit memoire; de façon que toute la plaine de la ville de Rome fut tout en eau iusques à vne picque de haut par les ruës, & dans les maisons , & n'y eut pas de cent vn qui peust ouyr Messe le iour de Noël. Cette inondation a porté des dommages inestimables , ayant noyé plusieurs personnes, gasté la plus part des prouisions de bled , vin, auoine , & foin , & vne infinité de marchandises , & autres meubles; gasté les fondemens de la plus part des edifices, qu'il a fallu estançonner quasi par tout Rome, & ruiné tout à fait vn grand nombre de maisons , desquelles vne partie a accablé les habitans. Nostre saint Pere en cette commune affliction a monstté sa charité & pouruoyance paternelle enuers ceste Cité: car outre qu'il faisoit prieres continuelles à Dieu pour la conseruation de son peuple, il fist distribuer par quartiers vn nombre de bateaux qui alloient par les ruës, portans des viures à qui en auoit besoin, comme quasi tous en auoient besoin, & transportans les personnes des lieux dangereux en autres plus surs: & enuoya particulièrement Monsieur le Cardinal Aldobrandin son neveu par la ville, pour faire pourvoir aux necessitez des plus pressees en la meilleure façon que faire se pourroit: & maintenant secourt vne infinité de pauvres gens qui se treuuent sans moyen de viure ny de loger , & fait consulter des moyens de reparer les dommages receuz , & obuier à ce qu'il n'en suruienne plus de semblables.

Il se parle d'envoyer vn Nonce en France , sans qu'on sçache encore qui ce sera. Ie croy que le Pape m'en dira quelque chose auant qu'il l'envoie, comme il a accoustumé d'en parler aux Ministres du Roy en telles occasions.

Monsieur de Sauoye , apres auoir esté quelque temps à Milan près la Royne d'Espagne, s'en partit apres assez soudainement , feignant qu'il se faisoit quelque amas de gens de guerre en Dauphiné contre luy. Ie n'estime plus qu'il doiué venir icy, comme il se disoit il y a quelque temps , & comme il y en a encor quelques vns qui le tiennent. Bien est-il certain que



oultre le Seigneur Arconat son Ambassadeur, qui est sur le port & de retour-  
ner par deçà, il enuoye icy pour le fait du Marquisat de Salusses le Presi-  
dent Moroso & des autres Docteurs, & en a fait consulter à Milan pen-  
dant qu'il y resté par le Menochio, & par les plus doctes & Practiciens  
de là. On adiouste encores qu'il a fait prouision pour cent mil escus de ba-  
gues à distribuer en ceste ville à ceux de qui il estimera pouuoir estre aidé en  
cét affaire.

La Royne d'Espagne est tousiours à Milan, & ne sçait-on icy rien de  
certain quand elle en partira. On tient que le Duc de Sesse, qui est icy  
Ambassadeur pour le Roy d'Espagne, sera employé ailleurs, & qu'en sa  
place sera enuoyé pour Ambassadeur resident le Seigneur Jean Idiaquez Se-  
cretaire d'Etat. Les discoueurs de cette Cour treuuent à dire en l'admini-  
stration & gouuernement de ce nouveau Roy, qui a fait de son Conseil plu-  
sieurs grands d'Espagne, & leur donne des charges d'importance, là où son  
pere a tousiours cherché de l'establis. Mais de belles choses chacun en  
iuge selon son humeur.

On trauaille icy à composer le different de la iurisdiction qui a esté &  
est entre le Cardinal Borromeo Archeuesque de Milan, & le Connesta-  
ble de Castille Gouverneur pour le Roy d'Espagne au Milanois, & la Sain-  
eté desire d'y mettre vne fin auant qu'on y change de Gouverneur, comme  
on y est aussi apres, afin que le successeur audit gouuernement ne puisse  
s'excuser, en disant qu'il a treuue les choses ainsi, & qu'il ne doit ny veut  
rien y innouer. Cependant il est aduenü d'autre costé que le Comte Oliua-  
rés Viceroy de Naples a fait quelque attentat sur la iurisdiction de l'Eue-  
que de Beneuento, ville qui est au Pape, enclauée neantmoins dans le Royau-  
me de Naples, pour laquelle chose le Pape tint vne Congregation generale  
de tous les Cardinaux Vendredy au matin quinziesme de ce mois, & dit on  
qu'il y fut decreté vn Monitoire contre ledit Oliuarés, & sur ce la Sain-  
eté a despeché en Espagne. Il faut bien que ce soit quelque chose d'import-  
tance & pressée, puis que le Pape en ayant esté aduisé le Iendy au soir, à  
trois heures de nuict, il enuoya appeller les Cardinaux à l'heure mesme  
pour le lendemain au matin. Monsieur le Cardinal de Loyeuse n'est point  
encores arriué en cette ville, ses hardes sont icy depuis huit iours. Le Car-  
dinal de Pepoli deceda Vendredy 15. de ce mois. C'estoit vn seigneur, qui  
auoit inclination au service du Roy, & au bien de la France. Le Cardinal  
Sauelly est grandement malade, & a esté tenu pour deploré, mais à present  
on dit qu'il commence à s'ameliorer.

Des deux Chanoines de l'Eglise de Verdun qui estoient icy pour les af-  
faires du Chapitre, le plus aagé appellé Ramberuilliers mourut hier, & le  
plus ieune appellé Vignon, apres auoir esté detenu prisonnier si long-  
temps, a esté condamné à cent escus de peine, & a esté banny de Rome,  
pour autant de temps qu'il plairoit au Vicaire du Pape. Le pretexte de  
celle prison & condamnation a esté qu'il eust pris vn paquet de Marins,  
partie aduersé dudit Chapitre, lequel neantmoins fut trouué & represen-  
té. Mais à la verité & en effet ç'a esté le nom & autorité de Monsieur le  
Cardinal de Lorraine, qui a escrit contre luy des lettres tres-aignes,  
comme m'a dit le Iuge mesme; & a tenu & tient icy le sieur Poirer  
son

son Secrétaire & Conseiller d'Etat de Monsieur de Lorraine, pour entre autres choses poursuivre contre ledit Chanoine, contre lequel ledit Seigneur Cardinal n'a autre occasion de mécontentement, que le deuoir que ledit Chanoine a fait en defendant les droicts de son Chapitre, contre ledit Marins, & contre ceux qui de la cause dudit Marins en ont fait la leur propre. L'ay esté parler à Monsieur le Cardinal de Rusticucci, Vicaire du Pape, & luy ay dit comme i'auois commandement du Roy d'embrasser la cause dudit Chapitre & de ce Chanoine, comme de ceux qui estoient en la protection de sa Majesté, & le priay de permettre audit Chanoine de demeurer en cette ville, & luy faire grace de l'exil, puis que ce n'estoit que pour autant de temps qu'il luy plairoit. Il se monstra fort disposé à seruir le Roy en cela & en toute autre chose : toutesfois que pour la grande instance que Monsieur le Cardinal de Lorraine auoit faite que ledit Chanoine fust banny de Rome, le Iuge dudit Seigneur Cardinal Vicaire appelé Vlisle Moscato luy donna vn expedient, à sçauoir que ledit Seigneur Cardinal Vicaire, sans autrement reuoker ledit bannissement, permit audit Chanoine de demeurer en cette ville; & que cependant l'escriuisse au Roy, à ce qu'il pleust à sa Majesté faire dire vn mot à Monsieur le Cardinal de Lorraine qu'il se contentast que la clause dudit bannissement fust ostee, & par ce moyen toutes choses passeroient avec satisfaction de part & d'autre. Ledit Iuge m'ayant esté enuoyé par ledit Seigneur Cardinal Vicaire pour me proposer ledit expedient, & pour me requerir de le treuuer bon ie n'estimay point deuoir aucunement monstrier de le treuuer mauuais, puis que i'auois pour cette heure ce que ie demandois. Maintenant vous aduiserez si le Roy en deura faire parler à Monsieur de Lorraine, ou me mander à moy de remercier ledit Seigneur Cardinal Vicaire de ce qu'il a fait en consideration de sa Majesté, & le prier de reuoker tout à fait ledit bannissement, qui n'est que pour autant de temps qu'il plaira audit Seigneur Cardinal Vicaire, & monstrier que la recommandation d'un Roy de France peut autant en son endroit à douceur & benignité, comme celle d'un Cardinal de Lorraine à rigueur & seuerité.

Monsieur de Lorraine, & Monsieur le Cardinal son fils poursuient icy l'erection de Nancy en Euesché, ce qui ne se peut faire sans diminution des Eglises Cathedrales, & de leurs Chapitres, & Eueschez de Mets, Toul, & Verdun, qui sont en la protection du Roy. Et fait fort beau voir que les Euesques de Mets, Toul & Verdun qui deuroient defendre les droits leurs & de leurs Eglises, Chapitres, & Eueschez, sont tous de la maison de Monsieur de Lorraine, fassans & consentans tout ce qu'il plaist à son Altesse. L'un fils, l'autre parent proche, & l'autre seruiteur obligé de son Euesché mesme : pource que la bonté & facilité de nos Roys a esté telle, que contre toute regle d'Etat, & contre la seureté de leur Royaume, comme l'experience l'a monstrier, & monstre encores auourd'huy és Citez de Toul & Verdun, ont donné ou fait donner tous ces trois Eueschez à qui que ce Prince voisin a voulu. Aussi est-ce vne belle chose que Monsieur le Cardinal de Lorraine son fils s'estant fait Pape en ce pays-là, par le moyen de la legation qu'il a obtenuë d'icy, confere tous les benefices du pays de la protection du Roy à des subiects & seruiteurs de Monsieur son pere, & par ce

moyen nous verrons auant que ce soit passé long temps, que ces trois Eglises Cathedrales, & encores les Collegiales, outre que sous tiltres de decimes elles ont esté faites tributaires de Monsieur de Lorraine, & seront vn de ces iours esbrechees pour l'erection de ce nouuel Euesché de Nancy, seront encores remplies toutes de Lorrains du Duché, comme seront aussi les Cures, les Prieurez, & autres benefices du plat pays de ladite protection du Roy; qu'on dit estre aussi la principale fin pour laquelle, ladite legation a esté demandee: car au reste, ce ne seroit que peine auec fort peu de profit. Dont est pour ensuiure ce qui seroit fort aisé à iuger, quand bien nous n'en aurions l'experience si fraische. Nous auons negligé par le passé, & negligéons encores aujourd'huy telles choses; aussi nous en sommes nous tres-mal treuuez; & Dieu vueille, en nous conseruant longuement nostre Roy, que nous ne nous en treuyions encores pis. Car si de rien on a fait tout ce que nous voyons, on pourra bien plus aisément auec ce que l'on tient & que l'on va tousiours gagnant, faire d'autres choses. Il se presente icy à mon esprit vne autre chose qui seroit fort à propos, mais elle ne se fait point à Rome, comme l'erection de Nancy en Euesché, de laquelle ie parleray au Pape en ma premiere audience, & le prieray d'attendre iusques à ce que le Roy luy ait remonstré l'interest que sa Majesté y peut auoir, & seroit bon que sa Majesté fist aduiser audit interest, & enuoyast des memoires. Cependant ie vous mettray icy vne autre chose qui s'estoit faite à Rome depuis peu de iours, & est à propos de Lorraine. Le College des Cardinaux a deux Secretaires qu'il eslit, desquels l'un est Italien, & à vie, l'autre est d'une autre nation, & pour vn an seulement; & les Statuts dudit College portent que cestuy-cy doit estre esleu au premier Consistoire de chacun an, & vne annee François, vne autre Allemand, vne autre Espagnol, & ainsi de trois en trois ans. Or il y a trois ans qu'autour des François vn Lorrain fut preferé aux François, & en ceste annee mil cinq cens nonante-neuf qui escheoit aux François, vn ieune homme Lorrain a esté encores preferé à des François, desquels il y en auoit vn entr'autres qui eust grandement honoré ceste charge, estant vn fort honneste, sage, & docte personnage, & qui se faisoit vn peu de tort en s'abbaisant iusques là que de demander vne chose peu digne de luy. Quelques iours auant l'eslection ie fus sommé par les François de faire pour eux: ce que l'entrepris tres-volontiers, comme chose qui estoit de mon deuoir. Et allant à vne grande partie des Cardinaux, sans faire particulierement pour vn plus que pour vn autre, ie les suppliy en general de vouloir eslire vn François, & conseruer à la nation François son tour & sa prerogative, & la bonne volonté de seruir au saint Siege, & au sacré College, & obuier à des mauuais satisfactions qui aduiennent souuent pour des choses bien petites en apparence, mais fort piquantes quand il y va de l'honneur & de la preference des nations. Et pource que ie ne pouuois aller à tous les Cardinaux, ie fis vn memoire, l'adressant à tout le College des Cardinaux, de la teneur que vous verrez par la copie que ie vous en enuoye, & le portay à Monsieur le Cardinal de Como qui representoit le Doyen, estant le plus ancien de ceux qui

estoyent presens, & qui pouvoient aller & marcher, & le priay de vouloir faire lire en la presence de tous les Cardinaux, auant que l'election se fust. Ce qu'il me promist, & le tint, comme i'ay sceu depuis. Mais ce nonobstant, tous, excepté, trois, prefererent le Lorrain au François: cōbien que les considerations representees au memoire les deuoient induire à faire autrement pour leur propre profit, qui leur estoit monstré là dedans. Ce que ie vous escriis, non pour autre chose que pour vous rendre compte de mon denoir, sachant qu'il en sera escrit cent lettres par delà, & qu'aussi bien vous l'aurez sceu d'ailleurs, & vous seriez esmeruillé que ie n'en eusse rien touché par mes despêches. Mais il est meshuy temps de mettre fin à cette longue & fascheuse lettre, & partant ie prie Dieu, &c. Monseigneur, &c. De Rome ce 17. Ianuier 1599.

A V R O Y.

CLXI.

SIR E,

Estant dernièrement à Bologne au retour du Pape de Ferrare à Rome, ie conferay avec Monsieur le Cardinal de Florence, du commandement que vostre Majesté faisoit à Monsieur de Luxembourg par sa despêche du quatriesme Octobre, de parler à nostre Saint Pere du grand nombre de Festes qui se font en France, & empeschent que les terres ne puissent estre labourées comme il seroit necessaire. Et apres auoir eu l'aduis dudit Seigneur Cardinal, ie traictay de cette affaire avec sa Sainteté, en l'audience qu'elle me donna en ceste ville le premier iour de l'an, & luy dis & laissay par escrit, comme pour la longueur, & violence des guerres passées, tant ciuiles, qu'étrangères, le peuple de France, & principalement des champs, & des Bourgs & Villages estoit tellement diminué, que ceux qui restoyent ne suffisoient point à labourer & cultiuier la terre, & mesmement à cause d'un tres-grand nombre de Festes qui se faisoient par tout le Royaume, outre celles de nostre Seigneur, de Nostre Dame, des Apostres, & d'autres Saints principaux; de sorte que demeurant en friche vne grande partie des terres, il s'en ensuiuoit grande disette & cherté par tout le Royaume, de laquelle se ressentoyent & pâtissoient grandement tous les François, de quelque estat & condition qu'ils fussent, & vostre Majesté n'en pouuoit tirer les subides accoustumés, & necessaires pour la conservation de l'Estat & du public. Par ainsi ayant vostre Majesté esté requise de plusieurs endroits du Royaume de mettre quelque ordre, & de pouruoir à cette necessité, vous priez sa Sainteté tres-affectueusement qu'il luy pleust permettre, nous en pourrions pour quelques années, que hors les susdites Festes de nostre Seigneur, de nostre Dame, des Apostres, & autres saints princ-

paux qu'il luy pourroit excepter, le peuple pût labourer & cultiver la terre  
 & faire les autres choses qui y appartiennent : & par le moyen de cette  
 grace, sa Sainteté continueroit d'obliger à soy & au Saint Siege-vostre  
 Majesté & tout le Royaume, y restituant l'ancienne fertilité & abondan-  
 ce, & obuiant à plusieurs desordres que font ceux qui ne pouuans employer  
 aux deuotions requises vn si grád loisir, cōme ils ont parmy tant de festes, se  
 desbauchét & s'adōnent au ieu & à l'yrognerie, à luxure, à querelles, & au-  
 tres choses illicites & dommageables : aussi pseroit-on Dieu par tout le  
 Royaume pour la prosperité & santé de sa Sainteté, pour l'accroissement  
 & exaltation du Saint Siege, & de nostre Mere Sainte Eglise. Sa Sain-  
 teté me respondit que la chose en soy ne luy desplaisoit point, pourueu  
 que la necessité fut telle que ie luy venois de dire, & que tout se fust à bone  
 fin, & nō pour abolir les Festes peu à peu. Que toutesfois ce que vostre Ma-  
 jesté demandoit estoit chose que les Euesques pouuoient faire : comme  
 aussi pouuoient-ils mieux cognoistre du fait, estans sur les lieux, que luy  
 qui en estoit si loing. Je luy repliquay que vostre Majesté sembloit auoir  
 preueu vne partie de sa response, en ce que vos lettres contenoient que vo-  
 stre Maiesté eust exhorté les Euesques de remedier à ce que dessus, mais  
 pour la faueur que chacun porte aux Festes de son Diocese, elle auoit esti-  
 mé qu'il seroit meilleur de supplier sa Sainteté d'en vouloir faire vn sien  
 reglement elle mesme, auquel aussi chacun obeyroit plus volontiers ; que  
 ie suppliois donc d'y vouloir penser, & de considerer le memoire que ie luy  
 en baillois, & se disposer à dōner ceste satisfactiō à vostre Maiesté & à tout  
 le Royaume. Il prit ledit memoire, sans me dire autre chose sinon qu'il y  
 penseroit. A huit iours delà, à sçauoir le Vendredy huitiesme de ce mois,  
 ie retournay à l'audience, & ie le mis en ce propos pour sçauoir s'il auoit  
 pris quelque bonne resolution sur le memoire que ie luy auois laissé tou-  
 chant lesdites Festes : & il me dit qu'il y auoit pensé & se confirmer en ce  
 qu'il m'auoit dit la premiere fois d'en laisser faire les ordinaires selō qu'ils  
 verroient en estre besoin, & qu'ils iugeroient en leurs consciences ; Qu'il  
 n'estoit vray semblable que tous les endroits de la France eussent égale-  
 ment paty, & eussent eu besoin d'vn pareil remede ; Que chacun Euesque pour-  
 roit mieux cognoistre & l'Estat de son Diocese, & si, & pour combien de  
 temps, on y auroit besoin de telle dispense ; que outre ceste consideration,  
 il y auoit encores des Saints auxquels iagout qu'ils ne fussent si celebres  
 comme d'autres, ce neantmoins en certains lieux pour des occasions parti-  
 culieres le peuple y auoit plus de deuotion qu'à d'autres plus grands : & se  
 pour cela il ne pourroit dire qu'vn tel Saint fust festé, & qu'vn tel ne le  
 fust point ; Que aussi falloit-il qu'il allast plus retenu en telles choses, d'au-  
 tant qu'vne des heresies qui courent pour le iourd'huy, est touchant les  
 festes ; Que les Canons, & mesme les loix Civiles, auient pourueu à tel-  
 les choses, & particulierement aux ceuvres rustiques, & labour de la terre,  
 pour lesquelles vostre Maiesté faisoit ceste instance : de façon que comme  
 il se trouue en l'Euangile qu'il auoit esté respondu autresfois qu'on auoit  
 Moyse & les Prophetes, aussi il me pouuoit dire que en France on auoit  
 les Euesques, les Canons, & les Loix. Ce fut sa response, à laquelle ie vis  
 bien qu'il n'en feroit autre chose. Qui fut cause que celuy propos fut vne-

pedient, à sçauoir de commettre à Monsieur le Cardinal de Condé de s'informer del'estat & condition des pays, & de la deuotion particuliere que les peuples de diuers lieux pourroyent auoir à quelques Saints, & selon qu'il trouueroit, octroyer la dispense quiluy sembleroit necessaire; mais sa Sainteté n'y voulut entendre & persista en ladite responce.

La mention qu'il m'auoit faite des droicts Canon & Ciuil me donna occasion de reuoir ce qui y est contenu touchant ceste matiere, & ay trouué que les choses y sont ordonnees conformément au besoin du Royaume & desir de vostre Maiesté. Car les Canons ne commandent de chommer en particulier sinon que les iours de Dimanche, de Noël, de S. Estienne, de S. Iean l'Euangeliste, des Innocens, de S. Siluestre, de la Circoncision, de l'Epiphanie, de Pasques, avec la semaine precedente & suiuate, de l'Ascension, de Pentecoste, avec les deux iours suiuaus, les festes de nostre Dame, la Natiuité de S. Iean & les festes des Apostres, de S. Laurent de la Dedication S. Michel, de Toussaincts; & de S. Martin, & en general telles que chacun Euesque en en son Diocese, avec le Clergé & peuple estimeroit deuoir estre solemnisées. Auquel commandement de chommer lesdites festes, lesdits Canons ajoutent ceste exception; Si la necessité ne presse, & la pieté ne persuade de faire autrement. Or est-il que nous sommes aux termes de ceste exception, estant le Royaume pressé de la necessité que vostre Maiesté sçait, & qui vous a esté representee de diuers endroits de la France, & estant encores le bien public compris sous le nom de pieté, dont vsent les Canons, selon que l'exposent. les Docteurs qui ont traicté ces matieres. A quoy se peut & doit encores adiouster, qu'es choses de l'agriculture on a tousiours donné plus de liberté pour le regard des Festes, qu'on n'a fait es ouurages des arts & mestiers des villes, & y a vne constitution au droit Ciuil de laquelle, à mon aduis, entendoit parler le Pape, quand il parloit des loix ciuiles, & des œuvres rustiques, & du labour de la terre, laquelle constitution permet de vaquer librement à l'agriculture es iours mesmes de Dimanche quand l'occasion de semer ou planter se presente plus belle au iour de Dimanche, qu'es autres iours, & qu'il y a danger qu'elle ne se perde. Et iacoit qu'es choses de la Religion on doie suiure le droit Canon, & s'arrester aux Ordonnances de l'Eglise, ce neantmoins la raison de ladite constitution ciuile a lieu par tout, & est faite bonne par les Canonistes, lesquels tout d'un consentement sont d'accord qu'on peut trauailler les iours de Festes, non seulement à l'agriculture, mais aussi es autres, quand il est question de ne perdre point quelque bonne occasion, ou d'eiter quelque danger ou perte notable: conseillett neantmoins lesdits Canonistes que si faire se peut tel trauail se fasse avec dispense de l'Euesque, & apres auoir ouy la Messe esdits iours de festes, auquel cas, on vouldra trauailler. Par ainsi i'estime que les choses estans telles que par vostre commandement in les ay exposees au Pape, les Euesques de France ne feront point de difficulté de bailler chacun en son Diocese la dispence que vostre Maiesté desiroit du Pape, attendu mesmement que sa Sainteté s'en remet à eux, & que nous sommes es cas & termes de ces saints Canons, & des Loix où elle nous renuoye, & qu'on y peut suiure le conseil desdits Canonistes, & y apporter encores d'autres precautions, s'il en est besoin. A tant &c. Si R.E. &c. De Rome, ce 18. Ianuier 1599.

## A MONSIEVR DE VILLEROY.

## CLXII.

**M**ONSEIGNEVR, L'ordinaire de Lyon n'estant party si tost comme il auoit dit, le Vendredy iour de l'audience des ministres du Roy est venu cependant, & i'ay eu temps de vous faire encores ceste lettre. I'ay esté doncques ce matin à l'audience, & dès le commencement ay dit au Pape, comme la dernière fois que i'auois esté à ses pieds, ie l'auois supplié de vouloir bailler en commande vn Prieuré de l'Ordre de S. Benoist à vn fils de Monsieur le President Seguiet, Cheualier de Malte, & luy auois représenté les causes qui le deuoient mouuoir à octroyer ceste grace, & que depuis i'auois receu vne lettre que le Roy luy en escriuoit, laquelle ie luy baillois, & sa Sainteté auroit ceste occasion de plus de faire ladite grace, à scauoir l'intercession du Roy. Sa Sainteté m'a monsté y incliner encores plus qu'auparauant: mais ie le veux voir signé & expédié auant que m'en assurer. Ie luy ay aussi ramentu, comme en l'audience précédente ie luy auois présenté vne lettre du Roy, par laquelle sa Maiesté le prioit de vouloir accepter Monsieur l'Abbé Fieschi pour son Camerier secret: & il m'a dit qu'il ne s'en estoit encores informé, comme il m'auoit dit vouloir faire, & qu'il s'en informeroit.

Ie luy ay encores réduit en memoire comme ie luy auois parlé & laissé vn memoire pour le Curé de S. Yves, en cas que le Chanoine de Verdun appellé Ramberuilliers, qui estoit à l'extremité, mourut, comme il estoit mort le iour apres: & sa Sainteté m'a dit qu'il auoit donné ledit Canoniat audit Curé, & que sur mon tesmoignage il auoit preferé ledit Curé à vn Lorrain qui seruoit à la Datairerie, & auoit mesme esté en Pologne avec luy, dont ie luy en ay baillé les pieds. Ledit Curé est vn fort honneste Prestre du pays de Bretagne, de vie fort exemplaire, docte en droit Canon, & en la partie de Theologie qui traite des cas de conscience, & a seruy long-temps de Confesseur, & d'autres fonctions Ecclesiastiques en l'Eglise S. Louys, & à present est Curé de S. Yves Eglise des Bretons, vnie depuis quelques années à celle de S. Louys. Il me pria de demander ledit Canoniat au Pape pour luy, ce que ie fis pour ses vertus & merites, & pour l'obliger d'autant plus à servir le Roy, & accroistre en l'Eglise de Verdun le nombre des Chanoines & des seruiteurs de sa Maiesté. Ainsi par ce moyen nous auons en nostre reuesche de ce que les Lorrains nous firent dernièrement gaigner le Clericat du Collège sur les François, & m'assure bien que le Lorrain voudroit auoir changé son Clericat; qui n'est que pour vn an, & ne sçauoit rapporter plus de deux cens escus de profit, avec le Canoniat du Breton, qui l'a pour toute sa vie, & en recouure beaucoup par chacun an.

Après ces choses qui dépendoyent de l'audience précédente, ie luy ay proposé d'autres faits nouveaux. Et en premier lieu ie le priay de surseoir l'erection de Nancy en Euesché iusques à ce que le Roy luy eust remonstreté.

terest qu'y pouuoient auoir les Eglises, Chapitres, & Dioceses de Mets, Toul & Verdun, de la protection de sa Maïesté, & mesme d'autant que les Euesques n'auroient garde de s'opposer à rien que Monsieur de Lorraine desirast, pour estre l'un fils, l'autre proche parent, & l'autre seruiteur tres-obligé de l'Euesché mesme. Sa Sainteté m'a respondu qu'elle ne s'y hastoit point, & leur en auoit donné vn long terme. Je vous prie donc que le Roy face aduertir cependant secrettement ces Chapitres, pour luy enuoyer les interests qu'ils peuuent auoir en telle erection, & les preiudices & dômages qui leur en aduiendroyent. Car il faut bien qu'il y ait en quelque empeschement notable, puis que depuis vn si long-temps qu'il y a vn Duché de Lorraine, on n'a point demandé, ou pû obtenir telle erection.

Ayant obtenu cela, ie luy ay parlé de donner dispense d'aage à vn fils de Monsieur de Barraut que le Roy a nommé à l'Abbaye de Salinaç, & de donner au nouveau Euesque d'Acqs la retention pour deux ans d'un Doyenné qu'il a en vne Eglise Collegiale lez Bourdeaux, & ay eu vne bonne response de l'une & de l'autre.

Sur la fin ie luy ay parlé du gratis de l'Abbaye de Morigny pour le beau fils de Monsieur de Maille, lequel gratis auoit esté cy deuant accordé pour la moitié, mais n'en auoit rien fait signer : & i'espere que nous l'aurons signé & pour quelqu'autre chose plus de la moitié.

Voyla sommairement ce que i'ay fait en mon audience d'aujourd'huy. Au demeurant le Cardinal Sauello a suiuy de bien pres le Cardinal de Pèpoli, estant decedé en vne sienne maison aux champs du depuis deux iours.

On m'a dit que ce ne sera le sieur Arconat qui retournera icy Ambassadeur pour Monsieur de Sauoye, ains que ce sera le Côte de Verruë qui viendra resider icy pour luy, & que ledit sieur Arconat est enuoyé en Espagne. Aussi m'a-on dit, que la Royne d'Espagne ne partira de Milan qu'en Aueil, & que l'Archiduc Albert trouuant ce temps trop long a despesché en Espagne, pour obtenir congé du Roy d'y aller luy au plustost sans plus attendre.

I'ay seruy Monsieur le President le Clerc, que vous m'auiez recommandé par la lettre du 6. d'Octobre, non pas en empeschant ce qu'il vouloit estre empesché, d'autant que cela auoit esté despesché, & enuoyé auant que i'eusse receu ses lettres & les vostres ; mais en l'aduertissant du remede qu'il y a, & du moyen de faire la chose nulle.

Le sieur d'Embourg Secretaire de Monsieur de Luxembourg est de retour de Bresse & de Milan. Il n'a rien fait à Bresse, mais à Milan, il a sceu vne partie de ce qui s'est trouué du bagage de Monsieur de Luxembourg.

Le Maistre des courriers d'icy m'a asseuré que le courrier ordinaire d'Espagne venant par deçà, a passé par la France sans toucher Lyon, dont il est fort fâché : & moy fâché & esmerueillé tout ensemble, attendu l'importance de la chose, & l'ordre que vous y auiez fait donner. I'espere neantmoins que cela ne se fera plus : car il n'y va pas de moins que de l'extinction de nostre ordinaire, pour les causes que ie vous ay autresfois déduites & que vous scauez trop mieux. A tant &c. Monseigneur, &c. De Rome, ce Venedredy 22. Ianuier 1599.



## A MONSIEVR DE VILLEROY.

CLXIII.

**M**ONSEIGNEVR, Depuis mes dernières lettres qui furent des 17. 18. 19. & 22. Ianuier, ie receus le dernier dudit mois la vostre que vous m'auiez escrite le huiſtième Nouembre, laquelle ie n'esperois plus recevoir. I'ay veu l'indisposition que le Roy auoit eue au commencement de Nouembre, & comme il se portoit mieux: & depuis l'ay entendu par autre voye sa pleine & entiere guerison, dont ie louë & remercie Dieu, & le prie qu'il luy plaise le nous conseruer longuement. I'y ay veu aussi ce que sa Maieſté veut estre gardé touchant les lettres qu'elle escrira sur les gratis, & m'y gouuerneray conformément à sa volonté pour ce peu de temps qui reste entre cy & la venue de Monsieur de Sillery, auquel i'estime que vous en aurez dit autant. Pour la promesse que Messieurs des finances vous auoyent faite, de faire payer la pension qu'il a pleu au Roy de me donner à vostre intercession, i'ay cogneu le bien & honneur que vous m'auiez fait de les en prier, dont ie vous en remercie tres-humblement, vous suppliant de m'y continuer cy-après vostre protection & faueur où besoin sera.

Outre la susdite lettre dudit iour huiſtième Nouembre, i'ay receu depuis quatre ou cinq iours quelques lettres du Roy sur des faits particuliers; à ſçauoir vne des seizeſme Septembre, sur la venue de Monsieur le Cardinal de Loysse: vne du 30. Nouembre, pour vne affaire qu'ont icy Monsieur & Madame la Princesse de Conty: vne du 15. Decembre, pour le ſieur de la Varenne touchant l'Abbaye de Montier-Neuf de Poitiers, avec vne lettre du 13. sur le meſme ſuiet, & vne du 19. Ianuier pour l'expédition de l'Archeueſché de Sens: en tous lesquels affaires, i'obeiray aux commandemens de sa Maieſté, & m'efforceray de les faire reuſſir à son contentement, & luy rendray compte de ce qui sera ſuccédé.

Par ma lettre du 22. Ianuier, ie vous eſcriuis ce qui s'eſtoit paſſé en l'audience que i'auois eue ce iour-là, qui eſtoit vn Vendredy. Le Vendredy apres qui eſtoit le 29. Ianuier, ie ne fus point à l'audience, pource que le Pape eſtoit las, ayant eſté en proceſſion à pied, & qu'aussi bien n'auois-je point d'affaires à traiter pour le Roy, ny d'autres qui preſſaſſent. Le Vendredy apres, qui fut le cinquiesme de ce mois, ie fus & parlay à la Saincteté de dix ou ſept affaires particuliers, lesquels n'eſt point beſoin que ie vous ſpécifie pour n'importer aucunement au ſeruite du Roy, ſinon entant qu'ils concernent les expéditions qui ont à ſe faire par-deçà pour ſes ſubieſts. Mais le Pape me parla du Nonce qu'il veut enuoyer en France pour reſider près du Roy, me diſant que pour faire ceste charge il auoit choiſi l'Eueſque de Modene, Prelat de grande bonté & preud'homme, ſage & modéré, & n'ayant dépendance d'aucun Prince, ny autre qualité qui doie apporter ſouſçon au Roy, & me chargea la Saincteté de l'eſcrire ainſi à la Maieſté, & le prie

de sa part de le croire ainsi, & d'auoir toute confiance en ce Prelat. Monsieur le Cardinal Aldobrandin m'en dit autant, & qu'on auoit aduisé d'enuoyer personne qui ne fust suiet du Roy d'Espagne, ny n'eust benefices en aucuns de ses Estats, suiuant ce que leur en auoit conseillé Monsieur le Cardinal de Florence. Ledit sieur Nonce est natif de la ville mesme de Modene, d'où il est Euesque, de la famille de Siluigardi, aagé d'environ soixante ans, & a eu l'Euesché par l'intercession de feu Monsieur le Duc de Ferrare, duquel il estoit subiet & seruiteur particulier, & par luy fust enuoyé deux fois en Espagne. Je n'ay trouué personne qui m'en ait dit mal, ny rien qui soit contraire à ce que le Pape & Monseigneur le Cardinal Aldobrandin m'en auoient asseuré. Et sur ce que j'ay dit qu'il auoit son Euesché sous le Seigneur Dom Cesar d'Este, qui estoit mal content des offres que le Roy auoit faites au Pape sur le fait de Ferrare, il m'a esté respondu, qu'au fait mesme de Ferrare il auoit tenu pour le saint Siege contre ledit Seigneur Dom Cesar d'Este, & luy en auoit tousiours parlé fort librement, ce que le Pape mesme & Monsieur le Cardinal Aldobrandin me dirent, & que cela estoit en partie cause pourquoy sa Sainteté s'y fioit particulièrement, & l'auoit appellé à ceste charge Monseigneur le Cardinal de Florence, & quelques vns des Prelats qui ont esté avec luy en France luy ont donné de tres-bons enseignemens comme il auoit à se gouverner quand il seroit par delà; & j'espere qu'il en aura fait son profit, & qu'en faisant le service du Pape & du S. Siege il taschera d'y conioindre aussi celsy du Roy en tant que faire se pourra. Il m'est venu voir, & m'en a demandé mon aduis, que ie luy ay dit le mieux que j'ay sceu. Il partira bien tost pour s'acheminer vers vous de Modene, comme il est ia party d'icy.

Monseigneur l'Archeuesque d'Arles; duquel ie vous escriuis de Ferrare que le Pape le vouloit enuoyer vers le Roy pour le fait des Iesuites, partist de ceste ville pour faire ledit voyage Vendredy 12. de ce mois, & le Pape est tousiours attendant le passe-port dont ie vous escriuis par mesme moyen.

Mais auant que passer outre à d'autres choses, il faut que ie vous achede escrire ce que mondit sieur le Cardinal Aldobrandin me dit outre le fait dudit Nonce. Il me dit donques qu'il entendoit que Monsieur le Cardinal de Loyeuse venoit, dont il estoit tres-aise, & qu'il desiroit que les autres Cardinaux François vinssent aussi resider en ceste Cour de Rome, & que par ce moyen avec ceux que le Pape feroit au Roy à la premiere promotion, on pourroit redresser icy le party de France; Que Monsieur le Cardinal de Giury viendrait fort volontiers; mais il n'auoit tout le moyen qui luy seroit necessaire; Que luy Cardinal Aldobrandin auoit autresfois fait prier le Roy de donner quelque bonne Abbaye ou Abbayes audit sieur Cardinal de Giury; Qu'il en suplioit encore sa Majesté, de toute son affection; Que l'Abbé Bandin auoit escrit à luy Cardinal Aldobrandin que le Roy luy auoit dit, que si luy Cardinal Aldobrandin vouloit quelque Abbaye, ou quelque autre chose, sa Majesté luy donneroit tres-volontiers; Qu'il prioit sa Majesté de vouloir donner audit sieur Cardinal ce qu'elle voudroit donner à luy Cardinal Aldobrandin, & qu'il receuroit ce bien comme fait à soy-mesme, & pendant l'absence, comme il auoit fait autresfois, que ledit Cardinal de Giury auoit tousiours fait bons offices pour l'absolution de sa Majesté, &

la seruiroit aussi fidellement qu'autre scauroit faire.

Ledit seigneur Cardinal me parla encores d'un troisieme affaire, à sca-  
 uoir de la protection de Sauoye, & me dit qu'il luy auoit esté dict que le  
 Roy en auoit pris quelque ombre, & que pour cela il m'en vouloit parler  
 afin que i'en rendisse compte à sa Majesté; Que la protection de Sauoye  
 estoit si peu de chose, qu'elle ne se nommoit point protection auant que le  
 Cardinal Alexandrin qui l'auoit exercée luy eust imposé ce nom; Que lors  
 du decez dudit Cardinal Alexandrin, luy Cardinal Aldobrandin estoit hors  
 de Rome pour les choses de Ferrare, & le sieur Arçonat Ambassadeur du  
 Duc de Sauoye, en escriuit à son maistre, sans le sceu de luy Cardinal Al-  
 dobrandin, & ayant receu response de son Altesse conforme à ce qu'il vou-  
 loit, en parla au Pape, qui tint l'affaire en suspens iusques à ce qu'il fust à  
 Ferrare, où luy Cardinal Aldobrandin estoit long temps auparavant; Que  
 lors se trouuant luy Cardinal Aldobrandin avec sa Sainteté, il fut aduisé  
 de ne mécontenter point ce Prince pour si peu de chose, n'apportant ladite  
 Protection aucune vtilité, ny aucun maniement d'affaires, mais seulement la  
 seule proposition des benefices Consistoriaux qui sont es Estats dudit Duc  
 de Sauoye; Que luy Cardinal Aldobrandin auoit donné tant de preuues de  
 l'affection qu'il portoit au seruice du Roy, qu'il luy seroit fait tort si sa Ma-  
 jesté ou autre en doutoit: & estoit prest à le monstrier plus que iamais à tou-  
 tes les occasions qui s'en presenteroient, & prioit sa Maiesté de s'en assu-  
 rer. Le luy respondis ce que i'estimay estre le plus ciuil & expedient, mon-  
 strant de croire tout ce qu'il me disoit, comme à la verité ie croy qu'en son  
 cœur il soit plus François d'affection qu'Espagnol, & nous est vtile qu'il  
 croye que nous auons ceste opinion, pour le grand moyen qu'il a de ser-  
 uir & desseruir le Roy, tant pour le credit qu'il a aupres du Pape, que pour  
 le grand nombre de creatures qu'il a, & aura encores beaucoup plus cy a-  
 pres. Mais en effet & à la verité il ne se peut faire que ceste protection de  
 Sauoye ne luy apporte quelque inclination aux affaires de ce Prince-là, &  
 qu'elle n'engendre quelque plus grande confiance entre eux deux. Et outre  
 que toutes les protections apportent quelque émolument aux Protecteurs, le  
 Duc de Sauoye & ses Ministres prendront occasion de ceste protection, de  
 communiquer audit Seigneur Cardinal Aldobrandin les autres affaires du-  
 dit Duc, quand bien ledit Seigneur Cardinal ne voudroit, & l'y engageront  
 petit à petit, comme ils ne luy ont offert ceste protection. Il me dit encores  
 qu'estant ces iours passez vaqué vne Abbaye en l'Estat du Duc de Sauoye, le  
 Pape luy dit qu'il la luy donneroit, n'estoit ceste protection qui donneroit à  
 parler, & qu'il auoit respondu qu'elle estoit à donner à sa Sainteté, & non  
 au Duc, & qu'il la tiendrait de sa Sainteté seule, & quitteroit plustost ceste  
 protection qui ne luy valoit rien. Il ne me dist point si le Pape luy auoit  
 donné ceste Abbaye ou non, mais ie tiens que si car s'il eust esté autrement il  
 me l'eust dit tresexpressément. Et croy encores plus, à scauoir que l'accepta-  
 tion de ceste Abbaye, suruenü depuis ladite protection, a esté cause qu'il  
 m'aye tenu ce propos: iugeant en soy-mesme que par le moyen de ladite Ab-  
 baye la chose alloit si auant qu'on en pourroit penser mal. Et à la verité ceste  
 Abbaye sera encores un autre gage que le Duc de Sauoye aura de plus: mais  
 si ne nous est vtile d'en faire semblant.

An demeurant le Comte de Verruë nouveau Ambassadeur du Duc de Sauoye, est arrivé en ceste ville sur le commencement de ce mois, avec le President Moroso & le Docteur Vando, que ledit Duc a enuoyez pour faire croire au Pape que le Marquisat de Salusses luy appartient, & non à la Couronne de France. Ils se vantent d'auoir des foys & hommages faits par les Marquis de Salusses aux Comtes & Ducs de Sauoye par l'espace de plus de trois cens ans, & qu'il y en a mesme quelqu'un fait en la presence du Dauphin de Viennois, & y consentant: disent encores auoir des saisies dudit Marquisat faites par les Ducs de Sauoye comme Seigneurs directs, à faute de foys & hommages prestez par les Marquis de Salusses leurs vassaux, & plaintes faites par les subiects dudit Marquisat aux Ducs de Sauoye comme superieurs, pour mauuais traictement & griefs fait par les Marquis de Salusses à leursdits subiects, & des ordonnances faites & executees par les Ducs de Sauoye & leurs officiers sur telles plaintes. Avec tout cela ils ont fait faire des consultations par tous les plus grands Docteurs d'Italie, qui leur donnent cause gaignee, & pensent nous accabler à force de paragraphes & d'autoritez de diuers Docteurs, outre les faueurs, & artifices, & autres obscurcissements de nostre bon droit, dont ils ont fait, & font tous les iours vne fort ample prouision. Mais quand bien feldites foys & hommages, saisies, recours, & plaintes seroient vrayes, le dernier estat du Marquisat, auquel il faut regarder, & selon lequel il faut iuger, est que les Marquis l'ont tenu & recogneu des Roys de France à cause du Dauphiné, & comme si le Dauphiné ont pris inuestiture de leurs Maiestez, & à elles presté la foy & hommage, & les seruices deus & accoustumés par les vassaux, & que ledit Marquisat a esté deuolu à la Couronne, premierement pour confiscation, & par cession des droicts de la lignee des Marquis de Salusses qui y pretendoient droit, & en fin par faute & manquement de lignee: & ainsi a esté paisiblement possédé ledit Marquisat par les Roys François I. Henry deuxième, Charles IX. & Henry III. Etés traictez & conclusions de paix faites pendant ledit temps, entre nos Roys d'un part, & Charles V. & le Roy Philippes son fils, & les Ducs de Sauoye d'autre, ny ledit Charles, ny lesdits Ducs n'ont point pretendu que ledit Marquisat leur deust estre rendu, ou recogneu d'eux, & ne l'ont point nommé ny compris parmy les choses qu'ils stipulest leur estre restituées. Et le Duc de Sauoye pere de cestuy-cy, ayant en sa puissance ledit Marquisat, & la ville mesme de Carmagnole, apres la mort du Marechal de Bellegarde, il rendit le tout au feu Roy, & le confia à Monsieur le Marechal de Rets pour & au nom de sa Maiesté. Et le Duc d'à present quand il osa spolier la Couronne de France dudit Marquisat, il declara & fit dire à tous les Princes d'Italie & autres que ce n'estoit point pour se l'approprier, ains pour le conseruer à la Couronne de France, & le preseruer de l'irruption des heretiques qui s'en vouloient emparer, & y introduire l'heresse, & de la en toute l'Italie. Toutes lesquelles choses courent broche aux disputes & sophisteries de ceux-cy enuoyez pour ietter de la poudre aux yeux du Pape, & sont plus que suffisantes pour faire adiuger ledit Marquisat au Roy, tant au petitoire qu'au possessoire. Mais quand il y auroit quelque doute pour le regard du petitoire, que non, il n'y a Loix, ny Canon, ny autorité de Docteur, ny pratique au-

cune, qui ne die & ne crie ; Qu'il faut reintegrer la Couronne tres-Chrestienne en la possession & iouissance dont vn Duc de Sauoye en pleine paix a bien osé dechasser & precipiter le Roy de France.

Que si les biens de ce monde, qui sont subiects à la variation, auoient à retourner là où ils ont esté autresfois, il faudroit que le Duc mesme de Sauoye rendist tout ce qu'il a pour le iourd'huy, d'autant que celuy qui donna commencement à ceste maison, & à cét Estat n'auoit rien quand il s'en vint en la vallee de Morienne, fugitif d'Allemagne pour auoir tué l'Imperatrice sa tante.

Je ne doute point que M<sup>se</sup>ieur de Sillery ne vienne pourueu & fourny de toutes pieces, & qu'être autres il ne porte les articles de la paix faite en l'année 1559. entre le Roy Henry II. d'une part, & Philippes, II. Roy d'Espagne, & le Duc Emanuel Philbert de Sauoye, pere de cestuy cy, d'autre. Mais si d'auenture on auoit oublié les articles de la paix de l'année 1544. faite entre le Roy François I. d'une part, & l'Empereur Charles V. & le Duc Charles III. de Sauoye, ayeul de ce Duc, d'autre, il sera bon que vous les enuoyez ; car ils seruiron non seulement contre le Duc de Sauoye, mais aussi contre l'Empereur d'aujourd'huy, si on le vouloit mettre en ieu pour fortifier la partie du Duc de Sauoye, puis que ladite paix de l'an 1544. fut contractée, non seulement avec le Duc de Sauoye ayeul de cestuy cy, mais aussi avec ce grand & puissant Empereur Charles le quint, qui sçauoit & pouuoit defendre ses droicts, aussi bien que l'Empereur d'aujourd'huy. Et ne laissez s'il vous plaist d'enuoyer lesdits articles de paix, encorés qu'il ne s'y parle point dudit Marquisat, car cela mesme nous seruira, puis que dès lors 1544. nous tenions & possédions ledit Marquisat comme nostre, & que le Duc de Sauoye ne stipule point que nous le luy rendions, ny ledit Empereur que nous le recognoissons de luy,

Outre ce que dessus vous auez à vous preparer à deux choses touchant ledit Marquisat, l'une que l'on dit, & ie ne suis pas loing de le croire, que le Pape pour plusieurs respects ne donnera iamais sentence pour ny contre le Roy, ains taschera d'accorder sa Majesté & le Duc de Sauoye par traité, en enuoyant quelque personnage de sa part vers l'un & l'autre pour moyenner l'accord, si son Nonce ordinaire ne suffit : & a-on opinion que tous les partis & moyens d'accord qu'on vous proposera ; rendront à ce que ledit Marquisat demeure au Duc de Sauoye d'une façon ou d'autre. Mais à cela seruiroit de remede vne semblable resolution que celle que vous pristez sur le regard des Espagnols, de n'entrer point en traité ny conference aucune d'accord, qu'avec ceste presuppotion qu'on vous rendra le Marquisat.

L'autre chose à laquelle il vous faut preparer, est qu'on vous requerra de prolonger le terme de l'an qui expire le vingt deuxiesme du mois de May prochain, attendu qu'on a demeuré si long temps sans y rien faire. Si vous refusez de le prolonger, le Pape le pourra trouuer mauuais, & l'attribuera à quelque defiance de sa iustice ; & vous n'auiez possible pas pour encore toute la prouision qui seroit necessaire pour auoir raison dudit Marquisat par la voye des armes, outre qu'il semble que par les articles de la paix ceste voye soit prohibée, & que la France mesme n'a pas encorés recouuré ses

forces, & son ancien ordre pour entrer si tost en vne nouvelle guerre Que si vous prolongez ledit terme, vous r'entrez en l'obligation d'attendre vn iugement du Pape, de laquelle le temps vous aura deliuré d'icy à deux mois, & si apres tout cela n'aurez point ledit iugement, suiuant ce qui a esté dit cy dessus, & cependant aurez fait ce que veut l'vsurpateur, qui ne demâde qu'à gaigner temps & s'establi de plus en plus, attendant plus grande assurance de quelque cas fortuit & inopiné : & pourrez encores perdre l'occasion de recouurer ledit Marquisat en temps que le Duc, de Sauoye est fort bas, & tous les subiects & Estats ruinez & mal contents, & le Roy d'Espagne de que il peut esperer secours nouveau en son regne, est embrouillé & aux mains avec les Anglois, Zelandois, Holandois & tels autres, comme est aussi l'Empereur avec le Turc.

A ce que dessus a quelque chose de semblable ce que i'ay appris de Monsieur de Lorraine depuis que ie vous en escriuis dernièrement. La ville de Marsal au Diocese de Mets, auant ces derniers troubles estoit possedee par nos Roys, & pendant lesdits troubles a esté prise par Monsieur de Lorraine, comme vous sçavez trop mieux ; surquoy ie ne sçay ce qui a esté accordé entre le Roy & luy : tant y a que depuis enuiron vn an mondit sieur de Lorraine, Monsieur le Cardinal son fils ont exposé au Pape, que ladite ville de Marsal estoit de l'Euesque de Mets, & qu'il estoit euidentement vtile à l'Eglise & Euesché de Mets, que ladite ville luy fust baillee & deliuree en propre, & qu'il baillast en recompense à l'Euesque d'autres biens de plus grand reuenu & de moindre despenle, en precomptant neantmoins sur ladite recompense les despeses grandes que Monsieur de Lorraine auoit faites pour ledit Euesque non pour soy, en assiegeant, prenant, & ostant aux heretiques, & conseruant à l'Euesque ladite ville de Marsal : ont obtenu Commission de la Sainteté adressante à l'Archeuesque, ou Vicaire, ou Official de Besançon, pour s'informer de ladite vtilité euidente de l'Eglise, & puis faire la cession de ladite ville à mondit sieur de Lorraine, & crois que le tout soit fait & passé en ladite ville de Besançon. Et ainsi Monsieur de Lorraine aura dorenavant vne si forte place comme est la ville de Marsal au païs de la protection du Roy, & l'aura pour rien, luy estant donnée & deliuree par l'Euesque son propre fils, qui consent que toute la despenle faite par Monsieur son pere pour auoir ladite ville, soit precomptee en la despenle, & portee par la pauvre Eglise. S'il est vray que cette ville forte fust de l'Euesque, & qu'il fust vtile à l'Eglise d'en prendre recompense, c'estoit au Roy à la recompenser, & non à Monsieur de Lorraine, puis que c'est au païs de la protection de sa Majesté. Mais telles choses aduiendront à toutes les fois que les Eueschez & Abbayes voisines des Princes estrangers seront donnees à leurs fils, ou parens proches, ou seruiteurs, comme il se trouue aujourd'huy des trois Euesques qui sont en la protection du Roy, Mets, Toul, & Verdun, en la diminution desquels ie m'attéds bien que Monsieur de Lorraine s'accroistra bié encores en autres choses, contre la seureté possible du Royaume, & du païs qui est sous la protection de la Couronne de France, & peut estre qu'il y en a de semblables sous la presse à l'heure que ie parle, qui ay appris ce que dessus cōme par cas fortuit par vn de leurs seruiteurs, que ie ne sçauois pas l'importance de ce qu'il me disoit. C'est pourquoy à la premiere fois que ie

parleray au Pape, ie le prieray que lors qu'on le requerra de quelque chose semblable, ou d'autre importante qui soit au pais de la protection du Roy, il luy plaise en faire aduertir sa Majesté & ses ministres, pour sçauoir si & quel interrest sa Majesté y peut auoir, à fin que sa Sainteté ne soit point surprise, & qu'il n'en aduienne des troubles & d'autres inconueniens.

Le huitiesme de ce mois me furent presentees des lettres de nomination à l'Abbaye de l'Isle-Barbe, de l'Ordre de saint Benoist diocese de Lyon par resignation de l'Archeuesque de Lyon, en faueur de Jean Huguet Prestre dudit diocese & estoient lesdites lettres dattees du dernier Nouembre 1598. & contre signées Forget: mais de bonne fortune i'auois esté deux iours auparauant aduertty de la mort dudit Archeuesque, qui fut cause que ie refusay d'y mettre *L'EXPEDITVR*, combien que i'en fusse fort pressé, à cause qu'on auoit retenu vne datte de ladite Abbaye du mois de Decembre, mais on n'auoit enuoyé les lettres de nomination sinon quand on vit ledit Archeuesque mort. Ainsi i'ay conserué la nomination de ladite Abbaye au Roy, qui la donnera par la mort à qui luy plaira.

Bien tost apres que ie vous euz escrit mes dernieres lettres, à sçauoir Dimanche 24. Ianuier, le Pape fist publier vn Iubilé pour ceux de la ville & destroit de Rome, sur l'occasion de l'inondation du Tibre qui aduint à Noel, à fin de prier Dieu qu'il luy pleust preseruer ladite ville & destroit de tout mal & inconuenient: & en consequence dudit Iubilé fist des processions generales à Saint Pierre & Sainte Marie Major les Mecredy vingt septiesme, & Vendredy vingt neufiesme Ianuier, où elle alla en personne à pied. Le Samedi trentiesme fut la feste & Chappelle de sa création, & le Mecredy neuuiemesme de ce mois fut la feste & Chappelle de sa coronation, & ainsi il est entré en l'annee huitiesme de son Pontificat.

Monsieur le Cardinal de Florence arriua en ceste ville le 30. Ianuier, venant de Florence où il s'estoit arresté pour y faire les festes de Noel. Je le fus visiter, & le trouuay de plus en plus affectonné au seruice du Roy auquel il continué tousiours de faire les bons offices qu'il commença dès qu'il arriua près le Pape. Depuis i'y suis retourné, & luy ay porté la lettre que le Roy luy escriuoit de sa main du premier Decembre, en faueur du Seigneur Alexandre Pico, & de Monsieur l'Archeuesque de Reims. Monsieur le Cardinal de Roeyse arriua icy le treiziesme de ce mois, & vne demie heure apres fust baïser les pieds au Pape. Je luy fus au deuant iusques à Monterose, où il me bailla la lettre du Roy du 26. Septembre, dont i'ay fait mention au commencement de la presente: & me declara bien amplement & expressément la bonne volonté qu'il a de seruir le Roy, & les occasions particulieres qu'il en a, outre estre subiect & vassal de sa Majesté, & auoir la protection de ses affaires, & à ce que i'en puis iuger par tous ses propos & actions, il ne portâ jamais plus de gratitude & de zele au seruice du feu Roy, qu'il fait à cely du Roy d'à present. Aussi a il si grand moyen d'amender icy les affaires de sa Majesté par son bon entendement & grande prudence, & par l'experience qu'il a de ceste Cour, & par la bonne opinion & authorité qu'il a acquise de si long temps, & mesme auprès de la personne du Pape qui l'ayme & l'estime particulièrement.

Il y a icy nouuelles que la Roynne d'Espagne partit de Milan le troisiemesme

de ce mois pour s'acheminer à Genes, & là s'embarquer & passer en Espagne. Il ne fut point vray qu'en la Congregation tenuë par le Pape le quinziesme Ianuier on y decretast monitoire contre le Comte Oliuarez Viceroy de Naples : bien y eust-il des Cardinaux qui furent d'aduis qu'on l'excommuniasst, & le Connestable de Castille aussi, pour les entreprises & attentats qu'ils ont faits & continuent sur la Iurisdiction Ecclesiastique : mais il fut aduisé par la pluspart, de ne point donner ce dégoust à ce ieune Roy au commencement de son regne, de peur qu'il ne s'en souuint toute sa vie : ains d'envoyer vers luy pour le prier d'en faire iustice luy-mesme, dont on attend response. Entre lesdits Cardinaux qui opinerent le plus rigoureusement fut Monsieur le Cardinal Aldobrandin, secondant la plainte que le Pape en auoit faite en ladite Congregation : ce que les Espagnols ont sceu, & en sont fort mal edifiez, comme aussi des autres qui furent de mesme aduis. Et tant mieux pour nous.

Le feu Duc de Sauoye obtint autresfois du Saint Siege que les benefices qui estoient en ses pays près de Geneue, où les gens estoient heretiques, fussent changez en Commandes de Saint Lazare, & à present qu'une grande partie s'y sont conuertis, il y a icy vn Preuost de l'Eglise de Geneue qui poursuit que lesdites Commandes soient remises en leur premiere nature de benefices Ecclesiastiques. A tant, &c. Monseigneur, &c. De Rome ce 17. Feurier, 1599.

## A MONSIEVR DE VILLEROY.

## CLXIV.

**M**ONSEIGNEUR, Ie vous escriuis le dix-septiesme de ce mois & respondis à toutes les lettres que i'auois alors du Roy & de vous. Le lendemain dix-huictiesme arriua en ceste ville de Rome le courier Baptiste Mancin, par lequel ie receus la dépesche dont vous l'auiez chargé, contenant vne lettre au Roy du trentiesme Ianuier, & cinq de vous : deux du dernier de Ianuier, vne du premier, & deux du sixiesme Feurier. I'ay encores receu trois lettres de sa Maiesté pour affaires particulieres, vne du sixiesme Ianuier, pour le gratis ou moderation de l'expedition de l'Euesché de Rhiez en faueur du Seigneur de saint Sixt Aumosnier du Roy ; vne autre du vingt-cinquiesme Ianuier, pour le gratis de l'Archeuesché de Lyon en faueur du fils de Monsieur de Bellicure, accompagnée d'une vostre du vingt-septiesme, & la troisieme du second Feurier, pour arrester l'expedition de l'Abbaye d'Ainay pour vn nommé Cheualier. Il y auoit encores des lettres pour d'autres que i'ay rendus aux presens, & enuoyees aux absens. Et puis que i'ay fait mention desdits faicts particuliers, ie respondray à ceux-là premierement, vous promettant que ie seruiray ledit Seigneur de saint Sixt, en la moderation qu'il desire, & selon qu'il a escrit par deçà à ceux qui y font les affaires de



Monsieur de Bellieure, en tout & par tout, m'assurant de trouver toute bonne disposition en nostre saint Pere, qui est tres-bien aduertie des merites de Monsieur de Bellieure, Quant à l'Abbaye d'Ainay, ie m'enquis incontinent de ce qui en estoit, & trouuay qu'il y a long temps que l'expediateur fust mis aux lettres de nomination par Monsieur de Luxembourg, & que la supplication en fust signee par le Pape, mais elle est demeurée aux componendes, & n'est point expediee entièrement, rants'en faut qu'il y ait eu bulles expediees; & partant i'ay esté à temps à prohiber l'expeditionnaire qui sollicitoit cette affaire de passer outre, ce qu'il n'osera plus faire.

Au demeurant ie vous remercie tres-humblement de la diligence dont il vous a plu vser à me respondre si particulièrement de toutes choses, & ay bien noté le tout pour en seruir le Roy par tout où besoin sera, soit enuers le Pape, ou Messieurs les Cardinaux, ou autres; & suis tres-ayse de ce que Monsieur de Sillery s'en venoit informé de toutes choses, & particulièrement des intentions du Roy pour en respondre au Pape, & luy donner toutes les satisfactions possibles: & aussi de ce qu'il porte avec soy les passe-ports que sa Sainteté a demandé pour le Seigneur Hieronymo Maggio, & de ce que le Roy luy a dit de gratis ce que vous m'en escriuez, que l'observeray pour ce peu de temps qui reste iusques à sa venue, & le tiendray secret comme i'ay tousiours fait, mais ie crains qu'il soit eschappé à quelqu'autre, & que des expeditionnaires en ayant senty le vent il y a plusieurs mois. Je loue aussi qu'il luy ait esté commandé de visiter en passant le grand Duc, auquel cependant i'ay fait sçauoir ce que i'ay veu par vos lettres que le Roy vouloit qu'il sceut, & luy ay enuoyé la petite lettre qui s'adressoit à luy, lequel aura grand contentement de ce qu'il a plu au Roy & à vous faire pour le Comte Octauius Anagadro.

Nous sommes apres à preparer les choses pour Monsieur de Sillery, & quand il sera icy ie le seruiray de tout mon pouuoir, comme dès long temps ie l'honore & reuere en mon ame pour tant de vertus & louables qualitez desquelles Dieu la doué.

La consommation du mariage de Madame sœur du Roy sans dispense, & la diuulgation de l'Edit touchant les pretendus reformez, nous viennent fort mal à propos, en cette saison de la dispute du Marquisat de Saluces, car sans cela nos aduersaires ne taschoient desia que trop à en rendre la restitution odieuse, & perilleuse à la religion Catholique en toute l'Italie. Mais la venue du Roy à Lyon, dont vos lettres font mention, viendra tres-bien à propos & comme ie vous ay escrit autresfois, il n'y aura raison si forte pour nous faire rendre ledit Marquisat, comme sera si on voit que nous sommes pour le reprendre par force, si on ne le rend de bon gré.

Outre ce que ie vous ay escrit par ma dernière des moyens dont entendent se seruir contre nous les docteurs enuoyez, par Monsieur de Savoie, ils mettent encores en auant certains articles qu'ils disent auoir esté accordez & signez il y a enuiron trois ans, par lesquels ils disent que le Marquisat demeureroit à son Altesse. Mais i'estime que fust seulement quelque projet d'accord, sans auoir esté acheué, & moins effectué, comme

me il n'y a eu que trop de guerre depuis, & en ce que ja lors que les choses n'alloient si bien pour le Roy, Monsieur de Sauoye vouloit recompenser ledit Marquisat, j'allois qu'il le tint comme il le detient encores. Il reconnoissoit aucunement par là que ledit Marquisat n'estoit point sien, mais au Roy. Et il me semble auoir entendu de plus, ou'outre lesdits articles signés, Monsieur de Sauoye auoit promis d'autres choses encor plus importantes, desquelles il se desdit quand se vint au fait & au prendre, de façon qu'il tint à l'ay que ledit project d'accord n'allast auant; auquel neantmoins il voudroit retourner, maintenant que le temps & les choses sont changees à son desauantage, & que le Roy ne peut sa reputation sauue faire aucune sorte d'accord, s'il ne recouure reellement & de fait à la Couronne, ce qu'un Duc de Sauoye, de gayeté de cœur en pleine paix luy a osé raurir à la veüe de toute la Chrestienté. Mais j'apprendray cela trop mieux, & toute autre chose, de Monsieur de Sillery qui fut vn de ceux qui furent employez audit traité.

A ce que ie vous ay escript de Marsal par ma lettre precedente, j'adiouneray aussi que j'ay depuis appris que Monsieur de Lorraine & Monsieur le Cardinal son fils Euesque de Mets, en ont bien fait d'autres par cy deuant à ce pauvre Euesché, l'ayant priué il y a quelques anneés entre-autres biens de certaines salines que ledit Euesché auoit, & Monsieur de Lorraine s'en estant accommodé par le consentement & moyen de Monsieur son fils, & sous couleur d'utilité euidente de l'Eglise, approuuée mesme par l'Archeuesque de Besançon: de façon que durant ce ieu qu'il a commencé & fort auancé, nous verrons bien tost ceste pauvre Eglise & diocese de Mets reduits en cotillon par vn Prince voisin & Monsieur l'Euesque son fils.

Nous auons entendu par deçà, comme vous par delà, que le nouveau Roy d'Espagne vouloit bailler à l'Infante & à l'Archiduc Albert le Royaume de Portugal, sans les Indes toutesfois, au lieu des Pays-bas, mais ç'a esté par la voye de Flandre & non d'Espagne. De Monsieur le Cardinal St George, il se dit quelquefois de temps en temps qu'il retournera aupres du Pape, comme il seroit bien raisonnable, mais il n'y en a rien de certain, & les choses en sont encores comme elles estoient la dernière fois que ie vous en escriuis. Notre saint Pere est allé à Frescati passer ces iours gras, & partist leudy 18. de ce mois: c'est pourquoy ie ne fus à l'audience Vendredy 19. & ne pourray l'auoir plustost que Vendredy prochain 26. aussi n'y a il rien qui presse.

J'oubliois à vous escrire que l'affaire de Monsieur de Bourges n'a rien auancé depuis la venue de Monsieur le Cardinal de Florence, lequel me dit dernièrement que ie luy portay les lettres que luy escriuoit le Roy, que l'expeditionnaire qui poursuit l'affaire de mondit Seigneur de Bourges, luy en auoit porté vne autre de sa Majesté touchant ce fait; Qu'il me vouloit bien dire que le Pape ne fit iamais & n'estoit pour faire chose plus contre son gré que celle là; Que si sa Majesté le vouloit tant, sa Sainteté seroit en fin contrainte de le faire, mais sa Majesté se chargeroit d'une obligation enuers sa Sainteté beaucoup plus grande que la chose ne valoit, & le Pape penseroit auoir plus fait pour sa Majesté, que s'il luy auoit conserué la moitié de son Royaume; Qu'il luy sembloit à luy Cardinal de Florence que le Roy se deuoit reseruer à faire celle instance si pressée, & à se charger de li

grandes obligations enuers le Pape; pour des choses qui importassent grandement à sa Majesté & au public; Que nous auions ce grand affaire du Marquisat de Salusses; Que nous demandions des Cardinaux, & quelques personnes auxquelles le Pape n'auoit aucune inclination; Qu'il sçauoit que Monsieur de Sillery portoit encores d'autres affaires de grande importance, & pleins de difficultés: & partant n'estoit expedient que le Roy consumast la faueur & bonne grace de sa Sainteté en vn affaire particulier qui n'importoit de rien à sa Majesté ny au Royaume; Que toutes les affaires ne se deuoient traiter enue meisme façon; Qu'il falloit traiter comme particuliers ceux des particuliers, & ceux du Royaume comme Royaux & publics; Que si ie voulois escrire cela à sa Maiesté, il se contentoit que ie luy escriuissse que c'estoit luy Cardinal de Florence qui me l'auoit dit, pour en aduiser sa Majesté comme son tres-humble & tres-deuot seruiteur. Je ne luy voulus rien repliquer voyant mesmement beaucoup de prudence en son propos, & beaucoup d'affection en sa contenance & façon de dire. Mais ie ne lairray pourtant de bailler au Pape les lettres que le Roy en escrit, & les accompagneray de tous les meilleurs propos dont ie me pourray aduiser, sans gaster rien neantmoins de ce que Monsieur le Cardinal de Florence craint. Si nous n'en venons à bout cette fois que ledit Cardinal de Florence qu'on attendoit est venu & est resident en cette Cour, & que Monsieur le Cardinal de Joyeuse s'y trouue aussi, & qu'on a tant differé cy deuant, & que le Roy de nouveau fait vne si affectionnee depesche & repliche, ie ne sçauois plus qu'en esperer, & pourroit bien estre qu'alors le conseil dudit Seigneur Cardinal de Florence auroit lieu, & que Monsieur de Bourges feroit bien de se resoudre à prendre recompense de l'Archeuesché de Sens en Abbayes, ou autres telles qui n'eussent à passer en consistoire.

Après auoir escrit ce que dessus, il m'a esté dit par vn Cardinal, que Monsieur le Cardinal saint George, dont i'ay parlé cy dessus, reuiédra bien tost auprès du Pape, & que ce sont les Espagnols qui l'ont moyenné, & que Monsieur le Cardinal Aldobrandin, qui eust voulu que ce retour se fust fait par son moyen, ne trouuoit pas bon que les Espagnols s'en fussent entremis. Je crois facilement que le nepueu soit pour retourner auprès de l'oncle, & le deuroit ja auoir fait, ains il n'en deuoit point partir: mais ie ne crois pas que cela se soit resolu prés du Pape sans quelque participation de Monsieur le Cardinal Aldobrandin: & si les Espagnols s'en sont mellez (comme ils pourroyent auoir faict par le moyen ou au nom de la Roynie, prés laquelle ledit Seigneur Cardinal saint George a esté quelque temps à Milan) ç'aura esté par leur presumption & ambition naturelle, plus que par besoin qu'il en fust, & ne crois pas que le Pape y fust condescendu pour eux, s'il n'y eust esté disposé d'ailleurs. Toutesfois ie vous en ay voulu escrire ce qui m'en auoit esté dit: car, comme vous sçavez, si de telles choses on n'escriuoit que ce qui seroit certain & asseuré, on en escriroit fort peu. Ioint que vostre depesche parlant dudit Cardinal saint George, m'a donné occasion de vous en escrire plus possible que ie n'eusse fait. Aussi outre ce que ie vous ay mis cy dessus des gens de Monsieur de Sanoye qui sont icy pour le Marquisat de Salusses, i'ay appris depuis, que le Comte de Verruë auoit esté à l'audience, avec le Pre

sident Morofo, & le docteur Vendo, & informé longuement le Pape de leurs pretentions sur ledit Marquisat. Le Cardinal Madruccio y alla aussi pour & au nom de l'Empereur: mais cela ne m'est point nouveau, n'ayant jamais douté que les Espagnols & l'Empereur ne fissent leur cause propre de celle de Monsieur de Sauoye en ce fait; & nous faut tenir pour certains lors mesme que nous entendrons telle particularité, qu'en general ils feront toujours, diront, & penseront à toutes choses qui puissent exclurre pour iamais le Roy & la Couronne de France dudit Marquisat, & de toute l'Italie. A tant, & c. Monseigneur, & c. De Rome ce 19. Feurier 1599.

## A MONSIEUR DE VILLEROY.

## CLXV.

**M**ONSEIGNEUR, Monsieur le Cardinal Paraucino ayant entendu que le Seigneur Alessandro Gattola Consul de la nation Francoise à Caieta estoit mort, m'enuoya son Auditeur pour me parler en faueur du fils aîné dudit sieur Alessadro, lequel fils est paré dudit Cardinal de par sa mere, & m'en bailla ledit Auditeur vn memoire dont ie vous enuoye copie. Le dis audit Auditeur que c'estoit au Roy, & à vous à pouruoir de tels offices, & que ie vous en escrirois, & cependant prierois le Consul de Naples dont est fait mention audit memoire, de ne rien faire au contraire, ains fauoriser ledit fils aîné en ce qui pourroit toucher audit Consul; car ie ne voulois pas donner à penser audit Consul, que i'estimasse qu'il pust pouruoir audit Consulat de Caieta. Aussi escriuis-je audit Consul de Naples la lettre dont la copie sera avec ledit memoire qui me fust laissé. Or estant ledit Seigneur Cardinal Paraucino vn des plus gracieux & dignes de ce College, & qui fist fort bon office au temps de l'absolution, encores qu'il eust quelque obligation au feu Roy d'Espagne, & priant pour vn sien parent, ie ne voy pas qu'on puisse honnestement refuser vne chose mesmement qui ne peut estre de grand fruit ny d'importance, estant la ville de Caieta plustost vne place de guerre & de garde, que de trafic & de commerce, & luy ayant trop de moyen de s'en reuancher aux occasions qui se presenteront de seruir le Roy: & pour mon regard i'en seray fort aise. S'il vous plaist donc d'en faire, & enuoyer la prouision, il vous plaira de faire laisser en blanc le nom, qu'on ne m'a sceu dire & mettre le surnom Gattola, & les motifs de la grace que le Roy luy fera se pourront prendre du contenu dudit memoire. De Rome ce 20. Feurier 1599.

## A MONSIEUR DE VILLEROY.

## CLXVI.

**M**ONSEIGNEUR, Par mes lettres des 17. 19. & 20. Feurier que le Courier ordinaire vous porta vous aurez responſe à toute la dépeſche que Baptiſte Mancin metendift arriuant en ceſte ville le 28. du mois de Feurier, & aduis de tout ce qui ſe paſſoit à lors par deçà. Depuis meſdites dernières lettres Monſieur le Cardinal de Lozeule fuſt à l'audience le Ieudy 25. en laquelle le Pape ſe plaigniſt grandement à luy, de ce que par delà on auoit paſſé outre aux eſpouſailles & conſommation du mariage de Madame Sœur du Roy ſans diſpenſe, contre le droit commun, & contre les particulieres admonitions de ſa Sainteté. Auſſi ſe plaigniſt il de ce nouuel Edit qui a eſté faiſt touchant les prétendus reformez, & mondit ſieur le Cardinal qui auoit preueu ceſte plainte, luy reſpondiſt & l'appaiſa le mieux qu'il pût, ainſi qu'il eſcrira plus amplement au Roy & à vous: & ne laiſſa apres l'auoir appaiſé, de luy parler de faire des Cardinaux pour ſa Majelté à ces quatre temps prochains. Sa Sainteté ne luy promit point d'en faire, mais auſſi ne dit elle point de non, de qui nous donna à penſer qu'elle en vouloit faire. Et ſur ce que mondit ſieur le Cardinal le pria d'en faire au moins quatre pour le Roy, ſuivant la dépeſche que vous me fiſtes le premier de Decembre, que ie luy auois communiquée; le Pape reſpondiſt reſoluément qu'il ne paſſeroit point le nombre de deux; ce que mondit ſieur le Cardinal vous eſcrira plus au long, encores que ie ne penſe pas qu'il ſe puiſſe faire pour ceſte heure, d'autant qu'il ſant qu'il aille & vienne en diuers lieux pour ceſte promotion qu'on attend à demain. Le Vendredy 26. Feurier ie fus à l'audience, en laquelle le Pape ne me parla point dudit mariage, ny de l'Edit, tant pour ce qu'il en auoit deſchargé ſon cœur le iour auparauant avec mondit ſieur le Cardinal, qu'auſſi pource que i'en eutay expreſſément l'occaſion, commençant madite audience par le parlement de Monſieur de Sillery de la Cour pour ſ'acheminer vers ſa Sainteté, & par le paſſe-port qu'il portoit pour le Pere Lorenzo Maggio Ieſuiſte, & par la parole que le Roy donne à ſa Sainteté, que cependant il ne s'innoueroit rien touchant les Ieſuiſtes, & par telles autres choſes les plus agreables que i'auois peu recueillir de voſtre lettre du 30. Ianuier, dont il fut fort aiſé. Apres cela ie luy parlay de la vacquance qui eſtoit aduenue de l'Archeueſché de Lyon, & de la nomination que le Roy auoit faite du fils de Monſieur de Bellicure audit Archeueſché, & du gratis de l'expédition qu'on deſiroit de ſa Sainteté, pour pluſieurs conſiderations que ie luy repreſentay, qui le meurent à l'accorder fort gracieuſement; & ſur tout les vertus & merites de mondit ſieur de Bellicure dont ſa Sainteté eſt tres-bien informée.

LE MOTU PROPRIO toutesfois n'est encore signé, mais il le sera en son temps.

Il me dit que les gens de Monsieur de Sauoye l'auoyent voulu informer sur le fait du Marquisat de Salusses, mais qu'il leur auoit dit qu'il falloit attendre que celui qui doit venir de la part du Roy fust arriué.

Me dit de plus qu'ils luy auoyent representé qu'en l'an du compromis s'en alloit expiré le deuxiesme May prochain, & que ce peu de temps qui restoit ne suffiroit pour cognoistre des raisons & moyens de part & d'autre, & qu'il recognoissoit que cela estoit vray, & ne voudroit luy mesme vser de precipitation : & partant mel' auoit voulu dire, afin que l'aduisasse si l'en voudrois escrire. L'entendis bien que cela tendoit à ce que ie vous auois predit par ma lettre du 12. Feurier, à sçauoir à la prorogation du compromis qui vous seroit demandee, dequoy ie me remets à ce que le vous en ay escrit par madite lettre, ne m'estant depuis venu en l'esprit rien de plus certain ny resolu que ce que ie vous en disois lors, tant d'un costé que d'autre. Je respondis à sa Sainteté que i'escrois ce qu'il luy auoit pleu m'en dire, & que cependant ie luy pouuois dire en verité, en tant que l'en pouuois iuger, que les droicts du Roy se pouuoient deduire en moins d'une heure, & que c'estoient choses toutes notoires.

Des choses d'icy il ne se parle que de ladite promotion qu'on attend à demain. Monsieur le Cardinal de Loyeuse traueille fort pour faire reüssir Monsieur le Comte de la Chapelle, à quoy il a plus affaire qu'on ne pourra croire par delà, mais toutes choses s'escriront à plus grand loisir, & le iour de demain nous esclaircira de l'euenement, dont vous serez aduertis incontinent. A tant, &c. Monseigneur, &c. De Rome ce deuxiesme Mars 1599.

## A MONSIEVR DE VILLEROY.

CLXV.

**M**ONSEIGNEUR, Outre ce que ie vous escriuis par le courier Valerio le Mecredy des quatre temps troisieme de ce mois, iour de la promotion des Cardinaux, ie voulois vous faire vne lettre touchant les personnes qui auoient esté promedès, pour vous informer de leurs qualitez & dependances, mais comme ie commençois ladite lettre suruint le Cheualier Clement, Maistre de la chambre de Monsieur le Cardinal Aldobrandin, qui sans me donner aucun temps m'enleua de mon logis pour me mener au Palais, & m'osta mesmes d'auec Monsieur le Cardinal de Loyeuse, qui partant du Consistoire s'en estoit venu chez moy, où ie fus contraint de le laisser comme il escriuoit la liste des Cardinaux nouuellement faits pour la vous enuoyer. Ce qui aura suppléé aucunement à mon deffaut, & me rendit alors la presse que ledit Cheualier me faisoit moins fascheuse.

Maintenant ie vous diray que de 13. Cardinaux que le Pape fit ce matinlà, il n'y en a que cinq qui ayent dependance d'aucun Prince que du Pa-

pe seul; à sçauoir Monsieur le Cardinal de Sourdis & moy, qui auons esté faits à l'instance & en consideration du Roy; le Cardinal Dietrichstein Allemand, qui a esté demandé par l'Empereur; & estoit icy Camerario secret du Pape, le Cardinal Royas de Sadoüal, Espagnol Euesque de Gienna, qui a esté obten par le Roy d'Espagne; & le Cardinal d'Este, frere de Dom Cesar d'Este Duc de Modena & Reggio, auquel Duc il fut promis par l'accord qui fut fait de Ferrare: les autres 8. Cardinaux nouueaux ont esté faits du propre mouuement du Pape, & tant s'en faut qu'en les faisant il ait regardé de complaire à aucun Prince, qu'au contraire il les a expressement choisis pour personnes neutres ne dépendans que de sa Saincteté, & mesmes qui deussent s'opposer aux autres Princes, qui pourroyent auoir de trop ambitieux desseins au preiudice de la liberté Ecclesiastique, à laquelle il a generalement & principalement regardé en faisant ceste promotion. Et quant aux particuliers, en faisant le Cardinal Beuilaqua il a voulu fauoriser & honorer, & exciter à bien esperer la cité de Ferrare nouuellement retournée au saint Siege, estant ledit Cardinal des plus nobles maisons de Ferrare, & Prelat doué de plusieurs vertus & louables qualitez, & sa Saincteté l'auoit à ceste fin ja fait Patriarche de Constantinople, lors que le Patriarchat vacqua par le decez du Comte Hercole Estense Tassono. Le Cardinal Visconti est à la verité Milanois, mais il a tousiours seruy le saint Siege de Nonce auprès de diuers Princes, & a son Euesché de Ceruia en l'Estat de l'Eglise, & ne tient rien des Espagnols, sinon quel'iniure que le Conneftable de Castille luy voulut faire à l'Isle près Ferrare, lors que la Royne d'Espagny fut receüe, l'appellant insolent, dont ie vous escriuis alors. Et apres ses merites & seruices, qui sont grands, ie ne pense point qu'il y ait rien qui aye tant aydé à le faire Cardinal, que la courageuse responce qu'il fit lors audit Conneftable. Quant au Cardinal Tosco, natif de Reggio, il estoit Euesque de Tiuoli & Gouverneur de Rome, & n'a eu aucune intercession ny recommandation que de sa vertu & doctrine, & des longs seruices faicts à ce saint Siege. Le Cardinal Zachia autrement de San Marcello, estoit Commissaire de la Chambre, & neveu du Seigneur Marcello de Nobili, vn des plus intimes seruiteurs que le Pape eust, lequel San Marcello estant mort auant que receuoir aucun fruit de la bonne volonté que sa Saincteté luy portoit, & de la grande estime que sadite Saincteté en faisoit, elle l'a voulu monstrier en la personne de ce sien neveu. Le Cardinal Siluio Antoniano Romain estoit Maistre de la chambre du Pape, & personnage de grande pieté, vertu & doctrine, ce qui a esté toute la recommandation qu'il a eüe. Le Cardinal Bellarmino estoit Iesuite natif de Montepulciano en Toscane, & est celuy qui a fait cét œuure incomparable des controuerses pour la Religion Catholique contre toutes les heresies qui sont aujourdhuy, & qui ont esté au temps passé, & nostre saint Pere le faisant Cardinal a voulu honorer tant la vertu, & doctrine, & labour de ce personnage, que le College des Cardinaux. Le Cardinal Bonuissi Lucquois estoit Clerc de la Châbre Apostolique, & est celuy que le Roy, par l'instruction donnée à Monsieur de Luxembourg, mettoit entre les Prelats Italiens que sa Maiesté vouloit en temps & lieu estre recommandez de sa part au Pape pour estre promotez à ceste dignité. Le Cardinal Deti est pa-

rent du Pape, aagé d'environ 18. ans, de stature & presence fort honorable & de fort bon naturel : & le Pape dit en le promouuant qu'il auoit grande obligation à la mere dudit Cardinal. En somme les Espagnols se plaignent grandement de ceste promotion, tant pour n'en auoir eu qu'un de leur nation, qu'aussi pour y auoir esté obmis quelques Prelats de ceste Cour qu'ils pretendent auoir merité ceste dignité, mieux que quelques-vns de ceux qui l'ont obtenuë, & ne peuvent penser pourquoy lesdits Prelats ayant esté postposez, sinon que pour auoir esté recogneuz ou soupçonnez d'incliner au seruice du Roy d'Espagne, & m'a esté dit de fort bonne part que l'Ambassadeur d'Espagne vouloit en décharger son cœur, le dit ainsi au Pape en la premiere audience qu'il eust après la promotion. Voila donc quant aux personnes des Cardinaux nouvellement faits.

Au demeurant ledit iour de la promotion Monsieur le Cardinal Aldobrandin nous donna à dîner à dix que nous estions presens en ceste Cour, & apres dîner nous mena en la chambre du Pape, qui nous donna les bonnets de Cardinal, & nous fit vne tres-graue & tres-saincte exhortation à bien seruir à Dieu, & à son Eglise, & au saint Siege. Le Samedi 6. tint Consistoire public, où il nous donna les chapeaux. Le Mercredi 11. tint Consistoire secret où il nous ferma la bouche suivant la coustume. Le Mercredi 18. en vn autre Consistoire secret il la nous ouurit, & nous donna nos tiltres, & à moy escheur celuy de saint Eusebe; qui est vn Monastere de Celestins auprès de sainte Maric Maior & de S. Antoine. Depuis le Pape nous a distribuez en certaines Congregations, & i'ay esté mis en celle du Concile. Le Pape a trouué bon que ie m'appellasse de mon nom le Cardinal d'Ossat, plustost que le Cardinal de Reres de mô Euesché, ou le Cardinal de S. Eusebe de mô tiltre.

Depuis le iour de ma promotion Monsieur le Cardinal de Ioyeuse m'a logé & traité en son Palais de Mont jourdain, & mis en appartement paré plus richement que pas vn qui soit à Rome, sans en excepter celuy du Pape mesme, & m'a accommodé de ses coches & carosses, & de ses estaffiers, Chappellains, Gentrils-hommes & autres, pour faire les visitations accoustumees des anciens Cardinaux, & pour les Chappelles & Consistoires. De sorte que toutes choses se sont passées sans comparaison avec plus de dignité pour le Roy, & pour la personne du Cardinal, qu'elles n'eussent fait s'il eust esté absent. Et encores qu'il m'ait fait tout ce bien & honneur en partie pour le bien qu'il me veut de sa grace, si est ce qu'il a esté meu principalement pour le respect du Roy, pour lequel il scauoit que i'auois esté demandé, & que ie traitois les affaires de sa M. Et comme ie desire luy en rendre toute gratitude & seruice toute ma vie, aussi vous prie-je de faire en sorte que sa Maiesté l'en remercie comme de chose qui luy aura esté agreable.

J'ay receu en son logis les visitations accoustumees de tous les Cardinaux, & encores des Ambassadeurs, & mesme du Dnc de Sesse, Ambassadeur du Roy d'Espagne, qui m'a tenu tous propos de courtoisie enuers moy, & de respect & reuerence enuers le Roy, & entre autres me dit qu'il desiroit & esperoit de voir le ieune Roy son maistre marcher contre le Turc ennemy de toute la Chrestienté sous la conduite de nostre Roy, comme de plus grand Capitaine du monde. Je vous ay escrit toutes les choses susdites, non pour auoir esté chatoüillé de ces grandeurs, vous assureant



que ie ne m'estime de rien plus que ie faisois auparavant, mais pour vous donner auis de ce qui s'est passé, comme cela est du deuoir de ma charge, & mesmement de l'honneur & respect qui a esté rendu au Roy.

Le Pape enuoye le bonnet pour Monsieur le Cardinal de Sourdis par vn sien Camerier secret, qui est de la maison tres-illustre des Comtes de Langueisciole, & possible luy baillera-ye ceste lettre à porter. Tant mieux il sera receu par delà, tant plus vostre reputation se maintiendra & accroistrá par deçà, qui est tout ce que i'auois à vous escrire touchant ceste derniere promotion, & ses appartenances & dependances.

A quoy i'adiousteray encor ce mot, qu'outre l'obligation que Monsieur le Cardinal de Sourdis a de venir dans vn an prendre le Chapeau à Rome, il seroit bon qu'il s'en vint resider en ceste Cour, & y seruir le Roy conioinctement avec le S. Siège, n'y ayant autre lieu, où il pnisist si bié apprendre les fôctions & deuoirs d'vn bon Ecclesiastique, acquerir experience & prudence en toutes sortes d'affaires, & bref se rendre capable en l'âge & en la dignité où il est, de seruir près & loing son Prince & sa patrie.

Il y a encor vne autre chose que ie veux & dois adiouster, c'est qu'auant la promotion lors que Monsieur le Cardinal de Loyeuse s'apprestoit pour parler au Pape de faire des Cardinaux, ie le priay de parler pour Messieurs Serasin & Lomelin, au rang & ordre auquel le Roy les auoit mis dès le commencement, & faire toute instance pour eux comme pour les quatre dont la Majesté & vous m'auiez escrit par vostre depesche du premier Decembre. Ce qu'il fit, ainsi qu'il escrit au Roy luy mesme, de façon que lesdits sieur Serasin & Lomelin se peuent consoler, en ce que le Roy a tousiours constamment poursuiuy de faire instance pour eux depuis le commencement iusques à la fin, & que les ministres de sa Maiesié y ont procedé de bonne foy, & avec toute sincere affection, comme Dieu qui est scrutateur des cœurs en est tesinoing, lequel ie prie, &c. Monseigneur, &c. De Rome, le 23. Mars 1599.

## A MONSIEUR DE VILLEROY.

### CLXVIII.

**M**ONSEIGNEUR, Le vous escriuis auant-hier certaines choses touchant la derniere promotion des Cardinaux, que ie ne vous auois pû escrire par Valerio, & voulois bailler ma lettre au Comte Langueisciole Camerier secret de nostre saint Pere, par lequel sa Sainteté enuoye le bonnet de Monsieur le Cardinal de Sourdis, mais il ne part point si tost comme ie pensois.

Par ma lettre du deuxiesme de ce mois, que ledit Valerio vous porta, ie vous rendis compte de l'audience que i'auois eüe le vingt-sixiesme Feurier. Le Vendredy d'apres cinquiemesme iour de ce mois ie fus point à l'audien-

ce, par ce que la coustume est que les Cardinaux nouvellement faicts, s'ils sont en Cour, ne sortent point de leur logis iusques à ce qu'ils vont prendre le chapeau, & les chapeaux ne furent donnez que le Samedi sixiesme iour de ce mois. Le Vendredy douziesme i'allay à l'audience, & remerciay le Pape de la promotion, premierement au nom du Roy, comme ayant ses affaires en main, & puis au nom de Monsieur le Cardinal de Sourdis, & au mien propre: & pour rendre cét acte plus authentique & plus agreable, ie n'y voulus meller autres, sinon qu'à la fin ie priay le Pape du gratis de l'expedition de l'Euesché de Bayonne pour Monsieur de Chaux, laquelle requeste ie ne pûs disputer, pour autant que ledit Euesché auoit esté preconisé au Consistoire precedent, & denoit estre proposé au prochain suivant, comme il fut. Sa Sainteté m'accorda le gratis fort volontiers, & en signa depuis le *MOTU PROPRIO*, comme il auoit aussi signé celui de l'Archeuesque de Lyon, avec retention de deux Abbayes pour le fils de Monsieur de Belliéure.

Le Vendredy dix-neufuiesme ie retournay vers sa Sainteté, & le premier affaire dont ie luy parlay fut de l'expedition de l'Archeuesché de Sens en la personne de Monsieur de Bourges, & luy baillay les lettres que le Roy luy en escriuoit, & encor d'autres que Monsieur de Luxembourg luy enuoyoit & les accompagnay de tous les meilleurs propos dont ie me pûs aduiser, tendant tous à luy persuader qu'il estoit meshuy temps d'expedier cét affaire, tant pour le respect du Roy qui l'en supplioit tres-instamment, que le bien de l'Eglise de Sens, & de tout le Diocèse & Prouince Archiepiscopale; & mesme après en auoir donné intétion à Monsieur de Luxembourg qui l'auoit aussi assuré au Roy, & laissé vn sien Secrétaire pour en solliciter & porter en France l'expedition. Sa Sainteté me dit qu'il n'en auoit iamais rien promis à Monsieur de Luxembourg, ny à autre & neantmoins s'il voyoit le pouuoir faire, il complairoit au Roy volontiers: mais Monsieur de Bourges estoit en si mauuais predicament en ceste Cour, que sa Sainteté receuroit vne escorne si cette affaire se proposoit au Consistoire, estant bien aduerty qu'il y a des Cardinaux, qui estoient résolus de s'y opposer: partant prioit le Roy de l'auoir pour excusé. Je luy dis que Monsieur de Bourges estoit vn tres-honorable Prelat, & auoit bien seruy l'Eglise & la Couronne, comme il faisoit à present, & estoit pour faire à l'aduenir plus que iamais; & ne pouuoit estre icy en mauuais predicament, que pour auoir tenu le party du Roy, & pour les mauuais offices que ceux du party contraire luy auoient faits. Sa Sainteté me repliqua que ce n'estoit pour cela, qu'il n'auoit point accoustumé de croire de quelqu'un à ceux qui luy estoient mal affectionnez, & estoit marry de ne pouuoir complaire au Roy.

J'ay parlé aussi à Monsieur le Cardinal Aldobrandin, auquel nous auons accoustumé d'aller sortant de chez le Pape, & luy baillay les lettres que sa Majesté luy en escriuoit, avec vne de Monsieur de Luxembourg, & vne autre de Monsieur de Bourges. Il me demanda ce que le Pape m'auoit répondu. Je le luy dis; & encores ce que ie luy auois répliqué: & m'étendant là dessus, ie luy remontray que ce refus seroit trouué mauuais en Cour, & par toute la France; & que luy Cardinal Aldobrandin seroit chose non seulement agreable au Roy, mais aussi utile à l'Eglise, & au S. Siege mesme, s'il

employoit son credit & autorité à promouvoir l'expedition de cét affaire. Il me dit que le Pape desireroit que cét affaire fust en termes de pouuoir estre expédié, & que luy Cardinal Aldobrádin y voudroit aussi seruir le Roy, mais qu'une grande partie du College des Cardinaux y estoit cōtraire, & s'y opposeroit, & qu'il n'estoit pas mesme bon pour Monsieur de Bourges que cét affaire se proposast en Consistoire, hors duquel neantmoins il ne se pouuoit expedier. Le second affaire dont ie parlay au Pape en ladite audience dudit 19. de ce mois, fut de l'Abbaye de Monstierneuf, priant sa Sainteté de la part du Roy de vouloir baillet ladite Abbaye en commande, encor que le dernier possesseur l'eust eue en tiltre, attendu qu'auparauant elle souloit estre tenuë en commande, & l'auoit esté par les trois predecesseurs. Il me dit que cela seroit contre le droit & contre la coustume de ceste Cour, & contre le bien & vtilité de l'Eglise, & mesme en France, où il n'y auoit ia que trop de débauches quant aux choses Ecclesiastiques, sans y introduire ceste-cy. Je luy répliquay que le Roy luy demandoit ceste grace pour une personne qui luy estoit fort agreable, & que sa Sainteté pourroit satisfaire à soy-mesme, & complaire à sa Maiesté, en baillant pour ceste fois ladite Abbaye en commande, & apposant vn decret que le Commandataire venant à deceder, ou à ceder ladite commande retourneroit en tiltre. Le Pape me respondit que ces decrets ne se gardoyent point. Je luy dis qu'ils se deuoient garder & exprimer es prouisions suivantes, autrement qu'elles estoient nulles, comme il scauoit trop mieux, & luy baillay le memoire qui en auoit esté dressé, sur lequel il a depuis respondu au Dataire, qui est à dire qu'il n'en veut rien faire. Apres cela ie parlay à sa Sainteté de quelques autres graces qui estoient plus aisees à obtenir pour des particuliers, & sur la fin de l'audience, ie fis introduire Monsieur de Chaux, Euesque de Bayonne, & prendre le rocquet de la main du Pape, qui l'auoit expédié de son Eueché de Bayonne deux iours auparauant.

Au demeurant, le General des Cordeliers a esté fait par le Pape Patriarche de Constantinople, & sa Sainteté m'a dit & fait dire par Monsieur le Cardinal Aldobrádin, qu'il vouloit enuoyer ledit Patriarche vers sa Maiesté pour le fait du Marquisat de Salusses, afin d'obtenir prorogation du tēps du compromis, qui s'en va expirer le 1. de ce mois de May prochain : mais outre ce que sa Sainteté m'a dit, ie tiens pour tout certain qu'elle l'enuoye encores pour essayer de composer ce different par voye d'accord, & qu'il vous portera diuers expediens, lesquels rendrons tous à ce que ledit Marquisat demeure à Monsieur de Sauoye, comme ie vous ay predict cy-deuant, & m'y confirme de plus en plus. Ledit Patriarche vous est connu autāt plus qu'à moy, & pour ce ie ne vous en diray autre chose, sinon qu'il a fait de fort bons offices au Roy par delà : mais avec tout cela, il faudra bien prendre garde à sa negociation. Je luy ay oüy dire entre luy & moy que le Marquisat de Salusses n'estoit rien à vn si grand Roy comme est le nostre, & qu'il n'y alloit qu'un peu de reputation : Que quoy qu'on dist, sa Maiesté pouuoit entrer en Italie par assez d'autres lieux ; Qu'il n'estoit expedient au Roy de faire la guerre à Monsieur de Sauoye, & que si sa Maiesté la faisoit, entre autres maux il aduiendrait celui-cy, que les Espagnols ne retireroient point leurs gens d'attē des Pays-bas, & pourroient mes-

me n'en tenir point le transport desdits Pays-bas que le feu Roy d'Espagne auoit fait à l'Infante & l'Archiduc à Albert. Par lesquels peuples il est facile à iuger où il veut venir, & me semble qu'à tous il y a fort bonne réponse, laquelle vous sçavez trop mieux faire. Je luy ay encores ouï tenir & deduire, que la Bresse entière, avec la ville & Citadelle de Bourg seroit plus utile au Roy que le Marquisat; à quoy ie conjecture qu'entre autres expédients ils ont cestuy-cy, de bailler ladite ville & forteresse de Bourg en Bresse pour ledit Marquisat. Les gens de Monsieur de Sauoye sont tousiours toy, & son Altesse fait dire par son Ambassadeur qu'il seroit bon de faire vne ligue contre le Turc, & d'y imiter le Roy, & qu'il se presente maintenant vne fort belle occasion de ruiner cet Infidelle. En somme, il voudroit que le Roy s'engageast si bien ailleurs, que sa Majesté n'eust moyen d'auoir raison de l'usurpation qu'il a faite sur la Couronne de France. Monsieur le President de Villiers m'a escript, qu'à Venise on tient que quelque mine qu'il face de vouloir soutenir vne guerre, plustost que de rendre le Marquisat, toutesfois il n'en fera rien. Aussi m'a fait souuenir ledit sieur President, que lors que Monsieur de Sauoye s'empara du Marquisat, vous n'estiez point en Cour, & que Monsieur de Renol vous auoit succédé, & qu'à cause de cela, possible ne vous seriez-vous point souuenu de faire bailler à Monsieur de Sillery les lettres que son Altesse auoit esrites en ce temps là au feu Roy. Que si ainsi estoit, ie vous prie de faire regarder entre les papiers de feu Monsieur de Renol, & y prendre lesdites lettres: car puis qu'au temps de ladite usurpation Monsieur de Sauoye escriuoit & faisoit dire à tous les Princes, qu'il s'estoit assuré dudit Marquisat, pour le garder au Roy, & non pour aucun tort qu'il luy en voulust faire, il est vray semblable qu'il n'en escriuoit pas moins à sa Majesté mesme; & cela nous feroit grandement contre luy. Je n'ay aucunes nouvelles de Monsieur de Sillery, j'ajoict qu'il y a environ trois semaines que Baptiste Mancini partit d'icy pour luy aller au deuant, & nous en porter nouvelles. Je ne sçay si ie vous ay escript que ie luy ay arresté le Palais du Sieur Dom Virginio Orsini à Campo di fiore. A tant, &c. Monseigneur, &c. De Rome, ce vingt-cinquième Mars 1599.

## A V R O Y.

CLXXIX.

SER.E.

Le fust de cette lettre sera fascheux, & nous à escrire, & à vostre Majesté à entendre. Mais comme il procede du Pape & non de nous, aussi nous asseurons-nous que vostre Majesté prendra en bonne part la folsie que nous luy gardons à luy exposer sincerement ce que sa Sainteté nous a dit, & esperons encores que vostre Majesté par sa bonté signifiera le Pape, mesme en ce qu'il aura excité, attendu que ce n'est point

pour aucune mauuaise disposition qui soit en luy, mais pour le grand zele qu'il a à la Religion Catholique, & encores à sa propre reputation. Il nous enuoya dire hier matin que nous le viussions trouver sur le soir à vingt deux heures : & quand nous fusmes arrivez en sa presence, il nous dist qu'il nous auoit donné la peine de venir vers luy, pour nous communiquer vne grande affliction qu'il auoit. Qu'il estoit le plus marry & desolé homme du monde, pour l'Edit que vostre Majesté auoit fait en faueur des heretiques, au preiudice de la Religion Catholique : lequel Edit estoit en fin passé & publié, contre l'esperance qu'il auoit tousiours eue depuis qu'il se parloit de cét Edit, ayant estimé la Sainteté que vostre Majesté l'eust fait pour contenter les Huguenoes en apparence, & que vous fussiez bien aise que le Clergé s'y opposast, & que la Cour de Parlement refusast de le passer, pour vous en seruir puis apres d'excuses enuers lesdits Huguenots; maintenant il voyoit le contraire de ce qu'il auoit esperé de vostre Majesté. Premièrement il voyoit vn Edict le plus maudic qui se pouuoit imaginer, ( ce sont ses mots que nous vous reciterons icy & tout le long de ceste lettre, sans y rien mesler du nostre ) par lequel Edit estoit permise la liberté de conscience à tout chacun, qui estoit la pire chose du monde, estoit permis encore l'exercice de ceste secte damnable par tout le Royaume, les Heretiques introduits és Cours de Parlement, & admis à toutes charges, honneurs & dignitez, pour s'opposer désormais à tout ce qui pourroit tourner au bien de la religion, & promouvoir & aduancer l'heresie. En apres il voyoit que vostre Majesté auoit faict cét Edict en temps qu'elle estoit en paix dedans & dehors son Royaume; de façon qu'il ne se pouuoit dire qu'elle y eust esté forcee; Que lors que les autres Roys auoyent faict de semblables Edicts, il estoit veu manifestement qu'ils y auoient esté forcez, pource qu'il y auoit des armées heretiques en campagne, & guerre ouuerte; outre que les autres Roys auoyent tousiours esté Catholiques, & grieuement offensez par les heretiques, de façon qu'on ne pouuoit soupçonner que lesdits Roys eussent aucune inclination enuers ces gens là, quelque chose qu'on les vist faire. En troisieme lieu, disoit prendre vn tres-mauais augure, & s'affligeoit extremement de l'affection & ardeur qu'il disoit que vostre Majesté auoit monstree à faire passer cét Edit; Qu'en toute autre chose ciuile, vous auiez tousiours montré grandemoderation, mais en cette-cy vous auiez descouuert vne extraordinaire vehemence; Que le Clergé s'estoit opposé à cét Edict; que la Cour de Parlement l'auoit refusé, & que vous au lieu de vous en seruir d'excuse enuers les Huguenots, vous estiez grandement nigry contre les Catholiques, les auiez brauez, menacez, & en fin contrains & forcez à subir vn Edict si pernicieux à la Religion Catholique; Que vous vous estiez mesmes indigné contre l'Archeuesque de Tours; pour auoir faict prier que cét Edict ne passast, & qu'il vous inspirast; Qu'il n'y pouuoit auoir aucune bonne raison ny cause pourquoy vostre Majesté deust craindre ou estimer plus les heretiques, qui estoient la pire, la moindre, & la plus foible partie du Royaume, que les Catholiques, qui estoient la meilleure, & la plus grande en nombre, en puissance, & en puissance; Que

c'estoit encores vn tres-mauuais signe , que lors qu'il estoit question de faire passer vn Edict en faueur des heretiques contre les Catholiques, vous vous formalisiez, parliez d'autorité, disiez vouloir estre obey & toutesfois pour faire recevoir & publier le Concile de Trente, qui est vne chose sainte en soy, & par vous promise & iuree, vous n'en auiez iamais parlé vne seule fois à la Cour de Parlement, qu'on disoit n'y auoir point tant d'inclination comme elle deuoit, Que prendre si fort à cœur les choses qui sont pour les heretiques, & aller si froidement en ce qui estoit de la Religion Catholique, & de l'acquit de vostre parole & serment, & de vostre conscience, luy donnoit fort mal à penser; Qu'il ne scauoit plus qu'esperer, ny que iuger de vous, que ces choses luy mettoient le cerueau à party; qu'il vous auoit absous, & recogneu pour Roy, contre l'aduis des plus grands & plus puissans Princes Chrestiens, qui alors luy predisoient qu'il s'y trouueroit trompé: & toutesfois il n'auoit laissé de passer outre à tout ce qui auoit esté de vostre contentement & grandeur, & n'auoit cessé iusques à ce qu'il vous auoit rendu paisible & dedans & dehors vostre Royaume; & maintenant la recognoissance & consolation qu'il en receuoit, estoit qu'il estoit la fable du monde, & que chacun se moqueroit de luy; Que cet Edict que vous luy auiez fait en son nez, estoit vne grande playe à sa reputation & renommee, & luy sembloit qu'il auoit receu vne balafre en son visage. Et sur ce propos il se laissa transporter si auant, qu'il adiouta que comme il auoit alors franchy le fossé pour venir à l'absolution, aussi ne se feindroit-il point de le franchir vne autrefois, s'il falloit retourner faire acte cōtraire; Que non seulement vous le vituperiez en sa renommee, pour le regard des choses par luy faites, mais vous luy gastiez encores ses principaux affaires pour l'aduenir: Que l'vne des choses qu'il auoit auourd'huy le plus à cœur, estoit d'auoir raison des entreprises que faisoient sur la iurisdiction Ecclesiastique les Espagnols à Naples & à Milian; Qu'il estoit apres à y prendre quelque resolution genereuse, mais vous luy en ostiez le moyen, d'autant qu'ils luy diroyent, comme ils disoient déjà, qu'il se prenoit à eux de peu de chose, quand bien il y auroit quelque occasion; & cependant souffroit qu'en sa barbe vous fissiez des Edit en faueur des heretiques, à la ruine de la Religion Catholique: & pour cela mesme il ne pouuoit laisser passer cecy sans en faire quelque ressentiment vers vostre Maiesté: mais auant que passer outre il nous auoit voulu oïr; Que l'un & l'autre de nous deux estions subiects, seruiteurs & ministres de vostre Maiesté: Qu'il entendroit volontiers si nous auions à luy dire quelque chose là dessus; Qu'il se trouuoit fort perplex, & demouroit fort exulceré, & nous demandoit conseil & aide.

Nous fumes fort fâchez & estonnez d'oïr tout ce que dessus; & y respondîmes ores l'un, ores l'autre, tout ce que nous estimâmes estre à la décharge de vostre Maiesté, & à la consolation de sa Sainteté. Le sommaire de ce que nous respondîmes est: Que nous estions extrêmement marris de voir la Sainteté en vne telle angoisse & indignation, & en auions grande compassion; Que nous louions le saint zele qu'il auoit à la conseruation de la Religion Catholique, comme il touchoit principalement à luy,

que Dieu auoit fait son Vicaire, & successeur de saint Pierre, & Pasteur vniuersel de son Eglise; Que nous n'auions point veu l'Edict dont il se plaignoit: luy confessions neantmoins que cét Edict, & tous les autres de ceste sorte, qui auoient esté faits par les Roys precedens, à les considerer en eux mesmes nuëment, sans regarder au temps, & à la necessité qui les auoient extorquez, estoient choses tres-mauuaises; Que nous estions marris comme luy, & que vostre Maieité l'estoit encores plus que nous, comme vous auiez plus d'intérêt que tous autres, que ceste faction qui preiudicioit grandement à vostre autorité, & à l'obeyssance qui vous estoit deuë par tous vos subiets, & à la tranquillité du Royaume, fust au plustost eteinte, tant s'en faut que vous la volussiez fomentier, que nous le supplions tres-humblement de prendre les choses comme elles estoient; Que comme il ne se falloit point flatter en son mal, l'estimant ou faisant moindre qu'il n'est, aussi ne falloit il point s'estimer ny se faire plus miserable qu'on estoit; Que nous le prions de ne s'offenser point: & de prendre en bonne part si pour la verité, mesmes pour la propre consolation, nous luy disions qu'il erroit grandement en ce fait, & prenoit les choses autrement qu'elles n'estoient, & s'affligeoit de choses qui n'estoient point; Que premierement il nous sembloit que sa Saincteté prenoit cét Edict comme vne chose nouvelle & neantmoins en effect n'estoit autre chose que l'Edict de l'an mil cinq cens septante & sept, fait par le Roy Henry III. très-Catholique. Que le malheur du temps auoit porté, que depuis trente & sept ans en çà la France n'auoit peu estre en paix sans quelquetel Edict de pacification; Que de plusieurs tels Edicts qui auoient esté faits en diuers temps, celui de ladite année mille cinq cens septante & sept estoit le plus tolerable, & le dernier sous lequel la France vinoit en paix, quand les derniers troubles furent suscitez; Que vostre Maieité ayant les mesmes occasions que les Roys ses predecesseurs, & d'autres encores plus grandes, n'auoit peu faire de moins que de donner lieu à cét Edict le dernier & le plus tolerable de tous, comme vostre Maieité auoit fait dès le commencement de son regne; Que depuis pour pacifier les choses avec ceux de la ligue, il s'estoit fait plusieurs accords avec eux, qui auoient tous stipulé quelque chose au preiudice dudit Edict de l'an 1577. & à la diminution de ce qui auoit esté accordé à ceux de contraire Religion; lesquels estans plaints de ce qu'on leur auoit osté, & en ayant tumulté, & voulu prendre les armes, & faire vne nouvelle guerre, il auoit fallu refaire l'Edict de l'an 1577. en y remplissant quelques choses au lieu de celles qu'on auoit ostées par lesdits accords partioullers faits avec ceux de la ligue; Que cét Edict dont sa Saincteté se plaignoit, n'estoit autre chose que cela; Que secondement nous voyons que sa Saincteté pensoit qu'il y eust en cét Edict des choses qui n'y estoient point, comme, que les heretiques pourroient prescher par tout le Royaume, voire dans Paris mesme, ce qui n'estoit point, & n'auoit iamais esté, & ne seroit oncques Dieu aidant: car outre que tous les Edicts de pacification le prohiboient, l'accord particulier fait avec la ville de Paris estoit au contraire.

Qu'on troisiesmesmedieu, il nous estoit aduis que les choses qui estoient rayées en l'Edict, estoient par la Saincteté estimées plus grandes, & de plus

perilleuse consequence qu'elles n'estoient, comme que les heretiques soient declarez capables des honneurs & dignitez; laquelle declaration estoit en l'Edict de l'an 1577. & es autres precedens: & neantmoins nous n'auions point veu que le feu Roy, ny vostre Maiesté depuis sa conuersion; eussent pour cela exalté ces gēs là aux premiers honneurs & dignitez du Royaume; Qu'estre capable de quelque honneur & dignité, n'estoit pas auoir cēt honneur & dignité: Que les Roys de France ne donnoient les estats sinon à ceux à qui il leur plaisoit: Que tout dépendoit de vostre Majesté, qu'il falloit que sa Saincteté & le saint Siege vous traittast de façon, que vous eussiez tant plus d'occasion d'aller retenu au fait desdits honneurs & dignitez; Qu'il sembloit aussi que sa Saincteté creust que tous les Parlemens seroient incontinent remplis d'heretiques, & que ceux-cy y estans, empescheroient toutes choses qui seroient pour le bien de la Religion Catholique, & aduanceroient celles qui seroient pour leur secte: mais nous supplions sa Saincteté d'entendre, que de plusieurs chambres qu'il y auoit en chacun Parlement, il n'y en auoit qu'une qui seroit composee partie de Catholiques, partie d'autres, pour iuger des procez qui seroient entre les particuliers de diuerse Religion: Qu'en ceste chambre ne se traitteroit de rien qui concernast la Religion, ny le public: Que par ce moyen les non Catholiques, qui seroient six tout au plus, n'auroient aucun moyen d'auancer, ny reculer aucune chose rouchant la Religion; & si d'auenture ils interuenoient aux deliberations qui se font quelques fois toutes les chambres assemblees, six ne pourroient rien parmy sept ou huit vingts Catholiques, qui composent, par exemple, la Cour de Parlement de Paris, ains roidiroient & eschaufferoient lesdits Catholiques, comme l'on voit aux forges, que le feu deuiet plus aspre par vn peu d'eau qu'on y iette dessus; en somme que par cēt Edict la Religion Catholique ne viendrait point de pire condition, ains amenderoit de la paix qui en seroit conseruee: & l'heresie n'en augmenteroit de rien, ains diminuerait par la tranquillité publique; Qu'en quatriesme lieu sa Saincteté sembloit s'arrester seulement sur ce qui auoit apparence de mal, sans considerer le bien qui reuenoit du renouvellement de l'Edict de l'an 1577. qui estoit comme la paix & tranquillité publique, plus necessaire au Clergé, & à la Religion Catholique, qu'à nulle autre partie du Royaume; Que la Religion Catholique en seroit par ce moyen renuise en toutes les villes & lieux où les heretiques estoient les plus forts, d'où elle auoit esté bannie long temps y a; & les Ecclesiastiques retourneroient en la possession & iouissance de leurs Eglises, maisons, benefices, rentes & reuenus; Qu'il y auoit encores vn autre profit notable, à sçauoir que le Roy en contenant par cēt Edict les villes huguenottes, & le general de ceste secte, & leur ostant tout soupçon pour l'aduenir, estoit quant & quant le moyen aux chefs & autres factieux de continuer & entretenir leur faction, qui est celle qui maintient l'heresie: & la faction estant éteinte, l'heresie s'aboliroit puis apres aisément, & mesmes d'autant que vostre Maiesté continueroit de bien donner les Eueschez, & de procurer la conuersion des principaux Huguenots, & de les inuiter à se faire Catholiques par toute sorte de recompenses & graces.

Qu'en cinquiesme lieu ce qui plus nous desplaisoit, & qui estoit encore



le pis, & ce d'où pouenoit toute sa douleur, sa Sainteté sembloit vous imputer cét Edict, comme si vostre Maiesté auoit quelque mauuaise inclination : là où il falloit imputer tout cecy autemps, & à la nécessité qui auoit contrainst les Roys vos predecesseurs tres-Chrestiens & tres-Catholiques à Edits semblables, & à d'autres plus grieux, comme elle contraignit aussi premierement ce grand Empereur Charles quint à l'Interim d'Allemagne, & tous ceux qui luy ont succédé à l'Empire, & contrainst encore auourd'huy les Princes de la maison d'Austriche en leurs Estats, & les Roys de Pologne, & de Suede, les Suisses, & le Duc de Sauoye en quelques valleses : & auoit induit vos plus anciens & plus sages Conseillers, & les meilleurs Catholiques du Royaume, à vous conseiller de vous laisser aller à cét Edit, eux sçachans & voyans des choses, que ceux qui sont loing ne peuuent sçauoir : Que vostre Maiesté cognoissoit assez que tant que ceste faction sera en son Royaume, son autorité ne sera bien asseuree, & partant en deuoit desirer la diminution & extinction : Que cela, quand il n'y auroit autre chose, deuoit asseurer sa Sainteté de vostre intention, qui estoit de reduire tous vos subiects à la Religion Catholique, Apostolique, & Romaine : mais que cela ne se pouuoit faire qu'avec le temps, & en biaisant & gauchissant, comme fait le bon Pilote, qui tend tousiours au port, encore qu'il n'y puisse pas tousiours aller de droit fil.

A ce que sa Sainteté auoit dit que cét Edit auoit esté fait en pleine paix, & ne se pouuoit dire que vostre Maiesté y eust esté forcee, comme auoyent esté les autres Roys vos predecesseurs ; Nous respondions que cét Edict ne venoit point d'estre fait à present, qu'il y auoit lōg temps qu'il s'en estoit traité, & mesme en l'assemblée de Roüen, & auparauant que la ville d'Amiens ayant esté surprise par les Espagnols, lors que la Bretagne tenoit encore pour eux, ( auquel temps vostre Maiesté se trouua en plus grande nécessité & en plus grand danger que le Roy de France ne fut iamais ) les huguenots s'assemblerent en armes, & tumultuerent, menassans de faire la guerre, si vostre Maiesté ne leur accordoit ce qu'ils ont auourd'huy ; Que dès lors elle fut contrainte de le leur accorder pour les contenir, & éviter la ruyne qui fust aduenüe de leur souleuation en temps si calamiteux, encore que l'émotion en la Cour de Parlement, & la publication en ait esté différée : de façon que iamais Roy ne fust si contraint à faire vn semblable Edict, ou autre, comme vostre Maiesté auoit esté forcee à faire cestuy-cy : outre qu'il ne falloit pas pēser que les autres Roys eussent esté forcez à endurer telles choses, lors seulement que les Huguenots auoyent des armées en cāpagne, ainsi que force duroit mesme apres les pacifications faites ; Qu'il n'y auoit plus d'armées aux champs, pour la iuste crainte que lesdits Roys auoyent que les seditions ne recommençassent, s'ils reuocquoyēt ce qu'ils auoyent accordé par tels Edits : comme de fait les seditions recommencerent à toutes les fois que leurs Maiestez reuocquerent ces Edits, ou qu'on soupçonna qu'elles les voulassent reuocquer. Par aīnś vostre Maiesté ne laisseroit d'auoir esté forcee, par la certitude qu'elle auoit que ces gens luy remettroyent son Royaume aux troubles & guerres ciuiles, si elle ne leur eust accordé ce qui est porté par l'Edit : laquelle guerre ciuile auroit esté pernicieuse à la Religion Catholique. Premièrement, comme l'experience a monstré qu'auoient esté toutes

les precedentes, & puis à tout le Royaume encore, attenué & alangoury par 38. ou 40. ans de guerres ciuiles, & les Huguenots estans gens resolués, & cauts, & ayans grand nombre de places fortes, & pouuans attendre secours d'Angleterre, Allemagne, & Suisse; comme ils ont tousiours eu; outre que tous les Catholiques mal-contents, ou mal-viuans, & preuenus en iustice, auoient accoustumé de se mettre de leur costé en telles occasions, pour piller & voler les Prestres les premiers, & les Eglises, & Monasteres.

Quant à l'opposition qu'auoit fait le Clergé, & le delay que la Cour de Parlement auoit mis à publier l'Edit, c'estoit chose qui s'estoit tousiours faite en tous les Edits precedens de ceste sorte, & neantmoins ils n'auoient laissé de passer, ny d'estre publiez. Le Clergé s'opposoit tousiours à telles choses, & la Cour les delayoit, encore qu'ils sceussent bien qu'en fin il falloit passer par là, pour monstrer tousiours que le Clergé n'y acquiesce point & que la Cour ne les passe volontiers. Au reste, tant s'en falloit que vostre Majesté les eust menassez, qu'au contraire vous auiez benignement entendu la requeste du Clergé, & les remonstrances de la Cour de Parlement, & modifié beaucoup de choses selonc ladite requeste & remonstrances; Que nous cognoissions bien que sa Sainteté auoit veu vn certain escrit, qu'on auoit fait courir sous le nom & tiltre de responce que vostre M. eust faite à ceux de ladite Cour de Parlement, & voulions aduertir sa Sainteté que c'estoit vn escrit faux & supposé, contenant plusieurs choses que vostre Maesté n'auoit iamais dites, & que sa Sainteté n'y deuoit point adiouster foy, comme nous en auions esté aduertis par ceux qui estoient aupres de vostre Maesté.

Pour le regard du Concile de Trente, que sa Sainteté se pouuoit souuenir que vostre Majesté luy auoit fait dire plus d'une fois qu'elle en desiroit la publication, & y alloit preparant les choses, mais que cela ne se pouuoit faire si tost comme sa Sainteté & vostre Majesté vouloient. Et quand il seroit vray que pour la publication dudit Concile il n'auoit esté fait instance si pressée à la Cour de Parlement, comme pour la publication de cét Edit, ce ne seroit pas que vostre Majesté eust plus ny tant d'affection aux choses qui sont pour les heretiques, qu'à celles qui sont pour les Catholiques; mais la cause en seroit, que si cét Edit ne fust passé, vostre Maesté scauoit bien qu'elle renetroit aux guerres ciuiles, mais si le Concile de Trente n'estoit publié, il n'y auoit point pour cela aucun danger de guerre, d'autant que les heretiques qui abhorrent tous Conciles, & mesme celui de Trente, ne l'approuuent point, & que la pluspart des Catholiques, & ceux qui plus peuuent, comme les Parlemens, & les Chapitres, & les principaux Seigneurs, ne veulent point dudit Concile, pour n'auoir point à laisser les benefices incompatibles, les confidences, & autres abus que la reformation portee par ledit Concile osteroit. Et c'estoit vne chose naturelle, que non seulement les Roys, mais tous les hommes se remuent plus pour les choses là où il y a danger grand & euidant, que pour celles où il n'y en a point du tout.

Après tout cela, nous luy dismes que les responses susdites deuoient seruir à sa Sainteté non seulement pour sa consolation, mais aussi pour repliche à ceux qui voudroient alleguer cét Edit pour detracter des actions de sa Sainteté, ou pour se faire laisser, ou pour s'excuser des entreprises qu'ils font

sur la iurisdiction Ecclesiastique ; Que vostre Maiesté n'entendoit gaster les affaires de sa Saincteté & du saint Siege, mais les vouloit ayder & promouvoir de son pouuoir : & sa Saincteté & le S. Siege n'auoient point Prince au monde, de qui ils peussent & deussent esperer tant que de vostre Maiesté ; pour les grands moyens que Dieu vous auoit mis en main, & pour la gratitude & deuotion particuliere que vous auiez à la personne de sa Saincteté & au saint Siege Apostolique ; Que par ce dernier Edit, vostre Maiesté ne s'estoit proposee autre chose que de bien affermir & assurer la paix & tranquillité de son Royaume, & par ce moyen restaurer la religion Catholique la premiere, & remettre les autres bonnes choses en leur ancien ordre, vigueur, & splendeur, pour en seruir toute la Chrestienté, & le saint Siege, & sa Saincteté auant tout autre. Et pource qu'il luy auoit pleu nous faire tant d'honneur que de nous demander conseil, nous ne le pourrions mieux conseiller, quand nous en serions dignes, qu'en le suppliant, comme nous faisons tres-humblement & tres-instamment, de continuer à auoir bonne opinion de vous, & vous vouloir bien, & à bien esperer de vostre Maiesté, & s'y fier, & par ce moyen conseruer & accroistre la bonne volonté que vous auiez de bien faire à la religion Catholique, & au S. Siege ; Que de faire autre ressentiment enuers vostre Maiesté, cela ne pourroit produire aucun bon effect, & s'il vous escriuoit sur cet Edit, comme il auoit dit de vouloir faire, il falloit que ce fust avec toute moderation paternelle, & sur tout qu'il se gardast d'vser de menaces, qui ne peuuent iamais rien enuers vn cœur genereux comme est le vostre.

Ces responses s'appaisèrent aucunesment, mais non pas tant comme elles deuoient, & comme nous eussions désiré, & reuenoit tousiours au Concile de Trente, disant que vostre Maiesté le deuoit faire publier, quand bien elle ne l'eust promis, & vouloit le Parlement ou non, comme elle auoit fait de cet Edit ; Qu'il n'y auoit rien qui vous empeschast de le faire publier en vostre Conseil, & d'ordonner aux Euesques qu'ils le fissent garder en leurs dioceses, & sa Saincteté ne se pouoit contenter d'aucune response que nous luy fissions là dessus. La fin de tout ce propos fut, qu'il vous escriuoit de sa part & nous ordonnoit de vous escrire de la nostre ; ce que nous auons fait de la façon que les choses se passerent.

Et partant de chez le Pape nous allasmes vers Monsieur le Cardinal Aldobrandin, & luy dis sommairement ce qui s'estoit passé entre le Pape & nous, tant pour le bien informer, que pour le prier de faire bon office pour vostre Maiesté aupres de sa Saincteté. Nous le trouuasmes imbu des mesmes opinions que le Pape, & errant en fait autant ou plus que sa Saincteté ; mais à la fin il l'esclaircit de plusieurs choses, & nous dit qu'il seroit bien aise, qu'il n'y eust point en cet Edit tant de mal comme il sembloit, & qu'en toutes façons il seroit bon office aupres du Pape, pource qu'il estoit & vouloit estre seruiteur de vostre Maiesté, & pensoit l'auoir montré par effect cy deuant, & esperoit de le monstrier encore à l'aduenir en ce qui se presenteroit, & pource aussi qu'il deuoit tascher à diminuer la douleur du Pape qui estoit merueilleusement affligé de la publication de cet Edit : mais que la plus grande consolation que sa Saincteté pourroit receuoir, dépendoit de vostre Maiesté ; qui seroit, disoit-il, en faisant la publication du Concile de Tren-

te, dont le Pape nous auoit parlé, & la restitution de la religion Catholique au pays de Bearn, & autres telles actions dignes d'un Roy tres-Chrestien; & ainsi se termina le propos que nous eufmes avec ledit sieur Cardinal Aldobrandin, comme ie feray aussi la lettre, apres auoir prié Dieu, comme nous faisons deuotement, qu'il vous donne, &c. Sire, &c. De Rome ce 28. Mars 1599.

## A V R O Y.

## CLXX.

SIRE,

Nous escriuismes hier vne lettre à vostre Maiesté sur le subiet que le Pape nous en auoit donné le iour auparauant. A ce matin en la salle du Consistoire il nous en a donné vn autre pour vous escrire ceste-cy; qui est qu'il nous a dit qu'il vous enuoyeroit le Patriarche de Constantinople, par cydeuant General des Cordeliers, pour le fait du Marquisat de Salusses, afin d'obtenir de vostre Maiesté vne prorogation du terme du compromis porté par les articles de la paix; attendu que vous avez laissé passer l'an sans rien faire; Qu'il s'attendoit que vostre Maiesté accorderoit ladite prorogation; Que s'il aduenoit autrement, ce qu'il ne pouuoit croire, cela ne correspondroit point au reste de vos actions, lesquelles vous vous estiez tousiours monstre Prince real, & de bonne foy: Que vous estre remis de ce différent à luy, & auoir par ce moyen obtenu la paix, & recouuert vos villes, & puis laisser passer le terme du compromis sans dire mot, & vouloir contre la foy inree commencer la guerre, & troubler le repos de la Chrestienté, qui auoit tant costé à obtenir, ce seroit chose trop indigne d'un Roy si genereux comme vous vous estes fait cognoistre en toutes autres choses; & chacun le trouueroit mauuais, & s'en plaindroit, & vous en seroit contraire, & luy mesme ne pouuoit estre pour vous. Quand les choses se faisoient avec raison & equité; chacun du la pluspart y acquiesçoit, & ceux qui n'y ont point d'interest les fauorisoient: mais quand les choses se faisoient autrement, chacun s'y opposoit, & les empeschoit, & défauorisoit. Par ainsi que nous vous en escriuissions de sa part, outre ce qu'il en feroit dire par le Patriarche; dequoy nous auons estimé deuoir faire ceste lettre en commun, tout ainsi qu'il nous auoit parlé à tous deux en commun. Et prions Dieu, &c. Sire, &c. De Rome ce 29. Mars 1599.

## A MONSIEVR DE VILLEROY.

CLXXX.

**M**ONSEIGNEVR, Le 25. de ce mois apres vous auoir escript vne lettre que vous trouuez dattee de ce iour là , ie receus vne vostre depesche contenant vne lettre du Roy du sixiesme du mesme mois , & deux vostres du neuuesme , & ay esté bien aise d'entendre que les miennes des dix-sept, dix-huict , & dix-neuuesme Ianuier vous eussent esté rendues, comme vous pourrez auoir esté de sçauoir par celles que ie vous escriuis le mois passé, que la vostre du huictiesme Nouembre estoit en fin paruenüe en mes mains , apres que i'en auois perdu toute esperance. A la verité vne partie de ces retardemens viennent, comme vous dites tres-bien , de ce qu'on ne peut faire le droit chemin de Piémont & Sauoye , & de ce que nos ordinaires ne sont encores bien ordonnez : mais nous les remettrons Dieu aydant en leur ancien ordre le plustost que faire se pourra , & ie louë cependant celuy que vous auez donné au passage des courriers d'Espagne , & l'ay dit au Maître des courriers Raby, qui en est fort ioyeux.

Ie vous remercie bien humblement de la diligente response qu'il vous a pleu me faire à tout ce dont ie vous auois escript , & serviray le Roy conformément à ce qui m'y est prescrit. Entre autres choses ie ne feray autre response au Pape touchant l'office qu'il vouloit estre fait par le Roy enuers ceux de Geneue, si la Sainteté ne m'en parle la premiere, & ne feray non plus semblant de sçauoir rien de la lettre escripte par Monsieur le Cardinal Aldobrandin touchant le Seigneur Alexandre Pico. I'ay esté bien aise que vous ayez eu contentement de la response que le Pape fit , & que vous en vueilliez vser selon la volonté de la Sainteté, comme aussi de ce que i'auois fait touchant le renouvellement des priuileges de l'hospital des Quinzevingts de Paris, & pour Monsieur l'Abbé de Fiesque, & pour le fils de Monsieur le President Seguier. Par les lettres que ie vous ay escriptes par le precedent ordinaire, vous aurez veu comme le Pape n'a point attendu Monsieur de Sillery pour faire election de son Nonce pour France, ains y a enuoyé l'Euesque de Modene, duquel ie vous ay donné toute l'information que i'en auois apprise. Le Comte l'Anguisciola partit Samedi vingts-septiesme de ce mois, pour aller porter le bonnet de Monsieur le Cardinal de Sourdis.

Si Monsieur de Sauoye par son troisieme voyage qu'il a fait faire en ceste Cour au sieur Roncas son Secretaire, monstre par delà qu'il est en alarme, il ne le monstre de rien moins par deçà, où ses ministres sont tous remplis de bruits de guerre, comme si elle se faisoit desia en Sauoye aussi forte qu'elle s'y est faite deuant la paix. Je ne sçay quel bien ils pretendent de ces faux bruits, si ce n'est de faire hastier le Pape à enuoyer au plustost vers le Roy,

comme il a enuoyé le Patriarche de Constantinople, cy deuant General des Cordeliers.

Les entreprises faites sur la iurisdiction Ecclesiastique à Naples & à Milan, n'ont iusques icy produit autre chose que ce que ie vous ay escript cy deuant : & vous verrez par vne lettre que Monsieur le Cardinal de Ioyeuse & moy escriuons au Roy en commun, comme le Pape s'excuse aucunement sur le dernier Edit du Roy s'il n'a fait autre chose. Je vous remercie bien humblement de la part qu'il vous a pleu me faire des aduis que vous auiez des Pays-bas, d'Angleterre & d'Espagne, & louë Dieu de la bonne santé du Roy, qui est la nouuelle la plus importante & la meilleure que nous puissions recevoir. Monsieur le Cardinal de Ioyeuse a eu vn courrier expres sur la resolution que vous m'escriuez auoir esté prise par Monsieur de Ioyeuse son frere, laquelle il a portee fort constamment.

Par ma lettre du vingt-troisiesme de ce mois ie vous ay escript vne partie du bien que Monsieur le Cardinal de Ioyeuse m'a fait en ceste occasion de ma promotion : à quoy i'adiousteray, qu'apres que i'en eus fait & receu en son logis par l'espace presque d'un mois les visites accoustumees des Cardinaux & Ambassadeurs, ie m'en retournay en mon logis Védredy au soir vingtiesme de ce mois, & le lendemain il m'a enuoyé presenter deux mil escus comptant, & vn coche avec vn paire de beaux cheuaux, vn liët de damas rouge, & vne panetiere d'argent doré, que d'autres appellent cadenacs. Je prisay grandement ceste sienne liberalité & magnificence, comme ie deuois, & m'en sens infiniment obligé; mais ie n'estimay pas en deuoir vser si auât, & acceptay seulement la panetiere qui peut valoir cent escus; car encore que ie n'aye point tout ce qu'il me faudroit pour soutenir ceste dignité, si est-ce que ie ne veux pour cela renoncer à l'abstinence & modestie que i'ay tousiours garde, ny m'obliger de tant à autre Seigneur ou Prince qu'au Roy. Tant y a que l'occasion de remercier ledit Seigneur Cardinal, dont ie vous ay prié par madite lettre du vingt-troisiesme de ce mois, est accruë de toutes les choses que ie viens de vous dire.

Le Vendredy vingt-sixiesme de ce mois i'allay prendre la possession de mon tiltre de Saint Eusebe, & n'auois à traiter aucun affaire pour le Roy : qui fut cause que ie n'allay à l'audience, & n'ay pour ceste heure à vous rendre compte d'autre chose, ny de quoy vous faire la presente plus longue, sinon que pour prier Dieu, &c. Monseigneur, &c. De Rome ce tren-  
tiesme Mars 1599.

## A MONSIEUR DE VILLEROY.

CLXXII.

MONSIEUR, L'Abbé d'Aumale est guery graces à Dieu, selonc que ie vous auois predict, & est party de ceste ville, depuis enuiron quinze iours, pour s'acheminer en France par Venise: ie prie Dieu qu'il luy donne longue & heureuse vie. Cependant i'ay grande obligation au Roy & à vous, de ce que sa Maiesté m'auoit destiné ceste Abbaye si elle eust vaqué, combien que ie ne l'eusse demandee, & l'adiousteray a tant d'autres que i'ay à sadite Maiesté & à vous, pour les recognoistre par tres-humble & tres-fidelle seruice toute ma vie. Je garderay à Monsieur de Sillery le petit paquet que vous m'auiez enuoyé pour luy. Par les lettres que Monsieur le Cardinal de Loyeuse & moy escriuons au Roy en commun, vous verrez ce que le Pape nous a dit à deux fois. Je vous assure que Monsieur le Cardinal de Loyeuse se porta merueilleusement bien, lors que sa Sainteté nous parla de l'Edict, deffendant le Roy avec toute affection, prudence, vigueur, & courage. Si sa Maiesté faisoit tant que le Concile de Trente fust publié, elle appaieroit toutes ses colères, & osteroit les mauuaises satisfactions, & se mettroit vne autre couronne sur la teste. Je n'ay iamais sceu cognoistre que ledit Concile preiudiciast à aucun droit Royal, comme quelques vns ont voulu dire qu'il fait: mais quand il preiudicieroit à quelque chose, il se pourroit tousiours publier en y apposant vn (sauf) auquel on mettroit tout ce qu'on voudroit, cōme les prerogatiues & preeminences de la Couronne, l'autorité du Roy, les libertez & franchises de l'Eglise Gallicane, les Indults de la Cour de Parlement, les Edits de pacification, & toutes autres choses qu'on vouldra excepter. Et comme le Roy par l'Edict a offensé toute ceste Cour & infinis Catholiques, sans le vouloir toutes fois, & sans meriter qu'on s'en offensast, aussi les contenteroit-il tous par la publication dudit Concile, & monsteroit qu'en pouruoyant à tour aux vns & aux autres, il veut & sçait bien fonder en l'Estat le repos & tranquillité de son Royaume, son obeyssance & autorité à la restauration de toutes choses bonnes, & en somme que tout compté & rabatu il est le plus grand Roy qui fut iamais en France. A tant, &c. De Rome ce dernier de Mars 1599.

## A MONSIEUR DE VILLEROY.

CLXXIII.

**M**ONSIEUR, Par le precedent ordinaire, ie vous escriuis des 23.  
25. 30. & 31. Mars, outre comme i'auois receu deux autres lettres de  
Monsieur de Sillery; qui m'escriuoit qu'il seroit bien tost par deçà, & que  
i'estimois qu'il arriueroit le Lundy ensuiuant 19. Le Pape me dit qu'il auoit  
esté aduertie comme ledit sieur de Sillery estoit passé à Bologne, & qu'il se-  
roit le bien venu, & que si n'estoit pour la consideration qui le retenoit, il  
partiroit incontinent apres l'Octave de Pasques pour aller prendre l'air  
hors de Rome. Je luy dis que sa Sainteté ne s'incommodast point, & que  
ledit sieur de Sillery l'iroit bien trouuer là où elle seroit, ou bien attendroit  
son retour à Rome, comme sa Sainteté commanderoit. Il me repliqua que  
il le vouloit attendre, & puis me demanda dudit Sieur de Sillery. Je luy res-  
pondis suiuant l'information que i'en auois long temps y a de plusieurs, &  
de vous mesme dont sa Sainteté monstra estre fort aise. A la fin de ce pro-  
pos ie luy demanday s'il luy plaisoit que ledit sieur de Sillery luy vint bai-  
ser les pieds le soir mesme qu'il arriueroit, & sa Sainteté se remit audit  
Sieur de Sillery & à moy.

Je luy parlay du fait de Marsal, dont Monsieur le Cardinal de Lorraine,  
a accommodé Monsieur de Lorraine son pere, au detriment & diminution  
del'Eglise & Euesché de Mets, & au preiudice de la protection du Roy: &  
prieray sa Sainteté à toutes les fois qu'elle seroit prie de conceder à ces  
Princes de Lorraine quelque chose qui fust du pays de la protection du  
Roy, il luy pleust en dire ou faire dire vn mot à ceux qui auroient en main  
les affaires de sa Maiesté en ceste Cour, pour scauoir si le Roy auoit quel-  
que interest en telles concessions, & qu'il luy pleust aussi se souuenir que ces  
trois Eueschez Mets, Toul, & Verdun qui s'ont es mains d'vn fils, & d'vn autre  
proche parent, & d'vn seruiteur obligé de Monsieur de Lorraine. Sa Sain-  
teté me respondit qu'elle se souuiendrait de l'vne & l'autre de ces deux  
choses, & monstra estre mal contente de ceste maison de Lorraine: Et de-  
puis le Sieur Poirot Conseiller d'Etat de Monsieur de Lorraine, qui solli-  
citoit icy quelques affaires pour son Altesse, & pour Monsieur le Cardinal  
son fils, me dit qu'à cause du Mariage de Monsieur le Prince de Lorraine  
le Pape auoit suspendu tous leurs affaires, & mesmes ceux qui auoient ia  
esté accordez, & presque du tout expediez, & qu'il falloit qu'il s'en retour-  
nast en Lorraine les mains vuides, iusques à ce que Madame fust conuertie;  
ou le Pape appaisé en quelque autre façon. A quoy vous voyez que ie n'au-  
ray pas grande peine à retarder l'erection de Nancy en Euesché.

I'acheueray aussi en ceste audience-là l'affaire de Monsieur l'Abbé de  
Fiesque, lequel iusques alors estoit demeuré imparfait; & sa Sainteté



pour le respect du Roy m'accorda d'accepter ledit Sieur Albé pour son ~~Camerier~~ secret, avec la part, & autres honneurs & émolumens qui y appartiennent. Le luy parlay aussi comme de moy-mesme, sans y interposer le nom du Roy, comme ie n'ay garde en chose du monde sans son express commandement, de vouloir faire Referendaire de l'une & l'autre signature l'Abbé Arnolfini Lucquois, beau frere du Sieur Bartholomeo Cenani, & en euz bonne responce. Le fis encôres offices pour quelques autres particulieres, afin de conseruer & acquerir des seruiteurs au Roy, & employer vne partie de la dignité qui m'est accruë pour le soulagement & commodité du prochain. Le lendemain septiesme d'Auil, Monsieur le Cardinal de Ioyeuse enuoya vn sien Gentil-homme en poste vers Monsieur de Sillery iusques à Viterbe, pour l'inuiter de nouveau à venir loger chez luy, comme il auoit ja auparavant inuité par lettres, & moy aussi en enuoyay vn autre avec le sien, pour me conioiür avec ledit sieur de Sillery de son approchement, & de ce qu'il auoit fait iusques-là son voyage Lien & heureusement; priant Dieu qu'il luy fist la grace de parachener de mesme & l'assurant que ie le verrois auant qu'il arriuaist à Rome. Cependant après l'auoir prié de me commander ce qu'il estimeroit estre pour le seruice du Roy & pour le sien particulier, ie l'aduertis de certaines choses qui me semblerent à propos, & entre autres choses, que les deux premiers poinçts dôt le Pape luy pourroit parler, seroient du Marquisat de Salusses, & de l'Edict n'agueres passé en la Cour de Parlement: & pour cela mesme ie luy enuoyay vn escrit que les gens de Monsieur de Sauoye auoyent présenté au Pape, lequel i'auois recouré par voye d'amis, & la coppie de la lettre que Monsieur le Cardinal de Ioyeuse & moy auions escrite en commun au Roy le 18. Mars: & le 18. mondit sieur le Cardinal de Ioyeuse enuoya des rafraischissement pour la souppee à Monterose, & pour la disnee du Lundy 19. à la Storta, avec des carrosses pour veint plus commodément & plus honorablement.

Le Lundy dix-neufiesme nous luy enuoyasmes nos familles au deuant, & fismes dire à tous les Gentils-hommes François qui estoient à Rome qu'ils y allassent, & apres sortismes nous mesmes, & allasmes par-delà Pôre-mole entre vingt-vn & vingt-deux heures, & luy arriué, entraimes en vne des vignes qui sont entre ledit Ponte-mole & la porte du Populo, & là parlasmes ensemble plus d'une heure & demie, & puis nous le conduisismes chez Monsieur le Cardinal de Ioyeuse, qui le logea & traitta avec les principaux de sa compagnie, & l'accommoda de carrosses & cheuaux, & de toutes autres telles choses iusques au Vendredy vingt-troiesme que nous l'accompagnasmes à sa premiere audience à descouuert, apres laquelle il s'en alla demeurer en son logis de Campo de Fiore, qui cependant luy auoit esté préparé. J'entends premiere audience à descouuert, car dès le soir du Lundy qu'il arriua, il fut premierement en vn carosse fermé baiser les pieds au Pape, & eut audience de sa Sainteté, dont il vous rendra compte. Le soir mesme que Monsieur de Sillery fut arriué vint vn Courrier extraordinaire de Lyon, qui porta vos lettres du deuxiesme & troiesme d'Auil, le lendemain Monsieur de Sillery me bailla la lettre de la main du Roy du treiziesme Iannier qu'il auoit portee luy mesme, avec vne autre de la

main

main aussi de sa Maïesté du septiesme Auril que ledit Courrier auoit apportee. Je respondray à celle de vostre main du 6. Auril, & au premier poinct de l'autre vostre du deuxiesme parvne autre mienne que ie vous feray à part, & par la presente respondray aux poincts de vostre lettre du 2. Auril. J'ay dit au Pape ce que vous m'escriuez du contentement que le Roy a eu de l'ellection que sa Saincteté auoit faite de Monsieur l'Euesque de Modena pour le seruir de Nonce près sa Maïesté, & le commandement que sadite Maïesté auoit fait à Monsieur de la Guiche de le recueillir, & luy ay dit pareillement comme iacoit que sa Maïesté eust plusieurs grandes occasions de desirer l'expedition de l'Archeuesché de Sens en la personne de Monsieur de Bourges, neantmoins sa Maïesté s'accommodant aux volonzes de sa Saincteté, auoit delibéré de ne l'en plus importuner: à quoy sa Saincteté monstra prendre vntres-grand plaisir, l'ay dit aussi à Monsieur le Cardinal Aldobrandin l'estime en laquelle le Roy auoit la recommandation que ledit sieur Cardinal auoit à sa Maïesté de la personne de Monsieur le Cardinal de Giury, & comme sa Maïesté auoit ordonné audit sieur Cardinal de s'en venir à Rome, & vouloit l'aider à faire son voyage, & comme elle entendoit aussi que Monsieur le Cardinal de Sourdis s'en vint au plus tost à Rome, & le luy auoit fait dire: de quoy ledit sieur Cardinal Aldobrandin a esté fort aise, & m'a dit qu'il en remerciroit sa Maïesté: Je luy ay aussi exposé la responce que le Roy vouloit luy estre faire de ce qu'il m'auoit dit de la protectiõ de Sauoye, pour luy acceptee, à quoy il a pris tres-grand plaisir, m'assurant de plus en plus la continuation de l'affection qu'il a tousiours eue au seruice du Roy, & au bien de la France, & qu'il veut garder tant qu'il viura. Monsieur de Sillery a conféré avec moy des ouuestures que vous m'escriuez auoir esté faites pour gratifier ledit Seigneur Cardinal: en quoy ie luy assisteray, & le seruiray de tout ce qui me sera possible, suivant ce que le Roy me commande par vous.

Je me trouuay present quand Monsieur de Sillery bailla à Monsieur le Cardinal de Ioyeuse la lettre de la main du Roy, & qu'il fit l'office de viue vois de la part de sa Maïesté sur la resolution que Monsieur de Ioyeuse son frere auoit prise. Ce que mondit sieur le Cardinal de Ioyeuse prit à grande fueur & honneur, ayant au reste besoin de grande consolation, d'autant que comme ie vous ay prodir, il a porté ceste occurrence fort constamment, tant pour l'auoir preueu en partie, que pour estre ia accoustumé à telles pertes. Sa Maïesté a grande occasion d'auoir, comme vous m'escriuez que elle a, tout contentement de luy; car à la verité il ne respire que le seruice du Roy, & le bien & reputation de ses affaires & de la France, & outre que tout deuoir & sa propre gratitude l'y portent, la sollicitude & condition à laquelle il est reduit, & le mariage de Madame sa niepce, qui seule reste de leur maison, avec vn Prince du Sang, ne comportent point qu'ils ayent autre mire en comode que le seruice & contentement du Roy & de tout le Sang Royal, ny aussi que personne iuge autrement d'un personnage de si bon entendement, & qui cognoist tres-bien où gist son bien, profit, honneur, & reputation.

Au demourant, de tout ce qu'il vous a plu m'escrire touchant le différend du Marquisat de Saluzzes, il n'y a rien qui m'aye tant consolé, comme

que le Roy ait respondre au Secretaire de Monsieur de Sauoye, que sa Majesté n'entendra iamais à aucun accord, & n'entrera en aucun traité avec Monsieur de Sauoye qu'elle ne soit premièrement remise audit Marquisat. Mais sur ce qu'il vous plaist adjouster que vous n'estiez point d'avis que sa Majesté change de langage, du moins qu'elle n'y recognoisse vn tres-grand aduantage, ie vous supplie me permettre de vous dire, que comme ie suis assuré que sa Majesté fera toutes choses pour le mieux, aussi ne sçay-je voir de moy-mesme qu'il y puisse auoir aucun aduantage à faire autrement que comme il a dit, au moins pour la reputation, qui est celle qui plus aide à maintenir les Roys, & autres Princes, & tous les grands Estats. Auquel propos il me souuient d'un Senatus consultu ancien, qui fut fait du temps de l'Empereur Alexandre Seuerus, & dont il se parle en nos digestes, lequel portoit que si vn serf ou esclau s'en estoit fuy de son Maistre, que ledit Maistre ne le pouuoit vendre ny donner à personne, que premièrement il ne l'eust recouru véritablement & de fait. Que si le Senat Romain estima telles venditions & donations d'un simple esclau fugitif deshonnêtes & dommageables aux hommes particuliers, à qui conque ledit esclau fust vendu ou donné, que diroit le monde aujourd'hui, & tous les siècles à venir, si vn Roy de France, tel mesme-ment qu'est le nostre, qui a extorqué au Roy d'Espagne tout ce qu'il auoit pris sur la France apres qu'on auoit denoncé la guerre à sa Majesté Catholique cedit & transportoit en quelque façon que ce fust vn tel Estat que le Marquisat de Salusse à l'usurpateur, qui l'a pris par force sur le feu Roy & sur la couronne en pleine paix: & afin que l'affront & l'escorne en fust plus atroce lors que ledit feu Roy auoit assemblé les Estats généraux, & que toute la France estoit congregee ensemble, & qui depuis s'est comporté enuers le Roy & le Royaume en guerre & en trefue comme chacun sçait. Quand les droits du Roy & de la Couronne sur ledit Marquisat seroient douteux, encores ne faudroit-il par souffrir qu'un Duc de Sauoye triomphast des dépouilles de la France, & de l'honneur & reputation de sa Majesté & de la Couronne tres-Chrestienne, ny qu'il se vantast d'auoir relegué les François par delà les monts: & de leur auoir osté tout moyen de faire profit en Italie des occasions que le temps & la vicissitude des choses humaines peuuent apporter & de secourir le saint Siege & l'Eglise, & autres Princes & Republiques, comme ils ont fait plusieurs fois. Mais les droits du Roy sont aussi clairs comme le iour en plein midy, & tout ce qui est allegué par le Duc de Sauoye n'est qu'une sophisterie cauteleuse & malicieuse, qui n'a rien de juste & d'equitable. D'auantage, il aduient à telles fois que quelque bon droit qu'on aye, on est contraint de s'accommoder, pour n'auoir moyen de s'en faire raison: mais il ne pourra tomber en esprit d'homme, que le Roy qui a peu venir à bout de tant si puissans ennemis, lesquels s'estoient bandez contre luy dedans & dehors le France, & qui maintenant a son Royaume en paix dedans & dehors, & qui presque de rien a fait tout, ne puisse, à present qu'il n'a à faire qu'au Duc de Sauoye seul, auoir raison de luy, lequel n'a rien que ce que la France a rendu à son pere, & qui a tous ses païs & subiects ruynez & pas vn amy assuré qui en vne cause si iuste se vouldut precipiter pour luy sans il n'y a Prince en Italie qui ne fust marry que ceste usurpation luy de-

monstrast, & bien aise que son orgueil fust rabbatu, & luy rangé à la raison. Que s'il faut penser aux éuehemens de la guerre, comme ie suis d'adujs qu'on y pense, & desire qu'il n'en faille point venir là, il a encores plus d'occasion de les craindre que nous, & s'il a eü l'audace d'ostes à la Couronne de France le Marquisat, & presume encores auioird'huy de le retenir contre toute raison, pourquoy n'aurons-nous la hardiesse de reprendre le nostre, & recouurer nostre honneur. Et ne feroit rien à propos si quelqu'un vouloit dire que l'vsurpation se fist du temps du feu Roy, & non du Roy d'apresent, & que pour cela le Roy en pourra plus aisément composer; car outre qu'un Roy succede à l'autre & le represente, le tort est fait principalement à la Couronne, laquelle reside en la teste de celuy qui regne: aussi l'iniure ne consiste pas seulement en l'acte du ratijssement de la premiere vsurpation, ains beaucoup plus en la detention en laquelle le Duc de Sauoye s'obstine, & par ce moyen detenant un Estat qui est au Roy, il fait à sa Majesté vne iniure continuelle, & autant d'heures & de minutes qu'il detient ledit Marquisat, autant de fois il iniurie & braue le Roy Henry quatriesme Roy de France & de Nauarre. Par toutes les considerations susdites, si le Roy le laissoit aller à l'obstination & flatterie de cet vsurpateur, qui s'est monstré n'estimer pas vne nefle le Roy de France ny toute la France ensemble, & n'ostoit ce des-honneur & reproche du nom François, il décheroit de reputation, & penseroit-on que les actes glorieux & miraculeux qu'il a conduits à chef par cy deuant, fussent prouenus de quelque sien bon-heur particulier, plustost que de vraye vertu, valeur & resolution. Aussi au contraire s'il tient bon, & recourant ce qui est sien & de la Couronne il efface ceste note, & rend son honneur & reputation à la France, ce sera le comble de sa gloire enuers tous ceux qui viuent, & enuers toute la posterité, & particulièrement enuers ceste nation fort iudicieuse, qui est en expectation de ce que cecy deuendra & attend sa Maiesté à ce passage pour voir comme elle en sortira, & comme, ne luy restant plus rien à recouurer que ce Marquisat, elle se portera en ce dernier acte, & comme elle accomplira & couronnera le recouurement & affranchissement des appartenances & despendances de son Royaume de France. Mais ie me suis possible laissé transporter trop auant, dequoy neantmoins tant s'en faut que ie me repente, que ie vous prie me faire ceste faueur & honneur de lire cet article à sa Majesté.

Auquel article si i'ay esté trop long, l'importance de la chose m'excusera; comme sera aussi le silence que i'entends m'imposer desormais en laissant faire Monsieur l'Ambassadeur, la suffisance & vertu duquel vous estant cognu ie ne vous en dois rien; bien vous dois ietez-moigner qu'il reüssie merueilleusement bien par deçà au contentement de toute ceste Cour, & entre autres choses il y se fort honorablement des moyens que le Roy luy donne, de façon que sa Majesté en sera tres bien seruiue, non seulement au fonds & à la substance des affaires, mais aussi en ce qui dépend de l'apparence extérieure. Aussi me remets-je à luy de vous escrire dès à present s'il y a quelque occurrence digne de vous estre mandée: & me contenteray de vous aduertir d'une chose que sembler me conuenir; c'est que ie suis present au la Congregation du Concile le vingt deuxiesme d'Auail.

quand on y arresta que les priuileges de l'Hospital des *Quinze vingts* de Paris seroient confirmez, & aiday à faire que lesdits priuileges ne fussent si restraints comme quelques-vns vouloient & proposoient. A tant, &c. Monsieur, &c. De Rome, ce 2. May 1599.

## A V R O Y.

## CLXXIV.

S I R E,

L'ay receu par les mains de Monsieur de Sillery les deux lettres de la main de vostre Maiesté desquelles il vous a pleu m'honorer, l'une du treiziesme Ianuier sur les affaires dont vostre Maiesté l'a chargé, l'autre du septiesme d'Auril sur la dignité de Cardinal, à laquelle i'ay esté promu par la recommandation & seul respect de vostre Maiesté. Je ne sçay que respondre à tant d'honneur qu'il vous plaist me faire par le contenu de l'une & de l'autre desdites deux lettres, & feray mieux de reuerer avec vn modeste silence, & recognoistre avec toute gratitude & tres-fidel service vostre grande bonté & benignité, qui font que vous honorez vos bien-faisen vos creatures, que vous auez de rien esleues. Auant que i'eusse à vostre Maiesté les obligations particulieres que ie luy ay, i'ay tousiours estimé que la commune que vos subiets vous ont, suffiroit pour me faire faire pour le service de vostre Maiesté tout ce qui seroit en ma puissance: maintenant que ie suis obligé à vostre Maiesté plus que nul autre de vos subiets, desquels nul n'a esté esleué si haut de si bas, ie recognois que outre le deuoir commun de la fidelité, ie ne dois penser à autre chose apres Dieu, qu'à employer à vostre service tous les biens, & honneurs, & dignitez que ie tiens de vostre Maiesté, ce que ie feray, non seulement esdites affaires que Monsieur de Sillery apporte, mais aussi en tous autres tant que ie viuray, & la vie mesme s'il en estoit besoin.

Le Seigneur Dom Cesare d'Este m'a fait dire par le sieur Grilenzoné son Ambassadeur en ceste Cour, & réquerir d'escrire à vostre Maiesté que ce que il n'a point enuoyé vers elle apres la mort du Duc de Ferrare, n'a point esté par faute de respect & reuerence enuers vostre Maiesté, mais pour les maladies suruenues à ceux qu'il auoit destinez à ce voyage; qu'il desire continuer la deuotion que la maison d'Este a tousiours eue vers la Couronne de France, & vous est tres-humble & tres-deuot seruiteur, comme il vous fera entendre plus amplement par personnage exprés qu'il veut enuoyer vers vostre Maiesté. Je luy ay donné bonne esperance que vostre Maiesté accepteroit ses excuses & la bonne volonté, ayant estimé que i'en deuois user ainsi pour le bien de vostre service, qui me semblo requérir qu'on n'aliene & ne reiette rien, & qu'on recueille ceux qui se veulent remettre au bon chemin, & mesmement de la qualité dudit Seigneur Duc. Le reste que i'auois à faire sçauoir à vostre Maiesté sera en la lettre que i'ecris à Monsieur de Vill-

roy, partant ie ne feray ceste-cy plus longue, sinon pour prier Dieu, comme ie fais deuotement, qu'il vous donne, S I R E, &c. Dé Rome, ce troisieme May 1599.

A MONSIEVR DE VILLEROY.

CLXXV.

**M**ONSIEVR, Le Roy & vous m'avez tant honoré & obligé par vos lettres des 6. & 7. Avril, que i'en demeure confus en moy-mesme, & ne sçay que vous respondre: bien vous dirayie quant à la partie de la congratulation, que ie ne m'émerueille point si à la façon des excellens ouuriers le Roy & vous vous resiouissez de vos ouurages. Le Roy de sa grace m'a demandé au Pape, & vous le luy avez ainsi conseillé, & souuent ramentu, & tenu la main qu'il perseuerast en ceste sienne demande outre les frequentes despeschés que vous en avez faites en çà; encores apres que tout a esté fait & accomply, vous avez trouué vne sorte de conioyffance, par laquelle le Roy & vous n'obligez autant comme par la dignité mesme. Surquoy ie ne vous puis dire autre chose, sinon que pour le moins ie le sens & recognois, & de ce sentiment & recognoissance vous deuez attendre tout ce que ie sçauray & pourray iamais.

Monsieur de Sillery m'a communiqué la procuration passée à Vesson le 21. Mars, & vne lettre de mesme datte, surquoy ie luy ay dit mon aduis, & l'ay mesme redigé par escrit pour le vous enuoyer, comme i'eusse fait par cet ordinaire l'ayant tout prest, mais il a esté d'aduis que i'attendisse à le vous enuoyer par Baptiste Mancini qu'il veut vous despeschier dans peu de iours. Si cet affaire n'est bien enfourné du commencement il ne s'y fera rien.

Monsieur Carpentier cy-deuant President au Parlement de Bretagne, que i'ay cogneu il y a plus de 25. ans, m'a requis plusieurs fois depuis trois mois de le vous recommander. Ie me suis fort esmeruillé qu'un homme qui est cogneu de tant de Seigneurs en Cour, & mesme de Monsieur de Bellieure, me demande secours à moy qui suis loing, & qui ne puis sçauoir si bien pourquoy il est en peine. Cela a fait que i'ay différé de vous en escrire, mesme que i'ay quelque aduis que par l'impression de quelques siens escrits depuis l'absolution du Roy, il s'est mis luy-mesme en estat de ne pouuoir estre aidé ny par vous, ny par autres. Si ainsi est ie me tiens aux preceptes d'Hippocrate, qui veut qu'on ne cherche point d'appliquer des remedes aux maladies desesperées. Mais si la faute estoit commune & prouenant de vice du temps plus que de quelque malice & folie particuliere, ie remets à vostre discretion & bon iugement s'il se pourra & deura faire quelque chose pour luy. Tant y a que s'il se trouue digne de faueur, & qu'en ma consideration il vous plaise luy en departir, ie vous en rendray tres-humble seruice, &c. Monsieur, &c. De Rome, ce troisieme May 1599.

## A MONSIEVR DE VILLEROY.

CLXXVE

MONSIEVR, Il y a quelques iours que Monsieur le Cardinal de Loyeuse me communiqua vn grand besoin & necessité qu'il a de faire vn voyage en France, & encores que du commencement ie trouuaſſe eſtrange ce propos pource qu'il auoit tant demeuré à venir à Rome, & qu'il n'y auoit qu'environ trois mois qu'il y eſtoit arriué, & d'ailleurs, qu'il eſtoit icy grandement vtile pour le ſeruice du Roy & pour la réparation de la Couronne, ſi eſt-ee qu'apres auoir bien entendu & conſideré ſes raiſons, il me ſembla que la neceſſité y eſtoit telle, que i'ay eu grande compaſſion, & en ay encore mal au cœur, voyant vne ſi bonne & honorable maiſon preſte à eheoir à terre ſans eſperance de ſe pouuoir oncques releuer, & vn ſi bon Prelat, poſtant tiltre de Duc ſeculier: & de tant de dignitez Eccleſiaſtiques, ne pouuoir faire eſtat de rien pour ſ'entretenir conuenablement ſelon ſa dignité en quelque petit lieu que ce ſoit, tant ſ'en faut qu'à Rome. Ce qui la fait reſoudre d'en eſcrire au Roy & à vous par vn Gentilhomme expreſ, pour prier ſa Maieſté de luy permettre d'aller donner ordre à ſes affaires, ce qu'autre que luy ne peut faire; & vous de luy eſtre favorable à ceſte ſienne requête. Et ſur le deſir qu'il a monſtré que Monsieur de Sillery & moy vous en eſcrinions, i'ay eſtimé pour mā part vous deuoir teſmoigner, qu'il me ſemble qu'en ce danger de la cheute de ſa maiſon, & aux termes où il eſt de ne pouuoir d'icy à peu de temps diſpoſer d'vn ſeul eſcu de ſes reuenus, le Roy fera non ſeulement humainement, mais auſſi vtilement & honorablement de luy permettre d'aller eſtañonner & appuyer ſa maiſon, & aſſeurer les moyens de ſon entretenement, pour pouuoir puis apres ſeruir ſa Maieſté icy & ailleurs avec la decence & honneur qu'il conuient; & vous, Monsieur, ferez non ſeulement office d'amy enuers monditz ſieur le Cardinal mais auſſi de bon & fidelle ſeruiteur enuers le Roy, d'aider à obtenir ce congé. Auſſi bien d'icy à peu de temps qu'on luy aura fait ſaiſir tous ſes biens & reuenus en France, il ne ſçauroit plus ſubſiſter icy en aucune façon; & la force & neceſſité ſeroit d'elle-meſme apres quelque temps, & quand il n'y auroit plus de remede, ce que la bonté de Roy peut faire maintenant à temps que les choſes ne ſont pas encores déplorees, & que monditz ſieur le Cardinal pourra encores y remedier, & eſtablir tellement ſes affaires qu'il puiſſe puis apres auoir tranquillité d'eſprit, & avec honneur ſeruir ſa Maieſté toute ſa vie, comme il deſire, & ſ'y recognoiſtres-obligé. A tant, &c. Monsieur, &c. De Rome ce 24. May 1592.

## A MONSIEUR DE VIDLERoy.

CLXXVII.

**M**ONSIEUR, Vendredy au matin onzième iour de ce mois d'Avril en cette ville Valerio, & i'eus les lettres que le Roy & vous m'escrivez du vingt-huitième May, par lesquelles ie cogneus que vous n'avez point receu les lettres que ie vous escrivois depuis le troisième Mars, à sçavoir le vingt-troisième, vingt-cinquième, vingt huitième, vingt neuvième, trentième & dernier de Mars, & premier d'Avril, outre celle que ie vous escrivois puis après des vingt troisième, dix-septième, & quatorzième de May, que la brièveté de temps ne comportoit point que vous eussiez encores reçues. Le Roy me commande par la sienne de le servir en occasions pour lesquelles il a despesché ledit courier; sur quoy ie vous prie l'asseurer que ie le feray de toutes les forces de mon ame, suivant les obligations particulieres que ie luy ay, outre la generale que tous ses subjects luy ont Monsieur de Sillery m'a dit en termes généraux, que ces occasions sont deux; l'une la dissolution du mariage, l'autre le fait du Marquisat de Salusses. Quant à ce dernier, mondit sieur de Sillery m'ayant fait voir dernièrement la copie que l'Ambassadeur de Sauoye luy avoit baillée de leurs defenses contre la demande du Roy, ie dressay en langue Italienne la replique, & la baillay à mondit sieur de Sillery, pour s'en servir ainsi comme il luy sembleroit, & vous en enuoye à vous à present la traduction en François; par où vous verrez au moins la bonne volonté que i'ay d'y servir sa Majesté, outre l'affection que vous avez peu recognoistre que i'y apportois par plusieurs de mes despêches precedentes, & mesme n'agueres par celle du second May. Quant à l'autre & premier point, vous aurez veu par mes memoires que ie vous enuoyay dernièrement, outre ce que ie en avois escrit tant de fois auparavant, l'affection que i'y ay. Nous ne pouvons ny devons entamer cét affaire avec le Pape, que nous n'ayons response de vous ausdits memoires, au contenu desquels ie persiste encores de plus en plus. Monsieur le Cardinal de Loyeuse de son propre mouvement, apres avoir leu les lettres que le Roy luy a escrites, s'est offert de s'arrester icy pour y servir sa Majesté, nonobstant la necessité de ses affaires, & quand bien sa Majesté luy auroit accordé le congé de s'en aller en France, pour lequel demander il vous manda dernièrement un sien exprés, & ie vous assure que non seulement il voudra, mais aussi qu'il pourra grandement y servir le Roy & le public, & qu'attendu la qualité de l'affaire, & la nature du Pape, & les choses qui se sont passées en ces derniers troubles, le Pape croira plus en luy, qu'il ne fera à Monsieur l'Ambassadeur, ny à moy-mesme. Mais aussi ie croy que le Roy feroit un acte digne de sa generosité, & de la deuotion que mondit sieur le Cardinal a à son service, & qui auroit encore beaucoup d'équité en soy, s'il plaisoit à la Ma-



iesté luy faire main leuee des saisies que ses creanciers ont fait faire, & suspendre toutes executions sur ses biens, pendant que mondit sieur Cardinal sera retenu icy pour le seruice de sa Maiesté, en attendant qu'il puisse aller donner ordre à ses affaires, & appuyer sa maison, qui sans vne telle grace de sa Maiesté est en danger de cheoir à terre, sans esperance de la pouuoir oncques plus releuer. Outre ce que dessus, ie vous puis assseuer que ie n'ay oncques veu Monsieur le Cardinal de Ioyeuse plus affligé, ny plus indigné, que de ce que l'on abuse par delà de la pieté & facilité de son frere contre l'intention de sa Maiesté, & qu'il a apporté vne promptitude & ardeur merueilleuse, pour obtenir incontinent l'obedience pour son frere, qu'il vous enuoye par courrier exprez.

L'Abbé de S. Victor de Marseille, qui est Romain, de la maison de Frangipani, & parent de Madame la Marquise de Pisani, m'a dit qu'on luy a fait saisir les fructs de son Abbaye sous pretexte qu'il ne reside point, & m'a requis de vous en escrire en sa faueur, à ce que le Roy commande à son Procureur General au Parlement d'Aix qu'on ne luy donne point ceste vexation. Ie croy ce qui m'a esté dit, que ceste saisie ne procuient pas tant du zele que ceux qui l'ont procuree ayent au seruice de Dieu, comme de certaine enuie qu'on porte à ce Gentil-homme estrange d'une telle Abbaye, & de la connoissance d'icelle, & du dessein qu'on a de contraindre ledit Abbé à s'en desfaire, & en prendre la recompense si petite qu'on voudra. A la verité la residence seroit bonne en tous benefices; mais on tient en ceste Cour que les Commandataires qui ne sont plus proprement Abbez, ne sont point astraits à resider. Aussi estans seculiers comme ils sont, ils n'ont point la direction de la discipline Monastique, qui est laissée aux reguliers superieurs de l'Ordre, & ce Commandataire tient vn Vicairé en son Abbaye, pour y faire ce qui touche à luy; outre que l'Euesque de Marseille, qui est sur les lieux, prend garde que les reparations & autres devoirs à quoy ledit Commandataire est obligé, soient faits en temps & lieu, de façon que rien ne déperisse.

I'ay esté requis de vous escrire que Madame l'Admirale est tousiours détenuë en prison, & aussi maltraitée que iamais, & n'espere-t-on point que le Duc de Sauoye la mette iamais en liberté, si ce n'est par le moyen du mariage de sa fille; Qu'il ne souffrira iamais que ladite fille soit mariée sinon à quelque personnage qui luy soit confident, & qu'on se trompe de penser autrement, & qu'à la fin il en faudra venir là, ou bien ceste pauvre Damoiselle ne sera iamais mariée, ny sa mere deliurée; Que de ceux qui sont confidents au Duc, le plus tolerable de tous semble estre le sieur de Mauleô, qu'on dit estre de la maison d'Albon, de bonne & ancienne noblesse, & bien composé de corps & d'esprit; Qu'encore qu'il ne soit si grand seigneur comme il seroit à desirer, ce neantmoins cela seroit aucunement recompensé par plusieurs graces naturelles & acquises dont il est doüé, & parce que la fille a plus de vertus & de biens, que de beauté ny de santé, & par la deliurance de la mere & de ses biens qui s'en ensuiuroit, & par la preservation du danger qu'il y a que ceste pauvre Dame ne meure en prison, & qu'elle morte on ne marie la fille par force à quelqu'autre, avec lequel elle ne sera si bien, ou qu'on ne la face mourir elle mesme, pour auoir ses biens qu'on a à desuoyez par esperance; & en somme par ce que quand l'on ne peut faire com-

me l'on voudroit, il est honnesté & expedient de s'accorder à ce qui est le moins de mal, & sortir d'un mauvais passage en la façon la plus tolerable que faire se peut. Et pource qu'en quelque maniere que ce soit on ne veut & on ne doit rien faire sans la permission du Roy & de Monsieur le Connestable, on m'a requis de vous en escrire, afin que si vous estimez que la chose fust faisable, il vous plüst à vostre commodité en sçavoir l'intention du Roy & de Monsieur le Connestable. Ceux qui mettent cecy en auant sont Venitiens bien affectionnez à Madame l'Amirale & à Madame sa fille, qui se sont fort employez pour elles par cy deuant, & qui en ont compassion plus que iamais. Madame l'Amirale ne sçait encore rien de ce party, & pense-t'on qu'elle auroit besoin d'y estre exhortée plustost qu'autrement. Je m'en remets du tout à vostre bon iugement & discretion, comme aussi me remets-je de toutes choses de deçà à ce que vous en escrira Monsieur de Sillery, auquel ie dis ce que j'apprends de nouueau, pour en escrire ce qu'il iugera deuoir estre mandé. A tant &c. Monsieur, &c. De Rome, ce 15. Iuin 1599.

## A V R O Y.

## CLXXVIII.

SIRE,

La lettre qu'il pleut à vostre Majesté m'escrire le huitiesme May en response de celle que ie vous auois escrite le premier iour d'Auril pour Monsieur Serafin, me fut renduë le 19. de ce mois, & ce iour là mesme ie la monstray audit Sieur Serafin, qui s'en sentit grandement honoré, vous en remerciant en route humilité, & attendant les effects de vostre bonne volonté, pour vous continuer d'autant plus son tres-humble & tres fidelle seruice toute sa vie.

Celle qu'il pleut à vostre Maieité m'escrire le douziesme May par le Comte de l'Anguisciola, m'auoit esté renduë le quinziesme de ce mois, par laquelle vostre Maieité me declare la volonté qu'elle a que tous les Cardinaux François & ceux qui dépendent d'elle, affectionnent Monsieur le Cardinal Aldobrandin, & me commande de m'y accommoder, à quoy i'estois desia tres enclin de moy mesme, pour les mesmes causes qui ont induit vostre Majesté à me faire ce commandement. Je seruiray donc ledit Seigneur Cardinal tant plus volontiers d'ores en auant aux occasions qui s'en presenteront, & l'ayant esté trouuer expressément pour luy dire ceste intention de vostre Majesté, & ce qu'elle m'en auoit commandé à moy en mon particulier, il l'a pris à grande faueur & honneur, & pour vne obligation de vous en rendre seruice tant qu'il viura, & me l'a ainsi promis fort amplement, outre qu'il m'a dit le vouloir escrire à vostre Maieité, & vous en remercier par ses lettres.

K K k

Le dix-neufiesme de ce mois ie receus par le Gentil-homme de Monsieur le Cardinal de Joyeuse celle qu'il auoit pleu à vostre Majesté m'escrire le sepriesme, par laquelle i'ay veu la permission accordee audit Seigneur Cardinal d'aller faire par delà le voyage auquel la necessité de ses affairesle contrainst, & ce qu'il a pleu à vostre Majesté m'escrire à ce propos touchant la Vice-Protection en son absence quand il vsera de ladite permission, dont il est en doute, pour le seruice qu'il desire vous rendre en l'affaire pour lequel le courrier Valerio fut par vostre Majesté depesché en ça derniere-ment. Ie me conformeray en tout & par tout à ce que vostre Majesté me cōmande, & mesmement qu'outre la reuerence & obeyssance que ie dois à tous vos commandemens, cestuy-cy est tel, que ie l'eusse ainsi conseillé de moy-mesme audit sieur Cardinal, si vostre Majesté eust oublié de le commander.

Iay fait sçauoir à l'Ambassadeur du Duc de Modena la gratieuse responce qu'il a pleu à vostre Majesté me faire sur ce que ie vous auois escrit à sa requeste, dont il a esté tres-aïse, & en a rendu compte à son Maistre.

L'assistance que ie rends à Monsieur de Sillery en ce qui se presente, n'est qu'une biē petite partie du seruice que ie dois à vostre Majesté, pour laquelle quand ie mourrois, ie n'aurois atteint à la moindre partie des obligations que ie vous ay. Mais comme vostre Majesté par sa bonté se contente de ce peu que ie puis, aussi m'efforceray-ie toute ma vie de ne rien obmettre de ce que ie pourray pour vostre seruice.

Monsieur de Sillery m'a dit le bien & honneur qu'il a pleu à vostre Majesté me faire d'augmenter de deux mille escus par an la pension qu'il pleut à vostre Majesté m'ordonner l'annee passee; en quoy ie recognois de plus en plus la bonté & beneficence de vostre Majesté, qui m'ayant exalté à la dignité de Cardinal par dessus mon merite, a voulu me donner moyē de la soutenir, aussi la suppliai-ie de croire que la dignité, & la commodité & ornement dont il vous a pleu l'accroistre, & toute autre chose que i'auray iamais, & toutes les forces de mon ame, sont dediees à rendre à vostre Majesté la tres-humble gratitude, & le tres-fidelle seruice que ie vous dois.

A tant, &c. SIRE, &c. De Rome ce vingt-huitiesme Iuin mil cinq cens nonante-neuf.

A MONSIEUR DE VILLEROY.

CLXXIX.

**M**ONSIEUR, Par la derniere lettre que ie vous escriuis le dix-huitiesme de ce mois, ie respondis aux lettres du Roy & vostre du vingt-huitiesme May, que le courrier Valerio auoit apportees: depuis ie receus le mesme iour quinziesme de ce mois vne lettre du Roy du douziemes May par le Comte d'Anguisciola, qui auoit porté le bonnet de Monsieur

le Cardinal de Sourdis; & le dix-septiesme de ce mois ie receus vne lettre du Roy du huiſtiesme May touchant Monsieur Seraſin, & deux voſtres du neuſiesme de May. Je viens de reſpondre à celles du Roy par vne lettre à part, & par ceſte cy ie reſpondray aux voſtres en ce qui aura beſoin de reſponſe. Premierement donc, i'ay eſté fort aisé d'entendre par voſdites lettres que vous euſſiez receu les miennes, dont la voſtre du vingt huitiesme May m'auoit mis en grand doute. Je ſuis encores plus aisé de la bonne eſperance que vous me donnez de la publication du Concile de Trente avec le temps, qui ſera de ſi grande importance au ſeruice du Roy, outre le ſpirituel que ie ne voy point que ſa Maieſté puiſſe faire vne action plus vtile pour le bien de ſes affaires non ſeulement en ceſte Cour, mais ailleurs bien long. Je vous remercie bien humblement de ce qu'il vous a plu lire à ſa Maieſté ma lettre du ſecond de May, & particulièrement l'article qui concernoit le Marquisat de Saluſſes, par lequel il me ſemble que i'ay deſchargé ma conſcience ſur ce fait, quoy qu'on en face à l'aduenir.

Quant au fait qui vous empêche grandement, pour l'apprehenſion que vous auez des changemens que le temps y peut apporter, ie vous en croy trop, & recognois cela, comme en toutes autres chōſes, voſtre ſinguliere prudence & prenoyance, vous priant neantmoins de conſiderer que les moyens portez par la procuration ſont, quant au fait & à la preuve, autant on plus ſubiets à debat, que l'expedient qui vous a eſté enuoyé d'icy; outre qu'ils n'auroient aſſez de force pour obtenir icy ce que nous deſirons, là où ceſtuy-cy eſt le plus puiſſant & plus facile de tous les concluans. Et quand il faudroit ſubir le hazard d'entrer en lice avec les autres moyens ſans ceſtuy-cy, il faudroit bien rehausſer la force & la crainte faite à la Reyne pour luy faire eſpoſer le Roy, d'autre façō qu'on ne l'a iuſques icy articulée. Comme auſſi croy-ie qu'on pourroit trouuer des teſmoins en plus grand nombre, & qui depoſeroient plus volontiers & plus ample-ment de ladite force & crainte, que dudit expedient, duquel nous attendons ce que vous nous en manderez, pour puis apres y commencer au pluſtoſt, dont nous auons auant de deſir par deçà, comme vous par delà. Mais, comme vous ſçaez trop mieux, il importe plus de faire bien, que de faire toſt, & meſme en vn affaire tel que ceſtuy-cy, lequel s'il n'eſt bien commencé, ne pourroit bien finir, & eſt vn de ceux qui ſe gagnent ou ſe perdent dès le commencement. Je vous remercie bien humblement de la prouiſion du Conſulat de Gaëte qu'il vous a plu m'en- uoyer, laquelle i'ay baillée à Monsieur le Cardinal Parauicino, dont il a eſté fort aisé, eſtant pour vn ſien parent, & moy encore plus aisé que luy, pour la ioye que ie ſens quand i'ay fait plaisir à quelqu'un, & meſmement ſi la perſonne eſt pour en prendre quelque inclination au bien des affaires du Roy & de la France.

I'ay ſceu de Monsieur de Sillery comme depuis ma promotion il vous a plu me faire augmenter par le Roy la penſion qu'il vous plut me faire donner par ſa Maieſté l'annee paſſee; de façō que le tout montera à quatre mille quatre cens eſcus par an. Vous ne vous eſtes contenté de m'auoir procuré la dignité de Cardinal, mais y auez encore voulu faire adjoûter la dot & l'entretien; qui eſt toujours de plus me faire recevoir les

fruiſſes de voſtre genereuſe & conſtante affection, à laquelle ie dois tout ce que i'ay de bien & d'honneur en ce monde: ce que ie recognoiſtray auſſi toute ma vie de cœur & de bouche, & par tous les ſeruiſſes que ie pourray iamaix rendre à vous & aux voſtres. A tant, &c. Monsieur, &c. De Rome, ce 28. Iuin 1599.

## A MONSIEVR DE VILLEROY.

## CLXXX.

**M**onsieur, Comme depuis la venuë de Monsieur de Silſery ie me ſuis remis à luy de vous tenir aduertiy de toutes choſes de deçà; auſſi ne dois-ie obmettre de vous eſcrire quelquesfois, quand il y a quelque choſe de ma' cognoiſſance particuliere, & de mon fait, comme ſera ceſtuy-cy. Le iour que Valerio partit d'icy pour aller vers vous, qui fuſt vn leudy premier iour de ce mois, le Pape appella à ſoy huit Cardinaux, quatre Auditeurs de Rote, & deux Penitenciers de ſainct Pierre, Ieſuites. Les Huit Cardinaux furent, Aſcoli, Borgueſe, Bianchetto, Mantica, Ar-rigone, Viſconte, d'Oſſar, & Bellarminio; les quatre Auditeurs de Rote; Serafino, Pamphilio, Pegna, & Mellino; les deux Penitenciers; Iuſtiniano, & vn autre, du nom duquel ie ne me ſouuiens point, Quand nous fuſmes arriuez en ſa preſence, il nous diſt qu'il nous auoit appelez pour vn fait d'importance, qui eſtoit la diſſolution du mariage du Prince Sigismond de Tranſilyuanie & de l'Archiduchefſe Marie d'Autriche, dont il auoit eſté requis, pour autant que ledit mariage n'auoit point eſté conſommé, & n'y auoit eſperance qu'il ſe peuſt iamaix conſommer. Qu'il vouloit y proceder avec toute iuſtification, & n'y faire rien dont il ne peuſt rendre raiſon à Dieu & aux hommes; & pour cela il nous prioit, car ainſi parloit-il, de voir les lettres & eſcritures qui luy en auoient eſté enuoyees, & bien conſiderer le tout chacun à part, & puis nous aſſembler tous enſemble, & aduiſer ce que nous aurions à luy en conſeiller, & bailla les pieces au Cardinal d'Aſcoli le plus ancien de la compagnie, & apres quelques autres propos tenus ſur ce ſubiet, il nous licentia: & ie m'en retour-nay à mon logis avec opinion que ſa Saincteté auoit fait ceſte congrega-tion ſi nombreuſe, & procedoit en ce fait ſi ſolemnellement tant plus volon-tiers, pource qu'il s'attendoit que dans peu de temps on-luy feroit ſem-blable requête de la part du Roy, & qu'il nous vouloit monſtrer au fait d'autrui comme il procederoit au noſtre, & m'auoit mis expreſſément moy de ceſte congregation, non ſeulement pour en dire mon aduis comme vn des autres Cardinaux, mais afin que i'en viſſe toute la procedure, & peuſſe teſmoigner de ce qui ſ'y ſeroit paſſé, & comme on n'y ſeroit point d'au-cune nouuelle rigueur au fait du Roy, quand il ſeroit propoſé à ſa Saincté. Ledit ſieur Cardinal d'Aſcoli fiſt faire des copies deſdites eſcritures,

qui n'estoient gueres longues, & en enuoya à chacun de nous, en nous faisant à sçauoir, que le Mardy ensuiuant sixiesme de ce mois la congregation se tiendrait chez luy. Lequel iour venu, nous nous trouuâmes tous quatorze en son logis, où fust premierement mis en deliberation; s'il y auoit moyen de proceder à ceste dissolution de mariage par voye de iustice & de declaratoire, en declarant le mariage nul, ou bien s'il estoit besoin de prendre la voye de graces & de dispense, en dispensant les parties, & les remettant en leur premiere liberté, en laquelle ils estoient auant que contracter leur mariage de parole de present. Et fut resolu quant à ce, qu'il n'y auoit point de moyen de paruenir à ladite dissolution par voye de iustice & de declaratoire, d'autant que nous ne sçauions si la cause qui auoit empesché la consommation de ce mariage, estoit vne impuissance naturelle de ce Prince là ou quelque enforcellement; ny si cét empeschement estoit suruenu après le mariage contracté, ou s'il l'auoit precedé, ny si le mesme empeschement estoit incurable ou guerissable, ny s'il estoit general à tous sortes de femmes, ou special pour le regard des filles pucelles seulement, comme quelques-vns auoient voulu dire. Et qui plus est, il n'y auoit moyen de nous esclaircir de ces doutes à l'aduenir, par les moyens que l'Eglise a ordonnez, comme par cohabitation & experience de trois ans, & autres, d'autant que ledit Prince s'estoit obstiné à ne vouloir plus cohabiter avec ladite Princesse, qu'elle s'en estoit ja retournée chez ses parens. Ceste resolution estant ainsi par nous prise, nous commençâmes à traiter de l'autre voye à sçauoir de la dispense; sur quoy se presenterent trois difficultez. La premiere & la plus grande; si par les escritures qui auoient esté produites il estoit suffisamment prouué, que le mariage n'eust point esté consommé, La seconde; posé que le mariage n'eust point esté consommé, si le Pape pouuoit dispenser sur vn mariage bon & valable, non toutesfois consommé. La troisieme; posé que le Pape püst dispenser s'il denoit dispenser en ce cas, c'est à dire s'il y auoit causes iustes & raisonnables pour octroyer la dispense. Quant à la premiere difficulté, il y auoit vn acte de la part du Prince, & vn autre de la part de la princesse, dattéz d'Alba Iulia le sixiesme d'April dernier, par lesquels chacun d'eux à part attestoient & iuroient en presence du Cardinal Battori & d'autres tesmoins, que leur mariage n'auoit iamais esté consommé, & qu'ils se disoient le dernier adieu pour ne plus cohabiter ensemble. Au pied de chacun de ces deux actes, il y auoit vne attestation du dit Cardinal Battori avec autres tesmoins, à sçauoir trois autres tesmoins en l'affaire du Prince, & quatre en l'affaire de la Princesse, qui attestoient & affermoient estre tellement asseurez que ledit mariage n'auoit point esté consumé, que par aucun indice humain ils ne peuuent le reuoker en doute. Entre ces tesmoins il y auoit les Confesseurs du Prince & de la Princesse; & du costé de la Princesse, auoit encore deux Dames de la chambre, les plus priees & les proches de sa personne. Et d'autant que bien souuent les preuues sont incertaines, il sembla à vne partie de nous, entre l'esquels j'estois, qu'on se pourroit contenter de ces preuues. D'autres ne s'en contentoient point, pource qu'il n'estoit point porté par lesdits actes que ledit Battori & les autres tesmoins eussent iuré, ne s'y faisant mention que du serment du

Prince & de la Princesse seulemēt, & eussent voulu qu'il y eust sept tēmoins de chaque costé, qui eussent iuré qu'ils croyoient que ledit mariage n'auoit point esté consumé; où ie vis vser de grandes rigueurs par de ceux mesmes qui font profession d'estre fort seruiteurs de la maison d'Autriche, & pensay bien que tout ce que nous mettrions en auant quand nous proposerions nostre fait, seroit bien criblé, & qu'il ne nous y faudroit rien oublier. Quant aux deux autres questions, nous nous trouuāsmes tous d'accord; à sçauoir quant à la seconde, que iāçoit que le Pape ne puisse dispenser en vn mariage valable & consumé, si est-ce qu'il peut dispenser en vn mariage valable non consommé. Et quant à la troisieme, il y auoit assez de causes iustes & legitimes pour dispenser au fait dont il est question. La conclusion fut, que si les parties se contentoient d'auoir la dispense en forme de commission; que le Pape dès à present leur pouuoit deliurer son rescrit adressant à son Nonce, ou à quelque Euesque ou Archeuesque sur les lieux, pour informer plus pleinement sur la non-consummation dudit mariage, & trouuant qu'il fut suffisamment prouué que ledit mariage n'eust point esté consommé, il dispensast les parties par autorité Apostolique que la Saincteté luy donnoit: mais si les parties vouloient la dispense en forme gratuite, la Saincteté deuoit premierement enuoyer, & faire ouyr moyennant serment les tēmoins qui auoient desia attesté, & d'autres encore le plus qu'on pourra trouuer, & l'information rapportee par deçà, se trouuant bien verifié leur mariage n'estre point consommé, la Saincteté donneroit alors la dispense en forme gratuite. En somme, soit d'une façon ou d'autre, ledit mariage sera dissout auant qu'il soit trois mois d'icy, & cela vaut autant comme dépesché. Il fust parlé de faire visiter la Princesse par des sages femmes & autre matrones, mais on ne s'arresta point à cela, parce qu'il fust sceu que ladite Princesse ne souffriroit aisément d'estre visitée. Et vous ay bien voulu rendre compte de ce que dessus, pource que nous aurons bien tost à entrer en vne poursuite semblable, & pour vous donner à coniecturer quel il y deura faire.

Monsieur de Sillery depuis trois iours me requist de dresser le memoire que nous auons à donner au Pape, quand vous nous auriez enuoyé la resolution sur l'expedient que Baptiste Mancini vous apporta d'icy. Ie le dressay en Latin, & le luy ay baillé de le retenir que vous verrez par la copie que ie vous en enuoye avec vne traduction en François. I'y ay compris briuelement tous les points dont nous auons à nous aider, me reseruant à discourir plus amplement sur chacun par autre escrit à part s'il en sera besoin. I'y ay mesmes employé ledit expedient, esperant que vous enuoyerez toutes bonnes nouuelles. Que s'il estoit autrement, nous en serions quittes en ostant cet article là. Ie desirerois bien que vous nous en puissiez assurer; car à tout le reste, quelque bien agencé que vous le trouuiez, il y a quelques responses que ie sçay bien en moy-mesme. En tout euenement, l'ay articulé la force & la crainte en la façon qu'il la falloir, car autrement elle ne seroit suffisante, & mesmement si ledit expedient nous defailloit; auquel cas il faudroit bien que vous vous disposassiez par delà de prouuer ladite force & crainte toute telle que ie l'ay touchée. Monsieur de Sillery dit qu'ayant sondé le Pape il y a trouué toute bonne disposition, laquelle i'y presump-

aussi de mon costé: mais le Pape pour sa décharge en chose de grande importance, & qui a à faire aux yeux de toute la Chrestienté, voudra faire voir & examiner l'affaire par d'autres, qui passeront letout par l'estamine, ou pour mieux dire par le feu; & ne fera rien contre l'aduis qui luy sera donné par eux.

Le sieur Vlysse Gallo qui exerçoit icy par cy deuant l'office du Consul pour la nation Françoisse, estant decédé, plusieurs se sont recommandez pour l'auoir, de tous lesquels le plus propre pour nous a semblé estre le sieur Leonardo Pomaro, pour estre personne plus intelligente en telles matieres, & autres plus grandes, & descendant de François, & merueilleusement affectionné à la France, comme i'ay veu qu'il l'a tousiours monstré par deçà aux temps plus calamiteux non sans quelque danger: de façon que s'il vous plaist luy faire le bien & honneur, outre la consolation qu'il receura de ceste gratification, les autres de ce pays qui nous veulent bien, demeureront tant mieux edifiez de nous, & nous-en aymeront d'autant plus, & s'affectionneront d'auantage à ce qui nous attouchera.

Depuis auoir escrit ce que dessus, l'Ambassadeur de Monsieur le Duc de Modena est venu vers moy, & m'a dit qu'il auoit escrit à son Maistre ce que ie luy auois dit dernièrement de la gracieuse réponse que sa Maiesté auoit faite touchant luy, dont son Altesse estoit demeuree fort consolee, & estoit sur le point de dépescher vn sien gentil-homme vers sa Maiesté. A tant, &c. Monsieur, &c. De Rome ce 14. Iuillet.

## A MONSIEVR DE VILLEROY.

CLXXXI.

**M**ONSIEVR, le vous escriuis le quatorziesme de cemois de ce qui s'estoit passé icy touchant l'instance que faisoient le Prince Sigismond de Trassylvanie & l'Archiduchesse Marie d'Autriche, pour la dissolution de leur mariage, à la dispute & conclusion duquel affaire i'auois esté present. Depuis i'ay scéu que ceux qui sollicitoient cét affaire aymét mieux prendre dès à present la dispense en forme de commission, que d'enuoyer faire l'enqueste sur les lieux, & la faire rapporter icy, pour auoir puis apres la dispense de forme gratuite, qu'on appelle; & ont bien fait à mon aduis: car outre qu'ils auront plus à retourner, ny à faire rien icy pour ce regard, & par ce moyen la chose en sera faite, d'autant plustost les choses se passeront encore par delà avec moins de rigueur que n'eussent fait icy. Et outre l'inclination que i'auois desia que nous en fissions de mesme quand nous en serions-là, cét exemple de personnes bien conseillées m'y a confirmé d'auantage.

Depuis arriua icy Baptiste Mancini le 17. de ce mois avec lettres du Roy & vostres des 4. & 5. par lesquelles nous auons esté esclaireis qu'il ne se falloit point arrester à l'expedient dont vous auoit esté escrit d'icy par le mesme Baptiste; aussi ne nous y arretons nous point: & comme cy deuant i'ay desiré quelque chose de plus cōcluant & assuré, aussi vos lettres venues, i'ay esté



d'aduis qu'on y commençast tout incontinent avec ce que nous auions, & qu'on ne laissast de bien esperer, & si la goutte ne fust suruenue au Pape, nous y aurions ia commencé, & en serions bien auant, comme vous escrira plus amplement Monsieur de Sillery. Aussi auons nous toutes choses en or dre, ainsi que vous aurez veu par le memoire que i'auois dressé en Latin, & baillé à mondit sieur de Sillery, dont ie vous enuoyay copie & la traduction en François par le precedent ordinaire; auquel memoire n'a fallu que rayer l'article qui contenoit le moyen dont nous attendions vostre response, que ledit Mancini nous a portee. Monsieur le Cardinal de Ioyeuse nous y aidera grandement, y apportant de l'ardeur beaucoup, & de l'entendement & prudence, & de l'autorité & credit enuers le Pape, & mesme pour les choses qui consistent en fait, & pour la consequence des biens qui sont pour aduenir de la concessiõ de ceste grace, & des grands maux qui arriueroyent du refus; aussi auons nous aduisé que ce seroit luy principalement qui ioueroit ce roler, ç'a esté bien fait d'attendre à le soulager par delà, pendant qu'il sert icy le Roy & la France; & en attendant qu'il puisse aller donner ordre à ses affaires, apres auoir aidé icy à faire celles de sa Majesté: & c'est tousiours matiere de vous faire priser & louer de plus en plus, de ce que vous voulez fauoriser & aider à vne si bonne œuvre, comme vous estes tenu près le Roy pour le principal instrument, & moyen de toutes choses louables.

Aussi vous remerciay-ie tres-affectueusement & humblement de ce qu'il vous a pleu faire pour le sieur Frangipani Abbé de saint Victor de Marseille, auquel i'ay dit le bien & honneur que le Roy & vous luy faites, & luy ay baillé le duplicata des lettres que sa Majesté a escrites à Monsieur du Vair premier President, & à l'Aduocat de sa Majesté au Parlement de Prouence, avec vne copie en François, & vne autre en Italien que ie luy en ay fait faire. Il en loue sa Majesté & vous avec toute sa maison, qui est vne des plus nobles & honorables de Rome, & de tout temps affectionnee à nos Rois, & à toute la nation François.

Quant à ce qui touche Madame l'Admirale & sa fille, quant l'ouuerture en seroit venue de moy-mesme, & que ce seroit chose qui ie sçeuße, ie m'en tiendrois tousiours à ce que vous en iugeriez, tant plus donc à chose que ie ne sçay point, & que ie vous ay escrite au rapport & instance d'autrui: de façon que i'ay encores à vous remercier, comme ie fais bien humblement, de la response qu'il vous a pleu m'y faire. Lundy 19. de ce mois fut Consistoire: les Cardinaux nouueaux ont accoustumé en telles occasiõs de Consistoires & des Chappelles d'aller à l'anti-chambre du Pape attendre que sa Sainteté sorte, & l'accompagner en bas. I'y fus ce matin là des premiers, & servis sa Sainteté de l'Euangile & de la paix à la Messe qu'il ouït, pour ne l'auoir peu dire à cause qu'il auoit la goutte à vne main, car autrement il a accoustumé de la dire tous les iours. Quand il fust retiré en sa chambre apres la Messe, & auant que sortir pour descendre à la salle où se tient le Consistoire, il me fit appeler de sa chambre, & m'ayant demandé comment ie me portois, ie luy respondis que ie me portois bien grâces à Dieu, & que i'estois bien meruy de luy voir vn bras en escharpe, & d'auoir d'ailleurs entendu qu'il auoit la goutte. Il me repliqua qu'il n'auoit reposé toute la nuit & precedente nō plus qu'une

qu'une ame d'amee; & puis il adiousta, c'est vous autres qui me voulez tuer, me faisant estudier durant ces grandes chaleurs. Je luy disqu'il se disoit voirement par tout Rome que depuis quelques iours sa Saincteté estudioit tout lelong du iour en l'affaire du Marquisat de Salusses, mais ie le suppliois tres-humblement de me pardonner si ie luy osois dire que cela ne couuenoit point ny à sa dignité, ny à son aage, ny à la saison de l'annee, & moins estoit il encores desiré du Roy, qui estimoit plus la vie & la santé de sa Saincteté, que tous les Marquisats du monde. Ouy, dit-il, mais on m'a baillé le terme si court, & ie ne voudrois point qu'à faute de pronocer on retournast en guerre, & puis qu'on m'en donnast la coulpe. Alors i'estimay ne deuoir demeurer court, en vn propos où il couchoit de sa santé & de sa vie, m'estendant en chose qui n'obligeoit personne. Je le suppliy de penser seulement à conseruer sa santé, & d'attendre tout respect & reuerence, & toute commodité du Roy, qui ne feroit iamais chose contre l'intention de sa Saincteté, si sa Maiesté n'y estoit forcee elle mesme la premiere. Il me dit sur cela, qu'il auoit dit à Monsieur l'Ambassadeur qu'il vouloit pronocer, & qu'il prononceroit si on luy donnoit temps, & feroit encores que le Roy d'Espagne passeroit par ce qu'il en auroit dit, mais qu'avec les chaleurs & le mal qui luy estoit suruenü; & ainsi il s'arresta tout court sans achener. Je ne pensay deuoir adiouster rien non plus; & comme nous eusmes demeuré vn peu de temps sans rien dire il demanda s'il estoit temps d'aller au Cōfistoir. Je luy respondis qu'il estoit onze heures & demie, qui pourroient estre à sept heures du matin à la façon de France, & partys pour sortir de l'antichambre, & il sortit incontinent. Je fus dire tout cecy le mesme iour à Monsieur de Silbery, qui me dit que le Pape luy en auoit dit autant le Vendredy auparauant, & encores cecy de plus, qu'il escriuist au Roy pour obtenir encores prolongation de terme du compromis. Nous conuenions en cecy Monsieur de Silbery & moy, que sa Saincteté auoit grande enuie de nous faire passer par dessus le possesseur, & nous tirer au petitoire, dequoy nous auons plusieurs autres coniectures: mais nous ne sommes point d'auis de nous y laisser aller, & pour mon regard ie n'y consentirois iamais; nous estans si bien fondez au possesseur. Que si le Pape prononçoit contre nous, en disant qu'il n'y a point de lieu de restituer la possession au Roy auant qu'auoir cogneu du petitoire, nous ne pourrions plus rien esperer de bon de sa Saincteté au petitoire, auquel il fait tousiours plus obscur, & y a plus de moyé de broüiller & de troubler les choses, & les esprits des Iuges; ioint que nous auons à faire à des esprits les plus broüillons qui soient sur la terre.

Ce que sa Saincteté assure si fort à present qu'il veut pronocer, peutuenir de ce que par ce moyen il pense plus aisément obtenir ladicte prolongation: de ce aussi que Monsieur le Nonce & Monsieur le Patriarche luy peuuent auoir escrit de la Cour, qu'on y a opinion que sa Saincteté ne vueille point pronocer, mais tirer les choses en longueur le plus que faire se pourra, qui est encores l'opinion de tout Rome. Et de fait, quoy qu'il dise, il sçait bien ne pouuoir pronocer iugement en ceste cause, sans faire vn grand desplaisir à vn des deux les plus grands & les plus puissans partis qui soient en la Chrestienté, à sçauoir celuy de France & celuy d'Espagne, & faut tenir pour chose toute certaine, qu'il ne veut encourir l'inimitié de l'un ny de l'autre.

Cela me fait quelques fois venir en pensément, iacôit qu'il ne puisse faire de moins que de complaire à Monsieur de Sauoye, & autres qui le pressent de faire prolonger ledit compromis, que toutes fois il ne seroit possible pas trop marry quand le Roy ne le prolongeroit plus, pourueu que sa Majesté ne fust point si tost la guerre, & luy donnaist temps de moyenner quelque accord à l'amiable sans autre sentence. Et pourroit estre aussi qu'en ce bruit qui a couru par Rome d'un si grand estude du Pape, & de la goutte qui luy en soit venuë, il y eust vn peu d'industrie, pour donner à entendre au monde qu'il veut prononcer, & qu'il l'eust fait dans le temps de la prolongatiõ, si ce mal & le danger de pis ne luy fust suruenü, & ne l'eust fait desister de ceste entreprise par force, & de ceste façon laisser couler ce peu de temps qui reste, & qui est aussi le plus chaud de l'annee, & ainsi de se lauer les mains de cét affaire, sansy laisser de sa reputatiõ. Quoy qu'il soit decela, il n'y a point de doute que si le Roy pouuoit refuser la prolongation & se mettre en liberté de ce compromis avec le gré du Pape, ce seroit vn grand aduantage pour sa Majesté, & vn grand moyen de faire condescendre sa Sainteté & Monsieur de Sauoye, & les Espagnols mesmes, quasi à tout ce que sa Majesté voudroit pour le regard dudit Marquisat, & possible encores d'autres choses: & croy qu'il ne seroit mal-aisé de retenir la bonne grace du Pape, en disant qu'on ne refuse point la prolongation pour aucune des fiance de la iustice de sa Sainteté, mais pour deliurer sa Sainteté mesme de la peine & fascherie qu'elle en prend, & pour rabattre vn peu de l'obstination de Monsieur de Sauoye, qui ose bien dire qu'il ne se sent pas assez sage pour obeyr à la sentence du Pape, quand elle seroit donnee contre luy, & pour le faire venir plus facilement à la raison, & le rendre plus docile & respectueux aux bõs records de sa Sainteté; & sur tout en assurant sadite Sainteté, que sa Majesté ne remueroit rien par armes pour autant de temps que sa Sainteté demanderoit la prolongation du compromis, ce que le Roy pourroit promettre d'autant plus facilement qu'il ne pourroit meshuy faire grande chose par la voye des armes auant le Prin-temps prochain. Monsieur de Sillery m'a fait bonnes ces raisons autre-fois, comme aussi vne autre dont il n'estoit point d'auis du commencement; assauoir que s'il y auoit à se traitter d'accord, comme quand Monsieur de Sauoye rendra le Marquisat il faudra tousiours venir à quelques conditions, il seroit meilleur que ledit accord se traittast & se conclust près le Roy, plustost qu'icy près du Pape, comme estant de ceste façon plus honorable, & plus profitable pour sa Majesté. L'honneur & reputation sera plus grande, en ce que Monsieur de Sauoye enuoyera prendre les cõditions du Roy, cõme il appartient, que non pas si le Pape les donne à sa Majesté & à son Altesse, comme à deux pairs & compagnons. Le profit sera, en ce que les conditions seront tousiours plus aduantageuses pour le Roy quand il les donnera, que non pas si ces gens les receuoient icy du Pape; & sera bien plus aisé à sa Majesté & à son Conseil de se defendre du Nonce & du Patriarche par delà, que non pas à Monsieur de Sillery de se defendre par deçà du Pape mesme pour la reuerence, autorité, & instâce duquel, parlant & traittant en personne, & aidé sous main de plusieurs Cardinaux, il sera en certaine façon contraint d'accorder des choses que le Roy & son Conseil n'accorderoient point à son Nonce ny au Patriarche.

Par ces propos d'accord, ie n'entends reuoker rien de ce que ie vous es-  
criuis par ma lettre du deuxiesme May, suiuant laquelle ie suis tousiours  
d'auis, en tant que i'en puis iuger (me submettant tousiours à ceux qui en  
sçauent plus) qu'il ne se peut faire aucun accord, sinon qu'en recourant le  
Marquisat; auquel cas le Roy pourroit pour le contentement du Pape &  
de toute l'Italie accorder, comme il a esté dit cy deuant, qu'il n'y mettra  
Gouuerneur ny garnison qui ne soient Catholiques; & pour le contente-  
ment de Monsieur de Sauoye, que sa Maesté y pouruoirra d'un bon Gou-  
uerneur fidele à sa Majesté, mais non ennemy ny suspect de Monsieur de  
Sauoye, & telles autres choses qui ne preiudicient à la pleine & entiere Sei-  
gneurie & puissance de sa Majesté, & peuuent aider aucunement à faire en-  
gloutir telle fascherie qu'il a à contre cœur, & ne la peut aualer volontiers.  
Mais ie m'oublie de mon discours qui s'est glissé de soy-mesme par l'occa-  
sion que le Pape m'en auoit donnée, & par le deuoir que j'auois de rendre  
compte au Roy par vous de ce que sa Sainteté m'auoit dit & commandé.  
A la lettre du Roy qui me commande de m'employer viuement en l'affaire  
pour lequel il a depesché ledit Baptiste, n'eschoit autre responce sinon que  
i'obeiray & seruiray sa Majesté en cela & en toutes autres choses toute ma  
vie. Atant &c. Monsieur, &c. De Rome ce vingt septiesme Iuillet mil cinq  
cens nonante neuf.

## A MONSIEVR DE VILLEROY.

CLXX XII.

**M**ONSIEVR, Ierecens par Valerio le sixiesme de ce mois les let-  
tres du Roy & la vostre escrites à Orléas le vingt quatriesme Iuillet.  
Nous auons ia commencé l'affaire qui est le plus recommandé en l'une &  
l'autre. Monsieur de Sillery en parla formellement au Pape le Mercredy  
vingt-huictiesme Iuillet, & luy bailla entre autres pieces le memoire en La-  
tin, dont ie vous enuoyay copie, duquel nous auons osté l'article qui con-  
cernoit l'expedient dont il vous auoit esté escrit par Baptiste Mancini. Mo-  
sieur le Cardinal de Ioyeuse fut à l'audience pour ce mesme fait deux iours  
apres, à sçauoir le Vendredy trentiesme de Iuillet, & moy ie fus appelé par  
le Pape pour cela mesme autres deux iours apres. Ils vous escriront tous  
deux ce qui se passa en leurs audiéces, mais moy ie suis contraint de differer  
à autre fois, & vous diray seulement que le Pape m'ayant dit la bonne in-  
clination qu'il vous portoit en cét affaire, & le desir qu'il auoit d'y estre aidé  
par nous, me fit plusieurs autres interrogations tant sur le fait que sur le  
droit, & apres que ie luy eus respondu ce que Dieu m'inspira pour le mieux,  
il me commanda de dresser vne escriture en droit, ce que ie fis, & l'ayant  
conferee avec Monsieur le Cardinal de Ioyeuse & Monsieur de Sillery, mo-  
dit sieur de Sillery la porta au Pape le Vendredy sixiesme iour de ce mois,  
qui fut la seconde audience qu'il eust sur ce fait. Et sadite Sainteté ayans

veu & considéré ladite escriture, m'envoya querir pour la seconde fois avant-hier, & m'ayant fait quelque difficulté sur icelle, & ouy mes réponses, il me bailla vne autre escriture, qui luy avoit esté baillée par quelqu'un à qui il se conseilla sur ceste affaire, à laquelle escriture ie respondis maintenant, & la réponse en sera faite pour demain qu'il ira à l'audience. Cela est cause que ie ne puis vous rendre compte de toutes choses au long; car ceste sorte d'escriture en droit requiert qu'on voye vne grande quantité de liures, & y a vne grande quantité de temps à trouver & mettre les mariées ensemble, & puis à les ranger & dresser. Cependant vous voyez comme nous avons mis les deux mains à cét affaire; & qu'il ne s'y perd point de temps. Je vous enuoyerois copie de la premiere escriture en droit, mais puis qu'il en faut encorès faire d'autres, j'attendray à vous enuoyer le tout ensemble.

Estant en cét endroit de ceste lettre, voicy vn estaffier du Pape qui me vient dire que sa Sainteté me veut parler à vingt trois heures, & il en est à present vingt vne. l'estime qu'il veut encore me parler de cét affaire, & vous en mettray quelque chose au pied de cette lettre quand ie seray de retour. Cependant ie ne puis celer le déplaisir que j'ay de la nouveauté qui a esté faite par delà, touchant le fait du Marquisat de Salusses, pour ce sequestre qui a esté accordé & offert au Patriarche de Constantinople, lequel semble estre quelque chose pour nous en apparence, mais en effet i'y recognois plusieurs maux dont nous auons discoursu Monsieur le Cardinal de Joyeuse, Monsieur de Sillery & moy. Premièrement, le Roy renonce tacitement au possessoire, qui estoit le plus seur & le plus clair de ses droicts, dont il ne falloit iamais se departir; en quoy il se fait vn preiudice inestimable. Secondement, quand bien Monsieur de Sauoye subira de bonne foy le sequestre, en souffrant que tous les gens de guerre qu'il a mis au Marquisat en soient ostez, le Marquisat sera entre les mains du Pape pour autant de tēps qu'il luy plaira, desquelles ne sera si facile de le r'auoir comme de celles de Monsieur de Sauoye; d'autant que le Roy, quand il en faudroit venir là, ne commencera pas la guerre si facilement contre vn Pape & contre le S. Siege, comme il feroit contre Sauoye & Piemont. Et ceste consideration peut encores empirer si le Pape vient à mourir, & qu'il luy succede quelqu'un qui ait plus d'inclination à l'Espagne qu'à la France, comme il peut aduenir. En troisieme lieu, le Roy tient vne grande partie de la Bresse, & se pourroit seruir des places & forces qu'il y a pour prendre par surprise ou par siege la ville & Citadelle de Bourg, là où apres ce sequestre il n'y tiendra plus rien, & s'il en veut quelque chose, il faudra qu'il l'oste au Pape & au saint Siege, auant que de pouuoir toucher à ce que Monsieur de Sauoye en tient. En quatrieme lieu, il faudra que sa Majesté se surcharge de despens, pour entretenir au moins vne grande partie des garnisons dudit Marquisat, que Monsieur de Sauoye ne vouldra plus payer, & le Pape encore moins; & ainsi Monsieur de Sauoye qui se consumoit en frais & en soing, pour le soupçon perpetuel auquel il estoit du Roy, & des habitans mesmes dudit Marquisat sera soulagé d'autant de despense & de soucy. Mais ce qui me fait porter cecy avec moins d'impatience, est la mauuaise foy dont Monsieur de Sauoye sans doute vsera en la procédure de ce sequestre, qui donnera moyen au

Roy de retirer sa parole sans y rien laisser de sa reputation, avec autres infinies difficultez qui d'ailleurs se presenteront en l'exécution, voire en la minute de ce sequestre. Mais il faut aller trouver le Pape, & penser à ce qu'il me pourra dire, & à ce que j'auray à luy respondre. J'en viés à present qu'il est demie heure de nuict. Il m'a demandé si j'auois veu l'escriure qu'il m'auoit baillee; & ie luy ay dit qu'ouy, & le luy ay fait voir, parce que ie luy ay respondu point par point, ce qui seroit trop long à vous raconter, & puis ie luy ay dit que j'en auois dressé la response par escrit, que Monsieur de Sillery luy porteroit apres demain. Sur cela il m'a dit en confiance, que cette escriure auoit esté faite par trois de qui il auoit voulu prendre aduis; à sçauoir par le Cardinal Arrigone qui a esté Auditeur de Rote, & par le sieur Pamphilio auourd'huy Auditeur de Rote, & par vn Penitencier appelé le Pere Benedetto Iustiniani. Apres cela, il m'a parlé des Commissaires à qui il faudroit adresser la commission pour enquerir des faits que nous auons mis en auant, & iuger de la nullité du mariage. Et pour ce que cela n'a esté resolu ie ne vous en diray autre chose sinon qu'avec son Nonce qui est par delà, il voudroit encores enuoyer d'icy vn Auditeur de Rote à nostre choix, comme il m'a dit; & par dessus ces deux mettre vn Cardinal François, qui pourra estre Monsieur le Cardinal de Ioyeuse qui a à s'en aller par delà, & qui fera grande diligence, lequel ie luy ay nommé, sçachât qu'il s'y portera tres-bien, & sera plus au goust du Pape que ne seroit vn autre, pour les causes dont vous pourrez conjecturer de vous mesme: ce que j'ay fait plus hardimēt, apres que sa Sainteté m'a dit que Monsieur le Cardinal de Gondy ne seroit propre, pour autant qu'il s'estoit fort employé en ce fait, & s'en estoit rédu cōme promoteur, & qu'il pourroit plus seruir pour vn tesmoin que pour vn Iuge. Delà il est venu aux Cardinaux dont il vouloit cōposer la Congregation, à laquelle il faut qu'il en face delibérer pour son honneur & reputation, & pour donner autorité & credit à l'affaire pour nous mesmes; & m'en a baillé la liste qu'il a escrie de sa main en ma presence, laquelle j'ay baillee à Monsieur de Sillery qui se promenoit en carrosse du costé de Belvedere avec Monsieur le Cardinal de Ioyeuse en attendant que ie sortisse du Palais, ausquels j'ay rapporté le tout: & sont lesdits Cardinaux, si bien m'en souuient, Florence, Giustiniani, Borghese, Bianchetto, Arrigone, Visconti, San Marcello, sept en tout, ausquels il a adjoinct vn seul Auditeur de Rote; à sçauoir ledit Pamphilio, & vn Penitencier, à sçauoir le Pere Benedetto Giustiniani. Il s'est passé en ceste audience autres particularitez que ie n'ay tēps de vous escrire, d'autant que le courrier doit partir d'icy à peu de tēps. Je suis trop obligé au Roy & à vous, de ce que vous voulez que la creuë de la pension cōtre de ceste annee, & que j'en sois dressé dès à present; ce qui viendra mieux à propos que ie ne vous oserois escrire, pour les debtes que j'ay esté contrainct de faire depuis que j'ay esté fait Cardinal, à cause de la despense ordinaire qui monte trois ou quatre fois autant qu' auparauant, outre l'ameublement que le Cardinalat requiert, & si ie ne fais rien de superflu, ains me passe avec le moins qu'il m'est possible. J'enuoye donc mon blanc signé, pour retirer l'assignation de la somme creuë. Je n'escriis point au Roy; & pense faire mieux en trauaillant à ce qui se presente pour le service de sa Majesté, que si ie m'en detournois pour luy en escrire; joins que quand

ie vous escriis, i'estime escrire à sa Majesté mesme. A tant, &c. Monsieur, &c.  
De Rome ce Mercredy au soir vnzième Aoust 1599.

## A MONSIEVR DE VILLEROY.

CLXXXIII.

**M**ONSIEVR, En continuant ce que ie vous escriuis le vnzième de ce mois, ie vous diray que la seconde esriture en droict que ie faisois lors, fut apportee au Pape par Monsieur de Sillery le Vendredy ensuiuant treiziesme de ce mois, & le Mardy apres dixseptiesme le Pape m'enuoya querir pour la troisieme fois, & me bailla vn gros cahier, où il auoit fait copier toutes les escritures qui luy auoient esté baillées iusques-là sur ce fait, à scauoir la dispense qui fut obtenuë en l'an mil cinq cens septante deux, sur la patente du Roy & de la Reyne Marguerite; la procuration passée par ladite Dame au mois de Furier dernier; la substitution passée par ses Procureurs pour occuper icy en leur lieu; le memoire en Latin que Monsieur de Sillery luy auoit baillé avec les susdites pieces le yingt-huictiesme Iuliet; la premiere esriture en droict que Monsieur de Sillery luy auoit apportee le Vendredy seiziesme de ce mois; l'esriture qui auoit esté dressée par le commandement du Pape par les trois dont ie vous fis mention, & à moy baillée par sa Sainteté le neuuesme; la repliche que i'y auois faite par madite seconde esriture en droict que Monsieur de Sillery luy auoit apportee le 13. & vne autre esriture en droict que sa sainteté auoit fait faire depuis par Monsieur le Cardinal San Marcello pour en auoir son aduis. En me baillant le cahier, sa Sainteté me dit qu'il auoit fait mettre toutes ces choses ensemble pour les bailler aux Cardinaux de la Congregation; Qu'il vouloit que ie les releusse premiere, pour voir si elles estoient bien copiees; Que ie visse aussi, & considerasse la derniere esriture qui auoit esté faite par ledit Seigneur Cardinal San Marcello, que ie n'auois encores veüe. Apres cela il me parla de certain point de droict touchant cete affaire, & en faueur d'iceluy, qu'il auoit estudié luy-mesme, dont ie le remerciay & louay grandement. Sur la fin il me parla pour la seconde fois de Monsieur le Cardinal Saluati, en la façon que Monsieur le Cardinal de Loyeuse, qui doit partir la nuit prochaine, vous dira, tant de la premiere fois que de la derniere. Je vis ledit cahier, & le rapportay à Monsieur le Cardinal Aldobrandin le lendemain au soir pour le rendre à sa Sainteté, comme il fit le soir mesme que ie luy eus porté; & le lendemain beydy dix-neufiesme le Pape m'enuoya encores vne troisieme esriture, qu'il auoit fait faire par le lesuite de ce qu'il auoit voulu prendre aduis, laquelle Monsieur de Sillery luy rapporta le Vendredy 20. De ces deux dernieres escritures, que le Pape nous auoit communiquées, ie pris occasion de faire vne troisieme esriture en droict, pour replicher à certains points contenus en icelles, & maintenant ie suis apres à en faire vne quatrieme, qui est tant de sommairement sonde ce qui est des precedentes, & qui nous puisse seruir.

tant des nôtres que de celles des autres, pour la donner aux Cardinaux de la Cōgregation, & les soulager d'autant. La Congregation n'a point encore esté conuoque, pource que la goutte est suruenü au Pape; mais sa Sainteté nous a fait assurer par Monsieur le Cardinal Aldobrandin, que ce sera la premiere action qu'il fera. Il demeure tousiours ferme sur cét Auditeur de Rote qu'il veut enuoyer d'icy, à vostre choix neantmoins pour estre vn des Iuges avec Monsieur le Nonce, & vn Cardinal François, & nous voudrions qu'au lieu dudit Auditeur de Rote il commist vn autre Cardinal François. Surquoy par l'aduis de Monsieur le Cardinal de Joyeuse, & de Monsieur de Sillery, ie fushier au matin trouuer Monsieur le Cardinal Aldobrandin auant qu'il allast chez le Pape, pour le prier, comme ie fis, qu'il luy'plust de s'employer enuers sa Sainteté pour la faire départir de ceste resolution, en luy ramentuant, que dernièrement en l'affaire de la Princesse d'Autriche avec le Transsylvain on n'enuoya point d'Auditeur de Rote; Qu'au temps du Roy Louys XII. en semblables cas on n'en enuoya point aussi, ains avec le Nonce qui estoit lors, on y commit l'Archeuesque de Rouën, & l'Euesque de Paris: Que l'enuoy de cét Auditeur de Rote apporteroit de la longueur en cét affaire, qui auoit besoin de prompte & briefue expedition: Que tout ce que sa Sainteté pretendoit faire par l'enuoy de cét Auditeur, elle le pourroit faire par de bons memoires & instructions qu'elle enuoyeroit à son Nonce, & pourroit mesmes faire dresser ces memoires par des Auditeurs de Rote, si bon luy sembloit: Que tant plus de confiance sa Sainteté monsteroit au Roy, tant plus d'obligation luy en auroit sa Majesté, & tant plus d'occasion de luy complaire en la publication du Concile, que sa Sainteté desiroit avec tant d'affection, & tant plus de moyen nous donneroit aussi sa Sainteté de la seruir en cela mesme aupres du Roy. Monsieur le Cardinal Aldobrandin fit l'office dès le matin mesme, & le Pape m'enuoya appeller l'apres-dinee pour 12. heures, & pour la cinquiesme fois, & me dit que le Cardinal Aldobrandin luy auoit fait sçauoir ce que ie luy auois dit, mais qu'il persistoit à vouloir enuoyer ledit Auditeur, & m'auoit enuoyé querir pour me le faire sçauoir, afin que ie le disse à Monsieur l'Ambassadeur; Qu'il le feroit ainsi, non seulement pour la iustification d'une affaire dont il auoit à rendre raison à Dieu & au monde, mais aussi pour la reputation & seureté de l'affaire pour le Roy mesme, & pour les enfans qui naistroient de son futur mariage. Je luy rendis les mesmes raisons que i'auois dites à Monsieur le Cardinal Aldobrandin: mais il me respondit, que l'affaire de la Princesse Marie d'Autriche se pouoit vider sur le champ, sans y vser d'autre façon, comme vne partie des Cardinaux qui en delibererent en auoit esté d'avis, & que ce qui en auoit esté fait, auoit esté surabondant, & pour sa plus grande iustification: Que pour y enuoyer vn Auditeur de Rote, allant, sejournant, & retournant, & sur la procedure mesme, plusieurs difficultez pourroient naistre, dont les memoires ne seroient chargez: Qu'outre qu'il nous bailleroit à choisir tel Auditeur que nous voudrions, il luy commanderoit de faciliter & fauoriser l'affaire en tout ce qui se pourroit par iustice & par equité: Qu'il nous prioit de nous contenter, que nous auions veu la bonne affection dont il procedoit en



cét affaire: Qu'il nous auoit donné toute les satisfactions que nous auions voulu, qu'il falloit de sa part qu'il en eust quelqu'une, & nous prioit de la subir volontiers, & mesme pource qu'elle tournoit à la seurte & bien del'affaire mesme pour nous, autant ou plus qu'à sa décharge & iustification. En somme ie vis bien qu'il estoit impossible de luy faire changer ceste resolution, toutesfois nous y ferons encores ce que nous pourrons, & aüsdela auisé quelques autres raisons que Monsieur de Sillery alleguera à sa Saincteté en son audience après demain. Monsieur le Cardinal de Loyeuse voyant au reste cét affaire reduit à bons termes, & que sa presence n'y est plus necessaire, comme elle a esté iusques icy, s'est resolu, avec l'aduis de Monsieur de Sillery & de moy, d'vsler de la permission du Roy luy donna dernièrement d'aller mettre ordre à ses affaires. Il partira ceste nuit prochaine, & fera en ce voyage toute la diligence qui luy sera possible, & pourra grandement seruir le Roy en cet affaire par delà, soit il compris en la commission que le Roy enuoyera, ou non, pour son bon entendement, & pour la cognoissance qu'il a des choses d'icy, & particulièrement de cet affaire, & de ce que le Pape y desire, & pour la deuotion & zele que ie scay qu'il apporte en ce qui est du contentement & seruice de sa Majesté & bien du Royaume. Je vous prie de prendre & estimer son aduis, & ne pensez iamais auoir trop de moyens & de preuue pour faire resüssir cet affaire.

La Vice protection a esté par luy présentée à Monsieur le Cardinal d'Aquaiua premlerement, & puis à Monsieur le Cardinal Giustiniani, & pource qu'ils se sont excusé de l'exercer, ie rendray seruice au Roy & à l'Eglise Gallicane avec toute integrité, fidelité & affection qui est deuë à ceste charge, en attendant que mondit sieur le Cardinal de Loyeuse retourne, qui ne sera si tost comme le seruice du Roy, & la réputation de ses affaires & de la Couronne requierent. Il mourut en ceste ville vn Gentil-homme François qui estoit Abbé de Nais en Roüergue, de l'ordre de saint Benoist, Diocese de Vahres; & pource que le Concordat donne expressement au Pape la pleine prouision des benefices vacants en Coue de Rome sans nomination du Roy, sa Saincteté entend y pouruoir de plein droit, & mesme d'autant que ledit Abbé n'estoit ny Protecteur ny Ambassadeur, ny d'autre telle qualité pour laquelle il deust residence à Rome. Par ainsi sa Saincteté estimant qu'elle conserueroit ses droicts, & ensemble feroit plaisir au Roy en me donnant ladite Abbaye, m'a fait dire qu'il me la donnoit, & ie ne l'ay acceptee que sous le bon plaisir du Roy, non seulement pource qu'il luy aura pleu d'auoir pour agreable ceste bonne volonté de sa Saincteté, mais aussi pource que sadite Saincteté ne me prefere à vn autre que pour l'opinion qu'elle a que sa Majesté le trouuera meilleur ainsi.

De trois Cardinaux Espagnols qu'il y a en ceste Cour, l'un appellé le Cardinal de Gueuarre, qui est personnage de grand merite, a esté fait par le Roy d'Espagne grand Inquisiteur de tous les Espagnes, & ayant à s'en aller pour executer ceste charge, il desire passer par le Languedoc. l'estime que le Roy fera chose digne de sa bonté, & de la reputation de la Couronne, s'il luy plaisoit commander à Monsieur le Duc de Ventadour de pouruoir à ce que ledit Cardinal en passant par le Languedoc ne receut aucun des plaisir de personne, ains tout honneur, gracieuseté, & courtoisie.

Atant,

Atant, &c. Monsieur, &c. De Rome, ce vingt-cinquiésme, d'Aoust mil cinq cens nonante-neuf.

## A MONSIEUR DE VILLEROY.

## CLXXXIV.

**M**ONSIEUR, Les lettres qu'il vous a pleu m'escire à Blois le cinquiésme Aoust me furent renduës le dernier, par lesquelles i'ay veu les consideracions que vous auez fait sur mes lettres du quatorziésme Iuillet, que nous ne faillerons de représenter icy, quand & à qui il sera besoing. Iusques icy il nous a bien succédé, graces à Dieu, qui comme i'espère conduira aussi le reste par sabôré. L'affaire a esté tenuë aussi fort secrette iusques à la tenuë de la Congregation, qui fut le dernier d'Aoust, mais depuis il ne s'est peu faire que par tout Rome on n'aye sceu en general qu'il se traittoit de la dissolution de ce mariage: bien auons-nous fait & faisons tout ce que nous pouuons emiers les Cardinaux de ceste Congregation, qu'au moins les moyens en soient tenus secrets autât que faire se pourra; à quoy neantmoins il y aura beaucoup à faire, car chacun desdits Cardinaux a vn Secretaire, & vn Auditeur, qu'on appelle, outre les Cardinaux amis, & la curiosité est merueilleusement grande en toute ceste nation, & mesmement en ceste Cour: mais le meilleur & le plus seur que i'y voye, est que nosdits moyens sont pertinents & concluans, & ont pleu & plaisent à ceux qui en doiuent & peuvent iuger, & mesmement au Pape, qui ne pourroit marcher en cét affaire meilleur pied qu'il fait, comme Monsieur de Sillery vous escrira plus amplement, auquel ie me remets,

En la premiere Congregation qui fut tenuë ledit iour dernier d'Aoust, le Pape proposa l'affaire qu'il auoit tres bien estudié, & rapporta tous nos moyens, & ce qui se pouuoit dire pour & contre, monstra son inclination & le desir qu'il auoit que la iustice que le Roy luy demandoit se trouuast du costé de sa Maiesté, bailla au plus ancien desdits Cardinaux, qui est Monsieur le Cardinal de Florence, les escritures que nous luy auions fournies, & celles aussi qu'il auoit fait faire par de sçauâs personnages à qui il a demandé conseil sur cét affaire, exhortant lesdits Cardinaux de bien voir & considerer le tout chacun à part, & puis s'assemblerent tous pour deliberer ensemble de ce qui seroit à faire, & le luy rapporter. Lesdits Cardinaux ont eu chacun vne copie de toutes lesdites escritures que nous auions fait copier; Monsieur de Sillery les a portées en les visitant, pour leur recommander l'affaire; & apres luy, comme i'ay pensé qu'ils auroient veu lesdites escritures, ie les ay esté voir tous l'un apres l'autre, pour les prier aussi d'auoir cét affaire en telle recommandatiô qu'il merite, & pour respondre aux doutes & difficultez qu'ils pourroient faire, côme ils en ont fait plusieurs, mais il me semble que ie les ay laissez tous bien édifiez de la iustice de nostre cause. Je vous ennoye copie de la quatriésme escriture en droit que ie dressay auant ladite Congregation, en laquelle est compris tout

ce que j'auois mis és trois premieres , & ce que j'auois trouué encores de meilleur en celles aufsi que le Pape auoit fait faire. Vendredy prochain dixiesme de ce mois se tiendra la Congregation desdits Cardinaux chez Monsieur le Cardinal de Florence ; nous verrons s'ils y prendront entiere resolution de toutes choses , ou s'ils auront à tenir encores quelque autre Congregation. Vn des derniers & des principaux poincts sera la deputation des Commissaires qui auront à informer par delà , & à iuger de la nullité du mariage , & la forme de la commission ; à quoy nous aurons les yeux ouverts , pour faire passer le tout en meilleure façon que faire se pourra. Le Pape demeure tousiours ferme sur cét Auditeur de Rote dont il vous a escrit cy deuant. Je vous remercie tres-humblement de l'extrait qu'il vous a pleu m'enuoyer de la lettre que Monsieur du Vair vous auoit escrite sur la dépesche que le Roy luy auoit faite en faueur du seigneur Frägipani Abbé de S. Victor de Marseille , auquel i'ë ay enuoyé la copie , & ay escrit qu'il face pouruoir aux desordres qui sont en son Abbaye , combien que c'est proprement aux reguliers superieurs de chacun Ordre de faire garder la discipline monastique , & non aux Commendataires. Aussi vous remerciai-je de ce qu'il vous a pleu faire accorder à Leonardo Pomaro le Consulat de la nation Françoisë à Rome , & espere que le Roy & toute la nation Françoisë en sera mieux seruie , & vous bien aise d'auoir fait si bien pouruoir à cét office.

J'ay commencé à exercer la Vice-protection le premier iour de ce mois ; proposant en Consistoire l'Euesché de Frejus pour le Sieur Barthelemy Cameleon Prestre & Archidiaque del'Eglise Cathedrale de la cité de Frejus , avec reseruatiou de seize cens soixante & six escus deux tiers de pension nouuelle pour le sieur de Grillon , suiuant la nomination du Roy. Mais d'autant que par lesdites lettres le sieur de Grillon est qualifié Maistre de Camp du Regiment des Gardes de sa Maiesté , le Pape adiousta vn decret à ladite reseruatiou de pensionnaire qu'il fust vrayement Clerc , & portast habit & tonsure du Clerc , suiuant les anciens decrets ; & vne Bulle de Sixte cinquiemesme. A tant &c. Monsieur , &c. De Rome ce 8. Septembre mil cinq cens nonante neuf.

## A M O N S I E V R D E V I L L E R O Y .

C L X X X V .

**M** O N S I E V R , Les deux lettres qu'il vous pleust m'escrire les 25. & 26. d'Aoust me furent rendus le 16. de ce mois : & par celle que Monsieur de Sillery & moy vous auons escrite cy deuant , vous aurez veu comme nous auons aduancé l'affaire que le Roy nous commande d'accelerer de tout nostre pouuoir. La seconde Congregation des Cardinaux fust tenuë chez Monsieur le Cardinal de Florence le Vendredy 10. de ce mois , suiuant

que ie vous auois predit par ma lettre du 8. Ils demurerent tous d'accord que nos moyens de nullité estoient pour la pluspart receuables, & qu'il falloit commettre la cause *IN PARTIBVS*, pour estre informé des faits par nous mis en auant & iuger de la nullité du mariage : mais quant aux Commissaires & à la forme de la commission, ils ne s'en accorderent point, & s'en remirent au Pape, comme ils deuoient, sans auoir plus à se rassembler pour cét affaire.

Vous aurez veu par nos lettres precedentes, comme le Pape vouloit en toutes façons enuoyer vn Auditeur de Roté, à nostre choix toutesfois ; & pour mon regard ie m'y fusse laissé aller l'y voyant ainsi resolu, & luy ayant donné toutes les autres satisfactions que nous auons desirées, & nous demandant ceste-cy pour luy, de laquelle neantmoins il estoit le maistre luy mesme. Mais sa Sainteté a esté enfin vaincuë par la perseuerance & dextérité de Monsieur de Sillery, qui l'a si bien sçeu mouuoir & persuader, qu'elle s'en est enfin départie. Et de fait m'ayant mondit sieur de Sillery rapporté comme il y auoit procedé, & ce qu'il luy auoit dit, i'en demuray tout rauy, & ne me souuiens point d'auoir veu ny ouy vne negotiation plus accorte ny mieux conduite, non pas mesmes dans les meilleurs liures que i'aye leus.

Estant doncques ainsi le point des Commissaires indecis, Monsieur le Cardinal San Marcello, qui estoit vn des 7. Cardinaux de la congregatiō, & est fort confident du Pape, & demurant au Palais, m'enuoya le Samedy au soir onzième de ce mois inuiter pour le lendemain Dimanche au matin à m'aller promener avec luy, en la vigne du Marquis de Riano pres la porte du Populo, & moy ayant accepté le conuoy, & comparu le lendemain au matin, il me dist comme le Pape auoit voulu sçauoir de luy priuement comme toutes choses s'estoient passées en ladite congregatiō du Vendredy precedent, en attendant le rapport formel & accoustumé qui luy en seroit fait par Monsieur le Cardinal de Floréce, le plus ancien de ladite congregatiō, soit qu'il le fist seul, ou avec d'autres, & auoit encore voulu sa Sainteté que le Cardinal de San Marcello & moy fussons ensemble, pour voir si nous nous pourrions accorder des Commissaires, & me demanda qui nous voudrions. Je luy dis que la première fois qu'il s'estoit parlé des Commissaires, le Pape auoit montré vouloir qu'ils fussent trois en nombre, & Monsieur le Nonce auoit toujours esté nommé & accepté sans aucune difficulté; que avec luy nous eussions desiré deux Cardinaux François les premiers en la liste, qui estoient Messieurs les Cardinaux de Ioyeuse & de Gondy : mais sa Sainteté s'estoit laissée entendre, & auoit par plusieurs fois déclaré vouloir enuoyer d'icy vn Auditeur de Roté, dequoy neantmoins i'estimois qu'elle se seroit en fin départie pour les remontrances & prieres de Monsieur l'Ambassadeur. Ledit Cardinal repliqua, qu'il croyoit aussi que ladite Sainteté s'en départiroit, pourueu que de nostre part nous nous contenterions qu'il eust aussi satisfaction. Et sur cela il dist que puis que nous ne voulions point d'Auditeur de Roté, le Pape ne voudroit point qu'il y eust aucun Cardinal, d'autant que le Cardinal auoit trop d'autorité sur le Nonce, & luy pourroit faire faire beaucoup de choses à sa mode. Je luy respondis, que ny le Cardinal, ny le Nonce n'au-

roïet en cela autorité que celle que le Pape leur auroit donnée; Que chacun y feroit pour vn chef, & auroit sa voix libre l'un cōme l'autre; Que la dignité estoit aucunement contrepesee par la charge & dignité de Nonce, qui d'ailleurs estoit Euesque; Que les Cardinaux n'auoient moindre dépendance du S. Siege, & ne deuoient estre moins confidens au Pape que ledit Nonce: Que la matiere estant de telle importance, & les parties de qualitez si éminentes, il est raisonnable qu'il y eust vn Cardinal pour le moins, & mesme d'autant que nous auons l'exemple de la dissolution du mariage d'entre le Roy Louys douziesme & Madame Ieanne de France fille du Roy Louys II. en laquelle cause auoient esté donnez pour Iuges avec l'Euesque de Septa, le Nonce du Pape Alexandre sixiesme qui seoit alors au saint Siege, le Cardinal de Luxembourg, & l'Euesque d'Alby, tous deux François.

Ledit Seigneur Cardinal San Marcello me demanda, si en cas que le Pape se contentast d'y mettre vn Cardinal, nous ne voudrions point Monsieur le Cardinal de Giury. Je luy dis, que ietenois ce Seigneur pour vn fort bon Cardinal, & n'y scauois aucune cause de suspicion ny de défiance: mais que ce seroit faire tort aux deux Cardinaux plus anciens que luy, de le preferer à eux, & mesmement vn estant en Cour ou bien près, & luy en estant loing. Que en outre il sembleroit que comme il fut fait Cardinal sans le sçeu du Roy, on en voulust aussi maintenant faire quelque chose de particulier & de propre, ce que ie n'estimerois à propos ny pour le seruice de sa Sainteté, ny pour le bien dudit Seigneur Cardinal; Que comme ie luy disois ce cy en confiance, & en seruiteur & creature de sa Sainteté, ie luy voudrois encore adiouster avec toute liberté, que ie n'estimois pas que Monsieur le Cardinal de Giury eust tant de viuacité & de resolution pour conduire cet affaire au gré & contentement de sa Sainteté, comme auoit chacun des deux qui le precedoient en temps & ordre de leur promotion; Qu'encore que cet affaire fut mes-huy clair au Pape & aux Seigneurs de la congregation, & mesmement à luy à qui ie parlois, & que nous ne demandassions & desirassions autre chose que iustice, si est-ce qu'il y auoit tant de ressorts, & de tours & retours, que nous auions besoin de personages qui fussent non seulement gens de bien, mais aussi vifs, prompts, & resolu. Ouy, mais (dit-il) le Pape dit que Monsieur le Cardinal de Gondy s'est fort meslé de cet affaire, & qu'il pourroit plus seruir au Roy comme témoin, que comme iuge. Sa Sainteté (dis-je) me l'a dit autrefois à moy-mesme & comme ie suis tout assuré que quand Monsieur de Gondy seroit commis, il ne feroit que ce qu'un bon iuge doit faire, & rendroit compte de son fait à sa Sainteté aussi bon que autre scauroit faire, aussi crois ie bien que Monsieur le Cardinal de Joyeuse, pour la fin que le Pape se propose, qui n'est que sa décharge & iustification, seroit aussi propre ou plus que nul autre, d'autant que outre les bonnes & louables qualitez qui luy sont communes avec Monsieur le Cardinal de Gondy, il est le premier en liste de tous Messieurs les Cardinaux François, & pendant les troubles de nostre France a esté ioint au saint Siege & à sa Sainteté, & vient de partir d'auprès sa Sainteté tresbien informé de toutes ses intentions sur ce fait, & autres concernans le Royaume.

Ledit Seigneur Cardinal San Marcello n'ayant que repliquer à ce que dessus & sans monstrier autrement de l'approuver, passa au troisieme Commissaire, demandant qui on pourroit commettre pour troisieme, & s'as attendre ma response, me demanda si l'Archeuesque d'Auignon, ou quelque Euesque de ceux du Comtat de Venisse ne seroit pas à propos, attendu qu'ils estoient en France. Je luy respondis, que ce seroit monstrier trop de defiance des Prelats de l'Eglise Gallicane, qui s'en pourroient plaindre à l'ordroit, attendu mesmement que par le chapitre DE CAUSIS és concordats, le Pape doit commettre IN PARTIBVS les causes de France qui luy sont reservees, ce qui se doit entendre à des Prelats François; Qu'il devoit suffire au Pape que Monsieur le Nonce y fust pour vn, & que les deux autres Commissaires fussent François, comme il en auoit esté vsé en la cause du Roy Louys douziesme.

Alors il me dit qu'il y auoient en France des Euesques Italiens de nation, lesquels ayans Eueschez en France, pouuoient & deuoient estre tenus pour Euesques François; Qu'il auoit ouy dire qu'ils faisoient serment de fidelité au Roy, & ainsi sa Majesté s'en pourroit fier, & cependant ce seroit au Pape quelque plus grande descharge & satisfaction; & continuant ce propos, il me nomma le vieil Euesque de Beziers, & le nouveau Archeuesque d'Arles: mais il adiousta incontinent apres, qu'autrefois, & à du temps du feu Roy, il auoit esté parlé à Rome dudit vieux Euesque de Beziers, à cause de quelque execution qui auoit esté faite sur certaines personnes de qualité semblables Catholiques en ladite ville de Beziers; & que pour celal'Archeuesque d'Arles seroit plus propre, lequel aussi estoit desia tout porté en Cour. Je vous confesse, Monsieur, que cét expedient me sembla meriter consideration, parce qu'outre qu'il y alloit de la satisfaction & du respect du Pape qui procedoit avec nous d'une si hōneste & amiable façon en vne chose dont il pouuoit disposer de luy mesme, ie ne voyois point qu'il y eust aucun danger, ny aucune longueur de plus qu'en vn Prelat François purement & simplement, & respondis audit Seigneur Cardinal San Marcello en soufriaient, que ie voyois bien qu'encore que ce fust vne cause Françoise, qui auoit à se iuger en France, toutesfois ils ne vouloient point que l'Eglise Gallicane y eust rien de plus que la nation Italienne, ains vouloient de tout partir par moitié avec nous, opposans à vn Cardinal François vn Euesque Italien Nonce du Pape, & puis au lieu d'un Prelat purement François en mettant vn qui fut Italien de nation, & François par benefice & par adoption; Qu'encore que i'y preuissie quelque ialousie qui en pourra naistre és esprits des Prelats François, toutefois ie me contentois pour mon regard que les choses fussent ainsi balancees: mais comme i'estimois luy de sa part vouloit reserver la conclusion de tout cecy au Pape, aussi auois-je de ma part Monsieur l'Ambassadeur, sans lequel ie ne pouuois, ny ne voulois rien conclurre; Que i'en confererois avec luy, & rascherois de le disposer à trouuer cét expedient bon.

Et de fait, nostre propos ayant finy en cét endroit, & moy ayant conduit ledit Seigneur Cardinal en son logis, d'autant qu'il estoit venu & s'en retournoit en mon carrosse, ie m'en allay tout droit chez Monsieur de Sillery, auquel ie rapportay fidellement tout ce qui se venoit de passer entre le-

*Le s<sup>r</sup> n'y  
pas enier  
en c<sup>es</sup> en-  
droit.*

dit Seigneur Cardinal San Marcello & moy, & ne trouuay point mondif sieur de Sillery esloigné d'accepter ce party, apres que toutes choses furent bien considerees de part & d'autre.

Mais ce iour là mesme l'apres-disnee vint chez moy Monsieur le Cardinal Aldobrandin, qui me dit que le Pape desiroit que Monsieur le Cardinal San Marcello & moy fussions ensemble au plustost que faire se pourroit pour aduiser au fait des Commissaires, & que cependant il estoit venu me dire qu'il auoit aduisé de luy-mesme qu'il n'estoit point besoin de tant de Commissaires, & que Monsieur le Nonce suffiroit tout seul, comme dernièrement en la cause du Prince de Transilvanie & de la Princesse Marie d'Austriche n'auoit esté commis que le Nonce seul. Je luy dis comme Monsieur le Cardinal San Marcello & moy auions esté ensemble le matin, & à quoy nous en estions demeurez, & que i'en auois parlé à Monsieur l'Ambassadeur, qui y pourroit condescendre; Que de commettre Monsieur le Nonce seul, ie n'en pouuois estre d'aduís attendu l'importance de la cause, de laquelle dépendoit tout le salut du Royaume, & l'eminence des parties, & le respect qui estoit deu à l'Eglise Gallicane & aux Coneordats, & l'exemple que nous auions du réps du Roy Louys douziesme en chose semblable, & le besoin & necessité que Monsieur le Nonce, & tout autre, quel qu'il fust, auroit d'estre aidé à porter vn si grand poids, & mesme d'estre guidé par des Françoisés choses de France, & encore porté par vn François d'autorité, pour faire trouuer bones, & receuoir beaucoup de choses, & mesme touchant le stile & la procedure, qui autrement ne passeroient point, & pourroient gaster tout l'affaire; Qu'il n'y auoit memoires ny instructions qu'on luy püst enuoyer d'icy, qui luy pussent suffire sans l'aide, direction, & support d'vn grand & puissant Prelat François. Sur toutes lesquelles choses ie m'estendis plus amplement que ie ne vous mets icy, & en fin priay ledit Seigneur Cardinal Aldobrandin de ne mettre point cela en anant, & entendre plustost à l'expedient qui auoit esté aduisé le matin entre Monsieur le Cardinal San Marcello & moy, & y disposer sa Saincteté suivant le pouuoir qu'il auoit auprès d'elle, & la raison qui y estoit euidente.

Il ne fut pas plustost party de chez moy que ie m'en retournay trouuer Monsieur de Sillery, & luy dis ce qui se venoit de passer entre ledit Seigneur Cardinal Aldobrandin & moy, & arrestasmes ensemble que i'en parleroís au Pape le lendemain treiziesme iour de ce mois qui seroit Consistoire auant que sa Saincteté sortist de sa chambre pour l'aller tenir, ce que ie fis, luy disant du commencement en quoy Monsieur le Cardinal San Marcello & moy estions demeurez le iour auparauant au matin touchant les Commissaires, & ce que Monsieur le Cardinal Aldobrandin m'estoit venu dire l'apres-dinee de commettre Monsieur le Nonce seul. Et sur ce ie luy dis toutes les choses que i'auois dites à Monsieur le Cardinal Aldobrandin, pour luy remonstrer qu'il n'estoit bon de commettre Monsieur le Nonce seul. Et apres cela, pour ce qu'il sembloit qu'on se desfiast des François, ie luy dis qu'il n'auoit aucune occasion de desfiance, le priant de considerer d'vn costé la nature & l'estat de la cause, & de l'autre costé la sincerité & grande bonté du Roy. Quant au premier poinct, la cause en soy, quant au droit, estoit claire & certaine, approuuee de sa Saincteté mesme, & de tous

teux de la congregation : & quant au faict , outre que toutes les choses par nous allegues estoient vray-semblables, la Saincteté en auoit desia vne grande lumiere, & nous auoit elle-mesme appris la cause que le Roy Charles neufiesme & la Royne sa mere auoyent eu de contraindre la Royne Marguerite à ce mariage.

Ce que ie vous expliqueray cy bas en quelque autre lieu, pour ne point icy interrompre l'ordre des matieres, & la teneur du propos commencé, & que ie m'asseurois que la Saincteté croyoit fermement que la dispense n'auoit iamaïs esté leuë ny expliquée à ladite Royne Marguerite, & qu'elle n'auoit point depuis ladite dispense presté nouveau consentement, & moins contracté le mariage de nouveau, & telles autres choses que nous auons mises en fait. Et quant à l'intégrité & bonté du Roy, la Saincteté n'en pouuoit auoir vne plus certaine prouue que ceste-cy ; Que sa M. si elle eut voulu, pouuoit se mettre en estat de n'auoir point besoin de la declaration que nous poursuiuions en ostant l'empeschement, & se deliurant par la rigueur de la iustice, ou par la voye de faict, comme auoient fait, & faisoient assez souvent plusieurs hommes priuez ; Que outre ce, voulant proceder par ceste voye ciuile de separation, il s'estoit trouué des gens qui luy auoyent dit qu'il n'auoit que faire d'enuoyer à Rome pour cela, & qu'il pourroit faire faire telle chose par l'Euesque de Paris, ou par assemblée de Prelats François ; Et que outre les heretiques, qui estiment que tant mieux que la Saincteté & sa Majesté seront ensemble, tant pis il ira pour eux, il y auoit beaucoup de Catholiques qui n'auoient point les choses de Rome trop à cœur, & ne se soucieroyent gueres qu'il y eust mauuais mesnage entre Rome & France, & penseroient ainsi faire mieux leurs affaires particulieres, quant au fait des benefices, dont ils sont démesurément auides, au grand mespris des canons & saints decrets ; Que auant tous ces desordres, & auant que les heresies qui courent auioird'huy commençassent, les Cours de Parlement & le grand Conseil auoient iugé plusieurs choses autrement qu'on ne tenoit à Rome ; Que l'Eglise mesme Gallicane auoit tousiours eu certaines pretensions par dessus ce que le S. Siege entendoit & vouloit ; Que la Sorbonne de Paris auoit aussi eu certaines opinions & maximes au desauantage des Papes & du saint Siege ; Que l'Estat du Royaume estant tel, la Saincteté auoit grande occasion de penser, non tant à ce que pourroit dire quelque Sauoyard ou Espagnol, si elle commettoit des François pour la plupart, comme au mescontentement que pourroit receuoir toute la France, si en vne cause qui importoit à tout le Royaume, la Saincteté depuroit vn seul estranger ; Que ie le suppliois donc de se resoudre au plustost, & par ce moyen se deliurer de l'importunité dont on luy vseroit tant que ceste chose seroit en suspens ; Que tout ce que Monsieur l'Ambassadeur & moy pouuions faire pour sa satisfaction, & pour euiter reproche en France, seroit d'accepter l'expedient de trois qui auoient esté nommez entre Monsieur le Cardinal San Marcello & moy.

La Saincteté ne respondit à pas vne de mes raisons, comme il luy eust aussi esté fort malaisé, & me dit seulement qu'il prioit Dieu qu'il l'inspirast, & que nous le priassions aussi de nostre costé. Au demeurant ie cognus bien à quelques autres mots qu'il me dit par cy & par là, que ce que Monsieur



le Cardinal Aldobrandin m'auoit dit, venoit de sa Sainteté & neantmoins il me sembla lire en son visage qu'il vouloit passer par lesdits expediens des trois nommez: mais qu'il le nous vouloit faire trouuer bon, & mesmemēt à Monsieur l'Ambassadeur. Et de fait Monsieur le Cardinal San Marcello, apres auoir fait son rapport au Pape de ce qui s'estoit passé entre nous, me dit le Mardy ensuiuant que le Pape luy auoit dit vne grande partie de ce que i'auois dit à sa Sainteté le Lundy au matin, & que nous obtiendrions lesdits trois Commissaires, si Monsieur l'Ambassadeur les demandoit en sa prochaine audience, & ainsi en aduint Vendredy 17, de ce mois que lesdits trois Commissaires furent arrestez entre le Pape & Monsieur de Sillery. Vous aurez donc pour Commissaires Monsieur le Cardinal de Ioyeuse, Monsieur l'Archeuesque d'Arles, & Monsieur le Nonce.

Quant à la forme de la commission, le Seigneur Vestrio principal Secrétaire du Pape, me vint trouuer de la part de sa Sainteté Samedy apres disner 28. de ce mois, pour en traicter avec moy, & estre informé de tout ce qu'il appartenoit. Je l'informay premierement de viue voix, & puis luy baillay copie du memoire contenant le fait qui auoit esté baillé au Pape, & de la dernière & pleine escriture en droict, & luy dis mon aduis touchant la forme de la commission, & qu'il falloit que le rescrit adressant aux Commissaires, fust vne bulle, & non vn brief comme il pensoit. Ledit Vestrio trouua à la minute dudit rescrit Dimanche 19. & Lundy 20. de ce mois, & le Lundy au soir il m'escriuit qu'il l'auoit faite, & qu'il me l'apporteroit le Mardy au matin, qui estoit hier; ce qu'il fit, & par mon aduis en osta quelques choses, & y en adiousta d'autres.

Et cela fait, ie la fis laisser pour la montrer à Monsieur de Sillery, auquel ie la portay incontinent, qui trouua bon le tout, & l'apres-disnée ie la r'apportay au sieur Vestrio pour le remercier, & la releusmes encore ensemble, & y r'accommodasmes quelque peu de chose. Reste maintenant à sçauoir si le Pape la trouuera bonne de la façon qu'elle a esté accommodée, & selonc cela elle sera mise au net; & grossoyée sans autre chose. Que s'il y change quelque chose, elle nous sera derechef communiquée, iusques à ce que sa Sainteté & nous en demeurions d'accord. Tant y a que comme ie l'ay laissée, elle est telle qu'il la nous faut. Et à la verité ledit seign. Vestrio nous a seruy tost & bien: le Roy luy en doit sçauoir gré, & nous tous l'en aymer & estimer. J'en ay retenu copie, mais iusques à ce que ie sçache si le Pape l'aura laissée ainsi ie n'ay estimé vous la deuoir enuoyer: cepédant i'ay auançay de vous escrire cecy, pource que l'ordinaire doit partir la nuit suiuaute, & si entre cy & ce soir i'en apprens quelque chose, comme ie pourray faire, ie l'adiousteray au pied de la presente.

Ie vous ay mis cy-dessus, comme i'auois dit au Pape entre autres choses, qu'il nous auoit appris luy mesme la cause que le Roy Charles neufiesme & la Roynie sa mere auoient eue de cōtraindre la Roynie Marguerite à ce mariage, & que ie vous expliquerois cela en quelque autre endroit de ceste lettre. Vous sçaurez doncques, s'il vous plaist, qu'une de tant de fois que le Pape m'a enuoyé appeller pour cēt affaire, il me dit que lors que l'on estoit à pres à faire ce mariage, Monsieur le Card. Alexandrin, enuoyé Legat par le Pape Pie V. son oncle, se rencontra en France, & fit tout

tout ce qu'il pût pour le destourner, & qu'après en auoir parlé plusieurs fois audit Roy Charles, sa M.<sup>le</sup> le prit vn iour par la main, & luy dist, Monsieur le Cardinal tout ce que vous me distes est bon, & en remercie le Pape & vous & si i'auois quelque autre moyen de me venger de mes ennemis, ie ne ferois point ce mariage, mais ie n'ay point d'autre moyen que cestuy-cy. Adiousta sa Sainteté, que lors que la nouvelle de la saint Barthelemy vint à Rome, ledit Cardinal Alexandrin dit; Loué soit Dieu, le Roy de France m'a tenu promesse. Disant sa Sainteté sçauoir tout cecy pource qu'il estoit lors Auditeur dudit Cardinal & fut avec luy en tout le voyage que ledit sieur Cardinal fist en Espagne premierement, & puis en France, & qu'il auoit luy mesme escrit cela deslors: & se pourroit encore auourd'huy trouuer escrit de sa main parmy les papiers dudit sieur Cardinal Alexandrin. Et est bon que vous sçachiez encore, que comme i'allois informant les Cardinaux de la congregation, vn d'eux, sçauoir Borghese, me dit que le Pape leur auoit compté ceste histoire le iour qu'il les assembla deuant soy pour ce fait, dont ie suis tres-aise. A quoy vous pouuez cognoistre entre autres choses la tres-bonne inclinatio de sa Sainteté au bien de cét affaire, & la gratitude que le Roy & nous luy en devons. Aussi me suis ie seruy du recit que sa Sainteté me fist en mon escriture en droit, pour rendre vray-semblable la crainte qu'on auoit faite à la Royne Marguerite pour luy faire faire ce mariage.

I'ay enuoyé ce soir vers le sieur Vestrio pour sçauoir si le Pape auoit veu & approuué la minute que nous auions hier accommodée ledit sieur Vestrio & moy; & il m'a mandé qu'il l'a portée ce matin au Pape & que sa Sainteté l'a retenuë pour la bien considerer.

Monsieur de Sillery vous escrira plus particulierement de toutes choses, auquel ie me remets, ne voulant toucher sinon à celles qui sont de mon fait, & auxquelles ie suis interuenu, & encore non à toutes, mais au principal, & le plus sommairement que ie puis. A tant, &c. Monsieur, &c. De Rome, ce Mercredy vîngt-deuxiesme Septembre mil cinq cens nonante-neuf.

## A MONSIEUR DE VILLEROY.

CLXXXVI.

**M**ONSIEUR, Pource que la lettre que ie vous viens d'escrire est desja trop longue, ie mettray en ceste-cy ce qui me reste. Premierement doncques ie vous remercie tres-humblement du soing qu'il vous a pleu prendre de mes deux blancs en continuation du bien & honneur que vous auez accoustumé me faire, vous estant celuy de qui ie tiens tout ce que ie & par qui ie suis ce que i'ay, suis, après Dieu & le Roy. Si on voustient promesse, cela m'accommodera grandement, & me viendra fort à propos. I'ay receu avec vostre lettre du 29. d'Aoust, la prouision du Consulat à Rome pour le sieur Leonardo Pomaro, dont ie vous remercie tres-affectueusement, & l'ay baillee à Monsieur l'Ambassadeur, afin que ledit sieur Pomaro la receust de sa main, comme il a à prester le serment en ses mains. Ie vous enuoye vne

NNn

lettre du fleur Mario Bandini que ie receus n'y a que quatre iours, & depuis la reception d'icelle est venuë nouvelle de sa mort à Ascoli, d'une recidive apres vne longue maladie qu'il auoit eue. Il m'auoit recherché de faire vn office pour luy, auquel ie ne l'eusse peu seruir, quelque inclination que i'aye de faire seruice à qui ie puis, pour autant que ce qu'il desiroit, me sembloit estre par dessus sa portee, & trop au dessous de la Couronne & du Roy. Le General des Iesuites ayant entendu que le Pere Lorenzo Maggio estoit arriué en Cour a desiré que ie vous escriuisse en recommandation de leur affaire: ie vous supplie d'y faire autant que vous iugerez le pouuoir & denoir faire. Le Pape fera fort aysé de toute la gratification que le Roy luy fera. A tant, &c. Monsieur, &c. De Rome ce 28. Septembre, 1599.

## A V R O Y.

## CLXXXVII.

S I R E,

Dieu a beny le labeur de Monsieur de Sillery & le mien, de façon que nous auons obtenu, & vous enuoyons le rescrit de nostre saint Pere le Pape, qui estoit necessaire à vostre Maiesté pour faire declarer nul son mariage. Sa Sainteté y a apporté toute la bonne disposition & inclination, que vostre Majesté eust sceu desirer, & nous toute la fidelité & sollicitude, labeur & industrie qu'il nous a esté possible; de sorte que j'espère qu'és moyens de nullité & faicts qui ont esté mis en auant, & és poincts, raisons, & autoritez de droict qui ont esté allegues, & au maniement & conduite qui a esté tenuë tant avec le Pape, qu'enuers les Cardinaux & autres, & és Commissaires qui ont esté deputez, & en la teneur & façon du rescrit & des memoires qui vous sont enuoyez, il se trouuera que vostre Maiesté a esté fidellement & diligemment serui, comme ie m'asseure qu'elle le fera encore mieux apres d'elle, & que dans peu de temps nous la verrons libre de ce costé là, & en termes d'auoir bien tost lignee naturelle & legitime à vostre contentement, & au bien & honneur de vostre Royaume. Aussi est-ce la seule chose qui vous reste pour le comble du salut que vous auez apporté à la France, & de tant de prosperitez que Dieu a donnees à vostre Maiesté, lesquelles ie prie sa diuine bonté vous vouloir continuer & accroistre, &c. S I R E, &c. De Rome ce 26. Septembre, 1599.

## A MONSIEVR DE VILLEROY.

CLXXXVIII.

**M**onsievr, Je respondis à vos lettres des 25. & 28. d'Aoust par l'ordinaire de Lyon le 22. de cemois, & vous fis vne bien longue lettre, de laquelle vous aurez vn duplicata avec la presente. Le dernier poinct de la lettre estoit sur la forme du rescrit que le sieur Vestrio Secretaire du Pape auoit par mon aduis dressé & corrigé, & puis porté à sa Sainteté, qui se le fit laisser pour le mieux considerer: & ce sont les termes auxquels les choses en estoient ledit iour 22. que ie vous en escriuis. Depuis ledit sieur Vestrio retourna par deuers moy le 23. avec la minute dudit rescrit corrigé & apostillée de la main du Pape, & de la siene. Monsieur de Sillery & moy auions arresté ensemble, que ie le ferois aduertir quand ledit Seigneur Vestrio deuroit retourner par deuers moy, & ainsi fut fait, de sorte que mondit sieur de Sillery estoit desia en mon logis, quand ledit seigneur Vestrio y arriva leudy avec ladite minute ainsi corrigée & apostillée, comme il a esté dit. Nous disputasmes assez longuement avec ledit sieur Secretaire sur quelques vnes desdites corrections & apostilles, dont en fin par commun consentement vne partie fut retenuë, vne partie cassée, & quelques mots adioustez, & encore changez par cy & par là à nostre aduantage, & ledit rescrit a esté entre nous en tout & par tout, sans qu'il fallist plus y retourner. Et ledit sieur Vestrio nous laissa vne copie du dispositif écrite & apostillée de sa main, & collationnée avec celle qui se retenoit. Laquelle coppie à nous laissée, Monsieur de Sillery m'enuoya demander par le sieur Breste son Secretaire Vendredy comme il vouloit aller à l'audience, & ie la luy enuoyay. Ledit escrit a depuis esté grossoyé & expédié, & vous est à present enuoyé par Baptiste Mancini. J'espère qu'il sera trouué de bonne façon, & vous contentera: sur l'exécution duquel i'ay dressé quelques memoires & instructions, dont vous vous seruirez autant comme elles le vaudront: outre le contenu desquelles i'ay estimé deuoir icy mettre en consideration trois ou quatre choses, pour y auoir tel esgard qu'il vous semblera.

Premierement, i'estime qu'il seroit bon pour la direction & conduite de cét affaire, d'en faire, tant qu'il durera, comme vn petit Conseil de trois personages, dont Monsieur le Chancelier seroit vn & le premier, avec deux autres, qui s'instruisissent s'ibien du fait & du droict, qu'ils possedassent l'vn & l'autre comme il fait, & que ces trois se trouuassent ensemble vne heure du iour, pour aduiser à ce qu'il faudra y faire de iour en iour, iusques à ce qu'il sera du tout accompli.

Secondement, ie pense qu'il soit expedient, & quasi necessaire, de commettre à la sollicitation de cét affaire dès le commencement quelque bon praticien, homme de bien, sage, & experimenté, & de quelque qualité, pour la grandeur & reputation de l'affaire & des parties, lequel face les

N N n 2

diligences requises tant enuers lesdits trois du Conseil, en prenant & exécutant leurs commandemens, & leur rendant compte de temps en temps de ce qu'il aura fait, & les aduisant de tout ce qui s'y passera, qu'enuers les Commissaires, les informant, sollicitant, & observant, & enuers les témoins, les langayant, & assurant, & produisant; & enuers le Notaire ou Greffier, prenant garde que tous les actes & procédures soient dressées & faites à temps, & en bonne & deuë forme, & enuers toutes autres personnes que besoin sera: & outre les diligences qui se feront, il y aura encor ce bien, que par cemoien quand le tout sera conduit de mesme main, toutes choses se rapporteront bien ensemble, & s'en trouveront mieux faites en toutes façons.

En troisieme lieu, il me semble bon de pouruoir aussi dès le commencement, à ce que le Notaire ou Greffier que Messieurs les Commissaires prendront, & dont ils ne se peuuent passer, soit honneste homme, secret, & loyal, & bien entendu, comme choses qui importent grandement à la validité, seureté, & reputation des actes qui doiuent servir à vn effect de si grande importance, & estre gardez à perpetuité, & veus des premiers hommes du monde. Et semble qu'il ne se puisse rien faire en cét affaire, que ledit Notaire ou Greffier ne soit arresté, car deslors que le rescrit sera présenté aux Commissaires, qui sera la premiere procédure, il faudra que ledit Greffier y interuienne, pour retenir acte de la presentation & requisiuon qui sera faite ausdits Commissaires de la part du Roy & de la Roynie Marguerite, & de la responce qu'ils feront, & de tout ce qui s'y passera.

En quatriesme lieu ie pense qu'il sera bon que de toutes choses qu'on aura à faire avec les trois Commissaires ensemble, on traite premierement & à part avec Monsieur le Cardinal de Ioyeuse, dont il pourra venir plusieurs profits pour le bien de cét affaire, lequel ie prie Dieu vouloir conduire à bonne fin. A tant, &c. Monsieur, &c. De Rome, ce 26. Septembre 1599.

## A MONSIEUR DE VILLEROY.

### CLXXXIV.

**M**ONSIEUR, Par le dernier ordinaire qui partit d'icy pour Lyon, ie respondis le 22. Septembre aux lettres qu'il vous auoit plu m'escire le 28. & 29. d'Aoust, & depuis ie vous escris encores le 26. par Baptiste, qui partit de ceste ville le 28. apres dîner, avec le rescrit du Pape pour la declaration de la nullité du mariage du Roy. Maintenant i'en ay que vous escire, n'ayant receu aucune lettre de vous par l'ordinaire de Lyon, qui arriua le premier de ce mois, & n'ayant plus à vous rendre compte touchant ledit affaire du Roy, lequel par le rescript fut entièrement acheué quant à Rome, où vous n'avez plus rien à faire pour ce regard; ains tout ce qui reste à faire sera par delà, où ie m'assure que vous ferez encor mieux que nous n'auons fait par deçà. Ceste

Lettre donc sera pour garder la coustume & le deuoir de vous escrire, plus que pour autre chose que i'aye à vous faire sçauoir. Et toutesfois il me souuient bien à propos, dont ie suis bien aise, de vous escrire que le sieur Bartholomeo Cenami de Lucques est party de ladite ville pour s'en aller avec sa femme & enfans, demeurer à Paris, pour y seruir le Roy de tout ce qu'il pourra: sur laquelle occasion ie me suis obligé de vous témoigner, que outre ce que vous sçaez de ses deportemens pendant qu'il a esté près de vous, il a fait & dit depuis en Italie tout ce qu'il a pû & sceu pour le seruice & reputation du Roy & de la Couronne, & encores gratifié les François en leur particulier de tout ce qu'il a pû, & entre autres, ie suis tenu de vous dire que encores qu'il ne m'ait iamais veu, & que ie n'aye iamais rien fait pour luy, toutesfois pour auoir eu information que ie suis fidele seruiteur de sa Majesté, tout aussi tost qu'il sceut ma promotion à la dignité de Cardinal, il m'envoya vne lettre de change pour prendre en ceste ville deux mil escus, pour m'en ayder en mon besoin. Et encores que ie n'estimay point deuoir vser de ceste sienne courtoisie, si est-ce que ie luy en sçay tant de gré, que ne pouuant faire mieux pour ceste heure, i'ay desiré que le Roy & vous sceussiez ceste particularité, & vous supplie de toute mon affection, qu'à l'estime que vous faisiez desia de luy, & à la bonne volonté que vous auez de faire pour luy, il vous plaise adiouster tout ce que pourra enuers vous la plus affectionnee recommandation, & plus longue priere du plus obligé & reconnaissant seruiteur que vous ayez en ce monde. A tant, &c. Monsieur, &c, De Rome, ce 6.d'Ocobre 1599.

## A MONSIEVR DE VILLEROY.

CXC.

**M**ONSIEVR, Par les lettres que i'ay receues du Roy & de vous des dix-huictiesme & vingtiesme Septembre, i'ay veu comme sa Maiesté a eu agreable que le Pape m'eust donné l'Abbaye de Nant, ie ne pouuois attendre autre responce de la bonté & benignité de sa Maiesté, ny de la faueur & protection qu'il vous plaist me departir auprès d'elle, dont ie vous remercie tres-humblement, & de toute mon affection, comme aussi de ce qu'il vous a pleu en aduertir Messieurs les autres Secretaires d'Estat. Ce sont tousiours des obligations que vous acquerez de plus en plus sur moy, & nouuelle matiere & sujet de la gratitude que ie vous rends en mon ame, & du desir qui m'a tousiours accompagné, qu'il se presente quelque bonne occasion de la vous monstrier en effect par quelque bon seruice. Maintenant que i'ay vostre responce, ie feray expedier mes bulles, & puis les enuoyeray en Cour pour auoir les lettres d'attache. Monsieur le Cardinal de Loyeuse d'un costé, & le rescript du Pape que le courrier Baptiste Mancini vous a porté d'autre, seront arriuez en Cour quasi en mesme temps, comme vous desirez, de sorte que tous les Commissaires

s'estans trouvez en Cour à l'arriuee dudit rescrit, il n'y aura en pour ce regard aucune occasion de retardement; comme j'espère aussi que toutes autres choses s'y trouueront disposees par delà à vne bonne & prompte expedition de cét affaire, que nous auons d'icy recommandé à Dieu, sans y auoir rien plus à faire par deçà.

Le partement de Monsieur le Cardinal de Gueuare d'icy, s'est rencontré au temps que les galeres d'Espagne s'en retournoient de Naples, qui a esté cause qu'il a changé son premier aduis d'aller par terre, & n'aura besoin de passer en France, si ce n'est de toucher à la coste, & se rafraischir en quelque ville maritime. Je vous remercie tres-affectueusement & humblement de l'ordre que vous auiez fait donner par le Roy touchant ledit Cardinal, sur ce peu que ie vous en auois escrit.

Entre autres matieres que j'ay à expedier pour la Vice-Protéction, il y a deux Eueschez, dont les nommez n'ont que vingt-cinq ans chacun, faict que par les Concordats il en faille vingt-neuf. L'un Euesché en Tullies en Limosin pour vn fils de Monsieur de Genouillac; l'autre de Vannes en Bretagne, pour vn fils de Monsieur Martin, Thresorier de France en la generalité de Guyenne à Bordeaux. Sur la priere que ie fis au Pape de les vouloir dispenser sur le deffaut d'aage, sa Sainteté en enuoya les memoires à la Congregation des matieres consistoriales. Les Cardinaux de ladite Congregation ont esté d'aduis que sa Sainteté dispesast ces deux pour ceste fois, & qu'elle exhortast le Roy de nommer cy-apres personnes d'aage en vne charge si importante, & mesme en la France, qui auoit besoin de personnes d'aage pour remettre les choses apres tant de desordres: ce que sa Sainteté me dit le douziesme de ce mois, comme il vouloit partir pour retourner à Frescati, m'enjoignant expressément de l'escrire au Roy de sa part, & de le prier de ne nommer, mesmement aux Eueschez, personnes qui n'eussent au moins l'aage porté par les Concordats, qui est moindre que celui qui est prescript par les saints Décrets, & le droit commun. Je ne maquay d'excuser sa Majesté de plusieurs bonnes excuses, mais sa Sainteté ne laissa pour cela de persister à me commander d'en escrire bien expressément. L'obtins de sa Sainteté qu'une nouvelle information faite à Paris pour la justification de Monsieur Benoist, touchant vne traduction de la Bible qu'il fit long temps y à, setoit veüe, pour apres l'auoir trouué suffisamment déchargé, comme il me semble qu'il est, le pouruoir de l'Euesché de Troyes. Ladite information est à present entre les mains de Monsieur le Cardinal Santa Seuerina, que ie fais solliciter afin qu'il la voye au plustost, & que ce bon Seigneur soit mes-huy depesché d'une si longue poursuite.

Le Pere General des Iesuites vint hier vers moy, & me parla de la plainte que le Roy auoit faite au Pere Lorenzo Maggio, de quelques vns des leurs qui s'estoient logez en certains lieux pendant qu'on traitoit de leurs affaires auprès de sa Majesté, dont il me monstra estre fort marry, m'assurant, & me faisant voir par quelques extraicts de lettres qu'il auoit cy-deuant esrites, qu'il leur auoit tousiours ordonné, que quelque presse que les villes ou les Seigneurs des pays leur fissent, & quelque assurance qu'on leur donnast d'obtenir le consentement du Roy, ils n'acceptassent aucun lieu, si ledit consentement de sa Majesté n'estoit préalable. Que pour l'aduenir aussi il don-

voloit tel ordre que cela ne se feroit plus, & escriroit audit Pere Maggio de donner au Roy toutes les satisfactions, & pour le present, & pour l'aduenir, que sa Majesté voudroit, & de prendre sur soy, & de remettre sur luy General toute l'enuie & mécontentement qui en pourroit venir és villes, sans que sa Maieité y participast aucunement ; Que ledit Pere Maggio demeurast par-delà autant que sa Maieité voudroit ; & quand sa Maieité trouueroit bon qu'il partist, il laissast en son lieu & charge tel autre que sa Maieité voudroit : Me prioit de faire voir en Cour le déplaisir qu'il en auoit, & ceste sienne bonne volonté de seruir le Roy en tout ce que sa Maieité commanderait, & d'aider entant que ie pourrois, à ce que leur requeste & l'intercession du Pape eust l'effet qu'on desiroit. C'est le sommaire de ce qu'il me dit : à quoy ie n'ay qu'adiouster du mien, sinon que ie vous prie d'aider & favoriser cét affaire, autant que vous iugerez estre pour l'honneur de Dieu, & pour le bien de la Religion Catholique & du Royaume, & pour le seruice & reputation du Roy. A tant, &c. Monsieur, &c. De Rome, ce 20. d'Octobre 1599.

## A MONSIEVR DE VILLEROY.

## CXCI.

**M**ONSIEVR, I'oubliais à vous escrire qu'il y a quelques iours que le Commissaire de la chambre Apostolique me vint trouuer de la part du Pape, pour m'informer d'un certain differét qu'il y a entre les fermiers du sel de Pecquais en Languedoc, & ceux du sel de Berre en Prouence, pretendans lesdits fermiers de Pecquais, que ceux du Comté de Grignan en Prouence, & d'autres lieux voisins, se doiuent pouruoir de sel de Pecquais, & non de celuy de Berre ; & les fermiers du sel de celuy de Berre, soustenans au contraire que ceux du Comté de Grignan, & d'autres lieux voisins, se doiuent pouruoir de sel de Berre, & non de celuy de Pecquais, alleguans ceux-cy des contrats entre la Couronne de France & le Comté de Prouence, & possession d'un si long temps qu'il n'estoit memoire du contraire, & ayant ioint avec eux, non seulement les habitans dudit Comté de Grignan, & desdits lieux circonuoisins, mais aussi tous les trois Estats de Prouence : surquoy il y a eu depuis peu de temps quelque Arrest du Parlement, & de la Chambre des Comtes d'Aix, en faueur desdits Fermiers de Berre, & d'autre costé vne ordonnance de Monsieur de Messe au contraire, en faueur de ceux de Pecquais. A ce different le Pape & l'Enesque de Cauaillon, qui sont Conseigneurs par moitié de ladite ville de Cauaillon, ont interest, d'autant que le sel qui est porté de Berre audit Comté de Grignan, & lieux voisins, passe par ladite ville de Cauaillon, & y seiourne en un magazin qui y est estably, & qu'ils baillent à ferme à des Marchands qui y reçoient ledit sel, & puis l'enuoyent audit Comté de Grignan, & autres lieux voisins dudit Comté : & pour ce ledit Sieur Commissaire, de la part de sa Sainteté, me recherchoit d'escrire au Roy, qu'il pleust à sa Maieité ne per-



mettre qu'il fust rien innoué au preiudice des Estats de Provence, & de la Chambre Apostolique, & dudit Euesque de Cauaillon. Surquoy ie n'ay autre chose à vous dire, sinon que ie me remets des merites de ceste cause à ce qui s'en trouuera; & au reste que c'est chose digne de tout Prince, & mesmement d'un si grand Roy comme le nostre, de faire iustice à chacun, & principalement au Pape, qui est Vicair de nostre Seigneur Iesus Christ, & particulièrement à nostre S. Pere, Clement VIII. qui sied auourd'huy au S. Siege, auquel nous auons de tres-grandes obligations, & duquel nous auons affaire tous les iours, comme vous sçauetz trop mieux, & partant ie ne vous en diray autre chose, & feray icy la fin de la presente, en retournant ma priere à Dieu qu'il vous donne, &c. Monsieur, &c. De Rome, ce vingt vn d'Octobre 1599.

## A MONSIEUR DE VILLEROY.

CXCII.

MONSIEUR, L'ordinaire de Lyon arriué ce iourd'huy n'a point apporté de vos lettres, & les dernieres que i'ay de vous sont du vingtiesme Septembre, tellement que n'ayant aucune responce à vous faire, ny autre chose à vous escrire qui ne soit de la charge de Monsieur l'Ambassadeur, ceste-cy ne sera que pour garder la coustume de vous escrire par tous les ordinaires, & pour vous saluer, comme ie fais de mes plus humbles recommandations à vostre bonne grace, priant Dieu, &c. Monsieur, &c. De Rome ce 5. Nouembre 1599.

## A V R O Y.

CXCIII.

SIRE,

Par celle qu'il a pleu à vostre Maiesté m'escrire du quatorziesme d'Octobre, i'ay veu comme elle a pris en gré le seruice que ie luy ay rendu au fait de la dissolution de son mariage: en quoy ie recognois vostre generosité & bonté accoustumée, & en demeure d'autât plus encouragé à faire mieux cy apres; n'ayant en ce monde autre mire, apres Dieu, que de faire à vostre Maiesté seruice agreable, & vtile à vos affaires & au public. Je ne faudray de dire à nostre saint Pere, & à Monsieur le Cardinal Aldobrandin ce que vostre Maiesté me commande sur ceste occasion. Mais i'ay voulu en laisser faire premierement Monsieur l'Ambassadeur, iacoit que i'en eusse bonne commodité hier au matin qu'il y eut Consistoire, & qu'auant que sa Sainteté descendist

descendist pour le tenir ie parlay à elle d'autres choses, & spécialement de la dispense du mariage de Monsieur le Connestable avec la tante de sa derniere femme, suivant le commandement que vostre Maiesté m'en faisoit par vne autre lettre du huietiesme du mesme mois d'Octobre; qui est vn affaire tres difficile, d'autant que la tante enuers sa niepce tient lieu de mere: & n'estoit l'intercession de vostre Maiesté, & qualité & merites de Monsieur le Connestable, & qu'il se trouue qu'il a autres-fois esté dispensé en quelque cas semblable, le Pape n'eust en façon du monde voulu ny osé accorder ceste dispense. Mais les considerations susdites seront qu'il l'octroyera, & que Monsieur le Connestable en sera consolé, suivant le memoire & requeste que i'en dressay leudy dernier, laquelle Monsieur l'Ambassadeur presenta à sa Sainteté le lendemain Vendredy avec les lettres de vostre Maiesté, à laquelle ie prie Dieu qu'il donne, SIRE, &c. De Rome, ce seiziesme Nouembre 1599.

## A MONSIEUR DE VILLEROY.

## CXCIV.

**M**ONSIEUR, Comme le rescript que Baptiste Mancini vous porta, & la dépesche qui l'accompagnoit vous donne du contentement en Cour, aussi le tesmoignage qu'il vous a pleu nous en rendre par vostre dépesche du quatorziesme d'Octobre nous a grandement resiouïs Monsieur l'Ambassadeur & moy, qui ne desfrons rien tant apres Dieu, que la satisfaction de sa Maiesté & de vos semblables, & le bien de son service & du Royaume. Au demeurant, ie croy fort aisément que vous vous trouuez fort empeschez au fait des Iesuites, & mesme pour la varieté des aduis de ceux qui ont à conseiller le Roy: surquoy ie n'ay rien à adiouter à ce que ie vous en ay escrit cy-deuant à diuerses fois, sinon que le service du Roy & sa reputation, outre le contentement du Pape, & autres considerations, requierent qu'on y prenne vne bonne & équitable resolution. Monsieur le Cardinal Aldobrandin sera fort aise, & le Pape mesme, de la dépesche qu'il a pleu au Roy faire à Monsieur de Vannes de sa ville de Toul, en faueur du Soubz-dataire touchant l'Abbaye de sainct Leon de Toul, & s'il est besoin de faire quelque autre chose cy-aprés, la faueur qu'il vous plaira y rapporter sera tres-bien employee: car outre que le droit est du costé dudit Soubz-dataire, & que le Pape & le sainct Siege y ont intereff, on a tous les iours besoin de l'industrie & faueur de cet officier, par l'aduis duquel sont le plus souvent admises ou rejettees les supplications qui se presentent en dataire, soit pour les benefices, ou pour les dispenses, ou pour autres telles choses.

Ie ne puis vous remercier assez du soing qu'il vous a pleu prendre de mes blancs, & si Monsieur de Rosny vous tient la promesse qu'il vous a faite, celame viendra à porpos plus que ie ne vous scaurois exprimer, vous asseurant en foy d'homme de bien, que depuis quatre ans qu'il y a que par le

bien fai& du Roy , & par vostre moyen i'ay l'Euesché de Rennes, ie n'en ay point receu mille escus par an, & qu'il n'en a point esté baillé pour m'enuoyer en tous lesdits quatre ans que quatre mille cinq cens escus en tout, dont il n'en est point venu quatre mille en mes mains, pour la cherté des chages & remises; & n'eust esté qu'il s'est rencontré qu'en ceste annee que i'ay esté fait Cardinal, i'ay esté payé de quatre mille escus que Monsieur le Cardinal d'Esté me laissa treize ans y a, i'eusse donné du nez en terre, tant d'attirail & de bagage ceste dignité traîne après soy du commencement, outre la dépence ordinaire qui suit pour tousiours.

Monsieur le Secretain du Pape, qui est personnage de grande vertu & doctrine, a composé vn liure sur l'occasion du voyage de sa Sainteté à Ferrare, où il traite de l'origine & de la cause de la coustume qu'ont les Papes de porter le sain& Sacrement deuant eux quand ils vont en quelque long voyage, & d'autres choses appartenantes audit voyage de Ferrare. Il en a voulu enuoyer vn exemplaire au Roy, avec vne sienne lettre d'oit il m'a chargé: ie vous prie qu'il en recoiue responce, par laquelle sa Majesté luy resmoigne le gré qu'elle luy aura sçeu de ce present, & le bon rrapport que des gens sçauans qui sont près d'elle luy auront fait de la doctrine & valeur de l'Auteur; c'est la recompense ordinaire que telles gens demandent & attendent de leurs labours, & de tels presens. Il y a par deçà vn Bourguignon de la Comté qui a trouué vne inuention touchant les moulins tant à sec qu'à eau, pour leur faire moudre en moins de temps plus grande quantité de grain qu'ils ne faisoient auparauant, dont il a fait experiance par deçà, & luy a t'on accordé priuilege pour quinze ans, de la teneur portee par la copie que ie vous en enuoye. Il desireroit auant que publier ladite inuention auoir vn semblable priuilege du Roy par la France & pays de son obeyssance, & m'a fait requerir par quelques miens amis de vous en vouloir escrire, & bailler vn memoire adressant au Roy, qui sera avec la copie dudit priuilege; surquoy ie n'ay à vous dire autre chose, sinon ce que vous sçavez trop mieux de vous mesmes, que les beaux esprits qui trouuent quelque chose vtile au genre humain, méritent d'estre fauorisez & graciez.

A ce que i'escris hier au Roy de l'affaire de Monsieur le Connestable, ie vous adiouste maintenant que le Pape en a signé la supplication ce iourd'huy, & a de son propre mouuement commandé à son Dataire de ne rien demander, ny prendre aucune composition, en quoy il n'y alloit pas moins de dix mille escus, attendu la qualité du fait & des parties; & si c'eust esté vn de ces grands d'Espagne qui se plaisent à espouser des parentes & des aliees, il n'en eust pas payé moins, si toutesfois il l'eust obtenu, à quoy il y eust eu trop à faire. A tant, &c. Monsieur, &c. De Rome ce 17. Decembre, 1599.

## A MONSIEVR DE VILLEROY.

CXCV.

**M**ONSIEVR; Le 27. Novembre arriva en ceste ville le courier Baptiste Mancin avec vostre dépesche du septiesme, par laquelle nous auons appris le bon estat auquel estoit l'affaire du démariage du Roy, dont nous sommes grandement resioüis, ainsi que i'escriis plus amplement à sa Maiesté, par la response que ie fais à la lettre dont il luy a plu m'honorer.

Le mesme Baptiste m'a fidellement rendu les deux mille escus d'or en or dont il vous auoit plu le charger, faisant la moitié des quatre mille qui ont esté receus de Monsieur le Thresorier de l'Espargne, pour la pension qu'il a plu au Roy m'ordonner, dont ie me sens infiniment obligé à sa Maiesté, outre les autres biens precedens qu'il m'a fait; & tant s'en faut que ie pense auoir perdu à la reductiõ qui a esté faire de quatre mille escus, en laissant les quatre cens, que ie trouue y auoir gaigné, m'estant payee ladite pension en deniers comptans, d'autant que si c'eust esté en assignations, il m'eust coûté beaucoup plus de quatre cens escus pour la reconurer, outre l'arrente & le hazard de l'aduenir. Ainsi m'asseury-je que ladite reductiõ a esté faite pour autres bonnes considerations, quand ee ne seroit que pour faire le compte rond, pour ce que le Roy a à pourueoir à vne infinir d'autres personnes, & à des despenses immenses. Mais ie ne sçay comment vous remercier, vous qui nõ seulement m'avez procuré ce bien enuers sa Maiesté, cõme tous les autres que i'en ay receus, & me l'avez fait auoir en deniers comptans, & en temps auquel i'en auois le plus de besoin; mais encores avez daigné vous charger des blancs, & auoir le soin de faire les diligences vous mesmes, tant pour le recouurement desdits deniers, que pour le change en or, & pour l'enuoy & port par deçà; qui sont choses à la verité bien correspondantes à vostre generosité & bonté, & à la constance de vostre faueur & affection enuers vostre creature, mais trop au dessoubz de vostre dignité, & de vos occupations publiques & continuelles, & qui ne se font pas mesme pour les plus proches parents, & pour les plus intimes amis qu'on aye. Bien vous diray-je que pour le moins ie les cognois & recognois en mon interieur, si ie ne puis au dehors de paroles, & moins par seruice cõme ie desirerois, & cõme ie prie Dieu m'en donner les occasions & les moyens.

Le Seigneur Leon Strossi oncle de Madame la Marquise de Pisani, m'est venu voir pour me dire & requerer de vous tesmoigner le sètimēt qu'il a du biē & honneur qu'il vous plaist faire à ladite Dame, la cõsolār en sō afflictiõ, & ayāt soin d'elle & de sa fille, & les tenanc en vostre protectiõ; en quoy, outre que vous faites choses dignes de vostre generosité accoustumee enuers la veufue & l'orphelline d'un si honorable Cheualier, & si fidele seruiteur du Roy & de la Couronne, cõme a esté feu Monsieur le Marquis de Pisani, & digne encores d'une Dame tres-vertueuse & estrangere de nation, mais si

〇〇〇 2

Françoise d'affection qu'à peine peut-elle estre surpassée par ceux mesmes qui sont naiz au milieu de la France, vous obligez deux tres-honorables & tres-illustres maisons des Sauelli & des Strossi, & tous leurs parens, alliez & amis, qui en celebreront & beniront par deçà non seulement vostre personne, mais aussi toute nostre nation.

En l'ordre de saint Dominique, & au pais de Toscane il y a eu autrefois vne Religieuse sainte appelée Sancta Agnese di Môte Pulciano, de laquelle par permission du Saint Siege on fait la feste en tout le Diocese de Môte-Pulciano, encores qu'elle n'aye point esté canonizée. Les Religieux de cet ordre desireroient obtenir du Pape que la feste de ladite sainte se fît en tous les Monasteres dudit ordre tant des Religieuses que des Religieux, comme elle se fait au Diocese de Monte Pulciano, & Messieurs les Cardinaux Taruggi & Bellarmino, qui sont natifs de ladite cité de Monte-Pulciano, secondent aussi le desir vniuersel de tout cet ordre. Et d'autant que Madame de Fonteurault est de cet ordre, & tante du Roy, ils ont estimé qu'elle seroit vn moyen propre pour faire que le Roy escriuist à nostre saint Pere le Pape, & ordonnast à Monsieur de Sillery son Ambassadeur de faire instance auprès de sa Sainteté, à ce qu'il luy pleust permettre que la feste de ladite Sancta Agnese de Monte-Pulciano soit faite en tous les Monasteres dudit ordre de saint Dominique, soient-ils de Religieux ou Religieuses; & mesmes d'auiant que encores qu'audit ordre il y ay eu plusieurs Saints, toutesfois de Saintes il n'y en a que ceste-cy. Ils en firent autresfois escrire à Madame de Fonteurault, & depuis peu de iours luy en ont fait escrire de nouueau, & m'ont requis moy d'en escrire en Cour à ce qu'on y fauorise la requeste qu'elle en fera auprès du Roy. C'est vne chose de pieté & de deuotion, qui ne scauroit estre que bien prise par deçà de la part de sa Maiesté, & mesmement elle se mouuant par la priere d'une Dame si proche de sang, & Religieuse dudit ordre. Aussi ne parle t'on point de faire canoniser ladite Sainte, en quoy il iroit grande despence, mais seulement de faire la feste de ladite Sainte es conuents de son ordre, encores qu'elle ne soit point canonisée, comme ils disent auoir des exemples d'autres Saintes, desquelles on fait la feste en autres ordres desquels elles ont esté, iacoit qu'elles n'ayent esté canonisées.

D'ailleurs i'ay esté requis de vous prier de moyéner enuers le Roy que lors que Monsieur de Sauoye sera en Cour, s'il y va, sa M. face office enuers son Altesse pour la deliurée de Madame l'Amiralle. I'ay respôdu que ie scauois que vous vous y employeriez tres-volôriers, me souuenant que vous m'auiez autresfois recommandé ceste Dame à moy-mesme, pour faire office auprès du Pape pour elle; mais que cela dépendoit de ce à quoy le Roy & Monsieur de Sauoye demeureroient de leur differét du Marquisat de Salusses; que si ils en étoient d'accord, c'est à dire si Monsieur de Sauoye faisoit ce qu'il doit, tous tels offices se pourroient en consequence faire par sa M. autrement ie pensois que sa Maiesté n'estimeroit possible pas en deoir requérir ledit Duc, & mesmement l'ayant chez soy, ce qui le feroit aller plus retenu; que neantmoins il y auroit tousiours moyen de faire cet office enuers ledit Duc par M. le Connestable, & par autres Seigneurs qui ont parenté ou alliance avec ladite Dame, & avec sa fille. Je laisse les autres choses à Monsieur l'Ambassadeur, & vous adiouteray seulement vne clause de ce qui est de mon fait. Le Roy

Monnay aduis dernièrement comme i'auois commencé l'exercice de la Vice-protection par la proposition en consistoire de l'Euesché de Frejus; & depuis vous fis sçauoir comme i'auais obtenu la dispense d'aage pour les deux nōmez aux Eueschez de Tulles en Limosin, & de Vannes en Bretagne, que i'ay aussi expediez. La dernière expedition a esté de l'Archeuesché d'Auch, que ie proposay en Consistoire le 24. Nouembre par Monsieur Destrappe, pour lequel i'obtiens encor du Pape quelques iours auparauint moderation de la taxe à deux mille ducats, qui ne sont que la cinquiesme partie de la somme à laquelle ledit Archeuesché est taxé. Il y a eu encore deux Abbayes expediees, l'une de saint Sain au Diocese de Poictiers, l'autre de saint Iean en vallee près Chartres. Atant, &c. Monsieur, &c. De Rome ce 5. Decembre, 1599.

## A MONSIEVR DE VILLEROY.

## CXCVI.

**M**ONSIEVR, Je recens auant hier la vostre qu'il vous pleut m'escire le vingt-sixiesme Nouembre, & ay esté tres-aïse d'entendre que l'affaire du demariage du Roy cōtinuë d'aller de bien en mieux, priât Dieu quenous en voyons bien tost la bonne & heureuse fin que les bons commencements & grands progres nous promettent. Les causes pour lesquelles le Roy n'a pû encore prendre resolution sur le fait des Iesuites; & du Concile de Trente, que i'ay veuës en la depesche de sa Maïesté à Monsieur de Sillery, sont à la verité de tres-grande consideration, & ie ne me doute point qu'elles ne soient bien prises du Pape, en attendant qu'on le contente fait au plustost que faire se pourra, comme i'estime que ce soit plus le profit du Roy, & de son Royaume, que nō pas de sa Sainteté; & mesmemēt du Concile, lequel quand il ne seroit pris que moralemēt & politiquement, encore porteroit il infinis biës au tēporel mesme, & à l'estat vniuersel de la Frâce, s'il y estoit receu & pratiqué. L'executeray tres-fidellemēt & tres-volontiers le cōmandement qu'il plaist à sa Maïesté me faire, touchât ceux qui se trouuerōt pareille nommez aux Eueschez, sans auoir l'aage porté par les Concordats, & suis tousiours à faire expedier Mōsieur Benoist de l'Euesché de Troyes, dōt ie n'ay encore pû venir à bout. L'Abbaye que le Roy a donnée à Monsieur de Vulcob n'est en taxe à cent ducats, lesquels se reduisent à cinquante, pour estre ladite Abbaye *IN PATRIA REDUCTA*: De demander moderation au dessous de cela, la chose ne le vaut quasi pas, & on ne le trouue point bon icy, de gratis entier on n'en donne guere plus, & moins de ces choses de petite taxe. Toutesfois les considerations que vous me representez, & que d'ailleurs ie sçay estre tres veritables, & l'affection qu'à si bon droit vous y apportez, nous inspireront quelque bonne insinuation, en parlant au Pape, & au Dataire, avec lequel il y a encore plus

à faire. Aussi ne vous ay-je pas mis ce que dessus pour m'en excuser, & moins encore pour encherir la besongne, mais seulement afin que vous sçachiez comme les choses se passent.

Je vous remercie bien humblement de la réponse qu'il vous a plu me faire à ce que ie vous auois escrit par commandement du Pape, touchant le différent qui est entre les fermiers du sel de Pecquais en Languedoc, & ceux du sel de Berre en Prouence, auquel différent sa Sainteté & l'Euesque de Cauaillon ont interest. Je seray sçauoir la réponse au Commissaire de la chambre, qui m'en parla de la part de sa Sainteté, n'ayant à vous dire autre chose là dessus, sinon que l'Euesque de Cauaillon qui est à present, & vous ceux de sa maison, ont tousiours esté bien affectionnez à la France, & à toute nostre nation. Mais à mesure que ie vous responds, il s'offre à moy nouuelle matiere & occasion de vous remercier, comme des lettres d'attache qu'il vous a plu signer pour l'Abbaye de Nant en Rouëgue, & de la tres-gracieuse réponse qu'il vous a plu faire à la lettre que le sieur Marechal vous bailla de ma part, & du soin qu'il vous a plu prendre de faire deliurer à Monsieur de Sansey le reste de quatre mille escus de la pension qu'il vous a plu me faire donner par le Roy. Qui est tout ce que i'auois à répondre à vostre lettre du vingt-sixiesme Nouembre.

Monsieur de Sillery est en peine de ce qu'on ne luy donne de delà moyen d'accomplir la promesse qu'il a faite à Monsieur le Cardinal Aldobrandin, touchant la partie dont il vous a cy deuant escrit. Il importe au service du Roy & au bien de ses affaires, que la creance & autorité soit conseruee à son Ambassadeur, & que ledit seigneur soit contenté de ce qui luy a esté promis. Quand aux autres choses dont il n'y a point de promesse, l'attente n'en est pas si dangereuse.

Par ma dernière lettre ie vous escriuis comme i'auois esté recherché de vous ramenteuoir de faire quelque office pour la deliurance de Madame l'Amirale, quand Monsieur de Sauoye seroit prés le Roy : mais nous auons depuis appris que Dieu l'auoit deliuree d'une autre sorte, en l'appellant à soy : elle a fait vne tres-chrestienne & belle fin. Maintenant il reste qu'on pouruoye à la fille en la meilleure sorte qu'on pourra : mais il y a danger que tant plus le Roy & les siens se montrent soigneux d'elle, elle en soit d'autant plus maltraitée. Le comble de ses desirs seroit d'estre en France, hors la puissance de ceux qui bayent & haïssent apres ses biens : mais si on s'en aperçoit, on l'en tiendra plus court.

Il y a par deçà Monsieur Pichot Docteur en Theologie, neveu du feu Euesque de Salusses, auquel le Roy a expédié deux breuets, & ses lettres de nomination à l'Euesché de Salusses. Il desire que le Roy s'en souuienne, afin de ne promettre ledit Euesché à quelque autre, s'il se faisoit quelque accord du Marquisat pendant que Monsieur de Sauoye sera pres sa Maïesté.

Cette lettre vous sera renduë par Monsieur de Leon, fils de Monsieur Brulart, & Conseiller du Roy en la Cour de Parlement, lequel par son bel esprit & bonnes manieres, & pour la prouision qu'il a ia faicte des bonnes lettres & sciences, & d'experience aux choses du monde autant que son age en est capable, nous donne esperance certaine qu'il pourra vn iour seruir le Roy & le public en charge plus grande que d'Abbé, ny de Con-

Teiller en la Cour. Atant ie prie Dieu, &c. Monsieur, &c. De Rome ce dix-septiesme Decembre 1599.

## A MONSIEVR DE VILLEROY.

## CXC VII.

**M**ONSIEVR, Il y a certaine sorte de gens qui ne perdent rien à faute de demander, & qui encore ne prennent point raison en payement, quand on s'excuse honnestement enuers eux : ce que vous deuez auoir expérimenté infinies fois en vostre vie, pour le lieu que vous tenez si longtemps y a prés nos Roys. De ceste sorte est vn Gentil-homme d'Ancone, Couppier de Monsieur le Cardinal Rusticucci, appellé Girolamo Raccani, lequel ces anneés passées trouua moyen par la faueur de son maistre de se faire Cheualier de Malte, sans auoir iamais esté à Malte. & sans intention d'y aller, ains de continuer à seruir en ceste Cour comme il fait ; & à present que le grand Maistre de Malte entrera au commencement du mois de May prochain en seconde grace, qu'ils appellent, pouuant de cinq en cinq ans dōner vne Commanderie de grace de chachun Prieuré de ceste Religion, voudroit auoir dudit Grand Maistre vne desdites Commanderies de grace par l'intercession du Roy : & sans m'auoir parlé oncques auparauant, m'a fait requerir par vn Prelat François, & puis requis luy mesme que ie voulusse m'employer enuers le Roy, à ce que sa Maiesté escriuist audit Seigneur Grand Maistre qu'il le pouruoie d'une des premieres Commanderies de grace qui vacqueront en Italie és Prieurez de Rome, ou de Lombardie, ou de Venise, ou bien d'une expectatiue desdites Commanderies en l'un desdits trois Prieurez. Je luy ay respondu que ie voudrois luy faire plaisir, mais qu'il me sembloit que le Roy auroit grande occasion de refuser d'escrire de telle chose, & que ie n'oserois l'en prier, ny le luy conseiller s'il m'en demandoit mon aduis, d'autant que ce seroit escrire pour vne Commanderie d'Italie, & non de France, & à vn Grand Maistre Espagnol, & non François. Que si c'estoit pour vne Commanderie de France, cela me sembleroit plus faisable, ou si c'estoit vn Grand Maistre de nation François, sa Majesté pourroit prendre vn peu plus de liberté avec vn sien subiect, encore que ce fust pour chose non de France : mais estans les choses de la façon qu'elles sont, ie ne voyois point que le Roy en peult escrire avec la dignité qu'il faudroit, ny moy l'en supplier sans inciuilité & indiscretion. Ceste responce deuoit contententer ce poursuivant, mais tant s'en faut qu'il ait desisté de poursuiure, qu'il a encore adionsté à sa premiere demande deux choses, l'une, qu'outre la lettre que le Roy en escriroit audit sieur Grand Maistre, sa Maiesté en escriuit encore vne autre au Vice-Chancelier de la Religion, appellé le Commandeur Otho Bosio, à ce qu'il rendit la lettre au Grand Maistre, en temps & lieu, l'en fit souuenir, & sollicitast ledit Grand Maistre de la part de sa Maiesté,



En somme ie ne m'en sus peu defaire sans dire que i'en escrirois : mais comme ie l'ay dit fort froidement, & par certaine forme, & m'en repens: aussi ne vous ay-ie escrit ce que dessus, sinon que pour pouuoir dire sans mentir que i'en ay escrit, ne me souciant point tant de seruir aux desirs indiscrets d'autrui, quoy que ie face volontiers plaisir quand ie voy le pouuoir faire, comme de ne requerrir le Roy, ny vous de chose peu digne de sa Maiesté, & contraire à la discretion que ie dois garder enuers sa Maiesté & vous, ains vne autre fois en choses semblables ie veux secoüer ceste pusillanimité, qui m'a empesché de persister constamment, comme ie deuois, en l'excuse raisonnable que i'auois faite du commencement, sans auoir plus à vous exposer les impertinences de tels importuns, ny ma honte pusillanime de les refuser. A tant, &c. Monsieur, &c. De Rome, ce 29. Decembre, 1599.

*Fin du cinquieme Livre.*





# LIVRE SIXIESME.

ANNEE M. D. C.

A MONSIEVR DE VILLEROY.

CXC VIII.

**M**ONSIEVR, Par ma lettre du 17. du passé, ie respondis à vostre derniere qui estoit du 26. Nouembre. Depuis ne nous est arriué aucunes lettres de la Cour, ne suruenue chose que i'aye à vous escrire, Monsieur de Sillery faisant tres-bien son deuoix, non moins à vous tenir aduertie de tout ce qui se passe par deçà, que à negocier ce qui luy est commandé, & ce qu'il voit estre expedient de luy-mesme. Je vous escriuis dernièrement comme il estoit en peine pour la partie promise à Monsieur le Cardinal Aldobrandin, & qu'il importoit au seruice du Roy que ledit seigneur Cardinal fust contenté. Je tourne encore à vous dire, qu'il importe plus que possible on ne pense par delà, & qu'il est besoin d'y pouruoir en toutes façons, & au plustost. Je vous escriuis aussi comme Dieu auoit appelé à soy Madame l'Admiralle de Chastillon, & qu'on desiroit qu'il fust pourueu à la fille. Depnis, ceux qui sont icy pour elle, m'ont dit qu'apres la mort de sa mere, plusieurs de la Cour de Monsieur de Sauoye, qui auoyent mesme persecuté la mere en son viuant, l'auoyent demandee en mariage à son Altesse; & que elle craignant d'estre mariee par force à quelqu'un de ceux-là, & se voyant hors de puissance de pere & de mere, & loing de ses parens, auoit esté contrainte, pour euitern plus grand mal, de faire declaration qu'elle ne vouloit estre mariee à autre qu'au sieur de Mauleon. Que si elle estoit en France, ou en autre lieu hors de danger d'estre traittee comme sa mere, ou pis, Elle n'eust iamais pensé à prendre pour mary sinon celui que le Roy & Monsieur le Connestable luy eussent donné: mais se trouuant aux termes où elle estoit, & ne pouuant mieux faire pour sauuer ses biens & sa vie, elle desire d'estre excusée par delà de ceste sienne resolution. Et à la verité ie croy que elle merite excuse enuers toutes personnes pitoyables & moderees, qui scauent les lōgstraux & angosses qu'elle a endurees, & le danger où elle estoit.

PP

Dieu veuille que par ce moyen elle se trouue entierement deliurée, & vous donne à vous, Monsieur, bon an, & en parfaite santé, tres-longue & tres-heureuse vie. De Rome, ce premier iour de l'an 1600.

## A MONSIEVR DE VILLEROY.

### CXCIX.

**M**ONSIEVR, l'ay tousiours estimé que la cause du démariage du Roy seroit terminée à Noël dernier, toutefois n'en estant venu encor aucun aduis de delà, ie commence à douter s'il aura esté ainsi. Bien pensay-ie que l'arriuee de Monsieur de Sauoye en Cour vous pourroit auoir induit à attendre ce que son voyage produiroit touchant le Marquisat, pour pouuoir donner aduis par deçà de ces deux choses ensemble par vne mesme dépesche. Quoy qu'il en soit, les seruiteurs du Roy, & tous autres dedeçà, sont en grande expectation de l'issuë de ces deux affaires.

Celle du premier ne peut estre que bonne, & de l'autre vous en deurez estre esclaircis auant que la presente arriue à vous. Des choses de deçà, ie me remers suiuant le deuoir & ma coustume, à Monsieur de Silhery : mais pource que i'ay esté present à vne congregation que le Pape tint le douzième de ce mois, ie puis vous en escrire sans entreprendre sur l'office d'autrui. Vous aurez desia entendu comme au mois d'Octobre dernier le Prince de Valachie estant entré avec vne puissante armee en la Transsylvanie, y desit & mit en fuitte le Cardinal Battory, auquel le Prince Sigismond l'auoit cedee, & comme ledit Cardinal fuyant avec cent Cheuaux par certains chemins estroits, où il falloit passer vn à vn, il fut assailly & tué par des payfans qui luy couperent la teste, & la porterent audit Prince de Valachie; de tout lequel succès le Pape fut aduertty par lettres du sieur de Malespine Euesque de sainte Sauerine son Nonce resident près ledit Cardinal, lesquelles sa Saincteté fit lire en consistoire il y a quelque temps. Depuis, sadite Saincteté receut lettres de l'Empereur, escrites apres la défaite dudit Cardinal, & neantmoins auant que l'Empereur en sceust la mort, par lesquelles il se plaignoit fort aigrement dudit Cardinal, & l'accusoit d'auoir intelligence avec le Turc, & prioit sa Saincteté de l'excommunier & le prouer du chapeau. En mesme temps sa Saincteté receut lettres du Nonce qu'elle a en Pologne, lequel luy escriuoit que ladite défaite & mort dudit Cardinal auoit apporté grand desplaisir à toute la Cour du Roy de Pologne, & mesme qu'on y murmuroit contre ledit sieur de Malespine Nonce, comme s'il eust esté en partie cause de cet inconuenient, & y disoit-on qu'il ne se falloit iamais fier de ministre Apostolique, & qu'il luy sembloit à luy Nonce de Pologne, que pour appaiser ces gens-là, sa Saincteté deuroit proceder par censures Ecclesiastiques cõtre ceux qui auoient tué ledit Card. Sur l'occasion doncques de ces deux lettres de l'Empereur & du Nonce de Pologne, tendantes à diuerses fins, le Pape conuoqua ledit iour douzième de ce mois vne congregation de dix-neuf Cardinaux; à sçauoir Gesualdo, qui est

le Doyen du college, Como, Madruccio, Saluiati, Ratzuill, Pinelo, Borghese, Bianchetto, Auila, Arrigone, Beuilaqua, Viscomte, Tosco, d'Ossat, Antoniano, Montalto, Farnese, Aldobrandino, & San Georgio; & apres auoir fait lire lesdites deux lettres, mit en deliberation s'il deuoit faire quelque ressentiment de la mort dudit Cardinal, & entrer en quelque iustification de ce qu'il auoit fait & procuré pour le bien de la Chrestienté en ces choses de Transsylvanie, & monstra d'incliner luy-mesme à la negatiue, rât de l'une que de l'autre de ces deux propositions. Les aduis furent diuers, comme il aduient souuent en si grandes compagnies; mais la plus part opinâ quantau premier point, que pour le present il ne falloit proceder par censures, ny faire aucun ressentiment touchant la mort dudit Cardinal, d'autât qu'il auoit esté tué en guerre portant les armes, & en tout autre habit & faction que de Cardinal; Qu'on ne sçauoit qui l'auroit tué, ny si ceux qui le tuèrent, pensoient tuer vn Cardinal, ou non, ny s'ils estoient Catholiques, ou Schismatiques, & hors de l'Eglise & iurisdiction du sainct Siege; Qu'auant que proceder à l'excommunication, il faudroit faire quelque forme & figure de procez, auquel en cette incertitude on ne sçauoit par quel bout commencer; Que d'ailleurs sa Saincteté offenserait l'Empereur & le Prince de Valachie, pour le mal qu'ils auoient voulu audit Card. la memoire duquel ils denigreroient en tout ce qu'ils pourroient; & pour ce qu'ils pourroient interpreter telles procedures & censures cōme estans indirectement contre eux mesmes, faire composer des liures contre la memoire du Cardinal, où ny le college des Cardinaux, ny le S. Siege mesme ne seroient espargnez; Que ledit Nonce Malepine estoit par chemin s'en retournant à Rome, & pourroit dire quelque chose de plus que ce qu'il auoit escrit, & lors on verroit s'il y auroit lieu d'y faire autre chose. Quant au 2. point qu'il ne seroit de la dignité du S. Siege, ny de la personne de sa Saincteté, d'étranger en iustificatiō par lettres adressees aux principaux de ceux qui se plaignoient, ny par aucune sorte d'escrit. Mais pource qu'il importe grandement à l'honneur de Dieu, & au bien de toute l'Eglise, qu'ils ayent bonne opinion du Pape & de ses ministres, & que ceux qui l'ont autre, soient destrompez, il sembloit bon que sa Saincteté commandast à Monsieur le Cardinal S. George, qui a ces pays là en ses departemens, d'escire aux Nonces qui sont près l'Empereur & le Roy de Pologne, tout ce qui s'est passé au fait de la Transsylvanie, & qui peut seruir à la descharge du Pape & de ses ministres, & de leur enioindre de dire cela comme d'eux-mesmes aux occasions qui s'en presenteroient, sans monstrier d'en auoir commandement, ny en commencer le propos eux-mesmes. Et ainsi fut resolu par sa Saincteté tant sur l'un que sur l'autre chef. A tant, &c. Monsieur, &c. De Rome ce treiziesme Ianuier, 1600.

## A MONSIEVR DE VILLEROY.

CC.

MONSIEVR, Quand le Pape estoit à Ferrare dernièrement, le seigneur Francesco Leocare Gentil-homme de Genes m'y vint voir plusieurs fois, & me fist voir des papiers, par lesquels il apparoissoit que ses ancestres auoient esté seruiteurs de la Couronne de France, & auoient eu des biens en Prouence, me déclarant en outre l'affection & deuotion qu'il auoit luy-mesme au seruice du Roy, & comme il s'y estoit employé es derniers troubles, sur quelques occasions qui s'en estoient presentées. Aussi y fist-il la reuerence à Monsieur de Luxembourg & luy dit les mesmes choses, & escriuit au Roy & à vous quand Monsieur de Luxembourg partit de Ferrare pour venir en France. Maintenan t il m'a escrit qu'il veut aller faire la reuerence au Roy, & a desiré demoy quelque lettre qui luy pût seruir de quelque plus facile accès. Par ainsi ie n'ay voulu faillir de vous escrire la presente à deux fins; l'une, pour vous tesmoigner comme il m'a semblé fort honneste Gentilhomme de ce que ie l'ay cogneu, & que l'ay ouy tenir pour tel de ceux qui l'ont plus frequenté que moy, & pour homme de bien & de moyens en sa Republique: l'autre, pour vous prier, comme ie fais bien humblement, qu'il vous plaife luy donner moyen de faire la reuerence à sa M. & le fauoriser de vostre protection là où il pourra en auoir besoin. Et outre que vous ferez œuvre digne de vostre generosité & bonté accoustumee, i'estime que ce soit chose de seruice & de reputation à sa Maiesté, & à toute nostre nation, d'accueillir & caresser les Gentils-hommes estrangers de ceste qualité, & si bien affectionnez enuers nous. Et pour mon regard, ie participeray à la courtoisie dont il vous plaira vser en son endroit, pour vous en rendre seruice en tout ce que vous voudrez me commander, comme sans cela i'y suis d'ailleurs tres-obligé & tres-affectionné. A tant, &c. Monsieur, &c. De Rome, ce 12. Feurier, 1600.

A V R O Y.

CCI.

S I R E,

SMô sieur d'Alincourt arrina en ceste ville Mercredy premier iour de Carême, & 16. de ce mois, & me redit la lettre dont il a pleu à vostre M. m'honorer par luy du 3. Ianuier, par laquelle, & par ce qu'il m'a dit de bouche, i'ay sçeu le contentement que vostre Maiesté a de ce peu de seruice que ie luy puis rendre, dont ie louë Dieu, attribuant le tout à sa grace, & à vostre bonté. Ledit sieur d'Alincourt est venu si bien in-

Struit de tout ce qu'il falloit pour bien faire sa charge, & a du conseil si près de luy en la personne de Monsieur de Sillery qui le loge, qu'il n'a point eu besoin du mien. Si n'a-il pourtant laissé de demander mon aduis en ce qui s'est présenté, lequel, suivant le commandement qu'il a pleu à vostre Maiesté m'en faire, ie luy ay donné en bonne approbation & louange de la bonne instruction qu'il auoit apportée, & des bons & sages records de mondit sieur de Sillery. Aussi a ledit sieur d'Alincourt apporté à l'accomplissement de sa charge beaucoup de dextérité & bonne grace, & a esté fort agreable au Pape, & à Messieurs ses nepueux, comme i'appris hier de sa Saincteté mesme, & de Messieurs les Cardinaux Aldobrandin & saint George.

Il y eust hier sermon chez le Pape, où ont accoustumé de se trouuer vne grande partie des Cardinaux, & mesmement les nouueaux, & ainsi i'eus occasion de voir & parler à mesdits sieurs ses nepueux, & apres le sermon la Saincteté me fist appeller en sa chambre, & m'ayant du commencement dit quelques mots en declaration du contentement qu'il auoit receu de certe legation, & en louange dudit sieur d'Alincourt, il me demanda si ledit sieur d'Alincourt estoit enuoyé comme Ambassadeur, & sans attendre ma response, adiousta, qu'il l'auoit fait seoir, & traicter en Ambassadeur, mais qu'és lettres de vostre Maiesté qu'il auoit veuës depuis, il ne trouuoit point que ledit sieur d'Alincourt fust qualifié Ambassadeur. Le luy respondis, suivant ce que Monsieur de Sillery & moy auions aduisé auant que ledit sieur d'Alincourt arriuaist en ceste ville, & afin que vostre Maiesté en eust plus de gré, qu'il estoit enuoyé comme Ambassadeur & que la Saincteté auoit bié fait de l'honorer comme tel; Que outre que Monsieur de Sillery me l'auoit assuré, i'estimois que ledit sieur d'Alincourt estant Cheualier de l'Ordre du saint Esprit ne pouuoit bonnement estre enuoyé hors le Royaumé, & mesmement vers la Saincteté, & pour vn tel compliment, sans estre entendu Ambassadeur; & qu'en France on ne gardoit point ainsi precisément, commel'on fait en Italie, ces formes de mettre la qualité d'Ambassadeur és lettres de creance que portoient ceux que nos Roys enuoyoient pour tels. A quoy la Saincteté ne repliqua aucune chose, sinon qu'elle continueroit doncques à le traicter comme Ambassadeur. Apres cela il me dist, qu'és choses de ce monde il y auoit tousiours quelque desplaisir meslé parmi les plus grands plaisirs; Qu'il receuoit grande consolation de ce que vostre Maiesté se monstroir de iour en iour si recognoissante & respectueuse en son endroict, mais qu'il me vouloit dire aussi qu'il estoit fort marry, de ce qu'il entendoit que vostre Maiesté auoit n'agueres fait Pair de France le sieur de la Trimouille, qu'il scauoit estre heretique. Le luy dis que vostre Maiesté n'en auoit rien escrit, que ie sceusse, mais que ie luy voulois bié recognoistre, que ie l'auois ouy dire comme luy, & que ie ne le descroyois pas autrement. Surquoy ie le priois de considerer, que demeurant en pied l'Edict de l'an 1577. fait non par vostre Maiesté, mais par le feu Roy, & par la necessité du téps, qui duroit encores à present plus que iamais, par lequel Edict ceste sorte de gens estoient declarez capables de tous hōneurs & dignitez, vostre Maiesté ne pouuoit faire de moins que de leur en faire quelque part, & mesmes à cestuy-cy, qui estoit d'une des plus nobles & des plus

illustres maisons du Royaume, apres les Princes, & neuue de Monsieur le Conneftable, & oncle de Monsieur le Prince de Condé: mais que vostre Maiefté s'estoit bien gardee de luy donner quelque gouuernement, ou autre telle charge d'importance; ains, posé que la chose fust vraye, luy auoit donné vn tiltre, qui en ce temps-cy n'auoit rien que le nom, sans aucune puissance, administration, ny maniement, & sans que cela luy eust accru vn denier de reuenue, ains plustost apporté occasion de despence; Que cependant c'estoit vne satisfaction donnée à luy & à ses parens, pour le gagner, & le reduire vn iour Catholique: comme vostre Maiefté, lors mesme qu'il sembloit qu'elle fist quelque chose pour telles gens, ne miroit à autre chose qu'à reünir tous ses subiects à la Religio Catholique, & à oster toutes partialitez & diuisions, qui ne sont moins preiudiciables & dommageables à l'autorité Royale, qu'au repos & tranquillité publique. Que par ainsy sa Saincteté en mist son esprit en repos vne fois pour toutes, & s'assurast que quand vostre Maiefté ne seroit poussee que de son interest propre, elle auroit assez d'occasion de tenir bas, & de diminuer peu à peu ceste sorte de gens, comme il auoit esté représenté à sa Saincteté autresfois par moy-mesme, & par Monsieur de Sillery & autres. Ouy, mais (dit-il) on dit que le Roy le veut encore faire Admiral, qui est vne dignité qui commande à toutes les villes & places maritimes. Je luy dis, que ie n'auois point entédu que vostre Maiefté le voulust faire Admiral, & ne le croyois point; Que les Admiraux neâtmoins ne commadoient point aux villes & places maritimes, si d'ailleurs ils n'estoient gnuuerneurs; Que mesmemét és fortereffes maritimes, & autres frontieres qui estoient de quelque importance, il y auoit des gouuerneurs particuliers, que vostre Maiefté mettoit, & non vos Lieutenans generaux, qui par quelque despit ou passion peuent quelquesfois se fouruoyer de l'obeyffance & pieté qui est deuë à leur Prince & patrie, comme la France vient d'en estre vn exemple le plus illustre qui fut iamais au mode. Sa Saincteté monstra d'acquiescer, & de prendre grand plaisir que ledit mal ne fust si grand comme on le luy auoit fait. En sortant de chez le Pape, ie trouuay en l'anti-chambre Monsieur le Cardinal Aldobrandit qui me parla des mesmes choses, & ie luy fis les mesmes responsés que i'auois faites à sa Saincteté. A tant, &c. Sire, &c. De Rome, ce 19. Feurier 1600.

---

## A MONSIEVR DE VILLEROY.

### CCII

**M**ONSIEVR, A l'arriuee de Monsieur d'Alincourt vostre fils, qui fut le 16. de ce mois, ie receus par ses mains la lettre qu'il vous pleut m'escrire le 8. Ianuier; au premier poinct de laquelle, qui est en sa re-commandation, ie respondray par vne autre lettre à part de ma main, & au reste par la presente.

Il n'estoit point besoin de vous excuser d'auoir differé plus que vous n'euss-

Je vous en ay voulu à nous escrire : car outre que vostre diligence est cogneüe de tous, nous auions ia preueu de nous mesmes que Monsieur de Sauoye & sa negociation vous auroit occupez tous, & que le futur voyage de Monsieur d'Alincourt, dont vous nous auiez donné aduis, retarderoit vne partie de ce que l'ordinaire nous eust pü apporter. Mais nous auons bien à vous remercier, de ce que vous auez si diligemment & particulierement respondü à toutes choses. Je louë Dieu de ce que l'affaire du demariage du Roy a eu si bonne issue, & ay veu la sentence donnee par messieurs les Commissaires, mais non encore la procedure : ie la verray incontinent apres le partement de cét ordinaire Dieu aydant.

Le septième de ce mois, qui fut iour de Consistoire, i'eus occasion de parler au Pape à cause de l'Abaye de S. Mesmin, ordre de S. Benoist, au Diocèse d'Orleans, qu'il me falloit preconiser audit Consistoire : & apres sa Sainteté me demanda si i'auois veu ladite sentence. Je luy dis qu'ouy. Il me demanda encores qu'est-ce qu'il m'en sembloit. Je luy respondis qu'il m'en sembloit tout bien. Alors il me dit, qu'il eust voulu qu'au dispositif de la sentence les Commissaires n'eussent point mis la clause qui commence *UT POTE NON CELEBRATVM* &c. en laquelle ils rendoient la cause de leur sentence, à quoy ils n'estoyent point tenus, & s'attaquoyent à la plus foible cause de la nullité du mariage, à sçauoir, à l'obmission des solemnitez, laquelle ne rēd pas le mariage nul, iagoit que les parties qui les obmettent pechent griefuement. Je luy respondis, que cela mesme m'estoit venu en pensément à moy, la premiere fois que ie leus ladite sentence, mais que ie m'y estois respondü moy-mesme par les mots qui suiuent; à sçauoir *AC ALIIS NECESSARIIS DE IVRE REQUISITIS AD VALIDITATEM MATRIMONII*, lesquels mots contenoient sous leur generalité toutes les causes de nullité que nous auions alleguees, & toutes autres qu'on pourroit allaguer iamais. A quoy sa Sainteté ne repliqua autre chose, sinon qu'en vne sentēce de telle importance, & entre parties de si haute & grande qualité, & qui deuoit estre veüe de tout le monde, il n'y deuoit auoir rien à redire. Aussi n'ay-ie rien que ie vous puisse adiouster à ce propos, sinon que la sentence me semble estre bien ainsi comme elle est, combien que ie ne laisse de recognoistre en moy-mesme qu'elle eust donné moins à parler au Pape, & à d'autres qui n'en ont encores parlé, si les Iuges n'eussent fait aucune mention des causes de nullité au dispositif, ou s'ils eussent dict seulement en termes generaux, pour les causes de nullité resultantes du procez. Je rapportay le tout le iour mesme à Monsieur de Sillery, qui fut de mon aduis. Quant à la confirmation de ladite sentence que vous me touchez, il ne s'en peut dire rien de mieux que ce que vous en dites en vn mot. Ladite confirmation n'est nullement necessaire, mais comme nous sommes bien sans elle, nous serions encores mieux si nous l'auions; & partant si nous la pouuons obtenir sans en faire grand bruit, il la faudra demander & poursuivre pour plus grande assurance : mais si nous voyons icy qu'il y auroit trop à faire, il en faudroit quitter la poursuite. Monsieur de Sillery & moy en apions conféré ensemble iauant la venue de Monsieur d'Alincourt, & auoit ledit sieur de Sillery trouué bon vn expedient que ie luy auois proposé, à sçauoir que sans monstrier aucun besoin ny grād desir de ladite confirmation, nous nous seruissions de la



iusdite plainte du Pape pour occasiō de luy demander la confirmation de ladite sentence, en luy disant, que s'il luy plaisoit de la confirmer, & declarer de nouveau ledit mariage nul en tant que besoin seroit, outre que toutes choses en seroient plus assurees, sa Sainteté auroit encore ce contentement de concevoir ladite declaration de nullité en termes qui seroient le plus à sō gré: & au lieu de ladite sentence, on feroit courir la confirmation, laquelle se verroit par tout le monde en la façon qu'il eust voulu ladite sentence estre concenē; laquelle confirmation sa Sainteté pourroit faire tant plus facilement, qu'elle auoit non seulement ladite sentence qui contenoit l'aduīs & iugement de ceux à qui il s'estoit fié de toute l'affaire, mais aussi toute la procédure par laquelle on estoit paruenū à la sētēce declaratoire de la nullité dudit mariage. Or mōdīt sieur de Sillery m'a dit qu'en l'audiēce qu'il eut leudy 17. de cē mois avec Mōsieur d'Alincourt, le Pape leur ayāt encore parlā de ladite clause *et potest*, il toucha à sa Sainteté l'expediēt de la cōfirmation de ladite sentence, de quoy il vous rendra compte plus amplement. Quand nous anrons vū le procez, nous verrons plus clair à coniecturer si le Pape sera pour nous octroyer ladite confirmation ou non; & dēs maintenant ie tiens que nous la deuons demander en la façon ditte cy dessus, & en toutes autres meilleures. Mais combien nous deuons presser & poursuire, cela dependra de ce que nous aurons trouuē audit procez, & de la dispositiō du Pape, & de l'humeur de ceux qu'il y voudroit employer. S'il se cōtentoit de faire voir le procez par Monsieur le Cardinal San Marcello, & en entēdre son rapport, comme il se sert ordinairement de luy en telles matieres, & s'ē est seruy en ceste-cy, & le tiēt logē au Palais, il n'en sçauoit aduenir aucun mal. Mais si sa Sainteté vouloit faire voir tout le procez par tous les huit qui furent employez en la Congregation que sa Sainteté fit pour cēt affaire, il s'y pourroit trouuer quelque esprit de contradiction qui ne melioreroit de rien nostre condition. Nous considererons, Dieu aydāt toutes choses, & sans rien hasarder, tascherons d'obtenir tout le mieux qui sera possible, & vous rendrons compte de tout.

Ie vous remercie de la response qu'il vous a pleu m'envoyer pour le sacristain du Pape, & du Priuilege des moulins pour le Bourguignon; dont il se sentiront tres-honorez, & obligez au Roy & à vous, comme ie le tiens moy-mesme à obligation. Le sieur Leon Strozzi sera aussi grandement consolē, non seulement de la lettre que luy escriuez, mais aussi de la response que vous m'avez faite à ce que ie vous en auois escrit. Pour le fait de Monsieur Benoist, en ayant parlē au Pape, il me dit qu'il auoit esté ven n'agueres en la Congregation de l'Inquisition, où auoient esté trouuez des empeschemens tels que difficilement se pourroit-il expedier; Qu'il commanderoit au Cardinal Sancta Severina, le plus ancien de ceste congregation, de m'en monstrier les papiers, les quels quand i'auray ven ie vous en oferiray plus amplement. Ie m'employeray pour Monsieur de Cherelles quād ie n'en aurois autre occasion que vostre recommandation, mais il est vn de mes bons amis & anciens, & d'ailleurs si honneste homme & si vertueux, qu'il merite estre seruy pour son seul respect. A tant, &c. Monsieur, &c. De Rome ce 10. Février 1600.

## A MONSIEVR DE VILLEROY.

CCVIII.

**M**ONSIEVR, Apres vous, à qui ie dois plus qu'à tous les autres hommes ensemble, ie ne pouuois voir personne avec plus de plaisir & de desir de le seruir que Monsieur d'Alincourt vostre fils, lequel vous touchant de plus près que nul autre, peut aussi sur tous autres disposer de moy, & en attendre tout ce que ie pourray iamais faire, dire, & penser pour vostre seruice & le sien: & ce que vous par vos lettres, & luy par ses propos allez exhortans, ains dissimulans du tout les obligations que ie vous ay, les accroist & engrave d'autant plus en mon ame, tant s'en faut que ceste vostre courtoisie puisse rien diminuer de ce que ie sçay & sens en mon cœur. Ce qui seruira de responce à la recommandation qu'il vous a pleu me faire de luy, & à tout le premier poinct de la lettre qu'il m'a rendue de vostre part du 8. Iamier. Au demeurant, sans la qualité d'Ambassadeur que Monsieur de Sillery a, & qu'il est d'ailleurs trop mieux logé que moy, ie ne luy eusse ia cédé l'honneur & contentement de loger & seruir mondit sieur d'Alincourt: mais ie rascheray de recompenser ce deffaut par quelqu'autre seruice, si toutesfoisie pourray; car la bonne instruction qu'il apporte de delà, & la dexterité & discretion qui l'accompagnent par tout, m'en oste quasi tout moyen.

Dieu vous le conserue, & vous à luy tres-longuement, & vous donne à tous deux, Monsieur, &c. De Rome ce 20. Feurier, 1600.

## A MONSIEVR DE VILLEROY.

2102

CCIV.

**M**ONSIEVR, Ie n'ay point failly à voir le procez du démariage du Roy, suivant ce que ie vous auois escrit par ma lettre du vingtiesme Feurier, & y ay trouué tous nos faits bien prouuez, & toutes choses au mieux que i'eusse sçeu cesirer; de façon que si auant que ie l'eusse veu i'eusse d'auis de demander au Pape confirmation de la sentence, pour plus grande assurance plustost que pour aucun besoin que nous en ayons, ie m'y fais encores confirmé d'auantage à present que i'ay tout veu, qu'il ne se trouuera homme qui puisse dire avec fondement, que nostre saint Père ne deust aujourd'huy declarer nul ledit mariage, s'il se fust reserué le iugement à soy, & eust seulement commis l'information des faits sur les

lieux, & par conséquent que sa Sainteté ne puisse ou ne doive confirmer la sentence donnée sur ladite nullité. Nous demanderons doncques ladite confirmation; & si nous l'obtenons, comme nous devons, nous en serons tant mieux: que si elle ne se pouvoit obtenir nous n'aurions rien perdu à la demander, & si ne lairrons d'estre bien assurez sans elle.

Le vingt troisieme dudit mois de Feurier arriua l'ordinaire vn peu plus tost qu'il n'auoit fait depuis trois ou quatre mois, & ie receus par luy la lettre qu'il vous a pleu m'escrire le cinquieme, & vous remercie bien-humblement de l'honneste response qu'il vous a pleu faire à ce que ie vous auois eserit touchant le Seigneur Girolamo Racani, m'ayant par ce moyen fourny d'vne response & excuse enuers luy plus courtoise & amiable que son importunité ne meritoit.

Au demeurant l'ordre de saint François est, comme vous sçauiez, le plus nombreux de tous: pour le moins en France il y a plus grand nôbre de Cordeliers, si ie ne me trompe, que d'aucune autre sorte de Religieux. Pour obuier aux inegalitez des nations qui aduiennent és elections des Generaux de ceste Religion, il a esté autresfois ordonné par le saint Siege que les Generaux de cet ordre se feroient alternatiuement, vne fois des nations de deçà les monts, & l'autre de celles de delà, & se garde ainsi. Mais par l'astuce des plus rusez, à toutes les fois que vient le tour de ceux de delà les monts, il se fait vn General Espagnol, au moins depuis vn fort long temps, & par ce moyen les François, qu'oy qu'en plus grand nombre que ceux des autres nations, demeurent exclus de ceste dignité: dont, outre l'inégalité qui se commet contre la iustice distributive, il aduiant que les Generaux estrangers ne visitas point les couens de France, les desordres introduits par la licence des guerres ciuiles, ne s'y corrigent point, ains s'y augmentent de plus en plus. Ce qui a meu quelques Cordeliers François qui sont par deçà, de requier Monsieur de Sillery & moy d'en escrire au Roy, & luy mettre en consideration s'il seroit bon que sa Maiesté nous commandast de représenter ces choses au Pape, & de prier de sa part sa Sainteté d'ordonner aux Peres qui seront assemblez pour eslire leur General à la Pétecoste prochaine, qu'estant maintenant le tour de ceux de delà les monts, comme il est, & n'y ayant point eu de General François il y a long temps, & la France ayant besoin de visitation & de reformation, cōme elle a, ils ayent à eslire vn General François à ceste fois: & que pour l'aduenir il plaise à sa Sainteté faire vne ordonnance, que le General de ceste Religion sera esleu de la nation François à son tour, aussi bien que de l'Italienne & Espagnolle. Que si sa Maiesté trouue bon de nous faire ce commandement, elle pourroit encores en dire vn mot par delà à Monsieur le Nonce, & à Monsieur le Patriarche de Constantinople, qui est encore General de cet ordre, afin qu'ils en escriussent à sa Sainteté de la part de sa Maiesté à mesme fin.

Monsieur Conti Euesque d'Ancone, qui s'en va Vicelegat en Auignon & au Contat, partit il y a huit iours, & m'estant venu voir quelques iours auant son partement, me dit auoir toute bone affection de seruir le Roy, & d'estre en bonne intelligence avec tous les officiers de sa Maiesté, & me requist d'en donner aduis en Cour, & de supplier sa Maiesté qu'il luy pleust escrire à ses Parlemens de Tholose, Prouence & Dauphiné, à ce qu'ils n'empeschent

point l'exécution des facultez de Vicelegat que nostre saint Pere luy a données en la forme accoustumee. A tant, &c. Monsieur, &c. De Rome, ce 4. Mars 1600.

## A MONSIEVR DE VILLEROY.

CCV.

**M**ONSIEVR, Je receus le 7. de ce mois la lettre qu'il vous pleust m'escrire le 11. Feurier en response de celle que ie vous auois escrite le 15. Ianuier, & depuis i'ay sceu par Monsieur de Sillery l'accord ensuiuy entre le Roy & Monsieur de Sapoye, dont ie me resioüys & louë Dieu de tout mon cœur, comme font tous les gens de bien de deçà, qui estoient en vne merueilleuse expectation de cét affaire, & à present louient hautement le Roy & les Seigneurs de son Conseil de la constance & fermeté qu'ils ont gardee contre la procedure variable de ce Prince, lequel à mon aduis ne procedera pas plus rondement en l'exécution dudit accord qu'il a fait en sa negociation, outre ce que vous aurez peu cognoistre par delà de ses façons & intentions. Monsieur de Sillery vous donnera aduis de la surprise que son Altesse luy a voulu faire par s<sup>r</sup> Ambassadeur, d'où vous passerez outre, s'il vous plaist, à considerer les bons offices que ce bon Duc doit faire de l'autre costé enuers le Roy d'Espagne son beau frere pour entretenir la paix entre les deux Roys. Il mettroit volontiers, pour retenir son vsurpation, toute la Chrestienté à feu & à sang s'il trouuoit les autres Princes aussi faciles à rompre la paix, comme il a esté de la violer trop insolément lors qu'il rait ledit Marquisat à la Couronne de France, & n'y a maintenant autre moyen de le cōtenir ou moderer, que de recouurer au plustost de ses mains le Marquisat, qui puis apres seruira de frain à ses passions demesurees, & le contraindra à souffrir la paix, pour ne pouuoir plus, sans trop de danger, faire ny procurer la guerre.

Par ma derniere lettre du 4. de ce mois ie vous escrins touchant le Generalat des Cordeliers. Depuis il m'a esté dit qu'ordinairement le General qui vient d'acheuer sa charge peut quasi tout à faire le suiuant, & Monsieur le Patriarche de Cōstantinople le pourra tant plus, pour la dignité & reputation dont il est accreu pendant son Generalat: de façon que s'il embrasse la iustice qu'il y a à faire ceste fois vn General de la nation Françoisse, il en viendra facilement à bout; par ainsi ie remets à vostre prudence s'il vous semblera que le Roy le doieue requerir, non seulement d'en escrire au Pape, comme ie vous escrins dernirrement, mais aussi d'y faire de son costé ce qui sera en luy. I'ay leu l'information qui a esté faite par delà des ruines de l'Abbaye de saint Eloy de Noyon, en laquelle on se deuoit contenter de procurer lesdites ruines & diminutions du reuenu, sans en charger le Roy comme on a fait, & principalement le 3. tesmoin, disant que c'est la Maieité qui a ruiné ceste Abbaye, & des matieres & des biens appartenans à ladite

Abbaye en a fait faire au lieu mesme vne citadelle, & cōtraint encores l'Abbé & les Religieux à payer de l'argent pour le bastimēt de ceste forteresse, & que lors que sa Maiesté prit la ville de Noyō, le Clergé fut cōtraint de se rachepter à la somme de quinze mil escus, dont il en toucha à payer trois mille audit Abbé & Religieux, qui en sont poursuiuis & pourchassez encores aujourd'huy. Cela feroit que nous ne pourrions produire ladite enqueste, ny iustifier le rapport que nous en pourrions faire, & que nous auons estimé la deuoir renuoyer par delà, afin qu'on en face vne autre, où les particuliers prouuent & facent leur fait, sans preiudicier à la reputation du Roy près du Pape & de la Cour Romaine. A tant, &c. Monsieur, &c. De Rome, ce 18. Mars 1600.

## A MONSIEVR DE VILLEROY.

### CCVI.

**M**ONSIEVR, Par ma lettre que i'escris presentement au Roy, vous verrez la responce que ie fais à celle qu'il pleust à sa Maiesté m'escrire le 8. Mars. Quant à celle qu'il vous a plu m'escrire de mesme date, ie n'ay autre chose à vous dire, sinon que ie louë grandement le voyage que le Roy veut faire à Lyon, pour les mesmes considerations que m'auiez touchees, & pareillement le secours que vous auez procuré aupres de sa Maiesté pour les pauvres pelerins François qui arriuent tous les iours icy en grand nombre à l'occasion du Iubilé. Au demeurant apres vous, ie ne cede à personne l'auantage d'aymer Monsieur d'Alincourt plus que ie fais, estant d'ailleurs si sage & discret, qu'il n'a besoin de l'instruction de personne. Toutesfois en ce qui s'est présenté ie n'ay laissé de luy dire mon aduis, vous assurant qu'il a donné contentement à tous ceux qu'il a visitez, qui l'ont visité, & que depuis mes lettres des dix-neufiesme & vingtiesme Feurier, il m'a encores esté loüé de plusieurs Cardinaux & d'autres; de façon que quand il partira, il laissera par deça toute bonne odeur de soy. C'est tout ce que i'auois à vous respondre.

A quoy i'adiousteray, que ie n'ay point oublié ce que ie vous ay escrit cy deuant, touchant la confirmation de la sentence donnee par delà sur le demariage du Roy: mais il ne s'en est peu rien traiter depuis, partie pour l'indisposition de goutte qui suruint au Pape bien tost apres, laquelle nous emporta quinze iours, partie pour la sepmaine Sainte & festes qui ont suivy de près ladite indisposition. Cependant nous est venu par ceste vostre depesche du 8. Mars l'aduis de ce que vous auez auancé par delà touchant le nouveau mariage, avec le commandement à Monsieur de Sillery d'en parler au Pape, ce qui nous a fait estimer qu'il n'estoit bon de demander expressément pour ceste heure ladite confirmation, mais essayer de la tirer en effet par la demāde d'une allee d'un Legat, & des galeres, & de telles autres choses, lesquelles emportent quant & soy vne manifeste approbation

& confirmation de ladite sentence, & s'obtiendront avec plus de facilité & moindre temps, que ne s'obtiendrait l'expresse confirmation par escrit; joint qu'elles nous faciliteront mesme l'impetration de ladite confirmation expresse, si nous la voulons demander aprestout cela. Monsieur, &c. De Rome ce 3. Aurlil 1600.

## A V R O Y.

## CCVII.

SIRE,

Suiuant ce qu'il a plu à vostre Maiesté m'escire par sa lettre du 8. Mars, Monsieur de Sillery m'a communiqué le commandement qu'il vous a plu luy faire par vne depesche du mesme iour, & me suis offert à y seruir vostre Maiesté de tout mon pouuoir, tant enuers le Pape, qu'enuers tout autre que besoin seroit. Ladite depesche arriua le 29. Mars, & nous sommes encores es saints iours, pendant lesquels nostre saint Pere ne donne point audience, & ne vacque gueres à autres choses qu'à celles de deuotion: mais nous en serons bien tost dehors. Cependât nous auons aduisé de prendre en cet affaire vn certain biais, qui nous a esté, & est conuenable premierement à la reputation de vostre Maiesté, & au bien de l'affaire en soy, & puis à l'honneur de sa Sainteté, & à l'estat des choses d'icy, & dont neantmoins Monsieur le Grand Duc aura occasion de se contenter, puis que l'effect qu'il se desseigne s'y trouue aussi bien, & sans subir aucune indignité, ny donner dégoust ou mauuaise impression à personne, & en somme sans rien gaster. Mondit sieur de Sillery rendra compte de tout à vostre Maiesté, laquelle ie remercie en toute humilité de l'honneur qu'elle me fait de me commander, & la supplie de croire, qu'apres Dieu ie n'ay rien en ce monde tant à cœur que d'obeyr à ses commandemens, & luy rendre le très-humble & tres-fidelle sernice que ie luy dois.

Nostre ordinaire n'a esté depesché pour Lyon si tost comme il auoit esté dit, & en ce delay est venu le temps auquel Monsieur de Sillery a pû demander & auoir audience, comme de fait il l'a eue, & toutes choses s'y sont passees de façon que vostre Maiesté en demeurera contente, & i'en loue Dieu. A tant, &c. Sire, &c. De Rome, ce 8. Aurlil, 1600.

## A MONSIEVR DE VILLEROY.

## CCVIII.

MONSIEVR, Ceste lettre avec celle que i'escris au Roy auoit esté Mescrete il y a 5. iours, pour ce qu'en ce temps l'on deuoit de depescher

l'ordinaire pour Lyon, mais il a retardé pour bonnes considérations. Cependant M. de Sillery a négocié & obtenu ce que vous verrez par sa dépêche, qui nous sera pour trois confirmations de la sentence du démariage du Roy. Aussi en cet intervalle de temps est venu à moy le sieur Abbé Bandini, qui m'a requis de la part de Monsieur le Cardinal Bandini de vous escrire, qu'il desireroit auant que Monsieur de Sauoye se resoluë de rendre le Marquisat, n'y estre point cottié pour ses benefices par ceux de Carmagnole, comme ils le cottiſoient auant que Monsieur de Sauoye se fust emparé dudit Marquisat, dont il a esté exempt pendant ceste vsurpation.

Monsieur, ie ne puis & ne dois encores obmettre à vous faire vn autre apostille, pour vous dire que Monsieur de Sillery m'ayant raconté la façon dont il auoit negocié avec le Pape Ieudy sixiesme de ce mois, & avec Monsieur le Cardinal Aldobrandin Vendredy septiesme, i'en suis demeuré tout rayuy, n'ayant oncques veu ny leu negotiation faite avec plus de dexterité, prudence, & bon heur; de façon qu'entre autres choses d'un affaire fort desplaisant, pour les occasions escrites cy-deuant, & qu'on estimoit encore prejudiciable & grandement dommageable, il en a fait vn affaire agreable, & dont on a conceu esperance de tout bien, & pour l'accomplissement d'iceluy a obtenu toutes choses en la meilleure façon que nous le pouuions desirer, de ceux-là mesmes qui auparauant l'eussent volontiers empesché, s'ils en eussent trouué les moyens. A tant, &c. Monsieur, &c. De Rome ce huietième d'Auril 1600.

## A V R O Y.

## C C I X.

## S R I E,

Partant Monsieur d'Alincourt pour aller à Florence, & de là s'en retourner vers vostre Maieſté, i'ay estimé estre de mon deuoir de vous tesmoigner, que tout ainsi que du commencement il se rendit fort agreable à nostre S. Pere, & à Messieurs les Cardinaux ses neueux, aussi at'il tousiours continué & acheué de mesmes enuers tous ceux qu'il a visitez, & qui l'ont visité, & avec qui il a eu à traicter ou parler, comme ie l'ay entendu de plusieurs endroits, & en ay obserué vne bonne partie moy mesme. De façon que s'en retournant maintenant, il laisse icy vn tres-bon nom de soy, & vne bonne opinion de sa modestie aux plus grands, de son affabilité & courtoisie aux moindres, & de sa preud'hommeie, sagesse, & dexterité à tous. Aussi me semble r'il, en tant que i'en puis iuger pour l'auoir fréquenté deux mois, fort capable de traicter & manier de grands affaires, & tres-digne d'estre employé par vostre Majesté, à laquelle ie prie Dieu qu'il vueille donner, &c. De Rome ce 10. d'Auril 1600.

## A MONSIEVR DE VILLEROY.

CCX.

**M**ONSIEVR, Comme Monsieur d'Alincourt m'apporta vne lettre du Roy, aussi ay-ie voulu que s'en retournant il en l'apportast à sa Maiesté vne mienne, en laquelle ie vous assure que ie ne luy ay rien presté, & me suffira bien que ie ne luy aye rien retenu du sien. Au déplaisir que mon affection enuers luy me donne de son esloignement, s'est adjoinct vn-rheume qui m'est suruenu depuis deux iours, qui m'empesche de luy rendre à son departement tout l'honneur que ie desirois, & que i'eusse fait sans empeschement. Mais ie me console au plaisir & contentement qu'il vous donnera bié tost par sa presence, & par la bonne nouuelle qu'il vous apportera de l'affaire que Monsieur de Sillery & luy ont acheué. A tant, &c. Monsieur, &c. De Rome ce 10. d'Auril, 1600.

## A V R O Y.

CCXI.

S I R E,

La lettre qu'il pleut à vostre Majesté m'escire le vingt-deuxiesme Mars, me fut renduë le douziesme de ce mois : en laquelle il vous a pleu, entr'autres choses, faire mention du fait de l'Abbé de saint Martin, frere de l'Euesque de Clermont de la maison de Rendan, touchant ceste femme pretenduë demoniaque, qui fist tant parler d'elle à Paris l'annee passée, & qui sera aussi le seul suiet de ceste lettre, sans que i'y mesle autre chose. Ledit iour douziesme de ce mois, auquel ie receus ladite lettre, estoit vn Mecredy, & le lendemain leudy Monsieur de Sillery & moy fusmes ensemble, & nous entre-communiquames ce que nous auions receu de la part de vostre Maiesté. Et d'autant que madite lettre portoit que ledit Abbé auoit fait conduire ladite femme en Auignon, & qu'il estoit à croire que le Pape seroit au plustost aduisé de tout cecy par ses officiers & seruiteurs de ladite ville d'Auignon, ie priay mondit sieur de Sillery d'en parler à sa Sainteté le lendemain Vendredy iour de son audience ordinaire, afin de preuenir les autres, & pre-munir sadite Sainteté, & gagner le temps de deux iours, qui estoient entre ledit iour de Vendredy & le Lundy ensuiuant, auquel deuoit estre consistoire, & deuant lequel ie ne pouuois bonnement parler au Pape. Ledit sieur de Sillery donc en parla à sa Sainteté de la façon que nous auions arresté ensemble, & en eut fort bone response, comme ie remets à luy à vous rendre compte de tout ce qui se passa entre-eux.



Le Dimanche seiziesme iour de ce mois , au matin, ie fus auisé que ledit Abbé de saint Martin deuoit arriuer en ceste ville ce iour là mesme; & que deux Iesuites François , ausquels il auoit escrit de luy trouuer vn logis, auoient requis le sieur de Gourgues, qui a esté cy deuant Conseiller au grád Conseil , & est fils du feu sieur de Gourgues General des finances à Bourdeaux, & estude à present en Theologie avec intention de se faire d'Eglise, de vouloir prester vn appartement chez luy audit sieur Abbé pour s'y loger. Ces deux Iesuites s'appellent, l'un le Pere Sirmond du pays d'Auuergne, & l'autre le Pere d'Aubigny du pays d'Anjou, tous deux fort sages & paisibles; mais qui ne peuuent refuser semblables offices en estans requis , & ne sachans ce qui se passoit. l'estimay que ledit Abbé se voudroit en ce fait preualoir des Iesuites, qui sont tres-puissans par deçà en telles matieres, & qu'il falloit les luy soustraire, & les arrester en leur faisant peur, & par eux encore l'estonner & moderer luy-mesme. l'enuoyay doncques enniron l'heure du disner prier ledit Pere Sirmond, qui est fort habile homme, & secretaire de leur Pere General, de venir parler à moy.

Et luy estant venu l'apres disnee, ie luy dis comme i'auois receu lettres de vostre Maiesté, & de Monsieur de Villeroy; esquelles n'y auoit rien de plus exprés, ny que vostre Maiesté monstrast plus auoir à cœur, qu'une certaine entreprise qu'auoit fait tout fraichement l'Abbé de saint Martin de la maison de Rendan. Et apres luy auoir ramenteu le bruit qui auoit esté à Paris l'annee passée pour ceste femme pretendüe demoniaque, & l'Arrest de la Cour de Parlement interuenue là dessus, par lequel il fut dit, entre autres choses, qu'elle seroit ramenee chez ses pere & mere, ie luy racontay comme ledit Abbé auoit enleué de son autorité priuee ladite femme de la maison de sondit pere, & l'auoit emmenee en Auuergne: & comme ladite Cour auoit donné vn autre Arrest là dessus: nonobstant lequel, & la signification qui en auoit esté faite à l'Euesque de Clermont son frere, ledit Abbé auoit fait conduire ladite femme en Aignon, hors le ressort de ladite Cour, & hors l'obeyssance de vostre Maiesté, avec intention encore, comme l'on disoit, de la faire passer iusques en ceste ville de Rome: Que ceste action estoit prise pour vn attentat fait contre la Iustice, & contre l'autorité de vostre Maiesté, & ne seroit point tolleree, ayant desia ladite Cour donné vn second Arrest contre ledit Abbé, où mesme ledit Euesque de Clermont estoit compris. Apres que ie luy eus dit ce que dessus plus amplement, i'adioustay que l'on m'escruiroit de plus; que d'autant que ledit Euesque & Abbé auoient esté instituez par ceux de leur Societé, desquels ils estoient encore environnez & possédez, cet attentat faisoit grand tort à la poursuite qui se faisoit auprès de vostre Majesté pour ladite Societé: Que ie les en auois voulu aduertir, afin qu'ils prissent garde à leurs affaires.

Ledit Pere Sirmond ne pult asseurer sa contenance de façon qu'il ne se monstrast bien estonné, & me respondist, qu'à la verité l'Abbé estoit arriué le matin, & auoit amené ceste femme avec luy: Qu'il les estoit allé voir en leur maison, mais qu'ils n'auoient fait, & ne feroient aucune chose pour luy en cet affaire: & que luy Sirmond dirait au Pere General ce que ie venois de luy dire, tout auisi tost qu'il seroit de retour chez eux; Que l'Euesque de Clermont & ledit Abbé auoient fait plusieurs plaisirs & faveurs à vn col-

lage

lege qu'ils auoient en Auuergne, & que pour cela eux Iesuites ne pouuoient obmettre de leur rendre certains offices communs : mais qu'en chose qui importast tant soit peu au seruice, ou au contentement de vostre Majesté, ils ne s'employeroient iamais pour eux, ny pour autres, & ne pensoit pas aussi que les Iesuites d'Auuergne eussent nullement trempé en ce fait : & qu'il auoit entendu d'ailleurs que ces deux Prelats estoient gens de leurs testes, & se gouernoient d'eux-mesmes, sans beaucoup chercher conseil ailleurs.

Le louay grandement ceste bonne resolution : & pour l'y confirmer encore dauantage, ie luy dis que ie luy auois iusques là recité fidèlement ce qui m'auoit esté escrit, & l'auois aduertiy en amy, de ce que i'auois estimé leur toucher de fort pres, Que ie luy voulois parler de là en auant comme à vn Pere Iesuite, Theologien, Canoniste, & versé en la discipline Ecclesiastique, & en la police ciuile, & en toutes autres bonnes choses, & que ie le priois de me dire librement de luy à moy, s'il luy sembloit que ceste action se peut soustenir en terme de Thologie, ou de Decrets, ou de quelque autre bonne & solide autorité ; Qu'il me sembloit à moy, que ce seroit vne presumption trop exorbitante, qu'un seul homme pensast sçauoir luy seul, de quelque chose que ce fust, plus que toute vne Cour de Parlement, & mesmement de Paris ; Que outre qu'il falloit tousiours estimer pour les choses iugees, & mesmement par des compagnies si venerables, il se voyoit si euidentement que la Cour auoit iugé tres-sagement & tres-iustement, d'auoir fait ramener ceste femme chez ses pere & mere, pour y estre gardee, quand bien elle eust esté possedee du malin esprit. Car apres que les demoniaques auoient esté exorcisez par l'Eglise, & que l'on auoit prié & inuqué le nom de Dieu sur eux, & fait ce qui s'y estoit peu pour les deliurer, il ne falloit point les abandonner à la fin aux autres miseres, necessitez, & dangers, & moins aux fraudes & malices de ceux qui voudroient abuser de ces pauvres gens, & des calomnies du diable, à la diffamation des gens de bien, & à la perturbation du repos public : & ne se pourroit mieux faire pour telles pauvres personnes, & pour le public, que de les remettre en la garde de leurs peres & meres, qui y sont tenus par tout droit diuin, naturel & humain. Que apres toutes ces considerations, vn homme particulier, de quelque qualité qu'il fust, osast attenter contre tant de droicts, & contre vn Arrest d'une telle Cour, & enleuer & emmener hors du Royaume les subiets, du Roy, ie ne pouuois m'imaginer en vertu de quoy, ny en quelle puissance cela se pouuoit faire ; Quand la Cour mesme eust failly à iuger, & que ledit Abbé eust esté seigneur de ladite femme, temporel, ou spirituel, ou tous les deux, qu'encore ne me sembloit-il point qu'il eust autorité d'entreprendre sur vn si grand Magistrat, & sur le Roy mesme, & que ie ne sçauois aucune loy de conscience, ny de zèle, qui nous obligeast à faire par dessus nostre vocation, & renuerfer l'ordre & la police que Dieu a mise & establie parmy les hommes ; Que ie le priois luy Sirmond de me dire librement s'il luy sembloit à luy autrement : que ie pouuois errer, & serois bien aise d'estre deliuré d'erreur, fust ce en tout, ou en partie. Ledit Pere Sirmond me respondit, qu'il luy en sembloit à luy tout ainsi comme à moy, & que à son aduis il n'y auoit aucun erreur en cela. Alors ie luy dis, que quelques-

fois les hommes se départoient des regles & de l'ordre commun des choses pour quelque apparence d'un grand bien, mais que ie ne sçauois voir quel bien ledit Abbé se pouuoit estre proposé de ceste sienne action, fust pour luy, ou pour la Religion Catholique, ou fust en France, ou à Rome; Que en France ne pouuoit aduenir que mal à la personne dudit Abbé, d'unetelle desobeyssance; à present mesmement que tous les Princes, Seigneurs, Gentils-hommes, Soldats, & les voleurs mesmes obeyssioient à vostre Maiesté, & à sa iustice: de sorte que i'entendois que par toute la France on pouuoit aller l'or à la main, & qu'il ne se trouuoit vne seule arquebuze sur les champs; & que ie sçauois d'ailleurs que vostre Maiesté qui auoit tres-volontiers oublié le passé, ne vouloit point qu'on abusast cy apres de sa clemence, & moins endurer d'estre braué, comme auoit fait le feu Roy, dont s'en estoit ensuiuy sa ruine, & le renuersement & confusion de toutes choses, & la destruction des particuliers, & peu s'en estoit fallu que l'Estat mesme, & la Couronne, & la Religion Catholique n'eust esté portee par terre sans esperance de ressource; Que de penser qu'il püst aduenir aucun bien à la Religion Catholique d'irriter les Rois, & les Cours de Parlements, & autres Magistrats, par les Catholiques qui se disoient zelez, c'estoit pure folie: Que au contraire, le moyen de profiter à la Religion Catholique, estoit de mettre de nostre costé les Souuerains; & ceux qui les representoient, par obeyssance, submission, & humilité: Quand à Rome, ledit Abbé ne pouuoit rien aduancer pour son particulier par ce desordre: Que au contraire, ie sçauois qu'il faisoit vn notable déplaisir au Pape, qui ne vouloit estre mis aux mains avec les Cours de Parlement de France; & moins avec vostre Maiesté, & mesmement pour telles choses: Qu'il y auoit quelquesfois des occasions si importantes à la foy Chrestienne, & à la Religion Catholique, qu'il nous falloit endurer mesme le martyre: mais comme il estoit certain en general qu'il y a eu, & y a au monde des demoniaques, & que la puissance de les exorciser est en l'Eglise, aussi quand il estoit question d'un particulier s'il est demoniaque ou non, il y faisoit si obscur, pour les fraudes qui s'y commettent, & pour la similitude des effets de l'humeur melancolique avec ceux du diable, que de dix qu'on pretendoit estre tels, à peine s'en trouuoit-il vn vray, & le plus souuent les Medecins ne s'en accordoient point entre eux, non plus que les Theologiens, & autres gens sçauans: Que le Pape donc & toute la Cour de Rome estimeroit moins ledit Abbé pour ceste action, quand bien ceste femme se trouueroit demoniaque, tant s'en faut que sa Sainteté s'en voulust formaliser contre la Cour de Parlement, & la prendre contre vostre Maiesté: Qu'au reste sa Sainteté & toute ceste Cour atioit appris à ses despens, combien dangereux estoient à la Religion Catholique ces zeles inconsiderez, & les desobeyssances & brauades faites aux Souuerains par les Catholiques qui se pretendoient zelez, & n'en vouloient plus ouïr parler; quoy qu'on fist icy, ie sçauois & voulois dire & protester à luy Pere Sirmond, & à tous autres en parlant à luy, qu'en France on n'oublieroit de tout ce siecle les maux & miseres dont la religion Catholique & l'Estat auoient esté accablez, par l'entremise principalement de telles personnes Ecclesiastiques, qui faisoient ceste profession d'auoir plus de zele que le reste du Clergé; Que vostre

Majesté, & les Princes & noblesse de France, & les Cours de Parlement, & ceux du Clergé mesme qui estoient r'entrez en leur bon sens, ne vouloient plus se laisser assassiner sous couleur de quelque zele que ce fust, ny par homme du monde, de quelque profession, habit, ordre, qualité, ou dignité qu'il fust, & que ie le priois luy Pere Sirmond de faire son profit de ce que dessus, tant pour soy que pour sa Société, & pour ledit Abbé mesme s'il luy vouloit bien.

Ledit Pere Sirmond ne fut moins estonné de ceste fin, qu'il auoit esté du commencement, & respondant avec sa modestie & sagesse accoustumee me dit; qu'à la verité il ne pouuoit iuger quel bien ledit Abbé auoit pû esperer de ceste sienne entreprise, & ne voyoit point qu'il en püst auenir aucun bien ny à luy, ny à la religion Catholique, ains recognoissoit que ledit Abbé en seroit moins estimé en ceste Cour, & du Pape mesme tout le premier, outre le mal qui luy en pourroit auenir en France; Qu'au reste il tournoit m'asseurer que pas vndes leurs ne se mesleroit de ce faire, & qu'au contraire, si ledit Abbé les vouloit croire, il se comporteroit avec tout le respect, modestie, & obeissance possible enuers vostre Majesté & la Cour de Parlement. Ieluy repliquay qu'ils feroient beaucoup pour luy & pour eux mesmes. Et fut ce il s'en retourna chez eux, & ie m'en allay trouuer Monsieur de Sillery, & l'aduertis de la venuë dudit Abbé de saint Martin avec ladite femme, & de ce que i'auois fait avec ledit Pere Sirmond.

Ce que dessus fut fait ledit iour de Decembre seiziesme de ce mois. Le Lundy au matin dixseptiesme auant le cōsistoire ie parlay au Pape, & luy dis comme l'Abbé de saint Martin, dont Monsieur de Sillery luy auoit parlé en sa derniere audience, estoit arriué en ceste ville avec la femme pretendue demoniaque. Sa Sainteté me respondit que puis qu'ils estoient arriuez, il n'y auoit plus de remede; Que s'ils se fussent arrestez en Auignon, il eust pû leur commander de s'en retourner d'où ils estoient venus, mais maintenant de les chasser de Rome tout aussi tost, il n'y auoit point de propos; Qu'au reste i'aussasse ce qui s'y pourroit faire. Ie luy dis, que sa Sainteté ayât entendu la chose comme elle s'estoit passée, & l'importance d'icelle, scauroit trop mieux iuger ce qui seroit pour le mieux: Que ce que ie luy pouuois dire pour ceste heure, estoit de le prier, comme ie faisois tres-humblement, qu'il ne creust de la Cour de Parlement, & moins de vostre Majesté aucune chose sinistre qu'on luy voulust donner à entendre, pour déguiser ou couurir cet attentat, comme les hommes cherchoient ordinairement de justifier leurs actions par toutes voyes, & que vñs de son accoustumee prudence il se gardast de faire ou dire chose qui püst offenser vostre Majesté, ny la Cour ce Parlemēt, ny enfler l'orgueil de tels entrepreneurs au détriment du repos public, & du respect & reuerence que vostre M. & ladite Cour portoient & vouloient pour iamais porter au S. Siege & à la personne de sa Sainteté. Laquelle me repliqua qu'elle ne feroit rien en cet affaire sans l'auoir premierement conféré avec moy, dont ie le remerciay en toute humilité: & luy ayant touché briefement quelques circonstances de ce fait, il me recogneut qu'il ne pouuoit voir luy mesme qu'elle fin pouuoit auoir ledit Abbé, & qu'il luy sembloit que la Cour auoit bien iugé, quād bien ceste femme seroit demoniaque. Ie parlay encore ce matin là en la salle du cōsistoire à M. le Cardinal:

Aldobrandin, & le laissay bien persuadé, & bien préparé pour en respondre quand on luy en parleroit, & faire auprès sa Sainteté les offices cōuenables.

Hier Mardy dix-huictiesme l'enuoya querir ledit sieur de Gourgues, & l'ayant mis en propos dudit Abbé & de ladite femme, j'appris de luy comme ledit Abbé estoit allé descendre avec ladite femme en la place de Monte-Iordano à l'hostellerie de l'espee, & qu'il y estoit encore logé & ladite femme aussi, laquelle ledit de Gourgues disoit auoir veüe, & encore vne sienne sœur que ledit Abbé auoit menée aussi, & que ladite prétendue demoniaque estoit aagée d'environ vingt-vn ou vingt deux ans, & sa sœur de trente. Interrogé par moy qu'est-ce que ledit Abbé vouloit faire de ceste femme, & s'il la vouloit tousiours retenir près de luy: il me respondit qu'il auoit esté conseillé de la mettre chés quelque bonne femme deuote, & qu'on estoit apres à en trouuer vne.

Après cela ie luy dis, que puis que ledit Abbé deuoit estre logé avec luy, & qu'il estoit de ses amis, ie luy voulois dire, afin qu'il le dist audit Abbé de ma part, que la Cour de Parlement de Paris & vostre Maiesté aussi auoient trouué tres-mauuais, que contre l'Arrest premier de la Cour de Parlement, il eust enleué ceste femme du ressort de ladite Cour, & de toute la France, & qu'on y auoit ia procedé par deux autres Arrests contre luy, & encore contre l'Euesque de Clermont son frere; & qu'il auisast bien à ses affaires, & à ce qui luy en pourroit auenir: Que vostre Maiesté m'en auoit escrit, & qu'il falloit que ie luy respondisse: Que des intétions dudit Abbé personne n'en pouuoit parler si bien que luy-mesme, & puis qu'il estoit icy, ie desirois apprendre de luy mesme ce qu'il vouloit que l'en escriuissè à vostre Maiesté, & que ie ne faudrois de vous escrire fidellement ce qu'il m'en feroit entendre, & mesmes il en vouloit escrire à vostre M. ie mettrois ses lettres en mon pacquet. I'estimay que outre ce que i'auois dit au Pere Sirmód, auquel ie n'auois pas expressément enuoyé qu'il parlast audit Abbé de ma part, ie deuois faire faire audit Abbé ceste expressé signification & ces offres de ma part, afin qu'il ne pust prétendre cause d'ignorance des Arrests de la Cour, ny de l'intention de vostre Maiesté, & afin aussi de le retenir de pis faire, & de le mettre au chemin de se recognoistre, & de retourner à son deuoir.

Et de fait ledit Abbé de saint Martin s'en vint me trouuer le mesme iour d'hier, environ trois heures apres que i'eus parlé audit sieur de Gourgues: & me parla fort modestemēt & humblemēt, me remerciant de ce que ie luy auois fait dite par le sieur de Gourgues, & protestant qu'en tout ce fait, il n'auoit fait rien à mauuaise intention, & n'auoit pensé faire aucun desplaisir à vostre Maiesté, ny à ladite Cour: Qu'à considerer l'œuvre en soy, elle estoit charitable & bonne d'aider à vne pauvre fille vexée du malin esprit, & de tascher à l'en faire deliurer: Qu'elle auoit tousiours montré desirer de venir à Rome, & auoit esperé d'y trouuer allegement: Que aussi estoit-il vray-semblable qu'en ceste ville, qui estoit le chef de la Chrestienté, & où residoit le Vicaire de Iesus-Christ, & où tant de Martyrs auoient espandu leur sang, les exorcismes y deuoient auoir quelque particuliere efficacy: Que ce n'estoit de ceste heure qu'il auoit pris soin de ceste pauvre fille, que ia auparauant qu'elle allast à Paris, il en auoit eu soin, & lors qu'elle y fut conduite, il la recommanda à ses amis: Qu'il auoit bien

Depuis entendu quelque chose de l'Arrest que la Cour de Parlement auoit lors donné pour le regard de ceste fille, mais que ceste sorte d'Arrest n'estoient point perpetuels, ains estoient donnez par prouision & à temps, & qu'il pensoit que ledit Arrest fut expiré, lors que luy retournant de Poictou avec vne sienne sœur, son chemin s'estoit addonné par le pays où estoit ladite fille, laquelle il n'auoit point trouuee chez son pere qui se tient à Romorantin, ains en vn village près ladite ville: Que ladite fille ne trouuoit allegement qu'en la Communion, & que là où elle estoit on ne luy vouloit donner à communier sinon vne fois le mois: Qu'il n'auoit iamais rien sceu de l'Arrest que ie luy disois auoir esté donné, qu'il eust à remettre ladite fille chez ses pere & mere: & l'Euesque de Clermont son frere, à qui ie disois ledit Arrest auoir esté signifié, ne luy en auoit rien fait sçauoir; Que moins auoit-il rien entendu du troisieme Arrest, par lequel il auoit esté reordonné cela mesme, sur peine de saisie des fruits de leurs benefices; Que maintenant que ie luy auois fait sçauoir, il me declaroit qu'il ne vouloit faire autre chose, ny passer outre pour le regard de ladite fille; Que le pere d'elle estoit vn marchand de draps, qui auoit eu autresfois des moyens honnestement, mais ils luy estoient diminuez par les guerres, à l'occasion aussi de la calamité de ceste sienne fille qui l'auoit destourné de son traffic; Que luy Abbé l'auoit aidé de ses moyens, & les aideroit encore: Qu'il estoit apres à la mettre chez quelque bonne femme d'icy, & l'oster de l'hostellerie où il estoit encore logé luy-mesme, mais qu'il n'y feroit autre chose; Qu'il me prioit de le faire ainsi entendre à vostre Maiesté, & que suiuant l'offre que ie luy auois fait d'enuoyer ses lettres, il vous escriroit luy-mesme, esperant que vostre Maiesté receuroit ses excuses. Je ne faillis de luy conseiller le plus fidellement & amiablement qu'il me fut possible ce que i'estimay estre pour la satisfaction de vostre Maiesté & de la Cour de Parlemēt, & encore icy pour celle de nostre S. Pere, & pour son bien & profit particulier. Il me monstra de l'entendre fort volontiers, & de s'y vouloir conformer, & l'espere qu'il le fera: aussi prendray-je garde de fort près, & en tant que i'en puis iuger dès maintenant, ceste chose ne sera pas si grand cas comme l'on pensoit, & ne produira pas les mauuais effects qu'on craignoit. Car outre que ledit Abbé voudroit estre à recommencer, & n'osera faire ce que possible il pensoit quand il est party de France, ie luy ay fermé toutes les adueniēs, & enclouē ceux dont il se fust peu aider. D'ailleurs le Pape & Monsieur le Cardinal Aldobrandin sont tres-bien persuadez à l'aduantage de la Cour de Parlement, & de vostre Maiesté encore plus: & ay parole de sa Saincteté qu'elle ne fera rien en cecy, sans l'auoir premierement conseré avec moy. D'aduantage, la reputation de vostre Majesté & de la Couronne est si haut releuee en ceste Cour depuis quelque temps, & ceste entreprise & toute ceste matiere est si peu fauorable en soy, qu'il ne se trouuera personne qui la veuille espouser pour ledit Abbé contre vostre Maiesté, & contre la Cour de Parlement, quand bien ledit Abbé voudroit. Toutesfois ie ne m'endormiray point sur toutes considerations, ains veilleray, & y pouruoiray au mieux qu'il me sera possible, & tant plus que ie me trouue icy seul, estant party Monsieur de Sillery pour Florence dés Lundy 17. de ce mois. A tant, ie prie Dieu qu'il vous donne &c. Sire, &c. De Rome, ce Mercredy 19. Aueil, 1600.

A V R O Y.

CCXII.

S R E,

Je respon. par vne lettre à part à ce qu'il a plu à vostre Maïesté m'escrire par la lettre du 22. Mars, touchant le fait de l'Abbé de S. Martin de la maison de Radan. Par ceste-cy ie respondray au reste de ladite lettre: au commencement de laquelle ie vois que vostre Maïesté a trouué bonne la réponse que i'auois faite au Pape touchant ce qu'il m'auoit demané de la qualité d'Ambassadeur en Monsieur d'Alincourt, lequel suiuant madite réponse a esté traité tel par sa Saincteté, & par tous les Seigneurs de ceste Cour, & les Ambassadeurs mesmes de l'Empereur & du Roy d'Espagne l'ont visité auant que d'estre par luy visité. Aussi a t'il geré ceste qualité fort dignement, & au commencement de tous, depuis son arriuee iusques à son partement, qui fut le Mardy vnziesme de ce mois, pour aller à Florence par le chemin de Loretto, & a depuis esté suiuy par Monsieur de Sillery Lundy dix-septiesme de ce mois par le plus court chemin, pour arriuer ensemble à Florence, comme l'un & l'autre en auront donné aduis à vostre Maïesté.

Aussi ay-ie veu ce qu'il a plu à vostre Maïesté respondre à la plainte que le Pape m'auoit faite de la dignité de Pair de France donnée à Monsieur de la Trimouille, & de celle d'Amiral qu'on auoit donné à entendre à sa Saincteté que vostre Majesté luy vouloit encor donner. Ce que ie représenteray à sa Saincteté en ma premiere audience, qui pourra estre demain.

Monsieur de Sillery auant que partir me bailla deux autres lettres de vostre Maïesté; l'une du sixiesme Ianuier, touchant les funerailles du feu Roy, l'autre du huietiesme, portant commandement de seruir vostre Maïesté en l'absence dudit sieur de Sillery. Ce que ie feray tres-volontiers, & tres-fidèlement, & au mieux que ie sçauray & pourray: remerciant vostre Maïesté en toute humilité de l'honneur qu'il luy plaist me faire, & de la confiance qu'elle a en ma fidelité, dont elle ne se trouuera jamais deceuë.

Il y a à Malte vn Inquisiteur peu discret qu'on y enuoya d'icy l'année passée, dont le Grand Maistre & toute la Religion ont enuoyé se plaindre au Pape, & y a trois Ambassadeurs de ladite Religion pour eët effect long temps y a. Iusques icy les Cheualiers François n'auoient eu rien de particulier à demesler euec luy, dont nous estions icy fort aises: mais il est venu tout fraichement qu'ils s'y sont m'eslez pour vne bonne fois. Car ledit Inquisiteur ayant fait emprisonner vn Capitaine Allemand d'un nauire qui portoit la banniere de France, ils sont allez quasi tous trouuer ledit Inquisiteur, & l'ont contraint de bailler ledit Capitaine, qui s'en est allé bien.

est apres sans se representer. Cét attentat sera icy fort mal pris, & nous donnera trop à faire : combien qu'il semble à nos Cheualiers que telles choses soient aussi faciles à excuser à Rome par Monsieur de Sillery & par moy, comme elles ont esté à commettre par eux à Malte. I'y feray ie que ie pourray. A tant, &c. Sire, &c. De Rome ce 20. d'Auril, 1600.

A V R O Y.

CCXIII.

S R I E.

Estant party de ceste ville pour Florence Monsieur de Sillery le dix-septiesme de ce mois, i'escris à vostre Maiesté Mercredi dix-neufiesme, & leudy vingtiesme, & baillay mes lettres à vn courier extraordinaire que Monsieur le Cardinal Colonne depeschoit vers l'Archiduc Albert, sur le decez du Cardinal Madruccio aduenu ledit Ieudy au matin vingtiesme. Le Vendredy vingt-vniesme ie fus à l'audience de nostre saint Pere : au commencement de laquelle ie luy dis comme i'auois lettres de vostre Maiesté du vingt-deuxiesme de Mars, & la responce que vostre Maiesté m'auoit faite à ce que ie vous auois escrit de la demande qu'il m'auoit faite, si Monsieur d'Alincourt estoit Ambassadeur ou non, & de ce qu'il s'estoit plaine de la dignité de Pair de France donnée à Monsieur de la Trimouille, & de celle d'Amiral qu'on luy auoit dit que vostre Maiesté vouloit encores donner au mesme fleur de la Trimouille. Sa Saincteté fut fort aise d'entendre la confirmation de ce que ie luy auois respondu, & ce qu'il auoit pleu à vostre Maiesté y adiouster de plus, & mesinement que toutes vos actions tendoient à l'exaltation de la Religion Catholique, lors mesme qu'il sembloit que vous fissiez quelque chose pour ces gens là ; & me dit qu'il croyoit volontiers ce que ie luy disois de vos bonnes & saintes intentions ; mais qui ayme craint : & il estoit grandement ialoux de ce qui appartenoit à la Religion Catholique, & aymoient vniquement la personne de vostre Maiesté, & quand elle entendoit dire qu'elle auoit fait ou vouloit faire quelque chose en faueur des heretiques, il ne pouoit faire qu'il ne s'en esmeut, pour ce que l'accroissement de telles gens tournoit auement à la diminution de la Religion Catholique, & donnoit à soupçonner & parler sinistrement de la personne de vostre Maiesté, de la reputation de laquelle il estoit aussi soigneux comme de la sienne propre ains il luy sembloit que de vos comportemens enuers la religion Catholique dependoient partie de sa propre reputation.

Sa Saincteté ne me parla point de la ligne contre le Turc, comme ie m'attendois qu'il feroit, d'autant qu'il auoit dit à Monsieur de Sillery & à moy mesme qu'il en falloit traiter, & ne plus y perdre temps. Duquel silence de sa Saincteté ie fus bien ayse, pour ce que c'est vn affaire qui a infinies difficultez, & auquel il semble que vostre Maiesté doit estre tiree des derniers plustost qu'y venir des premiers. Bien me demanda sa Saincteté si



vostre Maïesté ne m'auoit point escrit de la publication du Concile, & de  
 le restitution des Iesuites, dont on vous faisoit instance de sa part. Je luy dis  
 que non, d'autant que de ces choses-là & autres affaires ordinaires, vostre  
 Maïesté en escriroit à l'Ambassadeur, & que celles dont ie venois de parler,  
 vostre Maïesté m'en auoit escrit sur l'occasion que ie vous en auois don-  
 née en vous escriuant ce que sa Sainteté m'en auoit dit. Bien sçauois ie  
 par ce que i'en auois veu és depeschés de Monsieur de Sillery, que vostre  
 Maïesté estoit apres à faire vne bonne resolution sur le fait dudit Con-  
 cile & des Iesuites, & faisoit tout ce qu'elle pouuoit pour contenter sa Sain-  
 teté, & que i'esperois qu'en brefs sa Sainteté en receuroit toutes bonnes  
 nouuelles. Sa Sainteté me repliqua qu'elle desiroit infiniment la pu-  
 blication dudit Concile, pour l'edification de Dieu, & pour l'edification  
 de son Eglise, & pour le bien qui en viendrait à vostre Royaume, non  
 seulement au spirituel, mais aussi au temporel, & particulièrement pour  
 l'honneur de vostre Maïesté, qui auoit promis & iuré la publication du-  
 dit Concile: outre que sans cela elle y seroit tenuë comme Roy Catholi-  
 que & Tres Chrestien, & qu'en ce faisant vous mettriez sur vostre teste  
 vne Couronne de plus grande gloire, que n'estoient les deux de vos deux  
 Royaumes ensemble: Que par ce moyen vostre Maïesté fermeroit pour  
 iamais la bouche à tous ceux qui voudroient detracter d'elle: Que outre  
 les susdites considerations qui luy ont tousiours fait desirer ceste publica-  
 tion, il s'y affectionnoit encores d'auantage de iour en iour pour les desor-  
 dres & abus extremes qu'il apprenoit estre en l'Eglise Galicane, par tant de  
 Prestres François qui viennent à present à Rome à l'occasion du Iubilé, &  
 se trouuent souilleez & contaminez de tant d'irregularitez, qu'il en auoit  
 non seulement compassion, mais aussi vne grande horreur en son ame:  
 Qu'il exhortoit & prioit vostre Maïesté de le deliurer de ceste angoisse, &  
 mesme d'autant qu'il y alloit aussi de la conscience de vostre Maïesté: Qu'il  
 pensoit vous auoir fait cognoistre assez par bons effects, & en grande  
 varieté des choses, avec quelle affection il embrassoit vos affaires: Qu'il  
 estoit prest de le monstrier encores en toutes autres occasions qui se pour-  
 roient presenter cy-apres, & partant il vous supplioit de luy correspon-  
 dre en ceste bonne volonté, & luy complaire en cecy, puis que vostre  
 Maïesté ne luy pouuoit faire vn plus grand plaisir en ce monde. Je luy  
 dis que i'esperois que sa Sainteté en seroit bien tost consolee & contente.  
 Surquoy il me repliqua que ce ne seroit assez de publier ledit  
 Concile, mais qu'il falloit que ceste publication fut faicte sincerement  
 & notamment, & que vostre Maïesté s'en fit honneur, & ne permit  
 que l'on y mit rien qui vous en fit perdre le gré enuers les gens de bien.  
 Je vous dis cela (dit-il) pour ce que le Chancelier a dit à quelqu'un, que  
 parmy les conditions de l'absolution, l'article qui concerne la publica-  
 tion dudit Concile, contient que le Roy le fera publier & obseruer en tant  
 que la tranquillité du Royaume le pourra permettre: & cela me fait crain-  
 dre qu'on vueille faire quelque emplastration qui soit vne vaine apparence,  
 plustost qu'un vray & salutaire remede. Je luy dis qu'il n'auoit à craindre  
 telles choses, & qu'il en mist son esprit en repos: Que Monsieur le Chan-  
 celier n'auoit voulu dire autre chose par là, sinon ce que Monsieur d'Eureux

& moy auions entendu quand nous fismes exposer ladite modification au susdit article; à sçauoir que vostre Maiesté ne seroit tenu faire obseruer ledit Concile par ceux de la religion pretenduë reformee contre l'Edit de pacification, & par ce moyen entrer en guerre contre eux, & r'allumer les troubles en son Royaume: Qu'à cause de cela mesme nous ne voulusmes passer vne clause qui est à la fin du formulaire de la profession de foy, à sçauoir que celuy qui fait telle profession la fera garder par tous ses subiects; Que suiuant cela Monsieur le Chancelier auoit voulu dire, que par la publication du Concile les Edicts de pacification ne seroient point abolis, ny les heretiques contrains d'observer le Concile, iusques à ce que Dieu les eust illuminez, & reduits au giron de l'Eglise Catholique: mais qu'au reste le Concile seroit receu & obserué par les Catholiques. Le Pape me respondit que si le dire du Chancelier s'entendoit ainsi, il n'y auoit rien de mal, & que si le souuenoit bien que nous luy auions ainsi expliqué ladite restriction de la tranquillité du Royaume.

Après cela, il me dit qu'il auoit à cœur la chose des Iesuites, & l'estimoit grandement utile, à tout vostre Royaume, & qu'il vous prioit aussi d'y pouruoir au plustost. Quand i'eus fait ce que i'auois à faire pour vostre Maiesté, ie parlay à sa Sainteté pour la Reyne douairiere de plusieurs choses qu'elle m'a commandees. Je pensay ne deoir traiter en coste premiere audience que des plus faciles, à sçauoir de trois dispenses qu'elle desiré pour sa personne propre, qui sont, de pouuoir communier, nonobstant que pour le catarre qui luy descend ordinairement en la poitrine elle aye tenu & auallé quelque peu de sucre de Candie, ou d'autre telle chose, d'auoir vn Autel portatif, & licence de manger de la chair aux iours maigres pour la mesme infirmité. De toutes lesquelles choses i'eus fort bonne intention de sa Sainteté.

Ie ne veux oublier que l'Abbé de S. Martin de la maison de Rendan, qui s'est cōporté fort modestement depuis qu'il est à Rome, comme i'ay escrit à vostre Maiesté par mes lettres precedentes, m'auoit requis de le vouloir introduire à baiser les pieds au Pape: laquelle chose tant s'en faut que ie luy refusasse, que ie luy accorday fort volontiers, ayant mieux en luy faisant cet office, ouyr moy-mesme ce qu'il diroit à sa Sainteté, que nō pas en m'en deschargeant, demeurer en ignorance de ce qu'il auroit fait & dit. Je luy dis doncques qu'il se mit en l'anti-chambre, & qu'à la fin de mon audience ie prierois le Pape de le vouloir admettre à luy baiser les pieds. Quand i'eus doncques traité avec sa Sainteté toutes les autres choses que ie voulois, ie luy parlay dudit Abbé de saint Martin, & tout aussi tost que ie l'eus nommé, sa Sainteté me dit qu'il m'en vouloit demander. Je luy dis doncques comme ie luy auois fait parler par diuerses personnes tout aussi tost qu'il fust arriué avec ceste femme, & comme depuis il m'estoit venu voir, & m'auoit parlé fort modestement, m'assurant qu'il n'auoit rien fait à mauuaise intention, ny pour offencer la Cour de Parlement, ny moins vostre Maiesté, à laquelle mesme il auoit escrit. Le Pape qui ne veut point de noise, fut bien aise de ceste modestie, & me demanda ce qui auoit esté fait de ceste femme: & ie luy respondis qu'on l'auoit en fin logé chez vne femme deuote, où elle estoit, & n'en bougeoit que pour aller aux Eglises. Et après que i'eus dit à

sa Saincteté que ledit Abbé estoit en l'Antichambre & desiroit luy baiser les pieds, elle me demanda si ie voulois qu'elle luy dist rien touchant le fait de ladite femme. Je luy respondis que ie remettois cela à sa prudence & discretiō: & me repliqua qu'il valloit mieux ne luy en rien dire si l'autre ne luy en parloit point; & sur cela sonna la clochette, & cōmanda à vn sien Camerier qui estoit venu au son qu'il fist entrer l'Abbé de S. Martin. Lequel ayant baisé les pieds de sa Saincteté, luy dit qu'estant venu à Rome pour gaigner le Iubilé, il n'auoit voulu faillir de luy venir baiser les pieds, & prendre sa sainte benediction, & luy offrir son humble seruiue. Sa Saincteté luy respondit qu'il estoit tres-bien venu, & qu'elle sçauoit qu'il estoit de bonne maison, & de pere & de mere tres-bons Catholiques, & que son pere auoit mis sa vie pour la religion Catholique, & pour la Couronne, & qu'il s'asseuroit qu'il auoit le mesme zele, & l'accompagneroit de la discretion & modestie & autres vertus requises, & si elle pouuoit faire quelque chose pour luy elle le feroit volontiers: & ainsi ledit Abbé se leua & sortit de la chambre, où ie demuray quelque temps apres. Je n'allay point pour ce iour-là chez Messieurs les Cardinaux Aldobrandin & saint George neueux de sa Saincteté, par ce qu'à l'heure ils estoient aux funerailles du Cardinal Madruccio, où i'eusse esté aussi, comme c'est la coustume, mais elles se faisoient à la mesme heure que i'eus audience, laquelle i'auois demandée le iour auparauant. Mais hier Samedy au matin ie fus les trouuer, & leur dis sommairement tout ce qui s'estoit passé en l'audience du Vendredy. Il n'y eust point entre eux & moy autre chose notable qui merite que i'en rende compte à vostre Majesté, sinon que Monsieur le Cardinal Aldobrandin ne me parla point de la ligue contre le Turc, mais Monsieur le Cardinal S. George m'en parla, toutesfois en termes generaux.

A tant, &c. Sire, &c. De Rome, ce Dimanche 23. Auil 1600.

## A V R O Y.

### CCXIV.

SIRE,

I'escriuis à vostre Maieité le vingt-troisiesme de ce mois ce qui s'estoit passé en l'audience que i'auois eue de nostre saint Pere le Vendredy auparauant vingt-vniesme. Le Landy vingt-septiesme fust Consistoire, qui me donna occasion de parler au Pape d'une Abbaye que i'auois à proposer, & d'une autre à preconiser audict Consistoire. Et apres cela sa Saincteté me dit qu'elle auoit aduis qu'au Marquisat de Salusses & aux environs, les heretiques ayans entendu l'accord qui auoit esté fait entre vostre Maieité & le Duc de Sauoye, commençoient desjà à brauer, & se vantoient, qu'ils seroient bien tost retourner les ministres en certaines vallees, d'où ledit

Duc les auoit chassez; & chasseroient l'Inquisition de Salusses, où ledit Duc l'auoit mise. Je dis à sa Sainteté que ie ne croyois point que la chose portée par ledit aduis fut vraye, ains que c'estoit vn artifice du Duc de Sauoye, qui cherchoit moyen de différer l'exécution des choses par luy promises, & de mettre sa Sainteté de son costé. Mais que ie l'asseurois que les choses de la religion Catholique seroient aussi bien, & mieux au Marquisat apres que vostre Maiesté l'auroit reconuré, qu'elles ne sont à present, suiuant ce qu'autresfois ie luy auois déclaré de la part de vostre Maiesté. Monsieur le Card. Aldobrandin m'en parla aussi, quand nous fusmes descendus en la salle du Consistoire & me fist encores les choses plus grandes: auquel ie respondis cela mesme. Et ay trouué apres m'en estre enquis qu'il ne se remuoit rien en ces quartiers là; sinon qu'on y attend la deliurance d'une captiuité plus dure que ne fut iamais celle des enfans d'Israël en Egypte, lequel desir est tenu par Monsieur de Sauoye pour la plus damnable heresie du monde. Depuis, à sçauoir le leudy au matin vingt-septiesme de ce mois, ie receus lettres de Monsieur le Presidēt de villiers Ambassadeur de vostre Maiesté à Venise, par lesquelles il m'escriuoit entre autres choses que la Seigneurie auoit aduis de leur Ambassadeur resident près l'Empereur, qui se plaignoit ouuertement & hautement de ce qui auoit esté conuenu entre vostre Maiesté & le Duc de Sauoye, disant que pour les droicts qu'il auoit au Marquisat de Salusses & en la Bresse comme Empereur, telles choses ne se deuoiēt ny pouuoient traiter sans luy. Ce qui me donna incontinent à pēser que c'estoit vn artifice dudit Duc, qui faisoit tenir ce langage à l'Empereur, lequel l'estime n'estre assez fin pour se garder de l'astuce de l'autre, qui voudroit bien que le Pape pour l'interest de la religion, & l'Empereur, pour le sien propre, la prissent pour luy, & se rendissent auteurs de l'infraction de ses promesses, pendant qu'il feroit beau semblant de les vouloir garder, & d'estre tout prest à les executer. Cela fut cause que ie me resolu d'en parler au Pape en l'audiēce que i'auois le lendemain Vēdredy, qui fust hier.

Auquel iour d'hier vint bien à propos que l'ordinaire de Lyon arriua au matin, & m'apporta non seulement les lettres que Monsieur de Villeroy m'escriuoit des premier & troisieme de ce mois, mais aussi celle que vostre Maiesté auoit escrite le premier de ce mois à Monsieur de Sillery, qui me l'enuoya de Florence, où ledit courier ordinaire estoit passé. L'apresdinee doncques d'hier ie fus à l'audience, & commençay par ce que sa Sainteté m'auoit dit le lundy au matin auant que descendre de sa chambre en la salle du Consistoire, touchant les pretendus brauades qu'on luy auoit escrit que faisoient desia les heretiques au Marquisat de Salusses & aux enuirons: & priay sa Sainteté de se garder des artifices de ce Prince qui auroit trouué moyen de deceuoir le Nonce qui est près de luy, en apostant des gens qui comme d'eux-mesmes luy dissent de telles choses pour les escrire à sa Sainteté, & qui encores trouueroit enfin moyē de surborner des hommes pour esmouuoir les gens de ce pays-là, & leur faire dire & faire ce à quoy ils n'auroient pensé. Toutesfois que ie m'en estois informé, & auois trouué qu'oultre qu'il auoit fait mourir ou fuyr tous les plus apparens, & soupçonnez non tant du Lutheranisme ou Calvinisme que de France-

uoient faire estoit de respirer, sansoser s'entre-parler ny souspirer l'un près de l'autre, pour les espions qu'il auoit semez parmy eux. Et apres cela ie luy dis ce que ledit Duc faisoit dire par l'Empereur, & le desir qu'il auoit de rendre sadite Saincteté & ledit Empereur auteurs de sa perfidie, s'il pouuoit. Mais que vostre Maiesté estoit tres-assuree de la prudence & constance de sa Saincteté, qui sçauoit bien cognoistre & reietter telles impostures; mais que ie ne sçauois si l'Empereur s'en sçantoit si bien garder: m'assurant neantmoins que sa Saincteté en tels cas luy donneroit les conseils & bons recors qui luy seroient necessaires; Que les droicts des Empe-reurs d'auourd'huy n'estoient que pretentions; Qu'ils en auoient sur Rome mesme. Mais l'Empereur Charles le quint, qui pour le moins sçauoit autât que cestuy-cy, & sans doute pouuoit plus, nedit iamais vn seul mot de pretention qu'il eut sur ledit Marquisat en la paix qui se fist en l'annee 1544. entre luy & Charles Duc de Sauoye d'une part, & le Roy François d'autre, iacoit que deslors nous eussions le Marquisat; Que l'Empereur d'auourd'huy a tousiours laissé iouyr paisiblement le Duc de Sauoye de la Bresse, & ne dist mot quand ledit Duc s'empara du Marquisat: & maintenant qu'il voit remettre les choses selon le deuoir & la iustice, il s'en of-fençoit & alleguoit des pretentions, lesquelles en tout euenement ne luy se-roient ostées quâd ledit Duc de Sauoye feroit ce qu'il auoit promis, & que d'ailleurs il deuoit fait. Mais côme l'Empereur n'estoit point en estat qu'il pût se faire obeyr par ses vassaux propres, tant s'en faut qu'un Roy de Frâ-ce, & mesmement Henry quatriesme, en deust laisser recouurer le sien; aus-si se trompoit bien le Duc de Sauoye de recourir à tels moyens qui ne ser-uiroient que de roidir dauantage, & d'encourager & enflammer vostre ge-nerosité. I'eussé volontiers adiousté, qu'outre que l'Empereur en cela ne faisoit rien pour Monsieur de Sauoye, il faisoit encor peu cautelement pour soy-mesme, de se declarer contre vostre Maiesté & contre la France, en vn temps auquel il en desiroit & demandoit secours contre le Turc, & se pour-suiuoit vne ligue, de laquelle il estoit le premier & le principal profit: mais ie ne voulois pas donner occasion au Pape d'entrer au propos de la ligue, comme de fait il ne m'en parla point en ceste audience non plus qu'en la precedente.

Sa Saincteté me respondit quant à la nouuelle de Salses, qu'il l'auoit de gens dont il se fioit, qui n'estoient nullement interressez, & qu'au reste le temps descouriroit la verité. Et quant à l'Empereur, qu'il ne croyoit point qu'il eust dit telles choses; & que par tout il y auoit des gēs, qui ou par vanité, ou par mauuaise intention, ou par ignorance disoient ce qui n'estoit point, & que comme nous aduertissions les autres, nous deuions aussi nous garder de telles gens: ce qu'il dit en soufiant.

Après cela le luy dis comme i'auois ce iour là mesme receu lettres de la Cour, & mesme celle que vostre Maiesté auoit escripte le premier de ce mois à Monsieur de Sillery, & luy recitay ce que i'y auois appris de la con-uerſion du ſieur d ſainte Marie du Moht, & l'acheminement de celle de plusieurs autres de sa qualité, & de la conséquence que telles conuerſions, fauorisées & proueuës par vostre Maieſté, apportoiēt pour la confir-mation des Catholiques, & pour la reduction des deuoyez. Aussi luy dis-je

La sommation faite par le sieur du Plessis à Monsieur l'Euesque d'Eureux, & la response que ledit sieur Euesque y auoit faite, dont ie luy laissay vn exemplaire imprimé, ne luy celant point comme Monsieur le Nonce, soit pour ignorer la langue Françoisse, ou pour estre mal informé des personnes peu moderees, s'estoit remué vn peu pour ladite response comme Monsieur d'Eureux fust voulu entrer en dispute des poincts de la Religion, & recevoir l'autre à desfendre les erreurs ia condamnées: mais que sa Saincteté verroit par ladite response, qu'en cecy ne s'agissoit que des choses de fait, à sçauoir si ledit du Plessis auoit allegué faulxement ou non, la premiere desquelles dependoit de la seule inspection des antheurs alleguez, & de la conference des passages és liures originaux avec les allegations faites par ledit du Plessis. A quoy nostre S. Pere print plaisir, & en loua Dieu, & vostre Maiesté.

De là ie passay au fait du Concile & des Iesuites, & luy dis comme vostre Maiesté alloit disposant & preparant les choses pour en contenter sa Saincteté, & n'obais rien de ce que i'en trouuay en ladite lettre escriite à Monsieur de Sillery. A quoy sa Saincteté me respondit, que pouruen que la chose se fist, il n'importoit que cefust vn peu plus tard ou plustost: mais il desiroit que ce bon œuvre se fist en toutes façons. Et sur ce me dit derechef ce qu'il m'auoit dit à ce propos en l'audience precedente, dont i'ay rendu compte à vostre Maiesté par ma lettre du 23. de ce mois, & partant ie n'en feray point icy de redite.

Cela fait, ie luy dis ce que i'auois trouué à la fin de ladite lettre du premier de ce mois touchant l'assensbtee qui se deuoit faire à Bologne, pour traiter la paix entre le Roy d'Espagne & les Archiducs d'une part, & la Royne d'Angleterre d'autre, & touchant le peu que l'Audiencier Verreichen auoit fait en Angleterre.

Quand i'eus athené ce qui resultoit des lettres que i'auois receuës ledit iour d'hier, ie parlay à sa Saincteté de l'erection de trois Monasteres de Religieuses Capucines, dont la Royne douairiere auoit requis vostre Maiesté de luy escrire, & luy presentay les trois lettres que vostre Maiesté luy en escriuait, & ensemble celle que ladite Dame Royne luy enuoyoit. Sa Saincteté monstra vouloir complaire à vostre Maiesté & à ladite Royne, & n'y fit autre difficulté, sinon que les Religieux Capucins ne veulent en sorte du monde se charger de confesser & gouuerner les Religieuses, & qu'à peine auoit-il pû estre obey d'eux, quand il leur auoit commandé par plusieurs fois de prendre la superintendance de celles de Rome.

Au demeurant l'Abbé de saint Martin continué en sa modestie. La femme qu'il mena a esté mise avec sa sœur chez vne femme deuote, comme j'ay escrit cy-deuant, & la fait-on communier tous les iours. I'ay sçeu qu'ô l'exorcise encorés avec d'autres, sans en faire autre bruit: & c'est chose que ie ne veux point empescher, pour ne donner à parler dauantage de cela mesme, & encoré à mal penser & à mal parler de nous mesmes, comme de gens qui s'offensoient qu'on inuoke le nom de Dieu sur des personnes soupçonnées possedees du malin esprit, soit tel soupçon vray ou non. En somme, tout ce qu'on sçauoit faire icy ne fera rien, si nous mesmes n'en

faisons quelque chose, en voulant empêcher les choses accoustumées & ordinaires, & qui en ont apparence de piété. Car au reste i'ay donné tel ordre à toutes choses, que soit ceste femme demoniaque ou non, le Pape ny autre personne de quelque consideration n'en peusera autre mal & ne nous en estimera ny plus ny moins: & l'Abbé, quand il se departiroit de la modestie où iel'ay rangé & l'entretiens ( ce que ie ne pense point ) n'y sçauoit rien gagner.

Les galeres de Genes sont repassées par ceste coste s'en retournans à Genes, sans aller plus loing que Naples. Les Espagnols sont apres à faire bailler à vn Cordelier Espagnol le titre de l'Archeuesché de Dublin en Irlande, à quoy s'opposent formellement quelques Prestres Irlandois qui sont icy, disans que ce Cordelier Espagnol n'entéd rien en ceste langue là: & que s'il falloit bailler titre à quelqu'un, que ce seroit à vn d'entre-eux Irlandois non à vn Espagnol: & alleguent l'exemple du Roy d'Espagne mesme, qui ne permet qu'en toutes les Espagnes il y ait aucun Euesque qui ne soit de nation Espagnole. Les mesmes Espagnols depuis la mort du Cardinal Madruccio, qui auoit le secret du Roy d'Espagne touchant le Conclau, consultent fort entr'eux à qui ils doiuent procurer ceste charge, & en faueur de qui ils doiuent conseiller le Roy. Le Cardinal Gesualdo, quoy que Doyé du College, & vassal & seruiteur affectionné, ne leur semble peser assez, non plus que les deux Cardinaux Espagnols Deza & Auila qui resident icy. Como, qui passe 75. ans, est tenu d'eux plus propre pour conseiller que pour chef. Terranoua, bien que Sicilien & de tres-illustre maison, ne leur semble assez fin ny esueillé. Colonna a trop de grands parens, & les Espagnols pensent qu'il s'en seruiroit pour la grandeur de sa maison. Aquauina est hay d'eux pour n'auoir voulu faire à leur gré ces choses de France contre le bien du S. Siege & de toute la Chrestienté. De façon que l'on croid qu'ils conseilleront le Roy d'Espagne, s'ils ne l'ont desia fait, de faire venir resider en ceste Cour le Cardinal André d'Autriche pour estre chef de la faction Espagnole, conseillé par Como, & par quelques autres des plus cauts. Atant, ie prie Dieu, &c. Sire, &c. De Rome ce Samedy 29. d'Auril, 1600.

A V R O Y.

CCXV.

S I R E,

I'escris à vostre Maiesté le vingt-troisiesme d'Auril ce qui s'estoit passé en l'Audience que i'auois eue du Pape le Vendredy 21. & depuis ie vous escris le 29. du mesme mois ce qui s'estoit passé entre sa Sainteté & moy le Lundy vingt-quatrième auant le Consistoire, & depuis en l'audience du Vendredy vingt-huitiesme & enuoyay ces deux lettres en vn mesme

paquet à Florence ledit iour vingt-neufiesme pour estre baillées à Monsieur d'Alincourt, ou au courrier qui seroit depeesché vers vostre Maiesté. Mais pour s'estre trouqué party non seulement ledit sieur d'Alincourt, mais aussi Monsieur de Sillery, ledit paquet m'a esté renuoyé de Florence & sera avec la presente.

Le premier iour de May au matin, vint vers moy le sieur Erminio Secrétaire du Pape sous Monsieur le Cardinal Aldobrandin, lequel m'apporta de la part de sa Sainteté vn escrit en Italien, touchant la ligue qu'elle est après à faire entre les Princes Chrestiens contre le Turc, & me dit qu'il auoit commandement d'en porter autant aux Ambassadeurs de l'Empereur & du Roy d'Espagne, me recomandant grandement de la part de sa Sainteté de tenir la chose secrette, comme aussi le recomandoit-il aux autres. L'enuoye copie dudit escrit à vostre Maiesté, la suppliant tres-humblement d'observer entre autres choses, comme sur la fin l'on veut que vos ministres, avec ceux de l'Empereur & du Roy d'Espagne, & ceux que sa Sainteté deputera de sa part vacquent à cét affaire principalement iusques à en laisser toutes autres choses, & s'assemblans tiennent des congregations, & non seulement disent leurs aduis sur les articles y contenus, mais aussi comme il est porté dès le commencement de l'escrit les resoluent & accordent, pour puis apres passer à d'autres poincts & articles. En quoy il me semble qu'ils vont vn peu trop viste pour nous, & s'ils en pressent dauantage, ie seray contraint pour mon regard de leur dire, le plus ciuilement neantmoins que ie pourray. Cependant il plaira à vostre Maiesté commander ce qu'elle voudra estre fait & dit là dessus.

Le Vennredy ensuiuant ie fus à l'audience, & me sembla que ie deuois la commencer par ledit escrit qu'il luy auoit pleu m'enuoyer par le sieur Erminio, & l'auois leu & considéré diligemment: mais qu'estant la chose de telle importance comme elle estoit, Monsieur de Sillery deuant arriuer le lendemain comme i'en auois aduis, ie priois sa Sainteté de trouuer bon que ie reseruasse la chose en son entier iusques à sa venue, & luy dirois ce que le sieur Erminio m'auoit dit en me le baillant: dequoy sa Sainteté se contenta.

En second lieu, ie priay sa Sainteté de vouloir ordonner aux Religieux Cordeliers qui doiuent eslire leur General à ceste feste de la Pentecoste prochaine, qu'ils eussent à en eslire vn de la nation François, pour les causes contenues en la lettre qu'il peust à vostre Maiesté m'en escrire le quatrième d'Auril, que ie déduisis à Sa Sainteté avec d'autres dont ie me pûs aduiser. La suppliant encores de vouloir faire vne ordonnance pour l'aduenir, à ce que deormais les François eussent à leur tour ceste dignité comme auoient les Italiens & Espagnols. Sa Sainteté trouua la chose plus raisonnable qu'aïsee à executer: me dit neantmoins qu'elle y penseroit, & feroit tout ce qu'elle pourroit pour satisfaire au denoir de la iustice, & pour complaire à vostre Maiesté, & à toute la nation, & pour la reformation de cét ordre en France.

Entroisiesme lieu, ie luy ramentus de la part de la Royne d'ouïairiere certaines choses qui appartenoint à l'erection des trois conuents de Religieuses Capucines qu'elle desire d'estre erigez: & dont il a pleu à vostre Ma-



iesté en escrit trois lettres à sa Sainteté que ie luy presentay le vingti-huictiesme d'Auril, comme i'en ay par ma derniere rendu compte à vostre Majesté.

Et apres cela ie luy dis en quatriesme lieu, que pour luy acheuer d'exposer ce que ladite Dame Roïne m'auoit recommandé, ie priois sa Sainteté de vouloir mes-huy consoler ceste sainte Princeſſe des obſeques du feu Roy son Seigneur & mary, dont non ſeulement elle, mais auſſi voſtre M. luy eſcriuoit. Et apres luy auoir baillé lettres de vos Maieſtez ie luy dis les cauſes qui deuoient mouuoir ſa Sainteté à vous complaire; comme le reſpect de voſdites, Maieſtez, & de la Couronne meſme, qui pour auoir particulièrement reueré, aidé, & ſeruy le S. Siege, en a rapporté le tiltre de Tres-Chreſtien; la perſonne du Roy deſſunct, qui fut des plus zelez à la Religion Catholique qui ayent iamais eſté, & vescu vne vie autant ou plus religieuſe que Royale, & ſit vne ſintres-Chreſtienne, mourant repentant, contrit, confeſſé, & abſous en l'article de la mort, apres auoir proteſté de vouloir contenter le Pape qui eſtoit lors, de tout ce que ſa Sainteté deſireroit de luy, & encores apres auoir pardonné à tous ſes ennemis, & meſmes à ceux qui luy auoient procuré la bleſſure dont il mouroit; la qualité de la demande qu'on luy faiſoit, qui n'eſtoit que de prier Dieu pour vn trespaſſé & pour l'ame d'un Roy Tres-Chreſtien, premier ſils de l'Egliſe & du S. Siege, & en cela garder la ſainte & pie couſtume que les Papes ont de tout temps immemorial, de prier & tenir vne Chappelle pour les Roys Tres-Chreſtiens decedez, & les Roys auſſi de faire obſeques aux Papes quand Dieu les appelle de ce monde; le long-temps d'onze ans qui ſont paſſez depuis la mort du feu Roy, & le changement depuis aduenu és choſes & és perſonnes: de ſorte que ſa Sainteté n'auoit plus occaſion de craindre ou ſouſpçonner qu'en accordant ce pie & dernier office à l'ame du deſſunct, & à la conſolatiō des viuans, il fuſt pour offencer ou meſcontenter perſonne, comme ie ſçauois qu'autrefois on l'auoit ſouſpçonné & craint; l'annee du Iubilé où nous ſommes, abondante en grâces, indulgences, pardons, & en toutes ſortes d'œures pies & charitables.

Apres que ie luy eus remonſtré ce que deſſus par forme de priere & de ſupplication de la part de vos Maieſtez, ie le ſuppliy de me permettre de luy parler vn peu en Cardinal & creature, & en tres-humble, tres-obligé, & tres-fidelle ſeruiteur que ie luy eſtois & voulois eſtre toute ma vie. Que ie me reſſentois doncques tenu & obligé à luy dire, qu'il me ſembloit que ſa Sainteté, & tout le College des Cardinaux, & toute ceste Cour deuions eſtre bien aiſes que la Roïne douairiere, & meſmement voſtre Maieſté, luy fiſſent inſtance pour les funerailles du feu Roy, & deuions ſouhaitter & prier Dieu qu'il maintint ceste deuotion à vos Maieſtez & à tous les François, de demander & procurer tels offices Catholiques & ſaincts. Que ſa Sainteté, & tous ceux qui auoient quelque part au gouuernement & adminiſtration de l'Egliſe de Dieu, deuoient apporter toute bonne inclination à accorder telles pies requestes, & par ce moyen conſeruer & accroître aux Princes & peuples ceste pieté & deuotion, & le reſpect qu'ils portoient au ſaint Siege, & l'eſtime qu'ils faiſoient des ſuffrages & prières.

Qu'outre ceste consideration generale , il y en auoit encores vne en ce fait particulier , qui pour vn autre respect me sembloit importer grandement à l'autorité & reputation du saint Siege. C'est que i'auois autrefois à mon grand regret veu faire icy difficulté de croire à vne attestatoire qui fust faite de la mort du feu Roy , & signee par des Princes , Ducs , Mareschaux de France, Gouverneurs de Prouinces, grand Escuyer de France, Capitaine des gardes, Secrétaire d'Estat, Ausmoniers & Confesseurs , par laquelle il estoit tesmoigné comme le feu Roy , sur ce qu'on luy dist qu'il y auoit vn monitoire du Pape contre luy auroit fait ladite protestation de vouloir contenter le Pape d'alors de tout ce qu'il desiroit de luy , & autres choses touchees cy dessus : & qu'il m'auoit tousiours semblé , que outre l'iniure qu'on faisoit à tant de gens de bien & de si grande qualité de les mescroire , qu'on faisoit encore tort au saint Siege de le priver d'un si notable exemple de la reuerence & obeysance qu'un Roy de France luy auoit portee à sa fin ; Que l'autorité & reputation du saint Siege en seroit tousiours plus grande , quand on l'iroit à l'aduenir qu'un Roy de France , en ce passage auquel on fait & dit toutes choses à bon escient , tout aussi tost qu'il ouyt parler d'un monitoire du Pape , auroit vſé d'une telle submission ; & déclaré de luy vouloir satisfaire & obeyr , comme au contraire seroit vn grand scandale , qui ne pourroit tourner qu'au desauantage du saint Siege , quand on croiroit qu'un Roy de France tres-Chrestien , tres-Catholique apres auoir fait mourir vn Cardinal ne se seroit soucié d'un monitoire du Pape en sorte du monde , combien qu'au reste il eust fait la plus Chrestienne & Catholique mort qu'autre Prince fist iamais ; Que pour ceste consideration donc , quand il n'y eust eu autre chose , il m'auoit tousiours semblé , & sembloit encore auioird'huy plus que iamais , que non seulement il ne falloit déroger foy à ladite attestation , mais quand il y eust quelque doute , qu'il luy falloit ayder & fauoriser pour le bien qui en reuenoit au S. Siege , & pour l'edification de toute la Chrestienté.

Nostre saint Pere monstra se mouuoir beaucoup par tout le susdit propos ; & mesmement par ces dernieres considerations qu'il confesse estre vrayes & bonnes , & me dir qu'il y penseroit , & feroit tout ce qui seroit possible pour la consolation de la Royne douairiere , & pour le contentement de vostre Maiesté. Je luy en feray souuenir de temps en temps , & tiés pour certain , qu'il desire le faire , mais qu'il voudroit qu'il luy fut conseillé par les Cardinaux des plus anciens , & qui ont le plus d'autorité. Le reste de l'audience fut employé pour des faits particuliers , dont i'en mettray icy deux seulement. L'un est , qu'estant vacqué en Cour de Rome l'Abbaye de Beuillans par le decez d'un bon Abbé Feuillant : ie suppliai sa Sainteté si elle ne vouloit attendre la nomination de vostre Maiesté , la conseruer neantmoins en la congregation desdits Feuillans , & la mettre en teste de quelqu'un des meilleurs qui deust estre agreable à vostre Maiesté : ce que sa Sainteté dit vouloir faire. L'autre fait fut , qu'estant allé en procession aux quatre Eglises destinees pour gaigner le Iubilé ceux de l'Eglise sainte Louys avec quasi tous les François qui estoient à Rome le iour de sainte Croix troisiésme de ce mois , il aduint qu'une autre compagnie venant aussi en procession apres eux , conduite par quelques-uns de la Confrairie du :

Confalon, les atteignit entre saint Jean de Latran & sainte Marie Maior, & les voulant faire marcher plus viste, frappa sur quelques-vne des derniers, qui estoient aussi des moins apparens, dont il aduient qu'une petite partie des François, qui n'ont pas accoustumé de se laisser battre, tournans le visage de ces insolens, les gouvernerent tres-bien, & les firent tourner en derriere plus vist qu'ils n'estoient venus, & se contentans les François d'auoir fait leur deuoir sur le champ, ne penserent qu'à paracheuer leur procession, & puis se retirer en leur logis. Mais ceux qui auoient fait l'insolence s'entendans plus à chicaner qu'à combattre, s'allèrent plaindre au Gouverneur de Rome, & à d'autres Magistrats qui firent mettre en prison sept ou huist des François, dequoy ie me plaignis au Pape, de sorte que les François furent incontinent mis hors de prison, & quelques-vns des autres y furent mis en leur place, lesquels ont eu depuis l'estrapade tres bien, & est on apres à en trouuer deux ou trois de plus mutis, qui sont chargez d'auoir crié **FRANCESE LUTHERANI**, qui seront pendus, ou pour le moins enuoyez en galere s'ils sont trouuez, & ainsi me le dit le Pape luy-mesmes. Au demeurant le Pape me dit qu'on luy auoit escrit de la Cour de l'Empereur, que les députez du Marquis de Brandebourg & du Comte Palatin y estoient arriuez avec lettres de recommandation de vostre Maiesté, pour auoir de l'Empereur les dépeschés de l'Euesché de Strasbourg, qu'il a accoustumé de faire deliurer aux Euesques pour iouyr de leurs Eueschez, & par ces lettres vostre Maiesté ne se contentoit pas de recommander le fait simplement, mais monstroit se vouloir ressentir du refus qu'il seroit fait à ses amis. Suyquoy la Saincteté adiousta qu'il ne croyit cela, tant pour ce que celuy qui en auoit escrit ne disoit pas auoir veu les lettres, que pour ce qu'il ne voyoit point que vostre Maiesté peust retirer aucune utilité à faire tomber cet Euesché és mains d'un heretique fils dudit Marquis, & mesme contre la prouision que la Saincteté auoit faite au Cardinal de Lorraine. Que si vostre Maiesté pensoit entretenir ces gens pour ce qui pourroit aduenir vn iour de l'Empire, elle deuoit considerer qu'elle perdoit beaucoup plus du costé des Electeurs Catholiques qui auoient l'exclusion en main: mais le principal estoit que ce ne seroit le fait d'un bon Catholique, de tenir la main qu'un heretique eust l'Euesché. Je luy respôdis qu'outre qu'il pouuoit estre que vostre Maiesté n'eust point écrit du tout, il pouuoit encore estre que la lettre, si aucune y en auoit, auroit esté conceüe en termes généraux pour quelque affaire que lesdits deputez auoient à traiter avec l'Empereur, sans qu'il ny fut parlé de l'Euesché: Quoy qu'il y eut, la Saincteté faisoit tres-sagement de ne croire point que le contenu en fut tel comme on luy auoit écrit, pour les considerations alleguees, & pour l'alliance eucore que vostre Maiesté auoit avec Monsieur le Cardinal de Lorraine, auquel vous ne voudriez oster ce qui luy auoit esté donné par la Saincteté pour le faire tomber és mains d'un autre, & mesme d'un incapable; Que celuy qui auoit écrit que vostre Maiesté necessitoit l'Empereur par cette lettre, n'entendoit gueres bien le stile, ny le respect que les grands Princes gardent entr'eux, ny la particuliere modestie & discernion de vostre Maiesté; Qu'au reste vn grand Roy tel que vous, ne pouuant, & bien souuent ne deuant refuser ceux qui le supplient, a accoustumé

de les gratifier de lettres de recommandation, sans au reste se peiner beaucoup si elles auront effet ou non : comme aussi les Princes à qui telles recommandations sont faites, n'ont obligation non plus d'y deferer, sinon autant que l'honnesteté & la nécessité le requierent. En somme, au pis aller ceste lettre ne pouoit estre si grande chose qu'on luy auoit faite. Ce qu'elle monstra trouuer bon.

C'est tout ce qui se passa de plus notable en l'audience dudit neuuesme de ce mois. Au demeurant, le lendemain arriua en ceste ville tournant de Florence Monsieur de Sillery, auquel ie mis en main le susdit escrit qui m'auoit esté porté de la part du Pape touchant ladite ligue contre le Turc ; & ie receus par luy les lettres qu'il pleust à vostre Maiesté m'escire les dix-sept, dix-huit, & dix-neufiesme d'Auril. Par le premier dudit iour dix-septiesme d'Auril, il plaist à vostre Maiesté m'escire qu'elle m'a donné l'Euesché de Bayeux, dont ie luy baise tres-humblement les mains, recognoissant ce bien fait comme tous les autres de vostre liberalité & bonté, sans autre mien merite que de la fidelité & zele que tous vos suiets doiuent auoir à vostre seruice, auquel comme vostre Maiesté m'oblige tous les iours de plus en plus, aussi m'y sens-ie eschauffer dauantage de iour en iour avec toute la gratitude dont mon ame est capable. Tout aussi tost que les lettres de nomination en seront portees par deçà, ie resigneray l'Euesché de Rennes à Monsieur Serafin, du bien duquel ie ne suis moins aisé que du mien propre.

La seconde lettre du dix-huitiesme d'Auril en forme de dépesche ordinaire, estoit accompagnée d'une autre que vostre Maiesté escriuoit de sa main au Pape, en response de la dernière que sa Sainteté vous auoit escrite, & fait rendre par le Patriarche de Constantinople, sur l'accord interuenu entre vostre Maiesté & Monsieur de Sauoye, lesquelles deux lettres, tant celle qui s'adressoit au Pape, que celle qui s'adressoit à moy, ie mis es mains de Monsieur de Sillery, qui fut hier au matin à l'audience, & bailla au Pape la sienne, & luy exposa le contenu de la mienne, comme il en rendra comte à V. Maiesté. Par la troisieme qui est du dix-neufiesme, vostre Maiesté me commande d'empescher l'expedition de l'Abbaye de Calophe, ce que ie feray : & croy que i'y feray à temps, n'estant encore comparuës par deçà vos lettres de nomination à l'Abbaye que ie sçache.

Quand aux occurrences de deçà, ceux qui mieux cognoissent le naturel de Monsieur de Sauoye, tiennent qu'il n'accomplira point dans le temps prefix l'un ny l'autre des deux partis par luy promis, & qu'il fera tout ce qu'il pourra pour obtenir de vostre Maiesté sous diuers pretextes prolongement du terme. Mais ceux-cy mesmes sont d'aduis, que si vostre Maiesté se relasche tant soit peu cet homme ira tous les iours multipliant ses artifices pour tirer la chose de plus en plus loing & cependant machiner quelque grand meschef : adionstans de plus que tout considéré, & ceste restitution est de telle nature, que si elle ne se fait tost, elle ne se fera iamais sans guerre, & qu'il sera plus aisé à vostre Maiesté de l'auoir tost que tard.

L'Abbé de saint Martin continuë en sa modestie, à laquelle il fut besoin que j'aidasse du commencement, tant plus que comme j'ay sceu depuis, il mena aies la femme prétendue demoniaque le mesme Prestre François

exorciseur qui l'exorcisoit à Paris, lequel Prestre se messe encore d'exorciser d'autres. Mais de s'opposer formellement à telles choses qui ont apparence de piété, ce seroit occasion de faire sçauoir la chose à infinies personnes qui n'en sçauent rien, & de faire mal penser & mal parler de nous mesmes: & ie me conforme d'autant plus à conuiuer en cela, qu'il m'a esté rapporté que ce n'est rien qu'un pur badinage, qui fait rire iusques aux plus simples & aux plus credules. L'Archeuesché de Dublin en Irlande fust expédié en Consistoire le 5. de ce mois en la personne d'un Cordelier Espagnol, nonobstant l'opposition des Irlandois d'icy. Dequoy les Espagnols ne sçauoient tirer tant de profit, comme ils ont montré d'ambition, & acquis d'enuie & de haine. Les espousailles du Duc de Parme & de la niece du Pape se firent Dimanche au matin 7. au Palais en la chapelle de Sixte, non seulement en la presence du Pape, mais aussi par le ministère de sa Saincteté officiante, & la nuit ensuiuant le mariage fut consommé. A tant, &c. Sire, &c. De Rome ce 9. May. 1600.

## A MONSIEUR DE VILLEROY.

### CCXVI.

**M**ONSIEUR, I'ay receu à mesme temps, à sçauoir le 7. de ce mois, quatre de vos lettres. La premiere du 9. d'Auril venuë par la voye de Bruxelles, touchant l'Euesché de Bayeux: La 2. du 18. d'Auril, en response de celle que ie vous ay escrete le 18. Mars. La 3. dudit iour 18. d'Auril, touchant le desir du sieur du Plessis Mornay à Monsieur l'Euesque d'Euëux, & la response dudit sieur Euesque. La 4. est un posterit du mesme iour 18. d'Auril, sur l'aduiz que vous veniez de recevoir que M. l'Euesque de Bayeux n'estoit encore decedé. Ie prie Dieu qu'il luy donne autant de vie & de santé que i'en desire pour moy-mesme. Cependant ie vous remercie de toute mon affection de ce bien & honneur qu'il a pleu au Roy me faire, ne doutant point que ie ne l'aye receu par le mesme moyen que i'ay eu tous les autres. Aussi vous remercay-ie bien humblement du soin qu'il vous a pleu prendre avec Monsieur le President Ruellé, d'enuoyer son frere sur les lieux avec lettres d'oëconomat pour la conseruation des biens & reuenus dudit Euesché, & de ce qu'il vous a pleu demander au Roy pour moy le droit de Regale, pour pouuoir conferer les prebendes de l'Eglise de Bayeux qui vacqueront auant que i'aye mes bulles & prouisions: qui est vous porter enuers moy, non seulement comme bon seigneur & bienfaicteur, mais comme pere, & s'il y auoit quelque autre nom qui nous peust représenter vne charité & sollicitude plus grande. Aussi vous priay-ie de croire que ie vous tiens & recognois pour tel, & en un mot pour tout.

Si la volonté de Dieu sera que la chose sorte à effect, ie ne faudray tout aussi-tost que i'auray receu les despêches de la Cour de resigner à Monsieur

Berastin (auquel l'enuoyay incontinent ses lettres avec ledit postcrit) l'Euefché de Rennes, & de me pouruoir de celuy de Bayeux, & enuoyeray vn Vicariat à Monsieur le President Ruellé, avec charge expresse de pouruoir de la première prébende vacante l'Aumosnier de feu Monsieur de Villeroy vostre pere. Vous suppliant de tout mon cœur, que si vous auez quelques autres que vous desiriez gratifier, qu'il vous plaise ordonner audit sieur President tout ce qui sera de vostre intention, & il aura commission de moy de vous obeyr au moindre signe que vous luy ferez, comme seigneur & maistre que vous estes & serez tousiours de tout ce que i'auray, & de moy-mesme, qui tiendray tousiours à grande faueur & honneur que vous en disposiez comme de chose plus que vostre. Mais à mesure que ie lis vos lettres, i'y trouue nouuelle matiere de vous remercier, comme ie fais tres-humblement, de l'assignation qu'il vous a pleu retirer de la pension qu'il a pleu au Roy par vostre moyen m'ordonner. C'est tousiours m'accroistre les premières obligations, & me donner tant plus de matiere de gratitude & recognoissance.

Ce que i'escriuis au Roy de Monsieur de Sauoye, & de l'office fait enuers le Pape touchant le General des Cordeliers, & d'autre chose, seruira de repliche à vostre deuxiesme lettre: apres neantmoins que ie vous auray remercié, comme ie fais bien humblement, de la sauue-garde qu'il vous a pleu faire expedier pour Monsieur Perin Soufdataire de nostre S. Pere.

Quant à la troisieme lettre concernant le susdit défi & response, ie vous en ay escrit cy deuant mon aduis qui est semblable au vostre: & le Pape quand ie luy en parlay n'y fist pas les scrupules que Monsieur le Nonce y auoit faits; & Monsieur le Cardinal Antoniano, à qui le Pape bailla l'exéplaire imprimé que i'en auois laissé à sa saincteté me loua grandement vn de ces iours la response de Monsieur d'Eureux. De Rome ce neuuiesme May, mil six cens.

## A MONSIEVR DE VILLEROY.

CCXVII.

**M**ONSIEVR, C'est beaucoup de ne penser point meriter gré ny grace quand l'on fait du bien & honneur à quelqu'autre; mais d'en tirer encore occasion & matiere de remercier celuy qu'on oblige, c'est vne surabondance d'honnesteté & de ciuilité incomparable. Ceux neantmoins qui se cherchent en eux-mesmes, & non au beau dire d'autrui, ne laissent de prendre tels excez de courtoisie pour redoublement d'obligation, comme ie me sens doublement obligé à vous, Monsieur, & pour la depesche & bon office fait auprès du Roy, & pour ce surcroist le plus gentil & exquis que i'aye receu de ma souuerance. Je vous remercie donc doublement, & vous prie de croire que ce bien, & tout autre que i'auray jamais, sera tousiours à

vostre commandement, & que vous me trouuez tousiours prest à vous faire humble seruice en tout ce qu'il vous plaira me commander. Cependant ie me recommande bien humblement à vostre bonne grace, Monsieur, &c. De Rome ce 12. May 1600.

## A V R O Y.

## CCXVIII.

SIRE,

Ie receus le 22. de ce mois par le courier ordinaire la lettre qu'il pleut à vostre Maiesté m'escire le 2. & le lendemain 23. ie receus par Valerio celle du 11. & tiens à grande faueur & honneur qu'il ait pleu à vostre Maiesté prendre en gré ce peu de seruice que ie vous ay rendu en ce qui s'est presenté par deçà ces iours passez, & ne faudray de continuer à toutes les occasions qui s'en presenteront, & de toutes les forces de mon ame. L'Abbé de S. Martin se trouue bien empesché, s'apperceuant bien que quelque volonté qu'il ait eüe, Il n'aura en fin pu faire mal qu'à soy mesme. Il a vëu plusieurs fois Monsieur de Sillery depuis son retour de Florence, lequel aussi veille sur luy, & rendra compte à vostre Maiesté des propos qu'ils ont tenus ensemble, & s'il y a quelque autre chose qui concerne ledit Abbé.

Quant aux Cheualiers de Malte François, apres qu'en l'absence de Monsieur de Sillery i'en eus parlé pour la seconde fois au Pape, & à Monsieur le Cardinal S. Seuerin, qui est le plus ancien de la congregation de l'Inquisition, sa Saincteté se contenta d'une satisfaction par escrit, que lesdits Cheualiers auoient offerre d'eux-mesmes à l'Inquisiteur de Malte en sa maison: mais sa Saincteté & les Cardinaux de l'Inquisition auoient arresté que ladite satisfaction se feroit en l'Eglise; dequoy Monsieur de Sillery s'estant plaint à sa Saincteté, il fut pris expedier qu'elle se feroit en la maison du Grand Maître, ayant sa Saincteté déclaré expressement, qu'elle faisoit ceste moderatio pour le respect de vostre Maiesté sur la requeste de vostre Ambassadeur. Et à la verité ce ne fut pas peu de reformer vn Arrest de sa Saincteté faite la congregation du saint Office; aussi fit Monsieur de Sillery tel deuoir, que le Pape mesme me dit à moy, qu'il ne l'auoit iamais ouy parler avec tant d'affection & de vehemence. Qui est tout ce que i'ay estimé deuoir respondre aux susdites lettres de vostre Maiesté; me remettant de toutes autres choses à ce que vous en escriira Monsieur de Sillery; lequel m'ayant entre autres choses communiqué la minute de l'Edit touchant la publication à faire du Concile de Trente, que vostre Maiesté luy a enuoyee pour scauoir son aduis & le mien, comme seront trouuees par deçà les modifications & restrictions qui sont à la fin, il est besoin que i'allonge encore la presente de cet article. Mon aduis est donc, qu'encore qu'une publicatio pure & simple plairait icy plus qu'une modifiée, si est-ce que lesdites trois modifications n'offenseroient point le Pape, & mesmement avec la bonne & equitable interpretation que Mo-

fleur de Sillery & moy y apporterons. Car quant à la dernière qui concerne les Edits de pacification, elle nous fut accordée par le Pape lors de vostre reconciliation, & sa Sainteté en demeura d'accord avec moy dernièrement, à sçauoir le Vendredy vingt-vniesme iour d'Auril, ainsi que i'escrisuis à vostre Maiesté par la lettre du 23. dudit mois. Quant à la première & seconde modification, outre qu'elles sont equitables, & seruiron à fermer la bouche à ceux qui s'opposent à ceste publication, & à la faire passer plus facilement par delà, elles ne restraignent quasi en rien ledit Concile : par ce que quoy que quelques-vns soient mal-affectiionnez à la publication pretendue, il ne se trouuera en effect que l'intention dudit Concile ait esté de toucher aux droicts, priuileges, & prerogatiues de vostre Couronne, ny d'autres, ny moins aux libertez, franchises, & immunitéz des Eglises, pour lesquelles y a plusieurs decretz audit Concile, & nul au contraire; si on ne vouloit dire que les concubinages, les simonies, & autres tels abus fussent libertez, franchises, & immunitéz de l'Eglise Gallicane, de laquelle les vrayes libertez sont au droit Canon, authorisées & maintenues principalement par les Papes & le saint Siege, de sorte que sa Sainteté ne s'en voudroit ny pourroit honnestement plaindre. Je conclus donc, qu'il me semble que vostre Maiesté se peut assurer que la publication du Concile plaira infiniment par deçà notwithstanding lesdites modifications, & que vostre Maiesté ne pourroit faire pour le iourd'huy chose qui soit pour apporter plus de contentement au Pape & à toute ceste Cour, ny plus de confusion à vos haineux, détracteurs, emulateurs, & enuieux, ny plus d'edification à l'Eglise & à toutes les parties de vostre Royaume, ny à vostre Maiesté plus de merite enuers Dieu, ny plus de reputation & de gloire enuers les gens de bien. Le Pape pour conseruer le droit de la reseruacion qu'il a des benefices vacquants en Cour de Rome, au gré toutesfoi de vostre Maiesté, a donné en titre l'Abbaye de Fueillans à vn Religieux François appellé Frere Iean de S. Maur de Tholose, le plus qualifié Religieux de ladite Abbaye qui fut à Rome ou ailleurs : car outre qu'il est Prieur de S. Bernard de Termini & Vicaire du Pere general en toute l'Italie, il est celuy qui avec vn autre decedé vint planter leur ordre en Italie, & apres Dieu a donné commencement & progres à tous les monasteres que ils ont en Italie. Et comme il est profez de l'Abbaye de Fueillans, & receut l'habit par les mains du feu Abbé, aussi luy a-t'il tousiours rendu l'affection, reuerence, consolation, & seruice qu'il luy deuoit, sans auoir iamais eu de part aux persecutions qui ont esté faites audit feu Abbé. Aussi l'ay-ie tousiours recogneu au reste fort moderé, & desirant à vostre Maiesté tout bien & prosperité, lesquelles qualitez furent cause que le Pape m'ayant demandé en qui ie pensois que ladite Abbaye fust mieux colloquée, ie luy dis en Dieu & en conscience, que i'estimois que ce seroit à cestuy-cy, pour ces causes, & autres que ie luy exposay. A tant ie prie Dieu, &c. Sire, &c. De Rome, ce 16. May 1600.



A V R O Y.

CCXIX.

S I R E.

La lettre qu'il plut à vostre Maiesté m'escrire le neufiesme d'Auril sur le voyage de Monsieur le Duc de Bar par deçà, me fut renduë le iour de l'Ascension au matin vnziésme iour de cemois, par vn sien gentil-homme appellé le sieur Beauueau, qui me dit que mondit sieur le Duc arriüeroit en ceste ville à deux ou trois iours de là. Je fus marry de ce voyage si soudainement entrepris, scachant dés long temps la difficulté qu'il y a en son affaire, & craignant grandement qu'il n'en rapportast point le contentement qu'il s'en estoit promis, & ne le celây point audit gentil-homme; adioustant neantmoins à la fin que nous y ferions tout ce qui nous seroit possible, comme nous sommes bien deliberez de faire Monsieur de Sillery & moy. Ce iour-là mesme mondit sieur de Sillery & moy fusmes ensemble, & deliberaşmes longuement sur ce fait, & arrestaşmes la façon comme il en deuoit parler au Pape. Le lendemain Vendredy iour de son audience ordinaire ielluy laissay ladite lettre que vostre Maiesté m'en auoit escrite dudict iour neufiesme d'Auril. Le Lundy quinziesme de ce mois fut consistoire, qui fut cause que ie n'entray en discours, mais luy demanday seulement congé d'aller voir mondit sieur le Duc de Bar quand il seroit arriüé, ce qu'il me permit, & me dit de luy mesme que ce Prince venoit pour auoir la dispense qu'on auoit autresfois demandee: mais tant que Madame demeureroit en ses opinions, il ne la donneroit iamais, & se feroit plustost mettre en quatre quartiers, pour les raisons qu'il auoit cy-deuant alleguees, & pour n'auoir exemple en l'Eglise qu'une telle dispense ait iamais esté concedee. Le luy dis que sa Saincteté admettroit ce Prince à ses pieds, & l'orroit suuant sa benignité accoustumee, & puis trouueroit quelque bõ expedient en cét affaire: à quoy sa Saincteté ne repliqua rien. Il auoit ia lors vn commencement de goutte à la main, laquelle s'accreuist depuis, de sorte qu'il n'a point encore donné audience, & tout ce qu'il a pû faire, ç'a esté de se faire porter hier iour de la Pentecoste au lieu où il a accoustumé de donner la benediction, laquelle il donna à infinité de peuple, c'est pourquoy il n'a encore admis à ses pieds Monsieur le Duc de Bar qui arriua en ceste ville comme incogneu ledit iour de Lundy au soir quinziesme de ce mois, & alla loger au Couuent de la Trinité du Mont, où Monsieur de Sillery & moy l'allõs voir fort souuent, & luy procurerons audience, & expedition la plus prompte, & la plus fauorable que faire se pourra.

Cét affaire, Sire, est tres-difficile, & ie ne scay que vous en promettre. Les difficultez sont en la parenté, & en la diuersité de religion des deux cõioints, lesquelles s'augmentent reciproquement l'une l'autre. La seule diuersité de religion, quand les deux parties sont baptisees & Chrestiennes, ne rend

rend point de soy le mariage nul, i'açoit que personne Catholique qui espouse vne non Catholique peche griefuement, estans tels mariages prohibez, pour le danger qu'il y a que la non Catholique seduise, & peruertisse la Catholique, comme il aduint mesme à ce grand & sage Roy Salomon, & que les enfans aussi ne soient si bié instruits en la vraye religion, & encore pour les discordes, haines, & troubles que la diuersité de la religion à la longue apporte entre les deux conioints. La parenté seule rendroit bien ce mariage nul, mais la dispense nous seroit incontinent accordée, si elle n'estoit empêchée par la diuersité de religiō, sur laquelle le Pape fonde son refus, nous ayant dit sa Sainteté dès Ferrare à Monsieur de Luxembourg & à moy, lors que nous demandions ladite dispense, qu'il ne la deuoit ny pouuoit accorder, pource que l'une des parties non seulement ne la demandoit pas, mais ne le recognoist point pour pasteur de l'Eglise Catholique & Apostolique, ny pour auoir puissance de dispenser, comme aussi ne croit-elle point que le mariage soit vn Sacrement, ny qu'il soit illicite de contracter mariage mesme entre cousins germains. Ces raisons du Pape durent encore, puis que Madame ne se recognoist point : ausquelles on a adiousté cecy depuis, qu'on a passé outre nonobstant ledit refus de la dispense demandée, & nonobstant les inhibition expresse que sa Sainteté en fist par ses briefts, & par ceux qui les rendirent.

Or les choses estans en ces termes, & Monsieur le Duc de Bar s'estant embarqué en ce voyage, sans auoir fait sonder le fonds, ny vsé d'aucun preparatif, encore le pourrions nous seruir à obtenir l'absolution, s'il n'y auoit que la consideration du passé : mais la consideration de l'aduenir, est ce qui nous tient en grande perplexité, car d'obtenir dispense pour la validation du mariage, sa Sainteté dit ne la deuoir ny pouuoir donner pour les causes susdites, moins peut il permettre aux parties qui sont parentes en degré, prohibé de demeurer & cohabiter ensemble sans dispense, comme ils ont fait iusques icy, car ce seroit leur permettre de pecher, ce qui est par dessus la puissance du Pape, aussi bien que contre sa volonté. Il y a encore plus, c'est que par les maximes de la Theologie, & des cas de conscience qui se practiquent en l'Eglise, on ne donne point absolution pour le passé, si celui qui la demande n'a ferme propos, & ne promet de s'amender, & de desister du peché pour l'aduenir. De sorte que Monsieur le Duc de Bar sera venu à Rome pour s'enretourner non seulement sans dispense, mais aussi sans absolution du passé, & sans auoir gagné Iubilé, ou bien pour promettre de r'enuoyer vne sœur du Roy de France qu'il a prise pour sa femme; sçachant bien de quelle religion elle estoit, & encore la r'euoyer après l'auoir tenuë dix-huit mois, & cependant estre possible entré en défiance de n'en pouuoir auoir enfans : auquel propos ie ne dois celer à vostre Maiesté, que moy ayant dit audit sieur de Beauueau quelque chose de ce que dessus, pour luy faire cognoistre la nécessité où mondit sieur le Duc de Bar se mettoit, il me dit bien expressément, que ledit seigneur Duc quitteroit Madame sa femme si le Pape le luy commandoit. Monsieur de Sillery escrira à vostre Maiesté ce qu'il en aura entendu d'ailleurs.

Voilà, Sire, la condition & estat de cét affaire, que ie vous ay voulu représenter fidèlement, tant pour informer vostre Maiesté au vray, qu'aussi afin

que si les choses succedēt comme vostre Maieſté desire, on ne l'impute puis apres au peu de deuoir que vos seruiteursy ayēt fait, ny aussi à aucune mauuaise disposition du Pape, ainsà la nature de la chose, à la precipitation de ce voyage, & au zèle que le Pape a à l'edification del'Eglise, & à sa reputation. Madame seule a en elle le remede de tous ces maux, & peut deliurer de perplexité soy-mesme, & Monsieur son mary, & vostre Maieſté, & tous vos seruiteurs, & toute la maison de Lorraine, & le Pape mesme. Et à la verité si ie l'osois dire, il me sembleroit qu'il seroit aussi raisonnable que Madame en son fait propre & pour elle mesme; s'accommodast à l'aduis de tant de gens de bien, qui desirent son salut & repos, comme qu'ils s'accomodent à son opinion. Que si elle craint de blesser sa cōscience en faisant le bien qu'o luy desire, elle doit pēser aussi que le Pape, & tant d'autres, ont peur de blesser la leur en faisant ce qu'elle veut. Au demeurant le Pape est disposé à l'inviter à luy escrire, & à luy enuoyer qui on voudra, & à faire toute autre chose qui puisse faciliter sa conuersion.

Pour tout ce que dessus n'est pas à dire que ie n'aye arresté beaucoup de raisons & de moyens, pour tascher d'induire le Pape à nous accorder mesme la dispense; mais comme i'estime que ces raisons luy donneront à pēser, aussi neveux ie pas me promettre d'en venir à bour. Tant y a qu'elles sont prestes à estre employees, comme aussi apres qu'elles l'auront esté, ie les escri-ray à vostre Maieſté, à laquelle ie prie Dieu qu'il donne, Sire, &c. De Rome, ce 22. May 1600.

## A MONSIEVR DE VILLEROY.

CCXX.

**M**ONSIEVR, Avec les lettres du Roy des deuxiesme & onzieme de ce mois i'ay receu les vostres de mesme date, & ay esté tres-ayse d'entendre que Monsieur d'Alincourt fut arriué en bonne santé & avec vne nouvelle si agreable au Roy, & si vtile comme i'espere à la France. Je ne respondray rien aux remerciemens qu'il vous plaist me faire, de ce que i'ay fait vne petite partie de mon deuoir enuers luy, mais ie ne laisse de recognoistre que quoy que ie sceusse & peusse faire, ie ne sçaurois iamais atteindre à la moindre partie des obligations que ie vous ay. Il me semble que c'est tres-bien fait de différer la celebration des nopces du Roy iusques à vn réps plus commode, tant pour la santé, qui a esté la premiere consideration, que pour la commodité & reputation. La resolution de Monsieur d'Eureux m'a toujours pleu auant l'euenement, comme vous aurez veu par mes lettres precedentes, mais à present que i'en ay sceu le succez, ie n'e puis assez remercier & louer Dieu, & en attends vn grand fruit pour la religion Catholique, & pour le seruice du Roy, qui en est desia tres-haut loüé en toute ceste Cour. Je feray sçauoir à Monsieur le Cardinal Bandini la bonne response qu'il

vous a pleu me faire touchant l'Abbaye de Casenoue au Marquisat de Salusses. Quant à celle de Monsieur Perrin Soufdataire de nostre saint Pere, ie vous remercie bien-humblemēt de ce qu'il vous a pleu y faire, & vous prie de vous souuenir qu'en son fait il s'agist plus de l'autorité & droit de sa Sainteté, que de l'interest dudit sieur Perrin. Il nous faut obtenir vn Indult pour le pays Messin, ce qui se pourra faire sur l'occasion de la publicatiō du Concile, ou sur quelque autre telle: mais auant qu'auoir ledit Indult, nous ferions mal fondez, & ferions tort & desplaisir à sa Sainteté. Bien est vray que comme i'ayescrit autresfois, le Pape doit bailler tels benefices de la protection du Roy, & mesmes ceux qui sont és villes closes, à personnes qui soient confidentes à sa Maiesté, laquelle autrement leur pourroit refuser la possession, & principalement estant ce pays de frontiere.

L'affaire de Monsieur le Duc de Bar est mauuais, & s'y descouure tous les iours quelque chose qui nous desplaisit, mais quoy que l'on face on ne trompera point M. de Sillery ny moy. Le voyage de Monsieur le Grand pour le regard de Rome n'est nullement necessaire, nō pas mesme pour le remerciement dont est parlé és lettres du Roy à Monsieur de Sillery: car cet office a esté fait par mondit sieur de Sillery de si bonne façon, qu'il ne seroit possible de le surpasser, à grande peine de l'esgaler. Bien est vray qu'un seigneur si qualifié venant si près de Rome en ceste année sainte sans y venir gagner le Iubilé, pourroit donner à penser à plusieurs, & à dire à ceux qui ne nous veulent point de bien, que les François n'ont point toute la deuotion qu'il faudroit, excepté si son voyage de Florence, se rencontroit en Iuillet ou en Aoust, auquel cas il seroit excusé de tous de n'y venir point, pour le grand danger où il se mettroit en y venant: & vne lettre qu'il escriroit de Florence à Monsieur de Sillery, & qu'on feroit courir, par laquelle il luy declareroit la volonté qu'il auoit de venir gagner le Iubilé, & le regret qu'il a d'en auoir esté destourné par les medecins & autres, repareroit à tout, & tiendrois lieu de voyage de Florence à Rome. Que si hors de Iuillet & d'Aoust mōdit sieur le Grand venoit à Rome pour le susdit respect du Iubilé, il ne pourroit faire de moins que baiser les pieds au Pape, & mesme de la part du Roy, & par mesme moyen de ramenteuoir à sa Sainteté la gratitude que sa Maiesté luy rend de tant de graces receuës de sa Sainteté, & en particulier de ceste derniere dont est faite mention és susdites lettres de sa Maiesté à Monsieur de Sillery.

Le Prestre François exorciseur m'estant venu voir, ie luy parlay de telle forte qu'il me dit qu'il s'en retourneroit à Paris, si l'en estois d'aduis. Je luy dis qu'il ne scauroit mieux faire que de se tirer d'icy & se tenir le plus loing qu'il pourroit de ceste femme pretenduë demoniaque. Suiuāt cela il retourna hyer prendre congé de moy pour aller à Paris. Il est Prouengal, & dit se tenir à Paris depuis vingt cinq ans. Ceux qui le frequentent & qui croient en luy l'appellent Messire Cesar. Il dit n'estre venu avec l'Abbé de S. Martin, & que s'il eust sceu. que ledit Abbé & la femme deussent venir à Rome, il n'y fust venu: & toutesfois ledit Prestre comparut à Rome peu apres l'arriuee dudit Abbé, qu'on dit l'auoir amené, & ont conuersé tous les iours ensemble, & ledit Prestre a exorcisé ladite femme en chambre en presence de François, & a dit que c'estoit luy à qui Monsieur l'Euesque de Paris confie-

324  
LETTRES DE MONSIEUR,  
gna ceste femme l'an passé. Tout cela me fait penser que s'ils ne sont venus  
tous ensemble, ils ont concerté ensemble leur voyage, & arresté leur ren-  
dez-vous. A tant, &c. Monsieur, &c. De Rome ce vingt-sixiesme May, mil  
six cens.

AV ROY.

CCXXI.

SIRE,

Le vingt-deuxiesme May ie respondis à la lettre qu'il auoit pleu à vostre  
Maiesté m'escire le neufiesme d'Auril, sur le voyage de Monsieur le Duc  
de Bar à Rome, & par mesme moyen vous escrivis les difficultez qui se  
presentoient en son affaire, & la crainte que i'auois qu'il ne rapportast de ce  
voyage le contentement qu'il s'en estoit promis. Depuis mes lettres Mon-  
sieur le Duc de Bar eut audience du Pape vn<sup>e</sup> Vendredy au soir 26. de May;  
de ce qui se passa, vostre Maiesté en aura esté aduertie, tant par luy, que par  
Monsieur de Sillery, qui est, qu'il vouloit mettre ceste affaire en vne congre-  
gation de deux Cardinaux & trois ou quatre autres Theologiens, & me  
nomma moy avec Monsieur le Cardinal Bellarmino pour les deux Cardi-  
naux. Tout aussi tost que Monsieur de Sillery m'eut rapporté que le Pape  
m'auoit nommé pour vn des Cardinaux, ie luy dis que c'estoit mauuais si-  
gne pour nous, d'autant que sa Sainteté en toutes ses actions procede avec  
grande iustification, & que luy preuoyant que cét affaire ne se pouuoit ex-  
pedier selon nostre desir, il ne se pouuoit mieux iustifier, qu'en y mettant vn  
si obligé subiet & seruiteur de vostre Maiesté, qui vist & ouïst tout ce qui s'y  
diroit & feroit, pour pouoir tesmoigner à vostre Maiesté & à Monsieur le  
Duc de Bar, & à tous autres qui en pourroient estre marris, qu'il n'auoit te-  
nu à faute de bonne volonté de sa Sainteté, mais à l'impossibilité de l'affai-  
re en soy.

Depuis ledit iour de Vendredy 26. du mois, sa Sainteté ayant demeuré  
huiet iours à faire appeller à soy ceux qu'il vouloit estre de ceste congre-  
gation, Monsieur de Sillery luy en parla le 9. de ce mois, & sa Sainteté luy  
demanda si on vouldroit que Monsieur le Cardinal de saint Senerin, qui est  
grand Penitencier, fust de ladite congregation, & Monsieur le Duc de Bar  
& son conseil ayant trouué bon que ledit sieur Cardinal en fust, sa Sainteté  
l'y mit, & nous fit appeller Mardy treiziesme de ce mois lesdits Cardinaux  
saint Seuerin, Bellarmino, & moy avec eux, & trois Theologiens, à sça-  
uoir le Pere Benedetto Iustiniani Iesuite, le Procureur general de S. Domi-  
nique, & le Commissaire general de l'ordre de saint François de l'obser-  
uance.

Nostre saint Pere proposant le fait, dit que lors qu'il estoit à Ferrare, on  
luy fit instance de la part de vostre Maiesté & de Monsieur le Duc de Bar, de  
donner dispense pour le mariage qui se traitoit de Madame vostre sœur.

avec Monsieur le Prince de Lorraine parens entre le 3. & 4. degré de consanguinité: qu'il respondit qu'il ne la deuoit ny pouuoit dōner, pour les causes qui lors furent alleguees, & neantmoins on passa outre à contracter, & consommer de fait ledit mariage, qui fut vn grand scandale à toute la Chrestienté; & maintenant dix-huict mois apres estoit venu ledit Prince de Lorraine, qui demandoit encores ladite dispense, & cependant estre admis à la communion, & à gagner le Iubilé. Quant à la dispense, si Madame vostre Sœur se vouloit rendre Catholique, il la donneroit tres volontiers, & quand besoin seroit il iroit encores luy mesme en personne pour la Catholiser: mais pendant qu'elle demeureroit opiniastre en ses erreurs, il ne deuoit ny pouuoit donner ladite dispense. Quant au reste qui concernoit la communion & le Iubilé, s'il y auoit moyen de consoler & contenter ce Prince, sa Saincteté desiroit luy donner toute consolation, & contentement qui seroit possible, sans preiudicier à sa conscience, ny à l'autorité de l'Eglise & du saint Siege. Que nous nous assemblassions & ouyssions doncques ce qui nous seroit dit & remonstré de la part dudit seigneur Prince, viissions les escritures qu'il nous feroit bailler, deliberassions sur le tout, & aduisassions à ce qui s'y pouuoit faire, & le rapportassions à sa Saincteté: c'est le sommaire de la proposition que le Pape fit.

Le lendemain Mecredy quatorziesme de ce mois nous nous assemblâmes chez Monsieur le Cardinal de saint Severin le plus ancien, où la chose mise en deliberation opinerent premierement les trois Religieux Theologiens, & puis les trois Cardinaux, & fut resolu que pour le regard de l'excommunication, en laquelle ce Prince estoit encouru pour auoir espousé vne sienne parente en degrez prohibez par les saints decrets, il pouuoit estre absous facilement, attendu qu'un excommunié peut estre absous pour quelque bien particulier, encore qu'il ne le demande point, & qu'il demeure opiniastre & impertinent, & qu'il ne vueille pas mesme estre absous: mais de recevoir ledit seigneur Prince à la communion, & à gagner le Iubilé, il n'y auoit point de moyen sans la dispense qu'il demandoit, d'autant qu'auant l'y recevoir il faudroit qu'il fust confessé & absous de ses pechez, & entre autres de l'inceste commis avec sa parente, & pour en estre absous il faudroit qu'il eust ferme propos & resolution, & fist promesse de desister du peché, & de la quitter & renvoyer; ce que chacun cognoist estre hors de son pouuoir, & par mesme moyen qu'il ne luy falloit point obliger, attendu la qualité des parties, & que depuis le contract & consommation de ce mariage, n'estoit suruenue aucune nouvelle occasion de la repudier; & y en eut mesme qui dirent que quand il le promettrait il ne le tiendrait pas; mais si la dispense se pouuoit auoir, lors ne seroit besoin de faire telle promesse pour l'aduenir, & suffiroit de se repentir & confesser de sa faute passée, pour auoir l'absolution moyennant quelque penitence, & puis estre receu à communier & gagner le Iubilé.

C'est en somme ce qui se resolut en ladite congregation, & fut arresté que le lendemain Ieudy, auquel iour se tient toutes les sepmaines congregation de l'Inquisition deuant le Pape, lesdits seigneurs Cardinaux de saint Severin & Bellarmino, qui sont de ladite Congregation de l'Inquisition, rapporteroient au Pape ladite resolution, & luy demanderoient si sa Saincteté

voudroit que nous nous r'assemblâssions, pour deliberer sur la dispense que ledit seigneur Prince desiroit, de laquelle nous n'auons voulu deliberer que sa Sainteté ne nous l'ait permis.

Auquel propos ie dis à la compagnie sur la fin, que quand il plairoit à sa Sainteté nous ouvrir la bouche pour deliberer sur ladite dispense, i'estimois qu'il se trouueroit assez de raisons pour prouuer que sa Sainteté la pouuoit & deuoit donner, & quant & quant en alleguay quelques vnes, non par forme de deliberation, mais par forme d'ouuerture, & pour decouurir comment elles seroient acceptees, & quel il y feroit quand on viendrait à en traiter, & encores pour les preparer si dauanture le Pape leur en demandoit; & trouuay que tous me firent bonnes lesdites raisons que le leur auois alleguees, tant sur le pouuoir que sur le deuoir, excepté vn qui seteut sans rien alleguer au contraire. Et ie me partis de ladite congregation, avec opiniõ que si le Pape permettoit qu'on mist ladite dispense sur le bureau, tous ou la plus grande partie, tiendroient que le Pape la püst & deust donner. Mais le Pape long-temps y a s'en est monstré si fort esloigné, & s'est obligé à la negatiue par tant de refus, & d'asseurances qu'il se feroit plustost mettre en quatre quartiers, & telles autres choses, que ie ne sçay que m'en promettre; i'açoit que ie preuoy bien qu'il aura vne grande peine en soy-mesme de refuser qu'il en soit deliberé, & puis à refuser la dispense, si la compagnie iuge qu'il la puisse & doieue donner. I'ay dit à Monsieur de Sillery les raisons & moyens que i'auois apprestez pour cét effet, & il les a dits à Monsieur le Duc de Bar & à son Conseil, qui en ont mis vne partie en vn escrit qu'ils doiuent donner au Pape & aux Cardinaux & aux trois Theologiens consultants: de ce qui s'y fera cy apres vostre Maieité en sera aduertie. A tant, &c. Sire, &c. De Rome, ce 17. Iuin 1600.

## A V R O Y.

## CCXXII.

SIRE,

I'ay escrit cy deuant deux lettres à vostre Maieité sur le fait de Monsieur le Duc de Bar, la premiere du vingt-deuxiesme May, & la seconde du 17. de ce mois; ceste-cy sera la troisieme, par laquelle ie rendray compte à vostre Maieité de ce qui s'y est passé depuis la deuxiesme, i'entends de ce à quoy ie suis interuenue, laissant le reste à Monsieur de Sillery, comme i'ay accoustumé de toutes autres choses.

Le Lundy 19. de ce mois se tint vne congregation sur ceste affaire chez Monsieur le Cardinal de saint Seuerin, en laquelle fusmes presents les mesmes six que nous auions esté en la premiere qui se tint chez le mesme seigneur Cardinal saint Seuerin le Mercredy quatorziesme de ce mois, de la-

quelle ie rendis compte à vostre Maieſté par ma lettre du 17. de ce mois. Au commencement doncques de ceste ſeconde congregation Monsieur le Cardinal ſainct Seuerin nous dit, comme luy & Monsieur le Cardinal Bellarmino là preſent, auoient fait rapport au Pape le leudy auparauant de ce qui auoit eſté reſolu en la premiere congregation que nous auions tenuë le Mecedry 14. de ce mois, & qu'au reſte ſa Saincteté n'auoit point eſté d'aduis qu'on traitaſt de la diſpenſe, ne luy ſemblant point la pouuoir donner, ſi Madame voſtre ſœur ne ſe conuertifſoit. Mais d'autant que dedit ſeigneur Duc auoit baillé depuis vne eſcriture que nous deuions auoir veü, luy Cardinal ſainct Seuerin nous auoit appellez pour la ſeconde fois, pour aduiſer enſemble ſi par la lecture de ladite eſcriture nous auions trouué quelque choſe de plus que ce que nous auions reſolu en ladite premiere congregation; & fut reſpondu par tout l'un apres l'autre, que ladite eſcriture ne changeoit rien de ladite premiere reſolution, d'autant que ceste eſcriture tendoit principalement à la diſpenſe, à laquelle nous ne pouuions deliberer. A la fin leſdits ſeigneurs Cardinaux ſainct Seuerin & Bellarmino ayans entendu que pour autre choſe ie voulois aller au Pape le lendemain, ils me chargerent de prier la Pape de la part de tous, de nous dire quelle reſponſe nous aurions à faire à Monsieur le Duc de Bar. I'en parlay doncques au Pape le lendemain, & ſa Saincteté me dit, qu'il luy ſembloit qu'il falloit parler clairement audit ſeigneur Duc, & luy dire comme nous auions deliberé ſur ſon ſaiſt avec deſir de le contenter, mais qu'il ne s'en eſtoit pû trouuer, & qu'il falloit faire tout ce qu'il ſeroit au monde poſſible pour faire Madame Catholique, qui eſtoit le ſeul remede de tous ces maux. Je loüay la franchise & rondeur de ſa Saincteté, & le deſir de la conuerſion de ceste Princeſſe; & apres cela pour eſſayer d'auoir mieux, & pour l'induire à permettre que la congregation deliberaſt ſur la diſpenſe, i'adiouſtay, que comme ſeruiteur & creature de ſa ſaincteté, i'enſe deſiré qu'il ne print point ſur ſoy l'enuie de n'auoir voulu qu'on deliberaſt ſi ſa Saincteté pouuoit & deuoit donner la diſpenſe, & que ſa Saincteté pour ſa plus grande d'eſcharge & iuſtification, pourroit, ſ'il luy ſembloit, augmenter le nombre des Cardinaux, & des Theologiens & Canoniſtes de ceste congregation, & ainſi s'en lauer les mains, quelque reſolution qu'on y priſt, ſoit à l'affirmatiue ou à la negatiue; & quand bien on y conclurroit que la diſpenſe ſe pourroit & deuroit donner, ſa Saincteté pourroit encore qualifier & conditionner ladite diſpenſe, de ſorte qu'il en demeureroit encores plus iuſtifié enuers Dieu & le monde. Il me repliqua que quand il auroit à donner ceste diſpenſe, il voudroit que tout le College des Cardinaux y paſſaſt & en deliberaſt, mais qu'il ne ſe pouuoit induire à croire qu'il deuſt iamais donner ceste diſpenſe en quelque façon que ce fuſt, ſi prealablement la Princeſſe ne ſe declaroit Catholique; & entre autres raiſons qu'il allegua, que i'ay autrefois eſcrites à voſtre Maieſté, il dit que ſi vne fois il auoit donné la diſpenſe, ceste Princeſſe eſtimant par ce moyen eſtre miſe en repos, ne voudroit plus ouyr parler de ſe faire Catholique, & les Princes de Lorraine en deuientroient auſſi plus ne gligens à y faire leur deuoir; Qu'il deſiroit infiniment ceste conuerſion, & pour la procurer, feroit tout ce que nous trouuerions expedient, eſcriroit à la Princeſſe, luy enuoyeroit qu'il



nous voudrions & mesmes le Cardinal Bellarmino si nous l'estimions à propos, & si le grand Duc & la grande Duchesse auoient quelque personne confidente & propre à cét effect, il l'enuoyeroit aussi, que s'il estoit besoin sa Sainteté iroit elle mesme : protestant de ne le dire point par forme de parler, comme on fait quelquesfois en telles affirmations, ains pour ce qu'il y estoit ainsi disposé en son cœur & prest à l'exécuter. Et comme sa Sainteté parla résoluement en cecy, aussi quant à la façon d'abducir encore plus la réponse, & à la personne par qui il le feroit, il prit temps à y penser, & ne fut faite la réponse à Monsieur le Duc de Bar que Mardy au matin 27. de ce mois, que Monsieur le Cardinal Bellarmino la luy alla faire de la part de sa Sainteté au conuent de la Trinité du mont, où ledit seigneur Duc a tousiours logé. La teneur de la réponse sera enuoyée à vostre Maïesté par Monsieur de Sillery, comme il m'a dit qu'il feroit.

L'aprèsdinec dudit iour Mardy vingt-septiesme, Monsieur le Duc de Bar, avec le sieur de Glrenoue, autrement de Mariuille, & Monsieur de Sillery vindrent chez moy, & deliberasmes bien longuement ensemble sur les remonstrances que Monsieur le Duc de Bar auoit à faire, & les arrestasmes en la façon que nous estimames la meilleure pour le respect & reuerence de sa Sainteté, pour le contentement & satisfaction de vostre Maïesté, & pour la consolation & soulagement de Monsieur le Duc; & ledit sieur de Glrenoue partit pour aller faire lesdites remonstrances à Monsieur le Cardinal Bellarmino, qui logea au Palais chez le Pape, demeurant encores vne bonne piece de temps chez moy, Monsieur le Duc de Bar apres le parterment dudit Glrenoue. Apres que ledit seigneur Duc & Monsieur de Sillery furent partis de chez moy estant ià assez tard, ie m'en allay chez le Pape pour remercier sa Sainteté, de ce que le iour precedent il luy auoit plu proposer en Consistoire elle mesme pour moy l'Euesché de Bayeux, qu'il a plu à V. M. me donner, & comme j'arriuy en l'antichambre, on me dit que le Pape venoit de començer les Matines pour le lendemain, & quand il les auroit acheuees on luy diroit que j'estois là. Sa Sainteté demeura long temps à dire ses Matines, & cependant arriua en l'antichambre Monsieur le Cardinal Bellarmino, qui me dit de luy mesme, sàs que ie luy parlasse de rien, qu'il venoit pour dire au Pape ce que Monsieur le Duc de Bar venoit de luy faire dire par son Secrétaire, qui estoit que pour auoir absoluion de ses pechez, & pour se pouuoir communier & gagner le iubilé, il offroit, & promettoit de quitter & renuoyer Madame publiquement s'il en estoit besoin, & en toutes les meilleures façons qu'il faudroit, & cependant de ne retourner iamais à elle s'il n'auoit la dispense, & en outre que ledit seigneur Duc auoit escript à vostre Maïesté qu'il ne vouloit point se damner, & que s'il ne se pouuoit sauuer avec Madame vostre sœur, il la lairoit avec toute autre chose qu'il scauroit auoir en ce monde; adiousta ledit seigneur Cardinal, que le seigneur Duc faisant ceste offre & promesse, le Pape ne pourroit luy denier l'absolution, ny le iubilé; dequoy j'aduisey le sieur de Sillery le soir mesme.

Ce fut tout le contraire de ce qui auoit esté arresté chez moy environ deux heures auparavant, & voudrois qu'il m'eust costé ie ne scaurois dire tant bien, & que ie ne fusse contraint de vous escrire cecy. Je ne sçis iamais

mauvais office à homme du monde , & ne veux pas commencer à ceste heure , mesmement en telle personne , mais ie paye en cecy le deuoir de fidelité, que ie dois à vostre Maiesté, sans auoir intention de nuire à personne. Si ie disois à vostre Maiesté que ie fus estonné d'ouïr ce que ledit sieur Cardinal me dit, ie vous confesse qu'il y en auoit trop de subiect, mais au reste ie mentirois , car auant mesme que ledit seigneur de Bar arriua en ceste ville , apres que i'eus veu ses lettres, & ouy le sieur de Beauuau qui les porta, ie m'imaginay qu'il venoit avec ce dessein, & le dis à Monsieur de Sillery , & les causes de mon imagination , comme ie les luy ay inculquees plusieurs fois depuis , & pendant que cét affaire s'est traittee , ie luy ay dit plusieurs fois depuis que l'on feroit en fin ces offres. Mais en vne chose se font ils trôpez, c'est qu'ils croyoient en venant à Rome que le Pape leur eniendroit telle chose , & qu'ils s'en deschargeroient sur sa Sainteté : mais tant s'en faut que sa Sainteté leur ait donné occasion de venir à ceste extrémité & qu'elle en ait voulu subir l'enuie, qu'au contraire tous ceux qu'elle a commis & deputez sur ce fait , leur ont dit en particulier & en commun qu'ils tenoient cela pour impossible , & n'entendoient l'y astreindre , de façon qu'il a fallu que lesdites offres ayent esté faites du propre mouuement des offerans.

Le lendemain Mercredy au soir 28. de ce mois , Monsieur le Cardinal Bellarmino & moy nous rencontrafmes de nouveau en l'antichambre du Pape avec autres Cardinaux , à cause de la Chapelle des Vespres que le Pape deuoit tenir à l'heure , pour estre la veille de la feste de saint Pierre, & l'ayant tiré à part, il me dit que le Pape sur les susdites offres & promesses, n'auoit peu faire de moins que de permettre audit seigneur Duc de prendre secrettement vn confesseur, qui l'absolust & luy donnast à communier en quelque Chapelle à part , & qu'il gaignast le Iubilé en allant aux quatre Eglises vne seule fois; & ainsi sera fait: & aduenu ce que ie predis à vostre Maiesté par ma premiere lettre du 22. May, que Monsieur le Duc de Bar seroit venu pour s'en retourner non seulement sans dispense, mais aussi sans absolution pour le passé, & sans gagner le Iubilé, ou bien pour promettre de renuoyer la sœur du Roy de France qu'il auoit espousee, sçachant bien de quelle religion elle estoit, & en quel degré de parenté elle luy attouchoit.

Le soir dudit iour Mercredy , le sieur de Glrenoue fut trouuer Monsieur de Sillery , & partant d'avec luy s'en vint chez moy , & me raconta ce qu'il auoit remontré à Monsieur le Cardinal Bellarmino , suiuant, disoit-il, ce qui auoit esté arresté le iour auparauant entre Monsieur le Duc, Monsieur de Sillery , & moy; & apres vn long discours fait avec beaucoup d'anxiété, vint tomber à ce que Monsieur le Cardinal Bellarmino (disoit-il). apres plusieurs interrogatoires & responses, auoit conduit cét affaire en tels termes, qu'il falloit que Monsieur le Duc pour gagner le Iubilé promist de ne retourner point vers Madame qu'il n'eust la dispense; & apres tout cela voyant que ie ne respondois quasi rien, il me dit qu'il me prioit de la part de Monsieur le Duc de luy dire ce qu'il me sembloit, & qu'il auoit laissé Monsieur de Sillery fort pensif. Je pris ceste derniere partie , & sans luy donner à entendre que personne m'eust parlé , ie luy dis que Monsieur de Sillery

estoit homme d'entendement & de sçauoir, & qu'il estoit demeuré pensif, pour ce qu'il auoit iugé de luy mesme qu'on ne pouuoit auoir accordé à Monsieur le Duc de communier & gagner le Iubilé, qu'il n'eust premièrement & expressement promis de quitter & renvoyer Madame, & qu'il auoit esté ainsi conclud par deux fois en la congregation, en laquelle neanmoins tous les six consultants, & mesme les trois religieux qui ne sont si versez és choses du monde, auoient recogneu que Monsieur le Duc ne le pouuoit faire, & qu'il ne falloit point exiger telle chose de luy, & partant qu'ils y aduisassent bien. Le Lundy au soir 29. Monsieur le Duc de Bar vint chez moy luy-mesme, & me parla encore de cela mesme, me celant ce que ie sçauois si bien. Je ne voulus entrer en contestation avec luy, & me remis à ce que i'en auois dit à Monsieur de Glerenoue pour le luy rapporter; & sur ce qu'il me dit que le Pape vouloit sçauoir le Prestre qu'il prendroit pour se confesser & receuoir l'absolution, ie luy dis que comme subiect & seruiteur de vostre Maiesté, ie ne voulois ny ne pouuois luy rien dire touchant la moindre chose de sa confession, mais comme personne tierce ie luy pouuois dire, qu'il me sembloit qu'il falloit bien penser au principal & à ce qu'il promettoit, mais quant à cette particularité de nommer au Pape le Prestre qui le confesserait, ie ne voyois point qu'il en deust faire difficulté, non plus qu'à d'autres particularitez qui n'importoient point, esquelles, s'il falloit venir là, ie pensois qu'il se faudroit comporter de la façon que le Pape voudroit.

I'estime que Monsieur le Duc escrira à vostre Maiesté, & mesme luy enuoyera quelques vns ne ses Génrils-hommes: tant y a que c'est ce qui a esté fait en cet affaire iusques icy. De ce qui se deliberera cy-apres, sur les diligences qui ont à se faire pour la conuersion de Madame, & sur autres telles choses, vostre Maiesté en sera aduertie: cependant ie prie Dieu, &c. Sire, &c. De Rome, ce 30. Iuin 1600.

A V R O Y.

CCXXIII.

S I R E,

Ie receus le 2. de ce mois la lettre qu'il plust à vostre Maiesté m'escrire le 2. Iuin, & ay bien noté les raisons pour lesquelles vostre Maiesté a esté contrainte de différer la publication du Concile de Trente, & le ressentiment des Iesuites, desquelles ie m'aideray en temps & lieu pour le service de vostre Maiesté, & pour la satisfaction & contentement du Pape, & d'autres qui ont le mesme desir que sa Sainteté.

Monsieur de Sillery m'a communiqué la copie de la lettre que Monsieur de Sauoye escriuit de sa main à vostre Maiesté: mais pour tout cela on n'a point opinion icy qu'il veuille exécuter rien de ce qu'il a promis: on le croiroit d'un autre, mais de luy non. Ceux qui cognoissent bien ce Prince

fiement qu'il ne cherche qu'à gagner tēps pour faire la cueillette & attēdre le Côte de Fuentes, & les forces qui doivent venir d'Espagne; attēdre aussi que la paix du Roy d'Espagne & des Archiducs soit faite avec la Reyne d'Angleterre, & que l'hiver, qui a accoustumē d'aduācer en Sauoye plustost qu'ailleurs, empesche V. M. de rien faire contre luy auant le printemps prochain. J'ay horreur de vous adiouster vne autre chose que gēs de qualirē m'ont ditte, qu'il attend avec plus de desir & d'esperāce que tout cela; mais ie ne dois & ne peux la vous taire plus longuement; c'est le succez & ēuenement des embusches des assassins qu'il a dressez & apostez en diuerses facons cōtre la personne de vostre M. dont Dieu vous preseruera, & le confondra luy comme il merite, moyennant la precaution dont vostre Maieštē & vos seruiteurs vseront. Ces choses ne se disent pas par tenans & aboutissans, mais le naturel & facon de proceder de l'homme les rendēt vray-semblables, & meritent que vostre M. & tous vos seruiteurs y prennent garde. J'ay veu ce qu'il vous a plu escrire sur le fait de l'Euešché de Strasbourg, & le grand tort qu'ōt ceux qui vous y ayans engagēs y sont portez comme ils ont fait. Monsieur de Sillery, suiuant ce que nous en auons deliberē, en a tres-bien parlē au Pape. J'espere que la playe ne sera si dangereuse comme il semble, d'autant que la ialousie que ceux de Strasbourg ont de leur libertē, sera augmentee par cette Coadiutorerie, si auāt que le Coadiuteur n'y entrera iamais, & qu'ils inclineront d'autant plus vers vostre Maieštē, qu'aussi elle s'y scaura aider enuers eux par les voyes qu'elle estimera propres & raisonnables. Ie continueray la poursuite des obseques du feu Roy, & cōme i'espere de n'y perdre point ma peine, aussi ne pensay-ie pas en venir à bout qu'avec vn peu de temps. Et quant aux articles qui me furent portez par le sieur Erminio, il m'en a tousiours semblē conformēment à ce que nous en commande vostre Maieštē, laquelle sera obeye en cela comme en toute autre chose. Monsieur le Duc de Bar est sur son partement de Rome, s'estant ia licenciē de nostre saint Pere. Monsieur de Sillery qui l'y a accompagnē vous escrira ce qui s'y est passē; & ie me contenteray de vous aduertir que Monsieur le Cardinal Bellarmino m'a dit depuis ma derniere du 30. Iuin, que ce qu'on m'auoit dit que le Pape vouloit scauoir le Prestre à qui Monsieur le Duc se cōfesseroit n'estoit point vray; & qu'il n'y auoit eu autre chose, sinon que sur les offres faites par ledit seigneur Duc que i'escris à vostre M. le Pape auoit dit que ledit Duc se print doncques de luy-mesme vn cōfesseur tel qu'il voudroit, & que si ledit confesseur le trouuoit en disposition & en estar de pouuoir estre absous, & communier, & gagner le Iubilē, il luy donast l'absolution, & luy promist la cōmunion, & la participation dudit Iubilē, en faisant les 4. Eglises vne seule fois, pourueu que ladite ablution & communion fust faitē secretement, & sans que le mōde en sceust rien. La cause pourquoy il n'a peu estre absous, ny cōmunier & gagner le Iubilē sinon que secretement, vient des reigles de penitencerie, qui portent que pour permettre à vn qui auroit fait vn peché public de communier en public, il faut qu'il face la reparation publiquement & à la veuē de tout le monde: mais qu'il promet en secret de reparer vn iour publiquement la faute publique qu'il a cōmise; on ne luy permet aussi de cōmunier cependant sinon que secretement iusques à ce qu'il ayt fait la reparation publique. Et que ledit seigneur Duc

se soit confessé depuis, & ait esté absous, & ait communiqué secrètement, ie le croy comme si ie l'auois veu & pensé que ce fut Dimanche 2. de ce mois, & mesme d'autant qu'il fut és quatre Eglises où se gaigne le Iubilé le Lundy 3. de ce mois: & ainsi a pris fin cette affaire quant au passé. Reste le fait de la dispense pour l'aduenir, de laquelle nous ne pouuons nous promettre rien si Madame ne se fait Catholique, pour la reduction de laquelle il faut faire tout ce qui sera possible. Monsieur de Sillery vous escrira les diligences qui s'y preparent de deçà. A tant, &c. Sire, &c. De Rome, ce 8. Iuillet 1600.

## A MONSIEUR DE VILLEROY.

## CCXXIV.

**M**ONSIEUR, Je n'ay sceu tant gagner sur moy que ie n'aye enfin mescrit au Roy ce que ie crains du Duc de Sauoye, & qui m'a esté dit long temps y a par l'Ambassadeur de Venise resident icy, & qui a esté si long temps en France près de sa Maiesté. C'est ce que ie voulois dire sur la fin de ma lettre au Roy du 9. May en l'article qui commence, ( *QUANT AUX OCCURRENCES DE DEÇA* ) par ces mots, *MACHINE QUELQUE GRAND MESCHIEF*. Je sçay bien combien il faut estre retenu à donner aduis de telles choses & de telles personnes: mais la vie du Roy importe tant qu'on n'en peut estre trop soigneux; & l'aduis qui nous est venu par le dernier ordinaire d'une femme qui a voulu empoisonner sa Maiesté, m'a extorqué des mains cét aduertissement que ie differe iusques à maintenant. Que s'il est vray ce qu'on a dit de ceste femme, vous trouuerez si la chose est bien recherchee & examinée, qu'elle aboutira en quelque façon à Sauoye; & le trouuiez vous ou non, ie vous prie croire, encores que vous n'en voyez rien, que tant que le Duc de Sauoye tiendra le Marquisat, il ne cessera, ie ne dis pas de tergiverser & de mentir au Roy, mais de desirer, procurer, & machiner la mort de sa Maiesté, & comme il ne faudroit pas croire aisément telle chose d'un autre, aussi tant plus cette méchanceté est execrable & abominable; tant plus il la faut croire de luy qui en malice & audace n'a point son pareil. Je seray bien aise s'il vous plaist dire encores au Roy ce que ie viens de vous adiouster par la presente pour plus grande explication dudit aduertissement. A tant, &c. Monsieur, &c. De Rome, ce 8. Iuillet mil six cens.

## A MONSIEVR DE VILLEROY.

CCXXV.

**M**ONSIEVR, Celuy qui vous rendra la presente est le sieur Veyre bourgeois & banquier de Lyon, lequel a charge de solliciter l'affaire de Monsieur Perrin Soufdataire de nostre S. Pere, touchant l'Abbaye de S. Leon de Toul, que sa Saincteté luy a donnee. Il a desiré de moy vne lettre à vous, pour seruir audit sieur Veyre de plus facile accez, & à luy de continuation de la recommandation que ie vous ay faite autresfois de son bon droit. A quoy i'ay esté induit par cy deuant & le suis en cores à present, par la iustice que ie sçay estre de sō costé, & par sa vertu & merites que ie cognois de long temps, & pource que nostre nation a tous les iours besoing de luy, estās par luy venūs & examinees, & par son aduis admises ou reiettoes toutes les supplications des benefices & des dispenses, & autres telles graces qui ont à se despeschier en ceste Cour. Mais ie m'en formalise encore plus, pour ce qu'en ce fait il ne s'agit pas tant de l'interest dudit sieur Perrin, comme de l'autorité & droicts du saint Siege & de nostre S. Pere le Pape, & que ie sçay que sa Saincteté recevra grand desplaisir si on ne luy rend au moins iustice. pourtant de graces qu'il a faites & fait tous les iours au Roy & à ses subiects, & que de cela il n'en peut aduenir rien de bon pour les affaires & seruice de sa Maiesté, à quoy il est digne que Messieurs du Conseil, qui doiuent iustice aux moindres, regardent avec vn soing particulier : & mesme d'autant que le fort qu'on veut faire audit sieur Soufdataire, ne se pourroit rencontrer en personne qui le puisse plus facilement & plus souuent ramener au Pape, auquel il parle tous les iours à cause de son office & des matieres beneficiales qui luy en fourniront occasion à toutes les fois qu'il voudra. Atant, &c. Monsieur, &c. De Rome ce 22. Iuillet milsix cens.

## A MONSIEVR DE VILLEROY.

CCXXVI.

**M**ONSIEVR, Le Courier Valerio arriva en ceste ville le 13. de ce mois, & ie recens les lettres du Roy & les vostres escrites à Moulins le dernier Iuin ; & depuis est arriué l'ordinaire de Lyon avec vos lettres du 7. de ce mois, à toutes lesquelles ie respondray par celle-cy sans escrire à sa Maiesté pour ceste fois.

Je vois par toutes que le Roy & vous avez fort à cœur l'affaire de Monsieur le Duc de Bar., comme à la verité il est digne du soing de sa Maiesté &

X X x 3

du vostre. Aussi vous puis-je assurer deuant Dieu, que Monsieur de Sillery & moy y auons fait tout ce dont nous nous sommes pû appercevoir, non seulement pour le bien de l'affaire en soy, & pour le seruice & contentement du Roy, mais aussi pour le respect dudit seigneur Duc, que nous auons seruy de toute nostre puissance & affection. Quant au Pape, il ne s'y pouuoit porter avec plus de respect enuers le Roy, ny plus de moderation enuers tous. Premièrement, quelque chose qu'on aye faite en ce mariage contre les saints Decrets & son autorité, il n'en a fait aucun ressentiment contre personne, & a passé le tour par conuenance. Secondement, quand ce Prince est venu icy sa Sainteté l'a recueilly benigneement, & honoré largement. En troisiéme lieu, il a fait mettre son fait en-deliberation & a déclaré à ceux de qui il vouloit auoir l'aduis, qu'il le vouloit consoler & complaire de tout ce qui se pourroit sans preiudicier à sa conscience & à sa reputation. En quatriéme lieu, il luy a fait dire que ceux qui auoyent delibéré sur sô fait, trouuoyér qu'il ne pouuoit faire ce que les saints Decrets & la discipline Ecclesiastique requeroient pour pouuoir estre absous du passé, communier, & gagner le Iubilé. En cinquiesme lieu, quand ledit seigneur Prince luy a fait dire, que si pour auoir absolution de ses pechez, se pouuoit communier, & gagner le Iubilé, il ne falloit que quitter & renvoyer Madame, à la charge de ne retourner iamais avec elle, qu'il le pouuoit, & vouloit, & l'offroit à sa Sainteté, & la prioit de luy faire droit là dessus. Sa Sainteté qui ne pouuoit en façon du monde refuser ces offres, apres en auoir fait remonstrier l'importance audit seigneur Prince, & qu'il persistoit là dessus, a neantmoins tant respecté le Roy, que sans le vouloir accepter, n'y s'en mesler, a fait dire audit seigneur Prince qu'il se print doncques luy mesme vn Confesseur tel qu'il voudroit, & si ledit Confesseur le trouuoit en estat & disposition de pouuoir estre absous, & de se communier, & participer au Iubilé, qu'il l'absolust, & donnast la communion, & l'admit de gagner le Iubilé, pourueu que ce fust en lieu priué & secret, sans qu'il fust sçeu du monde. Que si le Pape n'a donné la dispense qu'on luy demandoit, il en allegue de tres-grandes raisons, qui meritent qu'on y aye esgard; comme aussi aux diligences qu'il desire estre faites pour la conuersion de Madame: pour lequel effect il offre tout ce qu'on trouuera bon & expedient, voire d'aller luy-mesme vers elle pour l'instruire & catechiser si besoin estoit. Si elle se conuertit nous aurons incontinent la dispense; mais si elle ne se conuertit point, ie ne la puis esperer.

Le Roy me commande de contribuer avec Monsieur de Sillery tout ce que ie pourray au fait du Marquisat. Je l'ay tousiours fait en cela & en toute autre chose, & le fais & le feray tant que ie viuray: vous assurant que i'ay le mesme soing de tout ce qui concerne le seruice du Roy, que ie sçaurois auoir si i'auois la charge moy-mesme & seul; & dis à Monsieur l'Ambassadeur tout ce qu'il plaist à Dieu m'inspirer apres y auoir profondement pensé, & tout ce que i'en puis apprendre d'ailleurs.

Pour vous assurer de Monsieur de Sauoye, & le mettre luy en repos, il n'y a autre moyen que de luy faire rendre au plustost ce qu'il tient du vostre. Comme cela sera fait, il tournera ses pensées ailleurs. Monsieur de Sillery tousiours dit constamment à son Ambassadeur, & à tout autre, que le

Roy ne rabbatroit iamais rien de l'accord qui auoit esté fait; & i'en suis bien tesmoin pour l'auoir ouy: & cependant on vous fait dire que mondit sieur de Sillery est entré en traité avec sondit Ambassadeur sur la moderation des conditions. Mais ce mensonge est fort peu de chose, en consideration d'une infinité d'autres plus grands. Si vous le croyez oncques plus de rien qu'il die ou vous face dire, s'il ne vous appert d'ailleurs, vous en serez plus coupable que luy-mesme.

Monsieur de Sauoye vous a fait assez mes-huy cognoistre qu'il n'a point de conscience ny de crainte de Dieu, & moins soin de son honneur & reputation, ny aucune vergongne des hommes. S'il se contentoit de tenir au Roy & à la Couronne le tort que chacun sçait sans y adiouster la mocquerie, l'indignation en seroit d'autant moindre: mais toutes les belles lettres qu'il escrit à sa Maïesté & les paroles qu'il luy fait dire ne sont que pures mocqueries & tromperies. Encore n'est-ce pas le pis: il faut craindre pis de luy, comme ie vous ay escrit cy-deuant. Et pour vous asseurer vous, & le mettre luy en repos, il n'y autre moyen que de luy faire rendre au plustost ce qu'il tient du vostre. Comme cela sera fait, il tournera ses pensees ailleurs; & vous l'ayant cogneu pour tel qu'il est, ne vous ferez iamais en luy, & n'en attendrez iamais aucune amitié ny bonne affection.

I'ay veu comme le Roy approuue la façon dont le Pape a disposé de l'Abbaye de Fueillans. Quelques Religieux, qui ont esté contraires au feu Abbé, & n'ont cessé de le persecuter, sont fort marris de ceste eslection du Pape, encore qu'elle ne peut estre meilleure, & se vantent d'obtenir de sa Maïesté qu'elle renoncera à la nomination de ceste Abbaye, & la liurera à la Congregation pour en disposer & eslire vn Abbé de trois en trois ans; & qu'ainsi ils contraindront cet Abbé au prochain chapitre de resigner entre les mains du Chapitre pour en eslire vn triennal. Ils ne sçauent ce qu'ils disent; & quand le Roy auroit à faire vne telle demission, il faudroit que ce fust en faueur & à la poursuite de personnes qui eussent plus de charité & bonté que n'ont ces trois ou quatre qui s'en passionnent trop ennuyeusement, & qui sont cogneus pour estre encore auïourd'huy fort mauuais François, & peu contents de l'estat present du Royaume.

Ie vous ay escrit vne lettre à part en recommandatiõ du sieur Perrin Soufdataire du Pape, laquelle vous sera renduë par le sieur Veyre bourgeois & banquier de Lyon. Si vous estimez qu'elle puisse aider à conseruer son bon droit si elle estoit veuë de Messieurs du Conseil, ie ne recuse point que vous ne la faciez voir à ceux enuers qui vous estimerez qu'elle poura profiter de quelque chose. Vous priant de croire cependant que ie ne m'en trauaille point que pour le respect du Pape, & pource que le Soufdataire l'approche de si près.

A tant, &c. Monsieur, &c. De Rome, ce 22. Iuillet 1600.



## A MONSIEVR DE VILLEROY.

CCXXVII.

**M**ONSIEVR, Les lettres du Roy & vostres du 14. Iuillet me furent rendues le vingt-huictiesme. Je respondray à l'une & à l'autre par celle-cy. Le fait de Monsieur le Duc de Bar demeura aux termes que vous aurez veu par mes lettres precedentes, & par celles de Monsieur de Sillery. Quand mondit sieur de Bar partit d'icy pour Florence, Monsieur Seraphin deuoit estre cépesché par le Pape au commencement de ce mois vers Madame sœur du Roy, pour l'inuiter & exhorter de la part de sa Sainteté à se faire Catholique, & pour aider à l'instruire avec quelque grand Theologien dont on accompagneroit ledit sieur Seraphin. Mais tout aussi tost que mondit sieur de Bar fut à Floréce, il escriuit à Monsieur de Sillery & à moy, & nous fit escrire par Madame la grande Duchesse sa sœur que nous fissions avec le Pape que sa Sainteté ordonnast audit sieur Seraphin qu'il allast premierement trouuer le Roy, & que de là il passast vers madite Dame sœur du Roy: ce que Monsieur de Sillery & moy n'approuuons point, pour quelques considerations, dont vne partie sera dans vn memoire à part que vous trouuerez avec la presente. Mais auant que nous eussions fait response audit seigneur Prince & à Madame sa sœur sur ce que dessus, il nous arriva vn sien gentilhomme avec des lettres de Monsieur de Lorraine à son dit fils, par lesquelles il le pressoit, & luy nous, de faire que Monsieur Seraphin ne fust point enuoyé, au moins si tost: ains qu'on fist enuers le Pape, que sa Sainteté procrastinast que le Roy enuoyast vers madite Dame sa sœur Monsieur d'Eureux, pour l'instruire & la conuertir. De ma part, ie n'ay iamais estimé qu'il fust besoin que le Pape exhortast le Roy à telle chose, ny qu'il fust beau ny decent que les seruiteurs de sa Maiesté en priassent sa Sainteté, puis que sadite Maiesté le feroit tousiours volontiers d'elle-mesme, & par ce moyen en rapporteroit plus de gré & plus de loüange. Toutefois ie n'ay pas estimé me deuoit opposer plus formellement à ce que les gens dudit seigneur Prince ne poursuiussent vne lettre du Pape au Roy à ceste fin, comme ils la poursuiuent: & c'est à quoy on en est à present. Le Gentilhomme, qui est le sieur de Bauuau, dit que tout aussi tost qu'il aura la lettre du Pape au Roy, il s'en ira en poste trouuer son Maistre, & de là vers le Roy.

Nous auons veu les subterfuges de Monsieur de Sauoye, & les querelles d'Alemand qu'il vous suscite, dont ie ne m'esmerueille nullement, & n'ay iamais attendu autre chose. Il y a icy aduis de fort bone part, & du vingtespriesme Iuillet, que pressé par le Roy il n'auoit en fin pû faire de moins que de faire declarer à sa Maiesté par le sieur de Roncas, que des deux parties il esliroit de rendre le Marquisat. Si cét aduis est vray, ne croyez pas  
pourant

pourtant qu'il ait aucune volonté de le restituer, & ne vous attendez pas de l'auoir que par force. Mais ne pouuant plus entretenir le Roy sur la generalité de ses remises & défaites, & luy estant force de faire quelque declaration sur l'un de ces deux partis, desquels il ne veut accomplir l'un ne l'autre, il s'est pris à cestui-cy, comme à deluy qui est pour luy fournir plus ample matiere de nouvelle cautelle & tergiversations. Car faisant semblant de vouloir rendre le Marquisat, il vous fera dire, pour gagner temps, qu'il faut arrester auant toutes choses la personne du Gouverneur qui y deura estre mis, & cōtrouuera quelque fausse occasion qu'il dira auoir de tenir pour ennemy ledit futur Gouverneur, & fera durer ceste excuse le plus longuement qu'il pourra, comme aussi toutes les autres, iusques à ce que vous viendrez aux mains. Apres ceste-cy, il fera naistre d'autres difficultez sur les garnisōs qu'il faudra mettre es villes & places dudit Marquisat. Ces difficultez qui ne seront de long-tēps vuidées, serōt suiues d'autres nouuelles, cōme sur la representation & verifiatiō des inuentaires des pieces d'artillerie, poudres, boulets, & autres munitions de guerre qui estoient dans les villes & places dudit Marquisat lors qu'il s'en empara, & dira qu'il est raisonnable qu'il sçache auant qu'il rende le Marquisat, ce qui est de faire sur les infeudatiōs par luy faites audit Marquisat, & sur telles autres choses qu'il dira deuoir estre prealablement liquidees. Il s'est dit icy vne autre, laquelle seule suffiroit pour entretenir l'affaire des annees entieres, non seulement des mois; à sçauoir qu'auant la restitution, il est raisonnable que le Roy luy donne des seuretez, non pas qu'il attende qu'apres la restitution on luy face la guerre avec ce qu'il aura restitué, & luy face-t'on payer iusques au dernier denier sans remission. Il trouuera encore matiere de différer, que si le Pape prononce en sa faueur sur le compromis, sa Maiesté luy rendra ledit Marquisat.

Je sçay bien que le Roy par l'accord article seiziesme n'est pas mesme reuolu de compromettre en la personne du Pape, sinon qu'apres que la restitution dudit Marquisat aura esté reellemēt & de fait accomplie: & toutesfois il ne lairra de vous faire encore ceste demande & difficulté, pour donner tousiours couleur à son refus, & tirer l'affaire en long le plus qu'il pourra, tout aussi bien comme il importune le Pape, & le fait importuner par les Espagnols d'enuoyer vers le Roy pour faire alterer ledit accord; iacoit que ledit accord ait esté prononcé par le Pape, & que par le dernier article, pour plus grande assurance l'execution & accomplissement du traitté en tous les poincts & articles y contenus, sa Maiesté & ledit Duc de Sauoye supplioient sa Sainteté, que comme par ses bonnes & paternelles exhortations. ils sont entrez en ceste voye d'accord, il luy plaise aussi es occasions qui se pourront presenter, interposer son autorité pour l'entiere & reelle execution des choses promises de part & d'autre, ainsi qu'il est contenu audit traitté.

Monsieur de Sillery s'est porté diuinement bien enuers le Pape & Monsieur le Cardinal Aldobrandin, pour empescher qu'il ne fust par sa Sainteté enuoyé ny escrit au Roy pour teleffect, & s'est surmonté soy-mesme; mais le bon-heur ne l'a point accompagné. Ce qui sera, comme i'espere, réparé par delà par la prudence, generosité, constance, & fermeté du

X Y Y

Roy & de Messieurs de son Conseil, qui sçavez vous garder de recevoir par là aucun dommage au patrimoine de la Couronne, ny en la reputation du Roy & de la France, & possible pourrez vous tirer encore quelque profit de cette Ambassade que Monsieur de Sauoye & Messieurs les Espagnols vous font faire, duquel profit Monsieur de Sillery & moy auons aduisé ensemble, auquel aussi ie me remets de le vous escrire. Ie suis tout assureé qu'il ne manquera au Roy ny à vous aucune sage, magnanime, & respectueuse responce enuers le Pape, mais ie ne lairay de vous proposer s'il vous sembleroit bien employé, que quand le Patriarche auroit dit au Roy tout ce qu'il auroit voulu, sa Maiesté apres l'auoir attentiuement & benignement escouté, & auant que luy faire aucune responce, le priaist de lire le proëme & le susdit dernier article de l'accord, lequel accord sa Maiesté pourroit alors tenir à poste pres de soy, traduit en langue Italienne, & le luy bailler à lire, & qu'apres que ledit Patriarche auroit leu ledit proëme, & ledit dernier article de l'accord, sa Maiesté luy dist; Monsieur le Patriarche, vous pouuez auoir cogneu par cy-deuant en toutes mes actions & procedures, en quelle recommandation & reuerence i'ay nostre saint Pere le Pape, & la gratitude que ie luy rends de tant de graces que i'ay receuës de luy; aussi pouuez vous auoir cogneu l'estime que ie fais de vostre personne, & la bonne affection que ie vous porte: par ainsi si les propos que vous venez de me dire de la part de sa Sainteté, sont conformes à ce que vous venez de lire, & à ce qu'elle a procuré par vostre moyen & entremise, ie suis tout prest de faire ce que vous venez de me proposer; mais si ce que vous venez de me dire est tout le contraire de ce que vous venez de lire, & de ce que sa Sainteté & vous-mesme auez procuré, ie prie le Pape & vous-mesme de m'en excuser. Et quand le Roy apres ces mots aura laissé bien rougir le Patriarche, comme il ne s'en sçauoit garder, recognoissans combien est messeant au Pape de faire porter telle parole au Roy, & à luy Patriarche de la porter: sa Maiesté pourra entrer en autres propos courtois & gracieux, pour ne laisser ledit Patriarche en confusion, & pour luy aider à se remettre de sa honte. Et si sa Maiesté vouloit puis apres entrer en autres excuses plus longues, ceste-cy seroit bien alleguee apres la precedente: que Monsieur de Sauoye a promis d'opter & effectuer l'un ou l'autre des deux partis dans le premier iour de Iuin, sans en retrancher, diminuer, ou alterer aucune chose, ny vser d'aucune longueur, ou difficulté fondee sur quelque couleur ou pretexte que ce soit; Que outre que sa Maiesté ne peut pour son honneur & reputation, & pour la protection qu'il doit à la Couronne, rabatre rien des conditions accordees, comme se pourra-t'elle assurer plus des promesses que le Duc de Sauoye luy feroit? & le Pape qui a cét exemple deuant les yeux, comment se peut-il assurer de rien que ledit Duc luy dise? Et de fait, à present que ie suis retourné en moy-mesme, apres m'estre égaré sur des responses que l'on sçaura trop mieux faire par delà, ie vous dis à bon escient, qu'apres tant de caresses & mocqueries manifestes, vous ne le deuez croire de rien, par la bouche de quiconque il parle. Il ne fait point de conscience de mentir au Pape non plus qu'à vous, & pourueu qu'il gaigne temps tout luy est vn. Quand vous luy auriez rabattu ce qu'il auroit vne

Fois demandé, il ne lairroit de demander puis apres que vous luy rabat-  
tissiez encore d'autres choses. Aussi ne penſay-je pas que ce ſoit de la di-  
gnité du Roy d'entrer en iuſtification avec les gens de Monsieur de Sauoye,  
touchant les friuoles qu'il fait dire par eux à ſa Maieſté. Le Duc de Sauoye  
ſçait bien qu'il n'eſtoit en aucun danger à Paris lors qu'il fit l'accord. Il  
ſçait bien auſſi que le Roy ne veut faire la guerre au Roy d'Eſpagne, dont il  
luy déplaiſt, il ſçait pareillement que c'eſt le ſieur de Morfontaine qui a fait  
la pretenduë harangue aux Suiſſes, & que ceſte harangue ne fut iamais faite  
du regne de ce Roy. Et quand il dit toutes ces choses, il ſçait bien qu'il dit  
faux, & pourtant elles n'ont point beſoin d'aucune refutation enuers luy  
comme ſ'il ſ'y eſtoit trompé, mais bien de riſee, ou pluſtoſt d'indignation,  
ains de la verge de fer. Tant que les choses ſe diſputerōt par paroles, il ſera  
touſiours ſuperieur à vous en inuention, en pretextes, en deguiſements, &  
en toutes ſortes de malices, & vous n'aduancerez rien; mais quand les cho-  
ſes ſe debattront par vertu, prouëſſe, force, & moyens, il ſ'y trouuera  
auſſi court & ſouffreteux comme il eſt abondant au reſte. Il vous couche de  
toutes les forces Eſpagnoles, iuſques à faire dire que le Roy d'Eſpagne veut  
venir en perſonne en Italie, choſe du tout eſloigee de ſa penſee, & de ſon  
naturel & diſpoſition. Il ſe fait tant de leuees à Milan & à Naples, & de tout  
rien, ou fort peu. Les Eſpagnoles à la verité aymeront mieux le Marquiſat  
de Saluſſes entre les mains du Duc de Sauoye que du Roy: mais au reſte ils  
ſont & plus larges & moins iniuſtes que luy; & comme qui leur feroit la  
guerre, ils taſcheroient à ſe deffendre & à bien rendre, auſſi auant qu'entrer  
en vne guerre ſi iniuſte pour ſeruir au caprice du Duc de Sauoye, ils y pen-  
ſeront cent & cent fois. Auſſi ont-ils aſſez de beſongne taillee ailleurs, &  
n'ont pas plus d'argent ny de forces qu'il leur en faut. La peſte leur a partie  
dissipé, partie conſommé celles qui deuoient venir avec le Comte de Fuen-  
tes, le Prince Maurice leur ſubiet leur a taillé en pieces les vieilles bandes  
Eſpagnoles qui eſtoient és Pays bas. Cependant le Duc de Sauoye qui ſçait  
bien qu'ils ne veulent point de guerre avec le Roy, leur a fait dire long-  
temps y a, que pour luy conſeruer le Marquiſat il n'eſt point beſoin qu'ils  
entrent en guerre, & que c'eſt aſſez qu'ils facent contenance d'y vouloir en-  
trer ſi on l'attaque luy. En ſomme tout ſon cas n'eſt qu'artifices & fraudes,  
qui ſe diſſiperont quand ſe viendra au fait & au prendre. Je ne me tiendrois  
pas, ie ne diray pour bon Eccleſiaſtique, mais pour bon Chreſtien, ſi ie  
n'aymois la paix; mais pluſtoſt que cette honte & infamie demeurast au Roy  
& en la reputation du Roy & de la Couronne de France, i'aimerois mieux  
perdre tout ce que i'ay en ce monde, & cent vies apres ſi ie les auois. Mais  
iem'eſgare vne autrefois transporté de trop de zele, auquel vous pardon-  
nerez ſ'il vous plaiſt. Pour retourner à moy meſme & à la reſponſe de vos  
lettres, i'eſtime que nous deuions diſſerer la demande de l'Indult des Eueſ-  
chez de Mets, Toul, & Verdun, iuſques à ce que nous ayons publié le  
Concile, avec laquelle occaſion i'eſpere que nous l'emporterons.

Je vous remercie bien humblement de ce que vous me vouliez faire de-  
peſcher les lettres patentes de main-leuee des fruits del'Eueſché de Ba-  
yeux & autres qui me ſont neceſſaires pour ce regard, & recognois en cela  
voſtre bonté & conſtance à me bien faire, comme ie deſire auſſi m'en ren-

A MONSIEUR DE VILLEROY.

CCXXVIII.

**M**ONSIEUR, Le seiziesme de ce mois me furent rendûes les lettres du Roy & vostres du 25. Iuillet, par lesquelles i'ay veu comme vous auiez eu de diuers endroits le mesme aduis que ie vous donnay par mes lettres du huiſtiesme Iuillet. Ce qui nous doit d'autant plus faire tenir sur nos gardes, & tascher d'autant plus courageusement à r'auoir le nostre au plustost, pour oster à cét homme l'esperance de profiter de sa meschanceté, & pour le mettre en tel estat qu'il ne puisse & n'ose plus attenter rien contre nous, comme il estoit auant qu'il nous eust rany le Marquisat, qui luy seruoit & seruira, quand nous l'aurons, d'un frein non moins necessaire à son variable & precipiteux naturel, que profitable à la France. C'est pourquoy ie serois d'aduis que puis que des deux parties de l'accord fait à Paris, il a choisi la restitution dudit Marquisat, comme i'ay veu par vos lettres à Monsieur de Sillery du trentiesme de Iuillet, vous ne condescendiez oncques plus à aucune variation qu'il pourroit vouloir faire, & vous souueniez que nous pourrions vn iour auoir encore plus grand besoin dudit frein qu'à present, si d'auenture le Roy d'Espagne & l'Infante venoient à mourir sans enfans. La ville de Salusses n'est qu'à vne petite iournee de Thurin, & Carmaignolle n'est qu'à vne petite demie iournee, & tout le Marquisat est cōme vne citadelle pour les François sur tout l'Italie, & particulièrement sur le Piémōt. C'est pourquoy puis qu'il le veut tout retenir, & que les Espagnols le nous enuient, nous deuons d'autant plus le recouurer, puis qu'il est nostre, & que ledit Duc a choisi ce party; & n'y a autre moyen de le contenir en son deuoir, & le garder luy & les siens de faire quelque autre escapade à l'aduenir semblable à celle qu'il a faite depuis douze ans.

Je demanderay au Pape le gratis de l'expedition de l'Abbaye de Preaux pour le fils de Monsieur de Chasteau neuf vostre beau-frere, & ay bonne esperance de l'emporter, & de vous en rendre compte en bref. Madame sœur du Roy m'a escrit ces iours passez deux lettres sur le voyage de Monsieur son mary par deçà; i'enuoye au sieur de Marinuille à Floréce ma response, & l'ay laissée à cachet volant, afin qu'il la vist, & la fist voir s'il luy sembloit à Monsieur le Duc de Bar, & puis la fist tenir si bon leur sembloit, & à toutes aduantures i'ay estimé vous en deuoir enuoyer vn duplicata, que i'ay aussi laissé à cachet volant, pour le sousmettre à vostre iugement, & me remettre en vous de l'enuoyer quand vous ferez quelque depesche à madame Daine, ou de ne l'enuoyer point,

Je vous remercie bien humblement de ce qu'il vous a plu me faire de pescher l'acte de serment presté au Roy en mon nom pour l'Euesché de Bayeux, & les lettres d'attache & de main-leuee, & la dispense sur le Vicariat pour Monsieur le President Ruellé. Atant, &c. Monsieur, &c. De Rome ce 14. Aoust milsix cens.

## A MONSIEVR DE VILLEROY.

## CCXXIX.

**M**ONSIEVR, Le deuoir auquel le Roy s'est mis depuis peu de Miours d'auoir raison par les armes du tort que le Duc de Sauoye tient à sa Maiesté & à la Couronne, & des mocqueries dont ledit Duc a vsé si longuement à l'endroit de sadite Maiesté, a releué par deçà la reputation de sadite Maiesté, que sa longue patience auoit aucunement abaissée, & mesme que chacun s'attend comme le Roy a monstré sa longanimité en son desir de conseruer la paix, ayant mis si tard la main à l'espee, aussi monstrera-il cy apres sa constance & perseuerance, ne s'arrestant qu'il n'aye entierement recourré le sié, & fait encore payer audit Duc la peine de son audace & temerité, pour seruir d'exemple à l'aduenir à tels entrepreneurs de ne se prendre à la France, & moins se mocquer d'un si grand Roy. Que si sa Maiesté preste l'oreille aux propos qu'on luy fera tenir d'accord & d'accommodement, chacun croit que ce sera sans aucune suspension ne retardement des armes prises, & sans plus perdre le temps ny les occasions de faire progrez sur l'ennemy; Qu'en traittant, le Roy ne consentira plus que la restitution dudit Marquisat soit chargée de compromis, ny d'autres telles restitutions, ains qu'elle sera faite purement & simplement pour estre tenu ledit Marquisat par sa M. & par les Rois ses successeurs en la façon que le tenoit, iouyssoit & possédoit le feu Roy Henry troisiésme & la Couronne de France, lors que ledit Duc l'vsurpa en pleine paix; Qu'en l'accord qui se fera, que toutes choses qui auront à se faire y seront spécifiées particulièrement & par le menu, comme que la restitution commencera par la ville de Carmagnole, & en tel iour, pour euter aux sophisteries & caillations dont on a veulu vser sur l'interpretation de l'accord fait à Paris au mois de Feurier dernier; Que sa Maiesté & ceux qui seront par elle employez au traité, se souuiendront en accordant des condicions, combien la France s'est mal trouuée d'auoir rendu par la paix de 1559. tous les estats de la maison de Sauoye que le feu Roy Henry second tenoit, & combien mal & ingratement ce Duc en a vsé, & que ses enfans & posterité en pourroient encore vser pirement descendans d'une mere Espagnole, là où ce Duc descendoit d'une Françoisé qui le deuoit aucunement retenir. Et sur tout s'asseuré chacun, que quoy qu'il soit accordé & promis, le Roy ne croira plus à aucune parole, ny à aucun escrit dudit Duc, ny d'aucun autre Prince qui

promette des faits dudit Duc: mais se fera sa Maieſté reſtituer le ſien aſſuellement & de fait deuant que poſer les armes, ny en ſupendre ny interrompre l'exercice.

Vn ſeul ſcrupule reſte à quelques-vns, qui craignent que le Roy ne ſe laiſſe aller pour la reuerence du Pape qui luy a enuoyé le Patriarche de Conſtantinople, & pourra encores enuoyer vn Cardinal Legat. Mais on ſ'aſſeure que pour cela le Roy ne lairra de tenir bon, d'autant que ce que le Pape en fait, eſt par l'importunité des Sauoyards & Eſpagnols, deſquels il ne ſe peut bonnement deſſendre quand ils le requierent de ſ'employer pour la paix, & meſme d'autant qu'en donnant ceſte ſatisfaction aux autres, il n'entend obliger le Roy à rien, ny empêcher qu'il ne reſponde ce qu'il eſtimera eſtre pour le bien de la Couronne, & pour ſon honneur & reputation: & Mōſieur le Cardinal Aldobrandin me l'a ainſi dit & aſſeuré pluſieurs fois, iaçoit que depuis il nous a monſtré luy-meſme qu'il fauoriſe à Sauoye, & voudroit la garantir de tout malheur ſ'il pouoit.

Mais quand ſa Saincteté l'entendrait autrement, ſe departant de la iuſtice & du deuoir du pere commun, le Roy ne ſeroit tenu de luy complaire au préiudice de ſa reputation, & à la diminution de la Couronne; ains auroit occaſion de ſe roidir d'autant plus, & meſme d'autant qu'ayant bien fait ſes affaires, & ayant monſtré ſa valeur & brauerie, & ſa puiffance de plus en plus, il fera touſiours bien ſa paix avec ſa Saincteté, & en fera plus eſtimé d'elle meſme, & de tous autres.

Voila doncques la commune opinion, & le deſir cōmun des gens de bien non intereſſez ny paſſionnez. Au demeurant, ie vous mettray icy quelques propos qui m'ont eſté tenus premièrement par Mōſieur le Cardinal Baroniō, & puis par Mōſieur le Cardinal Aldobrandin ſur ce mouuement & commencement de guerre, & de la part de noſtre ſainct Pere, Dimanche au ſoir 27. de ce mois, à vne heure de nuit, Mōſieur le Cardinal Baroniō m'e-uoya prier de l'attendre en mon logis le lendemain au matin, pource qu'il auoit à me parler, & eſtant venu le lendemain au matin me dit que le Pape eſtoit merueilleuſement affligé de ceſte nouuelle guerre, & vouloit faire ce qu'il pourroit pour la faire ceſſer, & auoit reſolu d'enuoyer ſur les lieux vn Card. Legat de ſes creatures qui fuſt propre pour manier vn-tel affaire, & non ſuſpect à aucune des parties; & pour cela ſa Saincteté luy auoit commandé de venir conſerer avec moy ſur les ſubiccts qui ſeroient plus à propos; Qu'il auoit de luy-meſme propoſé à ſa Saincteté Mōſieur le Cardinal Viſconti, lequel il cognoiſſoit dès ſa ieuneſſe, & l'auoit comme eſſeué; Qu'il n'y auoit rien à redire en luy ſinon qu'il eſtoit nay Milanois, mais cela eſtoit aucunement recompensé par le peu de fiance que les Eſpagnols auoient touſiours mōſtré d'auoir en luy; Que ſi ceſtuy-cy ne nous plaiſoit, il y auoit le Cardinal Borghèſe, & le Cardinal Arrigone. Quant au Cardinal Antoniano, ſa Saincteté ne ſ'en pouoit paſſer, à cauſe des briefs en quoy ſa Saincteté ſ'en fert. Quant à ſes nepueux, ſa Saincteté craignoit que ceſte legation ne ſeroit point de grand fruit, & qu'il y iroit plus de ſa dignité ſ'il vn de ſes nepueux ſ'en eſtoit retourné ſans rien faire. Me prioit ledit ſeigneur Cardinal Baroniō de tenir cecy ſecret, & ne le communiquer à perſonne ſinon qu'à Mōſieur l'Ambaſſadeur, afin d'en aduiſer enſemble aux obſeqes de

Monsieur le Cardinal Deze Espagnol, qui estoit decedé le jour auparauant. Je respondis audit seigneur Cardinal Baronio sur le champ ce que i'estimay de la reuerence que ie deuois à sa Saincteté, & à la personne dudit seigneur Cardinal, & que i'en irois traicter tout incontinent avec Monsieur l'Ambassadeur, & luy rendrois la response là où il m'auoit dit, puis qu'il l'aimoit mieux receuoir là que chez luy, où ie m'offrois de la luy porter. Incontinent que ledit seigneur Cardinal fut party de chez moy, ie m'en allay trouuer Monsieur de Sillery, & luy ayant exposé ce que Monsieur le Cardinal Baronio m'auoit dit, nous arrestasmes ensemble la response qu'il nous falloit faire, laquelle fut en somme, que nous remercions tres-humblement le Pape de l'honneur qu'il luy plaisoit nous faire de nous communiquer ce sien dessein. Que nous le supplions tres-humblement de n'enuoyer pour ceste heure aucun Legat, pour les raisons qui auoient esté representees à sa Saincteté lors qu'elle parla d'enuoyer Monsieur le Patriarche au Roy à ceste derniere fois, & pource que les choses estans encore si creuës, le Legat quel qu'il fust, ne feroit rien; Que si sa Saincteté estoit neantmoins resoluë d'en enuoyer vn contre nostre tres-humble priere & remonstrâce, il nous sembloit que Monsieur le Cardinal Borghese feroit le plus à propos de tous ceux qui nous auoient esté nommez; Que Monsieur le Cardinal Visconte estoit vrayement tel qui nous auoit esté décrit, & nous n'auons rien à dire de luy que tout bien, mais luy estant Milanois, & subiet du Roy d'Espagne, il nous seroit malaisé & impossible de persuader au Conseil du Roy & aux autres Frâçois ce que nous en sçaurions. Je fis ceste response audit seigneur Cardinal Baronio, qui monstra s'en contenter, & l'alla porter au Pape le soir mesme.

Au mesme lieu où se faisoient les obseques du Cardinal Espagnol, & où ie fis ladite response à Monsieur le Cardinal Baronio, Monsieur le Cardinal Aldobrandin me fit dire qu'il me voudroit parler chez le seigneur Iean Frâçois Aldobrandin, où il s'en iroit en partant de là. Je le dis à Monsieur le Cardinal Baronio, qui me dit qu'il croyoit que ledit seigneur Cardinal Aldobrandin me vouloit parler de cela mesme; toutesfois que ie ne luy disse rien de ce qu'il m'auoit dit, ce que ie luy promis, & le luy ay tenu, ne sçachât neantmoins pourquoy il ne vouloit que Monsieur le Cardinal Aldobrandin sçeust qu'il m'auoit parlé. Quand ie fus arriué chez ledit seigneur Iean Frâçois, Monsieur le Cardinal Aldobrandin me dist l'affliction que le Pape receuoit de ceste nouvelle guerre, & le desir & resolutiõ que sa Saincteté auoit prise de faire tout ce qui luy seroit possible pour faire que la chose n'allast plus auant; Que sa Saincteté me coniueroit de luy dire ce que ie penserois s'y pouuoir faire. Je luy dis avec quelques paroles de ciuilité qu'auant que le Roy eust pris les armes, il estoit aisé d'y obuier par Mõsieur de Sauoye en tenant & executant l'accord qu'il auoit fait: mais maintenant que sa Maiesté auoit esté tiree à la guerre par force, pour la conseruation de sa reputatiõ, & pour la protection qu'il doit à sa Couronne, ie ne voyois point aucun prõpt remede, & ne pensois pas que Monsieur de Sauoye püst iamais auoir la paix aux mesmes cõditions, comme aussi il n'estoit pas raisonnable; Que le meilleur que ie visse pour sa Saincteté, c'estoit de laisser couler ces deux ou trois mois prochains, & quand l'hyuer seroit venu, qui arriueroit en Sauoye plus tost que par deçà, sa Saincteté pourroit faire traicter d'accord si bon luy sé,



bloit, d'autant qu'entre cy & là les parties auroient ietté vne grãde partie de leur colere, & de l'ardeur qu'ils auoient en leurs cœurs, & les grands fraiz & autres mauuais temps qui suruiendroient, amenderoient les factions de la guerre, & pourroient donner lieu aux propos & ouuertures de la paix. Ouy, mais, dit-il, le Pape craint qu'en ces deux ou trois mois il ne se face trop de maux, lesquels il voudroit empescher & preuenir; & entr'autres que les Espagnols se messas en cecy pour la deffense du Duc de Sauoye, la paix ne vint à se rompre entre les deux Roys. Je luy repliquay, quoy qu'on sceust faire que ie ne pensois pas que le Roy fust pour accorder aueune suspension d'armes qu'il n'eust le sien, & que sa Maieité vouloit garder la paix avec les Espagnols & avec tous, mais si les Espagnols d'eux-mesmes se mettoient de la partie espousans vne cause iniuste, sa Maieité rendroit guerre pour guerre à qui la luy feroit. Ledit seigneur Cardinal dist là dessus, que le Roy par la prise des armes auoit satisfait à ce qui estoit de son hõneur & reputation, & qu'il pourroit desormais prester l'oreille à quelque bon accord, & cependant faire suspension d'armes. Je luy respondis, que si sa Maieité ne continuoit la guerre, & laissoit mettre de nouveau ceste affaire en negociation, non seulement il n'auroit point satisfait à sa reputation, mais il la perdrait du tout, & auroit bien mieux vallu pour sa Maieité qu'elle eust portee patiemment les iniures & les moqueries de Monsieur de Sauoye, que de commencer à s'en ressentir par les armes, & puis les poser là tout à coup à la façon des enfans. Sur cela arriua Monsieur de Sillery qui auoit demandé à parler audit seigneur Cardinal, & auoit aussi eu assignation au logis dudit seigneur Iean François; & apres qu'il eust dit audit seigneur Cardinal Aldobrandin ce pourquoy il estoit venu, & eu la response, ie luy dis le propos sur lequel Monsieur Cardinal & moy estions quand il estoit arriué; & il fit bon tout ce que i'auois respoñdu, & m'aida à soustenir que nostre saint Pere m'auoit assez fait d'auoir enuoyé Monsieur le Patriarche de Costantinople, & qu'il n'y deuoit faire autre chose pour ceste heure, & qu'aussi biẽ quicõque y feroit enuoyé n'y feroit rien. Ce nonobstant ledit seigneur Cardinal demeura ferme, que le Pape y deuoit enuoyer de nouveau, & y faire toute autre chose qui luy seroit possible, quand ce ne seroit que pour sa iustification, & pour oster au monde l'occasion de l'accuser qu'il voyoit allumer vn grand feu de guerre en la Chrestienté, & neantmoins ne s'en remuoit point, & ne monstroit point s'en soucier: Et ainsi nous nous departismes pour ce soir là dudit iour Lundy 28. de ce mois.

Le lendemain au matin ledit Seigneur Cardinal Aldobrandin m'enuoya vn de ses gentils-hommes me dire qu'il auoit à me parler de la part de sa Sainteté, & seroit venu, mais qu'il tenoit la consulte, qu'on appelle & desiroit scauoir si ce seroit ma commodité qu'il vinst l'apresdinee. Je respondis audit gentil homme que j'allois faire mettre mon carrosse en ordre, & irois trouuer ledit seigneur Cardinal incontinent, & le fis ainsi: le trouuay qu'il estoit sorty de ladite consulte, & allé chez le Pape, d'où estant reueu, apres certaines excuses il me dit que n'ayant pu acheuer avec moy le soir auparavant, le Pape auoit voulu qu'il acheuast. Et apres m'auoir dit de nouveau la peine où sa Sainteté estoit pour ces commencemens de guerre, il me demanda qu'il me sembleroit que sa Sainteté deust enuoyer sur les lieux. Je

tournay

ournay à luy dire qu'il ne sembloit qu'il n'y falloit enuoyer personne pour ceste heure, & au reste si sa Sainteté estoit resoluë d'y enuoyer, elle connoissoit trop mieux, & luy aussi, celuy qui seroit le plus propre ou le moins importun; car qui que ce fust ne feroit rien pour ceste heure. Il me dist que possible si feroit, & entout euenement le Pape aura fait son deuoir, & monstre au monde le soing qu'il auoit de conseruer la paix, & de preuenir infinis maux qui estoient pour aduenir de la guerre, & que nous ne laissons de voir quels Cardinaux seroient les plus à propos; & sur cela il se leua pour prendre vne liste imprimée de tous les Cardinaux, & commença à lire les creatures de ce Pape l'un apres l'autre, & me demanda mon aduis sur chacun. Je luy dis bien de tous, m'arrestant principalement sur Borghese, tant pour garder constance en ce qui auoit esté fait par le Cardinal Baronio, que pour ce qu'à la verité ie l'estimay le meilleur, toutesfois il m'envoulut destourner; & à cela & à quelques autres choses qui seroient longues à racôter, ie cogneus qu'outre l'affection que nous auôs descouuerte en luy en faueur de Sauoye, il procedoit artificieusement avec moy en ceste action, ce qui m'eseruit pour mieux me tenir sur mes gardes.

Après qu'il m'eut leu tous les noms des creatures de ce Pape, & eu mon aduis sur chacun, il me dit que pour faire vn pas plus auant il me vouloit dire que nostre saint Pere estoit en quelque volonté d'y enuoyer vn de ses nepueux, qui estoit tout le contraire de ce que m'auoit dit Monsieur le Cardinal Baronio, auquel ie crois plustost qu'à luy. Je luy dis que ceste legation n'estoit pas vne charge de nepueu, & que ie serois marry infiniment pour la réuerence & affection que i'auois au sang de sa Sainteté, qu'un de ses nepueux fust pour ceste heure enuoyé en vne commission où ie scauois qu'il ne feroit rien, & que si sa Sainteté ne vouloit superseder d'enuoyer vn Legat, comme toutesfois ie pensois estre le meilleur, qu'elle feroit bien d'y d'espandre le moins qu'elle pourroit, & ne coucher point de tant en vne partie dont ie voyois la perte route certaine. Et apres cette generalité ie descendis au particulier, & luy dis que quant à luy, il estoit trop bien feant & necessaire auprès la personne de sa Sainteté, & que ie m'asseurois que sa Sainteté ne pensoit point à luy pour ce regard, mais que ie serois encores tres-marry que la personne de Monsieur le Cardinal saint George, pour auoir l'honneur d'appartenir à sa Sainteté, fut profanée en vne commission si rigoureuse, dont il ne pourroit sortir à son honneur. Là dessus il me dit, que si le Pape auoit à enuoyer vn de ses nepueux, il l'enuoyeroit luy, & non le Cardinal saint George, & m'en dist quelque cause; adioustant que si sa Sainteté luy commandoit d'aller, il ne pourroit manquer de luy obeyr, mais que ce seroit bien le commandement le plus mal-agreable qu'il pourroit receuoir; car outre ce que ie venois de luy dire, d'aller faire voyage loin de sa Sainteté ne luy tournoit point à compte pour plusieurs respects. Je luy dis alors que pour le zele & deuotio que i'auois à sō seruice, ie ne voudrois pour chose du monde que le Pape ny luy y eussent pensé quant à present: & que s'il auoit à faire quelque legation, il faudroit que ce fust pour chose reüssible, dont il pût r'apporter honneur & réputation, & qu'elle ne le tint absent de Rome que pour peu de iours: Que ceste-cy n'estoit pour reüssir d'un fort long-temps, & ne luy pourroit seruir que pour luy faire perdre vne grande

partie de la grande reputation qu'il s'estoit acquise par le passé en tant de fortes. En fin nous nous separasmes ainsi, en priant l'un l'autre de nous entre excuser, & moy le suppliant de prendre en bonne part ma franchise, qui ne procedoit, apres mon naturel & accoustumance, que de zele que j'auois au service & reputation de sa Sainteté & de luy, suiuant les obligations que ie leur en auois.

Ie ne puis vous représenter le tout, mais ie me partis de luy avec opinion ferme & certaine qu'il meurt d'enuie de ceste legation, poussé des Sauoyards & Espagnols, qui l'ont embarqué en une fausse esperance de mariage d'entre une sienne niepce & le Prince de Sauoye, & qui luy donnent à entendre qu'il viendra incontinent à bout de tout, & que le Roy fera tout ce qu'il voudra. Et d'autant que le Pape n'est pas d'aduis que luy ny son cousin y aillent, comme me dist naïfvement le Cardinal Baronio, il vouloit par mon consentement & aduis, s'il l'eust pu embler ou extorquer de moy, faire trouuer bon à sa Sainteté ce sien dessein, auxquels lesdits Sauoyards & Espagnols gaigneroient, quand bien il auroit perdu son temps : d'autant que le mescontentement que luy & le Pape en receuroient diminueroit la bonne intelligence qui a esté iusques icy entre le Pape & le Roy.

Hier auant le Consistoire ledit seigneur Cardinal Aldobrandin me dist qu'il auoit rapporté à nostre S. Pere la conference que nous auons eue ensemble le iour auparauant, dont sa Sainteté estoit demeuree contente, & s'estoit reserué à y penser, & qu'il croyoit que sa Sainteté parleroit de ces choses au Consistoire, comme elle fist, de la teneur que vous verrez en vn recueil que j'en fis estant de retour en mon logis pendant que j'en auois la memoire fresche, lequel ie vous enuoyeray avec la presente.

Entre autres choses que ie dis à Monsieur le Cardinal Baronio & audit seigneur Cardinal Aldobrandin, ie leur remonstray que le Pape en auoit desia fait assez, & trop, enuoyant Monsieur le Patriarche, & que si sa Sainteté vouloit encores monstret au monde vn plus grand soin, elle pourroit encores faire courir le bruit de vouloir enuoyer vn Legat, mais tirer la chose en long, & ne l'enuoyer iusques à l'hyuer qu'il y auroit esperance de faire quelque chose. Ie ne sçay si ceste harangue & proposition du Pape tendroit à cela, comme elle y est bien disposée & s'y peut fort bien adapter; nous verrons ce qui en succedera, & vous serez aduertis de tout. Cependant puis que vous avez commencé la guerre faites là à bon escient, & employez bien ce peu de temps qui vous reste entre-cy & l'hyuer, & vous assurez que si vous faites bien vos affaires vous en serez estimez, & louiez de ceux là mesmes qui vous voudront retarder, & que selon que les affaires du Roy iront en France & près de sa personne, ainsi iront ils à Rome en tout temps, & en Espagne mesme. De façon qu'apres Dieu le fondement de la reputation & de la prosperité des affaires du Roy aux nations estrangeres, est & sera toujours en sa prudence & valeur, & en la bonne conduite de ses affaires auprès de sa personne & en tous ses Estats tant en temps de paix que de guerre. A tant, &c. Monsieur, &c. De Rome, ce dernier d'Aoust 1600.

## A MONSIEVR DE VILLEROY.

CCXXX.

**M**ONSIEVR, Valerio arriua en ceste ville le quatriesme de ce mois & me redit vostre lettre du treiziesme Aoust, avec vne du Roy du douziesme. Par le commencement de vostre dite lettre il vous a pleu m'advertir comme vous estiez aux prises avec Monsieur de Sauoye; ce que nous auions entendu d'ailleurs auant que ledit Valerio arriuaist, & ie vous en escriuis mō aduis & ce qui s'en disoit icy par vne lettre que ie vous fis par l'ordinaire de Lyon le dernier d'Aoust: les deux premieres pages de laquelle j'emploieray pour response à ce que vous m'en escriuiez, & pour tout l'aduis que ie pourrois vous donner cy apres là dessus. Et en suite de ce que ie loue grandement la response que vous auez faite à Monsieur le Patriarche de Constantinople, & vous prie de continuer, & ne rien faire pour le respect de qui que ce soit, sinon ce que vous iugerez estre pour la seureté des affaires & service du Roy, pour le bien & grandeur de la Couronne, & pour la reputation de sa Maiesté & du nom François. Gardez vous bien de remettre iamais rien à decider par deçà touchant cét affaire ny autre qui touche le Duc de Sauoye.

Les Espagnols ne sont point à mon aduis si prests ny si disposez à la guerre comme ils veulent que nous croyons; toutesfois ie suis d'aduis que nous leur fassions ce plaisir de le croire, nō pour en faire rien de moins, mais pour nous preparer mieux en tout euenement en prenant les choses au pis. Nous faisons icy ce que pouuons enuers nostre saint Pere, à ce qu'il empesche entant qu'il pourra qu'ils ne se mettent point de la partie, & par ce moyen ne rendent les choses incapables d'accomodement. Et ie croy que sa Sainteté y fait tout ce qu'elle peut pour le bien de la paix, & preuoyant bien que cela rendroit plus difficile nostre accord avec Monsieur de Sauoye mesme, duquel elle monstre auoir grande compassion. Quoy que lesdits Espagnols se proposent de faire, ie croy qu'ils ne feront pas grand'chose auant l'hyuer, pendant lequel ils s'esclairciront si les choses seront pour s'accommoder ou nō; & possible aideront ils plus en effect qu'en apparence qu'elles s'accommodent, & s'accommoderont sans doute à toutes conditions iustes & raisonnables que vous voudrez, pourueu qu'entre-cy & là vous ayez bien fait vos affaires, & pris deux ou trois fois autant comme vaut le Marquisat de Salusses; & c'est le vray & le seul moyen de mettre le Pape hors de peine, & Monsieur de Sauoye & ses adherens au chemin de bien faire, & en repos de ce coste là.

Nous entendons icy que ledit Duc de Sauoye vous demande pour ostages entre autres Monsieur le Marechal de Biron: à quoy il monstre qu'il n'a pas encores perdu l'enuie de continuer à se moquer du Roy & de son Conseil. Il seroit beau voir luy bailler l'espee & les armes dont on le bat, & par

Z z z

ce moyen l'enhardir & encourager à nouuelles perfidies , & luy mettre en main ceux qui l'ont le plus offensé , & de qui il se craint le plus. Pour vous les rendre empoisonnez, & avec la mort au corps, comme il seroit sans doute, tant il est impie & temeraire. Quant au temps & lieu des nopces, vous aurez veu bien tost après que vous eustes escrit vostre dite lettre, comme la difficulté que vous faisiez sur le voyage de Monsieur le Cardinal Aldobrandin fut ostée de fort bonne façon, & en aurez esté en repos d'esprit.

Je feray pendant l'absence de Monsieur de Sillery és affaires du Roy tout ce qui me sera possible, comme i'y suis obligé de tout droit diuin, naturel, & humain; mais la presence de Monsieur de Sillery estoit fort nécessaire par deçà, mesmement en temps turbulent. Que s'il a à retourner ie vous prie que ce soit au plustost, sinon, qu'il en soit enuoyé vn autre en sa place, le plustost & le plus habile que faire se pourra. Aussi seroit-il bon de faire venir au moins Monsieur le Cardinal de Loyeuse, lequel est pour apporter icy beaucoup non seulement d'affection & de zele, mais aussi de suffisance, d'autorité, & de reputation aux affaires & seruice du Roy & du Royaume. Vn homme qui n'a point d'ayde ny de conseil, & peut deuenir malade, & mesmement estant aagé, & ayant à faire charge de Protecteur & d'Ambassadeur, & à se trouuer és congregations, & à s'apprester pour y dire son aduis en plusieurs matieres graues, & à respondre à vne infinité de gens qui demandent audience deçà, & qui escriuent de delà.

*il manque  
icy quelque  
chose.*

Quant au voyage de Monsieur Serafin, il est tout prest à le faire, & Monsieur de Sillery & moy à y contribuer tout ce que nous pourrons, mais ceux qui l'ont demandé changent si souuent de resolution, que pour mon regard ie ne les entends point.

Au demeurant depuis la proposition que nostre saint Pere fist en Consistoire le 30. d'Aoust, de laquelle ie vous donnay aduis, il prit les aduis des Cardinaux de chacun à part, les ayant fait appeller les vns apres les autres selon l'ordre de la liste des Cardinaux, & moy appelé aussi à mon tour comme les autres, dis mon aduis de la teneur que vous verrez par la copie que ie vous en enuoyeray : & ce iourd'huy au consistoire que nostre saint Pere a tenu, il a dit, cōme ayant receu les aduis de tous les Cardinaux sur la guerre qui s'estoit meü pour le Marquisat de Salusses, il auoit resolu d'enuoyer vn Cardinal Legat, mais afin que ceste legation se face avec plus grand fruit & reputation du saint Siege, il vouloit preparer le chemin audit Legat, & faciliter sa negociation pour certaines choses qui estoient prealables & necessaires, dont le college des Cardinaux seroit aduertý en temps & lieu. Cela est iustement ce que Monsieur de Sillery & moy voulions, à sçauoir qu'il n'euoyast aucun Legat, ou bien qu'il differast à l'euoyer iusques à l'hyuer, comme ceste dilation pourra aller bien prés delà, pour peu qu'elle dure. Cependant il veut depescher vers Milan le Secretaire Erminio, qui pourra donner iusques à Thurin, & possible encores iusques à vous. Vous trouverez qu'en l'aduis que ie donay au Pape il y a quelques traits bien hardis, adoucís neantmoins par certaines premuniōs pleines de reuerence, laquelle comme ie ne veux ny dois iamais oublier enuers la Sainteté, aussi estant recherché de dire mon aduis, & m'y voyant comme appelé sans m'y estre ingeré de moy mesme, ie n'ay voulu manquer de la hardiess & courage qui

est nécessaire en toutes grandes actions, ny de la fidelité requise en donnant conseil, sur choses mesmement qui importent si fort à sa Sainteté, à la France, & à toute la Chrestienté, & pense deuoir par ce moyen ietté comme vn fondement de toutes les raisons que i'auray à luy alleguer, & de toutes les responses & repliques que i'auray à luy faire cy apres, tant que ceste affaire du Marquisat de Salusses durera.

Le sieur Lelio Biscia Clerico di Camera, a vn sien frere appellé Francesco Biscia aagé de 19. ans, lequel estude en Espagne, & à cause qu'un de leurs freres est decédé ces iours passez, il est r'appellé, & pourra s'en reuenir à Rome dont ils sont natifs. Pource, & pour ce nouueau mouuement de guerre, ledit seigneur Lelio nous a requis Monsieur de Sillery & moy de luy faire auoir vn passe-port pour sondit frere, & pour ses seruiteurs & hardes, dequoy nous luy auions donné bonne esperance, & mesmement moy, avec qui il a plus de familiarité & de plus long-temps. Je vous prie doncques nous enuoyer ledit passe-port à Monsieur de Sillery ou à moy: ie vous assure qu'il n'en sera point abusé, & que c'est vne fort honneste famille

Le sieur Erminio Secrétaire du Pape sous Monsieur le Cardinal Aldobrandin, dont i'ay fait mention cy-dessus, est fort honneste homme, & bien voulu de sa Sainteté & dudit seigneur Cardinal, de façon que pour plusieurs respects l'honneur & la caresse quel'on fera à sa personne seront tres-bien employez. Quant aux choses pour lesquelles il va, ie n'en suis pas autrement aduertty, & en tout euenement ie m'en remets à ce que ie vous ay escrit cy-deuant par ma lettre du dernier d'Aoust, & par ma presente. A tant, &c. Monsieur, &c. De Rome, ce 11. Septembre mil six cens.

## A MONSIEVR DE VILLEROY.

CCXXXI.

**M**ONSIEVR, L'ordinaire de Lyon arriva en ceste ville le 18. de ce mois avec vos lettres du troisieme, esquelles i'ay veu le bon succez que Dieu a donné au Roy, à la tres-iuste guerre en laquelle sa Maiesté a esté contrainte d'entrer pour la conseruation des biens & droicts de sa Couronne, & de l'honneur de la France, & de sa propre reputation; de laquelle prosperité ie louë sa diuine bonté, & la prie de la nous continuer comme i'en ay ferme esperance.

Je ne pense pas que les Espagnols nous fassent grand mal auant l'hiuer, & croy qu'entre-cy & le Printemps, quelque mine qu'ils fassent en public, ils seront bien aises en leur cœur que Monsieur de Sauoye s'accommode, & le luy conseilleront en secret; & quelque opinion que vous ayez par delà du Duc de Lerme, tous les plus clairs-voyans de deçà tiennent avec grand probabilité que la guerre ne fait point pour luy, non plus que pour le Roy son Maistre, & qu'il ne la veut nullement, ny ceux qui ont esté aduancez

Zzz 3

par luy, comme le Vice-Roy de Naples son beau frere, & le Comte melme de Fuentes, lequel outre ceste consideration dudit Duc de Lerme, ne veut perdre la reputation qu'il acquist à Cambray & aux enuiron, ny se gaster & troubler la plus belle charge qu'Espagnol de sa sorte ayt iamais eue en Italie. Mais pour tout cela nous ne deuons laisser de prendre les choses au pis, & de nous preparer en tout euenement.

Quant à l'aduis que vous auez voulu sçauoir de moy, en cas que le Roy d'Espagne se declare ouuertement pour Monsieur de Sauoye, ie vous en fais vne lettre à part, laquelle sera avec la presente que i'ay voulu descharger d'autant. Des propositions & demandes que vous fait Monsieur le Patriarche, ie me remets à ce que ie vous escriuis par ma lettre du dernier Aoust, & encores par celle du 11. de ce mois, & à ce que vous en trouuerez en l'aduis que ie donnay au Pape, dont ie vous ay enuoyé copie avec la dernière des susdites deux lettres, vous priant de le tenir pour dit vne fois pour toutes, quand bien ie ne vous en escriray plus rien cy apres.

Ie vous remercie d'auoir fait voir au Roy ma lettre du 14. d'Aoust, & celle que i'escris à Madame sa sœur, & me suffit qu'en l'une & en l'autre sa Maiesté ait recogneu le zele & deuotion que i'ay à son seruice, & au bien des affaires & de ceux qui luy appartiennent.

Messieurs du Conseil ont fait vne bonne œuvre, d'auoir conserué à Monsieur Perrin Soufdataire de nostre saint Pere son bon droit, & par mesme moyen au Pape son autorité, & ne se pouoit attendre autre chose de leur prudence & iustice; ie vous remercie bien humblement de l'aide que vous y auez contribué. Je prie Dieu, &c. Monsieur, &c. De Rome, ce 22. Septembre. 1600.

## A M O N S I E V R D E V I L L E R O Y .

C C X X X I I .

M O N S I E V R ,

Il vous a plu m'escrire par vostre lettre du troisieme de ce mois, que ie ferois seruice agreable au Roy, de luy escrire mon aduis de ce qu'il deuoit faire, si le Roy d'Espagne prend le party du Duc de Sauoye ouuertement; ie vous feray ceste lettre à part de ce que i'en pense: mais si ie fais quelque incongruité en chose qui n'est point de ma profession, vous en serez aucunement cause, & en ma personne vous deurez excuser vous mesmes. Ie serois doncques d'auis, quoy que les Espagnols se deliberent de faire, que vous ne deuez estre les premiers à les assaillir, ains attendre & voir ce qu'ils feront, & cependant pour suiure fort & ferme la guerre de Sauoye, sans distraire ailleurs les forces, sinon autant qu'il en faudra pour la preservation & seurété des frontieres.

Et quant à ce que lesdits Espagnols font pour faire s'ils entrent en ceste guerre, nous pouuons dire de deux choses l'une ; à sçauoir que ou ils se contenteront d'ayder au Duc de Sauoye, & de mesler leurs forces avec les siennes sans assaillir aucunement la France, ou bien ils adiouteront encore l'offensue de la France à la deffensue de Sauoye.

S'ils se contentent de deffendre Sauoye, comme il est vray semblable qu'ils feront, i'ay pensé qu'il ne faudroit point les assaillir par ailleurs, mais les bien battre ensemble avec les Sauoyards, & employer d'autant plus de forces & moyens en ceste guerre de Sauoye, puisque nous aurons à faire non seulement contre le Duc de Sauoye, mais aussi contre le Roy d'Espagne. De ce mien aduis ie pense auoir plusieurs raisons, desquelles la premiere est.

Qu'il sera plus iuste enuers Dieu & tous les hommes du monde d'en vser ainsi, d'autant que Dieu & le monde verront que nous ne ferons que nous deffendre des Espagnols, que ce seront les Espagnols qui seront venus contre les François, & non les François contre les Espagnols, & que le violement & rupture de la paix viendra d'eux & non de nous, dequoy la renommee importera beaucoup enuers tous les Princes, Potentats, & peuples Chrestiens.

La seconde raison est, qu'il sera plus vtile au Roy & à son Royaume, & se fera plus grand progrez, & avec moins de despence & de desordre, & moins de foule des subiets de sa Maiesté, quand toutes les forces du Royaume seront employees en vn seul endroit, & conduites toutes par sa Maiesté, que si elles estoient distraittes çà & là, & commandees par diuers chefs. Estant au reste la France aujourd'huy si aguerrie, que si les François n'ont affaire qu'en vn seul lieu, ils se deffendront, & conserueront ce qu'ils ont ia acquis & acqueront cy-apres sur le Duc de Sauoye, non seulement contre les Sauoyards & Espagnols, mais aussi contre toute la Chrestienté ensemble.

La troisieme raison est, que le Duc de Sauoye qui seul est cause de la guerre, & du remuement mesme des Espagnols, sera par ce moyen mieux puny, la guerre se faisant toute sur le sien, & luy ayant sur les bras non seulement les François, mais aussi les Espagnols qui ne luy peseront gueres moins.

La quatriesme raison est, que par ce moyen les deux Rois s'aigriront moins l'un contre l'autre, & la paix à laquelle il faudra venir vn iour, quelque guerre qui se face, s'en fera plus aisément, & nostre S. Pere qui ne cessera iamais de la procurer y trouuera moins de difficulté.

L'odiousteray encores vne cinquieme raison, c'est que quand nous voudrions assaillir les Espagnols, nous ne le pourrions faire vtilement si ce n'estoit en attaquant quelqu'une des Prouinces qui ont esté cedees & transportees par le feu Roy d'Espagne à l'Infante sa fille & à l'Archiduc Albert, auquel cas nous ferions vne chose iniuste, qui seroit reprise de tout le monde, ne faisant pas proprement la guerre au Roy d'Espagne, qui la nous fait, mais aux Archiducs, avec lesquels nous auons paix faite & iuree, & qui sont mesmes cause que nous l'auons avec les Espagnols, & qui dauantage nous recherchent de continuer & perseuerer à la paix, & protestent ne n'adherer.



aucunement à ceste guerre, & qui plus est, sont en estat que nous ne nous ferons point de tort de les en croire.

Car quand bien ils feront la paix avec les Anglois, & encores avec les Hollandois & Zelandois, à quoy il y aura trop à faire, si auront-ils besoin pour vn fort long-temps d'estre bien avec nous, & n'oseront penser qu'à s'establiſſir, & à remédier à infinis maux que la longueur & rigueur des guerres ont apporté au pays & à toutes les parties de l'Eſtat, & en particulier à leur domaine, autorité & droicts, & les peuples meſmes qui n'en peuuent plus, ne penseront qu'à ſe repoſer, & à medicamenter leurs maux, & ne voudroient ouyr parler de nouuelle guerre: outre que ſi la paix ſe faiſt avec les Hollandois & Zelandois, il eſt vray-ſemblable que ce ſera avec condition que les Eſpagnols ſortiront des Pays bas, à quoy pouſſeront autant ou plus les Prouinces qui obeyſſent aux Archiducs, que celles qui ne leur obeyſſent point, & ainſi nous aurons moins à nous craindre de ce coſté-là.

Voilà doncques mon aduis pour ceste heure, en cas que les Eſpagnols ne nous fissent autre guerre que de deffendre le Duc de Sauoye, ſauf à le changer à l'aduenir ſelon les occasions que le temps, & les euenemens de la guerre, & la viciffitude des choſes humaines pourroient apporter.

Que ſi les Eſpagnols nous aſſaillent en quelque endroit de la France, en ce cas, comme il ſeroit neceſſaire de nous deffendre de ce coſté-là, auſſi chacun nous eſtimeroit & loueroit de leur faire tout le pis que nous pourrions & à conuert & à deſcouuert, & de renouueller nos anciennes alliances, & de ſuſciter tout le monde contr'eux & les pourſuiure à outrance.

Auquel cas ie ſerois d'aduis que nous fiſſions tout cecy ſans leur faire aucune denonciation de guerre par parole ny par eſcrit, au cōtraire de ce que nous fiſſies la dernière fois; d'autant que telle denonciation ne ſeruiroit que de les engager d'auantage à pourſuiure, & de leur oſter le moyen de ſe retirer avec moins de honte, & de rendre l'accord plus difficile, & cependant de vexer & tourmenter par mer & par terre les ſubiects de l'une & l'autre Couronne, ſans qu'il en reuint aucun profit au Roy ny au public.

En ſomme, comme nous ſommes entrez en ceste guerre par neceſſité, & Dieu & le monde ſçait qu'elle eſt iuſte de noſtre coſté, & perſonne ne nous peut imputer les maux qui en aduiendront, auſſi la depons nous continuer avec la meſme iuſtice & deſcharge de noſtre conſciencé & de noſtre honneur, monſtrant par eſſect ce que le Roy a dit par ſa declaration, que nous n'en voulons point aux Eſpagnols, ny à perſonne qu'à celui qui nous tient le noſtre & s'eſt encore mocqué de nous. Que ſi les Eſpagnols d'eux meſmes ſe mettent de la partie eſpouſans vne cauſe iniuſte contre la paix qu'ils ont avec nous, il faut en l'un & en l'autre des deux cas deſſusdits les recueillir & battre, de façon que le profit de la conquiſte, & l'honneur d'auoir gardé la paix nous demeure, & à eux le dommage des choſes perduës & l'infamie d'auoir fauſſé leur foy & violé la paix.

Cependant en l'incertitude où ils nous tiennent de ce qu'ils veulent faire comme nous ne les deuons point aſſaillir, auſſi deuons nous prendre les choſes au pis & nous preparer en tout euenement ſ'ils nous aſſailloient, & tenir bien munies & biē garnies les places de frontières de tous les coſtez &

Endroits du Royaume, principalement là où le besoin en pourroit estre plus grand, comme en Prouence où i'estime que tant pour cecy, que pour plusieurs autres respects en paix & en guerre, il faudroit entr'autres choses solliciter & diligenter la construction des galeres dont on a parlé & escrit tant de fois, lesquelles ne seront iamais si tost faites comme la seureté, commodité, autorité, & reputation de la France le requierent; à faute desquelles vous voyez comme auiond'huy en ceste occasion du passage de la Royné il vous en faut mendier d'vnes & d'autres. Et encore auec tout cela estes-vous en danger de receuoir quelque grand affront en ce voyage; dequoy Dieu nous garde. Cependant ie ne seray à mon aise que ie n'entende que la Royné soit arriuee à Marseille.

Il nous faut doncques, dis-je, tenir sur nos gardes, afin que la commodité & presentant aux Espagnols de surprendre quelque place d'importance sur nous, ne les portast à vne rupture manifeste, à laquelle ils ne viendroient pas aisément si le profit n'en valloit le peché.

Aussi sera-il bon de prendre garde soigneusement que par leurs brigues & artifices, ou par le vice des choses passées non encore possible bien gueries du tout, il ne s'excitast dans le Royaume quelque sedition. Ce que le Roy pourra euitier en-employant les chefs dont on se pourroit douter, & en appellant les vns pres de soy, & enuoyât les autres çà & là à diuerses charges, & en diuers endroits, & distans les vns des autres. Outre que la prosperité du Roy, & le progrez qu'il fair & fera sur les ennemis, luy accroistra son autorité & reputation, non seulement enuers les estrangers, mais aussi dâs la France mesme; de façon qu'il en sera plus rouéré & redouté, & ses subiets contents en leur deuoir, & en l'obeyffance qu'ils luy doiuent.

Auec cela sa Maiefté de temps en temps pourra encore escrire & enuoyer aux Gouuerneurs ou Lieutenans generaux des Prouinces, & aux Cours de Parlement, & aux principaux Magistrats & Seigneurs des pays pour les admonester de veiller sur ceux qui sont dessous eux, & pouruoir à ce que rien ne se remuë en leurs gouuernemens, destroits, iurisdicçions, terres, & seigneuries.

Après que nous aurons ainsi usé de toute la pouruoyance possible, il nous faut remettre le reste en Dieu, & l'inuoker deuotement en public & en priué, le priant particulieremēt & expressément pour la conseruation de la personne du Roy, auec ferme esperance qu'il le nous preseruera; & luy donnera tout bon & heureux succez, puis que le Roy pour crainte d'Espagne, ay de tout le monde ensemble, n'a deu subir ceste infamie, qu'un Duc de Saouye triomphast du bien & honneur de la Couronne de France, & de la reputation de sa Maiefté. A tant, &c. Monsieur, &c. De Rome, ce 23. Septemb. 1600.

## A M O N S I E U R D E V I L L E R O Y .

C C X X X I I I .

**M** O N S I E U R , Vous entendrez par les lettres de Monsieur de Sillery comme l'importunité & la passion a en fin tant gagné, que contre les remontrances que nous auons faites plusieurs fois, le Pape vous enuoye Legat Monsieur le Cardinal Aldobrandin , lequel partira dans deux iours pour Florence , & y faire les espousailles de leurs Maïestez , & puis s'en ira en poste droit à Milan, Thurin , & à vous. Mais si pour tout cela vous vous laissez aller à quelque chose qui fust contre le bien de la Couronne, & contre la reputation du Roy, ie ne voudrois point estre nay François. Il est vray semblable que luy & le Pape ayent parole de Sauoye & d'Espagne de la restitution actuelle & presente du Marquisat, & de la satisfaction qui est deuë pour les dommages de la guerre commencee à faute d'auoir obserué l'accord de Paris ; autrement il leur a assez esté protesté que nulle legation ne seruiroit de rien. Ledit seigneur Cardinal aura plusieurs partis en main , & tâchera à vous faire contenter de moins qu'il pourra, mais si vous tenez bon , vous aurez toutes les conditions raisonnables que vous voudrez , & il n'abandonnera iamais l'entreprise que vous ne soyez contents du tout. Atant, &c. Monsieur, &c. De Rome, ce 24. Septembre, 1600.

## A M O N S I E U R D E V I L L E R O Y .

C C X X X I V .

**M** O N S I E U R , Estant venu en ceste ville Monsieur le Comte de Brienne pour gagner le Iubilé, & s'y estant rencontré sur le parterment de Monsieur de Sillery, cela luy a fait penser plus auant, à sçauoir que si Monsieur de Sillery n'auoit point à retourner , & que le Roy se voulust seruir de luy en ceste charge , il se tiendroît grandement fauorisé & honoré par sa Maïesté : & a voulu que ie vous exposasse ce sien desir pour le représenter à sa Maïesté ; ce que ie n'ay pû , ny deu refuser , & mesmement n'ayant à y mettre rien du mien , ains à vous escrire purement & simplement ce qu'il m'a dit. Il dit donc, que comme il a seruy par cy deuant de tout son pouuoir le feu Roy & le Roy d'apresent , il desireroit continuer encore plus que iamais ; & ne pouuant maintenant pour les

ables qu'il a faites pour le service de la Couronne, aller servir le Roy, avec l'equipage qu'il faudroit, il seruiroit volontiers en ceste charge; Qu'il entend & parle bien la langue Italienne, & s'il n'a tout l'experience qu'on pourroit desirer de luy; la bonne volonté qu'il a de bien servir le Roy, & le soin & la peine qu'il y prendroit, & la docilité qu'il apporteroit aux bons conseils de ceux qui sont plus experimentez, pourroient supplier à ce defaut; Qu'il prendroit tel Secretaire que vous luy voudriez enuoyer, & esperoit trouuer au Pape quelque bonne inclination & disposition enuers luy, pour la memoire que sa Saincteté conserue de la residence faite par deçà par Monsieur de Luxembourg son oncle, comme sa Saincteté le luy monstra par ce qu'elle luy dist, & par les caresses qu'elle luy fist lors qu'il luy baïsa les pieds.

A ce que dessus il adionste, que comme ce luy seroit à luy quelque soulagement pour ses affaires domestiques en l'estat où elles se trouuent à cause des despences passées, aussi pourroit-il auoir quelque commodité pour le service du Roy, d'autant que se trouuant luy tout porté icy, la place en seroit d'autant plustost remplie, & sa Maïesté espargneroit ce qu'il faudroit bailler pour le voyage à vn Ambassadeur que l'on enuoyeroit de deçà.

C'est en somme ce qu'il m'a dit plus longuement, & que ie vous ay exposé fidellement, sans y rien adionster ny diminuer quant à la substance, me remettant du reste à ce qu'il en plaira au Roy & à vous; ne voulant vous dire autre chose là dessus, sinon qu'il est vray qu'il parle bien Italien, & par tous ses propos se monstre tres-affectionné au service du Roy. Au reste sa Maïesté & vous cognoissez trop mieux ledit seigneur Comte, & tout ce qui est digne de cōsideration en cecy; de façon que ce seroit imprudence & presumption à moy de vous en vouloir informer, n'ayant eu le bien de luy parler si on depuis ce peu qu'il y a qu'il est icy.

A tant ie me recommande bien humblement à vostre bonne grace, & prie Dieu, Monsieur, &c. De Rome ce 1.<sup>r</sup> d'Octobre, 1600.

A MONSIEVR DE VILLEROY.

CCXXXV.

**M**ONSIEVR, Depuis mes lettres du cinquiesme & 14. d'Aoust, ausquelles i'ay responce de vous, ie vous'escris le dernier d'Aoust par l'ordinaire, & le vniesme Septembre par Valerio s'en allant avec le sieur Erminio secretaire du Pape; & les 22. vingt-troisiesme & 24. Septembre par l'ordinaire de Lyon party le vingt-quatriesme qui estoit vn Dimanche. Le lendemain vingt-cinquiesme Monsieur de Sillery partit pour Florence, comme il vous aura escrit. Ce iour là mesme nostre sainct Pere tint Consiistoire, où il dit que le Roy l'auoit prié de vouloir enuoyer. Legat Monsieur le Cardinal Aldobrandin son nepueu à Florence, pour y fai-

re les espousailles entre sa Maieſté & la Princeſſe Marie de Toſcane, & leur donner la benediſtion nuptiale. Ce que ſa Saincteté luy auroit accordé fort volontiers, eſperant que ce mariage ſeroit vtile à la Chreſtienté, & qu'il en naiſtroit des enfans, qui à l'imitation de Charlemagne chafferoient l'heréſie non ſeulement de la France, mais auſſi des autres Royaumes. Et apres auoir fait en cét endroit vne lōgue pauſe, adiouſta que pour eſtre ſur-uenue la guerre entre ſa Maieſté & le Duc de Sauoye, il auoit delibéré, iacōit que l'affaire n'eſtoit encōre meure, d'enuoyer encōre Legat le ſeigneur Cardinal Aldobrandin vers ſa Maieſté, & vers les autres Roys & Princes, vers leſquels il ſeroit beſoin de voyager pour l'occaſion de ladite guerre, afin que tout le monde viſt qu'il n'obmettoit rien de ce qu'il pourroit faire pour eſteindre ce feu auant qu'il s'embraſt dauantage; ſur quoy il deſiroit ſçauoir les aduis du college. Les Cardinaux dirent leurs aduis les vns apres les autres ſur le dernier point, ſans toucher au premier, lōuās tous la reſolution de ſa Saincteté, & la perſonne de Monsieur le Cardinal Aldobrandin. Mais quand ſe vint à mon tour, pour ne faire tort à ce que j'auois dit & conſeillé en ſecret, & auſſi pour ne troubler point la feſte, ie dis ſeulement ſās toucher au premier point, ny auſſi ſpecifier le dernier, que ie lōuois grandement l'honneur que ſa Saincteté faiſoit au Roy, & luy en rendois graces les plus humbles & les plus amples qu'il m'eſtoit poſſible. Apres que tous les Cardinaux eurent ainſi dit leur aduis, ſa Saincteté crea Legat, ledit ſeigneur Cardinal Aldobrandin pour l'une & l'autre des deux fins ſuſdites; & à la fin du Conſiſtoire luy donna la croix, & puis tous les Cardinaux en Pontifical accompagnerent ledit ſeigneur Cardinal Aldobrandin iuſques hors la porte de Populo, lequel eſtant puis apres entré en la ville en vn carroſſe fermé, partit le lendemain Mardy vingt ſixieſme pour Florence, & pour ſon autre voyage. Au meſme Conſiſtoire ſa Saincteté crea deux autres Legats, à ſçauoir le Cardinal Benilaqua pour Perugia, & le Cardinal Farneſe pour Viterbe & le patrimoine de S. Pierre, qu'on appelle.

Le Vendredy enſuiuant 29. Septembre ie fus à l'audience, & dis au Pape que ayant plēu au Roy que i'euffe la ſoin des affaires en l'abſence de l'Ambaſſadeur, ie n'auois voulu laiſſer paſſer ce iour là, qui eſtoit le premier depuis le partement de Monsieur de Sillery de l'audience ordinaire des miniſtres de ſa Maieſté, non que i'euffe rien de public à traiter avec ſa Saincteté, n'ayant receu aucun commandement ny lettre depuis le partement dudit ſieur de Sillery, mais pour ſçauoir premierement ſi ſadite Saincteté auoit quelque choſe à me commander; & puis la ſupplier pour quelques perſonnes particulieres, en deſſaut des choſes publiques.

Sa Saincteté me diſt qu'elle n'auoit rien à me dire, ſinō qu'à me recomāder de faire pour la paix tout ce qu'il me ſeroit poſſible, & que c'eſtoit auourd'huy la choſe qu'il auoit le plus à cœur, & qui luy donnoit plus de ſoucy & de peine. Ie luy repliquay que ſa Saincteté y auoit fait tout ce qu'elle auoit pū, venant meſme d'enuoyer la perſonne la plus chere & la plus neceſſaire qu'elle euſt apres de ſoy: & puis que le ſort en eſtoit ietté, il falloit attendre comme il reüſſiroit; & qu'au reſte les enenemés de la paix & de la guerre eſtoient en la main de Dieu, duquel i'eſtimois que nous les deuions at-

tendre avec vn esprit tranquille & posé, apres y auoir vſé de toute la preuoyance possible aux hommies.

Après cela ie luy parlay de certaines affaires de l'ordre de Cisteaux, dont le cheſt en France, & pour l'Abbé & Religieux de ſainct Vincent de Mets & pour quelques personnes particulieres; & puis ſis introduire Monsieur le Comte de Brienne à luy baiſer les pieds, lequel dit eſtre venu expellément pour gagner le Iubilé, & apres luy Monsieur le Marquis de Maubec venu à Rome, où il a accompagné Monsieur le Grand, & apres eux vn grand nombre de Gentils-hommes qui estoient auſſi venus de Florence, & de ceux que mondit ſieur le Grand a amenez; à tous leſquels ſa Saincteté permit de gagner le Iubilé en vn ſeul iour.

Le Pape me demanda s'ils auoient rencontré Monsieur le Cardinal Aldobrandin, & ce qu'ils en diſoient. Ie luy diſ qu'ils l'auoient rencontré, & ne pouuoient aſſez louer la belle compagnie, & le bel equipage qu'il menoit. Tout cela, dit-il, ſe donne au Roy de France; comme s'il euſt voulu dire que pour le grand Duc on n'en euſt point fait vn pas, tant s'en faut qu'on ſe fut mis en telle deſpenſe. Ie luy diſ que le Roy luy en demeureroit fort obligé, & qu'il adiouſteroit ceſte faueur à tant d'autres que ſa Maieſté auoit receuës de ſa Saincteté. Auquel propos ie vous diray que Monsieur de Sillery vous doit enuoyer de Florence la liſte des Prelats & Seigneurs que ledit ſeigneur Cardinal Aldobrandin a menez à Florence, & de ceux qu'il retiendra quand il partira de Florence pour continuer le chemin de ſa legation pour la paix, qui ſera cauſe que ie ne me mettray point en peine de vous en donner aduis. Il a eſté ordonné audit Cardinal mil eſcus par iour outre ſes reuenus, & outre vne bonne ſomme qui luy a eſté donnee pour s'equiper.

ſa Saincteté me demanda encore ſi Monsieur le Grand viendrait à Rome, ie ne ſeus que luy reſpondre, ſinon que ie n'en eſtois pas encore bien certain; Que iuſques là il ſ'eſtoit toujours dit qu'il y viendrait, & meſme auant que Monsieur le Cardinal Aldobrandin partiſt de Rome, & que ie ſçauois qu'il auoit eſté ainſi réſolu & ordonné par le Roy; toutesſois depuis, cōme l'on auoit veu que mondit ſieur le Grand demeueroit tant à venir & que l'occafion de nauiger ſe pourroit perdre, on auoit aduiſé de ſupplier ſa Saincteté de trouuer bon que pour gagner autant de temps mondit ſieur le Cardinal partiſt, & que ledit ſieur le Grand ne lairroit de venir, mais que ce ſeroit en poſte, & pour y eſtre peu, afin d'eſtre de retour à temps près la Royne quand elle partiroit pour France; Que i'attendois donc de ſçauoir ce qu'il feroit. Surquoy ie vous diray, Monsieur, que ceux qui ont conſeillé Monsieur le Grand de ne venir point à Rome, luy deuoient par meſme moyen conſeiller d'enuoyer incontinent vn des ſiens par deçà pour faire ſes excuſes, ou m'eſcrire à moy que ie les fiſſe, afin que par le premier des ſiens qui comparoiſtroit en ceſte ville, on ſçeuſt ce qu'il falloit attendre, au lieu qu'on a veu venir à trouppes ceux qui ſont venus à Florence avec luy & ſe promener par Rome, & chez le Pape meſme, ſans que nous ayons ſçeu que dire ny reſpondre au Pape de ſa venue. Si Monsieur de Sillery fuſt arriué à temps à Florence, il n'en fuſt pas allé ainſi, ains toutes choſes ſe fuſſent paſſées avec plus d'ordre & de reputation. I'eufe volon-

tiers suppléé de moy mesme les excuses, cōme l'on peut & doit on quelque fois, mais ie n'osay, pour ne sçauoir au vray s'ils viendront ou non, ny au cas qu'il ne vinst point, quelles meilleures excuses il pouuoit alleguer, ny s'il enuoyeroit des lettres du Roy à sa Sainteté, & de faire ie demeuray en suspens de sa venüe à Rome iusques au leudy ensuiuant cinquième de ce mois, que ie receus de ses lettres, & de celles de Monsieur de Sillery du 2. de ce mois, par lesquelles ie fus resolu qu'il ne viendrait point à Rome, & chargé d'en faire les excuses. Avec leurs lettres, epuoyèrent aussi celles que le Roy escriuoit par Monsieur le Grand au Pape, & à Monsieur le Cardinal de Florence, & à Monsieur le Cardinal de saint George, au seigneur Jean François Aldobrandin, & à moy.

Le lendemain Vendredy sixième iour de ce mois ie fus à l'audience, & fis au Pape lesdites excuses, & que sa Sainteté prist en fort bonne part. Après cela ie rendis à sa Sainteté les lettres que le Roy escriuoit; & pour ce que celle qui estoit de la main de sa Maesté estoit en creance sur Monsieur le Grand, ie remplis ladite creance selon que luy & Monsieur de Sillery m'auoient escrit, avec ce que Dieu m'inspira de plus, qui fut en somme, que Monsieur le Grand auoit eu commandement du Roy de baiser les pieds à sa Sainteté de la part de sa Maesté, & de la remercier tres-humblement de tant de faueurs & de graces qu'il auoit pleu à sa Sainteté luy despartir, & mesme au fait de son mariage, pour lequel ledit seigneur le Grand auoit fait ce voyage; premierement, en la iustice que sa Sainteté luy auoit admistrée sur la dissolution du premier: secondement, en ayant voulu que Monsieur le Cardinal Aldobrandin allast Legat pour solenniser les espouailles de sa Maesté, & donner la benediction nupriale: tiercement, en ayant accommodé sadite Maesté de ses galères; Que sa Maesté mettroit ces faueurs au nombre des autres obligations qu'elle auoit à sa Sainteté, outre la gratitude & seruice qu'elle luy en vouloit rendre; Qu'elle feroit eleuer les enfans qui naistroient de ce mariage, auquel sa Sainteté auroit tant contribué, en la profession de la religion Catholique, en l'obseruance & reuerence du saint Siege & de la personne de sa Sainteté, & en toute bonne amitié & tous bons offices enuers la maison Aldobrandine, & fonderoit si bien ceste bonne intelligence & affection, qu'elle seroit pour durer autant que la posterité de sa Maesté & de la maison Aldobrandine.

Le Pape me respondit, que ce qu'il auoit fait pour le Roy, il l'auoit fait fort volontiers, & seroit tousiours prest à complaire à sa Maesté de tout ce qui seroit en sa puissance. Et au reste il cognoistroit maintenant en l'affaire pour lequel alloit le Cardinal Aldobrandin, si le Roy vouloit faire quelque chose pour luy; Qu'il n'y auoit auourd'huy chose qu'il eust si fort à cœur que la paix entre les Princes Chrestiens, & en quoy le Roy le pust plus contenter qu'en se rendant facile à ladite paix.

Le luy repliquay que le Roy aimoit si fort la paix, que s'il n'eust esté tiré par force & comme par les cheueux à la guerre, il n'y fust iamais entré; & que tout aussi tost que le Duc de Sauoye luy auroit fait raison des choses qu'il tient à la Couronne de France, il n'y auroit plus de guerre du costé de sa Maesté.

Mais ie priois cependant sa Sainteté de se souuenir, que des graces que le Roy auoit receues de sa Sainteté, il n'en estoit point tenu au Duc de Sauoye, qui les eust volontiers destournees & empeschees s'il eust pû, & pour ce il n'estoit non plus raisonnable que le Duc de Sauoye en receust la recompense, Que si le Roy deuoit & pouuoit recompenser personne du patrimoine de sa Couronne, dont il n'a que l'administration sa vie durât, il faudroit en faire la recompense à sa Sainteté & aux siens, & non au Duc de Sauoye qui a fait tout le pis qu'il a pû contre le Roy & contre le Royaume. Baste, dit le Pape, le Roy me fera plaisir de donner la paix au Duc de Sauoye en receuant le sien.

Après cela il me dit que Amurat Rais corsaire, qui faisoit tant de maux aux Chrestiens sur mer, estoit receu és ports du Roy en Provence, dont le monde se scandalisoit grandement, & mesme d'autant que les Venitiens qui ont plus d'occasion de craindre le Turc, ne souffroient sur la mer Adriatique aucuns corsaires Turcs: ains leur couroient sus incontinent qu'ils en scauoient quelqu'un. Et entre autres maux que sa Sainteté me compta que ledit Amurat Rais auoit faits, il me dit qu'il auoit pris vn courrier d'Espagne, qui portoit à sa Sainteté des lettres du Nonce qu'elle a prés le Roy d'Espagne, & que ledit Amurat auoit vendu ces lettres à vn Geneuois qui les auoit achetees.

Ie respondis à sa Sainteté, que ie ne croyois point que ledit Amurat fust receu és ports du Roy qui estoient fermez & gardez, mais qu'il y auoit des ports qui ne se ferment point où il n'y auoit nulles gardes, comme aux Isles d'Ieres, & en quelques autres lieux; Que lors que les Espagnols nous faisoient la querre auant la paix de Veruins, ils se retiroyent en ces ports là malgré nous, & ainsi en deuoit-il estre maintenant dudit Amurat, lequel ie scauois destrousser aussi bien les François cômme les autres; & qu'il m'en auoit cousté à moy mesme de bonnes aumosnes, pour ayder aux François qui auoient esté despoüillez par luy en venans à Rome gagner le Iubilé. Aussi scauois-je que ledit Amurat auoit esté ces iours passez en la coste du Royaume de Naples, où il y a ordinairement bon nombre de galeres du Roy d'Espagne, & y auoir pris terre & plusieurs Chrestiens & mesme tué en vne embuscade par terre le Prince de Scalea; & toutesfois ie n'auois iamais soupçonné les Espagnols de l'auoir receu en leurs ports, ny de conuiuer enuers luy; Qu'on ne deuoit non plus dire ny penser telle chose de nous. Sa Sainteté me me dit qu'elle m'en auoit parlé auec ce presupposé que ledit Amurat eust esté receu, que s'il ne l'auoit point esté, sa Sainteté en estoit bien aise, & n'entendoit blasmer personne.

Ledit iour Vendredy sixiesme de ce mois, on m'apporta de Florence vn paquet de Monsieur de Sillery, où outre ses lettres à moy il y en auoit du Roy à luy & à moy du seiziesme Septébre, & vne lettre aussi à moy du mesme iour, & vne de la main du Roy au Papé, auec sa copie, & encores auec vne copie de la responce que le Roy auoit faite à Monsieur le Patriarche au siege de la Chrbonniere, & d'une lettre encor que le sieur de Iacob vous auoit escrite à vous le premier de Septembre: toutes lesquelles lettres auoient esté portees à Florence par vn courrier qui s'y en estoit retourné d'auprés du Roy.



Et pour ce que ledit Patriarche auoit donné aduis de fort bonne heure au Pape de ceste sienne negociation, & que le Pape mesme en auoit parlé à Monsieur de Sillery auant son partement pour Florence, se plaignant sa Saincteté entre autres choses de ce que le Roy auoit parlé audit Patriarche de quelques autres pretenions, outre le Marquisat de Salusses; & pour ce aussi que mondit sieur de Sillery luy auoit fort bien respondu là dessus, & sur tout le reste, & que sa Saincteté en auoit ia passé sa fascherie, & n'en parloit plus, ie n'estimay point que pour ceste dépesche il me fallust hastier de retourner à l'audience auant le iour ordinaire de Vendredy ensuiuant.

Et cependant arriua l'ordinaire de Lyon le neuuesme de ce mois qui me rendit les lettres que le Roy & vous m'auiez escrites de Grenoble le vingtiesme Septembre, & celle aussi que sa Maiesté auoit escrite à Monsieur de Sillery, qui me l'enuoya de Florence avec vne sienne du septiesme de ce mois.

Le Vendredy doncques ensuiuant treiziesme de ce mois i'allay à l'audience; & pource que Monsieur de Sillery & moy auons plusieurs fois fait au Pape toutes les excuses & iustificacions du Roy touchant ceste guerre, & que sa Saincteté elle mesme en croit & scaiten sô cœur plus qu'elle ne nous en monstre au dehors, & que quant au Legat la pierre en est ietee, estant party Monsieur le Cardinal Aldobrandin, comme dit est, & que auant son partement mondit sieur de Sillery & moy auons dit plusieurs fois à sa Saincteté & audit sieur Cardinal tout ce qui se pouoit dire pour empescher ceste legation, comme aussi pour destourner les Espagnols d'espouser vne cause si iniuste comme celle de Monsieur de Sauoye, ie n'estimay point en deuoir rien dire, si le Pape mesme ne me donnoit quelque occasion; mais accompagner seulement la reddition de la lettre de la main du Roy d'un peu de paroles qui seruissent à faire scauoir à sa Saincteté l'occasion & le suiet de ladite lettre, qui estoit en response de celle que sadite Saincteté auoit eseeite à sadite Maiesté le vingt-cinquiesme d'Aoust, & que Monsieur le Patriarche luy auoit portee au siege de la Charbonniere, & apres cela attendre ce que sa Saincteté me diroit là dessus. Je le fis donc ainsi & rendis ladite lettre de sa Maiesté.

Et d'autant que sa Saincteté ne me respondit rien, attendant possible que ie luy disse quelque autre chose; i'adioustay, que le Roy auoit enuoyé par escrit le discours entier de ce qu'il auoit respondu à Monsieur le Patriarche: mais pource que ie scauois que bien tost apres sa Saincteté en auoit receu lettres dudit sieur Patriarche, ie ne voulois donner la peine à sa Saincteté de l'oïr vne autre fois.

Bien luy voulois ie dire vne particularité que i'auois trouuee audit escrit, que possible Monsieur le Patriarche ne luy auoit point escrite, & de laquelle ie m'estois fort esmeruillé; c'est que le Roy luy auoit dit qu'il luy pouoit faire voir par escrit, que Monsieur de Sauoye auoit baillé pouvoir au sieur de Iacob, & au Presidēt de la Rochette de traicter avec sa Maiesté, avec declaration que ny ledit Patriarche, ny les trois Ambassadeurs qui auoyent cy devant traité avec sa Maiesté de la part dudit Duc, ne scauoient rien des intentions de son Altesse. Sa Saincteté monstra esmeruillier

ler de telle chose, & apres auoir demeuré vn peu pensif, dit que maintenant le Cardinal Aldobrandin traitteroit, & verroit come tour iroit. Et apres que i'eus vn peu exaggeré ceste façon de proceder du Duc de Sauoye, ie retour- nay à dire à sa Sainteté que Monsieur le Patriarche ne luy auoit possible point escrit cela, & le Pape confessa ingenuëment que non. A quoy ie cognû ce dont ie m'estois douté, que le Patriarche auroit en cela espargné Monsieur le Duc de Sauoye.

Après cela ie luy dis que i'auois trouué audit escrit vne autre chose, d'or- ie m'estois aussi esmeruillé; c'est que ledit Duc auoit baillé au sieur de Fosseuse parent de Monsieur le Conestable vne lettre de creance adressan- te à Monsieur le Conestable, & auoit dit audit sieur de Fosseuse qu'il ne rendroit iamais le Marquisat, & que si le Roy luy vouloit faire la guerre, il luy donneroit de l'esbattement pour quarante ans. A quoy le Pape me respondit que sur cela il me diroit ce qu'il auoit dit plusieurs fois à M<sup>onsieur</sup> de Sillery, qu'il n'auoit point entrepris, ny ne vouloit point entreprendre de deffendre les actions du Duc de Sauoye, mais quoy qu'il fîst il desi- roit de voir la paix entre le Roy & luy, & entre tous les Princes Chrestiens, & que si le Roy se vouloit contenter de la raison & iustice, nous l'aurions bien tost; que s'il ne s'en vouloit contenter, il ne feroit le deuoir de bon Roy. Je respondis, que sa Maiesté se contenteroit de toutes choses iustes & raisonnables.

Je luy dis encor que i'auois trouué audit escrit vne chose qui plairoit à sa Sainteté, c'est que le Roy ayât le Chasteau de Montmelian & la citadelle de Bourg en Bresse, il ne refuseroit la suspéñion d'armes, dont ledit Patriarche requeroit. Il le pourra bien faire (dit le Pape) quand il aura pris toute la Sauoye. Tres. saint Pere (dis- ie) il ne se peut faire plustost, pource que sans ces deux places tout le reste qu'il a pris ne luy seroit point assésuré, & il y auroit perdu tout ce qu'il y a mis iusques icy d'hommes, d'argent, de tēps & de peine. Je luy voulois expressément rememorer & inculquer cecy, afin qu'il le trouue moins mauuais quand le Roy l'aura dit à Monsieur le Cardi- nal Aldobrandin, & qu'il se dispose à patienter de bonne heure & dès à pre- sent, comme ie luy dis aussi les deux autres choses precedentes, pour luy faire d'autant plus cognoistre le naturel & la façon de proceder de Mon- sieur de Sauoye, & le peu de fiance qu'on deuoit auoir en luy.

Cecy acheué, le Pape me damanda qu'est-ce qui se faisoit aupres du Roy. Je luy respondis que le plus grand pensément du Roy estoit à la guerre, & que ie ne luy referois pas volontiers les exploits de guerre, sçachant que sa Sainteté n'y pouuoit prendre plaisir: neantmoins que sur ce qu'il luy plaisoit me demander, ie pensois luy pouuoir dire que les 16. & 22. de Sé- ptembre, dont estoient dattees les lettres que i'auois receuës, les choses estoient en rel estat. Et là dessus ie me mis à luy dire ce que i'auois appris par lesdites lettres de l'estat de la guerre: ce que sa Sainteté escouta at- tentiuement, & ne me respondit autre chose, sinon qu'il estoit marry par- ticulierement de ce que le Roy employoit le sieur de Lesdiguières qui estoit heretique. Je luy respondis que ce n'estoit point en ceste qualité là, mais pour estre le plus voysin de ces lieux là, & le plus entendu & experi- menté au pays, & qu'au reste il n'estoit point de ces acariastres, ains fort

*Il manque  
icy quelque  
chose.*

ciuill & moderé, traittoit fort doucement les Prestres & les Religieux; & auoit marié à vn Seigneur Catholique sa fille vnique, qui deuoit vn iour succeder à tous ses biens & moyens, & qu'on auoit esperance de le voir vn iour Catholique. S'il auoit ceste volonté, dit le Pape, il y a long temps qu'il l'auroit mis en effet. Je luy repliquay qu'il y auoit des Gentil-hommes & du peuple de ceste secte en Dauphiné plus qu'en nulle autre Prouince de ce que ceste-cy contenoit, & que s'il se declaroit Catholique auant qu'on eust pourueu au tout, ils se reuolteroient, & le Roy n'y seroit si bien obey, ny la religion Catholique en si bon estat & condition. En suiuant ce propos ie luy dis comme les Eglises & Monasteres y estoient maintenus, & que ceux de Chambery y estoient traittez en la ville comme les Parisiens dans Paris, & que le dernier ordinaire qui estoit arriué de Lyon m'auoit compté, comme il s'estoit trouué à passer le Rhosne avec vn soldat qui venoit du camp du Roy; lequel soldat luy auoit dit qu'il ne leur estoit pas seulement loisible de prendre vn raisin dans les vignes, & que ceux qui en prenoient estoient punis fort seuerement. Cela (dit le Pape) fait craindre que le Roy n'aye pris à cœur la Sauoye. Et encore que ie luy disse, que ceste moderatiō & police venoit de la iustice & bonté de sa Maiesté, toutesfoisie ne fus point marry que sa Saincteté pensast que cela peut estre; & qu'elle en parlast si doucement: car en tous les susdits propos sa Saincteté ne monstra aucun signe de cholere ny de fâcherie, ains m'oüit parler, & parla luy mesme avec la mesme douceur qu'elle eust sceu faire de tout autre suiet.

Après tout cela ie luy parlai pour quelques particuliers, & partant de sa Saincteté m'en allay trouuer Monsieur le Cardinal saint George, & luy rendis compte de ce que dessus, & ne s'y passa autre chose digne de vous estre escrite.

Au demeurant il est malaisé de sçauoir au vray ce qui fut resolu au pour-parler que firent le Duc de Sauoye, le Comte de Fuentes, & le Connestable de Castille dernièrement en la ville d'Ast; tant y a qu'incontinent après qu'ils furent separez, le bruit s'espandit par tout qu'ils auoient resolu que le Duc seroit secouru de toutes les forces que le Roy d'Espagne auroit en Italie & ailleurs, & ie croy facilement qu'ils firent courir ce bruit (soit que l'intention & resolution des Espagnols fust telle ou non) tant pour la reputation, partie de laquelle ils font bien souuent en tels bruits, artifices, & desguisemens, qu'aussi pour donner occasion au Roy d'aller plus retenu, & de se contenter de moins en l'accord qu'ils desirerent & poursuirent auprès du Pape si chaudement, qu'ils ont forcé sa Saincteté d'enuoyer Legat Monsieur le Cardinal Aldobrandin hors de saiso & contre toute apparence, à vn affaire encore cru & nullement disposé & préparé à recevoir le remede conuenable. Mais le plus seur est de croire qu'ils le secourront, & de prendre tousiours les choses au pis, & faire quelque despêse sans besoin, plustost que pour espargner encourir vn grand danger, dommage, honte & vergongne. Et de fait, on luy a ia enuoyé deux mille tant d'Espagnols: & le seigneur Dom Iean de Mendosse, qui fut à ce colloque, s'en alla incontinent après embarquer à Genes pour passer à Naples solliciter, comme l'on dit, le secours, & passa en ceste ville sans s'y arrester le 27. Septembre. Outre les deux mille Espagnols qui furent enuoyez dernièrement en Piemont, il

s'est fait leuee ces iours passez au Duché de Milan d'environ six mille Italiens, sous deux Colonels les sieurs Theodore Triultio & Barnaba Barbo, chacun trois mille, & sont lesdits six mille Italiens prests à marcher, ou marchent desia vers le Piedmont. Bien disent quelques vns que c'est pour estre mis en garnison à la frontiere de Milan qui confine avec le Piedmont, suiuant la coustume à tous Princes de s'armer quād ils voyent la guerre pres d'eux, encore qu'elle ne se face contr'eux ; & qu'en tout euenement s'ils ont esté employez en Piedmont par le Duc de Sauoye, il faudra qu'il leur bailletrois ou quatre bonnes places pour se loger, eux ne voulans demeurer à la cāpagne, ny en place foible où ils puissent estre forcez par les François. Auquel propos ie vous diray qu'il y a long temps, comme de deux ou trois ans, qu'on nous menace que si nous traittons le Duc de Sauoye rigoureusement, c'est à dire si nous voulons auoir le nostre, nous le contraindrons de fuir le Marquisat, & encores autres places de Piedmont es mains des Espagnols. A quoy i'ay accoustumé de respondre, qu'il n'est vray-semblable qu'il soit si ennemy de soy-mesme & de ses enfans, que de se mettre en vne guerre perpetuelle, & s'oster le moyen d'estre iamais en paix avec la France, & d'abandonner aux François les Estats qu'il a delà les monts, pour auoir deliuré aux Espagnols le seul moyen qu'il a d'auoir paix avec les François. Et quand il seroit si hors de soy que de venir à ceste extremité, la France ne luy sçauroit desirer vne plus grande punition pour ne dire vengeance, de tant de maux qu'il luy a faictz & procurez, & de son ingratitude & peu de foy, que de le voir luy & ses enfans priuez des Estats de delà les monts par les François, de ceux de deçà les monts par les Espagnols ; & le tout par son fait & sa faute propre. Que outre que nous aurions gagné au change, & n'aurions perdu pour cela l'esperance de recouurer vn iour nostre Marquisat, nous aurions pour voisin le Roy d'Espagne quoy que plus puissant, pour le moins aussi plus sage, plus constant, & plus soigneux de garder sa foy & ses promesses.

Mais pour retourner aux leuees qui se font en Italie par le Roy d'Espagne, outre les susdits deux Colonels de Milan qui ont desia leurs gens prests, on y a declaré deux autres Colonels pour leuer au Milanois autres six mille soldats, à sçauoir les sieurs Ferrante Noua, & Basso Ancher : mais ces deux derniers n'ont encores rien leué, & peut estre que ceste-cy seroit vne leuee de bouclier. Mais comme i'ay dit cy dessus, il faut prendre les choses au pis, & s'y preparer comme si les six mille là leuez deuoient aller en Piedmont, & comme si les autres six mille deuoient estre leuez cy apres en temps & lieu.

A Naples encoir on fait leuee de huit mille soldats, & y en a vne partie de leuez qu'on a departis en diuers lieux par la coste de la Calabre, pour les opposer au Sicile, qu'on a dit ces iours passez deuoir venir en ladite coste ; & se dit que lors que ladite leuee sera toute faite, & que le danger dudit Sicile sera passé, lequel on ne craint desia plus pour ceste annee, l'on embarquera sur la fin de ce mois tous ces huit mille en galeres pour les porter iusques au Final, & là les mettre en terre pour estre cōduits aussi en Piedmont par le Prince d'Auelano qui les conduira, outre quatre cens cheuaux Albanais qu'on doit faire marcher dudit Naples vers le Piedmont. La sai-

son qui est desia si aduâcée, & la nature du pays de Sauoye, tât pour l'asprété des lieux & del'hiuer, que pour la faute des viures, & de cōmodité d'y cōduire l'artillerie, dōne à pēler qu'on ne fera pour ceste année passer lesmōts à tous ces gens icy, quand biē ils iroient en Piémont, & qu'on les reseruera pour le Printemps, au cas qu'entre-cy & là l'accord qu'ils procurēt en toutes façons ne se face, dont ie me remets à ce que vous en pourrez entendre du iour à la iournée, & à ce que le Roy & tant de bons Capitaines qu'il a auprès de soy en iugeront trop mieux. Mais cependant ie serois tousiours d'aduis de iouër au plus seur, & de faire les prouisions aduantageuses, de façon qu'il nous en reste d'abondant, plustost que de nous en trouuer courts & d'estre surpris.

Le Duc de Sauoye a encores enuoyé au Duc d'Vrbain pour auoir secours de luy, & dit-on qu'il en a eu bonne intention, toute fois il ne s'y remuë encores rien; & les Espagnols se vantent, qu'ils auront outre ce que dessus six mille Allemans & dix mille Suisses, dequoy ils ne sont point creus, ny mesmes de tout ce qui se dit de l'Italie. De ce que Monsieur de Sauoye peut faire pour ceste heure des forces qu'il a, vous en poussez plus sçauoir par delà: icy il s'en parle diuersement; Qu'il n'y a apparence qu'ils soient pour aller attaquer directement l'armée du Roy qui est en Sauoye; Qu'il ira plustost assieger & prēdre Essilles, & de là entrer en Dauphiné & y prendre ce qu'il pourra; ou bien si les Espagnols veulent estre de la partie, par mesme moyen il attaquera la Prouence qui est assez ouuerte, ou plustost descendra par la Val d'Aoste, & taschera de reprendre ce qu'il pourra, & d'enuoyer des gens au secours de la citadelle de Bourg en Bresse, desesperant de pouuoir secourir le chasteau de Montmelian: & ceste dernière opinion est la plus commune, & aydee par les derniers aduis qui sont venus de delà. Quoy qu'il soit de tout cela, i'estime quant à moy qu'il se treuve maintenant aussi empesché & perplex, comme il se plaisoit auant cette guerre en ses subtilitez & inuentions, pour entretenir & amuser le Roy, afin de gaigner l'hyuer & le plus de temps qu'il pourroit; & qu'il a plus d'esperance au voyage de Monsieur le Cardinal Aldobrandin, qu'en ses forces propres, ny en celle des Espagnols. Surquoy i'ay à vous dire, que s'il falloit venir à quelque accord, si vous ne recourez le Marquisat, quand bien au reste il vous bailleroit en eschange trois ou quatre fois autant de vallant delà les monts, le Roy n'auroit point sa reputation sauue en Italie, ny en plusieurs autres pays de la Chrestienté; car les Espagnols & luy mesme diroient qu'ils l'auroient vaincu & fait passer par là où ils vouloit & relegué & confiné sa Maiesté & les François delà les monts. Aussi n'auons nous point de telle bride pour arrester cēt homme; & le garder de mal faire & de machiner contre le Roy & contre la France, outre les occasions que le temps peut apporter à nos Rois, quand ils auroient un pied en Italie; & puis le Duc de Sauoye a desia choisi de rendre le Marquisat, & en fist faire sa declaration le vingt septiesme de Iuillet, & vous l'a depuis fait offrir par le sieur de Iacob le premier de Septembre, & personne ne doute plus icy qu'auant que Monsieur le Cardinal Aldobrandin soit party, le Pape n'aye eu parole & esécriture tant des Espagnols que du dit Duc de Sauoye que le Marquisat sera rendu au Roy, si sa Maiesté ne se veut contenter.

ter d'en prendre recompense en eschange; à quoy l'on taschera premiere-  
ment. Et m'a esté dit que quand se viendra à la restitution du Marquisat,  
Monsieur de Sauoye entend le desliurer à Monsieur le Cardinal Aldobran-  
din representant le Pape, afin que ce soit sa Sainteté, ou son Legat qui le  
rende au Roy, & non le Duc de Sauoye qui est plus que le Roy d'Espagne,  
lequel en la restitution de Calais, & autres villes qu'il auoit prises en guer-  
re à luy dénoncée, fist si peu de compte de sa reputation qu'il n'vsa point  
d'un tel circuit, ains les restitua directement là où il pouuoit les faire ren-  
dre à Monsieur le Cardinal de Floréce Legat du Pape, pour estre puis apres  
par luy rendus au Roy. Cependant aduisez, qu'en ce circuit & en ceste fa-  
çon de proceder, il y pourroit auoir encor dessein de quelque forme de se-  
questre, & de vous imposer des conditions de la part du Pape plus rigou-  
reuses que vous ne voudriez. Car quant à la conseruation de la religion Ca-  
tholique, cela n'est chose qui doïue desplaire à sa Maïesté, ains cela luy pour-  
ra seruir d'excuse enuers la presse & importunité que luy pourront faire à  
l'aduenir ceux-là qui ont autre opinion.

Monsieur le Duc de Mantouë fut dernièrement à Milan voir le Com-  
te de Fuentes, & depuis a esté à Florence, où Monsieur de Sillery l'aura  
veu, qui sera cause que ie ne vous esciray rien d'une lettre d'un Prelat  
Mantoïan, qu'on fait courir par Rome, en laquelle se fait mention de  
quelques propos tenus par le Comte de Fuentes audit seigneur Duc  
de Mantouë, à l'aduantage de nostre Roy, & en desfaueur du Duc de  
Sauoye: car si lesdits propos ont esté vrayement tenus, son Altesse ne  
les aura celez audit sieur de Sillery; & quand ainsi seroit, il y peut auoir de  
l'artifice.

Ie n'escris point pour ceste fois au Roy, mais i'escris à sa Maïesté quand  
i'escris à vous. L'ordinaire de Lyon n'arriue point icy si tost ny si souuent  
comme il souloit, qui est cause qu'on ne le peut despescher icy si tost com-  
me nous ferions sans cela, & que vous aurez plus tard nos lettres que ie ne  
voudrois. A tant, &c. Monsieur, &c. De Rome, ce quatorzième d'Octobre,  
1600.

## A MONSIEVR DE VILLEROY.

CCXXXVI.

**M**ONSIEVR, Je viens de vous faire vne lettre bien longue, &  
neantmoins il faut que i'y adiouste encor ceste-cy, pour vous dire  
que ie louë grandement tout ce qu'il a plù au Roy m'escire sur la fin de sa  
lettre du vingtiesme Septembre, touchant Madame sa sœur & Monsieur  
le Duc de Bar: mais on a tort de vous donner à entendre que le Pape aye pre-  
fix à Monsieur le Duc de Bar vn terme pour faire resoudre sa femme, ou  
de prendre party. Iamais le Pape n'en parla, ains sa Sainteté, & tous ceux

BBBb 3

qui ont esté employez par elle en ceste affaire, ont dit que le Pape ne pouvoit prendre autre party. Les choses sont passées comme ie vous ay escrites en temps & lieu. Monsieur le Duc de Bar se peut promettre autant de temps qu'il voudra: & comme le Pape n'a rien dit par cy-deuant de ceste affaire, si non quand on luy en a parlé, aussi n'en dira-il rien cy-apres, si on ne retourne à luy en parler; mais c'est Monsieur le Duc de Bar qui se donne de la peine luy-mesme, & aux autres encor. Il a espousé sciemment vne Princeesse sa parente au degré prohibé par l'Eglise, & d'autre Religion que la sienne, & puis s'en est repenty, & est venu à Rome, a promis ce que vous scauez, non au Pape, qui n'en a point voulu ouyr parler, mais au cōfesseur qu'il s'est choisi luy-mesme; maintenant ne pouuant se départir honnestement de sa promesse qui est sceüe du Pape & de Monsieur le Cardinal Bellarmio, ny aussi pour plusieurs occasions qui le pressent perséuerer en ce qu'il a promis, il s'est party de Toscane, & s'en est retourné en Lorraine, accompagné de la perplexité où sont tous ceux qui sont des résolutions de grande importance contre raison, & sans auoir bien pensé à la suite & à la conséquence; dont s'ensuit encor vn autre mal, à scauoir que ceux-là-mesmes pour couurir leur faute, sont contraincts de desguiser les matieres, & les faire autres qu'elles ne sont, comme i'ay veu par ladite lettre du Roy: ce qui m'a contrainct de vous dire contre mon gré ce qu'en est pour vous desliurer d'erreur.

Le n'ay point expédié l'Abbaye de Beauueux en Dauphiné, que le Roy a donnée à Monsieur de la Riuere son premier Medecin, & entre cy & le prochain ordinaire ie feray regarder si elle auroit esté expédiée. Vous pouuez bien vous asseurer qu'elle ne le fera cy-apres, sinon qu'en la faueur dudit sieur de la Riuere, ou de qu'il le Roy commandera. Je vous enuoye vn bref que i'ay obtenu du Pape pour le Roy, afin que si ie decede en Cour de Rome, la nomination des benefices que i'aurois lors de mon trespas, soient sauuez à sa Maiesté. A tant, &c. Monsieur, &c. De Rome ce quatorzième d'Octobre, 1600.

## A MONSIEVR DE VILLEROY.

CCXXXVII

**M**ONSIEVR, Les dernières lettres que i'ay receuës du Roy & de vous sont du vingtiesme Septembre, auxquelles i'ay obcy & respondu long-temps y a: & n'ayant pour ceste heure à vous respondre, ny à vous rendre compte d'aucune negociation, ie ne scay que vous escrire, si non que le Pape est tres-desireux de la paix, & que le Roy ne luy scauroit faire plus grand plaisir que de s'y disposer. A toutes les fois que la Sainteté me parle pour quelque cause & condition que ce soit, elle me commande de faire ce que ie pourray. Je ne pretends point d'y pouuoir rien: ce no-

inobstant vous sçavez avec quelle affection ie vous en ay escript par cy-deuât, & mesmement par mes lettres du dernier d'Aoust, & 11. Septembre, lesquelles ie sçay que vous avez receuës, par la response que vous fistes aux premieres, & par l'assurance que Valerio me donne de vous auoir mis en main les dernieres; par ainsi ie ne vous en diray autre chose, me tenant tousiours à ce que ie vous en ay rescrit par lescdites deux depeschcs, & n'y pouvant adiouster rien de mieux à mon gré.

Les Espagnols continuent tousiours leurs leues à Naples, & à Milan, & ailleurs pour le secours de Monsieur de Sauoye, & sont bié resolu de vous donner des affaires, si vous ne faites la paix. C'est la seule chose d'importance, & qui vous touche, que ie vous puisse escrire: tout le reste sont nouuelles que i'ay quasi honte de vous mander, & pour peu que vous soyez occupé, vous pourrez vous arrester icy sans lire plus outre.

Le Cardinal André d'Austriche a esté icy ces iours passez pour gagner le Iubilé, & y estant venu incogneu, a visité les Eglises de mesmes; toutesfois le Pape l'ayant sçeu, l'enuoya enleuer de nuict par Monsieur le Cardinal S. George qui le conduisit en son Palais, & l'y a logé & traité iusques à son partement de ceste ville, qui fut le Lundy au soir 23. de ce mois, sans cependant auoir esté visité & veu que de deux ou trois qui le suiurent. Le Vendredy ensuiuant 27. de ce mois arriua aussi incogneu le Cardinal Dietrichstein pour la mesme deuotion du Iubilé, & pour quelques affaires de l'Empereur, mais il se laisse visiter, & est logé au Palais du Pape, & est venu ce soir en la chapelle que le Pape a tenuë pour les premieres Vespres de la feste de Toussaincts.

Le seigneur Laurent Saluiati, vn des principaux gentils-hommes de Florence, a aussi esté en ceste ville ces iours passez enuoyé par la Royné, & par le grand Duc & grande Duchesse pour remercier le Pape de la faueur & honneur que sa Saincteté leur auoit faite, leur enuoyant legat Monsieur le Cardinal Aldobrandin son neveu pour faire les espouailles de leurs Maiestez.

Le Comte Renato Borromeo, frere de Monsieur le Cardinal Borromeo, a esté aussi enuoyé par le Comte de Fuêtes au Pape, pour faire avec sa Saincteté les complimens accoustumez d'estre faits par les grands d'Espagne, qui viennent en Italie pour y administrer telles charges. L'on dit aussi qu'il a charge d'inuiter ledit sieur Cardinal son frere de retourner à Milan, dont il est Archeuesque, avec promesse qu'il y sera mieux traité qu'il n'a esté du temps du Conneftable de Castille, lequel est sur le poinct de s'embarquer à Gennes pour passer en Espagne, où se dit aussi que passera le Prince de Saouye avec daux de ses freres: toutesfois le passage de ces princes ne se tient pas pour certain.

Valerio arriua en ceste ville le vingt-vniesme d'Octobre sans m'apporter aucunes lettres, s'excusant sur ce qu'il ne pensoit passer Thurin, où il fut depesché par Monsieur le Patriarche & par le sieur Erminio avec vne despesche au Nonce resident à Thurin, lequel Nonce le despescha vers Monsieur le Cardinal Aldobrandin qu'il rencontra à Parme, & ledit seigneur Cardinal le despescha de Plaisance au Pape; & hier au soir arriua à sa Saincteté vn autre courier, depesché de Tortone le vingt-deuxiesme de ce mois par le-



dit seigneur Cardinal Aldobrandin, apres s'estre embouché avec le Comte de Fuentes à Voghera,

Ie ne vous escrirois ce qui sera en cét article, n'estoit que pour vne chose de peu ou de rien il s'en parle fort à Rome, & y fonde t'on mesmes des presages. Tout au plus haut de l'Eglise de S. Louys de Rome, il y a les armoiries de France en vne grande pierre separee vn peu de la muraille, mais attachee à ladite muraille avec de gros fers larges, les vns plus hauts que les autres, entre lesquels il y a des interualles & des distances qui de loing ressemblent à des trous. Sur le toict de ladite Eglise de Saint Louys il y a ordinairement des pigeons. Il aduint Dimanche dernier vingt neuuiesme de ce mois, qu'un gros oyseau de proye, qu'on dit estre vn Faulcon ou vn Autour fut veu volant l'apresdinee sur ladite Eglise, espiant vn pigeon s'enfuiant derriere lesdites armoiries de France, en vn de ces trous qui sont entre lesdites armoiries & la muraille de l'Eglise. Ledit oyseau de proye se lança apres ledit pigeon de telle roideur, que se trouuant trop petit ledit trou pour y recevoir vne si grosse beste elle y demeura prinse par son corps, sans pouuoir passer auant, comme fist ledit Pigeon, ny retourner en arriere, & luy vit on vne aille qui s'estant denouée luy est demeurée hors ledit trou; & y a trois iours qu'en la place deuant ladite Eglise, se voit vne infinité de gens qui viennent de tous les endroicts de la ville pour regarder ceste aille, & bastissent là dessus des augures & des succez chacun à sa fantaisie. Quant à moy, ie n'y entends ny crois autre finesse, sinon que la petitesse du trou & la roideur & grosseur de l'oyseau ont engendré cét eueneement: mais si cela ne signifioit rien, comme plusieurs se persuadent attendu la rareté de telle occurrence, aduenue dedans Rome chef de la Chrestienté, & en la face d'une Eglise, & Eglise nationale de François, & tout aupres, ains touchant les armoiries de France, & attendu encores le temps, qui estoit vne feste de Dimanche, heure de Vespree, en vne annee de Jubilé, & sur le commencement d'une guerre, si cela (dis-je) signifie rien, l'augure ne peut estre interpreté qu'à l'aduantage de la France, comme s'il rememoroit au monde quant au passé, que la Couronne de France a toujours esté refuge des autres Estats affligez, & particulièrement de l'Eglise, & du saint Siege de Rome, & l'aduertissant pour l'aduenir, que quiconque n'a respecté, ou ne respectera les fleurs de lis & la Couronne de France, & a osé ou osera cy-apres attenter contre ladite Couronne, ou contre ceux qu'elle a sous sa domination ou protection, y demeurera pris, mort & ruiné. Mais ie vous en ay trop compté, & fait quasi le nouellant: par ainsi ie feray icy fin par mes humbles recommandations à vostre bonne grace, en priant Dieu qu'il vous donne, Monsieur, &c. De Rome ce dernier d'Octobre 1600.

A MON-

## A MONSIEVR DE VILLEROY.

CCXXXVIII.

**M**ONSIEVR, Je vous escriuis le quatorzième de ce mois tout ce que i'auois negocié & appris depuis le vingt cinquième Septembre, que Monsieur de Sillery partit pour aller à Florence, & de là en France. Depuis n'ay point receu de lettres de la Cour, & l'ordinaire de Lyon n'est venu non plus: ie n'ay pourtant laissé d'aller à l'audience les Vendredis, pour sçauoir si le Pape auroit rien à me commander, & pour expedier quelques affaires particulieres concernant les Eglises & Monasteres de France. I'y fus doncques le Vendredy ensuiuant 20. de ce mois, & ayant dit au Pape d'entree, que depuis que i'auois esté à ses pieds, ie n'auois receu lettres de la Cour, & n'auois à traiter avec sa Sainteté pour lors d'aucun affaire d'Etat, il me dit que si auoit bien luy avec moy, & commença à me lire vne lettre que ie tiens pour certain auoir esté escrete par le Nôce qu'il tient près le Duc de Sauoye, par laquelle estoit porté que ceux de Berne & de Geneue auoient prié le Roy de trouuer bon qu'ils fissent l'entreprise du fort sainte Catherine, & que sa Maiesté du commencement ne l'auoit trouué bon, ains auoit respondu que ce seroit luy qui la feroit faire par le Marechal de Biron: mais que depuis sa Maiesté s'estoit changee, & leur auoit permis de faire tout ce qu'ils voudroient; & que suiuant ceste permission, ils estoient allez à Tonon & aux enuirs, & y auoient sacagé & ruiné les Eglises, battu & tué les Prestres, commis autres sacrileges & impietez; Qu'un College que sa Sainteté y auoit fait dresser à ses despens, pour l'entretienement & instruction de ceux qui se reduiront à la religion Catholique, & plusieurs autres bons commencemens appartenants à la restauration de ladicte religion Catholique, auoient esté dissipés & abolis.

Et apres qu'il eut leu ce que dessus, il me dit que cela l'affligeoit merueilleusement, tant pour voir la dissipation & ruine des Catholiques & de la religion en ces quartiers là, que pour ce qu'on luy reprochoit à luy les calamitez & prenoit on de là occasion de drapper sur luy; & Dieu sçait (dit-il) en mettant la main droite sur sa poitrine, ce que i'en patis en mon ame: si on veut faire la guerre audit Duc, c'est vne autre chose, mais de la faire à Dieu & à la Religion, aux Eglises, Prestres, Colleges, & estudians, cela n'estoit tolerable.

Quand il eust acheué, ie luy respondis que ie compatissois grandement à la fascherie de sa Sainteté, & que si la chose estoit ainsi comme la lettre le narroit, la douleur en seroit tres-iuste, & i'en porterois moy-mesme ma part; Que ie n'en auois rien entendu sinon ce que sa Sainteté venoit de m'en faire sçauoir; Que sa Sainteté s'estoit pu appercevoir en cent mille choses que le Duc de Sauoye estoit merueilleusement inuentif & artificieux, Qu'il pourroit estre que tout cecy n'en fust rien, ou qu'en estant quelque

chose, ce n'estoit à beaucoup près tout ce qu'on luy escriuoit: quoy que s'en fust, sa Sainteté se pouuoit & deuoit assurer que le Roy n'y auoit aucune part, & en auroit esté marry comme sa Sainteté mesme; Que Dieu & le monde scauoit comme sa Maïesté s'estoit tousiours comportee depuis sa profession de la Religion Catholique, & chacun voyoit. comme il se comportoit en ceste guerre mesme, & qu'il auoit fait publier par sa declaration sur la prise des armes, qu'outre la conscience & le zele qu'il a à la Religion Catholique qu'il professe, il est Prince qui a son honneur & reputation en recommandation, le seul respect de laquelle, quand il n'y en auroit point de plus grand, le tiendrait tousiours en ceste sorte de deuiroir, & mesmes d'autant qu'il scait qu'on a trop les yeux sur luy, & que sans autre occasion que de la mal-veillance qui pousse les haineux, ils interpretent ses meilleures actions en mauuaise part; Que si les Bernois & Geneuois, qui ne sont subjects du Roy, auoient fait scauoir à sa Maïesté qu'ils voudroient faire la guerre de leur costé au Duc de Sauoye, sa Maïesté n'auroit point d'occasion de les destourner de faire la guerre à celuy qui tient tant de tort à la France & à sa Maïesté, & qui a suscité tant d'ennemis & de troubles au Royaume, auquel il estoit le plus obligé: Que si les Bernois & Geneuois, qui sont heretiques, & particuliers ennemis dudit Duc, auoient fait la guerre à leur mode, & auoient excédé contre Tonon qu'on auoit dressé & bandé à la ruine de Geneue, que le Roy n'en pourroit mais, & personne ne s'en deuoit esmerueiller, encor que nous ayons tous occasion d'en estre marris: Que le Duc de Sauoye estoit luy seul cause de tous ces maux, & n'en deuoit accuser que soy-mesme, & s'il eust eu la cétiesme partie du sens & de l'étendement qu'il se donne, il eust preueu qu'en se comportant comme il a fait envers le Roy, sa Maïesté seroit contraincte luy faire la guerre, & que d'autres avec qui il estoit desia en guerre en pourroient faire leur profit contre luy: Que de se prendre de telles choses à sa Sainteté & le luy reprocher, comme sa Sainteté disoit, ie ne scauois que c'estoit: mais quiconque fust, c'estoit vne imprudence & audace monstrueuse, qui esbranleroit & irriteroit toute autre patience que celle de sa Sainteté: à laquelle i'osois dire sur ceste occasion, que s'ils entendoient luy reprocher la reconciliation du Roy à l'Eglise & au saint Siege, dont ils firent lors tant de mauuais presages pour l'empescher, que sa Sainteté ne fit, ny ne feroit iamais action plus vtile & salutaire ny plus necessaire à la Chrestienté, & à l'Eglise, & au saint Siege que celle-là. Au demeurant, sa Sainteté se pouuoit souuenir, qu'auant la prise des armes Monsieur de Sillery & moy auions predit à sa Sainteté plusieurs fois (sans toutesfois penser à ce fait particulier de Tonon) que si le Roy estoit contraint d'étrier en guerre, la Religion Catholique seroit la premiere à en patir, & que c'estoit cela qui causeroit plus de regret à sa Maïesté, & à nous tous.

Qu'en ce qui concernoit ce qu'ils osoient dire contre sa Sainteté, ie ne me voulois ingerer de luy rien conseiller; qu'il y scauoit trop mieux pouruoir par sa prudence: mais pour le regard des calomnies qu'ils dressioient contre le Roy, ie suppliois sa Sainteté de se souuenir, qu'auant mesmes la guerre, on auoit tousiours cherché de detracter de sa Maïesté, & que maint-

tant que nous estions en guerre, on s'y estudioit d'autant plus; Que sa Sainteté auroit tous les iours de ces algarades, & qu'il denoit faire bonne provision de constance & de fermeté à ne croire point telles inuentions, & à s'asseurer que le Roy auoit plus de preud'homie, de bonté, & de generosité au bout de ses ongles, que ceux qui en parloient mal depuis le sommet de leur teste iusques à la plante de leurs pieds. Sa Sainteté escouta tout ce que dessus fort patiemment, & ne m'y repliqua autre chose, smon qu'il falloit faire la paix, & que si le Roy se vouloit cōtenter de raison nous l'aurions biē tost. Il me semble qu'il n'en croit pas tant comme on luy en diō, & n'en est pas si fasché comme il monstre, & d'autres qui l'ont obserué aussi bien comme moy me l'ont ainsi confirmé.

Dedans la lettre que le Pape luy en uoit de plus, que ceux de Geneue auoient demandé au Roy au lieu de Monsieur le Marechal Biron le sieur de Lesdiguières, ou Monsieur de Sacy qui estoit aussi des leurs. Surquoy ie luy dis apres ce que dessus; que ceux qui escriuoient à sa Sainteté estoient mal informez de la qualité des personnes dont ils parloient; & que le sieur de Sancy, comme sa Sainteté l'auoit seu de Monsieur le Cardinal de Florence & d'autres, estoit tres-bon Catholique, & en faisoit toutes les actions, & le Pape me monstra s'en souuenir tres-bien, & me dit qu'en lisant la lettre, il s'estoit esmerueillé de ce qu'on escriuoit ainsi dudit sieur de Sancy; & adioustay que ceux qui auoient suggéré ceste fable à celui qui la luy auoit escrite, auoient pour dessein & pour mire de tenir sa Sainteté & les siens en perpetuel soupçon & deffiance de la Religion du Roy; & de celle des seruiteurs de sa Maiesté: mais la clemence incomparable du Roy, sa foy inuiolable, sa iustice, sa franchise & bonté, sa longanimité & patience auant qu'estre entré en ceste guerre, & la compassion qu'il a de ses subiects, & encorer de ceux d'autrui, & tant d'autres vertus humaines & charitables qui reluisent en luy, monstroient assez la creance de sa Maiesté; comme les actions & procedures du tout contraires de ses ennemis, arguent qu'ils n'ont aucune crainte de Dieu ny vergogne des hommes, & qu'ils ne pourroient pas seulement passer pour payens tolerables. Ie priois à sa Sainteté de se souuenir, qu'elle ne pourroit aujourd'huy faire vn plus grād bien à la Religion Catholique, & au saint Siege, que de tenir & de monstrier tenir le Roy pour tel qu'il est, c'est à sçauoir tres-Chrestien & tres-Catholique, & de monstrier de bien esperer de tous ceux qui ont iusques icy suiuy, & qui suiuront cyapres l'exemple de sa Maiesté. Apres ces propos qui ont plus du public, ie luy parleray d'autres affaires particulieres, & sur la fin de l'audience ie fis introduire deux fils de Monsieur de Vitry, & quelques autres Gentils-hommes François arriuez à Rome depuis peu de temps, à luy baiser les pieds, lesquels sa Sainteté vit fort volontiers, & les caressa & s'offrit à eux.

Ie vous ay dit cy-dessus que ie tenois pour certain que le Nonce de Thurin auoit escrit ladite lettre, à quoy iuger ie n'eus pas grande peine, d'autant que le mesme iour au matin j'auois veu vne lettre dudit Nonce à vn Gentil-homme particulier de ma cognoissance & amitié, que Monsieur de Sillery deuina bien, par laquelle il luy escriuoit toutes les dites choses, & ceste cy

CCC 2

de plus, que les Soldats du sieur de Lesdiguieres mangioient chair ~~es~~ iours maigres, & que par ce moyen leur long seiour en Sauoye gasteroit & infecteroit le pais de Sauoye. Le Pape ne leut point cest article, soit qu'il ne fust point en sa lettre, ou qu'il tint la responce pour trop facile, qui fut cause aussi que ie ne luy en dis rien. Mais en parlant à Monsieur le Cardinal de saint, George comme nous y allions tous après l'audience du Pape, & luy ayant rendu compte de ce qui s'estoit passé entre le Pape & moy, ie luy dis que i'auois entendu de plus, qu'on auoit escrit encore de Thurin que les soldats du sieur de Lesdiguieres mangeoient de la chair, dequoy ie ne m'esmerueillois pas tant comme de celuy qui l'auoit escrit, pource qu'il ne fut iamais qu'en vne grande armee, pour Catholique qu'elle fust toute, on n'y mangeast de la chair en tous iours, pour ce qu'il ne s'y trouue iamais tant d'œufs & de poisson qu'il puisse suffire pour tous; Qu'en la Sauoye, qui est toute montagne avec vn peu de torrens, on y estoit particulièrement contrainct, Que si l'armee de Monsieur de Sauoye passoit les monts, elle encheriroit par dessus les soldats dudit sieur de Lesdiguieres, & mesmement les Espagnols, ains ie m'asseurois que sans auoir passé les monts, ils en faisoient ia plus quelque part qu'ils fussent assemblez; Que nous auons vû icy n'a pas long temps que venant le Vice-roy de Naples pour prester l'obedience au Pape de la part du Roy d'Espagne, & estant arriné à Marino lieu maritime en la maison de Monsieur le Cardinal Colonne à vne demye iournee de Rome vn Vendredy au soir, encor qu'ils trouuassent le souper tres bien & tres-abondamment appresté, les Espagnols neantmoins voulurent menger de la chair; & fallut soudainement tuer iusques aux coqs & iars & autres vollailles qui ne vailloient pas mieux, & le lendemain Samedy au soir eux estans arriuez en ceste ville; on vit en la cuisine de l'Ambassadeur d'Espagne, chez lequel les principaux logeoient, tourner les broches chargees de toutes sortes de chairs; mais c'est trop parlé de cela.

Le Dimanche vingt-deuxiesme de ce mois frere Iean Renault Religieux Cordelier, & gardien du conuënt des Cordeliers de Nancy, & cōfesseur de Monsieur le Duc de Bar vint par deuers moy, & me dit qu'il venoit d'arriver en poste, & me rendit vne lettre dudit seigneur Duc escrite à Rimini le 19. de ce mois, par laquelle, & par la creance que ledit seigneur Duc auoit fice audit Religieux, il monstroir desirer que si le Pape ne luy vouloit point encor octroyer la dispense, qu'au moins il luy fist cependant quelque grace pour auoir repos de conscience, & se pouuoir rendre prez Mōsieur de Lorraine son pere au plustost, afin de trauailler à la conuersion de Madame: pour laquelle chose mesme il auoit enuoyé peu auparauât le sieur Barnet son Secrétaire, auquel auoit esté respondu que Monsieur le Duc n'auoit besoin de congé ny de grace du Pape pour retourner en Lorraine, & vacquer à la conuersion de Madame: mais si mondit seigneur le Duc entendoit que le Pape luy donnast permission de pecher quand il seroit de retour en Lorraine, la Sainteté ne vouloit & ne le pouuoit faire: & que ledit seigneur Duc ayant sa conscience en sa main, vist d'en bien vsr. Je dis audit Religieux que la Sainteté feroit à present la mesme responce à quicōque luy en parleroit: & sur cela ledit Religieux fut enuiron deux heures à confeter avec moy, sâs que nous y püssions prendre aucune ferme resolution. L'entray en quelque soup-

non que ledit Religieux estoit venu pour quelque autre chose que celle qu'il disoit, & pour laquelle estoit venu ledit Secrétaire Barnet : & mesme d'autant que le sieur de Beauuau estoit arriué vn peu de temps auant ledit Religieux, & est encor demeuré icy après luy, & que ledit Religieux ne pouuant bonnemét repliquer à diuerses respôses que ie luy disois que le Pape faisoit, il me dist par deux ou trois fois que le Pape auoit grâd tort, de tenir ce Prince & toute ceste maison si longuement en suspens & qu'il luy deueroit donner la dispense, ou bien luy commander de laisser ou r'enuoyer sa femme ; à quoy ie ne voulus luy rien expliquer pour luy donner occasion de rabiller son dire, & dissimuler ce que i'auois descouuert long temps y a qu'ils desiroient.

Mais le lendemain au matin Lundy vingt troisiésme de ce mois au Consistoire ie réitéray avec le Pape les offices que Monsieur de Sillery & moy auions faits à sa Sainteté sur ce subiet, deslors que Monsieur le Duc de Bar estoit icy : & sadite Sainteté me dist & afferma que iamais il ne commanderoit telle chose, & qu'il s'en estoit bien gardé, & s'en garderoit encore mieux à l'aduenir, & lairroit cela à la conscience dudit Duc, sans luy dire qu'il fist ou qu'il ne fist point. Et le Vendredy ensuiuant 27. de ce mois que ie retournay à l'audience, encore que ie n'eusse à traiter autre chose concernant le public, ie parlay encor plus amplement à sa Sainteté de cela mesme, comme la commodité est plus grande en la chambre qu'au cōsistoire ; & sa Sainteté me reconfirma aussi encore plus expressémét la mesme response, & me dist tout ouuertement qu'il croyoit que ceste Princeesse ne faisant point d'enfans, ces Princes qui voyoient que le Roy estoit en chemin d'en auoir bien tost de legitimes, se repentoient de ce qu'ils auoient fait : mais comme ils auoient fait telle resolution sans son approbation, ains contre sa prohibitiō, aussi ne vouloit-il point se charger de l'enuie & haine qui suiroit ce diuorce, si on en venoit là, & en lairroit faire à ceux qui il touchoit.

En la mesme audience, parce que sur le commencement de la sepmaine estoit arriué le sieur Laurent Saluiari, enuoyé par la Roynes, & par le grand Duc & grand' Duchesse, pour remercier le Pape de ce qu'il luy auoit pleu enuoyer Legat Monsieur le Cardinal Aldobrandin, pour faire les espousailles de leurs Maïestez, & leur dōner la benediction nuptiale, i'estimay deuoir aussi vser de quelque remerciement, attendant que le Roy me le commande & en escriue à sa Sainteté ; à quoy encore ie fus excité par vne lettre que Monsieur de Sillery m'escriuit par le mesme seigneur Laurent Saluiari. Ie fis donc ledit compliment, que sa Sainteté monstra d'ouïr volontiers, & me dist que Monsieur le Cardinal Aldobrandin y auoit esté grandement honoré, & s'en estoit party avec toute la satisfaction possible.

Les leues qui se font à Naples sont fort sollicitées du costé de Milan ; toutesfois encor qu'on s'y soit proposé d'y leuer hui& mille homme, on n'en auoit peu mettre ensemble que cinq mille cinq cens iusques au vingt & vniésme de ce mois, distribuez en 54. compagnies. Le Vice roy auoit vne fois fait arrester toutes les nauires qui s'estoient trouuees au port & en la coste de Naples pour porter ces gens de guerre à Vado, qui est vn port qui est à trois milles de Sauoye, mais en fin il a laissé aller lesdites nauires, ayant sceu que les galeres de Naples & de Sicile pourroient estre à uenir.

de retour de Leuant pour porter lesdites gens audit port de Vado : & mesme d'autant qu'on inge qu'on ne les pourroit faire embarquer plustost qu'à la moitié du mois prochain. Ledit Vice-roy se trouuant court d'argent, estoit prest à faire que la cité de Naples anticipast le don de douze cens mille escus qu'elle a accoustumé de faire au Roy d'Espagne de deux ans en deux ans. Dans Rome mesme l'Ambassadeur d'Espagne fait enrouler autant d'Espagnols qui y viennent pour gaigner le Iubilé, & les fait acheminer vers Milan, ce qui a donné occasion à quelques vns de dire qu'on faisoit des leuees en ceste ville en faueur de Sauoye & d'Espagne ; ce qui n'est point vray, sinon que de la façon cy dessus dite.

Au Duché d'Vrbino y sonne le tambour, mais personne ne s'y presente ; ce qui n'est pas de ceste heure : car en toutes les guerres precedées ceux de ce pays là n'allerent iamais volontiers contre la France, & à toute force on y poussa vne fois sept ou huit cens hommes, qui s'en retournerent la part auant qu'auoir fait la moitié du chemin de Piémont.

Vous estes plus près de Milan que nous pour scauoir des leuees de Milan : icy on dit que le regiment conduit par le seigneur Theodoro Triuultio estoit passé en Piedmont, & joint avec les forces du Duc de Sauoye pour passer en la val d'Aoste, & que l'autre regiment conduit par Barnaba Barbo estoit vers Alexandrie, où le Comte de Fuentes en deuoit faire faire la monstre, apres auoir parlé à Monsieur le Cardinal Aldobrandin à Voghera le 19. de ce mois.

J'ay veu vne lettre du Nonce resident à Thurin du vingt quatriesme de ce mois, par laquelle il dit que tout aussi tost que Monsieur le Cardinal Aldobrandin sera party d'avec le Duc de Sauoye, ledit Duc vouloit partir avec toutes les forces tant siennes que Espagnoles pour aller par ledit val d'Aoste. Or soit que ledit Duc vueille aller là ou ailleurs, il est vray semblable qu'il entreprendra quelque chose lors qu'il iugera que vous y penserez le moins, à cause de l'arriuee dudit seigneur Cardinal près le Roy, & de la Royne, & des nopces, & de l'hiuet mesme, & taschera de vous surprendre ; mais j'espere qu'il se trompera aussi bien en ceste finesse comme il s'est trompé en tant d'autres.

On nous a entretenus icy quelques iours de ces trois enfans massés qu'il vouloit enuoyer en Espagne ; mais cela s'est refroidy depuis. Quant à moy quoy que d'autres en pensassent, ie ne m'en donnois point de peine. Et puis que le pere est de si peu de foy, & que la France n'en peut esperer amitié ny aucune bonne affection pour ceste heure, ie les aymerois mieux en Espagne qu'en France, où eux & les leurs seruent d'autant de sangliers & d'espions & de suborneurs & corrupteurs de l'obeyssance & bien vueillance que les François doiuent à leurs Rois & au sang Royal. L'experience toute fraische nous doit auoir appris combien c'est chose dangereuse de recevoir si facilement les Princes estrangers ; & leur fier les principaux Gouvernemens des Prouinces, & les principales dignitez, tant Ecclesiastiques que temporelles.

Le Duc depuis la prise des armes se jette tout en apparence entre les bras de la Sainteté de le prendre en sa protectiō, & de menacer le Roy de l'excommunication & de toutes ses forces si sa Maiesté ne se desiste. Mais j'espere

Je tant de la prudence & iustice du Pape, qu'il ne s'embarassera point à vne protection si iniuste & dangereuse, en laquelle luy & le saint siege ne pourroient sinon que perdre. Ceste lettre ja trop longue sera la principale, outre laquelle ie vous en feray vne autre de paille pour bailler au courier, afin qu'il l'exhibe s'il est pris, & que les preneurs n'ayent occasion d'en chercher d'autres, & en vseray ainsi cy aprestant que le danger durera.

Ie viens d'entendre d'un Cardinal amy intime de Monsieur le Cardinal Aldobrandin, que ledit seigneur Cardinal Aldobrandin s'est arresté à Tortone, où estoit ia arriué le Comte de Fuentes, & y attendoient Monsieur de Sauoye; & que ledit seigneur Cardinal n'auoit point voulu le contenter de les ouyr chacun à part pour entendre separément leur intentions; ains auoit voulu qu'ils se trouuassent ensemble, & prissent commodément vne bonne resolution qu'il pust apporter au Roy afin que ce que l'un auroit fait à part l'autre ne le defist puis apres, & qu'ils ne se pussent excuser cy apres l'un sur l'autre, comme on a fait par le passé, disant Monsieur de Sauoye qu'il vouloit rendre le Marquisat, mais que les Espagnols ne l'ont point voulu; & les Espagnols au contraire que ce sont eux qui ont conseillé Monsieur de Sauoye de rendre le Marquisat, mais qu'il ne l'a oncques voulu faire. Si le seieur de Monsieur le Cardinal Aldobrandin à Tortone est pour ceste fin, il a fait son profit des bons conseils qui luy furent donnez auant qu'il partist de Rome. Par mesme moyen i'ay entendu que par composition ceux du chasteau de Mont-melian auoient obtenu du Roy vn mois de terme pour attendre s'il leur viendroit secours, à la charge de rendre la ville à sa Maiesté si le secours ne leur venoit dedans ledit mois. Ce qui m'a seruy pour descouurir & refuter la calônie des Sauoyards & Espagnols, lesquels ayas tousiours dit & soustenu opiniaistrement que le Roy ne scauroit prendre ceste place de trois ans, disent à présent qu'on luy a vendue pour cent mille escus. Arant, &c. Monseigneur, &c. De Rome ce dernier d'Octobre, 1600.

## A MONSIEVR DE VILLEROY.

CCXXXIX.

**M**ONSIEVR, Les dernieres lettres que ie vous ay escrites sont du 14. & dernier d'Octobre, & depuis est venu en fin l'ordinaire de Lyon, à scauoir le Samedi 11. de ce mois, avec vostre depesche du 17. d'Octobre, contenant vne lettre du Roy, & vne vostre dudit iour 17. & la copie de la lettre que le Roy escriuit à Monsieur le Cardinal Aldobrandin par le sieur Erminio, & de celle du sieur Alphonse Casale Ambassadeur du Roy d'Espagne en Suisse aux Cantons Catholiques, & des propositions dudit Ambassadeur & de celuy de Sauoye en l'assemblée de Baden le 14. d'Octobre.

Par vostre lettre du dix-septiesme i'ay veu comme vous avez receu les



miennes des vniesme & vingt-troiesme Septembre, & le voyage que le Roy venoit de faire à Beaufort, & ce qui s'estoit passé és deux audiences que sa Maiesté auoit donnees audit sieur Erminio, & à Monsieur le Patriarche de Constantinople les neuuesme & quinziesme d'Octobre, & ne vous pourrois assez exprimer combien i'estime & louë en mon cœur toutes les responses que sa Maiesté a faites audit sieur Erminio, & la prompteresolution qu'elle prist de luy donner ceste audience sans la luy faire attendre. Je desire qu'elle en aye peu faire autant à Monsieur le Cardinal Aldobrandin: car comme vous sçauiez trop mieux ouyr les personnes & ne laisser cependant de tenir bon au fait de la negociation, monstre d'un costé la franchise & rondeur avec courtoisie & respect, & de l'autre la constance & fermeté avec soin & zele du bien & grandeur de son Royaume, & de son honneur & reputation.

Quant à l'aduis que vous voulez sçauoir de moy, ie pense vous auoir desia escrit plus d'une fois que mon aduis estoit que vous recourussiez le Marquisat en toutes sortes. Ie perseuere en cela mesme; premierement, pour la reputation du Roy & de la Couronne de France, à laquelle reputation il importe infiniment que le Duc de Sauoye restituë à sa Maiesté & à la France ce qu'il a osé luy oster par voye de fait la paix, & de gayeté de cœur. Et quand ledit Duc de Sauoye auroit donné ailleurs tout ce que vous sçauriez luy demander, il semble que la reputation du Roy & de la Couronne n'y seroit pas autrement sauuee, d'autant que le Duc de Sauoye dira toujours, que quoy que le Roy & toute la France ayent sceu faire son Altesse neantmoins a fait passer sa Maiesté par où il a voulu, & qu'il a & tiët le Marquisat malgré tous les Bigarrats du monde: car ainsi appellent ils les François & autres qui tiennët le party du Roy. D'autre costé les Espagnols qui se sont vantez à Rome & ailleurs que iamais ils ne souffriroient que les François s'entraffent audit Marquisat, encore qu'aujourd'huy ils consentent & conseillent qu'il vous soit rendu, diront ce nonobstant, & persuaderont au monde par l'euement, qu'ils ont donné la loy au Roy, comme ils se vantent de la donner au reste de la Chrestienté, & que pour crainte d'eux sa Maiesté a quitté le patrimoine que la Couronne de France auoit en Italie, & s'est laissée avec tous les François releguer delà les môts par un Duc de Sauoye. Dauantage, tous les Princes d'Italie, de quelque party qu'ils soient & une infinité de seigneurs, & gentils-hommes, & du menu peuple, qui fauorisent au Roy & à la France, demeureront fort dégoustez & découragez, & rabattront beaucoup de la grande opinion qu'ils ont du Roy, & de sa puissance, prosperité, & valeur.

Ce point de la reputation, tant enuers les ennemis qu'enuers les amis, me semble de grande importance, & mesme d'autant que les grands Estats, cōme vous sçenez; se maintiennët autāt par la reputation que par tout autre moyen, & quelquesfois plus que par vraye force & puissance. Secondement ie suis induit à croire qu'il est meilleur que vous recouriez ledit Marquisat, pour infinies occasions que le temps peut apporter au Roy & à ses successeurs Rois de France de faire de belles, honorables, & profitables entreprises en Italie, comme ont fait autrefois ses predecesseurs, se courrant le S. Siege & autres Princes, Potentats, & Republiques, & s'y grandissant sans faire

faire tort à autrui, ny commettre chose indigne de bons Roys. Et de fait nous auons autrefois possédé le Royaume de Naples, de Sicile, & le Duché de Milan, que les Espagnols tiennent à present, & si auons encore eu Gennes & Corse que qu'ils ne tiennent point. Ce que ie ne dis pas pour desir que i'aye que le Roy entreprenne iamais rien contre la paix, mais seulement afin qu'il ne se priue point du fruit des moyens & occasions que Dieu & les hommes luy peuuent presenter avec le temps; & pource aussi que c'est chose digne de toute personne sage, & mesmement des grands Roys de faire en tout temps prouision tant contre les aduersitez qui peuuent suruenir, que pour aduancer les prosperitez que le temps peut offrir & presenter. En troisieme lieu, ie fais grande estime de ce que le recourrement du Marquisat seruira au Roy d'une bride pour contenir en deuoir le Duc de Sauoye, & les Espagnols mesmes, qu'ils ne machinent & n'attendent rien contre sa Maiesté, ny contre la France, de peur de reuence sur le Piémont & sur le Duché de Milan par le moyen dudit Marquisat. Vous avez experimenté que le voisinage de la France à la Sauoye, & l'experience du passé n'a point esté moyen suffisant pour destourner la conuoitise & ambition du Duc de nous iniurier & outrager par la prise du Marquisat. Mais quand la France aura recourré ledit Marquisat, & que nous pourrons nous reuencer non seulement sur la Sauoye pour la prochaineté de la France, mais aussi sur le Piémont par le moyen du Marquisat, il se gardera bien, quelque remuant & frotillant qu'il soit, de rien attendre contre le Roy, ny contre son Royaume. Les Espagnols aussi qui vous brauent aujourd'huy, se garderont bien apres que vous aurez le Marquisat de vous faire plus de ces tours, craignant que vous ne vous ruassiez sur le Milanois, où ils scauent qu'ils sont hays à mort comme aussi à Naples & par tout là où ils commandent. Aussi à present que ils n'ont plus les dix-sept Prouinces cedées à l'Infante & à l'Archiduc Albert, ils ne pensent pas que vous ayez moyen de les entamer ailleurs: car les aduenés d'Espagne sont malaisées par terre, & nous n'auons galeres ny autre équipage pour leur rien faire par mer. Outre que l'Espagne estant aujourd'huy toute vnüe, a trop de moyen de se defendre de qui que ce soit, de façon que tout ce qu'ils craignent est en Italie.

Aussi voyez-vous comme ils s'en remuent pour vne cause iniuste, laissant faire au Prince Maurice aux Pays-bas, & au Turc en Hongrie, & au pays de l'Archiduc Ferdinãd cousin & beaufrere du Roy d'Espagne, où les Turcs viennent de prendre Canise, & n'ont plus rien qui les arreste iusqu'à Gratz, qui est la principale maison & habitation dudit Archiduc Ferdinand, & distante de Canise de sept lieuës d'Allemagne seulement. Par ainsi ie ne voy point que pour chose du monde vous deuiiez laisser le Marquisat, & lequel outre la reputation qui importe tant, vous conserue, & facilite les occasions que le temps vous peut presenter à l'aduenir, & vous assure pour tousiours de la uarieté & malice de ce dangereux Duc, & de l'ambirion & puissance des Espagnols.

Ie ne doute point que prenant recompense delà les mots, on ne vous donne un pays de plus de reuenu & de moins de despense que ne fera le Marquisat, qu'on vous rendra mesmement tout ruiné & destruit, & que cela ne vous fust quelque moyen d'encherir au Duc de Sauoye les conditions de l'accord;

DDDD

mais les trois considerations , de la reputation presente , & des occasions que le temps peut apporter à l'aduenir , & du moyen de vous assurer des maintenant des machinations & attentats du Duc de Sauoye & des Espagnols , me semblent d'un si grand poids , en comparaison de quelque reuenu & espargne de plus ; que pour mon regard ie ne mettrois pas seulement en deliberation si ie deurois quitter le Marquisat , tant s'en faut que ie m'y pûsse resoudre jamais.

Vn peu de reuenu de plus , mesme en vn grand Roy , ne fait pas la reputation , mais la reputation aequiert les reuenus & les Estats , & les conserue & maintient : aussi le moindre faux bond que le Duc vous fera , si vous ne le bridez bien par le recouurement dudit Marquisat , vous fera plus couster d'argent en six mois , outre les hommes , la peine & le danger , que ne scauroit monter en plusieurs annees le reuenu de tout ce qu'il vous pourroit bailler. Mais à tant est-ce assez parlé de cela.

Par mes deux dernieres depeschés ie vous ay donné aduis des lettes que les Espagnols font au Royaume de Naples ; à quoy i'adionstéray maintenant que les derniers aduis portent que les galeres dudit Royaume estoient arriuees à Naples , & qu'on y attendoit celles de Sicile pour y embarquer les gens de guerre distribuez çà & là par la coste de la mer , lesquels on auoit aussi à ceste fin fait approcher de ladite ville ; Qu'on en auoit ià enuoyé six cens en ces places principales que le Roy d'Espagne a au Sienois ; Qu'on auoit aussi fait venir à Naples mille Albanois par vn assez court traict que il y a bien d'un certain lieu dudit Royaume en Albanie , pour les monter à cheual , & les faire marcher vers le Piémont par terre ; outre autre cinq cens hommes à cheual qui s'y estoient déia acheminez.

Quant aux leues de Milan , ie vous en ay aussi donné aduis cy deuant ; maintenant on dit qu'elles ont toutes marché vers le Piémont , & que le Comte de Fuentes y a mesme enuoyé ses gardes , & que lesdites leues font partie de l'armee que le Duc de Sauoye conduit au secours de Montmelian , pour lequel il partit le dernier d'Octobre de Thurin , y laissant Monsieur le Cardinal Aldobrandin qui n'en partit que le deuxiesme de ce mois. Les Sauoyards & Espagnols se promettent toutes choses de ceste expedition , & que le Duc surprendra l'armee du Roy , pendant que les vns s'amuseront à receuoir ledit Cardinal d'un costé , & la Roynie d'un autre : & quoy que ce soit , qu'il la forcera , & deliurera le Chasteau de Montmelian du siege. Je ne suis pas marry de la vanterie , mais ie le serois bien si le Roy s'estoit trouué absent lors que ledit Duc aura fait ses efforts , comme ie croy qu'il les ayt fait mes-huy.

Des deliberations du Roy d'Espagne quant à la guerre , ie croy qu'il veut à la verité secourir le Duc de Sauoye de tout ce qu'il pourra , puis qu'il s'y est desia si fort engagé ; mais qu'il aymeroit mieux vn bon accord , avec la restitution mesme dudit Marquisat de Salusses , que d'entrer en guerre contre le Roy. Je le coniecture ainsi , pource que ie le tiens pour vn Prince sage & bien conseillé , qui doit cognoistre qu'il peut plus perdre en ceste guerre que gagner , & mesme si elle passe en Italie ; & doit se souvenir qu'il n'a point melioré de consideration depuis la paix de Vervins que fit le Roy son pere ; là où nostre Roy & son Royaume sont en beaucoup meilleur

estât qu'il n'estoit alors ; Qu'il a encore assez d'affaires ailleurs, ayant la guerre avec les Anglois, Zelandois, ou Hollandois, ou celle que le Turc fait à ses plus proches parimens de la maison d'Autriche en Hongrie, & en la Scirie, auxquels il doit plustost secours en vne cause iuste & pie, que contre le Roy tres-Christien. Et ie veux croire que nonobstant l'ancienne & perpetuelle emulation entre ces deux Couronnes, & les flatteurs qui ne manquent iamais d'enfler le cœur d'un grand & ieune Roy, ce qu'il ne se remuera ainsi contre nous ne prouient pas tant de son propre mouuement, comme de la mauuaise impressiõ que le Duc de Sauoye par ses artifices & intentions fausses luy a donnée du Roy, duquel la valeur & prosperité est d'ailleurs redoutée par quelõques ministres d'Espagne mesmement qu'ils ne se peuuent asseurer de sa foy & integrité, pour n'en auoir point en eux mesmes, & mesurer les autres à leurs pieds.

Les efforts qu'il peut faire contre vous auant le Prin-temps, estant desia la saison si aduancée, seront qu'il fera marcher vers le Piémont & la Sauoye toutes les forces qu'il aura pû tirer du Milanois & du Royaume de Naples, & d'ailleurs les logera le plus près qu'il sera possible à plusieurs fins, comme ceste nation est fort prudente & preuoyante. Premièrement, pour vous empeschet de faire autres progresz, & vous induire à vous accorder, & à vous contenter de moins en l'accord à faire. Secondement, pour espier cependant l'occasion de vous surprendre, & de vous embler quelque place, laquelle occasion les Espagnols & Sauoyards attendent de la rigueur mesme de l'huiuer, qui fera à leurs aduis que vous vous en douterez moins, & de l'impatience de laquelle on taxe les François, comme gens qui ne puissent endurer & patienter, ny s'arrester longuement en vn lieu où ils n'ayent toutes leurs commoditez. Tiercement, pour n'auoir à amasser & à attendre les gens au Printemps qu'il faudroit sortir en campagne, ains les auoir tous prests, & gagner temps, & faire de la besongne, pendant que vous ferez venir de loing, & assemblerez vos forces. Mais ie m'assure que vous ne serez moins patiens, ny moins pouruoyans que les Espagnols, & rendrez vaines toutes leurs esperances.

Audemeurant le Roy a tres-bien fait de s'excuser enuers Monsieur le Duc de Lorraine de l'instance que son Altesse vouloit que sa Maiesté fist enuers le Pape, car c'eust esté temps & peine perduë de refueiller les choses qu'on doit laisser dormir pour vn temps.

Il vous plaira voir la copie d'un memoire qu'un Gabriel Castagne Religieux des Conuentuels Cordeliers de Grenoble a fait presenter au Pape escrit de sa main, où trop indiscrettement, & en temps mal opportun, & encore contre verité, il deserie les choses de la Religion en France, contre la bonne & vraye information qui en a esté donnée au Pape par les ministres du Roy & contre la bonne esperance que sa Sainteté en a conceuë ; & ce pour l'ambition que ledit Castagne a d'estre employé en la charge de Visiteur, que ie sçay tres-bien que le Pape ne luy commettra. Je recognois qu'il y a trop de confidenciaires en France : mais tant s'en faut que pour cela il n'y ait point de Messe, & que les Sacremés ne soient point administrez, qu'au contraire on tient des confidenciaires pour cela, & que ceux qui tirent les fruiets veulent que la Messe y soit celebree. L'Abbé de saint Martin

est party de ceste ville pour aller demeurer en Lombardie avec sa prétenduë demoniaque.

Je n'ay point esté à l'audience les deux derniers Vendredis, pour n'auoir de vos lettres, ny rien à traiter avec le Pape: mais aux iours de chappelle & de Consistoire ie m'en suis excusé enuers sa Sainteté & enuers Monsieur le Cardinal S. George son nepueu, afin qu'ils ne pensassent point que se fust pour autre chose. Le 3. de ce mois pource que ie n'y auois point esté, le Pape fit enuoyer par Monsieur le Cardinal S. George la copie d'un memoire & plainte qui auoit esté presentee à sa Sainteté, à mon aduis par l'Ambassadeur de Sauoye, pour & au nō du sieur d'Anuili de Chablais auquel sa Sainteté desire que le Roy face restituer sa maison & les autres biens que ledit d'Anuili dit luy auoir esté pris, iacoit qu'il n'ye point porté les armes contre sa M. ains se soit confié en la declaration faite publier par sadite M. & la sauue-garde portee par icelle. Je vous enuoye ladite copie, & vous prie apres auoir veu sa plainte, vous bien informer du fait, & m'escire la response que le Roy voudra que ie face là dessus à sa Sainteté.

Il y a quelque mauuais mesnage entre le Pape & le Duc d'Vrbain, pour des traittes de bleds que quelques-vns faisoient de l'Estat Ecclesiastique, qu'ils alloient vendre à Senegaille, lieu & port dudit Duc d'Vrbain; & pource que sa Sainteté a fait mettre aux confins d'entre luy & le Duc quelques soldats Corfes, pour empescher & arrester ceux qui transporteroyēt lesdits bleds, ledit Duc d'Vrbain a aussi redoublé les garnisons de là auprès: ce qui a esté cause que sa Sainteté fait leuer sourdement quelques gens en la Marque d'Ancone sans sonner le tambour, ny faire autre bruit.

Mais ie ne pense pas que cela aille plus auant, tant le naturel du Pape, & la condition de cetemps, & le respect aussi à mon aduis dudit Duc d'Vrbain sont esloignez de susciter quelque nouueau trouble. Le Gouverneur que les Geneuois riennent en l'Isle de Corse a donné aduis à ses maîtres, que le Cicale Capitaine de l'armee Turquesque a esté veu passer à venē de la Sardaigne avec 40. galeres, dont les Sauoyards & Espagnols ont pris occasion de dire contre verité, & dontre toute apparence, que c'estoit le Roy qui faisoit venir ledit Cicale en la coste de Prouence.

L'on tient en ceste Cour, chez le Pape mesme, que l'Empereur est deuenu fol, & commence-t'on ià à parler de nouvelle election, où le Roy n'est point oublié: mais comme telle chose pourroit reüssir au bien commun de la Chrestienté, aussi ne sçay-ie si se seroit le meilleur pour le particulier de nostre France.

Mardy au soir 7. de ce mois le Cardinal André d'Autriche, qui partāt dernièrement de ceste ville estoit allé à Naples, fut de retour icy malade, & mourut la nuit d'entre le Samedy 11. & le Dimanche 12. de ce mois.

Peu de iours apres que les enfans de Monsieur de Vitry furent arriuez en ceste ville, l'aisné fut surpris d'une maladie avec letargie dont il est mort 14. iours apres, nonobstant qu'on aye fait tout ce qui a esté possible pour le conseruer. Son gouuerneur en est fort desolé & ne sçait comme le faire entendre à Monsieur de Vitry pere.

A tant, &c. De Rome ce 15. Nouembre, 1600.

## A MONSIEUR DE VILLEROY.

CCXL.

**M**ONSIEUR, Par ma dernière lettre du quinzième de Novembre je respondis à la vostre du 17. d'Octobre. Le Vendredy ensuiuant 17. dudit mois de Novembre ie fus à l'audience, où ie n'auois point esté les deux Vendredis precedens, comme ie vous ay escrit par ma dernière; & dès le commencement ie dis au Pape comme i'auois deux iours auparavant receu ladicte dépêche, par laquelle l'on m'aduisoit de l'arriuee du sieur Erminio & des audiunces que Monsieur le Patriarche & luy auoyent eues de sa Maiesté les 9. & 15. d'Octobre: mais sa Saincteté ayant esté aduertie par eux de tout par courriers expres, que ie scauois estre arriuez plusieurs iours auparavant, il n'estoit point besoin que ie l'en entretenisse, & mesmement n'ayant moy aucun commandement de traicter d'autre chose qui y appartenist. Aussi ne s'y passa autre chose là dessus, pource que sa Saincteté ne me donna point occasion de luy en parler plus auant & que ie n'auois à le requérir de rien, ny à prendre aucune conclusion sur cela.

Passant donc outre à autres choses, ie luy dis comme i'auois receu lettres de Monsieur de Sillery escrites le 17. Octobre à Antibes, où la Roynne estoit arriuee ce iour là; & que sa Maiesté desiroit auoir de sa Saincteté permission d'entrer és Monasteres de France, tant de Religieux que de Religieuses.

Sa Saincteté me respondit, que pour ceste heure il luy bailleroit permission d'entrer és Monasteres de Religieuses, & puis en ceux des Religieux si le Roy s'en contenteroit, & se prit de luy mesme à rire de sa response plus que ie ne l'auois veu rire auparavant, & de ma part i'en ris gueres moins.

Après cela ie luy parlay pour quelques particuliers, comme il y a tousiours quelque requeste à faire pour des François, & encore pour d'autres à qui les ministres du Roy ne doiuent manquer, en tant que la discretion le peut comporter. Quand i'eus acheué, sa Saincteté me dit qu'elle auoit lettres de Monsieur le Cardinal Aldobrandin escrites à Lunebourg, par lesquelles il escrinoit qu'il auoit trouué audit lieu des gens du Roy qui luy auoient dit que sa Maiesté l'attendoit à Chambery, où ledit seigneur Cardinal esperoit arriuer le 8. de Novembre. Je luy dis sur cela, que sa Saincteté pouuoit iuger de la vanité & malice de ceux qui auoyent dit que le Roy feroit naqueter vn fort long-temps ledit seigneur Cardinal auant que il l'otüst.

On m'auoit escrit à moy-mesme (dit-il) que le Roy s'estoit party de ces

quartiers là, & auoit diuisé son Conseil en 3. parts, & laissé les vns à Chambéry, & les autres enuoyez à Grenoble & à Lyon, afin que ledit seign. Cardinal n'eust où aller, ny que faire. Padioustay que ledit seign. Card. seroit non seulement ouy, mais bien veu auprès de sa M. & qu'il trouueroit en elle toute reuerence & gratitude enuers sa Sainteté, & toute amitié enuers luy, & rondeur & franchise au traictier, de façon qu'il seroit bien tost resolu de ce qui se pouuoit faire, ou non. Sa Sainteté me repliqua qu'ils l'esperoient ainsi, & que le Roy trouueroit aussi ledit seigneur Cardinal qui traicteroit de mesme, comme il auoit d'ailleurs intérêt de n'arrester par delà que le moins qu'il pourroit, & de s'en retourner par deçà le plustost qu'il luy seroit possible.

Sortant de chez le Pape j'allay trouuer Monsieur le Cardinal saint George. Apres que ie luy eus dit ce que j'auois à traicter avec sa Sainteté, ie le priay qu'il luy pleust sauoir auprès du Pape le Pere Pierre Lomelin Religieux de l'ordre de saint Benoist & frere de Monsieur Lomelin, pour luy faire auoir l'Archeuesché de Gennes vacant par le deceds du dernier Archeuesque, dont j'auois esté aduertuy. & requis par vne lettre du sieur Ambrosio Lomelin, qui m'auoit esté rendu le soir auparauant; & ledit seigneur me promit den parler au Pape, & de faire tout bon office audit Religieux enuers sa Sainteté. Pour cela ie ne laissay d'en parler moy-mesme au Pape le Lundy ensuiuant 20. Nouembre, qui fut iour de Consistoire; & sa Sainteté me respondit qu'il n'estoit pas pour se resoudre si tost en personne de qui il colloqueroit ceste dignité, mais qu'en temps & lieu il se souuiendrait de ce suiet icy parmy ceux qui luy auoyent esté & seroyent proposez, pour y auoir tel esgard qu'il conuiendrait.

Le 23. Nouembre ie receus la lettre qu'il vous plût m'escrire le douzième, par le courrier que depescha en çà Monsieur le Cardinal Aldobradin, par laquelle j'appris l'arrivée par delà dudit Seigneur Cardinal, la reception, son audience, & ses bons & sages deportemens, & les autres choses contenues en ladite lettre, laquelle fut cause que le lendemain 24. de Nouembre j'allay à l'audience, que ie commençay par exposer au Pape la reception de ladite lettre, & le subiet d'icelle en general; surquoy ie luy dis ne me vouloit estendre, pource que Monsieur le Cardinal Legat le luy auroit escrit luy-mesme. Sa Sainteté sans attendre autre chose me dist, qu'il estoit marry de ce qu'on auoit escrit par delà que ledit seigneur Cardinal auoit esté enuoyé à l'instance des Sauoyards & Espagnols: mais qu'on verroit bien par la façon de traicter dudit Cardinal, & par toutes autres choses, comme & à quelle fin il y auoit esté enuoyé. Je luy respondis, que Monsieur de Sillery & moy auions tousiours fait tout ce que nous auions pu pour conseruer & accroistre la bonne intelligence qui estoit entre sa Sainteté & le Roy, & pour asseurer sa M. des bonnes graces de sa Sainteté, & de sa bonne & droicte intention; & quant à ce particulier, ie ne sçauois point si Monsieur de Sillery l'auoit escrit ou non: mais pour mon regard ie voulois bien luy confesser ingenuement que ie pensois me souuenir d'auoir escrit, que le partement dudit seigneur Cardinal auoit esté fort pressé & sollicité par les Sauoyards & Espagnols, & que sans telle instance si pressée, sa Sainteté l'eust différé pour quelque temps: ce que j'auois tousiours craint & cra-

Vois entores, & s'estoit dit par tout Rome, ains Monsieur de Sillery & moy l'amis dit à sa Sainteté mesme, & luy auions cotté les fins que ces importants luy proposoient; à sçauoir d'obtenir les conditions aduantageuses pour eux, & pour l'autorité de sa Sainteté, ou diminuer la bien-vueillâce paternelle qu'il portoit à sa M. & rompre la susdite bonne intelligence qui estoit entr'eux deux; Que cecy n'auoit pas esté escrit pour exclurre la vraye & principale cause de ceste legation qui estoit la charité paternelle de sa Sainteté enuers ses enfans, & le desir de cōseruer la paix entre les Princes Chrestiens, qu'elle auoit mesmement procuree & parfaite, & d'obuier aux maux infinis qui prouienent des guerres, & mesmement en cette occasion du progrez que le Turc fait sur la Chrestienté, ains pour excuser sa Sainteté de ce que par dessus les remonstrâces que ledit sieur de Sillery & moy luy auis faites plusieurs fois afin de n'enuoyer aucun Legat, & moins ledit seigneur Cardinal Aldobrandin, ou d'attendre quelque temps plus oportun, elle auoit neantmoins esté forcee de l'enuoyer auant saison, par la presse extrême qui luy en auoit esté faite; Que ceste excuse neantmoins auoit esté enuoyée par la vanterie du Duc de Sauoye, lequel plus de quinze iours auant que le sieur Erminio arrinast au Roy, auoit publié la venue prochaine de Monsieur le Cardinal Aldobrandin, & le fruiet qu'il en attendoit, pour le fait de ses desseins & intentions; & toutesfois lors que ledit sieur Erminio partit de Rome, Monsieur de Sillery & moy ne sçauions point & ne croyons point que ledit seigneur Cardinal deust aller Legat en France; mais pour cela le Roy n'estoit iamais entré en deffiance des bonnes & droictes intentions de sa Sainteté, & ledit Seigneur Cardinal n'auoit laissé d'estre bien venu, honoré, & reueré par le Roy, par tous les Princes, seigneurs, & gentils-hommes de la Cour de sa Maiesté, comme sa Sainteté en deuoit estre informée. Alors sa Sainteté me dit, qu'à la verité ledit seigneur Card. auoit esté tres-honorablement recueilly, & que par ses lettres il se loioit infiniment de la courtoisie du Roy, & de tous les Princes & seigneurs, & entre'autres tesmoignoit fort amplement la bonne affection & respect que sa M. portoit à sa Sainteté, laquelle en cet endroit dit aussi qu'elle luy correspondoit, de façon qu'elle desiroit au Roy tout le bien & prosperité qu'elle se desiroit à soy-mesme; dont ie la remerciai, & passant outre ie luy dis que ie luy voulois dire vne chose que ledit seigneur Cardinal ne luy auoit point escrite; c'est qu'il s'estoit comporté avec tant de prudence, & cordialité & candeur, qui sont les mesmes mots dont vous vſez en vostre lettre, que le Roy & toute sa Cour en estoient demeurez tres-satisfaits & contés, & que vous en particulier esperiez que Dieu bepiroit sa legation, à quoy seruiroyent tons les gens de bien de tout leur pouuoir. Le Pape print grand plaisir à ce propos, & me dit que mondit sieur le Cardinal par ses lettres faisoit mention de vous, & monstroist auoir vne particuliere esperance en vous.

Quand ce propos fut acheué i'en commençay vn autre, luy disant que i'auois receu lettres de Bruxelles du 4. de Novembre (c'estoyent lettres de Monsieur de la Boderie) par lesquelles i'estois aduertny, que le Comte de Sorrel vn des principaux seigneurs de ce pays-là, & des plus confidés qu'eussent l'Archiduc & l'Infante, venoit à Rome, pour gagner le Jubilé seules-



ment, mais qu'on pensoit que ce fust pour traicter avec sa Sainteté de la part de leurs Alteſſes; & qu'en ce qui ne touchoit point le Roy ny la France, ie n'y auois que faire, mais ſi d'auenture, ce que ie ne croyois point, c'estoit choſe contre ſa M. ou contre ſon Royaume, ie priois ſa Sainteté de n'y adiouſter foy, & moins condeſcendre à aucune requête qu'il luy pûſſent faire en tel cas comme ie voulois & pouuois aſſeurer ſa Sainteté, que le Roy auoit toute bonne affection enuers eux, & ne penſois à rien moins qu'à les inquieter ou moleſter en façon du monde, comme iel'auois ſçeu n'aguères ſur certaines occaſions qui s'eſtoient preſentées. Sa Sainteté ne reſpondit autre choſe, ſi non qu'elle n'auoit rien entendu de ce voyage. Il luy diſ enſuy, qu' auparauant ledit Comte eſtoit party de ce pays le Docteur Boucher, pour venir à Rome viſiter *Lumina Apoſtolorum Petri & Pauli* au nom de l'Eueſque de Tournay, qui luy auoit donné vn Canoniat en ſon Eglise: & là deſſus i'expoſay à ſa Sainteté la violence & rage de cét homme, les liures qu'il auoit eſcrits contre le ſeu Roy, & depuis contre la conuerſion, & contre la vie du Roy à preſent regnant, ſouſtenant le parricide attenté par Iean Chaſtel, & exhortant vn chacun à paracheuer ce que cét diſſin auoit commencé; où il auoit encores eſcrit pluſieurs choſes contre l'autorité & puiſſance du Pape & du S. Siege, & eſtoit encores au iourd'huy plus obſtiné & plus violent que iamais, & qu'il y auoit trop de lieu & de raiſon de l'arreſter priſonnier, & de le bien punir de ſes forfaits & blaſphemes: mais ſi la bonté & clemence de ſa Sainteté, & la condition du temps & autres reſpects ne luy conſeilloient point d'vſer en l'endroit de cét homme de la rigueur qu'il meritoit, qu'au moins ſa Sainteté luy monſtrast, en ne l'admettant point à ſes pieds ou autrement, que telles gens luy deſplaiſoient, & ne deuoit attendre de ſa Sainteté les accueils & graces qui ſont deuës aux gens de bien, paiſibles & moderez. Le Pape me reſpondit, qu'il ſe ſouuenoit d'auoir autresfois ouy parler de cét homme, & meſme que le ſieur Maluaiſie alors Nonce és Pays bas, luy auoit eſcrit qu'il diſoit que le Pape ne pouuoit àbsoudre le Roy. Sa Sainteté me demanda s'il eſtoit arriué: le luy diſ que non, que ie ſçeuffe. Or bien (dit-il) nous verrons. Apres cela, ie luy parlay pour quelques particliers à l'accouſtume: & en partant ſa Sainteté m'exhorta de faire tout ce que ie pourrois pour la paix, comme il fait quaſi à toutes les audiences. Monſieur le Cardinal ſainct George, auquel i'allay en ſortant de chez le Pape, me dit enſuy plus au long le recit que Monſieur le Cardinal Aldobrandin auoit fait par ſes lettres des honneurs & faueurs qu'il auoit receus du Roy & de tous les Grands de la Cour, dont ledit Cardinal ſainct George ſe recognoiſſoit grandement obligé en ſon particulier, avec toute la maiſon Aldobrandine. Auſſi en eſt le bruit eſpandu en toute ceſte Cour, & chacun en louë & magnifie ſa Maieſté, laquelle auſſi ne pouuoit mieux faire, que de recevoir Monſieur le Legat toſt & bien comme elle a fait, & au poinct de la negociation luy complaire autant que le bien de ſes affaires & de ſon Royaume & ſon honneur & reputation le peut comporter.

Le 26. Novembre ie receus par l'ordinaire de Lyon les deux lettres du 7. du meſme mois, & les copies de la capitulation du chateau de Montmelian, & de la lettre de Monſieur de Sauoye au Comte de Brandis, de la nouuel-

le promesse touchant ladite capitulation, de la lettre de Monsieur le Cardinal Aldobrandin au Roy & de la réponse de sa Maïesté. Je respondray aux points de vos deux lettres qui me semblent en auoir quelque besoing. Premièrement donc, i'ay esté fort aise d'entendre que mes deux lettres du 14. d'Octobre vous eussent esté rendues; & quant à ce que ie vous auois escrit de reconuer le Marquisat, quelque accord que vous vissiez au reste cōme ie le vous ay encor escrit par ma dernière, ç'a esté selon que i'en puis iuger, & neantmoins i'estimeray toujours meilleur ce que le Roy en aura arresté, & au moindre signe que vous me ferez, ie seruiray sa Maïesté autāt en vne façon comme en l'autre, si i'y puis rien, ou si i'anray à y faire quelque chose par deçà. Cependant par la resolution que le Roy a prinse en l'estat où les choses estoient de n'aller point à Marseille, ains de se tenir en son cāp, il y a non seulement assurez ses affaires mais aussi de beaucoup accrus sa reputation par deçà, enuers tous ceux qui considerent la grande tē-tation qu'il doit auoir en, la force qu'il a faite qu'il se soit fait à soy-mesme. De ma part, ie n'ay point depuis le commencement de ceste guerre rien appris qu'il m'aye deliuré d'un plus grand soucy, ny apporté tant de plaisir & d'aise. I'ay bien noté ce qui s'est passé en Espagne touchant Monsieur de la Rocheport iusques au 12. d'Octobre, & m'en seruiray là où besoin sera. Quant aux deportemens du Nonce qui reside en Suisse, i'en feray plainte ce jourd'huy au Pape en l'audience que i'auray apresdiner, de laquelle audience & des choses que i'auray apprises de deçà ie vous feray vne lettre à part. Cependant ie finiray la presente par mes bien-humbles recommandations à vostre bonne grace, priant Dieu qu'il vous donne, Monsieur, &c. De Rome ce 1. Decembre, 1600.

## A MONSIEVR DE VILLEROY.

CCXLI.

**M**ONSIEVR, Sur la fin d'une lettre que ie vous escriuis hier, ie mis que ie vous ferois vne lettre à part de l'audience que i'aurois l'apresdinee, & de occurrences que i'aurois apprises: ceste-cy sera ladite lettre à part. Je dis doncques au Pape dès le commencement de l'audience, que depuis la dernière fois que ie fus à ses pieds, i'auois receu de vos lettres du 7. Nouembre par l'ordinaire; Que comme ceste lettre estoit venuë tard, aussi n'y auoit-il rien que sa Sainteté n'eust desia entendu d'ailleurs, cōme la capitulation de la forteresse de Mont-melian, & la resolution que le Roy auoit prise de n'aller à Marseille, & telles autres choses: Que ie n'y auois nō plus receu commandement de traicter avec sa Sainteté, sinon que de deux choses, dont la première m'estoit venuë fort contre mon opinion, moy ayāt toujours tenu le Comte Iean de la Tour Euesque de Vella son Nonce aux Suisses pour vn fort honneste gentil-homme, & Prelat sage & modéré, & toutesfois le Roy me commandeit de faire plainte à sa Sainteté, que sondit Nonce, qui comme ministre du pere commun de tous les Princes Chrestiens,

E E E

deuoit demeurer neutre, se monstroit néanmoins partial pour les Espagnols & Sauoyards, faisant en cela tort à sa Sainteté, & donnant occasion d'en mal penser, si d'ailleurs nous n'estions asseurez de sa bonne & droicte intention. Sa Sainteté sans attendre que ie luy en disse d'auantage, me respondit que ceux de ceste maison de la Tour auoyent tousiours esté tenus pour Guelfes, & le Cardinal de la Tour son oncle estant Euesque de Ceneda auoit esté Nonce en France: Que cestuy-cy son nepueu estoit de soy bien sage, & auoit eu de sa Sainteté instruction & commandement exprés de ne partialiser pour aucun Prince, mais de viser tousiours à la paix en commun: de façon qu'elle s'asseuroit que cecy estoit vne calomnie, & vn effet de soupçons, & de ialousies que les ministres de diuers Princes conceuoient les vns des autres. Ie luy repliquay, que d'une mesme famille les vns sont pour vn Prince, les autres pour vn autre, & qu'avec le téps & la vicissitude des choses humaines les hommes changeoyent de party: Que ie venois de laisser son antichambre l'Ambassadeur de l'Empereur, qui estoit du mesme pays du Frioul, & de la mesme maison de la Tour, & que les Intérêts de l'Empereur & du Roy d'Espagne estoient pour le iourd'huy si conioincts pour le regard d'un Prince tiers, que qui seruiroit l'Empereur seruiroit en consequence le Roy d'Espagne: Que possible ledit Ambassadeur de l'Empereur, outre infinies autres moyens que les Espagnols ont, pourroit auoir haleté ce sien parent comme il se fait, par ainsi ie croyois qu'il estoit bon que sa Sainteté y print garde. Il me respondit qu'il luy en escriroit, iasoit qu'il s'assurast qu'il n'en fust de besoin.

Après cela ie le priay de la part du Roy de permettre à Monsieur Lomelin de resigner & vendre son estat de clerc de chambre à personne capable & agreable à sa Beatitude, & me seruis des raisons contenuës en la lettre à part qu'il plût à vostre Maiesté m'en escrire le 6. Nouembre, y adionstant encores de plus ce que Dieu m'inspira. Sa Sainteté après auoir vn peu gaussé sur l'indisposition dudit sieur Lomelin, comme auez entendu d'ailleurs qu'il a accoustumé quand on luy parle de luy, me respondit qu'il n'estoit pas ainsi des grands estats comme des menus offices, qu'on permettoit de resigner & vendre. Et comme ie luy redisois les principales raisons qui le deuoient mouuoir à faire ceste grace au Roy, il me dit qu'il ne m'en vouloit rien promettre pour lors, ains y vouloit penser: & puis après ce coup, me dit que Monsieur le Cardinal Aldobrandin seroit arrivé depuis que ce commandement m'auoit esté fait, & ie luy dis qu'ouy, & que Monsieur Lomelin n'auoit point failly de faire son deuoir enuers luy. I'estime que sa Sainteté se resoudra de complaire au Roy: mais ce dernier mot de sa Sainteté, me donne à penser qu'elle aimeroit mieux en ceste occasion accorder ceste grace à sa Maiesté par le moyen & intercession de mondit sieur le Cardinal Aldobrandin, qu'autrement, à fin d'incliner par mesme moyen sa Maiesté à complaire & gratifier ledit seigneur Cardinal en la negociation pour laquelle il est allé vers sadite Maiesté. Et à ce propos ie vous lairray à considerer si en autres choses qui se pourroient presenter, il ne seroit pas à propos, pendant que la negociation durera, que sa Maiesté aille retenuë à demander des grâces d'importance à sa Sainteté, en parlant audit seigneur Cardinal Aldobrandin & autrement: en quoy ie voudrois mesurer & esti-

met l'importance, nontant par la chose en soy, comme par la resistance qui se trouue en sa Sainteté, ores pour le peu d'inclination qu'il a vers les personnes, ores pour le scrupule qu'il trouue es affaires dont on luy fait instance. Comme (pour n'aller point querir exemple plus loing) i'estime que ce soit moins que rien à vn Pape d'admettre ceste resignation, en ne regardant qu'à la chose en soy: mais il est si peu incliné à la personne, que la resistance qu'il sent en soy mesme luy fait estimer que ce soit vne grande chose. Quand la consideration publique sera finie, sa Maiesté pourra plus aisément complaire les particuliers en leurs desirs prieuez.

Au demeurant, le Dur de Saoye continuë tousiours par deçà ses artifices & calomnies, & a fait presenter ces iours passez par ses ministres vn memoire au Pape, sous le nom des peuples conuertis d'auprés de Geneue, de la teneur que vous verrez par la copie que ie vous enuoye. Le Pape ne m'en a point parlé, soit qu'il n'en ait rien creu, & se souuienne que ie luy ay plusieurs fois respondu à telles calomnies, ou pour quelque autre consideration. Mais ie l'ay sceu & eu ladite copie d'ailleurs, & n'ay estimé en deuoir rien dire à sa Sainteté puis qu'elle ne m'en parloit point.

Aussi fait-on dire icy que le Roy tient vn gentil-homme en Allemagne près les Princes Protestans appellé Bongars, lequel dit ausdits Princes Protestans & à ceux de leur secte, que le Roy pour la conversion n'a point changé d'opinion en son cœur, mais que pour iouyr paisiblement de son Royaume, il a façonné son extérieur, s'accommodant au temps, & à ce que son profit requeroit. Je ne peux croire que ledit Bongars tienne ce langage si contraire à la verité, & à la bonne foy dont le Roy doit estre recommandé, non seulement enuers les Catholiques, mais aussi enuers les Protestans mesmes, qui autrement ne s'y pourroyent fier, & ne voudroyent s'employet pour luy: mais ie tiens que c'est vne inuention Saoyarde & Espagnolle. I'ay eu cet aduis de Monsieur Gauchery, qui est icy depuis vn mois, & m'a dit qu'un Allemand appellé Schoppius le luy auoit dit, lequel en auoit receu lettres d'Allemagne d'un d'Ansbourg appellé Mayer.

A Naples on est tousiours apres l'embarquement des soldats qu'on a leuez en ce Royaume là, & en a r'on fait aduancer vne partie par terre, & outre la quantité dont ie vous ay donné aduis cy-deuant, on veut tirer des garnisons de Sicile & dudit Royaume de Naples deux mille Espagnols, pour les envoyer au Milanois: on y fond aussi vne grande quantité d'artillerie, pour la guerre de Saoye & de Piémont. Cependant plusieurs des soldats leuez s'enfuyent, contre lesquels on a publié des Edicts fort rigoureux. Il passa hier icy vn gentil-homme Albanois, enuoyé de Milan par le Comte de Fuentes, pour aller à Naples solliciter l'acheminement de la cavalerie Albanoise, dont ie vous ay escrit cy-deuant.

Tant plus on pense à la foudre leuee des gens que le Pape fait en la Mar-que d'Ancone, dont ie vous ay donné aduis par mes dernières, tant moins on en scait la fin & intention de sa Sainteté. On ne croit plus que ce soit comme le Duc d'Urbain; mais on dit plusieurs autres occasions, & que c'est pour secourir l'Archiduc Ferdinand contre les Turcs & Protestans, & pour ayder à prendre Ghise, que les Turcs tiennent en ces quartiers là, où pour saoye s'empare de Saluote, contre le Duc de Modenz, qui s'est esten-

du maistre depuis quelque temps, comme de sief qui luy soit deuolt, on peut enuoyer se saisir de Tremiti, qui est vne petite Isle appartenant aux Chanoines & Chapitre de S. Iean de Latran, en la coste du Royaume de Naple. Monsieur le Card. de Sourdis arriua en ceste ville le 25. Nouembre, & ce iourd'huy a fait son entree, & pris le chapeau, ie luy dis hier que ie me remettois à luy d'aduertir le Roy de sa venue, & de tout ce qui y appartenoit, & que ie n'en escrirois autre chose. Au demeurant, ie me souuiendray de ce qu'il vous a pleu m'en escrire à la fin de l'vne de vos deux lettres du 6. Nouembre.

Ie responds à vne lettre que Monsieur le Cardinal Aldobrandin m'a écrite, touchant les honneurs extraordinaires que le Roy luy a faits; ie vous prie luy faire rendre ma responce. Ie viens de recevoir tout maintenant la lettre du Roy & la vostre du 16. Nouembre, qui m'ont annoncé la bonne nouvelle de la reddition de la forteresse de Mont-melian à sa Maesté, dont ie louë Dieu, & le prie de continuer à honir & faire prospérer les armes du Roy, & qu'il vous donne à vous, Monsieur, &c. De Rome ce 2. Decembre 1600.

## A MONSIEUR DE VILLEROY.

### CCXLII.

**M**ONSIEUR, Les dernieres lettres que ie vous ay écrites, sont du 1. & 2. de ce mois. Ie fus à l'audience le Vendredy 8. & n'ayant à traiter rien de public, ie demanday à nostre S. Pere certaines graces pour les particuliers, comme l'erection d'vne Eglise collegiale en la ville de Perinas, vn iubilé particulier pour les Parroisses de S. Louys & de S. Yves de Rome, & autres choses iulques au nombre de dix, desquelles ie vous en diray vne seulement. Apres que le chasteau de Mont-melian fut assiégé par le Roy, & que l'on sceut icy que la batterie commençoit à se dresser, on y commença à faire des gageures là dessus ( comme c'est la coustume par deçà de faire des gageures de choses dont l'evenement est douteux. ) La plus commune fut, que ledit chasteau tomberoit es mains du Roy pour tout le mois de Nouembre, ceux qui fauorisoient à la France soutenant la firme, & les Sauoyards & Espagnols la negative: & ces gageures se firent par plusieurs iours en public en la place de la Banque, au veu & sceu des Magistrats & de tout Rome. Mais quand la reddition dudit chasteau au Roy fut sceue & bien asseuree, lesdicts Sauoyards & Espagnols qui auoient perdu, au lieu de payer comme ils deuoient, & comme eussent fait ceux de nostre party, & tous autres qui eussent fait quelque chose de leur foy & parole par esvent, & de leur honneur & reputation, voulant faire declarer nulles lesdites gageures, ou pour le moins, sous couleur de pitié, faire appliquer à des lieux pieux les deniers gagez, tant des gaignans que des perdans, suscitèrent sous main le Gouverneur de Rome, qui est Milanais, & qui a eu charge de collecter en Espagne pour le S. Siege, lequel faisant desdites gageures en crime, fit mettre en prison le Mercredy au soir 6. de ce mois le Sieur Hieronimo Romei.

le Consul de la nation Françoisse, auquel ils veulent mal particulièrement, pour estre tres-affectionné au service du Roy, & vn de ceux qui auoient esté des plus chauds à gager; & pour couvrir la partialité, emprisonnat-on encores quelque malotru des perdans, qui fut tout aussi tost mis en liberté. Je me plaignis donc au Pape en ladite audience de ceste façon de procéder, & ie le fis de maniere que ledit Consul fut deliuré le iour mesme dudit Vendredy, & qu'il faudra que qui a perdu paye. Je ne vous mettray point icy ce que ie dis à sa Sainteté, de peur de vous prouoquer à colere contre telles gens: mais vous pouuez bien vous assurer qu'il ne manqua ny maniere ny liberté. Aussi ne m'appercus-je point que le Pape en eust rien commandé, ny qu'il y eust aucune part, bien me dit-il qu'il seroit contrainct de prohiber toutes ces gageures, d'autant qu'on entreprenoit de gager de toutes sortes d'affaires, & qu'on taschoit de mettre des espions iusques dans son Palais propre, pour penetrer & descouurir les choses.

Au demeurant, sa Sainteté ne faillit point de me declarer à l'accoustumee le grand desir qu'elle a de la paix, & que Monsieur le Cardinal Aldobrandin s'en puisse retourner bien tost par deçà. Aussi ne faillis-je point de l'assurer de la bonne disposition du Roy au repos de la Chrestienté, & à complaire à sa Sainteté en cela, & en tout autre chose; autant que les droits de la Couronne, & son honneur & reputation le pouuoient permettre, & que sa M. ne retiendroit point le traité à la longue, ains resoudroit bien tost Monsieur le Legat de ce qu'elle voudroit faire.

Quand ie fus descendu chez Monsieur le Cardinal S. George, apres luy auoir parlé de ce que i'auois dit au Pape, il me souuint de le mettre en propos du Comte de Sore arriué n'agueres à Rome d'aupres l'Archiduc Albert & de l'Infante. Ledit seigneur Cardinal me dit qu'il auoit premierement gagné le lubilé incognu, & puis estoit venu baiser les peds au Pape, & par mesme moyen l'auoit visité luy; Qu'il ne leur auoit parlé que de ses deuotions, & de l'extrême regret qu'auoyent leurs Alteſſes de ceste guerre de Sanoie, & desir que les choses s'accordassent au plustost, & que sa Sainteté continuast à s'y employer de tout son pouuoir: & qu'au reste ledit Comte voulant aller à Naples, comme il y est allé, auoit monstré d'en faire conscience, & de craindre de perdre vne partie du fruit du lubilé, pour lequel seul il est venu à Rome; s'il alloit dépendre quelques iours en ceste curiosité, de voir vne ville & pays, que neantmoins il n'auoit oncques veu, & ne ſçauoit qu'il en recouireroit la commodité. Je luy dis que ceste simplicité & scrupulosité ne se trouuoit gueres en ceste saison, ny en ces Pays-bas, parmy ceux mesmes qui sont entretenus & employez parmy les grands Princes, & que telles protestations dudit Comte, pourroyent donner à penser au contraire à quelques vns plus soupçonneux que moy, qu'il n'eust à traicter quelque grand affaire avec le Viceroy de Naples; Que pourueu que ce ne fust chose qui touchast au service du Roy, ie ne me souciais de ſçauoir ce qu'il traicteroit à Naples, ny ce qu'il pourroit auoir traité à Rome. Bien luy voulois-je dire qu'il auoit esté escrit d'Anuers, que ledit Comte auoit charge de leurs Alteſſes de supplier le Pape des'employer enuers les Suisses, & ce qu'ils donnaſſent le passage par leurs terres à deux ou trois mille Espagnols qui deuoyent estre enuoyez par leurs Alteſſes, Surquoy i'estimois

estre de mon deuoir de luy dire, pour le monstrer au Pape, que Monsieur de Sauoye estoit si artificieux, qu'il pourroit auoir dessein d'employer lesdits Espagnols ou partie d'iceux pour soy-mesme en la Bresse au secours de la citadelle de Bourg, & qu'il seroit bon de se prendre garde que sa Sainteté pensant employer son credit & autorité contre les Zelandois & Hollandois, ne l'employast contre le Roy, dont pourroyent ensuiure des inconueniens que ledit seigneur Cardinal pouuoit iuger de soy-mesme sans que ie m'y arrestasse dauantage. Il ne repliqua autre chose, sinon qu'il m'auoit dit tout ce que ledit Comte auoit trié icy.

Je viendray donc maintenant aux occurrences de deçà, & commenceray par adiouster à ce qui a esté dit cy-dessus dudit Comte de Sore, que i'ay entendu qu'il est encor venu avec charge de demander au Pape de la part de leurs Alteesses permission de leuer certaine decime sur le Clergé des Prouinces qui leur obeïssent, & qu'il a esté escrit de Naples, qu'il auoit fort longuement négotié avec le Viceroy. Je pense qu'entre autres choses les Archiducs cherchent d'estre aydez des leuees qui se sont faictes à Naples, en cas mesmement d'accord entre le Roy & Monsieur de Sauoye. Quant au Docteur Boucher, dont ie vous auois escrit la premiere fois que ie vous fis mention dudit Comte de Sore, il n'est point arriué à Rome, soit qu'il aiteu par les chemins quelques remords de conscience, ou qu'il luy soit suruenue quelque malheur long-temps y a merité. Par les dernieres lettres qui sont venuës de Naples du 12. de ce mois, i'ay sceu qu'outre les gens de guerre qu'on a fait acheminer par cy-deuant peu à peu vers le Milanois & le Piémont, le grand embarquement se deuoit faire le 15. Mars; Qu'il n'y auoit que neuf galeres de prestes, & dix nauires.

Que le Viceroy auoit recherché le General des galeres de Malte, de le vouloir accommoder en ce besoing de galeres de Malte, qui estoient au port de Naples de retour de Marseille: mais ledit General s'en estoit excusé, disant ne le pouuoir faire sans l'expres cōmandement du grand Maistre de leur ordre; Qu'on y estoit encor à y leuer denouveau deux mille hommes de pied; Qu'outre les compagnies à cheual d'Albanois, dont ie vous ay escrit cy-deuant, on y auoit commandé à la cauallerie du Royaume de se tenir preste pour marcher quand il leur seroit ordonné.

Vous estes plus près de Milan & de Piémont que nous ne sommes icy, & en deuez entendre plus souuent des nouuelles, ie ne lairray pourtant de vous dire, que l'on escrit icy de Milan, qu'on faisoit marcher de nouueau vers le Piémont mille Espagnols outre les precedents, & plusieurs charrettes de munitions de guerre qu'on auoit tirees du chasteau, & qu'on auoit resolu d'y faire dix compagnies de gens de cheual, à sçauoir six d'arquebussiers, & quatre de lancieres & qu'un hospital de malades qu'on faisoit en Alexandrie se feroit en la suite de l'armee, & à ceste fin auoient esté déboursez douze mille escus, pour faire prouision de matelars. Et de Thaurin on escrit que l'on estoit apres à fortifier ceste ville là, & les autres de Piémont, & que les Espagnols qui estoient à Carmagnolle, estoient apres à entrer dans le chasteau par force, si on ne les y laissoit entrer de gré, & que le Duc de Sauoye auoit fait prendre prisonnier le Comte de Montmaieur, frere du Comte de Brandis qui a rendu Montmelian au Roy.

Au demeurant, les Espagnols ont en fin obtenu qu'un Religieux Iacobin Barcelloinois, appelé Raymundo de Pegnafort, sera canonisé sur la fin de ce mois. Possible ils ont pressé que ce fust plustost en ce temps-cy qu'en autre, à fin que n'y ayant point en ceste Cour d'Ambassadeur de France, celuy d'Espagne pût assister à ceste ceremonie, comme à ceste fin ils tenterent de faire que Monsieur le Marquis de Pisani s'abstint d'assister à la canonizatiō de sainct Diego du temps du Pape Sixte, dont il vous peut souuenir. Mais à present que nous n'auons point icy d'Ambassadeur, l'assistance de celuy d'Espagne ne nous preiudiciera de rien, ains pourra estre tiree en argument & preuue de la precedence du Roy, qui sera cause que ie n'auray à en parler en sorte du monde, ny en faire aucun semblant.

Vous ayant escrit ce que dessus, est arriué l'ordinaire de Lyon, qui m'a apporté vne lettre du 26. Nouembre, à laquelle ie respondray tout de suite. Les lettres que vous accusez tout au commencement m'auoir escriptes des dix-sept d'Octobre, 7. 12. & seiziesme Nouembre, m'ont esté rendues, comme vous auez veu par mes precedentes. L'ay bien noté pourquoy le Roy a disposé de la garde du chasteau de Montmeliā comme il a fait, & m'en seruiray enuers le Pape, & enuers tous autres que besoin sera pour respondre aux calomnies de ceux qui en parleront contre verité. Le memoire aussi que vous m'auiez enuoyé, de ce que le Roy auoit fait depuis la reddition dudit chasteau iusques au 25. Nouembre qu'il fut de retour à Chambery, me seruira non seulement pour mon particulier contentement, mais aussi pour celuy de tous ceux qui sont affectionnez au seruice de sa Maiesté; lesquels ont vn merueilleux plaisir d'entendre le progrez de ses prosperitez, & d'estre destrompez d'une infinité de faux bruits que les Espagnols & Sauoyards font courir de temps en temps. Monsieur de Sillery est arriué tout à propos auprès du Roy pour seruir sa Maiesté, & vous soulager en la negociation qui a à se faire avec Monsieur le Legat, & deputez de Monsieur de Sauoye : car outre la cognoissance qu'il a de toutes sortes d'affaires, il possede celles de Rome & de Sauoye en toute perfection; & parmy tant d'autres bons & grands seruices qu'il a faits icy, ç'a esté vn coup de maistre à luy de vous auoir d'une fort belle façon remis les affaires par delà, où vous les pouuez traicter avec tout aduantage, outre la reputation qui vient au Roy, de ce que de tous costez on le va supplier, & receuoir les conditions de sa Maiesté. Aussi préuit-il bien le preiudice que vous m'escruez que le Roy reçoit de la legation & pourparlé de paix, & pour cela, & pour autres considerations, il fit tout ce qui luy fut possible pour l'éuiter, ou au moins retarder; mais vous auez esté aduertis des causes de la precipitation, & auez tres-sagement fait d'en vser comme vous m'escruez.

La deputation que Monsieur de Sauoye a faite, quelque couleur qu'on luy donne, est conforme à sa procedure precedente, & à celle de tous ceux qui ne vont rondement en besongne, & qui n'ont enuie de bien faire, lesquels pour vn mesme affaire n'enuoyent iamais mesmes deputez, ains tousiours des gens nouueaux, comme l'a tres-bien remarqué nostre Philippes de Commines. Permettez moy donc, ie vous prie, qu'à propos ie vous dise, possible trop familièrement, que ie vous ayme & prise grandement de ce que vous vous deschez de l'intention dudit Duc à la paix, & n'estes d'a-



uis qu'on y croye que sur bons gages. Pour cela mesmes il est besoin que nonobstant l'huyet, le Roy tienne ensemble de bonnes & grandes forces, comme ledit Duc & les Espagnols en vont tousiours accumulans, & ie ne prends point plaisir d'entendre d'ailleurs qu'il leur vient des Suisses, & qu'il n'en vient point au Roy, qui en pourroit auoir aussi tost, & en plus grande quantité, quelque espargne de despens que nous y pretendions. L'espargne & le gain, comme vous sçavez trop mieux, est en la victoire, & à conseruer l'acquis, & aller tousiours conquestant, comme i'espere que sa Maiesté fera, & que l'obstination & cautelle de son ennemy tourneront à la iustification & bon-heur des armes de sa Maiesté.

Quant à l'affaire de Monsieur le Duc de Bar, ie vous en ay escript par cy-deuant ce qui en est, & la disposition du Pape, & ne suis pas d'aduis d'en parler pour ceste heure tant pour ce que nous n'y aduancerions rien, que pour ce qu'il me semble expedient que pendant que la negociation de la paix sera en pieds, nous ne deuons faire instance au Pape ny à Monsieur le Legat de chose d'importance, ou qui soit trop chere, & pour vous faire rabbatre des conditions del'accord.

Les complimens qui en attendant se pouuoient faire enuers sa Saincteté pour les faueurs faites au Roy en la celebration des nopces de leurs Maiestez, ont par moy esté faits; & ie les rafraeschiray à ma premiere audience, en disant à sa Saincteté l'office que Monsieur le Legat a fait à sa Maiesté de passer iusques à Lyon, & y benir de nouueau les nopces de leurs Maiestez. Aussi l'asseuray-ie de la bonne inclination du Roy à la paix, sous les honnestes & iustes considerations que vous me cotez tout à la fin de vostre lettre. A tant, &c. Monsieur, &c. De Rome ce 16. Decembre 1600.

*Fin du sixiesme Livre.*

LIVRE



# LIVRE SEPTIESME.

ANNEE M. D. C. I.

A MONSIEUR DE VILLEROY.

CCXLIII.



MONSIEUR, Par mes dernieres lettres du seiziesme Decembre, ie vous cortay sur la fin ce dont ie vonlois parler au Pape à la prochaine audience. Le premier iour de Vendredy qui suiuit apres, il fut occupé en vn consistoire à demy public touchant la canonisation de S. Raymundo de Pegna fort Barcelonnois, dont ie vous fis mention en ma dite

derniere, lequel Consistoire dura iusques à vingt & vne heure, de façon que auant que nous fussions de retour chez nous, & qu'on eust diné, il fut près de la nuit. Et pour cela, & que ie n'auois rien qui pressast, ie n'estimay point de uoir aller donner peine au Pape, & mesmement denant estre las, tant pour auoir harangué luy mesme audit Consistoire fort bien & longuement, que pour auoir ouy les adils non seulement de tous les Cardinaux, mais aussi de tous les Patriarches, Archeuesques, & Euesques qui lors estoient à Rome, & setrouuerent & parlerent audit Consistoire, & le deuxiesme Vendredy apres, qui fut le 29. de ce mois de Decembre, nostre saint Pere auoit la goutte aux mains, & ne donna point d'audience.

Puis donc que ie n'ay point à vous rendre compte d'aucune negociation ny à respondre à aucune lettre, ie passeray aux occurrences de deçà. Par lettres de Naples du dixneufiesme Novembre nous entendismes icy comme ce iour-là mesme on auoit embarqué les soldats leuez en ce Royaume là, pour les enuoyer en Piémont, & que tout aussi tost qu'ils furent embarquez, il se leua vne tempeste si grande que trois nauires où il auoit quatre cens hommes perirent avec lesdits soldats dans le port mesme. Vn des gentils-hommes de Monsieur le Cardinal d'Este m'a dit que le Comte de Fuentes auoit recherché le Duc de Modena d'aider le Roy son maistre de deux mille hommes des Estats dudit Duc dont ledit Duc estoit fort fâché, ne

FFFf

pouvoit accorder ny refuser telle demande sans se déclarer plus tard qu'il ne vouloit : nous verrons ce qui en sera , & ie vous en donneray aduis. Et encore que la chose soit vray semblable, les Espagnols voulans descouvrir les intentions des Princes , & les engager de leur costé le plus qu'ils pourront , si est-ce que ie n'ay laissé de penser qu'on ne pouvoit auoir tenu ce propos expressement, encor qu'il n'en fust rien, pour me donner à croire que ledit Duc de Modena n'estoit pas si enclin aux susdits Espagnols, qu'il leur eust voulu complaire de ce secours.

Par ma lettre du deuxiesme de Decembre, ie vous donnay aduis de certain langage qu'o disoit icy auoir esté tenu par le sieur de Bongars aux Princes & Potentats d'Allemagne touchant le conuersion du Roy. Et pource que depuis on s'offrit à m'en faire voir les lettres, i'acceptay l'offre, & me furent mises en main plusieurs lettres en Latin, escrites à vn homme de lettres Allemand appellé Gaspard Schoppius qui est icy, les vnes par ledit Bongars, & d'autres par vn appellé Velfer qui demeure à Ausbourg. Par toutes ces lettres j'appris que ce Schoppius auoit esté Huguenot, & qu'après s'estre conuert en ceste ville, il escriuit à de ses amis Huguenots, & entr'autres audit Bongars, des lettres aspres & iniurieuses, & plus propres à les irriter & endurcir en leur opinion, qu'à les gagner & conuertir, dont ledit Bongars se picqua aucunement, & luy respondit brusquement, mais non sans beaucoup de respect & de modestie; & en toutes ces lettres il ne se trouue vn seul mot touchant le susdit langage, ny qui en approche : de façon que la production de ces lettres a esté sa iustification enuers moy, pour ce regard. Mais parmy les lettres dudit Velfer, ie trouue quelques-les que ledit Bongars escriuoit audit Schoppius, passioient par les mains dudit Velfer, qui les pouroit & lisoit, & puis les enuoyoit audit Schoppius; & y en a vne dudit Velfer audit Schoppius, par laquelle il suggere audit Schoppius que en repliquant audit Bongars il luy reproche la conuersion de son Roy, & que sur icelle il a tenu tel & tel langage aux princes Protestans d'Allemagne. Mais il se voit que ce Velfer est ennemy dudit Bongars, & Partial de la maison d'Autriche, comme ledit Schoppius estoit entretenu par feu Monsieur le Cardinal Madruccio, qui estoit si fort de ladite maison que le feu Roy d'Espagne luy auoit fié le secret du Conclave plustost qu'à ses Ambassadeurs propres, ny aux Cardinaux Espagnols naturels. De façon que ie tiens que ceste imputation & charge mise sur ledit Bongars est vne pure calomnie, controuuée pour nuire au Roy principalement. Mais comme on ne peut empêcher les mal-vueillans de parler, aussi peut on bien les dementir par bonnes & loüables actions, comme a fait le Roy iusques icy, & sera toujours à l'aduénir de bien en mieux quiconque s'en falschera.

La sours de leuee qui se faisoit en la Marque d'Ancone sans tambour n'a en aucun effect, & tient on à present que s'estoit pour prendre sur le Turc en Dalmatie vne forteresse appelée Scutari, moyennant certaine intelligence qu'on y auoit pratiquée, laquelle a esté descouuerte, & les pauvres Chrestiens qui en estoient exécutez à mort.

La porte sainte ne fut point fermée la veille de Noel, comme est de coutume, d'autant que l'année passée elle ne put estre ouuerte que le premier

Jour de l'an, & que nostre saint Pere a voulu donner l'an entier à la deuotion des gens de bien. Mais pour luy estre venu la goutte aux mains le iour mesme de Noel, il ne la pût fermer le dernier iour de l'an comme il vouloit. On pense que il la pourra fermer la veille des Rois, comme la canonisation du saint Espagnol auoit aussi esté destinee pour le iour des Rois, à cause que ledit saint Espagnol mourut en semblable iour: mais l'une & l'autre de ces deux actions dépendra de l'estat auquel se trouuera alors sa Sainteté. Je prie Dieu qu'il soit tres-bon, & vous donne à vous, Monsieur, &c. De Rome ce 2. Ianuier, 1601.

A MONSIEVR DE VILLEROY.

CCLXIV.

**M**ONSIEVR, Je reccus le troisieme de ce mois par le courier de Monsieur le Cardinal Aldobrandin la lettre du Roy du vingt-troisieme Decembre, touchant les deux nominations à l'Euesché de Salusses, & la vostre du vingt-deuxiesme par laquelle vous vous remettez à celle que vous m'auiez esrite le iour auparavant par l'ordinaire de Lyon, qui n'est encore arriué, & n'en auons point de nouuelles. Je loue Dieu de la bonne santé, amitié, & contentement reciproque du Roy & de la Roynes, & le prie qu'il luy plaise les leur conseruer & accroistre de bien en mieux, & qui leur donne dans ceste annee, qui commence vn siecle nouveau, vn beau Dauphin. La volonté de sa Maiesté touchant ledit Euesché de Salusses, sera par moy suivie comme en toute autre chose: mais il ne faut s'attendre que le Pape y pouruoye tandis que le différent du Marquisat durera entre le Roy & Monsieur de Sayoye. La goutte luy dure encore aux mains & en vn pied de sorte que la porte sainte est encore ouverte, & la canonisation du saint Espagnol surse, iusques à ce que sa Sainteté se trouue mieux: ce qui est cause aussi que hier Vendredy ie ne fus point à l'audience. Pendant le susdit delay, de nostre ordinaire de Lyon sont venues lettres de Naples du 1. de ce mois, qui portent que le vingt-neufiesme passé la mer se monstroit tranquille, on y embarqua de nouveau les quatre mille hommes, & les mit en hors du port, mais la nuit ensuiuant la mer se troubla si fort, qu'on fut contraint de les ramener au port, & les desembarquer, & s'enfermer au Lazaret, dont le Viceroy se monstroît fort fâché, & mesme d'autant que le Comte de Fuentes gouverneur de Milan tieut des gens prés de luy pour solliciter cet embarquement, & c'est ainsi dit Viceroy, qu'il ne peut en uoyer les soldats pour ce sens. Quel les ennuy qu'à vn. Les susdits solliciteurs & lettres dudit Comte de Fuentes ont ainsi fait, que ledit Viceroy s'est en fin cōtente qu'il y leuast quatre ces hommes de cheval Albanois, auxquels il a donné terme de quarante iours pour s'aprestre & equiper. Il y auoit aduis de Naples que le Cicale ne serouroit de tout cet hyuer à Constantinople & passeroit l'hyuer aux mers de deçà; ce que les Espagnols attribuent au Roy, comme si la M. en auoit requis le Tusc tout de mesme qu'ils firent

FFFf 2

courir le bruit que c'estoit la Maïesté qui auoit procuré sa venue par dady, & suïuent leurs coustumes de reïetter tousiours sur nous toutes les choses odieuses, sans s'appercevoir cependant qu'ils nous apprennent à estre mauuais, & à leur procurer du mal, si nous estions disposez à faire nostre profit de leur malice; & des calomnies qu'il nous mettent sus, & de nous reuancher du mal & de la guerre qu'ils nous font sans cause & de gayeté de cœur. De Piedmont on-escrit qu'il estoit arriné quatre mille Suisses par le Milanois, & que Monsieur de Sanoie auoit comandé qu'on les amenast avec de l'artillerie & munitions, & qu'il demeureroit tousiours ferme à Hina contretoute apparence. Ce qui fait penser à plusieurs qui reconnoissent son naturel, qu'il couue quelque assassin, avec lequel il pense faire de beaux ioux: mais Dieu fera que non seulement il se morfondra & demeurera perclus en ses neiges, mais se ruinera & s'enseuclira en ses pernicious & damnables desseins. Cependant les siens font courir des bruits que le sieur de Lesdiguières a esté bien patru par luy, & que l'on oira bien tost parler d'une grande souleuation qui se doit faire en France. Mais ie ne crois point le premier, & espere que s'il se fait quelque mouvement plus grand en France, ce sera contre luy & contre ses adherans, pour le seruice du Roy, & la conseruation & accroissement de son Royaume.

Le Comte de la Tour est arriué en ceste ville depuis peu de iours, enuoyé par l'Archiduc Ferdinand pour prier le Pape de luy donner secours, & de luy en procurer encor d'autres Princes, pour reprendre la ville de Canise que les Turcs luy prirent dernièrement. Mais s'il est vray ce qui a esté escrit de Prague, quel'Empereur enuoye des Reistres pour Monsieur de Sanoie contre le Roy, ce n'est pas la voye d'oster au Turc ce qu'il tient, ny mesme se deffendre de luy, & moins d'impetier secours des autres Princes & de les faire entrer en ligue avec la maison d'Autriche, dont ils ont fait si grande instance, & le Pape mesme ces iours passez. Il y a cinq ou six iours que ledit sieur de Beaudeau, que ie vous ay escrit ces iours passez estre demeuré icy, me dit qu'il estoit arriué icy vn gentil-homme pour y resider & faire les affaires de Monsieur de Lorraine & que ce gentil-homme est Piémontois de nation, & retourné depuis peu de temps d'Espagne, où il a demeuré 12. ou 10. ans; & y a fait les affaires de son Altesse l'espace de six ans; & monstroït de luy mesme ledit sieur de Beaudeau de s'esmeruiller qu'en vn temps si soupçonneux, non seulement pour le regard de Sanoie, mais aussi d'Espagne, son Altesse eust enuoyé à Rome pour faire les affaires vn Piémontois ayant demeuré si long temps en Espagne, & qui en estoit revenu tout fraichement. Je luy demanday le nom, & il me le dit; mais ie Pay oublié: ie l'apprendray bien tost. Il me dit que ledit gentil-homme ne doit venir voir mais ie ne l'ay point vu. Me voyez il ou non, ie le fais bien esclaire; & prendray après le Pape & de Monsieur le Cardinal saint George la negociation y entre qu'il fait venir pour quelque mal: A tant, &c. Monsieur, &c. De Rome ce 6. Ianuier 1601.

## A V R O Y.

CCXLV.

SIRE,

La lettre qu'il plût à vostre Maiesté m'escrire le premier Decembre me fut renduë le dixiesme de ce mois, avec le memoire contenant les deux partis que vostre Maiesté auoit fait proposer à Monsieur le Legat le 20. dudit mois de Decembre. Et d'autant qu'à deux iours de là escheoit le iour de mō audience, & que ie me doutay que nostre S. Pere trouueroit à redire és articles desdits deux partis, ie me preparay diligemment, afin de pouuoir respondre à sa Saincteté pour la iustification d'un chacun d'iceux. l'allay donc à l'audience Vendredy 12. de ce mois, & d'entree ie dis à sa Saincteté que c'estoit la premiere fois que i'estois venu à ses pieds en ceste nouuelle annee, & que cela m'admonestoit de commencer mon audience par prier Dieu que il luy donnast bon an. C'est le Roy de France, dit-Il, qui me peut & me doit donner le bon an. Je puis dire qu'il ne m'a demandé chose que ie n'aye faite pour luy, & toutesfois il n'a fait rien pour moy de tout ce que ie luy ay demandé; & si ne luy ay-je rien demandé qui ne fust à l'honneur & gloire de Dieu, & au bien de la Chrestienté, & profitable à luy-mesme, & à tout son Royaume, comme est la paix que ie desire, & luy demande sur toutes choses pour plusieurs respects, mais particulièrement pour le danger où la Chrestienté se trouue par l'inuasion du Turc, qui va tousiours conquerant & accroissant de plus en plus; & neantmoins il fait des demandes excessiues, voulant qu'on luy paye les despens qu'il a faits en ceste guerre. Et l'autresfois que la Saouye fut renduë par le Roy Henry deuxiesme luy payat'on les despens. Et dernièrement en la paix de Veruins capitula t'on sur les despens. En apres il veut retenir Montmelian, & demande tant d'autres choses. Je ne sçay qu'en dire, ny penser.

A ceste plainte de sa Saincteté si ressentie i'estimay deuoir respondre le plus doucement & le plus respectueusement qu'il me seroit possible, sans aigrir, ny aussi nourrir son ressentiment, & luy dis que ie sçauois, & auoit esté escrit & dit à sa Saincteté plusieurs fois, que sa Maiesté s'estimoit & professoit grandement obligée à sa Saincteté, & luy en rendoit toute gratitude, obseruance, & reuerence, comme elle en vouloit aussi rendre tout seruice à la personne de sa Saincteté. & au saint Siege en toutes les occasions qui s'en presentent; & recognoissant aussi n'auoir pu faire iusques icy, pour la malice du temps & de l'estat des choses, tout ce qu'elle desiroit pour le contentement de sa Saincteté; & quoy qu'elle sceust & pût faire à l'aduenir, confessoit tousiours n'auoir fait à beaucoup près de ce qui estoit deu à nostre Saincteté, & l'Eglise, au saint Siege, & à la personne de sa Saincteté.

FFFF 3

vostre Maïesté en auoit tousiours ainsi parlé & escrit, & n'en parleroït iamais autrement : mais moy qui estois vostre sujet & seruiteur si obligé, & à qui vostre Maïesté auoit confié ses affaires, & qui auois l'honneur de les traiter, estois tenu de luy dire pour sa consolation & pour vostre iustification, que comme i'estois tesmoin de sa bonté, benignité, & paternelle bien-veüillance en vostre endroit, aussi me souuenois-je tres-bien de plusieurs choses de tres grande importance demandees par la Saincteté, que vostre Maïesté auoit faites & executees, & dont elle mesme vous auoit loué grandement ; Que ie me souuenois encor d'autres choses, que la Saincteté n'auoit point demandees, & neantmoins vostre Maïesté les auoit faites & offerres fort liberalement & promptement, dont la Saincteté vous auoit remercié tres affectueusement ; Que de tout cela ie n'en voulois rien specifier, mais pource qu'il se parloit d'accord & de paix entre vostre Maïesté & le Duc de Sauoye, & qu'on pretendoit que vostre Maïesté n'en auoit toute l'inclination qu'on desiroit, ie ne deuois omettre que le dernier accord fait à Paris entre vous deux, auoit esté fait par vostre Maïesté pour le seul respect de la Saincteté, comme il se voyoit par le commencement & par la fin dudit accord, & pource que vostre Maïesté s'y estoit fait plusieurs grâds intolerables preiudices, & au lieu de recourir le Marquisat purement & simplement comme il estoit possédé par la Couronne de France quand le Duc de Sauoye le print en pleine paix, s'estoit contenté pour la reuerence de la Saincteté de le receuoir avec condition & charge de compromis, & d'y mettre certaine sorte de gouuerneurs & de garnisons, & avec telles autres ; Que nonobstant tout cela le Duc de Sauoye violant sa foy n'auoit voulu garder ledit accord si auantageux pour luy, & mesprisant l'interposition de l'autorité de la Saincteté, ses saints & salutaires records, auoit forcé vostre Maïesté, apres auoir trop enduré, de prendre les armes pour le recouurement des biens de sa Couronne, & pour la conseruation de son honneur & reputation, & estoit cause de tous les maux qui en estoient aduenus à ses subietz, & à la Chrestienté par la prise de Canise, & de la peine & fâcherie que la Saincteté en prenoit ; Que c'estoit le Duc de Sauoye qui n'auoit rien fait de ce que la Saincteté luy auoit demandé : ce qui estoit neantmoins pour son propre profit & honneur. Et maintenant qu'il s'en estoit maltrouué, au lieu de recognoistre sa faute & de s'accommoder, il tâchoit d'aigrir la Saincteté contre vostre Maïesté, & la vexoit & tourmentoït continuellement par ses lettres & par ses ministres, sans luy laisser vne heure de repos ; & vouloit, & quasi obtenoit que de son inconstance, & perfidie & de sa coulpe en tant d'autres choses, vostre Maïesté en eust le reproche. Mais que ce n'estoit pas le moyen de meriser, ny d'obtenir la paix d'un Roy si genereux & magnanime, qui ne pouuoit & ne vouloit s'acquiescer par ces façons là, comme on l'auoit veu en ses plus grandes aduersitez, & lors que tant de Princes & Seigneurs estrangers & domestiques estoient bandez contre luy : Que ledit Duc estoit reduit en tel estat par les François d'un costé, & par les Espagnols de l'autre, que toute la paix luy estoit bonne, non seulement celle que vostre Maïesté luy vouloit donner, & qu'il deuoit reputer à grande grace & faueur que vostre Maïesté luy vouloit rendre la Sauoye, la Bresse, & autres pays qu'elle auoit acquis par son

guerre iuste; & qui, outre les fruits & reuenus qui s'en peuent tirer, aſſeuroient & reparoient à voſtre Maieſté le Dauphiné, le Lionnois, & le Duché de Bourgogne; & qui contiendroient en office les Piemontois Milanois, Geneuois, Bernois & autres Suiſſes, la franche Comté, & iuſques aux Pays bas inſiſſiuelement : & leſquels païs nouuellement conquis eſtoient en outre ſi aizez à maintenir par vn Roy de France, que quand tout le Piémont & toutes les Eſpagnes ſe diſtilleroient pour les rauir, on ne les pourroit iamais oſter par forcée à la France, ſi le monde ne venoit à ſe renuerſer du tout. Et de fait ie n'auois trouué homme d'entendement & d'affaires, qui euſt voulu croire que voſtre Maieſté fut pour rendre leſdits païs, à quelque condition ny pour quelque reſpect que ce fuſt : attendu, outre ce que deſſus, les comportemens de l'homme, & le peu de foy qui s'en peut attendre pour l'aduenir, & l'oſtination preſente, & que la France s'eſt ſi mal trouuee d'auoir autresfois ſi facilement rendu ces meſmes pays. Auſſi m'eſcriuoit voſtre Maieſté (& à ſa Saincteté meſme) que ſans le reſpect & reuerence de ſadite Saincteté, elle n'en ſeroit deſcenduë aux termes où l'on en eſtoit : tant s'en falloir qu'on euſt occaſion de ſe douloir de voſtre Maieſté, laquelle en l'accord de Paris n'auoit point voulu demander reſtitution de fruits, ny parler d'aucune ſomme d'argent, comme elle pouuoit iuſtement. Mais à preſent voyant que ce Prince n'auoit tenu comte de la promeſſe qu'il auoit faite de rendre le Marquiſat, ny de ſa ſaincteté, ny de perſonne, & qu'il auoit contraint voſtre Maieſté à faire vne ſi grande deſpenſe, & à hazarder la vie de tant de Princes, Seigneurs, Gentils-hommes, & autres, & ſa propre perſonne, ne deuoit trouuer mauuais que voſtre Maieſté demandat vne partie de ce que les loix luy adiugent. Leſquelles, comme ſa Saincteté ſçauoit trop mieux, nous enſeignoient que reſtituer n'eſt pas rendre proprement ny ſimplement la choſe, ains faire encores raiſon des fruits & des deſpens, & de tout autre iuſte intereſt : de façon que celui auquel la choſe eſt reſtituee, aye par ce moyen tout ce qu'il auroit ſi on luy euſt rendu la choſe en temps & lieu, ains tout ce qu'il auroit ſi la choſe ne luy euſt ontques eſté priſe; Que ce n'eſtoit point choſe nouvelle qu'es traittez de paix on rembourſait les deſpens; & ſ'il n'auoit eſté fait en ce dont ſa Saincteté auoit fait mention, les guerres auoient eſté d'une autre nature. Mais ceſte-cy n'auoit eu aucun pretexte du coſté dudit Duc, ſinon qu'une ſeule perfidie, & le meſpris de ſa foy, & de Dieu, & des hommes, & de ſon propre honneur & reputation; Qu'en outre, ſa Saincteté ſe pouuoit ſouuenir comme les choſes eſtans encor en entier, Monsieur de Sillery luy auoit pluſieurs fois predit, & comme proteſté, que ſi Monsieur de Sauoye n'oſſeruoit ledit accord, & contraignoit ſa Maieſté à prendre les armes, il n'en ſeroit point quitte pour rendre ſimplement le Marquiſat, & qu'il faudroit faire raiſon des deſpens & d'autres choſes; Que ie ſçauois que ledit ſieur de Sillery en auoit autant dit à Monsieur le Cardinal Aldobrandin, & à l'Ambaſſadeur meſme de Sauoye reſident près ſa Saincteté, comme il auoit encores eſté predit en voſtre Cour à ceux que le Duc y tenoit. Et pour fin, le Duc ne deuoit s'arreſter à cela, puis que la deſpenſe d'un mois de guerre monteroit plus à luy & aux Eſpagnols, que ne ſeroit la ſomme que voſtre Maieſté demandoit. Quand à la retention de Montmelian pour



ce peu de temps, nous en auons exemple en ceste mesme maison de Sauoye, & en la paix mesme de l'an mil cinq cents cinquante neuf, par laquelle auoient esté laissées au Roy Henry second les places de Thurin, Cherasco, Chinasso, Ville franche, Aft, & Pignerol : Qu' alors neantmoins ledit Roy Henry second n'auoit point tant d'occasion de défiance, n'ayans pour lors les Ducs de Sauoye pris aucun Estat de la Couronne de France en la pleine paix, ny autrement, ny si manifestement violé leur foy, & mesprisé les Rois de France. Mais ce Duc auoit bien monstré qu'on ne pouuoit contracter assez cautelement & seurement avec luy, & qu'il ne luy falloit croire sans bons gages, & mesme puis que, pour mauuaise cause qu'il eust, les Espagnols le fomentoient & deffendoient. Ce qui donnoit à penser à vostre Maiesté, qu'après ceste paix qui se procnoit, il pourroit prédre audie Duc vn autre caprice de la rompre, comme il a rompu les autres, & que les Espagnols le voudroient encor aider de mesme. De façon que non seulement vostre Maiesté, mais aussi sa Saincteté, & tous ceux qui ayment la paix & le repos de la Chrestienté, auoient occasion de desirer qu'en l'accord qui se feroit interuinsent le plus de seuretés que faire se pourroit. Et neantmoins vostre Maiesté ne demandoit à tenir ladite place que pour trois ans, & en laisseroit à son Altesse le reuenu, iacoit que vostre Maiesté fut conseillée de la demander pour long-temps, & que le temps expiré elle fust démolie, comme faite contre l'intention de ladite paix de mil cinq cents cinquante neuf. Mais pour complaire à sa Saincteté, & à Monsieur le Cardinal Legat son neveu, elle auoit passé par dessus toute autre considération.

Sa Saincteté en sa repliche se monstra plus moderée, disant qu'elle ne vouloit point dire que vostre Maiesté n'eust raison de mouoir les armes : mais à present qu'on vous vouloit rendre le vostre, la guerre ne seroit plus iuste desormais, & qu'on laissast dire qui voudroit au contraire ; Qu'il falloit regarder à Dieu, & au bien de la Chrestienté, & auoir encore compassion de luy qui endureit infiniment, & luy sembloit qu'il auoit des dagues au flanc iusques à ce que la paix fust faite.

Je ne vouldus point redupliquer sur cela, ny entrer en iustification des autres articles du premier party, puis que le Pape ne m'auoit parlé que de ces deux, à sçauoir des despens, & de Montmelian. Mais d'autant que le second party fait grandement pour la iustification de vostre Maiesté, & que sa Saincteté n'en auoit fait aucune mention, j'estimay m'en deuoir aider, pour plus ample responce à sa plainte, & plus efficace consolation de sa douleur : & luy dis que par le second party que sa Saincteté auoit entendu, elle pouoit cognoistre le grand desir que vostre Maiesté auoit de luy complaire, & de deliurer la Chrestienté des maux de ceste guerre, puis que vostre Maiesté se contentoit de prendre récompense du Marquisat es pays les plus esloignés du Piémont & de l'Italie ; Qu'en ce second party ne se parloit plus de Pignerol & de son territoire, ny de Barcelonnette & de son Vicariat, ny des vallées du Sture, & de Perouse, & de leurs appartenances & dépendances, ains des lieux dont les noms n'estoient pas seulement eognus ny oïrs en Italie ; si ce n'estoit de la Bresse ; Que c'estoit bien esclaireir le monde que vostre Maiesté n'auoit point intention de faire la guerre au Duché de Milan, ny en autre endroit d'Italie, comme on auoit fausement controuué, & pris ceste

cette iustication pour former la mauuaise cause de ce Duc. De sorte que si ce party ou l'autre n'estoit accepté, le ruyeroit enuoyé qu'on ne se ce & ceux qui deormais luy assisteroient, seroient tombez en sens repprouné & que Dieu vouloit de plus en plus iustifier les armes & les conquestes de vostre Maiesté, & ruiner du tout ses ennemis, Oüy, mais, dit le Pape, vous voulez fermer aux Espagnols le passage de la Comté de Bourgongne & des Pais bas, & ne leur voulez point accorder vne libere qu'ils demandent sans aucune forteresse. Je luy respondis ce que vostre Maiesté m'auoit escrit, qu'elle leur promettoit le passage libre quand ils le demanderoient, & leur en feroit vne promesse; Que s'ils gardoient la paix avec vostre Maiesté, le passage ne leur seroit iamais refusé; Que s'ils vous faisoient la guerre, la reseruacion de ceste libere ne leur seruiroit de guerres. I'adioustay qu'il seroit malaisé, quand on voudroit conuenir des bornes & limites de ce chemin en toute sa longueur, & quand on en auroit conuenü, elle ne seruiroit que d'occasion & matiere de discord & de dissension: parce qu'il se trouueroit de mauuaises gens estrangers & voisins qui gasteroient ce chemin, y faisant des fosses & destrons de long & large, y couchans & traouer sans des arbres entiers, y charrians & laissant de grosses pierres & des ordures, & toutes sortes d'empeschemens. Et quoy que pour ceste heure les Espagnols se contentassent de n'y auoir aucunes forteresses, si est ee qu'auuec le temps ils voudroient y en bastir sous diuers pretextes, & les François ne les voudroient endurer, dont s'ensuiuiroit vne nouvelle guerre. De façon que ce que vostre Maiesté offroit, valoit beaucoup mieux pour les Espagnols que ce qu'ils demandoient; & si i'estois en leur place ie l'aimerois mieux ainsi. Aussi en l'eschange contenu en l'accord de Paris, il ne s'estoit point parlé d'aucune telle libere, ny mesme du passage: & iusques à ceste heure ie n'auois oncques ouy ny leu, que parmy les Estats d'autrui, il y eust iamais eu vn chemin appartenant à quelque nation estrangere & lointaine, & que c'estoit vne nouueauté & fantaisie vrayement Espagnolle.

Sa Saincteté ne repliqua à tout cela autre chose, sinon qu'il desiroit la paix en toutes façons, & qu'il exhortoit, prioit & coniueroit vostre Maiesté de la faire en quelque sorte que ce fut. Le moy n'estimant deuoir plus continuer le propos, luy presentay sur ce point la lettre que vostre Maiesté luy escriuoit de sa main, en response de celle que Monsieur le Cardinal Aldobrandin vous auoit renduë de la part de sa Saincteté le seiziesme iour de Decembre. I'auois delibéré en allant en l'audience, de la commencer par presenter ladite lettre, mais la plainte que sa Saincteté me fist dès l'entree me remuer la l'ordre que ie m'estois proposé. Apres doncques que ie luy eus baillé ladite lettre en set endroit, & que ie luy eus parlé conformément au contenu d'icelle, ie luy dis ce que Monsieur de Villeroy m'auoit escrit par ses lettres du vingt-sixiesme iour de Nouembre & vingt-vniesme de Decembre, en response des calomnies qu'on auoit dites & escrites à sa Saincteté, touchant les choses de Tonon Geneue, & de Berne, & luy bailla l'attestatoir du pere Recteur du College des Iesuites audit Tonon, priant sa Saincteté de ne croire cy apres telles choses, & d'observer comme ses propres ministres luy escrivoient des choses faulces trompez par vos ennemis. Aussi luy donna la permission que vostre Maiesté :

auoit donnée au Pere Lorenzo Magio <sup>à l'aller viſiter les colléges de</sup> ~~France qui ſont en~~ Languedoc & en Guyenne, & comme voſtre Maieſté auoit donné au ſieur d'Anuilly main leuee de ſa maiſon & biens: de toutes leiſquelles choſes ſa Sainteté monſtra receuoir grande conſolation.

Partant de chez le Pape i'allay chez Monſieur le Cardinal ſainct George, lequel me parla des meſmes choſes que le Pape m'auoit dites, mais fort doucement & humblement, & ie luy fis les meſmes reſponſes qu'à ſa Sainteté.

Il me parla encores des trois autres; la premiere fut, qu'au lieu de diminuer les demandes, à meſme qu'on alloit traittant d'accord on les auoit augmentees, & qu'ouſtre que ceſte procédure en ſoy ne pouuoit eſtre trouuee bonne, elle oſtoit le credit à Monſieur le Cardinal Aldobrandin, & donnoit à parler aux Sauoyards & Eſpagnols du peu de compte qu'on tenoit de luy, & qu'on auoit fait plus pour vn religieux Cordelier que pour luy: de quoy toutesſois ledit ſeigneur Cardinal n'auoit rien eſcrit par deçà, mais qu'on l'auoit entendu par autre voye. Ie luy reſpondis que ie n'auois rien entendu de tel, & ne croyois point que de voſtre part on euſt accreu les demandes, combien que l'opiniſtreté & obſtination de Monſieur de Sauoye, qui donnoit temps & occaſion à voſtre Maieſté d'aller touſiours conſeillant ſur luy, pourroit auoir merité qu'on luy encheriſt d'autant plus les conditions comme auſſi la dépenſe, & les travaux & dangers que voſtre Maieſté ſouſtenoit alloyent touſiours en augmentant, à meſure que la guerre duroit, & que ledit Duc tardoit à vous faire raiſon; Que les Eſpagnols & Sauoyards ne manqueroient iamais de calomnies: & Monſieur de Sillery & moy auions bien preuue, qu'ils ne procuroient ceſte legation à autre fin, que pour obtenir par ce moyen des conditions iniques, & préiudiciables à la Couronne de France, & à l'honneur & réputation de voſtre Maieſté, ou au moins mettre en mauuais meſnage le Pape & voſtre Maieſté; Que nous l'auions ainſi predit à ſa Sainteté, & audit ſeigneur Cardinal Aldobrandin; Que ce n'eſtoit point legation d'un neuu du Pape; Qu'on n'eſtoit plus aux termes où les choſes eſtoient, quand l'accord de Paris ſe fit par l'autorité de ſa Sainteté, & enſremiſe de Monſieur le Patriarche; Que i'auois dit moy meſme à ſa Sainteté, ce qu'elle pouoit auſſi auoir conſideré de meſme, que les Princes ſeculiers obéiſſent & complaiſſent au Pape iuſques à vn certain terme, mais quand il ſe traitte de leurs Eſtats & de leur réputation, ils ont raiſon de ſ'en excuſer, & de ne point recompenſer leurs ennemis des obligations que quelques-uns peuuent auoir au ſainct Siege. Que ſi Monſieur le Cardinal n'obtenoit tout ce qu'il vouloit, la faute venoit du Duc de Sauoye, & des choſes meſmes qui ne ſe pouuoient faire ainſi comme il deſiroit. Ioint qu'il eſtoit de ſa prudence & equité de ſe contenter de la raiſon, & de ce qui ſe pouoit obtenir.

La ſeconde choſe dont ledit Cardinal ſainct George me parla fut, que les Sauoyards & Eſpagnols ſe ſeruiroient de la demoliſſion du fort de ſaincte Catherine, que voſtre Maieſté vouloit eſtre faite en l'un & en l'autre des deux partis, iagoit que ledit fort aieſté ſait contre Geneue ſeulement, & n'apportait de ſien à la France. Ie luy dis que ie m'eſtois bien imaginé de moy-meſme que les Sauoyards & Eſpagnols ſe ſeroient ſeruis de ce point, pour faire trouuer mauuais au Pape tous les deux partis, & que i'auois deſa

veu qu'ils auoient fait mettre és gazettes des nouuellans, que ceux de Geneue auoient prié vostre Maieſté de mettre en ſes conditions la demolition dudit fort, & vous auoient promie vne bonne ſomme d'argent ſur ladite demolition s'en enſuiuoit. Mais la verité eſtoit que ce fort auoit eſté fait autant contre la France que contre Geneue, & contre l'intention de la paix de mil cinq cens cinquante neuf, & partant il importoit à la France qu'il fuſt ruiné, & l'importeroit encores plus, ſi ſuiuant le ſecond party la recompense du Marquiſat vous eſtoit donnée delà le Roſne. Ioint que ce qui importoit à la ville de Geneue, importoit auſſi aucunement à la Couronne de France, non pour affection qu'on portaſt à ceſte ville, qui par la contagion de l'heresie auoit cauſé tant de maux à ce pauvre Roſaume, mais pour ce que c'eſtoit le ſeul paſſage que la France euſt, pour faire venir les Suiſſes quand il s'en preſentoit occaſion; & ne vouloit ny denoit endurer que ce paſſage luy fuſt fermé: & qu'on voyoit par ceſte condition meſme la modeſtie de votre Maieſté, qui mettoit en condition ce qu'elle auoit peu faire de ſon autorité incontinent qu'elle fut dans ce fort, au moins à l'imitation de votre ennemy, qui auoit demantelé la forterreſſe de Cental, qui n'eſtoit pas meſme du Marquiſat, ains de la Prouence, & qu'il ſçauoir bien qu'il faudroit rendre vn iour, quand bien le Marquiſat luy demoureroit par eſchange ou autrement.

La troiſième choſe dont ledit ſeigneur Cardinal me parla fut de Cental, de Montroqueparuiſ, & Chateau Dauphin, que le Duc de Sauoye voudroit auoir outre le Marquiſat, pour la Breſſe, Bugeay, & Valtromay. Mais ie luy dis que ces places n'auoient iamais eſté du Marquiſat, ains eſtoient de tout temps, les vnes du Dauphiné, les autres de Prouence, comme il auoit eſté recogneu par ledit Duc en l'accord dernier fait à Paris, par lequel il auoit promis de les rendre en tout cas, iacoit qu'il retint le Marquiſat, ou en baillaſt la recompense lors accorties; Qu'il ſe traictoit de recompenser le Marquiſat, qui eſtoit encores trop à vn Duc de Sauoye, qui n'auoit plus de Sauoye, & non de recompenser le Dauphiné ny la Prouence; Que le Roy n'eſtoit point reduit à telles conditions qu'un Prince de Piémont, qui venoit de recevoir garniſon à Thurin meſme, luy deuſt faire tenir propos d'aliener la Prouence & le Dauphiné: ioint que des places que ledit Duc vouloit luy eſtre quittees, il y en auoit qui appartenoient à des ſeigneurs particuliers vaffaux de votre Maieſté, lesquels n'auoient point merité que votre Maieſté leur oſtaſt le leur, pour le donner à ſon plus capital ennemy, non plus que luy n'auoit point merité que pour l'accommoder votre Maieſté ſe miſt en peine de recompenser enuers ſes vaffaux, ce qu'il leur auoit oſté, & leur vouloit retenir. Et ainſi ſe paſſerent ces deux audiences dudit iour douzième de ce mois, ſur les lettres qu'il eut plu à votre Maieſté m'eſcrire le vintg vniesme iour de Decembre, qui ſera auſſi tout le ſuiet de la preſente. A tant, &c. S I R E, &c. De Rome ce dix huitiesme iour de Ianuier 1601.

## A MONSIEUR DE VILLEROY.

CCXLVI.

MONSIEUR,

Après vous avoir escrit les 2. & 6. de ce mois, arriva l'ordinaire de Lyon le 10. qui me rendit une lettre du Roy du 21. & trois vostres des 6. 18. & 21. Decembre. L'ay desia respondu à celle du Roy, par vne occasion qui se presenta il y a quatre iours : & neantmoins ie respondray aux vostres par cet ordinaire, & puis vous escriray à l'accoustumée de ce qui se dit par deçà. Je vous remercie tres affectueusement des aduis qu'il vous plaist me donner par celle du sixiesme iour escrite à Luy sante près le fort sainte Catherine, de l'estat où estoient lors les choses, & du decez du pauvre Monsieur Lomelin, que Dieu absoluë. L'ay receu toutes les lettres que vous me contez au commencement, & celles du dix-huitiesme iour, comme vous aurez veu par mes responses : & ny esté fort aisé d'entendre que les miennes aussi vous eussent esté rendues, & tout ce qu'il vous a plu m'escrire de l'arriuee du Roy & de Monsieur le Legat à Lyon : & de la solemnité & consommation du mariage de leurs Maiestez, que Dieu maintienne longuement, & leur donne bien tost lignee digne du Roy & du Royaume Tres-Christien. Les difficultez que vous trouuez au traité de la paix ne m'ont point esté nouvelles, attendu le naturel des gens à qui nous avons affaire : & les considerations que vous avez faites sur tout cet affaire, sont dignes de vostre prudence & pouruoyance, & du zele que vous avez tousiours eu au bien public. Surquoy ie ne vous puis dire autre chose, sinon qu'après que nous nous serons mis en deuoir de faire la paix à conditions iustes & raisonnables, si elles ne sont point acceptees, Dieu & le monde verra qu'il n'aura tenu à nous que l'accord ne s'en soit ensuiuy, & favorisera de plus en plus les armes de sa Maiesté. Par ladite lettre que j'ay escrite depuis quatre iours au Roy, vous aurez veu avec combien de passion nostre saint Pere desire la paix, qu'il ne fera iamais à son aise iusques à ce qu'il entende qu'elle soit faite, & vous tous tant que vous estes par delà, ne luy sçavez faire vn plus grand plaisir en ce monde que de vous y disposer, & ayder à la faire comme il medit à toutes les fois que ie luy parle.

Ce que vous m'avez respondu touchant le Docteur Boucher, est durtout conforme à mon naturel & à mes persuasions : cependant i'en vseray icy, où il n'est point comparu iusques à present, & m'a t'on dit qu'il estoit demeuré malade à Cologne. Le Comte de Sore est encores icy, & auoit hier apres dîner enuoyé chez moy pour me venir voir, comme il visite les autres Cardinaux, mais i'auois à aller à l'audience.

Ma lettre du deuxiesme de ce mois vous aura esclaircy de ce que vous vouliez sçauoir, touchant la seconde leuee qui se faisoit en la Marque d'Ancone, & à present est reduite à rien. Aussi y aurez vous veu comme de moy-mesme i'auois desia iustificié le sieur Bongars de l'imputation qu'on luy auoit mise sus, & sur la production mesme de ses parties aduerses. Je rendis moy-mesme les lettres à Monsieur le Cardinal de Florence, & luy parlay en conformité du contenu en icelles ; & vous remercie bien-humblement de ce qu'il vous plaist faire pour les sieurs Bartholomeo Benese & Perrin que ie vous auois recommandez.

Après tant d'embarquemens & desembarquemens de soldats leuez au Royaume de Naples, en fin ils se rembarquerent pour la dernière fois le 5. de ce mois, & eurent le temps propice, de façon qu'en quatre ou cinq iours ils arriuerent à Genes. On ne laisse pourtant de faire audit Royaume de Naples autres prouisions de guerre, pour les enuoyer en Piémont ou au Milanois. Entre autres choses le Comte de Fuentes auoit escrit au Viceroy, que de chasques compagnies d'hommes d'armes & de cheuaux legers, il en print vingt cinq, & les enuoyast à Milan. De Piémont on escrit que le Duc estoit arriué à Thurin le deuxiesme de ce mois, & auoit distribué ce qu'il auoit amené de son armee morfondue en diuers lieux de Piémont & du Marquisat, dont tous ces peuples estoient fort affligez. Il faisoit mesme estat de mettre cinq cens Suisses, en Thurin, s'ils n'y estoient desia. Mais vous estes plus près de là que nous ne sommes d'icy.

Cependant on ne fait que parler de nouvelles leuees que les Espagnols proiettent en diuers lieux. On a escrit de Genes que le Comte de Fuentes auoit enuoyé querir à Genes Giouan Hieronymo Doria, & luy auoit baillé charge de leuer en l'estat des Geneuois trois cens hommes de pied. Vne personne publique residente près l'Empereur a escrit par deçà, que l'Ambassadeur d'Espagne qui reside en la mesme Cour, auoit obtenu lettres patentes pour leuer quatre ou cinq mille Lansquenets. On m'a dit que les deux cens demandez au Duc de Modena ne s'obtiendroient point. Il est sorty vn bruit de chez l'Ambassadeur d'Espagne en ceste Cour, que si la paix ne se fait point, le Duc d'Urbin ira gouuerneur à Milan, & le Côte de Fuentes en Piémont à conduire l'armee du Roy son maistre. Je vous escriuis par ma lettre du sixiesme de ce mois, comme ils faisoient courir le bruit qu'on oyroit bien tost parler d'une grande souleuation qui se feroit en France : depuis ils ont dit que le Duc d'Aumale auoit failly à prendre Amiens. J'ay autres fois obserué que des choses qui n'estoient encores qu'en dessein seulement, se disoient loing comme faictes, par ceux qui sçauent quelque chose du projet. Ce Prince là d'Aumale n'a plus à perdre que sa personne, & a autresfois commandé en laditte ville d'Amiens, en laquelle peut estre reste encor quelque chose de la contagion Espagnolle. Par ainsi les Espagnols pourroient s'en vouloir seruir à tel effect, & ne sera que bon d'aduer-tir qu'on prenne garde à toutes auantures, comme aussi en toutes autres villes de frontiere.

Ils sont encor courir vn autre bruit, que le Roy a voulu forcer quelques endroits des Suisses pour passer au Milanois, mais personne ne les en croit, & ie ne me puis imaginer à quoy ils se veulent seruir de ceste inuention.

L'homme de Monsieur de Lorraine dont ie vous escriuz par ma lettre du sixiesme de ce mois s'appelle Barette, & me vint voir le seiziesme de ce mois, & me rendit vne lettre de Monsieur le Cardinal de Lorraine qui me le recommande. Il dit auoir esté enuoyé par ledit seigneur Cardinal, pour aduertir le Pape d'un nouuel accord qu'il a fait touchant l'Euesché de Strasbourg, dont il me dit aussi que ledit seigneur Cardinal auoit fait rendre compte au Roy. La porte saincte fut fermee le Samedy troisieme de ce mois, & ainsi fut mis fin au Iubilé. La canonisation du saint Espagnol ne se fera pas si tost.

Le pretendu Dom Sebastien Roy de Portugal, que les Venitiens auoyent laissé aller, comme vous auez entendu, a esté fait prisonnier par le grâd Duc vers Liurme, & comme on ne louë point la simplicité de ce pauvre homme d'estre allé passer en ces quartiers-là; aussi blasme-t'on grandement son Altesse de ce fait, qui ne luy profitera pas tant enuers les Espagnols, comme il luy nuira enuers le commun des autres. A tant, &c. Monsieur, &c. De Rome ce 20. Ianuier, 1061.

## A MONSIEVR DE VILLEROY.

## CCXLVII.

**M**ONSIEVR, Le deuxiesme de ce mois au soir arriva l'ordinaire de Lyon avec vostre depesche du quatorzieme Ianuier, & en mesme temps arriva aussi le sieur Erminio, qui m'enuoya hier vne autre vostre depesche du dixseptiesme. Par l'une & l'autre de vos deux depeschés, j'ay vu cōme il a plu au Roy faire la paix avec le Duc de Sauoye: mais à voir la face des choses de deçà, il semble que le Duc ne l'ait point faite avec le Roy; car outre que le Pape n'en a fait ny fait faire aucun signe d'allegresse, ny le moindre semblant du monde, ledit seigneur Erminio, qui en venant a parlé & traité longuement avec le Duc de Sauoye & Comte de Fuentes, ne dit point qu'il y ait paix, & se monstre tout fâché, soit qu'il se feigne ou non. D'autre costé les Sauoyards & Espagnols disent tout haut qu'il n'y a point de Paix, & quoy qu'on dise, il ne sera iamais laissé au Roy pour le Marquisat autre chose que la Bresse seule. Dauantage, j'ay esté aujourd'huy avec Monsieur le Cardinal saint George, & ay fait avec luy l'office & compliment que le Roy me commandoit de faire avec le Pape par sa lettre du dixseptiesme Iannier, n'ayant pu auoir audience de sa Sainteté à cause de sa goutte, & ay trouué ledit seigneur Cardinal saint George si froid & taciturne contre sa coustume, & i'oseray dire contre toute ciuilité, & encores contre son deuoir, qu'il ne m'a pas respondu vn seul mot audit compliment que le Roy me commandoit de faire avec le Pape, non pas mesme qu'il le rapporteroit à sa Sainteté: & apres auoir esté quelque temps sans mot dire, il m'a demandé des conditions de la paix. Je luy ay dit qu'il les deuoit mieux sçauoir que moy, & neantmoins ie luy en dirois le sommaire, ce que j'ay fait; à quoy il n'a rien repliqué: mais à vn peu de là

il faudrà, dit-il, que le Duc de Sauoye signe ces conditions. Comment dis-je, on m'a dit que luy & le Comte de Fuentes les auoit signees quand le sieur Erminio est passé deuers eux : & luy ( disant ne me respondre ne si ne non ) faudrà t'il, dit-il, que les ministres du Roy d'Espagne les signent-encores ? Il n'est pas necessaire, dis-je, puisque c'est avec le Duc de Sauoye que nous en auons : mais Monsieur le Cardinal Aldobrandin ayant voulu en s'en allant traicter avec lesdits Duc & Comte conioinctement, il a semblé à quelqu'un que ledit seigneur Cardinal voudroit aussi que l'un & l'autre signassent à present que la chose estoit faicte du consentement de tous deux. Cecy m'a fait penser que lesdits Duc de Sauoye & Comte de Fuentes ayans recogneu la facilité & l'impatience de vos quartiers, pourroient auoir faict des difficultez sur l'accord, avec intention de vous en faire rabatre encores d'auantage, ains avec esperance que sous le bruiet de cet accord signé la plus part des forces du Roy se separeront, s'en courant chacun chez soy, & que ce siege de la citadelle de Bourg se relascheroit, sous esperance qu'elle se donneroit à nous d'elle mesme dans vn mois apres ledit accord, & que cependant ils l'aitailleroient, & muniront de gens & de toutes autres choses necessaires, & avec tant de forces qu'ils ont ensemble prés de vous, se rueront sur vos conquestes & les recouureront toutes, si ce n'estoit Montmelian, auant que le Roy eust mis sus vne forte armee. Ce soupçon m'est encores augmenté par ce que j'ay veu dans vos lettres que le Roy s'en vouloit aller dans trois iours à Paris, & parce que dedans les articles de l'accord, il y a que dés le iour & date du traicté, il y deuoit auoir paix & commerce libre entre les subiects & pays de l'un & de l'autre Prince, ce qui leur donneroit commodité de faire tout ce qu'ils voudroyent. A cela faict, que depuis vos articles signez, il se fait plus de bruiet & de preparatifs de guerre qu'auparauant, tant à Naples, qu'à Milan & en Piémont. Mais sur tout j'ay pour suspecte la perfidie du Duc, & l'impudence de ceux qui se fomentent si ouuertement en vne cause manifestement iniuste, & ne puis entendre qu'il ait plus d'égard aux seings de ses deputez qu'au sien propre, ny plus de respect à Monsieur le Cardinal Aldobrandin qu'à vn Roy de France, avec lequel il traicte luy mesme, & qu'il deuoit cognoistre pour Prince qui auoit du cœur & du moyen pour en auoir sa raison, comme il le luy a bien monstré depuis : voilà ce qui m'est venu en pensement de ce costé là. Mais ie ne laisse pour cela de penser d'un autre costé, qu'ils ont obtenu plus qu'ils n'eussent osé esperer d'un Roy de France, & de Henry III. irrité, victorieux, & saisi, & quelque peu de foy qu'il y ait en eux, ne vouldroient remettre en doute le certain pour l'incertain ; Que les propos qu'ils tiennent, & les bruits qu'ils font courir, peuent estre des effects de leurs ruses & vanité accoustumee, qui ne va iamais rondement en besongne, & crie & brame pour se faire tenir lors qu'elle a moins d'enuie de se battre, & vouldroient faire croire au Pape qu'il leur est fort obligé de ce que par son moyé ils sont paruenus au comble de leurs desirs, d'auoir extorqué à la Couronne de France vn de ses plus beaux fleurons, qui leur estoit comme vne paillette dans l'œil, & chassé les François d'Italie, pour faire deormais à leur plaisir de la plus belle & noble partie du monde ; Que si le silence du Pape peut venir tant de ce que les articles de la paix ne sont encores ratifiez, & qu'il y.



a termé d'un mois pour les ratifier , qu'aussi de ce que cependant il peut avoir quelque dessein & traité secret avec les Espagnols & Saoyards, pour faire employer les forces qu'ils ont ensemble contre le Turc, au secours de l'Archiduc Ferdinand & recouvrement de Canise, & mesme d'autant que le Milanois & le Piémont, où sont lesdites forces, ne sont guerres loins des Pais dudit Archiduc Ferdinand: comme aussi la cōtenance du sieur Erminio, & la taciturnité du Cardinal saint George, peuvent venir des diffiances que le Pape leur aura faites de parler de la paix en sorte du monde avec qui que ce soit. En cette incertitude donc, s'il plaira à Monsieur le Duc de Saoye nous donner sa paix ou non, ie n'entreray point en autre discours, & avec vostre congé passeray au reste. Si l'on me parle du changement advenu au chasteau d'Alignes par la faute du sieur de saint Aubin, i'en respondray en la façon qu'il vous a plu m'escrire. Celuy de qui vous avez eu l'advis dudit changement est tout à Monsieur de Saoye, & pourroit estre que l'advis ne contient verité, tout ainsi que l'on trouve tousiours icy des calomnies, comme, que le Roy a esté sesiours passez à Geneve, & y atant caressé les ministres; que le sieur de Lesdiguières a fait la cene dans Lyon, dont Monsieur le Legat avoit esté fort alteré.

Le Pape estant allé prendre l'air à Porto le 24. Januier, retourna en ceste ville le vingt neufiesme pour se trouver à la chappelle de la creation le Mardy trentiesme auquel iour commença la dixiesme année de son Pontificat; mais la goutte luy estant survenuë la nuit en un genoüil, il ne pût s'y trouver, & on la fist sans luy; aussi ne pût il se trouver & donner les chandelles à la chappelle de nostre Dame le deuxiesme de ce mois, & toucha à moy qui y celebroid la Messe ce iour là à les donner. Par lettres du Pape du trentiesme Januier, nous avons appris que ce qui restoit des gens leuez à embarquer, s'estoient embarquez dans six galeres de Sicile, commandées par Dom Pietro de Leua, de l'arriuee desquelles ie vous avois donné advis, & n'attendoiet que tēps propre pour faire voile. Aussi escrit on qu'y sonnoit tousiours le tambour pour leuer encores des gens, mais que personne ne s'y presentoit; Que l'on y construisoit bon nombre de galeres, pour en avoir d'autant plus pour infester la Prouence, & que c'estoit le Prince Doria qui avoit donné ce conseil.

Ie desirerois que le Roy, si nous avons la paix, employast à la confectiō d'un bon nombre de galeres à Marseille & à Tolon, la somme qu'il auroit dependu en un, deux, ou trois mois de guerre, qui seroit vne chose de grande seureté, commodité, ornement & reputation à la couronne de France, & mettroit fin à la honte que c'est un si grand Royaume flanqué de deux mers de n'avoir de quoy se defendre par mer contre les pirates & corsaires, tant s'en faut que contre les Princes. Le Duc d'Yrbain ayant esté prié par le Comte de Fuentes de faire leuee en son Estat pour le service du Roy d'Espagne, a depesché un sien gentil-homme vers ledit Comte, & dit-on que c'est pour s'en excuser, attendu qu'il sçait que lors mesme que le Roy ne s'estoit encores déclaré Catholique, ceux de l'estat d'Yrbain ne se voulerent enroller pour aller contre luy, & de sept à huit cens qu'on y contraignit à corps de bastōs, il s'en fuit par les chemins plus des deux tiers avant qu'ils arrivassent en Piémont.

Le Duc de Mantouë seroit tousiours sur ses gardes pour le Duché de Monferrat : aussi a le Duc de Parme renforcé ses garnisons sur les frontieres vers le Piémont & Milan, & s'en est allé tenir à Plaifance. L'homme de Monsieur de Lorraine appelé Baratti est encores icy prest à s'en retourner, comme il dit. Le Comte Sigismond de la Torre enuoyé par l'Archiduc Ferdinand, pour l'occasion dont ie vous escriuis par ma lettre du sixiesme Ianuier, m'est venu comme vn des autres Cardinaux, & puis m'a visité pour la seconde fois comme faisant les affaires du Roy. Il est frere du Nonce qui est en Suisse, & vne de leurs sœurs est mariee à l'Ambassadeur de l'Empereur resident icy, lequel est encores leur parent, & de la mesme maison de la Torre ; ce qui me rend d'autant plus vray semblable ce que vous m'auiez escrit cy deuant dudit Nonce. Aussi m'est venu voir l'Abbé Richardot fils du President Richardot ; lequel Abbé est venu resident en ceste Cour en qualité d'Agent de l'Archiduc Albert & de l'Infante. Le Duc de Sauoye a demandé ces iours passés, & obtenu que tous les soldats & gens de guerre de son armee puissent estre absous des pechez & de tous cas reservez au saint Siege, & en fust le brief mis es mains de Monsieur le Cardinal Deti, qui est parent de nostre saint Pere ; & fut laissé pour Vice-protecteur en la Protection de Sauoye par Monsieur le Cardinal Aldobrandin Protecteur en chef : ce qui est tousiours ioindre de plus en plus ledit Duc avec les parens du Pape. Ceste demande dudit Duc que tous & chacuns soldats puissent estre absous de tous cas en la vie & en la mort, m'a donné à penser, non seulement pour ce qu'il semble que les gens dudit Duc ayant à combattre contre des Turcs & autres infidelles en vne tres-inste & tres-sainte guerre, mais aussi pour quelque meschant & mal-heureux dessein qu'il peut auoir, & vouloir employer & allaiter quelque miserable ; & m'a reduit en memoire que le feu Roy, aprez la mort du Cardinal de Guise, se voulust seruir d'un semblable Brief qu'il auoit obtenu pour sa personne propre. Le Pape ne cognoist pas Monsieur de Sauoye si bien comme nous le cognoissons : s'il le cognoissoit, il l'ayuroit refusé ceste demande, comme on m'a dit qu'il l'auoit refusee au Roy d'Espagne, qui l'auoit demandee pour ses gens de guerre employez aux Indes pour la propagation, comme il disoit, de la foy Chrestienne.

Mais aussi le Roy d'Espagne n'a pas pour Protecteur vn neveu du Pape, & moins deux.

Tout homme d'affaires attend que Monsieur le Cardinal Aldobrandin retournant triomphant de faire la paix, si paix sera, procuerra vne promotion aux quatre temps prochains, qui escherront aux 14. 16. & 17. de Mars, & mesme d'autant qu'il y a neuf lieux desia vacans du nombre de 70. Cardinaux portez par la Bulle de Sixte V. Il faudroit de bonne heure aduiser celuy ou ceux que le Roy desirera, si d'auanture il n'en a desia esté parlé par delà à Monsieur le Cardinal Aldobrandin, & vous souuenir de l'instance que vous auiez fait faire pour le seigneur Dom Alexandre de la Miranda auant tout autre ; ce que toute ceste maison scait & s'y attend.

Aussi vous parlera-t'on d'enuoyer secours pour la maison d'Autriche

HHHh

LE TIREB...  
contre le Ture, & possible aussi d'entrer en ligue : surquoy vous vous sou-  
viendrez du bon office que vient de vous faire le Roy d'Espagne, qui est la  
principale souche de cette maison, pour vous ayder enuers Monsieur de  
Sauoye à auoir le Marquisat que ledit Duc auoit promis de rendre, & aussi  
du secours que l'Empereur, qui est la principale branche de ladite maison  
vous enuoyoit à mesme fin. A quoy i'adiousteray ( s'il vous plaist ) qu'un  
de ces iours bien tost, la Royne d'Angleterre peut mourir, & en ce cas  
vous aurez affaire de vos forces pour empescher le Roy d'Espagne à se fai-  
re Roy d'Angleterre, comme il y tend de toutes ses forces, & les pratiques  
& les menees en sont dressées il y a plusieurs années.

I'ay oublié cy-dessus auant qu'entrer en ces occurrences, de vous dire  
que le pouuoir expédié par le Duc de Sauoye à ses deputez, où il s'imitule  
le Marquis de Salusses, & dit que son intention a tousiours visé à la con-  
seruation de la paix, & qu'il n'a tenu à luy que tous les traictez cy-deuant  
faits en suite d'icelle ne soyent affectuez, m'a semblé digne de luy & du re-  
ste de ses actions, & ie ne m'esmerueillay iamais, que qui fait comme luy  
parle & escriue de mesme.

En somme telles gens se peuent bien rompre & ruiner, mais non redres-  
ser ny corriger, & n'en attendez autre chose, & sur tout ne vous fiez ia-  
mais en luy, ny en guerre ny en paix. A tant, &c. Monsieur, &c. De Rome  
ce 4. Feurier 1601.

---

## A MONSIEVR DE VILLEROY.

CCXLVIII.

**M**ONSIEVR, Les expeditionnaires m'ayans requis de leur donner  
Encores deux iours depuis ma dernière lettre escrite, ie m'y suis laissé  
aller plus facilement pour ce pendant apprendre quelque chose de l'inter-  
action de nos Sauoyards & Espagnols.

Or tant plus ie vais en auant, tant plus ie descouure qu'elle est tres-  
mauuaise & trompeuse. Le Comite de Fuentes a enuoyé au Pape un  
Espagnol appellé Diego Salinas son sergent maior, lequel apres auoir  
parlé & traicté avec sa Sainteté est passé à Naples. Le Duc de Sauoye a en-  
uoyé Domenico Belli son Chancelier, qui arriva hier au soir, & sa grande  
qualité m'a fait doubter qu'il ne venoit point pour parler au Pape de la ra-  
tification de l'accord, comme quelques uns pensent. Ce iourd'huy au matin  
ils ont fait vne longue consulte chez l'Ambassadeur de Sauoye, où s'est trou-  
ué l'Ambassadeur d'Espagne, & apres dîner ledits Chancelier & Ambassa-  
deurs ont esté à l'audience. Chacun tient que de la part desdits Duc & Co-  
te est remonstré au Pape que cet accord est trop auantageux pour la Fran-  
ce, & qu'ils ne le peuent ratifier, & prient sa Sainteté se vouloir interpo-  
ser enuers sa Majesté à ce qu'elle rabatte de ses conditions & adonne  
aux leurs, & que sa Sainteté vous doit depescher de nouveau le sieur Er-  
minio pour demander le rabais.

Or cōme sa Sainteté prend ces choses, & de ce qu'elle en fera, ie ne vous en puis rien dire; mais ie les prends de ceste façon; qu'eux ne pouuans plus conseruer la citadelle de Bourg, & cognoissans la facilité & impatience Françoisse, ont fait faire l'accord avec intention de separer par ce moyen vos forces, & vous renuoyer loing de vos conquestes, & puis avec les leur qu'ils ont toutes prestes forcer les passages, & ayans auitaillé & presidié ladicte citadelle, reprendre tout ce qu'ils pourront auant que le Roy se soit r'appresté. Et afin de faire passer les monts à leurs soldats & gens de guerre avec moins de peur & plus de facilité, ils ont forgé à Milan sur le voyage du Roy à Paris, que c'estoit pour vne grande sedition & carnage aduenu en ladicte ville de Paris entre les Catholiques & le Huguenots, & à present viennent entretenir & amuser le Pape pour cependant faire leur fait, & si la voye de la force ne leur succedoit, tirer par voye de negotiation en long l'exécution de l'accord, & gagner le Printemps, comme le Duc par ses cauilations sur l'accord de Paris cherchoit de gagner l'hyuer, voyla ce que i'en soupçonne. Et de fait tout aussi tost que ie vis en vos lettres que le Roy s'en vouloit aller à Paris, ie m'en esmerueillay grandement, me semblant que cela ne se deuoit point faire auant que la ratification fust arriuee, & que la citadelle de Bourg eust esté renduë, quand bien vous eussiez eu affaire à vn Prince qui ne vous eust iamais trompé, parce que la prudence commune le porte ainsi, & qu'en telle chose on doit tousiours regarder non seulement à ce qui se doit, mais aussi à ce qui se peut faire. Mais vous ayant affaire à vn Prince si perfide, ie m'estonne que vous ayez si tost desemparé ces quartiers. Et à la verité s'il vous en arriue mal; ce ne sera point luy qui vous aura trompé à ceste fois, ce sera vous mesme; la premiere tromperie est du trompeur, mais la seconde est à bon droit imputee au trompé. Dieu veuille que ie sois trompé moy mesme en ces coniectures.

A V R O Y.

CCXLIX.

SIRE,

Par la lettre qu'il plut à vostre Maieité m'escire le dix-septiesme Ianuier, i'ay veu comme il vous a plu donner la paix à Monsieur de Sauoye. En quoy ie recognois vostre generosité & bonné, & le respect que vostre Maieité a eu à nostre saint Pere le Pape, & à Monsieur le Cardinal Aldobrandin son neveu.

Mais il se dit par tout Rome que son Alteffe ne veut point de ceste paix, & y en a plusieurs signes que i'escris plus amplement à Monsieur de Villeroi: Tant y a qu'il est desia arriué icy vn gentil-homme de la part du Comte de Fuentes sur ce suiet, & ce soir en arriuera vn autre dudit Duc; de façon qu'il se verra bien tost si c'est pour approuuer ou impro-

HHHh 2

614 LETTRES DE MONSIEVR,  
uer ladite paix. Si elle tient, i'en louë Dieu, & avec toute humilité m'en  
conioüis avec vostre Maïesté, laquelle par ce moyen hors de hazards &  
travaux de la guerre, pourra viure désormais en plus grande sècurité & re-  
pos, & soulager son pauvre peuple & tous les estats de son Royaume qui  
sont fort chargés à l'occasion des guerres sans trêues qu'il a eues, & ac-  
quer à redresser la religion, la iustice, la police, la discipline militaire, les  
finances & autres choses qui en ont besoin, & acheuer de purger les mau-  
uaises humeurs qui sont restées de la contagion & corruption des années  
passées, & assurer le repos de France & l'autorité Royale, non seulement  
pour son temps, mais aussi pour sa posterité, dont ie prie Dieu vous faire la  
grace; comme estans les principaux fruits qui se doivent attendre & se  
peuvent recueillir de ceste paix.

Quand nous serons esclaircis si elle tiendra ou non, alors ie ne faudray de  
satisfaire au commandement de vostre Maïesté, luy escriuant de quelle façon  
le Pape & toute la Cour de Rome l'auront receüe, & les conditions d'icelle.  
Cependant, ne pouuant faire avec la personne de sa Sainteté, à cause de sa  
goutte, le compliment que vostre Maïesté me commandoit par sadite lettre  
sur l'occasion de cét accord, ie le fis dès hier avec Monsieur le Cardinal  
saint George son nepueu, qui le void tous les iours pour ne laisser enui-  
lir cét office, & ne faudray de le faire encoer de nouveau avec sa Sainteté  
mesme en la premiere audience que j'auray d'elle Dieu aydant. A tant, ie  
prie Dieu, Sire, &c. De Rome ce cinquième Feurier, 1602.

---

## A MONSIEVR DE VILLEROY.

CCXL.

**M**ONSIEVR,  
Pour respondre à la lettre qu'il vous plüist m'escrire de vostre main  
le quatorziesme Ianuier, ie vous diray que ie tiens à grande faueur & hon-  
neur la condoléance confidente qu'il vous a plu faire avec moy; aussi l'a-  
uez-vous colloquée en vn cœur qui est disposé & passionné de mesme, & qui  
ne peut se contenter d'appeller interest ou ambition, que des François ayent  
dit à Monsieur le Legat que le Roy n'auoit aucun moyen de continuer la  
guerre, quand bien il eust esté vray, ains l'estime & appelle trahison; & si la  
paix qui fut traitée & conchüe à Veruins se fust traitée auprès du Roy, elle  
ne fut point faite, ou bien n'eust esté profitable & honorable pour sa Maï-  
esté & pour son Royaume.

Sur quoy ie fais ceste obseruation, qu'une autrefois si nous auions à trait-  
ter choses semblables, il faudroit assigner aux deputés d'un lieu d'autant de  
la Cour & retiré, auquel personne n'allast que ceux que le Roy y enuoye-  
roit. I'estime infiniment Monsieur de Sillery, d'estre demeuré forme & es-  
tât en l'affliction laquelle ie l'ay tousiours veu, & reçoit grande consolation  
du témoignage qu'il vous a plu m'en rendre, quand nous sommes icy.

ste paix tiendra ou non, ie vous escriray ce qui s'en dit, & ce qu'on y adiou-  
stera cy apres. Quant à moy, comme ie vous en ay escrit mon aduis lors  
que les choses estoient encore en entier, aussi deormais puis que ç'en est fait,  
ie ne faudray, si elle dure, de la louer pour la plus vtile & aduantage pour nous  
que ie pourray: mais de la mettre en reputation il seroit impossible, en Italie  
mesmement. Encore y aura t'il bien de la peine à la faire passer pour vtile,  
euers ceux qui trouuent qu'à vn grand Estat & à tout grand Prince l'y-  
tilité qui n'est accompagnée de reputation n'est pas mesme vtilité. Les con-  
siderations que ie touche en ma lettre du Roy, pesent à la verité beaucoup en  
mon endroit, pourueu que nous scachiōs tirer de la paix tous ces profits là,  
qui nous sont plus necessaires qu'ils ne se trouuerōt difficiles, si nous nous y  
appliquons vn peu serieusement. Ie vous remercie de ce que vous voulez te-  
nir la main à ce qu'il soit bien tost enuoyé vn Ambassadeur resident en ceste  
Cour, & vous de l'aduertir quand il sera declaré, d'enuoyer tout aussi tost  
quelque honneste homme pour luy trouuer & luy faire accommoder vn lo-  
gis, à quoy il y aura fort à faire, & mesme s'il se fait promotion auant qu'il  
arriue par deçà.

Monsieur le President Ruellé m'a infiniment obligé en vn voyage qu'il  
a fait par moy à Bayeux, où il a mieux fait pour moy que ie neusse pū moy-  
mesme. Ie vous prie de luy monstrier de vostre part que vous l'avez agrea-  
ble. Atant, &c. Monsieur, &c. De Rome ce cinquiēme Feurier, 1601.

## A MONSIEVR DE VILLEROY.

CCLI.

**M**ONSIEVR, Quoy que ie vienne de vous escrire, il n'est pas que ie  
ne pense que le Roy allant à Paris aura pourueu à son fait à tout eue-  
nement, & s'il y fut allé apres vne rupture de paix, ie n'en serois en peine,  
estimant que ses forces se seroient contenuës ensemble pour continuer la  
guerre. Mais apres vn accord, & le Te Deum chanté, cela me fait craindre  
que quoy que sa Maiesté ait ordonné, la plus grand'part s'en courra chez  
loy. En somme ie me sens diuersement agité, & emporté çà & là, sans sca-  
uoir à quoy m'en tenir; mais quoy qu'il en arriue ie ne me repētiray iamais  
de m'estre mesié de la foy du Duc de Sauoye. Atant, &c. I'escriis vn mot de  
lettre touchant ma pension à Monsieur de Rosny; ie vous supplie bien hum-  
blement de luy faire rendre madite lettre, & à vostre commodité luy en dire  
vn mot. Atant, &c. Monsieur, &c. De Rome ce 6. Feurier 1601.

HHHh 3

A V R O Y.

CCLII.

S I R E,

Je respondis le 5. de ce mois par l'ordinaire à la lettre qu'il auoit plû à vostre Maïesté m'escrire par le sieur Erminio, par ceste cy ie respondray à celle qu'il vous a pleu m'escrire le 20. par Raby maistre de vos courriers à Rome, laquelle ie receus le 11. de ce mois.

Premierement donc i'ay bien noté les points dont Monsieur le Cardinal Aldobrandin vous parla en sa dernière audience, & ceux aussi dont vostre Maïesté luy parla, & les responces que vous vous entrestistes l'un à l'autre, & ne faudray quand il sera icy de retour, de solliciter, & de parler au Pape de tout ce que vostre Maïesté desire, & de vous rendre compte de tout ce qui s'y passera.

Cependant i'ay enuioyé au seigneur Alessandro Pico le paquet de vostre Maïesté qui s'adressoit à luy, & luy ay escrit conformément à ce qu'il vous a pleu m'en commander: aussi ay-je rendu vos lettres à Messieurs les Cardinaux de Florence, Baronio, Iustiniano, d'Este, & Rusticucci, & leur ay parlé conformément au contenu de leursdites lettres, lesquels tous s'en sont tenus grandement honnorer, & en baïsant tres-humblement les mains à vostre M. avec grande demonstration de desirer vous faire seruice aux occasions qui s'en presenteront. Le present que vostre Maïesté veut faire à Monsieur le Cardinal Baronio sera tres-bien employé, & digne de la splendeur de vostre Maïesté, & du bel & excellent œuvre qu'il vous a dedié.

L'aduïs de la grossesse de la Roïne a apporté vn merueilleux plaisir à tous les gens de bien de deçà, & specialement à vos subiects & seruiteurs, qui en loïsons tous Dieu de tout nostre cœur, & le prions de conduire le fruit à sa perfection, esperans que par la fecondité de vos Maïestez il accroïstra de plus en plus vostre autorité, & comblera vos prosperitez & assurera le repos & tranquillité de vostre Royaume pour plusieurs siècles, & remplira la France de toutes sortes de benedictions.

Au demeurant Monsieur de Sauoye ne tient pas plus de compte du traité accordé & signé à Lyon par les deputez & par Monsieur le Cardinal Aldobrandin, que de celui qu'il fit & signa luy-mesme à Paris au mois de Feurier l'année passée, & tient à present la mesme procedure qu'il fit alors.

Car comme apres qu'il fut de retour en son pays, il vous escriuit, & fit dire par les siens qu'il preserueroit en la mesme volonté d' auparauant; aussi a-t'il fait dire au Pape par le sieur Domenico Belli son Chancelier; & luy fait dire à toutes les occasions par son Ambassadeur resident icy, qu'encore que les articles accordez luy soient trop preiudiciables, nonobstant il les

vent ratifier, & executer & observer de tout, quand ce ne seroit que pour le respect de sa Sainteté & de Monsieur le Legat son nepveu; mais que les Espagnols avec lesquels il faut par nécessité qu'il demeure conioint, ne s'en contentent point, & le luy ont despendu: que sa Sainteté face enuers eux & enuers le Roy d'Espagne qu'ils s'en contentent, & que luy de sa part il est & sera tousiours prest à ratifier, & executer le tout.

En quoy il se mocque de sa Sainteté comme il faisoit alors de vostre Maïesté: car l'abouchement qu'il alla faire dernièrement à Somo sur le Po près Pauie avec le Comte de Fuentes apres les articles accordez, ne fut que pour instruire ledit Comte des pretextes & excuses dont il pouuoit & deuoit vser au nom du Roy d'Espagne son maistre enuers le Pape, & pour le prier de les enuoyer exposer à sa Sainteté par personne confidente, & puis a dépesché ou fait despescher vers le Roy d'Espagne pour l'instruire & preparer de mesme, & le prier de tenir bon, & de continuer à faire les provisions de guerre, & l'asseurer qu'il luy feroit auoir bon marché de vostre Maïesté qui l'auoit surpris armoisd'Aoust dernier. Il a encor tiré en la mesme contagion le Duc de Sesse Ambassadeur d'Espagne resident icy, auquel la paix de Veuins ne plût iamais, & qui estoit d'aduis qu'on fist plustost paix avec la Roïne d'Angleterre, & qu'on luy liurast Calais plustost que le rendre à vostre Maïesté. Et quand le Pape a voulu enuoyer vn Prelat vers le Roy d'Espagne en faueur de la paix, ledit Duc de Sesse luy a dit qu'il n'estoit point de besoin que sa Sainteté fist ceste despenſe & qu'il dépescheroit luy-mesme vers le Roy son maistre pour luy porter les brieſs de sa Sainteté, & pour pouuoir mieux persuader la guerre, a dépesché en Espagne le secretaire Ximenes, iacoit qu'il en eust besoin près de soy, estant ledit Ximenes secretaire de l'Ambassade. Et comme apres le temps expiré del'accord de Paris, ledit Duc de Sauoye tascha d'auoir prolongation de delay, & de mettre l'affaire en negociation pour tousiours gagner temps & ietter vostre Maïesté en huer, auquel il ne peut estre assailly; aussi à present il se parle de faire prolonger le mois dans lequel il falloit ratifier, sous-couleur que la response d'Espagne laquelle on fera expressement différer le plus qu'on pourra, ne peut estre venuë si tost, le tout pour gagner le Printemps, & vous assaillir avec plus d'auantage. Aussi fait il mettre des expediens en auant semblables à ceux qu'il faisoit proposer alors, & dit que si vostre Maïesté ne veut souffrir qu'on bastisse des forts au passage reserué, qu'au moins elle quitte la protection de Geneue, laquelle par ce moyen sera tout aussi tost prise par luy, & lors le passage sera asséuré par ceste autre voye, sans qu'il soit besoin de faire des forts au passage reserué. Ce pretexte est fort plausible au Pape, & à ceux qui sont des plus fendans Catholiques. Et de fait les ministres de Sauoye & d'Espagne ont aposté le Cardinal de Cosmo & quelques autres, qui sont allez remonstrer à sa Sainteté qu'il importoit infiniment à la religion Catholique & à l'autorité du saint Siege que le passage des Espagnols & Italiens ne soit point fermé en ce pais là si près de Geneue & des Suisses Heretiques. Ledit Duc fait encor parler d'alliance, & de bailler en hief pres la Bresse & les autres pays cedez en recompense du Marquisat; comme il faisoit dudit Marquisat apres le mesme accord de Paris. Et à mon auis, SIRE, si vostre Maïesté



eust fait la response qu'on desiroit quand Monsieur le Cardinal-Aldobrandin vous parla du mariage de Monseigneur le Duc de Vendosme avec vn fils du Duc de Sauoye, il vous eust fait vn autre interrogatoire, à sçauoir s'il vous plairoit de luy donner en fief & l'investir de la Bresse & autres pays. Ce que je coniecture, parce que le Gouverneur de Rome qui est Milanois, & passionné pour Espagne de soy-mesme, & comme esperant d'estre fait Cardinal par ce moyen; m'estant venu voir sous couleur de visite commune, deuë à tout Cardinal vne fois l'an, après plusieurs autres propos de loin me demanda s'il n'estoit pas vray que vostre Maesté vouloit investir Monseigneur de Vendosme desdits pays. Luy respondis tant pour la verité, que pour leur en oster toute esperance, que ie n'en auois point ouy parler, & ne le croyois point, pource que par les articles de l'accord il estoit porté que lesdits pays seroient & demeureroient vnns & incorporez à la Couronne de France, & seroient reputez domaines & patrimoine de la Couronne, & n'en pourroient estre separés pour occasion que ce soit. Et en outre, qu'vn pays de nouuelle conqueste, dont les vassaux & peuples ne pourroient si tost laisser les habitudes de Sauoye, & prendre celles de France, & estant aussi frontiere, deuoit estre tenu & regy sous la main & autorité de vostre Maesté immediatement, & non par le moyen d'autre vassal & feudataire. Il y a plus, SIRE, c'est que pendant toute ce que dessus, les Espagnols font tousiours à Naples, & à Milan, & ailleurs amas de gens & de forces plus qu'auiens, non seulement pour seruir par terre, mais aussi par mer, faisant construire à Naples bon nombre de galeres; comme i'en ay desia donné aduis par delà, outre tant qu'ils en ont desia, & faisans grande prouision de biscuit, & d'autres telles choses necessaires à vne armée nauale, & ce pour infester la Prouence qu'ils menacent desia de mettre à feu & à sang dès le commencement. Vos seruaiteurs de desjà, & tous ceux qui sont affectionnez à la France, ont vn tres-grand regret de ce qu'ils entendent icy qu'à la fumée de ce trompeux accord nous auons laissé perdre l'occasion de prendre la citadelle de Bourg qui ne nous pouuoit eschaper, ayant souffert qu'il ne soit sorty & qu'il y soit entré des personnes & des choses qui ne deuoient, & que c'est ce qui a plus ouuert le chemin & donné courage à la perfidie naturelle du Duc de Sauoye, & ne se contentent point vofdits seruiteurs d'icy de ce que nous disons l'auoir ainsi promis pour obmplaire à monsieur le Legat, d'autant que luy, ny le Pape mesme n'ont peu guarentir ceste perte, & qu'il leur estoit expedient à eux mesmes de ne point recevoir ceste courtoisie de nous, pource que si la citadelle de Bourg eust esté prise, non seulement vostre Maesté, & le Duc de Sauoye & les Espagnols, seroient à present hors d'affaires pour ce regard, & la guerre finie, mais aussi la Sainteté & monsieur le Legat son nepueu seroient hors de la peine où ils se trouuent, & hors du danger qu'ils courent, d'estre moquez de ceux qui leur sont peu affectionnez, & d'y laisser trop de leur reputation. Je sçay que la Sainteté fait & fera tout ce qu'elle pourra enuers le Roy d'Espagne & enuers le Duc de Sauoye à ce qu'ils ratifient & obseruent la paix accordée: mais ils ne respectent point le Pape en effect, comme fait vostre Maesté, & hormis les reuerences & les belles paroles, ils ne seroient en subiect à ce pour la

Sainteté,

Saincteté, sinon autant que leur propre profit & ambition les y conuiera, ou que la nécessité les y contraindra. C'est vostre valeur & bon-heur, SIRE, qui les peut & doit r'amener à la raison, en remettant sus vos forces au plustost, & ne se laissant donner paroles à qui que en soit, & n'oüroyant point à vos ennemis la commodité du temps & du Printemps prochain, & recourant au plustost l'auantage que nous auions sur ladite citadelle, & ne croyant iamais à parole ny à escriture de Sauoye, & ne vous desarmant, ny arrestant iamais que vous n'ayez tout vostre compte, & cependant munissant au plustost la Prouence, qui est la plus necessaire, & la plus exposée au danger. Mais ie lairray ce propos mes huy trop long pour vous dire vn peu de l'audience que i'eus Vendredy dernier 16. de ce mois, en laquelle ie fis en la personne du Pape sur la conclusion de la paix, l'office que i'auois fait avec monsieur le Cardinal saint George le 4. suiuant ce qu'il auoit pleu à vostre Maiesté me commander par sa lettre du 17. Ianuier, laquelle lettre estant merueilleusement bien faite, & ne pouuant par moy estre recitée si bien, & d'ailleurs ne contenant rien que la Saincteté ne deust voir, i'estimay la luy deuoir lire, à laquelle il prit tres-grand plaisir, & en loua grandement vostre Maiesté, attribuant à vostre personne la loüange entière de la paix, & de tout ce qui s'y estoit fait de bon, & vous estimant le meilleur de tous ceux avec qui il en auoit esté traité.

Après ce compliment, ie luy dis qu'outre la lettre du dix septiesme Ianuier i'en auois encor du 20. par laquelle il auoit pleu à vostre Maiesté me faire part de certaines choses qui s'estoient passées en la dernière audience que Monsieur le Cardinal Aldobrandin auoit eüe de vostre Maiesté, mais que ie les voulois reseruer à quand ledit sieur Cardinal seroit arriué par deçà: & puis pour essayer de tirer de luy les difficultez que Monsieur de Sauoye & les Espagnols faisoient sur la ratification de la paix, ie luy dis qu'il se disoit par tout Rome qu'il n'y auoit point de paix, & que ce seroit la seconde fois que nous l'aurions faite avec le Duc de Sauoye, & luy non avec nous. Sa Saincteté qui est fort retenue à parler, ne me respondit sinon qu'il y auoit quelque chose, mais qu'il esperoit en Dieu que nous aurions la paix, & qu'il auoit renuoyé Erminio, & escrit des briefts tres-affectionnez à plusieurs & en diuers lieux, auoit aussi commandé au Cardinal Aldobrandin de passer là où il falloit, & que Dieu scauoit le soin & sollicitude qu'il en auoit. Et moy me me contentant de ceste generalité, & desirant entendre quelque chose de plus particulier, ie luy dis qu'entre autres choses on disoit que les Espagnols vouloient contre l'accord, qu'il leur fut loisible de faire bastir des forts au passage qui auoit esté reserué, qui rendroit vaine & inutile, & ains dommageable à vostre Maiesté la cession de sdicts pays, qui sont tous ouuerts sans aucunes forteresses que celles de Bourg; Que vostre Maiesté pourroit sur ceste leur proposition demander par mesme raison & moyen vn pareil passage par le Marquisat de Salusses, & pouuoir d'y construire des forts. Que si l'on respondoit que vostre Maiesté n'auoit point des Estats en Italie au deçà dudit Marquisat, pour lesquels vous eussiez besoin de vous reseruer vn passage: ie repliquois que le Duc de Sauoye, auquel seul nous contradiions, & qui se reseruoit ce passage, n'auoit non plus aucun Estat ces pays cédéz, & le Comté de Bourgogne iusques

Il man-  
que icy  
quel-  
ques

618 LETTRES DE MONSIEUR,  
 auquel ils'estoit reserué ledit passage. Et si ledit Duc vouloit dire que si auoient bien les Espagnols, pour lesquels il se mouuoit à retenir ledit passage; ie luy pouuois respondre que les princes d'Italie, & principalement le saint Siege, auoient aussi des Estats au deçà, & fort près du Marquisat de Salusses, comme le Ferrarois, & l'Exercat de Rauennes, & que vostre Maiesté auoit autant ou plus de raison de se mouuoir à demander ledit passage bien fortifié pour venir au besoin secourir les Estats du saint Siege, & mesme ledit Exarcat & le Ferrarois, qui auoyent esté donnez par les Roys de France Pepin & Charlemagne, & pour venir continuer aux Papes presens & futurs le seruice, secours, & protection que les Roys de France leur auoient tousiours renduë, & de fraische memoire, du temps de Clement septiesme & Paul quatriesme, contre l'ayeul paternel, & contre le pere du ieune Roy d'Espagne d'à present. Sa Saincteté se prit à rire sans aucunement s'ouurir, mais seulement tourna à dire qu'elle esperoit que la paix tiendroir. Ce que ie croy qu'elle me disoit plus pour n'aigrir les matieres, que pour aucune certitude qu'elle en puisse auoir. Quant à moy ie tiens pour chose certaine que le Duc de Sauoye ne ratifiera point que par force, & quand bien il ratifiera, ie ne croy point qu'il vienne à l'execution sinon par la mesme force. En somme, quoy qu'il face, ie pense qu'il ne faudra iamais fier, ny attendre rien de bon de luy ny en guerre ny en paix: & en ceste verité infaillible ie finiray ceste trop longue lettre, apres auoir prié Dieu qu'il vous donne, &c. Sire, &c. De Rome ce vingtiesme iour de Feurier, mil six cens vn.

## A MONSIEUR DE VILLEROY.

CCLIII.

**M**ONSIEUR, sa Maiesté a fait vn tres-bon choix de Monsieur le Connestable, de vous, de Monsieur de Sillery, & de Monsieur le President Iannin, pour faciliter l'execution du traitté de l'accord, mais par la lettre que i'escriis au Roy vous verrez à quoy vous en estes, outre ce que vous en auez appris ailleurs, qui est en somme que le traitté redigé par escript, & signé par les deputés, & par Monsieur le Cardinal Aldobrandin, ne sera point executé par le Duc de Sauoye, quelque auantageux & honorable qu'il soit pour luy & pour les Espagnols, lesquels, quoy que vous en pensiez vous fondant sur la raison & sur le deuoir, sont resolus de fomentier ceste sienne perfidie, aussi bien comme ils ont fait les precedentes. Mais le traitté que ledit Duc auoit fait en son esprit est desia tout executé: car il vouloit vous faire desarmer, & mettre au large la citadelle de Bourg, & en faire sortir toutes les bouches inutiles, & qui pouuoient esmouuoir le Gouverneur & les soldats à compassion, & leur causer encore de l'espouuement, & vouloir de plus y mettre des viures & autres com-

moditez. Or tout cela a esté fait, comme i'entends par ceux de son party, qui s'en vantent & se moquent de nous, dont ie suis plus marry & honnêteux que ie ne vous puis escrire, apprehendant en outre les grands maux qui sont pour en aduenir, desquels ne vous garantira pas le Legat, sur lequel on m'a dit que vous vous excusez par delà, & Dieu nous garde que pour vn escu que nous auons pensé espargner en nous desarmant si tost, il ne nous en faille despendre plus de cent ou mille. Et à la veüiré, si ie l'ose dire, il ne falloit point tant vous hastier, quand bien vous eussiez contracté avec le Prince le plus loyal, veritable, & constant en promesses qui soit au monde : mais ayant affaire avec le Duc de Sauoye qui s'est tant donné à congnoistre à vous, ie ne sçay quel enchantement vous a precipité. Pardonnez moy ie vous prie, & croyez que ie ne loge point tant de presumption chez moy, que ie pense estre entendu en telles choses plus que le moindre qui soit à la suite du Roy : mais en recompense de mon ignorance en autres choses, ie pense estre fort sçauant à ne croire point à monsieur de Sauoye, ny à pas vn qui dise ou promette que le Duc de Sauoye fera. Et comme i'estime que monsieur de Sillery me pleigeroit de ceste science s'il en estoit besoin, aussi me souuiens- ie tres-bien de vous, auoir escrit plus d'une fois, & entre autres dès le dernier d'Aoust, qu'il ne luy falloit plus croire, ny pour quelque propos d'accord qui serinst faire aucune suspension d'armes, ny perdre aucun temps, ny occasion de faire progrès sur luy, & quoy qu'en fin fust accordé & promis, ne croire plus à aucune parole, ny à aucun sine escrit, ny d'aucun autre Prince qui promist des faits de cet ennemy : mais que attendu la perfidie percedente, sa Maieité se deuoit fair faire raison actuellement & de fait, auant que poser les armes, ny en suspendre, ny intermettre l'exercice. Et pource que deslors ie preuoiois l'importunité que vous receuriez de deçà, ie vous en preparay par la mesme lettre du dernier d'Aoust, & vous en escriuis l'antidote bien au long sans en rien oublier. Ie sçay bien que des choses faites ie ferois bien cautelement de m'en taire : mais ie sens bien aussi en moy-mesme que si ie n'en deschargeois mon cœur, i'en creuerois; cy apres ie me disposeray à patience puis qu'ainsi va, mais pour cette fois elle m'est eschappée, dont ie vous prie m'excuser.

Quand aux occurrences d'icy, i'ay escrit, en respondant au Roy, comme les Espagnols continuent les prouisions & preparatifs de guerre aussi fort que iamais, & menassent la Prouence si ouuertement, qu'il s'est trouué icy vn de leurs adherens qui a voulu gaiger contre vn François qu'auant qu'il soit trois mois, ils auront vn des meilleurs ports de Prouence, par ainsi il sera bon d'y pouruoir au plus tost. A Naples depuis y auoir sceu la conclusion de la paix, on a deboursé argent aux Capitaines Albanais qui y font des luees de gens de cheual, & a en auancé à chacun desdits Capitaines deux mille escus comptant, & baillé assignation pour autres cinq mille escus. A Milan aussi on a fait de nouueaux Capitaines de cheualiers legers, & aduancé à chacun six mille escus, & huit Capitaines d'arquebusers à cheual, & fait payer à chacun trois mille escus.

Le Comte de Fuentes a enuoyé bien tost apres en cette Cour deux Senescurs & le Fiscal de Milan, pour mettre fin au dissenin de la iurisdic-

tion Ecclesiastique qui estoit entre monsieur le Cardinal Borromee Archeuesque de Milan & les officiers du Roy d'Espagne, dont les articles auoient desia esté accordez à Milan, moyennant le siege & le daiz du Gouverneur de Milan que le Pape permet estre au chœur de l'Eglise Cathedrale, dont le feu Cardinal Borromee lors Archeuesque de Milan l'auoit fait leuer, & croy que les Espagnols ont choisi ce temps pour enuoyer ces deputés, & donner ce contentement au Pape, afin de s'en seruir d'un leniment & adoucissement du desplaisir que sa Sainteté reçoit des difficultez qu'ils font sur la paix dernièrement accordée. Les Espagnols auoient vn temps y a garnison à Piombino, comme lieu de leur protection; depuis peu ils l'ont acquis tout à fait, donnans recompense au Seigneur dans le Royaume de Naples, & traitans desia de bastir vne autre forteresse près de là. Et par ce que c'est vne place en Toscane sur mer auprès de Pise, le grand Duc en est entré en ialousie, & ce d'autant plus qu'on pretend quel'isle d'Elba, qu'il tient en engagement, depend dudit Piombino. Nous n'auons aucun moyen de secourir nos amis par mer, pour n'auoir point de galeres, qui est vn de mes anciens regrets, & vn des plus notables & honteux manquemens du premier Royaume de la Chrestienté, si qu'on de deux mets, & situé par la nature au plus beau & auantageux endroit de l'Europe, pour faire, aider, ou empescher toutes grandes entreprises par mer ou par terre. A tant, &c. Monsieur, &c. De Rome ce 26. Feurier 1601.

---

### A M O N S I E V R D E V I L L E R O Y .

#### C C L I V .

**M** O N S I E V R , Cette lettre que ie m'en vay vous faire ne sera point vn ouurage volontaire, ains forcé & contraint, & du tout contre mon naturel, que ie ne puis neantmoins se ne dois obmettre, d'autant qu'il appartient au seruice du Roy, & à quelque miennne telle quelle iustification. Vn Capuchin appellé frere Hilaire de Grenoble vint à moy le septiesme de ce mois, & me rendit vne lettre de la main du Roy du dix-neufiesme d'Octobre, par laquelle sa Majesté me commandoit de toute son affection de vouloir embrasser les affaires dont il me parleroit, à ce qu'il les peust traiter tant avec sa Sainteté, qu'avec le sacré college des Cardinaux, & autres Prelats, qui sont les mesmes paroles de ladite lettre. Apres que i'eus fait audit Religieux l'accueil & caresses que ie deuoie à son habit & à la lettre du Roy, ie luy dis que ce iour là i'estois fort occupé à ouyr ceux qui me venoient informer pour la congregation du Concile qui se deuoit tenir le lendemain, & à lire & considerer les escriptures qu'ils me laisseroient, & que s'il luy plaisoit différer à vn autre iour, ie l'ouerois aussitost qu'il voudroit, & le seruirois de tout mon pouuoir. Il retourne

le Vendredy apres disner neufiesme de ce mois , & apres que ie l'eus fait  
asseoir , il me dit plusieurs choses , lesquelles rendoient toutes à me faire  
croire qu'il auoit tres-bonne opinion de la religion du Roy , & estoit son  
tres-affectionné seruiteur ; Que sa Maiesté aussi auoit toute fiance en luy ,  
l'employoit en ses affaires les plus secretes & importantes , croyoit à ses  
admonitions , & se conduisoit grandement par ses conseils ; Que c'estoit  
luy qui auoit esté cause du bon accueil que Monsieur le Cardinal Aldo-  
brandin auoit receu du Roy , & que sa Maiesté luy auoit quitté son logis  
à Chambery. Cét exemple me fit douter aucunement des generalitez  
precedentes , d'autant que ie sçay que la courtoisie de sa Maiesté , & le  
respect qu'il porte à nostre saint Peré , & son profit propre luy dictoient  
assez le bon accueil & honneur qu'il deuoit faire audit sieur Legat ; & vn  
bon & discret seruiteur du Roy , quand bien il auroit donné tel conseil à sa  
Maiesté , ne s'en vaneroit point ; ains au contraire diroit que le tout auroit  
esté fait du propre mouuement de sa Maiesté , afin qu'on luy en sceust plus  
de gré. En apres il me dit que c'estoit luy qui auoit admonesté le Roy lors  
que ledit seigneur Legat approchoit d'vn costé , & la Royne d'vn autre ,  
d'envoyer hors de sa suite Mademoiselle d'Entragues , afin que ledit sei-  
gneur Cardinal Legat n'en prist scandale , ny la Royne ialousie. S'il eust  
commencé par cet exemple , son habit & sa profession me l'eussent pû faire  
croire ; mais pource que ie tenois desia & tiens le premier exemple pour  
faux , & que ie sçay d'ailleurs combien le Roy est discret de soy , & consi-  
derant les circonstances du temps & des lieux , des personnes & des choses ,  
ie doutay encore de ce second exemple ; ioint qu'en tout euenement il estoit  
plus seant ( comme dit est ) à vn bon seruiteur du Roy tel qu'il se fait , de  
s'en taire , & d'en laisser la loüange à la bonté & prudence de sa Maiesté  
mesme. Mais ce que dessus est peu de chose en comparaison de ce qui sen-  
suit. Il me dit donc de plus , que c'estoit luy qui auoit consellé au Roy de  
marier ladite Damoiselle , & de recouurer de Monsieur de l'Entragues son  
pere vn escrit qu'il disoit que le Roy luy auoit fait de sa main auant que la-  
dite Damoiselle luy fust rien , & qu'il auoit fait par le commandement du  
Roy plusieurs allees & venuës pour le mariage d'elle , & pour le recou-  
urement dudit escrit , mais qu'il auoit laissé ces deux ourages imparfaits  
pour faire ce voyage de Rome , & qu'à son retour par delà il les parache-  
ueroit. Je ne vous oferois mettre icy le contenu dudit pretendu escrit  
qu'il me recita , car le penser seulement me fait horreur , comme chose qui ,  
si elle estoit vraye , & qu'il n'y fut bien tost pourueu , suffiroit pour remet-  
tre la France en plus grande combustion que iamais ; & sur cela il me  
monstra & bailla à lire deux lettres à luy Capuchin escrites , comme il di-  
soit , de la propre main de ladite Damoiselle , en l'une desquelles est faite  
mention dudit pretendu escrit qu'elle fera voir à Monsieur de Neuers , dit-  
elle , s'il veut entendre au mariage de luy & d'elle. En me contant sesdites  
allees & venuës , pour me monstrier la grande priuauré qu'il auoit avec le  
Roy , il luy eschappa plusieurs fois qu'en parlant à sa Maiesté , il luy disoit ,  
MON ROY IL FAVT QVE TV FACHE CECY , ET IL FAVT QVE TV  
FACHE CELA , & en parlant à ladite Damoiselle , il luy disoit , MAM OYSE  
MAMIE , SÇAIS TV , CELA N'EST PAS BON , IL NE FAVT PAS QVE

**TES FACES CELA, TV DOIS FAIRE AINSI ET AINSI.** Pendant qu'il me faisoit ces beaux contes ie disois en moy-mesme, voila vn Capuchin bien vain & leger, & vne teste pleine de vent & de fumees. Mais quand bien tout ce qu'il me dit seroit vray, ny auroit-t'il point encor de la meschanceté & trahison? mō Dieu pourquoy me parle il de cét escrit, puis que ce n'est point chose donc il faille traicter à Rome, ny en laquelle ie puisse rien faire, ny qui se doive dire à hommie du monde, sinon qu'à celuy qui auroit à seruir à le reconurer? & ces deux lettres qu'il m'a baillées, & qu'il deuoit auoir brulées inconrinēt apres les auoir leuës pourquoy les a-t'il gardees, puis que de les grader il n'en peut aduenir aucun bien, ainstrop de mal? & ayant fait ceste premiere faute de les garder, à quelle fin en a-t'il fait vne autre plus grande de les porter en Italie & à Rome? pourquoy les montre-t'il à moy-mesme, quelque fidelle & asseuré seruiteur du Roy que ie sois? en fin quelle folie est-ce à vn Capuchin de dire, tu, au Roy? & quelle vanité de le reciter à vn Cardinal à Rome? & si d'uanture il ment, quel excès de vanité est-ce de se vanter, & mentir de sa honte? Voila, Monsieur, les considerations que ie faisois en moy-mesme, pendant qu'il me retiroit ses beaux faits & gestes. Quand il estima auoir bien fondé enuers moy par ce que dessus l'autorité qu'il auoit auprès du Roy, il me dit qu'il y auoit quelques Capuchins Italiens en France, soubgonnez d'auoir voulu tuer le Roy, & que sa Maiesté desiroit qu'ils sortissent de son Royaume, & qu'il vouloit faire cela avec Monsieur le Cardinal sainte Seuerine Protecteur de leur ordre sans en parler au Pape, pour ne scādaliser sa religion, puis que la volonté du Roy se pouuoit accomplir à moins. Je luy respondis là dessus qu'il n'auroit pas grande peine à cela; Que le Pape & les generaux des Ordres nous auoient tousiours dit & escrit, que s'il y auoit quelques religieux qui ne plüssent au Roy, ils les feroient incontinent sortir hors du Royaume en les nommant, sans aucune expression de cause, de laquelle ils ne s'enqueroient nullement. En vne chose s'arresta-t'il plus qu'à nulle autre, & s'y eschauffa terriblement, c'est qu'il auoit entendu que le Pape vouloit faire Cardinal le Pere Monopoli Capuchin, que vous auez veu avec Monsieur le Cardinal Aldobrandin, & que si cela aduenoit ce seroit la ruine de leur ordre, & fut long temps à mespriser ledit Monopoli, adioustant, qu'il ne sçauoit point ceste nouuelle quand il estoit. party d'auprès le Roy, que s'il l'eust sceu il eut fait faire par le Roy cecy & celà: mais qu'il pensoit y estre encores à temps, & feroit parler le Roy si hault, si hault, si hault, que ie ne pouuois m'imaginer autre chose, sinon que le Roy denonceroit la guerre au Pape, en cas que sa Sainteté fist Cardinal ledit Pere Monopoli; me dit neantmoins qu'il n'en vouloit point parler au Pape directement ny expressément, mais qu'il luy diroit bien quelques choses appartenantes au bien de leur ordre par lesquelles la Sainteté coniecturerait & concluerait en foy mesme qu'il ne deuoit faire ledit Monopoli Cardinal. Voila en somme les trois matieres dont il me parla, me disant luy mesme que des deux dernieres il n'en vouloit point parler au Pape. Quant à la premiere vous iugerez assez s'il s'en peut parler à la Sainteté, ny près ny loing, sans vne horrible trahison; de sorte donc qu'il ne me dit rien de ce qu'il auoit à traicter avec la Sainteté, & avec le college des Cardinaux, & avec autres Prelats, dont il

s'ensuit aussi qu'il ne se vouloit seruir de moy que pour auoir audience du Pape, & pour s'autoriser de mon nom à traicter choses à moy incognues, & possible dommageables au seruice du Roy. Quand il m'eust tenu en ce que dessus vne grosse heure & demie; ou plustost deux heures, ie luy respondis vn peu en moyne, mais bien fort contre mon naturel, que i'estois bien aise de cognoistre & auoir ouy vn Pere si bien persuadé de la religion du Roy, & si affectionné & confident à sa Maiesté, que ie le seruirois très-volontiers en tout ce qui appartiendrait au seruice de nostre Prince, & au bien du Royaume, & si ie pouuois faire quelque chose pour son ordre, & pour sa personne en partuculier ie m'y offrirois semblablement.

Le lendemain 10. de ce mois, il m'enuoya vn billet, par lequel il m'escrinoit qu'on luy auoit dit que le temps le plus propre pour son audience seroit le Dimanche apresdinee, pour n'estre iour ordinaire d'audience, dequoy il m'auoit voulu donner aduis, à ce qu'à mon adueu, ce sont ses mots, il püst auoir audience le lendemain. Moy qui me souuenois que l'audience m'auoit esté refusée à moy-mesme le iour auparauant qui estoit Vendredy, & qu'en ce iour de Vendredy ny au Samedy, qui sont iours d'audience pour les ministres des Roys & autres Princes, le Pape ne leur auoit point donné d'audience, i'estimay que sa Sainteté ne commenceroit point à donner audience par vn Capuchin, & pour celà ie n'enuoyay point demander audience pour luy, & d'autant moins que ie pensay que si le Pape tenoit Consistoire le Lundy qui n'estoit qu'un iour apres, ie parlerois moy-mesme au Maistre de chambre du Pape, pour luy faire auoir audience. Je luy fis sçauoir que pour bonnes considerations ie n'estimois point deuoir demander audience pour le Dimanche, attendu que le Vendredy le Pape n'auoit point donné audience à pas vn Ambassadeur, mais que si sa Sainteté tenoit Consistoire le Lundy ie demanderois moy-mesme l'audience pour luy. Monsieur le Capuchin se facha fort de cela, comme il me fut rapporté, & par cela ie cognus d'autât plus sa presumption & folie. Le Dimanche sa Sainteté fit signifier le Consistoire pour le lendemain Lundy; & ledit iour de Lundy au matin auant que ie partisse de chez moy pour ledit Consistoire, le sieur de Beauuau de Lorraine, qui demeura icy apres le partement de Monsieur le Duc de Bar, me vint faire souuenir de demander l'audience pour ledit Capucin. Je luy dis que ie l'auois ainsi delibéré, que ie n'y faudrois point, & m'allay imaginant que ce gentil-homme & ledit Capuchin auoient conféré ensemble sur des choses de Lorraine, & particulierement sur le fait de Monsieur le Duc & de Madame la Duchesse de Bar, & que ce deuoit estre vne des choses dont ledit Capuchin vouloit traicter.

Quand le Pape fut descendu en la salle du Consistoire, ie parlay à son Maistre de chambre, & luy dis comme il y auoit vn Religieux Capuchin François qui m'auoit esté recommandé par le Roy, & desiroit auoir audience de sa Sainteté, que ie le priois la luy faire auoir le plustost que faire se pourroit. Ledit Maistre de chambre me dit qu'il y auoit enuiron deux mois que le Pape n'auoit donné audience, sinon qu'aux deux extraordinaires qui auoient esté enuoyez par le Comte de Fuentes, & par le Duc de Sa-



uoie, & qu'il y auoit plusieurs Cardinaux, Ambassadeurs, & autres qui l'auoient demandee, laquelle apres la tenuë du Consistoire ne se pouuoit plus honnestement refuser ny differer; qu'il ne pensoit point pouuoir faire donner audience audit Capuchin de toute ceste semaine là, mais que la suiuaute il feroit tous ses efforts pour la luy faire auoir. Je me contentay de cela sans luy repliquer autre chose, sinon que ie le priois que ce fust au plustost que faire se pourroit.

Ledit Capuchin enuoya incontinent apres le Consistoire sçauoir la response que i'auois eue, laquelle ie luy manday de bõne foy comme elle m'auoit esté faicte: & lors il se mit en tres-grande colere comme si ie luy eusse fait tous les torts du monde, & l'Archeuesque d'Vrbain, qui est vn tres-honorable Prelat, s'estant rencontré avec luy l'aspresdnee, il se plaignit aigrement de moy audit Archeuesque, & braua, comme vous pouuez penser, en gouuerneur du Roy, qui dit, tu, à sa Maiesté: car ledit Archeuesque qui me vint voir sur le soir, fut si modeste qu'il ne me voulut point reciter les particularitez, & ie ne l'en recherchay point aussi; mais il me dit seulement en general que ledit Capuchin estoit en grande colere contre moy, & en particulier auoit dit qu'il auroit bien moyen d'auoir audience par autre voye que par moy, & que luy Archeuesque d'Vrbain l'auoit dissuadé d'y employer d'autre, puis que nous faisons tous deux pour le Roy. Je remerciay ledit sient Archeuesque, & luy dis que ie ne cognoissois ce Capuchin pour Agent de sa Maiesté, quelque charge qu'il se vantaist auoir d'elle, & neantmoins que i'auois demandé audience pour luy, comme i'eusse sçeu faire pour moy mesme, & s'il la pouuoit auoir par autre voye que ie n'en ferois point marry.

Le lendemain au matin douzième de ce mois, i'envoyay vers ledit Capuchin mon auditeur qui est vn fort honneste homme & doux, & luy dis qu'il trouueroit vn homme en grande colere, pour n'auoir eu audience du Pape aussi tost qu'il se l'estoit imaginé, & qu'il aduailast de ne luy augmēter point sa passion, ains de luy parler avec toute douceur, quelque chose qu'il ouïst de luy, & sur tout qu'il ne sortist point des termes que ie luy prescriuois; qui estoient que i'auois entendu qu'il estoit fesché de ce qu'il n'auoir eu audience du Pape si tost comme il eust desiré; Que ce n'estoit point ma faute, qui en demandant audience pour luy auois procedé avec plus de diligence & de respect que ie ne faisois quand ie la demandois pour moy; car ordinairement les Cardinaux & Ambassadeurs l'enuoient demander au maitre de Chambre par vn estasier ou par vn de leurs gentils-hommes tout au plus, & pour luy ie l'auois demandee moy-mesme; que puis qu'il ne se contentoit de la response, & disoit qu'il auoit d'autres moyens d'auoir audience, ie le priois d'en user, & que ie n'en prendrois aucune ialousie ne desplaisir, ains serois bien aise de sa bonne & briue expedition, & de tout autre contentement qui luy sçauroit aduenir. Le Capuchin respondant à mon auditeur qui luy auoit parlé si doucement, pratiqua le proverbe Oignez vn vilain il vous poindra; & luy dit plusieurs sottises qui ne valent pas le reciter. Mais ie vous diray seulement deux menaces dont il usa; l'une est qu'il retourneroit bien tost vers le Roy, & feroit bien entendre à sa Maiesté comment ses affaires estoient administrées à Rome, l'autre, que le Roy le

le renuoyeroit encotes par deça, & qu'il porteroit des lettres de sa Maieſté, mais que ce ne ſeroit point à moy.

Monsieur vous ingerez aſſez de ceſte inſolence Capuchine, quant à moy ie ne vous en diray autre choſe, me contentant de luy en auoir dit mon aduis à luy meſme, qui me vint voir le lendemain au matin quatorzième de cemois, ayant mis de l'eau en ſon vin, & ſe monſtrant auſſi pariure ceſte fois cy, comme il s'eſtoit monſtré vain & leger la premiere : d'une choſe m'aſſeſſay-ie bien, que s'il luy reſte quelque ſcintille de ſens & de iugement, il ne me tiendra iamais pour homme qui croye que mon bien eſtre, ou mon mal eſtre auprès du Roy depende de luy, ny qui aye vn ſeul poil de crainte de tous les Capuchins & moines qui ſont hors ou dedans le monde. Ordinairement les aſſions offuſquent l'entendement, & pour cela s'appellent perturbations, mais vn peu de colere qui me vint d'eſtre menacé par vn Capuchin m'illumina lo mien, & me representa que quoy que le Roy m'eult eſcrit, ie pouuois auoir fait mal d'auoir demandé audience pour vn tel fol, & qui ne m'auoit communiqué ce dont il deuoit traiter avec le Pape, avec lequel il pourroit faire quelque eſcapade, comme il auoit fait avec moy; & quand il n'auoit point de mauuaiſe volonté, de quoy toutesfois ie ne me pouuois aſſeurer, ſa legereté & vanité luy pourroit faire faire vne auſſi grande faute comme la malice meſme, ainſiqu'il aduenoit trop de fois. Quand il penſa m'auoir aucunement appaiſé par ſes pariures & par ſon hypocriſie, il me dit qu'il vouloit parler au Pape de la diſpenſe de Monsieur le Duc de Bar & de Madame la Duchefſe, s'eſtant poſſible apperceu atiec le ſieur de Beauuau que ie m'en eſtois douté : & la premiere raiſon qu'il m'allegua, fut que ſa Saincteté ne deuoit ſçauoir mauuais gré de ce mariage à ce Prince, d'autant qu'il auoit eſté intimidé, & auoit contracté ce mariage par crainte. Ie luy dis que c'eſtoit mal commencé, & que cela bleſſoit l'honneur du Roy, & eſt faux, & que Monsieur de Sillery & moy auions reſpondu à ceſte calomnie; & que le Pape croyoit & ſçauoit le contraire. Il eut honte, & me dit qu'il ſeroit vn ſommaire par eſcrit de ce qu'il vouloit dire, & me le monſtreſoit, & ainſi s'en alla, & ie ne l'ay point veu depuis. Mais ie diſ l'apreſdinee au ſieur de Beauueau, qu'il aduiſaſt bien à ce qu'il faiſoit, & que ce Capuchin entonnoit mal, quicôque luy euſt donné le ton, & luy adiouſta que le Roy luy auoit recommandé cét affaire de toute ſon affection à Monsieur le Cardinal Aldobrandin, qui luy auoit promis de luy faire tout bon office, & qu'il ſeroit bon de reſeruer cét affaire iuſques à la venuë dudit ſeigneur Cardinal qui ne pouuoit gueres plus tarder, & qu'alors nous y ſerions tous.

I'ay depuis ſçeu des nouuelles dudit Capuchin, & comme il a cherché d'auoir audience du Pape par autre voye, & entre autres par Monsieur le Daire, qui ne s'eſtant contenté d'auoir parlé au maiſtre de chambre, en parla au Pape meſme, comme il en a toute commodité luy portât à ſigner tous les iours. Mais il ne la ſeut auoir iuſques à hier 21. de ce mois, de façon qu'il a appris que ie luy auois dit verité, & qu'il n'eſt pas ſi aiſé d'auoir audience du Pape comme de ſon gardien. Auquel propos ie vous diray que le M. de chambre me dit le Vendredy 26. de ce mois, que ie fus à l'audience, que Monsieur le Cardinal Geſualdo qui eſt Doyen du College des Cardinaux

K K K k

& qui est pressé de s'en retourner à Naples dont il est Archeuesque, auoit demandé audience avec grande instance, mais qu'il ne l'auoit peu auoir, & ne l'auroit encores de deux iours. l'ay encores sceu que cependant il est allé voir vn grand nombre de Cardinaux, & qu'il s'est vanté avec d'autres qu'il a esté cause & moyen du bon accueil, & des honneurs que le Roy a faicts à Monsieur le Cardinal Aldobrâdin, & d'auoir fait releguer de la Cour la susdite Damoiselle; Qu'il a parlé des choses de la paix, comme s'il y eust esté employé: & toutesfois il estoit party de ces quartiers là dès le mois d'Octobre, & ne sçauoit rien de ladite paix sinon autant comme ie luy en dis la premiere fois qu'il me vint voir; Qu'il s'est vanté d'autres lettres de créance du Roy au Pape; ce qui est faux: d'auoir encores plusieurs blancs signez de sa M. ce que ie ne sçay point, mais s'ils seroient tres-mal colloquez: Qu'il veut faire plusieurs seruiteurs au Roy en ceste Cour; Que Monsieur de Silbery auoit manqué en cela, & ne s'y entendoit rien, & moy encores moins; Qu'il vouloit faire mettre icy vn Ambassadeur qui sçauoir bien continuer ce qu'il y auroit commencé. Et de fait ie sçay qu'il s'est enquis fort soigneusement avec quelques Prelats de ceste Cour qui on pourroit attirer au service du Roy; laquelle action n'auroit en soy rien de mal s'il la sçauoit conduire. Il s'équit aussi fort soigneusement de mon auditeur mesme, s'il y auoit point encores d'Ambassadeur arresté pour venir résider par deçà, & luy parla mesme du Côte de Brienne. Il s'est encores vanté d'auoir traité pour le Roy de grandes affaires en venât son chemin, & mesme en Toscane. Ceste derniere vâterie me fait craindre, & croire que pour s'auantager envers le grand Duc & la grand'Duchesse, & leur faire croire que la Roine & eux luy sont fort obligez, il leur aura dit qu'il aura fait enuoyer hors de la Cour ladite Damoiselle, & qu'il est apres à faire que le Roy la marie, pour en distraire du tout sa Maiesté, & qu'il recouure l'esprit dont il a esté parlé ci dessus: & à ce propos pour s'en faire à croire leur aura monstré les deux lettres qu'il me bailla à lire à moy; & en cet instât me vient en pensément que c'est pour cela qu'il les a portees en Italie. A vostre aduis ne leur aura t'il pas annoncé vne belle nouuelle, qui les aura mis en repos pour long-téps: N'aura t'il pas fait vn bon service au Roy? Mais si vous sçauiez la bonne guide qu'il a prise pour luy donner adresse par Rome: c'est vn Capuchin appelé frere Cherubin, Sauoyard, de saint Iean de Maurienne, duquel Monsieur de Sauoye & ses ministres se sont tousiours seruis en toutes les calónies qu'ils ont forgees contre le Roy, quant à le religio & aux choses de Geneue, Tonon, & des peuples nouuellement conuertis auprès de Geneue. Cestui-cy qui est vn homme grossier en apparence & malicieux en effect, luy applaudit en toutes ces vanteries.

Voilà Monsieur, ce dont il m'est souuenu en ce beau Pere. Ce que ie vous ay voulu escrire, n'ostant tant pour preuenir les mauuais offices qu'il dit me vouloir faire auprès du Roy, lesquels ie ne crains point, comme pour vous donner à cognoistre l'homme, & vous prier de supplier sa Maiesté de ma part qu'elle aduise de mieux cognoistre les hommes, & mesmemét moy mesmes, auât que leur commettre choses d'importance, pour estre mesmement traitées en Italie & à Rome, où il y a plus de finesse qu'en tout le reste du monde. A tant, &c. Monsieur, &c. De Rome, ce leudy 22. Feurier 1607.

## A MONSIEUR DE VILLEROY.

CCLV.

**M**ONSIEUR, Le dernier ordinaire qui partit d'icy pour Lyon vous porta de mes lettres des 20. 21. 22. & 23. Feurier. Depuis ie fus à l'audience le 2. de ce mois, plus pour apprendre ce que le Pape pensoit du succez & euenement de l'accord fait à Lion par Monsieur le Cardinal Aldobrandin son neveu, que pour autre chose, afin d'é aduertir le Roy. Sa S. me dit qu'elle en auoit bõne esperâce, & sur ce que ie luy repliquay que du costé du D. de Sauoye, & des Espagnols qui le fomentoient, il ne se voyoit aucun signe de paix, ains tous preparatifs & propos de guerre, il tourna à me dire qu'il esperoit que la paix sortiroit son effect; & apres auoir demeuré vn peu de temps sans me dire mot, il adiousta, ie ne vous dis pas que ie le sçache, mais bien vous dis-je que i'en espere bien. Tres-sainct Pere luy dis-je, ie ne doute point que vostre Saincteté, qui comme Vicair de Iesus Christ est continuellement assistee du sainct Esprit, ne fonde bien ses esperâces, mais nous autres qui auons esté cy-deuant deceus par le Duc de Sauoye, & auõs cogneu son naturel du tout elloigné de la paix & du repos, ne pouuons nous garder de soupçonner qu'il cherche à présent de tirer au long l'exécution & la ratification de cét accord, pour gagner le Printemps qui s'approche, comme apres le terme de l'accord de Paris fut expiré, il cherchoit, de gagner l'hyuer, Ouy dit le Pape, il trouua ce qu'il cherchoit; car il fut luy mesme surpris de l'hyuer, apres que le Roy eust fait vne bonne partie de ce qu'il vouloit. Or ie vous dis qu'il se traicte à bon escient avec les Espagnols, & si le Roy d'Espagne veut la paix, il faudra bien que le Duc de Sauoye se taise. Voila Monsieur ce que ie pust tirer de sa S. pour ceste fois-là.

Le cinquieme de ce mois arriua au Pape sur l'heure du dîner vn courier de Monsieur le Cardinal Aldobrandin, & deux heures apres il m'enuoya son Maistre de chambre qui me dist que sa Saincteté m'auoit voulu faire part de l'aduis qu'elle venoit de recevoir, que le Roy d'Espagne auoit enuoyé son consentement que l'accord fust executé, & qu'elle ne voyoit point qu'il y eust plus aucun empeschement que la paix n'allast auant, & que les François & les Espagnols de demeurassent bons amis ensemble. Surquoy ie fis le remerciement & la demonstration de ioye que i'estimay estre conuenable à vne telle nouuelle, & à moy enuoyee par sa Saincteté, combien que i'ay tousiours entendu mal volontiers qu'on pensast seulement qu'un accord fait avec vn Roy de Frâce deust dependre d'un Roy d'Espagne. Depuis, ie sceus comme en mesme temps que Monsieur le Cardinal Aldobrandin auoit enuoyé ledit courier au Pape il auoit aussi enuoyé le Côte Ottavio Tassone au D. de Sa. pour retirer de luy la ratification & l'aporter au Roy.

Pour tout cela les Sauoyards & Espagnols ne laissent de se vâter par tout

K K K k 2

Rome qu'il y auroit guerre : & quand on leur oppoſoit ledit conſentement du Roy d'Eſpagne , ils reſpondoient diuerſement ; les vns , que ce conſentement auoit eſté preſté ſur le premier aduis que Monſieur le Cardinal Aldobrandin luy fiſt donner de l'accord par le Nonce du Pape reſident en Eſpagne , mais quand le Roy d'Eſpagne auroit veu les lettres des Duc de Sauoye , Comte de Fuentes , & Duc de Seſſe , il parieroit & feroit bien autrement : les autres diſoient , que le conſentement eſtoit conditionné moyennant que le Roy rabbatit des conditions de l'accord cecy & cela. Encores que ie ſçache long-temps y a qu'il ne ſe faut arreſter à tels bruiſts ſi eſt-ce que i'en en voulus eſclaircir avec le Pape , & avec Monſieur le Cardinal S. George , en ma premiere audience qui fut le Vendredy enſuiuant 9. de ce mois , & aprins de ſa Sainteté & dudit ſeigneur Cardinal , que ledit conſentement eſtoit pur & ſimple , ſans aucune reſtriction ny condition expreſſe , apres que le Roy d'Eſpagne auoit veu & entendu les articles de l'accord , & tout ce que ſes miniſtres d'Italie & le D. de Sa. luy auoient eſcrit là deſſus.

Mais pour ce qu'il ſembloit à chacun que la ratification du Duc de Sauoye tardoit trop à venir , le monde ne laiſſoit de douter de ſon intention , iuſques à hier qu'eûrō mady arriva en ceſte ville le Cheualier Clement enuoyé par Monſieur le Car. Aldobrandin , & apporta la nouuelle que le D. de Sa. auoit ratifié , dont le Pape receut vn plaifir merueilleux , & m'enuoia aduiſer par le ſieur Iacomo Sanefe , Secrétaire de la cōſulte & frere dudit Cheualier Clemēt , & deſcendit en l'Egliſe ſainct Pierre , accompagné des Cardinaux qui logent au Palais , & fiſt chanter le Te Deum , & tant que le iour dura l'artillerie du chaſteau ſainct Ange ne ceſſa de tirer , & le ſoir meſme furent faiſts feux de ioye , tant audit chaſteau qu'au Palais , & chez les principaux officiers de ſa Sainteté , comme le Gouverneur de Rome , & l'Auditeur de la chambre , & chez les Ambaſſadeurs d'Eſpagne & de Sauoye , & pluſieurs Cardinaux. A quoy , pour pluſieurs bons reſpects , ie ne voulus m'aller de ma part , ayant entendu comme les preparatifs ſ'en faiſoient eſdits lieux & meſme d'autant que l'Ambaſſadeur d'Eſpagne eſtoit venu vers moy ſur le ſoir , qui me dit qu'il auoit receu lettres de Monſieur le Cardinal Aldobrandin & du Comte de Fuentes , qui luy eſcriuoient que le Duc de Sauoye auoit ratifié l'accord fait dernièrement à Lyō par ledit ſeigneur Cardinal. Et i'açoit qu'être les deux Roys ne fuſt graces à Dieu interuenu iuſques icy aucun rupture , neantmoins pour la cōionctiō qui eſt entre le Roy ſon maistre & le Duc de Sauoye , ſi ceſte guerre n'eût eſté aſſoupie , il eût pû aduenir quelque deſtourbier de la bonne intelligence & amitié qui eſtoit entre leurs M. il auoit voulu venir vers moy ſur l'occaſiō de cette bōne nouuelle , pour ſe réiouir avec moy de ce que par ledit accord toute occaſion de tel deſtourbier eſtoit oſtee. Ie luy fis pareillement la reſponſe que i'eſtimay eſtre conuenable à vn tel compliment , & de façon que ie ne penſe point m'eſtre laiſſé vaincre d'honnéſteté & courtoisie. Ce iourd'huy eſt venu auſſi l'Ambaſſadeur de Sauoye me viſiter ſur la meſme occaſion de la paix , & ſ'en eſt fort reſioüy avec moy , qui l'ay traité de meſme , & après le partemēt de ce courtier ie les iray voir tous deux.

A ce matin le Pape eſt allé faire les ſept Eglises pour d'autant plus remercier Dieu de la paix , & croy qu'un de ces iours il en fera vne Chappelle ex-

présentement. Le grand Duc continuë tousiours en ses soupçons, & se prépare en tout euenement & son Ambassadeur m'estant venu trouuer vn de ces iours par le commandement de son Altesse, ie luy ay dit le commandement que i'auois eu du Roy, de faire office enuers le Pape pour la separation des forces assemblees en Italie, afin que chacun püst iouyr du fruit & de la paix sans ombre ny ialousie, & que sa Maiesté auoit fait expressément apposer ceste clause en l'accord principalement pour la consideration de son Altesse, & que comme le commandement m'auoit esté fait dès le 17. Iannier, avec la lettre mesme qui portoit le commandement de remercier sa Sainteté sur la conclusion de la paix, aussi l'auois-je accompli par mesme moyen, & iournerois faire ledit office à toutes les fois que bon sembleroit.

Vous aurez eu ladite ratification long temps auant que la presente arrive à vous, & à mon aduis ne vous y ferez fié sinon autant que la foy de Monsieur de Sauoye merite, & aurez attendu les effects & l'exécution réelle & actuelle des choses promises auant que r'enuoyer aucun soldat, ny laisser entrer aucune commodité dans la citadelle de Bourg, ny desgarnir la Prouence, veu les grandes forces qui sont à vos portes, & le Printemps qui s'en vient les favoriser. Iusques icy on a tousiours cherché de les accroistre & à Milan & à Naples, comme j'ay sceu par les dernieres lettres qui en sont venues: nous verrons s'ils cesseront desormais, & à quoy on les voudra employer.

Au demeurant la nouvelle est venue icy, comme ie croy aussi qu'elle vous aura esté escrite de dessus les lieux, que la Royne d'Espagne est grosse, de quoy ie suis fort aise, quand ce ne seroit que pour rabatre vn peu de l'orgueil & de l'outrecuidance du Duc de Sauoye, qui auoit desia deuoré par esperance la succession & grandeur de la Couronne d'Espagne. Elle est grosse de trois mois, & outre que le Pape me l'a assuré en ma dernière audience, l'Ambassadeur d'Espagne me le dit hier apres auoir accôply avec moy sur ladite nouvelle de la ratification, & m'adiousta qu'on n'en auoit voulu rien dire, iusques à ce qu'elle auoit esté trois mois sans auoir ses mois. I'ay d'ailleurs entendu que le Roy & la Reyned'Espagne auoyent fait de grands vœux pour auoir des enfans, & qu'à present lesdits vœux leur semblans excessifs, ils en ont fait demander la moderation & commutation au Pape, & i'ay esté aduisé de ceste circonstance de si bon lieu que ie la tiens pour certaine. M. le Cardinal de Sourdis me dit le 7. de ce mois qu'il vouloit s'en retourner en France où ses affaires le r'appelloient. Je luy dis que pour mon regard ie n'auois rien à luy dire là dessus: mais comme seruiteur du Roy ie luy voulois dire que Monsieur le Cardinal Aldobrandin en la dernière audience qu'il auoit eue de sa Maiesté, l'auoit prie de faire que les Cardinaux François qui estoient en France vinssent résider à Rome, luy remontrant qu'ils y seroient plus vtils au service de sa Maiesté, & plus dignement qu'ailleurs pour les raisons qu'il luy representa, & que sa Maiesté par sa réponse le luy auoit tacitement accordé, par où il sembloit qu'à plus forte raison ledit seigneur Cardinal disoit que sa Maiesté entendoit que ceux qui estoient desia à Rome y demeurassent par prouision iusques à ce qu'il fust autrement ordonné, & que pour le moins il deuoit attendre le retour de mondit sieur le Cardinal Aldobrandin, & voir ce qu'il luy en diroit. Surquoy il me respondit qu'il ne seruiroit de rien le Roy par deçà, & que si Monsieur le Cardinal

Aldobrandin ne demeueroit trop à venir il l'attendroit : mais au reste qu'il n'auoit point moyen de s'étretenir à Rome, & quand il en auroit, s'il plaisoit à sa Maesté qu'il reuint, il reuiendrait. A tant, &c. Monsieur, &c. De Rome ce 12. Mars 1601.

## A MONSIEUR DE VILLEROY.

CCLVI.

**M**ONSIEUR, Je vous ay escrit deux diuerses fois que par autres deux fois le Pape m'auoit donné intention d'aplisier le Iubilé de Pontoise comme nous desirons: mais quand il a fallu expedier ladite amplification les Secretaires & autres officiers y ont fait tant de difficultez qu'ils ont destourné ceste volonté de sa Sainteté, comme ie vis Vendredy dernier que ie luy en parlay pour la troisieme fois, & faudra que nous nous contentions de la façon qu'il est, dont ie suis plus marry pour ceste varieté que pour le reste. Tousiours faudra il refaire le brief, à cause des six mois qui deuoient cōmencer à la fin de la precedēte annee, ce qui ne se peut plus faire. Je le feray accommoder le mieux qu'il sera possible. Ils font les récheris depuis quelque mois, tant que c'est merueille. Je vous assure l'auoir demandé 4. ou 5. mois. autant de fois pour mon diocese, mais ie ne l'ay encores peu obtenir, sous ce pretexte que le Pape vouloit tenir vne Congregation, & y faire deliberer comme il auoit à l'octroyer à plusieurs qui luy demandoient, & Vendredy dernier il me dit qu'auant la my-careme il s'en resoudroit.

Le Comte Ludouico Languiscola Camerier de nostre saint Pere, qui porta le bonnet à Monsieur le Cardinal de Sourdis, me vint trouuer auant hier, & apres m'auoir amplement déclaré l'affection qu'il a au seruice du Roy & au bien de la France: me dit que pour accroistre d'auantage la seruitude, il desiroit estre honoré de l'Euesché de Carcassōne, en faisant à Monsieur le Connestable la condition aussi bonne que scauroit faire vn autre licitement, par voye de pension ou autrement, d'autant qu'il auoit du patrimoine honnestement, & ne vouloit qu'entrer par ce moyen plus auant au seruice de sa Maesté, me priant de m'y employer & de luy ayder. A quoy ie luy respondis que ie ne pouuois faire autre chose que vous en escrire, afin que si la chose estoit entier, & qu'au reste il vous semblast d'ē deuoir parler au Roy, & à Monsieur le Connestable, il vous plust nous faire cēt honneur à luy & à moy; dont il se contenta. Je remets donc le tout à vostre discretion, sans y adiouster autre chose, sinon que ce gentil-homme me semble fort bon, comme il est extraict de fort ancienne noblesse, & qu'il seroit bon que le Roy obligeast quelques telles personnes de deçà. I'ay représenté au Pape touchant le present Euesché, duquel sa Sainteté disoit pouuoir disposer par les concordats, qu'és lieux de frontiere, & telles autres place d'importance, les Roys y auoient grād interest d'y auoir des Euesques tres-confidēs, & pour cela Rebuffe Docteur tenoit en tels cas, que quand bien les Euesques va-

requeroient T N C V R I A, le Roy devoit auoir sa nomination faime, & en apportoit pour exemple mesme ladite ville de Carcassonne. Le Pape repliqua que ses predecesseurs n'auoient si bien gardé leurs droicts en telles vacances comme ils pouuoient & deuoient : mais ie luy dis que la courtoisie dont les Papes & les Roys vsoient entr'eux estoit tres-expediente, & aucunement necessaire pour entretenir la bonne intelligence & amitié qui doit estre entr'eux, sans quoy ne se pouuoit rien faire de bon par eux.

Ie vous remercie bien humblement de ce qu'il vous a plû escrire au Roy & à Monsieur de Rosny, pour me faire acheuer de payer de la pension de l'annee passée, dont i'ay grand besoing. A tant, &c. Monsieur, &c. De Rome ce 13. Mars. 1601.

## A V R O Y.

## CCXLIX.

S I R E,

I'ay receu la depesche qu'il a plû à vostre Maiesté me faire, pour l'expedition de l'Abbaye de Religieuses de S. Pierre de Rheims en faueur de Damoiselle Renee de Lorraine, par resignatiō de Dame Renee de Lorraine sa tâte dont ie parlay à nostre S. Pere le neufiesme de ce mois, & luy presentay les lettres que vostre Maiesté luy en escriuoit, & celles de Madame de Guise. Sa Saincteté du commencement fut fort esbahie d'entendre qu'on le requist de faire Abbessse vne fille qui ne pouuoit pas seulement estre Religieuse professe, n'ayant encores 16. ans accomplis, là où il faut par le Concile de Trête qu'une Religieuse qu'on veut faire Abbessse soit aagée de 40. ans, & ait fait profession huit ans auparauant, & me respondit qu'il ne scauoit que faire à cela. Ie luy repliquay que c'estoit vne Princesse d'une maison tres Catholique, & deuote au sainct Siege, qu'elle auoit l'honneur d'estre vostre parente, & que vostre Maiesté en supplioit sa Saincteté; Que ladite Damoiselle auoit porté l'habit dès son enfance, auoit esté nourrie & accoustumee à l'obseruance de la reigle de cet ordre par ladite Dame sa tante, & estoit desirée de routes les Religieuses de ce monastere pour leur superieure; Que en telles personnes, & en tel cas, on n'auoit accoustumé de garder la rigueur des saincts decretz, & que sa Saincteté pourroit en pouruoyant à ceste Abbaye de la persōne de ladite Damoiselle, apposer vn decret à la prouisiō que ladite Damoiselle, pendant son bas aage, & iusques à vn certain temps que sa Saincteté arbitreroit, ne pourroit rien faire quant au regime spirituel de ladite Abbaye sans l'aduis & consentement de ladite Dame sa tâte, & apres elle de la Prieure ou plus ancienne Religieuse, & que ie suppliois sa Saincteté d'y penser, & d'en cōferer avec ses officiers de la datairerie, & autres versez en telles matieres, & qu'il se trouueroit quelque moyé de gratifier vostre M. & ladite maison de Lorraine, sans que pour cela il en aduint aucun inconvienient ny desordre en l'administration de ladite Abbaye. Et sa Saincteté



me respondit qu'elle y penseroit , & en communiqueroit avec lesdits officiers. Je ne faudray de luy ramenteuoir de temps en temps , & d'y faire tout ce qui me sera possible. Aussi ay-je receu les lettres qu'il a pleu à vostre Maïesté m'escire touchant l'Abbaye d'Ainay en faueur de Messire Guillaume Fouquet ; & comme i'ay desia escrit à vostre Maïesté , i'ay empesché que le proiect de la resignation commencee du viuant de l'Abbé desunet ne fust point acheuée apres sa mort , comme on y estoit apres. Maintenant pour en faire pouruoir ledit Fouquet , il est besoin des lettres de nomination de vostre Maïesté , & d'autres pieces que i'escris au sieur de la Varenne lesquelles ie n'ay point encores eues , mais seulement les lettres de recommandation à nostre saint Pere , pour obtenir la dispense de l'age dudit Fouquet , à quoy aussi ie ne faudray de faire tout deuoir.

Il m'a encores esté rendu depuis deux iours vne lettre de vostre Maïesté , touchant la vente d'une partie du reuenu temporel des Eueschez & des Chapitres de l'Eschar & Oleron en vostre pays souuerain de Béarn , auquel affaire ie travailleray aussi apres l'auoir bien digeré en moy-mesme , d'autant qu'il le faut traicter fort delicatement , pour la mention qui s'y fait des biens d'Eglise vendus par vostre Maïesté que sa Sainteté n'entendra gueres volontiers. I'y procederay de la plus douce façon dont ie me pourray aduiser , & ayant escrit de vos principaux affaires à Monsieur de Villeroy , ie finiray la presente en priant Dieu qu'il vous donne , &c. Sire , &c. de Rome ce 13. de Mars 1603.

## A MONSIEUR DE VILLEROY.

### CCLVIII.

**M**ONSIEUR , Je receus le dixseptiesme de ce mois vos lettres du quatriesme , avec le paquet du Roy , que Monsieur de Fresne vous auoit adressé , & la copie de la lettre que Monsieur de Sauoye auoit escrite à Monsieur le Connestable. La depesche que ie vous fis par le precedent ordinaire , & la lettre que ie viens d'escire au Roy , laquelle ie vous prie lire auant que l'enuoyer à sa Maïesté , seruiront de response à la plus longue de vos lettres , excepté à ce que vous m'y auez escrit sur la fin en chiffre touchant le sieur Alessandro Pico , & l'Archeuesque de Pise. Et quant au dernier , ie ne vous puis informer mieux de ce qui s'y est passé , qu'en vous enuoyant la copie de la lettre que la Reine m'en escriuit , & de celle que ie luy escruiis , comme ie les vous enuoye. Quant au premier , ie l'entends tout de mesme que vous , & est tres-necessaire d'en vser ainsi pour le seruice & reputation du Roy , & quand se viendra au fait & au prendre , ie m'en feray bien entendre au Pape & à Monsieur le Cardinal Aldobrandin ; & que mon intention ait esté telle , auant mesme que recevoir vostre dite lettre , vous l'eurez pu voir par la lettre que ie vous escruiis le 4. Feurier. Voilà donc

done quant à vostre plus longue lettre dudit iour 4. de ce mois. Quant à la courte qui concerne l'Abbaye de lars pour vn des enfans de Monsieur de Sillery, ie ne vous en puis escrire mieux qu'en la façõ que i'ẽ escriuis à mondit sieur de Sillery mesme par le precedent ordinaire, & pour ce ie vous enuoye l'arricle. Ie suis seruiteur de tous les gens de bien & de merite, & des bons seruiteurs de Roy, encor que ie ne les aye onc veus; & pour le regard de mondit sieur de Sillery, que i'ay en l'honneur de practiquer si longuement, & de cognoistre si auant & de si près sa vertu & valeur, & son zele au seruice du Roy au bien de nostre patrie, ie l'ay en singuliere estime, & lui porte vne particuliere reuerence & amitié, avec vn extreme desir de luy faire seruice toute ma vie: mais on ne scauroit faire trouuer bonne à Rome ceste sienne cause, & mesmement y estant le sieur Horatio Rucellai qui est des plus habiles hommes du monde, qui fut cause que ie luy escriuis de la façon que vous verrez par ledit extraict. Le Capucin dont ie vous escriuis le 22. Feurier, continué es vanitez & folies par Rome, tranchant tousiours de l'intention du Roy comme cognu de luy seul en toutes choses. Il s'est vanté à quelques Prelats ces iours passez qu'il a charge de sa Maiesté de porter au Cardinalat certains subiets, desquels il dit que ie ne sçay rien, ny autre que lui, & ie suis assure qu'il n'en est rien. Le Pape escrit au Roy vn brief en faueur du sieur Perrin Soufdataire, lequel a desiré aussi que ie vous en escriuisse, & vous priasse, cõme ie fais bien humblement, qu'il vous plaise continuer à fauoriser la iustice de sa cause. C'est grand pitié du peu de iustice qui s'en rend, & que feroit-on à vn qui ne feroit près du Pape, & ne parleroit tous les iours à sa Sainteté? I'ay cominandement de demander au Pape pour le Roy, pouuoir de nommer à tous les Eueschez, Abbayes, & Prieurez electifs qui sont en tout ce pays de la protection de sa Maiesté, qui est vne tres-grande chose, & de la pure grace & liberalité du Pape; & toutesfois en mesme temps nous refusons, ou delayons de laisser passer la prouision qu'il a faite d'une petite Abbadiotte qui ne vaut pas le parler, & encor qu'il ne demande que iustice, si est-ce qu'il en a ia escrit plusieurs fois en vain. Ce n'est pas le moyen d'obtenir vne grande & singuliere grace de quelq'un, que de l'offencer en lui déniât vne petite chose de iustice, & l'interessant en sa propre authorité, & offenser encore ceux par les mains desquels elle a à passer, & qui la peuuent auancer ou trauerser. Aussi vous pre-dis ie bien que cela nous sera vn grand empeschement à obtenir ledit indulg, à quoy i'ay tant plus de regret, que nous laissons perdre de si belles & grandes occasions au loing, pour n'oser ou ne vouloir dire à quelque petit Courtisaneau de neât present, qu'il ait patiẽce en sa mauuaise cause, & que le Roy ne veut point perdre la bonne grace du Pape, ny les comoditez qu'il en peut retirer, pour luy conseruer à luy vne chose qui ne luy appartient point & en priuer celuy à qui elle est, & quant & quant le Pape de son authorité & droicts. A tant, &c. Monsieur, &c. De Rome ce 27. Mars, 1601.

## A MONSIEVR DE VILLEROY.

## CCLIX.

M O N S I E U R , Je receus le 6. de ce mois celle qu'il vous a pû m'escrire de Lyon le 17. Mars, avec la copie de la publication de la paix, & des articles accordez le 16. Mars pour l'execution d'icelle, & la copie de l'Arrest prononcé contre le Comte d'Essex en Angleterre, dont je vous remercie bien humblement, comme aussi de l'aduis qu'il vous a pû me donner bien particulièrement de tout ce qui s'estoit fait par delà depuis que le Comte Ottavio Tassone, & le sieur Boursier secretaire de Monsieur le Duc de Sauoye y estoient arrivez, jusqu'au iour & dattre de ladite lettre. J'ay la mesme opinion que vous quant aux deux causes que vous m'escrivez auoir contraint le Duc de ratifier le traité de la paix. Luy & le Comte de Fuentes ont fait tout ce dont ils se sont pû aduiser pour engager & necessiter le Roy d'Espagne à la guerre: mais il a mieux esté conseillé près que loin. Tant y a que les forces assemblees au Milanois & aux environs ne sont point encores separees, ains iusques icy on n'a laissé de les accroistre, avec toutes autres provisions de guerre: bien dit-on depuis quelques iours qu'il est venu un courrier d'Espagne au Comte de Fuentes pour le faire desarmer, & qu'il commence; mais cela n'est pas encore bien certain, & le sieur de Lesdiguières le sçaura par delà plustost que nous par deçà, duquel vous en serez aduertis.

Auant hier Lundy neufiesme de ce mois le Pere Monopoli Capuchin, que vous auez veu par delà avec Monsieur le Cardinal Aldobrandin, me vint voir, & me dit que Monsieur de Sillery luy auoit dit à son parlement, & plusieurs autres fois auparauant, qu'il n'ordonnast rien du Pere Brulart son frere sans mon aduis; & que retournant de France il auoit trouué que celuy qui en son absence auoit fait l'office de Procureur general de l'ordre, auoit accordé à Monsieur le Cardinal de Sourdis que ledit Pere Brulart, qui est en la Prouince de Venise, s'en retournast en France avec ledit seigneur Cardinal, & auoit escrit audit Pere Brulart qu'il s'en allast en Sauonne l'attendre, pour là s'embarquer quand ledit seigneur Cardinal y passeroit en s'en retournant de Rome en France. Et sur ce que ledit Pere Monopoli auoit remonstré à son dit substitut qu'il ne deuoit luy accorder telle chose, puis qu'il sçauoit qu'on auoit fait venir ledit Pere Brulart en Italie à la requeste du Roy, & des plus proches parens dudit Brulart, ledit substitut luy auoit répondu qu'il auoit dit tout cela à Monsieur le Cardinal de Sourdis pour s'excuser enuers luy; mais que ledit seigneur Cardinal auoit pris sur soy, & l'auoit asseuré plusieurs fois qu'il le feroit trouuer bon à sa Maiesté. Surquoy ledit Pere Monopoli me demandant mon aduis, je luy dis plusieurs choses là dessus, dont la conclusion fut, que le Roy sçauoit mieux ses intentions, & ce qui estoit expedient au public de son Royaume, que nul autre, & que M<sup>on</sup>

ſieur de Sillery aymoit ſon dit frere, & luy deſiroit autant de bien qu'à pas vn autre: par ainſi il me ſembloit qu'en choſe faite par authorité de ſa Maieſté, & par l'aduiſ de mondit ſieur de Sillery, il ne falloir rien changer ſans leur ſceu, puis qu'il n'y auoit aucune neceſſité qui preſſaſt, ny vtilité euidēte qui y conuiſt les Superieurs de l'Ordre; auxquels au contraire eſtoit tres-vtile de complaire au Roy, & à ſes miniſtres & meilleurs conſeillers en choſes raiſonnables. Ledit Pere Monopoli ſe reſout d'eſcrire audit Pere Brulart, qu'il ne bougeaſt pour ceſte heure, apres m'auoir dit que ſi Monſieur le Cardinal de Sourdis en crioit, il luy diroit que i'aurois eſté de cēt aduiſ, & que ie luy eus reſpondu qu'il le diſt hardiment, & que ie l'aduouerois touſiours. Je vous prie de conferer cecy avec Monſieur de Sillery, & en ſçauoir la volenté du Roy. A tant, &c. Monſieur, &c. De Romē l'onziēme d'Auril, 1601.

## A V R O Y.

C C L X.

SIRE,

A la fin de ma derniere lettre du 27. Mars i'eſcruiſ à voſtre Maieſté qu'on n'attendoit icy Monſieur le Cardinal Aldobrandin que le ſixieſme ou 7. de ce mois, & la verité eſt qu'il ſe diſoit ainſi chez le Pape meſme, & par ceux qui ſont ſes domeſtiques & faiſoient ſes affaires: toutesſois ledit ſeigneur Cardinal arriua en ceſte ville deux iours apres, à ſçauoir le Ieudy 29. Mars à vingt trois heures, s'eſtant deſrobé de ſon train à noſtre Dame de Lorette, & ayant pris la poſte avec deux des ſiens ſeulement. Tout ce ſoir là ſe paſſa avec le Pape, & le lēdemain au matin il ne ſe laiſſa voir qu'environ les onze heures de France, & commençoit-on à dire qu'on ne le pourroit voir qu'au iour de ſon entree, comme eſt bien la couſtume de ne ſaine ny recevoir les viſitations en tel cas qu'apres l'entree; mais il ne peut ſe garantir de tant de gens de grande qualité qui demandoient à le voir, & à luy dire deux mots ſeulement, & entr'autres nous eſtans de 25. à 30. Cardinaux qui eſtions allez ce matin là pour oïr le Sermon qu'on faiſoit chez le Pape, & pour accompagner ſa Sainteté à l'Egliſe de S. Pierre, où il a accouſtumé de deſcendre tous les Vendredys de Mars, apres laquelle ceſemonie nous allaſmes en deux troupes voir ledit ſeigneur Cardinal, & luy diſmes chacun deux mots, remettant le reſte à autre fois.

Le Mardy troiſieſme iour de ce mois luy fut faite l'entree fort ſolemnelle, tout le College des Cardinaux en corps l'eſtât allé recevoir à la porte du Populo avec toute la Cour & Nobleſſe de Rome, & l'ayant conduit au Palais, où il fut receu par le Pape en Cōſiſtoire public. Ce matin là nous luy diſmes encor à chacun peu de mots, & pour mon regard ie differay de negocier avec luy pour plus grande commodité ſienne & mienne juſqu'au iour

de l'audience, qui n'estoit qu'à deux iours de là, à sçauoir le Vendredy 6. de ce mois. Je fus donc ce iour à l'audiéce premieremēt du Pape, & puis dudit seign. Cardinal, & d'entree ie me cōiouis grandement avec sa Sainteté, de l'heureux retour dudit seign. Card. & de celuy du Côte Ottauio Tassone, qui estoit arriué le Lūdy 22. de ce mois, & de la bōne dispositiō à l'execution de la paix que ledit Comte auoit trouuee en monsieur le Connestable, & autres Seigneurs que V.M. auoit laissez auprès de lui, nonobstant que la ratification de M. de Sauoye eut tant tardé, & que la consignation de la citadelle de Bourg eut esté faite par force & necessité extremé, non de gré, & que les Espagnols ne cessassent de tousiours croistre & augmenter leurs forces au Duché de Milan, & aux enuiron. Surquoy ie pris occasion de supplier sa Sainteté, comme i'auois fait en nom audience precedente, qu'il luy pleust interposer son autorité à ce que lesdites forces fussent separees ou enuoyees hors l'Italie, comme il auoit esté promis & accordé par l'art. 24. de l'accord. Sa Sainteté me respōdit que ce n'estoit de ces forces là tout ce qu'on en disoit; Qu'apres qu'on auroit tiré six mille hommes, qu'on vouloit enuoyer à l'Archiduc Ferdinand, & autres six mille à l'Archiduc Albert, le reste ne seroit pas grand' chose. Qu'il sçauoit bien que plusieurs en estoient entrez en grand soupçon, & s'en mettoient en despense, comme aussi n'ignoroit il point qu'on ne l'espargnoit luy mesme, & qu'on le soupçonnoit estre de la partie: mais que ceux-là l'entendoient tres-mal, & qu'il ne pouuoit assez s'esmerueiller qu'il setrouuast hōme de bon sens qui peust croire qu'il eût eu si grād soin d'esteindre le feu de la guerre delà les monts pour l'allumer au milieu de l'Italie; Que les Venitiens luy en auoient fait parler par leur Ambassadeur, & qu'il les auoit esclaircis. Apres que ie luy eus respondu vn peu de mots là dessus, en louiant ses bonnes & saintes intentions, ie passay à d'autres choses, & luy dis qu'en la dernière audience que monsieur le Cardinal Aldobrandin auoit eue de vostre Maieſté, vous l'auiez prié de faire office enuers sa Sainteté pour certaines graces que vous desiriez obtenir d'elle: Que iusques là ie n'en auois pas mesme parlé audit seigneur Cardinal, & moins en voulois ie traiter pour lors avec sa Sainteté: mais quād ie serois avec ledit seigneur Cardinal au partir d'avec sa Sainteté, ie lesui voulois ramēteuoir, afin qu'il les luy exposast cōme il les auoit entēduës de la bouche propre de vostre Maieſté, & cependant ie la priois de se rendre encline aux prieres & requestes de V.M. Il me repliqua que V. Maieſté auoit aussi promis audit Cardinal certaines choses, & qu'il vouloit sommer vostre Maieſté de sa parole, me specifying trois choses, assauoir la publication du Concile, la restitution des Iesuites, & vne plus grande sollicitude à la restitution de la religion Catholique en pais de Bearn. Je luy respondis que vostre Maieſté estoit resoluë de faire publier le Concile, & que i'en auois veu la minure de l'Edit; comme aussi vouloit elle faire vn reglement touchant les Iesuites: & que ces deux choses eussent deſia esté faictes sans la guerre dont le Duc de Sauoye auoit esté cause. Quant au troisieme point, la religion Catholique auoit esté remise en Bearn, & s'y auançoit tous les iours autant que la nature des choses & la qualité du temps pouuoient comporter; & comme il falloit louer la zele & l'ardeur de ceux à qui le temps duroit, & qui desiroient de voir au plus tost ynaſcaine & entie-

re reduction en l'estat auquel les choses estoient auant l'heresie ; aussi estoit-ce chose certaine que de precipiter les remedes , & de tailler & couper en la façon que quelques vns voudroient , apporteroit autant ou plus de dommage au reſtablishement de la religion Catholique , qu'au repos & tranquillité du pays. De là ie passay à d'autres faits particuliers, & entr'autres luy dis comme j'auois entendu qu'on recommençoit à faire instance à sa Sainteté de l'erection de Nancy en Euesché, & que ie desirois luy rafraischir aussi la memoire de ce que ie luy auois autresfoiſ remonſtré là dessus. Ce que ie fis, luy disant vne partie de ce que j'en escriuis à vostre Maieſté par ma derniere du 27. Mars, & concludant qu'il pluſt à sa Sainteté de surseoir iusqu'à ce qu'elle eust ouy plus amplement l'interest de vostre Maieſté, & des Euesques & Chapitres, au dommage & detrimement desquels on pourchassoit ceste erection ; ce qu'il m'accorda.

Sortant d'avec sa Sainteté i'allay droit à Monsieur le Cardinal Aldobrandin, & estant la premiere fois que ie m'estois trouué seul avec luy depuis son retour, ie me conioüis avec luy vn peu plus expressement de ce qu'il estoit retourné en bonne santé, & en meilleur point qu'il n'estoit quand il partit d'icy, & de ce qu'il estoit venu à bout d'un affaire tres difficile, & impossible à tout autre qu'à luy ; à quoy j'adioustay que j'auois encor à me conioüir avec luy d'une plus haute main, vostre Maieſté m'ayant commandé que tout aussi tost qu'il seroit de retour à Rome ie m'en allasse conioüir avec luy en vostre nom, & puis luy ramentüssé les derniers mots que vostre Maieſté luy auoit dits lors qu'il prit congé d'elle, qui estoient, que le Pape & luy pourroient faire estat que vostre Maieſté employeroit tousiours son Royaume & son propre sang pour le seruice du saint siege Apostolique, pour le bien de la maison Aldobrandine quand il s'en presenteroit occasion ; Que vostre Maieſté le prioit aussi de se souuenir de la correspondance & amitié qu'il vous auoit promise de la part de sa Sainteté & de la sienne. Je pris l'occasion & la matiere de ce cöpliment d'un article de la lettre qu'il pluſt à vostre Maieſté m'escrire de Lyon le 20. Ianuier, sur les derniers propos qui auoient esté tenus entre vous deux. Il me respondit que j'estois tesmoin moy-mesme de l'affection qu'il auoit tousiours eüe au seruice de vostre Maieſté, & comme il l'auoit monſtreé au fait de l'absolution, & en tout ce qui s'estoit présenté depuis, auant qu'il allast en France ; Que ceste affection & deuotion luy estoient grandement accreuës en ce voyage de France, où il auoit receu plus de faueurs & honneurs de vostre Maieſté, que ne fit iamais Legat aucun quel qu'il soit ; Qu'il s'en souuiendroit toute sa vie pour vous en rendre tres-humble seruice en toutes occasions ; Qu'il ne faudroit point d'escrire à vostre Maieſté, & de luy rendre compte de son arriuee par deçà, & cependant que ie l'aduertisse en quoy il pourroit seruir vostre Maieſté, & qu'il s'y employeroit de tout son pouuoir & affection.

Après ce compliment ie luy dis ce que j'auois traité avec le Pape, & il me fit quasi les memes responses que m'auoit fait sa Sainteté ; & quand ie fus paruenü à l'endroit auquel j'auois dit au Pape que ie parlerois audit Seigneur de certaines grâces que vostre Maieſté desiroit obtenir de sa Sainteté par son moyen, & luy disant, je recaray au ſeigneur Cardinal cela mesme que j'auois dit au Pape, & venant au fait ie luy dis, que ie luy auois ven-

la laisser frâcs. & libres les huit iours passez sans luy parler d'affaires, pour n'interrôpre les complimens qu'il auroit à recevoir & à faire; mais qu'alors i'auois estimé ne deuoir plus différer, sans toutesfois le vouloit charger de trop de choses à la fois; & me contenterois pour ce commencement d'interceder enuers nostre sain& Père pour l'Indult dont vostre Maieité luy auoit parlé de nommer aux Eueschez de Mars, Toul, & Verdun, & aux Abbayes & Prieurez électifs qui sont esdites villes, & aux pays de la protection de vostre Maieité en ces quartiers là, & pareillement aux pays de Bresse, Beugeay, Valromay, & au Bailliage des Gex nouvellement cedez à vostre Maieité par le Duc de Sauoye; & de plus la confirmation des nominations que vous auez faites, tât à l'Euesché de Salusses, par la mort du dernier Euesque qu'aux Abbayes de sainte Strafarde & Haute-Combe, par resignation des Abbez commendataires desdites deux Abbayes. De toutes lesquelles choses ie luy parlay au lóg, cõformémēt à un memoire que ie luy en laissay par escrit adressant à sa Sainteté, duquel ie vous enuoye copie: auquel memoire néantmoins ie ne vølus point faire mention de l'Abbaye de Haute-Cõbe, me cõtentāt d'en parler d'une viue voix, pour n'estre ceste demande si biē fondée que les precedentes. I'estimay deuoir cõmencer par ledit Indult, comme chose tres-importāte à vostre Maieité, & connexe aucunement avec le voyage & negociation que ledit Seigneur Cardinal venoit de paracheuer, & aussi d'en deuoir vser de ceste façon, & monstret que vostre Maieité desiroit obtenir ceste grace & les autres par son moyen, & que ce fust luy, quien portast la parolē, & en requist la Sainteté, & luy en presentast le memoire que i'en auois dressé, combien que ie sois bien resolu d'en parler au Pape moy-mesme apres que ledit Seigneur Cardinal aura commencé, & croy aussi qu'il en sera besoin plus d'une fois. Il me promit de s'y employer, me disant cependant qu'il y auroit de l'empeschement de la part de Monsieur de Sauoye pour le regard de l'Euesché de Salusse, & desdites Abbayes de Strafarde & Haute Combe, qui estoient es pays qui demeurent à son Altesse, qui auoit aussi nommé à quelque Abbaye de Bresse.

Le soir dudit Vendredy sixiesme de ce mois, apres que ie fus retourné de l'audience, ie receus la despeche de vostre Maieité du troisieme Mars, en responce de mes lettres du 27. Ianuier, quatriesme, cinquiesme, & sixiesme Feurier, par laquelle i'ay veu & noté la difference de la resolution & propos d'un grand, puissant, & magnanime Roy, valeureux, & heureux Capitaine, à la foiblesse & soubçon de nous autres pauures gens de robe longue & d'Eglise, qui neantmoins sommes dignes de quelques excuses en ce fait, non seulement pour nostre infirmité, & profession du tout estoignée de la militaire, mais encores pour plus le zele que nous auons à la reputation & seruice de vostre Maieité, & au bien de la patrie, qui nous rend ainsi soubçonneux, avec la mauuaise opinion & impressiõ que le Duc de Sauoye & les Espagnols nous ont donnée de leur foy & procedures par le passé, & les grands preparatifs de guerre, & menaces que nous auons veüs & ouyes, voyons & oyons encores à present, nonobstant la publication & ratification de la paix. Je suiuray les commandemens & intentions de vostre Maieité touchant les Cardinals, à demander l'Archeuesque de Pise, comme aux autres choses.

Au demeurât, les dernières lettres de Milan, qui estoient du vingt-huitiesme Mars, portoient que le Comte de Fuentes continuoît tousiours de plus en plus à faire leuer des gens, & à fonder & monter de l'artillerie, à faire prouision de chevaux & de bœufs pour la tirer, de petards, pionniers, & telles autres choses de guerre: & que le Duc de Sauoye faisant semblant de licencier ses gens les luy enuoyoit tous. Mais depuis trois ou quatre iours il sedit que par vn courrier d'Espagne, il a esté commandé audit Comte de Fuentes de separer & renuoyer l'armée, excepté ce qui doit estre enuoyé aux Archiducs Aibert & Ferdinand. Le temps nous esclairetra bientost de ce qui en doit estre.

Le cinquiesme iour de ce mois arriuerent les Ambassadeurs du Roy de Perse, venant de la Cour de l'Empereur, dont vostre Maiesté aura esté aduertie par le sieur Ancel de ce pourquoy ils sont enuoyez, & comme ils sont deux, vn Anglois & vn Persien. Il leur fut faite vne belle entree & le Pape les loge & les traite en Borgo assez prez de saint Pierre en vn Palais à part. Ils n'ont point encores eu audience du Pape, à cause qu'ils ne sont point d'accord de leur rang, & pretendant chacun deuoir preceder son compagnon; qui fut cause qu'un peu auparauant leur entree ils se battirent à coups de poing en vne maison, où ils attendoient ceux qui leur venoient au deuant, & quand apres l'entree ils furent dans leur logis, il s'entre-heurerent bien rudement en montant l'escalier de leur dit logis. On est apres de les accorder, à quoy on se trouue bien empesché: il se pourra trouuer quelqu'un qui leur dira que puis qu'eux qui ne sont que deux, & enuoyez par vn mesme Prince, & pour mesme fin, ne se peuuent accorder entr'eux, il sera mal aisé qu'ils vnissent ensemble tant de Princes Chrestiens & autres pour ruiner l'Empire du Turc.

L'estois icy lors de la presente quand est venu à moy le sieur Antoine Faure, Presidēt au Cōseil de Geneuois seant à Nicy pour Monsieur de Nemours, lequel President estoit en ceste Cour long temps y a pour le service de Madame de Nemours en vn procès qu'elle a en Rote contre le Duc de Modena; & pour ce qu'il me souuiet d'un mot que Monsieur le Cardinal Aadorbrandin m'auoit dit qu'on auoit nommé quelqu'un en Bresse, luy qui a pleine cognoissance de ces pays là qui ont esté cedez à vostre Maiesté, ie luy ay demandé si auant la cession Monsieur de Sauoye nommoit aux Abbayes & Prieurez Cōuentuels & elecōtifs de ce pays-là. Il ma dit qu'ouï, & qu'encores dernièrement en vne impetration d'un Prieuré simple pour vn sien parent, il auoit fallu oïr la nominatiō de son Altesse; Qu'il auoit bien entendu qu'en ceste Cour on se plaingnoit des nominations de Monsieur de Sauoye, & qu'on les receuoit mal volontiers; mais que du costé de son Altesse on auoit tousiours allegué des Indults, & s'en estoit on fait accroire. Or si ainsi est que le Duc eust droit de nomination, ce droit est passé à vostre Maiesté par sa cession, sans qu'il ait esté necessaire que le Pape eust besoin d'y mettre la main: & en tout euenement quand il n'auoit eu autre droit, la possession de nommer en laquelle il estoit est passée à vostre Maiesté: & quand son Indult, s'il en auoit, auroit esté personnel, & ne s'estendrait plus outre qu'à sa personne, le Pape ne pourroit auourd'huy honnestement refuser à vn Roy de France vne grace & courtoisie qu'il eust concedee à vn



Duc de Satoye ou à vn Comte de Bresse. Et si i'eusse sceu ce fait quand i'en fis le memoire que ie baillay à Monsieur le Cardinal Aldobrandini Vendredy passé, i'en eusse fait mon principal fondement, & me fusse contété de demander tout au plus vne simple cōfirmation du droit de nommer qu'auoit Monsieur de Sauoye auant la cession, & ne faudray desormais quand i'en parleray de m'en ayder, cōme ie tascheray aussi d'en sçauoir mieux la verité par deçà. Mais par ce qu'on pourroit ne la rechercher icy, il sera bō qu'il plaise à vostre Maiesté de commander qu'on recherche diligemmēt sur les lieux où on en a vſé cy-denant, & qu'on parle aux principaux beneficiers, & qu'on se face monstrier leurs prouisiōs de Rome, pour voir s'il s'y fait mētion de la nomination du Duc de Sauoye, & qu'on voye encores és greffes des insinuations, s'il y en a, ou és autres lieux où leurs prouisiōs peuuent estre enregistrees, & si le Duc expedioit lettres d'attache, & comment on y a procedé par le passé, & qu'on leue les actes, & face-t'on faire copies bien collationnées en la plus authentique forme que faire se pourra desdites prouisiōs où se trouuera faite mention de la nomination du Duc de Sauoye, & qu'on en enuoye autant par deçà pour en seruir vostre Maiesté.

Sera bon aussi de faire recherche des benefices qui auront esté fondez par les Ducs de Sauoye, Comte de Bresse, & autres tels, dont le droit de presentation sera deuolu à vostre Maiesté, laquelle par ce moyen, outre & sans le droit de nominatiō, y pourroit presenter par droit de patronat, qu'on appelle. La chose veut qu'il en soit donnée commissiō expresse à quelque homme de bien, qui en vſe fidellement pour le service de vostre Maiesté, & discrettement & moderément sans foule pour le regard des particuliers, & mesmes en ces commencemens qu'il est non seulement iuste & raisonnable, comme tousiours, mais aussi vtile, expediēt & necessaire pour la reputation de vostre Maiesté, & de la Couronne, & de la nation Françoisē, & pour capter la bien veillance & deuotion de ces nouveaux subiets, qu'ils soient traitez & maniez avec toute douceur, equité, & moderatiō de ceux qui y commanderont, & qui auront quelque charge pour grande & petite qu'elle soit.

Atant, &c. SIRE, &c. De Rome ce onziēme Aurił, mit fix cens vn.

I'ay receu cette lettre iusques à ce soir du Ieudy douziēme d'Aurił & cependant est venu l'ordinaire de Milan, avec lettres du quatriēme de ce mois, qui portent que quoy qu'on ait dit icy depuis quelques iours le Comte de Fuentes continuē d'armer & d'accroistre le nombre de ses gens, des autres prouisiōs de guerre plus que iamais, entre autres choses, a fait faire plusieurs milliers de faucilles pour seyer les bleds.

## A V R O Y.

CCLXI.

S I R E,

Par ma lettre del'onzième de ce mois, ie rendis compte à vostre Maesté, entre autres choses, comme i'auois traité le Vendredy avec Monsieur le Cardinal Aldobrandin, des Indults que vostre Maesté desire obtenir du Pape pour nommer aux Eueschez, Abbayes, & Prieurez Conuentuels & electifs de Mets, Toul, & Verdun, & des pays de Bresse, Beugeay, Valromay, & Bailliage de Gex, cōme i'en auois laissé audit Seigneur Cardinal vn memorandum par escrit adressant au Pape, pour le presenter à sa Sainteté apres qu'il en auroit fait l'office de bouche. Par la presente ie continueray à vous rendre compte de ce que i'ay fait depuis. La prochaine audience en laquelle ie voulois parler moy-mesme au Pape, tomboit au Vendredy treizième de l'apres-difnee, & pour ce que ie fus trouuer ledit Cardinal le matin, pour sçauoir s'il auoit fait ledit office, & ce que le Pape luy auoit respondu; il me dit qu'il en auoit parlé au Pape, & l'auoit trouué vn peu difficile, d'autant que les villes de Mets, de Toul, & Verdun estans seulement sous la protection, & non sous la souueraineté de vostre Maesté, il ne vouloit faire preiudice à l'Empire.

Le luy repliquay que ie me souuenois que du temps du Pape Gregoire treizième & depuis, il auoit esté iugé à Rome par l'aduis d'vn nombre de Cardinaux, que les Eueschez de Mets, Toul, & Verdun n'estoient point compris es Estats d'Allemagne, & que leurs Chanoines & Chapitres n'auoient point droit d'elections: cōme de fait les elections faites à diuerses fois par le Chapitre de Verdun auoient esté declarees nulles, & les Papes y auoient pourueu d'autres personnes que de ceux qui auoient esté pourueus par ledit Chapitre: il s'ensuiuroit que le Pape octroyât à V. M. ledit Indult, ne seroit aucun preiudice à l'Empire ny à autre pour ce regard; & pour tous autres respects & considerations qu'on pourroit alleguer ou s'imaginer, il y seroit obuié & pourueu amplemēt en apposant vne clause à l'Indult, que telle concession s'entendoit SANS PREIUDICE DE L'EMPIRE, ET POUR AVANT DE TEMPS Q'ES LADITE PROTECTION DVRE-ROIT: laquelle clause ie m'asserois que vostre Maesté ne trouueroit point mauuaise. A quoy ledit Seig. Cardinal ne sceut que respondre autre chose sinon que j'en parlasse moy-mesme à sa Sainteté; ce que ie voulois faire desia sans cela, & y estois resolu dès le commencement, comme ie l'escriuis à vostre Maesté par madite lettre du onzième de ce mois, mais l'auois estimé de uoir faire commencer ceste instance par ledit Seigneur Cardinal, pour ce que vostre Maesté l'auoit requis elle.

M M M m

mesme de s'y employer, & qu'il vous l'auoit promis, & pour luy monstrer d'autant plus de confiance, & par ce moyen l'obliger à mieux faire.

Et de fait le iour mesme dudit Vēdredy 13. iour de cemois l'apres-disnee ie commençay par là mon audience; & dis premierement à sa Sainteté ce que i'auois fait avec Monsieur le Cardinal Aldobrandin, & puis les causes que vostre Maiesté auoit de desirer & esperer de sa Sainteté ceste grace, conformément au memoire que i'auois baillé à monsieur le Cardin. Aldobrandin, & dont l'ennoyay dernièrement copie à vostre Maiesté, adioustant que pour le regard des pays nouuellement cedez à vostre Maiesté par monsieur de Sauoye, i'auois appris depuis que l'eus baillé ledit memoire, que monsieur de Sauoye en auoit l'Indult, & qu'il estoit en possession d'y nōmer. Sa Sainteté me respondit, que l'experience auoit monstré que les Papes precedens eussent mieux fait de ne dōner point aux Princes seculiers la faculté de nōmer aux Eueschez & autres Prelatures & que l'authorité du S. Siege en estoit grandement diminuee & lesdits Princes en auoient abusé, & leurs pays en auoient empiré, & mesmement en France, & que pour ces considerations il y vouloit bien penser auant qu'accorder ce que vostre Maiesté luy demandoit; & s'arresta en ceste generalité sans descendre au particulier du pays Messin ny de la Bresse, ny parler du preiudice de l'Empire, ny de rié qui y touchast. Le luy repliquay, que si les choses estoient à recommencer possible y pourroit-on mieux penser; mais elles estans venues si auant, il sembloit que là où il y auoit pareille ou plus forte raison d'accorder telles graces on ne les deuoit plus denier; Que s'il plaisoit à sa Sainteté de rememorer en soy-mesme cōme les nominations auoient esté introduites en France, elle trouueroit que ce n'estoit point les Rois de France qui les auoient demandees, ains qu'elles leur auoient esté offerres, afin qu'ils se départissent de la protection de la pragmatique sanction, & des elections desquelles les Chapitres & Conuents de France estoient en possession suiuant le droit Canon, & nonobstant les reseruations que les Papes s'estoient faites depuis des provisions des Eglises Cathedrales, des Abbayes & Prieurez Conuentuels & effectifs. Qu'au reste, sans entrer en desense ny excuse de nos Rois passez ie le pouuois asseurer, & sa Sainteté se pouuoit souuenir que depuis cinq ou six ans que vos nominations ont esté receuës à Rome, vostre Maiesté n'auoit nommé aux Eueschez que personnes dignes & de grand merite, comme elle vouloit continuer cy apres de bien en mieux, de sorte que sa Sainteté en auroit tout contentement, & n'auroit aucun regret de vous auoir accordé ceste requeste. Apres cela, i'adioustay que Monsieur le Card. Aldobrandin m'auoit dit que sa Sainteté ne vouloit faire preiudice à l'Empire pour le regard du pays Messin, & la response que ie luy auois faite, & la clause que l'on pourroit apposer à l'Indult. Et sa Sainteté passant sous silence tout le reste de ma replique, respondit seulement à ce dernier point, en disant que nous n'estions pas encore sur la façon de coucher l'Indult, mais sur la deliberation s'il le falloit concéder ou non; & qu'auant s'y résoudre il y vouloit penser bien bien bien.

Je n'estimay point le deuoir presser plus auant pour ceste fois, ny adiouster autre chose sinon que personne ne scauroit trouuer mauvais que sa

Saincteté y voulut penser, & que i'esperbis qu'apres y auoir bien pensé elle complairoit à vostre Maiesté.

C'est tout ce qui se passa entre luy & moy quant à ce point, & me sembla qu'il auoit fort peu d'inclination, & qu'il y aura bien à faire à lui arracher cet Indult des mains, si ce n'est par le moyen de la publication du Concile, qu'il a fort à cœur comme il doit.

Aptes ie parlay à sa Saincteté de ce que les Espagnols augmentoient leurs forces au Milanois, au lieu de les separer & conduire hors d'Italie, comme il fut conuenu & promis par l'article 24. de l'accord fait à Lion; & sa Saincteté me fist les mesmes responses qu'elle m'auoit faites autres fois, à sçauoir que ce n'estoit pas tout ce qu'on en disoit, & qu'il n'en falloit rien craindre.

Ayant fait avec le Pape ie descendis chez Monsieur le Cardinal Aldobrandin auquel ie dis comme depuis que ie luy auois parlé le Vendredy auparavant des Indults que vostre Maiesté desiroit, i'auois appris comme Monsieur de Sauoye nommoit aux benefices electifs des pays qu'il venoit de vous ceder, & qu'en ce cas vostre Maiesté luy auoit succédé en ce droit comme en tous autres. Ledit Seigneur Cardinal me respondit que le Duc de Sauoye pretendoit bien de pouuoir nommer comme tous les Princes taschent d'y surper ce qu'ils peuent sur le sainct Siege, mais qu'à la verité il n'auoit point l'Indult ou autre droit de nomination, si ce n'estoit en quelques fondatiōs particulieres; & ses nominatiōs n'estoient point admises à Rome; mais le Pape lui complaisoit bien souuent en pouruoyant les personnes par luy nommees, non toutes fois en vertu de sa nomination, de laquelle ne se faisoit aucune mention és bulles des prouisions. Je luy repliquay que cela consistoit en fait, mais qu'il m'auoit esté aſſeuré par personnes qui le pouuoient bié sçauoir que ledit Duc nommoit, & que sās sa nomination personne n'estoit receu à prendre possession; Que vostre Maiesté seroit conseillée de continuer en la possession de nommer en laquelle estoit ledit Duc: & par tant il seroit bon que le Pape concedast à vostre Maiesté la faculté de nommer, & que luy Cardinal Aldobrandin la procurast de tout son pouuoir; suiuant l'inclination qu'il vous en auoit donnée la derniere fois que vous auez parlé ensemble.

Il pourroiestre, SIRE, qu'il peut estre ainsi comme me disoit ledit Cardinal Aldobrandin; car sans aller querir des exemples plus loing, ie voy tous les iours qu'encores que nos concordats ne donnent point droit à nos Roys de nommer aux Abbayes des Religieuses, si est-ce que vos predecesseurs y ont nommé, & vous mesmes y nommez, & les Religieuses par vous nommees sont pourueës: mais vos nominatiōs ne sont point icy acceptees: que par vos Ambassadeurs qui y mettent L'EXPEDIALTVR, & ne s'en fait aucune mention és bulles des prouisions; ains les solliciteurs des expeditions r'euoyent en France aux parties vosdites lettres de nomination avec les bulles des prouisions.

Quand ie fus de retour en mon logis ledit iour Vendredy treiziesme de ce mois, i'y trouueray la despesche de vostre Maiesté du seiziesme Mars, en laquelle, outre la lettre qui s'adressoit à moy, i'en trouuay deux de la main de vostre M. l'une avec l'autre à Monsieur le Cardinal Aldobrandin.

M M M m 2

toutes deux en remerciement de la paix qu'ils auoient procuree, contenant chacune sur la fin vne clause de creance sur moy touchant l'amas des forces que les Espagnols augmentent tous les iours, comme ie voy par les copies qu'il vous a plû m'en enuoyer.

Quand i'eus bien leu & considéré le tout, ie me resolus d'aller trouver le Pape dès le lendemain, & luy rendre sa lettre, & faire enuers luy les offres que vostre Maiefté me commandoit par la mienne; & ce d'autant plus, qu'outre qu'il estoit bon que le Pape sceust au plustost vos intétions, si i'eusse laissé passer ledit iour suiuant, nous allions entrer en la semaine sainte, en laquelle on ne demande audience au Pape, si ce n'estoit pour quelque grand cas extraordinaire qui n'endurast dilación.

Le lendemain doncques 14. de ce mois & veille des Rameaux sur le soir, quand ie pensay que le Pape auroit donné les audiéces ordinaires ce iour là ie m'en allay au Palais sans faire demander audience, comme est la coustume, & arriué en l'anti-chambre du Pape, ie luy fis scauoir que i'auois vn mot à luy dire.

Ie fus introduit incontinent, & tout aussi tost qu'il me vist il me demanda si ie venois pour quelque chose de mal; ie luy dis que non, ains pour tout bien, & en particulier pour remercier sa Sainteté, & luy rendre vne lettre de la part & de la main de vostre Maiefté, & apres luy auoir dit comme i'auois receu ceste dépesche depuis l'audience du iour precedent, ie luy bailloy ladite lettre, & luy fis remerciement de la part de vostre Maiefté conformément au contenu de ladite lettre, & puis luy exposay la creance avec respect pour le regard de sa Sainteté, mais au reste avec les mots les plus expres & significatifs que i'auois trouuez en la lettre qu'il vous auoit plu m'escire.

Ie luy dis doncques, que ma creance portoit que vostre M. auoit donné la paix au Duc de Sauoye pour cōplaire à sa Sainteté & à Monsieur le Cardinal son neveu, & à conditions qui auoient déplû à tous les autres Princes d'Italie, & à vne grande partie des François; Que par le 24. article du traité, il estoit porté que les forces assemblees à l'occasion de ceste guerre rā en France qu'en Italie, seroient separees & licentiees dans vn mois apres la publication du traité; Que vostre Maiefté sans attendre le commencement du mois, auoit satisfait au contenu de cet article dès le lendemain de la conclusion & subscriptiō du traité, & auoit donné ordre à tout ce qui apparteñoit à l'exécution de tout le reste, & laissé à Lyon Monsieur le Connestable & autres principaux officiers pour faire executer le tout, & estoit disposée à cōseruer la paix pour tousiours, & à viure en bōne amitié avec tous ses voisins; Que ce nonobstant V. M. estoit aduertie que les forces assēbles au Milanois & au Piedmont à l'occasion de la guerre, passée, non seulement n'estoient point separees ny conduites hors l'Italie, mais s'augmentoient tous les iours, & mesme depuis que le mois apres la publication faite à Thurin & à Milan estoit passé; ce qui tenoit tout le monde en soubçō & trouble, n'estant vray-semblable qu'ils fissent vne si grande dépense sans dessein de s'attaquer à quelqu'un; Que continuant le Comte de Fuentes, & le Duc de Sauoye à faire amas de gens & autres prouisions de guerre, vostre M. ne le pouuoit comporter gueres plus légèrement, & s'il y auoit tant soit

peu d'apparence que les appareils se fissent contre la France, vostre Maieité ne leur donneroit point la peine de faire tout le chemin, ains elle en feroit la meilleure partie pour leur aller au deuant, & seroit vn exercice fort agreable à la noblesse Françoisse qui brasse d'ardeur d'estre employee; Que s'ils s'adresseroient cōtre quelque autre de ceux qui sont cōprins au traitté de Veruins, ce seroit enfreindre la paix, & remuer tout le reste, & d'une guerre entre Frâce & Sauoye, que la Saincteté venoit d'assoupir, en exciter vne cōmune & generale, où tous lesdits cōpris pourroient entrer, & mesmement les Princes d'Italie qui sēbloient estre menacez de plus prcz, & avec vne bonne partie desquels vostre Maieité auoit tant d'alliance & d'amitié qu'elle ne pourroit les abandonner. Par ainsy vostre Maieité supplioit sa Saincteté de preuoir ces inconueniens, & par son autorité pouruoir à la separation desdites forces le plustost que faire se pourroit. Le Pape me respōdit, qu'il auoit desia commencē ce dont vostre M. le requeroit, & y estoit tousiours apres, sollicitant que lesdites forces fussent au plustost enuoyees partie à l'Archiduc Albert, & partie à l'Archiduc Ferdinand, & qu'il continueroit; & au reste que vostre Maieité se pouuoit asseurer, que de ces forces dont on parloit tant, il n'en viendroit aucun inconuenient, & en mettre son esprit en repos.

Monsieur le Cardinal Aldobrandin, à qui incontinent apres ie baillay aussi sa lettre, & fis sōz remerciement, & exposay la mesme creance de là part de vostre Maieité, me dit en substance la mesme chose; & adiousta que lors qu'on le rechercha à Lyon de mettre ledit article 24. concernāt la separation & licentiaement des forces, il dit qu'il se contentoit de le mettre pour faire plaisir à ceux qui l'en requeroiēt; mais qu'il protesta que ladite separation des forces assemblees aux Milanois ne se pourroit faire si tost, & qu'au cōtraire le Pape & luy, vouloiēt & deuoient procurer & solliciter que ladite armee du Milanois fut acernē & augmentee, pour en enuoyer le plus grand secours que faire se pourroit aux Pays bas & à l'Archiduc Ferdinand. C'est tout ce que V. M. me commandoit de faire avec le Pape & avec Monsieur le Card. Aldobrandin par sadite lettre du 16. Mars pour acheuer de respondre, à laquelle, ie diray à V. M. que ie n'ay rien entendu de ceste ligue qu'on vous a escrit que le Card. Dietrichstein auoit eu charge de traiter en Allemagne au preiudice de vostre M. & que ie mettray peine d'en descouvrir la verité. Je ne sçay non plus surquoy se fonde l'Archiduc Albert que la Roynie d'Angleterre entendra plus volontiers à la paix à cause du remuement fait en Angleterre par le Comte d'Essex, & de la punition qui en a esté faite: car cet euenement mesme peut reduire en memoire à ceste Princesse que toute la maison d'Autriche cherche long temps y a & cherchera sans celle les moyens de la faire assassiner, & que les assassins se trouueront & s'exerceront plus aisément parmy la liberte du commerce & les alces & venuēs qui se font en paix, que ne font en temps de guerre, & mesme quand il faut passer la mer pour aller en vne telle Isle. Au demeurant, il ne se parle icy quasi d'autre chose que de ceste armee du Milanois que le Comte de Fuentes va tousiours augmentant. Et le sieur Carlo Doria est arriué d'Espagne à Genes depuis peu de iours, & a apporté cōmandement du Roy d'Espagne qu'il armeroit & mist en ordre toutes les galeres qui sont à luy.

à la deuotion, tant à Genes, qu'à Naples & en Sicile, à quoy on commençait à travailler incontinent à Genes, & y armoit on mesme la Royale, qui n'a acoustumé de voyager sinon lors que le Roy d'Espagne ou son General des Galeres vont sur mer en personne. De ce qu'on en veut faire outre le secours qu'on doit enuoyer aux Archiducs Albert & Ferdinand de 6. mil hommes à chacun, les hommes en vont discourans & deuinant à leur fantaisie. Si c'estoit contre quelque Prince d'Italie qu'ils voulassent employer ses forces, ce seroit contre le grand Duc; mais la prudence & la bonté du Pape ne permet de croire que ce soit contre aucun Prince d'Italie, ny mesme contre aucun Prince Chrestien; & neantmoins on peut tenir pour certain que quelle qu'elle soit l'entreprise, le Pape la sçait & approuue, dont s'en suit aucunement qu'elle soit contre les heretiques, ou contre les Turs. Si c'est contre des heretiques, il est plus vray semblable que ce soit contre Geneue que contre nuls autres, pour les raisons que j'ay autrefois escrites à V. M. combien qu'on a parlé de la Valtoisine qui confine avec le Milanais, & est fort infectée d'heresie. Mais ceste vallee est possedee des Orsions, auxquels s'attaquer ne seroit pas possible expedient aux Espagnols. Si c'est contre les Turs, c'est contre Alger dont il se parle desia assez, ou contre des places & pays que le Turc a en la coste de la mer Adriatique du costé opposé à l'Italie, comme sont les places de la Valona, Scutari, Castel novo, & le pays d'Albanie & autres; & de ce dernier la coste Adriatique est plus vray semblable que celui d'Alger, comme estant le plus près d'Italie où sont les forces dont est question, & plus près aussi de l'Archiduc Ferdinand où le secours doit aller. A quoy fait aussi que le Pape, pour le regard de ce dernier, pourra & voudra estre de la partie, ce qu'il ne fait pour Alger: & desia il a fait publier que le secours d'hommes qu'il veut enuoyer à l'Archiduc Ferdinand, s'ira embarquer en la mer Adriatique aux ports de l'Estat Ecclesiastique; de façon qu'au lieu d'enuoyer ces secours tout droit au pays de l'Archiduc Ferdinand, comme le Pape veut qu'un chacun entende, on les pourroit faire passer par lesdits lieux tenus par le Turc. L'enuoye à vostre M. un exemplaire imprimé de la publication que le Pape en fist faire dès le commencement de la semaine Sainte sous le nom du sieur Lean François Aldobrandin. C'est ainsi que l'on va discourant; mais il pourra estre que de tout cela il n'en sera rien. Cependant V. M. est haut louée de la superabondance de foy, & de l'assurance qu'elle a monstree en faisant rendre au Duc de Sauoye Mont-meliâ & autres places, & eslargir les places de la Sauoye, notwithstanding la proximité & l'accroissement de ceste armee Espagnolle contraire au 24. article de la paix, de quoy vos seruiteurs de deçà font leur profit pour le seruice & reputation de vostre Maiesté.

Le Marquis d'Aix enuoyé pour Monsieur de Sauoye, arriva en ceste ville le 16. d'Auil, & eut audience le Mercredy au matin 18. La cause de son voyage, come il dit, a esté pour remettre le Pape de la paix qu'il luy a plu procurer: mais estant la premiere personne qu'aye auourd'huy le Duc de Sauoye, on ne peut croire qu'il l'ayt enuoyé pour cela seulement, attendu mesme que son Altesse en fit remercier Monsieur le Cardinal Aldobrandin auprès de Paule: & que le Chancelier Belli fut enuoyé à sa Sainteté depuis la paix. On en dit donc une autre cause, à sçavoir qu'il a esté enuoyé pour le

plandre au Pape de ce que M<sup>or</sup> melià n'estoit entores rendu lors qu'il parut d'aupres du Duc, qui fut le 7. de ce mois, mais ceste cause n'est estimée suffisante, pource que ledit Duc a icy vn Ambassadeur resident qui en eut bien fait son deuoir.

Je trouue donc fort vray-semblable ce que d'autres m'ont dit, & que i'auois pensé de moy-mesme, que ledit Marquis ait esté enuoyé pour persuader au Pape que lesdites forces, toutes autres entreprises post posées, soient employées en celle de Geneue, chose que le Duc de Sauoye desire sur toutes les choses du monde. Auec cela il peut auoir donné audit Marquis d'autres commissions fantastiques conformes à son naturel; entre autres ledit Marquis a porté des informatiōs & vn fort lōg procez verbal d'vne mine qu'ils disent auoir trouuee sous le chasteau de Châbery, & auoir esté faite expressement par le sieur de Boëce, à fin de faire sauter ledit chasteau quand le Duc de Sauoye y seroit, comme ledit sieur de Boëce auoit pensé que son Altesse y iroit en bref pour donner ordre à ses affaires.

Ceste inuention de la mine m'a esté dite à moy-mesme en la façon que dessus par ledit Marquis d'Aix & l'Ambassadeur resident, qui me vindrent voir le Lundy de Pasques le 23. de ce mois, comme ils ont visité tous les Cardinaux. Je leur respondis en riant, de façon qu'ils eurent vn peu de honre s'apperceuans que ie ne le troirois point, & que i'en reseruois plus au dedans que ie n'en mettois dehors.

Les Ambassadeurs du Roy de Perse sont demeurez long-temps à auoir audience du Pape pour n'estre d'accord de leur precedence, comme ils ne le sont point encores; qui a esté cause que le Pape leur a dōné audience separément, à sçauoir hier au soir à l'Anglois, & ce soir au Persien, & par cet ordre l'Anglois est racitement déclaré le principal. Il enuoya dernièrement au Pape vne lettre & certains articles pour iustifier sa precedence, dont i'en uoye copie à vostre Majesté.

Quant à leur charge ie ne vous en ay cy-deuant escript, qui seroit toutes-fois le principal, pource que le sieur Ancel que vostre Majesté tient près l'Empereur la vous a desia escripte, puis qu'il m'en fit part à moy deslors que ces Ambassadeurs estoient encores à la Cour de l'Empereur, qui sera l'endroit où ie mettray fin à ceste trop longue lettre en priant Dieu, &c. SIRE, &c. De Rome ce 26. d'Auil 1602.

A MONSIEUR DE VILLEROY.

CCLXII.

**M**ONSIEUR, La lettre qu'il vous pleut m'escrire de Clugny le 22. Mars me fut renduë le treizieme d'Auil, & celle que vous m'escriues de Paris le 9. d'Auil me fut renduë le 27. j'ay esté tres-aise d'entendre que vous fussiez retourné vers le Roy, & que vous eussiez trouué le



Maïestez en tres-bontie fanté, & prie Dieu qu'il les maintienne très-longuement & très-heureusement. Ma despesche du nouuellement Mars arriva à Paris bien à propos, puis que vous la receustes le mesme iour que vous y arrivastes.

Par la lettre que l'escriis au Roy, vous verrez comme le fis l'office que sa M. a voulu estre réstéré enuers le Pape sur la continuation & acroissement de l'armée Espagnole au Duché de Milan, lequel à la verité se pouvoit obmettre pour les raisons que vous auez très-sagement cotees, jugeant des intentions du Pape & du Roy d'Espagne come il falloit; & come l'espere que l'éuenemēt le monstrera bien tost: mais outre que ledit office aura esté fait avec dignité du costé du Roy, & aura serui à toutes auantures pour y faire tant inieux penser ceux cōtre qu'il a esté fait, il a encōres apporté grande consolation aux Venitiens, & au grand Duc, & à d'autres Princes d'Italie, & reputation à sa M. de Prince de bōne amitié, & secourable enuers ses amis, allies, & confederez comme aussi en restituant incontinēt apres ledit office Montmelian & autres places, & ouuert les passages de la Sauoye nonobstant ladite armée Espagnolle & qu'il soit des-armé, il a donné à tout le monde vn tres grand tesmoignage de la foy qui sur-abonde en luy, & de la confiance & assurance qu'il a en ses forces & moyens, & en sa propre valeur. J'ay bien noté tout ce qui estoit en chiffré à ce propos, & recognois les deffauts de la personne dont il s'y parle & en suis marry; mais c'est à ceux qui ont plus de generosité, bonté, & prudence, d'en plus fournir, & supporter iusques à vn certain terme les imperfections de leurs amis. Je suiuray exactement l'intention du Roy quant aux Cardinaux que sa M. desire estre faits par son intercession, comme en toutes autres choses; & m'émervaille comme vous, de ce que le sieur Dom Alessandro Pico n'a rien respondu à la dernière lettre du Roy, non plus qu'à celle que ie luy escriuis dès le 12. Feurier en luy enuoyant celle de sa M. Je me doute que luy & son frere se soient faschez de ce que pour vne chose qu'ils tenoient pour toute assuree il falloit qu'il fust vn voyage en France, & se mist en grande despenſe pour y comparoir conuenablement à son extraction & qualité: Toit que lors que la Roynē partist de Toscane pour France il s'estoit présenté, & encorē vne sienne sœur, pour accompagner sa Maïesté & me semble auoir entendu, ie ne ſçay de qui, que leur bonne volonté ne fut recueillie de nous comme ils pensoient que leur maison auoit meritē. Auquel propōs ie vous diray que sur la fin de la semaine passée il se leua vn bruit qu'ils auoient receu dans la Mirande garnison Espagnole, comme vous ſcauez qu'ils en ont en longnement de François; lequel bruit ie ne tiens point pour vray, mais ie n'estime pas qu'il soit à negliger, pouuant estre que les Espagnols trament ceste toile auïourd'huy que nous n'auons plus rien en Italie, & qu'ils peuent estre trop bien informez du peu de recognoissance que ceste maison a receuē de nous, quand ce ne seroit que par la Signora Hyppolita Pica leur sœur vefue du feu sieur Alfonse Piccolomini, laquelle est ordinairement avec la Duchesse de Solle femme de l'Ambassadeur d'Espagne resident en ceste Cour.

Monsieur le Cardinal de Sourdis est le pasteur du Roy le mesme iour & heurt que ieus le mien, à ſçavoir le Vendredi 17. iour d'Auril. Le non

en nous nous vîmes, & luy dis qu'outre ce que le Roy luy escriuoit par sa lettre, sa Maïesté me commandoit à moy de le prier de sa part de ne partir pour encores de Rome, & m'adionnoit que deseroit le moyen d'obtenir d'elle les graces & bienfaits dont il auoit besoin, & que s'il prenoit autre conseil, sa Maïesté luy en scauroit tres-mauuais gré; & apres luy auoir dit din de la part du Roy lesdites pavoies formelles qui estoient en vostre lettre, ie me mis à lui parler & conseiller en seruiteur sien, & en la meilleure façon que ie sceus & peus, concluant qu'il n'y auoit pas seulement lieu de deliberer. Et sur ce qu'il me dit qu'il auoit desja pris congé de la plus part, & vendu ses meubles, & qu'il n'auoit moyen de s'entretenir icy, sinon que ce peu qui lui restoit pour faire son voyage, & que son Euesché passiroit en son absence, & telles autres choses; ie luy dis qu'il se deuoit seruir de tout cela non pour s'en aller contre le commandement du Roy, mais pour monstret & représenter à sa Maïesté l'obeyssance qu'il luy vouloit rendre: & neantmoins s'il en vouloit encores scauoir l'aduís de quelque autre, ie m'asseurois qu'il ne trouueroit homme d'entendement qui ne luy conseillast de mesme. Il me repliqua qu'il en parleroit au Pape & à monsieur le Cardinal Aldobrandin. Ie luy dis que le Pape mesme seroit de cet aduís. Le Dimanche apres nous nous trouuâmes encores ensemble, où tout ce que dessus fut par moy dit de nouveau. Hier Lundy au matin nous en parlâmes encores auant le Consistoire, où ie continuay tousiours à dire & maintenir qu'il n'en deuoit pas mesme deliberer, comme i'en dis tant à Monsieur le Cardinal Bellarmine & à monsieur le Cardinal Aldobrandin, auxquels il en auoit parlé, & qui m'en mirent en propos. Ce qu'il fera ie ne le scaurois encores dire & ne m'en puis assurer, mais ie vous aduertiray bien de ce qu'il aura fait. Ceux qui ont donné aduis au Roy que Monsieur de Lorraine auoit obtenu du Pape l'erection de Nancy en Euesché ne sont pas bien aduisez eux mesmes, comme vous aurez seu par les lettres que vous aurez receuës de moy depuis que vous eustes escrit celles auxquelles ie responds, qui sera cause que ie ne m'estendray autrement sur ce point, vous ayant assez donné à cognoistre par mesdites lettres mon opinion & disposition touchant ceste erection.

Au demeurant, outre ce que i'ay escrit au Roy de l'audience du Vendredy treziesme d'Auril, ie parlay au Pape & à monsieur le Cardinal Aldobrandin de ce que le Pere Monopoli m'auoit dit du Pere Brussart Capucin frere de Monsieur de Sillery, & ils trouuerent bonne la response que ie luy auois faite, & qu'il n'y fust rien innoué sans le sceu & consentement du Roy. Ledit Pere Monopoli voulut que i'en parlasse pour se garentir de l'autorité de monsieur le Cardinal de Sourdis.

Et pour ce que la lettre que i'escriuis au Roy ne va que iusques à Ieudy au soir vingt sixiesme d'Auril, & que ie fus le lendemain à l'audiēce, ie vous mettray icy que ie trouuay le Pape fort ioyeux de ce que Montmelian & quelques autres lieux auoient esté rendus; surquoy ie ne faillis pas aussi à me preualoir de ceste occasion, pour lui faire d'autant plus cognoistre la foy & l'assurance de vostre Maïesté, laquelle aussi il loua grandement: & comme apres cela ie lui voulus parler de ceste mine qu'on lui auoit rapporté auoir esté trouuee sous le chasteau de Chambery, il me dit qu'il n'estoit

NNNn

550  
 LETTRES DE MONSIEUR R,  
 rien de cette mine là, qui fut cause que ie ne passay outre à luy dire ce que  
 j'auois appresté pour refuter ceste calomnie. Ie ne sçay s'il me dit ainsi  
 pour assoupir, ce propos, ou qu'à la verité il ne croye point aux informa-  
 tions que le Marquis d'Aix me dit en auoir apportees de sa Saincteté  
 luy-mesme. Et passant à d'autres chose, ie luy dis que sa Saincteté ayant  
 pris temps à deliberer sur les Indults que le Roy desiroit, ie ne vou-  
 lois luy en parler pour lors; mais ie le priois bien de se resoudre sur  
 les faits particuliers de l'Euesché de Salusses, & de l'Abbaye de Scra-  
 farde, en admettant les nominations que le Roy en auoit faites, de ce-  
 stui-là par mort, & de cestui-cy par resignation, en pouruoyant les nom-  
 mez par sa Maiesté, puisque lors desdites nominations le Marquisat es-  
 toit du Roy qui ne l'auoit encores cedé au Duc de Sauoye. Sa Saincteté  
 me respondit que le Marquisat de Salusses estant tenu par le Duc de Sa-  
 uoye lors que le Roy fit ses deux nominations, & luy estant demeuré  
 par l'accord, sa Saincteté ne pouuoit honnestement & ne deuoit de  
 pleine autorité admettre à present les nominations du Roy, & pour-  
 uoir les nommez sans premierement le faire sçauoir au Duc de Sauoye; &  
 entendre ce qu'il vouloit dire là dessus, & qu'elle en parleroit au Marquis  
 d'Aix & à l'Ambassadeur resident du Duc de Sauoye; & me semblant qu'il  
 y auoit de l'apparence en la response de sa Saincteté, ie ne luy repliquay  
 autre chose, sinon que ie le suppliois donc de leur en parler. Ie separay de  
 ces deux l'Abbaye de Haute-Combe, de laquelle ie luy parlay apres; & il  
 me dit que ladite Abbaye estant en pays qui estoit & est au Duc de Sa-  
 uoye, la nomination du Roy ne pouuoit de rien seruir à ceux qui l'a-  
 uoient obtenuë, & qu'il s'en falloit adresser au Duc, Que neantmoins s'il  
 pouuoit aider de quelque chose il parleroit encore de ceste Abbaye aux  
 gens du Duc: dequoy aussi ie le suppliy, le remerciant tres-humble-  
 ment de la grace à laquelle il luy plaisoit s'offrir. Monsieur le Cardinal  
 Aldobrandin, auquel i'en parlay en sortant de chez le Pape, me dit qu'il fe-  
 roit ce qu'il pourroit pour les deux premieres: mais quant à l'Abbaye de  
 Haute-Combe, de laquelle luy auoit parlé aussi à Lyon le sieur Alexan-  
 dre Delbene, il renoit la chose pour impossible, d'autant qu'aux premiers  
 mescontentemens que le Duc de Sauoye auoit desia de ceux de la maison  
 des Delbene ils auoient adiousté cestui-cy de nouveau, qu'en son affliction  
 ils auoient demandé au Roy la nomination de ladite Abbaye par res-  
 gnation, tout aussi tost qu'ils auoient veu la Sauoye occupee par sa Ma-  
 iesté.

Dimanche 29. d'Auril fut en fin canonisé le saint Espagnol dont ie  
 vous ay autrefois par escript cy deuant. L'Ambassadeur d'Espagne ne s'y  
 trouua point en qualité d'Ambassadeur, mais il estoit en vn certain lieu  
 derriere vne tapisserie regardant la ceremonie. Monsieur le Cardinal Far-  
 nese fit au Pape au nom du Roy d'Espagne la requeste de la Canoniza-  
 tion, que les Ambassadeurs ont accoustumé de faire. Monsieur le Cardi-  
 nal Dietrichstein est sur le point d'arriuer en ceste ville retournant d'Alle-  
 magne, s'il n'est desia arriué; & demain doit arriuer le seigneur Vescero  
 Ambassadeur extraordinaire enuoyé par la Seigneurie de Venise au Pape  
 pour occasion de cette armee Espagnolle qu'on ne laisse d'accroistre tou-

Jours au Milanois. A tant, ie prie, &c. Monsieur, &c. De Rome, ce Mardy premier de May 1601.

## A MONSIEUR DE VILLEROY.

CCLXIII.

**M**ONSIEUR, J'ay veu par vostre lettre de Clugny du 22. de Mars la response que le Roy vous auoit faite sur la lettre que ie vous auois es-  
crite touchant le Capuchin Hilaire de Grenoble, & vostre aduis là dessus,  
lequel j'ay trouué tresbon, & en eusse vsé ainsi de moy-mesme, pour les cõ-  
siderations par vous tres-sagement déduites. Quand vous l'aurez par delà  
vous en ferez comme il vous plaira, & le plus soudement que vous pour-  
rez: mais icy il vous faut garder de faire parler le monde plus qu'en nul au-  
tre lieu. Il est mesme bon qu'il s'en aille hardiment & sans peur, & pour cela  
ie n'ay fait aucun semblant avec personne du monde de rien. Il y a plusieurs  
iours qte ie n'ay ouy parler de luy, mais par la premiere commodité ie vous  
en sçauray à dire ce qui en fera. Toute cettè Cour est pleine d'un bruit, que  
de nouueau il s'est trouué quelqu'un qui a voulu attenter à la personne du  
Roy, & i'en ay veu des lettres escrites de Paris & de Lyon. A tous ceux qui  
m'en ont demandé, j'ay respondu que ie n'en sçauois ny n'en croyois rien,  
& que i'auois lettres de sa M. & de ses Secretaires d'Estat qui n'en faisoient  
aucune mention. En telles occurrences ie croirois qu'il seroit expedient  
d'en escrire par deçà aux ministres du Roy, non ce quien seroit, car il ne  
seroit pas tousiours vtile, mais ce que vous voudriez qu'on y respondit aux  
grands qui en demandent, comme encores hier monsieur le Cardinal Aldo-  
brandin m'en demanda au Consistoire. Il y en a qui conioignent ce dessein  
avec le remuement aduenü en mesme temps en Angleterre, & avec l'amas  
de tant de gens au Milanois, duquel on ne sçait la fin, comme si le Duc de  
Sanoÿe & le Comte de Fuentes s'en fussent voulu seruir pour apres le coup  
faire de beaux ieux en France, pendant que d'autres eussent iolié la tragedie  
en Angleterre, sans qu'un Royaume eust peu secourir l'autre. Je vous re-  
mercie bien humblement de ce qu'il vous a plu me respondre à ce que ie  
vous auois escrit de l'Euesché de Carcassonne pour le Côte Louys de Lan-  
guischole, lequel se recommande encores, & m'a esté de nouueau recomman-  
dé par des Seigneurs qui nous veulent bien.

Mais vous remerciay-je de tout mon cœur de la faueur qu'il vous plaist  
me presier pour estre payé de la pension de l'annee passée, de laquelle si ie  
n'auois grand besoin ie ne voudrois en auoir sonné mor: mais monsieur le  
President Ruellé vous pourra dire comme ie suis de l'Euesché de Bayeux  
& du Prieuré de Bellefme, & quant à l'Abbaye de Nant en Roüergue el-  
le ne m'a rendu, les charges deduites, en toute vne annee que deux cent  
vingt-cinq escus rendus à Lyon, pour lesquels faire venir à Rome il me

NNN 2

A MONSIEUR DE VILLEROY.

CCLXIV.

**M**ONSIEUR, Apres que ie vous eus escrit par le precedent ordinaire mes lettres des 16. d'Auril & premier de ce mois, qui estoit vn Mardy, le Pape partit de ceste ville le lendemain pour aller à Frescati, dont il ne retourna que Mardy au soir 8. de ce mois, c'est pourquoy ie ne fus point à l'audience le Vendredy 4. Le matin du Vendredy 11. fut confistoire, & parce que ie deuois aller l'apresdinee à l'audience du Pape, & que ie voulois parler à sa Sainteté de la dispense du mariage de monsieur le Duc de Bar & de Madame sœur du Roy, dont sa Maiesté parla à monsieur le Cardinal Aldobrandin en la dernière audience qu'il eut d'elle, ie demanday audit sieur Cardinal s'il en auoit parlé au Pape. Il me dit que ouy, mais qu'il estoit d'aduiz que nous en conférassions ensemble luy & moy, auant que i'en parlasse à sa Sainteté, & que pour ce iour là ie pourrois obmettre ce point avec le Pape, & en conférer avec luy Cardinal, quand i'aurois eu l'audience de sa Sainteté, à quoy ie m'accommoday. Je luy dis encore que ie voulois aussi parler au Pape de pouruoir à l'Euesché de Troyes la personne de Monsieur Benoist Confesseur du Roy, dont sa Maiesté luy auoit aussi parlé, & il me dit qu'il en auoit aussi parlé; & que i'en pourrois parler au Pape le mesme iour. L'apresdinee donc dudit iour Vendredy 11. de ce mois, comme ie fus arriué en la présence du Pape il commença à parler le premier, & me dit qu'auant qu'entrer en autre propos il me vouloit dire qu'encores que le Duc de Sauoye eut rendu Chasteau-daufin, & razé le fort de Beche-daufin, & accompli de sa part tout ce qui auoit esté promis, si estoit ce qu'on ne luy rendoit point à luy ce qui auoit esté promis de luy rendre apres ladite restitution de Chasteau-daufin, & demolition de Beche-daufin. Que les choses ayans esté si bien acheuées iusques icy, sa Sainteté desiroit que ce qui restoit s'executast de mesme, & que personne n'eut occasion de se plaindre du Roy ny de ses ministres, & que i'en escriuisse à sa M. & y fisse tout le meilleur office que ie pourrois. Je luy respondis que sa Sainteté & tout le monde scauoit la profession que le Roy auoit tousiours faite de garder sa foy, que i'auois tenu iusques là, que tout eust esté rendu de part & d'autre & comme ie ne scauois les causes de ce retardement que sa Sainteté venoit de me dire, aussi m'asseurois-ie bien qu'il y en auoit quelque vne que sa Sainteté approuueroit; Que i'attendois de iour en iour l'ordinaire de Lyon par lequel i'en pourrois apprendre quelque chose, & cependant ie ne faudrois d'en escrire & obeyr aux commandemens de sa Sainteté. Ce que faisant ie vous dis à vous, Monsieur, que mon aduis se-

roit, s'il n'y a cause iuste & legitime de retenir, que l'on rendist au plustost ce qui reste à rendre, en continuant la bonne foy & l'assurance que nous auons iusques icy monstree; ce que ie m'assure aussi estre de l'intention du Roy, & de l'aduis de tous les gens de bien qui sont près de sa Majesté. Que si on a cause iuste & legitime de retenir, qu'on la dist librement & ouuertement, & qu'on la fist entendre au Pape, auquel monsieur de Sauoye adresse tousiours ses plaintes non seulement de ce qui est, mais aussi de ce qui n'est pas.

Monsieur le Cardinal Aldobrandin vouloit que pour cecy ie vous despeschasse vn courier exprez, mais estant si près de l'expedition de l'ordinaire, auquel ie pourray donner quelque auantage pour mieux courir, i'ay estimé qu'un courier exprez ne le deuanceroit de gueres. Voila d'oc le premier point de ceste audience, lequel vint du Pape & non de moy. Le second point qui fut le premier de ma part, fut touchant l'Euesché de Salusses, & des Abayes de Strasarde & Haute-Combe, dont ie luy auois parlé en l'audience precedete, comme ie vous en rendis compte par ma lettre du premier de ce mois; mais ie ne luy en auois point laissé memoire par escrit à part, depuis celuy que ie luy auois baillé pour les Indults des pays Messin & de Bresse; & partant ie luy en donnay vn à part pour ces trois presentes, de la teneur qu'il vous plaira voir par la copie que ie vous en enuoye. Sa Saincteté me dit qu'il en parleroit à l'Ambassadeur de Sauoye, & que l'office d'ot il m'auoit parlé que ie ferois enuers le Roy pour la restitution de ce qui restoit à rendre, pourroit aider à obtenir dudit Duc ce qu'on en desiroit. Apres cela ie rammentus à sa Saincteté le long temps qu'il y auoit que le Roy l'auoit prié & supplié d'expedier l'Euesché de Troyes en la personne de monsieur Benoist son Confesseur, Docteur en Theologie, & bien merité de la Religion Catholique, & que dernièrement que monsieur le Cardinal Aldobrandin se tenoit de sa Maiesté, elle le pria tres-affectueusement de s'employer enuers sa Saincteté pour certe expedition, comme aussi elle m'auoit commandé par ses lettres d'en faire souuenir ledit Seigneur Cardinal Aldobrandin, & d'en faire tres-humble & pressée instance à sa Saincteté, laquelle ie suppliois donc de vouloir en fin contenter sa Maiesté, & consoler ce bon personnage qui auoit employé toute sa vie au salut des ames, & à conseruer la Religion Catholique, & refuter les heresies, & en laissay à sa Saincteté vn memoire par escrit que l'expeditionnaire qui a la sollicitation de cet affaire auoit dressé: lequel memoire sa Saincteté prist, sans me respondre autre chose, sinon qu'il y penseroit.

Ie luy parlay puis apres de ce que le Roy desiroit que sa Saincteté ordonnast au nouveau Nonce, de pouruoir à ce que les Prescheurs en France preschassent avec la discretion & moderation requise, sans s'ingerer aux affaires d'Estat, dont ils ne scauoient les motifs, ny tenir propos tendas à seditio, & luy en laissay aussi vn memoire par escrit, auquel vous aurez copie avec la presente. Et sa Saincteté me dit qu'elle l'ordonneroit ainsi audit Nôce nouveau, appellé Innocentio Bufalo, qui est gentil-homme Romain, docté de fort belles qualitez: & sa Saincteté m'en parla à ce propos, me disant qu'il l'auoit choisi tel qu'il n'y pouuoit tomber soupçon d'aucune dependance d'autre Prince que de sa Saincteté, ny par natiuité, puis qu'il estoit

Romain, ny par benefice, ny par autre bien-fait, luy n'ayant renté ny reueus hors l'Estat Ecclesiastique; Qu'au reste il estoit doué des qualitez requises, si on ne vouloit dire qu'il n'estoit assez vieux; mais qu'il l'auoit voulu choisir d'aage vigoureux pour porter la peine, ayant à l'enuoyer à la Cour de France, qui n'est point sedentaire comme celle de Rome & de Venise, & comme sont encores d'autres de quelques Rois. Je luy dis qu'il auoit fait vn bon choix, & que ledit Nonce & pour cela, & quand il n'y auroit que le respect de sa Saincteté, seroit tousiours bien receu près sa Majesté, & honoré comme il appartenoit à sa dignité. A chose faite ie pēsay qu'il falloit ainsi respondre, outre que ie croy que sa Saincteté aura bien choisi. S'ils m'eussent parlé auant la resolution, ie me fusse souuenu de ce que le Roy m'auoit escrit touchant Monsieur d'Arles.

Je parlay au Cardinal Aldobrandin de toutes les choses susdites, comme est la coustume de luy dire les choses qu'on a traittes avec le Pape, mais luy traittay principalement de la dispense dudict mariage de Monsieur de Bar, & luy monstray par vides-raisons que le Pape la pouuoit & deuoit donner; & en cas que sa Saincteté en fit difficulté, comme elle a fait iusques à present, elle ne pouuoit refuser au Roy, & à Monsieur de Lorraine, & à toute cette maison d'en faire deliberer par vne Cōgregation de Cardinaux, tels & en si grād nōbre qu'il luy plairoit, & accōpagnēz encores d'autant de consultants Theologiens & Canonistes que sa Saincteté vouldroit; Que si la Cōgregation resoluoit que le Pape pouuoit & deuoit dōner ladite dispense, sa Saincteté qui estoit père, & deuoit abonder en charité plus que nul autre, y deuoit incliner d'autāt plus, & pourroit faire cette grace sās aucun soupçon de cōscience; Que si la Cōgregation resoluoit autrement, le Roy & Monsieur de Lorraine auroient patiēce, & sa Saincteté se seroit deschargée enuers eux. C'est ce point, Monsieur, que ie veux presser, à sçauoir que le Pape mette la chose en deliberation de gēs de bien, & entendus en telles matieres; ce qu'il ne peut honnestement refuser, & mesmement à vn Roy de France, & à la maison de Lorraine. Et ie vous assure vous, que s'il se fait nousst gaigné, comme il vous peut souuenir que ie vous en ecriuis dès lors que Monsieur le Duc de Bar estoit icy, que nous eussions emporté ladite dispense, la Saincteté nous eust permis d'en deliberer: mais il ne voulut qu'on dōst rāst sinon sur ce que mondit sieur le Duc demandoit à gaigner le Iubilé. Et croy que pour conforter la poursuite que i'en feray dès la premiere audience que i'auray du Pape, & en toutes les suivantes, il sera bō que le Roy en escriue à sa Saincteté vne bonne lettre, la supliant, en cas qu'elle ne veuille apres vn si long temps accorder presentement la dispense, qu'au moins il mette la chose en deliberation en vne Cōgregation, composee d'autant de personnes qu'elle aduysera; & suis d'adujs que nous ne quittons iamais ceste poursuite; car la chose est si raisonnable qu'il faudra y condescendre en fin. Bien est vray que si Madame se vouloit faire Catholique, comme elle doit pour infinis respects, elle deliureroit le Pape & nous de toutes ces peines, & sa Saincteté sans autre instance luy enuoyeroit incontēent la dispense toute par fumee. Monsieur le Cardinal Aldobrandin, pour retourner à luy, fit quelques difficultez, auxquelles ie luy respondis pleinement, étant dès long-temps informé & préparé de tout ce qui se peut alleguer contre.

ladite dispense, & des responses qu'il y faut faire, & sur la fin il me dit que le Roy luy auoit dit, que si on vouloit enuoyer la dispense à luy, il promet-  
toit de ne la deliurer iamais aux parties iusques à ce que madite Dame se-  
roit Catholique. Je luy dis que sa M. me l'auoit encores escrit à moy, &  
qu'il en seroit ainsi visé, ou autrement en la meilleure façon que sa Sainte-  
té aduiseroit, & en somme nous demeurâmes là, que i'en parlerois au  
Pape en la premiere audience: ce que ie feray, Dieu aydant, & ay desia tout  
prest le memoire par escrit que ie luy veux laisser, duquel ie vous enuoye-  
ray copie quand ie l'auray baillé à sa Sainteté. Au demeurant, l'armee du  
Roy d'Espagne au Milannois & aux enuiron est tousiours en pied, & tient  
encores le monde en suspend & en doute de ce qu'on en veut faire. Bien dit  
on que les Suisses ont esté licentiez, mais on ne s'accorde point s'ils sont  
partis ou non. Le Comte de Fuentes auoit fait proclamer à son de trompe,  
que tous les soldats & gens de guerre eussent à se retirer chacun en son  
quartier, & à se tenir prests, & à deux iours delà en auoit fait vn autre, que  
tous les hommes à pied eussent à se tenir prests pour marcher avec vne che-  
mise seulement, quand & la part qu'il leur seroit commandé. Les galeres  
de Naples partirent il y a enuiron 15. iours, pour s'aller ioindre à celles de  
Sicile & de Make, pour toutes ensemble courir sur la Carauane qui doit  
aller d'Afrique à Constantinople, porter les tributs & presens au Turc.  
Nostre S. Pere incontinent apres les festes de Pasques commencera à faire  
leuer les gens qu'il veut enuoyer au secours de l'Archiduc Ferdinand, & se  
voyent enrooller plusieurs François venans de la guerre de Sauoye. Le Mar-  
quis d'Aix partit Mecredy 9. iour de ce mois pour s'en retourner vers M. de  
Sauoye.

Le Cardinal Dietrichstain arriva le iour mesme que ie vous escriuis ma  
derniere lettre, qui est du premier de ce mois, & est prest à s'en retourner.  
De l'occasion de sa venue il s'en parle diuersement: tant y a que c'est l'Em-  
pereur qui l'enuoye, & est chose qui se passe entre le Pape & l'Empereur,  
soit pour l'entreprise à laquelle doiuent estre employés les secours que le  
Pape & le Roy d'Espagne veulent enuoyer en ces quartiers là, soit pour  
rompre l'election d'un Roy des Romains, dont l'Empereur n'entend pas  
volontiers les propos qu'on en tient, soit pour la Transylvanie, de nouveau  
troublée à l'Empereur, ou pour quelques autres telles choses. Monsieur le  
Cardinal de Sourdis partit de ceste ville pour France le Lundi 27. iour de ce  
mois, il y a auourd'huy 8. iours. Je me remets à luy de vous faire entendre  
les causes de ceste sienne resolution, m'estant moy mesme commandé de  
n'en escrire ny en bien ny en mal.

Depuis ma derniere lettre i'en ay receu vne du Seigneur Dom Alexandro  
Pico du 15. d'Auril, en laquelle il ne fait aucune mentiõ de celle que ie luy es-  
criuis le 12. Feurier, en luy enuoyât celle du Roy, madite lettre fut baillée ches  
la Signora Hyppolita Pica sa sœur, comme i'é auois visé tousiours aupara-  
uant, & n'en estoit iamais aduenue faite, & ne suis pas hors de soubçon qu'il  
dissimule d'auoir receu madite lettre & celle du Roy, pour n'auoir point à  
faire le voyage de France dont il estoit prié, & qu'il a pris l'occasio que vous  
voyez de m'escrire la lettre dont ie vous enuoye copie, quand il a veu que le  
temps s'approchoit auquel il faudroit que ie fisse office pour luy, cõme à la



verité ie veux & dois faire, & le Roy a trop plus quade raison de me l'auoir commandé, y allant vn peu de sa reputation que ce ieune Seigneur estant de la maison dont il est, soit anancé par le moyen & autorité de sa Majesté, & mesmes apres qu'elle s'en est tant de fois & si expressément declarée.

Monsieur le Patriarche de Constantinople a en fin eu l'Euesché de Parté en Sicile, & en fut pourueu en Consistoire le dernier iour d'Auril; le Pape mesme le proposant avec grande louange dudit sieur Patriarche. Monsiignor Bufalo, qui doit aller Nonce en France bien tost, partira au commencement de Idin. Il me vint voir dès le Mardy 2. de ce mois, le lendemain que ie vous eus escrit ma derniere lettre, & me le dist luy mesme, me requerant de luy conseiller ce qui me sembloit estre à propos pour bien administrer sa charge. Je luy dis fort volontiers & fidellement ce que Dieu m'inspira, l'aduertissant de certaine sorte de choses & de personnes dont i'estimois qu'il se deuoit garder, & en fin le priay d'en demander aduis à Monsieur le Cardinal de Florence, & audit sieur Patriarche, qui auoient esté longtemps en France, & auoient obserué & appris comme il s'y falloit gouverner pour y bien faire le service du Pape, & le bien de la religion Catholique. Ce iour là mesme 2. de ce mois, monsieur le Cardinal Aldobrandin, lequel ie fus voir parce qu'il deuoit aller le lendemain apres le Pape à Frescati, me parla de l'élection que le Pape auoit faite de ce Prelat pour nonce en France, & m'en dit beaucoup de bien, & qu'ils auoient esté à l'escole ensemble, & qu'il venoit d'estre son Lieutenant au gouvernement de Fermo, & qu'il estoit parent de monsieur le Cardinal Bandini; lequel Cardinal Bandini me l'a ainsi fait dire par vn sien qu'il tient à Rome, luy estant Legat en la Marque d'Ancone. Ledit sieur Bufalo fut enuoyé à Malte par le Pape, lors qu'il y auoit vn grand different entre feu monsieur le grand Maistre Verdale & vne partie des Cheualiers; & s'y porta fort bien, & en rapporta louange, & mesme de plusieurs Cheualiers François.

Comme l'on change de Nonce en France, aussi fait-on en Sauoye, & y enuoye-t'on Monsiignor Tartarino Euesque de Forli. Il m'est venu voir: ie luy ay dit entre autres choses, que le Prince aupres duquel il alloit resider, auoit besoin de conseils pacifiques, & que luy Nonce auoit besoin d'aller retenu à croire des choses fausses qu'on luy diroit en la Cour de Sauoye de nostre Roy & de la France, expressément afin qu'il les escriuist au Pape; en quoy l'Archeuesque de Bari son predecesseur auoit trop souuent failly, comme i'auois fait voir à sa Sainteté plusieurs fois tout le contraire, de ce que ledit Archeuesque auoit escrit; de quoy ledit Nonce fut me remercier. Nous verrons comme il reüssira en l'execution. Le Seigneur Veniero Ambassadeur extraordinaire de la Seigneurie de Venise arriva icy le 2. de ce mois, & fut à l'audience à Frescati le Dimanche 6. On tient que la principale occasion de sa venue soit pour l'armée du Milanois; mais qu'il est encores chargé de parler de leur Patriarche, qu'ils ne veulent point enuoyer à examen à Rome, & des decimes que le Pape veut imposer pour la guerre du Turc, qu'ils ne veulent estre exigées en leur Estat; & peut encor y auoir quelque autre chose qu'on ne sçait pas. Les Ambassadeurs du Roy de Per-

se font dépesciez par le Pape, qui leur fist donner par le Patriarche Biondo son Maistre d'hostel leudy au soir 10. de ce mois mille escus d'or en or à chacun, & à leurs Truchemens deux cens aussi pour chacun, & leur fist on dire qu'ils s'en pourroient aller quand il leur plairoit. Ils sont encores icy, & ne se sont jamais peu accorder de leur precedence. Ils se veulent mal de mort; s'ils ne sont plus que fins & dissimulez; & comme ils ont eu leurs audiences & leur traitement séparément, aussi dit-on qu'ils s'en iront séparément, & que l'Anglois partira le premier. Quant à celuy qui est Persien de nation, on dit que partant d'icy il ira tout droit en Espagne, & que de là il s'en retournera en Perse. Del'Anglois on ne sçait ce qu'il fera. Monsieur le Cardinal de Sourdis me dit le cinquiesme de ce mois, que ledit Anglois l'estoit allé voir, & luy auoit demandé son aduis, s'il deuoit aller vers le Roy ou non: & luy Cardinal luy auoit respondu qu'il me le demanderoit à moy; & me l'ayant demandé ledit Seigneur Cardinal le iour mesme, ie luy respondis que le Roy ne m'auoit rien fait entendre là dessus, & que ie n'en pouuois aussi rien dire ny conseiller, & m'en remettois audit Ambassadeur Anglois, qu'il en fist comme bon luy sembleroit. Ie respondis ainsy, premierement pour la verité, & que ie suis accoustumé de laisser faire nature, quand ie ne sçay si les choses sont bonnes ou mauuaises. Secondement, pour ne uoloir donner occasion audit Anglois de s'excuser sur moy d'estre allé en France, ou de n'y estre point allé, & d'en causer en Rome mesme avec d'autres, & mesmes avec les Espagnols, lesquels ie sçay auoir pratiqué avec luy fort estroittement. En apres, ie me souuenois que le Roy auoit esté aduertiy de Prague par Monsieur Ancel de tout le fait de ces Ambassadeurs, & du voyage qu'ils se proposoient de faire, comme ledit sieur Ancel m'en auoit donné aduis à moy mesme, & me souuenois aussi que sa Maiesté eust en fort à cœur que ces Ambassadeurs allassent ou n'allassent point vers elle, il y auoit eu du temps pour m'en commander quelque chose; & puis qu'elle ne l'auoit fait, ie ne me denois ingérer à en dire vne chose plus qu'autre. D'ailleurs, ie pensois d'un costé, que pour ceste telle quelle paix que nos Roys passez ont laissée à sa Maiesté avec le Turc, il estoit possible bon pour le regard dudit Turc, qu'il sceust que ceux qui sont enuoyez aux Princes Chrestiens pour les liquer cōtre luy, n'ayent osé s'en adresser à sa Maiesté, & nous pourroit seruir de quelque chose: & d'autre costé, il sembloit que pour le regard des Princes Chrestiens, il estoit de quelque reputation au Roy d'estre inuité apres le Pape, & l'Empereur, à vne entreprise si specieuse comme est ceste-cy; par ainsi ie n'en vou-

ois dire autre chose. De cela essay-ie bien resolu, que si lesdits Ambassadeurs deuoient aller au Roy, ils y deuoient aller plustost qu'à celuy d'Espagne, & que s'ils peruertoient cét ordre, ie ne serois point d'aduis qu'il fussent admis par le Roy apres auoir esté en Espagne; attendu mesmement que pour aller de Rome en Espagne, il faut passer en France ou la costoyer. Et pourroit estre que les Espagnols, qui sont tousiours attentifs à l'ambition & à la malice, auroient en cecy ioué sous-main quelque tour de passe-passe: mais quoy qu'ils puissent auoir fait, ie ne pense pas que nous y perdions guere, ceste Ambassade n'estant pas chose de quoy on puisse esperer grand effet & seruant aux Princes, où elle va plustost de depense & de détourbier

A MONSIEUR DE VILLEROY.

CCLXV.

**M**ONSIEUR, Je vous ay rendu compte par vne autre que ie vous ay  
mescrite ce iourd'huy mesme, de tout ce que i'auois fait & appris depuis  
ma dernière lettre du 1. de ce mois iusques à ce iourd'huy, excepté de ce que  
ie receus hier au soir vostre dépesche du 1. de ce mois, contenant vne bien  
longue lettre du Roy, & vne de vostre main; laquelle depesche a donné oc-  
casion à la presente, qui sera d'autant plus courte, que toute ceste matinee a  
esté par moy employée au Consistoire que nostre S. Pere a tenu, & qu'il faut  
que ie depesche l'ordinaire ceste nuit, pour satisfaire en partie à la diligen-  
ce dont Monsieur le Cardinal Aldobrandin a désiré que i'v fisse, ainsi que  
vous aurez veu en ma lettre précédente.

La premiere chose que le Pape fait estant arrivé en la sale du Consistoire,  
c'est de donner audience aux Cardinaux, selon leur rang & ordre : cette  
commodité a fait que sans attendre l'audience de Vendredy prochain, à la-  
quelle ie me reserue pour les autres choses, ie luy parlay du Iubilé que le  
Roy desire obtenir pour Paris, & luy ay dit comme sa Maiesté luy en escri-  
uoit, & representay ce qu'elle mecommandoit. Sa Sainteté m'a respon-  
du, qu'il auoit fait deliberer en vne Congregation expresse de Cardinaux de  
ce qu'il auoit à respondre à tant de Princes & nations qui luy demandoient  
le Iubilé, & qu'il y auoit esté prise resolution contraire au desir de sa Maie-  
sté; & ne scauoit comme il luy pourroit complaire. Je luy ay repliqué, qu'il  
n'y auoit qu'un Roy de France, ny qu'un Paris au monde, & que ceste gra-  
ce que sa Sainteté feroit à sa Maiesté, & à la ville capitale du premier Roy-  
aume de la Chrestienté, ne pouuoit estre tirée en consequence par ceux  
qui le voudroient importuner de chose semblable. Il m'a dit qu'il y pense-  
roit; & ie luy ay dit que ie laisserois à son Maître de chambre la lettre que sa  
M. luy en escriuoit: ce que i'ay fait. Je vous ay escrit cy deuant, à autre pro-  
pos, que sa Sainteté & ses officiers s'estoient fort restraints pour le regard  
dudit Iubilé depuis quelque temps en ça; de façon que cōme ie n'esuis pas  
hors d'esperance de l'obtenir, aussi ne vous en puis-je point assurer; biē vous  
assureray-je d'y faire mō. deuoir, & tous mes efforts, & que s'expediât ledit  
Iubilé, ie tiendray la main que l'expedition soit conforme à l'intention du  
Roy en toutes ses circonstances. I'ay aussi baillé à Monsieur le Cardinal  
Aldobrandin la lettre que le Roy luy en escriuoit, & l'ay prié de faire bon  
office enuers sa Sainteté: ce qu'il m'a promis. Des autres choses que le  
Roy me commande, j'en parleray à la prochaine audience, Dieu aidant,  
comme des deux hommes que l'on auoit dit à sa Sainteté que Ebraïm Bas-

sa, ou le Turc mesme enuoyoit à sa Maiesté, & de la recommandation que le Roy a faite à Monsieur de Breues de ceux de l'Isle & forteresse de Chio, & du compliment que sa Maiesté veut estre fait enuers sa Saincteté pour le regard de Monsieur l'Euesque de Modena qui retourne de sa charge de Nonce. Quant à la protection d'Espagne, ie n'en ay rien entendu depuis que i'en escriuis par delà, quoy que i'aye tousiours esté aux escoutes pour en apprendre quelque chose, & faudra que i'attende quelque bonne occasion, s'il faut que i'en parle aux dénommez en la lettre du Roy pour la qualité & condition de la chose. Mais quant à Geneue, & aux Iesuites de Cahors, i'en parleray au moindre besoin que ie verray qu'il en soit, & à la première occasion qu'on m'en donnera, pour petite qu'elle soit. Pour le regard du Cardinal Farnese & Angleterre, si à ee que ie vous en escriuis vous adioustez l'aide du Roy qu'ils vous demandent tacitement, en montrant le desir qu'ils ont qu'il s'en accorde avec le Roy d'Espagne, & que tous deux y procedent coniointement, vous ne vous en émerueillerez plus tant. Ouy, mais la merueille ne sera pas moindre, de ce qu'ils esperent que le Roy conuocque en vn parent & seruiteur du Roy d'Espagne. Il est vray: aussi voyez-vous comme ils y viennent de loing, esperans s'expliquer avec le temps, & vous le faire trouuer bon, pour le respect du Pape allié avec la maison de Parme, & qui a obligé & peut encores obliger le Roy en plusieurs façons, & pour la protection que la Couronne de France a autresfois eue de la maison de Parme, dont ils vous diront que ceste maison a tousiours retenu en son cœur, & retient encores la memoire & la gratitude: adioustant que les hommes paruenus à quelque grande principauté, changent leurs premières pensées & affections, mesurent toutes choses au pied de l'interest de leur estat present, & que le nouveau Roy d'Angleterre ne pensera plus à Espagne, ny à autre chose qu'à s'establiir, & à estre bien avec ses voisins, & mesmes avec la France, qui luy peut plus profiter & nuire que nul autre Potentat du monde. Enfin quand vous n'approuuerez aucunes de ces coniectures, & qu'il ne vous viendra en l'esprit autre raison pour appuyer leur esperance, comme ils ne s'en peuuent imaginer d'autres, souuenez-vous qu'il n'y a rien au monde de plus trompeur que le desir & l'esperance, & mesmes en vn grand obiect. Vous scauez la faute que firent contr'eux mesmes les Espagnols, qui sont si habiles gens, en proposant aux François de la Ligue leur Infante avec leur Ernest, & puis avec Monsieur de Guise d'aujourd'huy; qui ne vint que de trop de conuoitise, & d'esperance qui les trompa, & leur fit perdre ce que plus ils desiroient. Au demeurant, ie ne faudray de me conduire en cecy comme sa Maiesté me le commande, comme ie feray aussi pour le regard de l'erection de Nancy en Euesché; & sur ce, &c. Monsieur, &c. De Rome ce 24 May 1601.

## A MONSIEVR DE VILLEROY.

CCLXVI.

**M**ONSIEVR, l'adiousteray ce mot de ma main à deux autres lettres que ie vous ay escrites ce iourd'huy, pour vous dire que comme la Pentecoste approche, i'entens faire instance au Pape & à Monsieur le Cardinal Aldobrandin, pour la promotiō à la dignité de Cardinal du Seigneur Alessandro Pico, & de Monsieur d'Eureux. Le sieur de Beauuau, autrement d'Anuilliers, de Lorraine, me parlât vn Samedi huietiesme iour de ce mois du Capuchin Hilaire de Grenoble, avec lequel il a oüuerlé fort priuement, & ont essayé ensemble d'obtenir la dispense, contre ce que i'auois dit audit sieur de Beauuau qu'il falloit attendre Monsieur le Cardinal Aldobrandin; me dit, dis-je, que ledit Capuchin auoit bien d'autres affaires que ladicte dispense, & qu'il auoit des lettres de Madame la Marquise, & apres auoir pensé & demeuré vn pen, il me dit, la Marquise d'Entragues. Je n'osay luy demander quelles lettres, ny mesme faire semblant de l'auoir entendu. Je vous laisse à penser si ce Capuchin n'a pas biē choisi sō depositaire, & qu'est ce qu'il peut auoir fait d'ailleurs. Pour tout cela ie ne me depars point de ma premiere resolution, de ne faire autre chose contre luy que de luy oster credit, en disant que c'est vn homme vain & menteur, qui dit auoir charge du Roy de negocier en ceste Cour, & n'en a point. Quand il sera en France vous en ferez comme il vous semblera; & la premiere chose, si i'en suis creu, sera de le faire fouiller; & luy prendre ses lettres, & telles autres choses qu'il peut auoir.

Le Curé de saint André des Arcs, appelé Christofle Aubry, qui fut chargé du fait de Barriere executé à Melun, mourut la nuit d'entre le leudy & le Vendredy 11. de ce mois, & fut enterré à la Trinité du Mont. Je voudrois que tous ceux qui ont iamais eu, ou sont pour auoir telles pensées, fussent en repos comme luy: car il en seroit mieux à eux mesmes non seulement mais au reste du monde.

L'on tient icy que le pretendant Roy de Portugal a esté liuré aux Espagnols, & qu'il a esté transporté à Naples; dequoy plusieurs hommes sages s'émervellent fort & moy aussi, qui neantmoins ne suis pas de ceux-là. Et pour n'en dire pis, seray icy fin par mestres-humbles recōmandations à vos bonnes graces, en priant Dieu, qu'il vous donne, &c. Monsieur &c. De Rome, ce 14. May 1601.

## A MONSIEUR DE VILLEROY.

CCLXVII.

MONSIEUR, Sans que j'aye ici rien dit ny fait à nostre Capuchin, il s'est de soy-mesme rendu odieux à ses Superieurs & à tout le Cœuer par ses vanitez, medifances, & autres insolences. Le Pere Monopoly Procureur general de cét ordre me vint voir vn Ieudy dix septiesme de ce mois, & apres m'auoir dit comme il auoit suivy mon conseil, de ne point laisser retourner en Frâce le Pere Brulart frere de Monsieur de Sillery, iusques à ce que le Roy en auroit declaré sa volonté, & que ie l'en eus remercié; il me demanda si ie cognoissois Frere Hilaire de Grenoble. Je luy respondis que ie le cognoissois trop, & luy dis quelques vanitez & insolences de l'homme de celles qui se pouuoient dire; & il m'en dit aussi de son costé d'autres, lesquelles pour la pluspart tendoient routes à persuader au monde, que le Roy ne respire que par luy, & qui a l'ame de sa Maiesté toute à sa disposition, & la porte en sa main. Je n'eus pas grand'peine à luy persuader le contraire, car il s'estoit desia apperceu de soy mesme que ce n'estoit tout que vanitez, & mesme d'autant que ledit Hilaire s'estoit aussi vanté d'auoir dit au Pape, & ouy de sa Sainteté des choses, qui n'estoient point vrayes, & ne le pouuoient estre. Apres que nous nous en fumes dit d'un costé & d'autre, il vint au point pour lequel il estoit venu vers moy, me disant qu'il vouloit enuoyer ledit frere Hilaire hors de Rome, & l'enuoyer, non en France, mais en quelque monastere d'Italie, & que luy ayant fait entendre ceste sienne volonté, il auoit monstré vne obediencia de Monsieur le Cardinal Santa Seuerina leur protecteur, par laquelle il luy permettoit de s'en retourner en France rendre compte au Roy de ce qu'il auoit negocié en ceste Cour pour sa Maiesté; Que sur cela luy Pere Monopoly estoit allé voir ledit Seigneur Cardinal Sâra Seuerina, pour luy remonstrer les causes & raisons pour lesquelles ledit Frere Hilaire ne deuoit estre enuoyé en France, ains retenu en Italie; mais que ledit Seigneur Cardinal luy auoit respondu qu'il auoit promis à Monsieur le Cardinal N. de permettre audit Pere Hilaire de s'en retourner en France pour ledit effect, & aussi pour faire la paix du Marquis d'Allegre avec Monsieur le Connestable, & autres de la maison de Montmorency, & en suite d'icelle impetrer du Roy la grace & remission dudit Marquis. Que luy Pere Monopoly se doutant que ceste-cy estoit vne des vanitez dudit Frere Hilaire, estoit venu vers moy pour me prier de luy aider à détrôper ledit Seigneur Cardinal leur Protecteur, & faire qu'il reuocast ladite obediencia, ie luy respondis que bien volontiers ie luy aiderois à detromper ledit Cardinal: mais le prier de reuocquer son obediencia, ie le priois de m'en excuser, Que ie trouuois fort bon que cét homme fust au plus tost enuoyé de Rome, mais j'aimois autant qu'il s'en retournast en France

OOOo 3

que de demeurer en Italie. C'est ce que ie luy dis, & vous dis à vous afin que vous ayez moyen de le chastier, & de luy prendre les lettres dont ie vous ay escrit cy deuant. I'ay depuis parlé à monsieur le Cardinal Santa Seuerina pour qu'il deroge foy à la vanité de l'homme, mais ie ne lui ay autrement parlé de ladite obediencce, ny monstré d'en auoir rien entendu. Ie demanday au Pere Monopoli s'il y auroit point moyen de mettre la main sur ses papiers, pour auer la fausseté des instructions & blancs signez qu'il se vante auoir du Roy, pour les enuoyer à sa Maiezté par moi; ce que ie mettois en auant, pour sous ce pretexte pouuoir auoir & vous enuoyer lesdites lettres. Il me dit qu'il auoit pensé pour autre fin de faire mettre la main sur les papiers; mais qu'un autre Religieux qu'il tiens avec luy auoit dit qu'il les portoit tous sur luy en diuerses poches & pochetes qu'il auoit en ses vestemens, outre que ledit compagnon auoit veu un iour que ledit Frere Hilaire auoit rompu & ietté au feu plusieurs papiers de diuerses sortes, comme s'il se fut douté qu'on le deust un iour fouiller. Voila monsieur, en quoy les choses en sont à present, & moy acquité de la promesse que ie vous auois faite dernièrement de vous faire sçauoir de ses nouvelles, dont en voicy vne pour achener ceste page; c'est que ledit Pere Monopoli me dit que ledit frere Hilaire n'ayant peu obtenir de ses Superieurs la licence de prescher, d'autant qu'il a esté heretique, estoit allé voir l'Ambassadeur d'Espagne, & l'auoit prié d'interceder pour luy enuers monsieur le Cardinal Santa Seuerina leur Protecteur, à ce qu'il luy donnast ladite licence; & que luy Monopoli l'ayant sceu, dit au compagnon dudit Frere Hilaire, comme en riant; Qu'il dit audit Frere Hilaire, que le monde se scandalisoit fort, de ce que luy, qui estoit plus que cousin germain, ains plus que frere du Roy de France, alloit traiter avec l'Ambassadeur d'Espagne, & cherchoit d'obtenir des graces & faueurs par son intercession. Mais ce seroit trop de passer la troisieme page pour vne creature si vaine & si folle. A tant. &c. Monsieur, &c. De Rome ce 28. May, 1601.

## A. MONSIEUR DE VILLEROY.

### ECLXVIII.

**M**ONSIEUR, Depuis que ie vous en ay escrit le 24. de ce mois par l'ordinaire, ie fus le Vendredy ensuiuant 18. à l'audience, & dis à nostre saint Pere comme i'auois receu le 13. lettres du Roy, par lesquelles sa Maiezté me commandoit de dire à sa Sainteté, que ces deux hommes, qu'il luy auoit dit qu'Ebraïm Bassa, ou le Turc mesme, enuoyoit vers sa Maiezté, n'estoient point comparus, ny personne de leur part; & que sa Maiezté n'en auoit rien entendu du tout; & quand on enuoyeroit, si les enuoyez estoient ses subiects, & de condition que sa Sainteté m'auoit dit, sa Maiezté

Se comporteròit enuers eux comme son honneur & le deuoir de Prince Chretien l'obligeroit de faire: Que j'asseurasse aussi sa Sainteté, que sa Ma. recômanderoit tres-volontiers au sieur de Breues son Ambassadeur les Chrétiens de l'Isle & forteresse de Chio, & cependant auois trouué bon que i'en eusse escrit audit Ambassadeur. Cela est bon, dit le Pape, mais ie ne puis celer ny diférer à vous dire, que ie suis tres-marry & fort affligé en moy-mesme, de ce que outre qu'on mist dernièrement vn Capitaine Huguenot en la citadelle de Bourg en Bresse, comme s'il n'y auoit pas vn Catholique en France duquel le Roy se püst fier, tout aussi tost que le Duc de Sauoye a eu fait rendre au Roy Chasteau daufin, on y a mis vn heretique, lequel chassa incontinent le Curé de sa maison parochiale, & y logea vn Ministre predicant. Vous sçauiez dit-il en continuant son propos, combien cela est pernicieux & odieux à Dieu & au monde, & que les Edicts de la liberté de Religion faict en France, ont eu leurs bornes deçà les mots, & que le Roy d'à present m'a fait promettre plusieurs fois, que quand le Marquisat luy seroit restitué, il n'y mettroit d'autre gouuerneur que de Catholique; & encores que ce dernier mal soit, comme ie croy, aduenu sans le sceu du Roy, siest-ce que la pluspart du monde ne lailra de croire & de dire tout autrement, & ceux qui en penseront le moins de mal, diront qu'il n'est obey ny respecté. Je vous prie de luy escrire que ie le prie de faire cesser ce scandale au plustost, comme il est obligé en conscience, & en iustice, & pour son honneur & reputation: en quoy il me fera encores vn plus grand bien en soy-mesme. Le luy respondis que ie n'auois rien entédu de tout cela, & qu'il pourroit estre qu'on l'auoit inuenté, comme du costé de Thurin il souffloit tousiours vn tres-mauuais vent de mensonge & de calomnie contre l'honneur du Roy & de la France, comme i'auois plusieurs fois fait voir & toucher à sa Sainteté en diuerses occasions, & quand il y auroit quelque chose de vray, il ne falloit point en croire tant comme on en disoit; car ie sçauois qu'es lieux mesmes où pour la necessité du temps l'exercice de ceste secte estoit toleré, il n'estoit permis de chasser les Prestres, & moins les Curez de leurs logis, & moins d'y loger les Ministres, & que les premiers articles des Edicts de pacification auoient tousiours esté en faueur de la religion Catholique, & des personnes & biens Ecclesiastiques, & qu'il n'y auoit pas plus d'un an que le sieur de l'Esclignieres mesme auoit esté en persône pour auoir les Commissaires du Roy & faire mettre par tout le Dauphiné la Messe & tout autre exercice de la Religion Catholique, & les personnes Ecclesiastiques en leurs benefices, Eglises, maisons, biens, & fonctions, & quoy qu'il eust esté fait audit Chasteau daufin contre le deuoir, sa Sainteté se deuoit & pouuoit assurer que c'estoit contre l'intention du Roy, & que sa Maiesté feroit au plustost reparer tout ce qui auroit esté faict contre les Edits, & montreroit en cela & en toute autre chose combien il a chere sa conscience, & son honneur & reputation, & le contentemét de sa Sainteté, & qu'il se sçait bien faire respecter & obeyr prés & loing. Voilà Monsieur, ce qui se passa entre le Pape & moy sur ce point. Quant à ce que ie pourrois remonstter à sa Maiesté là dessus, elle le sçait trop mieux, comme faites vous aussi, mais ie ne me puis tenir de vous dire ce mot, que si les choses dont le Pape se plaint sont vrayes, le Capitaine Huguenot qui a fait ceste innouatio-



aux portes de l'Italie, à la veüe du Pape & de ce sainct Siege, & leurs Ministres ne scauroient en mille ans profiter tant à leur secte, comme ils nuisent en vne seule heure à la reputation du Roy & de la France; enuers ceste Cour, & enuers toute l'Italie, & autres nations Catholiques & que le Roy ne pourroit mieux faire pour son seruice, & pour les affaires qu'il a & pourra encores auoir cy apres en ceste Cour, que d'oster au plustost ceste scandaleuse nouveauté. La troisieme chose dont ie luy parlay fut l'Euesque de Modena qui auoit pris congé du Roy par lettres de Lyon, & du contentement que sa Maiesté auoit receu des compliments dudit sieur Euesque en sa charge de Nonce, & du regret qu'elle auoit à son partement, & desir qu'il eut vn successeur aussi sage, circonspéct, & modéré, comme il auoit esté. A quoy sa Saincteté me monstra prendre plaisir, & prit de là occasion de me parler de nouveau de celuy qu'il a choisi pour succeder audit sieur Euesque de Modena en ladite charge de Nonce, tendant à monstrier l'opinion que le Roy & vous tous ne demureriez point moins contents de cestui-cy que l'Euesque de Modena.

La quatrieme fut du Iubilé d'Orleans que sa M. venoit de gagner, & de celuy de Paris dont sa Maiesté luy auoit esorit, & moy parlé le Lundy auparavant en la salle du Consistoire; & pour ce qu'il m'auoit monsté ledit iour de Lundy y faire quelque difficulté, ie luy alleguay plusieurs raisons pour lesquelles il deuoit accorder ledit Iubilé de Paris, lesquelles sont briefuement & sommairement comprises en vn memoire que ie luy en laisfay par escrit, duquel ie vous enuoye copie; & pour cela ne vous en diray autre chose, sinon qu'il y en a assez pour luy faire accorder vne chose plus difficile. Aussi à la verité monstra sa Saincteté se monnoir des considerations que ie luy auois representees; me dit neantmoins qu'il en vouloit conferer avec les Cardinaux de la Congregation, en laquelle auoit esté resolu qu'il n'en donneroit plus.

La cinquieme chose dont ie luy parlay fut de l'Euesché de Troyes pour Monsieur Benoist, luy ramenteuant comme ie luy en auois ja parlé & laissé vn memoire en mon audience precedente, & luy montrant que ie desirois scauoir s'il y auoit pris quelque bonne resolution: Il me dit qu'il auoit pensé de comettre au Nonce de s'informer bié de tout cét affaire quand il seroit par delà, & selon que ledit Nonce auroit trouué il se resoudroit puis apres. Monsieur le Cardinal Aldobrandin dit qu'il esperoit que cét affaire seroit expédié au contentement du Roi.

La sixieme, fut la dispense du mariage d'entre Monsieur le Duc de Bar & Madame sœur du Roi, dont ie vous ay escrit par mes dernieres que i'auois auparavant conféré avec Monsieur le Cardinal Aldobrandin, sa Saincteté tout aussi tost me dit qu'on auoit fait ce mariage non seulement contre les saincts decretz, mais aussi contre son expresse prohibition, & que depuis que ledit Duc de Bar fut icy on n'auoit rien fait de ce qui auoit esté arresté; Qu'on n'auoit point renuoyé certaines femmes qui estoient auprès de la Princesse, & empeschoient sa conuersion; ny fait aller par delà Monsieur Serafin, ny aucun autre denoir pour la reduction de ceste Princesse. Je luy repliquay que ie luy confessois, & luy auois toujours reconnu qu'on auoit grandement failly à faire ce mariage sans la dispense de sa Saincteté, mais que

que le peché en estoit fait, & ne se pouuoit plus reuoker; Que l'on s'en repentait & auoit on desia fait vne bien longue penitence; Que nostre Seigneur Iesus Christ disoit en l'Euangile que ceux qui se portent bien n'ont besoin de medecin, ains les malades, & qu'il estoit venu pour appeler non les iustes, mais les pecheurs: aussi auoit-il donné à l'Eglise puissance d'absoudre & de delier du peché, pour en vser enuers les repentans qui se recognoissent & en demandent pardon; Qu'il auoit choisi pour son Vicaire en terre S. Pierre, qui l'auoit renié trois fois, afin que par sa propre infirmité & coulpe il apprist à auoir compassion des autres pecheurs, & à leur pardonner & absoudre; Qu'au reste Madame sœur du Roy auoit esté griefuement & longuement malade, & en grand danger de mourir; Qu'elle en auoit esté debile long-temps apres, & n'estoit pas mesme à ceste heure remise en sa premiere santé & vigueur; qu'estant en cet estat il ne luy falloit parler de chose qui fat pour empirer son mal; & moins chasser d'aupres d'elle les personnes qui luy estoient les plus necessaires pour son seruice ordinaire, & pour le recouurement de sa santé. Ces propos l'adoucirent, toutesfois pour cela il ne laissa de persister au refus de la dispense. Surquoy ie pris occasion de le supplier, comme ie vous ay cy deuant escrit, que i'auois liberté en moy-mesme, qu'il luy plust de mettre la chose en deliberation, & en faire vne Congregation, composee d'autant & de tels Cardinaux & Consultants, Theologiens & Canonistes qu'il luy plairoit, & s'ils trouuoient que la dispense ne se pouuoit, ou ne se deuoit donner, le Roy, & Monsieur de Lorraine avec toute sa maison se disposeroient à patience; Que s'ils trouuoient que elle se peust & deust donner, la Sainteté, qui estoit le Pere commun, en qui la charité doit abonder plus qu'en nul autre, n'auroit occasion de la refuser ny d'en faire aucun scrupule, & en seroit déchargée deuant Dieu & le monde. Pour tout cela il ne voulut pas seulement accorder de mettre la chose en deliberation; & moy sans vouloir plus auant pour ceste fois là enfoncer la matiere, luy dis qu'elle y penseroit, & luy en laissay par escrit vn bref memoire que i'auois apporté quant & moy à ceste fin, duquel ie vous enuoye coppie.

Voila donc quant à l'audience dudit iour. 8. depuis i'y retournay Vendredy dernier 25. & le trouuay tenant vne lettre en sa main escrite de Thurin à Rome, de la tenenr que vous verrez par sa copie, laquelle lettre il me leut, & puis me la bailla, se plaignant griefuement, comme il auoit fait 8. iours auparauant, de ce que les subiets du Roy introduisoient l'exercice de Geneue deçà les monts, où il n'auoit iamais esté toleré, & me chargeant tres-expressement d'en escrire à sa Maiesté, à laquelle dit-il, i'en escrirois moy-mesme, mais ie ne scaurois luy en escrire sans plus d'aigreur que ie ne voudrois. Je luy fis les mesmes responses que ie luy auois faites la premiere fois, & l'appaisay le mieux que ie pûs, & apres qu'il fut remis, & que ce propos fascheux fut acheué, ie luy ramenteus comme desia par deux fois ie luy auois parlé de la part du Roy du Iubilé pour Paris, & à la derniere luy en auois dressé vn memoire par escrit. Que ie le suppliois de commander que ledit Iubilé fut expedie pour les considerations qui estoient deduites audit memoire. Il me dit qu'il ne pouuoit faire de moins que d'en parler aux Cardinaux qui auoient auparauant delibéré sur le general de tous ceux

P P P P

qui demandoient ledit Iubilé, & auoient arresté qu'il ne seroit point donné du tout. Ie le priay de leur en vouloir parler à sa premiere commodité, m'asseurant que sa Sainteté & eux auroient esgard aux raisons particulieres & propos representez par ledit memoire. Ie luy fis resouuenir aussi comme en mon audience precedente ie luy auois parlé de la part du Roy & de Monsieur de Lorraine de la dispense dudit mariage, & luy en auois laissé vn memoire par escrit, & que ie desirois sçauoir s'il en auoit arresté quelque chose. Il me respondit qu'il y vouloit encores penser, sans autrement entrer en aucune contradiction, & me sembla beaucoup adoucy en comparaison des autres fois.

C'est le sommaire de ce que j'ay negocié. Quant aux occurrences de deçà l'armée du Milanois est tousiours au mesme estat, excepté que les Suisses ont esté renuoyez, & à Genes estoient arriuees les six galeres que le Seigneur Carlo Doria auoit laissees en Espagne, & auoient porté grande quantité d'armes, & vn million & demy d'or; lequel iacoit qu'il appartienne à des particuliers, on pense neantmoins qu'il sera employé au seruice du Roy d'Espagne, avec lequel lesdits particuliers en feront party. Lesdites galeres, & les autres du Roy d'Espagne, & celles du Pape, & de la religion de Malte seront employées à ce que l'on dit à quelque entreprise contre le Turc, soit conioinctement avec les forces de terre, ou separément. On continuë à Rome les leuees pour le secours de l'Archiduc Ferdinand; & auoit on enrrollé des soldats François en diuerfes compagnies iusques au nombre de deux ou trois cens en tout. Maintenant on dit qu'on ne veut point de François, & leur veut on faire rendre l'argent d'un mois qui leur a esté avancé ou partie; ce qui n'est point iuste, & suis apres à empescher ceste iniustice.

Le sieur Barreti Agent de Monsieur de Lorraine vouloit faire traiter en la Congregation des matieres Consistoriales l'affaire de l'erection de Nancy en Euesché, & ie luy ay tourné dire que s'il le faisoit ie m'y opposerois au nom du Roy, & que ce contraste entre nous pourroit preiudicier à l'affaire de la dispense qui est commencé & que nous pouruiuons d'un commun accord; par ainsi qu'il seroit bon de superseder la poursuite de ladite erection ce qu'il ma promis de faire. S'il tient sa promesse ie ne feray autre chose: mais à la premiere fois qu'il en fera traiter ie formeray mon opposition.

Le Cardinal Dietrichstein partist de ceste ville pour s'en retourner vers l'Empereur la nuit du Mercredy vingt-troisiesme de ce mois venant au vingt quatriesme. On pense que la principale cause pour laquelle il estoit venu aye esté pour monstrier au Pape comme l'Empereur est recherché de la paix avec le Turc, & que si sa Sainteté ne luy donnoit, & procuroit des autres Princes Chrestiens quelques notable secours pour pouuoir se defendre & offenser ledit Turc, il seroit contraint de s'accorder; & que le Pape aye admonesté l'Empereur par ledit Cardinal de tenir bon, & promis de contribuer & faire contribuer tout ce qu'il pourra. L'Ambassadeur de l'Empereur doit suivre bien tost ledit Cardinal Dietrichstein, iacoit qu'il dise vouloir retourner. Le Nonce pour France doit aussi partir dans huit iours.

J'ay escrit cy-deuant comme les Ambassadeurs du Roy de Perse auoient esté licentiez, ce qui est vray, toutesfois ils ne sont encores partis : iacoit que le Persien eust arresté d'aller par mer droit en Espagne, toutesfois il a changé d'aduis, & veut aller premierement en France rendre au Roy vne lettre qu'il a du Roy de Perse son Maistre. Il me vint voir Vendredy 27. de ce mois, & me le dit ainsi par son interprete, me priant de luy vouloir donner vn passe-port pour la France, & vne lettre adressante au Roy quand il partiroit. Je vous ay escrit cy-deuant que ie ne m'estois iamais laissé eschapper aucun mot par lequel on pût coniecturer que i'estimasse que ces Ambassadeurs deussent, ou ne deussent point aller vers le Roy, pour les considérations que ie vous representay. Je garday cela mesme en respondant audit Ambassadeur Persien; car ie ne luy dis pas vne seule parole par laquelle il püst iuger que ie trouuasse bonne ou mauuaise ceste sienne deliberation d'aller vers le Roy : mais sans toucher à rien de tel, ie luy respondis gracieusement que ie le serurois du passe-port & de la lettre qu'il me demandoit, n'estimant point que ie les luy deusse refuser, car ç'eust esté déclarer que ie ne voulois point qu'il y allast, & faire mal penser & mal parler le monde. Quand il sera prest de partir, s'il enuoye querir ledit passe-port & lettre ie la luy donneray; cependant ie vous ay voulu aduertir de ce que dessus. Il me dit qu'il feroit le chemin de Lyon tout droit par Thurin & parla Sauoye. Vous aduiserez s'il sera bon que le Roy escriue aux Gouverneurs des principales villes où il aura à passer, qu'il y soit receu, honoré, & caressé, afin qu'il se puisse louer de la France. Quand il sera à la Cour, ie croy qu'il le faudra faire loger, traiter & accommoder de coches ou carosses tant qu'il y sera, eomme ont fait le Pape & l'Empereur, outre le present qu'ils luy ont fait à la fin. Le lendemain Samedi vingt-sixiesme vint aussi me voir l'autre Ambassadeur dudit Roy de Perse & Anglois de nation, soit à l'imitation ou emulation de l'autre, ou que sans cela il eust la volonté de ce faire, & me dit qu'il estoit fort seruiteur du Roy, & l'auoit seruy és guerres passees; Qu'il vouloit estre le mien, ainsi parloit-il, & venoit s'offrir à moy pour tel; Qu'au reste, pour les traueses qu'on luy auoit donnees en ceste Cour il s'en vouloit retourner en Perse sans passer outre, pour en retirer vn sien frere qu'il y auoit laissé; Qu'aussi bien n'auoit il point d'inclination d'aller en Espagne; Quant à l'Angleterre il auoit commandement de la Royne de n'y point aller, en France il luy sembloit ne deuoir point aller pour ne preiudicier au seruice du Roy qui estoit en paix avec le Turc; & pour n'estre cause que les subiets de sa Maiesté traffiquans és terres & pays de Turcs y fussent mal traitez. Je garday le mesme stile en respondant à cestui-cy que i'auois fait enuers l'autre, ne me laissant rien entendre en sorte du monde que ie trouuasse bon que luy ou l'autre allast ou laissast d'aller vers le Roy. Au demeurant, ie respondis à toutes autres choses le plus gracieusement qu'il me fut possible, de façon qu'il ne m'escauroit auoir passé en courtoisie, non plus que surpris au reste en cas qu'il eust voulu decourir ce que i'en pensois. Il me dit qu'il m'enuoyeroit certains papiers conçoernants sa charge; ce qu'il a fait: & en ay fait copier le principal, qui est ce qu'il a dit au Pape de la part du Roy de Perse, &

vous en enuoye la copie, comme ie feray des autres de moindre importance par le premier ordinaire. Ledit Anglois se monstroir à moy fort aliéné des Espagnols, mais ie sçay qu'ils l'ont fort pratiqué & confessé, & luy ont fait de belles offres pour l'auoir de leur costé, tant en leur ancien dessein d'Angleterre, qu'en ces choses de Perse contre le Turc : & pourroit estre que luy qui est hors de son pays & fort necessiteux prendroit appointement d'eux, qui donnent plus volontiers pour mal faire, que pour autre chose ; & me doute qu'en l'escriit dont ie vous enuoye copie, & en l'article qui commence *TERTIO CVM VISIA CONFEDERATIONE* ils luy ont fait adiouster contre nous la clause qui commence *ACCIO QVESTA CONFEDERATIONE*. Cela sçay- ie tres-bien qu'il conféra avec le Pere Personio Iesuite Anglois & avec l'Ambassadeur d'Espagne auant qu'auoir audience du Pape, combien que ie veux croire qu'il en fust recherché par eux, & non qu'il les recherchaist le premier.

Dernierement que ie vous respondis à ce que vous vous émerueillez du Cardinal Farnese touchant le Royaume d'Angleterre, l'oubliai à vous dire qu'il y a quelques annees qu'à la suggestiō d'un Iesuite Anglois ie Pere Personio, lequel est recteur du College des Anglois à Rome, & deuot du Roy d'Espagne, s'il en fut oncques, le Pape crea en Angleterre vn certain Archipreste, auquel il veut que tous les Ecclesiastiques, & encores tous les autres Catholiques d'Angleterre respondent & croient, & par ce moyen on pense faire ce qu'on voudra de la plus grande partie des Catholiques d'Angleterre. Il vous plaira doncques adiouster ce moyen aux autres qu'on se fantastique en l'esprit, & puis epiloguer en vous mesme, que le Pape, nostre Roy, & le Roy d'Espagne, & ce qui dépend d'eux, avec les Catholiques d'Angleterre, tout cela dis ie, joint ensemble par imagination comme vn grand desir promet tousiours assez & trop, est suffisant pour embarquer en de bien grandes esperances.

L'instance que i'ay faite ces iours passez, & mesmement Vendredy, au Pape & à Monsieur le Cardinal Aldobrandin pour le Iubilé de Paris, a esté cause que sa Sainteté dès hier fist signifier aux Cardinaux de la Congregation, qu'apres le Consistoire de ce matin il leur vouloit parler & deliberer avec eux : dequoy ayant esté aduertty comme i'entrois en la salle du Consistoire, i'ay eu temps de parler ausdits Cardinaux vn à vn, & leur recommander cet affaire auant que le Pape vint comme i'en ay aussi parlé au Pape mesme, quand ie suis allé à montour pour l'audience à sa chaire. Lesdits Card. sont, Santa Seuerina, Florence, Baronio, Antoniano, Bellarmino, Aldobrandino, & Sangeorgio, ils m'ont tous monstré inclination à complaire au Roy, excepté Bellarmino qui m'a dit ouuertement qu'il n'en estoit point d'aduiz, iacoit qu'il eust veu le memoire que i'en auois baillé au Pape, que sa Sainteté a fait courir par les mains desdits Cardinaux. I'ay enuoyé vers Monsieur le Cardinal Aldobrandin pour sçauoir ce qui auoit esté resolu en ladite Congregation ; lequel m'a mandé qu'il auoit esté arresté que sa Maiesté seroit contentee quant au Iubilé : mais quant au temps de six mois il auoit esté iugé vn peu trop long, & qu'on rabbattroit quelque chose, comme il me diroit à moy la premiere fois que nous nous verrions. Ie l'iray voir dès demain. Cependant i'estime que nous aurons pour le

moins quatre mois Atant, &c. Monsieur &c. De Rome, ce 28. May mil six cens vn.

## A MONSIEVR DE VILLEROY.

## CCLXIX.

**M**ONSIEVR, Quand il a plû au Roy me faire Cardinal sans que  
 Mie l'en eusse iamais requis directement, il m'ordonna de sa grace qua-  
 tre mille escus de pension par an pour m'ayder à maintenir ceste dignité, &  
 m'en fit payer à l'espargne la premiere annee 1599. de façon que ie n'y per-  
 dis que le port & les changes de Paris iusques à Rome. En la seconde an-  
 nee 1600. i'en fus assigné sur la recepte de Paris, & n'en ay esté payé que  
 des trois quartiers premiers. Quant à ceste troisieme annee mil six cens vn  
 celuy qui a pris la peine d'en solliciter l'assignation m'a escrit qu'encores  
 qu'il eust mon blanc signé dès le commencement de ceste annee, si est-ce  
 que le douzieme de May, duquel iour il m'escriuit, il n'en auoit encores as-  
 signation, & ne la luy vouloit on point donner sinon que sur la recepte de  
 Tours. Ceste nouuelle, Monsieur, m'est venuë non seulement contre mon  
 besoin & necessité, mais aussi contre mon opinion & expectation; car enco-  
 res que ie ne me fonde guerés sur des esperances, & qu'au contraire i'aye  
 toujours crainct d'estre par le moyen du Cardinalat condamné à vne perpe-  
 tuelle & honteuse pauvreté, si est-ce que ie n'estois pas allé si auant que de  
 penser qu'en temps de paix, auquel le Roy me fait faire ses affaires à Rome,  
 & que ie luy espargne cependant ce qu'un Ambassadeur luy eust dependu,  
 & en temps encores que ie fais l'office de Protecteur auec beaucoup de pei-  
 ne & sans émolument, côme ie n'en desire & ne m'en appartient point aussi,  
 ie n'auois, dis ie, esté si pouruoyant que de penser qu'en ces trois temps  
 ioints & confidez ensemble, & durant le mesme besoin & necessité on  
 me diminueroit ladite pension & en qualité, & encores en commodité du  
 lieu de l'assignation. Mais à present que ie voy qu'au plus fort de ce peu de  
 seruice que ie puis faire au Roy on me diminue sa liberalité, qui m'est aussi  
 necessaire qu'auparauant, ie vous confesse ingenuëment que ie n'en puis  
 bien esperer pour l'aduenir; & pour cela ie suis contraint de vous escrire  
 bien expressément pour vne bonne fois, vous priant de m'en excuser, & ne  
 vous en tenir point pour importuné. I'ay fort pensé & repensé à ceste di-  
 minution & changement d'assignation en vn tel temps, & n'en ay sceu trou-  
 uer aucune cause vray semblable, sinon que le Roy & Messieurs des finan-  
 ces peuuent auoir opiniõ que i'aye d'ailleurs dequoy m'entretenir à Rome,  
 & y maintenir la dignité de Cardinal; & mesmement qu'il plût à sa Maiesté  
 me donner l'Euesché de Bayeux, & partant qu'il soit meshuy temps de sou-  
 lager les finances du Roy de toute ladite pension, ou de partie d'icelle; Sur-  
 quoy, Monsieur, ie vous diray que s'il estoit ainsi que i'eusse dequoy m'en-

tretenir à Rome en Cardinal, ie reputerois à grand honneur d'y servir le Roy sans aucune pension de sa Maiesté ny grande ny petite, & tiendrois ma peine, & tout mon bien & ma vie pour tres-bien employee en seruant sa Maiesté & ma patrie, & encores apres tout cela ie ne penserois point que le Roy me fust tenu de rien, ny auoir fait qu'une partie de mon deuoir; mais ie n'ay point de moyen de m'entretenir à Rome depuis que ie suis Cardinal, & le Roy ne me continuë sa liberalité. Qu'ainsi soit, vous croirez aisément qu'un Cardinal, mesmement François, ne se peut tolerablement maintenir à Rome, où aborde & abonde une infinité de François, s'il n'y reçoit par chacun an pour le moins la somme de huit mille escus, & encores cela se doit entendre apres qu'il est bien meublé, ce que ie ne suis pas. Or est-il que depuis un an & plus que j'ay ledit Euesché de Bayeux, j'ay dependu pour l'Euesché plus de neuf cens escus, à sçauoir cinq cens pour payer le droit de la Regale à Messieurs de la saincte Chappelle de Paris & de la chambre des Comptes, & le reste en plusieurs voyages & autres dépenses qu'il a fallu faire en ces commencemens pour y bien establir & ordonner les choses tant au spirituel qu'au temporel, & n'en ay encores receu que quatre cens escus, de façon qu'il s'en faut plus de cinq cents escus que j'aye rien de quitte dudit Euesché de Bayeux: Monsieur le President Ruellé, que vous cognoissez pour personnage tres-digne de foy, vous témoignera que ie vous dis la vérité tant en la depence qu'en la recepte. Quant à l'Abbaye de saint Pierre de Nanten Rouergue au diocèse de Vabres, en vingt-denz mois qu'il y a que ie l'ay, ie n'en ay encores rien receu que deux cens cinquante escus sols rendus à Lyon au banquier Bonuifi au mois d'Auril dernier. A quoy vous voyez Monsieur, comme tout compté & rabbattu de deux benefices que j'ay à la nomination du Roy ie n'en ay encores rien receu de quitte, ains y ay dependu de la pension mesme qu'il a plu au Roy m'ordonner, & qu'il y a bien loin de recevoir rien, & encores dépendre d'ailleurs, à recevoir huit mille escus qu'il faut pour le moins à un Cardinal François qui reside à Rome. A quoy aussi voyez vous encores s'il y a eu occasion de diminuer ladite pension, & d'en changer l'assignation de Paris à Tours où ie ne cognois personne, & mesme moy, n'ayant aucun patrimoine, ny aucune rente ny reuenue temporel, ny eu iamais soin ny moyen de reseruer & mettre ensemble quelque somme d'argent pour suppleer à tels manquemens. Ouy; mais il vous est deu dudit Euesché & de ladite Abbaye, & vous en receurez beaucoup d'argent à la fois; Je voudrois bien, Monsieur, qu'il fut ainsi; mais outre que quand ainsi seroit i'endurerois cependant trop de necessité & de honte, il ne m'est rien deu de ladite Abbaye: & quant à l'Euesché, le mesme Monsieur le President Ruellé vous dira qu'il n'a trouué à en affermer les fruits & reuenus, & qu'il les a fallu bailler en recepte, & faudra attendre que les fruits soient vendus petit à petit, de sorte que ie n'en sçauois estre secouru promptement ny de grande somme, comme i'e aurois besoin, outre que les fruits ne se trouueront à vèdre, & les faudra donner pour fort peu de chose. Et ie vous assure que ie penserois auoir fait assez, si non seulement de l'Euesché de Bayeux, mais de tous les benefices que j'ay, i'en pouuois tirer à l'aduenir pour chacun an quatre mille escus quittes & portez à Rome, qui est la moitié de ce qu'il me faut rendu à Rome si j'ay

à y demeurer. Voila donc, Monsieur, comme pour le passé ny pour l'advenir ie ne me puis passer tant que le Roy me tiendra à Rome de ce bien qu'il a plu à sa Majesté m'ordonner, si pour descharger ses finances elle n'aymoit mieux me gratifier pour ce peu de temps que j'ay à viure, estant desia aagé de 64. ans, d'une ou de deux Abbayes qui me rendissent autant toutes charges faites comme sa Majesté le pourroit faire sans aucun hazard, puis que par le bref que ie vous ay enuoyé cy-deuant, sa Maieité est asseuree qu'encores que ie meure en Cour de Rome, sa nomination luy sera sauue. Par ainsi sembleroit conuenable qu'il pût à sa Majesté faire l'une ou l'autre de ces deux choses, non pour aucun seruice que ie luy aye fait, ny pour aucun mien merite, mais pour sa bonté, & pour garder constance, & pour quelque siennereputation en ceste Cour, où outre le Pape, & le College des Cardinaux, & tant d'autres Prelats, il y a des Ambassadeurs & autres notables personages de tous les endroits de la Chrestienté qui ont les yeux sur nous. Que si sa Maieité n'est conseillée de faire l'un ny l'autre, cōme aussi ne presumay ie point de l'auoir merité, ny del'en deuoir importuner, ie la supplie quand elle aura icy vn Ambassadeur, & ce qu'elle iugera vtile au bien de ses affaires, me permettre de m'en aller resider en l'Euesché qu'il luy a pleu me donner, & quand i'y seray, comme ie yeux croire que ledit Euesché me nourrira sur les lieux, aussi vous assouray-ie bien que ie ne demanderay ny desireray pension, ny autre benefice. Que si nonobstant tout ce que dessus, sa Maieité me detenoit icy plus longuement sans que i'eusse dequoy m'y entretenir en Cardinal, ie n'en partirois ia sans congé : mais ie sens bien en moy-mesme que cela m'abbregeroit mes iours, & m'y feroit mourir bien tost de necessité, de regret, & de honte. Ce que ie vous supplie lire à sa Majesté, & remonstrer à qui besoin sera, en continuation de tant d'autres biens qu'il vous a pleu me faire, & m'excuser de ceste importunité, de laquelle ie suis aussi marry comme de la necessité mesme qui m'y contraint. Arant, &c. Monsieur, &c. De Rome ce septiesme Iuin mil six cens vn.



## A V R O Y .

C C L X X .

S I R E ,

Depuis que j'eus escrit à Monsieur de Villeroy le vingt-huitiesme May, ie receus la trentiesme la depesche de vostre Maiesté du treiziesme avec les lettres que vostre Maiesté escriuoit de sa main au Pape & à M<sup>rs</sup>ieur le Cardinal Aldobrandin en response de leurs lettres , & des brefs de sa Saincteté quel'Euesque de Modena vous auoit enuoyez de Lyon par son neveu & par son secretaire; & le Vendredy ensuiuant, qui fut le premier iour de ce mois, ie fus à l'audience & presentay au Pape les lettres de vostre Maiesté, & luy exposay la creance qu'il vous auoit pleu me commander : en luy rememorant premierement ce que vostre Maiesté auoit respondu audit Euesque de Modena sur la publication du Concile & reestablishement des Iesuites, & sur le gouverneur de la citadelle de Bourg en Bresse, & puis adionstant ce que vostre Maiesté me commandoit de dire de plus à sa Saincteté ; laquelle apres auoir escouté le tout, me respondit qu'il y auoit si long temps que vostre Maiesté auoit promis de faire publier le Concile , qu'il seroit meshuy plus que temps de l'executer : Que ceste publication tourneroit non seulement à l'honneur de Dieu, à l'edification de l'Eglise, mais aussi au profit & embellissement de la France , & à vostre grande vtilité & reputation. Et neantmoins il voyoit que de temps en temps on prenoit nouveaux delais & vsoit-on de nouvelles excuses : & cela luy donnoit à penser qu'il y auoit de mauuais gens qui destournoient vostre bonne volonté, & taschoient à gaigner tousiours temps afin qu'il ne s'en fist rien du tout à l'aduenir: tellement que s'il ne voyoit desormais des effets, il ne pourroit plus croire à paroles. Je luy repliquay qu'outre l'information que sa Saincteté auoit d'ailleurs de vostre bonne volonté ; ie luy pouuois asseurer que vostre Maiesté auoit vne vraye & sincere intention de contenter sa Saincteté de la publication du Concile, & que j'auois veu copie de l'Edit qui en auoit esté dressé, comme ie luy auois dit autresfois, & sans la guerre derniere à laquelle le Duc de Sauoye auoit donné l'occasion que sa Saincteté sçauoit, le Concile seroit ia publié, & en grande partie estably & executé ; Que la publication du Concile, comme aussi le reestablishement des Iesuites, estoit chose qui ne se deuoit entreprendre sinon qu'en pleine, entiere, & seure paix, attendu que non seulement les heretiques, mais aussi vne grande partie des Catholiques y estoient contraires, comme sa Saincteté en estoit ia informée ; & comme aussi se pouuoit elle souuenir que les Roys passez, lesquels ne pouuoit tomber aucun soubçon, n'estoient iamais peu venir à bout de la publication dudit Concile : Que iusques icy on n'auoit peu tenir la paix pour asseurée, attendu la perplexité en laquelle le Comte de Fuentes

auoit

auoit tenu les esprits des Princes & autres, en mettant ensemble tant de forces, & faisant tous preparatifs de guerre: attendu aussi que le Roy d'Espagne n'auoit encores iuré la paix de Veruins, quelque instance qui luy en eust esté faite, & le mauuais & cruel traitement que receuoient les François en Espagne, y estans gehennés & meurtris contre la liberté du commerce promise & accordée en ladite paix de Veruins, & nonobstant les remonstrances par plusieurs fois reitérées audit Roy d'Espagne & à ceux de son conseil par vostre Ambassadeur resident en Espagne, & par vostre Majesté mesme, & par vos conseillers à l'Ambassadeur d'Espagne resident près de vostre Majesté, & attendu encorés les entreprises commencées, ou pour le moins continuées depuis la ratification de la paix sur les villes de Marseille & de Mets, d'où que vinssent lesdites entreprises, desquelles vostre Majesté ne se plaignoit point & n'é accusoit personne: mais la chose (d'où qu'elle vint, de près ou de loin, de dedans ou dehors) parloit assez d'elle mesme, & monstroït euidentement que iusques icy la paix & le repos de la Frâce n'auoient point esté assurés: Que toutes les choses susdites estans vrayes, certaines, & publiques, la Sainteté n'auoit à craindre que ce fussent excuses controuuées, ny qu'on luy donnast des parolles, comme si on luy disoit des choses qui ne se vissent point, & qu'il ne peut sçauoir d'ailleurs que de nous. A cela il respondit, que du fait du Comte de Fuëtes vostre Majesté en estoit meshy esclaircie, & que par les aduis qu'il auoit d'Espagne il s'imaginoit que le Roy d'Espagne auoit iuré la paix de Veruins lors que nous parlions. Quant à ce mauuais traitement des François en Espagne, il ne sçauoit que c'estoit, sinon qu'il auoit entendu que le commerce ayant esté prohibé aux Zelandois & Holandois en Espagne, les François leur prestoiēt le nom, & portoiēt & vendoiēt leurs marchandises. Quant aux entreprises sur Marseille & Mets, il vouloit croire que c'estoiēt des faux bruits, ou choses vieilles commencées pendant les guerres; & apres la paix delaisées. Je luy dis quant ausdites entreprises, que ie luy auois desia dit que vostre Majesté ne s'en plaignoit point, & n'en accusoit personne: mais moy comme creature & seruiteur de la Sainteté ne le denois point laisser en erreur, ains luy denois dire qu'elles estoient vrayes & certaines, & qu'il y auoit eu des hommes iusticiez & executez à mort tant pour l'une que pour l'autre. Alors il me demanda que c'estoit, & d'où cela venoit: & moy pour ne manquer à vne si belle occasion de luy faire cognoistre que les Espagnols le trompoient, & qu'une autresfois il ne deuoit s'asseurer d'eux, & moins promettre pour eux comme il venoit de promettre à vostre Majesté, à la Seigneurie de Venise, & au grand Duc) ie luy dis fort volontiers ce que i'auois entendu de l'une & ne fis difficulté de nommer le Duc de Sauoye & le Comte de Fuentes en celle de Marseille, & le Comte Monferli & l'Archiduc Albert en celle de Mets. Sa Sainteté, comme en faisant difficulté que sur l'Archiduc Albert; me dit que ce Prince auoit d'autres os à ronger. Je luy respondis qu'il les auoit voirement: mais que ie ne laissois de le croire de luy aussi bien que d'autres; d'autant qu'outre la confession des complices, & la passion de toute la maison d'Autriche contre la France, & particulièrement contre vostre Majesté, c'est alors que ce sont les beaux coups, quand il semble que ceux qui les font ont moins d'occasion d'y penser: Sa Sainteté cōme me cedant à ce-

QQQq

ste raison, dit; Et vous autres François les trauallez aussi, allans au secours des Zelandois & Hollandois, tant à pied qu'à cheual. C'est là tres-S. Pere, luy dis ie, vn autre pretexte qu'il eust pris de plus, & c'est vne raison de plus que vostre Saincteté n'apprend, pour me faire croire d'auantage ceste entreprise; mais ie ne dois obmettre de dire à vostre Saincteté que ce pretexte ne luy eust pû servir, y ayant autant ou plus de François en son camp qu'en celuy des Estats, & Monsieur le Prince de Ioinuille, qui a l'honneur d'appartenir à sa Maiesté, estant allé tout freschement le servir, comme il m'a esté assuré depuis peu de temps: & sur cela i'adioustay que les François, fretilans de leur naturel, & accoustumés à la guerre depuis quarante ans en çà, ne pouuoient demeurer en leurs maisons en paix, & alloient trouver la guerre où elle estoit, & y servir ceux auxquels ils auoient plus d'inclination, ou avec lesquels ils auoient similitude de religion, ou de secte & d'opinion; Que sans plus loing, sa Saincteté auoir à Rome des soldats François qui s'estoient venus offrir à son seruice, & estoient bien maris d'estre renuoyez. Baste, dit le Pape, il faut que le Roy face publier le Concile, & remettre les Iesuites au plustost, & qu'il ne differe plus. Aussi fera-t'il tressainct Pere, le plustost qu'il luy sera possible, & supplie vostre Saincteté de n'en point douter. Ce point estant ainsi expédié, ie luy dis qu'il n'y auoit qu'un autre Vendredy iusques à la Pentecoste, & que i'auois pensé n'attendre point iusques là à luy parler de promotion de Cardinaux; Que ie ne presumois point de m'enquerir si sa Saincteté en feroit ou non, ny aussi de la presser d'en faire si elle n'y inclinoit; bien luy voulois ramener, & la supplier de la part de vostre Maiesté, que si elle en faisoit, il luy plust vous gratifier de deux personages que vostre Maiesté auoit elle mesme nommez à Monsieur le Cardinal Aldobrandin, à sçauoir le Seigneur Alessandro Pico, & Monsieur l'Euesque d'Eureux. Que vostre Maiesté les desiroit tous deux; mais qu'à sa Saincteté n'en pourroit faire qu'un à la prochaine fois, pour n'en faire qu'un pour Espagne, vostre M. desiroit qu'elle honorast de ceste dignité ledit Seigneur Alexandro Pico, pour lequel auoit esté fait instance premierement, & auquel vostre Maiesté en auoit donné intention auant tout autre depuis la dernière promotion, cōme aussi au Prince de Mirade son frere, & à toute ceste maison, laquelle auoit tousiours esté deuote à la Couronne de France, & si fort qu'il sembloit que V. M. ne pust maintenir sa réputation en Italie, si elle n'obtenoit ceste grace de sa Saincteté, pour vn personnage si bien qualifié en sa personne, & extrait d'une maison si illustre, & affectionnée à la France. Le Pape me respondit que nous n'estions pas encōres en ces termes: & quant au Seigneur Alessandro Pico, cōme V. M. consideroit ce qui faisoit pour elle, aussi deuoit elle considérer ce qui estoit expedient au S. Siege, & avec qui ledit Seigneur Alessandro estoit allié, & que la Mirade estoit fort près de Ferrare. Ie luy repleiquay que V. M. desiroit le bien du S. Siege, & de la maison Aldobrandine, cōme le sien propre, & estimoit que la promotion dudit Seigneur D<sup>e</sup> Alessandro l'obligeoit luy & toute ceste maison à servir d'autant plus fidellement le S. Siege, & la personne de sa Saincteté, & toute la maison Aldobrandine, de laquelle il s'estimeroit & seroit vrayement creature; Que outre ceste obligation, qui l'admonestoit de son deuoir, V. M. vouloit entre-

pleige pour luy, qu'il seroit toute sa vie tres fidelle & tres deuot seruiteur de sa Saincteté & de tous les siens; & pour ceste consideration, outre les autres occasions que vostre M. auoit de luy bien faire, luy donneroit des benefices en France, qui seroient autant de gages de sa fidelité; Que V. M. en vouloit faire autant de Monsieur le Cardinal d'Este, & asseurer l'un & l'autre au service, non seulement du S. Siege, mais aussi de M. le Cardinal Aldobrandin, & de tous les siens. Et comme les Rois ont les mains lógues, si d'auanture ces deux Cardinaux s'oublioient de leur deuoir, ce que V. M. ne pouuoit croire, ils n'auroient personne plus contraire que leur seroit V. M. Que ie ne disois point cela de moy-mesme, ains vostre Maiesté me l'auoit escrit expressément dès le 28. Ianuier, pour le dire en temps & lieu à sa Saincteté, laquelle pourroit encores sçauoir de M. le Cardinal Aldobrandin que vostre M. luy en auoit dit autant elle mesme: à quoy ie suppliois sa Saincteté ne trouuer mauuais que moy-mesme i'adioustasse vne autre consideration comme son tres-humble seruiteur & créature, c'est, que comme sa Saincteté consideroit ce qui pourroit aduenir si elle faisoit Cardinal ledit Seigneur Dom Alexandre, il estoit aussi digne de sa sapience de considerer ce qu'il pourroit aduenir si elle refusoit de le faire; Qu'outre que sa Maiesté en receuroit vn tres-grand desplaisir, toute la maison Pica en resteroit grandement degoustee, & leurs alliez, pour doute desquels sa Saincteté auroit laissé de le faire, & n'en amenderoit point de volonté enuers sa Saincteté & les siens. D'arantage, ce Seigneur icy estant ieune & qualifié comme il est, & ne se pouuant promettre l'intercession de vostre Maiesté, & de tout autre Roy de France à venir, pourroit estre, ains seroit vn iour fait Cardinal par quelqu'autre Pape; & en ce cas Monsieur le Cardinal Aldobrandin & les siens ne pourroient pas s'en promettre toute la seruitude qu'il leur auroit toute sa vie si sa Saincteté l'auoit esleué à ceste dignité, comme vostre Maiesté l'en supplioit tres-humblement, & le vouloit compter pour vn François fait Cardinal à sa requeste. Sa Saincteté ne replica autre chose à cela, sinon qu'elle ne regardoit à son particulier ny aux siens, mais au bien public seulement, & à ce qui estoit pour la seureté & vtilité du S. Siege, & des choses qui en dependoient, & au reste qu'il y auoit du temps assez pour penser quels Cardinaux il voudroit faire.

Je ne pensay deuoir adiouster autre chose pour lors quant audit Seigneur Alessandro Pico: mais pour ne laisser imparfait le propos de la promotion, & pour obeyr aux comandemens de la Royne, ie luy ramétus l'instance que i'auois faite au commencement du Carême passé de la part de ladite Dame Royne, laquelle aussi supplioit sa Saincteté de se souuenir de M. l'Archeuesque de Pise. Et afin que l'instance de la Royne ne peust en rien preiudicier à ceux que V. Maiesté demandoit, i'adioustay incontinent, que ladite Dame Royne estoit aymee de vous autant que femme le pouuoit estre de son mary, & que vous seriez bié aise qu'elle fust gratifiée de sa requeste; mais en matiere de Cardinaux, vostre M. & elle n'auiez rien de meslé ensemble, & que si sa Saincteté faisoit en cela quelque chose pour la Royne, vostre Maiesté en eût doit que ce fust sans diminutio ny preiudice aucun des subiets que V. Maiesté luy demandoit. Le Pape se prit à rire bié fort, & dit qu'il y auroit du réps. à penser, pour l'Archeuesque de Pise aussi bien que pour les autres. Quand

I'eus fait avec le Pape, i'allay trouver Monsieur, le Cardinal Aldobrandin; & luy baillay la lettre de la main de vostre Maiesté, & traittay avec luy les mesmes choses, & comme il me faisoit les mesmes responses, ie luy fis les mesmes repliques, & ne s'y passa autre chose. I'oubliais à dire à vostre M. que l'un & l'autre me parlerent avec grande affection de cét exercice de huguenoterie qui a esté introduitte à Chasteau daufin, & scandalise toute cette Cour, & toute l'Italie, & prejudicie grandement aux affaires que vostre Majesté a par deçà, & à sa reputation; de façon que vostre Maiesté fera beaucoup pour soy en plusieurs sortes de les faire oster de là, & entr'autres choses fera grand plaisir au Duc de Sauoye & à ses semblables, de leur oster ceste matiere de calomnie, à laquelle ils se plaisent sur toutes les choses du monde, & ne pourroient auoir vn plus grand creue cœur, que de voir vostre Maiesté bien faire, & principalement és choses de la religion Catholique. C'est donc le sommaire de ce qui se passa en l'audience dudit iour premier de ce mois de Iuin, à laquelle ie retournay Vendredy dernier 8. de ce mois; & encotes que par la precedente i'eusse occasion de croire que la Saincteté ne feroit point de promotion à ceste Pentecoste prochaine, si est-ce que ie ne voulus obmettre de luy en parler encores à toutes aduantes, n'y ayant plus aucun iour d'audience iusques aux quatre temps: & comme ie commençois à luy en parler, il me dit que ie ne m'en misse en peine, & qu'il y auoit du temps assez pour en parler, & pour y penser. Ie luy dis que ie n'auois nouuelle instance à luy faire sur cela, & que i'auois pensé de luy ramenteuoir ce que ie luy en auois dit en l'audience precedente. Il me repliqua qu'il se souuenoit tres-bien de tout ce que ie luy en auois dit, & que le m'asseurasse qu'il y auroit du temps assez: ainsi ie n'en parlay plus. Et croy fermement qu'il ne fera point de promotion en ces quatre temps prochains, si ce n'estoit de l'Archiduc Leopold frere de l'Archiduc Ferdinand & de la Roined'Espagne, qu'il pourroit promouoir tout seul pour l'honorer d'auantage. Apres cela, ie luy dis que i'auois cōmandement de luy ramenteuoir de temps en temps la dispense de mariage d'entre Monsieur le Duc de Bar & Madame vostre sœur. Et moy, dit-il, ie ramentois au Roy la publication du Concile, & le r'establissement des Peres Iesuites. Qui estoit assez me signifier que si vostre M. veut estre contentee de ladicte dispense, & de telles autres choses, comme des Indults pour nommer aux Eueschez de Mets, Toul & Verdun, & autres, il faut luy cōplaire desdites choses, & qu'autrement il n'en fera rien. Que si i'estois digne d'interposer mon aduis en cecy, il sembleroit puis qu'il vous met en ce chemin, qu'il seroit bon de publier le Concile au plustost que faire se pourroit, comme sans cela vostre Majesté y est obligee, & puis luy faire instances & presse de ladicte dispense & Indult, & ne parler au reste des Iesuites qu'il n'ait fait de son costé.

A tant ay-je respondu à tous les points de ladicte depesche du treiziesme May qui en auoient besoin; reste à donner aduis à vostre Maiesté de ce qui se passe en ces quartiers. Ie commenceray donc par les soldats François dont i'ay fait mention cy-dessus. Les Capitaines qui eurent charge du Seigneur Iean François Aldobrandin de faire des compagnies pour le secours de l'Archiduc Ferdinand contre le Turc, enspoillerent des soldats François qui

estoyent venus à Rome au bruit desdites lenees, au nombre de deux à trois cens en tout, en diuerses compagnies, & leur ayant auancé vn mois, les firent seruir au corps de garde, & à ce que bon leur sembla; & vn mois apres, le Seigneur Iean François me de ie ne sçay quel esprit, fit dire ausdits Capitaines qu'il ne vouloit point mener de François, & les Capitaines vouloyent contraindre les soldats François de leur rendre ce qu'ils auoient auancé: ce qui estoit iniuste. I'en parlay audit Seigneur Iean François Aldobrandin, qui me recogneut que lesdits soldats ne deuoient rien rendre, puis qu'il ne tenoit à eux qu'ils ne seruissent, & me promit qu'il tiendrait la main qu'il ne leur fust fait tort. Au demeurant, il me dit que ia dès le commencement il auoit dit ausdits Capitaines qu'ils ne prissent point de soldats François: mais lesdits Capitaines le nient tres-bien, & disent que s'il leur eust deffendu, ils se fussent bien gardez de contreuenir à son commandement: & fait contre luy sa declaration propre imprimée, par laquelle sont inuitez à ceste expedition tous bons Chrestiens & honorables soldats, sans qu'il y face distinction de nation, comme aussi a'on retenu esdites compagnies les Sauoyards & Bourguignons de la Comté, outre vn bon nombre d'Espagnols, qui s'en sont fuis avec la paye; ce que pas vn François n'a point essayé. Quant à moy, en parlant audit Seigneur Iean François, ie me contentay d'auoir obtenu que lesdits soldats François ne seroient contrainsts de rien rendre, & ne pensay pas estre de la dignité de la France, ny de la mienne particuliere, de supplier qu'il se voulust seruir desdits soldats François, puis qu'ils auoient esté receus, enrrollez, & employez. Mais m'ayant depuis quelques vns desdits soldats François porté vn memoire adressant à moy, qui leur auoit esté fait par vn de leurs Capitaines ou Sergent de bande, tendant à ce qu'on voulust se seruir d'eux; ie le remis en meilleure forme, & l'envoyay ainsi reformé à Monsieur le Cardinal Aldobrandin: lequel ayant delibéré avec ledit Seigneur Iean François, ils persisterent neantmoins à ne s'en vouloir point seruir, contre plusieurs bonnes considerations contenues au memoire dont ie vous enuoye copie, auxquelles ils deuolent auoir égard, au moins pour l'amour d'eux-mesmes, & pour le besoin qu'ils en peuvent auoir bien tost, & mesme pour ne donner à vostre Maiesté vne si iuste excuse de leur denier le secours qu'ils vous demandent pour ceste mesme guerre. Me promit au reste ledit Seigneur Cardinal, tant de sa part que de celle dudit Seigneur Iean François, que lesdits soldats François ne seroient molestez par les Capitaines pour l'argent qui leur auoit esté aduancé. Ce nonobstant vindrent se plaindre à moy deux desdits soldats François le premier iour de ce mois, qui estoit vn Vendredy au matin, qu'on leur auoit osté leurs espees, & à l'vn son collet & son pourpoint, pour l'argent qu'il leur auoit esté auancé: & pour ce que ie deuois aller à l'audience l'apres-disnee ie dressay vn memoire là dessus pour le laisser au Pape comme ie fis apres luy auoir parlé de ce fait avec quelque ressentiment; ce fut lors à ce propos que le Pape me dit ce que j'ay mis cy dessus, qu'il n'auoir rien sceu ny entendu de tout ce qui s'estoit passé pour le regard desdits soldats François: i'envoye aussi copie de ce memoire. Monseigneur le Cardinal Aldobrandin se monstra fort fasché de ceste insolence qui auoit esté faite ausdits soldats François, & en ma pres-

sence commanda qu'on allast querir l'Auditeur de camp, c'est à dire le Iuge qui doit aller en ceste expedition pour inger des causes & differens qu'il naistroient entre ceux de l'armée; lequel Auditeur me vint trouver le soir de la part dudit Seigneur Cardinal & me dit qu'il auoit commandement de faire rendre aux soldats ce qui leur auoit esté osté, & qu'on luy baillast les noms par escrit, & les choses ostées, & de fait ledit Auditeur enuoya le lendemain en mon logis les deux espees, & le collet & le pourpoint: mais iusques icy ie n'ay sceu obtenir que lesdits Capitaines donnaissent à ces soldats licence pour se retirer, lesquels patissent, pour n'auoir cependant de quoy viure, à quoy ie supplée aucunement de ce peu que j'ay.

Des deux Ambassadeurs du Roy de Perse, l'Anglois s'en alla le 30. May, luy ayant le Pape enuoyé le iour auparavant trois-cens escus outre les mille premiers, & fait dire qu'il partist. Il a dit s'en retourner tout droit vers le Roy de Perse, & n'a laissé gueres bon renom à son partement, pour auoir abandonné de ses gens à qui il deuoit, & les auoir abusez de fausses esperances, & promesses qu'ils seroient payez par vn certain Anglois qui estoit à Rome, auquel il disoit auoir laissé de l'argent pour ce faire, combien qu'il ne luy eust rien laissé. Le Persien partit le 6. Iuin, & quoy qu'il m'eust dit vouloir aller vers vostre M. on dit qu'il ira droit vers le Roy d'Espagne. Le Patriarche Biondo Maître d'hostel du Pape vint vers moy de la part de la Sainteté le deuxième de ce mois, & me dit que la Sainteté ne pouoit trouuer bon que ledit Persien allast par mer, comme d'autres luy auoient conseillé, ains vouloit qu'il allast par terre, & passa en Auignon, & me requeroit de luy vouloir expedier vn passe-port, & escrire aux Seigneurs qui commandoient es lieux où ledit Persien auoit à passer, & me monstra vn passe-port en Latin que la Sainteté luy auoit fait expedier. Je me comportay enuers ledit Patriarche comme j'auois fait enuers tous autres, ne monstrant point que ie voulusse, ou que ie ne voulusse point que ledit Persien allast vers V. M. ny que je me souuinsse que ledit Persien m'auoit dit vouloir aller. Je respondis seulement que fort volontiers j'obeyrois à la Sainteté, & ferois vn passe-port pour ledit Persien tel que ie le pouois faire, & escrirois à Monsieur de Guise, & à Monsieur de Vantadour, qui commandoient l'vn en Prouence, l'autre en Languedoc où ledit Persien auoit à passer en tenant le chemin que ledit Patriarche venoit de me dire. Et de fait, i'enuoyay le soir mesme audit Patriarche ledit passe-port, & lesdites deux lettres, de la teneur que V. M. pourra voir par les copies que l'en enuoya. Il faut que ledit Ambassadeur Persien ait esté desourné par quelques vns, comme par les Espagnols, d'aller vers vostre Maesté, luy m'ayant dit y vouloir aller. Mais i'ay tousiours tenu cela comme indifferant; & ne sçauois dire s'il y eust eu plus de bien ou de mal. Tant y a que si vostre Ma. en veut user, ils vous ont appresté en cela vne autre excuse pour n'entrer point en la ligue dont il se parle, ains en laisser faire ceux qui renuoyent ces Ambassadeurs les vns aux autres. Ledit Ambassadeur Persien m'enuoya le soir deuant qu'il partist vne lettre à vostre M. ie croy que ce soit la lettre du Roy de Perse, qu'il me dist auoir à rendre à vostre Maesté. Ledit sieur Patriarche Maître d'hostel du Pape me dit que ledit Persien auoit sceu

tant faire en la dernière audience, que sa Sainteté luy auoit fait donner autres mille escus outre les premiers; & qu'outre ces donatifs, les deux Ambassadeurs luy auoient dependu en traitement enuiron six mille escus. Quand ledit Persien fut à Pontemole, 3. de ces Persiens s'en retournerent à Rome, disans se vouloir faire Chrestiens; & de fait on a commencé à les catechiser.

En l'Eglise de S. Pierre de Rome il y a deux Chappellenies de sainte Petronille fille de S. Pierre, & tient on qu'elles soient de droit patronat des Roys de France; ce que les Chanoines & autres beneficiers de ladite Eglise tiennent à grand honneur, & fauorisent entout ce qu'ils peuvent audit droit de patronat; & estant dernièrement vacqué par mort vne desdites Chappellenies, de reuenu enuiron 30. escus, me requièrent de vouloir consentir en absence d'Ambassadeur, à la prouision que nostre S. Pere en feroit à vn fort honneste Prestre qui a seruy longuement en ladite Eglise, appelé Ioseph Dominique; ce que ie fis fort volontiers, tant pour conseruer la possession de ce droit à vostre Maiesté qu'aussi pour complaire à ce venerable Chapitre. Il y en a vn autre qui en a obtenu collation du Cardinal de Conscience Archi-prestre de S. Pierre, & pretend qu'il n'y a point de patronat, & quand il y en auroit, que i'auois besoin de mandement special de vostre Maiesté, pour consentir à ladite prouision de nostre S. Pere. Ie feray tout ce que ie pourray pour prouuer ledit droit de patronat; & si és archiues de la Couronne il s'en trouuoit quelque chose, il seroit bon d'en enuoyer vne copie bien & doucement collationnez; & cependant vne ratification du consentement que i'ay presté comme Cardinal François faisant les affaires de vostre Maiesté & Vice protecteur: i'enuoye vne copie de ladite ratification à faire.

Le iour de l'Ascension nostre saint Pere communia de sa main le Seigneur François Aldobrandin, & les principaux qui doiuent aller avec luy en ceste expedition de Hongrie ou de Croace & Stirie, & apres la Messe luy bailla l'estendart, & ledit Seigneur Iean François partit le lendemain de bon matin, tirant vers Bologne & Ferrare, & au Frioul, d'où il passera au pays de l'Archiduc Ferdinand, faisant tout son chemin par terre. Le grand Duc enuoye deux mille hommes de pied payez pour le secours dudit Archiduc Ferdinand sous vn sien Colonel, qui a commandement d'obeyr en tout & par tout audit Seigneur Iean François Aldobrandin. L'Ambassadeur de l'Empereur partit de ceste ville pour sa maison & pour la Cour de l'Empereur le cinquiesme de ce mois. Le Nonce pour France n'est point encor party, à cause d'vne defluxion en vne de ses iambes pour s'estre voulu purger auant que partir. Le Seigneur Veniero Ambassadeur extraordinaire de la Seigneurie de Venise se licentia du Pape Vendredi 8. de ce mois, & partira vn iour de ceste semaine. Aussi s'en sont allez deux Senateurs de Milan, qui auoient esté enuoyez par le Comte de Fuentes, pour le different des iurisdiccions Ecclesiastiques & seculieres, lequel on tient accordé, & dit-on aussi que le Cardinal Borromeo Archeuesque de Milan, qui s'estoit party de Milan pour ledit different, y retournera résider.

Quant à l'armée du Milanois, vostre Maiesté scaura ce que le Pape m'en



a dit ce iourd'huy par ce qui s'ensuit. Il m'a enuoyé querir ce matin, & m'a dit que ie luy auois dit dernièrement de la part de vostre Maiesté, pour excuser le tardement de la publication du Concile de Trente, & du rétablissement des Peres Iesuites, que c'estoient choses qui ne se pouuoient faire qu'en paix ferme & assurée, & que le Comte de Fuentes auoit tenu iusques icy les esprits en suspens, de façon qu'on ne s'estoit pu assurer s'il y auroit paix ou non; Que le Roy d'Espagne n'auoit encores iuré la paix de Veruins, & les François estoient si mal traittez en Espagne, que vostre Maiesté n'en pouuant plus endurer, seroit contrainte d'y ser de represailles; Que là dessus il me vouloit dire, pour l'escire à vostre Maiesté: que quant à l'armée dudit Comte de Fuentes, vostre Maiesté en pouuoit meshuy estre esclaircie, non seulement par ce que sa Sainteté vous en auoit escrit, & fait escire, mais aussi pour ce que de ladite armée vne partie s'en alloit aux Pays-bas, vne autre à l'Archiduc Ferdinand, & le reste aux galeres qui seroient conduites par le Prince Doria; & quant à la paix de Veruins il auoit aduis que le Roy d'Espagne l'auoit souscrite & iurée fort volontiers, & amiablement; & pour le regard des François qu'on pretendoit auoir esté mal traittez: il auoit aussi aduis que c'estoient certains qui auoient voulu frauder les gabelles vers Seuille, mais de ceux là, les moins coupables auoient esté deliurez & renuoyez en France, les plus coupables auoient esté conduits à Valladolid, où il leur seroit accordé pardon & deliurance, au moindre mot que vostre Maiesté ou son Ambassadeur en diroit; & ainsi il ne seroit besoin d'y ser de represailles, ny de faire autre mouvement, Que sa Sainteté auoit tres-bonne information de la bonne inclination du Roy d'Espagne à la paix & au repos de la Chrestienté, & si vostre Maiesté y correspondoit, elle esperoit de voir entre vos Maiestez, non seulement paix, mais aussi amitié perdurable, & si de son viuant il suruenoit quelque occasion de différent, il s'assuroit de l'assoupir par son entremise, sans qu'il fallust faire autre mouvement, Qu'il prioit vostre Maiesté des'en assurer, & entre autres choses empescher qu'il n'allast des François au secours des Zelandois & Holandois, ou s'il y en alloit monstrier au moins par quelque effet que ç'aura esté contre la volonté de vostre Maiesté, laquelle pouuant désormais estre en repos de tous les trois points susdits, pourroit aussi faire publier le Concile, & rétablir les Iesuites, qui estoient les deux choses que sa Sainteté desiroit le plus de vostre Maiesté, & dont il vous prioit de toute son affection: mais que n'ayant point de Nonce près vostre Maiesté, il ne scauoit si elle feroit, & desiroit que ie vous escriuisse de sa part.

I'ay noté que comme il auoit tres bien retenu les trois points susdits, aussi faisoit il fort prudemment les entreprises sur les villes de Marseille & de Mets, desquelles neantmoins ie m'assure qu'il se souuenoit aussi bien pour le moins que du reste; mais aussi luy auois ie donné occasion de les pouuoit taire, les ayant dites comme de moy-mesme, & non comme vostre Maiesté s'en plaignant, & ne nommant personne. I'ay aussi noté que le mot de represailles luy estoit entré bien auant dans l'esprit, & de ceux à qui il le peut auoir communiqué & que c'est cela principalement qui a esté cause qu'il m'a fait appeller. Au demeurant, ie luy ay répondu que ie ne manquois

de luy obeyr & de vous faire entendre fidellement tout ce qu'il venoit de dire; Que sa Saincteté se pouuoit asseurer que cōme vostre M. estoit auioird'huy le Prince le plus apte & dñr à la guerre, aüssi estoit-il le plus disposé à la paix, comme vostre Maïesté l'auoit monstré en tontes occasions, & si-gnamment en cestē dernière conclusion de paix, s'estant desarmé possible plustost qu'elle ne deuoit pour le moins plustost que ie n'eusse conseillé; Que le Roy d'Espagne ny autre ne vous passeroit iamais en courtoisie & bonne amitié comme se voyoit tous les iours en vos propres vassaux & subiets, que ceux qui auoient esté les plus capiraux ennemis de vostre Maïesté, ne laissoient de trouuer en elle la mesme courtoisie, faueur, & bonne volonté, & en receuoir les mesmes bien faits que ceux qui auoient esté constamment, & perpetuellement fidelles & obeïssans, & qui auoient plusieurs fois hazardé leurs personnes & vies pour vostre autorité & seruice; Que sa Saincteté se pourroit aüssi asseurer que vostre Maïesté la receuoir tousiours pour arbitre de tous differens qui pourroient naistre, soit avec ledit Roy d'Espagne, ou avec autre Prince: mais que iēme doutois qu'on luy auoit déguisé les matieres sur le mauuais traitement receu par les François en Espagne; car il m'auoit esté escrit à moy, qu'on les y auoit gehénez, & fait mourir, combien que pour frauder les gabelles, quand ainsi seroit, il n'y echeoit que la perte des marchandises. Quant aux François qui estoient allez au camp des Zelandois & Holandois, ie luy auois deia dit que c'estoit contre la volonté de vostre Maïesté, comme sa Saincteté pouuoit iuger d'autrui par soy mesme, de laquelle les subiets estoient allez seruir d'autres Princes contre son grē n'y auoit pas long-temps; cē qu'il m'a confessé: & ay adiousté qu'il y auoit beaucoup plus de François au camp de l'Archiduc, où mesmes estoit allé depuis peu de temps Monsieur le Prince de Ioinuille, là où de l'autre costé il ne se trouueroit qu'il y eust personne de marque, si ce n'estoit vn gentil-homme appellé la Nouë, qui auoit esté nourry & esleué par son pere parmy eux, de façon qu'il se pouuoit dire autant Holandois que François. Sur cela sa Saincteté a dit qu'il scauoit que ledit Prince estoit avec l'Archiduc, mais qu'on scauoit aüssi comme il y estoit allé. Ie luy repliquay que lors qu'il y estoit allé il estoit en la bonne grace de vostre Maïesté, & toutes ses querelles appointees, de façon qu'il n'auoit eu aucune contrainte d'y aller. Quy, mais, a dit le Pape, le Roy ne vouloit point qu'il y allast, mais l'autre luy dit qu'il y vouloit aller en toutes façons. Ie voy, tresrainct Pere, ay-ie dit, que l'on vous rapporte tousiours les choses au desaduantage du Roy, & qu'on voudroit vous faire croire que tous ceux qui vont de l'autre costé, y vont du grē de sa Maïesté, & ceux qui vont à l'Archiduc, y vont malgré luy: mais on ne scait si bien déguiser les choses qu'on ne voye la malice à trauers. Quand ainsi seroit que le Roy n'eust point voulu que ce Prince y allast, il ne faisoit en cela sinon ce que deuoit vn bon alliē & confederé, qui mettant à part le point de la religion, n'a iamais receu que secours & seruices des Estats en sa necessité, & des autres il n'en a iamais receu que déplaisir & dommage. Mais si le Roy estoit si contraire au desir de ce Prince, ne pouuoit il pas l'arrester. Et ne l'arrestant point ne pouuoit il pas luy faire saisir ses biens, & arrester les pēsions que sa Maïesté luy donne? Que si vostre Saincteté n'entend rien de tout cela, & si ceux là mesmes qui luy ont

ces rapports ne l'ont pas mesmes osé feindre, le luy en laisseray tirer la conclusion qui luy semblera conuenable. D'une chose me crois-je, que le voyage de ce Prince pourra causer vn de ces iours à vostre Sainteté nouvelle occasion de telle plainte, d'autant que son exemple pourra faire aller de l'autre costé plus de gens qu'il n'y en est allé cy deuant; car d'esperer plus d'obeyssance & de respect des heretiques que des Catholiques, il n'y a pas grande apparence. Le Pape dit à lors, que V. M. pourroit trouuer quelque remperance à cela & mesmes procurer quelque accord entre eux. Le luy ay dit que vostre Maiesté l'auoit voulu faire dès le commencement, mais que l'Archiduc ne s'en estoit point fié, ne pouuant comprendre la bonté & bonne foy de vostre Maiesté, & la mesurant au pied du commun des autres Princes; & qu'il me souuenoit qu'il estoit venu icy vn des principaux Seigneurs du Pays-bas, qui auoit recogneu à Monsieur de Sillery, & que si l'Archiduc eust suiuy le conseil de vostre Maiesté, il s'en fust mieux trouué, & seroit plus à son aise qu'il n'estoit.

Or sus, dit le Pape, il faut oublier le passé, faire mieux à l'aduenir, & ainsi s'est finy ce propos, comme fera aussi cette trop longue lettre, priant Dieu, S I R E, &c. De Rome, ce Lundy 11. Iuin, mil six cens vn.

A V R O Y.

CCLXXI.

S I R E,

Cette lettre sera toute sur l'erection de Nancy en Euesché, que Monsieur de Lorraine fait poursuiure en ceste Cour depuis l'annee mil cinq cens nonante-huict, comme i'en donnay aduis à vostre Maiesté dès lors. Par mes deux dernieres despeschés i'auois escrit à vostre M. comme ceux qui sont icy pour Monsieur de Lorraine m'auoient promis de surseoir ceste poursuite, iusques à ce que l'affaire de la dispense du mariage de Monsieur le Duc de Bar & de Madame vostre sœur fust expédié; mais i'ay découvert que nonobstant leur promesse on y trauailloit bien fort: ce que i'en parlay de nouueau au Pape le Vendredy 15. de ce mois, non par forme d'opposition encorés que i'en eusse menacé les Agens de Monsieur de Lorraine, au cas qu'ils me manquassent de parole, mais en homme qui desiroit auoir communication des papiers & escritures concernans cét affaire, pour en rendre compte à vostre M. qui m'auoit commandé d'y prendre garde, pour la protection qu'elle a des Eueschez de Mets, Toul, & Verdun, au preiudice desquels pourroit tourner l'erection qu'on demandoit de ce nouueau Euesché; & fist tant avec la Sainteté, qu'elle se cõtéra que lesdites escritures & autres

pieces me fussent communiquees. Au reste, elle me dit qu'elle ne controit en cét affaire, & qu'aussi bié l'Archeuesque de Treue s'y opposoit, & que nous aurions temps de fournir nos raisons & preuues, & que toutes choses seroient bien & meurement considerees & decidees. Le Lundy 18. au Consistoire, ie fis que la Sauuéteté commanda à Monsieur le Cardinal de Como, chef de la congregation des matieres Consistoriales, où cét affaire se traite, que lesdites escritures me fussent enuoyees, comme de fait elles me furent apportees le lendemain Mardy 19. inferrees par ordre, & reliees en vn assez gros liure de ladite année 1598. Auquel liure se trouue premierement la requeste de monsieur de Lorraine, avec le renuoy que le Pape fist à ladite Congregation à monsieur le Cardinal Mantica pour informer des qualitez de la ville de Nancy, & des causes de ceste erection, & des biens dont on vouloit dotter l'Eglise Cathedrale à eriger, & d'autres choses appartenantes à cét affaire. Le mandement de monsieur de Lorraine au sieur Poiror, pour solliciter ceste erection près nostre saint Pere. Deux lettres patentes dudit Duc, par lesquelles il consent que les Abbayes de nostre Dame de Clerlieu & de saint Martin fondees par les Ducs de Lorraine ses predecesseurs, soient supprimees & reünies au nouveau Euesché. Le consentement de monsieur le Cardinal de Lorraine à ce que lesdites deux Abbayes dont il est commendataire, & encorcs l'Abbaye seculiere de saint Gorgon, & les Prieurez de saint Dagobert & de Varengeuille, dont il est pourueu, soient appliquez à la dotation dudit nouveau Euesché. Vn consentement encore du Doyen, Chanoines, & Chapitre de ladite Abbaye de saint Gorgon au mesme fait. Autre consentement des Doyen, Chanoines, & Chapitre de saint Dieu donné, à ce que du nombre de vingt sept canonicats & prebendes de leur Eglise, il en soit démembré trois à perpetuité, & qu'elles soient vnies, appliquees & incorporees à la nouuelle Eglise Cathedrale qui s'erigera à Nancy. Deux Catalogues des benefices qui seront distraits des Dioceses de Mets & de Toul, & soubsmis & assuiettis à la nouuelle diocese de Nancy. Les consentemens prestez par les Euesques de Toul & de Mets, par le Chapitre de Toul à la destruction desdits benefices. Les faits proposez & articulez de la part dudit Seigneur Duc sur le fait de ladite erection, avec les noms & surnoms des tesmoins à examiner sur lesdits faits. Et est à noter, que toute ceste procedure se fit en l'année mil cinq cens nonante-huict à Rome pendant que le Pape estoit à Ferrare & que Monsieur de Luxembourg & moy l'auions suiuy, & nous tenions près de luy pour vostre service: toutesfois pour loing de nous que ladite procedure se face, vostre Maiesté ne leissa d'en estre aduertie.

De toutes lesdites pieces, j'en ay choisi quatre pour en enuoyer copies à vostre Maiesté, à sçauoir la requeste de Monsieur de Lorraine; les deux catalogues des benefices à distraire des Dioceses de Toul & de Mets; & les faits proposez & articulez de la part de mondit sieur de Lorraine. Sur lesquelles pieces aussi j'exposeray à vostre Maiesté en cét endroit certaines considerations qui se pourroient presenter à nostre saint Pere pour empescher ceste erection, outre ce que j'espere recevoir de delà, après que vostre Maiesté aura ordonné à ceux qui sont sur les lieux, ou plus près que ie ne suis, d'en faire & enuoyer de bons memoires.

Premierement donc en la requeste de monsieur de Lorraine, ie considere quatre choses qui sont contraires à son desir. La premiere est, qu'il demande qu'une Eglise qui n'est point, & qu'il a intention de faire bastir, soit erigee en Cathedrale; ce qui ne se doit point faire.

Secondement, il demande droit de patronat & de presentation tant pour ceste premiere fois, qu'à perpetuité, & tant pour le regard de l'Euesché, que des dignitez, canonicats, prebendes, & tous autres benefices qui seront erigés en ladite Eglise, iacoit que des biens Ecclesiastiques qu'il veut estre appliquez à ladite Eglise, plusieurs soient libres, sans aucune seruitude de droit de patronat qui luy appartienne d'ailleurs; ce qu'on ne trouue pas bon icy, comme il n'est pas aussi raisonnable.

En troisieme lieu il veut agrandir, annoblir, & autoriser la ville de Nancy, au détriment & diminution des villes & Eglises Cathedrales de Mets & de Toul, qui ne sont point en ses Estats, ains en la protection de vostre Majesté. Que si ces citez & Eueschez estoient en seldits Estats, la chose seroit plus tolerable, mais luy n'y ayant rien, il n'a point raison de demander que pour luy on degrade les citez, Eueschez, & Eglises Cathedrales de Mets & de Toul, qui sont hors de ses terres, & en autre principauté.

En quatrieme lieu, il demande que tout aussi tost que l'Euesché de Nancy sera erigé, monsieur le Cardinal son fils en soit Euesque; ce qui est conforme au desir commun que les Peres ont de procurer du bien à leurs enfans, & à la dignité, extraction & merites de mondit sieur le Cardinal, qui n'aura jamais tant de bien qu'il n'en merite d'avantage: mais cela ne s'accorde pas bien à ce que mondit sieur de Lorraine dit au premier & vingt quatrieme de ses faits, que l'Euesque de Toul pour la grandeur & frequence de la cité & de sa diocese ne peut suffire à les bien & commodément regir & gouverner, & que sion en démembre les lieux nommez en son Catalogue il pourra mieux regir & gouverner son Eglise de Toul, & le reste de sa diocese. Ce qui donnera à present à qui bien pesera ceste raison, que beaucoup moins donc pourra monsieur le Cardinal son fils, estant mesmement maladi comme il est, à bien administrer les Eglises, citez, & dioceses de trois Eueschés Strasbourg, Mets, & Nancy. Aussi ladite nomination de mondit sieur le Cardinal au nouveau Euesché, diminuë grandement de la force du consentement par luy presté au démembrer de la diocese de son Euesché de Mets, à l'union & incorporation des Abbayes & Prieurez qu'il a en sa teste au nouveau Euesché à eriger, comme ie le diray cy apres en lieu plus commode.

Quant au catalogue des benefices qu'on veut démembrer de la diocese de Toul, est à noter Premierement le grand nombre; sçavoir cinq Eglises collegiales, 17. monasteres. 6. Prieurez, & soixante & dix Parroisses & 3. Doyennetz de l'Eglise Cathedrale de Toul, outre l'Abbaye de saint Gorgon qu'on n'y a point nommee, iacoit qu'elle soit en la Diocese de Toul, pource qu'elle est exempte de la diocese de Toul, & ainsi pretendent qu'elle ne soit d'aucune diocese. En apres est à noter, que le consentement presté par Messire Christoffe de la Vallee Euesque de Toul n'est point considerable, d'autant qu'il a esté tout le meilleur temps de sa vie seruiteur domestique de Monsieur de Lorraine & de Messieurs ses enfans, & qu'il leur est

tenu & obligé de cét Euesché mesme qu'il a eu par leur moyé. Et quant à ce que par sondit consentement il s'est reserué vne petite pension de six vingts ducats par an pour luy & les successeurs sur le futur Euesché de Nancy sans aucune seureté, il se voit que c'est par contenance, & par certaine couuerture plustost que vraye indemnité des Euesques de Toul d'un si grand démembrement & perte de cinq Eglises collegiales, dix-sept monasteres, six Prieurez, & 70. paroisses, & des dismes & autres profits & émolumens, outre la iurisdiction & authorité qui en prouient à l'Euesque. Le consentement du chap. de Toul n'y peut de rien ayder, parce qu'il est fait à yeux clos, sansy rien exprimer ny specifier des susdits benefices sans qu'il conste que les Doyens en ayent eu cognoissance particuliere, comme il faudroit. Le catalogue des benefices. quel'on veut esclipsier de l'Euesché de Mets n'est pas du tout si nombreux, mais tout y est neantmoins de trop, vn monastere, 5. Prieurez, & 45. Paroisses. Et le consentement de Monsieur le Cardinal Euesque de Mets est encores moins considerable, d'autant que luy ny l'Euesque de Toul n'ont pû faire deterieure la condition de leurs Eglises & de leurs successeurs, il est fils du suppliant, & frere & oncle de ceux qui ont à succeder au Duché de Lorraine & au droit de patronat dont il s'agit, & qu'il se voit manifestement que pourueu qu'il eust bon compte pendant sa vie, il ne s'est point soucié de conseruer à l'Euesché de Mets & à ses successeurs Euesques leur entiere iurisdiction & droits, non pas mesme de leur reseruer vne petite pension, au moins par contenance comme a fait l'Euesque de Toul. Le monastere, les 5. Prieurez, & les 45. Paroisses qu'il souffre estre démembrées du diocese de Mets, il se les trouuera en l'Euesché de Nancy, comme aussi fera-t'il les 3. Abbayes & 2. Prieurez qu'il consent y estre vnies; & ainsi n'aura rien perdu quant à luy, ains toute la perte sera de l'Eglise & des Euesques de Mets ses successeurs, ausquels ne restera rien pour le Monastere, Prieurez, & Paroisses démembrées. Ainsi a-t'il desia priué, en tant qu'en luy est, l'Eglise & Euesques de Mets de la ville de Marsal la plus forte place qu'ils eussent, & des salines leur plus vtile reuenu, les donnant à Monsieur son pere sous autres pretextes & titres que de deuotion.

Ainsi autresfois a ledit Seigneur Duc de Lorraine en de l'Euesché & Comté de Verdun les Bailliages de Clermont & de Hatron-chastel; & le pauvre Euesque de Toul, qui encores aujourd'huy; & mesmes en sondit consentement, s'intitule Euesque & Comte de Toul, & Prince du sacré Empire, ie ne scay comment ny par qui a esté reduit à ce point qu'il n'a hors les murailles de Toul vn poulce de temporel pour soustenir son tiltre de Comté & de Principauté; c'est vne des choses de quoy me battent aujourd'huy les Agens de Monsieur de Lorraine, disans que vostre M.<sup>a</sup> a interest à ceste erection; n'ayant aucune protection ny autres droits hors les murailles de Toul, & toutes choses à l'environ estans à Monsieur de Lorraine. Mais quoy qu'il soit de cela, il appert de ce que dessus que le consentement de mondit sieur le Cardinal ne doit estre tenu en aucune consideration.

Quant au chapitre de l'Eglise de Mets, il n'a point consenty audit démembrement; iacoit que Monsieur le Cardinal en son consentement dise qu'il en a deliberé avec les Archidues qui y auoient interest, & a demandé & obtenu leur consentement, si est-ce qu'il n'en appert rien que son dire simple,

& comme ils n'en ont rien voulu bailler par escrit, si bien il est vray sembla-  
ble qu'ils en ayent esté recherchez, aussi pourra estre qu'ils ne l'aduoueront  
point. Outre ce que dessus, est à considerer és susdits aux catalogues des be-  
nefices, territoires, & pays qu'il veut distraire & démembrez des dioceses  
de Toul & de Mets, le grand interest qu'y ont ces deux Eueschez, & leurs  
Chapitres & dignitez, en la diminution de leur iurisdiction, & de leur autho-  
rité & droicts du sceau & de vifitation, & actes en la collation des benefi-  
ces, & en la perception des dismes, fruiçts, reuenus, profits & émolumens.

Et quand il n'y auroit autre interest que cestui-cy des Eglises Cathedrales,  
de leurs Euesques, dignitez, & Chapitres, si seroit-il œuvre tres-digne de la  
protection de vostre Maiesté que de les conseruer en leur entier, & ne souf-  
frir que de vostre temps elles fussent diminuees & estropiees tant au spirituel  
qu'au temporel, pour en creer & aggrandir des estrangers en autres Estats  
que les vostres; puis qu'il est ainsi, Sire, que le premier deuoir de la prote-  
ction que Dieu vous a donnée sur ce pays là, est deuë à Dieu, & aux per-  
sonnes & biens Ecclesiastiques qui luy sont dedieez.

Mais il plaira à vostre Maiesté considerer que cét interest & preiudice ne  
touche pas seulement les Eglises, Euesques, Chapitres & leurs dignitez, mais  
passant outre blesse grandement les communautéz & corps des villes de  
Toul & de Mets; d'autant que comme vostre Maiesté sçait trop mieux, la  
grandeur, opulence, honneur, & reputation des villes consiste vne grande  
partie à estre frequentees, & que plusieurs gens en ayans besoin, y aillent &  
viennent, & dependant & y laissent de leur argent. Or outre que tant plus  
les Euesques, Chapitres & leurs dignitez ont de reuenu, tant plus en reuient-  
il & est dépendu és citez où ils ont leur residence, & tant plus aussi d'aumô-  
nes ils peuuent & doiuent faire aux pauures de la ville.

Il y a cela encor, que tant plus sa diocese est grande, tant plus de gens  
de dehors viennent à la cité, & y dependent & laissent du leur, non seulemēt  
les Ecclesiastiques pour la tonsure, pour la collation des benefices, pour les  
Synodes, pour le Cresme dont ils ont besoin tout le long de l'année, pour les  
procès des titres des benefices, & pour autres causes ciuiles & criminelles  
dont les Euesques & leurs officiaux cognoissent entre personnes Ecclesiasti-  
ques comme ordinaires, & bien souuent encor comme deleguez de nostre  
S. Pere le Pape, qui leur adresse de ses rescrits, & les delegue iuges en di-  
uerses occasions; mais les laïcs viennent ausdites citez pour y receuoir le sa-  
crement de la Communion, pour y obtenir des dispenses que les Euesques  
peuuent donner, pour y leuer monitoires, y plaider en causes matrimoniales  
& puremēt Ecclesiastiques, pour auoir absolution des cas reservez aux Eues-  
ques, & des excommunications & autres censures Ecclesiastiques qu'ils au-  
ront encouruës, & pour telles autres choses; comme il faut aujourd'hui que  
de Nancy, mesme, dont il se parle, & du Pontamousson, & de toutes les  
villes & Bourgs du Duché de Lorraine on aille & porte de l'argent en vos  
villes de Mets, Toul, & Verdun. De sorte, Sire, qu'autant de dioceses & de  
nefforts qu'on osterà aux Euesques, Chapitres & dignitez de Toul & de Mets,  
autant osterà t'on de grandeur, honneur, richesse, & reputation à vos villes  
& communautéz de Toul & de Mets, pour en annoblir, honorer, aggran-  
dir, & enrichir la ville de Nancy, où vostre Maiesté n'est en rien recogneüe.

Et les Agens de Monsieur de Lorraine ont grand tort de dire que vostre Maieſté n'a aucun intereſt à l'erection qu'ils demandent. Ce ſont, Sire, les moyens d'oppoſition que me ſemble ſe pouuoir tirer de la requette de Monsieur de Lorraine, & des deux catalogues ou liſtes des benefices & territoires qu'on veut démembler des diocèſes de Toul & de Mets en attendant qu'on m'en fourniſſe d'autres de delà.

Au demeurant ie me remets à ce qui ſera adaiſé par delà, ſi on doit moyēner qu'il ſoit formé oppoſition à ceſte erection par le Chapitre & dignitez de l'Egliſe de Mets, & par les communautéz des villes de Toul & de Mets, & que le Chapitre & dignitez de l'Egliſe de Toul reuoquent la prœcuracion qu'ils paſſerent le 6. Mars 1568. pour conſentir au ſuſdit démembrement: car il n'y a point eu de conſentement formé par eux, ains eſt ſeulement vne prœcuracion paſſée pour conſentir icy, & poſſible n'ont ils iamais veu ledit catalogue, ny ne ſçauent de combien importe ladite prœcuracion qu'ils ont paſſée, en laquelle auſſi n'y a point vn ſeul benefice exprimé ny nommé. Ie me remets encores à ce qui ſera aduiſé de delà, s'il ſeroit à propos de faire encourager encores l'Archeueſque de Treues lequel s'oppoſe à ceſte erection, comme le Pape m'a dit. Ie n'ay point encores ſçeu ſes moyens d'oppoſition, & taſche de les apprendre; bien croy-ie qu'eſtans les Eueſchez de Mets & de Toul ſes ſuffragans, il peut dire qu'il a intereſt à ce que ſes ſuffragans ne ſoient diminuez ny amoindris. Mais s'il n'a autre cauſe d'oppoſition que celle-là, il ſera fort aiſé del'appaiſer & de le mettre hors d'interreſt, en luy ſouſmettant le nouveau Eueſché de Nancy & faiſant ſon ſuffragant, comme i'entends qu'on veut faire; de façon que ce qui ſera oſté des Eueſchez de Mets & de Toul, ledit Archeueſque le trouuera en celuy de Nancy qui luy ſera auſſi ſubiet, & par ce moyen n'aura rien perdu.

Sur tout ce que deſſus i'attendray les commandemens de vostre Maieſté, & cependant prendray garde, Dieu aydant, que rien ne ſe paſſe, & à la premiere audience que i'auray du Pape ie luy diray tout ce que deſſus, ou les principaux points, ſans pour encores former autrement par eſcrit, ce qui ſe pourra toujours faire; ains comme luy rapportant ce que i'ay trouué eſdictes eſcritures, & luy diſant ce qu'il m'en ſemble, & luy donnant en cét affaire l'impreſſion qu'il en doit auoir par la verité & iuſtice, & non autrement; comme auſſi luy proteſtay-ie dernièrement quand ie luy demanday à voir leſdites eſcritures que vostre Maieſté & ſes ſeruiteurs ne voudroient nullement empeſcher le contentement de monsieur de Lorraine, ains y ayder, mais comme vostre Maieſté denoit protection aux Eglises, Eueſchez, Chapitres & dignitez de Mets & Toul, auſſi ne pouuions nous & ne deuions manquer d'y ſeruir votre Maieſté & elles.

A tant, ie prie Dieu, &c. S I R E, &c. De Rome, ce 23. Iuin 1601.



## A V R O Y.

CCLXXII.

S I R E,

Le receus auant hier au soir 23. de ce mois la lettre qu'il pleut à vostre Ma-  
iesté m'escire le 26. May & encores vne autre du 29. Quant à la premiere,  
c'est la depesche ordinaire, & en responce de la mienne du 26. Autil. Je louë  
grandement la façon dont vostre Maiesté entend se comporter pour le re-  
gard des Indults qu'elle a fait demander à nostre saint Pere; & vostre Ma-  
iesté aura pû voir par les depeschés que i'ay faites depuis la derniere de-  
mande, que pour mon regard i'ay suiuy son intention auant qu'elle me  
l'eust escrite, en surseant ceste poursuite, & n'ayant fait instance que pour  
l'Euesché de Salusses & pour l'Abbaye de Strafarde que ie continuë en-  
cores. Aussi ne pensay-je point m'estre gueres esloigné de l'intention de  
vostre Maiesté touchant l'entreprise faite sur la ville de Meta, de laquelle ie  
n'ay iamais parlé qu'en termes generaux si non au Pape, & encores avec la  
feuille & le biais, & pour la fin & intention que i'ay escrite à vostre Ma-  
iesté. On escrit de la Cour de monsieur de Lorraine, où il y a de tres-mau-  
vais François, qu'il n'y a eu aucune entreprise à Mers, mais que ç'a esté vne  
invention vostre, pour interuertir la forme ancienne de la iurisdiction de  
cette ville, & en faire desormais à vostre mode, & que c'est chose que les  
Rois de France proieettoient long temps y a, i'en ay veu les lettres. De l'ar-  
mee du Comte de Fuentes & du delay du Roy d'Espagne à iurer la paix  
de Veruins, & du mauuais traitement fait aux François en Espagne, ie  
n'ay autre chose à en dire que ce que le Pape m'en dit, il y a auourd'huy  
quinze iours, de quoy ie rendis compte à vostre Maiesté tout à la fin de la de-  
pesche que ie luy fis ce iour là mesme qui estoit l'11. de ce mois. Je prens &  
prendray garde soigneusement à ce que l'on desseigne par delà touchant la  
succession au Roy d'Angleterre, & recognois que c'est auourd'huy quasi  
le principal affaire auquel vostre Maiesté & ses seruiteurs doiuent regarder  
& se preparer. C'est vne chose tres-assurée, quoy que le Pape, croye, que  
les Espagnols pensent pour eux, & tout ce qu'ils font en Irlande tend à ce  
but.

Quant au Pape ie n'ay point changé d'avis, & me tiens pour encores à ce  
que i'en ay escrit cy deuant touchant le Cardinal Farnese; & ay sçeu de-  
puis qu'un gentil homme Anglois appelé Artus Polo domestique de mon-  
sieur le Cardinal Farnese veut aller d'icy en vn an en Angleterre, sous cou-  
leur d'aller voir sa mere qui est encores en vie, & doit estre accompagné  
d'un autre Anglois Docteur en Theologie, & Chanoine Theologal à Vin-  
cence en l'Estat de la Seigneurie de Venise, lequel a aussi son pere en vie en  
Angleterre. C'est de ce Chanoine mesme que ie l'ay appris, lequel a grande  
confiance en moy, & m'a dit de plus qu'ils y veulent aller a decouvert, &  
faire

& faire la reuerence à la Royné, & parler à Cecile, & à d'autres Conseillers de ladite Royné; & m'a prié que quand il en sera temps ie veuille donner audit sieur Polo vñe lettre à vostre Maiesté à laquelle il desire faire la reuerence en passant. Ce que ie luy ay promis de faire pource que ladite lettre ne pourra de rien nuire, & que ceste esperance me seruira de continuer à apprendre quelque chose dudit Chanoine, comme il m'a promis de Bologne où il alloit demeurer en attendant qu'il fut temps de faire ledit voyage. Il y a long temps qu'il m'auoit dit que ledit sieur Polo estant de la parenté des Roys d'Angleterre, & doié de plusieurs vertus, seroit pour pretendre à paruenir à ladite succession, & pour estre marié à l'Arbelle, & que vostre Maiesté luy deuoit aider, & que ie serois bien de le procurer.

Ie ne luy ay iamais resieté cela, mais seulement luy ay dit plusieurs fois qu'il seroit mal-aisé de faire Roy d'Angleterre vn gentil-homme priué qui n'eust aucun moyen de soy-mesme, ny porté dans le pays; Que vostre Maiesté pourroit bien contribuer à faire Roy vn qui soit d'ailleurs fondé & appuyé dans le pays, mais de prendre tout sur soy qu'il seroit mal-aisé. Et de fait cela en partie m'a retenu que ie n'en ay iamais escrit à vostre Maiesté, ioint que ce gentil-homme Polo a vn frere en Espagne que le Roy d'Espagne entretient aux estudes. Mais sur ceste occasion ie vous escriis à present ce mot, & mesme qu'il appartient à ce pourquoy i'ay comincé ce propos, qui est que combien que ce Chanoine pense que ledit Polo aille en Angleterre pour briger pour soy, si est-ce que ie soupçonne que ne luy pouuant rien faire pour soy il briguera pour son maistre; & mesme d'autant que le Chanoine m'a dit que le maistre se contente & desire que ce voyage se face, & que le Pape l'approuuera aussi; & ainsi vostre Maiesté aura ceste coniecture de plus, outre celle que i'ay escrete cy-deuant touchant le mesme Cardinal Farnese. Quand au Seigneur Dom Alessandro Pico, vostre Maiesté aura veu par ma dernière dépesche ce que i'ay fait au nom de vostre Maiesté pour luy enuers le Pape & enuers Monsieur le Cardinal Aldobrandin, qui est iustement conforme à vostre intention: mais le Pape ne fist point de promotion aux quatre-temps derniers.

Et quant à la disposition dudit Seigneur Dom Alessandro, & du Prince son frere, vostre Maiesté verra s'il luy plaist ce qu'ils m'en ont escrit par les dernières lettres que i'ay receuës deux, dont ie vous enuoye copie. Je parleray à l'ingenieur Iean Robert Villano, & luy bailleray la lettre que vostre Maiesté luy escrit, l'accompagnant des propos qu'elle me commande luy tenir de bouche, afin que s'il n'est luy bien assuré de son baston, il ne se mette point en chemin pour aller trouuer vostre Maiesté.

C'est la responce que i'auois à faire à la dépesche de vostre Maiesté du 26. May. Quant à la lettre du 29. concernant l'Euesché du Mans, on ne despesche point à Rome les Eueschez de France sur des breuets, ains sur des lettres de nominatiõ qui s'adressent au Pape; par ainsi il n'y a point de dâger qu'on expedie ledit Euesché pour persõne qui n'aye lettre de nomination de vostre Maiesté, outre que toutes telles expeditions ont à passer par mes mains, & que ie me garderay bien de mettre la main à chose telle qui ne soit expressement commandee par vostre Maiesté, comme avec les lettres de nomination il y en a toujours d'autres pour le Protecteur & pour l'Ambassa-

SSSf

deur. Au demeurant, il y a fort peu à escrire des choses de deçà. Les soldats François, dont i'ay escrit cy-deuant, eurent enfin chacun leur cõgé par escrit le 14. de ce mois, & s'en allerent les vns çà, les autres là, apres m'estre venus remercier des plaisirs que ie leur auois faits.

Depuis enuiron quinze iours est arriué en ceste Cour vn Ambassadeur du Roy de Pologne, pour asseurer le Pape que ledit Roy de Pologne ne sera point pour le Prince Sigismond Battori contre l'Empereur en la Transsylvanie, pourueu que l'Empereur ne trouble point celuy que ledit Roy de Pologne a estably en la principauté de la Valachie. A tant, &c. Sire, &c. De Rome ce 25. de Iuin. 1601.

## A MONSIEVR DE VILLEROY.

### CCLXXIII.

**M**ONSIEVR, Auec la lettre du Roy du 26. May i'en ay receuue autre de vostre main, & de mesme date. Quand il plaira au Roy escrire au Pape touchant l'Euesché de Salusse & l'Abbaye de Strafarde, ce sera autant d'occasion à sa Sainteté d'en faire meilleure & plus briefue expedition; combien que ie ne pense qu'il s'y resolut sans le consentement de Monsieur de Sauoye, avec lequel l'Abbé de la Mante ou ses parents pourroient traiter cét affaire pour l'intrest de l'Abbaye d'Ambournay, qui seroit que ils y procederoient avec toute fidelité & affection. Quant à l'Abbaye de Strafarde, le Pape trouue bon que son Altesse en contente sa Maiesté, & cõplaise à Messieurs de la Rocheposay : mais pour le regard de l'Euesché, il voudroit le donner luy mesme, & pense-t'on que ce soit au Pere Iuenal de l'Eglise neuue Piémontois, toutefois si le Roy & Monsieur de Sauoye s'accordent de la personne de Monsieur le Docteur Pichot que sa Maiesté a cy deuant nommé, sa Sainteté ne s'en pourroit bonnement deffendre quoy qu'elle pretende que ny le Roy ny Monsieur de Sauoye, n'ont eu & n'ont droit de nommer audit Euesché. Je vous remercie bien humblement du soin qu'il vous plaist auoir de ma pension, de laquelle vous auez bien veu ce que ie vous escriuis dernièrement. Si la necessité ne me contraignoit ie n'en escrirois point, mais ie ne reçois rien de mes benefices, & quand i'en receuray, ce ne sera la moitié de ce qu'il me faut pour m'entretenir à Rome en Cardinal, de façon que ie n'ay aucun moyen d'y subsister s'il ne plaist à sa Maiesté me continuer ce bien. Et vous assure que pour ne recevoir ladite pension, toute & à temps, ie patis plus que ie n'en fais de monstre. Avec tout cela si on ne m'escriit à quoy i'auray à employer les trois cens escus destinez au sieur Marquesetto, ie les vous renuoye au mesme sac qu'ils me furent portez, d'où ils ne sont encore sortis: car m'ayans esté enuoyez pour les bailler à autrui, ma candeur ne pourroit pas mesme souffrir qu'ils entrassent seulement en payement d'une somme qui me fust bien & loyalement due, comme seroit d'argent presté.

L'ordinaire de Lyon ne vient plus que de 3. en 3. semaines, d'où vient grâ

retardement au service du Roy, & au public, & mesme aux pauvres courriers, qui ont à attendre hors de leurs maisons plus long-temps en attendant leur tour. Vne seule heure peut à telles fois importer grandement aux affaires de sa M. Pour vn seul iour plusieurs bons benefices se peuvent perdre, & plusieurs affaires encores pour les marchands, non seulement pour vne semaine. Ceux qui introduisent ceste nouveauté contre leur deuoir & contre leur promesse, vous veulent faire croire que ce sont les marchands & à tous autres, & que quand on dépesche l'ordinaire à son temps accoustumé, on ne fait tort à pas vn marchand, ny à autre personne pource qu'on ne contraint personne d'escire, & escrit seulement qui veut. Par ainsi ie vous prie de n'endurer que sous tels pretextes on abuse de vostre patience. Quant à moy, si le Roy ne me commande autrement & bien expressement, ie dépescheray d'icy l'ordinaire de 15. en 15. iours à l'accoustumee, quoy que l'on face à Lyo pendant le peu de temps que j'auray à faire ceste charge, & M. l'Anibassadeur en fera puis apres ce qui luy plaira. Si j'auois vn peu plus de temps, ie vous enuoyerois l'Arrest du conseil du Roy en faueur de M. de la Varenne, & ses belles promesses d'expedier deux fois, & les belles lettres qu'il m'escrit en m'enuoyant ledit Arrest, pleines encore d'autres promesses: mais si ie ne vous les enuoye à ceste fois, ce sera à la prochaine Dieu aidant.

Monsieur Perrin Soufdataire de nostre S. Pere le Pape m'a monsté ce iourd'huy copie de certaines lettres patentes où l'on fait parler le Roy en Pape, outre qu'elles sont contre raison & iustice, obtenues par vn Moine qui presse son nom à certaines gens qui veulent rair l'Abbaye de S. Leon de Toul audit Soufdataire. Il est vray aussi qu'il m'a monsté vne ordonnance du priué Conseil que l'impetrant sera contraint par emprisonnement de sa personne à apporter l'original desdites lettres. Ie vous prie tenir la main en tant que vous aimez les affaires du Roy, & nostre honneur & reputation, que ledit Soufdataire jouysse pleinement & paisiblement de ladite Abbaye, soit par Arrest d'une pleine maintenue, ou si pour ce qui m'a esté escrit en chiffre, on aime mieux par des lettres patentes du Roy qui mettent fin à cét affaire, & imposent silence à perpetuité audit Moine, & à tout autre. Quand vous auriez à innouer quelque chose, il ne faudroit point commencer par ledit Soufdataire. Ie m'assure que vous m'entendez assez, & sera bon que le Roy commande au gouuerneur de Toul qu'il tiene la main à bon escient que ledit Soufdataire jouysse, & que ledit commandement soit fort exprés, car j'entends qu'il en est besoin. A tant ie prie Dieu, &c. Monsieur, &c. De Rome ce 15. de Iuin, 1601.

A V R O Y.

CCLXXIV.

SIRE,

J'escris à vostre Maesté le 23. & 25. de Iuin, & respondis à ses let

SSSf 2

tres de 26. & 29. de May depuis ie n'allay point à l'audience Vendredy 29. Iuin, pource qu'en ce iour là fut la feste de saint Pierre, & que le Pape celebra sollemnellement la Messe, & fut occupé tout le long du iour, & que ie n'auois rien de pressé. Mais i'y fus le Vendredy ensuiuant sixiesme iour de ce mois, & tout aussi tost que ie fus en sa presence, auant que ie luy eusse rien dit il commença à se plaindre de nouveau de ce Huguenot qu'on a mis pour Gouverneur à Chasteau-daufin, lequel en continuant ses attentats contre la religion Catholique, a de nouveau ruiné l'autel ou les autels de l'Eglise dudit lieu, comme disoit sa Sainteté, laquelle adiousta ne se pouuoit assez esmerveiller que vostre Maiesté comportast vn cas si enorme contre ses Edicts, & contre sa promesse, contre sa reputation, & contre son profit, & qu'à l'appetit d'vn Capiraneau Heretique vostre Maiesté se chargeast de la haine de toute l'Italie, laquelle se voyoit à ses portes preparer le venin dont on la veut empoisonner & ruiner, comme tant d'autres nations, & la France mesme, en ont esté ruinees, & vostre propre aduancement & grandeur reculez, & voyoit aussi se dresser deuant ses yeux vne Geneue, & vn asile pour y receper & receler toutes les ames meschantes qui ne voudroient subir la correction de leurs superieurs, & des saints de crets, & des loix. Quand à moy, disoit il, ie ne puis souffrir d'estre si fort mesprisé, qu'en mon nez on me face vn tel escorne, & si vous me demandiez qu'est-ce que ie feray, ie vous respondrois que ie feray toutes choses auant que patir vn tel ourage.

Ie ne pûs faire mieux que de me ioindre à sa plainte, & de me plaindre encores moy mesme avec luy de ces attentats, & de louer son zele & sa iuste douleur, l'assurant cependant que ces choses se faisoient au desceu & contre l'intention de vostre Maiesté, laquelle y remedieroit en bref, de sorte que sa Sainteté en seroit entierement & pleinement consolee, & mesme i'esperois de receuoir par le premier ordinaire response aux premieres lettres que i'en auois escrites par le commandement de sa Sainteté, laquelle ie suppliy aussi de prendre garde qu'il n'y eust de l'artifice aux rapporteurs qui luy faisoient d'vn mesme mets plusieurs seruices, & en diuers temps, luy disans d'vn mesme fait ores vne circonstance, ores vne autre de quinze en quinze iours, pour faire durer & renoueller non seulement la calomnie contre vostre Maiesté, mais aussi l'affliction que sa Sainteté en prenoit; & que possible ne se plaissent ils pas moins à ceste derniere qu'à la premiere: outre que ie ne pouuois croire toutes ces choses, scachant qu'à la Rochelle, & à Montauban, & en autres telles villes, les Eglises & Autels y estoient redressez, & la messe s'y celebrait avec tout autre exercice de la Religion Catholique, Apostolique, & Romaine. Cecy le remit vn peu & commençant à parler plus doucement, me raconta que lors qu'il estoit Legat en Pologne, il escriuit vne lettre au Roy de Pologne, & la luy enuoya par son secretaire, par laquelle il le prioit de ne point donner de charges & honneurs aux heretiques, l'assurant qu'apres Dieu c'estoit le plus puissant moyen de les faire conuertir; & que le Roy, selon l'usage du pays, fit lire ceste lettre en plein Senat, & respondit en public que c'estoit contre le reglement & coustume du Royaume. Mais à quelque temps de là le Roy fit appeller ledit Secretaire, & luy parlant à part, luy dit qu'il trouuoit bon

le conseil du Legat & le vouloit obseruer en tant qu'il luy seroit possible, toutefois qu'il ne luy promettoit point, n'y voulant point engager sa parole, mais qu'il esperoit de luy en faire voir les effectz; & de fait dit sa Sainteté continuant ses propos, ce Roy en a vsé ainsi, & s'en est bien trouué, & m'en a remercié plusieurs fois: car vn grand nombre des grands se sont conuertis, & de ceux qui se sont obstinez, les enfans se sont faits, ou se font tous les iours Catholiques; & ainsi le Royaume de Pologne se remet de iour en iour, & reprend son ancienne forme, ordre, & vigueur, comme fera beaucoup plustost le Royaume de France, qui n'est pas si gaste de tant d'heresies, si le Roy en veut faire de mesme.

Iel'assuray que c'estoit l'intention aussi bien que l'interest de vostre Maiesté, & qu'elle trauailloit à la conuersion des deuoyez & par ceste voye, & d'autres, & par graces à Dieu il s'en conuertissoit en grande quantité, & des premiers d'entr'eux; & luy alleguay l'exemple frais de Monsieur de Fresne Canaye, & d'autres conuertis auparauant, & encore de ceux qui sont pour le suiure bien tost: Et ainsi ce propos commencé si rudement se termina assez doucement, & mesme que ie finis en luy disant que i'en escrirois à vostre Maiesté, comme i'auois fait par tous les ordinaires depuis que sa Sainteté m'en parla la premiere fois, l'assurant derechef que vostre Maiesté y donneroit bon ordre, & bien tost, & osteroit ce scandale des yeux de sa Sainteté, & de toute l'Italie; comme ie vous en supplie, Sire, tres-humblement, & de toute mon affection, estant chose que i'estime estre vne des meilleures que vostre Maiesté scauroit faire aujourd'huy pour son seruice, & pour le bien de ses affaires.

Après cela, ie luy dis comme vostre Maiesté par ses lettres du 29. May m'ecriuoit que Monsieur l'Euesque de Modena vous auoit escrit de Lyon comme sa Sainteté auoit fait election de l'Euesque de Camerin pour luy succeder en sa Nonciature, & vous auoit donné bonne information de ses vertus & louables qualitez, conformément à ce que ie vous en auois escrit de mon costé: dont vostre Maiesté auoit esté tres aise & auoit choisi Monsieur de Bethune, frere de Monsieur de Rosny, pour venir resider Ambassadeur près sa Sainteté au lieu de Monsieur de Sillery, dont vostre Maiesté se promettoit que sa Sainteté ne seroit moins contente qu'elle vouloit que vous fussiez dudit sieur Euesque de Camerin. Le Pape me demanda quel homme c'estoit. Ie luy respondis que i'en auois ouy dire grand bien, & premierement qu'il estoit tres-bon Catholique, & seigneur tres-vertueux, tres sage, & moderé, & au reste de fort ancienne & illustre noblesse, de presence honorable, & d'une conuersation fort douce & agreable, & que i'esperois qu'il donneroit toute satisfaction à sa Sainteté, & à Messieurs ses nepueux, & à toute ceste Cour; dequoy sa Sainteté monstra estre bien aise.

En second lieu, ie luy dis comme Monsieur de Bréues Ambassadeur de vostre Maiesté à Constantinople, auoit respondu aux lettres que ie luy auois escrites par le commandement de sa Sainteté en faueur des Chrestiens del'Isle de Chio, & qu'auant que recevoir mes lettres il auoit ia fait l'office pour eux à la Porte, & obtenu vne grande partie de ce qu'ils desiroient, & que ledit sieur de Bréues m'auoit enuoyé les lettres qu'ils luy auoiét escrites pour

SSSf 3

le prier de les secourir par son intercession; & vne copie durescrit qu'il auoit obtenu de ce seigneur Sangiaque de Chio en faueur desdits Chrestiens, & vne lettre de remerciement quel'Euesque de Chio luy auoit escrite apres auoir receu le fruit de ladite intercessiō; & ie recitay à sa Sainteté sommairement le contenu desdites lettres & copie, afin qu'elle voye comme ledit sieur de Bréues s'y est comporté selon la sainte & tres-Chrestienne intention de vostre Maiesté.

En troisieme lieu, ie luy dis comme suivant ce qu'il luy auoit plū m'ordonner, i'auois leu les escritures concernantes l'erection de Nancy en Euesché, & luy exposay sommairement ce que i'y auois obserué, conformément à ce que i'en escriuis à vostre Maiesté par ma lettre du vingt troisieme Iuin, sans rien oublier de principal; & sa Sainteté escoûta le tout fort attentiuement, monstrant ne trouuer bons plusieurs des desirs de Monsieur de Lorraine, & la facilité de ceux qui auoient consenti si promptement au desmembrement de leurs Dioceses, iurisdicions, & autres droicts; & tournant à me dire qu'il ne courroit point à l'erection comme ceux-là auoient fait au consentement, & que nous verriōs ce que nous diroit l'Archeuesque de Treues qui s'y opposoit. Surquoy ie luy dis qu'on fermeroit la bouche audit Archeuesque, en luy offrant de luy soubsmettre ce nouveau Euesché, comme luy estoient subiects Mets, Toul, & Verdun. A quoy sa Sainteté repliqua que ce n'estoit pas l'intention de Monsieur de Lorraine: ce que i'interpretay que Monsieur de Lorraine vouloit que son Euesché fust exempt de la iurisdiccion dudit Archeuesque, & de tout autre, & fust dependant immediatement du saint Siege: laquelle interpretation sa Sainteté me fit bonne, & si Monsieur de Lorraine persiste en cela, l'opposition dudit Archeuesque sera fort puissante. Cependant ie supplie vostre Maiesté de noter qu'en madite lettre du 23. Iuin, par laquelle ie rends compte à vostre Maiesté des escritures concernantes ceste erection, i'oubliai à faire mention de 6. Prieurez, lors que ie parle des benefices qu'on veut demembrer de l'Euesché de Toul; car ce sont 5. Eglises collegiales, 17. monasteres, 6. Prieureux, & 45. Parroisses, qu'on veut eclipser de l'Euesché de Mets.

La quatriesme chose dont ie luy parlay fut de l'Euesché de Salusses pour le Docteur Pichot, & de l'Abbaye de Strafarde pour l'Abbé de Rochepozay; à quoy il ne me respondit autre chose, sinon que l'Ambassadeur de Sa uoye n'auoit iamais rien respondu là dessus.

C'est ce qui se passa en l'audience ledit iour de Vendredy 6. de ce mois. Au demeurant ie n'ay à respondre à aucune lettre de vostre Maiesté, d'autant que l'ordinaire de Lyon, qui deuoit & souloit estre depesché de 15. en 15. iours, ne vient plus que de 3. en 3. semaines; ce qui est contre le bien de vos affaires & seruices, & contre la commodité publique non seulement des marchands & banquiers, mais de tous vos subiects, qui ont ordinairement affaire à Rome pour le fait des benefices, & des dispenses & autres graces, & contrel'offre & promesse que fit en vostre Conseil priué le sieur de la Varenne, de faire partir de quinze en quinze iours les courriers, lors que par le moyen dudit offre & promesse il se fit adiuger par ledit Conseil la charge qu'exerçoit & les emolumens que receuoit Orlandin de Lyon. Par ainsi ie supplie vostre Maiesté commander audit sieur de la Varenne de re-

mit sa promesse, & obeyr à l'Arrest de vostre Conseil, & ne vous arrester, Sire à vne friuole excuse que le commis dudit sieur de la Varenne met en auant, à sçauoir que les marchands de Lyon ont demandé que l'expedition desdits courriers à Rome fust mise de 3. en trois semaines : car quand ainsi seroit, il ne falloit rien innover contre vostre seruice, & contre le bien public. Mais la verité est que la commodité d'escrire souuent tourne à bien & profit des Marchands, & de tous autres, & n'y a personne qui s'en doie ou puisse plaindre, pource que quand la despesche des courriers se fait, personne n'est contrainct d'escrire, & escrit seulement qui veut. Mais la vraye cause, Sire, de ceste nouueauté, & du retardement de vostre seruice, est que le sieur de la Varenne a offert & promis au Conseil, & ledit Conseil acceptant ses offres, l'a declaré estre tenu de faire porter de 15. en 15. à ses frais & despens vos despeschés à Rome ; & il aduient quelquesfois que le port des lettres ne suffit pour payer entierement la despence que le courrier fait en venant, & lors il faut que ledit sieur de la Varenne parfasse le surplus, qui ne peut monstrier à gueres grande chose. Voyla, Sire, la vraye & seule cause pourquoy vos despeschés sont retardees, & toutes les autres excuses qu'on vous alleguera, sont des inuentions pour courir ceste espargne.

Au Consistoire que nostre sainct Pere tint Vendredy 6. de ce mois, il publia vne declaration, par laquelle il rafraischit & estend vne constitution du Pape Sixte V. par laquelle est deffendu à tous ceux qui ont des biens immeubles en l'Estat Ecclesiastique, de ne les alierer à ceux de dehors ledit Estat. Ceste declaration sera imprimee vn de ces iours, & ie l'enuoyeray à vostre Maiesté. L'occasion a esté vn testament que fit dernièrement Monsieur Vitelli Clerc de la Chambre Apostolique, par lequel il institua heritier le grand Duc de Toscane, & d'autant qu'au seruice dudit grand Duc y a vn fils naturel dudit testateur Vitelli, on a pensé que ceste institution d'heritier fut en fraude d'une constitution de Pie V. qui deffend à toutes personnes Ecclesiastiques de rien laisser à leurs bastards, & pour faire venir indirectement audit fils naturel les biens que sondit pere ne luy pouuoit laisser directement.

L'armee de Milan s'est en fin separee, vne partie en ayant esté enuoyee aux Pays-bas, comme vostre Maiesté l'a sçeu, & vne autre s'estant allé embarquer à Genes pour seruir en l'armee de mer qu'on va dressant. Le seigneur Carlo Doria partit n'agueres de Genes, tirant à Naples avec vn nombre de galeres, & le Prince Doria son pere avec vn plus grand nombre partit aussi de Genes pour le suiure le 5. iour de ce mois, & sont à present à Naples, où l'on attend encore quelques galeres d'Espagne. Le grand Duc y enuoye encores quatre des siennes, le Pape cinq, & la Religion de Malte autres cinq, & fait on compte qu'il y pourra auoir 70. galeres en tout. Le Duc de Parme est de la partie, comme le Duc de Mantouë de celle de l'Archiduc Ferdinand ; & s'est ledit Duc de Parme embarqué és galeres qui sont parties avec le Prince Doria, & doit commander aux forces quand elles auront pris terre, tout ainsi que ledit Prince Doria commande sur mer comme general des galeres du lieu où ils vont. I'en ay cy-deuant escrit diuerfes coniectures à vostre Maiesté ; tant y a que personne ne doute que ce ne soit contre le Turc.



190  
Vostre Maieſté aura eſté aduertie d'Eſpagne, comme le Roy auoit fait inuentorier toute l'argenterie d'Eſpagne, tant des Eglises que des maisons particulieres: maintenant i'entends icy que ledit Roy sous pretexte de ses expéditions contre le Turc & contre les heretiques, a obtenu du Pape la moitié de l'argenterie de toutes les Eglises, & de toutes les personnes Ecclesiastiques d'Eſpagne. Je ne le vous donne point encores pour chose du tout certaine; bien est vray qu'au mois de Feurier dernier, sa Saincteté conceda audit Roy d'Eſpagne de prendre trois millions par chacun an sur les huiles & vins des Ecclesiastiques, qui sont dix-huit millions en six ans, outre plusieurs autres grandes charges que lesdits Ecclesiastiques d'Eſpagne sont contraints de porter. Ceste charge de trois millions par an, & pour six ans, commença au temps de Gregoire XIV. mais le Pape d'apresent auoit refusé de la continuer, iusques au susdit mois de Feurier qu'il la conceda pour autres six ans.

Je parlay aussi à sa Saincteté pour l'Abbé de saint Anthoine de Vienne, à ce que la collation d'une commanderie de son ordre vacquee au Diocèse de Milan luy fust conseruee, contre certains qui la vouloient impetret d'elle: & pour sœur Christofle Vachereau Religieuse professe de l'ordre de saint Benoit, à ce qu'elle fust transferee de cet ordre à celui de S. Augustin, pour pouuoir tenir le Prieuré des Filles-Dieu que V. M. luy a donné au Mans, à quoy me fut faite bonne responce. A la fin de ma lettre du 25. i'escriuis à V. M. que les deux Ambassadeurs de Venise, tant l'ordinaire que l'extraordinaire, auoient esté faits Cheualiers par le Pape; depuis i'ay entendu que sur ce que le sieur Giouan Mocenigo Ambassadeur ordinaire estoit desia fait Cheualier par V. M. quelques contemplatifs ont dit que c'estoit chose sans exemple, & que possible le Pape l'auoit fait pour estimer nulle la Cheualerie par vous donnee, si qu'auoit esté auant l'abolition de V. M. mais ce sont vaines pensees; car quand il fut dit au sieur Mocenigo que le Pape le vouloit faire Cheualier, il dit qu'il estoit ia Cheualier de la main du Roy de France, & ayant esté delibéré sur ce, il fut trouué que lors que la Seigneurie de Venise enuoya quatre Ambassadeurs pour prester l'obedience au Pape Sixte V. sa Saincteté les fit tous quatre Cheualiers, iagoit que le Roy Henry III. eust ia fait Cheualier, à Venise mesmement, le sieur Forſcarini, en la maison duquel sa Maieſté logea à son retour de Pologne, & que la Cheualerie du Pape est compatible avec celle de tous Princes Chrestiens qui n'ont point de competence avec sa Saincteté. Et que le Pape n'ait point voulu preiudicier à cela, il appert par le brief qu'il a fait expedier au sieur Mocenigo, auquel il fait honorable mention de la Cheualerie par vous donnee.

Le Duc de Sesse Ambassadeur du Roy d'Eſpagne me vint voir leudy 5. iour de ce mois, & me laissa vn memoire pour vn priuilege qu'on desire que V. M. octroye pour vn certain œuure que deux Iesuites veulent faire Imprimer, & me laissa vne copie Imprimee de semblable priuilege que le Pape luy a icy concedee. Ledit Ambassadeur me requiert fort affectueusement de m'employer enuers V. M. pour ledit priuilege, & i'estime que ce sera chose digne de vostre generosité & bonté de leur faire expedier, & ie vous en supplie en toute humilité & de toute mon affection.

Le

Le Pere general de l'ordre de S. Dominique Espagnol, qui fut esleu la veille de la Pentecoste, escrivit à V. M. vne lettre qui sera avec la presente. Il vent faire son vicaire & visiteur en France le Pere Michaëlis Prieur du couuent de Tolose, & Religieux de grande & bonne reputation, & desire qu'il plaise à V. M. tenir la main que ledit Michaëlis soit obey en ce qu'il ordonnera pour la discipline monastique, & pour le bien de tout l'ordre; en quoy V. M. fera aussi chose digne du nom de Roy tres Chrestien qu'elle porte.

Il m'a esté dit ce matin d'assez bon lieu comme i'entrois au Consistoire, que les galeres parties de Genes pour Naples auoient rebroussé chemin vers Espagne. Je ne l'ay point creu; mais ie ne laisse de penser qu'on pourroit auoir vû de ce stratageme pour mieux dissimuler leur entreprise, & prendre plus à despourueu ceux où l'on va, comme pourroit estre l'Irlande, ou l'Angleterre mesme, & que les forces qui sont allees par terre aux Pays bas & celles cy de mer fussent ordonnees à mesme fin; mais tout cecy ne sont que des pensees sans autre fondement. Tant y a qu'on à tousiours dit qu'on attendoit d'autres galeres, & d'autres forces d'Espagne; & pourroit estre au contraire qu'en Espagne on attendoit celles cy. Et puis il s'entendit soudainement que le Duc de Parme, duquel ne s'estoit nullement parlé, s'estoit embarqué, & le Cardinal Farnese est party d'icy soudainement; & a t'on mesme dit que le Pape ne trouuoit bon eet embarquement du Duc de Parme, qui pourroit estre pour mieux feindre & courir leur dessein. On a aussi fait ce matin au Consistoire vn Archeuesque pour Armacans en Irlande, dequoy n'estoit pas grand besoin, si ce n'estoit pour quelque dessein. Le pourueu est Irlandois de Waterford, & s'appelle Pierre Lombard, cy-deuant Preuost & Chanoine en l'Eglise de Cambray. A tant ie prie Dieu, &c. SIR E, &c. De Rome ce Lundy 9. Iuillet 1601.

---

### A MONSIEVR DE VILLEROY.

CCLXXV.

**M**ONSIEVR, Je vous enuoye la copie de l'Arrest obtenu par Monsieur de la Varenne contre le sieur Orlandin, dont ie vous fis mention en mes dernieres lettres, & encores que ie ne doute point que vous ne l'ayez veu, si est ce que ie ne laisse de le vous enuoyer pour vous en rafraischir la memoire. Aussi vous enuoyay- ie deux extraicts de deux lettres que ledit sieur de la Varenne escriuit apres cet Arrest, l'une à Monsieur de Sillery, l'autre à moy, où vous verrez qu'il promettoit ce qu'il ne tient pas. Son commis a trouué vne cauillation prise de ces mots, A LA COMMODITE' DE CELLES DES MARCHANDS, qui se lisent en l'Arrest; mais il y a bonne response. Premièrement, i'estime qu'il faut lire en l'Arrest, ET, au lieu de, A, ainsi, ET POUR GATTEFFCT ET LA COMMODITE' DE CELLES DES MARCHANDS. Secondement, encore qu'on lise, A, pour, ET, il se voit par ce qui precede & par ce qui suit que les courriers doiuent estre despescchez de 15. en 15. iours, & cela demeurant, on peut au reste, & doit on aussi s'accommoder pour l'heure du parlement à la commodité des marchands. Il y a vingt-quatre heures en vn iour naturel: on peut faire partir le courrier

TTT

au soir du iour destiné pour son parlement, ou à 2. 4. 6. 8. 10. heures de nuit, voire & le faire attendre iusques au matin du lendemain, si la commodité des marchands le requiert. Quelques fois encores pourroit-on, comme au temps des foires & payemens, anticiper & retarder d'un iour en faueur des marchands; combien qu'en telles occasions on a accoustumé de se pourvoir par aduantage qu'on donne aux courriers ordinaires, ou en despeschant quelque extraordinaire pour ne causer desordre à l'aduenir: mais de mettre en auant que de 15. iours qui sont prescripts en l'arrest par deux fois, on doie faire 3. semaines, c'est vne glose qui gaste le texte, & ensemble porte preiudice au seruice du Roy, & au bien public, pour espargner quelque peu d'argent à son maistre. Mais c'est trop parlé de cela.

Le Capuchin de Grenoble partit de ceste ville il y a enuiron 3. semaines, tirant vers Paris, avec vne obediencie de M. le Card. sainte Seuerine, car les superieurs de l'ordre ne luy en voulurent point donner. Il est allé là où ie desirois, mais ils vouloient le tenir en Italie hors de Rome, & faisoient toutes fois bien pour son regard, & pour celuy de leur ordre. On m'a bien dit depuis qu'il est party, & entr'autres choses qu'il s'est plaint à plusieurs Cardinaux que ie luy auois hasté toutes ses affaires. Que sans moy il fust venu à bout de tout, Que ie n'entendois rien à traicter affaire; Qu'aussi bien le Roy m'auoit abandonné, & ne se seruoit plus de moy qu'en chose de peu, & que c'estoit luy qui auoit le secret des choses d'importance. De tout cela ie ne me soucie nullement: mais ne luy pardonne point ce qu'il a dit à plusieurs du contenu de la pretendue lettre ou escriture de la main du Roy.

On dit icy que Madame sœur du Roy s'en va voir sa Maiesté en compagnie de Monsieur de Lorraine; si vous la pouriez conuertir à ceste fois, & bien-tost, outre le bon œuvre que vous feriez pour l'honneur de Dieu, & pour le bien la Religion Catholique, & pour la loüange & reputation du Roy, & confusion de ses detracteurs, vous auriez incontinant la dispense sans qu'on la vous presentast icy pour rien; & au lieu de ceste dispense vous pourriez demander & obtenir, apres la publication du Concile, l'Indult pour nouuer aux Eueschés de Mets, Toul, & Verdun; autrement on pensera vous auoir surpayez en vous accordant ladite dispense apres ladite publication. Je vous recommande de toute mon affection l'expedition du priuilege que demande l'Ambassadeur d'Espagne, dont j'escriis au Roy & luy en enuoye le memoire, & la copie de semblable priuilege que le Pape a donné, car comme en guerre & en brigues nous leur deuons faire du pis; aussi en matiere de generosité & courtoisie nous deuons estre bien aises qu'ils nous recherchent, & leur monstrent que nous auons le cœur bon & amiable, & prompt à faire plaisir. Aussi vous priay ie d'un petit mot de responce à la lettre que le Pere General de l'ordre de S. Dominique escrit au Roy. Atant &c. Monsieur, &c. De Rome ce 9. de Iuillet, 1601.

---

A MONSIEVR DE VILLEROY.

CCLXXVI.

**M**ONSIEVR, Ma dernière despesche au Roy & à vous fut du neuuiesme de ce mois, depuis laquelle ie receus l'vniesme de ce mois la

vostre du vingt-deuxiesme Iuin, & le Vendredy ensuiuant, qui fut le treiziemesme ie fus à l'audience, où dès le commencement ie dis au Pape ce qu'il vous auoit plû m'escrire touchant le changement qu'on pretend auoir esté fait au Chasteau Dauphin à l'exercice de la religion, depuis que ceste place a esté renduë au Roy. A quoy sa Sainteté me respondit que ce qu'il m'en auoit dit cy-deuant estoit trop verifié, & qu'il apprenoit tous les iours de nouueaux maux qu'on y faisoit; Que des gens qui dependoient de Monsieur de Sauoye auoient esté voir sur les lieux comme les choses s'y passoient, & en auoient fait vne relation, de laquelle il auoit commandé qu'on me donnast copie, & que ie verrois que les choses y alloient en empirant, comme il n'en falloit pas attendre autre chose si le Roy n'y remedioit bien-tost, & qu'il estoit besoin que sa Maiesté le fist au plustost, Qu'il ne suffisoit de dire que sa Maiesté feroit reparer ce mal, qu'il falloit accourir promptement à esteindre ce feu reellement & de fait; Que pour le regard de la publication du Concile, & du retablissement des Peres Iesuites, il y auoit long temps qu'on luy donnoit de belles paroles sans venir au fait, qu'il craignoit qu'on en fist autant en cecy. Quant à ce que le Roy desiroit qu'il ne s'esmeust des aduis qui sortiroient de Sauoye, sa Sainteté ne croyoit point de leger, & scauoit discerner entre personnes & personnes, & entre choses & choses: & au reste dequoy ne s'esmouuera-t'il s'il ne s'esmouuoit de telles choses, où il y va de l'honneur & service de Dieu, de la religion Catholique, du salut des ames, de l'autorité du saint Siege, & de la conseruation de toute l'Italie: ie luy repliquay doucement, l'assurant que le Roy donneroit ordre & satisferoit en temps & lieu à toutes autres choses dont il auoit cy-deuant donné intention à sa Sainteté, & luy ramentus les empeschemens que sa Maiesté auoit eut cy deuant, & que la paix venoit seulement d'estre faite. Et quant à ce fait particulier, sa Maiesté venoit d'en estre aduertie, & ne scauoit encores cōme les choses s'y passoient, & ne pouoit auoir mieux respondu en sorte du monde, qu'en disant qu'il scauroit: & que le desordre estant tel il le feroit reparer incontinent. C'est le sommaire de ce que ie luy ay repliqué: & à ce propos ie vous dis à vous, Monsieur, que nous n'aurons iamais paix avec le Pape, ny ne ferons nos affaires en ceste Cour, & l'Italie n'aura aucune bonne affection enuers nous, ny bonne opinion de nous, que premierement nous n'ayons osté ce scandale de deuant leurs yeux. Et pour mon regard, quand bien par les Edicts de pacification il seroit permis de faire la presche à la Huguenotte en ce lieu là, ce que ie ne croy point, ie serois neantmoins d'aduis qu'on l'y fist cesser, & que plustost on contentast les heretiques de quelques autres lieux ailleurs delà les monts.

Mais pour retourner à l'audience, apres que ce premier point fut acheué, ie dis au Pape ce que vous m'écriuiez de la rigueur de Monsieur de Sauoye contre les personnes & biens de ceux qu'il estime auoir eu quelque inclination au seruice du Roy, & du gouvernement de Sauoye donné au sieur d'Albigny François renegat. A quoy le Pape respondit qu'il n'auoit point trouué bonne ceste election de Gouverneur, & auoit de luy mesme fait faire office enuers Monsieur de Sauoye touchant ledit Albigny: mais pour ce qu'il estoit ia déclaré Gouverneur, il ne s'y estoit pu faire autre chose, & qu'il s'esmerilloit de ce que le Duc de Sauoye se fioit de cét

homme là. Aussi dis-je au Pape l'aduis que le Roy auoit eu de la paix iurée par le Roy d'Espagne, comme la nouuelle en estoit arriuee bien à propos en tēps que sa Maiesté deliberoit avec vn bon nombre de ses officiers & seruiteurs, qu'il auoit fait assembler à ceste fin, comment il pourroit deliurer ses subiects des oppressions qu'on leur faisoit en Espagne: & adioustay comme sa Maiesté auoit esté asseuree par mesme moyen des bons offices que l'Archeuesque Sipontino Nonce de sa Sainteté près le Roy d'Espagne auoit faits, tant enuers le Roy, qu'enuers les seigneurs de son Cōseil, pour faire iurer ladite paix, & deliurer les marchands François: dont sa Maiesté m'auoit commandé remercier sa Sainteté, à la bonté, prudence, & commandement de laquelle estoient deus les bons offices faits par son Nonce. Le Pape mōstra estre fort aise de ce que son Nonce auoit fait, & dutesmoignage & contentement que le Roy en auoit receu, & dit qu'il auoit encores fait d'autres offices que nous ne scauons point, & continueroit tant qu'il viuroit à faire tout ce qu'il pourroit pour entretenir ces deux Couronnes en bonne paix & intelligence, & esperoit qu'il y auroit entre les deux Roys non seulement bonne paix, mais encore bonne amitié, & pource, dit-il, ie desire que le Roy ne trouue point mauuais si quelquefois ie m'interpose és choses qui me sembleront pouuoir apporter quelque preiudice à ceste bonne amitié que ie desire estre entr'eux, comme est ceste-cy des Archiducs qui sont vne mesme chose avec le Roy d'Espagne, & neantmoins les François vont contr'eux pour les Holandois & Zelandois rebelles à Dieu & à leurs Princes tellement que la meilleure cauallerie & infanterie qu'ayent lesdits rebelles est des François; & toutesfois le Roy a experimenté en soy mesme combien il fasche à vn Prince quand on donne secours à ses subiects qui luy font la guerre. A cecy ie fis les mesmes responses que i'auois faictes cy deuant en autre occasion, & luy alleguay de nouveau ses propres soldats qui estoient allez contre son gré à la solde d'autres Princes. A quoy il me repliqua qu'il auoit fait demonstration du desplaisir qu'il en auoit; & qu'ainsi en deuroit faire le Roy. Le luy dis que s'il faisoit demonstration contre ceux-cy, qu'il faudroit qu'il en fist aussi contre les autres François qui sont au service & au camp des Archiducs, où il y auoit mesme deux Princes nés en France, & qui y auoient tout leur bien. Monsieur le Cardinal Aldobrandin, à fin que ie mette ensemble tout ce qui appartient à vn mesme fait, alla plus auant quand ie luy parlay de cecy, disant que le Roy ne deuoit pas mesme souffrir que les Zelandois & Holandois eussent vn Agent près sa Maiesté, attendu que c'estoit vne chose manifeste qu'ils estoient rebelles, & que ce n'estoit point vn corps & Potentat legitime; Que pendant la guerre de Sauoye cela s'estoit peu dissimuler, à cause que le Roy d'Espagne fauorisoit & secouroit le Duc de Sauoye: mais à present il luy sembloit que cela ne deuroit plus auoir lieu. A cela ie respondis, que pour le regard du secours, le Roy n'en auoit point enuoyé ausdits Zelandois & Holandois, & ne leur en enuoyeroit point; Qu'il ne les requeroit point aussi de tenir vn Agent près de luy: mais s'ils luy enuoyoient & tenoient quelqu'un près sa Maiesté, ce seroit chose trop dure de leur refuser, attendu ce qui s'est passé entr'eux auant la paix faicte par sa Maiesté avec le Roy d'Espagne & avec les Archiducs, & personne ne deuroit trouuer mauuais ceste souffrance de sa

Maieſté, & meſme d'autant que i'eſtimois que leur homme ne tenoit point de rang parmy les Ambaſſadeurs & miniſtres des Princes & Potentats légitimes; Qu'en matiere d'Ambaſſadeurs, Agens, & d'autres enuoyez, on ne regardoit point de ſi près, & qu'on en receuoit de toutes parts, & en ſouffroit-on de toutes ſortes. Premièrement, quant à la diuerſité de religion, le Pape venoit de recevoir, carreſſer, & traiter les Ambaſſadeurs du Roy de Perſe, encores que ce Roy fuſt vn Prince infidelle, & qu'on ne fuſt gueres aſſeuré ſi ceux cy eſtoient vrayſ Ambaſſadeurs; Que le feu Roy d'Eſpagne auoit tenu pluſieurs annees de ſes Ambaſſadeurs près la Royne d'Angleterre, & de ceux de ladite Royne près de ſoy; & ſeroit choſe trop longue d'alleguer tant d'autres exemples qu'il y en auoit aujourd'huy. Et quant à eſtre légitime ou non le Potentat qui enuoye l'Ambaſſadeur ou Agent, les Princes n'auoient point accouſtumé d'y regarder quand ils voyoient vne puiffance conſiderable, ains ſans autrement s'enquerir du titre; comme l'on feroit en cas d'achapt ou d'eſchange, s'arreſtoient à la puiffance & poſſeſſion preſente; Que chacun ſçauoit en quelle conſideration ſont les Suiſſes, & que nul Prince ne fera difficulté de recevoir de leurs Ambaſſadeurs, ny de leur en enuoyer des ſiens, & toutesſois ils eſtoient reuoltez de la maiſon d'Autriche, auſſi bien que les Holandois & Zelandois, & n'y auoit autre différence, ſinon que ceux cy le ſont depuis moins de temps, & en ſont encores pourſuiuis, & les Suiſſes le ſont depuis vn plus long temps, & ſont laiſſez en paix. Que s'il falloit iuger du titre de chacun Prince auant que recevoir les perſonnes par luy enuoyees, il y en auroit beaucoup de qui les Ambaſſadeurs ſeroient renuoyez: mais on n'auoit point accouſtumé d'y regarder, non pas meſmes entre ennemis qui s'en entr'enuoyent ſouuent les vns aux autres. C'eſt ce qui ſe paſſa pour ce regard avec Monsieur le Cardinal Aldobrandin. Au demeurant de ce qu'il vous auoit phû m'eſcrite touchant le medecin Marſeillois qui auoit porté des lettres au Roy de ſa part du Turc & d'Ebain Baſſa, i'en dis au Pape ce que i'eſtimay luy denoir eſtre agreable, qui eſtoit quaſi tout, & ne m'y trompay point; car ſa Sainteté y priſt plaifir, & en ſceut bon gré au Roy. Je n'oubliai auſſi de dire à ſa Sainteté ce que vous m'eſcriuiez du voyage que Madame ſœur du Roy alloit faire vers ſa Maieſté, & de la diſpenſe du mariage entre elle & Monsieur le Duc de Bar, luy en faiſant nouuelle inſtance; à laquelle ſa Sainteté reſpondit que le Roy feroit vne œuvre tres-digne de Roy tres-Chreſtien de moyenner la conuerſion de madite Dame, comme ie luy diſois que ſa Maieſté vouloit faire, & que outre infinis autres biens qui prouiendroient de ſa reduction, c'eſtoit le moyen d'auoir la diſpenſe dont ſa Maieſté le requeroit; car tout auſſi toſt que madite Dame auroit déclaré vouloir eſtre Catholique il enuoyeroit ladite diſpenſe. Je ne vous parleray point des graces que ie luy demanday pour des particuliers, mais vous diray ſeulement que outre les choſes precedentes, i'eſtimay deuoir dire à Monsieur le Cardinal Aldobrandin, comme de moy-meſme, ce que vous m'auiez eſcrit du Nonce qui eſt à Veniſe. Je luy dis doncques que de tout temps les Ambaſſadeurs qui ſe trouuoient en la Cour d'un Prince lors qu'il y arriuoit vn nouveau Ambaſſadeur, auoient accouſtumé de viſiter le nouveau venu auant qu'eſtre viſitez de luy, & que les Papes auoient toujours trouué bon que leurs Nonces

en vlassent de mesme , & auoit tousiours esté obserué ainsi , mesmement à Venise, Que i'entendois neantmoins que l'Ambassadeur d'Espagne arriué à Venise depuis l'Euesque de Malfetta Nonce de sa Sainteté n'auoit point esté visité par ledit sieur Nonce , dont ledit Ambassadeur se ressentoit fort, resolu de n'aller point visiter ledit sieur Nonce , si ledit Nonce suivant la coustume ne l'auoit premierement visité ; Que ce different me desplaist d'autant plus , que ie scauois que le Roy d'icy à peu de temps enuoyeroit à Venise vn nouveau Ambassadeur , lequel trouuant l'Ambassadeur d'Espagne ainsi aheurté, & soustenu par la coustume ancienne , seroit contraint de faire de mesme pour garder au Roy son rang & ordre , & ne le mettre au dessous du Roy d'Espagne, au lieu qu'il le precede en Rome mesme; Que ses controuer ses ne pouuoient apporter rien de bon & quand elles ne causeroient autre mal , elles seroient pour empescher que le Nonce ne pourroit iamais communiquer avec les Ambassadeurs de ces deux Roys , ny eux avec luy, iacoit que le bien de la Chrestienté & le seruice de leurs Maiestez le requist, comme bien souuent il s'en pouoit presenter non seulement occasion, mais aussi besoin & necessité; Que ie n'auois point charge de luy dire cecy , ains ie luy disois de moy-mesme comme creature du Pape , & seruiteur de sa Sainteté & le sien, pour zele que i'auois au seruice du saint Siege , & au bien commun de la Chrestienté ; Que ie n'auois rien dit au Pape , ny n'en voulois point parler à Monsieur le Cardinal S. George , ains l'auois voulu proposer à luy seul à fin qu'il en considerast l'importance , & y fist ce qu'il iugeroit estre à propos par sa prudence. Il m'en remercia , & me dist qu'il y penseroit , & qu'il se souuenoit d'auoir entendu autresfois que le Nonce de Venise auoit certaines pretentions dont il se rafraischiroit la memoire. Ie luy repliquay que le Nonce de Venise n'auoit point d'autre pretention, sinon que lors que l'Euesque d'Amelia estoit Nonce à Venise, Monsieur de Maiffe, qui y auoit esté plusieurs annees Ambassadeur pour le Roy , fist vn voyage en France, & estant retourné à Venise bien tost apres , & le Roy estant ia absous par le Pape , s'attendoit que ledit sieur Euesque d'Amelia l'allast visiter le premier comme Ambassadeur nouvellement venu , & ledit sieur Euesque Nonce pretendit que Monsieur de Maiffe n'estoit point nouveau Ambassadeur , ains vieux Ambassadeur retourné d'un voyage à sa premiere charge & residence. Monsieur le Cardinal Aldobrandin me recogneur que ce fait estoit vray , & me dist qu'il scauroit s'il y auroit encore quelque autre chose. Possible en aura-t'il escrit au Nonce de Venise, & & i'attendray à le mettre en ce propos iusques à ce qu'il soit passé autant de temps comme il en faut pour auoir la response de Venise. I'ay estimé en denoir vser ainsi , & m'en laisser entendre audit Seigneur Cardinal Aldobrandin seul, encores que le Roy ny vous ne m'en eussiez rien commandé, & vous rendray comte de ce que m'aura dit mondit seigneur le Cardinal cy apres. A tant vous ay-ie escrit ce qui se passa en l'audience dudit iour Vendredy 17. de ce mois , & qui vous seruira aussi de response aux points de vostre dite depesche du 22. Iuin, desquels il est fait mention. Et pour acheuer de respondre aux autres qui en auront besoin , ie vous diray que pour le regard des Ambassadeurs du Roy de Perse, il vous sera aduenu ce que vous desiriez, s'en estant le Person allé tout droit en Espagne sans aller

au Roy, comme vous aurez vû par ma dépesche, du 11. Iuin, & depuis entendu de ceux qui sont au chemin qu'il aura tenu. Aussi aurez vous par mesme moyen receu le bref du Iubilé pour Paris, que ie vous enuoyay avec la dite dépesche, & sçeu l'expedient que le Pape auoit pris en l'affaire de Monsieur Benoist sur l'enuoy du nouveau Nonce par delà. Mais il court vn bruit par deçà de certain sermon que ledit sieur Benoist fit à Orleans en la presence du Roy, qui nous aura reculez aussi loing que nous fusmes iamais. Le Pape ne m'en a point parlé, comme aussi n'est il point venu à propos; mais il est mal-aisé à croire qu'on se soit passé de le rapporter à sa Sainteté. Ledit sieur Benoist a depuis raccoustré & fait imprimer ledit sermon, mais avec tout cela il n'est pas encores pour plaire icy.

Vous aurez vû par mes precedentes dépesches, & par des copies que ie vous ay enuoyees des lettres du Prince de la Mirandola & du seigneur Dom Alexandre son frere, la profession qu'ils font d'estre, & se vouloient conferuer à iamais seruiteurs du Roy, laquelle ils m'ont fait faire, encores plus expresse de viue voix par vn leur gentil-homme appellé le sieur Ottauio Mansini Lucquois, & croy qu'ils n'auront manqué d'escrire directement à sa Maiesté. Si l'Ambassadeur du Roy qui viendra à Rome eust fait le chemin de Lombardie, il ne se fust gueres destourné de passer à la Mirandola: mais puis qu'il a à venir par mer, il n'y scauroit passer. Ladite ville de la Mirandola est beaucoup plus près de Venise qu'elle n'est de Rome, & du temps que nous en auions plus de soin qu'à present, elle estoit sous la cure de l'Ambassadeur de Venise, & le payeur de la garnison que nos Roys y tenoient habitoit à Venise, d'où Monsieur de Fresnes Canaye, apres qu'il y sera estably, pourra faire commodément vn voyage à la Mirandola, & en arriuant à Venise escrire audit Prince comme il en a commandement du Roy. Tel chemin pourroit-il faire en venant qu'il y pourroit passer auant qu'arriuer à Venise sans beaucoup se destourner, soit qu'il vienne droit à Thurin, ou qu'il arriue à Genes par mer. Et à propos des Ambassadeurs d'Italie, il seroit bon que celuy qui a à venir à Rome y eust vn palais arresté & meublé deuant qu'il arriuaist, & mesmement deuant venir comme l'on dit, avec sa femme & toute sa famille, autrement son arriuee se passera avec peu de reputation. De l'Angleterre ie n'ay rien appris depuis mes dernieres, & prendray garde à ce qui s'y fera en temps que ie pourray. Je n'ay point receu la lettre par laquelle vous dites m'auoir escrit les raisons pourquoy on auoit prolégé l'expedition des ordinaires de quinze en trois semaines, & ne me puis departir de ce que ie vous en ay escrit desia par trois fois, vous priant qu'ils soient dépeschez de quinze en quinze iours à Lyon aussi bien comme ils sont à Rome. A la fin de ma derniere dépesche du neufiesme de ce mois, i'adioustay vn postcrit, par lequel ie vous auisois comme il auoit esté dit que les galeres parties de Genes vers Naples auoient rebroussé chemin vers Espagne, mais cela ne s'est trouué vray; aussi escriuis-je en madite apostille que ie ne l'auois point creu, toutesfois que ie n'auois laissé de penser que ce pourroit auoir esté vn stratagemme pour mieux celer leur entreprise. Et de fait ils en eussent trompé beaucoup, si ayans embarqué leurs gens sur des galeres qui ne sont point bonnes pour la mer Oceane, il les eussent portez iusques au destroit de Gibral-



tar, & là changé des vaisseaux en gros gallions de Portugal, & aux autres vaisseaux de guerre qu'ils y ont pour l'Océan en grand nombre. Si ceux qui seruent bien les Princes n'escriuoient en telles matieres que choses certaines, iamais leurs ministres ne seroient aduertis des occurrences à temps. Maintenant donc i'entends que les galeres parties de Genes continuerent leur chemin vers Naples, & y sont arriuees, & que celles qu'on attendoit d'Espagne estoient arriuees à Genes, & deuoient suivre les autres bien pres, & venir à Naples, où aussi estoit arriué Dom Pietro de Toletto avec celles qu'il auoit menees en Levant il y a enuiron trois mois, d'où il n'a point apporté proye de grande consideration. On a arresté à Naples quelques vaisseaux pour s'en seruir à apporter dix mille picques, cinq mille demy picques, dix mille arquebuses, quatre mille selles, & autant de brides à cheual, douze canons, & vingt-deux petarts; & fait-on compte qu'il y pourra auoir de dix à douze mille soldats, outre plusieurs gentilshommes Romains, qui y sont accourus au bruit de l'embarquement du Duc de Parme, comme aussi dit-on qu'il y aura bon nombre de seigneurs & gentils-hommes Neapolitains. Il se dit aussi que le seigneur Dom Virginio Orsino neveu du grand Duc s'appreste pour y aller, accompagné d'un bon nombre de gentils-hommes de Florence & du reste de la Toscane. Du lieu où l'on va il ne s'en sçait rien de certain, mais on pense que ce soit en Albanie ou en la Grece, jasoit qu'il y en ait qui parlent de Barbarie. Cependant nous entendons que le Turc a fait munir les auentures de tous ces pays-là; & de fait, ceste entreprise est tirée si fort au long, comme sont quasi tousiours toutes celles des Espagnols, que ce sera grande merueille s'ils y arriuent à temps, & s'il font chose d'importance. En toutes façons, ils causeront de grandes miseres & calamitez aux pauvres Chrestiens qui sont sous la domination du Turc, sur lesquels tombera la vengeance, comme il en aduint l'année passée de ceux de l'Isle de Chio. D'autre costé, j'entendis que les ministres du Roy d'Espagne à Naples se plaignent de ceste entreprise, disans que c'est ouvrir vne autre porte pour consumer au loing l'Or & l'Argent du Roy d'Espagne, en temps que ses Estats en ont trop de besoin, & mesmement aux Pays-bas. On blasme encore d'ailleurs le Comte de Fuentes d'auoir retenu huit mois de solde à toute ceste grande armée qu'il auoit assemblee, & qu'il y a gagné pour soy plus d'un million d'or. Les Suisses entr'autres sont demeurez tres-mal contents de luy. Tant y a qu'en fin nous entendons que les Allemans estoient parz du Milanois, & s'en alloient en Croace vers l'Archiduc Ferdinand, & ainsi le dernier tiers de ladite armée qui restoit près le Comte de Fuentes a esté licencié, & ne reste plus rien de ladite armée qui doive mououir le soupçon qui a si long-temps tenu en suspens les esprits des hommes.

Il y auoit long-temps que ie desirois parler au sieur Marquetto, comme ie vous auois escrit, mais ie n'auois pû iusques au quinziesme de ce mois qu'il me vint voir, & me porta vn exemplaire de l'oraison qu'il prononça à Lyon deuant le Roy sur la conclusion de l'accord, laquelle il a fait imprimer de nouveau à Ferrare. Il me plut fort, & augmenta la bonne opinion que i'en auois conceue en lisant son oraison lors que vous me l'envoyastes. Entre autres choses, i'y apperceus vne ardeur au seruite, &

à la loü.

à la louange & reputation du Roy, qui ne se peut exprimer. Ceux qui l'ont accusé d'en auoir trop dit, l'y ont eschauffé d'auantage; & outre qu'il rend de tres bonnes raisons de ce qu'il a appellé le Roy le plus grand des Roys, & d'autres telles louanges qu'il luy a donnees, il a en ceste nouvelle edition mis deuât sadite oraison vne briefue epistre liminaire sous le nom de l'Imprimeur, en laquelle il se louë grandement de l'humanité & de la liberalité du Roy, & comme sa M. estant encore enfant elle traduisit les commentaires de Cesar en François, ce que peu de gens sçauoient, & moins l'eussent sceu, si on n'eust calomnié cét Orateur d'auoir trop loué sa M. Apres que ie l'eusse conté long-téps parlant des louâges du Roy, dont il ne se pouuoit estancher & que ie luy eus respondu, & l'eus loué luy-mesme, ie luy dis côme vous m'auiez enuoyé les 300. escus dont ie l'auois fait aduertir par Raby dès le commencement, & que i'en auois parlé par 3. diuerses fois à Monsieur le Card. Aldobrandin, duquel ie n'auois pu rien obtenir; & voyant qu'il s'alloit tousiours aigrissant d'auantage, i'auois resolu en moy-mesme de ne plus luy en parler, mais que ie le priois luy de les prendre, & ne se pruer de ceste commodité ny le Roy du plaisir que sa M. en receuroit; Que hōme du monde ne le sçauoit que luy & moy, & vous à qui il escriuait 3. mots seulement pour ma descharge; Que ie ne voudrois iamais rechercher luy ny autre de faire rien contre la volonté de son Maistre, ny de chose qui ne fust à faire: mais cognoissant que ce n'estoit qu'un caprice par trop inciuil & iniuste de sōdit maistre, ie le priois & cōiuerois d'accepter ceste liberalité du Roy, que i'estimois deuoir estre vne arre de quelque plus grand bien & honneur que sa M. luy pourroit faire quelque iour. Il me dit qu'il auoit vn sien oncle qui luy auoit serui de tuteur & de pere, qu'il me l'envoyeroit, & tiendrait à ce ce que nous en ferions ensemble. Je le priay de me l'enuoyer donc bien tost, mais il n'est encor venu: s'il tarde plus gueres ie l'enuoyeray querir. Tant y a qu'à present ietiens que la liberalité du Roy aura effect, dont ie suis tres-aise, & feray que ce soit au plustost.

Monsieur le Sacristain du Pape sur l'occasion de la canonization derniere a composé & fait imprimer vn liure de la canonizatiō des Saints, & en enuoye vn exemplaire aussi avec vne sienne lettre à sa M. Je vous prie qu'il luy soit fait vne honneste response, comme il fut lors que sur l'occasion du voyage du Pape à Ferrare il composa & enuoya au Roy vn autre liure de la coutume de porter le S. Sacrement deuant le Pape lors qu'il va en voyage. Le Pert Joseph Texera Religieux Dominicain Portugais arriva le 14. en ceste ville & estant aduertý qu'il prist garde à soy, d'auantage que l'Ambassadeur d'Espagne le faisoit chercher, & luy procuroit tout mal, se tint caché le 15. & 16. & partit desguisé le 17. de grand matin pour s'en retourner en France. Atant, &c. Monsieur, &c. De Rome ce 23. de Iuillet 1601.

---

A MONSIEVR DE VILLEROY.

CCLXXVII.

**M**ONSIEVR, Par la lettre qu'il vous plent m'escire de vostre main  
le 7. Iuillet, i'ay veu comme il n'auoit esté besoin de lire au Roy, ny

faire voir à Messieurs du Conseil la lettre que ie vous auois escrite touchant ma pension, ayant esté pourueu au payement d'icelle, tant pour la presente annee, que pour les arrerages des precedentes; & recognois que ceste provision est venuë, comme toute la pension mesme, de la faueur & protection qu'il vous a pleu m'y departir, auant mesme qu'auoir receu madite lettre, dont ie vous remercie de toute mon affection, comme aussi d'auoir vſé de madite lettre de la façon que vous auez fait. I'ay senty & obserué de moy-mesme le premier la rudesse des propos qui m'ont esté tenus es audiences precedentes: mais comme ie vous ay deub referer fidellement ce qui s'y est passé, aussi me semble-t'il que le Pape y est grandement excusable pour le regard de Chasteau-Dauphin, car il y va de trop. S'il y auoit quelque sorte de gens qui vinssent nicher en quelques aduenues en France, qui dissent & preschassent que le Roy n'est point Roy, & que la Couronne mesme de France, & que les Princes du sang, les Pairs, les Cours de Parlement, les Magistrats & Officiers tant de la Couronne qu'autres, les ordonnances, Arrests & iugemens ne sont qu'abus, piperie, & abomination, & qu'il faut exterminer tout cela, ie croy que ces gens vous reueilleroient bien, & que vous vous en remueriez bien encore plus que ne fait sa Sainteté. Vous entendez assez le reste; & ferez beaucoup pour les affaires & reputation de sa M. s'il vous plaist tenir la main, comme ie m'assure que vous ferez, que ceste engeance qui apporte tant d'indignation au S. Siege & à toute l'Italie, soit resserree delà les monts. I'ay desia touché vn mot en ma derniere audience à Monsieur le Cardinal Aldobrandin de ladite rudesse, & si la commodité se presente belle ie suis homme pour en dire quelque chose au Pape, mesme comme pour son seruice: mais le principal doit venir de nous, & du contentement que nous luy donnerons mesmement audit fait de Chasteau Dauphin.

I'ay esté aussi le premier marry de ce que le General des Iacobins ait esté vn Espagnol plustost qu'un François. Mais il faut que ie vous die entre nous deux que les François en sont eux-mesmes la principale cause: car outre la débauche generale qui est en France parmy les Ordres des Mendians ils ne se soucient point de venir aux Chapitres generaux, comme en ce dernier il n'y auoit pas à peine la moitié de ceux qui pouuoient y estre; & ce peu qui y estoient, estoient diuisez entr'eux, detraçans les vns des autres parmy les Italiens & Espagnols. Ie vous laisse à penser s'il est facile de vaincre de ceste sorte le grand nombre, le soin, la dexterité, les faueurs, les artifices & canteles des susdits Italiens & Espagnols en chose qui va par brigade & meenes, & se resoult à la pluralité de voix.

L'Archeuesque de Montreal en Sicile est vn fort honorable Prelat, & a vn frere Religieux de l'ordre de S. Iean de Hierusalem depuis 27. ans, appellé le Chenalier François Torrès, qui n'a iamais receu aucun bien de sa Religion. Ledit Archeuesque m'a requis d'escire à Monsieur le grand Maistre, pour le prier de vouloir conſerer à son dit frere quelque petite Comanderie, ou pension, ou membre; ce que i'ay fait: mais il desireroit obtenir du Roy par mon moyen vne lettre de sa Maieſté à mesme fin à mon dit ſieur le grand Maistre lequel estant François à present, & la personne qui en supplie sa Maieſté de merite, l'estime, que ladite lettre se peut conceder, & s'il vous semble ainsi, & qu'il vous plaise me l'enuoyer ie la luy deliureray.

Monsieur Perrin m'a montré la copie de la bonne lettre que le Roy par vostre moyen a escrite en sa faueur au Gouverneur de Toul, dont luy & moy vous sommes obligez, & vous en remercions bien humblement; toutes fois il est tousiours molesté, & a encor besoin de vostre ayde & protection. A tant &c. Monsieur, &c. De Rome ce 6. d'Aoust 1601.

## A V R O Y.

## CCLXXIV.

SIRE,

Depuis ma dernière despesche qui fut du 23. ie fus à l'audience du Pape le 27 dudit mois, & ne me restant rien à traiter de ce que V. M. m'auoit commandé par ses despesches precedentes, ie dis à sa Sainteté les choses que i'auois trouuees par lesquelles se pouuoit verifier que les Roys & Couronne de France auoient droit de patronat és deux chappellenies de la chappelle de sainte Petronille en l'Eglise de S. Pierre, iaçoit que le titre & la concession des Papes ne s'en trouuaist point; concludant qu'afin qu'on ne peust debatre le droit de patronat à l'aduenir, il seroit bon qu'il pleust à sa Sainteté en renouveler le titre, dont ie la suppliois tres-humblement: ce que sa Sainteté me promit de faire bien volontiers. Je parlay aussi à sa Sainteté pour 4. François prisonniers en tour de None, qui pour auoir desrobé 18. paires de souliers en vne boutique de Cordonnier, disent auoir esté condamnez à Ferrare à la galere pour 10. ans, & conduits par deçà pour estre menez és galeres de sa Sainteté; de laquelle i'obtins qu'il seroit escrit à Ferrare pour faire porter icy leur procez, & voir s'il y auroit lieu de moderer la peine. Je presentay aussi à sa Sainteté Madame de Lignery venue à nostre Dame de Lorette par deuotion & par vœu, & delà en ceste ville avec vn sien fils aagé de 18. ans, & vne fille de 10. & sa Sainteté leur fit vn accueil fort benin, & leur conceda de pouoir gagner le Iubilé comme s'ils fussent venus en l'annee sainte, & encor en visitant vne seule fois les quatre Eglises.

Le leudy 2. de ce mois ie receus la despesche de V. M. du 7. Iuillet, & le lendemain Vendredy 3. ie fus à l'audience, & baillay au Pape par escrit en vn memoire Latin lesdites preuues du droit de patronat que ie luy auois exposees de vive voix en l'audience precedente; & il me dit derechef qu'il confirmeroit ledit droit de patronat, & que i'en fisse dresser la supplication. Ce que ie feray incontinent apres le partement de cet ordinaire: cependant i'en uoye à V. M. copie du memoire que i'en laissay à sa Sainteté.

Après que i'eus mis ces choses deuant comme les plus aisees, & par forme d'exorde, ie vins à ce qui estoit de negociation & de plus grande difficulté, & sur ceste nouvelle du voyage & arrivée prochaine de monsieur de Lorraine & de Madame vostre sœur, i'entray doucement au propos de la dispence, luy disant que ceste grace eust esté bien à propos en ceste entreuë pour seruir à vostre Maiesté d'un grand & puissant moyen, entr'autres, pour persuader à madite Dame de se faire Catholique; qui estoit vn des plus grands desirs que vostre Maiesté eust en ce monde. Le Pape qui n'auoit

quasi rien dit sur les choses precedentes, respondit à ceste cy bien expressement, que tout aussi tost que madite Dame se seroit declaree Catholique, il enuoyeroit la dispense, & V.M. s'en pouuoit asseurer comme si elle la tenoit desia en sa main; Qu'il exhortoit & prioit V.M. de ne laisser perdre ceste occasion de la conuertir, & que outre infinis autres biens qui aduiendroient de sa conuersion, V.M. en auroit vn grand merite enuers Dieu, & loüange & gloire parmy les hommes. Cela fait, ie luy dis que V. M. m'escriuoit sur la publication du Concile, & sur l'assistance que les Zelandois & Holandois receuoient de quelques François particuliers. A quoy il respondit fort peu; mais demanda quel ordre on donnoit au Chasteau Dauphin, où il entendoit que les choses alloient tousiours de mal en pis.

Et pour ce que vostre Maiesté ne m'en escriuoit rien; ie ne luy en sceus dire autre chose sinon que celuy qui auoit ce lieu en engagement n'estoit encores près V.M. laquelle l'attendoit de iour en iour, pour incontinent apres auoir bien sceu le tout, y donner l'ordre qui seroit necessaire. A quoy le Pape reплика, que la chose valoit bien que V. M. y eust enuoyé expressement & en diligence au premier aduis qu'elle en eust de sa part, & qu'il attendoit cela de vostre pieté, & generosité & affection enuers le saint Siege, & enuers toute l'Italie; Que c'estoit la plus grande fascherie qu'il eust pour le iourd'huy & que si V.M. en comprenoit vne partie, elle en auroit compassion, & l'en auroit ia deliuree, ou bien elle ne luy portoit point l'amitié dont elle faisoit profession, & qu'il l'a tousiours creu. Ie ne luy reпликаuy autre chose sinon que ie scauois que V.M. luy portoit toute la reuerence, gratitude, & affection que pouuoit porter vn bon fils à son pere, & qu'elle seroit bien tost contente de ce costé là, comme ie l'en auois asseuré cy-deuant: mais que l'action & executiō des choses n'est point capable de la vîstesse de nos desirs.

C'est ce qui se passa en l'audience, excepté certains offices que ie fis pour des personnes particulieres, comme il y en a tousiours à faire. Quant aux autres poincts de la susdite despesche du 7. Iuillet, desquels n'est point fait mention, cy-dessus, celuy qu'enuoyoit Monsieur de Bethune n'est encores venu, & m'a enuoyé de Lyon par l'ordinaire ladite despesche.

Tant y a que le logis est arresté pour ledit sieur de Bethune, qui sera tres-bien & tres-honorablement logé au Palais de Ricari en la Longare; où, outre le Palais capable & tres-cōmode, il y a vn beau grand iardin, & vne vigne de grande estenduë, de façon qu'un Ambassadeur de robbe courre, & ayant femme, ne pourroit estre mieux, ny si bien logé à Rome que là.

Il me semble que vostre Majesté a tres-bien iugé que le conui à vne plus estroite amitié avec le Roy d'Espagne, vient du Pape, & se refere au dessein d'Angleterre, comme à la fin principale, iagoit qu'il y puisse auoir d'autres respects moins principaux, comme d'empescher que les François ne secourent les Estats & Prouinces-vnies des Pays-bas, & que vostre Maiesté enuoye contre le Turc. I'ay escrit pour le moins en deux despesches comme sa Sainteté m'auoit dit à diuerses fois qu'elle esperoit tant faire que de son viuant il y auroit non seulement paix, mais aussi amitié entre vostre Maiesté & le Roy d'Espagne. Ie tascheray d'en descouvrir ce qui se pourra, n'estimât pas au reste que le Cardinal Aldobrandin soit si mal aduisé que de destourner le bien & honneur que vostre Maiesté procure au sieur Dom

Alessandro Pico pour la fin qui vous est venuë en l'esprit ; car en matiere du Conclauë, à quoy il regarde principalement, il y a plus d'occasion de se desier & craindre des Espagnols & de leurs adherens, que des François.

Il pourroit bien estre que la maladie de Monsieur le Duc de Bar auroit esté vraye : mais il y a occasion d'en douter, d'autant que le sieur de Beauuau, qui est tousiours icy pour son Altesse, m'a dit plusieurs-fois, & deux mois auant que Madame soit partie de Lorraine, que mondit sieur le Duc ne feroit point le voyage avec Monsieur son pere & avec Madame.

Par les dernieres lettres que nous auons icy de Naples, on escrit que ceste armee de mer qui se prepare si long-temps y a estoit encores à Messine en Sicile, vers où s'acheminoient de Naples les Princes Doria & Duc de Parme dès le 19. Iuillet avec 32. galeres. Dom Pietro de Toledo les suivit deux iours apres avec 13. galeres. Le 24. ledit Prince fit partir les galeres de Malte pour Malte mesme, & ne sçait-on pourquoy, si ce n'est pour descourir. Les derniers 11. galeres venuës d'Espagne à Genes estoient arriuees à Naples assez mal en ordre, & apres s'estre mieux pourueüs deuoient suivre les autres. Celles du grand Duc de Toscane retournerent de Naples à Liouourne pour prendre le seigneur Dom Virginio Orsino, & furent de retour à Naples le dernier de Iuillet, passans à la venë de Naples seulement, & tirans vers Sicile, ayans pris en retournant audit Liouourne vne galeotte de Barbarie de 25. bancs. D'autre costé, les Turcs se preparent, & se munissent de tous costez en Albanie. Ils ont fait retirer tous les Chrestiens loing de la mer dans le pays, & se fortifient de gens à cheual ; & en Alger on auoit enfermé en des grottes sous terre plus de dix mille esclauës attachez de doubles chaines, avec bonne garde à l'usage de ce pays-là. Cependant il est venu aduis du costé de Raguse qu'Ebraïm Bassa, qui commandoit à l'armee Turquesque en Hongrie, mourut le dixiesme Iuillet & qu'on attendoit en ladite armee le Bosboly de la Romagne pour y commander, en attendant que le Turc y eust enuoyé vn Bassa, & que c'estoit ainsi que l'a ordonné ledit Ebraïm en l'extremité de sa maladie.

Le Comte de Fuentes n'a point encor licentié les gens de cheual qu'il auoit assemblez, & les tient encor ensemble à grande foule, mescontentement, & plainte de tout ce pays-là, & de la ville mesme de Milan.

Le Patriarche de Venise est arriué en ceste ville pour contenter le Pape de l'examen pour lequel sa Saincteté s'est si fort formalisee. Il est venu sous la protection de Monsieur le Cardinal Aldobrandin, & les Venitiens esperent qu'il ne sera point examiné, si ce n'est par le Pape mesme en sa chambre, hors la congregation de l'examen. A tant, &c. SI R E, &c. De Rome ce 6. Aoust 1601.

A V R O Y.

CCLXXIX.

S I R E,

La lettre qu'il plust à vostre Maiesté m'escire le 25. Iuillet me fut ren-

VVVu 3

duë le 16. de ce mois, & le lendemain 17. ie fus à l'audience, & dis à nostre P. Pere la reception de ladite lettre, & la bonne santé de vostre Maieſté & de la Reyne, comme elle estoit entree au 8. mois de sa grossesse dès le 20. du dit mois de Iuillet, & deuoit faire ses couches à Fontaine bleau; dont sa Saincteté fut fort aise, priant Dieu qu'il luy fist la grace d'accoucher d'un maſle, adiouſtant qu'il prioit Dieu tous les matins pour elle: dequoy ie le remerciay tres-humblement, & l'asseurai qu'outre qu'il faisoit en bon pere, les prieres qu'il faisoit pour la Couronne de France, & pour ce qui y appartenoit, tournoient au bien du saint Siege, & de toute la Chrestienté.

De ceste bonne nouvelle de la Royne ie passay à vne autre du deuoir auquel V. M. se mettroit de faire instruire Madame sa sœur en la Religion Catholique, & par ce moyen preparer sa conuersion; dequoy aussi le Pape se monstra fort ioyeux, & loüa le choix que V. M. auoit fait des personnes de Monsieur l'Euesque d'Eureux & du Pere Ange de Ioyeuse pour ladite conuersion. Ce que dessus fut fini de ce que V. M. deuoit faire partir dans peu de iours Monsieur de Cheurieres pour venir à Thurin y voir iurer la paix au Duc de Sauoye, & Monsieur de Bethune pour venir resider Ambassadeur près sa Saincteté, comme ie luy auois dit autresfois de la part de vostre Maieſté.

Et à ce propos adiouſtay que ledit ſieur de Bethune luy porteroit aduis de ce qui se feroit peu faire iusqu'à l'our de son parlement pour preparer les personnes & les choses à la publication du Concile, de laquelle V. M. desiroit contenter sa Saincteté au plustost que faire se pourroit, & que cependant vostre Maieſté auoit enuoyé querir en Languedoc le Pere Lorenzo Magion pour traiter avec elle du fait des Iesuites, & y prendre quelque bonne resolution. Apres cela ie luy voulois parler de Chasteau-daufin, mais il me preuint me demandant; Et de Chasteau daufin quoy? Je luy dis ce que V. M. m'en escriuoit, que celui qui auoit ce lieu en engagement auoit esté vers V. M. & l'auoit assuree que les Catholiques & les Ecclesiastiques y viuoient en toute liberté de leur Religion & biens, & les autres qui estoient en grand nombre en ces valles là, y viuoient comme les habitans des valles voisines qui sont au Duc de Sauoye, & mesmement celles d'Angrogne, de Luſerne, & de Perose, sans que ledit Duc y face rien, qui neantmoins parloit incessamment des autres, comme si luy & son pere & ayeulx n'auoient enduré ces gens là, pour n'y auoir peu faire autre chose. Le Pape me dit que ce n'estoit pas respondre à propos; Qu'auant que le Duc de Sauoye restituaſt à vostre Maieſté Chasteau-daufin, qui est en Italie, n'y auoit aucun exercice de l'heresie; mais que tout aussi tost qu'il vous fut restitué, au lieu d'y mettre vn gouuerneur Catholique, on y mit vn huguenot qui y auoit fait venir vn ou plusieurs ministres infectans tout ce lieu là, & tous les environs, en voulans faire vne Geneue aux portes d'Italie, & à la veüe du saint Siege; Qu'il vous auoit prié de faire cesser ceste nouveauté, & d'oster ce scandale, quand ce ne seroit que pour euitier la haine & le mauuais nom que cela vous apporteroit; & maintenant au lieu de luy dire que cela estoit osté, ou le seroit bien tost, ie luy disois en somme que les Catholiques y viuoient Catholiquement, & les heretiques heretiquement: ce qui n'estoit

point respondre selon la demande ; Que c'estoit auiourd'huy la chose qui plus le faschoit, & qu'il vous prioit de la faire cesser au plustost sur tous les plaisirs que vostre Maiesté luy sçauroit faire iamais, autrement il ne croyoit point que V.M. l'aimast, ny tint aucun compte de l'Italie, ny de ce qu'on pourroit dire & penser d'elle. Je luy dis que V. M. y auoit enuoyé le mesme personnage en poste exprés pour donner ordre à tout, & que i'esperois que bien tost nous en aurions bonnes nouvelles. Ce propos acheué ie luy dis que insques là ie luy auois dit toutes choses bonnes & douces, mais qu'il m'en restoit quelques vnes où il y auoit vn peu d'aigreur; Que ie n'en auois point voulu faire à deux fois, & le priois de les onyr benignement, & les prendre en bonne part. Il me dit que ie disse hardiment, & que tout seroit bien pris. Et là dessus ie luy dis ce que les habitans de Geneue vous auoient fait sçauoir dudit mauuais traictement que le Duc de Saouye & ses ministres leur font; le danger qu'il y auoit que cela n'allumast vne nouvelle guerre, & le besoin que ledit Duc auoit d'estre admonesté par sa Sainteté; laquelle me respondit qu'elle ne faudroit de faire enuers ledit Duc les offices qui appartiendroient à la conseruation de la paix & du repos public; Que vostre Maiesté de son costé seroit bien aussi de tascher à tenir les choses en paix, plustost que se mettre pour les vns contre les autres; Que le Duc de Saouye pretend que ces lieux, dont les autres se plaignent, sont à luy, & qu'ils ont esté vsurpez pour les autres en temps de guerre, & qu'il luy auoit esté dit que ledit Duc auoit despesché de nouveau quelqu'un vers vostre Maiesté pour l'informer de ses droicts.

Je luy dis aussi, comme de moy-mesme, que V. M. n'auoit encores receu aucun effect des esperances & promesses qui auoient esté donnees à vostre Ambassadeur en Espagne sur la deliurance de vos subiets arrestez & retenus iniquement, & que cela seroit venu mal à propos ce qui s'estoit fait à Valladolid les 17. & 18. Iuillet enuers les François & famille dudit sieur Ambassadeur, dont V.M. ne sçauoit encores rien lors qu'elle m'escriit ladite lettre du 25. Iuillet, & m'estendis vn peu sur la superbe cruauté, & haine inueterée & implacable de la nation Espagnole contre la Françoisse. Sa Sainteté me respondit, qu'elle estimoit que les François qui auoient esté arrestez à S. Lucar près Seuille, auoient esté deliurez; quant à l'accident aduenu à Valladolid, il en estoit marry, & son Nonce auoit fait tous bons offices enuers les vns & les autres, & des deux costez il en auoit escrit & rendu compte à V. Maiesté, laquelle n'imputeroit point au Roy d'Espagne ny à son Conseil la faute de la popullasse, qui n'auoit point toute la ciuilité & discretion qu'il seroit besoin.

Je n'ay rien à vous escrire pour ceste heure pour la succession d'Angleterre, & quand i'en apprendray quelque chose ie ne faudray d'en rendre compte à vostre Maiesté, & au reste m'excuseray de la lettre que demande le sieur Artus Polo qui demeure avec Monsieur le Cardinal Farnese, pour la consideration qu'il vous a pleu m'escrire, outre que le moindre signe de vostre Maiesté me sera toujours pour vn tres-exprés commandement. Quant au Prince de la Mirandola, & au seigneur Don Alessandro son frere, ie n'en auois rien entendu depuis ce que i'en escriuis dernièrement à vostre Maiesté.



mais estant Vendredy dernier avec Monsieur le Cardinal Aldobrandin, il m'en mit en propos de luy-mesme sans que ie lui en parlasse, & me confirma ce que vostre Maiesté m'escriit des p<sup>er</sup>sions du Duc de Modena & dudit Prince, adioustant que ledit Prince la prend non seulement en son nom, mais aussi au nom de sondit frere; toutesfois qu'il ne m'en asseuroit pas comme de chose qu'il sceust certainement, mais qu'il l'auoit entendu de fort bonne part. Au reste il ne me cela point la fin pour laquelle il me le disoit, ains me dist tout ouuertement qu'il m'en auoit ouuert le propos pour l'instance que vostre Maiesté faisoit en faueur de ceste maison, & qu'il falloit bien aduiser que nous ne fissions la souppe au chat, qui est vn proverbe dont on vse en ce pays. Tout ce que ie puis dire à vostre Maiesté sur cela, & sur l'aduis qu'elle me commande luy en donner, est qu'il nous faut faire tout ce que nous pourrons pour en descouvrir la verité; à quoy ie travailleray de ma part. Il peut estre que la chose soit comme on la dit, mais il peut estre aussi que ce soit vne inuention & vn bruit espandu à poste par quelques personnes qui ne voudroient point que ce ieune seigneur fust fait Cardinal par le moyen de vostre Maiesté, & voudroient que vostre Maiesté substituast quelque autre Italien en son lieu: car l'instance faite par vostre Maiesté pour luy est sc<sup>eu</sup>e & publiee ie ne sçay eomment, & est chose accoustumee en ce pays en telles occasions de publier des faux bruits contre ceux qui sont sur le point d'obtenir de telles dignitez. Quand nous aurons fait tout ce qui sera possible pour en sçauoir la verité, si nous ne trouuons la chose plus que certaine, ie serois d'aduis que vostre Maiesté persistast en sa demande, & n'abandonnast point ceste poursuite ny ceste maison, estant chose certaine que si vostre Maiesté les abandonne apres auoir déclaré qu'elle vouloit ceste cy auant tout autre, ils s'alieneront du tout, & chacun les excusera & nous blasmera, & ceux qui auront inuenté ce mensonge serviront toute leur vie de ce qui leur sera si bien succedé; là où quand vostre Maiesté suiuant sa singuliere generosité & bonté persistera en sa premiere deliberation de fauoriser ceste maison, dont les ancestres ont esté si deuot<sup>s</sup> à la Couronne de France, elle fera ce qui est digne d'elle, & mettant le droit de son costé, mettra ceux-cy en leur tort s'ils ne font ce qu'ils doiuent de leur costé. A tant ay-ie respondu à tous les points de la susdite lettre qui en auoient quelque besoin, & ne me reste que donner vn peu d'aduis à vostre Maiesté des occurrences de deçà. Ledit seigneur Cardinal Aldobrandin en l'Audience que i'eus de luy Vendredy dernier apres celle du Pape, me fit vne grande & extraordinaire declaration de sa bonne volonté au service de vostre Maiesté, iusques à me dire qu'il le monstreroit encores plus apres ce Pontificat qu'il seroit plus libre; Que le Pape aymoit grandement vostre Maiesté, mais par ce que les choses de la Religion ne se passent en France, & mesme aux confins de l'Italie, comme il seroit à desirer, & comme il semble qu'elles pourroient faire, la Saincteté est contrainte d'entrer en des aigreurs qu'elle ne voudroit pas; & luy, qui est son neveu, & a le maniem<sup>en</sup>t des affaires, ne peut faire de moins que de seconder les intentions & volontez de sa Saincteté. Et quand Dieu auroit disposé d'elle, ce seroit à celuy qui seroit nepveu du Pape futur à contester telles choses, & à luy ne resteroit plus que le desir commun que doit auoir chacun que les choses de la religion

religion aillent bien, & seruiroit de tout son pouuoir vostre Maiesté, laquelle il prioit de faire venir par deçà Monsieur le Cardinal de Giury, & luy donner quelque moyen de faire son vōyage & de s'entretenir à Rome.

Il remercie vostre Maiesté tres-humblement de la ratification qu'il luy a plu m'enuoyer du consentement par moy presté à la prouision des Chappellenies de sainte Petronille en l'Eglise de S. Pierre de Rome, ie la bailleray au pouruen pour s'en reualoir au précez qu'on a intenté contre luy. Quoy qu'il en aduienne, nous sommes seurs pour les autres à l'aduenir, puis que le Pape se contente de confirmer & renouveler ledit droit de patronat à la Couronne.

Il y a icy aduis de Naples par lettre du quatorzième de ce mois que l'armée de mer s'estoit en fin reduite à Trepani, qui est l'Angle & promontoire de la Sicile le plus près de l'Afrique, d'où ladite armée deuoit partir toute ensemble le 7. de ce mois pour aller à son entreprise, laquelle selon cela doit estre en Barbarie, si ce n'estoit quelque stratagème pour plus facilement surprendre l'Albanie ou la Grece. Aussi-dit on qu'il se fait autres preparatifs en Espagne pour aller de là tout droit trouuer & fortifier ceste armée dudit pais de Barbarie, & auoit on fait crier par tous les costez de la Sicile qu'on ne laissast partir aucuns vaisseaux grands ny petits qui tirassent vers Ocean, iusques au vingtiesme dudit mois. A tant, &c. Sire, &c. De Rome ce 20. d'Aoust, 1601.

A MONSIEUR DE VILLEROY.

CCLXXX.

MONSIEUR, Auec la lettre du Roy du 25. Iuillet j'ay receu la vostre de mesme darte, laquelle me donne plusieurs occasions de vous remercier, comme ie fais bien humblement. Premièrement, de l'aduis qu'il vous a plu me donner que la Reine fust entree au huitiesme mois de sa grossesse dès le vingtiesme Iuillet, & que ses couches se doivent faire à Fontainebleau. Secondement, de ce que vous auez fait remettre l'expédition de l'ordinaire de Lyon de quinze iours en quinze iours. J'ay mis ces deux causes les premières : pour ce qu'elles concernent le public. Tiercement, de l'ordre qu'il vous a plu faire mettre au payement de ma pension ; ce qui m'accommodera grandement. Quartement, de la protection que vous departez au bon droit de Monsieur Perrin Soubsdataire de nostre saint Pere, auquel ie voudrois qu'on l'eust rendu paisible en quelque autre façon, dequoy nous recueillons icy beaucoup de bon gré, de loüange, & honneur. Je suis obligé à Monsieur le Cardinal de Gondy en mon particulier, outre que ie participe comme François à ce qu'il a merité du public par ses longs seruites, qui est cause qu'il ne pourroit auoir des plaisir que i'en y participe, comme à la verité ie fais à l'affliction qu'il a receüe sur l'occasion qu'il vous a plu m'ecrire.

Vous verrez en la lettre que j'escris au Roy le propos que me tint dernièrement Monsieur le Cardinal Aldobrandin, lequel ie ne sçay à quoy bonnement retenir, si ce n'est à ce que ie luy auois touché en mon audience.

XXX.

ce precedente de la rudesse des responses qui m'auoient esté faictes auparavant, & aussi à quelque defiance qu'il a depuis sa Legation que nous ne le tenions pour bien affectionné à nos affaires. Je n'ay point escrit en ladite lettre du Roy comme ie parlay audit Seigneur Cardinal de l'affaire de Monsieur de Bourges touchant l'Archeuesché de Sens, dont il me dit qu'il auoit parlé au Pape, & que sa Sainteté luy auoit dit qu'il seroit bon que ie parlasse aux Cardinaux de l'Inquisition, & que s'ils s'en contentoient sa Sainteté l'auroit agreable, sinon que ie verrois qu'il ne tenoit à elle. A quoy ie iugeay sur le champ qu'on n'en veut rien faire, mais qu'on veut se seruir de moy pour tesmoin enuers le Roy que l'empeschement vient du S. office & non du Pape. Je repliquay que Monsieur de Bourges auoit tousiours esté bñ Catholique, & qu'en France on tenoit que le refus qu'il receuoit ne prouenoit d'ailleurs que de ce qu'il a tousiours suiuy le party du Roy, & auoit esté le premier à l'absolution qui fut donnee à sa M. à S. Denys, qui fut vne faute si faite, fut, tres-heureuse & salutaire non seulement à la France, mais aussi au S. Siege mesme & à toute la Chrestienté. Ledit seigneur Cardin. me dit que ce n'estoit pour cela, ains qu'il y auoit d'autres empeschemens & bié grands. J'adioustay que quoy qu'on eust sceu dire & deposer contre luy, tout estoit en haine de cela, & qu'il auoit couru vn temps auquel certaine sorte de gens pensoient faire vn sacrifice agreable à Dieu, en disant & faisant toutes choses contre ceux qui suiuoient le party de sa M. & mesmement contre ceux qui estoient des premiers aupres d'elle. A quoy ledit Seigneur Cardinal n'eust autre rephique; sinon que i'en parlasse moy mesme au Pape; ce que ie pourray faire en ma premiere audience, mais ce sera avec plus de desir que d'esperance d'obtenir, A tant, &c. Monsieur, &c. De Rome ce 20. d'Aoust, 1601.

---

## A MONSIEVR DE VILLEROY.

### CCLXXXI.

**M**ONSIEVR, Par la copie de la lettre que Monsieur de la Rochepot auoit escrite au Roy, & par les informations & declarations par luy enuoyees à sa M. i'ay veu bien au long l'affront qui luy auoit esté fait le 18. Iuillet, & comme toutes choses s'y estoient passees. J'eusse desiré que par mesme moyen il vous eust escrit le fait de ses gens comme il s'estoit passé le soir du dix-sept non seulement pource que le fait en toutes choses est le fõdement du droit & du iugement, qui se peut & doit faire de tout ce qui en suit, mais aussi pource que ce fait icy se dit en tant de façons que ie ne scay à laquelle me tenir. Tant y a que quoy que lesdites gens eussent fait, & quelle occasion que les grands de ceste Cour là ayent eue de s'esmouuoir, ils ont par trop excédé deuant tous homes de sain iugement; aussi sont-ils pour cela contrains de deguiser les matieres, & de les dire & faire toutes autres qu'elles se sont. Mais la verité est qu'ils nous portent vne haine si mortelle qu'ils ne scauroient garder enuers nous aucune moderation, & sont d'ailleurs si presomptueux & arrogans qu'ils mesprisent toutes les autres nations;

Que si i'auois à leur monstrier qu'ils ne sont point tels qu'ils s'estiment, ie ne voudrois point d'autres arguments que les insolences qu'ils ont si long réps endurées estre faictes par les ruës à Mon. de la Rochepot & aux siens, de la souffrance & impunité desquelles sont aduenus tous ces derniers inconueniens, & en pourront suruenir encores d'autres dont ils se trouueront mal. Ie ne laisse pour tout cela de vous remercier bien humblemēt, ains vous remercieray d'autant plus, du priuilege qu'il vous a plû faire expedier, car il est digne de nous de faire mieux qu'eux. Au demeurant, ie me rencontray leudy 30. d'Aoust avec le Pere Monopoli procureur general de l'ordre des Capuchins, qui me dit auoir aduis com̃me nostre bon Capuchin de Grenoble, dont vous faictes mention par vostre lettre du 5. d'Aoust, estoit passé en Lorraine, & s'estoit vanté d'auoir gouuerné le Pape & les plus grands de ceste Cour, & qu'il estoit enuoyé vers le Roy par sa Sainteté, & par Monsieur le Cardinal sainte Seuerine Protecteur de leur ordre, combien que ie vous assure qu'il partit d'icy comme desesperé, se plaignant à quelques vns de ceux qui plus le voyoient du Pape, & de chacun, & disant qu'il ne pensoit pas pouuoir iamais arriuer vif en France, tant il estoit affligé & desolé. Vous m'anez cependant fait vn grand bien en m'ostant le serm̃ple de l'escriit dont il me parla dès la premiere fois que ie luy donnay audience, car il me dit que le gentil homme dont il s'y parle, prenoit à femme & esponse par paroles de present la Damoiselle y mentionnée. Ledit Pere Monopoli m'e parla encore d'un different qu'il y a entre les Capuchins & Feuillans de Paris. Il disoit que les siens estoient défavorisez, & qu'on luy auoit escriit que depuis que le Roy estoit retourné de Sauoye il ne voyoit plus de si bon œil les Capuchins comme il faisoit auparavant. Quant au different, ie m'en remets à la iustice : mais quant à l'opinion que ces bonnes gens ont conceüe du Roy, comme ie m'assure qu'elle n'a aucun fondement, & que c'est vne leur pensée, aussi desirerois ie qu'à la premiere occasion que sa Maiesté en aura elle leur ostast ce soubçon, en les caressant & vsant de sa courtoisie & humanité naturelle.

Par ma lettre precedente ie vous escriuis que ie parlerois au Pape en ma premiere audience de l'expedition de Monsieur de Bourges touchant l'Archeuesché de Sens ; ce que ie fis Vendredy dernier, outre ce que i'ay escriit au Roy, & n'en eus autre responce que celle que Monsieur le Cardinal Aldobrandin m'auoit faicte ; à sçauoir que ie parlasse aux Cardinaux de l'Inquisition, comme ie vous escriuis par ma precedente. Ie demanday aussi audit seigneur Cardinal Aldobrandin, s'il auoit esté résolu quelque chose touchant la vísitation du Nonce de Venise, dont ie luy auois parlé le Vendredy treiziesme de iuillet, laquelle ie presupposerois icy, pour n'auoir à vous raconter la chose dès le commencement. Il me dist que ie luy auois fait plaisir de l'en faire souuenir, & qu'il m'en vouloit parler ; Qu'il en auoit parlé au Pape, & que sa Sainteté luy auoit dit du commencement qu'il ne vouloit point s'arrester à ces bayes, & vouloit que le Nonce de Venise fist comme auoient fait ceux qu'il auoit esté deuant luy : ce neantmoins qu'il seroit bon que ledit Cardinal Aldobrandin escriuit audit Nonce, pour sçauoir en quoy il se feroit, & que d'ailleurs luy Cardinal s'informast de la façon dont on en vsait

ailleurs : Que luy Cardinal Aldobrandin en auoit eſcrit auſſi Nonce de Veniſe, & s'eſtoit informé d'ailleurs; Que le Nonce auoit reſpondu, qu'autreſois les Nonces auoient fait à Veniſe cōme les Ambaſſadeurs des Roys, viſitans les premiers Ambaſſadeurs venus nouuellement auant qu'eſtre viſitez, mais que depuis quelque temps en çà ils auoient eſté viſitez premièrement par les Ambaſſadeurs venus nouuellement, auant que les viſiter, & que le dernier Ambaſſadeur d'Eſpagne Don Diego de Mendosſe venu depuis l'Eueſque d'Amelia, auoit viſité ledit Eueſque d'Amelia Nonce auant qu'eſtre viſité par luy, iacoit que du commencement il en fiſt quelque difficulté: mais en fin il ſ'y reſoluſt conſeillé par le Duc de Sefſe d'ioy, qui luy eſcriuit que les Princes Chreſtiens pour grands qu'ils ſoient ne remettent iamais rien de leur autorité en honorant le Pape, comme ils pourroient faire entr'eux s'ils ne gardoient leur rang : Que Monſieur de Maiſſe retourné à Veniſe après l'abſolution du Roy en fiſt de meſmes, & ainſi le dernier eſtat, pour le regard de Veniſe, eſtoit tel, que le Nonce du Pape eſtoit viſité le premier par les Ambaſſadeurs arrivez depuis luy; Que c'eſtoit doncques ce que le Nonce auoit reſpondu autant que ledit Cardinal ſ'en pouuoit ſouuenir; Qu'au reſte luy Cardinal Aldobrandin ſ'informant des autres Cours de la Chreſtienté, auoit trouué qu'en la Cour d'Eſpagne de tout temps les Nonces du ſainct Siege, quoy que premiers venus, eſtoient toujours viſitez par les Ambaſſadeurs ſuruenans depuis eux, auant qu'ils viſitaſſent leſdits Ambaſſadeurs. Quant à la Cour de l'Empereur il n'y auoit pour ceſte heure à Rome perſonne qui y euſt eſté Nonce: mais bien auoit-il trouué qui luy auoient dit qu'ils croyoient qu'en ladite Cour de l'Empereur on faiſoit comme on auoit fait autreſois à Veniſe; à ſçauoir que les Ambaſſadeurs derniers venus y eſtoient viſitez les premiers, tant par les Nonces que par les autres Ambaſſadeurs. Quant à la Cour du Roy, il n'auoit m'en dire rien, puis que nous le pouuions ſçauoir mieux que tous les eſtrangers: Que ſur le rapport qu'il auoit fait au Pape de tout ce que deſſus, il auoit ſemblé à ſa Sainteté de ne deuoir point laiſſer perdre la poſſeſſion en laquelle il ſe trouuoit à Veniſe: & que noſtre Ambaſſadeur qui viendrait à Veniſe feroit bien de n'entrer en ces conteſtations, puis que, comme auoit tres-bien dit le Duc de Sefſe, vn Prince temporel ne remet iamais rien de ſien avec la Pape. Je repliquay ſeulement à ceſte conſeſſion, diſant que ie ſtimois la choſe en ſoy ſi peu, & eſtois ſi aſſeuré du reſpect & reuerence que le Roy & ſon Conſeil portoient au ſainct Siege, & à la perſonne de ſa Sainteté, que ie croyois qu'un Ambaſſadeur de France n'eſt point doant commencement à ceſte diſpute & conteſtation: mais puis qu'il ſe trouuoit déja à Veniſe vn Ambaſſadeur d'Eſpagne qui l'auoit commencée, & ſ'y eſtoit aheurte, il ſembleroit que noſtre Roy qui precede le Roy d'Eſpagne, fuſt quelque choſe moins ſ'il ſe ſoumettoit à ce à quoy ledit Roy d'Eſpagne ne ſe veut ſoumettre. Ledit ſeigneur Cardinal me repliqua en riant que noſtre Roy ne ſe monſtreroit en rien moindre, mais bien plus grand en deuotion enuers le ſainct Siege, & ſeroit cauſe que l'Ambaſſadeur d'Eſpagne qui maintenant fait le retif, feroit ſon deuoir puis après, cōme les Roys de France ont toujours eſté les premiers à bien faire au ſainct Siege, & acquerir ſon autorité & ſa puiſſance. Et ainſi ſe termina ce propos, en

Etant l'un & l'autre de nous deux assez longuement de ceste gentille response, sans que j'estimasse pour lors y deuoir repliquer autre chose, me refermant à ce que le Roy m'en commanda.

Monsieur le Cardinal del Monte, qui fut fait Cardinal à la requeste & cōme par resignation du grand Duc, me parla il y a huit iours au Consistoire, me remontrant qu'il y a en ceste ville vn gentil-homme appellé le seigneur Fabritio Naro riche de mille escus de rente, & apparenté & allié des meilleures maisons de Rome, lequel a vn sien fils appellé Bernadino Naro page de la Royne, ce que son pere & toute leur maison tiennent à grand honneur, & sont tres-affectionnez seruiteurs du Roy & de la Couronne. Ce nonobstant il auoit esté escrit audit seigneur Fabritio pere, qu'on vouloit licentier de la Cour sondit fils, dont il estoit fort marry: & luy Cardinal, qui estoit abssi tres-humble & tres-deuot seruiteur de leurs Maistrez, craignoit que ce renuoy ne diminuast la deuotion de ceste maison, & possible d'autres: & mesmement quand on consideroit que les Espagnols au contraire sont fort soigneux d'entretenir & de gaigner les affections de beaucoup moindres personnes; Qu'outre les seruices essentiels qui aux occasions se peuvent retirer des seruiteurs bien affectionnez près & loïn, il aduenoit fort souuent à Rome que les Ambassadeurs en sont plus ou moins accompagnez aux actes publics, ce qui sert ou nuit à la reputation enuers le peuple, & encores avec les grands; Que ce qu'il m'en disoit n'estoit point pour aucun interest qu'il y eust, mais seulement pour le service du Roy, me priant de l'excuser s'il s'estoit ingeré trop auant. Le luy dis que ie tenois à faueur & honneur le propos qu'il luy auoit pleu me tenir, & l'en remerciois tres-humblement, & escrirois en Cour ce qu'il luy auoit pleu m'en dire, & esperois qu'on y auroit esgard. Aussi le vous ay-ie escrit en auant de mets sans y rien adiouster ny diminuer. A tant, &c. Monsieur, &c. De Rome ce 3. Septembre, 1601.

## A V R O Y.

CCLXXXII.

S I R E,

La dernière depesche que ie fis à vostre Maiesté fut du 20. Aoust, & le trentiesme du mesme mois ie receus celle qu'il pleust à V.M. m'escrire le 5. & Vendredy dernier ie fus à l'audience, où ie dis au Pape ce qui est tout au commencement de ladite depesche dudit iour 25. d'Aoust touchant Chastelau-daufin.

À quoy la Saincteté me respondit qu'elle auoit auis qué celuy qui tenoit ceste place auoit enuoyé sur le lieu, & auoit fait dire aux heretiques que s'ils vouloient auoir leur exercice libre, il falloit qu'ils prouuassent que ledit exercice y auoit autresfois esté estably & continué en vertu des Edicts de pacification; Que d'ailleurs la Saincteté estoit bien informee que les pays de deçà les monts en auoient tousiours esté exempts, & expressement exceptez par les Edicts de pacification.

Ce nonobstant la Saincteté craignoit qu'estans heretiques tant possesseur

XXXx 3

que le Gouverneur dudit Chasteau Daufin, ils ne fissent faire les preuves comme ils voudroient, & ne pouvoit esperer rien de bon par ceste voye; Que toute son esperance estoit au commandement absolu de vostre Maiesté laquelle par conscience, par raison & iustice, & par interest & reputation sienne propre, deuoit au plustost faire cesser ce scandale; Que si vostre Maiesté, laissoit mettre la chose en dispute, & en procédures, ce ne seroit iamais fait, tant ceste sorte de gens sont subtils & malicieux; Qu'il vous prioit & exhortoit de tout son cœur de commander absolument que cet exercice ne s'y fist plus: & qu'outre le bien qui d'ailleurs vous en aduiendroit, vostre Maiesté luy feroit vn plaisir indicible, dont il vous scauroit gré toute sa vie.

Monsieur le Cardinal Aldobrandin me dit de plus qu'on y auoit desia fait certaine attestation par force, & qu'on vouloit faire deposer aux Catholiques que le preschey auoit esté autresfois estably par autorité publique; mais qu'avec toute la force on n'auoit peu tirer ceste fausseté d'eux, & qu'on auoit seulement attesté que quelquesfois certains soldats heretiques y firent prescher d'eux mesmes sans aucune autorité publique. Je ne sçeus que repliquer à ces choses qui consistoient en fait, desquelles ils disent estre bien asseurez: & ne dis autre chose, sinon que ie l'escrirois à V. M. de laquelle ils deuoient attendre toutes choses raisonnables, & qui pourroient tourner au contentement de sa Sainteté. Ledit seigneur Cardinal Aldobrandin me fit bailler certain escrit venu de ces quartiers là il y a plusieurs iours, dont le Pape m'auoit parlé autresfois, comme ie l'ay aussi touché par mes precedentes despêches, lequel escrit sera avec la presente. Je dis aussi à sa Sainteté ce que V. M. m'escriuoit sur le conseil par luy donné au Roy de Pologne lors qu'il y fut Legat, & sur les apprests que vostre Maiesté faisoit pour l'instruction & conuersion de Madame sa sœur; à quoy sa Sainteté prit plaisir.

J'ay rendu compte à vostre Maiesté par ma precedente despêche, comme en l'audience que j'eus le Vendredy dixseptiesme d'Aoust il estoit venu à propos de parler de l'affront qui fut fait à Monsieur le Comte de la Rochepot vostre Ambassadeur le dixhuitiesme Iuillet à Vailladolid. Je ne pûs faire moins que de luy en parler en ceste derniere audience, d'autant que les Espagnols content icy le fait tout autrement que ie ne l'ay entendu d'ailleurs, disants que les gens de Monsieur de la Rochepot pour quelques paroles qui leur auoit esté dites, quelques iours auparavant, s'en allerent le soir du dix-septiesme Iuillet armez avec resolution de se venger sur les premiers qu'ils treuueroyent: & de fait treuuerent sept ou huit personnes innocentes qui ne sçauoient rien de ce qui leur auoit esté dit, entre lesquelles il y auoit des petits enfans. Et ce que la iustice estoit allée ainsi armée chez Monsieur l'Ambassadeur, c'auoit esté pour le conseruer luy & sa famille d'estre m'assacrez par le peuple, qui s'estoit émeu & mis en armes pour l'indignation conceüe contre les François, à cause de la cruauté par eux vlee sur tant de personnes innocentes. J'en parlay doncques à sa Sainteté, non de la part de vostre Majesté, mais de moy-mesme; & non pour luy en demander raison ny pour m'en plaindre, mais pour l'informer de la verité, & se detromper si d'auanture il auoit eue autrement. Je luy dis

doncques comme long-temps auant ce dernier accident Monsieur le Com-  
 te de la Roche pot Ambassadeur de vostre Maesté allant par les ruës, les  
 gens auoient esté attraquez & chargez plusieurs fois en sa presence, & tout  
 aupres de luy, & vn iour entre autres qu'il alloit visiter Monsieur le Non-  
 ce, il fust contraint de sortir de son coche, & mettre la main à l'espee pour  
 les desfendre; Qu'une autre fois on luy tua vn de ses lacquais par derriere,  
 ainsi que ledit lacquais le suiuoit par la ruë, dont il n'auoit iamais pu auoir  
 iustice: Que ceste licence si desbordée & impunie estoit venue à tels ter-  
 mes, que le soir du 17. Iuillet estans sortis quelques gentils-hommes de  
 l'Ambassadeur de France pour aller prendre le frais, comme il se fait, tout  
 aussi tost qu'ils comparurent en vn certain lieu public plusieurs Espagnols  
 semirent à crier contre eux, & à les iniurier, les appellans, FRANCISE  
 VELLACHI, BORACHI, LUTERANI: dequoy les François irri-  
 tez, furent contraincts d'en faire à ceux qui les outrageoient le ressentiment  
 que leur honneur, & celuy de toute leur nation requeroit; Que ie l'auois  
 veu ainsi escrit par des gentils-hommes Italiens qui estoient à la suite de  
 Monsieur le Cardinal Colonne en Vailladolid, gens qui n'auoient point  
 d'interest en la chose, & qui auoient plustost occasion de parler en faueur  
 des Espagnols, estant leur maistre seruiteur particulier du Roy d'Espagne &  
 de toute sa maison, laquelle aussi en auoit receu & receuoit tous les iours  
 plusieurs bië-faits: Que sa Sainteté pouuoit & deuoit estre aduisee de tout  
 ce que dessus par son Nonce, & sçauoit trop mieux iuger de la foiblesse ou  
 haine auenglee de ceux qui commandent en ceste Cour là, endurans tels  
 affronts estre faicts à de grands Seigneurs qui representent les premiers  
 Roys de la Chrestienté: affronts, disois-ie, qui en vn Estat bien policé ne se  
 font point aux plus basses & viles personnes du monde; Qu'il ne falloit  
 doncques s'esmerveiller si ayans si long temps & tant de fois manqué  
 aux premiers principes de la police & de l'entretien de la société humaine,  
 ils auoient puis apres excédé en forçant & eschellant par plusieurs endroicts  
 le logis de l'Ambassadeur de France, rompans & enfonçans non seulement  
 la grande porte, & autres respondantes aux ruës, mais aussi les huis de tou-  
 tes les chambres, & battans les domestiques, volans la vaisselle d'argent  
 & autres meubles, comme il se fait en vne ville d'ennemis prise d'assaut,  
 brauans encores la personne de l'Ambassadeur à sa barbe, encores qu'il  
 leur offrit plus de raison qu'ils n'en sçauoient demander, & commettans  
 tous exces d'ennemis forcenez, qui ne sçauent les respects qui doiuent  
 estre gardez en temps mesmes de guerre enuers les grands Princes, & leurs  
 Ambassadeurs, & autres ministres; Qu'il y auoit moyen de faire des cap-  
 tures; & de s'asseurer des delinquans, sans lezer la Maesté des Roys, ny  
 violer le droit des gens en leurs Ambassadeurs, & mesmement quand on  
 ne trouue aucune resistance, ains toute promptitude & offre d'obeyr à la  
 iustice. Aussi ne faudroit-il s'esmerveiller si vostre Maesté en prenoit la  
 raison comme sa dignité l'y obligeoit, & comme elle auroit ia renoué  
 son Ambassadeur, & desendu à ses subiects de plus trafiquer en Espagne,  
 qu'ils auoient plus perdu & souffert plus de maux depuis la paix, & sous  
 la foy publique, qu'ils n'auoient en temps de guerre. Sa Sainteté me res-  
 pondit qu'elle estoit marrie de ce qui estoit aduenü, & sans parler du fait



comme il estoit passé, me dit qu'on auoit rendu à Monsieur de la Roche-pot ce qui auoit esté pris en sa maison, & que les choses estoient en voye d'estre accommodees; à quoy son Neueu s'estoit fort employé; Qu'il auoit esté trouué que le neueu de l'Ambassadeur estoit celuy qui auoit infligé les autres François, lesquels estoient tous fort ieuues, & n'auoient à peines attainé seize, dix sept, & dixhuict ans, & qui auoit meü à compassion les grands de la Cour du Roy d'Espagne; Que c'estoient des accidents & fautes particulieres dont le public ne deuoit point souffrir; & que vostre Maiesté qui s'estoit toujours monstree fort modeste en toutes autres choses deuoit encores vser de sa moderation en cest cy. Ce sont les poincts de ladite dépêche de vostre Maiesté, desquels ie deuois parler à sa Sainteté, outre lesquels ie luy parlay encores du droit de Patronat des deux Chappellenies de sainte Pétronille en l'Eglise S. Pierre, pour ôster vne difficulté que Monsieur le Bataire y faisoit, non sur la confirmation & renouvellement dudit droit de Patronat pour l'adueuir, mais sur vne clause que j'ay fait mettre en la supplication; Qu'il seroit imposé silence à la partie aduersé qui moleste celuy qui a esté pourueu de l'vne des deux Chappellenies par la Sainteté de mon consentement; à quoy le Pape se monstra assez enclin. Je parlay aussi d'ôster certains abus qui se commettent par degrés benefices & Cais de France, par le moyen des petits dattes, qu'on appelle: dequoy aussi il me donna tres-bonne intention.

Ie croy facilement ce qu'aucuns ont voulu dire sur l'accordement des differens d'entre le Pape & la seigneurie de Venise, que la Sainteté ne s'assure pas trop de la foy des Espagnols; & j'ay accru moy-mesme ceste des fiance de tout ce que j'ay peu sur les occurrences de Marseille & de Metz. Mais la Sainteté & ladite Seigneurie ont tant d'autres occasions de desirer d'estre bien ensemble, que ceste cy ne peut estre comptee quasi pour rien; & mesme d'autant que la perfidie & ambition des Espagnols, n'a point commencé d'estre cogneü de la Sainteté par la pratique que le Comte de Fuentes auoit faicte du Donato qui fut dernièrement executé à Venise. Et pour obeyr au commandement que Vostre Maiesté me fait à ce propos, ie luy diray que ie tiens pour chose toute assuree que les Espagnols n'ayment le Pape, & qu'ils ne luy pardonneront iamais l'absolution de V. M. ny la dissolution de son premier mariage, n'ayans esté de rien moins marriés de ceste derniere que de la premiere, iacoit que pour s'estre faicte ceste seconde en temps de pain, ils n'ont eu le moyen ny l'audace de s'y opposer comme ils firent à la premiere. Mais pour le besoin qu'ils ont de la Sainteté en infinies choses, & pour les graces qu'ils en recoiuent de iour en iour, ils n'en font point de semblant, ains le flattent & reuerent extrêmement, beaucoup plus qu'ils n'ayment vraiment. Il cognoist tout cela, & ne les ayme non plus, pour n'en pouoir auoir bonne opinion, mais redoutant leur malice & leur grande puissance, il leur rend feintise pour feintise, & ne faut point s'attendre qu'ils viennent iamais à rapture manifeste.

Que si vostre Maiesté donna au Pape certaines satisfactions qu'il a pour, comme de Chasteté d'astin, de la publication du Concile, & de telles autres choses appartenantes à la confirmation de la Religion Catholique

que, qu'elle pourra faire sans preiudicier à l'Estat, elle se peut promettre le premier lieu au cœur & affection de sa Sainteté, comme ie crois à la verité qu'il vous ayme desia plus en son cœur, qu'il n'en ose faire de monstre. Quant aux Venitiens & Espagnols, ils ne s'aimeraient iamais; & les Venitiens seront tousiours mieux avec les Papes & le S. Siege, & y seroient tousiours mieux, n'estoit qu'ils ne se plient facilement à toutes les pretentions du S. Siege, & sont plus tenans de certaines leurs franchises & libertez que l'on ne voudroit en ceste Cour.

Ie remercie tres-humblement V. M. du priuilege qu'il vous a pleu faire expedier à la requeste du Duc de Sesse, & ne faudray de voir le liure dont est question auant que deliurer ledit priuilege. I'ay enuoyé au General de l'ordre de S. Dominique la response qu'il a pleu à V. M. faire à sa lettre, dont il se sent grandement honoré, comme il m'en est venu remercier. Et parce que i'escriuis dernièrement à M. de Villeroy les causes pour lesquelles ce Generalat ne se peut obtenir pour vn François, ie n'en feray point icy de redite: & ayant acheué de respondre à vostre dite depesche, ie passeray aux occurrences de deçà.

L'armee de mer qui s'estoit reduitte toute à Trepani en Sicile, en partit la nuit du 6. venant au 7. d'Aoust, comme i'escriuis par ma precedente depesche qu'elle deuoit faire, & s'en alla en Sardaigne; & deslors chacun a pensé que son entreprise estoit en Alger. De Sardaigne elle est passée en l'Isle de Maiorque, d'où il y a aduis icy par homme exprés enuoyé par le Duc de Parme, & portant lettres du 15. Aoust, que ledit Duc & le seigneur Carlo Doria arriuerent en ladite Isle de Maiorque le 12. d'Aoust avec 27. galeres, & qu'ils y attendoient le Prince Doria avec le reste de ladite armee. Or d'autant que de Sardaigne à Maiorque il y a autant ou plus de distance que de Sardaigne à Alger, cela peut faire douter si ladite entreprise est pour Alger. Les galeres de Malte qui doiuent estre de la partie, & qui se sont trouuees en ladite armee iusques au 24. Iuillet qu'elles furent renuoyees à Malte par le Prince Doria, se trouuoient encores à Malte le 8. d'Aoust sans auoir suiuy l'armee. Il y en a qui disent que c'est pour competence de precedence entre elles & celles de Genes.

Autres disent qu'elles sont demenees de l'aduis & ordonnance du Prince Doria, pour se faire voir en Leuant, & amuser l'armee navale du Turc, conduite par le General Cicalé; lequel, comme portent les lettres de Naples du 22. d'Aoust, estoit party de Negrepont pour aller au Caire establir Gouverneur vn sien fils, & auoit laissé quelques galeres pour charger des biscuits & autres choses, avec commandement de l'attendre en l'Isle de Chio, où il deuoit se rendre à la fin d'Aoust. La caualerie de Milan en fin a esté cassee par le Comte de Fuentes, excepté quatre compagnies qu'il a retemës. I'ay veu lettres de Thurin qui portent que ledit Comte a escrit & enuoyé homme exprés en Espagne pour demander son congé. Si cela est vray, ce doit estre pource que l'on ne luy a laissé brouiller & troubler le monde à sa fantaisie. Cependant l'on escrit de Milan qu'il a entrepris vne grande œuvre, pour dresser la navigation de ladite ville de Milan à celle de Pavie: dequoy ceux de Milan estoient fort aises, & ceux de Pavie non d'autant que ceux cy auoient eux seuls tout ce, qui sera porté à Milan par le canal que ledit

YYY.

Comte fait dresser de Milan à Paue, & ainsi en auoient plus grande abondance, & meilleur marché, qu'ils n'auront apres ceste œuvre paracheuue. Par autres lettres de Thurin de personne affectionnée au seruice de V. M. i'ay veu qu'y passant l'Euesque de Camerin, qui va resider Nonce près de V. Maie. il a esté fort controllé tant en faisant la reuerence au Duc, & aux Princes & Princeſſes, qu'autres choses. Entr'autres on a remarqué que l'Ambassadeur d'Espagne resident à Thurin l'estant allé visiter, & luy disant vne infinité de maux de la France, & de la personne de V. M. & principalement au fait de la religion, & se plaignant encores du Pape qui ne vous cognoissoit pas bien, & tenoit trop de compte de V. M. dont estoit pour aduenir grands maux à la Chrestienté; ledit sieur Euesque Nonce n'en pouuant plus endurer, luy respondit que ny au Royaume de France, ny en la personne de V. M. n'y auoit tant de mal comme l'en disoit. Et sur cela s'estans eschauffez tous deux, vindrent aux paroles, & se departirent mal edifiez l'un de l'autre. Il se dit par ceste Cœur que le Roy d'Espagne a fait prior le Pape de faire tenir en son nom aux fons de Baptême l'Infant qui naistra de la Roynie sa femme, & que sa Sainteté le doit faire tenir par son Nonce, & a enuoyé à ladite Roynie certaines reliques, & les drapeaux & bandes benistes dont ledit enfant doit estre enuveloppé.

Nous celebraſmes la feste de S. Louys le 25. d'Aouſt, aſſiſtans à la grande Meſſe 24. Cardinaux, à ſçauoir; Terranoua, Gallo, Camerino, Montelbero, Giuſtiniano, Monte, Palaucino, Piatta, Borghese, Baronio, Bianchetto, Mantica, Arrigone, Toſco, San-Marcello, Antoniano, Bellarmino, Bottuſi, Santiquatro, Aldobrandino, San Georgio, Ceſis, Deti, & moy. Le iour de la feste de la decolation S. Iean Baptiſte 29. d'Aouſt, noſtre S. Pere baptiſa, & puis confirma 13. perſonnes, à ſçauoir 9. Iuiſs & Iuiſues tous d'une maiſon de Rome qu'on appelle de Regnano, vn Turc, & les trois Perſiens que i'eſcriuis à V. M. eſtre demeurez quand l'Ambassadeur Perſien partit de ceste ville pour Espagne. A cét acte ſa Sainteté inuita 20. Cardinaux, deſquelss'y en trouua 17. & i'en fus vn. Lesdits Cardinaux chacun en ſon rang tindrent au Baptême ou à la Confirmation vn des baptiſez ou des confirmez: & toucha à moy de tenir audit Baptême le premier deſdits trois Perſiens. A tant, &c. Sire, &c. De Rome ce 3. iour de Septembre, 1601.

## A MONSIEVR DE VILLEROY.

CCLXXXIII.

**M**ONSIEVR, Depuis ma derniere qui fut du 3. de ce mois, le droit de parronat du Roy & de la Couronne de France sur les deux chapellenies de ſainte Petronille en l'Eglise S. Pierre. de Rome a eſté confirmé & renouuélé par le Pape qui en a ſigné le MOTU PROPRIO, ſur lequel ſont expedies les bulles: & ſa Sainteté paſſé & approuué la clauſe

par laquelle est imposé silence à la partie aduersé de celuy qui fut dernièrement pourueu d'une desdites deux chappellenies par mô consentement, notwithstanding la difficulté que faisoit Monsieur le Dataire sur ladite clause. Le 13. de ce mois, iour de Ieudy, arriua l'ordinaire de Lyon avec vostre depesche du 18. d'Aoust, & le lendemain ie fus à l'audience, & remerciay nostre S. Pere du commencement de ce qu'il luy auoit pleu signer ledit *MOTU PROPRIO*, & renouueller ledit droit de patronat, & apres cela luy dis la reception de ladite depesche, le bon portement de leurs Maiestez, le prochain voyage de Monsieur le Cardinal de Joyeuse par deçà, & l'arriuee de Monsieur de Bethune à Lyon, comme ie l'auois entendu par lettre dudit Lyon du 4. de ce mois. Et en continuant le propos dudit sieur de Bethune, ie luy dis comme il portoit ce que le Roy auoit aduisé de faire touchant la publication du Concile de Trente, & les Iesuites. A quoy sa Sainteté ne respondit autre chose, sinon qu'il seroit mes-huy temps de mettre fin à ces deux affaires. De là ie passay à tout ce que m'escriuez tout au commencement de vostre dite depesche touchant Chasteau-daufin, & le dis à sa Sainteté, laquelle me respondit comme elle auoit fait cy devant, à sçauoir que nous ne luy respondions point à propos; Qu'au lieu de Chasteau-daufin n'y doit point auoir d'exercice de la nouuelle opinion par nos Edicts de pacification; Que lors que le Duc de Sauoye s'en faist, il n'y en auoit point; Que moins y en a t'il eu pendant que ledit Duc l'a tenu; que tout aussi tost qu'il l'a eu rendu, nous y auons mis vn Gouverneur ou capitaine huguenot, lequel incontinent y a fait venir vn ou plusieurs Ministres, qui y font tout de mesme qu'à Geneue; Que c'est de cela que sa Sainteté s'est plainte, & se plaint; & à quoy le Roy deuroit ra auoir donné ordre. Mais au lieu de cela nous luy parlions des valees, & d'autres choses qui n'appartiennent point au fait particulier dont il s'agist. Voila, Monsieur, iustement ce que le Pape me respondit; à quoy ie n'eus point de repliche, me semblant qu'il a raison; mais luy dis seulement que ie m'asseurois que le Roy le contenteroit, & donneroit bon ordre à tout. Et de fait, Monsieur, si nous ne pouuons ou ne voulons donner ordre à cecy, qui outre la iustice importe tant au contentement du Pape, & de toute ceste Cour, & de toute l'Italie, & à la reputation, des affaires, & seruice de sa M. par deçà, ie ne sçauois plus que dire en ceste matière. Je ne luy eusse point parlé de Madame Sœur du Roy, ne pouuant luy en dire bonnes nouuelles, mais il m'en demanda; qui fut cause que ie luy respondis à la verité ce que vous m'en escriuiez: & luy s'esmerueillant de l'opiniastrerie, i'adioustay que ceux-là qui sont le plus difficiles à se résoudre sont aussi puis apres les plus fermes & constants, quand ils se sont vne fois resolus au bien.

Après cela ie luy dis comme de moy-mesme, que par sa depesche que i'auois receuë ie ne voyois point que du costé d'Espagne on eust encores donné aucune satisfaction au Roy touchant l'affront qui auoit esté fait à son Ambassadeur, & que cela pourroit causer quelque grand mal. Sa Sainteté me respondit qu'elle en auoit escrit au Roy d'Espagne, & estoit d'ailleurs aduisee par son Nonce qu'il trauiilloit fort à accommoder les choses, & luy en donnoit bone esperance, Qu'il falloit que nous aussi de nostre costé nous contentassions de ce qui s'en pourroit raisonnablement tirer, & ne

laissons échapper des mains la paix qui nous estoit si bien. Cela parachevé, ie luy dis que la semaine suiuite seroient les quatre temps, & que ie ne m'enquerois point s'il feroit promotion, ou non, & croyois plustost que il n'en feroit point qu'autrement: mais en tout euenement i'auois estimé luy deuoir ramenteuoir les deux subiets dont le Roy l'auoit fait supplier par cy deuant.

Il se print à rire, & à secoüer ses bras, sans me respondre vn seul mot: ce qui pourroit estre pour quelque soubçon de promotion, & mesme d'autant que Monsieur le Cardinal Aldobrandin quand ie luy dis ce que dessus ne me respondit non plus. Toutefois i'incline plustost à croire qu'il n'en fera rien pour ceste fois. C'est le principal de ce qui se passa en ladite audience: maintenant ie respondray au reste de vostre dite depesche. I'ay veu la copie de la lettre de Monsieur de Refuge, & cogneu la diligence dont il vse pour auoir de l'Abbé d'Ambournay copie collationnee des priuileges iadis accordez par les Papes aux Ducs de Sauoye sur la nomination des benefices de Bresse, & de leurs autres pays, & puis qu'il ne tenoit, comme il semble, qu'à trouuer qui collationnast lesdits priuileges, i'estime que vous ne tarderez gueres à receuoir lesdites copies.

Le n'ay encores pû auoir chez moy l'oncle auquel le sieur Marquetto m'a remis, pour les trois cens escus que le Roy luy a destineez: mais ie ne cessay que ie ne les aye deliurez. I'estime qu'ils retardent tant l'un que l'autre, afin qu'on ne les estime plus aspres de profit que d'honneur & de reputation. I'ay enuoyé à Monsieur le Sacristain du Pape la lettre qu'il a plû au Roy luy escrire, dont il a esté tres-aïse, & s'en tient fort honoré: la premiere fois que ie le rencontreray, i'y adiouteray encores les belles paroles, comme l'on dit en ce pays-icy. Vous m'avez annoncé vne tres-belle nouuelle que Monsieur le Cardinal de Loyeuse deuoit venir bien tost par deçà; d'autant que outre qu'il m'a tousiours esté tres-bon Seigneur en mon particulier, ie m'assure que son seiour en ceste Cour tournera grandement au seruice du Roy, & à la reputation de la France. Je ne vous scaurois rien dire pour ceste heure de l'alliance qu'on a dit au Roy qui se traicte pour le Roy de Pologne, n'en ayant rien entendu iusques icy, & estant chose qui peut estre & n'estre point. Je feray ce que ie pourray pour en scauoir la verité: & encores qu'il y ait du hazard à s'enquetter, si est-ce que ie croy que comme de moy-mesme ie m'adresseray à celuy mesme qu'on dit la traicter, avec lequel i'ay quelque amitié & confiance, & vous tiendray compte de ce que i'en apprendray. Cependant pour fin de la presente ie vous escriray des occurrences de deçà. Le comperage du Pape avec le Roy d'Espagne touchant l'enfant qui doit naistre de la Royne d'Espagne, dont i'escriuis par ma precedente depesche, m'a esté confirmé, ensemble les presens que la Sainte Eté enuoye pour ledit enfant.

Depuis ma derniere est venu adois comme le Prince Doria estoit arriué le 22. d'Aoust, avec le reste de l'armée de mer en l'Isle de Maiorque, où dès le douzième estoient arriuez avec 17. galeres le Duc de Parme & le seigneur Carlo Doria, & que toute ladite armée, en nombre de 68. galeres, estoit partie le 28. d'Aoust pour aller en Alger; mais il s'en peut douter pour la raison que ie touchay par ma dite lettre derniere. Et d'autant que ladite Isle

de Majorque est sans comparaison beaucoup plus proche de France que d'icy, & que l'Espagne, desormais les nouvelles de ladite armee iront premierement toucher la France, vous les sçavez plustost dar delà que nous icy: tellement qu'il ne sera plus besoin que ie me mette en peine de vous en escrire. Aussi est venu aduis que les galeres de Malte couroient la coste de la Moree, & que les gens de guerre desdites galeres estoient entrez par escalade en vn fort appellé en langue Turquesque Panana, autrement Geucoscat près Mamo, & y auoient pris vn bon nombre de Turcs, & encloué l'artillerie ne la pouuans amener, nonobstant que le Cicala fust à Mamacino aussi en la Morce avec quarante galeres, en ayant seulement enuoyé quatre en Egypte pour la conduite de son fils destiné Gouverneur de ce pays-là.

Le Comte de Lemos Viceroy de Naples a esté griefuement malade d'une dissenterie avec vne fièvre, mais à present il se porte tellement, qu'on le tient pour estre hors de danger. Il y a icy des deputez du Clergé d'Espagne pour se plaindre de la concession faite par le Pape à leurs Roys de trois millions d'or par an pour six ans sur ledit Clergé, & particulièrement de ce que la Saincteté a permis que l'exécution s'en fist par les ministres mesmes du Roy d'Espagne. La plainte en a esté faite non sans beaucoup d'aigreur du costé desdits deputez, & de desplaisir du costé de la Saincteté.

L'escriuis par ma dernière comme le Patriarche de Venise auoit esté examiné vn Dimanche vingt-sixiesme d'Aoust: depuis i'ay sçeu que l'Ambassadeur de Venise auoit auparavant fait grande instance, & comme vne espece de protestation, que ledit Patriarche ne fut point examiné; & que nonobstant ledit iour de Dimanche Monsieur le Cardinal Aldobrandin ayant conuié ledit Patriarche à dîner, le remit iusques à enuiron les vingt-heures, & puis le mena en son carrosse chez le Pape pour estre examiné, sans luy en auoir rien dit auparavant. L'examen fust fort doux, & fait par le Pape mesme, & en iour de Dimanche, là où les autres examens se font le Ieudy, & toutesfois ce fut en presence d'une partie des Cardinaux qui sont de la Congregation de l'examen. Ledit Ambassadeur de Venise fasché de ce que l'examen auoit esté fait contre son instance & expectation, despescha incontinent vn courrier en diligence vers la Seigneurie, luy rendant compte de ce qui s'estoit passé, en la suppliant de luy commander ce qu'il auroit à faire. Cependant ie ne fus point à l'audience le Vendredy ensuiuant dernier iour d'Aoust, & ledit courrier fut de retour le Dimanche second iour de ce mois, portant aduis que la Seigneurie estoit demeurée contente de ce qui s'estoit passé, & commandement audit Ambassadeur d'en remercier la Saincteté. Ce que ledit Ambassadeur alla exposer au Pape le iour mesme de l'arriuee dudit courrier. On pense que la Seigneurie en ait ainsi vû, non pour plaisir qu'elle en ait pris, mais pource que c'estoit chose faite, & qu'il n'y auoit plus de remède.

Monsieur le Cardinal Aldobrandin a acheté du Duc d'Vrbain le palais d'Vrbain en la rue du Cours, auquel ont logé depuis vn fort long-temps les Ambassadeurs d'Espagne, & le Duc de Sesse y loge encore à present. Le prix est de trente mille escus, & la despenſe que ledit seigneur Cardinal

desseigna d'y faire pour le meliorer montera à beaucoup plus. Ledit Duc de Sesse est apres à trouuer vn autre palais, iacoit que ledit Seigneur Cardinal luy ayedit qu'il pourroit continuer d'y demeurer autant qu'il luy plairoit. Le Pape escrit vn brieſ au Roy en faueur de Monsieur Perrin son Souſdataire, lequel brieſ sera presenté par Monsieur le Nonce nouveau. Je vous prie de continuer à aider ledit ſieur Perrin & tant faire qu'il ſoit paisible de son Abbaye, y ayant desia trop long temps que cét affaire traifne, puis qu'il ne nous ſeroit beſoin pour maintenir icy la reputation de la iuſtice, & de la reuerence que nous deuions au ſainct Siege, & pour eſtre gratifiez des graces que nous en deſirons. Apres auoir eſcrit ce que deſſus, arriva hier auſoir à deux heures de nuit vn extraordinaire expedie de Lyon pour vacance de quelques benefices, par lequel ie receus la depeſche qu'il vous pluſt me faire à Monſtreuil le dernier d'Aouſt : aux principaux poinſ de laquelle ſeruira de reſponſe le contenu cy deſſus, & particulièrement au ſaiſt de Monsieur de la Rochepot & de Chasteau Daufin, dont ie vous ay eſcrit auoir parlé au Pape en moderniere audience. A quoy ie n'ay rien à adiouſter, ſinon premierement, qu'en l'Edit de pacification de l'an 1577. article 10, & en l'Edit de Nantes 1598. article 14. il eſt expreſſément prohibé de faire aucun exercice de la nouvelle religion es terres & pays du Roy qui ſont deçà les monts. Secondement, que le lieu & place de Chasteau-daufin eſt deçà les monts. Troiſieſmement, que pendant le temps que Monsieur de Sauoye a tenu ceſte place ledit exercice n'y a point eſté. Quarriieſmement, qu'on dit qu'auant que ledit Duc de Sauoye l'occupast, ledit exercice n'y eſtoit non plus, & n'y fut iamais eſtably par autorité publique; & ſi quelques fois les huguenots y ont preſché, ç'a eſté par vſurpation de quelques ſoldars huguenots de ladite garniſon, & pour peu de temps. A quoy nous auons à reſpondre preciſément, & à parler de ladite place, & non des valees. En cinquieme lieu, ie vous prie croire que ce que i'en ay eſcrit cy-deuant, n'a point eſté pour contenter le Pape, auquel neantmoins ie deſire, comme ie dois, tout iuſte contentement: mais ç'a eſté pour le bien du ſervice du Roy au répoſe meſme, & pour la reputation de ſa M. aupres du S. Siege, & en toute l'Italie, qui me fait & me fera toujours deſirer qu'en ladite place on faſſe ceſſer ceſte nouueauté, quand bien il faudroit recompenser ces gens ailleurs delà les monts, auſquels neantmoins, eſtans les choſes comme deſſus, il n'eſt deub aucune recôpenſe. Tout maintenant ie viens d'entendre qu'il eſt venu aduis que l'armee de mer du Roy d'Eſpagne qui eſtoit partie de Maſorque le 28. d'Aouſt, s'en retourna en la meſme Ile pour auoir eſté batuë de la tourmente, & aduertie que l'entreprife d'Alger eſtoit deſcouuerte. Vous le deuiez ſçauoir par delà auant que ceſte-cy arrive à vous: comme auſſi ſi elle aura pris autre route que celle d'Alger, pouant eſtre que ce n'ait iamais eſté leur intention, ains que leur deſſein fuſt ailleurs, comme en Irlande, ou en Angleterre meſme, en changeant de vaiſſeaux ſur la mer Oceane, ainſi que vous aurez pû voir par mes precedentes depeſches, & que ie m'en ſuis donté quelques fois. Atant, &c. Monsieur, &c. De Rome ce 17. Septembre, 1601.

## A MONSIEVR DE VILLEROY.

CCLXXXIV.

**M**ONSIEVR, Par ma dernière dépesche qui fut du 17. Septembre, ie respondis à deux des vostres des 18. & dernier d'Aoust qui ont esté aussi les dernières que i'ay receuës. Le lendemain de madite dépesche 18. Septembre, le Seigneur Henry Firliir Ambassadeur du Roy de Pologne me vint voir, d'autant qu'il vouloit partir de là à peu de iours pour s'en retourner en Pologne, comme il partit Samedy 29. Septembre; & apres qu'il m'eust dit ce qu'il voulut, & que ie luy eus respondu, ie l'interrogeay de l'alliance dont vous m'auiez escrit par vostre lettre du 18. Aoust, non sans auoir v'sé premierement d'une preface appartenante à vn traitt si hardy, i'auoit que nous soyons amis dés long temps auant qu'il eust ceste charge, & qu'il ait tousiours monstré grande affection à la France, estant nay du tēps que le Roy Henry 111. estoit en Pologne, & tenu aux fons de Baptisme par la M. dont il porte le nom. Il me respondit fort candidement qu'il n'en auoit iamais esté parlé, & que son Roy n'y auoit oncques pensé, & qu'aussi bien la noblesse dont leur Royaume estoit plein, ne le trouueroit point bon. Je luy dis que ie l'auois ainsi creu de moy-mesme, & que tant plus hardiment ie luy en auois ouuert le propos. Apres cela il me dist qu'il estoit vray qu'il auoit demandé au Pape, par forme de conseil, où il luy sembloit que son Roy se deust marier en vne si grande penurie de Princesses qu'il y auoit auourd'huy, & que Monsieur le Cardinal Aldobrandin luy auoit dit qu'il y auoit en France la sœur de Monseig. le Prince de Condé; & sur cela il me demanda quel âge elle auoit. Je luy dis que pour le moins elle auoit 14. ans, d'autāt que son Pere estoit mort en Mars 1588. laissant Madame la Princesse grosse de mondit seigneur le Prince de Condé. Lors que ie vous escrins ma dernière lettre, la goutte estoit venuë au Pape en vn bras le iour auparauāt, & à peine en estoit-il guaruy qu'il luy vint vn courrier de Croace, portāt que le seigneur lean François Aldob. estoit griefuemēt malade, & à peu de iours de là en vint vn autre qui en apporta la mort; dont sa Saincteté & toute sa maison a esté fort contristee. Sadite Saincteté en parla vn peu au Cōsistoire qu'elle tint Mecredy 29. Septēbre, & entr'autres choses nous exhorta de ne point faire enuers luy ny enuers ses parens les condolēces en tel cas accoustumees, qui ne seruiroient que d'aigrir la playe encore sanglante; Qu'ils estoient Chresttiēs, & sçauoient que nostre Seigneur Iesus Christ estoit mort, & qu'il nous falloit tous mourir: & comme il estoit resuscité, aussi ferions-nous. Ledit seigneur lean François a eu fort peu de bon-heur en ce voyage; car arriuant en Croace il n'y auoit aucune prouision de viures, dont ses soldats eurent beaucoup à patir, & s'en retournerent enuiron la moitié. D'autre costé, les principaux Colosels qu'il auoit menez d'icy, comme les sieurs Paulo Sauello, Horatio Baglione, & le Marquis de Malatesta se mutinerent pour yoir preferé à eux le sieur Flaminio Delfino Maître de camp.



general, & quitterent les six enseignes qu'ils auoient chacun à commander. Sa Sainteté a fait prier Dieu par les Eglises de Rome pour l'ame du defunct, & fust elle mesme à dire vne Messe des Morts en l'Eglise S. Gregoire Vendredy 28. iour de Septembre, & en tournant de là alla visiter & consoler la signora Olympia femme du defunct, & sœur de Monsieur le Cardinal Aldobrandin, & leur mere, & les enfans dudit defunct.

Ce mesme iour de Vendredy 28. iour de Septembre sa Sainteté donna audience aux Ambassadeurs, & i'y allay aussi, & donnay compte à sa Sainteté de la lettre que j'auois receuë du Roy du dernier d'Aoust, & du voyage de sa Maïesté à Calais, & des lettres que sa Maïesté auoit receuës de Monsieur de la Rochepot du 19. d'Aoust, & de la Cour du Roy d'Espagne, qui n'auoit encores donné aucune satisfaction sur les indignitez qui auoient esté faites audit sieur de la Rochepot: ains l'Adelante de Castille auoit recommencé à emprisonner & tourmenter les marchands & patrons des nauires François, dont s'en ensuiuit quelque grand inconuenient s'il n'y estoit en brief remedie. Sa Sainteté ne peut croire que ces nouueaux emprisonnemens & tourmens soient vrais, & quant au reste, il me dist qu'il esperoit qu'il s'accommoderoit, & qu'il en auoit escrit luy mesme au Roy d'Espagne, & scauoit que son Nonce y faisoit tout ce qu'il pouuoit, duquel il me dist auoir lettres du mesme iour 19. Aoust. Mon intention n'estoit point de luy parler du feu seigneur Iean François Aldobrandin, attendu qu'il nous auoit dit au Consistoire precedent: mais sa Sainteté m'ayant dit sur la fin comme ie voulois partir, **VOUS VOYEZ COMME LES CHOSES DE CE MONDE VONT;** ie luy dis qu'ouy; mais que ie n'auois eu la hardiesse de luy en parler, attendu ce qu'il nous auoit commandé au Consistoire, Que ie m'asseurois que le Roy en seroit fort marry, estant sa Maïesté si obligée à sa Sainteté, & si affectionnée à toute la maison Aldobrandine, qu'il ne pouuoit luy arriuer bien ny mal, que sa M<sup>re</sup> ne le sentist comme aduenü à elle-mesme. A quoy il ne respondit rien, sinon que Dieu fust loüé de tout en soupirant. Cela me donna occasion & hardiesse d'en faire autant avec Messieurs les Cardinaux ses nepueux, qui me dirent l'un & l'autre que sa M<sup>re</sup> auoit perdu vn tres-humble & tres-devot seruiteur, & que tout ce qui restoit de ceste maison estoit & seroit tousiours à son seruice. Je croy qu'il sera bon que sa M<sup>re</sup> en escriue à sa Sainteté & à Messieurs les Cardinaux Aldobrandin & S. George, & à la signora Olympia, & commande à Monsieur l'Ambassadeur de rendre les lettres, & les accompagner de propos conuenables à vn tel office.

Comme j'attendois l'audience, suruint l'Ambassadeur du Roy de Pologne, qui venoit se licentier du Pape pour partir le lendemain, lequel me dist qu'il auoit deliberé de me venir voir le soir; mais puis qu'il me trouuoit en commodité, il vseroit de ceste occasion, & gagneroit ce temps tant pour moy que pour luy-mesme; Qu'il auoit à me dire qu'il auoit receu lettres de son Roy, qui luy escriuoit que le Comte Charles son oncle qui luy faisoit la guerre, auoit enuoyé homme exprés au Roy pour luy demander des Capitaines François, pour commander à des gens tant de cheual que de pied, & que sa Maïesté luy en auoit accordé, & qu'ils estoient ja a trineux au camp dudit Comte Charles, dont son Roy estoit grandement enuieillé, atten-

du la notoire iniustice du Comte Charles: & l'obseruance & reuerence que sa Maieité de Pologne porte à nostre Roy, & toute la nation de Pologne à la Françoisé. Il ne me dist point qu'il eust charge de s'en plaindre au Pape: mais ie me doute qu'il en auoit, & qu'il la fist en l'audience qu'il eust apres moy. Je luy respondis que ie ne croyois point telle chose; ains au contraire ie m'asseurois que si le Roy auoit à ayder l'un ou l'autre, il ayderoit plustost le Roy de Pologne que ledit Comte Charles, pour plusieurs considerations que ie luy mis au deuant. Et de fait, Monsieur, ie luy respondis comme ie croy, & comme l'estime estre du deuoir; car il se scait par toute la Chrestienté que le Comte Charles a iniustement occupé le Royaume de Suede sur le Roy de Pologne son nepueu, & merite que tous les Roys se tournent contre luy, pour oster vn exemple si pernicleux, & de si perilleuse consequence pour tous les Princes qui desirent la seureté de leurs Estats, & la transmission d'eux à leur lignee & posterité. Dauantage, ledit Comte Charles ne se contente pas d'auoir proditoirement usurpé le Royaume de Suede, mais il a encores l'audace d'aller assaillir son nepueu au Royaume de Pologne qui luy est acquis par election. En troisieme lieu, il est heretique Caluiniste, & le Roy de Pologne Catholique. Cecy est encores de grande consideration, que le Roy de Pologne a pour ennemy l'Empereur & tous les Princes de la maison d'Autriche, qui sont aussi & seront toujours les nostres, non seulement en guerre, mais aussi en tout temps de paix; & que les Polonois ont tant estimé les François, qu'il n'y a pas encore trente ans qu'ils eleurent vnanimement vn de nostre nation & du sang Royal de France pour leur Roy, & pour commander sur leurs biens, honneurs, & vies. Je vous prie me mander ce que i'auray à respondre de ce fait au Pape, & à d'autres qui m'en pourront parler: cependant ie le nieray fort & ferme, & le feray en bonne conscience, pource que ie croy fermement qu'il n'en est rien.

L'Ambassadeur du grand Duc vint à moy ledit iour Vendredy 28. Septembre au matin de la part de son Altesse pour me dire que lors que Monsieur d'Eureux s'en retournoit de Rome, & qu'il passa par l'Estat des Venitiens, le Comte Iean Domenico Albano, qui est vn seigneur d'autorité & de grande suite en son pays, offrit au Roy son seruice & de tous les siés, & particulièrement d'un sien fils appellé le Comte Iean Francesco Albano; & que ledit sieur Euesque estant arriué en Cour le dist au Roy, qui accepta à son seruice ledit Comte Iean Francesco, & luy ordonna deux mille escus de pension, comme ledit sieur Euesque l'escriuit à Monsieur Seraphin, & ledit sieur Seraphin audit Comte: lequel sur cela se declara & publia seruiteur du Roy; & mesme la Seigneurie de Venise luy ayant offert vne certaine charge, il auoit respondu que le Roy l'auoit accepté à son seruice. Maintenant il desireroit auoir vn breuet de sa Maieité, pour monstrier au monde que ce qu'il en a dit n'a point esté par vanité, mais pour estre chose vraye. Que si sa Maieité luy fait payer les deux mille escus, il y en aura de l'obligation, sinon il se contentera dudit breuet. C'est ce que me dit ledit Ambassadeur de la part de Monsieur le grand Duc, me requerant d'en escrire: ce que ie viens de faire, & en suis au bout estant ce, les premieres nouuelles qu'il en ay iamais ouyes. Monsieur le Cardinal Borghese qui est Protecteur des

Escollois, & Vice protecteur des Anglois, me parla mecredi dernier 26. Septembre d'escrire au Roy qui luy pleust eriger à Paris vn College des Escollois, comme le Roy d'Espagne en a erigé en plusieurs lieux pour les Anglois. Je croy que ce seroit vne chose pie & sainte; & si sa M. trouuoit bon de le faire, il y a long temps que d'autres m'auoient parlé de luy proposer d'en eriger pour les Anglois, tant pour la mesme pieté, que pour contreminer la mine des Espagnols, qui ne tend qu'à empieter l'Angleterre apres la mort de la Roïne, si plustost ils ne peuent. Quant aux occurrences de deçà, outre ce que ie vous en ay mis cy-dessus, il s'y dit des mensonges forgees à Thurin, & publiees icy par les Espagnols, que l'Ambassadeur d'Espagne a esté emprisonné à Paris; que les François ont attenté de surprendre Pampelune & Fontarabie; & que le Roy est allé à Calais pour favoriser les assiegez d'Ostende, & s'aboucher avec la Roïne d'Angleterre, & le Prince Maurice; & telles autres dignes de leur forgeron, & de ceux qui les vont debitant.

I'ay veu lettres de Thurin, par lesquelles est porté que tout aussi tost que Monsieur de Nemours y fut arriué, l'Ambassadeur d'Espagne y residant se mist apres luy pour luy persuader d'esponser la signora Matilda sœur naturelle du Duc, se faisant fort que le Roy d'Espagne y seroit pour cent mille escus, & le voulant par ce moyen obliger au Roy d'Espagne. Mais ce Prince est si sage, qu'il ne fera en cela rien sans la permission du Roy, ny sans le conseil & autorité de Madame sa mere. Je sçay qu'il s'est parlé de le marier avec vne fille du Duc de Modena: mais pource qu'on voudroit par mesme moyen mettre fin au differant qui est entre Madame de Nemours & ledit Duc de Modena sur la succession du dernier Duc de Ferrare, & que je sçay que les pretentions des parties sont fort esloignées les vnes des autres, il seroit mal aisé que ce mariage reussisse. Le Pape partit hier pour Frefcati, où il se dit qu'il demeurera pour tout le mois. I'ay tant de fois enuoyé chez l'oncle du sieur Marquéssetto qu'en fin il est venu parler à moy: mais quoy que i'aye scien dire, il n'a iamais osé prendre les 300. escus. Que s'il les eust refusez tout à plat, ie n'y ferois autre chose; mais il m'a dit que son neuueu & luy chercheroient l'opportunité d'obtenir permission de Monsieur le Cardinal Aldobrandin de les prendre, me priant de les laisser cependant au fond d'un coffre. Le luy ay repliqué qu'il y auoit plus de six mois que ie les auois, & que i'en voulois estre deschargé, & qu'il les prit & mit en banque, ou ailleurs où il luy sembleroit; mais il m'a persisté qu'il n'oseroit. De façon que par ce delay plustost que refus ceste somme demeure comme enclauée, sans qu'on en puisse faire autre chose, & moy en suspens & irresolu; qui est chose du tout contraire à mon naturel & à mes intentions. A tant, &c. Monsieur, &c. De Rome le 1. d'Octobre 1691.

---

A V R O Y.

CGLXXXV.

SIRE,

Depuis ma dernière espérance qui fut du premier de ce mois le Pape a

toujours esté à Frescati, & la plus part du temps indisposé de la goutte,  
 qui luy retourna bien tost apres qu'il fut là, ce qui a esté cause que ie n'ay de-  
 puis esté à l'audiéce, aussi que ie n'auois rien de pressé. Le Védredy 5. de ce  
 mois à 20. heures, comme l'on compte à Rome, y arriva le courier Cesar  
 Gallo qui me rendit les depeschés de vostre Maiesté des 12. 26. & 27. Sep-  
 tembre, par la dernière desquelles j'ay appris l'heureuse naissance de Mon-  
 seigneur le Dauphin; dont ie receus vne ioye indicible, & en louay Dieu de  
 tout mon cœur, comme de chose infiniment importante non seulement à  
 Paix & contentement de vos Maiestez, mais aussi à la seureté de la Cou-  
 ronne, repos & tranquillité du Royaume, & au bien commun de toute la  
 Chrestienté. En quoy entre autres choses, il se voit manifestement la bene-  
 diction de Dieu sur la personne de vostre Maiesté, & par le moyen d'elle  
 sur toute la France: vous ayant sa bonté diuine donné lignee de ce maria-  
 ge, le plustost & le mieux qu'il se pouoit faire par l'ordre de nature. Je le  
 supplie qu'il luy plaise continuer & perpetuer les graces & prosperitez,  
 tant en ce sujet & en ceste sorte de benediction, qu'en toutes autres. Je des-  
 peschay incontinent audit Frescati vn Gentil-homme en poste vers Mon-  
 sieur le Cardinal Aldobrandin avec vn petit mot de lettre, & luy enuoyay  
 celle mesme que vostre Maiesté m'en escrivoit, à fin qu'il en donnast aduis  
 à sa Sainteté, & le print pour soy: à quoy il me respondit en la maniere  
 qu'il plaira à vostre Maiesté voir par la response qui sera avec la presen-  
 te. Et aussi-tost que i'eus depesché ledit Gentil-homme, i'enuoyay en  
 donner aduis aux Cardinaux qui estoient à Rome, & en escriuis aux ab-  
 sens, tous lesquels ont enuoyé s'en conioyr avec moy, & quelques vns y  
 sont venus en personne, & plusieurs en escriuent à vostre Maiesté. Comme  
 aussi sont venus à moy qualistous les Ambassadeurs, celuy mesme d'Espa-  
 gne y voulut venir; mais ayant enuoyé deuant en mon logis, il luy fust rap-  
 porté que i'estois dehors estant allé vers Monsieur le Cardinal de Flo-  
 rence. Je laissay que la nouvelle de ceste natiuité se diuulgast par Rome le  
 dit iour Vendredy, laquelle apporta grande consolation & aise à toute la  
 cité, & le Samedi au soir à vingt-trois heures j'allay en l'Eglise sainct  
 Louys, où setrouuerent tous les gentils-hommes & autres François qui  
 sont à Rome, outre grande multitude d'autres gens, & y fut chanté le  
 Te Deum, & incontinent apres furent faits feux de ioye, tant au deuant  
 de ladite Eglise, que des maisons particulieres des François & autres  
 bien affectionnez au service de vostre Maiesté & au bien du Royaume.  
 Le Dimanche au matin ie retournay en ladite Eglise sainct Louys,  
 où fut celebrée solennellement vne grand' Messe pour rendre gra-  
 ces à Dieu de ce grand bien, & le soir furent derechef faits feux  
 de ioye comme le soir auparavant. Ainsi comme la Messe ve-  
 noit d'estre finie, & que nous nous leuions pour nous en aller, ar-  
 riva l'escuyer du Duc de Sesse Ambassadeur du Roy d'Espagne, qui  
 me dit de la part dudit sieur Ambassadeur que comme ie luy auois  
 deux iours auparavant fait part de la naissance du Dauphin de France,  
 ainsi auoit-il estimé estre de son deuoir de me faire sçauoir que la  
 Roynie d'Espagne estoit accouchée d'une fille: ce qui estoit venu bien-  
 à point pour pouoir vn iour avec l'ayde de Dieu faire vn bon mar-

riage, & par ce moyen estreindre la paix de plus en plus, & la bonne amitié entre les deux Couronnes, & coniondre tous ces Royaumes ensemble. Je l'en remerciay tres-affectueusement, acceptant ce bon presage, & priant Dieu qu'il eust vn iour effect. Depuis i'ay sceu que le Pape manda aux Cardinaux chefs d'ordres, qui est à dire au premier Euesque, au premier Prestre, & au premier Diacre, qu'ils deliberaissent ensemble, s'il faillloit que la Sainteté fit quelque allegresse sur la naissance du Dauphin de France, & que comme il ne vouloit rien innouer, aussi ne vouloit-il obmettre rien de ce qui se trouueroit auoir esté fait autresfois en telle occasion. Lesdits trois chefs d'ordre s'assemblerent & delibererent, mais ils ne conclurent rien. Sa Sainteté auant que mander ausdits trois chefs d'ordre, auoit demandé aux Maistres des ceremonies s'ils en auoient quelque chose en leurs registres & memoires; & ils responderent que non. Aussi fit il demander au Cardinal de Como qui estoit à Frescati & y a vn Palais, & est des plus vieux Cardinaux de ce college, s'il se souuenoit qu'à la naissance du Roy d'Espagne qui est à present en l'annee 1578. le Pape Gregoire XIII. eust fait faire quelque allegresse: lequel Cardinal respondit ne s'en souuenir point bien; & qu'il luy sembloit qu'il n'y eust que les particuliers affectionnez qui en fissent des feux de ioye. Je trouue neantmoins en vn certain sermon imprimé de l'Euesque de Bitonto, qu'en l'annee 1545. il fut fait publique allegresse à Rome, & à Trente par tous les Prelats du Concile, pour la naissance du premier nay du Prince d'Espagne fils de Charles le Quint Empereur qui viuoit encores à lors, c'est à dire, pour Dom Charlo fils du feu Roy d'Espagne Philippe II. Je mettray avec la presente vn extraict de deux articles du dit sermon, & le remontreray au Pape & au Cardinal Aldobrandin en ma premiere audience, leurs disant entre autres choses que vostre Maiesté & tous les François se contenteront tousiours de toute la demonstration que il plaira à sa Sainteté faire, comme ce sont choses qui ne doiuent estre mendices, ny obtenues par importunité, ains doiuent prouenir de son bon gré, mouuement, & de sa bien-veillance: mais que le mal & la consequence seroit en l'inégalité, si ayant autresfois esté faite allegresse pour les Princes d'Espagne, on n'en faisoit point pour le Dauphin de France; & encores pis si d'icy à 10. ou 12. mois que le Roy d'Espagne pourra auoir vn fils male, on faisoit des feux & tels autres signes de ioye qu'on eust obmis en la naissance du fils Dauphin de France. C'est ainsi que i'ay delibéré dem'en gouverner; quand le Pape fit faire certains presents pour l'enfant qui naistroit de la Roïne d'Espagne, il en fit faire aussi pour celuy qui naistroit de la nostre, & dit-on qu'il les enuoyera par le Comte Octauius Tassone: qui est tout ce que i'auois à dire à V.M. sur la lettre du 27. Septembre.

Je viendray maintenant aux deux autres 12. & 26. Septembre, & diray au Pape à la premiere audience que i'auray de luy, la belle & honneste response qu'il vous a pleu faire à ce qu'il m'auoit dit qu'il prioit Dieu tous les matins pour vos Maiestés, & la peine que vostre Maiesté prend pour l'instruction & conuersion de Madame sa sœur, & la courtoisie dont vous aués usé enuers les Archiducs, leurs renuoyant ces deux subiects leurs, qui ont esté conuaincus de l'entreprise de Mets, & comme tels condamnez à mort par la Cour de Parlement. Des Princes de la Mirande. le 27. ca. ny rien ap-

pris depuis mes dernières , & n'ay point aussi changé d'avis touchant l'instance que vostre Maiesté a commencée en faueur du seigneur Don Alexandre. Que le peu d'inclination que le Pape & Monsieur le Cardinal Aldobrandin ont monstté à le faire Cardinal , ne vienne en grande partie de l'alliance que ceste maison de la Mirande a avec celle d'Este , il n'en faut point douter , puis que l'un & l'autre me l'ont dit à moy , comme i'en ay rendu compte à vostre Majesté en son temps , & que ledit Seigneur Cardinal Aldobrandin le dit à vostre Maiesté mesme en la dernière audience qu'il eust d'elle à Lyon , sur l'instance que vostre Maiesté luy faisoit d'interceder pour ledit seigneur Don Alexandre. Que la desffiance que les Aldobrandins ont de ceux d'Este & de leurs alliez , ne soit accreuë par la pension qu'on dit que le Duc de Modena a acceptée du Roy d'Espagne , & par le support qu'il cherche de ce costé-là , il n'en faut non plus douter : estant chose naturelle , que tant plus ceux qui nous veulent mal se fortifient , tant plus nous nous desffions d'eux , & de ceux desquels ils s'appuyent. Que d'ailleurs le Cardinal Aldobrandin ne soit grandement intéressé & que le profit & ambition puisse extraordinairement sur luy , non seulement ie ne l'ay point celé à vostre Maiesté , mais ie vous l'ay escrit encores tres-expressément autresfois , & mesmes lors que Monsieur de Sillery & moy ne le peusmes retenir d'aller , ains de courir à la legation de France & de Sauoye. Il peut estre aussi que sadite declaration dernière tende à toutes ces fins que V. M. m'escrit , & soient de belles parolles à la façon de la Cour Romaine , & qu'il y ait encores quelque dessein particulier , comme celuy d'Angleterre que ie vous ay escrit cy-deuant , auquel ie me vais tousiours confirmant , quelque doute qu'on en face par delà , comme pour plus grand esclarcissement i'en feray vne lettre expresse à V. M. par le prochain ordinaire , Dieu aydant. En somme Sire , toutes ces choses qu'il a pleu à V. M. m'escire à ce propos sont contingentes , qui peuuent estre & n'estre point : & comme V. M. sçait trop mieux & par raison & par experience , il n'y a rien de plus obscur ny de moins assuré que la volonté & affaires des hommes , & mesmement de ceux qui sont nourris en vne escole de dissimulation , & qui n'ont autre mire que l'ambition & le profit : l'occasion desquels interrests se changeant , comme il aduiet souuent , telles gens sont par mesme moyen portez diuersement , ores çà ores là , sans qu'on y puisse fonder rien de stable , sinon pour autant de temps que l'interrest dure. Et le mieux que ie sçache , est de prendre de ceux-là ce qui s'en peut auoir , & s'en seruir du iour à la iournée , selon qu'on les voit disposez par le vent qui souffle. C'est pourquoy , Sire , encores que ie vous aye tousiours escrit fort librement de toutes choses , selon que les occasions s'en sont presentées , ie n'ay pourtant voulu vous assurer ny aussi de l'assurer de ce qui de sa nature estoit incertain & sujet à changement. De cela vous assureray-je bien , que ie n'espere ny ne crains rien de ceste Cour , & ne pense qu'à m'acquitter du deuoir d'homme de bien & de bon Ecclesiastique , & de bon & fidelle sujet & seruiteur tres-obligé que ie suis à V. M. comme ie pense vous pouuoir aussi assurer de nouveau , que V. M. donnant au Pape les satisfactions au fait de la religion qu'elle luy pourra donner sans preiudicier au repos de son Royaume , elle trouuera tousiours en sa Sainteté toute sincere , cordiale , & vrayement paternelle

amitié : ce que ie diray à Monsieur de Bethune tout aussi-tost qu'il sera par deçà. Sa Sainteté, comme i'ay dit au commencement de la presente, est encores à Frescati, & a disposé des offices & estats qu'auoit le seigneur Iean François Aldobrandin en faueur du Seigneur Siluestro fils aîné du deffunct, comme sont les offices de Castellan, du gouuerneur de Borgo, du Capitaine general de la garde du Pape, tant des cheuaux legers que des Sniffes, & de toutes les forteresses de l'Estat Ecclesiastique, & a ordonné que tous les profits & emoluments desdits Estats soient pris & perceus par la Signora Olympia veufue du deffunct, & mere dudit seigneur Siluestro, & sœur de Monsieur le Cardinal Aldobrandin, & qu'elle les face siens, & les retienne pour & au nom de sa dote, n'ayant esté dotee au contrat de son mariage que de la somme de quinze cens escus. Quant au generalat des armes du sainct Siege, on pense que la Sainteté le reserue pour le Duc de Parme.

Les Espagnols apres auoir pensé toute vne semaine à ce qu'ils auoient à faire sur la naissance de la fille du Roy d'Espagne, commencerent à faire chanter le *T A D E V M* en l'Eglise de S. Iacques Samedi au soir 13. de ce mois & le lendemain la Messe, & à faire faire des feux de ioye: & suiuirent toute ceste semaine aux Eglises des nations suiuettes à la Couronne d'Espagne, cōme des Catalans, des Portugais, des Milanois, Neapolitains & Siciliens. I'ay veu vne lettre escrite de Florence par vne personne publicque, laquelle porte que le Seigneur Firfir Ambassadeur du Roy de Pologne s'en allant d'ioy est passé à la Cour de Monsieur le grand Duc, où il a esté traité & fort caressé, & qu'ils y est parlé de marier le Roy de Pologne avec vne sœur de Madame la grand' Duchesse. Vostre Maieité peut scauoir quelles filles Monsieur de Lorraine a à marier.

Les galeres qui estoient en l'armee de mer qui s'est bien employee ces iours passez sont de resour chez elles, grandement diminuees par vne grande quantité de morts, & encores affoiblies & debilitées par vne infinité de malades. Ce qui accroît les plaintes & murmurations qu'on faisoit desia sans cela de la vanité de l'entreprise. On a desembarqué à Yado, qui est vn port de la Seigneurie de Genes, vn terço d'Espagnols & 15. enseignes d'Italiens, pour les conduire au Duché de Milan, dont ceux dudit Duché sont fort mal contens; iagoit que l'on dise que les soldats Italiens seront licentiez: comme aussi dit-on qu'il est venu commandement du Roy d'Espagne que les 4. compagnies de gens de cheual extraordinaires que le Comte de Fuentes auoit reteuës soient licentiees. L'armee de mer Turquesque a esté ces iours passez es costes de Sicile & de Calabre, sans qu'il se soit entendu que elle y ait fait dommage notable. Monsieur de Bethune vient d'arriner tout maintenant, & pour le peu de temps que i'ay esté avec luy, il m'a semblé y auoir trouué tout le bien qu'on m'en auoit escrit, & quelque chose d'auantage, ce qui me fait esperer que vostre Maieité fera bien & dignement seruir. A tant, &c. Sire, &c. De Rome ce 15. d'Octobre, 1601.

## A MONSIEVR DE VILLEROY.

CCLXXXVI.

MONSIEVR, Je ne vous feray point icy de reditte des choses dont  
 M<sup>i</sup>escriis au Roy, & respondray seulement aux points de vos lettres des  
 24. & 26. Septembre qui en auront besoin, & mesmement au fait des Capu-  
 chins, ayant esté tres aise que le Roy ait fait demonstration de vouloir bien  
 à cet ordre en composant le different qui estoit entr'eux & les Feuillans, &  
 donnant de l'argent pour le paracheuement de leur Eglise d'Amiens. Quand  
 à ce fol & malin Hilaire de Grenoble, il n'y a pas vn seul mot de vray en tout  
 ce qu'il a dit par delà, tout est fausseté & malicieusement controuué, l'o-  
 bedience mesme qu'il a monstree de la teneur qu'on vous a dit ne peut estre  
 vraye, & faut qu'il l'aye faite luy-mesme, ou fait faire par quelque faussaire  
 comme luy. Il est bien vray qu'il eust vne obediencia de M. le Card. de sainte  
 Seuerine, mais non pas de ceste teneur: & vous prie de croire qu'il n'est point  
 besoin de parler au Pape de ne luy fauoriser point, car sa Sainteté n'y  
 pensa iamais, & en a fort mauuaise opinion. Au demeurant, vous ne deuina-  
 stes iamais mieux que d'auoir pensé que le Duc de Sauoye le met en beson-  
 gne; c'est cela sans doute. Et comme il loué grandement vostre sagacité &  
 prespicacité d'auoir penetré iusques à ceste verité, aussi accusay-ie bien fort  
 ma stupidité de ne m'en estre point douté, attendu que ie scauois que le fre-  
 re Cherubin de Chambery le menoit chez les Cardinaux & ailleurs çà & là;  
 & luy donnoit des cognoissances à Rome, comme ie vous escriuis sur la fin  
 de la premiere lettre que ie vous fist touchant ce memoire le 22. Feurier der-  
 nier. Mais à present que vous m'avez ouuert l'esprit, il me semble que i'y  
 vois fort clair. Le Duc de Sauoye desire la ruine de la France & du Roy;  
 plus qu'il ne souhaite sa propre conseruation & celle de ses enfans, & a de  
 la malice & des inuentions diaboliques plus que tous les autres Princes en-  
 semble. Il a proué que le Royaume & la personne du Roy s'asseuroient &  
 s'establissoient grandement par le Mariage de sa Maie. & par la lignee qui  
 en sortiroit, & que seroit le seu des prosperitez du Roy, & de la tranqui-  
 lité de la France, de sorte qu'il n'y auroit plus moyen d'y apporter la con-  
 fusion & desolation en laquelle il a constitué son souverain bien, & le but  
 de toutes ses penées; & partant il a suborné & apposté cestui-cy, qui est  
 tel entre les Moines comme il peut estre entre les Princes, pour dénigrer  
 le mariage du Roy, & les enfans qui en naistroient. Et afin qu'il en fust  
 mieux creu, l'a instruit de faire l'affectionné & passionné enuers le Roy,  
 & de le louer en toutes autres choses, & de tirer des lettres de recomman-  
 dation de la main de sa Maieité, & de s'autoriser de sa creance, & de la  
 fiance que sa Maieité auoit en luy: s'adresser encorés à Madame de Ver-  
 ueil sous couleur de charité & de deuotion, & luy tenir propos de cer-  
 taine pretenduë promesse & escriture qu'il dit estre conceuë par paroles  
 de present, & quand elle seroit en parole de futur. L'accomplissement en-



suivy depuis la rendroit par les Canons de mesme efficace que si elle estoit de present. Apres, s'estant esloigné d'elle a trouué moyen en luy escriuant de luy tirer des lettres escrites de sa main, ou bien d'en falsifier luy-mesme, lesquelles il a portees & monstrees à Rome, comme il fit à moy la premiere fois qu'il me parla, & comme ie sçay qu'il a fait des François, Lorrains, Sauoyards & autres, & n'en aura pas fait moins en France, Lorraine, Sauoye & ailleurs, allumant & couuant par ce moyen vn feu qui pourroit embraser & consumer la France, si Dieu qui la protege visiblement, ne rendoit vains leurs desseins abominables & detestables. Or en ce soubçon, pour ne dire claire verité, attendu ce que ie vous ay escrit cy-deuant des lettres & des propos qu'il tenoit, & en vn si grand danger qui requeroit vne prompte resolution, & vn remede present & secret, ie ne me puis assez esmerveiller qu'on me commande de demander à Rome permission de corriger & chastier ce galland. Mais puis qu'ainsi va, j'ay obey, & escrit au Pere Monopoli, que le Pape tient pres de soy à Frescati, vne lettre de la teneur que vous verrez par la copie que ie vous enuoye, lequel m'a escrit la lettre que ie vous enuoye en son original, & m'a mandé vne adressante au Pere Provincial de Paris ou en son absence au Pere Gardien ou Vicaire du conuent de Paris que ie vous enuoye. Aussi vous verrez par celle qu'il m'escrit comme il leur mande de le chastier, nonobstant quelque obediēce qu'il puisse monstrier, & qu'on luy prenne toutes ses escritures, & me requiert moy que i'enuoye ladicte lettre à personne qui face executer le contenu d'icelle promptement & secrettement & qu'il en fera encores escrire à Monsieur le Nonce par Monsieur le Cardinal Aldobrandin, & par ce mesme ordinaire. La clause que i'adioustay à la lettre que i'escruius audit Pere Monopoli, que si on n'y remedioit tost par la voye ordinaire, il y seroit remedié par l'extraordinaire, a à mon aduis beaucoup aydé à la diligence dont il a vsé. Ce fera donc à vous, Monsieur, à qui i'enuoye ladicte lettre, à en faire executer le contenu, avec la promptitude & secrettesse que ledit Pere Monopoli & le cas en soy desirent; pouruoir à ce que vous sçachiez qu'elles escritures on luy trouuera, & que les lettres qu'il a monstrees par deçà, si elles y sont, soient retirees. Que s'il y a encores d'autres moynes qui se detraquent, vous voyez comme il s'offre de les remettre & chastier si on les luy nomme: mais c'est assez de ce point. J'ay dit à Monsieur le Cardinal del Monte & au Pere de Bernardino Naro page de la Roynne ce qu'il vous a plu m'escire & respondre à ce que ledit sieur Cardinal m'auoit dit touchant ledit page, dont il vous remercie bien humblement, comme ie feray quand il vous aura plu m'enuoyer le priuilege que demande le Duc de Sesse, duquel le Roy & vous m'avez donné intention. A tant, &c. Monsieur, &c. De Rome ce 15. d'Octobre, 1601.

A V R O Y.

CCLXXXVII.

SIRE,

Monsieur de Bethune m'a rendu la lettre qu'il a plu à vostre Maesté m'escire

m'escire par luy, & m'a parlé encores conformément au contenu d'icelle, dont ie baise tres-humblement les mains à V. M. attribuant toute ceste faveur & honneur à la generosité & bonté de vostre Maiesté, & non à aucun merite mien, qui me recognois seruiteur inutile, quoy que plein de bonté & de fidelité à vostre service. J'ay rendu iusques icy audit sieur de Bethune tout le service dont ie me suis peu auiser, & luy continueray cy-apres, Dieu aydant, de tout mon pouuoir & affection. Aussi a t'il commencé sa charge tres-sagement & heureusement, & m'assure que vostre Maiesté en sera tres-bien & tres-diligemment serui, & le Pape & toute ceste Cour en demeurera satisfaite & contente. Cependant ie remettray à luy de rendre cōpte à vostre Maiesté de sa réception & de ce qu'il a traité avec nostre S. Pere, comme de toutes autres choses qui se sont passées depuis son arriuee à Rome. Mais pource que sa Saincteté me commanda Vendredy 19. ensemble audit sieur de Bethune d'escire à vostre Maiesté pour le fait de Chasteau dauphin; i'obeyray à sa Saincteté par la presente sous la permission de vostre Maiesté, laquelle, outre ce que ie luy en ay escrit cy deuant pourra iuger combien sa Saincteté à cecy à cœur, parce que dès la premiere fois qu'il vit Monsieur de Bethune, encores que ce ne fust point proprement audience, ains vne simple reuerence & baise pieds, luy en parla neantmoins de tres-grande affection & à moy quant & quant, nous chargeant tres-expresément l'un & l'autre d'en escire à vostre Maiesté. Et à la verité, Sire, comme il m'a dit plusieurs fois, & comme ie puis m'imaginer de moy-mesme, c'est la plus grande fascherie qu'il ait pour ceste heure, & vostre Maiesté ne pourroit pour le present luy faire vn plus grand plaisir que de l'en deliurer. Car outre qu'il conuient à tout Pape de se peiner de la religion, & pour le salut des ames, & pour l'autorité du S. Siege, cestuy-cy se tient pour affronté & mesprisé, de ce qu'à sa barbe & à la veüe du S. Siege, on dresse & establit aux portes de l'Italie l'exercice du Caluinisme. Et cet affront pretendu est malicieusement aggraué & reaggraué par certains Espagnols & Sanoyards, lesquels bien que Atheistes & sans aucune Religion en eux-mesmes, ont tousiours cherché aupres du Pape & ailleurs de reuoker en doute vostre conuersion & Religion, prouuee neantmoins & verifiée par la continuation & perpetuité de vos actions, & maintenant se seruent de ceste nouveauté de Chasteau-dauphin, quoy que faite sans vostre sçeu, pour colorer leurs calomnies & mesdisances, non seulement contre vostre Maiesté, mais aussi contre le Pape, comme s'estant trop fié & trop promis d'elle. Et comme sa Saincteté n'entend rien du monde plus mal volontiers, aussi luy semble-t'il que luy vous ayant monstré plusieurs bons signes de vraye amitié, au grand desplaisir & creue-cœur de vos ennemis & enuieux; & à vostre M. facile, & de grand profit & reputation, & pour laquelle il vous a prié & reprié en tant de façons. Ce sont en partie les clauses de la fascherie, de laquelle tant plustost vostre Maiesté l'en deliurera, tant plus il s'en sentira obligé, & vous en sçaura gré. Que si i'estois digne d'y interposer mon peu de conseil, ie supplierois vostre Maiesté tres-humblement & de toute mon affection de luy complaire. Aussi bien n'aurez vous iamaïs paix avec luy, & vos affaires ne se feront iamaïs bien en ceste Cour, que cela ne soit fait. Et vostre Maiesté sçait qu'il y a plusieurs grands affaires & plusieurs grâces à

A A A A a

obtenir du Pape, outre que le temps en peut apporter de iour en iour de plus grandes, & accroistre le besoin que vostre Maïesté a de sa Saincteté. Les Princes encores & Potentats, citez & peuples d'Italie, qui est vn des plus considerables pays de la Chrestienté, s'en sentiront aussi obliger, & en loueront & beniront vostre Maïesté, excepté le Duc de Sauoye, & quelques Espagnols de sa facine qui en creueront. Et comme ce qu'ils ont crié & tempesté du presche de Chasteau dauphin n'a point esté pour dessein que ils eussent de le faire cesser, ains pour s'en servir à calomnier vostre Maïesté & le Pape encores: aussi ne pourroient ils receuoir vn plus grand des-plaisir que de se voir oster toute la matiere de calomnie, & d'en voir vostre Maïesté iustifiée, & sa Saincteté consolée & contente. A cela fait encores grandement, que vostre Maïesté en contentant sa Saincteté, ne fera point de tort à ceux de la Religion pretenduë reformée: car premierement Chasteau-dauphin est notoirement deçà les monts, soit-il Dauphiné ou non; & par l'Edit de Pacification de l'annee mil cinq cens septante-sept article 10. & par l'Edit de Nantes de l'an 1598. article 14. l'exercice de ladite Religion est prohibé es terres & pays de vostre obeyssance de deçà les monts, & vostre Maïesté a fait dire plusieurs fois au Pape par Monsieur de Sillery & par moy qu'elle feroit obseruer exactement lesdits articles. Secondement, auant mesme l'vsurpation de Chasteau-dauphin par le Duc de Sauoye, le presche n'y fust iamais estably par l'autorité publique, & moins en vertu d'iceux Edicts à ce contraires: & si on a quelquesfois presché, ç'a esté par vsurpation & licence de quelques soldats de la garnison. Tiercement, la detention du Duc de Sauoye a duré douze bons ans, pendant lesquelles il n'y a eu aucun tel exercice, & cependant les choses ont pris vn autre train & vne autre habitude, pour le regard de la Religion, en quoy on ne deuoir auoir rien innoué apres vn si long-temps sans le congé de vostre Maïesté, laquelle leur eust peu remonstrer ce qui estoit de son seruice & du bien public, & le grand preiudice que ceste nouueauté en ce lieu-là pouuoit apporter à ses affaires, & au bien du Royaume, duquel ils font partie, & auxquels ils se doiuent accommoder. Là où maintenant vostre Maïesté a grandement à se plaindre de la trop grande haste & audace de ces innouateurs, rant s'en faut qu'ils doiuent estre maintenus en leur entreprise, & au peu de respect & de reuerence qu'ils ont porté à vostre Maïesté. A quoy fait en quatriesme lieu, qu'ils sont fort peu en nombre, & de fort basse qualité, & ont toute commodité d'aller en vne de ces valles prochaines, pour satisfaire à leur deuotion avec quelque plus grand merite, & encores avec quelque exercice vtile à leur santé. En cinquiesme lieu, ce qui me ment est, que à ceux-cy & à tout le corps de ladite Religion le presche de Chasteau-dauphin importe de fort peu ou rien, & cependant preiudicie infiniment à vostre Maïesté en son seruice, en ses principaux affaires, & en sa reputation enuers le Pape, les Cardinaux, & toute la Cour de Rome, & enuers toute l'Italie, & enuers plusieurs autres parties de la Chrestienté. Pour lesquelles considerations i'adiouste en sixiesme lieu, que quand bien ledit exercice seroit loisible à Chasteau-dauphin par les Edicts de Pacification, comme il ne l'est pas, si est-ce que attendu le long-temps qu'il en a esté banny, & les grands cris qu'on en a fait par deçà, il seroit expedient de l'y faire cesser

du consentement de ces gens là, en les contentans & recompensant de quelques autres lieux delà les monts. Vn grand Roy comme est vostre Maiesté, a tousiours moyen de faire condescendre vne petite partie de ses suiets à ses desirs honnestes & vtils. Ces gens aussi de delà ne sont point si hors de la raison, qu'ils ne s'accomodent au besoin de vostre Maiesté, & au bien de vos affaires, qui sont aussi ceux du Royaume, & de tous vos subiects: de façon que le Pape & autres ne croiroient point que vostre Maiesté ne l'eust peu faire, ains la soubçonneroient ne l'auoir point voulu. Par ainsi ie supplie vostre Maiesté en toute humilité qu'il luy plaise de considerer les choses susdites, & d'en ordonner & faire comme elle verra estre de son seruice, & du bien de ses affaires, & de sa reputation: l'assurant deuant Dieu, qui voit nos cœurs & nos pensees, qu'encores que comme Catholique & Ecclesiastique ie desire l'accroissement de la Religion Catholique, & que comme obligé au Pape ie luy desire tout iuste & honneste contentement, si est-ce que ce ne sont pour ceste heure ces respects qui m'ont induit à vous escrire ce que dessus, ains la seule consideration du bien de vosdits affaires & de vostre reputation. Aussi suppliy-ie vostre Maiesté de ne penser point que ie croye que le presche de Chasteau-dauphin, soit pour causer tout le mal qu'on pense & dit par deçà; mais ce sera chose digne de vostre prudence de considerer qu'en vne grande partie des affaires de ce monde, & particulièrement en ceste sorte de choses, autant a puissance l'opinion que la verité mesme. Or est-il que par deçà on croit & dit que ceste nouueauté (si par vostre Maiesté n'y est obuié) est vn commencement de peste qui infectera toute l'Italie, comme la France, par les guerres ciuiles qui en sont aduenuës, en est toute defiguree & gaste'e en toutes ses parties, & sans la vertu, valeur, & bon heur de vostre Maiesté en seroit du tout ruinée. Il plaira doncques à vostre Maiesté, iuger du bon & mauuais gré que le Pape & ceste Cour, & tout le reste de l'Italie, vous sçauront d'auoir ou non fait cesser ce mal; non tant par la chose comme elle est en foy, mais par l'opinion & crainte que l'on en a: & en tout euénement prendre en bonne part ce que i'en ay escrit, men du zele que i'ay au seruice de vostre Maiesté & au bien de vos affaires. A tant, &c. Sire, &c. De Rome ce 28. d'Octobre, 1601.

AAAA z z

A V R O Y .

C C L X X X V I I I .

S I R E ,

Le Pape enuoye vers vostre Maieſté le ſeigneur Barberin Florentin , Reſerendaire de l'vne & l'autre ſignature, Protonotaire Apoſtolique du nombre des participans, & Clerc de la Chambre Apoſtolique, pour ſe conioiſſer avec vos Maieſtez de l'heureuſe naiſſance de Monſieur le Dauphin , & luy apporter certains preſens conuenables à ſon enfance. Ledit ſeigneur Barberin eſt vn Prelat fort honorable, & de grande expectation, & reputation en ceſte Cour , & particulièrement aymé & eſtimé de ſa Sainteté , & de Monſieur le Cardinal Aldobrandin. Ie m'aſſeure que votre Maieſté luy fera tout le bon accueiſl & honneur que le reſpect de ſa Sainteté qui l'enuoye, & la fauorable occaſion pour laquelle il eſt enuoyé, & ſes vertus & qualitez meritent. Par ainſi ie n'en diray autre choſe & finiray icy la preſente.

Ce que deſſuſeſt vn duplicata de la lettre que i'ay baillee audit ſeigneur Barberin, ayant eſtimé qu'il ſeroit à propos que Voſt. Maieſté l'eult auant que ledit Prelat arriuaſt , & pource ay ordonné au courrier Baptiſte Mancini qu'il vous enuoyeaſt ceſte-cy deuant, quand ils ſeroient arriuez à Lyō. A quoy i'adiouſteray, que les drappeaux, bandes, couuertures, & autres choſes que ledit Prelat porte pour Monſieur le Dauphin, ont eſté benits par le Pape d'vne benediſſion expreſſe & compoſee pour cét effet , ne s'en trouuant aucun formulaire ny exemple au Pontifical , ny au Ceremonial, ny en tels autres liures Eccleſiaſtiques. I'en enuoye à Voſtre Maieſté l'Oraiſon.

Depuis ma dernière lettre du 15. de ce mois j'ay parlé aux deux Maîtres des Ceremonies des allegreſſes que j'eſtimois auoir eſté faites autresfois à Rome pour la naiſſance des Dauphins de France , & des Princes d'Eſpagne, leſquels m'ont dit & aſſuré qu'ils ont les diaires & regiſtres faits par leurs predeceſſeurs Maîtres des ceremonies, outre ceux qu'ils ont fait eux-mêmes, & qu'il ne s'y trouue point que le S. Siege ait iamais fait allegreſſe pour la naiſſance de tels Princes; mais bien en ont fait en particulier les Cardinaux, Prelats, & Seigneurs Romains affectionnez à l'vne ou à l'autre de ces deux Couronnes; & pource que le Pape ne vouloit rien innouer, il auoit eſté arreſté en la Congregation des trois chefs d'ordre, dont il eſt fait mention en ma dite dernière lettre, qu'il ne s'en feroit autre choſe, & que ce decret auoit eſté redigé par eſcrit; & qu'il ne falloit point craindre que naiſſant cy apres vn ſils maſle au Roy d'Eſpagne, le S. Siege fiſt pour luy ce qui auroit eſté obmis à la natiuité du Dauphin de France. Et ſur ce que ie leur ay allegué le ſermon de l'Eueſque de Bitonto, qui aſſerme auoir eſté faite allegreſſe à Rome au chateau S. Ange, & au Concile de Trente, en l'an 1545. pour la naiſſance de Dom Carlo premier ſils du ſeu Roy d'Eſpa-

gne, viuant pour lors Charles le Quint Empereur : ils m'ont respondu que ledit sermon auoit esté considéré en ladite Congregation, laquelle luy auoit adiousté foy en ce qu'il estoit dit qu'il auoit esté fait allegresse au Concile de Trente où ledit Euesque estoit lors, & y fit ledit sermon; mais non pas en ce qui estoit dit de Rome & du chasteau S. Ange, où ledit Euesque n'estoit point, lequel s'estoit trompé en cela, attendu les diaires & registres des Maistres des ceremonies de ce temps-là qui n'en faisoient aucune mention, & ne s'en fussent point tus s'il en eust esté fait quelque chose publiquement par le saint Siege; Que dans Rome mesme il s'estoit dit, que depuis ceste nouvelle de la natiuité de Monseigneur le Dauphin, le chasteau S. Ange auoit tiré, & toutefois il n'estoit point vray; dont lesdits Maistres des ceremonies concluent qu'il ne falloit donc point s'esmerveiller si on s'y estoit trompé à Trente. Conformément à ce que dessus le Pape au Consistoire qu'il tint Lundy 22. de ce mois dit au College des Cardinaux qu'il auoit receu vne tres-grande ioye, & auoit rendu graces à Dieu de la naissance des enfans des deux Roys les plus grands & les plus puissants de la Chrestienté, & de la concorde desquels dependoit le repos & tranquillité de tout le reste du Christianisme; Que nous auions veu combien de miseres & calamitez aduiennent aux Royaumes & autres Estats à faute de succession directe & legitime des Roys & autres Princes. Par ainsi il s'estoit grandement resioy, de voir que ces deux si grands Estats seroient hors de danger pour ce regard. Et comme il en auoit rendu graces à Dieu, il nous exhortoit à en faire de mesme : adionstant qu'il eust encore voulu en faire allegresse publique par feux de ioye, & autres tels signes, & auoit fait chercher es diaires & registres si en cas semblable ses predecesseurs en auoient fait; & ayant trouué que non, il n'auoit voulu rien innouer. Tout cela, SIRE, a esté cause que ie n'ay point estimé en deuoir faire autre instance, ny plus en parler. Apres cela, il nous dist l'aïse qu'il auoit eu, & les graces que il auoit rendues à Dieu de ce que Albe regale en Hongrie auoit esté retirée de la main des infidelles, & qu'il prioit Dieu qu'il ouurist les yeux aux Princes Chrestiens, & leur inspirast de se vouloir vnir pour embrasser la belle occasion qui se presentoit de reconuerer & remettre au Christianisme tant de Royaumes, & se les partir entr'eux. C'est ce que i'auois à adiouster à madite dernière lettre du 15. de ce mois touchant mondit seigneur le Dauphin. A tant, &c. SIRE, &c. De Rome ce vint-neufiesme d'Octobre 1601.

---

A MONSIEVR DE VILLEROY.

CCLXXXIX.

**M**ONSEIGNEUR, L'ordinaire de Lyon arriua le 26. de ce mois, & me porta les lettres du Roy & vostres du 10. auxquelles ie respondray par la presente briuevement, n'y ayant point matiere de longue response, & mesme que sur le fait de Chasteau dauphin, qui est le premier

AAAa 3

point de la lettre du Roy, i'ay desia fait vne lettre expresse à sa Maiesté, & n'ay qu'y adiouster, sinon que ie persiste en tout ce que i'y ay mis, qui sera trouué trop par delà: mais ie vous assure en homme de bien, & vous prie de le dire au Roy, que c'est beaucoup au dessous de ce que i'en pense, & de ce que ie voy & oy tous les iours. Et tant plus on me fait ceste chose petite delà ( que ie croy estre encor moindre qu'on ne me l'escrit ) tant plus ie m'esmerueille que pour si peu de chose on face vn si grand desplaisir au Pape, & à toute ceste Cour, & à toute l'Italie, contre le bien, profit, & reputation du Roy. Vous me cognoissez meshuy, & vous pouuez vous estre apperceu qu'apres que i'ay fait mon deuoir ie ne me formalise point enuers mon maistre, & iamais pour moy, ny pour mon profit & commodité, & vous appelle à tefmoin quand il a esté question du Marquisat de Salusses & des autres choses de Sauoye, combien de fois ie vous ay priez de ne rien faire en cela pour le Pape, ny pour Monsieur le Cardinal Aldobrandin, sinon autant que le profit & reputation du Roy & le bien du Royaume le comporteroit, & scaurois à present vous escrire cecy en chiffre si ie craignois qu'ils le sceussent. Mais de ceste nouueauté de Chasteau-Dauphin sur les occasions que le Pape m'en a donnees, i'ay prié & reprié sa Maiesté de la faire cesser, & vous d'y tenir la main, pour le preiudice que i'ay ven, ouy, & touché que cela portoit par decà aux affaires & seruice, & à la renommée de sa Maiesté. Au demeurant, ne croyez point, ie vous prie, à ceux qui disent que le Pape veut auoir les choses d'autorité, & entreprendre sur le Roy, & qu'il faut que nous tenions ferme: car ie ne me suis apperceu iusques icy qu'il ait voulu rien entreprendre sur les droicts du Roy, ny mesme qu'il ait prié sa Maiesté de chose qui peust tourner à son profit particulier, & qui ne fust autant du seruice du Roy & du bien du Royaume, comme du propre contentement de sa Sainteté. Au contraire, ie voy & obserue tous les iours qu'il porte fort patiemment & charitablement plusieurs torts que nous luy faisons contre les concordats, & contre toute raison: dequoy cependant ne reuient rien au Roy sinon que le mauuais gré, le reculement de ses affaires, & le mauuais nom parmy les nations estrangeres, & dans son propre Royaume; & toutes ces iniustices tournent au profit de quelques particuliers qui veulent faire leurs affaires aux despens de celles du Roy & du Royaume, & puis disent qu'il faut tenir ferme contre le Pape, comme si c'estoit fermeté, constance, & generosité que de maintenir en la face de sa Sainteté que le tort est le droit, & le noir blanc. Je n'en ay point cogneu à Rome de plus ferme ny de plus hardy que moy, quand il a fallu parler des droicts de la Couronne, & de l'autorité du Roy: mais de me formaliser en choses manifestement iniustes pour les appetits desordonnez de quelques vns, contre l'autorité du Pape & du S. Siège, & contre tout droit & raison, ie penserois faire en cela non seulement contre le bien de ses affaires, & me rendre inutile du tout à seruir sa Maiesté & le Royaume. Aussi ne faut-il que le Roy croye pour le ressentiment que le Pape a fait & continué de faire sur le presche de Chasteau-Dauphin que les ennemis de sa Maiesté ayent grand pouuoir d'alterer la Sainteté contre sa Maiesté: car le Pape cognoist tres-bien leur malice, & de quel esprit ils sont poussez. Mais il s'altere de la chose en soy, & de la consequence qu'il en presup-

poſe, & du peu de compte que par là il eſtime qu'on tienne de luy, & de ce que les malins en prennent occaſion de detracter de luy-meſme, & denigrer la plus belle & ſalutaire action qu'il ait faite en ſa vie, & de blaſmer l'eſtime qu'il fait de ſa Maieſté, & la paternelle affection qu'il luy porte, dont ils meurent. Croyez-moy, Monsieur, que les ennemis & enuieux du Roy n'auront iamais pouuoir enuers ce Pape contre ſa Maieſté, ſinon autant que nous meſmes leur en donnerons par nos actions, ou par noſtre negligence & peu de ſoin. Mais ce n'eſt pas garder la briefuete que ie m'eſtois propoſee au commencement de ceſte lettre. Je ne parleray plus au Pape du fait de Monsieur le Comte de la Rochepot ny en vne façon ny en vne autre; & pour le regard des Cardinaux à faire, ie ſuiuray ce que le Roy en a commandé à Monsieur de Bethune.

La penſion que le Roy a ordonnee à Monsieur Camàiano eſt tres-bien employee en la perſonne de ce Prelat, & a porté grande louange en ceſte Cour à ſa Maieſté, & fait dreſſer les oreilles à pluſieurs, & cauſera de fort bons effectſ pourueu qu'on la face bien payer, autrement il vaudroit mieus qu'il ne s'en fuſt parlé iamais.

Monsieur le Sacriſtain du Pape m'a donné vne oraiſon que i'enuoye au Roy, avec laquelle ont eſté beniſtes par ſa Saincteté les choſes qu'il enuoye à Monſeigneur le Dauphin. Ledit ſieur Sacriſtain eſcrit au Roy vne lettre de congratulation: ie vous prie qu'il en ait vn mot de reſponſe. Je ne vous parle point de tant de Cardinaux qui luy eſcriuent, d'autant que leur dignité fera que plus facilement on ſe ſouuiendra d'eux. A tant, &c. Monsieur, &c. De Rome ce 29. d'Octobre 1601.

## A MONSIEVR DE VILLEROY.

CCXC.

**M**ONSIEVR, Le courier que vous deſpeſchaſtes ſur la reſolution que le Roy auoit priſe touchant le baptême de Monſeigneur le Dauphin, arriua icy le 2. de ce mois au matin, & outre les lettres qu'il m'apporta du Roy & de vous des ſeize & dix-neufieſme d'Octobre, Monsieur de Bethune me communiqua celles que ſa Maieſté & vous luy eſcriuiez, comme ie fis auſſi à luy les miennes, & luy dis alors & depuis mon aduis ſur tout ce qu'il a voulu ſçauoir de moy, dont ie me ſuis apperceu de moy meſme, comme ie continueray de le ſernir toujours de tout ce qui me ſera poſſible, non ſeulement pour la charge qu'il a du Roy, mais auſſi pour ce que de luy-meſme ie l'en eſtime tres-digne. Il vous rendra compte de toutes choſes, & ie ne vous diray autre choſe ſur ladi-



te resolution sinon qu'un mot que m'en a dit ce matin en Consistoire Monsieur le Cardinal Baronius qui est confesseur du Pape, à sçauoir que sa Sainteté en a esté tres-aise autant que d'aucune action que le Roy ait faite iusques icy; d'autant qu'outre l'honneur que sa Maïesté luy faisoit en luy presentant ce qu'elle auoit de plus précieux & de plus important, c'estoit vne bonne leçon que sa Maïesté faisoit par là aux heretiques, & vne protestation à tout le monde de sa pieté & deuotion enuers le S. Siège & la religion Catholique. A quoy i'adiouste que sa Sainteté & toute ceste Cour l'a trouué d'autant meilleur, qu'il ne s'est point trouué vray ce qui auoit esté dit que le Roy d'Espagne eust fait semblable offre ny deuant ny apres la naissance de sa fille, ains le Duc de Parme l'a tenuë en son propre nom, & non en ce luy du Pape.

Au demeurant ie n'ay à respondre qu'à deux outrois poincts de vostre lettre, dont le premier sera, que ie feray à l'Ambassadeur de Toscane la response qu'il vous a pleu me faire à ce que ie vous escriuis à son instance touchant le Comte Jean Domenico Albano. Le second, que suiuant vostre aduis i'enuoyay dès le 3. de ce mois à Monsieur de Bethune les 300. escus destinez au sieur Marquesetto. Le 3. que ie demanderay tres-volontiers au Pape le gratis pour l'expedition de l'Abbaye pour le fils de Monsieur de Sancy, & que i'ay fort bonne esperance de l'obtenir; mais ie n'en ay encor point veu les lettres de nomination, ny aucun memoire où soient les noms & qualitez de la personne & de ladite Abbaye, & auant cela ie n'y puis rien faire.

Et hors vostre dite lettre i'ay à vous dire seulement, qu'il me semble que Monsieur de Fresnes Canaye le prend vn peu cruellement contre le Prince de la Mirande, & contre le Seigneur Dom Alessandro son frere, comme vous verrez par vne lettre qu'il m'escriuit le 27. d'Octobre, laquelle ie vous enuoye avec vne copie de la response que ie luy fis. A quoy ie n'ay rien à adiouster, sinon que si ces Princes ont à innouer quelque chose en leur despendance, ie ne voudrois point qu'ils se peussent excuser sur nous, ains que le tort demeurast de leur costé. A tant ie me recommande bien humblement à vostre bonne grace, & prie Dieu qu'il vous donne, Monsieur, &c. De Rome ce 12. Nouembre, 1601.

A V R O Y.

CCXCI.

SIRE,

I'ay autresfois escrit à vostre Maïesté par occasion que le Pape auoit quelque pensément d'aduancer monsieur le Cardinal Farnese à la succession du Royaume d'Angleterre apres la mort de la Roynie qui regne à present, & m'estant apperceu que cet aduis n'auoit esté trouué par delà guerres vray-semblable, i'escriuis dernièrement sur vne autre occasion à vostre Maïesté que

que ie luy en escrirois vne lettre expresse à part, ce que j'accompliray (Dieu aydant) par la presente.

Le Pape donc a pensé premierement au Duc de Parme comme au frere aîné & son allié, & le fera aussi premierement & seulement, si sa Sainteté void que le Royaume d'Angleterre se puisse obtenir sans l'Arbelle: mais si apres le decez de la Roïne l'Arbelle dresseoit vn party fort en Angleterre, & que pour faciliter la conqueste du Royaume d'Angleterre, il fut besoin de conioindre ses forces avec celles de l'Arbelle; en ce cas pource qu'il ne se pourroit traiter de marier ladicte Arbelle au Duc de Parme qui est desia marié, le Pape pense au lieu du Duc de Parme substituer ledit Cardinal son frere qui pourroit estre marié avec ladicte Arbelle, & par ce moyen luy & elles conioignans leurs forces & moyens, viendroient plutost & plus aisément à bout de leurs intentions. Aussi fut ce à propos de ladicte Arbelle que ie fis mention la premiere fois dudit Seigneur Cardinal Farnese en vne mienne lettre du 27. Mars dernier. Et pource qu'en toutes telles choses il faut auoir quelque couleur & pretexte de iustice, on pretend aussi que ces deux Princes, par le moyen de leur mere, sont descendus des vrayz & legitimes Roys d'Angleterre, & qu'ils ont quelque droit de succeder au Royaume, sans lequel pretexte ie croy que le Pape n'y enst iamais pensé.

Auquel propos il plaira à vostre Maïesté se souuenir que dès l'an 1594. fut imprimé vn liure en langage Anglois, que les Espagnols firent faire par vn Iesuite Anglois appellé Personius, & courut par l'Angleterre, par les Pays bas, & par tout ailleurs où ils penserent que ledit liure pourroit seruir à leur intention: laquelle a esté & est, de persuader au monde que depuis plusieurs centaines d'annees, & il n'y a eu en Angleterre aucun Roy ny Roïne legitime, les exchant ledit liure tous, pour auoir esté ou criminels de leze Maïesté, ou desheritez, ou bastards, ou heretiques, ou pour quelque autre tel defaut; & par consequent il excluait aussi de la succession dudit Royaume apres la mort de la Roïne qui regne à present tous ceux qui sont auourd'huy du sang Royal d'Angleterre, & les plus proches de ladicte Roïne, comme sont le Roy d'Ecosse, & l'Arbelle, qui luy appartiennent de plus près; & puis les Comtes de Arby, de Harford, de Hastings, & les sieurs Artus & Garfrid Poles freres, ausquels tous ledit liure ne laisse d'objecter d'autres defauts propres & particuliers à eux mesmes pour les exclurre encores d'autant plus de ladicte succession, outre les defauts qu'il presuppose auoir esté en ceux qui ont regné es derniers temps.

Quand ce beau liure a ainsi exclus de la Couronne d'Angleterre tous les Escossois & Anglois, il tasche de monstrier que le vray droit de succeder à ladicte Couronne est deuolu au feu Roy d'Espagne qui vnoit alors & à ses enfans, & y fait venir ledit droit par diuers chemins, en disant que la maison d'Angleterre est deuoluë à deux maisons, à sçauoir à la maison de Bretagne & à la maison de Portugal. A la maison de Bretagne à cause de Madame Constance fille aînée de Guillaume le Conquerant premier Roy d'Angleterre, laquelle fut mariee à Alain Fergeant premier Duc de Bretagne, duquel mariage ledit liure pretend que soient descendus tous ceux de la maison de Bretagne iusques auourd'huy. A la maison de Portugal, à cause de Madame Philippe fille de Jean le grand, fils du Roy Edouard III,

BBBBb

& de Blanche fille vniue & heritiere de Henry Lancastre fils III. d'Emou  
fils II. de Henry III. Roy d'Angleterre, laquelle Dame Philippe fut mariee  
à Iean Roy de Portugal premier de ce nom : duquel mariage pretend aussi  
le mesme liure que soient issuës toutes les Princesses de la maison de Portu-  
gal iusques à ce iourd'huy. Or est-il (dit ledit liure) que tous les droicts &  
pretentions de la maison de Bretagne sont tombez en l'Infante d'Espagne  
mariee à l'Archiduc Albert ; doneques le droit de succeder à la Couronne  
d'Angleterre appartient aussi à ladite Infante ; à laquelle il attache encores  
ces droicts pretendus par deux autres lieux specifiez audit liure. Semblable-  
ment, dit-il, tous les droits & pretentions de la maison de Portugal, sont  
fondez en la personne du feu Roy d'Espagne Philippe II. & de ses enfans ;  
doneques à luy appartenoit, & à ses enfans appartient auourd'huy de suc-  
ceder au Royaume d'Angleterre. Et encores, Sire, que la susdite proposi-  
tion & conclusion qu'on en infere soient choses tirees par les cheueux, &  
contre tout droit & coustume, & en partie fausses ; si est-ce que, comme V. M.  
le peut mieux scauoir, le feu Roy d'Espagne en a fait tousiours estat, & y  
dresseoit toutes ses pensees, comme fait aussi auourd'huy le nouveau Roy  
d'Espagne son fils, & à cela ont rendu & tendent les caresses, pensions, dons,  
& autres biens que les Espagnols ont fait & font aux Catholiques d'Angle-  
terre qui en sont hors pour la Religion, & refugiez non seulement aux Pais-  
bas & en Espagne, mais aussi en France, en Italie, & ailleurs ; & principa-  
lement à ceux de qui ils pensent pouuoir retirer seruice pour leur noblesse,  
parenté, ou alliance, ou pour leur bon esprit, ou pour leur proüesse & va-  
leur. A cela mesme tendant encores les Colleges & Seminaires dressez ex-  
pressément par les Espagnols pour les Anglois à Douïay & à Saint Omer,  
où sont receus les jeunes gentils-hommes des meilleures maisons d'Angle-  
terre, pour avec eux & par eux obliger aussi les parens, allies, & amis qu'ils  
ont audit Royaume. Et le principal soin qu'on a esdits Colleges & Semi-  
naires, c'est de catechiser, nourrir, & esleuer lesdits jeunes gentils-hom-  
mes Anglois en ceste creance & ferme foy, que le feu Roy d'Espagne auoit,  
& que ses enfans ont auourd'huy le vray droit de succeder à la Couronne  
d'Angleterre, & qu'il est ainsi vtile & expedient pour la Religion Catholi-  
que, non seulement en Angleterre, mais aussi en toute la Chrestienté. Et  
quand ces jeunes gentils-hommes Anglois ont fait leurs estudes es lettres  
humaines, & qu'ils sont paruenus à certain aage, alors pour acheuer de  
les Espagnoliser on les transporte des Pais-bas en Espagne, où il y a d'au-  
tres Colleges pour eux, & là ils sont instruits en la Philosophie & Theolo-  
gie, & confirmez en ladite creance & sainte foy que le Royaume d'Angle-  
terre a appartenu au feu Roy Philippe second, & auourd'huy appartient à  
ses enfans. Et apres que ces jeunes gentils-hommes Anglois ont ainsi fait  
le cours, ceux qui sont recognus pour mieux Espagnolisez, & pour les plus  
courageux & plus fermes au Credo Espagnol, sont enuoyez en Angleterre  
pour y semer ceste foy, & y gagner ceux qui n'ont bougé du pais, & pour  
espier & donner aduis aux Espagnols de ce qui se fait dans l'Angleterre, &  
de ce qui leur semble se pouuoir & deuoir faire pour la faire tomber en la  
puissance d'Espagne, & pour si besoin est, subir martyre aussi bien ou mieux  
pour ladite foy Espagnolle que pour la Religion Catholique.

Les forces Espagnolles enuoyées cy-deuant & depuis peu de temps en Irlande sont aussi pour la mesme fin, & tant pour prendre ce pendant ce qu'ils pourront des Estats de la Royne, que pour leur seruir de planche à passer vn iour en Angleterre, outre la commodité que d'ailleurs ils ont d'y aller & d'y enuoyer, par le moyen des Païs-bas, d'où il n'y a qu'un trajet en Angleterre, & encores des costes de Portugal, de Galice & de Biscaye, & pour le grand nombre de vaisseaux qu'ils ont en tous les lieux susdits.

Mais à tous ces ambitieux desseins, les Espagnols préuoyens vne grande resistance, tant du costé de la plus part des Anglois mesmes, que du costé du Roy d'Ecosse, & de ses alliez & conféderez, & des Zelandois & Holandois, & principalement de la France. Et pour ce ils disent que le Roy d'Espagne ne veut point de l'Angleterre pour soy, mais pour l'Infante sa sœur, ou pour quelqu'autre Prince Catholique, qui ne luy soit point suspect, & l'ont ainsi persuadé au Pape, pour le moins sa Sainteté monstre de la croire ainsi, combien que la verité soit, que ledit Roy d'Espagne veut l'Angleterre pour soy, & s'il ne la peut auoir pour soy à cause de ladite resistance, il desire que ce Royaume vienne à sa sœur, & en deffaut d'elle à quelque Prince des plus proches qu'il ait; lequel Prince aydé par luy recognoisse ce Royaume de luy, & soit tousiours à sa deuotion contre tous autres, & principalement contre vostre Maiesté & contre la France, contre qui les Espagnols ont non seulement émulation, mais aussi haine mortelle.

Le Pape (pour retourner à sa Sainteté, & à son dessein des Princes de Parme) qui preuoit & croit ladite resistance qui se fera au Roy d'Espagne & à sa sœur, s'est imaginé en son esprit qu'il luy pourroit reüssir de faire Roy d'Angleterre, apres la mort de la Royne, le Duc de Parme ou son frere le Cardinal Farnese, selon la distinction que j'ay mise au commencement de ceste lettre pour le regard de l'Arbelle. Vostre Maiesté ne fera difficulté à croire qu'il leur desire ceste grandeur pour l'alliance qu'ils ont avec luy, & pour ce que d'ailleurs ils sont fort Catholiques, & tenus pour bons Princes & moderez, & que sa Sainteté penseroit faire vn œuvre agreable à Dieu, & profitable à la Religion Catholique. Mais sur quoy peut le Pape fonder l'esperance d'en venir à bout? Il la fonde sur plusieurs choses; & premierement sur ladite apparence de iustice, en ce que ces deux Princes descendent de la maison de Portugal par leur mere Marie, qui estoit fille aisnée d'Edouarde Infante de Portugal & fils du Roy Emanuel de Portugal, iointe la proposition cy-dessus, que le vray droit de succeder à la Couronne d'Angleterre soit déuolu à maison de Portugal. Et comme le Duc de Parme d'apresent, qu'on appelloit le Prince Ranutio, pretendoit de deuoir succeder audit Royaume de Portugal apres la mort du Cardinal Henry, voire auant le feu Roy d'Espagne; ainsi à present pretend-on que luy ou le Cardinal Farnese son frere doie succeder à ladite Couronne d'Angleterre, au moins en cas que ledit Roy d'Espagne & sa sœur ne

puissent obtenir ledit Royaume d'Angleterre pour eux, comme chacun croit qu'il luy sera impossible. Voila doncques l'apparence de Iustice, qui donne couleur & preterxe au dessein, & qui pourroit faire incliner vne partie des Anglois à accepter l'un ou l'autre de ces deux. Quand aux forces & moyens de faire valoir ce tel quel droit contre ceux qui s'y voudront opposer, le Pape pense que le Roy d'Espagne voyant ne pouoir rien faire pour soy ny pour l'Infante sa sœur, fera facilement induit à employer toutes les forces qui sont si grandes, & tout ce que le feu Roy d'Espagne son pere luy a laissé d'intelligences & d'interests, avec vn grand nombre d'Anglois gaignez en diuers temps, & en plusieurs façons, pour l'un desdits Princes de la maison de Parme, lesquels sont ses cousins remuez de germain, & serviteurs de profession. Aussi pense sa Sainteté que les Archiducs aux Pays-bas feront de mesme, quand ils verront ne pouoir rien faire pour eux: & de plus que les Seigneurs, gentils-hommes, & les villes & peuples des Pays-bas favoriseront ces deux freres de la maison de Parme, pour auoir esté lesdits Pays-bas gouuenez fort doucement, premierement par Madame de Parme leur ayeule, qui ne fut iamais d'aduis qu'on fit mourir les Comtes d'Aigmont & de Horme, & puis par le Duc Alexandre leur pere, qui a laissé tres-bon nom en tous ces pays-là, & y a obligé infinies personnes, mesme-ment plusieurs Anglois refugiez ausdits Pays-bas. Sa Sainteté d'ailleurs pense d'ayder ces deux Princes de toutes les forces, tant temporelles, que spirituelles: & de toute l'autorité qu'il a enuers les Princes, villes, & peuples Catholiques. Il y a enuiron quatre ans que sa Sainteté crea en Angleterre vn certain Archi-prestre, afin que tous les Ecclesiastiques, & tous les Catholiques dudit Royaume eussent à qui se retirer & recourir pour les choses de la Religion Catholique, & par le moyen de qui estre vnis entr'eux, & entendre ce qui seroit bon de faire pour leur conseruation, & pour le re-stablissement de la Religion Catholique; & a t'on donné à entendre à sa Sainteté que par ce moyen elle fera des Catholiques qui sont en Angleterre vne grande partie de ce qu'elle voudra. Et ie scay dire à vostre Maesté que sa Sainteté a enuoyé depuis peu de temps au Nonce qu'elle tient au Pays-bast trois briefs, pour les garder iusques à ce que ledit Nonce sçaura que la Roynie d'Angleterre soit morte, & lors les enuoyer en Angleterre, l'un aux Ecclesiastiques, le second à la Noblesse, & l'autre au tiers Estat, selon l'adresse desdits briefs, par lesquels lesdits trois Estats d'Angleterre sont admonestez & exhortez par sa Sainteté à demeurer vnis ensemble, pour recevoir vn Roy Catholique, que sa Sainteté leur nommera tel qu'il leur semblera agreable, profitable, & honorable, & le tout pour l'honneur & gloire de Dieu, pour la restauration de la Religion Catholique, & pour le salut de leurs ames. I'ay cy-deuant donné aduis à vostre Maesté, comme sa Sainteté auoit donné à Monsieur le Cardinal de Farnese la protection d'Angleterre, vacante par la mort du Cardinal Caïetan, afin que les Anglois Catholiques qui sont par deçà, ou qui ont affaire en ceste Cour se retirent à luy, & qu'il aye sujet & occasion de leur bien faire, & d'acquérir la bonne opinion & bien-veillance de ceste nation. Aussi ay-je autresfois donné aduis à vostre Maesté, comme ledit Cardinal Far-

ne se a à son seruice le sieur Artus Pole qui est du sang Royal d'Angleterre, & que ledit sieur Artus doit faire au Printemps prochain vn voyage en Angleterre, du consentement, pour ne dire commission de son maistre, & du Pape mesme. Il y peut auoir encor plusieurs autres choses tendantes à ce dessein que nous ne sçauons point, comme aussi fait-on tout ce qui se peut pour les tenir secretes. Et qui sçait qu'on ne face seruir aucunement à cela le voyage du Duc de Parme à la Cour d'Espagne & en Portugal, & mesmes s'il est vray ce qui se dit icy qu'à son retour il doit passer par France ? Or outre que sa Saincteté aydera ces deux Princes de tous ses moyens, & les fera ayder par d'autres, il pense qu'enners des Potentats d'où il ne pourra tirer ayde pour eux, il diminuera pour le moins la resistance & l'opposition qu'autrement on leur feroit. Et d'autant que vostre Maiesté est celuy de qui l'opposition est plus à craindre, sa Saincteté pense auoir merité, & pouuoir encores meriter à l'aduenir de vostre Maiesté en diuerses occasions, que si vous ne vouliez ayder à ses allies, pour le moins vous ne vous y opposeriez point, & a cette confiance en vostre Maiesté, sous laquelle, sans venir au particulier, il vous a desia fait dire par Monsieur le Cardinal Aldobrandin, qu'il desiroit que vostre Maiesté & le Roy d'Espagne vous accordassiez d'un tiers Prince Catholique, qui fust pour estre fait Roy d'Angleterre apres la mort de la Roynes. Et encores que vostre Maiesté fit lors quelque responce en faueur du Roy d'Escoce, si est-ce que sa Saincteté ne laisse d'esperer que vostre Maiesté pourra estre persuadée par raison d'Estat, de n'ayder point à faire conioindre en vne mesme personne le Royaume d'Angleterre & d'Escoce, attendu les grands maux que les Anglois seuls ont autresfois fait aux François plus que toutes les autres nations ensemble, & que d'ailleurs le Roy d'Escoce est parent proche & grand amy des Princes de la maison de Lorraine, qui sont en tres-grand nombre & trop grands en France par le peu de preuoyance & trop grande facilité des Roys passez, & qui n'agueres ont pensé engloutir la France, & est à craindre qu'ils n'en perdront iamais le desir, pour l'opinion en laquelle ils sont tous nourris dès le berceau, que la troisieme race de nos Roys commençant à Hugues Capet a vsurpé le Royaume de France sur eux, & que la Couronne de France appartient à la maison de Lorraine, descendant de Charlemagne, comme ils pretendent, quoy que faussement, d'où sa Saincteté entre en opinion que vostre Maiesté souffrira pour Roy d'Angleterre plustost le Duc de Parme, où le Cardinal Farnese son frere, qui n'ont rien aupres d'Angleterre, ny dedans ny aupres de la France, que non pas le Roy d'Escoce ny les Archiducs, ny autres tels. Et encores que ces deux Princes de la maison de Parme soient parens & seruiteurs du Roy d'Espagne, si est-ce que sa Saincteté ne laisse de croire que vostre Maiesté considerera d'autre part qu'ils sont allies de sa Saincteté, & qu'ils ne sont des plus mauuais, ny des plus proches, ny des plus contens du Roy d'Espagne, & que cette maison de Parme a autresfois esté en la protection de la Couronne de France, & veut que nous croyons qu'elle n'en a perdu la memoire ny la gratitude, à quelqu'autre semblant que la necessité du temps les aye reduits & contrainsts. Et de fait,

B B B b 3

Monsieur le Cardinal Farnese en la response qu'il me fit dernièrement à la lettre que ie luy auois escrite sur la naissance de Monseigneur le Dauphin, n'oublia point parmy les causes de la ioye qu'il disoit en auoir receuë, à faire mention des obligations que leur maison a à la Couronne de France, comme possible aura-t'il fait en la lettre qu'il escriuit sur ce sujet à vostre Maiesté. A quoy on adiousterá forces choses, & entr'autres celle cy, que lors qu'un deux seroit fait Roy d'Angleterre, il ne penseroit point tant à satisfaire aux volontez & interets du Roy d'Espagne, comme à s'establiir, & à estre bien avec ses voisins, & mesme avec vostre Maiesté qui luy pourroit plus nuire ou profiter que nul autre.

Ce sont, Sire, les considerations qui m'ont fait trouuer vray-semblable, ce dessein du Pape, depuis la premiere fois qu'il me fut dit de fort bon lieu. Et pource qu'à diuerses fois i'en auois touché ores vne, ores vne autre par mes precedentes: ie les ay voulu assembler toutes en la presente, en y adioustant ce que i'auois appris depuis, & mesme pour m'acquitter de la promesse que i'auois faite d'en escrire vne lettre à part. Quoy qu'il en soit, il ne peut estre que bon que vostre Maiesté soit aduisee, non seulement de ce qui peut estre, afin qu'en vne affaire de si grande importance vostre Maiesté pouruoye de loing à ce qu'elle iugera en auoir besoin, & se prepare à tout euenement. A quoy ie n'ay rien à adiouster, sinon qu'asseurer vostre Maiesté que par tout ce que dessus, ie n'ay point entendu m'ingérer à dire mon aduis directement ny indirectement sur la succession d'Angleterre, & moins où vostre Maiesté doit incliner: mais de vous représenter seulement les considerations qui peuuent auoir meu le Pape à entrer au pensément de ces deux freres, & que si ie vous en ay escrit cy-deuant: ce n'a point esté sans quelque fondement. A tant, &c. Sire, &c. De Rome ce 26. Novembre 1601.

## A MONSIEVR DE VILLEROY.

CCXCII.

**M**ONSIEVR, Outre ce que vous verrez que i'escris au Roy, des desseins qu'on fait sur l'Angleterre, il m'a esté dit que les Espagnols ont plusieurs espions en France, partie Anglois, partie Escossois, qui font semblant d'estre mal contents des Espagnols, & neantmoins les seruent fort soigneusement; & particulièrement à donner adresse à leurs lettres-qu'ils escriuent en Angleterre, ou ailleurs pour les choses d'Angleterre, & à leur faire tenir aussi celles qu'on leur escrit d'Angleterre, & d'ailleurs touchant les mesmes choses d'Angleterre; &

que ceste sorte de gens sont le long de la coste de la mer Oceane , comme à Bayonne, Bordeaux, Nantes, Rouën, Calais, & encores à Paris. De ceux qui resident à Paris, on m'en a nommé trois ; à sçavoir Robert , Brux Escossois, de poil de couleur de chastane, de stature moyenne, aagé de quarante-cinq ans. On m'a dit qu'il fait fort le mal-content des Iesuites & des Flamans , & neantmoins qu'il frequente fort chez le seigneur Jean Baptiste Tassis, Ambassadeur du Roy d'Espagne , & qu'il est fort mauuais homme. Le deuxiesme est vn seruiteur, ou plustost compagnon dudit Robert Brux, qu'on m'a dit estre encores pire que le premier , & s'appelle André , Escossois aussi de nation, de poil roux tacheté, de stature basse, aagé de vingt six ans. Le troisiemesme est vn Prestre Anglois appellé Jean Cecile , & le plus souuent est nommé le Docteur Cecile , comme il est aussi Docteur passé à Cahors, aagé de quarante ans , duquel on sçaura nouuelle au College Mignon. Il a esté en Espagne, & fait le mal content des Espagnols , & neantmoins escrit à Rome au Pere Personius Iesuite Anglois , & Espagnol de deuotion. Celuy qui m'a donné cét aduis est vn Anglois Docteur en Theologie , qui a esté longuement en France & es pays bas, & dit qu'il faudroit faire saisir les papiers & escritures de ceux-cy , & mesmement leurs chiffres, comme il assure qu'on leur en trouuera. Il m'en a nommé vn quatriemesme qui se tient à Calais, s'appelle Gabriel Colford, Anglois de nation, de poil roux, & de stature moyenne, & aagé de quarante ans, & m'a dit que cestuy-cy sert de faire tenir les pacquets d'Angleterre à Rome, & de Rome en Angleterre, & de donner commodité & adresse à ces jeunes gentils-hommes Anglois, qui apres auoir estudié à S. Omer, sont enuoyez en Espagne, & ont vne nauire pour cela. Dit ce Docteur que ledit Colford est autrement bon-homme , & qu'il ne voudroit qu'on luy en fist autre mal que l'enuoyer hors de Calais, auquel cas on verra, dit le Docteur , qu'il se retirera en Flandre , comme feront encores plus viste les autres trois sus-nommez , s'ils entendent qu'ils soient pour estre molestez en France. Voila, Monsieur, ce qui m'a esté dit. Si c'est vn aduis veritable , & tendant à nostre bien, ou quelque mal-veillance contre les susdits , pour les mettre en peine & danger, vous en iugerez ; sinon que ledit Docteur se monstre fort affectionné au seruice du Roy. Je ne vous diray rien des belles pretentions du Roy d'Espagne & de l'Infante sa sœur , sur le Royaume d'Angleterre, sinon que j'ay opinion que si nous auions fait vn peu fueilleter les Histoires de France & d'Angleterre à ceste fin , nous y trouuerions plusieurs chefs de pretentions meilleures , & mieux fondees pour le Roy que ne sont celles-là ; & du liure mesme du Pere Personius, on pourroit tirer des raisons en faueur de sa Maiesté , qui vaudroient mieux que celles qu'il déduisit pour le Roy d'Espagne , & pour sa sœur. Aussi se contredit le Pere Personius assez souuent , & bien lordement, comme il aduient à toutes personnes passionnees , pour habilles qu'elles soient , qui ne sont guidees par la verité & par la raison , mais transportees de l'interest de la passion. Je vous mettray icy deux de ses contradictions. Il oppose au Roy d'Escoce , entre autres choses , pour l'exclurre de la succession d'Angleterre, qu'il est nay hors d'Angleterre,



de parens non subiects à la Couronne d'Angleterre. Semblablement il oppose à l'Arbelle, entr'autres empeschemens, qu'elle femme, & qu'il n'est expedient au Royaume d'Angleterre d'auoir trois femmes Roynes de suite, & que bien souuent on a exclus des filles de Roys pour estre femmes; & neantmoins il adiuge ledit Royaume à l'Infante d'Espagne, par preference mesme au Roy d'Espagne son frere, comme si ladite Infante n'estoit pas femme aussi bien que ladite Arbelle. A tant, &c. Monsieur, &c. De Rome ce 26. Nouembre 1602.

## A MONSIEVR DE VILLEROY.

## CCXCII.

**M**ONSIEVR, Je n'ay à respondre à aucunes de vos lettres, ny à vous Mescrire rien qui concerne le seruice du Roy, à quoy Monsieur de Bethune satisfait pleinement: mais ceste lettre sera de mon particulier: & toute d'importunité, dont il me desplaist, encores que j'espere d'en estre excusé par vostre bonté, & par la constance & habitude que vous auez prise long-temps y a de me faire bien. Messieurs de la sainte Chappelle & de la Chambre des Comptes, pretendant que le droit de regale s'estend aux Eueschez de Bretagne, ont fait depuis peu de temps adiourner le sieur Artus Bollani, qui administra les fruiçts & reuenus de l'Euesché de Rennes en l'an mil cinq cens quatre-vingts seize vacquant lors par le decés de feu Monsieur Hennequin, Euesque dudit Euesché; desquels fruiçts ledit Bollani rendit compte à mon Vicaire apres que ie fus pourueu dudit Euesché; & pource qu'il m'a fait sommer & donner assignation, à ce que ie prenne le fait & cause pour luy, comme il est bien raisonnable, ie desirerois qu'il pleust au Roy me deliurer de ceste vexation, en imposant silence pour ce regard ausdits sieurs de la sainte Chappelle, & de la Chambre des Comptes, vous assurant que ce me seroit vn grand surcroist de mes autres incommoditez, si i'estois contrainct d'en bailler ce que i'en receus lors, apres l'auoir depuis despendu, & eux ne m'en ayans rien demandé lors qu'ils deuoient le demander, & faire saisir lesdits fruiçts pendant la vacquance, s'ils pretendoient quelque chose, comme ils firent l'annee passée de l'Euesché de Bayeux à quoy ie satisfis incontinent sans aucunement reclamer, comme ie scauois que la regale auoit lieu en Normandie. Mais à present ceste extorsion pour l'Euesché de Rennes me facheeroit d'autant plus qu'ils n'ont aucune raison ny iuste pretention pour intenter ceste action, & me donner ce travail. Premièrement: pource que le droit de regale ne s'estend point aux Eueschez de Bretagne, comme Monsieur le Maistre, en son viuant premier President

en

en la Cour de Parlement , le tesmoigne en vn traité qu'il a fait des regales, & tous les autres auteurs François qui ont escrit de cette matiere; & Duarin au troisieme liure des benefices, chapitre second, transcrit vn catalogue qui se trouue en la Chambre des Comptes de tous les Eueschez où regale a lieu, auquel catalogue y avn article de cette teneur; IL Y A REGALE EN LA PROVINCE DE TOURS, EXCEPTÉ EN L'EGLISE DE SAINT MALO, DE VANNES, ET AUTRES EGLISES DE BRETAGNE. A quoy fait la coustume & obseruance du temps passé; auquel la sainte Chappelle ny la Chambre des Comptes de Paris n'ont iamais rien pris és Eueschez de Bretagne, & moins en ce luy de Rennes, qui est en la cité capitale. Aussi sçauz vous que ce Duché ne fust vny à la Couronne de France qu'en l'année 1532. qui est cause qu'il n'est point compris és Concordats, lesquels auoient ia esté faits & publiez au Concile de Latran en 1516. d'où est ainsi aduenu que nos Roys n'ont pas mesme droit de nomination esdits Eueschez de Bretagne par lesdits Concordats, & qu'il faut que chacun d'eux en prenne vn Indult particulier pour sa vie durant. Et quand la Bretagne fust vnüe à la Couronne, il fust expressément conuenu entre le Roy François premier & les Estats du pays, & ordonné par l'Edit d'union, que les droits & priuileges que ceux dudit pays & Duché auoient eus auparauant, & auoient alors, leur seroient gardez & observez inuiolablement, sans y rien changer ny innouer: dequoy outre le susdit Edit d'union, leur fust expedié & deliuré lettres patentes en forme de chartres. Voila donc, Monsieur, comme la regale n'a lieu en Bretagne, & n'y en doit point auoir.

Mais quand le Roy ce nonobstant, & pour nouuelles occasions, voudroit qu'il y en eust, & auroit ia cy-deuant ordonné, ou fait ordonner qu'il y en auroit, comme on m'a escrit qu'il auoit esté donné vn Arrest en la Cour de Parlement en 1598. contre l'Euesque de Nantes; en ce cas ie suis tout assuré que de droit & raison les fruiçts des Eueschez vacquans, ausquels contre la coustume ancienne on estendroit maintenant le droit de regale, à laquelle ils n'estoient subiets aucunement, n'appartiendroit point à ladite sainte Chappelle en vertu de l'ancienne concession qui leur fut faite par nos Roys; n'estans, & ne denans estre compris en ladite concession les Eueschez ausquels on a depuis estendu, ou estendra on cy apres ledit droit de regale: ce qui est tout clair & certain en droit. Et n'estoit qu'il y a par delà infinis sçauans personnages qui sçauront trop mieux prouuer cette maxime, ie m'offrirois de faire ce seruice au Roy de la prouuer par texte de droit & par viues raisons, dõt ladite sainte Chappelle ne sçauoit se defendre. Et de fait, Monsieur, si on estendoit la regale à tous les Eueschez de France, comme l'on le pourroit faire de droit, aussi bien qu'on le veut faire à ceux de Bretagne, la sainte Chappelle auroit plus de reuenu que n'auroient deux ny trois des meilleurs Eueschez ou Archeueschez de France, pour ne dire Chapitres, comme ce n'est qu'un Chapitre Collegial, y ayant en tout temps des Eueschez vacquans en France, & vn trop grand nombre depuis quelques années.

CCCCc

A quoy j'adiousteray pour encores oster toute difficulté, comme le Roy me donna ledit Euesché, aussi me fit il don des fruits qui estoient escheus depuis le decez de mon predecesseur, & qui escherroient pendant la vacance, & ce par vn Breuet à part qu'il vous pleust en faire despescher, & enuoyer à mon Vicaire. Outre que puis apres sa Maiesté par ses lettres d'attache, qui furent iointes à mes Bulles, commanda derechef qu'il me fust rendu compte desdits fruits; & tout cecy auant ledit Arrest del'an 1598. qui partant, & au pis aller, ne doit preiudicier aux choses ja auparavant faites & determinees. Par ainsi vous voyez, Monsieur, le peu de raison qu'ont lesdits sieurs de la sainte Chappelle & de la chambre des Comptes, de me vouloir extorquer auourd'huy ce qu'il pleust au Roy me donner il y a 5. ou 6. ans, & que ie n'ay plus, & en quoy ils n'ont iamais rien eu, & qu'ils ont eux-mesmes laissé de demander lors qu'il en estoit temps, s'ils y pretendoient quelque chose. Ce qui me donne la hardiessé de vous prier de supplier le Roy de ma part, qu'il plaise à sa Maiesté me conseruer ce don qu'il luy pleust me faire, & ne me laisser oster ce que de sa grace il luy pleust me donner si liberalement, & que i'ay dependu à son seruice il y a si long temps. A tant, &c. Monsieur. &c. De Rome ce 4. Decembre 1601.

A V R O Y.

CCXCIV.

SIRE,

I'ay veu comme vous auez trouué bon ce que i'auois fait apres auoir receu la nouvelle de la naissance de Monseigneur le Dauphin, dont ie loué Dieu, & en baise tres-humblement les mains à vostre Maiesté. Je diray à Monsieur le Cardinal Aldobrandin ce que vostre Maiesté veut luy estre remonstré, sur les faueurs qu'on dit auoir esté faites en Espagne au Duc de Modena & aux Princes de la Mirande, & rendray compte à vostre Maiesté de ce qu'il m'y aura respondu. Quant à Monsieur de Bethune, la bonne opinion que i'en conceus dès qu'il arrina icy m'est tousiours augmentee de plus en plus, & tant plus nous allons en auant, tant plus il se rend agreable à toute ceste Cour, & tant plus ie le trouue iudicieux, diligent, capable, & zélé au seruice de vostre Maiesté, & au bien du Royaume; & tant plus adiouste r'il aussi de desir en moy au deuoir que i'ay de le seruir. J'ay veu aussi comme il plaist à vostre Maiesté que i'assiste mondit sieur de Bethune, particulièrement en ce qu'elle lay commande touchant les Peres Iesuites, & le sieur Perrin Soubsdairre, & l'Indult du pays Messin; ce que ie feray de tout mon pouuoir, apres auoir mieux consideré le tout que ie n'ay peu encores par la communication qui m'a esté faite des lettres que vostre Maiesté luy a esrites sur ce sujet. Cependant ie ne dois differer d'escrire à vostre Maiesté, qu'il

eust esté expedient pour vostre seruice, & pour la reputation de vostre iustice, que ledit Perrin eust esté longtems y a expédié par delà fauorablement de l'Abbaye de S. Leon de Toul que le Pape luy a donné, & que si maintenant nous proposons au Pape le retranchement que la partie aduerse de Perrin demande de la grace que sa Sainteté luy a faite, nous preiudicions grandement à la demande que V. M. veut estre faite dudit Indult, & à vos autres affaires, aux despens desquels sadite partie aduerse veut faire les siens : comme il n'y a auourd'huy que trop de cette sorte de gens, desquels ie prie Dieu qu'il vous garde, & vous donne, &c. SIRE, &c. De Rome ce 10. Decembre 1601.

A MONSIEVR DE VILLEROY.

CCXCV.

**M**ONSIEVR, avec les lettres du Roy des 9. & 18. Nouembre i'en ay receu trois des vostres des 6. 10. & 18. du mesme mois. La premiere contient l'histoire de nostre Capuchin Hilaire, accompagnée des copies de sa deposition & de son obediencce. I'ay esté tres-aïse de voir le tout, & principalement de ce que les deux lettres dont ie vous auois escrit se sont trouuees; desquelles, ne pouuans seruir à rien qu'à mal, la soigneuse & longue garde, le transport en Italie & à Rome, la monstre & diuulgation qu'il en a faite à plusieurs personnes, avec la fausse extension de la promesse pretendue, monstrent assez la malice & mauuais dessein de l'homme, quand il n'y auroit autre presumption contre luy. Je ne puis point parler de plusieurs choses qu'il a dites en sa deposition: mais ie vous assure bien qu'en ce qui m'y concerne, il n'y a pas vn seul mot de verité, & que tout y est faux, & que toutes choses se passerent en la façon que ie vous escriuis: mais bien luy prend qu'il a à faire à des gens plus religieux qu'il n'est, quelque moine Capuchin qu'il soit. Cependant ie vous remercie bien humblement de l'ample aduis qu'il vous a plu me donner du tout; estant bien aïse de ce que le Roy est demeuré content de luy, comme ie voy par la seconde de vosdites trois lettres, la dernière desquelles m'assure de ce qui importe le plus, qui est la bonne santé de sa Majesté, nonobstant le coup de pied de cheual qu'il auoit receu. Dieu le nous conferue longuement en parfaite santé & prosperité. A tant, &c. Monsieur, &c. De Rome ce 20. Decembre 1601.

CCCCc 2

A V R O Y.

CCXCVI.

SIRE,

Ayant veu & bien considéré l'expedient qu'il a pleu à V. M. escrire à Monsieur de Bethune sur l'Abbaye de saint Leon, pour le proposer au Pape si luy & moy estimions qu'il se deust faire; i'ay esté d'avis qu'il ne le proposast point: dequoy i'ay à vous rendre compte, comme ie me delibere de faire par ceste lettre. Mais en cette reddition de compte il y aura quelques parties, qui pour estre alloüees auront besoin de vostre iustice & bonté, non qu'elles ne soient tres vrayes & admissibles en elles mesmes, mais pource que la verité mesme n'est pas tousiours bien receüe, si ce n'est des ames sur-abondantes en generosité & bonté, comme est la vostre, Sire, qui parmy tant d'autres vertus royales & incomparables, auez ceste-cy qui surpasse & parfait la Royauté, qu'on vous peut seurement dire la verité. En cette confiance doncques, ie vous diray, Sire, que mondit aduis a esté fondé, premierement en l'expres commandement que V. M. a fait audit sieur de Bethune de s'abstenir de faire ladite ouuerture, si luy & moy iugions que ce ne fust vostre seruice par deçà. Or suis-ie tout asseuré que telle proposition eust grandement offensé le Pape, de l'autorité duquel il s'agit en ceste cause plus que de l'intereust du sieur Perrin son sousdataire; & la reputation de V. M. en ceste Cour, & les affaires qu'elle y a & est pour y auoir cy apres, ne comportent point que vostre nom & vostre puissance & moyens soient employez à debatre l'autorité du Pape, & à despoüiller sa Sainteté de la possession en laquelle il est de pouruoir à telles Abbayes, & que pour faire auoir à vn particulier ce qui ne luy appartient point, V. M. se met en mauuais mesnage avec sa Sainteté, en sorte que ledit particulier aye 3. ou 4. censescus de rente de plus, & V. M. n'en aye que la haine, & le reculement de ses affaires, & le blasme de toute ceste Cour. Et si la partie aduersé dudit Perrin est bon François, & bon sujet de V. M. il ne doit vouloir (quand bien sa pretention seroit la plus iuste du monde) que son particulier auancement couste si cher à V. M. & au public de vostre Royaume. Mais la verité est que ladite partie aduersé a fort mauuaise cause au fonds, l'a encores pirement poursuiui par faussetez, par voye de fait & de force, & par autres moyens illicites, & indignes non seulement d'un Religieux, & Docteur, & Predicateur tel qu'on vous l'a qualifié, mais de tout homme, de quelque qualité ou condition qu'il soit. De toutes lesquelles façons de proceder si V. M. n'a rien sceu, sa Sainteté en est tres-bien aduertie, & ie n'ay point souuenance d'auoir ouy parler icy d'une cause de France plus descrite, ny de laquelle i'aye eu plus de honte, que i'ay long temps y a de ceste-cy, pour le zele que i'ay à la reputation de vostre seruice, & de vostre Conseil, & à l'honneur de toute

la nation. Avec tout cela , ce beaupere & ses fauteurs ne manquent point de beaux pretextes , & remplissent leurs bouches de ces mots specieux de nomination de V.M.d'election Canoniquement faite, & de constitutions de l'Empire.

Premierement quant à la nomination , ie vous l'ay tousiours desirée , & ay esté vn des premiers qui vous ont donné l'aduis d'en demander l'Indult , & qui en ay dressé les memoires & commencé les poursuites ; & suis encores d'aduis que V. M. en pouruiue l'instance , iusques à ce qu'elle en soit venuë à bout , & espere qu'en fin elle l'obtiendra. Mais il se peut dire en verité, que pour encores V. M. ne l'a point. Les concordats entre le S.Siege & la Couronne de France, par lesquels le droit de nomination fust concedé à nos Roys, furent faits en l'an 1516. & le pays Messin ne vint point sous leur puissance sinon qu'en l'année 1552. & ainsi le dit pays Messin n'est point compris esdits concordats, comme n'y sont pas mesmes comprises la Bretagne & la Prouence , ainsi que nos Roys ont tousiours auoüé , & recogneu mesmes par les lettres patentes qui sont gardees és archives de S. Pierre , & se sont contentez d'en prendre chacun vn Indult à part pour leur vie durant. Bien a droit V. M. de refuser la possession à celuy auquel le Pape aura donné vne telle Abbaye ou autre dignité, si la personne vous est suspecte ; & la qualité du pays qui est frontiere , & les marques qui restent pretendues par l'Empire , & encores auourd'huy les villes de Toul & Verdun, tombees en ces dernieres guerres és mains d'un Prince estrange par le moyen de ses parens qui y commandoient au spirituel , vous peuuent & doiuent admonester d'en estre fort soigneux à l'aduenir : mais pour le regard dudit Perrin il n'y a aucune suspicion.

Quant aux elections, Sire , c'estoit vne chose bonne & sainte , & conforme à tout droit diuin & humain ; & ie ne voudrois pas dire que c'eust esté bien de les oster, mais il est tout certain que de les auoir ostees est aduenü vne grande ruine à l'Eglise. Tant y a qu'il y a trois cens ans que les Papes ont tasché de les abolir sous diuers pretextes , & les ont abolies par tout où ils ont peu. Iean XXII. François de nation , dont il me desplaist , fust le premier qui outre les taxes & annates qu'il inuenta, ostant encores, en tant qu'en luy estoit, aux Chapitres des Eglises Cathedrales l'election des Euesques , & aux Conuents des Abbayes l'election des Abbez , se reserua à soy seul la prouision des Eueschez & Abbayes de toute la Chrestienté , & les Papes suiuaus continuerent tousiours à faire semblables reseruatiens l'un apres l'autre , dont ils se firent croire premierement en leur Estat Ecclesiastique , & puis en toute l'Italie , & autres Estats foibles, qui n'eussent assez de puissance pour leur resister. La France, comme le premier & plus fort Royaume de la Chrestienté, pour ne parler à ceste heure des autres, s'en defendist tant qu'il pleust à nos Roys despartir leur protection aux Chapitres & Conuents , pour la conseruation de leurs libertez & droits d'election, iusques au Roy François premier, lequel on trouua moyen d'interessier, en luy offrant la nomination des Eueschez & Abbayes, & des Prieurez electifs ; & ainsi la

Roy François premier abandonnant les Chapitres & Couuents, forcé fust à l'Eglise Gallicane, & aux Cours de Parlement, & aux Vniuersitez qui auoient tenu bon iusques-là, de subir le ioug, non du Pape, pour lequel ils n'en eussent rien fait, mais du Roy qui voulut iouyr du beau present des nominations que le Pape venoit de luy confirmer par les concordats. Voila, Sire, comme les eslections furent ostées, & les nominations introduites en France.

Or soit que les eslections ayent esté bien ou mal ostées, & à quiconque en soit le dommage, la verité est que le profit est venu aux Roys de France, qui ont tousiours depuis nommé aux Euechez, Abbayes, & Prieurez electifs, & en ont recompensé qui bon leur a semblé. Maintenant, Sire, que vostre Maiesté leur ayant succédé fait comme les autres, recueillant le profit de la suppression des eslections, comme elle ne peut estre reprise de conseruer son droit de nomination es lieux où il luy est acquis, aussi es autres lieux où elle n'en a point, il n'est point decent, ny expedient pour vos affaires, que vostre Maiesté à l'appetit d'un particulier se mette en peine de resusciter les eslections ja esteintes contre le Pape d'à present, qui a trouué les choses ainsi, & ne fait que maintenir la possession en laquelle ses predecesseurs l'ont laissé; vostre Maiesté, dis ie, qui ne veut point d'eslecion chez soy, & de qui les predecesseurs sont cause plus que les Papes de ce qu'il n'y a plus d'eslecion en France. Et quand mesme le Pape auroit vn peu entrepris au fait de Perrin (ce qui n'est point) si est-ce que l'entreprise n'estant point sur vostre Maiesté, elle ne s'en doit point rendre le controolleur, ny entrer en scindicat contre sa Saincteté, laquelle iustement indignee, nous pourroit dire sur cela plusieurs choses qui nous feroient rougir de honte Monsieur de Bethune & moy. Car si les Papes ont entrepris sur les libertez de l'Eglise, les Roys, Sire, (ie ne le dis qu'à vous, & en cela mesme ie monstre quelle opinion j'ay de vostre generosité & bonté) n'en ont pas fait moins sur leurs Royaumes, & sur leurs Eglises mesmes; & s'il falloit remettre les choses comme elles estoient au commencement; ainsi qu'on voudroit par delà remettre le Pape aux eslections, les Roys y perdroient encores plus que les Papes. Et sans sortir de cette matiere benefeciale, il se voit en tous les endroits de la France tant de contrauentions aux concordats, que nous deuons reputer à grand auantage que le Pape s'en taise, tant s'en faut qu'en luy debattant ou contreroollant la prouision d'une petite Abbaye qui ne vaut pas le parler, vostre Maiesté ny ses ministres de deçà luy doiuent apporter necessité de le nous reprocher; qui est ce que i'auois à dire touchant les eslections. Quant aux constitutions de l'Empire, il seroit encores plus mal à vn Roy & à ses ministres de les alleguer au Pape, & luy dire en face qu'il n'y a deu ny peu desroger: car il nous diroit que pour son regard il n'est point suiet aux loix de l'Empire, ains que ce sont les Papes qui ont fait ces petits Empereurs d'Allemagne, & que les matieres benefeciales se regissent par les constitutions Canoniques, non pas les Imperiales; & qu'il ne peut s'esmerveiller assez qu'en vne chose de rien nous nous môstrons si zelateurs de l'observation

de certaines constitutions Imperiales imaginaires, qui ne sont point, & me furent iamais, & cependant ne faisons difficulté contre les vrayes constitutions Imperiales de tenir Mets, Toul, & Verdun. Ce seroit doncques, SIRE, vne autre grande honte que nous encourrions Monsieur l'Ambassadeur & moy, & vne autre dommage qui aduiendroit à vostre Maieité, si nous alleguions au Pape de vostre part ces pretendues constitutions de l'Empire. Je croy que ceux qui alleguent ces constitutions Imperiales, veulent dire les concordats d'Allemagne: mais le concordat d'Allemagne est vne Bulle du Pape Nicolas cinquiesme, faite en l'annee 1442. comme le concordat de France est vne Bulle du Pape Leon dixiesme, faites l'une & l'autre apres auoir concordé & conuenu de certains articles: & pour cela s'appellent concordats. Or est-il qu'en vne cause longuement plaidee à Rome sur le droit d'ellection pretendu par les Chanoines & Chapitres de l'Eglise Cathedrale de Verdun aduenant vacation de leur Euesché, il a esté iugé en Rote, que le pays Messin n'est point compris és concordats d'Allemagne, comme aussi les Geographes, ny la commune façon de parler d'auourd'huy ne mettent point les villes de Mets, Toul, & Verdun en Allemagne; ains anciennement on les mettoit en Gaule, & maintenant en Lorraine. Et est à noter, Sire, que les Ambassadeurs de l'Empereur & du Roy d'Espagne, & tous leurs adherans firent tout ce qui fust au monde possible pour faire iuger autrement, & pour faire comprendre ledit pays Messin és concordats d'Allemagne, preuoyans de quel preiudice cela seroit aux Roys & Couronne de France, beaucoup mieux que ne font ces François, qui pour auoir trois ou quatre cens escus de pension, veulent soustenir que le pays Messin est Allemand, contre le Pape & contre la Rote, qui sans y penser a iugé en faueur de la France que le pays Messin n'est point d'Allemagne. Aussi fust-il verifié audit procez, que depuis que lesdits concordats d'Allemagne furent faits il y a enuiron 154. ans, iamais le sainct Siege n'auoit fait bonne ausdits Chapitre & Chanoines de Verdun aucune leur ellection: ains les Papes auoient tousiours pourueu audit Euesché pleinement, purement, & simplement, sans confirmation d'aucune ellection faite par ledit Chapitre. De façon que ceux qui vous donnent à entendre que ces pretendues constitutions Imperiales n'ont iamais esté violees és dioceses de Mets, Toul, & Verdun, ains y ont tousiours esté pratiquées & obseruees, parlent contre la verité aussi bien qu'à vostre dommage, pour leur profit particulier. Aussi ay-ie desia veu trois Commendataires de ladite Abbaye de sainct Leon, qui ne pouuoient auoir esté esleus par les Religieux, ains pourueus en commande par le Pape, comme il pourroit sans aucune ellection à toutes les autres Abbayes de ce pays-là, si ce n'est à quelqu'une qui aye du sainct Siege priuilege particulier d'esslire son Abbé, comme il y en a quelques vnes; & encotes dernièrement l'aiday à vne à luy faire continuer vn semblable priuilege obtenu des anciens Papes. De tout ce que dessus il appert que ladite partie de Perrin a mauuaise cause, & que comme que ce soit, il ne seroit honneste ny vtile à vostre Maieité de l'espouser contre le Pape, en faueur duquel neantmoins, ny de Per-



rin, ie n'ay point eu intention de parler en ceste lettre (Dieu le sçait) mais pour vostre seule reputation, affaires, & seruice. Que s'il y a quelque chose plus librement ditte que ne comporte la commune façon de temps, ainsi que ie le recognois moy-mesme, vostre Maiesté me fera ceste grace de l'attribuer au zele que i'ay non seulement à la verité & iustice, mais aussi à tout ce qui est de vostre dignité & seruice, & à la ferme opinion & assurance que i'ay que vous estes non seulement le plus grand, mais aussi le meilleur & le plus debonnaire Roy que la France ait eu iamais, A tant, &c. S I R E, &c. De Rome ce 22. Decembre 1601.

## A MONSIEVR DE VILLEROY.

## CCXCVII.

**M**ONSIEVR, Vous verrez ee que i'escris au Roy par le commandement de sa Maiesté, sur le fait de l'Abbaye de saint Leon de Toul. S'il ne me l'eust commandé, ie ne m'y fusse point ingeré, mais puis qu'il l'a voulu i'ay deu luy obeyr fidellement, & m'assure que ma fidelité sera bien receüe; mais ie n'oserois en dire autant de ma liberté, si ie ne me confiois en la bonté du Roy, & au tesmoignage que ma conscience me rend, qu'en rien que i'aye dit, ny en la façon de le dire, ie n'ay regardé qu'à son seruice & au bien de ses affaires, & à pouruoir que pour vn gain petit & iniuste d'un particulier, sa Maiesté ne se fust vn grand dommage, tant en ses affaires publiques & en sa reputation, qu'en tout le reste. Ie n'ay aucun interest ny affection; aussi n'y eust-il possible iamais Cardinal moins amoureux de Rome que moy: mais ie ne laisse pourtant de recognoistre quand le Pape & le saint Siege ont raison & iustice, & de cognoistre qu'elle leur doit estre faite, & mesmement par nostre Roy, à qui il sied bien de faire iustice à chacun: mais il est particulierement honorable & profitable de la faire au Pape & au saint Siege. Joint que ie ne conseille & ne dis rien en cette cause; que ie ne l'aye dit & fait en la mienne propre lors que le Roy m'enuoya le breuet & lettres de nomination pour l'Abbaye de saint Nicolas des prés de Verdun: auquel fait vous pouuez vous souuenir comment ie m'y comporteray. Or pour mettre fin à ce propos, le procez du sieur Perrin n'a que trop duré: si on ne le veut terminer par Arrest de maintenuë, le Roy le peut faire en vn cas extraordinaire, comme est cestuy-cy par des lettres patentes, ordonnant pour le respect du Pape, & pour les merites dudit Perrin, qu'il iouyra pleinement & paisiblement de ladite Abbaye, & imposant silence perpetuel à la partie aduersé, & donnant en mandement au gouuerneur de Toul, & à tous autres qu'il appartiendra, qu'ils y tiennent la main, & autrement, comme vous sçaez trop mieux iuger. Je vous remercio bien  
humblement

humblement de la responce qu'il vous a pleu faire à Monsieur le Sacristain du Pape, & d'auoir fait rendre ma lettre à Monsieur le Nonce. Monsieur l'Archeuesque d'Arles vous rendra vne miême lettre en sa recômandation. Je vous ratifie icy & confirme tout ce que ie vous ay escript par la dite lettre, & vous prie l'auoir pour recommandé, en tout ce que vous iugerez pouuoir honnestement faire pour luy, & pour l'expedition des affaires pour lesquelles il va en Cour. Aussi vous priay-ie d'auoir pour recommandé l'affaire dont i'escriis au Roy pour Monsieur le Cardinal Camerin, qui est digne que sa Maiesté l'oblige de la grace qu'il luy demande pour vn sien parent proche. Si vous auez temps de vous rafraeschir la memoire d'une lettre que ie vous escriuis le 16. Nouembre 1596. vous trouuerez que les constitutions ou concordats d'Allemagne y sont encores mieux rabbatus qu'en celle que ie viens d'escrire au Roy, & que tout ce qui luit aux particuliers pour leur profit, n'est pas or pour le Roy ny pour la Couronne, encores qu'en apparence on cherche d'y interesser sa Maiesté, iusques à la faire parler & poursuiure contre elle mesme, & contre la grandeur & seureté de son Royaume. En la responce que i'eus de madite lettre, ie remarquay la grande bonté de sa Maiesté, qui s'abaisa iusques à me remercier de n'auoir point fait ce qu'elle m'auoit commandé pour le Chapitre de Verdun.

Je suis infiniment aise de la resolution que sa Maiesté a prise sur le fait de Chasteau-daufin, laquelle luy tournera par deçà à grand honneur & profit. Mais ie suis bien de vostre aduis touchant la demande que fait le Duc de Sauoye, & que le Roy, quiconque en parle, ne doit offenser ses amis pour faire plaisir à ses ennemis, ny se constituer iuge, & moins executeur entre ceux qui ne sont point ses suiets, ny se soumettans à sa iurisdiction. A tant, &c. Monsieur, &c. De Rome, ce 24. Decembre 1601.

*Fin du septiesme Livre.*

DDDDd



# LIVRE HVICTIESME

ANNEE M. DC. II.

AV ROY.

CCXCVIII.



IRE,

I'ay receu ce matin la lettre qu'il pleust à vostre Ma-  
jesté m'escire le 24. Decembre, en response de celle que ie  
vous auois escrite le 26. Nouembre, touchant les dessein  
qui se font sur la sueccession au Royaume d'Angleterre, &  
hier au soir à trois heures de nuit ie receus celle du 2. de ce mois, en  
response des miennes des cinq & dixiesme Decembre. Quant à la pre-  
miere ie tiens à grand honneur la part qu'il vous a pleu me faire de vos  
intentions sur ledit sujet, lesquelles ie trouue pleine de grande prudence,  
pieté, & iustice, & prie Dieu qu'il vous face la grace de les executer bien  
& heureusement en temps & lieu. Cependant ie n'ay rien à dire là dessus,  
sinon que Monsieur de Bethune & moy vserons de tout ce qu'il vous a  
pleu m'en escire au mieux que nous scaurions, & que nous auons desia  
aduisé de nous mesmes d'euitter toutes occasions que le Pape ou Mon-  
sieur le Cardinal Aldobrandin pourroient prendre de s'ouurir à nous du  
desir qu'ils ont d'aggrandir leurs alliez; & de fait ledit sieur de Bethune  
l'a desia dextrement euittee deux ou trois fois, comme ie l'ay remarqué en  
des propos qu'il m'a recitez.

Quand à la seconde lettre qui est du 2. de ce mois, ie diray au sieur Re-  
boul le bien & l'honneur que vostre Maieité luy veut faire. Et au demeu-  
rant, pource que Monsieur de Bethune est tombé avec Monsieur le Car-  
dinal Aldobrandin plusieurs fois sur le propos des faueurs qu'on dit auoir  
esté faites en Espagne au Duc de Modena, & aux Princes de la Mirande,  
& de quelle importance est cecy, & telles autres choses estoient à toute  
l'Italie, & en particulier à la maison Aldobrandine, & luy a remonstree ce

que vostre Maieſté m'eſcrit luy vouloir eſtre dit, ie n'y fis autre choſe, y ayant ledit ſieur de Bethune ſatisfait bien dextrement & amplement. Je ne lairray neantmoins de le ſecondier s'il m'en vient ocaſion, comme elle ſe pourra preſenter aſſez ſouuent, & comme i'en parlay meſme au Pape Vendredy 18. de cemois ſur l'acquiſition ou occupation du Marquiſat de Final queles Eſpagnols ſont apres à faire, dequoy ledit ſieur de Bethune & moy reſtaſmes d'accord Samedi qu'il vous eſcriroit. Et pour le regard de l'Abbaye de S. Leon de Toul, & du ſieur Perrin ſouſdataire de noſtre S. Pere, i'en eſcris à votre Maieſté bien au long par vne mienne lettre du 22. Decembre, en laquelle voſtre Maieſté aura veu, entre autres choſes, que les droicts de ceux de l'Empire, quant aux eſſections, ne touchent en rien les Diocèſes de Mets, Toul, & Verdun, & qu'il vous eſt expedient qu'ainſi ſoit, & que telles allegations ne font rien contre ledit Perrin, ains tournent au preiudice de voſtre Maieſté & de voſtre Couronne, du dommage de laquelle pluſieurs particuliers ne ſe ſoucient point, pourueu qu'il en tombe vn peu d'argent à leur bourſe, deſquels ie prie Dieu qu'il vous donne, S I R E, &c. De Rome ce 21. Ianuier 1602.

## A MONSIEVR DE VILLEROY.

CCIC.

**M**ONSIEVR, La iuſtice de Dieu ſur les Eſpagnols m'a apporté vne grande conſolation, & ie le prie de continuer à les humilier, & reprimer leur ambition inſatiable. Ils compteront l'vſurpation de Final pour vne grande proſperité, ſans ſe ſoucier de l'ire de Dieu, & de l'enueie & haine des hommes qu'ils accumulent ſur eux par leur violence & rapacité; mais l'Italie en laquelle ils ont la meilleure part, eſt au reſte ſi diuiſee, ſi intimidée, & intereſſée avec eux, qu'il n'y a que le S. Siege & la Siegneurie de Veniſe de ſain & entier. Mais vous ſçauiez que les Papes ne ſçauent & ne veulent faire la guerre, les Venitiens ont de la prudence & generoſité aſſez, & des forces encor pour eſtre de la partie, mais ſeuls ils ne feront que ſe deſſendre quand les Eſpagnols les attaqueront. Le Marquiſat de Saluſſes entre les mains du Roy eſtoit la vraye bride des Eſpagnols en Italie, comme vous dites tres-bien, & encor du Duc de Sauoye qui ne ceſſe de vous brouiller: & vous ſçauiez bien ce qui eſtoit de mon aduis, & que i'en eſcris par delà plus d'vne fois les choſes eſtans encores en leur entier: mais de choſe faite le conſeil en eſt pris. A tant, &c. Monſieur, &c. De Rome ce 4. Mars 1602.

DDDDd 2

## A M O N S I E U R D E V I L L E R O Y .

C C C .

**M** O N S I E U R , La lettre qu'il vous pleust m'escrire de Fontainebleau le 9. Mars me fut renduë le 29. & quant à ce qui se dit par delà, qu'un Iesuite a presché à Aix la Chappelle contre le Roy, la Royne, & Monseigneur le Dauphin, ie suis de vostre aduis que telles impostures sôt mises en auant par gens qui portent avec extrême impatience le repos & prosperité dont la France iouyt par la grace de Dieu, & par la vertu & valeur de nostre Roy, & ne feroit pas mal aisé à en deuiner les vrais & premiers auteurs. Sur quoy ie vous diray pour nostre commune consolation, que puis que ces malheureux conuoient ces chymeres en leurs ames meschantes, il n'a possible point esté si mauuais comme il semble de prime face, qu'ils les ayent escloses de si bonne heure, & en temps que le Roy est graces à Dieu plein de vie, de forces, & de vigueur pour pouruoir à la seureté de son Estat, & de la succession de ses enfans & de sa posterité, & pour à vn besoin rōpre la teste à ceux qui mettent en besongne tels prescheurs & escriuains. I'ay adiousté escriuains, pource que nous entendons icy qu'il y a encores quelques liures & escrits & semez par delà sur mesme suiet. Les menaces, mesmement faites de loing, comme sont celles-cy, sont autant d'armes pour ceux qui sont menacez, & qui en sçauent faire leur profit. Dauantage, outre la préuoyance du Roy & le bon ordre qu'il y donnera, ces calomnies se trouueront, vieilles, rances & pourries, & sans aucune force lors que les inuenteurs en penseront recueillir le fruit. A quoy i'adiousteray encores, que tout cecy se faisant pour reuocquer en doute la legitimité, & par consequent la succession de Monseigneur le Dauphin, ils perdent leur temps & leur peine, car la dissolution du premier pretendu mariage ayant esté faite par l'autorité du Pape, quand il auroit esté exposé, ou teu à sa Sainteté quelque chose contre verité & contre raison, & que mesme le dernier mariage ne seroit point valable, comme toutesfois il est, & comme toutes choses se trouuent au contraire de ce qu'ils veulent, si est ce que l'enfant seroit legitime par les Canons, & par les opinions de tous les Docteurs qui ont iamais escrit en telles matieres, quand il n'y auroit que la bonne foy de la mere, & par consequent succederait à la Couronne: dequoy ces méchans ne s'appertçoient point, pour l'enuie & la haine enragée qui non seulement les rongge & consume, mais aussi les auengle; qui est vne des plus grandes penitences que puissent auoir, telles gens, de voir vn si grand bien en la Chrestienté, & non seulement ne s'en pouuoir resiouyr, mais encores s'en affliger, & tourmenter, & enrager & perdre leur sens.

Ie diray à Monsieur le Cardinal Camerin ce que vous m'auiez escrit de l'Ordre de S. Michel qu'il desire pour son parent, vous priant cependant de tenir viuë la memoire de l'intention que le Roy en a donnée: Monsieur

Adorno Prelat Geneuois qui fut en France à la Cour avec Monsieur le Cardinal de Florence , retient tousiours sa bonne affection & seruitude enuers le Roy, & a desiré que ie le témoignasse à sa Maiesté & à vous

Outre vostre lettre du 9. Mars, i'en ay receu vne du Roy & vne autre de vous du 26. Feurier en recommandation de l'Archeuesché de Sens pour Monsieur de Bourges. l'ay fait & faits tout ce qui m'a esté possible, & encores dernièrement ie fis vn sômaire de deux informations qui furent faites des qualitez de mondit sieur de Bourges és annees 1596. & 1598. & le rapportay par escrit au Pape, qui n'eust que me respondre. Monsieur de Bethune sollicite fort l'Indult de Mets, Toul, & Verdun, & sur les responses qu'on luy a faites, i'ay esté d'auis qu'il offrist au Pape & à Monsieur le Cardinal Aldobrandin que le Roy subiroit toutes les conditions que sa Sainteté voudroit apposer à l'Indult pour asseurance que sa Maiesté & ses successeurs en vseront bien, en nommant personnes de qualité requise par les saincts decretz. Cependant estans ces deux instances si difficiles, & comme incompatiables ensemble, il sera besoin superceder vn peu ceste-là, pour ceste-cy qui importe plus, & à laquelle le Pape se laissera plustost aller qu'à l'autre. Le Comte de Verruc m'a baillé les repliques qu'il fait aux responses de Monsieur Boiwin, Villars, sur le differant qu'ils ont pour le Prieuré de saint Iean de Geneue. Atant &c. Monsieur, &c. De Rome, ce 2. Auil 1602.

## A MONSIEVR DE VILLEROY.

CCCI.

**M**ONSIEVR, Par la copie de la lettre de feu Monsieur le Marechal de Brissac à feu Monsieur de Beauregard que m'enuoyez, il appert qu'au temps que ledit Marechal escriuit ladite lettre, qui fut le 10. Octobre 1554. il auoit les originaux & copies des vieux Indults concedez par le S. Siege aux Ducs de Sauoye & Princes de Piémont touchant les benefices desdits pais: mais de la confirmation desdits Indults que le Roy Henry II. auoit obtenuë pour soy il n'en auoit autre chose, sinon ce que sa Maiesté en auoit escrit en passant, & à autre propos, par lettres du 29. Septembre 1554. Or quand aux Indults que pour ce regard auoient lors les Ducs da Sauoye, vous en aurez pleine cognoissance & certitude par vne copie que Monsieur de Bethune a recouree de la confirmation qu'en obtint de ce Pape mesme le Duc d'apresent le 19. Iuin 1595. où vous verrez comme la premiere concession de tels Indults fut faite par Nicolas V. à Louys Duc de Sauoye, & depuis a esté confirmee & continuee par Sixte IV. Innocent VIII. Iules II. Leon X. Clement VII. Iules III. Gregoire XIII. & par le Pape d'aujourd'huy. Lesdits Indults ne donnent point aux Ducs de Sauoye faculté de nommer proprement. Aussi n'a le saint Siege en vertu d'iceux receu iusques icy leurs nominations, ains a

DDDDd 3

touſiours pourueu purement & ſimplement aux benefices deſdits païs, quand au ſtyle & façon de parler des bulles Apoſtoliques: mais bien contiennent leſdits Indults vne choſe quaſi équipollente à vn droit de nomination, qui eſt en ſomme que le Pape ne pouruoirra point aux Archeueſchez, Eueſchez, & Abbayes deſdits païs, ſans auoir premierement eul' inſtention & conſentement du Duc touchant les perſonnes capables qui auroient à y eſtre pourueës, ny pareillement à trois Prieurez, à ſçauoir de Saluſſes, de Ripaille, & de la Nouaiſſe, ny à la Preuoſté de Montjou. Et quand aux plus grandes dignitez des Eglīſes Cathedrales apres la Pontificale, & aux Prieurez conuentuels, & aux autres benefices reſeruez par les regles de Chancellerie de Rome à la diſpoſition du S. Siege, le Pape en pouruoirra perſonnes capables, natifues des terres & Seigneuries dudit Duc, mais non d'autres, s'ils ne ſont agreables audit Duc, autrement les prouiſions Apoſtoliques ſeront nulles en tous les cas cy-deſſus ſpecifiez. Voila tout; & ne faut point penſer qu'au temps du Mareſchal de Briſſac, ny depuis iuſques à la derniere confirmation, il y ait eu plus que cela. Car le Duc d'apreſent qui eſt tel que vous le cognoiſſez, & qui a touſiours eſté traité fauorablement en ce Pontificat, n'y doit auoir rien oublié, & y auroit pluſtoſt adiouté que diminué. Quant à la confirmation qu'Henry II. en obrint pour ſoy & pour ſes ſucceſſeurs eſdits païs, outre ce qui eſt porté par ladite lettre du feu Mareſchal de Briſſac, j'ay trouué parmy mes vieux papiers vne copie de certaines lettres patētes que ledit Roy expedia en faueur du S. Siege touchant le Duché de Bretagne à S. Germain le 18. Auiil 1553. eſquelles ledit ſieur Roy entr'autres conſiderations qui le meurent à les expedier, dit que le Pape d'alors Iules III. luy auoit peu de iours auparauant octroyé & concedé la confirmation des Indults qu'auoient ſes predeceſſeurs les Ducs de Sauoye Princes de Piémont de nommer & preſenter aux benefices conſistoriaux deſdits païs, avec autres graces & conceſſions contenuës eſdits Indults. Outre cela j'ay encores trouué vne copie d'un brief expedie par ledit Pape audit Roy le 28. Octobre 1550. par lequel, ſans ce que ledit Roy auoit fait vne autre declaration au profit du S. Siege touchant le païs de Sauoye & Piémont, & neantmoins pretenoit que ſes predeceſſeurs Ducs auoient eu des Indults, & qu'il en deuoit iouir, ſa Sainteté dit que ſa Maieſté n'auoit rien pour monſtrer deſdits Indults du temps de Paul III. ny du ſien, & neantmoins promet en parole de Pape, pour ſoy & ſes ſucceſſeurs Papes, & pour le S. Siege, que ſi ſa Maieſté prouuera dās 18. mois qu'il aye eſté cōcedé des priuileges & Indults Apoſtoliques auſdits Ducs, & que leſdits priuileges & Indults ayent eſté valables & en vſage, & qu'à raiſon d'iceux ledit Roy aye quelque droit pour le regard des Eueſchez & Abbayes deſdits païs, ils luy ſeront faits bons. Et afin que pour cela vous puſſiez mieux iuger de toutes ces choſes, ie vous enuoye copie deſdites eſcritures, de la ſuite deſquelles & de leurs actes il eſt aiſé à iuger que depuis ledit brief de Iules III. 1550. iuſques à la derniere declaration de Henry II. du 18. Auiil 1553. ledit ſieur Roy en cēt eſpace de temps de deux ans & cinq mois fit apparoir des Indults octroyez aux Ducs de Sauoye, & en obtint confirmation pour ſoy; laquelle deuoit

auoir esté concedee peu de temps auant ledit 18. Aueil. 1553. d'autant que les paroles du Roy sont, *NOVS A CES IOVRS PASSEZ LIBERALEMENT*, &c. de façon qu'elle pourra auoir esté expedice sur la fin de 1552. ou au commencement de 1553. ce qui vous seruira pour en trouuer plustost par delà les bulles ou briefs. Nous ne lairrons pourtant de les faire chercher és registres de deçà, si nous y pouuons penetrer, ce qui nous sera peut estre difficile. Tant y a que quand ladite confirmation ne se pourroit trouuer, & n'auroit iamais esté, si est ce que sur la confirmation mesme derniere du Pape d'apresent au Duc de Sauoye desdits Indults, la Saincteté ne pourra refuser la mesme grace au Roy qui a succédé audit Duc és pais de Bresse, Bugeay, Valromay, & Bailliage de Gex, avec leurs causes, droicts, priuileges, prerogatiues, & preeminences; outre que la Saincteté ny aucun autre Pape, ne voudroit auoir refusé à vn Roy de France, ce qui auroit esté accordé à vn Duc de Sauoye pour le regard d'un mesme sujet, terre, & pais. Il y a encores plus; C'est que par les mesmes causes pour lesquelles la premiere concession del'Indult fut faite par Nicolas V. à Louys Duc, le Pape d'apresent, & tout autre doit conceder au Roy & à ses successeurs l'Indult des Eueschez de Mers, Toul, & Verdun, comme i'espere que nous l'obtiendrons pour le plustard après la publication du Concile. En lisant lesdites declaratiōs de Henry II. en faueur du S. Siege, tant pour Sauoye & Piémōt, que Bretagne, est à noter que toutes les fois que les Papes renouelloient les Indults pour Bretagne & Prouence, ils se faisoient faire semblables declaratiōs par nos Roys iusques en 1186. que Sixte V. ayant mis en la detairerie personnes toutes nouvelles, Monsieur le Cardinal d'Est, près lequel i'estois lors, trouua moyen d'auoir l'Indult de Bretagne & Prouence pour le feu Roy, sans faire fournir aucune declaratiō du Roy. Ce qui a esté suiuy de la mesme façon du Roy d'apresent lors qu'on obtint pareil Indult pour luy, & se fera desormais pour les Roys suiuaus sur ces deux derniers Indults, ainsi obtenus purement & simplement sans aucune telle declaratiō. Aussi a-t-on laissé d'vser icy mesme de quelques choses que estoient lors portees par lesdites declaratiōs. Qui sera cause que si en la confirmation que Henry II. obtint de Jules III. se trouue trop imprimee & inculquee la declaratiō precedente dudit Roy, nous ne nous en aiderons point, de peur de reduire en memoire cela, & de donner occasion d'en demander autant: mais nous nous fonderons sur la derniere confirmation que le Pape a faite au Duc d'apresent. A tant, &c. de Rome, ce premier Aueil 1602.



## A MONSIEVR DE VILLEROY.

CCCCII.

**M**ONSIEVR, Je receus le sixiesme de ce mois vne lettre du Roy du vingt deuxiesme Mars par le sieur de Beauuau, enuoyé par deçà par M<sup>onsieur</sup> de Lorraine & par M<sup>onsieur</sup> le Duc de Bar son fils, pour la dispense du mariage d'entre mondit sieur le Duc de Bar & Madame sœur du Roy; au fait de laquelle ie feray suivant le commandement de sa Maies<sup>té</sup> tout ce qui me sera possible, comme i'ay fait cy deuant. Bien eussay-je desiré que le renouvellement de ceste poursuite ne se fust point fait si tost apres le refus de Madame de se faire Catholique; & qu'il ne se fust point rencontré avec l'instance qui se fait de l'Indult des Eueschez de Mets, Toul, & Verdun, & des expéditions de l'Archeuesché de Sens pour M<sup>onsieur</sup> de Bourges, & de l'Euesché de Troyes pour M<sup>onsieur</sup> Benoist, matieres toutes difficiles; mais nous aduiserons M<sup>onsieur</sup> de Bethune & moy de faire de sorte, en tant qu'il se pourra, que ceste rencontre ne nuise à pas vne desdites requestes.

Le douziesme de ce mois ie receus par l'ordinaire de Lyon la vostre du 26. Mars, en responce de celle que ie vous auois escript le 4. & ne faudray de remonstrer à nostre S. Pere ce qu'il vous plaist m'escrire touchant la façon de proceder des Espagnols en la deliurance des gens de M<sup>onsieur</sup> de la Rochepor, & le traitement qu'ils continuent de faire aux François traffiquans en leur pays; ce que i'attribuë à leur superbe, & mépris de toutes autres nations, & à leur haine particuliere contre la François<sup>e</sup>. Quant à ce qu'il est adueni depuis peu de iours à M<sup>onsieur</sup> le Cardinal de Sourdis ie ne m'en émerueille nullement, ains m'attends qu'apres que vous l'aurez tiré de ceste fosse, comme vous faites bien d'y penser, il s'en cauera d'autres encores plus profondes. D'une chose me déplaist autant ou plus que tout le reste; c'est que i'entends qu'il enuoye vn homme par deçà sur ce suiet, ce qui donnera occasion à ceste Cour de blasmer les François en diuerses façons, & nous empesch<sup>er</sup> bien M<sup>onsieur</sup> de Bethune & moy, qui voudrois dire bien de tous, loüer, ou pour le moins excuser toutes choses: mais ie vous assure bien qu'il n'en rapportera point la loüange que possible il en attend, & qu'il fera vn tres-grand déplaisir au Pape, lequel ne veut auoir les oreilles battues d'éuenemens ausquels il ne peut remedier; & moins trouuent-il bon que les Ecclesiastiques heurtent les puissances seculieres, & facent donner des coups qu'ils ne puissent parer. Bien aime sa Saincteté le zele es personnes Ecclesiastiques, mais elle veut qu'il soit regy & guidé par la prudence & discretion, en ayant esgard aux choses, & à leur possibilité, importance, & consequence, & aux personnes, temps, & lieux, & autres circonstances; ce que i'ay ouï dire autresfois à sa Saincteté sur semblables occasi<sup>ons</sup>. Nous ferons icy de  
mieu.

mieux que nous pourrions, pendant que vous par-delà travaillerez au plus difficile. Je vous remercie de ce que vous voulez faire pour Monsieur de Reboul, & ay fait tenir par luy mesme à Monsieur le Cardinal Baronia vostre response sur la recommandation qu'il vous avoit faite du dit Reboul. J'ay entendu y a plusieurs iours qu'il y a prisonnier en la Bastille vn appelle Villebouché, & ie viens d'apprendre tous maintenant du dit sieur Beauran, que ledit Villebouché & le Capucin Hilare de Grenoble vendront à Rome en compagnie, & s'en retourneront aussi ensemble en France; de quoy i'ay estimé vous deuoir donner aduis, comme de chose qui par accident pourroit servir de quelque preuue, ou indice, ou d'autre sort des actions ledit Villebouché pour estre chargé. La remise que le Roy a fait du voyage du Cardinal Legat à l'année prochaine, a donné & donnera encores à discurrir aux iuristes sur les causes d'vn si long delay, mais quoy qu'ils en disent ie m'assure qu'il n'y a autres causes que telles que le Roy en a escrites; & que sa Maiesté ne vouldra point negliger la bonne volonté que le Pape a monstree de luy complaire en luy destinant vn Legat pour chose qui auoit accoustumé de se faire par les Monces residents; ains en vn temps si mal ie voudra encores adiouster celle approbation du Pape & du S. Siege à Monseigneur le Dauphin, outre celles qui ont ja precedé cy deuant. L'Ambassadeur de Savoye vient de m'envoyer la copie de la poulxion que son fils obtenu de Prieuré de S. Jean de Geneue par resignation du Secretaire qu'il impetra en 1595. & du consentement que Monsieur de Savoye a presté à la prise de possession, desquelles copies seront avec la presente.

Vn moine Fueillentin appelle frere Philibert de borderia, autrement de sainte Potentiane, grand allant, & menteur impudent, ayant eu par forme de pénitence du Pape, commandement d'aller quelques iours en vn leur couuent de Sermoneta à vne iournee & demie de Rome, au lieu d'obeyr à sa Sainteté, s'en est fuy en France, où son General craint qu'il ne face quelque folie scandaleuse à leur congregation, & déplaisante à sa Sainteté, & desire qu'en vne telle contumace, il ne trouue point de faueur en Cour, ains soit rennoyé à sa Sainteté, & à ses Superieurs qui le connoissent trop mieux. Apres la presente escrite, i'ay receu vne vostre du 16. d'Anvers, en recommandation de Monsieur Moran premier commis de Monsieur le Thresorier de l'Espargne, lequel sieur Moran ie serviray tres-voluntiers de tout mon pouuoir. A tant, &c. Monsieur. &c. De Rome ce 15. d'Auril 1602.

EEEE

## A MONSIEVR DE VILLEROY.

CCCCIII.

**M**ONSIEVR, La lettre qu'il vous pleust m'escrire le 9. de ce mois fust renduë le 25. par laquelle i'ay veü que vous attendiez l'aduis de Monsieur le Chancelier sur les copies qui auoient esté enuoyees d'icy des Indults obtenus du S. Siege pour les Ducs de Sauoye & Princes de Piémont, & nous attendons icy ce qu'il plaira au Roy nous commander là dessus, pour executer ses commandemens avec la fidelité accoustumee. Cependant i'ay consideré ce que vous auez escrit à Monsieur l'Ambassadeur de l'entreprise de Geneue, & me semble que la raison ne comporte point que les Espagnols s'aillent engager à vne telle entreprise, eux ayans tant d'autre besongne taillee ailleurs. Toutesfois le plus seur est de prendre tousiours les choses au pis, & pouruoir en tout éuenement. Aussi depuis le decez du Roy Philippe second, ils ont fait tant d'autre choses contre raison, & contre leur propre profit, que ce ne seroit point à nous de conclurre qu'ils nous feront quelque chose par ce qu'ils ne la doiuent point faire. Et puis ils ont tousiours aux flancs Monsieur de Sauoye qui ne peut demeurer en repos, & qui fait la pluspart de ses choses à rebours, & s'est tousiours montré particulièrement affollé de cette entreprise: laquelle d'ailleurs en haine de l'heresie semble en soy plausible & honorable, & est facilitée encore par le pretexte & besoin qu'ils ont passage là auprès pour aller aux Pays-bas; de façon que s'ils decourent qu'il y fasse bon pour eux, ils peuvent attaquer ceste place, sinon ils peuvent suivre leur chemin, & passer outre sans monstrier d'y auoir pensé; & vous exerceront en cela tous les ans tant que la guerre desdicts Pays-bas durera. Mais l'intérêt d'Estat que le Roy a que ceste place ne tombe entre leurs mains est si clair & cogneu de tous, & sa M. s'en est si expressément & tant de fois declarée enuers le Pape mesme, que ie ne sçay mes-huy qui se pourroit esmerueiller si en cas qu'ils y attentaient, elle se mettoit au deuoir auquel le bien & la seurte de ses Estats, & son honneur & reputation la contraindroient. Quant à ce que vous n'estes point pressez pour le fait des Iesuittes, ie ne pense point qu'il y ayt autre finesse, si ce n'est que l'on reseruoit possible ceste instance à quand le Legat qui vous auoit esté destiné seroit par delà, par le moyen duquel l'on penseroit de faire rabatre quelque chose des conditions que vous auez apposees à leur r'appel. Ce pourroit auoir esté cause que ny le Pape, ny les Iesuittes mesmes n'en auroient cependant fait aucune instance: outre que sa Sainteté a assez d'autres choses à penser, & qu'eux n'ont possible pas grande esperance que vous rabbattiez gueres desdictes conditions. Bien est vray qu'un Prelat de ceste Cour appelé Monsignor Aguccia, me dit qu'il y a enuiron six semaines que le Pape luy auoit ordonné de me venir trouuer pour conferer avec moy du fait desdicts Iesuittes, & depuis

m'ayant rencontré en la rue, me dit qu'il auoit esté chez moy pour ce fait, mais qu'il ne m'auoit point trouué, & qu'il retourneroit; ce qu'il n'a point fait encores. Au demeurant, il me semble que c'est à eux à poursuivre, & que vous ayans parlé les derniers, vous pouvez attendre sans y faire autre chose, tout de mesme que de la publication du Concile, dont ie m'émouillerois plus que vous n'ayez esté sollicitez, n'estoit qu'on pourroit auoir aussi donné ceste instance audit Seigneur Legat. Tant y a que comme en la suspension de l'instance du Concile nous n'y deuons presupposer aucune finesse, aussi me laissay ie aller à croire qu'en l'autre fait des Iesuites il n'y en aye gueres plus.

Ie parlay au Pape le 22. de ce mois de la dispense de mariage de Madame sœur du Roy avec Monsieur le Duc de Bar; & sa Sainteté me respondit qu'il remettrait ceste affaire à vne Congregation; dequoy ie me contentay, tant pource que ie scauois qu'il ne se resoudroit iamais seul de cét affaire, que pource que ie crois que nous la gaigerons en quelque Congregation qu'elle soit, comme ie vous ay escrit autresfois. Ie ne presume gueres de moy, (comme i'en ay moins d'occasion que tout autre) mais ie pense auoir assez de prouision en ce fait particulier, pour monstrier & prouuer que sa Sainteté peut & doit accorder ceste dispense. Et si sa Sainteté eust permis que l'on disputast de ce pouoir & deuoir en la Congregation qui se fist lors que mondit sieur le Duc de Bar estoit icy, comme sa Sainteté permit qu'on y disputast du Iubilé que ledit Seigneur Duc demandoit à gagner, nous eussions gagné deslors tous ces deux poincts sans doute, comme ie vous en rendis aussi compte en ce temps là. Le mesme iour par permission de sa Sainteté, ie preconisay en Consistoire l'Archeuesché de Sens pour Monsieur de Bourges, & ce matin ie l'ay proposé, & ledit Seigneur a esté fait Archeuesque de Sens. Il est obligé au Roy, non seulement de l'Archeuesché, mais aussi de ceste expedition y ayant sa Maiesté interposé son intercession & son autorité avec vne si longue constance & perseuerance comme vous scauez. Monsieur de Bethune y a executé ses commandemens avec toute fidelité & affection, & ie ne pense pas y auoir esté du tout inutile, par le moyen entre autres d'un sommaire que ie dressay des deux informations qui furent faites à Paris es années 1596. & 1598. des qualitez dudit sieur de Bourges, lequel sommaire ie rapportay de vive voix au Pape, & le luy laissay par écrit pour le mieux considerer, & le faire voir s'il luy plaisoit aux Cardinaux qu'il penseroit estre les plus contraires à cette expedition, comme ie scay qu'il a fait. Ie vous enuoye vne copie dudit sommaire & possible y en aura-t'il deux, afin que vous en puissiez donner l'une audit Seigneur Archeuesque de Sens si bon vous semble.

Monsieur Pichot neveu de feu Monsieur l'Euesque de Salusses, & que le Roy auoit nommé à l'Euesché dudit Salusses vacquant par la mort de son oncle, m'a prié d'escrire en sa faueur au Roy & à vous, à ce qu'il luy fust fait quelque bien. Il est tres-honneste homme & digne des bien-faits de sa Maiesté n'ayant nullement de ces fumées qu'ont trop souvent les Docteurs en Theologie, ains abondance en vraye & naïue bonté & modestie.

I'auois anticipé de vous escrire ce que dessus auant qu'aller au Consistoire, où quand i'ay parlé au Pape en mon audience priuée de la proposition que i'auois à faire en public de l'Archeuesché de Sens, suivant la preconisation que i'en auois faite il y a huit iours par sa permission, i'ay trouué que depuis on auoit fait de mauvais offices envers la Sainteté, laquelle m'a dit qu'il y auoit à Rome des dispenses que l'Archeuesque de Bourges auoit données, lesquelles ne pouuoient estre concedées que par le S. Siege. le luy ay repliqué que ce pouoit estre vne calomnie, pour empêcher ce bon uerue, & des tourner la bonne volonté de la Sainteté, mais au pis aller, ie ne luy voulois point celer que du temps qu'on ne pouoit venir à Rome pour obtenir du S. Siege les despêches & expéditions nécessaires sur affaires qui ne se pouuoient différer, les Parlemens qui fuiuoient le parry du Roy ordonnoient aux Euesques d'y pouuoir; Que i'en auois veu quelque chose de quelques autres Euesques, mais de celuy cy rien: & quand il s'en trouueroit quelque vne, cela luy seroit commun avec tous les Euesques qui auoient serui le Roy, lesquels ie pouois dire, avec le congé de la Sainteté, auoir plus seruy à la Religion Catholique & à l'autorité du S. Siege, que ceux qui estoient contre la Maisté, & qui faisoient tout ce qu'ils pouuoient, premierement à ce que la Maisté ne se convertist, & secondement afin qu'il ne fust receu ny recogneu pour Catholique, & par consequent le S. Siege n'eust iamais eu l'obedience qui luy appartenoit; Que ie priois doncques la Sainteté de n'auoir égard mes huy à tels rapports; & de ne s'arrester en si beau chemin, ny souffrir qu'un tel affront fust fait, non à un Prelat ny à moy, mais au Roy, qui en fin auoit obtenu que cet affaire fut preconisée comme il auoit esté; Que si la Sainteté me permettoit lors que ie ferois la proposition, de lire à haute voix en plein Consistoire le sommaire que ie luy auois fait voir des deux informations des qualitez de ce Prelat, & que i'auois porté expressément sur moy, ie m'asserois qu'il n'y auroit Cardinal si estoit qui ostant dire contre Sa Sainteté doncques m'ayant permis de proposer, & de lire tout ce qui me sembleroit à propos, i'ay dit par cœur ce qui appartenoit à l'Eglise & à l'Archeuesché en soy, & quand v'est venu à parler des qualitez de ce Prelat, i'ay dit qu'avec le congé de la Sainteté, & contre ma coustume, ie lirois par escrit ce que i'en auois extrait des deux informations; afin que le tout fust recité fidèlement, & que per sonne ne pout dire que i'y eusse auioüsté ny changé vn seul mot. Et moy ayant acheué de parler, le Pape, suivant la coustume de demander tousiours à celui qui a proposé son aduis le premier, m'a demandé ce qu'il m'en sembloit; & moy ayant respondu en faueur de l'expédition; Monsieur le Cardinal de Florence qui s'est trouué au iourd'huy le plus ancien du Consistoire, a dit, *PLACET*, & plusieurs autres apres luy ont puis en est trouué vn seul qui a dit, *MISI NON PLACET, SED TAMEN MERE MITTO*, & toutes les autres apres ont agréé chacun l'expédition. Et apres que tous ont en ainsi fait, le Pape ayant osté son bonnet, prononcé les paroles solennelles & acoustumées quand il fait vn Euesque ou l'Archeuesque, & puis s'estant remis son bonnet & tourné son visage vers le Cardinal qui auoit dit *MISI NON PLACET*,

SED SID TAMEN MERMITTO a dit qu'il auoit bien pensé & delibéré ce fait auant que permettre qu'on en yint à l'expedition : mais que tant de gens de bien ayant depose & tesmoigné tout ce que i'auois recité, & ce Prelat estant desia Archeuesque, & de si long temps, & le Roy ayant fait instante plusieurs annees qu'il fust transféré à l'Archeuesché de Sens, sa Sainteté n'auoit peu faire de moins que ce qu'elle venoit de faire. Voila, Monsieur, comme cét affaire s'est passé. A quoy n'ayant rien qu'adiouster, ie finiray icy la presente par mes tres-humbles baile-mains, &c. Monsieur, &c. de De Rome, ce Lundy 29. d'Auril 1602.

## A MONSIEVR DE VILLEROY.

## CCCIV.

**M**ONSIEVR, La lettre qu'il vous pleust m'escrire de Blois le 14. d'Auril me fust renduë le 12. de ce mois, & ie vous remercie bien humblement de ce qu'il vous auoit plu lire au Roy en la presence de la Royné la lettre que ie vous auois escripte le premier dudit mois d'Auril, estant bien aise que Monsieur le Chancelier qui s'y rencontra confirmast que ie vous y escriuois contre le mariage de leurs Maiestez. Outre ce, on escrit de France qu'il y a encor parmy vous des personnes qui ont des volontez tres-mauuais, & qui troubleroient volontiers la tranquillité de la France s'ils pouoient. Mais j'espere que comme Dieu a fait au Roy la grace ( qui sembloit la plus difficile ) de pacifier son Royaume dedans & dehors, aussi luy fera-t'il encores cette cy ( qui semble facile ) de conseruer la paix & le repos qu'il y a mis par sa vertu, valeur, & bon-heur, continuant sa Maiesté à faire de bien en mieux administrer la iustice à vn chacun, & à ne souffrir que les plus forts & les plus audacieux oppriment les plus foibles & plus modestes, & moins que les officiers, de quelque estat, condition, & robbe qu'ils soient, abusent de leurs charges & de leur puissance à l'oppression de ceux qui sont sous eux, ou ont à passer par leurs mains; chose qui irrite les subjets non seulement contre les Magistats & autres superieurs qui font les concussion & oppressions, mais aussi contre le Prince qui les endure: & ne se contentant point sa Maiesté de faire marcher droit seldits officiers de toutes robbes, mais aussi continuant elle mesme mieux que iamais en la iustice distributive des charges, honnetrs, & dignitez de toutes sortes, les distribuant à gens de bien & capables, qui ayent zele au public, aiment la personne de sa Maiesté, & la conseruation & propagation de sa posterité, & soient contens de son regne, sans desir d'aucune mutation que de bien en mieux; approchant aussi de soy, & mettant en son Conseil gens de mesme; vsant au reste de precaution & pouruoyance pour le regard de ceux de qui il a à douter dans le Royaume premierement, & puis dehors; ne negligean point les aduis qui luy seront donnez, ains les bien examinant, & mesme tenant les gens expres

en chacthe Prouince; qui veillent & ayent les yeux ouuerts pour decou-  
 urir s'il se brasse quelque chose contre son seruice, & contre le repos de  
 son Royaume, & loin de toute calomnie en aduertissent fidellement sa  
 Maieité. Que si d'auanture il y auoit quelque chose qui despleust vniuer-  
 sellement aux bons, ou en quoy le commun peuple, & les Ecclesiastiques  
 ou autres fussent par trop greuez, ie m'assure que sa Maieité y apportera  
 le remede & la moderation conuenable: se souuenant tousiours (comme  
 ielçay qu'il a empraint en son ame) qu'il est, cōme sont aussi tous les bons  
 Roys, gardien, tuteur, & pere du peuple, & de tous ses subjets, & de leurs  
 personnes, de leur honneur, & de leurs biens, estably de Dieu pour com-  
 mander à son honneur & gloire, & au bien, profit, soulagement, repos, &  
 felicité de ses subiets. Sa Maieité doncques estant telle, il n'y aura mau-  
 uaise volonté de qui que ce soit qui ne se corrige, ou demeure vaine, sans  
 aucun moyen de preiudicier à l'autorité de sa Maieité, ny à la tranquil-  
 lité du Royaume. Mais ie m'oublie en la consideration de tant de vertus  
 siennes, & en l'assurance qu'elle me donne de la continuation de la paix  
 de la France, tant au dedans que dehors, quoy que l'on dise & murmure de  
 guerre & de troubles. Au demeurant, vous aurez veu par mes precedentes  
 cōme la consideration de l'Indult de Mets, Toul, & Verdun, ne nous a  
 point fait perdre l'occasion d'obtenir la prouision de l'Archeuesché de  
 Sens pour Monsieur de Bourges, ny la Congregation pour la dispense de  
 mariage de Madame sœur du Roy, comme elle ne nous fera non plus per-  
 dre cy apres aucune occasion d'impetrer ce que sa Maieité aura à cœur.

Ie n'ay iamais entendu qu'il ait esté fait aucun mauvais office aupres du  
 Pape contre Monsieur de Fresnes Canaye, ny que sa Sainteté l'aye en au-  
 tre opinion que de bon Catholique. Que si ledit sieur de Fresnes en a quel-  
 ques aduis contraires, ie m'esmerueille que par ses lettres il ne s'en soit  
 laissé entendre quelque chose à Monsieur de Bethune, ou à moy, ou à tous  
 deux: car comme ie ne suis pas d'auis que nous en parlions au Pape que  
 bien à propos, pour ne donner à penser à sa Sainteté, ce que possible elle  
 n'a oncques pensé; aussi n'eussions nous manqué audit sieur de Fresne, &  
 ne luy manquerons iamais d'aucun office & seruice qui soit den non seu-  
 lement à la sincerité de sa conuersion, de laquelle ie sçay combien le party  
 qu'il a quitté a eu de desplaisir & d'indignation, mais aussi à la charge  
 dont le Roy l'a honoré, & à ses rares vertus & merites. A tant, &c. Mon-  
 sieur, &c. De Rome, ce 20. May 1602.

---

A MONSIEVR DE VILLEROY.

CCCV.

**M**ONSIEVR, Ie vous remercie bien-humblement de ce qu'il  
 vous a plu lire au Roy ma lettre du 29. d'Auril, comme i'ay veu  
 par la vostre du 21. May, pour moy receu le 10. & loué Dieu du content

serment que le Roy a receu du deuoir que Monsieur l'Ambassadeur & moy auons fait en l'expedition de l'Archeuesché de Sens. Nous ne manquerons non plus en celle de l'Euesché de Troyes pour Monsieur Benoist; mais la Bible en François y apporte des longueurs & difficultez, comme vous escrira plus amplement ledit sieur Ambassadeur, qui en a traité plus fraichement avec le Pape.

Sa Sainteté, quoy qu'on l'aye sollicitée, n'a point encores fait appeler les Cardinaux destinez pour la Congregation qui se doit faire sur la dispense de mariage de Madame sœur du Roy avec Monsieur le Duc de Bar, & dilaye le plus qu'elle peut, preuoyant en son esprit que ladite Congregation conclura que sadite Sainteté peut & doit faire ce qu'elle a autresfois dit qu'elle ne feroit iamais. Si faut-il qu'elle y vienne tost ou tard, & ne peut gueres plus différer: aussi vne semaine plustost ou plus tard n'importe pas tant qu'on la doie violenter, & se departir de la ciuilité & du respect que nous luy devons. Cependant nous ferons sentir au sieur de Beauuau à toutes occasions que l'intercession du Roy est celle qui fait tout, & que c'est à sa Maiesté, apres Dieu, que le tout sera deu. Aussi a resolu Monsieur de Bethune quand la dispense sera obtenüe de l'enuoyer au Roy, afin que les Princes de Lorraine la recoiuent des mains de sa Maiesté, comme par son moyen & autorité elle aura esté impetree. Le mesme sieur de Bethune vous a donné & donne si particulier aduis des leuees que les Espagnols ont faites & font en Italie, que ie ne scaurois y rien adiouster: aussi quand i'apprens quelque chose de cela, ou d'autre chose qui importe, ie la luy dis. Ie loue Dieu de l'obeyssance que le Roy a trouuée à Poitiers & en tout ce pays-là, & de ce que sa Maiesté dispoit les choses pour l'y maintenir & accroistre, comme i'espere qu'elle en fera autant par toute la France. Aussi est-ce la chose la plus vtile & la plus salutaire qu'elle sceust faire pour soy, & pour sa posterité, & pour son Royaume; Dieu luy en face la grace.

Monsieur le Cardinal Baronio me dist vn de ces iours qu'il auoit aduis d'Alger de plusieurs maux qu'on y faisoit aux François, contre ce qui auoit autresfois esté capitulé entre nous & ceux-là, & que c'estoit grande compassion; Qu'il m'enuoyeroit les lettres qu'il en auoit receuës, afin que s'il me sembloit i'en escriuissse en Cour. Depuis il m'enuoya lesdites lettres, que ie trouue estre d'un Moine, à laquelle sorte de gens ie ne sçay combien de foy doit estre adioustee, par l'ignorance, vanité, & malice qui trop souuent s'y trouue. Si le Roy (comme ce Moine dit) a enuoyé quelqu'un par-delà de sa part, vous serez mieux aduertis par luy de ce qui se passera avec luy. Tant y a qu'en tout éuenement i'ay estimé vous deuoir enuoyer copie desdites lettres. Apres auoir demandé ce matin en Consistoire audit Seigneur Cardinal Baronio qui estoit ce Religieux-là qui luy escriuoit, il m'a respondu qu'il auoit esté enuoyé en Alger vn Religieux Capuchin appelé le Pere Ambroise, pour acheter des Chrestiens, & qu'on l'auoit accompagné de cestuy cy, appelé Ignatio, qui escrivoit que ledit Pere Ambroise y estoit mort, & que cestuy cy y estoit demeure, & escrivoit ainsi par fois. Quoy qu'il en soit, i'en assure que



ledit Seigneur Cardinal Baronio n'en parle qu'à bonne fin, & qu'il est aussi bon que plusieurs Moines sont mauvais. A tant, &c. Monsieur, &c. De Rome, ce 17. Iuin 1601.

## A M O N S I E V R D E V I L L E R O Y .

C C C V I .

**M** O N S I E V R , Le portrait que le sieur Raby vous a enuoyé, dont vous faites mention au commencement de vostre lettre du 3. Iuin, ne represente que l'exterieur de ce qui vaut le moins en l'homme, encores ne sçay-je combien fidellement. Que si le pinceau du maistre eust peu arriver iusques à l'interieur, & vous en figurer l'ame, vous y eussiez apperceu en recompense de plusieurs defauts, quelques traits de iustice & de bonté envers tous, d'affection & pieté envers sa patrie, de zele & deuotion au service & reputation de son Prince, & d'une singuliere gratitude envers ses bien-faiteurs; laquelle derniere qualité i'eusse particulièrement desiré pouuoir estre exposée à vos yeux: mais comme telles choses ne se peuvent peindre; aussi m'avez vous fait trop d'honneur & de faueur d'auoir desiré, & fait venir de si loin la ressemblance de si peu de choses. Des memoires que vous avez enuoyez à Monsieur l'Ambassadeur touchant le neveu de Monsieur Baronius, j'entends que la procuration seule a esté vraiment passée à Rome, mais par certains marauds tous Sauoyards, qui ne sçauent où ils ont la teste ny les pieds; & cependant sous le nom pitoyable d'une Congregation ou Confrairie de nostre Dame de la compassion des sept douleurs, erigee à Tonon en Sauoye près Geneue pour la conuersion des heretiques, osent & entreprennent ce que vous voyez, d'enuoyer non seulement au Roy d'Espagne ( qui seroit encores trop ) mais aussi à tout le reste du monde, à tous Princes & Seigneurs, & autres personnes Catholiques, & seruent d'occasion & de pretexte à leur procureur, & à celuy qui les met tous en besogne de faire encores pis, & abuser de leur procuration & commission: dequoy i'ay bien delibéré de dire mon aduis au Pape. Le reste desdits memoires est supposé, & forgé par vne ame meschante & diabolique, qui, sous autre semblant, s'est proposé pour fin principale de troubler par telles inuentions & calomnies le repos & tranquillité de la France, & d'interrompre le cours de la prosperité du Roy. Qui en peut auoir esté le forgeron, ie ne sçauerois ny voudrois imaginer d'autre que celuy que vous sçauiez estre mortel & implacable ennemy du Roy & de la France broüillon supreme, & impatient, voire incapable de tout repos. Et encores que plusieurs ayent peu tremper à ce tripotage, dës Rome mesme, où il y a des pires & des plus fols, comme aussi des meilleurs & des plus sages hommes du monde: si est-ce que de rien que l'intention & le dessein en est sien, comme aussi de ladite Confrairie, & de tout ce qui s'en est ensuiuy, & qu'à lui en doit estre attribué le commencement, le milieu, & la fin, comme encores de tant d'autres pratiques & m-  
n-

ness que vous descouurez de iour en iour dedans le Royaume. Mais son suppost. Brôchard Baron Prestre menrtier, & puis heretique & marié, & depuis feintement conuert & relaps, de mesme naturel que luy, y va messant & broüillant du sien, selon la diuersité des personnes à qui il s'adresse, & de la pippee qu'il s'en promet. Outre que pour estre ignorant de plusieurs choses, & mesmes des intersts & affections de quelques Princes, il n'a pas bien sçeu accorder toutes ses fustres. Quand au Pape, il voudroit que tous les hommes fussent bons Chrestiens & Catholiques, mais il ne pensa iamais à ce que ce broüillon luy impute: car outre qu'il est particulierement assisté de l'esprit de Dieu, il est d'ailleurs Prince tres-sage & tres iudicieux, pour cognoistre que trop difficile seroit, pour ne dire impossible de mettre & ageancer tant de diuerses pieces ensemble, & que tel dessein au lieu de profiter à la religion Catholique, seroit plustost vn moyen de faire liguier ensemble tous les Protestans de la Chrestienté, & avec eux d'autres qui entreroient en soupçon & crainte de cette trame qui leur auroit esté celee, & se trouueroit à l'auantage de leurs ennemis, & d'armer & acharner les Chrestiens les vns contre les autres, & faire beau jeu au Turc ennemy commun de tous, tant Protestans que Catholiques; dequoy le vray auteur desdits memoires n'a aucun soucy ny apprehension, & tout luy seroit vn, pourueu qu'il peust reuoir la France troublee. Mais pour cela mesme il en faut d'aurant plus soigneusement garder la paix & le repos, & par vne sage & continuelle pouruoyance y disposer les affaires & les choses tout au contraire de ce qu'il desire & desseigne: & mesmes pour auoir encores plus de moyende de le chastier vn iour, si cependant il ne se punist luy-mesme, en creuant de despit de se voir frustré de l'effect de ses damnable entreprises, & descouuert & cogneu de tout le monde pour tel qu'il est, & menacé du danger auquel se mettent ceux qui à l'abry de la paix & de gayeté de cœur prouoquent de plus forts qu'eux. Voila ce que ie vous puis dire en general touchât lesdits memoires, que i'ay seulement courus de l'œil. Quand ie les auray mieux veus & considerez ie vous en pourray dire dauantage, & mesme si vous en enuoyez encores d'autres, comme vous nous en donnez esperance. Cependant Monsieur de Bethune vous en dira dauantage, & vous informera particulierement des qualitez de ce bel Ambassadeur de Messieurs les Confreres Sauoyards. Si vous luy pouuez faire mettre la main dessus, outre ce que vous en apprendriez, son chastiment seruiroit d'exemple, à tels meschans garnimens, & de confusion à celuy qui l'a suborné & apposté parmy tant d'autres. Cependant ie me conioins avec vous du bon ordre que le Roy a mis à ce pourquoy il estoit allé en Poitou. A tant, &c. Monsieur, &c. De Rome, ce premier Iuihet 1602.

FFFFF

## A MONSIEVR DE VILLE ROY.

CCCVII.

**M**ONSIEVR, Nous ne receusmes icy les lettres du Roy & vostres du 18. Iuin sur la capture du Duc de Biron & du Comte d'Auvergne que le 9. de ce mois, estant ia quelques iours auparavant la chose diuulgée par la voye de Thurin, de Milan, de Venise, & de Genes. Je fais au Roy la réponse que vous verrez. Quant à vous, Monsieur, ie vous remercie bien humblement de ce qu'il vous a pleu m'en mander, & la réponse que vous auez faite à ma lettre du 20. May. La douleur que vous sentez par delà sur cet accident, a esté commune à tous les gens de bien de deçà. De ma part ie ne scaurois vous dire si i'en sens en moy plus de tristesse ou d'indignation, & suis si estonné de cet euenement si prodigieux & monstrueux, que ie ne scaurois dire là dessus vn seul mot du mié, bien vous mettray-ic icy 3. ou 4. paroles de ce que i'en ay ouy dire à d'autres. Ils disent qu'outre que nous sommes en vn siecle extrêmement corrompu, déloyal, & perfide, la vaillance sans preud'homme & sans vn contentement solide est peu asseurée & fort dangereuse en tout temps, & principalement quand elle est enflée du vent de presumption de vaine gloire, & élançee par vne extrême prodigalité; Que si à tout cela se joint le soufflement de quelque mauuais voisin, & conseillers & seruiteurs éceruéllez, il n'est pas possible de se sauuer; Qu'en vain doncques nous émerueillerons-nous, si de telles causes sortent de tels effets; Qu'il nous faut changer ce nostre ébaïssement en seuerité & en pouruoyance pour l'aduenir, sans auoir pitié de ceux qui seront perdus eux-mêmes en voulant perdre leur Roy & leur patrie, & qui de gayeté de cœur se seront priuez de la dignité, du respect, & du nom mesme de Ducs, de Comtes, de Mareschaux, voire de François. Que le Roy en doit laisser faire la iustice, & ne point en faire à moitié, quelques instances & promesses qui luy soient faites au contraire par qui que ce soit: estant meshuy temps qu'apres auoir monstré tant de compassion & de misericorde enuers ses ennemis, il fasse aussi voir en fin qu'il n'est point cruel contre sa personne, contre tout son Royaume, & contre ses enfans & posterité. Voila, Monsieur, de plusieurs propos qui se tiennent, ce qui semble le plus à propos. Il se dir plusieurs autres choses, que ie remets à vne autre fois que ie me trouueray plus rassis. Me recommandant, &c. Monsieur, &c. De Rome ce 15. Iuillet 1602.

A V R O Y.

CCCVIII.

**SIRE,**

Par la lettre qu'il a pleu à V. M. m'escire le 18. Iuin, i'ay veu qu'à vostre grand regret & déplaisir vous auez esté contraint de faire arreste

Duc de Biron & le Comte d'Auvergne; & comme ie tiens à grand faueur & honneur ce qu'il vous a pleu m'en escrire, aussi detestay-je l'extreme méchanceté de ceux qui ont attenté de les débaucher, & déplore la folle déloyauté de ceux qui se seront laissez decevoir: remerciant en outre & loüant Dieu, de ce qu'il luy a pleu preseruer vostre personne & toute la France des maux qu'on vous preparoit, & le priant qu'il aduienne de ceste conspiration comme de tant d'autres passées, esquelles a esté observé que tout ce qui auoit esté brassé & machiné contre V. M. est tourné à vostre grand bien, accroissement, & exaltation. Aussi remarque-t'on desia en ceste dernière plusieurs graces que Dieu vous a faites, & quelques aduantages que V. M. en peut tirer. Outre que Dieu vous a découuert la coniuuration, & sauué vostre personne & vostre Estat, il vous a encores mené chez vous ceux qu'on dit auoir conintré, pour sans aucun tumulte auer & conuaincre la conspiration & punir ceux qui se trouueront coupables, & par leur punition donner terreur à ceux de qui la mauuais-volonté ne s'est encores découuerte. Et comme auparavant vous auez montré vostre clemence incomparable, & en icelle surmonté & surpassé tous les siècles passés, vous rendant par ce moyen aimable par tout l'vniuers, aussi en ceste occasion V. M. doit faire voir au monde, qu'en temps & lieu vous sçavez vser de la severité requise & necessaire, & par quelme moyen vous rendre redoutable dedans & dehors la France. Aussi aura V. M. par ceste conspiration découuert de plus en plus la rage de vos ennemis estrangers, & l'instabilité & ingratitude d'une partie de vos subiers, & de tels de qui moins se deuoit attendre, pour aduifer encore mieux de qui vous aurez cy apres à vous fier & défer, & pour embrasser la trop iuste occasion qu'on vous donne de pouruoir à l'aduenir, & de faire tout ce qui sera pour la conseruation & seurété de vostre personne, & de vostre Royaume, & de vostre succession & posterité. Apres qu'on a fait par deçà toutes ces obseruations & remarques, chacun louë encores le paternel regret que V. M. a montré auoir à la perte de ses seruiteurs, & la resistance qu'elle a sentie en soy-mesme à faire mettre la main sur eux, & la moderation dont elle a vsé, les remettant à la iustice ordinaire pour eux iustifier par les voyes ordinaires & en tel cas accoustumées, sans que V. M. ait apporté à vn fait si odieux & si dangereux rien d'extraordinaire, ny autre affection que de pere doux & équitable. Tous louent encores par deçà vostre grande vigilance & pouruoyance en ce fait, d'auoir donné le bon ordre à toutes choses, qu'il ne s'entend point que rien bouge, ains que l'obeyssance vous est rendue pleine & entiere. A tant, &c. Sire, &c. De Rome ce 15. iuillet 1602.

---

A MONSIEVR DE VILLEROY.

CCCIX.

**M**ONSIEVR, Par la lettre qu'il vous pleust m'escrire le dernier de Iuin, que ie receus le 20. de ce mois, i'ay veu la responce  
 FFFFf2

qu'il vous a plu faire à la miennne du 3. Iuin, de laquelle response ie suis merueilleusement consolé & satisfait, & n'ay rien que i'y puisse adiouster, sinon que prier Dieu qu'il continué d'affister le Roy & les Seigneurs de son Conseil, pour la preservation de sa personne, & de tout sô Royaume, à la confusion & ruyne de tous ses ennemis.

Mecredy dernier le Pape fist appeller les Cardinaux qu'il auoit cy-deuant nommez pour deliberer en Congregation de la dispense que le Roy demande touchant le mariage de Madame sa sœur avec le Duc de Bar. Lesdits Cardinaux furent neuf, Aseoli, Mattei, Borghese, Baronio, Bianchetto, Mantica, Arrigone, san Marcello, & moy. Le Cardinal Visconti auoit encores esté nommé, mais pour estre en son Euesché de Spolato il ne s'y trouua point. Il y auoit encores 4. Docteurs en Theologie pour seruir de conseil; à sçauoir le Pere Benedetto Giustiniano Iesuite, le Pere Monopoli Capuchin, le Pere Commissaire de l'Inquisition Iacobin, & le Pere Gregoire Portugais Augustin. Sa Sainteté nous proposa le fait, disant qu'il nous auoit fait appeller sur ce que le Roy & Monsieur de Lorraine luy faisoient grande instance d'octroyer la dispense de mariage contracté de fait entre Madame sœur du Roy & le Prince de Lorraine, qui estoient patens en degré prohibé par les saints Decrets; Que si tous deux estoient Catholiques, il n'auroit fait cy-deuant, & ne feroit à present aucune difficulté sur ladite dispense. Mais l'vne des parties étant heretique; & ne recognoissant le S. Siege à qui la dispense est demandee; & errant encores au sacrement de mariage, & au degré de consanguinité dont est question, il ne s'estoit iamais peu induire à la donner, & leur auoit escrit auant mesmes que ledit mariage fut contracté de fait, qu'il ne l'accorderoit iamais, & étant venu le Prince mesme à Rome l'année sainte pour la demander, sa Sainteté la luy auoit refusee. Maintenant sur la presse qu'on luy faisoit, il nous prioit tres-instamment de bien estudier ceste matiere qui estoit de si grande importance, & la bien considerer chacun à part, & puis nous assembler & en deliberer tous ensemble, pour luy en donner aduis, & luy conseiller ce qu'il auroit à faire là dessus. Apres cela, il nous cotra 4. chefs ou poincts sur lesquels il entendoit que nous deliberassions. Le premier; A sçauoir si le Pape pouoit dispenser d'un tel cas où l'vne des parties est heretique: & si nous trouuions que le Pape y peust dispenser, le 2. poinct seroit; S'il y auoit des causes iustes & raisonnables pour accorder ladite dispense: & trouuant qu'il y en eust: le 3. poinct seroit; S'il estoit expedient d'octroyer ceste dispense. Et quand bien il se trouueroit que tous les 3. poincts susdits fussent selon le desir des parties, encores vouloit il qu'on cherchast des exemples de telles dispenses accordees autresfois par les Papes; qui estoit le 4. poinct: adioustant sa Sainteté que s'il ne se trouuoit des exemples de telles dispenses, quand bien les 3. poincts se conclurroient affirmatiuement, il ne vouloit estre le 1. à accorder telles dispenses, ny qu'on peust dire à l'aduenir que elles eussent esté introduites de son temps. Et afin que nous sceussions encores mieux de quels exemples il entendoit, il nous déclara qu'il sçauoit bien qu'autresfois il y auoit eu des dispenses accordees pour des pe-

sonnes dont l'une estoit heretique, ayans les parties en ceste qualite d'heresie, & exprimé seulement le degre auquel ils estoient conioints, & que luy-mesme qui parloit y pourroit auoir esté surpris: mais que les exemples qu'il demandoit estoient de ceux esquels les Papes eussent seu que l'une des parties fust heretique, & persistast en son heresie: & quand aux autres exemples de dispenses obtenues par surprise il n'en admettoit pas une. Monsieur le Cardinal d'Ascoli, qui estoit le plus ancien, respondit pour tous que nous oboyriens aux commandemens de sa Saincteté, & considererions diligemment & meurement tous les poincts proposez parelles, & qu'à la verité la matiere luy sembloit de grande importance & difficulté. Apres cela le Pape se tournant vers moy, me demanda si i'auois à représenter quelques considerations là dessus. Et ie pris volontiers l'occasion qu'il me donnoit de leur dire ce que ie leur eusse dit de mon propre mouuement s'il n'eust esté bien seant de le dire de moy-mesme estant appelé comme vn des Puges; & discours briefuement sur chacun des 4. poincts proposez, remonstrant à sa Saincteté & à la compagnie certaines choses que vous verrez en vne escriture que i'en dresse en Latin pour l'information de sa Saincteté, & des Cardinaux & Consultans de ceste Congregation: par ainsi ie ne vous en specifieray autre chose pour ceste heure, voulant enuoyer ladite escriture par le prochain ordinaire. Cela aussi donna occasion aux autres Cardinaux de dire quelque chose de leur part, & de decouurir quelques difficultez qu'ils y faisoient ausquels ie pourray d'autant mieux respondre par ladite escriture, outre ce que i'y respondis sur le champ. Je vous ay escrit cy-deuant plus d'une fois que ie ne scauois aucune difficulté qu'on ne concludt que le Pape pouuoit & deuoit accorder la dispense que nous demandions: à quoy se referent les trois premiers poincts que le Pape nous a proposez: mais s'il s'obstine sur ces exemples qu'il nous demande, il nous sera fort difficile de trouuer que les Papes ayent donné de telles dispenses, sachans que l'une des parties estoit heretique & persistoit en son erreur. De ma part i'estime, comme ie le remonstray alors, que quand il apparoitra que sa Saincteté le peut & le doit faire pour causes iustes, raisonnables, & necessaires, il n'est point besoin de s'enquerir s'il a esté fait autresfois ou non. Ioint que toutes les dispenses qui sont auourd'huy en l'Eglise, ont commencé jadis, & a esté vn temps qu'on pouuoit dire qu'il n'y auoit point d'exemples: & les Papes commencerent à les donner, non pour auoir autresfois esté donnees, mais pource qu'ils iugerent qu'ils les pouuoient & deuoient donner pour des causes iustes & raisonnables, qui leur estoient alleguees & prouuees. Monsieur l'Ambassadeur & moy y ferons tout ce qui nous sera possible, & nous remettrons du reste à Dieu, lequel ie prie qu'il vous donne. Monsieur, &c. De Rome ce 29. iuil. 1602.

## A MONSIEUR DE VILLEROY.

CCCX.

**M**ONSIEUR, Par ma dernière lettre du 29. Iuillet, ie vous donnay aduis comme le Pape auoit en fin appelé à soy les Cardinaux qu'il auoit destinez pour la Congregation de la dispense du mariage de Madame sœur du Roy avec Monsieur le Duc de Bar, & par mesme moyen vous escriuis les particularitez que s'estoient passees en ce premier pourparler, & que i'estois apres à dresler vne esécriture sur ce fait, pour informer la Saincteté & lesdits Cardinaux, & les quatre Consultants. Je portay à Monsieur l'Ambassadeur dès le dernier de Iuillet quatre copies de ladite esécriture, pour enuoyer la premiere au Pape; la seconde aux quatre premiers Cardinaux; la troisieme aux quatre derniers; & la quatriesme aux quatre Consultants: lesquelles furent enuoyees par Monsieur l'Ambassadeur le premier de ce mois. Et quelqu'un desdits Cardinaux s'estant laissé entendre qu'il seroit besoin que chacun d'eux eust la sienne, mondit sieur l'Ambassadeur en fit faire d'autres, & les enuoya. Maintenant ie vous en enuoye vne à vous, comme ie vous escriuis que ie ferois par cet ordinaire. Vous verrez par icelle que i'ay eu raison de vous escrire comme i'ay fait quelquesfois, que le Pape pouuoit & deuoit accorder ladite dispense, & que sans ces exemples qu'il demande à present, il n'y a aucun honneste moyen de s'en excuser. Encores y trouuerez vous que ceste excuse luy est ostee, quand bien il ne se trouueroit point de tels exemples qu'il demande. Les Cardinaux ne se sont point encores assemblez depuis pour delibérer sur ladite dispense, mais ce sera vn iour de ceste sepmaine. Cependant ils voyent & considerent ladite esécriture, & estudient encores d'eux mesmes sur ceste matiere. De tout ce qui s'y fera vous en serez aduisé.

Depuis ma dite dernière, ie reeus le quatriesme de ce mois la vostre du seiziesme Iuillet. I'en ay encores veu d'autres de mesme temps, lesquelles se lit la fascherie que ces derniers accidens ont causé en toute la Cour, & la crainte qu'on y auoit que la queue en fust longue; dont il sembloit que la poursuite commençoit desia à ennuyer les meilleurs. Mais comme ceste fascherie est humaine, & a esté louable du commencement, & nous a pareillement trauallez par deçà, nous qui sommes loin; aussi est-il plus que necessaire de la surmonter virilement & constamment, & vser de la feuerité & perseuerance requise en cas si enorme, & de si perilleuse consequence. Les meschans ont bien eu l'audace de machiner la mort du Roy, & la ruine de la France, & ont eu la patience d'en inuenter & rechercher les moyens près & loin vn si long temps & en tant de façons, & ceux qui sont en liberté couuent encores aujourd'huy les mesmes machinations, comme vous verrez par les aduis de Milan que Monsieur de Bethune vous enuoye, & ne cesseront tant qu'ils auront vie; & le

Roy, & son Conseil, & sa Iustice, & tant de gens de bien & innocens à qui on a cherché d'oster la vie & les biens, se laisseront, & n'auront point le cœur de pourfuiure constamment les criminels de leze Maieité, & de pourueoir à la seureté de leurs personnes, & de leurs femmes, & enfans, & à celle de l'Estat, & de la Iustice, & de tout ordre & police qu'on a voulu esteindre? Mais ie m'oublie, & si autre que vous & le Roy voyoit cecy, il pourroit dire que ce n'est pas parlé en Prestre: mais ce que ie viens de dire est aussi necessaire, & aussi pur & saint que la mesme Prestre, & les Prestres y ont le mesme interest, & encōres plus grand que les autres. Aussi m'auouera-t'on que saint Ambroise estoit Prestre, & Euesque, & saint, & neantmoins il nous a laissé par escrit, Qu'à espargner les mechans qui pensent à perdre & à faire mourir beaucoup de gens, c'est abandonner à la perdition & à la mort les innocens & gens de bien; que ie ne loge chez moy rien d'inhumain & de dur; & c'est bonté, douceur & humanité enuers les bons, & la patrie, & enuers la Religion, les loix, & la iustice, & enuers toutes choses bonnes & saintes, qui me font tenir ce langage. Aussi a le Roy monstré cy-deuant tant de clemence, & a en ceste occurrence tant de matiere & de contrainte de seuerité, qu'il ne faut point craindre que quoy qu'il face en ceste occasion, il soit tenu de personne cruel ny par trop rigoureux. A ce propos appartient aucunement ce que i'ay à vous dire sur vn aduis que i'ay receu de Lorraine, qu'un theoligien Anglois appellé Pits, ayant tenu propos à vn autre theoligien François appellé Saint Germain, de tuer le Roy, & ledit Saint Germain s'en estant laissé entendre à quelqu'un, l'Euesque de Toul, qui a pris cognoissance de ce fait, a fait mettre en prison tant ledit Saint Germain, que ledit Pits Anglois; & par la denegation de l'accusé, la cōdition se trouue meilleure que celle de l'accusateur, qui n'a moyen de prouuer ce que l'autre luy a dit seul à seul. Laquelle procedure, soit de propos deliberé, ou par mégarde, tend à ce que nul cy-après à qui on aura parlé de tuer le Roy, ose le reueler ny s'en declarer à personne, de peur d'estre emprisonné & puny pour auoir voulu sauuer la vie au Roy, & conseruer tout le Royaume: là où il faut qu'en cas de telle consequence il soit loisible à chacun de deferer autrui, non seulement sans rien craindre, mais encores avec esperance de grande recompense; sauf toutesfois à ne croire pas legerement, ny condamner personne sur le simple dire d'un autre sans bons indices & preuues. Ie croy que le Roy aduertty de ce fait, aura pour le moins pouruü à la deliurance & à la seureté de celuy qui n'a pû comporter qu'on parlât de le meurtrir. Le Comte de Verruë Ambassadeur du Duc de Sauoye, desire qu'il luy soit fait iustice du Prieuré qu'il dit que Monsieur de Boiwin Villars detient à son fils, & m'a requis de vous enuoyer vne responce qu'il a faire à la derniere escriture dudit Boiwin. Ie croy que Monsieur le Nonce a commandement d'en parler par delà, & que la iustice que le Roy fera sera d'autant mieux receüe & louée par deçà que le temps semble y estre moins disposé. Aussi le sieur Fabricio Naro, qui auoit vn sien fils page de la Royne, duquel à l'instance de Monsieur le Cardinal del Monte ie vous escriuis par vne mienne lettre du troisié-



me Septembre, m'a dit qu'on auoit licencié sondit fils, sans luy auoir vſé d'aucune gracieuſeté, dont ledit pere eſt en peine. Je vous prie de vous informer comme cela s'eſt paſſé, & en tant que vous iugerez & pourrez, faire que les choſes paſſent avec la reputation qu'il conuient, & qu'on n'ait point occaſion par deçà de ſe plaindre de noſtre cōduite. Je ſçay bien que c'eſt peu de choſe, & que les grands Princes ne peuvent prendre garde à choſes ſi petites, mais les officiers qui les ſeruent, & ceux qui ont charge des pages, peuvent & doiuent pourueoir à ce que les choſes, & les congez meſmes, & principalement de ceux qui ſont de loin, ſe paſſent avec la decence & dignité requiſe. A tant, &c. Monſieur, &c. De Rome, ce 11. d'Aouſt 1602.

## A MONSIEVR DE VILLEROY.

CCCXI.

**M**ONSIEVR, Vos lettres du premier de ce mois me furent rendues le 16. avec d'autres de meſme datte, par lesquelles nous auons appris la mort du Duc de Biron. Tous les bons François & gens de bien ont grand regret que ſa vaillance ait manqué de la fidelité & gratitude qu'il deuoit à ſon Roy & à ſa patrie. Mais puis qu'à ſa mort meſme, comme nous entendons, il s'eſt monſtré encores plein de felonnie & de furie, ils eſtiment que le public a beaucoup gagné en ſa perte, louans Dieu de ce que les loix ont commencé de reprendre vigueur en luy, & le crime de lezeMaieſté a eſté puny en France, comme de tout temps il l'a eſté ſur tous autres forfaitis en tous Royaumes, Republiques, & Eſtats bien policez, & comme il eſt du tout neceſſaire pour le ſalut du genre humain. Au demeurant, les miſeres dont on dit qu'il nous a menacez, ne ſeront point augmentees ny veuës par luy, & cela y ſera de moins, & que ſa punition & exemple en pourra encores deſtourner & diminuer: ce que ie diſais aller, quand bien il auroit eu quelque faculté de preuoir & preſager les choſes futures. Mais outre que l'eſprit de prophetie n'entre point en ames perfides & deſloyales, il a bien monſtré par experience qu'il n'eſtoit bon prophete ny prognostiqueur; premierement quand il ſe laiſſa emporter à la malice & vanité des promeſſes des eſtrangers, qui le deuoient faire ſi grand, & puis quand il s'en alla dernièrement trouuer le Roy, penſant éluder la prudence & la iuſtice de ſa Maieſté. Par ainſi ne craignons point ſes menaces, & pourſuiuons hardiment les autres complices de ſa coniuuration, & pouruoyans à noſtre ſeureté à l'aduenir, entant que la pouruoyance humaine ſe peut eſtendre, remettons nous du reſte en la garde de Dieu, qui nous preſeruera, & confondra tous nos ennemis, tant domeſtiques qu'eſtrangers, comme il a fait cy-deuant, pourueu que nous nous amendions, & nous en rendions dignes.

Les Cardinaux deputez pour deliberer ſur la diſpenſe du mariage de Madame ſœur du Roy avec Monſieur le Duc de Bar ne ſont point encores aſſemblez; ainſi ne les en auons nous point ſollicitez, pour auant que quelques uns ſe ſont laiſſez entendre qu'il eſtoit bon de ne rien haſter.

cet affaire, tant pour leur donner temps à se bien instruire du fait & du droit, que pour acoustumer le Pape à en ouyr passer auant que d'en venir à la décision, & encores pour trouuer des exemples que la Sainte Eglise demande. Et de fait, depuis ma dernière nous auons trouué vne dispense generale que le Pape Gregoire XIII. donna aux nouveaux Chrestiens & Catholiques des Prouinces & Isles du Japon, par laquelle il valide tous les mariages par eux contractez & à contracter avec les Payens & infidelles desdits pays: ce qui deura frapper coup, jacoit que ce ne soit entre Catholiques & heretiques, puis qu'il est en plus forts termes, à sçauoir entre Catholique & Payens. Aussi ay-je depuis ma dernière respondu à vne nouvelle obiection qu'on nous a faite, & vous en enuoye la response, pour estre adfouste à l'escriture que ie vous enuoyay dernièrement immediatement auant la conclusion.

Au reste, vous sçaurez qu'au mois de Iuin dernier le Comte de Saponaara au royaume de Naples retournant d'Espagne, & passant au pont de Beauuoisin en qualite & equipage de simple gentil-homme Napolitain à 2. chenuaux seulement, pour estre moins destournée en son voyage, les gardes dudit pont de Beauuoisin luy osterent 235. ducats, sous pretexte de la prohibition de tirer or du royaume, combien qu'il leur monstra que cette somme n'excedoit point ce qui luy estoit necessaire pour son voyage iusques à Naples. Surquoy celuy qui commande audit pont ordonna que ladite somme seroit mise en depost, disant qu'il en vouloit escrire à Lyô, & de ce depost en fut retenu acte par deuant Notaires & tesmoins. Ces gardes firent encores pis, prenans des ioyaux que ledit Comte auoit en sa valize, & entre autres 2. brasselets de diamans qu'il portoit à sa femme, dequoy toutesfoi's ne fut faite aucune mention audit acte, ne voulant ledit Comte donner occasion ausdits gardes de le tirer hors de là, d'où pour ce mesme respect il sortit au plustost tirant son chemin: & sans que bien près de là il trouua vn voiturier qui luy fit ses despens iusques à Thurin, ce personnage n'eust eu dequoy se conduire iusques audit Thurin. Maintenant l'Euesque de Bouines, qui est son oncle, & vn tres-honorable Prelat, & que le Pape enuoye resider Nôtre aupres le Duc de Savoie, m'est venu trouuer, & priet de faire office à ce que ladite somme de 235. ducats & lesdits ioyaux soient rendus: ce que l'estime estre iuste & expedient pour la reputation du Roy & de nostre nation, & croy que vous ferez de mesme aduis. A tant, &c. Monsieur, &c. De Rome, ce 23. d'Aoust 1602.

A MONSIEVR DE VILLEROY.

CCCXII.

**M**ONSIEVR, Je respondis le 23. de ce mois à la lettre que vous m'auiez escrite le premier, & par mesme moyen vous rendis cöpte de l'estat auquel estoit l'affaire de la dispense du mariage de Madame saur

G G G G g

du Roy avec Monsieur le Duc de Bar. Le lendemain, qui estoit 24. de ce mois, ie receus les lettres du Roy, & les vostres du 14. par lesquelles i'ay veu comme vous auiez receu les miennes du 17. & 29. Iuliet. I'ay encores appris d'ailleurs qu'on auoit opiniõ par delà que par la mort du Duc de Biron sa faction ne fust point esteinte; & de plus, qu'il seroit difficile de l'ammortir entierement pour la grande deprauiation & corruption qui se trouue es cœurs d'une grande partie des François. Mais, quoy qu'il en soit, nous en auons fait plus de moitié d'en auoir abbatu la teste; & quand il se trouueroit en ce qui reste toute la difficulté qu'o craint, cela ne doit point nous estõner, mais bien nous exciter & encourager à paracheuer, puis que la vertu, l'honneur, & la louange, consistent es choses difficiles, non point es faciles & bien aisees. Quand Hercules, auquel à bon droit plusieurs ont comparé le Roy, eut coupé vne de tant de testes qu'auoit ce monstre qu'on appelloit hydre, & qu'il veit que pour vne teste qu'il auoit abbatu il luy en renaissoit deux, il ne se desista pour cela de son entreprise, ains encourage plus qu'auparauant, employa cõtre ceste horrible beste non seulement le fer, mais aussi le feu, & ne cessa qu'il ne l'eust du tout estouffee & esteinte, laquelle neantmoins n'en vouloit point à Hercules, & ne le cherchoit point: là où ceux-cy en ont voulu, & veulent au Roy & à tout son Royaume. Si le Marechal de Biron au lieu de s'aller rendre au piege se fust mis en campagne avec toute sa sequelle, ne fussions nous pas accourus à l'encontre, avec resolution non seulement de nous defendre de luy, mais de le défaire, & de le creuer luy & tous tant qu'ils eussent esté: & maintenant qu'il est mort nous eraindrons ses supposits qui s'enfuyent & se cachent? Quant à ceux qui craignent les assassinats contre la personne du Roy, tant s'en faut que ie vueille diminuer ces soupçons, qu'au contraire j'estime estre chose sainte, salutaire & necessaire de les augmenter. Iamais les Espagnols & les Sauoyards, ny les meschans François pour enragez qu'ils soient, ne se joueront au Roy à guerre ouuerte, ils redoutent & craignent trop sa valeur pour en venir là: mais toute leur esperance est en la mort de sa Maieité, & es assassins qu'ils ont subornez & apotez contre sa personne, en laquelle ils entendent aussi tuer la France tout à fait. Et quand vous n'en entendriez iamais rien de particulier, & qu'il n'y auroit autre que le Duc de Sauoye seul, tenez pour chose certaine qu'il est toujours après, & qu'il n'abandonnera iamais ceste poursuite. A quoy après Dieu, en la garde duquel nous sommes tous, il n'y a meilleur remede que la pouruoyance du Roy, & de tous ceux qui sont près de luy; pouruoyance, dy-ie, que la nature mesme enseigne à tous les hommes, voire mesme aux plus petits animaux, & se souuenir que pouruoir de sens rassis & resolu à la seureté de sa personne, & par consequent de ses enfans, & de ses Estats & peuples, n'est point crainte, laquelle n'entra & n'est pour entrer iamais au cœur de nostre Roy, ains est valeur & prouesse, force & courage; là où faute de se garder, & de s'abstenir de certaines choses, s'exposer aux embusches & assassinats de ses ennemis, & par ce moyen liurer sa personne, & sa posterité, & son Royaume à vne extrême ruine, seroit impuissance, imbecillité & foiblesse, voire coulpe enuers Dieu, & reproche enuers tous les hommes.

qui sont à present ; & qui seront aux siècles à venir. Il n'y a personne de vous qui ne sçache toutes ces choses mieux que moy : mais le zele me transporte à chaque fois, sans que ie me puisse retenir, de quoy i'espere estre excusé, & en ceste esperance finiray icy la presente, en priant Dieu, &c. Monsieur, &c. De Rome, ce 26. d'Aoust 1602.

## A V R O Y.

## CCCXIII.

SIRE,

Par vne lettre que i'escriuis à Monsieur de Villeroy il y a trois iours, ie luy ay donné aduis comme la mort du Duc de Biron a esté prise par deçà, & en quel estat est l'affaire de la dispense du mariage de Madame vostre Fœur avec Monsieur le Duc de Bar, de quoy ie ne feray icy aucune repetition; aussi eusmes nous hier la feste de saint Louys, & ce iour d'huy auons eu Consistoire, de façon que ie n'ay point temps pour faire à V. M. gueres longue lettre, & faudra que ie me contente d'accuser la reception de celle qu'il pleust à V. M. m'escrire le 14. de ce mois, & de remettre à vne autre fois vne plus ample response à icelle. Cependant ie prie Dieu que la bonté & liberalité dont V. M. m'escriit aubir vlt enuers les freres dudit Duc, contre la severité des loix & de l'Arrest de la Cour de Parlement, soit recueilli avec la recognoissance & gratitude qui est deuë à vostre clemence & debonnaireté. Monsieur de Bethune m'a monsté la copie de la lettre que V. M. a escrete de sa main au Pape, sur la crainte que sa Sainteté a monsté auoir par vne sienne, & par son Nonce, que V. M. fist la guerre à ceux qui luy en ont donné trop d'occasion : en laquelle lettre de V. M. ie louë grandement que vous ne vous soyiez monsté si offensé de ce soupçon de sa Sainteté, comme es lettres que vous auez escrites audit sieur de Bethune & à moy ; me semblant que par ledit soupçon & crainte sa Sainteté donne assez à cognoistre qu'il iuge en soy-mesme que V. M. a iuste cause de faire la guerre, & qu'il croit qu'outre vostre valeur & courage, & l'experience militaire qui est noroie à tout le monde, V. M. en a la puissance & les moyens. Laquelle opinion tourne à reputation & profit de V. M. pour plusieurs respects, & nous la deuons nourrir & accroistre entant que nous pourrons, & luy imprimer bien auant dans l'ame que son soupçon estoit tresbien fondé, & qu'il auoit grãde raison de craindre la rupture de la paix, & que sans le respect que vous luy portez, apres Dieu, & sans celui de la Religion, & des bonnes mœurs qui se corrompent par les guerres, & sans le desir que vous auez de soulager vos subiects, & de vous accommoder au bien & necessité de la Chrestienté ; a faillie par les infideles, vous eussiez denoncé tout à fait la guerre à toute outrance à ceux qui vous en ont donné l'occasio la plus iuste qui fut iamais, ny qui se puisse imaginer ; & que si on y retourne, il n'y aura plus respect aucun qui vous garde de faire ce que la nature enseigne, & tout droit diuin & humain permettent & Maiesté Royale, à laquelle Dieu vous a esleué, & l'honneur & repu-

ration de vostre Couronne, & le salut de vostre Estar, & des peuples que Dieu vous a souzmis, & le soin de vostre posterité le requierent: & quand j'en parleray à sa Saincteté, comme V. M. me le commande s'en presentâr l'occasion, j'en parleray à peu présence sens, comme il me semble que doit faire Monsieur l'Ambassadeur, ainsi que ie luy ay dit, & puis dōneray aduis à V. M. comme le tout aura esté pris, & ce qui s'en sera ensuiuy. Au Consistoire de ce matin le Pape a fait Monsieur Serafin Patriarche l'Alexandrie, vacant ce Patriarchat par le deceds du Patriarche Caietan, mort depuis trois semaines en çà, & sa Saincteté l'a proposé elle-mesme, loüant grandement ledit sieur Serafin, & disant, entre autres choses, qu'il s'estoit autresfois parlé de luy, mais que sa Saincteté auoit cherché & recherché avec grād soin & diligence, & fait voir par les Cardinaux de l'Inquisition, & delibéré avec eux, & n'auoit rien trouué qui peust tant soit peu offenser sa reputation. Ceste iustification si expresse faite en plein Consistoire, duquel faisoient partie lesdits Cardinaux, me donne esperance certaine que le Pape le veut faire Cardinal à la premiere promotiō, à cause de ceste dignité Patriarchale. Que si sa Saincteté fait la promotiō au mois prochain, auquel V. M. ne pourroit auoir intercedé pour luy, tombans les quatre temps au 18. du mois prochain, cela nous monstrera que sa Saincteté en veut auoir le gré elle seule, pour luy oster le mescontentemēt du refus passé; auquel cas sa Saincteté ne deuroit point aussi le vous conter. Mais ie m'assure comme & quand sa Saincteté la face, que chacun recognoistra, & ledit sieur Serafin mesme, que sa Saincteté l'aura fait en consideration des instances pressées que V. M. en a faites cy-deuant, & de ce que sa Saincteté sçait en son cœur qu'elle fera chose tres-agreable à V. M. ce qui me fait douter aussi que si à la premiere promotion le Pape est contraint par importunité de faire deux Cardinaux Espagnols, il vous pourra conter ledit sieur Serafin pour l'un des vostres. Tant y a, que l'acte de ce iourd'huy s'est passé fort honorablement pour ledit sieur Serafin, ayant esté loüé par vn bon nombre de Cardinaux, & par ceux qui ont esté Auditeurs de Rote quand est venu leur tour de dire leur opinion, & sa Saincteté, quand mon tour est venu, ayant esté par moy non seulement loüée de sa bonne eslection, mais aussi tres-humblement remerciée au nom de toute nostre nation, & ayant ledit sieur Serafin esté promu à la dignité de Patriarche, avec la retention du Doyenné de la Rote, & du *Concessum*, & de toutes autres charges, offices, benefices & pensions qu'il auoit. En quoy i'ay obserué, entre autres choses, que le Pape ne demeure pas tousiours ferme en vne mesme opinion, nous ayans veu le temps, comme se pourra spouenir Monsieur de Sillery, que sa Saincteté se lascia entendre de ne vouloir point le pourueoir à l'Euesché de Rennes à vostre nomination. Ainsi se verifie le dire commun, Que tout vient à point qui peut attendre. A tant, ie prie Dieu, &c. S I R E, &c. De Rome, ce 26. Aoust 1602.

## A MONSIEUR DE VILLEROY.

CCCXIII.

**M**ONSIEUR, Les dernières lettres que j'escrivis au Roy & à vous estoient des 23. & 26. d'Aoust. Depuis arriva icy l'ordinaire de Lyon le 3. de ce mois, qui n'a point apporté lettres de sa Maïesté ny de vous, de quoy nous ne nous esmerueillons point, ayans reçu par anticipation de l'extraordinaire du Pape peu de iours auparavant réponse à nos dépesches des deux ordinaires. Le dernier jour d'Aoust fut tenue la première Congregation sur la dispense du mariage de Madame sœur du Roy avec Monsieur le Duc de Bar, en laquelle Congregation fut disputé seulement le premier point des quatre proposez par le Pape; à sçavoir si sa Sainteté pouvoit dispenser en ce cas: & fut resolu par tous vnaniment que sa Sainteté le pouvoit. L'ay veu de nouveau trois informations qui furent faites à Paris sur le faict de Monsieur Benoist és années 1596. & 1598. & en ay dressé vn sommaire que Monsieur de Bethune bailla au Pape le Vendredy 6. de ce mois. S'il y a moyen de conduire cét affaire à bon port, c'est en disant, comme ie fais, que les fautes qui se trouvent en la Bible en François, dont on bat ledit sieur Benoist, ne sont point siennes, ains de deux mauuais garnemens Compagnons d'Imprimerie, qui falsifierent sa copie; & pour ceste fausseté furent condamnez par Arrest de la Cour de Parlement du 21. May 1566. lequel fut produit deuant Monsieur le Cardinal de Florence, qui fit la première information à Paris. Mais d'autant qu'audit Arrest ne se faisoit aucune mention dudit sieur Benoist ny de chose sienne, & que l'on pourroit dire que ledit Arrest n'auoit point esté donné sur la falsification de sa Bible, mais de quelque autre copie, ie conseillay & escrivis d'icy dès l'an 1597. qu'on fist informer sur ce que la copie falsifiée dont est parlé audit Arrest, estoit véritablement la copie de ladite Bible, baillée par ledit sieur Benoist à imprimer à certains marchands Libraires. Et sur ce que j'en escrivis alors, fut faite l'information de l'adite année 1597. en laquelle furent examinez cinq tesmoins, entre lesquels sont Sebastien Niuelle, & Pierre l'Huillier, des premiers & plus anciens Libraires de Paris: par la deposition de tous lesquels il appert, que la copie, par falsification de laquelle auoient esté condamnez lesdits Compagnons d'Imprimerie, estoit véritablement celle de la Bible dudit sieur Benoist, & qu'elle auoit auparavant esté venue & approuuée par les Docteurs de Sorbone de Paris, & puis par le Priuilege du Roy Charles IX. octroyé à certains marchands Libraires pour faire imprimer ladite Bible, & que ledit Arrest de condamnation fut donné sur la plainte & à l'instance dudit sieur Benoist, & desdits marchands Libraires. Nous verrons à quoy sa Sainteté se resoudra par l'aduis les Cardinaux de l'Inquisition, sans lesquels il n'oseroit rien faire en va tel cas. A tant, &c. M. de V. &c. De Rome le 9. Septembre 1602.

GGGGg 3

## A MONSIEVR DE VILLEROY.

CCCXV.

**M**ONSIEVR, l'ay veu par la vostre la faueur qu'il vous a pleu départir à Monsieur l'Euesque de Tarbes, l'ayant fait expedier promptement de son serment de fidelité, dont ie vous remercie bien humblement. Aussi ay- ie veu la resolution que le Roy en fin auoit fait prendre à Monsieur le Cardinal de Joyeuse de s'en venir à Rome, nonobstant le peu d'inclination qu'il y auoit; dequoy ie me resouys grandement, comme de chose qui tournera au bien & reputation du seruice & des affaires du Roy, & du Royaume, & de toute nostre nation. On n'a point tenu encores la seconde congregation sur la dispense du mariage de Madame sœur du Roy; & Monsieur l'Ambassadeur & moy auons esté conseillez de n'en point solliciter les Cardinaux, ains les laisser aller leur pas.

Le seigneur Iulio Pepoli, qui est des premiers de ceste maison, m'a enuoyé de Bologne vne lettre qu'il escrit au Roy sur l'occasion de ces derniers mouuemens de France, afin de la faire tenir à sa Maiesté. Ceste maison a tousiours esté fort affectionnée à la Couronne de France, & c'estuy-cyl'est particulièrement, & merite que le Roy luy en face vne gracieuse responce; dequoy ie vous prie tres-affectueusement. Il destine à la profession Ecclesiastique vn de ses enfans appelé Alfonse, qui dédia certaines propositions au Roy il y a enuiron 2. ans, & desiroit que sa Maiesté fist quelque bien à ce sien filz en l'Eglise, comme le Roy d'Espagne agrandit en plusieurs façons ceux de la maison de Maluuzzi aussi Bolognois, qui sont de faction Espagnole; & j'estime que sa Maiesté feroit chose qui luy apporteroit reputation par toute l'Italie, en estant ceste maison vne des premieres & plus illustres apres les Princes, & en laquelle il y a accoustumé d'auoir des Cardinaux, & le dernier qui mourut il y a 3. ou 4. ans, estoit tres-affectonné seruiteur du Roy, & de la Couronne.

Le seigneur Iuliano de Medicis, qui s'adressa à moy pour le regard des aduis que nous rasonons de Milan, & que j'adressay à Monsieur l'Ambassadeur; de lire que le Roy escriue à mondit sieur l'Ambassadeur, & à moy aussi en sa faueur, à ce que venant occasion de vostre en Toscane, ou de quelque autre bien qu'on luy peult moyenner, nous le recommandions comme personne que sa Maiesté fauoris. Il n'a besoin de recommandation, enuers moy, luy estant de l'extraction qu'il est, & de fort bon entendement, & de belles lettres, vertueux, & tres-affectonné à la seruitude du Roy; mais puis qu'il le desire, ie vous prie luy procurer ce contentement. Auquel propos de Milan, ie vous mettray icy en consideration vne chose que j'ay proposée à Monsieur l'Ambassadeur il y a plusieurs fois, s'il ne feroit pas bon que le Roy achast par deux moyens de faire venir à soy ce luy que le dit sieur appelle son Prince, par le moyen duquel sa Maiesté pourroit apprendre ce qui s'est passé en Italie de ces dernières conspirations,

830000

& osteroit aux mauvais François, & au Duc de Savoye & Comte de Fuëtes la principale adresse & instrument de leur maudite & pernicieuse intelligence; outre que Picoté mesmes osteroit du danger de mort ou de captivité perpetuelle où ils le reduiront bien tost, & s'acqueroit la bonne grace, & encores la recompense de sa Maiesté. L'ay opinion qu'il presteroit volontiers l'oreille à vn tel propos, & en tout evenement qu'il n'oseroit s'en descouvrir au Comte de Fuentes, de peur de se rendre suspect, & d'accelerer luy-mesme sa prison perpetuelle. L'Estat des Vénitiens confie avec celuy de Milan, d'où il s'y pourroit rendre en moins de six heures, & là il trouveroit vn saufconduit & vn pardon du Roy, à la charge d'aller trouver sa Maiesté: lequel saufconduit vous auriez enuoyé à Monsieur de Fresnes, qui aussi pour estre plus près, & parmy des gens qui nous veulent bien, pourroit faire ceste pratique envers ledit Picoté par telle personne qu'il trouveroit le plus à propos. Le sieur Giulio Bussini, qui donne ledit aduis de Milan, ne seroit bon pour faire ceste pratique, d'autant qu'il se porte par delà pour passionné d'Espagne, & se descouriroit par ce moyé, & que ledit Picoté qui se défie de luy, estant sa vache à lait pour la commodité qu'il tire, & espere de tirer des aduertissemens qu'il nous donne, ne voudroit possible s'en priver en s'alloignant du lieu où il est à present. Je vous escris vne autre lettre à part de ma main en faueur de mon Secrétaire, à laquelle ie vous prie avoir le mesme égard que si elle estoit inferée toute de ma main à la presénte dépesche; & vous assure que iamais ie n'ay usé de recommandation qui fust accompagnée de plus d'équité; ie ne veux & ne dois dire iustice en chose qui se doit reconnoistre entierement de la bonté & liberalité du Roy, & de la bonne aide & faueur qu'il vous plaira nous y départir. A tant, &c. Monsieur, &c. De Rome, ce 23. Septemb. 1602.

## A MONSIEVR DE VILLEROY.

CCCXVI.

**M**ONSIEVR, Mon Secrétaire, qui depuis dix ans en ça escrit sous moy les depeschés que i'ay faites au Roy & à vous, est d'ailleurs vn fort homme de bien, modeste, fidele, secret, diligent, & tres-zélé au service de sa Majesté, & comme tel a eu communication de tout ce qui m'a esté commandé & escrit depuis ledit temps, & de tout ce que i'ay fait, dit, & escrivant au fait de l'absolution, & du demariage du Roy, que du Marquisat de Salazar, & de toutes autres choses qui se sont presentées en divers temps, soit en presence ou absence d'Ambassadeur, outre celles de la Protection & des matieres beneficiales. De façon que ie puis dire en verité, que son travail, industrie, & loyauté, sont tournees au service du Roy & de la France plus qu'au mien, & qu'il a seruy sa Majesté & l'Eglise Catholique plus de moy, comme il continue encores à present tousiours de



bien en mieux. Et pource que ie voy que sa Maieité depart des pensions sur des benefices, & autrement, à ceux qui luy ont fait seruice longuement, i'ay estimé estre de mon deuoir de luy représenter les seruices de mon Secrétaire, & de vous prier, comme ie fais de toute mon affection, qu'il vous plaise le supplier de ma part, qu'il daigne estendre ses bien-faits à ce sien subiect & seruiteur, en luy donnant quelque telle pension, de la quantité de laquelle ie me remets à la discretion de sa Maieité, & à la vostre; vous assurant du reste, que ie mettray ce bien au rang de ceux qu'il a pleu à sa Maieité me faire à moy-mesme; & à vous me procurer enuers elle, pour le reconnoistre avec la mesme gratitude, fidelité, & perpetuel seruice, tant qu'il plaira à Dieu me conseruer en vie. Mondit Secrétaire s'appelle Pierre Bosu, natif de Lyon, âgé d'environ 35. ans, clerck, allant vestu de long depuis que se fus fait Cardinal. A tant, &c. Monsieur, &c. De Rome, ce 23. Septembre 1602.

A MONSIEUR DE VILLEROY.

ECCXVII

**M**ONSIEUR, Vostre lettre du 9. Septembre me fut renduë le 2. de ce mois, & celle du Roy & la vostre du 21. me furent réduës hier, auxquelles ie respondray par ceste-cy. Premièrement, quant au faict de la dispense du mariage de Madame sœur du Roy avec Monsieur le Duc de Bar, la seconde congregatio ne se tint qu'auant hier Samedi 5. de ce mois. Quatre iours auparavant fut baillee à chacun des Cardinaux & des Consultants vne seconde escripture que i'auois proposée particulièrement sur les causes de ladite dispense, qui est le 2. point des 4. que le Pape auoit proposez, comme vous auez esté aduerty. Et comme ie vous enuoyay copie de ma 1. escripture, aussi vous en enuoyay-ie à present vne de la seconde, afin que le Roy & vous voyez le deuoir que i'y ay fait de ma part. Mais pource qu'en ceste seconde il a fallu remonstrer plus particulièrement les maux qui en aduiendroient si le Pape ne concedoit la dispense, & en telles matieres il s'y pourroit trouuer quelques mots vn peu plus rudes que certaines oreilles trop tendres ne poutroient endurer, ie vous prie vous souuenir que pour obtenir icy ce que nous desirons, il falloit parler à la façon des Canons & de Rome, & dire non ce qu'il plaisoit à Madamie, & à ses Dames & Damoiselles, mais ce qui estoit utile & expedient à la cause & à nostre intention, & de faire bien sentir par deçà la laideur & enormité des maux resultans du refus & retardement de ceste dispense.

Auant que ladite congregation se tint, & apres qu'elle fut tenue, il fut arresté que tout ce qui seroit dit & qui auroit esté dit seroit tenu secret, mais i'en estime pas qu'apres cela on l'ye entendu en compaignie de

comp

compte au Roy sommairement, sans nommer personne. Je vous diray doncques que les quatre Consultants, comme est la coustume, parlerent les premiers, & puis sortirent: aussi n'ont-ils que voix consultiue, qu'on appelle, & non la decisive, laquelle est propre aux Cardinaux. Les deux premiers Consultants conclurent, qu'il leur sembloit que les causes déduites és escritures estoient iustes & suffisantes, & que le Pape devoit céder la dispense. Le troisiésme, apres avoir fait plusieurs arguments encontre, se remit à la prudence & iugement des Cardinaux. Le quatriésme nous fut formellement contraire, concluant que les causes n'estoient point suffisantes, & que le Pape ne devoit nullement accorder la dispense. De neuf Cardinaux que nous estions, cinq nous furent semblablement contraires, & conclurent tout de mesme que le dernier Consultant. Trois, desquels i'estoit vn, furent d'aduis que les causes estoient plus que suffisantes, & que la dispense devoit estre concedee au plus tost. Vn se reserva à dire son aduis à la prochaine congregatiō, où il seroit traité s'il seroit expedient ou non d'octroyer la dispense: d'autant, disoit-il, qu'encores qu'il y eust de grandes causes & occasions de dispenser, toutesfois il pouvoit estre qu'il seroit expedient pour d'autres plus grandes de n'en rien faire. Apres que tous eurent ainsi dit leurs aduis, le plus ancien demanda aux autres qu'est-ce qu'on feroit cy-apres, & quand leur sembleroit-il que la prochaine congregatiō se deust tenir. Il y en eut vn qui dit que la compagnie ne s'estant trouuee d'accord pour le regard des causes, elle s'accorderoit encores moins de ce qui estoit expedient, & que le Pape en cas de negative d'un des quatre points par luy proposez, ne se resoudroit point à conceder la dispense purement & simplement: qu'il vaudroit mieux s'adviser dès l'heure de ce qui se pourroit faire, sans avoir plus à contester & debatre entre nous en vain. Et sur cela fut proposé, qu'il seroit bon qu'au plus tost le Pape enuoyast commission à quelque Prelat de delà, pour donner & expedier par auctorité de la Sainteté la dispense, pourveu que Madame se convertist preallablement, & que par ce moyen il seroit au pouvoir de ladite Dame toutes les fois qu'elle voudroit, de legitimer son mariage & ses enfans, si elle en avoit, & de tirer Monsieur son mary, & tous ceux de ceste maison, & elle-mesme de la peine où elle se disoit estre par les lettres qu'elle avoit escrites au Pape, & à Monsieur l'Ambassadeur, & à moy. Cela fut incontinent approuvé de tous: & moy, pour ne demeurer seul en mon opinion, je me laissay transporter au torrent des autres, considerant que nous avions ja perdu le point des causes, & croyant qu'il ne s'en feroit autre chose, & que l'aduis d'un ne peseroit rien contre huit contraires. Si Monsieur l'Ambassadeur est d'aduis de poursuivre l'expedition de telle commission, nous adviserons de la faire dresser au reste la plus douce & favorable qu'il sera possible, & en la façon dont Madame puisse estre la moins offesee que faire se pourra, & puis vous sera rendu compte de tout. Encore que vous-avez trouvé par la premiere escriture que le Pape pouvoit & devoit accorder ladite dispense, comme il est vray, & la seconde vous le persuadera autant ou plus, si est-ce que quand le Pape ne l'octroye point, il n'en fait point inferer qu'il n'aye volenté de contenter le Roy.

H H H H h

Car la verité est, qu'en cét affaire se traitant de la Religio<sup>n</sup> & de l'honneur  
 sa Sainteté n'oseroit donner la dispense cōtre l'aduis de la plus-part des  
 Cardinaux de la Congregation: & quand bien il voudroit tirer de peine la  
 maison de Lorraine, si est-ce qu'il ne s'y voudra mettre pour les en tirer  
 eux. Si c'estoit quelque autre affaire où la Religion ne fust point meslee,  
 il seroit beaucoup plus libre, & plus hardy pour s'en faire croire. Aussi  
 vous priay-je de ne croire point que le Pape soit à présent moins favora-  
 ble envers le Roy qu'il estoit cy-deuant; si l'en sçauois & croyois quelque  
 chose, ie ne vous le celerois point. Vous sçavez avec quelle liberté & frâ-  
 chise ie vous ay tousiours escrit de toutes choses, & specialement que ie ne  
 vous ay iamais voulu respondre de personne: mais ie suis le plus trompé  
 homme du monde, si la Sainteté n'aime & estime le Roy sur tous les au-  
 tres Roys de la Chrestienté. Que s'il ne nous accorde tout ce que nous  
 demandons, ou aussi tost que nous voudrions, il a ses raisons, & a respō-  
 dre à trop de gens. Vray est que le Pape a si à cœur la conseruation de la  
 paix entre les Princes Chrestiens, que ie croy facilement qu'il conseiliera  
 le Roy, comme vous attendez, d'enuoyer au plustost vn Ambassadeur en  
 Espagne pour y resider; comme ie croy encores beaucoup plus fermement,  
 que quelque office que sa Sainteté sçache & puisse faire enuers les Espa-  
 gnols, afin qu'ils donnent satisfaction au Roy, ils ne la donneront iamais  
 & plustost-croy-je que s'il y auoit au monde quelque Iuge commun, par-  
 deuant qui ils peussent intenter action de ce que le Roy ne s'est laissé ac-  
 cabler par ceux qu'ils auoient subornez, ils y feroient adiourner sa Maie-  
 sté pour cela mesme, comme nous trouuons és histoires Romaines, qu'un  
 certain Cajus Fimbria fut si impudent & si audacieux, qu'ayant attenté de  
 faire tuer Quintus Scæuol, vn des plus hommes de bien & des plus hono-  
 rables de Rome, & ledit Scæuola n'estant point mort du coup & de la bles-  
 sure, ledit Fimbria le fit adiourner, pour ce, disoit-il, que Scæuola n'auoit  
 receu le trait assez auant dans son corps.

Au demeurant, i'açoit que ie sois trop marry de ce qu'il reste encores  
 trop de mauuaises humeurs dans le Royaume, ie suis neantmoins fort cō-  
 solé du bon denoir que le Roy & ses bons seruiteurs font pour l'en per-  
 ger, & pour pouruoir qu'il n'en arriue point d'incōueniens. Je prie Dieu  
 qu'il vous face la grace de mettre en effect toutes vos bonnes & saintes  
 intentions. J'ay esté fort aise de ce que le Roy a escrit à Monsieur Serafin,  
 sur l'occasion du Patriarchat d'Alexandrie, que le Pape luy a donné, & de  
 ce qui a esté ordonné pour faire reparer le tort qui fut fait au pōt de Beau-  
 uoisin au Comte de Saponara au royaume de Naples, & feray entendre  
 au Comte de Verru<sup>e</sup> cōme il faut qu'il s'adresse au Conseil du Roy pour  
 le Prieuré de son fils, & au seigneur Naro de ce qu'il vous a plu faire &  
 m'escire de son fils, dequoy ie vous remercie tres affectueusement, &  
 encores plus de ce qu'il vous a plu parler à Monsieur de Rosny pour ma-  
 pension, duquel i'attendray respōse à la lettre que ie luy escriuis. Ce ma-  
 tin a esté Consistoire, où Monsieur le Cardinal d'Ascoli, le plus ancien de  
 la Congregation sur la dispense du mariage susdit, a fait rapport au Pape  
 de ce qui s'estoit passé auant hier en la Congregation: auquel sa Sainteté

à répondu qu'elle bailleroit la dispense en la façon qu'il auoit esté aduisé en ladite Congregation, & lay a dit qu'il le fist sçauoir à Monsieur l'Ambassadeur & à moy: & sortant ledit Cardinal du Pape s'en est venu seoir près de moy, & m'a dit ce que dessus. Demain Monsieur l'Ambassadeur & moy delibererons ensemble de tout cecy; & afin que ie le puisse faire plus librement, nonobstant le silence qui fut enioint en la Congregation, i'ay demandé congé au Pape de luy dire tout ce qui s'estoit passé, & d'en conférer avec luy: ce que sa Sainteté m'a accordé fort volontiers. A tant, &c. Monsieur, &c. De Rome, ce 7. Octobre 1602.

## A MONSIEUR DE VILLEROY.

## CCCXVIII.

**M**ONSIEUR, Par ma dernière du septiesme de ce mois, ie vous donnay aduis de ce qui s'estoit passé en la Congregation tenuë le Samedi auparavant, sur la dispense du mariage de Madame sœur du Roy avec Monsieur le Duc de Bar. Depuis, Monsieur l'Ambassadeur & moy deliberasmes ensemble de ce qui estoit à faire, & moy le trouuant enclin à n'accepter point la resolution qui auoit esté prise en ladite Congregation, ie l'en louay grandement, & le confortay à cela mesme, pour plusieurs raisons: & entre autres, pource qu'à toutes les fois que nous voudrions la dispense à condition que Madame se fera prealablement Catholique, nous l'aurons sans aucune difficulté, & sans que nous ayons rien perdu en l'attente; & cependant nous prenons temps pour attendre sur ce le commandement du Roy, sans en rien monstrier par deçà. Secondement, en acceptant la dispense de ceste façon, nous rendrions plus manifeste & plus odieuse l'opiniastreté & obstination de Madame, si elle ne se faisoit Catholique, & rendrions les Princes de Lorraine de meilleure condition, si d'auanture ils se resoluoient vn iour au divorce, comme on les y met en chemin. Laquelle raison l'auois d'autant plus imprimée dans mon esprit, que ceux qui nous furent contraires en ladite congregation respondans à ce que nous auons baillé par escrit, que si la dispense n'estoit donnée il y auoit grand danger de guerres & troubles, soit que Monsieur de Bar repudiast ou qu'il retinst Madame, ils dirent qu'il n'y auroit point de guerre pour le repude, d'autant que le Prince de Lorraine auoit fait tout ce qui estoit en luy pour la convertir, & pour auoir la dispense, estant venu en personne à Rome pour cela, & la poursuivant encores auourd'huy de toute son affection, & que le Roy estant iuste & bon comme il estoit, il ne voudroit mouuoir vne guerre iniuste, contre vn Prince, qui apres auoir fait tout deuoir & tous ses efforts, & attendu quatre ans, chercheroit de sauuer son ame, en s'ostant de peché, & mettant sa conscience en repos. Et encores qu'il leur fust alors repliqué suffisamment, si est-ce que nous pouuons iuger par leur dire, qu'en acceptant la dispense de la façon qu'il fut alors resolu, si Madame ne se convertissoit nous empriions la condi-

HHHHh 2

tion, & meliorerions celles des Princes, & d'operations encores plus à dire à ceux qui ont desia tenu tant de tels propos, & aux autres qui sont de mesme humeur: cōme au contraire, si Madame pendant que l'on dispute à Rome de son fait se resoluoit à se declarer Catholique d'elle mesme, comme elle deuroit faire, ceste resolution luy seroit beaucoup plus honorable, que si elle le faisoit pour iouir de l'effect d'un parchemin, & pour obeir à vne condition qui luy auroit esté imposée cōtre son gré. L'alleguois encore pour vne 3. raison, qu'en acceptant ceste resolution, & en poursuivant l'expedition, nous nous preiudicierions pour vne autrefois, quand il semblera au Roy & aux Princes de Lorraine de remettre sus & renouveler, ou mesme dès maintenant continuer & poursuivre ceste instâce. Pour toutes ces considerations & autres, il fut resolu entre Monsieur l'Ambassadeur & moy que lad. resolution ne seroit point acceptee, & qu'il en parleroit au Pape, cōme il a fait depuis en deux audiēces, dont il vous rendra compte.

Au demeurant, j'ay veu par deux de vos dernieres depeschés à Monsieur l'Ambassadeur, comme vous soupconnez le Nonce de pancher du costé d'Espagne. Je ne veux pleiger personne, & me remets à ce que vous pouvez observer plus près. Tant y a, que les particularitez que i'en ay veuës iusques icy, ne me le presuadent point encores, & les offices qu'il peut auoir faits peuuent estre interpretez comme en faueur de la paix, suivant l'intention du Pape, plustost qu'en faueur des Espagnols. Decela vous puis-je bien asseurer, qu'il partit d'icy bien edifié & bien affectionné, & vous prie de vous souuenir de la dispute qu'il eut à Thurin avec l'Ambassadeur y residant pour le Roy d'Espagne, de laquelle j'escriuis au Roy par ma lettre du 3. Septembre de l'annee passée. Il se faut grader, comme vous sçavez trop mieux, de certains rapporteurs mal-contents de ceux de qui ils parlent, qui sans cōter rien de particulier mesdisent des gens en general, interpretans en mauuaise part tout ce qu'ils font, & presumans de voir iusques en leurs cœurs & penſées. Comme que ce soit, s'il s'apperçoit qu'on ait mauuaise opinion de luy, cela n'apportera rien de bon aux affaires & seruice du Roy, & ces flagorneurs auront fait vn grand deseruice à sa Majesté, & mesme d'autant qu'auant qu'on l'aye changé il ne se pourra faire qu'il ne se passe beaucoup de temps.

Nous auons icy aduis que le Duc de Sauoye a mis es mains des Espagnols toutes les fortes places de Sauoye, & qu'il estoit après à en enuoyer encores à Nice, & l'a fait auant que le Comte Visque fust arriué à luy, & apres neantmoins auoir ſceu ce que ledit Comte auoit obtenu du Roy; en quoy outre qu'il a continué sa mauuaise foy en negociant, il a monſtré cōbien il se sent coupable enuers le Roy & la France, & que la haine qu'il porte à l'un & à l'autre, & le desir ardent qu'il a de mettre les deux Rois en guerre, luy a oſté le sens & la cognoissance du tort qu'il se fait à luy mesme, & à ses enfans, & à ses subiects presens & à venir, qui en haïront sa personne tant qu'il viura, & sa memoire apres sa mort & à iamais. Quand à nous, cela ne nous sera pas possible si dōnnageable comme il pense & veut: car au pis aller, quād la Sauoye demurerait au Roy d'Espagne, il est vray que nous auons vn voisin plus puissant; mais aussi l'auiens nous moins

perfidie, moins eshonté, moins remuant, & moins temeraire, & sa grande puissance seruiroit à nous rendre plus sauts & aduises, & à nous mienx tenir sur nos gardes, non seulement en ceste frontierelà, mais aussi plus auât dans tout le Royaume, & non seulement és choses de guerre & d'armes, mais aussi au gouvernement ciuil & politique, qui auroit besoin d'une bõne reformation ; comme il pourroit estre que par ce voisinage l'Espagnol en seroit plus retenu enuers nous, aussi bien cõme il sera plus hay des Sauiyards, & de ceux de Nice, que ce bast blessera à bon escient iusques aux os, & les contraindra vn iour d'implorer l'aide des François, & de se loindre à eux pour se deliurer de ceste tyrannie. Et cependât si la chose est bien conduite de nostre part, le Roy d'Espagne qui desire la continuation de la paix, comme elle luy est tres-vile, & grandement necessaire, se pourra seruir de ces forterefes comme elle d'une forte bride, pour garder le Duc de Sauoye de rompre la paix, & de faire cy-apres les escapades qu'il a faites cy-deuant ; & ainsi sera deuenü par la providence & iuste iugement de Dieu, que cët homme qui seul avec son Comte de Fuentes cherchoit de mettre aux mains ces deux Roys, & qui a pensé donner au Roy d'Espagne des gages de sa fidelité enuers luy, & de sa haine implacable contre les François, se trouuera contre son intention auoir donné les gages & assurances de paix entre les deux Couronnes, & se sera luy mesme mis les fers aux pieds, & manotes aux mains, pour ne pouuoir plus faire le fol & enragé comme il a fait autresfois, & n'agueres en ceste action mesme qui a donné occasion à ce mien propos, auquel il est temps que ie mette fin.

Le Pape avec tout le College des Cardinaux a fait ce matin vne procession depuis l'Eglise de la Minerue iusques à l'Anima, pour le recouremet que les Chrestiens ont fait sur les Turcs de la ville de Bude en Hongrie, dont la nouvelle luy vint hier, comme Monsieur l'Ambassadeur, qui aussi a esté à ladite procession, & au *Te Deum*, & à la Messe que le Pape a dite en l'Eglise de l'Anima, vous en pourra donner aduis plus particulier. A tant &c. Monsieur, &c. De Rome, ce Landy 21. d'Octobre 1602.

## A MONSIEVR DE VILLE ROY.

CCCXIX:

**M**ONSIEVR, La lettre qu'il vous plent m'escrire le 21. Octobre me fut renduë le 8. de ce mois, avec la responce du Roy au Comte Giulio Pepoli, & avec les deux lettres de sa Maieité à Monsieur l'Ambassadeur & à moy, en faueur du sieur Giuliano de Medicis: de toutes lesquelles ie vous remercie tres-affectueusement, ayant enuoyé à Bologne celle qui s'adreffoit audit sieur Comte Giulio avec vne mienne, & monsté audit sieur Giuliano la faueur & honneur que le Roy luy auoit fait, dont il se sent grandement honoré, & obligé à sa Maieité & à vous: aussi verrons nous Monsieur l'Ambassadeur & moy de nous en prendre aux occasions. Quand aux deux affaires, de la dispense de Monsieur le Duc de Bar, & de

H H H H h 3

l'expedition de l'Euesché de Troyes pour monsieur Benoit, l'indisposition du Pape depuis environ vn mois a esté cause, qu'il ne s'y est peu rien faire. A present qu'il est guery nous les poursuivrons ; combien que ie ne sçay plus bonnement ce que nous pourrons faire quant au premier, auquel ie confesse ingenuëment m'estre trompé, non pas en ce que j'ay tousiours dit & soutenu que le Pape pouoit & deuoit accorder ceste dispense, (car tant plus ie vay auant, tant plus ie le croy & m'en assure) mais en ce que ie vous ay escrit plusieurs fois, que si le Pape mettoit ceste affaire en vne congregation nous l'emporterions, estimant que chacun opineroit comme il deuoit. Mais il est aduenü contre mon esperance; de quoy ie feray, & ay desja fait mon profit, pour ne plus m'esseuer de rien qui depende de l'arbitre d'autrui, quelque iuste & raisonnable chose que ce soit. Il me semble que le Roy a fait vne bonne chose d'auoir approuué l'ellection de Dom Pietro Paula Abbé de S. Honorat de Letins en Prouence, & que cela apportera à sa M. grande louange en ceste Cour, & en toute la Congregation de S. Benoit; comme ie croy aussi que ceste approbation ne preiudiciera en rien à la seureté de ladite isle : car outre que ceux de ceste nation, & mesmement élëuz à telles Prelatures par les Chapitres geneaux, ne sont rien moins soigneux & pouruoyans que les nostres, ils ont encores le mesme interest que ladite isle soit preseruee de troubles, & que leur tranquillité, leurs biens & reuenus leur soient conseruez. I'ay receu les lettres du Roy, de la Royne, & de vous, & de Monsieur de Sillery, en faueur de Monsieur Garnier, nommé à l'Euesché de Montpellier, à ce qu'il soit exempt de payer les droicts en tel cas deubs & accoustumez. I'espere que nous ferons quelque chose pour luy, attëdu ses qualitez de Religieux, Docteur en Theologie, & Predicateur du Roy, & l'estat & cōdition de la cité de Montpellier pour le regard de la Religion, outre le respect qui est deub aux recommandations de leurs Maiestez, & aux vostres. On escrit de Paris, que le Roy estoit sollicité de r'appeller tous les François qui estoient aux Colleges des Iesuites hors la France: sur quoy i'ay voulu adiouter ce mot à la presente, pour vous dire que comme sa M. ne se laissera point aller à ceste demande, aussi croy-je que telle chose ne sera point auant d'huy à propos, après que le Pape a fait si longue instance pour la restitution des Iesuites, & que sa M. luy en a donné l'intention que vous sçavez; & quand cela auroit à se faire, i'estime qu'il le faudroit differer & remettre à quelque temps plus opportun, que le faire à present que sa Sainteté s'offenseroit de telle inouation, les choses estans encores pendantes & non résolües. I'ay esté tres-aïse de la prompte volonté que le Roy a monsté de faire du bien à mon Secretaire, & vous remercie bien humblement de l'aide que vous nous y voulez prester, vous suppliât de toute mon affection qu'il vous plaise vous en souuenir, & croire qu'oultre que ce bien sera tres-bien employé, ie le mettray au rang de ceux qu'il vous a pleu me procurer à moy-mesme, & le recognoistray de la mesme gratitude & service enuers sa Maïesté premierement, & puis enuers vous & les vostres toute ma vie. A tant, ie prie Dieu, &c. Monsieur, &c. De Rome, ce 18. Nouembre 1603.

## A MONSIEUR DE VILLEROY.

CCCXX.

**M**ONSIEUR, Je reccus le 20. de Novembre la lettre qu'il vous pleut m'escrire le 2. apres que vous eustes receu la mienne du 7. d'Octobre, par laquelle ie vous rendois compte du succez de la seconde congregation qui auoit esté tenuë sur la dispëse du mariage de Madame sœur du Roy avec Monsieur le Duc de Bar, & ay trouué en vostre lettre toutes choses conformes à la résolution que M. l'Ambassadeur & moy prîmes apres que ie vous eus escrit l'adite lettre du 7. d'Octobre, comme vous auez veu par la miëne du 21. dudit mois. Puis donc que nous sommes d'accord en tout & par tout sans auoir sceu les vns des autres, ie ne vous en escriray autre chose pour le present, & me remettray à mondit sieur l'Ambassadeur de vous escrire ce peu qui s'y est passé depuis entre le Pape & luy. Outre vostre lettre j'en ay receu vne autre du Roy du 29. d'Octobre par la voye de Monsieur de Fresnes Canaye Ambassadeur pour sa M. à Venise, touchant la pension de quatre cents escus que sa M. a dōnée à vn fils du Côte Gioseppe Porto, depuis le deceds du sieur Camille de la Croix, auquel elle auoit esté destinee, laquelle ie ne faudray de faire expedier ensemble avec l'Euesché de Montpellier. Cependant, ie louë grandement ceste liberalité de sa Maieité, & m'assure qu'elle tournera au seruice & reputation de sa Maieité en ces quartiers là. Ledit sieur Comte Gioseppe est mon amy depuis 28. ans en çà, que Monsieur de Foix fit son premier voyage à Rome au commencement de l'an 1574. de façon qu'outre la publique consideration du seruice du Roy, ie suis en mon particulier tres-aise du bië & honneur que sa Maieité luy a fait, & seray cy-apres de tout autrë qu'il vous plaira faire en sa faueur.

La derniere matiere Consistoriale que i'ay expediee en Consistoire a esté l'Euesché de Sarlat pour vn fils de Monsieur de Gaulezac, neveu de feu Monsieur de la Motte Fenelon, que vous & feu Monsieur de Foix auez aimé grandement, comme de ma part ie l'ay fort reuërë, & auois bonne part en ses bonnes graces: dequoy ie me suis souuenü en ceste expedition, & en a esté bon besoin: car sans la particuliere diligence & affection que i'y ay apportee, il eust fallu que le nommé pour estre expedie dudit Euesché eust attendu l'aage entier de 27. ans porté par les Concordes, sur le defect duquel ie l'ay fait dispëser, nonobstant que le Pape eust dit il y en auoir trois ans qu'il ne donneroit plus de telles dispenses, & fut ledit Euesché proposé & expedie audit Consistoire le 27. Novembre dernier, dequoy ie vous ay voulu rendre compte, pour l'opiniõ que i'ay eüe que vous en sèzez bien-aise, quand ce ne seroit que pour la consideration de la bonne memoire dudit sieur de la Motte Fenelon.

Monsieur Marshesain qui s'est arresté à Venise depuis son retour de France, m'a escriit de ladite ville, & fait parler icy par un Cardinal, afin que



i'escruiſſe en Cour à ſa faueur pour l'effect de certaine penſion qu'il a obtenué du Roy. Je luy ay reſpondu que ie vous en eſcrirais, comme ie fais à preſent, pour ne luy manquer point de parole, mais que ie l'aduifois que pour vne autrefois, & pour ceſte-cy encores, il regardaſt de ſe ſeruir de quelque autre, d'autant que ie n'eſtois apre interceſſeur en matiere de faire payer des penſions, pour cauſe que ie ne luy pouuois dire. C'eſt que ie n'ay pas voulu qu'il ſeuſt que i'ay aſſez affaire à eſtre dreſſé de ſa miſme, & en ſuis en arriere. Moins ay- ie voulu qu'il ſeuſt que Monſieur de Bioſny n'a point ſeulement reſpondu à la lettre que ie luy en ay eſcrite, & que ie me ſuis abſtenu de demander à Monſieur de Bethune ſon frere ſ'il auroit en reſpoſe à celle qu'il luy auoit eſcrite pour moy de peur de le faire ſougir, mon naturel eſtant d'eſpargner mes bons ſeigneurs & amis en tout ce que ie puis. A tant, &c. Monſieur, &c. De Rome ce 2. Decéb. 1602.

A MONSIEUR DE VILLEROY.

CCCXXI.

MONSIEUR, Voſtre lettre du 17. Nouembre me fut renduë le 5. de ce mois, au commencement de laquelle i'ay veu comme le Roy auoit trouué bon que i'euſſe conforté Monſieur l'Ambaſſadeur à n'accepter point la reſolution priſe en la Congregation tenuë ſur la diſpenſe du mariage de Madame ſa ſœur avec Monſieur le Duc de Bar, & me commandé de continuer à faire en ce ſaiet tout ce qui me ſera poſſible, à quoy i'obeiray tres-volontiers, & à tout autre commandement qu'il plaira à ſa Maieſté me faire. Monſieur l'Ambaſſadeur par mon aduis a fait inſtances au Pape, qu'il pluſt à ſa Saincteté luy faire bailler par eſcrit les raiſons pour leſquelles on pretendoit qu'elle ne deuoit point nous accorder ceſte diſpenſe, & ſi-bien continué ceſte pourſuite, qu'en fin le Pape les luy a baillees, & nous aſſés apres à les voir, & faire voir par des perſonnages doctes & conſiderés, pour puis apres en delibérer en ſenſible, & y reſpondre de commun aduis. Et ſi il ne tenoit qu'à faire de bonnes & ſuffiſantes reſponſes, nous l'auroions bien-toſt gaigné: mais il y a en ceſte affaire ie ne ſçay quel chancere malin & enuieimé, duquel non ſeulement la guarifon eſt fort difficile, mais auſſi la cure, & outre que la condition de la conuerſion preſſable eſt en ſoy fort fauorable, il ſemble encores d'ailleurs que les Princes de l'orayne ſe ſont eſtoyés, ſoit par leur facilité, ou pluſtoſt pour leur deſſein, que ie vous en ſcray en ma lettre du 22. d'Octobre. Car le Pape ayant ſur ce voulu auoir l'aduis de Monſieur le Cardinal Bellarminio, bien qu'abſent de ceſte Cour, ledit ſieur Cardinal a eſcrit entre autres choſes, que lors que Monſieur le Duc de Bar fut en ceſte ville ledit ſeigneur Duc luy dit plus d'une fois qu'il ſe contenteroit de la diſpenſe ainſi conditionnée, & ſçauoir qu'il n'en faiſt point que Madame ne ſoit par la ſeule & ſeule ſeule, le ſieur Barreſſier n'en faiſant rien, & ſi-bien ſe ſont enuoyés

par Monsieur de Lorraine, & par Monsieur le Cardinal son fils, & m'estât venu voir, me dit la sepmaine passée qu'un iour parlant avec Monsieur de Lorraine, & luy disant qu'à peine auroit-on iamais la dispense qu'à ceste condition que Madame se feroit auparauant Catholique, Monsieur de Lorraine luy respondit qu'il s'en contenteroit de ceste façon : & ledit Barette continuant ce propos, me dit luy-mesme qu'il seroit d'auis que nous acceptions la dispense en la façon que la Congregation auroit aduisé de la donner. Or ie vous laisse à penser si cecy estât sceu du Pape & des Cardinaux de la Congregation, cōme ils sçauent desia ce que Monsieur le Cardinal Bellarmin en a escrit, ils seront d'aduis de rabatre de lad. condition, avec ce que sans cela ils estoient desia portez d'eux-mesmes à lad. condition, qui de soy est tres fauorable & tres-equitable. Il y'a encores vn autre mal à craindre en cecy, c'est qu'eux monstres de ne trouuer mauuaise lad. condition, & nous la refusans tout à plat, quelques malins pourroient remettre sus vne calomnie qu'ils ont autrefois publiee, à sçauoir que Madame seroit ja conuertie si le Roy eust monsté de le vouloir à bon esciēt : jaçoit que le Pape n'aura point ceste opinion, ayant tesmoigné de sa bouche lors qu'il assembla les Cardinaux de ceste Congregation, que sa Maiesté auoit fait tout ce qu'elle auoit peu pour la conuersion de Madame sa sœur. Tant y a, qu'un Cardinal arriué à Rome depuis peu de tēps me dit quatre iours y a, qu'il auoit ouy tenir ce langage du Roy, dōt il luy déplaisoit. Ledit Barette m'a dit n'auoir aucune charge de ceste affaire, & qu'il en lairroit faire le sieur de Beauuau, sans s'en meller aucunement. Ie luy dis que le Pape luy en pourroit demander, & qu'il aduisast en ce cas de ne point oster à sa Sainteté l'esperance que nous luy donnions de la conuersion de Madame, moyennant que sa Sainteté nous accordast la dispense pure & simple; ce qu'il me promit, & me l'a tenu : car sa Sainteté luy en ayant demandé son aduis, il respondit si bien, qu'elle luy enioignit de le mettre par escrit, & de le luy porter à la prochaine audience, comme il a fait. Ie l'aduertis de ce que dessus, pource que s'il y a moyen de faire charger d'auis aux Cardinaux qui ont opiné cōtre la dispense, c'est l'esperance de sa conuersion; & seroit bon que Madame en donnast l'esperance de plus en plus, & encore meilleur qu'elle fist la conuersion tout à fait. I'ay fait sçauoir au sieur de Beauuau le soin que sa Maiesté a de ceste affaire, & avec l'aide qu'il en a receu, il m'a dit qu'il en redroit compte à ses Princes.

I'ay veu en la lettre du Roy & vostre à Monsieur l'Ambassadeur ce qui auoit esté descouuert de ces maudites & detestables conspirations; ce qui m'a confirmé de plus en plus en l'aduis duquel ie vous escriuis que i'estois par ma lettre du quatriesme Nouembre, & duquel ie ne pouuois me departir iamais. Bien loüay-ie grandemēt qu'il n'en soit parlé aux deux que vous nommez par lad. lettre, & Monsieur l'Ambassadeur & moy n'en auons pas vsé autrement, & n'en vsérons cy-apres, pour les mesmes considerations que vous m'avez representees. Le Comte de Verruë Ambassadeur de Monsieur de Sauoye, me vint voir vn iour de la sepmaine passée, & m'ayant dit certaines choses dont son Altesse s'est plainte au Pape des ministres du Roy, desquelles Monsieur l'Ambassadeur vous escrit, me re-

quit de vous prier d'aider à son fils à conseruer son bon droit au Prieuré de saint Iean lez Geneue. le seray tousiours d'auis que iustice soit faite tant au seruiteur qu'au maistre, non seulement pour le commun deuoir que tous les Princes y ont, mais aussi pource que la iustice bien administree aux estrangers, apporte à ceux qui la font vne particuliere reputation & louange es nations lointaines, & m'assure que le Roy & tous les Seigneurs de son Conseil l'entendent ainsi, & beaucoup mieux. Pleust à Dieu que les estrangers s'abstinsent aussi bien de nous mal-faire. A tant, &c. Monsieur, &c. De Rome ce 16. Decembre 1602.

---

A MONSIEVR DE VILLEROY.

CCCXXII.

**M**ONSIEVR, Par la lettre qu'il vous pleut m'escrire le 4. de ce mois, i'ay veu comme le Roy auoit pris en bonne part ce que ie vous auois escrit par la mienne du 4. Nouembre, sur la paix & affection qui se doit attendre du costé d'Espagne & de Saouye. Et voudrois qu'il pleust à Dieu m'inspirer quelque chose qui peust tourner au seruice & contentement de sa Maiesté, & au bien de son Royaume, comme il y a dressé ma volonté & deuotion, & toutes mes pensees & intentions. Si le Marechal de Bouillon prend la routte de Hollande, comme quelques vns estiment, il est certain que les Espagnols & Sauoyards diront ce que vous aués preuû, & qu'il sera besoin que le Pape soit par nous preuenû à temps, & informé de la verité. Je voudrois que nous en fussions là, si ledit Marechal ne peut estre attrapé auant que sortir de la France, où ie le craindrois plus qu'en Hollande, n'estoit la vigilance & vifesse du Roy, qui à mô aduis n'aura donné loisir audit Marechal de faire souleuer ceux de la Religion, ains l'aura attraint & renfermé auant qu'il ait peu tramer ses pernicious desseins, comme vous sçauiez que les remedes de tels mouuemens consistent principalement en la diligence de les preuenir & deuaner. Qui est ce peu que i'auois à respondre à vostre dite lettre dudit iour 4. de ce mois. Au demeurant, les Espagnols nous ont bien deuancez à bon escient au fait des pensions dont vous deliberez si long temps y a par delà, comme vous entendrez par la depesche de Monsieur l'Ambassadeur. Et à la verité il nous surpassent en cela, & nous surpasseront à l'aduenir, autant comme le Roy les surmonte en vraye vertu & valeur. I'aduertis dernièrement Monsieur l'Ambassadeur, comme le Pere Personius Iesuite Anglois, partial du Roy d'Espagne, auoit icy aduis qu'un Prestre Anglois, Chanoine de l'Eglise du Mans, appellé Oüen, lequel a vn frere es Pays-bas au seruice des Archiducs, estoit allé par commandement du Roy vers son dit frere, & luy auoit tenu propos touchant la succession au Royaume d'Angleterre apres la mort de la Roynie, & que ledit Personius sçauoit tout ce que ledit Chanoine auoit dit à son frere, & ce que son frere luy auoit respondu; dequoy Monsieur l'Ambassadeur vous aura donné aduis. A quoy

à adiousteray à present, n'ayant eu le temps de luy dire, que ledit Chanoine a enuoyé audit Personius la copie d'une lettre que vous luy escriuistes de Fontaine bleau le 9. Nouëbre dernier, laquelle copie i'ay veüe, à telles enseignes qu'il y a en substance que vous auiez dit au Roy les propos qui s'estoient passez entre vous & luy, & que sa Maiesté auoit eu à plaisir de les entendre, comme aussi reconnoissoit-elle que c'estoient choses qui se deuoient acheminer par l'entremise & auctorité du Pape, auxquelles aussi sad. Maiesté apporteroit de sa part tout ce qui seroit du deuoir d'un Roy tres- Chrestien, & de raison & iustice, & que sad. Maiesté trouueroit bon que ledit Chanoine se retirast au Mans, iusques à ce qu'il seroit temps de le mettre en besongne. C'est le Pere Personius qui m'a fait voir la copie, desirant grandement qu'il se dressé vn traicté par deçà entre le Pape, le Roy, & le Roy d'Espagne, pour conuenir entr'eux d'un personnage Catholique qui doine regner en Angleterre apres la Roine, soit le Roy d'Escolle, en cas qu'il se face Catholique, dit-il, soit vn autre; & pour s'accorder aussi des moyens de porter & aduancer celuy dont ils auront conuenu: & me vouloit persuader par ladite copie que le Roy s'y monstroir disposé, dequoy il louoit fort sa M. Vous sçauéz ce que ie vous ay escrit de ceste matiere autrefois, & pourrez iuger à quoy cela peut tendre. Si les choses se doiuent passer de bonne foy en ceste negociation, sans autre respect que de la Religion Catholique, & du bien du Royaume d'Angleterre, & de la commune seureté & satisfaction des voisins, & de la paix & repos vniuersel de la Chrestienté, ie la louërois grandement: mais d'attendre du costé d'Espagne ceste bonne foy, & ces seuls respects, il m'est fort difficile, pour ne dire impossible. Ie vous en laisse le iugement, & ensemble de combien il se faut fier dudit Chanoine Anglois: & prie Dieu qu'il dressé toutes choses au mieux, & qu'il vous donne, &c. Monsieur, &c. De Rome, ce 30. Decembre 1602.

*Fin du bienheureux Livre.*

IIII 2



# LIVRE NEVFIESME.

ANNEE M. DC. III.

A MONSIEVR DE VILLEROY,

CCCXXIII.

**M**ONSIEVR, Depuis ma dernière du 30. de ce mois, j'ay receu la vostre du 15. du mesme mois, le commencement de laquelle m'a grandement consolé, pour la prudence, justice, generosité, constance; & fermeté du Roy qu'il vous a pleu m'y représenter sur ces dernières conspirations & mouuemens. Je prie Dieu qu'il luy face la grace de les esteindre du tout bien tost, & de remettre son Royaume en estat tranquille & assuré, non seulement pour luy, mais pour toute sa posterité. L'affaire de la dispense de Monsieur le Duc de Bar estant aux termes que nous vous auons escrit, la presse & sollicitation extérieure que Madame desire n'y est point bonne, & vous mesmes l'avez ainsi jugé par la première despêche que vous nous fistes, après auoir scéu la résolution de la dernière congregation, outre ce que ie vous escriuis par ma lettre du seiziesme Decembre, que Monsieur l'Ambassadeur & moy estions après à respondre par vne nouvelle escriture à tout ce qui a esté dit cy-deuant contre ladite dispense. Il nous faut trouuer encore quelque moyen de faire reuenir les Cardinaux qui ont esté de contraire opinion. Or ne reuiendront-ils iamais sans qu'on leur propose quelque chose de nouveau, qui n'aye point esté dit auparavant. L'esperance de la conuersion de Madame seroit vn des plus propres moyens: aussi l'auois-ie touché en mes escritures: mais ils ne la peuuent nullement conceuoir, ains fondent leur opinion principalement sur la pertinacité qu'ils presupposent estre en elle. Nous

taschoûs à leur oster de l'esprit peu à peu ceste mauuaise impression, & à leur imprimer l'esperance de ladite conuersion : à quoy Madame qui a si grande haste nous deuroit aider, ou pour mieux faire, vser elle mesme du remede qu'elle a en sa main, & mettre à son aise soy-mesme, Mons.<sup>r</sup> son mary, & toute la maiso<sup>n</sup> & pays de Lorraine, & le Roy, le Pape, & tous les Catholiques. Que si elle-mesme pour auoir sa fin & intention, & pour le salut de son ame, ne peut s'accommoder au consentement vniuersel de l'Eglise Catholique, le Pape estime auoir encore moins d'occasion de faire seruir son auctorité & sa dignité à l'appetit & à l'erreur d'une femme, contre l'aduis de la plus-part d'une Cōgregation, & en danger d'en estre calomnié, & mis en grande peine luy-mesme. Je vous en parle ainsi librement pour la verité, & pource que les autres le nous disent ainsi par deçà, & pource que ie sçay en ma conscience que i'ay fait en cét affaire tout ce dont ie me suis peu aduiser, & y fais encores tous les iours, & suis delibéré d'y faire à l'aduenir mieux que iamais, s'il me sera possible, mais il n'y pourroit auoir rien qui acheuast plustost de ruiner cét affaire que la presse & la haste. Quant aux declamations qu'on dit auoir esté faites au College des Iesuites de Dole, ie m'en esmerueille bien fort, & ne sçay qu'en croire. Lors mesme que ie vous ay escrit avec plus de diligence pour la restitution des Iesuites en France, ie vous ay protesté que ie ne fus iamais en amouré d'eux, & que ce que i'en faisois estoit pour l'opinion que i'auois qu'outre le bien qu'ils pourroient apporter à la Religion Catholique, & aux lettres & sciences, leur r'appel donneroit contentement au Pape, & bon nom & reputation au Roy. Maintenant apres auoir considéré plusieurs choses que i'ay leuës & ouïes d'eux, ie vous declare que ie ne veux plus me mesler de leur fait, & que ie m'en remets vne fois pour toutes à ce que sa Maiesté & son Conseil iugeront estre pour le mieux. Et ainsi ay-ie respondu à vostre dite lettre du 15. Decembre. Au demeurant, Monsieur le Cardinal San Marcello m'a dit auoir refusé la pension qui luy auoit esté presentee par l'Ambassadeur d'Espagne, & qu'il auoit dit à Monsieur le Cardinal Aldobrandin que non seulement il ne luy en demandoit point son aduis, mais que quand il luy cōmanderoit de la prendre il ne luy obeyroit point. Mōsieur le Cardinal Visconti m'a dit aussi qu'il ne la prédroit point, me recitant les paroles dont il vouloit vser en la refusant, que i'ay trouué tres sages & modestes; aussi est-il personnage tres-sage, tres-entier, & magnanime. Le Pape a respondu à ceux qui luy en ont parlé qu'il s'en remettoit à eux, sans se laisser entêdre s'il trouueroit bon ou mauuais qu'ils la prissent: ce qui leur donna à penser qu'il trouueroit mauuais s'ils la prenoient, & leur a mis le cerueau à party: de façō que peu l'oseront prédre, de quoy nous serons esclaircis dās peu de iours, & vous en serez aduertis par mesme moyen. Sur la nouuelle qui est venuë de l'entreprise du Duc de Sauoye sur Geneue, i'ay fait voir à Mōsieur l'Ambassadeur la depesche que le Roy me fit le 1. May 1601. en laquelle y avn article bien long, par lequel sa Maiesté montre bien amplement que ceste ville est comprise en la paix de Veruins. Ie viens du Consistoire, où le Cardinal Bandini m'a dit qu'il auoit refusé la pension qui luy auoit esté offerte, & dont il auoit pris tēps à

deliberer: & ay entédu d'autres que pas vne des creatures de ce Pape n'en prendroit point, quoy que ce fust des autres; desquels le Cardinal Pinelli l'a refusé, comme ie sçay de l'Ambassadeur de Toscane auquel ledit Pinelli l'a dit.

A tant, &c Monsieur, &c. De Rome, ce 13. Ianuier 1603.

## A MONSIEUR DE VILLEROY.

CCCXXIV.

**M**ONSIEUR, Outre la lettre que ie viens de vous escrire en response de la vostre du 15. Decembre ie vous feray ceste cy à part pour vous dire que Monsieur de la Varenne a enuoyé au sieur Raby vne despêche du Roy, où il y auoit vne lettre pour le Pape, vne pour Monsieur l'Ambassadeur, & vne pour moy, & le prie d'auoir soin de ladite despêche, & prendre la peine de retirer l'expedition que le Roy desire de sa Sainteté, & luy adresser à luy de la Varenne, & en son absence à Puyperoux son commis. La mienne est du 25. Nouembre contresignée Ruzé & contient en somme que sa Maiesté a resolu de leuer sur les Benefices de Bresse, Bugey, Valromay & Gex la somme de 36. mille liures en 3. années consecutiues en la mesme façon que faisoit le Duc de Sauoye, & desire que ceste leuee soit approuuée & autorisée de nostre S. Pere le Pape, & que sa Sainteté luy en oüroye & face deliurer vn bref, & me commande de le servir en cela, à quoy Monsieur l'Ambassadeur & moy sommes tous prêts, mais pour l'importance & difficulté de la chose, nous auons pensé de différer iusqu'à ce que nous ayons esté aduertis si le Roy est bien informé au vray que le Duc de Sauoye leuoit telle somme sur lesdits benefices par permission du Pape. Car s'il la leuoit, sa Sainteté ne peut trouuer mauvais que le Roy la veuille leuer, ny luy en refuser honnestement la permission si elle a accordée au Duc, & nous en pourrions parler plus cautelement; ains s'il plaisoit au Roy, il seroit possible meilleur que sa M. me commandast de n'en point faire instance, & s'abstint de faire telle leuee sur des nouueaux subiects, non encores si bien incorporez & consolidéz à la Couronne, comme ils seront avec le temps, pour ne leur faire regretter leur ancien maistre, & ne donner occasion au monde de croire & de dire que lesdits 4. pays estoient de meilleure condition sous le Duc de Sauoye, qu'ils ne sont à present sous le Roy de France. Ioinct que le Duc de Sauoye & cestuy-cy ont tant imposé & exigé sur leurs subiects, que tout autre Prince qui leur aura succédé en quelque partie que ce soit de leur Estat, se peut contenter d'en prendre autant.

Surquoy nous attendrons ce qu'il vous plaira nous en faire entédre. Cependat ceste cy seruira de response à ladite lettre qu'il vous a plu m'escr-

A MONSIEVR DE VILLE ROY.

CCCXXV.

**M**ONSIEVR, Au commencement de la lettre qu'il vous pleut m'escire le dernier Decembre, vous cõtez avec beaucoup de prudence les causes de l'Infidelité qui se voit auioard'huy en vne partie des François, en quoy ie suis du tour de vostre aduis; vous priât neantmoins de prendre en bonne part que i'y adioulte vn mot dont ie suis gros long tẽpsy a, & que ie vous aycy-deuant aucunemẽt signifié, mais non apertemẽt declaré; c'est que quelque legereté & inquietude naturelle qu'une grãde partie des François aye, & quelque ambition & auarice qui regnent auioard'huy parmy eux, les conspirateurs n'eussent iamais eu l'audace de faire leurs conspirations, & mesmement sous le regne d'un si valeureux & heureux Roy, s'ils n'eussent veu vne partie de la noblesse mal contente, l'Eglise mal menee & deconfortee, & le pauvre peuple & quasi tout le tiers Estat trop foulé: comme aussi sans cela les estrangers ne fussent entrez en esperance de nous troubler, ny en la hardiesse de suborner les seigneurs & gentils-hommes François. A la verité la pouruoyance & vigilance du Roy à preseruer sa personne, & à descourir & preuenir les desseins de ses mauuais voisins & subiects, a tellement profité iusques icy, que sans elle nous serions desia perdus, & la continuation en est & sera tousiours necessaire, mais ie ne puis m'exempter de la crainte de semblables recidues, ny esperer vn entier & assuré repos iusques à ce que le Roy aye informé l'Estat, commençant à soy mesme, & entre autres choses à moins prendre sur ses subiects, & contenté les meilleures parties dudit Estat, qui preuaient en nombre & en forces aux perfides & seditieux; de sorte que ceux cy, & les estrangers mesmes, perdent tout moyen de toutes esperances de troubler le repos public, & de faire souleuer les subiets contre leur Prince.

Ie sçay bien que ce propos est hardy, & que peu l'oseroient tenir: mais ie l'estime encores plus vraie que necessaire; & si ie pensois qu'il deust profiter, ie le voudrois desia auoir escrit au Roy mesme au peril de ma vie, ains d'un million de vies si ie les auois, combien que ie m'assure qu'il n'y auroit aucun danger, & qu'il m'en sçauroit gré. Et de fait, si autre chose ne vous retient, ie me contente pour mon regard que vous lisiez tout cecy à sa Maiesté. C'est le vray moyen d'asseurer sa personne & sa Couronne, non seulement pour luy, mais pour toute sa posterité, & de faire benir sa memoire à iamais.

Du fait de Geneue dont vous veniez de receuoir le memoire, ie m'en esmerueillerois si c'estoient d'autres que M. de Sauoye & les Espagnols qui eussent fait l'entreprise, mais de ceux cy ie ne m'esmeruillera i jamais quelque chose qu'ils facent contre la paix, & contre le deuoir de bõs voi-



sins. Cependant ceste entreprise m'a fait penser que eux ne pouuans ignorer que le Roy ne leur laisseroit iouyr paisiblement de leur vsurpation, si elle leur fust reüssie, ils pouuoient estre disposez à la guerre ouuerte, mais qu'ils vouloient pour l'honneur du monde que le Roy la leur commençast & pbur vnetelle occasion.

Mais quant au Duc de Sauoye & Comte de Fuentes, il n'est besoin d'ẽchercher autre raison: car ils desirent la guerre si follemẽt, qu'ils y constituent leur souuerain bien, sans regarder à dommage, perte, ny ruine qui en peut arriuer à eux-mesmes & à la Couronne d'Espagne. Mais quant au reste des Espagnols, ils sçauent en leur conscience auoir donẽ tant de iustes occasions au Roy de leur faire la guerre, qu'ils croyent qu'il la leur fera quoy qu'il tarde, & qu'il n'attẽd qu'à purger les mauuaisẽs humeurs de sã Royaume, pour puis apres les assaillir en temps plus cõmode pour luy, & plus incõmode pour eux. Et ainsi ilspouuoiet s'estre laissẽs persuader ausdits Ducs de Sauoye & Comte de Fuentes, qu'il estoit meilleur, ou moindre mal, d'auoir la guerre avec le Roy d'apresent, que d'attendre vne saison plus aduantageuse pour luy, & plus des-aduantageuse pour eux; mais que pour la reputation enuers les Catholiques, il falloit faire de façon que l'enuie & la haine de l'infraction de la paix tombast sur le Roy, comme il seroit aduenũ si sa Maiehtë se fust meũ pour la prise de Geneue, ville pour l'heresie la plus haye qui soit en la Chrestientẽ. Mais comme ceste leur malice nous doit faire tenir tant plus sur nos gardes, & nous admonester de nous rendre tant plus forts en tout euẽnement, aussi nous doit elle rendre plus cauts à ne leur commencer point la guerre ouuerte s'ils ne nous en donnent vne occasion publique, euidente, & manifeste à chacun, laquelle ne puisse estre niee par eux, ny estre trouuee mauuaisẽ de ceux qui auroient quelque sentiment de iustice, & de la bonne foy, qui doit estre gardee parmy les hommes.

Entre les plaintes que le Duc de Sauoye fit faire au Pape par son Ambassadeur, estoit bien celle dont m'ẽscriuiez touchant les biens qu'il auoit affectez à l'ordre de S. Lazare: mais il se plaignoit encore de certaines autres responſes que le Roy auoit faites aux articles qui luy furent apportez par le Comte de Visque. Aussi se plaignoit il d'vn certain pont que ceux du costẽ du Roy sans en rien dire à ceux du Duc, auoient fait faire sur vne petite riuierẽ qui diuise vne parttie des terres de sa Maiehtë & de celles de Sauoye: ce que ledit Duc interpretoit à mespris de son Alteſse.

A tant, &c. Monsieur, &c. De Rome, ce 27. Ianuier 1603.

A V R O Y.

CCCXXVI.

SIRE,

Je ne pense point que vostre M. ayt aucun suieſt ny ſerviteur qui luy ſoit plus obligé que moy, qui d'un petit ver de terre que i'estois ay esté eleué à la dignité de Cardinal par vostre ſeule bonté & ſans aucun mien merite, & ſans auſſi que iamais ie vous en euſſe requis ny fait requérir directement ny indirectement: & après vn ſi grand excez de bonté V. M. y en a adiouſté vn autre m'ordonnant 4. mille eſcus de penſion par an ſur ſon eſpargne, pour m'aider à maintenir ceſte dignité; & au lieu de l'Eueſché de Renes qu'elle m'auoit auſſi donnée auparauant ſans en eſtre requiſe ny que ie le meritaſſe, elle m'en donna vn autre de plus grand reuenu: tellement que ſi votre ordonnance touchant ladite penſion eſtoit executée, comme ie m'aſſeure eſtre de votre intention, ie n'aurois aucun ſubiet de vous eſcrire la preſente, ny à faire aucune choſe pour ceſte heure ny à l'aduenir que continuer en l'exercice ordinaire pour ma gratitnde, qui eſt de penser tous les iours à ce qui eſt de votre ſeruice, & de prier Dieu pour la ſanté & proſperité de V. M. & des ſiens, & pour le bien de tout ſon Royaume. Mais outre que ladite penſion ne m'eſt payée entierement, ie voy que les aſſignations vont en empiſſant d'an en an. Que ſi l'auois moyen de m'entretenir en ceſte dignité de Cardinal ſans ladite penſion, ie n'en voudrois auoir eſcrit ny parlé, & tiendrois à grand bien & honneur de vous ſeruir icy ſans aucune penſion, quand bien ie n'aurois iamais receu aucun bien-faiſt de votre Maieſté, comme i'en ay receu tout ce que i'ay en ce monde; mais ne pouuant m'entretenir ſans ceſte liberalité de votre Maieſté, ie ſuis contrainct de luy faire ſçauoir comme les choſes ſe paſſent, à ſin qu'il luy plaiſe commander que les arrerages des deux années paſſées me ſoyent payées, & que ie ſois mieux dreſſé de ladite penſion à l'aduenir, ſi votre Maieſté pour deſcharger ſes finances n'ayme mieux y pouruoir par quelque autre voye à elle moins oncreuſe, & à moy auſſi profitable; dont ie ſupplie tres-humblement votre Maieſté, me conſiant non en aucun ſeruice que ie luy aye faiſt, & moins en aucun merite qui ſoit en moy, mais en ſa ſeule bonté & beneſicence, qui ne voudra laiſſer manquer ſa creature de ce qui luy eſt neceſſaire pour ſon enttetenement honneſte & moderé.

Atant, &c. Sire, &c. De Rome, ce dixieſme Feurier 1603.

K K K K k

## A MONSIEUR DE VILLEROY.

CCCXXVII.

**M**ONSIEUR, Depuis ma dernière qui fut le 27. Ianuier, Monsieur de Bethune m'a communiqué avec la dépeche du Roy du 16. du mesme mois la copie de la lettre que le Pape escriuit de sa main à sa M. le deuxième de Decembre. Et apres auoir considéré les propositions que sa M. y fait, i'en ay dit à mondit sieur de Bethune mon aduis, lequel ie vous mettray en ceste lettre suivant ce que m'avez ordonné par vostre dernière du 16. Ianuier. Le Pape apres auoir exposé au commencement le desplaisir qu'il a des soupçons qui s'engendrent & s'augmentent de iour en iour entre les deux Roys, & la peur qu'il a qu'il ne s'en ensuiue vn iour quelque inconuenient, & apres auoir dit encores ce dōt le Roy s'est plaint cy-deuāt des Espagnols, adiouste que les Espagnols & l'Archiduc se plaignent au contraire de ce que le Roy a continuellement des intelligences es Pays-bas, & desseins d'y surprendre des places, & qu'il fauorise & aide les rebelles desdits Pays-bas de grosses sommes d'argent & d'hommes à descouuert; tellement que l'annee passée il y a eu au camp du Comte Maurice contre l'armee Catholique deux rigimens de François à enseignes desployées, & ensemble grand nombre de caualerie, dōts'en est ensuiuy la perte de Graue, de si grande importance. Ce sont les mots de sa Sainteté, laquelle en vn autre lieu de sa lettre vers la fin monstre de le croire ainsi, non seulement quand elle dit qu'il sera tres-difficile de faire croire que les François qui sont allez en Flandre y soient contre la volonté du Roy, mais encores beaucoup plus quand elle adiouste que sa Maiesté peut croire combien grande affliction luy donne de veoir que les ennemis de Dieu si perfides & si animez contre le S. Siege, & qui en ladite annee passée ont commis tant de sacrileges & d'abominations contre les Eglises & autres lieux sacréz, soient aidez & fauorisez par celuy que le S. Siege a embrassé d'un si bon cœur, & en toutes les façons & moyens qui luy ont esté possibles, & procuré de luy pacifier le Royaume dedans & dehors. Sur cela ie ne scaurois dire autre chose, sinon que si nous auions fait les premiers contre la paix, nous aurions grand tort, & meriterions vne partie du mal que les Espagnols nous veulent, & qu'ils s'efforçēt de nous faire. Les accords de paix se doiuent garder par tout droit diuin & humain, & l'observation en est non seulement honneste & iuste, mais aussi vtile, & tellement necessaire, que si la foy n'est gardee, les Estats ny la société humaine ne se peut maintenir.

Et d'autāt plus auōs nous deu garder de nostre part la dernière paix à Veruins que les Espagnols s'y mirent à toute raison, promettant de nous rendre tout ce qu'ils tenoient de la Frāce, qui estoient plusieurs villes & places fortes

que nous eussions en bien à faire à reprendre par force, & tenans leurs promesses, & l'exécutans de bonne foy & bien tost. J'ay tousiours creu & dict par deçà que le viollement de la paix venoit du Duc de Sauoye, & des Espagnols qui l'y auoient fomenté & aidé, & fait depuis toutes les choses que vous sçaez trop mieux. De sorte que pour ce regard j'ay esté d'aduis avec Monsieur l'Ambassadeur qu'il falloit iustifier le Roy enuers le Pape, & detromper sa Sainteté & autres qui peuvent auoir séblable opinion. En suite de ce que dessus, le Pape dit audit lieu que ie designay parauant la fin de sa lettre; que le Roy se faisant licites telles choses, à grand peine se pourroit l'Espagne persuader de n'yfer point de mesmes façons de faire contre sa Maesté; en quoy il dist tres-bien: car ce seroit tousiours assez que les Espagnols nous gardassent la paix, pendant que nous la leur garderions; mais de penser que nous la violans contre eux ils la nous gardassent, il n'y auroit point d'apparence, quand bien ils seroient moins puissans, moins rusez, & moins glorieux & arrogans qu'ils ne sont. Sa Sainteté adiouste en poursuuant son propos, que l'vnique remede aux maux dont le Roy se plaint des Espagnols, est que sa M. laisse de fauoriser & proteger les rebelles des Pays-bas, & que par ce moyen la paix s'acheuera d'establir & affermer & cesseront sans doute de l'autre costé toutes les choses dont sa M. se plaint des Espagnols. Surquoy j'ay à vous dire que comme la paix denoit estre gardée par tous dés le commencement & tousiours, depuis aussi si elle n'a esté gardée iusques icy ny d'un costé ny d'autre, il seroit moindre mal qu'on commençast mes-huy à la garder, & qu'on cessast cy-apres de tous les deux costez de faire aucun acte contraire à ladite paix.

Ce remede que le Pape propose me fait souuenir de ce que j'ay leu au tresfois de la varieté d'opinions qu'on a tenuës au temps passé touchant la iustice. Ceux qui ont esté les plus gens de bien & les mieux sensez, parmy les Payens mesmes, ont tenu & defendu constamment que la iustice auoit son origine de la nature mesme, laquelle sans autre loy ny preceptes humains inuitoit les hommes à estre bons & iustes, & à se garder de faire tort & iniure les vns aux autres, & que la iustice d'elle mesme estoit bonne & desirable, outre la sèuerité, repos, & tant d'autres biens qu'elle apporte aux hommes; mais il y a eu vne secte de gens pervers qui tenoient que la iustice n'estoit point bonne de loy, mais bien necessaire aux hommes pour estre preseruez d'iniure; & adoustoient ces mauuaises gens, que naturellement il seroit bon de faire iniures à autres, mais que d'en recevoir c'est mal, & qu'il y a plus de mal à souffrir les iniures, qu'il n'y a de bien à les faire, & que à cause de cela les hommes du commencement apres auoir fait & receus des torts & iniures d'un & d'autre, & auoir gousté de tous deux, composeroient enfin & conuindrent ensemble qu'ils ne seentre-fesoient point de tort les vns aux autres, & firent des loix & constitutions, & que ce fust l'origine de la iustice. Ce que ie vous ay allegué icy; pour monstrer par là que ceux là mesmes qui n'ont point eu de la iustice l'opinion qu'ils deuolent; & n'en ont eogneu la vraye source, ont neantmoins recognu qu'il la falloit obseruer, & se garder de faire tort & iniure à autrui, à fin de n'en receuoir point. Par ainsi il n'est point qu'à

cela que les Espagnols ne nous fassent point de mal, il me semble que nous estans en paix avec eux, nous ne leur en devons point faire, & que le Pape a grande raison de nous proposer ce remede. Et quand nous ne voudrions l'accepter, & nous abstenir de faire contre la paix pour obeyr à Dieu, & suivre la raison naturelle qui nous dit qu'il faut garder sa parole & son sermēt, au moins le deurions nous faire pour nous preserver des maux que les Espagnols nous brassent, & brasseront incessamment tant que nous leur en ferons. Et croy que quand tous actes d'hostilité faictz sous main cesseroient de part & d'autre, nous y gagnerions mille pour cent; d'autant que comme en prouesse & vraye vertu nous deuançons les Espagnols, aussi en matiere de brigues & menées sourdes, & suborner & desbaucher les subiects, ils y sont plus entendus & plus malicieux que nous, & y despendent plus volontiers & plus largement; & qui pis est, ils trouvent chez nous les subiects plus disposez, & plus faciles à estre subornez & corrompus que nous ne trouuons & ne trouuerons les leur chez eux. Voyla doncques ce qui me semble pour le regard dudit remede que le Pape propose. Je dis d'auantage, que si outre l'observation de la paix, il se pouuoit esperer vne bonne & entiere intelligence entre les deux Roys, ie voudrois qu'ils fussent non seulement en perpetuelle paix, mais aussi en amitié sincere, entiere, & parfaite, de sorte que qui toucheroit l'un touchast l'autre. Ils en vaudroient beaucoup mieux chacun chez soy, & encorés es pays loingtains. Il n'y auroit point de subiects rebelles en leurs Estats, ny ennemis estrangers au dehors qui osassent leuer la teste contr'eux, ains prés & loing la plupart des choses & les plus importantes y passeroient en la façon qu'ils voudroient. Je sçay bien qu'il est mal aisé que deux Couronnes si puissantes & voisines n'ayent de l'emulation, & de l'enuie, & de la jalousie entre elles, mais cela vient d'imbecillité & imperfection humaine, & d'une particuliere malice de ce temps. Car la chose en soy, la verité & le deuoir est, comme ie dis, qu'ils se deuroient accommoder, & disposer à vne parfaite intelligence & amitié, laquelle leur apporteroit à tous deux non seulement toute seureté & repos, aise, commodité, & abondance, mais aussi toute grandeur, autorité, reputation, & gloire, tant dedans que dehors leur Royaume, là où maintenant ils consomment à s'entre mal faire le temps, les pensees, l'argent, & les hommes qui deuroient estre employez à faire de belles & Royales actions, à soulager & faire bien à leurs subiects, à les bien regler & solliciter, & obliger à eux tout le genre humain, & à se preparer le chemin de la vie éternelle au Ciel, & de louange immortelle en toute la terre, & au lieu qu'ils pouuoient & deuoient se faire heureux eux & leurs peuples, viennent eux-mesmes en perpetuelle inquietude & en quelque danger, souffreteux & en dettes, quoy qu'ils rōgēt leurs subiects iusques aux os, plus crains qu'aymez des leurs propres, & moins estimez des nations estrangeres & hors la voye de salut & de la vraye & solide louange.

Je toucheray icy à ce propos vn autre point qui n'est en l'adire lettre du Pape, duquel neantmoins il a parlé à Monsieur l'Ambassadeur depuis auoir escrit au Roy, comme vous aurez veu la depesche precedente dudit sieur Ambassadeur, c'est du mariage de Monsieur le Dauphin

avec l'Infante d'Espagne : laquelle alliance seroit tres bonne s'ils la vouloient non seulement traicter & accorder, mais aussi executer & accomplir en temps.

Mais ie ne puis me persuader que pour ceste heure ils ayent intétion de faire chose, dont il peust aduenir que la Couronne d'Espagne avec tant d'Estats qui en dépendent deuinist vn iour accessoire de celle de France. Et s'est veu iusques icy quasi tousiours qu'ils ont marié leurs filles entr'eux sans sortir de la maison d'Autriche, pour la susdite consideration d'y retenir & conseruer tousiours leurs Estats, pays, terres, & seigneuries. Et puis il y a encore quinze ou seize ans à passer auant que ce mariage peust estre effectué, & ils preuoient qu'en vn si long temps peuent aduenir infinies choses qui pourrout destourner ceste alliance, ou pour le moins donner couleur à leur desdit. Ie ne dis pas que si pendant ces quinze ou seize ans le Roy d'Espagne auoit trois ou quatre fils masles, comme il pourroit aduenir, il ne fust pour executer la promesse qu'il pourroit auoir faite de donner sa fille aisnée à mōdit seigneur le Dauphin, en quoy il se feroit aussi beaucoup d'honneur : mais pour ceste heure ie pense qu'ils n'ont intention d'accōplir la promesse qu'ils en pourroient faire, ains qu'ils se veulent seruir de l'ouerture de ce mariage pour quelque autre dessein, comme pour faire ailleurs leurs affaires, estās assurez du costé du Roy, & pour se descharger du bast qui les blesse en plusieurs endroits. Et Dieu vueille qu'ils n'ayent encore pour dessein d'endormir le Roy par cetraicté, pour le pouuoir puis apres mieux surprendre luy mesme. Mais nonobstant tout cela & quelque intétion qu'ils ayent, ie ne suis d'aduis qu'on laissast d'y entendre, & d'en traicter, & mesme d'en passer cōtract s'ils en veulent venir iusques là. A quoy le Roy ne scauroit rien perdre, pourueu, qu'il ne se fie point d'eux, & qu'apres tout cela il se tienne tousiours sur ses gardes, & continué d'auoir le mesme soing, & la mesme vigilance & preuoyance qu'il a à present. Car au reste Monseigneur le Dauphin ne scauroit estre marié en toute la Chrestienté plus grandement, ny plus aduantageusement, ny avec plus grande expectatiue. Et la conclusion de cetraicté seroit vn beau & honneste pretexte au Roy de se retirer d'ayder les Zelandois & Holandois, & d'essayer comme les Espagnols correspondroient à l'obseruation & entretien de la paix, s'abstenans de toutes subornations, brigues, & menees dans la France, & nous laissant en repos comme nous ferons de nostre costé enuers eux. Le Pape pour monstrier que le Roy doit obseruer la paix, & s'abstenir d'aider les Estats des Prouinces vnies, dit que assurer le demembrement des Pays bas de la Couronne d'Espagne tourne à compte à la France, & que si ceste guerre dure le Roy d'Espagne peut se resoudre à tourner toutes ses forces de ce costé-là, & reprēdre lesdits Pays-bas ; mais, comme i'ay monstrier cy-dessus, ie croy sans ces raisons cy que l'on a deub & doit on garder de bonne foy la paix de part & d'autre, & ces deux raisons que le Pape allegue à ce propos, me semblent se pouuoir beaucoup mieux appliquer au poinct qui s'en suit, pour lequel aussi ie les reserve.

Sa Sainteté doncques passant outre, dist que le Roy deuroit encores procurer la paix entre l'Archiduc & lesdits rebelles. Iusques icy ie me suis con-

KKKK 3

formé du tout à l'aduis de sa Sainteté, excepté en ce qu'elle semble croire que le Roy aye le premier conteuenu à la paix, & voudrois pouuoir encores suiure son intention au fait de ceste autre paix, comme ma robbe, & ma profession, & l'obligation que ie luy ay. n'y enclinent: mais ie sens vn tres-grande resistance en moy-mesme à croire que sa Maiesté doie procurer la paix entre les Archiducs & Espagnols d'un costé, & les Estats des Prouinces vnies d'autre. Et neantmoins si nous pouuions nous assurer qu'apres telles paix toutes choses fussent pour passer & s'observer de bonne foy, & que l'accord que le Roy auroit procuré ne nous fust point au desauantage & dommage de la France, j'en serois aussi d'aduis; mais les Espagnols, & les Archiducs mesmes, ont monstré vne si tant de haine & de venin contre le Roy & contre la France, que ie ne puis que ie ne me desfie, & ne craigne quand ils seroient en repos de ce costé là, ils ne tournassent puis apres contre nous toutes leurs forces. Car si maintenant qu'ils ont tant affaire ailleurs, ils nous font le pis qu'ils peuuent, & n'attendent que quelque bonne occasion, & quelque pretexte specieux & de belle apparence pour nous faire la guerre ouuertement, comme l'entreprise de Geneue semble montrer qu'ils y estoient disposez, que seroient ils lors qu'ils n'auroient affaire qu'à nous? Par ainsi ie croy qu'en leur gardant la paix, ce ne seroit point au reste mal fait à nous de les laisser là où ils se trouuent, & leur desirer tant d'affaires ailleurs, qu'ils n'ayent moyen d'exécuter la mauuaise volonté & les mauuais desseins qu'ils ont contre nous.

Mais voyons si les raisons du Pape sont assez fortes pour nous faire changer d'aduis; & parlons premierement dudit desmembrement. Il n'y a point de doute que le desmembrement des Pays-bas de la Couronne d'Espagne ne soit tres-bon & tres-vtile à la France, & ie voudrois qu'il fust bien assuré, & que les Archiducs eussent vne demie douzaine d'enfans. Mais comme les choses sont à present ie ne pense point que la paix entre les Archiducs & les Estats assurest ledit desmembrement, attendu que les Archiducs n'ont point d'enfans ny gueres plus d'esperance d'en auoir, & que nous sçauons que l'Infante mourant sans enfans, tous les Pais-bas retourneroient au Roy d'Espagne, lequel dès à present, comme tousiours auparauant, a des Espagnols en la pluspart des forteresses qui en apparence obeyssent aux Archiducs; & me semble que ladite paix assureroit plustost ceste reuersion, & le retour desdits Pais-bas au Roy d'Espagne. Mais ce que les Holandois & Zelandois prennent, comme depuis long-temps ils sont tousiours allez en prenant & conquerant, cela est bien desmembré de fait, combien qu'à la verité ils n'en ont point d'autre titre que la force, non plus que les Suisses qui se sont distraits de l'obeyssance de la mesme maison d'Autriche, pour le mauuais traitement qu'ils en receuoient. Il y a bien plus grande apparence que la continuation de la guerre parachepera du tout ledit desmembrement, non par conqueste entiere que ie croye que lesdits Estats vnis puissent faire, mais parce que les villes & pays qui obeyssent aux Archiducs sont foulez & oppressez infiniment, en premier lieu par les soldats qui y sont Espagnols & Italiens;

qu'autre; & en second lieu par le Comte Maurice, & par tous ceux qui tiennent son party comme les Anglois & autres; de sorte que pour se delivrer de tant d'oppressions, lesdites villes & pais obeyssans aux Archiducs seront vniour, & possible bien-tost, contraints de s'accorder d'eux-mesmes sans lesdits Archiducs avec le Comte Maurice, & avec le Zelandois & Holandois, & autres leurs compatriotes. Voila donc quant au desmembrément: apres lequel le Pape se fait luy mesme vne obiection, disant que quelque esprit subtil pourroit dire qu'il tourne à compte à la France, que le Roy d'Espagne demeure engagé en ceste guerre & qu'il s'y consume. Je ne sais pas de ces subtils, & toutesfois les Espagnols nous voulans le mal qu'ils nous veulent, & s'efforçans de nous en faire tous les iours comme ils font, ceste obiection me semble tres forte, tres puissante, & tres indissoluble à vn bon François. La solution que le Pape y donne est, qu'il faut aussi considerer que le Roy d'Espagne voyant que iacoit que les Pais bas ayent esté donnez à sa sœur, il demeure neantmoins en la mesme guerre & en la mesme despense & travail, il luy pourra venir volonté de reprendre les Pays-bss, & pour mettre fin vne fois à ceste guerre tourner de ce costé là toutes les forces & toutes les armées; auquel cas la France, dit-il, seroit priuée du fruit qui en aduiendroît du susdit desmembrement. A quoy j'adiousteray icy vne autre chose, qui autresfois m'a esté dite & escrite par d'autres, qu'au moyen de ceste paix, si elle se faisoit, tous les Espagnols viendroient à sortir de tous les Pais-bas; ce que ceux-là estimeroient vn grand bien pour la France. Mais pour mon regard i'estime que la volonté, & encores l'interest que le Roy d'Espagne a de conseruer & r'auoir lesdits pays, ne peuuent deuenir gueres plus grands qu'ils sont desia, comme aussi quelque effort qu'il face, il ne pourra faire plus qu'y fit le sen Roy son pere, quand il y auoit des armées fort puissantes sous le Duc d'Alue, & depuis sous le Duc de Parme, & des Capitaines en plus grand nombre, & de plus grande experience & valeur qu'il n'en a maintenant; & les forces extraordinaires qu'il pourroit mettre sus, pourroient aussi exciter les Anglois & les Protestans d'Allemagne, & autres qui penseroient estre interessez en la ruine desdits Estats, à leur donner aussi des secours extraordinaires, cōme ils ont fait autresfois; de façō que le Roy d'Espagne n'y feroit point tout ce qu'il pourroit esperer: & quād il y auroit de la prosperité beaucoup, il y a de la besongne taillee pour si long-temps, que quelque ieune qu'il soit, il aura les cheveux blancs, auant qu'il en puisse venir à bout, & cependant nostre Dauphin avec l'ayde de Dieu sera crū, & le Roy aura melioré la France, & assuré la succession à sa posterité.

Quant à ce qu'au moyen de la paix les Espagnols sortiroiēt tous des pais-bas, ie vous diray que s'ils nous aymoient, & s'ils auoient moins de rapacité & d'ambition qu'ils n'ont, ie ne me soucierois point où qu'ils fussent; mais eux estans si ambitieux & si auares que la Monarchie de tout le monde ne les pourroit assouuir, & d'ailleurs nous portans vne haine si cruelle & naturelle, qu'ils semblent constituer leur souverain bien en la mort du Roy & en la ruine de la Couronne de Frâce, ie les ayme mienx dans les Pays-bas vieillissans, harassez, & blessez, & meurtris par autres que nous sans aucune eoul;



pe nostre, qu'aux costes de Prouence & de Bretagne, & en Brest, Bourgogne, & Lyonnois, nous faisans la guerre, sousleuans nostre noblesse, & soulans leur haine & rage contre les François.

Aprésces deux raisons, qui sont mieux appliquees à ce point d'aider à faire la paix, la premiere raison, que le Pape allegue en saditte lettre pour persuader au Roy qu'il doit moyenner ceste paix, est que le Roy par mesme moyen feroit bien aux Estats mesmes, lesquels à la longue pourroient succomber. A quoy il est aucunement respondu par les deux articles precedens; & encores parce que les choses ne pourroient aller si bien pour les Espagnols, qu'ils ne demeurent fort extenuiez & debilitiez d'hommes & de finances, d'armes & de munitions par vne si longue guerre, quand bien elle leur auroit reconquesté tout ce qu'ils ont desja perdu; & au pis aller il vaut beaucoup mieux pour la France que lesdits Estats patissent & facent partir les Espagnols en la guerre qu'ils ont ensemble, que si les François patissoient apres auoir mis les autres en paix, se ruants sur eux les Espagnols avec toutes leurs forces & moyens, & avec tous leurs amis, alliez, & confederez. Il y a encore vne autre consideration sur ce point; c'est qu'il est plus que vray semblable que les Archiducs & les Espagnols qui offrent aux Estats des conditions trop auantageuses & exorbitantes, ne pensent à faire ceste paix pour la garder, ains seulement pour arrester le cours des victoires & de la prosperité du Comte Maurice & des siens, dont ils ne se peuvent desfendre, & pour les distraire de l'amitié de la Royné d'Angleterre, avec laquelle ils ne laissent de traiter secrettement, & de leurs autres amis & alliez, & pour les faire desarmer, & desunir, & retenir en leurs maisons & puis les surprendre & les assassiner, comme ils ont pour regle qu'il ne faut garder la foy aux heretiques & rebelles de Dieu & à leur Prince, & plusieurs autres telles maximes; de façon que la paix, si elle se faisoit non seulement n'empescheroit point la ruine de ses Estats, ains la cauferoit & l'aduanceroit.

La seconde raison, est que pendant que la guerre des Pays-bas durera sa Maiesté ne pourra estre sans traualier & sans despandre elle mesme. Mais la responce est, que toute ceste dispense & traual ne sont que roses & œillets, en comparaison d'auoir contre soy en guerre ouuerte toutes les forces du Roy d'Espagne, & de tous ses amis, alliez, & confederez, & encores les mauuais & desloyaux François, & de voir mettre son Royaume à feu & à sang; & pour vn peu de soin que la guerre de nos voisins nous apportera, nous n'en vaudrons que mieux, ne nous laissant aller trop à nos aises, & ne deuenans trop nonchalans.

La troisieme raison est, que le Roy obligeroit l'Archiduc & le feroit tout sien. Mais outre ce que i'ay dit cy-dessus, il se peut dire encore de plus que quand le Roy auroit fait en cela pour les Archiducs & pour le Roy d'Espagne tout le mieux qu'il auroit pû & scû, ils ne sont point gens qui se sentent iamais tenir pour obligez à sa Maiesté, au contraire ils estimeront auoir perdu par le moyen de sa Maiesté, tout ce qu'il leur manqueroit de la pleine & entiere obeysance & subiection que tout le Pays bas leur doit, & dont ils seroient iourissans, s'ils l'eussent scû garder en regnant bien iustement,

nement, & en traitant les peuples avec l'équité & moderation qu'il appartiendroit, & que tous Roys, Princes, & Seigneurs doivent garder, commandans & gouvernans leurs peuples non pour leur profit particulier, ains pour le bien, & repos, & felicité de leurs subiects, qui est la fin & le but que Dieu & la nature ont proposé à tous les Roys & Princes, & la vraye assurance aussi de leurs personnes, & de leur autorité, grandeur, reputation, & gloire immortelle. Et d'autre costé le Comte Maurice & tous les Estats penseroient auoir perdu par l'entremise du Roy leur liberté, & tous les avantages qu'ils pensent auoir maintenant, outre que si en fin de compte ils estoient trompez & surpris, comme ie tiens pour certain que les Archiducs & les Espagnols y tentent, ils penseroient que le Roy auroit esté cause & moyen de leur totale destruction & ruine : & ainsi de la paix que sa Maiesté auroit procurée, sa Maiesté n'en receuroit aucun gré desvns ny des autres, pour ne dire encores ce qui a esté dit cy dessus, qu'il pourroit auoir procuré la paix aux autres pour auoir la guerre luy mesme.

La quatriesme raison est, que le Roy faisant ladite paix avec les Archiducs & ses subiects, & par ce moyen obligeant à soy lesdits Archiducs & le Roy d'Espagne, il s'ensuivroit entr'eux mesmes vne paix seure, que toute la Chrestienté recognoistroit de luy, & ainsi il se feroit arbitre de toute la Chrestienté. Je ne repeteray point icy ce que j'ay desia respondu à ces pretendues obligations, ny de la paix des autres pourroit estre nostre guerre, mais diray seulement que si les choses alloient par raison, sa Maiesté devroit estre des-jà arbitre de la Chrestienté, comme il a l'avantage de la presence, de l'age, de l'experience, de la prudence, de la proüesse & valeur par dessus tous autres Roys de la Chrestienté. Mais les Espagnols sont si arrogans & superbes, & mesprisent si fort toutes les autres nations qu'ils tiennent dès à present leur Roy, qui n'est qu'un enfant, sans s'estre seulement effaié à rien de haut ny de grand, & qui a des affaires près & loin plus qu'il n'en peut démeller, pour arbitre & quasi Seigneur de toute la Chrestienté, & penseroient estre un sacrilege monstrueux qu'il y eust Prince au monde qui pensast seulement competer avec luy en quelque chose que ce fust, & en quelque sorte & maniere qu'on le voudist prendre. Mais le vray moyen que sa Maiesté a d'asseurer à soy l'arbitrage de la Chrestienté, qui luy appartient, semble estre plustost de laisser les emulateurs & ennemis es affaires & guerres où ils se trouvent, & luy s'en preserver & tenir loin, en gardant la paix, & ne faisant tort à pas un de ses voisins, & au reste reformer, amender, & melliorer son Royaume qui en a grand besoin, & soulageant & rendant meilleure, & en tant que faire se pourra, heureuse la condition de ses subiers, & les remettre par ce moyen en l'ancienne obeyssance, fidelité, & bien vueilance que les François souloient auoir enuers leurs Roys, & assurer la succession à ses descendans; & comme en guerre il a surpassé tous ses predecesseurs, aussi maintenant par toutes belles & bonnes actions de paix, se faire benir de Dieu & du monde dedans & dehors son Royaume, se rendre glorieux & immortel à la posterité & à tous les siècles à venir. Vous voyez que par le moyen d'un peu de repos, tel que la France a eu depuis, que nos guerres civiles & étrangères ont

cessé ou iertemēt, les plus hautains & glorieux Princes du monde recherchēt desia sa M. de les mettre en paix avec leurs subiects, & encores avec le Turc, (car il nous a esté parlé aussi de ceste paix du Turc à Mōsieur l'Ambassadeur & à moy par quelqu'un de leurs seruiteurs. Que seroit ce si sa M. auoit fait ce que ie viens de dire, reformant & meliorant, soulageant & contentant les trois Estats de son Royaume, il seroit bien alors arbitre de la Chrestienté à bon escient. Et à la verité, Monsieur, c'est ceste gloire de repurger & restaurer le Royaume qui reste au Roy à acquerir, sans laquelle ie crains que tous les travaux qu'il a pris iusques icy és guerres passées & depuis la paix, ne fussent point pour asseurer du tout bien le repos de la France, & l'autorité de sa M. & celle de ses enfans à l'aduenir; mais ceste obligation qu'il acquerra sur tous ses subiects, & la gratitude, amour, honneur & gloire qui luy en reuiendront; le mettront luy & ses successeurs au dessus de toutes choses, & les asseureront eux, & la tranquillité de leur Royaume pour plusieurs siècles.

La cinquieme raison de sa Sainteté est, qu'au moyen de ladite paix & bonne intelligence on pourroit aduiser & arrester d'un commun accord de mettre un Roy Catholique en Angleterre, qui ne fust suspect ny à l'une ny à l'autre Couronne. Cela seroit grandement à desirer, comme à autre propos ie vous ay escrit n'y a pas long temps, si les choses se pouuoient accorder & executer de bonne foy, pour l'honneur & gloire de Dieu, pour la restauration de la Religion Catholique en Angleterre, pour le bien & repos des Anglois, & pour la commune seureté & satisfaction de tous les voisins de ceste Isle là. Et comme ie m'asseure que le Roy du viuant de la Roynie d'Angleterre ne voudroit luy faire aucun desplaisir, pour en auoir receu secours & aide en sa necessité, aussi seroit-ce chose tres-digne de la prouoyance de sa M. que des'apprester à l'eueneement qui d'heure en heure peut arriuer du deceds de ladite Roynie, pour ayder à y mettre & establir un Roy Catholique, qui ne soit pour fomenter en France ny l'heresie, ny aucune ligue contre sa Maiesté, ou contre ses descendans. A quoy sa Maiesté pourra d'autant mieux pouruoir à son aduantage, quand les ennemis occupez ailleurs auront moins de moyen de l'en destourner.

Les considerations que sa Sainteté represente au Roy sur la fin de sa lettre cōme les diuers accidents de ce monde, & les tragedies qui se sont iouées de nostre temps en son Royaume, & qu'il n'est point immortel, & qu'il se passera long temps auant que Mōseigneur le Dauphin se puisse passer de tuteur: & que seroit ce si le Roy luy laissoit en un aage si tendre une guerre sur les bras; & combien est diminuée la fidelité, la reuerence, & l'amour des subiects enuers les Princes; & si sa Maiesté a treuvé tāt de fidelité en personnes qu'il auoit si fort obligées, que pourroit-on faire à un successeur enfant; & en fin que sa Maiesté doit considerer combien il est tenu à Dieu pour infinies graces & prosperitez qu'il a receües de sa bonté diuine. Toutes les dites considerations, dis ie, que le Pape represente au Roy sont bonnes & saintes, & comme ie croy dictées à sa Sainteté par le saint Esprit, & seroit fort à propos que sa Maiesté se les representast une fois par chacun iour, non seulement pour garder & asseurer la paix avec le Roy d'Espagne & avec les

Archiducs, à quoy la Sainteté apporte les susdites considerations, comme illes viennent fort à propos, mais aussi pour en mieux regner, & apporter à l'Estat le melioremment & satisfaction que j'ay touché cy dessus, ostant les abus & la corruption dont sont infectées toutes les parties du Royaume, faisant refleurir la religion Catholique, & l'ordre Ecclesiastique, la pieté & la deuotion, la iustice, l'observation des loix & ordonnances, la concorde qui mette fin à toutes partialitez, la moderation des gouverneurs, l'integrité & doctrine des Magistrats & des Officiers, la bonne foy, probité, & preu-homie des particuliers, l'ordre & la police, la discipline militaire, les bonnes lettres & sciences, les academies pour l'adresse & exercice des ieunes gentils-hommes, le labeur & industrie des arts & mestiers, le trafic & commerce, le labourage des champs, & l'abondance, & toutes autres telles choses bones & louables, & dignes de la pouruoyance & sollicitude d'un grand Roy, & par ce moyen affermir de plus en plus les volontez des bons suiets, egagner celles des mauuais, oster toute esperance aux mauuais voisins de es suborner, & asseurer encore mieux son autorité, sa succession, & la tranquillité, repos, & bon-heur de la France. Ce que ie redis si souuent, & possible trop, pource que cela me semble possible si necessaire, qu'il ne pourroit iamais estre dit assez, & que tout ce que le Roy & son Conseil pourroient faire, dire, & penser de bon, & de solide & perdurable, consiste en cela, & que tout le reste que vous faites & ferez cy après ne sont & ne seront que de petits remedes de peu defficace, & de peu de duree, comme apocenes & gargarismes pour aucunement refrigerer & entretenir la France malade, mais non pour la guarir entierement, & moins pour l'asseurer longuement. Ioint que ie voy que si ce Roy ayant l'aage, l'experience, & la prudence & autorité qu'il a, pour ne dire l'interest de ses enfans, ne remet la France en sa senté premiere, il n'y aura cy après Roy qui le puisse faire, ny qui y soit à temps, tant le mal presse & requiert des remedes prompts & presens. Voila, Monsieur, à quoy outre l'observation de la paix, il me semble qu'il faut referer les susdites considerations, & ce que j'estime aussi qu'il faut faire touchant les choses que le Pape vous a proposees, qui est en somme destromper la Sainteté en ce qu'il croit à tort de nous, garder de nostre costé sincerement & de bonne foy la paix faite & iuree avec le Roy d'Espagne & avec les Archiducs, pouruen qu'ils la gardent aussi de leur costé, comme ils s'y offret par la bouche & par la main de la Sainteté, estreindre encorces ceste paix par toutes les sortes des liens honorables & profitables, sans toutesfois s'y fier plus que de raison, ny en estre moins vigilans & pouruoyans; mais au reste laisser le Roy d'Espagne & les Archiducs comme ils sont avec les autres, non pour aucune mauuaise affection ny intention, mais pour nostre propre conseruation, & pour ne donner le moyen à qui en a monstté la volonté de tourner toutes ses forces contre la France; & pendant que les autres feront la guerre entr'eux, employer la paix & le repos que Dieu nous a donné à bien faire, & à redresser d'as le Roy, aume les bonnes choses, & en extirper les mauuaises, & ramener en France le bon-heur & le bon temps passé, tant pour le souverain que pour les subiects.

Il reste pour fin de la presente, que ie vous prie, cōme ie fais bien humblement, qu'il vous plaise m'excuser de ce que ie pourrois y auoir trop dit, repeté, & inculqué contre le goust du Roy & le vostre, & vous souuenant que ie ne m'y suis point ingeré de moy-mesme, prendre le tout en bonne part, comme de celuy qui n'a excédé que par vne surabondance de zele au seruice, reputation, & autorité du Roy, & à l'assurance de sa posterité & succession, & au bien, repos, & felicité de son Royaume, A tant, &c. Monsieur, &c. De Rome, ce 10. Feurier, 1603.

## A MONSIEVR DE VILLEROY.

### CCCXXVIII.

**M**ONSIEVR, Apres vous auoir escrit sur l'aduis que me demandastes par vostre lettre du 16. Ianuier, ne me trouuant autre lettre à laquelle i'eusse à respondre, i'ay estimé deuoir employer le temps qui me restoit à escrire de deux miennes affaires particulieres: l'une de ma pension, de laquelle i'escris directement au Roy, ainsi qu'il vous plaira voir; l'autre, de mon Euesché de Bayeux, duquel sera la presente lettre. Depuis doncques qu'il pleust au Roy me donner ledit Euesché, & à vous me le procurer, il m'a esté parlé & escrit plusieurs fois d'en prendre recompense; ce que i'ay tousiours reietté fort loing, pour certaines considerations que i'auois. Mais y ayant mieux pensé depuis peu de tēps, ie vous confesse que i'y enclinerois volontiers si vous le trouuiez bon, s'il plaisoit au Roy de me le permettre pour les raisons que ie mettray cy apres, ayant voulu, auant que prester l'oreille à personne, commencer par là où ie deuois, à sçauoir par vous en escrire & en sçauoir vostre aduis, & par mesme moyen la volonté, & l'intention de sa Maiesté. Les Eueschez, Monsieur, comme vous sçauiez, sont les plus grandes & les plus importantes charges de l'Eglise, qui requierent la presence & residence des Prelats pour estre bien administrees, & mesme en vntēps si desreglé & si desordonné cōme est cestuy-cy, encore y a-t'il bien à faire à s'en bien acquiter quand l'Euesque est present, pour soigneux, diligent, & zelé qu'il soit. Or est-il que ie ne me voy point en termes de pouuoir aller resider à Bayeux: premierement pour ce que possible le Roy n'estimeroit pas que ce fust de son seruice que ie m'e allasse de Rome, ou pour le lōg tēps que i'y ay demeuré, & pour la dignité à laquelle il m'y a eleué, ie luy puis estre moins inutile qu'ailleurs. Secondement, pour ce que en l'aage de 66. ans que i'ay, partir d'un air plus chaud où ie me suis accoustumé depuis 24. ans, pour m'en aller demeurer au fin fonds de Normandie, en un air beaucoup plus froid & humide, pourroit m'abreger ce peu de vie qui me reste, & qui doit estre employé au seruice de Dieu & de sa Maiesté. Ne me voyant donc point pour ceste heure l'opportunité d'aller resider en mon Euesché,

hy gueres d'apparence pour l'aduenir, il me semble que de le retenir gueres plus long temps en ceste sorte, il iroit de ma conscience & de ma reputatiō, qui sont les deux choses que nous devons auoir en ce monde les plus cheres, & qui doiuent auoir le plus de pouuoir à regir nos actions. En apres, le profit & l'vtilité se rancontent en ce cas avec le denoir de ma cōscience, & avec l'honneur & reputation. Car il m'en a esté offert quatre mille escus d'or en or de pension par chacun an, payable & cautionnee à Rome, qui est le double de ce que i'en reçois par an l'vn porrant l'autre. Auquel propos ie vous prie ne trouuer impertinent que ie descende au particulier vn peu plus que la decence ne semble competer. Je viens de voir expressément trois comptes pour autant d'annees de Monsieur le President Ruellé, auquel ie me sens infiniment obligé pour le bien & honneur qu'il luy plaist me faire pour la peine & soin qu'il prend de mes affaires. Par le premier compte, qui est de l'annee 1600. ie voy qu'il n'y eust rien pour m'enuoyer à Rome; ains qu'il me fallut employer vne partie de ma pension pour payer la Regale. Au second compte, qui est de l'annee 1601. ie trouue qu'il ne m'a esté enuoyé en toute la seconde annee que mille 822. escus 23. sols. Au 3. compte de l'annee 1602. ie trouue qu'il m'a esté enuoyé en toute la 3. annee 2. mille 300. escus. De sorte que laissant à part la premiere annee en laquelle ie ne receus rien, tout ce qui a esté baillé à Paris pour m'enuoyer es 2. dernieres annees, ne monte qu'à 3. mille 4. cens 30. escus, à soixante sols piece; lesquels auant qu'arriuer de Paris à Rome ont receu vne grande diminution, pour les rémises & pour les changes, qui encor nous ont esté rechauffez au double depuis le dernier Edict des monnoyes. Par ainsi vous voyez que les 2. dernieres annees ne m'ont point valu à beaucoup près de ce que l'on m'offre de pension pour vne annee, & que ie gagnerois beaucoup au change. Je puis encor adiouster que ie me deliurerois d'vne grande fascherie que me donnent les procez, & encor plus l'indiscrerion & malice des gens du pays, & la resistance que font aux choses bonnes & saintes ceux qui deuroient estre les premiers à les promouuoir & aduancer. De facon que toutes les sortes de bien me conuient à present à faire ce à quoy ie n'ay voulu entendre cy deuant; à sçauoir la conscience avec l'honneur & reputation; le profit & vtilité, & le plaisir que ie receurois d'estre deliuré de ladite fascherie, outre que le repos de la conscience, & la commodité plus grande m'apparteroit aussi du plaisir & contentement. Par ainsi s'il plaist au Roy me permettre d'en prendre recompense, & à vous de le moyenner enuers sa Maiesté, il me semblera que sa Maiesté m'aura donné vne autrefois ledit Euesché, & que vous me l'aurez procuré de nouveau. Et pource qu'outre que le Roy est maistre, & qu'en cela il ne se peut rien faire sans sa permission, ie desire que sa Maiesté aye toute la satisfaction possible non seulement pour son seruice, & pour le bien de ses affaires, mais aussi pour son goust & plaisir. Je vous specifieray ceux qui m'en ont fait parler & escrire, afin qu'il plaise à sa M. choisir celuy qui luy plaira le plus, & me commander avec qui i'auray à m'en accorder. Il y a deux ans & plus que M. de Beueron gendre de feu M. le Marechal de Maignon m'en fit escrire, m'offrant lesdits 4. mille escus de pension par an, portez & cautionnez à Rome. Quasi en mesme temps

L L L L 1 3

Monsieur l'Euesque d'Auranches m'escriuit, & fit escrire pour vn sien frere qu'on appelle monsieur de saint Taurin, Conseiller du Roy en la Cour de Parlement de Normandie, & Doyen en l'Eglise metropolitaine de Rouen, m'offrant vne Abbaye & vn Prieuré de quatre mille cens de reueu, toutes choses payees. Depuis peu de temps il m'a esté parlé pour le sieur de Moutiers fils de monsieur de Maintenon, avec offre de benefices & de pension, selon qu'il seroit trouué raisonnable. Quant au premier, ie ne sçay point l'aage ny les qualitez du fils de monsieur de Beueron, & ne voudrois engager ma conscience ny ma reputation, en resignant à vn ieune gentil-homme qui n'eut point l'aage requis, & moins à quelque miserable Custodinos, que ie luy gardast en confidence. Quant au second, la qualité de Conseiller en vne Cour de Parlement, & Doyen en vne Eglise metropolitaine me plairoit bien, outre que son frere & luy descendent de personnes qui ont seruî les Rois & le public, & que leur pere fut Procureur general en ladite Cour de Parlement. Quant au troisieme, on m'a dit grand bien dudit sieur de Moutiers, & qu'il a esté esleué en grande partie par feu monsieur du Mans, qui a esté vn des meilleurs Euesques de France, & i'ay en particulier estime Messieurs les Ramboüillers, pour auoir esté & estre gens d'honneur & de bon entendement, & bons & fidelles seruiteurs de la Couronne de nos Rois. Voila ceux qui m'en ont fait parler iusques icy. Et ie m'assure que si on sçauoit que i'eusse ceste volonté, qu'ils s'en offriroient encore d'autres, & mesmes d'autant que ie desire prendre la recompense & pension payable & cautionnee à Rome ma vie durant, plustost qu'en benefices. Ce que chacun aymera mieux attendu mon aage, & qu'apres moy on aura les benefices qu'on auroit à me bailler par la recompense, & ensemble l'Euesché toute quitte. Ie ne vous ay parlé iusques icy que de la satisfaction du Roy, mais ie vous dis à present qu'apres celle de sa Maïesté ie desire plus la vostre que d'homme du monde, comme i'y suis tres-obligé. Et si vous auiez quelque amy à qui vous desirassiez ceste piece, & qui eust moyen d'asseurer la pension à Rome, ie la luy resignerois plus volontiers qu'à nul autre. Atant, ie mettray fin à la presente, apres vous auoir supplié de me vouloir ayder & fauoriser en ce que dessus; premierement de vostre aduis & conseil entre vous & moy, & puis de vostre intercession aupres du Roy, & croire que ce ne sera point vn petit accessoire aux obligations que i'ay desia pour vous rendre tout le seruice qui me sera possible. De Rome ce 19.iour de Feurier 1603.

## A MONSIEVR DE VILLEROY.

CCCXXIX.

**M**ONSIEVR, L'ordinaire de Lyon qui arriua en ceste ville le Vendredy douzieme de ce mois, ne m'a point apporté de vos lettres: c'est à cause que les nostres du 30. de Decembre, auxquelles vous eussiez respondu, se perdirent en mer entre Larice & Genes, avec la courrier qui les por-

toit. Mais cōme vous aurez eu vn duplicata de celles dudit 30. Décembre, avec les suivantes du 13. Ianvier, aussi esperay-ie que nous aurons tout à vn coup response de vous aux vnes & aux autres. Cependant ie vous remercie bien humblement des recommandations que i'ay trouuees de vostre main en celle que vous avez escrete à monsieur l'Ambassadeur, en laquelle i'ay veu, entre autres choses, ce que vous escriuez touchât les differens suruenus entre la ville & Citadelle de Metz, dont ie suis tres-marry, & en attends l'issuë avec quelque soucy; esperant neantmoins que Dieu en tirera quelque chose de bon pour le seruice du Roy, & pour la seureté de sa Couronne: & mesmes que sa Maiesté, suivant l'experience qu'il a des choses, & des personnes, & de ce temps, ne permettra que le gouuernement & de la citadelle & de la ville ensemble demeure à vne mesme personne. Il n'y a pas long temps que ie lisois en vn autheur fort ancien, que les anciens Rois de Perse ne donnoient iamais à vne mesme personne le gouuernement d'une ville grande & notable, avec celuy de la forteresse ensemble. Et moins permettoient ils que les gouuerneurs des Prouinces missent ceux des villes particulieres ny des fortresses, ains c'estoient les Rois qui mettoient eux-mesmes non seulement les gouuerneurs des Prouinces, mais aussi ceux des villes, & encores les capitaines des fortresses, de sorte que tous les trois dépendoient immediatemet du Roy, sans tenir rien les vns des autres, ny s'entre deuoir autre chose que tout respect honneste, & toute concorde & bonne intelligence pour le seruice du Prince, & pour le bien cōmun. Dont s'en ensuiuoit, entre autres biens, que si le gouuerneur de la Prouince pour estre auare, ambitieux, ou insolent, ou pour estre trop apparenté & puissant, ou pour quelque despit & mescontentement vouloit innouer quelque chose en son gouuernement au preiudice du seruice du Roy, & de la seureté & tranquillité publique, il ne pouuoit, trouuant empeschement & resistance en son propre gouuernement, & tout aupres de luy en quelque part qu'il fust. Aussi ne pouuoit-il pretendre que le capitaine de la forteresse luy fust tenu de sa capitainerie, & en deust respondre à lui, & moins se dōner licence del'assiēger, & de faire soufleuer & armer le peuple, & susciter vn trouble pour oster ledit capitaine, & le ranger à toutes ses volonteiz & appetits. Ceste sagepouuoyance dont les anciens Rois de Perse vsoient il y a plus de deux mille ans, a esté tousiours depuis suiuite, & l'est encores auourd'huy en tous les Royaumes & Estats bien administrez. Et nostre Roy s'est bien trouué de l'auoir ainsi pratiqué au fait de Bourg en Bresse. Mais le feu Roy dōnant le gouuernement des Prouinces les plus importantes à des personnes qu'il aimoit, leur permettoit de mettre dans les villes & dans les fortresses tels gouuerneurs particuliers & tels capitaines qu'il leur plaisoit; dōt il se trouua mal le premier, & son Royaume en a pensé estre ruiné, & l'eust esté du tout sans la valeur & bō-heur de ce Roy qui l'a releué. Et la peine en laquelle sa Maiesté & vous tous, vous trouuez auourd'huy, est encores vn reste de ceste trop grande facilité en cela du Roy deffunct, que Dieu absoluë, & duquel ie n'entends parler qu'avec tout honneur & reuerence. Mettāt aussi fin à ce propos, auquel ie me suis laissé aller ie ne sçay commēt, cōme il m'aduient trop souvent que le zele du seruice du Roy, & du bien public me trainy



sparte plus auant, que la decence ne comporte, & que le besoin ne requiert; mais comme c'est entre nous deux, la faute en est moindre. Monsieur le Cardinal Bandini a vn sien nepueu fils de sa sœur, page de la Royne, de la maison de Strozzi, appellé Ottauio Strozzi. Et pource que ledit Ottauio sera tantost d'aage pour estre mis hors de page, il desireroit qu'alors son nepueu fust retenu au seruice de ladite Dame Reine en quelque autre chose, & m'a requis d'en escrire. Je vous prie vous interposer autant qu'il vous semblera, à ce que ledit Ottauio soit traité au mieux que faire se pourra, tant pour le respect de la maison dont il est, & dudit seigneur Cardinal Bandini son oncle, que pour quelque reputatiō nostre en ceste Cour, & en Toscane & ailleurs. Au demeurant, j'ay dressé vne nouuelle escriture sur le fait de la dispense, où j'ay compris briefuement ce que i'auois deduit plus amplement es precedentes, & y ay adiousté quelque chose dont nous sommes appercus depuis. Aussi ay-ie respondu à des obiections nouuelles qu'on nous auoit faites. Je vous en enuoye la premiere partie, en laquelle sont contenues les causes pourquoy le Pape doit donner la dispense, & est expedient & necessaire qu'il l'octroye. La seconde contient la response aux obiections. J'ay parlé au Procureur general de la Congregation du Mont-Cassin de ce que vous m'avez escrit touchant S. Honorat de Lerins. Il m'a respondu conformément à vn memoire par escrit qu'il m'enuoya depuis, dont le sommaire est; Que lors qu'il s'est trouué des Religieux François capables de gouverner, ils les ont eus non seulement Abbez de ladite Abbaye, mais aussi Generaux de toute la Congregation, comme fut frere Cesar de Grasse, & autres; & au dernier Chapitre leur qui se tint à Padouë y fut esleu Prieur de ladite Abbaye frere Cesar de S. Paul, & qui l'est à present; Que les Religieux Nissards & Sauiyards, dont il est parlé audit memoire, ont tous esté receus & vestus par des Abbez François, & neantmoins que si le Roy ne veut qu'ils y demeurent, les Superieurs les transfereront ailleurs; Que depuis trois ans ont esté vestus quatre Religieux François, & pour l'aduenir n'en sera vestu d'autres que François naturels; Que quelques biens dépendans de ladite Abbaye, qui ont esté baillez à ferme à des estrangers, sont tūtez en l'Estat & territoire de Genes, où les Prouëaux n'en eussent peu recueillir le fruit sans trop grande despense & peine; & quand il faudra bailler à ferme ceux qui sont en Prouence, l'on y preferera tousiours les subiets du Roy & gens du pays mesmes; Que sa Maiesté se peut asseurer que la nation Françoisë a tousiours esté & sera estimée & honorée par les Peres de ceste Congregation, & qu'ils enuoyeront tousiours pour superieurs en ladite Abbaye des personnes confidentes à sa Maiesté. A tant, &c. Monsieur, &c. De Rome, ce 14. Feurier 1603.

---

A MONSIEVR DE VILLE ROY.

CCCXXX.

MONSIEVR, Par la lettre qu'il vous plut m'escire le 18. Feurier, j'ay  
 Meur response aux vniennes du 30. Decembre, xxviii. & quatorziel-  
 me

me Ianuier. Et quant à ce que vous m'avez escrit des choses d'Angleterre & Roy d'Escoffe, & des beneficiers de Bresse, Bugey, Valromay & Gex, ie n'ay rien à vous repliquer estant de vostre aduis en tout & par tout. Aussi m'accorday-je avec vous, qu'apres le refus que l'on a fait tout fraischement des pensions d'Espagne, il faut que nous allions plus reservez à offrir les nostres; mais i'ay à vous dire là dessus (puis que vous en voulez sçauoir mon aduis) premieremēt que nos pensions ne seront trouuees si mauuaises ny du Pape, ny du Cardinal Aldobrandin, ny de la Cour Romaine, pource que (comme i'ay accoustumé de dire quād il vient à propos) les interests du Roy & de la Couronne de Frâce sont cōioints avec ceux du saint Siege, les François ne rendans point à opprimer la liberté Ecclesiastique, ny à asservir le saint Siege (comme font les Espagnols) ains à maintenir & conseruer l'un & l'autre en son entier, & à faire qu'il y ait tousiours vn bon Pape, homme de bien & d'entendemēt, qui ne se laisse tromper par les artifices des malins, & se rende pere commun à tous, & tiennent la balance esgale, sans procurer mal aux vns à l'appetit & suggestion des autres. De sorte que tout Cardinal homme de bien, bon Ecclesiastique, & genereux, se peut accoster de la France sans faire bresche à sa preud'homie, à sa conscience, ny à sa preffession, ny à sa generosité, honneur & reputation. Et si vous auiez par delà le soing de ceste Cour que la grandeur temporelle du Roy requiert, sans mettre en compte la deuotion, ceste consideration de la liberté Ecclesiastique, & de l'autorité du saint Siege, & de la iustice égale, qui est le vray & solide fondement de toutes les parties & societéz durables, vous acquerroit tous les meilleurs & les plus magnanimes Cardinaux de ceste Cour; tellement que vous feriez plus avec vn quart de ce que les Espagnols y dependent, qu'ils ne sçauoient faire en quadruplant encore la dépense qu'ils y font. Et se trouueroit bien souuent en fin de compte que les Espagnols auroient payé ceux qui vous auroient seruy en bonne conscience, en faisant leur deuoir enuers le saint Siege & l'Eglise, & enuers toute la Chrestienté. Secondement les Espagnols au fait desdites pensions se sont adressez à trop de gens à la fois, sans faire choix de ceux de qui ils pouoient auoir quelque particuliere occasion de bien esperer, ains y ont compris de ceux là mesmes qu'ils auoient autresfois offensez, & qu'ils n'aimoient nullemēt, & desquels ils estoient encores moins aymez, & encore sans faire difference des merites les traitans tous également, & sans attendre l'occasion, qui est celle qui donne grace & facilité à la pluspart des actions, & en tout cecy ont procedé à la descouuerte, comme s'ils eussent crié **A QVISE VBT VENDRE.** Là où nous, pour ne faire les mesmes fautes, pourrions donner ores à vn, ores à vn autre, & aux vns plus, aux autres moins, selon la proportion de leurs qualitez & merites, & tantost sur vne occasion, tantost sur vne autre, & si secrettement, qu'il ne se sçauoit de quelque temps, & à ceux que nous sçaurions d'ailleurs auoir plus d'inclination vers nous que vers d'autres. Mais il faudroit auoir les moyens prests pour y commencer, & continuer selon que les occasions se presenteroient, & que l'on verroit les choses & les personnes y estre disposees. Je seruiray volontiers Madame de Longueuille, tant pource que son desir est pie & saint, que pource que

M M M M m

ie dois service à tous ceux & celles qui ont l'honneur d'appartenir au Roy; & que vostre recommandation a la mesme puissance sur moy que ie puis auoir moy-mesme.

Je croy que le Roy feroit bien & vtilement de persister en ce qu'il a accordé aux Peres de la Congregation du Mont-Cassin, ains au Pape qui en pria & repria tant sa Maiesté, & en confirmation de l'Abbé qui a esté esleu. Pendant que ceste pauvre Abbaye a esté es mains de gens d'espee, & en cōfidence contre les Canons, & contre toute la raison, personne ne s'en est plaint, & n'en a eu compassion. Et maintenāt qu'elle est reduite en l'estat qu'il appartient, on ne crie, sous pretexte quel'Abbé, qui n'estoit que pour trois ans, n'est point nay en France, encore qu'il aye le cœur François, & qu'après luy en viendra vn nay en France, s'il s'en trouue de capable.

Tout aussi tost que i'eus acheué de lire vostre lettre du 7. Feurier, i'envoyay vers le Pere general de l'Ordre de S. Dominique, en attendant que ieluy peusse parler moy-mesme, comme ie veux faire, sur le fait du Prieuré des Religieuses de cét ordre les Mōrargis, & appris que sur autre aduis qu'il auoit eu, il auoit ia approuué la cassation que le Prouincial auoit faite de l'ellection de la Religieuse de la maison de Courtenay: ce qui est bon pour sœur Anne de Sallart, l'ellection de laquelle neantmoins il n'auoit point confirmée, pource qu'elle n'auoit eu nombre suffisant de voix, qui doit passer de deux la moitié du nombre des Religieuses de l'ellection, & pour ce il auoit ordonné que la vieille Prieure continuast le regime & administration de sa charge. Et pour le regard del'aduenir, m'a fait dire qu'il tiendra les choses en cét estat iusques à ce qu'il soit par delà, où il se veut acheminer à ce Printemps, & estant là, fera que les Religieuses esliront & accepteront pour leur Prieure ladite Sallart, pour obeyr au Roy, & contenter ceux à qui elle appartient, & conformément à ses bonnes & louables qualitez.

Le sieur de Seaux fils de Monsieur de Géure est tres-bien morigené, & fort studieux & sage, autant ou plus qu'aucun que i'aye veu de son aage. Et en tant que i'en puis iuger, il a inclination, & sera propre à la profession à laquelle Monsieur de Géure son pere l'a destiné, & le Roy en sera bien seruy, & le public, & vous, Monsieur, receurez tout contentement del'auoir dressé & instruit. Et comme ietiens à honneur que vous m'en ayez demandé mon aduis, aussi vous poussez vous asseurer que ie vous l'ay mis en ce peu de mots, à la verité, & plustost au dessous qu'au dessus de la bonne opinion que i'ay de luy. I'ay esté requis de vous rasraischir la recommandation que ie vous fis par ma lettre du 23. d'Aoult dernier du Comte de la Saponara du Royaume de Naples, à ce que les deux cens trente-cinq ducats, & deux bracelets de diamants, que les gardes du pont de Beauuoisin luy osterent au mois de luin precedent comme il passoit audit pont de Beauuoisin retournant d'Espagne, luy fussent rendus. Je croy qu'oultre que telle restitution est de raison & iustice, elle nous tourneroit à honneur & reputation, comme aussi le contraire feroit mal penser & mal parler de nous parmy les nations estrangeres. A tant, &c. Monsieur, &c. De Rome, ce 10. Mars 1603.

## A MONSIEVR DE VILLEROY.

CCCXXXI.

**M**ONSIEVR, L'ordinaire n'arrîua que hier, mais vostre depeſche faite à Monceaux le 24. de Feurier qu'il nous devoit apporter, nous fut renduë dès le 14. de cemois par vn extraordinaire, auquel paſſant par Lyon elle fut baillee par l'acquet commis du ſieur de la Varenne. Le vous remercie bien-humblement de ce que i'ay trouué tout au commencement qu'il vous a pleu lire au Roy ma lettre du 27. Ianuier, quoy qu'elle fuſt plus hardie que la façon de ce temps ne comporte, & ne puis aſſez louer la bonté & benignité de ſa Maieſté qui a pris le tout en bonne part, dont ie me ſens autant obligé enuers elle, comme de tant d'autres biens & honneurs qu'il luy a pleu me faire par deſſus mon merite, & me contentant pour ceſte heure de vous en dire ce peu, ie ne m'arreſteray plus ſur ce propos.

Par la longue lettre que ie vous eſcriuis le 10. iour de Feurier, i'anticipay de vous eſcrire mon aduis ſur la propoſition du Pape touchant le mariage de Monſeigneur le Dauphin avec l'Infante d'Eſpagne, auquel aduis ie ne change rien à preſent, me ſemblant de m'eſtre aſſez deſſié des Eſpagnols en cét endroit, côme ie fais quaſien tous autres. Bien recognois ie que ie manquay en vne choſe, à ſçauoir en n'ayant point aſſez conſideré la perte que la conſeſſion de ce mariage pourroit apporter au Roy de la bonne affection de ceux qui ſont contraires au Roy d'Eſpagne, & qui ſont auourd'huy vn corps fort puiſſant, dont i'ay eſté mieux inſtruit par la depeſche du Roy à monſieur l'Ambaſſadeur faite audit Monceaux le 24. iour de Feurier, où ce point eſt tres-prudemment & amplement repreſenté. Par ainſi ie reuoque ces mots de m'a lettre du 10. iour de Feurier, *QUE LE ROY N'Y SCAVROIT RIEN PERDRE POURVEU QU'IL NE SE FIAST POINT D'EUX*; & ſuis à preſent d'aduis qu'il y faut mieux & mieux penſer auant que de s'engager de ſi loing à vn contract duquel l'exécution ne peut enſuiure de quatorze ou quinze ans, quand bien on auroit bonne intention; & d'ailleurs peut eſtre empesché par infinies occurrenſe & pretextes qu'un ſi long temps a accouſtumé de porter. Qui eſt tout ce que pour ceſte fois vous aurés de moy, qui pour fin de la preſente me recommande bien humblement à votre bonne grace. A tant, &c. Monſieur, &c. De Rome, ce 24. de Mars 1603.

MMMMm 2

## A M O N S I E V R D E V I L L E R O Y .

C C C X X X I I .

**M** O N S I E V R , Ceste-cy sera seulement pour retenir la coustume que i'ay de vous escrire par tous les ordinaires, moy n'ayant aucune responce à vous faire, & ne deuant entreprendre sur l'office de Monsieur l'Ambassadeur qui le fait tres-diligemment. Les superieurs de la Congregation du Mont-cassin m'ont de nouveau confirmé auoir esleu Prieur de l'Abbaye de S. Honorat en l'Isle de Lerins vn Religieux François Prouençal appellé Dom Cefare de S. Paul, frere de monsieur de Barceillon Conseiller du Roy en la Cour de Parlement d'Aix, & qu'ils tiendront tousiours particulier compte des François à toutes les fois qu'il s'en trouuera de capables pour gouverner. Le General de l'ordre de S. Dominique s'en alla à Naples auant Pasques, & n'est encores de retour; qui est cause que ie ne luy ay peu parler du Prieur de cét ordre qui est prés Montargis pour sœur Anne Sallart. Quand il sera de retour, ie ne faudray de luy parler. A tant, &c. Monsieur, &c. De Rome, ce 8. d'Auril, 1603.

A V R O Y .

C C C X X X I I I .

**S I R E ,**

I'obeyray tres-volontiers au commandement qu'il a pleu à vostre M. me faire par sa lettre escrite à Mets le 22. de Mars, & me ioin dray à monsieur de Bethune à la poursuite de l'Indult que vostre M. desire du Pape pour la nomination des Eueschez, Abbayes & Prieures electifs du pays de vostre protection de Mets, Toul, & Verdun. Louant Dieu cependant du bon succez qu'il a donné au voyage que vostre Maiesté vient de faire audit pays, & le priant de vous continuer semblable prosperité en tous autres endroits, & en tous vos affaires & actions. Quant à l'ordre que vostre M. veut donner, que la pension qu'il lui a pleu m'ordonner soit bien assignee & bien payee, vostre Maiesté m'en fera grande grace, me deliurant non seulement de necessité, maisaussi de la contraincte de ne vous en plus importuner, n'y ayant chose en ce monde que ie face plus contre mon cœur que de demander. A tant ie baise tres-humblement les mains à vostre Maiesté, & prie Dieu, &c. S I R E , &c. De Rome, ce 21. Auril, 1603.

## A MONSIEVR DE VILLEROY.

CCCXXXIV.

**M**ONSIEVR, La depesche que vous me fistes à Mets le 22. Mars, nous fut renduë le 15. de ce mois, par laquelle nous auons eu response aux nostres des 10. & 24. Feurier. Ie me sens grandement obligé au Roy & à vous de ce que les miennes ont esté prises en bonne part, & pareillement de ce qu'il vous a pleu me declarer ce que vous estimez qui se puisse faire de mieux en certaines choses y contenuës, car comme i'escris mon aduis rondement & librement quand il m'est demandé, aussi suis-ietres aise quand on me monstre mieux, & suis si peu amy de mes opinions & si esloigné de toute opiniafreté, que non seulement ie me range volontiers à ce que i'apprens de meilleur, mais aussi me soumetts facilement au iugement des plus aduisez, lors mesme que ie ne comprends point bien leurs raisons, & qu'il me sembleroit autrement. Vous aurez veu par ma lettre du 24. Mars comme de moy-mesme ie m'estois desia départy de l'opinion que i'auois lors que i'escriuis celle du 10. Feurier, touchant le mariage de Monseigneur le Dauphin avec l'Infante d'Espagne: & à present pour le regard de la paix à faire ou à procurer es Pays-bas, ie m'en remets à ce que vous en iugerez estre le meilleur, priant Dieu qu'il face prosperer au Roy tout ce que sa Maiesté fera ou laissera d'y faire.

Quant à l'Angleterre, si ce qu'on escrit de delà est vray, que la Roynne n'a pas plustost rendu l'ame que le Roy d'Escoce y a esté receu paisiblement, le different en est vuidé, & les gens de ceste isle là ont bien monstre qu'ils scauoient faire leurs affaires entr'eux tost & seurement, & que ceux de dehors se sont fort mescontez en leurs desseins & esperances, & trouneront que les Espagnols, qui sont les plus marris de cét euenement, seront les premiers à s'en coniouir avec le Roy d'Escoce; & tascher de le mettre de leur costé si vous n'estes fort pouruoians & diligens à les preuenir. Ie louë Dieu du bon succez qu'avez eu en vostre voyage de Mets, & ne faudray de seruir le Roy au fait de l'Indult que sa Maiesté desire pour ce pays là, pour lequel obtenir ie preuoy que nous aurons beaucoup à faire: mais c'est es choses difficiles que la vertu & l'industrie, & encores l'affection se monstre. La poursuite que nous faisons de la dispense du mariage de Madame sœur du Roy avec Monsieur le Duc de Bar, ne se rencontre pas trop bien avec celle que nous auons à recommencer touchant cét Indult, attendu mesmement le peu d'ayde que madite Dame nous preste, mais nous ferons au moins mal que faire se pourra. Ie vous remercie bien humblement de ce qu'il vous a plu parler à la Roynne pour le neveu de Monsieur le Cardinal Bandini page de sa M. & en ay rendu compte audit Seigneur Cardinal, qui s'en ressent vostre obligé. A tant, &c. Monsieur, &c. De Rome ce 21. d'Auril, 1603.

MMM M m 3

## A MONSIEVR DE VILLEROY.

CCCXXXV.

**M**ONSIEVR, Je vous remercie de toute mon affection de la tres-amiable & tres-prudente responce qu'il vous a plu faire à la lettre que ie vous escrui le 10. Feurier à part touchant l'Euesché de Bayeux, & m'en sens aussi obligé vers vous, comme de l'Euesché mesme que vous me fistes donner par le Roy. Je m'y conduiray de la façon qu'il vous a plu me conseiller, & de sorte neantmoins que vous ayez tout loisir d'aduifer si vous aurez à me commander quelque chose pour personne qui vous soit à gré, vous assurant cependant que comme ie n'ay rien que par vostre moyen, aussi estes vous seigneur & maistre de tout ce que i'ay. A tant, &c. Monsieur, &c. De Rome, ce 22. Aueil, 1603.

## A MONSIEVR DE VILLEROY.

CCCXXXVI.

**M**ONSIEVR, La lettre qu'il vous plut m'escire de Toul le 8. Aueil me fut renduë le 26. & ie fus tres-aise d'entendre le bon succez qu'auoit eu le voyage du Roy à Mets, & que sa M. eust pourueu à la seureté de ceste ville là, & à la tranquillité de la frontiere d'Allemagne. Vous avez bien deuiné par vostre lettre, que si la Royne d'Angleterre mourroit de la maladie dont vous auiez receu nouuelle, & que la maladie ne fust longue, le Roy d'Escoffe en recueilleroit la succession. Aussi crois-je qu'il aduiédroit ce que vous dites, que les Catholiques empireroient leur condition, si estans les choses comme elles sont, ils attentoient quelque chose contre ledit Roy sur ceste occasion. Mais ce siecle est plein de gens malins & de fols, & les malins pour acheminer leurs desseins ne se soucient point que les fols se perdent. Tant y a que le Pape, qui est tres-sage, ne fera rien mal à propos, & iusques icy nous n'entendons point qu'il ait fait autre chose que mandé aux Eglises qu'on y priaist Dieu.

Nous sommes tousiours apres la dispense du mariage; & outre la derniere escriture que i'ay dressée dont il a esté baillé copie au Pape, & aux Cardinaux de la Congregation, & aux quatre Confuseurs, ie dois vn de ces iours aller informer sa Sainteté de vive voix. Cepédant ie vous enuoye toute la dite escriture entiere, ne vous en ayant enuoyé cy-deuant que la premiere partie de la plus courtte. Monsieur de Cherelles, qui arriva hier au soir bien tard, m'est venu voir ce matin, & m'a rendu la lettre qu'il vous a plu m'escire par luy du 24. Mats. Quand il ne seroit mon amy ancien, comme il est,

ie le seruirois tousiours par le respect de vostre recommandation, & quand ie ne l'aurois iamais cogneu, & que personne ne m'eust escrit pour luy, il m'a apporté & donné vne chose si chere & precieuse que ie l'en aymerois & seruirois toute ma vie. Monsieur l'Euesque de Beauuais en est ceste ville depuis le 21. Ayril; il me rendit vne de vos lettres du 7. de Mars; ie me suis offert à le seruir en tout ce que ie pourrois; c'est vn tres-digne Prelat, & merueilleusement docte; ie ne luy ay parlé fois que ie n'aye appris de luy quelque chose notable: le Roy fera beaucoup pour son seruice, & pour le bien public de l'aduancer encores plus. A tant, &c. Monsieur, &c. De Rome ce 5. May 1603.

## A MONSIEVR DE VILLEROY.

CCCXXXVII.

**M**ONSIEVR, Le dernier ordinaire qui arriua en ceste ville le onziemesme de ce mois, m'apporta la lettre qu'il vous pleut m'escrire le vingt vniesme d'Ayril, par laquelle i'ay veu le changement qu'a apporté la mort de la Royne d'Angleterre, & la declaration de son successeur faite par le Conseil incontinent apres son deceds. C'est l'ordinaire des hommes de regarder plus au soleil d'orient qu'à l'occident, & des Princes bié aduisez qui sont appelez à vn nouuel Estat, d'y entrer doucement sans irriter ny mescontenter personne dedans ny dehors. Si ce Prince continuë guidé par la vertu, & accompagné du bon-heur comme iusques icy, il sera tres grand & fera bon l'auoir pour amy: & nous qui depuis quelques annees en çà n'auons eu l'œil quasi qu'en vn lieu, faudra que l'ayons cy-apres en deux, comme faudra bien aussi que facent encores d'autres. Et en fin de compte, celui de tous qui regnera le mieux, & le plus iustement à l'honneur & gloire de Dieu, & au soulagement, profit, & felicité de ses subiects, sera le plus asseuré, le plus fort, & le plus aimé & benist de Dieu & des hommes; en quoy consiste la vraye & perdurable grâdeur & puissance des Roys, & l'asseurance de leur posterité. Outre vostre dite lettre i'en ay receu vne du Roy, & vne autre de vous pour le gratis de l'Abbaye du Bourg-Dieu au diocèse de Bourges, pour vn des fils de Monsieur de Chasteau neuf, lequel m'en a aussi escrit. Je seruiray sa Maiesté & vous deux tres-volontiers, & espere que ce ne sera point sans fruit: mais il nous faut attendre vn peu, pource qu'il n'y a pas long-temps que Monsieur l'Ambassadeur de son costé, & moy d'un autre, en auôs demandé & obtenu, qu'il va aujourd'huy bien à tirer. Le Roy m'a encore escrit pour frere Nicolas Coeffeteau Religieux de l'ordre de sainct Dominique, qui a esté esleu Prieur du Couent des Iacobins de Paris, à ce que son election fust confirmee par le Pere General de l'ordre, nonobstant les difficultez que quelques vns y font. La lettre est du dernier de Iauier, & ne me fut réduit que le 13. de ce mois. Quand ie la vis de datte si vieille ie me doutay que ie ne serois à temps pour faire l'office que sa Maiesté me commandoit; mais ie ne laissay pour cela de parler au Pere General



de l'ordre qui retourna de Naples la semaine passée. Il m'a dit qu'il auoit lōg temps y a cassé l'election qui auoit esté faite dudit Coeffeteau & en auoit enuoyé les lettres de cassation à Paris, non pource que ledit Coeffeteau n'auoit point esté Prieur d'autre Conuent, ny parce que à son election estoient interuenus plusieurs qui ne doiuent y auoir voix, surquoy il eust facilement dispensé, & mesmement en France, où il n'est besoin auourd'huy de tant de rigueur, ny pource qu'il n'auoit encores atteint l'age de quarante ans, mais pource que luy General auoit esté informé tellement de la vie & mœurs dudit Coeffeteau qu'il n'auoit peu faire de moins que de casser ladite election. Et neantmoins pour sauuer l'honneur à l'esleu, il n'auoit point exprimé les vrayes causes de ladite cassatiō, ains auoit montré & déclaré le faire pource que ledit Coeffeteau estant fort docte, & Docteur regent en la faculté de Theologie, il seroit grand dommage pour l'estude de Paris qu'il fust destourné de ses lectures, qu'un autre ne sçauroit faire si bien que luy, pour l'office du Prieur du Conuent que d'autres sçauoient faire aussi bien que luy. M'a dit de plus le Pere general que les lettres de cassatiō qu'il auoit enuoyées à Paris à vn certain Religieux de son ordre, auoient esté supprimées; & que non seulement ce Religieux, mais aussi Monsieur le Nonce auoient escrit à luy General qu'il feroit bien de confirmer ladite election, & qu'autrement la Cour de Parlemēt pourroit y mettre la main, & s'en pourroient ensuire des incōueniens: Que luy General auoit respōdu audit sieur Nonce, qu'il desiroit euitier toute sorte d'inconueniens, & ne s'estoit men à casser ladite election que par le deuoir de conscience & l'obseruance de leur regle: Qu'il en faisoit iuge Monsieur le Nonce mesme, qui representoit le Pape par delà, & le prioit de s'informer des excès pretendus estre commis par ledit Coeffeteau & si luy Nonce trouuoit que ce dont ledit Coeffeteau estoit chargé ne fust vray, il luy pleust confirmer ladite election luy mesme: au contraires'il trouuoit qu'il fust vray, il luy pleust d'en faire publier ladite cassation, sans toutesfois scandaliser l'esleu, & la courrant del'honneste voile qu'il luy auoit donné: Qu'à cela Monsieur le Nonce par ses dernieres lettres auoit respondu à luy General, qu'il s'estoit informé de ce que dessus, & auoit trouué que le tout estoit vray, & que pource il feroit publier ladite cassation apres Pasques, en la façon, & sous le pretexte que luy general auoit voulu & escrit. Quand i'ay veu tout ce que dessus, ie n'ay peu faire de moins que d'acquiescer & de louer la procedure du Pere general: auquel i'ay encores parlé du Prieuré des Religieuses de saint Dominique les Montargis pour sœur Anne de Sallart: & il m'a dit que depuis m'auoit fait informer de tout ce qu'il auoit fait iusques alors, il ne sçauoit ce que le Prouincial y auroit fait, & que le Pape auoit trouué bon ce qu'il auoit ordonné là dessus. Le Pape n'a point encores eu loisir de voir la dernière escriture que j'ay faite sur la dispense du mariage, & dit qu'il veut l'auoir veüe auant que j'aille l'informer de viue voix. Ce n'est pas vne chose qu'il faille presser, ains est vne de celles où il faut se haster lentement, suiuant l'ancien prouerbe. Monsieur de Cherelles eut hier le bref qui luy estoit necessaire pour l'affaire qu'il va traicter à Malte, & est party ce iour d'huy pour s'y acheminer, &c. De Rome, ce 19. May 1603.

A MON-

## A MONSIEVR DE VILLEROY.

CCCXXXVIII.

**M**ONSIEVR, De ce qu'il vous a plu m'escrire des choses d'Angleterre par vostre lettre du 6. May, que ie receus le 23. ie me remettray à ce que ie vous escriuis au commencement de ma dernière du 19. du mesme mois, respondant à la vostre du 21. d'Auril, & du Conuent des Religieuses dont vous m'avez eserit par la mesme lettre du 6. May, ie vous feray vne lettre à part, reseruant ceste-cy pour deux choses qui ont vn peu plus de public; dont la première sera, que le Pape m'enuoya dernièrement le Commissaire de la Chambre Apostolique, pour me dire, comme aussi à Monsieur l'Ambassadeur, qu'estant tombé vn arc du pont d'Auignon & attendant qu'il fust refait, il estoit necessaire de passer le Rosne par barque, & que les officiers du Roy en Languedoc auoient voulu bailler à ferme ce passage eux seuls pour le tout, pretendans que ce fleuve appartient du tout à sa Maiesté. Mais pretendant le S. Siege que ledit fleuve luy appartient par moitié, Monsieur le Vicelegat auoit remonstré aux officiers de sa Maiesté que le passage se deuoit bailler à ferme par autorité & commun consentement tant du Pape que du Roy, & que les deniers qui prouieroient de la ferme se doiuent appliquer à la reparation dudit pont; Que sur cela les officiers du Roys'estoient contentez d'en escrire à sa Maiesté, & attendre son commandement sans cependant rien innouer, comme aussi les officiers du Pape en auoient rendu cōpte à sa Sainteté. Apres cela ledit sieur Commissaire me dit les raisons qui faisoient pour le S. Siege, lesquelles sont contenues en vn memoire en langue Italienne, qu'il me laissa, & que ie vous enuoye; ce qui me gardera de vous les deduire autrement. Mais sur ce qu'il monstra desirer que i'en escriuisse en Cour, & fisse bon office pour la conseruation du bon droit du S. Siege, ie vous diray que quant au droit commun, & à la raison naturelle, il me semble que les gens du Pape ont raison, & que si le Roy n'a quelque droit particulier, que ie ne puis deuiner, sa Maiesté fera bien & iustement de consentir & ordonner que ce passage soit donné du commun consentement des officiers tant du S. Siege que de la Couronne, & que les deniers en soyent conuertis à la reparation du pont; dequoy ie me remets à sa prudence & iustice.

L'autre chose dont i'ay à vous escrire est, qu'ayant Monsieur de Lorraine obtenu de nostre S. Pete l'erection d'une Eglise Collegiale en sa ville mesme de Nancy, & l'expedition estant minuitee, & la supplication signee par sa Sainteté, Monsieur l'Ambassadeur a eu quelque volonté de s'y opposer. Surquoy le sieur Bernardino Bareti, qui procuroit ceste expedition pour Monsieur de Lorraine, a remonstré que le Roy n'auoit point d'intrest à la-

NNNNq

dite erection, & partant il eseroit plustost faueur & ayde des ministres de sa Maieité, qu'il n'en craindroit aucun empeschement, & par l'aduis de Monsieur l'Ambassadeur m'a mis en main la minute de ladite supplication. Laquelle ayant leuë & confiderée, i'ay trouué que ladite Collegiate a esté erigee avec tous les aduantages qu'il s'est pû faire, tant pour ladite Collegiate que pour Monsieur de Lorraine; à quoy neantmoins ie n'ay point veu que le Roy eust aucun interest notable qui meritaist que sa Maieité ou autre pour elle, en formast opposition par deuant le Pape, & contre vn Prince son voisin, & si fort allié, & duquel en ce dernier voyage de Mets il venoit de receuoir tant de bon traictement & de seruice; & aye esté d'aduis que Monsieur l'Ambassadeur laissast aller l'expedition, & neantmoins que ledit Bareti en baillast vne copie pour enuoyer à sa Maieité, qui verroit si en l'executiō de ladite Bulle elle auroit à faire quelque chose. Les Eglises Collegiates n'ont point de Dioceses, comme eust eu la Cathedrale, pour laquelle on vouloit distraire & démembrer vne grande partie des Dioceses de Mets & de Toul, au grand detrimēt non seulement des Euesques, mais aussi des villes de Mets & de Toul. Dauantage, des benefices qui sont vnīs à ladite Eglise Collegiate, il n'y en a pas vn qui soit à la nomination du Roy, en quoy i'aurois fondé le premier interest de sa Maieité. Aussi tous lesdits benefices pour la plus part sont reguliers, & par ce moyen ia exempts de la iurisdiction des Euesques, & vne partie d'iceux benefices estoient déja vnīs à autres Eglises. Que l'Eglise Collegiate, & les personnes & biens d'icelle soient exempts de la iurisdiction de l'Euesque, ce n'est point chose nouuelle, y en ayant plusieurs autres en Frâce & ailleurs; & n'est rien à l'Euesque, puis qu'il n'auoit iurisdiction en vne Eglise qui n'estoit point encore en nature; outre que par le decret apposé à la fin de la supplication, la iurisdiction & visitation des Euesques leur est expressement conseruee, hors les personnes & les biens de ladite Eglise Collegiate, & d'une Abbaye de l'Ordre de Cisteaux, qu'il y a, de laquelle les Ducs de Lorraine sont fondateurs, & le general de l'ordre a consenty luy mesme à l'union; de sorte que pour maintenif au General de l'ordre vn tel quel droit sur ladite Abbaye qu'il abandonne luy mesme, & que le Pape laisse aller, il ne semble pas que le Roy s'en doie formaliser contre vn Prince à luy si conioinct comme dessus.

A tant, &c. Monsieur, &c. De Rome, ce 2. Iuin, 1603.

A MONSIEUR DE VILLEROY.

CCCXXXIX.

**M**ONSIEUR, Par le commencement de la lettre qu'il vous a plu m'escrire le dixneuuesme May, i'ay veu comme le Roy auoit esté traouillé extraordinairement d'une espee de colique, dont i'ay esté tres-marry; me consolant neantmoins en ce que sa Maieité suiuoit le Conseil

des medecins, & sa proposoit de viure cy apres avec plus de regle. Aussi à la verité est il digne de sa prudence de considerer mes-huy qu'encores que son grand courage ne soit pour vieillir iamais, & qu'il l'aura tousiours ieune, gaillard, & vigoureux, voire és choses mesmes naturelles qui manquent avec le temps, si est-ce qu'il n'est pas ainsi des parties du corps, tant interieures qu'exterieures, lesquelles vieillissantes & s'affoiblissantes de iour en iour ne peuvent plus comporter les mesmes actions qu'elles faisoient en ieunesse. I'ay obserué au cours de sa vie, que de plusieurs trauerses & facheux euenemens qu'il a eu en paix & en guerre, Dieu en a tiré du bien & de la prosperité pour luy. Si sa Maiesté tient ceste promesse de se mieux garder à l'aduenir, il aduiendra de mesme de ce dernier assault qu'il eust en sa santé la veille de la Pentecoste, pour ce qu'elle en viura cy-apres plus sainement & plus longuement, comme il est necessaire à son Royaume, & à ses enfans, & à toute la Chrestienté : Dieu luy en face la grace.

Les Espagnols n'ont pas seulement nommé vn Ambassadeur pour l'envoyer vers le Roy d'Angleterre, comme vous m'escriuez, mais en attendant que cestuy-là passe & face la ceremonie à decouvert, ils traictent desia avec luy sous main par des personnes de basse qualiré enuoyees vers luy à couuert sous autres pretextes, & qui font semblant d'auoir toute autre affaire près de luy. Ie l'appriis Vendredy 13. iour de ce mois, iour de Consistoire, en m'entretenant avec vn des Cardinaux des mieux aduisez. Aussi est ce chose toute cômune en ceste Cour, que nonobstant la guerre qui estoit ouuerte & est encore de Couronne à Couronne, les nauires Anglois sont receus, inuités, & bien traictés aux costes d'Espagnes: là où les nostres depuis la paix faite & iuree y ont esté traictés comme vous sçauéz. Les Espagnols nous haïssent plus qu'ils ne haïssent les Anglois & Escossois, & nous craignent moins par mer, où est leur principale crainte; par ainsi il pourroit estre qu'ils aimeroient mieux s'allier avec eux qu'avec nous, & qu'ils s'en fieront plus: & en matiere de brigues & menees, ils surpassent toutes les autres nations, quoy qu'en d'autres ils soient auares, neantmoins en celles-cy ils sont plus que liberaux. Du nouveau Roy d'Angleterre, ie ne prens pas pour argument certain de ses intentions & affections enuers qui que ce soit, tout ce qu'il peut dire & faire à present qu'il n'est encores en possession de son nouveau Royaume. Mais quand il sera bien estably, & qu'il se sera saisi & rendu maistre des forteresses, des arsenaux & des ports, & qu'il se verra obey en toute ceste Isle là sans aucune apparence de contradiction, alors on pourra mieux iuger de ses intentions & affections par ce qu'il dira & fera en ce temps-là.

Ie seruiray Monsieur de Bethune en l'execution des commandement que le Roy luy fait; mais ie suis marry de ce que ie voy que par delà vous commencez à douter de la bonne volonté du Pape, parce qu'il ne nous a desia accordé la dispense de mariage, ny l'indult de Mets, Toul, & Verdun, ny la prouision de l'Euesché de Troyes pour Monsieur Benoit. Ie puis dire avec verité, & sans vanterie, que personne n'a trauaillé plus que moy auprès du Pape en chacun de cestrois affaires, & toutesfois ie ne m'apperceuz iamais

NNNNn 2

que le retardement de leurs expéditions prouinst du peu d'affection que le Pape eust vers le Roy ou le Royaume , ains i'ay recogneu en luy plusieurs fois beaucoup d'affliction de ce qu'il ne pouuoit complaire à sa Majesté. Mais comme nous auons nos raisons de demander , il a les siennes pour refuser, ou dilayer, & a à respondre à plus de gens que nous , & ne peut faire de luy seul ce que nous voudrions , ains faut qu'il prenne aduis de certains Cardinaux, & qu'il le suiue, s'il ne se veut ruiner soy-mesme, y allant de la religion en toutes ces trois choses que nous luy demandons. Apres tout cela , il nous faut encore recognoistre que les parties mesmes pour lesquelles nous demandons ces graces, apportent elles-mesmes de l'empeschement à l'impetration d'icelles, en faisant des choses contraires à leurs demandes. Mais pour ce que c'est icy vn passage fort glissant , i'ayme mieux le sauter que marcher par dessus ; & vous diray seulement quant à la premiere, que ie fus Mardy dixiesme de ce mois informer sa Sainteté de vne voix comme iel'auois informee par escrit , & la trouuay pleine de bonne volonté plus que de resolation ; & vne des plus grandes difficultez qu'il me fit fut que lors que ce mariage se traittoit. Madame sœur du Roy luy fit dire que si sa Sainteté faisoit enuers le Roy qu'elle fust mariee à Monsieur le Comte de Soissons, elle se feroit Catholique ; dont sa Sainteté dit auoir iuste occasion de iuger que ce n'est point la conscience qui la retient en sa secte , mais que c'est vne certaine obstination & presumption qu'elle a que le saint Siege & toutes autres choses se doiuent accommoder à ses appetits. Et pource que ceste obiection estoit trop pressante, ie ne fis que gaudir , & m'en seruïs à luy monstrier que ceste Princesse en seroit doncques d'autant plus facile à conuertir , dont i'auois compté l'esperance pour vne des dix causes de la dispense que nous demandions. Je respondis bien plus directement à vne autre difficulté qu'il me fit , que s'il y auoit des enfans de ce mariage, la mere les feroit heretiques, & ain si il y auroit vn iour vn Duc de Lorraine heretique : car ie luy dis que sa Sainteté pourroit mettre vne clause en la dispense , par laquelle seroit obuié à ces inconueniens ; à sçauoir que les enfans qui naistroient de ce mariage , seroient instruits & esleuez en la Religion Catholique , & que le Roy , Monsieur de Lorraine, & ses trois fils respondroient , & en bailleroient à sa Sainteté obligation par escrit. A quoy i'adioustay que sa Sainteté n'euieroit point ce mal par le refus de la dispense, ains aigriroit les matieres d'autant plus : car laissé, de quelque secte qu'il fust , ne lairroit de succeder au Duché de Lorraine, & y seroit maintenu par les François, Allemands, & Suisses ; ains comme i'auois dit en mes escritures , la bastardise qu'on pretendoit contre les enfans de ce mariage, seroit cause de grands troubles & seditions, & par consequent de grands dommages à l'Eglise & à la religion en tous ces pays de delà ; où si sa Sainteté bailleroit la dispense, ceste occasion de trouble & de guerre seroit ostee, & il auroit assurance que les enfans seroient nourris Catholiquement ; outre que la mere mesme donnoit intention , moyennant la dispense, de receuoir instruction, & d'embrasser la Religio Catholique, si on luy monstroit avec raison & douceur que c'est la voye de salut. La fin fut, que sa Sainteté me dit pour conclusion qu'elle seroit tenir deux foy

la Congregation des Cardinaux, où il vouloit faire disputer certaines choses qu'il auoit pensees de luy-mesme, & cependant & apres il prioit Dieu qu'il l'inspirast. Je l'en prie aussi moy-mesme, & qu'il vous donne; &c. Monsieur, &c. De Rome ce 16. Iuin 1603.

## A MONSIEVR DE VILLEROY.

CCCXL.

**M**ONSIEVR, Vous auez tres bien dit au commencement de vostre Lettre du 4. de ce mois, laquelle ie receus le 20. que la meilleure nouvelle que vous eussiez sceu escrire, & qui me pouuoit estre la plus agreable, & à nous tous la plus vtile & necessaire, estoit la bonne santé du Roy, de laquelle ie rends graces & louanges à Dieu, le priant qu'il la luy conserue longuement, & luy donne tout autre bien & prosperité. On a parlé icy fort diuersement de son dernier mal, & les Sauoyards entre autres, & l'ont décrit tel, que sa Maiesté ne pouuoit plus viure que fort peu de iours. Possible y sçauoient-ils quelque chose que plusieurs de ceux qui en sont prés ne sçauent pas. Gardés vous, entre autres choses, de toutes sortes d'empiriques, & particulièrement de ceux qui ne vous sont cogneus de longue main, & ne souffrez qu'il soit rien appliqué à la personne du Roy, soit par dehors ou par dedans, & à quelque partie basse ou haute que ce soit, que vous ne sçachiez bien par qui, & quoy, & combien, & comment. Les ennemis de sa Maiesté & de la Couronne sçauent, & tenteront plusieurs d'assassiner tout à vn coup l'vn & l'autre. Mais Dieu nous aidera, & mesmement si nous nous aidons nous-mesme de la raison & pouruoyance qu'il nous a donnée.

I'ay esté bien aise d'entendre que vous eussiez mis entre les mains de Monsieur le Chancelier la derniere escriture que ie vous auois enuoyee sur la dispense de ce mariage que nous poursuuons, d'autant qu'il ne se pouuoit trouuer vn iuge plus capable pour cognoistre & fidellement rapporter au Roy ce peu de bien qu'il y peut auoir, ny plus équitable pour excuser les fautes qui s'y seront trouuees. Je vous prie luy baiser bien humblement les mains de ma part. Le Pape n'a encores eu commodité de tenir la Congregation des Cardinaux qu'il veut estre faite en sa presence: mais il la doit tenir Samedy prochain 5. iour de Iuillet. Dés la premiere fois qu'on me bailla des lettres du Roy, & de vous, & de Messieurs de Reuol pour l'expedition de l'Euesché de Dol, ie m'offris à l'expeditionnaire de m'employer pour leur faire auoir vne fort honneste moderation, non seulement pour l'obeyssance que ie dois aux commandemens du Roy & aux vostres, & pour l'estime que ie fais desdits sieurs de Reuol, mais encore pour l'honneur que ie porte à la memoire de feu Monsieur de Reuol, qui a

NNNNn 3

si bien seruy le Roy & la Couronne, qu'il merite que le gré & la faueur en redonde encore sur ses parens. Mais à ce que ie voy par la seconde depesche, ils veulent emporter le gratis tout entier, & ie voudrois qu'ils l'eussent desia, mais il n'est si facile comme ils pensent. L'Euesché est taxé à 4. mille ducats; & qu'il soit d'honneste reuenu, quoy que l'on dise, il appert par la pension de 4-mille liures dont ils sont d'accord, & qu'on veut que le Pape impose. Dauantage, ils ont depuis la paix perceu les reuenus dudit Euesché, & deuroient penser que s'ils font difficulté de fournir pour eux-mesmes mille, douze, ou quinze cens escus, faisans partie des fruiçts d'une annee, que les autres ont encôres plus grande occasion de faire difficulté de leur donner 4. mille & tant d'escus, apres auoir esté si fort importunez cy deuant par tant d'autres, que le souuenir en est fascheux. I'ay failly à dire 4. mille & tant d'escus: car la Bretagne estant pays d'obedience, & la taxe ne se reduisant point, l'expedition à payer cousteroit entierement 5745. escus d'or en or.

Quant l'Euesché de Montpellier fut depesché avec les pensions de 4. cens escus pour le fils du Comte Ioseph Porto, & de deux cens pour Mario Volta, le Pape ordonna que la premiere seroit payee à Venise, & la seconde à Rome, Monsieur l'Ambassadeur & moy l'ayans ainsi arbitré, ou que sa Sainteté le pouuoit ainsi ordonner de soy. M'ayant esté dit qu'il ne les veut payer que dedans Montpellier, ie me remets au Roy & à vous si sa Maiesté doit declarer, au moins pour ceste fois, qu'il veut que ces 2. pensions soient payees aux lieux ordonnez par sa Sainteté, apres auoir esté ainsi arbitré par Monsieur l'Ambassadeur & moy.

Atant, &c. Monsieur, &c. De Rome, ce dernier iour de Iuin, mil six cens trois.

## A MONSIEVR DE VILLEROY.

CCCXLI.

**M**ONSIEVR, La lettre qu'il vous a plu m'escire le 16. Iuin me fut renduë le 6. de ce mois; au commencement de laquelle vous m'assurez de la bonne santé du Roy, de laquelle ie louë Dieu, & le prie qu'il le conserue longuement, & l'accompagne de tout bon heur & prosperité, & entre autres qu'il accroisse ses saintes grâces & benedictions à Monseigneur le Dauphin, qui par ces beaux & grands commencemens nous promet d'estre vn iour vn Prince heroïque, & de nous représenter au vif la valeur & vertu de son pere.

Monsieur l'Ambassadeur m'a monstré la copie de la lettre que le Pape escriuit au Roy de sa main le 18. iour d'Auil, de laquelle ie me suis gran-

lement esmerueillé. Et n'estoit que son grand zele à la religion Catholique & à la paix publique, & l'amitié particuliere qu'il porte au Roy merite excuse, ie ne scaurois que dire pour cela. Car de dire qu'il l'aura escrete en colere apres auoir escouté & creu ce que le Duc de Sauoye luy fit dire des choses de Geneue, ce ne seroit de la gratuité, moderation & sapience de sa Saincteté. Quoy qu'il en soit, il a pris les choses & l'intention du Roy tout autrement qu'elles ne sont; & pour toute response comme ie dis à mondit sieur l'Ambassadeur, ie le voudrois prier de considerer la chose comme elle est à la verité, & puis iuger luy-mesme si cela meritoit que sa Saincteté en escriuist de la façon. Or la chose est ainsi, que le Roy n'a point commencé cecy, ains il n'y a encores rien fait; & quand il fera quelque chose cy-apres, forcé par le Duc de Sauoye, il ne fera que deffendre le passage qui luy est necessaire pour faire venir les Suisses à son besoin, & recevoir de ces peuples & Cantons le fruit del'alliance que la Couronne de France a avec eux, & de la grande despenſe que sa Maieſté y a nagueres faite; laquelle alliance encores & deffense dudit passage n'a point commencé à sa Maieſté, ains luy a esté transmise par succession par ses predecesseurs Roys tres Chrestiens & tres-Catholiques, qui ont plus fait pour la Religion Catholique, & pour le bien & grandeur du S. Siege, que tous les autres Roys & Princes Chrestiens ensemble.

Quand doncques le Roy ne se lairra prédre & occuper ce passage, il ne fera que se deffendre soy & sa Couronne, & les commoditez & necessitez de son Royaume, à quoy il est tenu par tout droit diuin, naturel, & humain, & par l'exemple des Roys tres-Chrestiens ses predecesseurs, & par toutes les loix d'honneur & reputation, tant s'en faut que ce soit prendre les armes contre les Catholiques, & la deffense de l'heresie ny des heretiques, & moins s'y venir avec les ennemis de Dieu pour destruire & aneantir la sainte foy Catholique, à quoy les heretiques mesmes n'aspirent point, & meriter l'ire de sa diuine Maieſté. Que si ledit passage estoit habité des Catholiques, sa Maieſté les priserait & les aimeroit mieux. Mais puis que la commodité dudit passage n'est heretique non plus que Catholique, & que cependant elle est vtile & necessaire à la France, le Roy veut que chacun sçache qu'il ne sera iamais si simple, ny si failly de courage, qu'il se laisse oster des mains ses commoditez, & les necessitez de son Royaume, de peur que la deffence de soy-mesme & de sa Couronne soit par le Duc de Sauoye & par ses adherens appellee alliance & protection d'heretiques. C'est ce que ie veux respondre & au Pape & à tous autres, tant pour le passé que pour l'aduenir, en occasions semblables qui se pourront presenter sans y despendre vne parole d'auantage. Aussi a mondit sieur l'Ambassadeur trouué le Pape en toute autre assiette & disposition qu'il n'estoit lors qu'il escriuit ladite lettre, comme vous entendrez par ce que ledit sieur Ambassadeur vous escrira.

Quant à la dispense de Monsieur le Duc de Bar, le Pape tint en fin devant soy Congregation vn Samedi cinquieme iour de ce mois, en laquelle de quatre Consultants Theologiens qu'il y auoit, les deux premiers furent contre, & les deux derniers pour la dispense. Ces deux derniers sont le Pe-



re Gregoire de l'ordre de saint Augustin Portugais , & le Pere Benedet-  
to Giustiniano Iesuite. De neuf Cardinaux qu'il y auoit , les six furent contre , & les trois pour la dispense. Ces trois sont Baronio, Mantica, & moy. Le Pape à la fin après nous auoir ouys tous, voulant donner l'exclusion, dit qu'il falloit disputer séparément poinct par poinct, cōme l'on fait en la Rote de Rome, les choses dont on estoit en differant , & qu'il les bailleroit par escrit. Ainsi nous sommes remis à d'autres Congregations , qui est tousiours longueur. Mais disputer les choses poinct par poinct est bon de foy , & pour ceux qui ont la raison de leur costé, comme nous auons, car cela oblige à parler à propos , & d'une proposition seulement à la fois, & oste le moyen de tergiverser & d'extravaquer , & de tant obscurcir la verité. Mais le pis est que ceux qui nous ont esté contraires ne seront jamais pour nous, soit que les choses se disputent en gros , ou en detail. Si Madame sœur du Roy ne se reduit, ou ne change tellement de façon de faire en la Religion qu'on y voye une grande esperance de conuersion , contre l'aduis de la pluspart des Cardinaux , le Pape, comme ie vous ay escrit plusieurs fois , ne sçauroit en matiere de Religion donner ceste dispense quand bien il le voudroit, comme ie croy qu'il voudroit donner ceste satisfaction au Roy, & à toute la maison de Lorraine.

Par ainsi ie concluds que si madite Dame continuë en sa façon de proceder , ie n'espere plus que nous obtenions ceste dispense , quoy que nous sçachions faire par-deçà , comme Monsieur l'Ambassadeur & moy ne manquerons d'y faire tout ce qui nous sera possible , & sommes apres à trouuer vn exemple qui nous a esté indiqué d'une dispense du temps du Pape Gregoire XIII. qui est en plus forts termes que la nostre , & nous donneroit quasi cause gaignee. Le Pape a depuis enuoyé les poincts qu'il veut estre disputez au Cardinal d'Ascoli, le plus ancien de la Congregation mais nous ne les auons encores receus dudit Cardinal.

Quant à ce que Monsieur le Nonce dit au Roy qu'il auoit eu du Pape tout pouuoir de traiter avec sa Maisté les affaires des Peres Iesuites, ie vous diray ce que i'en pense. Quand Monsieur l'Ambassadeur eust baillé au Pape long-temps y a les conditions sous lesquelles à sa Maisté se contenoit que lesdits Peres fussent receus, la Sainteté communiqua lesdites conditions au Pere general, lequel les ayant veüs & cōsiderees avec les principaux d'entre-eux , ils les trouuerent fort rigoureuses , & principalement la quatriesme , touchant vn certain serment que le Roy veut qu'ils facent : & la cinquiesme, qu'ils ne puissent recouir des biens, ou moins immeubles , de ceux qui voudront entrer en leur societé : & la 8. que les Euesques ayent toute iurisdiction & correction sur eux , & la dixiesme, qu'ils ne puissent administrer les Sacremens de penitence qu'à ceux de leur societé ; sinon que par permission des Euesques. Il y a encores la seconde, qu'ils soient tous naturels François , laquelle les fasche , & supplient le Pape d'employer son autorité vers le Roy pour faire oster ces conditions.

Sa Sainteté qui s'attendoit d'envoyer Legat par delà Monsieur le Cardinal Visconti pour le Baptisme de Monseigneur le Dauphin , estimoit pouuoir

pourroir faire cecy avec vn plus grād aduantage pour ledit seigneur Cardinal Legat: mais semblāt depuis. au Pere general & à d'autres Peres de cēt ordre que ceste legation alloit trop à la longue, ils auroient à mon aduis priē la Saincteté de faire traicter cēt affaire par son Nonce, & luy auroient fourny des raisons & moyens tendant à oster du tout lesdites conditions; & la Saincteté aura enuoyé lesdits moyens à son Nonce, & luy aura ordōné d'en traicter avec le Roy, & d'en auoir le meilleur marché qu'il pourra. C'est ce que j'en pense. Il n'y a pas long-temps que parlāt à vn Pere lesuite venu n'aguères de Lorraine, il me sembla. cognoistre qu'ils aimeroient mieux à present que ces choses se traittassent près du Pape: mais il me semble à moy plus honorable, & plus aduantageux pour le Roy, qu'elles se traittent auprès de sa Maiesté. Si d'auanture vous n'auez lesdites conditions en main, vous les trouuerez inserees en vne depesche que vous fistes à Monsieur de Berhune le 18. de Nouembre 1601.

Ce parler que fait le Roy d'Angleterre & en public & à table des choses plus serieuses, & mesme contre l'autorité du Pape & du S. Siege, ne semble pas se correspōdre à l'opinion que quelques vns ont eue de sa prudence, si ce n'est qu'il se face à dessein, pour euitter quelque difficulté qu'il penseroit trouuer à son plein establissement si on le tenoit pour disposé à se faire vn iour Catholique. Le temps, & le maniement qu'il a à present plus grand que lors qu'il n'auoit à gouverner que l'Ecosse, nous decouurira plus euidentement sa portee, & ses humeurs & complexions, la cognoissance desquelles ne peut estre que fort vtile à ses voisins, & à la pluspart encore d'e: autres Princes.

Sur la plainte que Monsieur l'Ambassadeur a faite ces iours passez de la façon dont Monsieur le Cardinal de Lorraine vsoit en l'exercice de sa Legation, quant à la collation des benefices à personnes toutes dependantes de sa maison, dont il remplissoit les Chapitres des Eglises de Mers, Toul, & Verdun, le Pape a pris occasion de m'envoyer la copie des facultez dudit seigneur Cardinal pour les voir, & considerer ce qui s'en pourroit faire. Je les verray & considereray, Dieu aidant, & consoleray avec Monsieur l'Ambassadeur, pour puis apres en dire nostre aduis à la Saincteté, & vous rendre compte de tout.

A tant, &c. Monsieur, &c. De Rome ce 14. de Juillet 1603.

A MONSIEVR DE VILLEROY.

CCCLXII.

**M**ONSIEVR, Par la lettre qu'il vous plent m'escrire le troisieme de ce mois, que ie receus le dix-septiesme; j'ay veu la resolution que Messieurs du Conseil du Roy ont prise sur ce que Monsieur l'Ambassadeur & moy vous auiois escrit du passage par barque qui se fait sur le Rhene de:

OOOO

uant la ville d'Auignon, & de l'Eglise Collegiate erigee nouvellement en la ville de Nancy : laquelle resolution ie loue, & vous remercie bien humblement de l'aduis qu'il vous a pleu m'en donner. Monsieur l'Ambassadeur m'a aussi fait voir les aduis que vous auiez de la bonne inclination & amitié du nouveau Roy d'Angleterre, dont ie loue Dieu, & le prie que la suite & le progrès soit conforme à ces beaux commencemens. Il m'a encores communiqué la copie de la lettre que le Pape escriuit de sa main au Roy le dernier iour de May, laquelle m'a semblé tresdigne de sa Sainteté, & fait d'un autre stile que la precedente du 18. Auriel, & sera bien & equitablement fait de compenser l'une avec l'autre; & mesmes d'autant qu'il se voit euidemment que la bonne est sortie du propre mouuement de sa Sainteté, & l'autre auoit esté extroquée par dol & fraude de ceux qui font profession de dénigrer toutes les bonnes actions du Roy, & d'interpreter en mal tout le bien que sa Maïesté fait.

Par ma dernière ie vous touchay un mot de certain exemple que nous estions après à trouuer d'une dispense de mariage donnée par le Pape Gregoire treizième en un cas semblable à celui de Monsieur & de Madame de Bar; & de certaines questions à disputer, que le Pape auoit de nouveau enuoyées à Monsieur le Cardinal d'Ascoli, qui est le plus ancien de nostre Congregation, desquelles deux choses j'ay maintenant à vous escrire plus amplement. Mais pour ne vous faire ceste-cy trop longue, ie vous en feray une autre à part. Aussi vous escriuis-je comme le Pape m'auoit enuoyé les facultez de la Legation de Monsieur le Cardinal de Lorraine pour les voir, & considerer ce qui s'y pouuoit faire pour le seruice & satisfaction du Roy, Mais j'ay pensé depuis que le meilleur estoit d'en enuoyer copie à sa Maïesté, afin qu'elle voye elle mesme & face voir par qui il luy plaira ce qui sera expedient, & nous commandes ses volontez là dessus; & ainsi a semblé aussi à Monsieur l'Ambassadeur, auquel ie portay lesdites facultez, & qui s'est chargé d'en enuoyer copie à sa Maïesté.

Je me remettray à ce que vous en aduiserez par delà, ne voulant neantmoins omettre à vous en dire quelque chose en gros; & seulement pour l'intérêt du Roy, car au reste ie suis tres-humble seruiteur de Monsieur le Cardinal de Lorraine, & luy desiré toute grandeur & contentement au dessus de sa Legation. Premièrement doncques, le temps auquel les facultez furent demandées & concedées peut apporter de la suspicion; car ce fut en l'an 1591. au plus fort de la guerre contre le Roy, & seant au saint Siege le Pape Gregoire X I V. qui en son Pontificat fist toutes choses au gré du Roy d'Espagne, & enuoya son neveu le Duc de Mont-Martiano contre le Roy avec toutes les forces qu'il pût mettre sus, & enuoya en France les 2. bulles; l'une contre le Clergé, l'autre contre la Noblesse qui tenoit le party du Roy. Aussi il dit au commencement desdites facultez, que le Pape a esté meu à les donner audit seigneur Cardinal, pource que le cœur & intentions dudit seigneur Cardinal & de Monsieur le Duc de Lorraine son pere, s'accordoient tres-bien avec celles de sa Sainteté en la defense de la religion Catholique.

Secondement, ladite Legation ne s'estend pas seulement par le Duché de Lorraine & de Bar, mais aux citez de Mets, Toul, & Verdun, qui sont sous la protection de sa Majesté; & quoy qu'on veuille & puisse dire du temps auquel lesdites facultez furent donnees, si est-ce que depuis que le Roy fut Catholique, & reconcilié avec le saint Siege, il a esté besoin de son consentement pour exercer vne Legation en ces villes, mesmes frontieres, & par vn Prince de la maison de Lorraine, si voisine, & si seconde en pretentions. Quand les Roys mesmes ont demandé ou accepté des Legats pour estre quelque temps près d'eux, & en lieux moins suspects que ne sont les frontieres, encores ont-ils toujours fait voir & modifier les facultez desdits Legats en la Cour de Parlement: tant plus d'occasion on a doncques maintenant de regarder ceste-cy, donnée au temps, & en façon, & à la fin que dessus. Au demeurant, iacoit que ces facultez soient pour la pluspart ordinaires & accoustumées quasi en toutes Legations, si est-ce qu'on s'en est peu & pourroit-on encores sernir à plusieurs mauvais effectz esdites villes de Mets, Toul, & Verdun, & autres, comme à pratiquer & gagner ceux desdites villes qui s'y sont trouvez, ou qui s'y pourroient trouuer disposez, en les fauorisant par le moyen de ces facultez, & les aduantageant & fortifiant par dessus les autres, & au contraire abbaissant & reculant ceux qui ne pourroient estre gaignez. A quoy se peuvent appliquer, entre autres, les facultez premiere, huitiesme, & vingt-quatriesme, d'autant que la premiere dōne pouuoir au Legat de visiter, corriger, & reformer les Eglises Cathedrales, Collegiates, Parochiales, & les Monasteres d'hommes & de femmes, les Prieurez, Hospitaux, les Chapitres, Conuents, Vniuersitez, Colleges, & les personnes tant seculieres que regulieres, avec quoy s'est peu ou peuuent faire de grands remuemens & changemens esdites villes. La huitiesme luy permet d'ouyr, cognoistre, & terminer toutes causes Ecclesiastiques, mesmes matrimoniales, beneficiales, & profanes, ciuiles, & criminelles, & mixtes, tant par voye de simple querelle, que par appellation de tous iuges; qui est vn autre grand moyen de faire pour & contre qui l'on veut, & de tirer beaucoup de gés après soy. La vingt-quatriesme faculté donnant puissance de conferer les benefices Ecclesiastiques desdites villes & pays, donne aussi moyen de remplir de gens partiaux & affectionnez à la maison de Lorraine les Eglises Cathedrales, Collegiates, & Parrochiales, & les Chapitres, & Prieurez, & autres lieux près desdites villes & pays.

Outre lesdites trois facultez, la troisieme est encores à considerer, permettant au Legat de legitimer toutes sortes de bastards, & de les rendre habiles à succeder à tous biens, & mesme fcodaux, & à estre receus & admis à tous honneurs, dignitez, & offices seculiers, publics, & prineuz; est à considerer, dis-je, non seulement pour le moyen de gratifier & de transférer quelques fois des successions, & biens des personnes affectionnées au service du Roy, à d'autres partiaux de la maison de Lorraine, mais aussi pource que le Pape mesme ne peut point legitimer en France les bastards quant aux biens, honneurs, offices, & autres choses seculieres & temporelles.

Voilà ce peu que ie vous ay voulu dire desdites facultez en passant. Vous examinerez beaucoup mieux & plus particulièrement le tout par delà, & aduisez à ce que vous aurez à nous commander que nous facions enuers le Pape. Il y a cela de bon, que ladite Legation & les facultez ne sont point à perpetuité, mais seulement *AD SEDIS APOSTOLICÆ BENEFAC-TIVM*, comme vous verrez sur le commencement de la Bulle; de façon qu'il sera plus aisé d'obtenir du Pape la renouation ou limitation desdites facultez qu'il semblera bon au Roy de demander pour son interest.

Le Pere general des Iesuites vint à moy le 21. iour de ce mois, avec deux Peres François de sa Societé, ayant es mains les conditions sous lesquelles le Roy a déclaré cy deuant les vouloir recevoir, & me demanderent l'interpretation de certains mots & clauses, laquelle ie luy dis selon qu'il me sembloit que le Roy l'entendoit. Apres cela ils entrerent en discours sur quelques vnes desdites conditions; sur quoy ie leur dis aussi mon aduis franchement, apres leur auoir protesté neantmoins que comme ie n'auois aucune charge ny volonté d'en traiter avec eux, ny avec autre, aussi n'entendois-je qu'ils fissent aucune recepte ny mise, ny aucun estat de rien que ie leur disse.

Monsieur de Chenelles est icy de retour de Malte depuis le 20. de ce mois, & deux iours après ie luy dis qu'il me sembloit qu'il deuoit proceder à demander du gratis de l'Abbaye de Bourg-Dieu, & en presenter les lettres du Roy au Pape, & luy dressay & baillay vñ memoire par escrit pour le laisser à la Sainteté, comme est la coustume d'icy.

A tant, &c. Monsieur, &c. De Rome, ce 28. Iuillet, 1607.

## A MONSIEVR DE VILLEROY.

CCCXLIII.

**M**ONSIEVR, Pour ne faire trop longue la lettre ordinaire que ie viés de vous escrire en response à la vostre du 3. de ce mois i'ay estimé en deuoir separer ce que i'auois à vous faire sçavoir sur la poursuite que nous faisons icy de la dispense du mariage de Monsieur & de Madame de Bar. Par ma dernière dont, qui fut le 14. de ce mois, ie vous entannay deux choses touchant ce fait; l'une que nous estions après à trouuer vñ exemple d'une dispense donnée du temps du feu Pape Gregoire 13. laquelle quand elle se trouueroit bien verifiée, nous donneroit quasi cause gagnée; l'autre que le Pape apres auoir ouy les Consultants & les Cardinaux en la dernière Congregation tenue deuant la Sainteté le cinquiesme de ce mois, auoit dit qu'il vouloit qu'on disputast separément les questions qu'il baille-rait par escrit, & que lesdites questions auoient esté enuoyées au Cardinal d'Ascoli le plus ancien de ladite Congregation, mais nous ne les auons encore receuës dudit Cardinal. Maintenant ie vous parleray plus

amplement de chacune de ces 2. choses desquelles la premiere va ainsi. Feu Monsieur le Card. Borromeo Archeuesque de Milan visita non seulement son diocèse de Milan, mais aussi toutes celles qui sont subiettes à l'Archeuesque le Milan; entre lesquelles est celle de Cosmo, laquelle s'estend bien auant dās le pais des Grisons; & estāt paruenū ledit sieur Card. Archeuesque en vn lieu appellé Gaspano dudit pais des Grisons, il trouua qu'il y auoit 2. sœurs Catholiques mariees & deux freres heretiques, & parens desdites deux sœurs Catholiques leurs femmes entre le 3. & 4. degré de consanguinité, comme sont iustement Monsieur & Madame de Bar, & voulant ce pasteur pie & charitable ostter ces deux pauures femmes de concubinar, & leurs enfans de bastardise, il escriuit au Pape Gregoire XIII. luy exposant le fait, & le suppliant de les vouloir dispenser, à fin qu'elles peussent en bonne conscience, & leur hōneur sauue, continuer en leursdits mariages, & que les enfans nais & à naistre de ces deux mariages fussent legitimes; & le Pape ayant fait deliberer & consulter cēt affaire par des Docteurs Theologiēs, & trouuē qu'il pouuoit donner & deuoit ladite dispense, commit au mesme Cardinal Borromeo Archeuesque de dispenser lesdites parties par authorité de sa Sainteté.

Nous auons appris cecy en cherchant des exēples de telles dispenses en vn gros liure escrit à la main, que le Cardinal Contarel, qui lors estoit Dataire, a laissé, auquel sont plusieurs minutes de dispenses sur des cas les plus rares aduenus de son tēps, lesquelles minutes il assembla & fit relier ensemble, & en cōposa ledit gros liure, auquel se trouue escrite la resolution desdits Theologiēns, & quant & quāt la minute du bref adressé audit sieur Cardinal Borromeo, auquel il est donné faculté de dispenser; & est ladite minute corrigee de la main dudit Contarel Dataire. Mais nous n'auons peu trouuer chez le Secretaire des brefs, que ledit bref ait esté registré, d'autant qu'en ce temps on ne faisoit point encores registré de brefs; comme on commença à en faire du tēps du Pape Sixte cinquiesme. Aussi ne s'est point trouuee la minute dudit bref, en des liasses où l'on mettoit telles minutes aprez que les brefs estoient expediez; & nous at'on dit qu'il y a eu beaucoup desdites minutes perduës, & mesme des liasses entieres brulées par inconuenient de feu.

Qui a esté cause que nous auons pris resolution d'envoyer d'icy vn praticien de ceste Cour, bien entendu en ces matieres, & Lorrain, appellé Nicolas Pirotis, lequel partit d'icy le vingt-deuxiesme de ce mois, ayant charge d'aller audit lieu de Gaspano de pays des Grisons, & là s'informer de la verité & de l'estē & de ladite dispense, comme nous a esté asseuré qu'il y trouueroit encores vn desdits hommes, & vne desdites femmes dispensées qui viuent encores. Pour lequel lieu des Grisons, il porte lettre de Monsieur l'Ambassadeur, & de là doit aller à Comō voir au registre de l'Euesque de Comō; s'il s'y trouuera quelque chose de ladite dispense, & puis aller à Milan, & voir au registre dudit sieur Cardinal Archeuesque. Pour lesquelles deux villes Como & Milan, il a apporté lettres du Pape à l'Euesque de Como, & à Monsieur le Cardinal Borromeo à present Archeuesque de Milan, & neuen dōit son sieur Cardinal Borromeo. Si ledit Pirotis

nous apporte verification de ladite dispense, nous aurons vn grand auantage, & sera mal aisé que le Pape se dessède de nostre poursuite. Car ceste dispense dudit Pape Gregoire XIII. est en plus forts termes que celle que nous demandons; d'autant premierement que ceste dispense est double; à sçauoir des deux sœurs Catholiques, mariees à deux freres heretiques leurs parens en mesme degré que sont Monsieur & Madame de Bar. Secondement, lesdites sœurs Catholiques & les deux freres heretiques mariez n'estoient que personnes priuees & roturieres, de la separation desquelles ne pouuoient aduenir de si grands inconueniens; mais Monsieur & Madame de Bar sont de tres-hauts & tres-grands Princes, qui ne se peuent separer sans guerres & infinies calamitez publiques. En troisieme lieu, lesdites sœurs Catholiques ne demandoient point ladite dispense, & leurs maris heretiques encores moins; ains ce fut ledit sieur Cardinal Archeuesque qui la demanda d'office pour elles, à fin de pouruoir à leurs consciences & à leur honneur, & à la legitimité de leurs enfans: mais nous il y a tantost 5. ans que nous poursuivons la nostre, Voila donc quant à la premiere des deux choses que ie vous ay proposees au commencement de la presente lettre.

Quant à la seconde, Monsieur l'Ambassadeur ayant dit au Pape que nous n'auions encores veuës lesdites doutes & questions que la Sainteté auoit enuoyees audit Cardinal d'Ascoli, & vouloit estre disputees separémēt l'vne apres l'autre, la Sainteté me les enuoya le 19. de ce mois, desquelles vous adrez copie avec la presente. Elles sont onze en nombre, comme vous verrez, & telles que nous en auons pour vn bien long-temps; aussi semblēt elles auoir esté tissües, & embrouillées pour gagner temps, & tirer l'affaire en longueur. Les quatre poincts que la Sainteté proposa du commencement de cēt affaire estoient bien autrement à propos, desquels il vous pourra souuenir que le premier estoit, si le Pape pouuoit dispenser vn tel cas que le nostre; le second, si en ce cas il y auoit cause iuste & suffisante pour dispenser; le troisieme, s'il estoit expedient d'y dispenser; le quatrieme & dernier, s'il se trouuoit des exemples que les Papes eussent autresfois dispensé en cas semblables. Sur lesquels points aussi nous discourusmes & escriuismes suffisamment, cōme vous aurez veu par les escritures que ie vous ay enuoyees cy-deuāt. Mais par ces onze dernieres questions, il semble que l'on cherche des nouës auions; & le pire est que pour obtenir la dispense, il faudroit que ces onze questions fussent decidees en nostre faueur, là où si nous en perdons vne nous aurons perdu le tout. Outre que quand nous les aurions gagnees toutes, on en peut cy-apres faire naistre de chacune plusieurs autres: comme de fait toutes ces onze ont esté forrees sur le premier des susdits quatre poincts que la Sainteté proposa du commencement, à sçauoir si le Pape pouuoit dispenser en ce cas. Et tendent toutes onze à monstrier qu'à cause que ledit mariage est vn des sept Sacramens, & que Madame de Bar ne le croit point, le Pape commettroit vn grief peché en accordant ceste dispense, & par consequent qu'il ne la peut donner, iacoit qu'en la premiere Congregation des Cardinaux, qui se tint sur ce fait le dernier iour d'Aoust 1602. il fut resolu par tous vnanimement que le Pape pouuoit. Or ie vous laisſe à penser si apres auoir esté ainsi resolu que

Le Pape pouuoit, on a neãtmoins esté si ingenieux & industrieux que de controuer ces onze questions contre ceste puissance du Pape mesme, & contre la memoire de ses predecesseurs qui vray semblablement ont donné de telles dispenses, comme vous auez veu cy dessus que nous en auons desia de tres-grandes coniectures, quels doutes & difficultez n'inuenteroient ils contre nous sur les causes de la dispense, & sur les autres poincts qui pourroient estre tournez à nostre des-faveur, sans que l'autorité du Pape y soit interessée. Mais qu'est il à faire maintenant. Je ne sçay bonnement car si nous ne faisons disputer les onze questions susdites, & laissons nos gens en paix, nous ferons ce qu'ils veulent, & encore diront-ils que nous aurons desisté pour defiance de la iustice de nostre poursuite, & que nous confessions tacitement que l'on a eu raison de nous refuser ceste dispense, à laquelle nous nous sommes si long temps opiniastrés. Que si au cōtraire nous sollicitons, & faisons disputer lesdites onze questions, outre que nous leur apprenstons à rire, & nous nous ferons tenir pour gens simples qui ne nous aperceurons que tout cecy n'est que pour allonger, ils s'attacheront à tout ce qui se pourra decider contre nous, & feront naistre encores d'autres difficultez sur celles-cy, & n'y aura iamais fin. En ceste perplexité donc il me semble, & ie l'ay ainsi dit à Monsieur l'Ambassadeur, que sans y faire pour ceste heure autre chose que nous plaindre, nous devons attendre le retour dudit Pirotis, & voir ce qu'il nous apportera, comme aussi ce qu'il plaira au Roy de nous commander sur tous ce que dessus; & si ledit Pirotis, nous apporte certitude de ladite dispense du Pape Gregoire XIII. fonder nostre poursuite là dessus, sans faire disputer lesdites questions, ny nous mettre aux hazard de la subtilité & inuentions de ceux qui nous sont contraires. Que si ledit Pirotis s'en retourne, sans auoir trouué rien de plus que ce que nous auons icy audialliure du feu Cardinal Contarel, encores faudra-t'il bien y penser auant que de nous engouler en ceste mer de difficultez & cauillations, qui n'aura ny fond ny riuie. Bien suis ie-d'auis neantmoins qu'entre cy & le retour dudit Pirotis, & encores apres, nous estudions & facions estudier lesdites onze questions pour nous preparer en tout euenement. Auquel propos il me vient en l'esprit que vous auez par delà de grands Theologiens, à aucuns desquels, i'entends des plus ciuils, vous pourriez s'il vous semble faire bailler copie desdites onze questions, & en retirer leur aduis par escrit, duquel nous nous seruiron par deçà en ce qui seroit pour nous. C'est ce qui me semble pour ceste heure, & tout ce que ie puis escrire pour le present sur le fait de nostre poursuite. Nous irons pensans de iour en iour s'il s'y pourra faire mieux, & vous aduertirons de tout, Dieu aydant, lequel ie prie qu'il vous donne, Monsieur, &c. De Rome, ce 28. Iuillet, 1603.



## A MONSIEVR DE VILLEROY.

CCCXLIV.

**M**ONSIEVR, Vous avez esté aduertty plusieurs fois par M<sup>o</sup> sieur de Bethune de ce qui s'estoit passé entre luy & moy d'une part, & Monsieur le Cardinal d'Este d'autre, pour acquerir & asseurer au Roy ledit Seigneur Cardinal; par ainsi ie ne vous en feray point icy de redite. Mais continuant les derniers erremens dudit sieur Ambassadeur, ie vous diray que le seigneur Comte Alfonse Fontanella, qui fait en coste ville les affaires dudit seigneur Cardinal, & luy est très-confident, & sçait tout ce qui s'est passé entre nous, vint à moy le 16. de ce mois, & me dit que ledit seigneur Cardinal, qui est à Modena, par ses dernières lettres luy auoit commandé de venir vers moy me baïser de sa part les mains, car ainsi parloit-il, & m'asseurer qu'il estoit à son deuoir quant à ce que ie sçauois, me priant de la faire entendre aussi audit sieur Ambassadeur. Je pris cela pour vne denonciation qu'il estoit prest maintenant à receuoir le bien qu'il plairoit au Roy luy faire; suivant ce que nous auons arresté ensemble, qu'il le nous feroit sçauoir quand il en seroit temps. Mais d'autant que Monsieur l'Ambassadeur & moy n'auons rien de présent pour luy offrir de la part de sa Maïesté, ie ne fis pas semblant d'ainsi entendre ledit propos, ains le prenant simplement à la lettre ie luy respondis que c'estoit la plus agreable nouuelle que Monsieur l'Ambassadeur & moy pourrions escrire au Roy, comme elle estoit aussi digne du nom & du sang d'Este, & de la vertu & constance particuliere dudit seigneur Cardinal, de laquelle sa Maïesté & nous ses seruiteurs estions tous asseurez, & n'en donterions iamais. En faisant de necessity vertu, & me seruant de la modestie du langage dudit seigneur Cardinal & de son messager, i'adioustay aussi que Monsieur l'Ambassadeur & moy n'attendions que le moindre signe qu'il nous feroit, pour luy faire plus expresse & plus essentielle declaration de la bonne volonté du Roy enuers ledit seigneur Cardinal, ne vouläs rien faire mal à propos ny hors tēps, ains le feroit quand & comme il luy plairoit. A quoy ledit Comte Alfonse respondit seulement qu'il ne se pouoit mieux dire. Et moy pour ne m'arrester trop sur cela, & pour aussi ne m'en esloigner gueres; ie luy demāday en quel estat estoit à present l'affaire de Sassuolo ( car c'est sur cēt affaire que ledit seigneur Cardinal fonde sa requeste qu'il nous fît de differer à luy offrir de la part du Roy ) & ledit Cōte Alfonse me respondit que cēt affaire n'estoit encores accordé, mais qu'on y trauailloit tousiours. Apres cela ie luy demanday si mōdit sieur le Cardinal viendroīt à Rome l'automne prochain; & il me respondit qu'ouy, & principalement si le seruice du Roy le requeroit. Il me demāda aussi de son costé si M<sup>o</sup> sieur le Cardinal de Toyusse viendroīt; ie luy respondis qu'ouy, & qu'une partie de ses gens estoient desia arriuez icy. Et apres que nous eusmes tenu quelques propos, ledit

Comte

Comte d'Alfonse se partit en me priant derechef de faire sçauoir à Monsieur l'Ambassadeur que le Cardinal d'Este estoit à son deuoir. Or si vous souuenez comme les choses se font passées à plusieurs fois, & de ce que le Roy auoit escrit par deçà, vous iugerez que quoy que sa Maiesté vneille faire pour le regard d'autres Cardinaux, la chose n'est point en entier pour le regard dudit seigneur Cardinal d'Este, puis qu'il a esté recherché de la part du Roy, & qu'il a donné sa parole, & qu'en ne luy a jamais donné intention de moins que de quatre mille escus par an en pension ou benefice. Ains quand il nous fit prier de différer, nous respondîmes qu'à toutes les fois qu'il voudroit, il trouueroit outre vne bonne Abbaye ia vacante qui luy auoit esté destinee, les fruits perçus depuis la vacance qui luy auoient esté reseruez, cōme nous pensions à lors Monsieur l'Ambassadeur & moy. Aussi iugerez vous de quelle importance il est au seruice & reputation du Roy, non seulement pour ledit seigneur Cardinal, mais aussi pour toute ceste Cour, que les choses promises soient accomplies, & que pour y faillir, nous ne perdions vne si belle & si vtile acquisition que celle dudit seigneur Cardinal. Je vous confesse que i'y suis aucunement intéressé, pour ce que ledit seigneur Cardinal ne voulust engager sa parole sans auoir la mienne, laquelle ie donnay sur ce que ie vis que le Roy auoit escrit de delà. Mais comme c'est la premiere que i'aye donnée en tel cas, aussi vous assurey ie bien que la seconde est bien loin, & ne se laissera ouyr de long-temps. Ce nonobstant l'intérêt du seruice & de la reputation du Roy m'est plus que moy-mesme, & que toutes les autres choses du monde. Je vous prie de lire la presente à sa Maiesté, pour fin de laquelle, &c. Monsieur, &c. De Rome, ce 29. Iuillet, 1603.

## A MONSIEVR DE VILLEROY.

CCCXLV.

**M**ONSIEVR. Tout au commencement de vostre lettre du 14. Iuliet que ie receus le 3. de ce mois, i'ay trouué ce que plus ie desirois, qui est la bonne santé du Roy, dont ie loue Dieu, & la prie de la luy conseruer à longues années, comme aussi i'elay ie la digne bonté des bonnes nouvelles que Monsieur de Rosny a apportées d'Angleterre, & la prie de disposer & dresser les choses de mieux en mieux. Depuis ma dernière, qui fut du 28. Iuillet le Pape m'a enuoyé en deux diuerses fois deux escritures, faites par deux diuers Theologiens sur les onze questions que ie vous enuoyay avec ma dite dernière lettre, en quoy le Saint Pere nous oblige grandement, nous donnant moyen de nous ayder de ce qui est pour nous, & de respondre à ce qui s'y trouue contre. Le gratis de l'Abbaye de Bourg Dieu fut demandé par Monsieur l'Ambassadeur le Vendredi premier iour de ce mois, dont il vous rendra compte, & ie finisay la presente, n'ayant autre chose à vous écrire, &c. Monsieur, &c. De Rome, ce 11. Aoust, 1603.

PPPP

## A MONSIEUR DE VILLEROY.

CCCXLVI.

**M**ONSEVR, Par la lettre qu'il vous a plu m'escrire le vingt-huictiesme Iuillet, que me fut renduë le douzième de ce mois, il semble que vous auez quelque esperance qu'en la premiere Congregation que le Pape tiendroït sur la dispense du mariage de Monsieur & de Madame de Bar il s'y resouldroit quelque chose de bon & de fauorable; mais vous aurez veu tout le contraire par mes lettres du quatorzième & vingt-huictiesme Iuillet; dont ie ne vous feray icy aucune repetition, & vous diray seulement deux choses qui appartiennent à cét affaire. L'une que Maître Nicolas Pirotis, qui a esté enuoyé au pays des Grisons, où il auoit trouué en vie vne des deux sœurs Catholiques qui furent mariees à deux freres heretiques leurs parés, pour chercher la verification de l'exemple d'une semblable dispense, dont ie vous escriuis bien particulierement par ma lettre du vingt-huictiesme Iuillet, a escrit de Milan du treizième de ce mois, qu'il auoit esté à Gaspano au pays des Grisons, où il auoit trouué en vie vne des deux sœurs Catholiques qui furent mariees à deux freres heretiques leurs parés entre les trois & quatrièmes degrez; laquelle auoit deposé par dedant Notaires & tesmoins, que du commencement de son mariage, son Curé luy denia la Communio pour quelque temps, à cause qu'elle s'estoit mariee à vn sien parent en degré prohibé par l'Eglise: & qu'apres ledit temps ledit Curé luy dit, qu'on auoit enuoyé de Rome ce qui luy estoit necessaire, & luy donna l'absolution, & de là enuoyé la receut à la Communio. Adionsle ledit Pirotis, qu'à Como, au Diocèse duquel est ledit lieu de Gaspano, il n'auoit rien trouué; qu'il ne faisoit qu'arriuer à Milan, & y chercheroit diligemment, & s'en viendrait avec ce qu'il auoit trouué. Voyla la premiere chose que i'auois à vous escrire, à laquelle si vous conioignez ce que ie vous escriuis ledit iour vingthuitiesme Iuillet, vous iugerez que ce qui auoit esté enuoyé de Rome estoit la dispense, sans laquelle le Curé eust continué à refuser la Communio à ladite femme comme il auoit fait auparavant. Mais ie crains que ces gens icy n'e voudront rien croire. L'autre chose est; que le Pere Monopoli Capucin, qui est vn des quatre Consultants, & auquel le Pape croit fort en telles matieres, a dit à Monsieur Camaiano qu'il me dist de sa part, & à Monsieur l'Ambassadeur aussi, que si Madame sœur du Roy enuoyoit son ministre d'avec elle, il s'assureroit & mettroit sa teste que le Pape ne l'ordonneroit la dispense, quand bien madite Dame ne se convertirait point; mais sans cela il ne la donneroit point, & qu'il falloir donner cela si on le vouloit, & cette affaire ou couleur à sa Sainteté. Ledit Pere Monopoli s'est offert au sieur Camaiano de le nous venir dire luy-mesme, si nous le mandions; qui me donne à penser que le Pere mesme consent à ce qu'il le nous dise, & soit qu'apres cela mesme ne tiendrois point la dispense pour ceste Dame, & voy qu'il refuse de l'offrir, nous donnerons nous-mesme excuse à la denegation qu'on nous fera

Et apres de ladite dispense, ce que ie voudrois que nous eussions. Que si ceux qui ont besoin & demandent des graces, ne veulent point s'ayder ny risquer s'ils n'obtiennent point ce qu'ils demandent. L'ay esté bien aise d'entendre par vostre dite lettre que Monsieur le Cardinal de Joyeuse deuoit partir dedans peu de iours, & prie Dieu qu'il luy donne bon & heureux voyage, & qu'il apporte des moyens pour acquerir des seruiteurs au Roy, comme l'on s'y attend. L'occasion d'enuoyer par deçà avec luy le fils de Monsieur de Chasteau-neuf nommé à l'Euesché d'Orleans a esté tres-bien prise: & ie seruiray ledit sieur nommé de tout mon pouoir, comme i'y suis tres-estroitement obligé, quand ce ne seroit que pour vostre respect à qui ie me dois moy-mesme. Il m'a fait beaucoup d'honneur en me dedicant ses theses, & en les defendât si bien, comme ie suis aduertý qu'il a fait: aussi luy monstreray ie par effect que ie n'estime rien tant comme la vertu, & les fruíts d'un tel esprit, industrieux, & remply de la cognoissance des bonnes lettres & sciences. Les pensionnaires del'Euesque de Montpellier feront tousiours tout ce qu'il vous plaira: mais il sembleroit aussi que s'ils ont à se contenter d'estre payez à Lyon, l'Euesque leur en deuroit donner quelque assurance: car si apres s'estre départis du droict qui leur est acquis par l'ordennance de nostre saint Pere, ils auoient encores à plaider avec l'Euesque pour estre payez audit Lyon, il vaudroit autant qu'ils se reseruassent leur droict entier, & plaidassent pour le tout comme pour vne partie. A tant ay-je respondu à vostre lettre du vingt-huictiesme Iuillet. Au demeurant, Monsieur le Cardinal de sainte Cecile m'a requis d'enuoyer au Roy & à la Royne deux lettres qu'il leur escrit, lesquelles feront avec la presente: c'est pour des reliques qu'il desire auoir, comme il est fort deuot. Le Roy l'obligeroit grandement s'il le gratifioit de ce qu'il luy demande: mais s'il ne se peut, ie vous supplie neantmoins qu'il ait vne hõeste responce de leurs Maiestez, avec des excuses courtoises & gracieuses: & vous plaira de vous souuenir de suscrire les lettres au Cardinal de sainte Cecile, & non au Cardinal Sfondrat, car il ne veut nouuellement estre appellé de son surnom, mais de son titre seulement.

Le General de l'ordre des Cordeliers estant au chemin d'Allemagne, a entendu quelque desordre aduenu en la Prouince de Guienne entre les siens, & pource il a dépesché en France vn Religieux son Secretaire, appelé frere Paullo del Lago, que vous auez veu autre fois avec le General precedent. Ce religieux est fort honneste homme & capable, & se monstre affectionné à nostre nation, & en ce qui concerne sa personne propre, ie luy desire tout contentement, & vous prie de l'auoir pour recommandé, & quand il vous ira voir luy monstrer que ie vous ay escrit en sa faueur: mais au reste ie n'entends point m'entremettre en ces querelles des Cordeliers de Guienne, desquels ie suis tres-bien informé, & sçay que les vns & les autres ont tort, & que la matiere de leur discorde n'est qu'ambition, enuie, beine, & vengeance entr'eux. Ils ont tous voué obedienee, mais il n'y en a pas vn qui venille obeir tous veulent estre maîtres, & loger à l'enseigne du monde renuersé: par ainsi ie ne sçay quoy pour lesquels vous escrire. Bien vous recommanday-je les Pères Recollets, qui n'ont nulle part en ces discorde & diuisions, & qui

**LETTRES DE MONSIEVR,**  
gardent leur regle. Et d'autant que ie sçay que le Pere General ne les ayme point, ie vous prie que si vous donnez quelque pouuoir à celuy qui vous est enuoyé par ledit Pere General, ou à luy mesmes s'il va en Frâce, il vous plaise que ce soit avec exception & limitation qu'il n'en pourra vser contre lesdits Peres Recollets, au preiudice des bulles & brefs qu'ils ont obtenuës icy du Pape, ny des lettres patentes que le Roy leur a octroyees, vous assurant que sa Sainteté porte & affectionne de plus en plus lesdits Recollets, & la reformation de tous ordres, & que sa Maiesté & son Conseil luy feront grand plaisir de continuer à fauoriser & proteger ces bons Religieux. A tant, &c. Monsieur, &c. De Rome ce 16. d'Aoust 1603.

---

A MONSIEVR DE VILLEROY.

CCCXLVII.

**M**ONSIEVR, Par la lettre qu'il vous a pleu m'escire le 12. iour d'Aoust, i'ay appris la responce que le Roy vous fit touchant la resignation de l'Euesché de Bayeux, sur quoy i'ay à vous dire que ie ne desire m'accorder, sinon qu'autant qu'il plaira à sa Maiesté, & pour employer le tout à son seruice. Mais puis que cet accommodement a à despendre d'un accord de personnes de diuerses humeurs, & de contraires intentions en une matiere fort ialouse, il sera fort casuel, & la fortune, qu'on appelle, aura bonne part en ce que ie voulois deuoir du tout à la seule bonté du Roy. J'attendray donc ce que le sort apportera, disposé & desireux seulement de n'estre tenu long-temps. Cependant ie vous remercie bien humblement & de toute mon affection, de ce qu'il vous a pleu & vous plaist encores y faire cy-apres, vous suppliant de croire que ie suis plus content, & me sens plus honoré de la faueur & protection qu'il vous plaist me departir tant en cecy qu'en toutes autres choses, que ie ne ferois de toutes les commoditez qui se pourroient tirer de toutes les Eueschez de France, quand bien elles se pourroient reduire toutes ensemble, A tant, &c. Monsieur, &c. De Rome, ce 8. Septembre, 1603.

---

A MONSIEVR DE VILLEROY.

CCCXLVIII.

**M**ONSIEVR, I'auois preuoy-mesme le desplaisir que le Roy aueroit du succès de la dernière Congregation tenue deuant le Pape, sur la dispence du mariage de Monsieur & de Madame de Bar, dont vous m'escrimez par vostre lettre du 12. d'Aoust que ie receus le 3. de ce mois. Mais la verité est, cōme ie vous ay escrit plusieurs fois, que le Pape en telles matieres ne peut faire vne resolution contre l'aduis de la plupart des cardinaux

de la Congregation, lesquels pensent ſçauoir autant de Theologie, & des autres chofes de la religion comme Madame ſœur du Roy, & iugent plus raifonnable qu'elle ſ'accomode à l'autorité du S. Siege & de l'Eglife, & à l'exemple du Roy ſon frere, & au beſoin & neceſſité de Monſieur ſon mary, & à ſon propre deſir & affection, que non pas que le S. Siege, & le Pape, & toute la Cour de Rome ploient ſoubs les fantaifies d'une femme errante. Que ſi elle allegue ſa conſcience, ils diſent qu'ils ont auſſi la leur à garder, & encores infinies autres ames dont le regime & gouuernement leur eſt commis de Dieu. Ce ſont les propos qu'ils nous tiennent ordinairement; & ie ne doute point qu'une grâde partie de ceux qui nous ſont contraires ne recognoiſſent en leur cœur la force de nos raiſons, & que la diſpenſe ſe pourroit donner, mais il leur eſt aduis que ce ſeroit une trop grande indignité que de ſe monſtrer moins fermes & conſtans à procurer ſa conuerſion, qu'elle à tenir ſon cœur. Vous luy auez tres-bien reſpondu à ce qu'elle vous a dit des Eſpagnols: à quoy j'adiouſte que les ennemis du Roy & d'elle, ſoyent ils Eſpagnols, Sauoyards, ou autres, ſont tres-aiſes & ſe rient de tout ce qu'ils y ſçauent ou penſent de mal, & ſeroient tres-marris de la voir Catholique & mariee canoniquement, & elle ne leur ſçauroit faire vn plus grand déplaiſir, ny ſe vanger mieux d'eux que de ſe remettre au giron de l'Eglife Catholique, & rendre ſon mariage canonique, & les enfans qu'il plaira à Dieu luy donner legitimes & indubitables ſucceſſeurs de la maiſon de Lorraine, & ceſte conſideration parmy d'autres plus grâdes, deuroit auoir une grâde efficace enuers vn cœur ſi genereux & magnanime que le ſien. Le ſieur Nicolas Pirotis eſt de retour de ſon voyage, ſans auoir rien trouué à Milan. Outre ce que ie vous eſcriuis dernièrement de la dépoſition d'une des d'eux ſœurs Catholiques qui s'eſt trouuee en vie au lieu de Gaſpano au pays des Griſons, il a encores apporté une autre dépoſition d'un vieil Docteur Catholique du lieu meſme, qui a attesté la meſme choſe, & encores une certificatiō comme deux autres femmes Catholiques, mariees à deux heretiques leurs parens de degré prohibé par l'Eglife en vn autre lieu deſdits Griſons appellé Sôdrio, auoient eſté par ordonnance de Monſieur le Cardinal Borromeo abſoltes & admieſſes à la Communion: ce qui ne peut auoir eſté ſans diſpêſe du Pape, & pouuoir donné par le S. Siege audit feu ſieur Cardinal Borromeo. Nous ferons valoir autant cecy comme il nous ſera poſſible. Le Pape a deſia veu le tout, & monſtre en faire cas. Auſſi l'ont veu tous les Cardinaux de la Congregation chacun à part. L'eſtime qu'il y a de quoy ſe contenter. Nous verrons comme les autres le prendront, & vous ſerez aduertie de tout ſe qui ſ'y paſſera. Quand au faiet des Ieſuites, & des facultez de la Legation de Monſieur le Cardinal de Lorraine, ie n'ay rien qu'adiouſter à ce que ie vous en ay eſcrit cy deuant, & n'ayant autre choſe à vous eſcrire ie finiray icy la preſente. Monſieur, &c. De Rome ce 8. Septembre 1603.

A V R O Y.

CCCXLIX.

SIRE,

Les Chanoines & Chapitre del'Eglise de saint Iean de Latran à Rome pretendent que la Couronne de France depuis Louys XII. leur est redevable de plusieurs biens & reuenus, & en monstrent & sont prests à monstrier des titres & enseignemens qu'ils ont ia autrefois faits voir au Conseil de V. M. avec espoir de quelque recompense; pour aduiser des moyens de laquelle & icelle obtenir, ils enuoyent vers V. M. vn de leur compagnie. De plusieurs moyens de les recompenser aucunement qui ont esté mis en auant, il semble qu'vn des moins difficiles & moins incommodes seroit, s'il plaisoit à V. M. faire vnir à ladite Eglise le reuenu d'vne ou deux Abbayes situées es pays de vostre obeyssance les plus prés d'Italie; & que dudit reuenu vne partie fut conuertie en augmentation des fruiets & reuenus de ladite Eglise, pour estre commune à tous ceux qui y participent, & de l'autre partie fussent fondees vn nombre de portions, comme dix ou douze, qui soient affectées à autant de Chanoines de ladite Eglise Gentilhommes Romains, pourueus à la presentation de V. M. & des Rois ses successeurs, dequoy semble qu'il aduiendroit plusieurs biens. Premièrement, vostre Maiesté acquitteroit ceste pretention, & donneroit satisfaction ausdits Chanoines & Chapitre, & au Pape mesme, & à toute la Cour de Rome, & correspondroit au zele que ceste venerable compagnie a tousiours monstré enuers la Couronne, ayant au plus fort des guerres & des calamitez de la France tousiours tenu sur la porte de ladite Eglise les armoiries de France, sans y auoir iamais voulu souffrir celles d'Espagne, quelque instance & presse qui leur en ait esté faite. Secondement vostre Maiesté, & tous vos successeurs, & le Royaume mesme participeroient au fruit de tous les suffrages, prieres & oraisons, qui se feroient à iamais en ladite Eglise, qui est vn bien inestimable. Tiercement, vostre M. en augmenteroit le nom & la loüange du Roy pie & deuotieux, & bien facteur enuers les lieux pies, & mesmement en faisant du bien à ceste Eglise, qui est la Patriarchale de Rome, & la premiere de toute la Chrestienté; & par ainsi frapperoit vn grand coup sur ses ennemis & detracteurs. Quartement, s'acqueroit des seruiteurs à Rome, obligeant non seulement ceux qu'elle presenteroit ausdites portions par elle fondees, mais aussi leurs familles, qui setiendroient honorees d'vn tel bienfait; de sorte que ceste fondation vous vaudroit à Rome autât comme deux ou trois Cardinaux à vostre deuotion & seruice. Et aduenât vacation à l'aduenir de l'vne desdites portions, autant de fois que V. M. & ses successeurs y presenteroient vn desdits Chanoines Gentil-homme Romain, ce seroit autant de fois faire commemorer & celebrer par tout Rome les Rois & la

Gouronne de France. A tant, &c. Sire, &c. De Rome, ce 9. Septembre, 1603.

## A MONSIEVR DE VILLEROY.

CCCL.

**M**ONSIEVR, l'ay esté tres-aïse d'entendre par vostre lettre du 25. d'Aoust, que ie receus le 10. de ce mois, qu'il vous ait plu lire au Roy la lettre que ie vous escriuis le 29. de Iuillet touchant monsieur le Cardinal d'Est, & que monsieur le Cardinal de Loyeuse en deuoit apporter la resolution de sa Maïesté; & louë grandement vostre maxime, Qu'il est meilleur d'acquiescer moins de seruiteurs, & les bien traiter & asseurer, que d'en rechercher plusieurs ensemble à demy.

Ie n'ay rien que repliquer à ce qu'il vous a plu me respondre touchant les onze questions que le Pape veut estre disputees sur la dispense du mariage de Monsieur & de Madame de Bar, puis que toutes choses y sont conformes à ce que i'en estime de moy-mesme, & à ce que ie vous en auois écrit. Mais quant à l'exemple des deux sœurs Catholiques mariées à deux freres heretiques, leurs parans entre le 3. & 4. degré de consanguinité, i'ay à vous dire que le liure de feu monsieur le Cardinal Contarel, dont ie vous fis mention, n'est pas vn registre comme vous l'auiez interpreté par delà; aussi me suis-je bien gardé de l'appeller ainsi en ma lettre du 28. iour de Iuillet. C'est vn liure auquel pour son contentement & vsage particulier il assembla, & fit relire les minutes des plus notables & des plus rates expeditions qui estoient passées par ses mains luy estant Dataire, & depuis qu'il auoit eu la signature des brefs. Que si c'eust esté vraiment & proprement vn registre pour seruir de tesmoignage public, & faire foy à l'aduenir de l'expedition de telles matieres, comme sont les registres des Notaires, Tabellions, Greffiers, Secretaires, & tels autres, ie n'eusse point en vous escriuant obmis ceste qualité & circonstance si importante, qui aussi nous eust apporté gain de cause, sans qu'il eust esté besoin d'envoyer au pays des Grisons pour chercher autre liure de ceste expedition. Mais pource que ledit liure n'est point vn registre, & que ladite minute inserée audit liure n'est point dattee, on se permet de douter si elle fut vraiment expedice, ou si ce fut seulement vn projet de chose qui n'auoit point d'expedition entiere, comme quelquefois on minute & grossoye en la Cour du Roy des lettres patentes qui ne passent point, & demeurent sans estre despeschees. Pour ceste cause, & pource qu'en la secretaire du Pape ne se trouue rien de ceste expedition, il a fallu enuoyer sur les lieux, pour sçauoir si le bref authentique se trouueroit; ou quelque copie collationnée à l'original, ou quelque autre chose qui peult seruir à prouuer qu'il aye esté vraiment expedice & executé. Il a esté trouué ce que ie vous ay escript cy deuant, & nous cherchons encore d'autoriser par bonnes raisons ladite minute trouuée audit liure, & de luy acquiescer toute la foy



& credit qu'il nous est possible, comme vous verrez par vne esécriture que i'en ay dressée pour estre baillée au Pape & aux Cardinaux. Sa Sainteté a promis de tenir la Congregation au plustost sur ces exemples, auât que proceder à aucun autre acte en cét affaire, & vous ferez aduertis de tout ce qui s'y fera. Cependant le Roy par les raisons par vous deduites a tres bien fait de n'enuoyer homme exprés pour cét affaire, iacoit que Madame sa sœur l'en requist.

I'ay veu les copies de la lettre du Duc de Sauoye au Roy, & de la réponse de sa M. audit Duc, & ay leu tres volontiers l'apostille de vostre main, que vous ne lairrez pour cela de prédre garde à toutes choses. Le Duc de Sauoye est vn homme duquel il se faut douter plus lors qu'il monstre de bien faire. Il n'a donné cét aduis au Roy, que pour le soupçon qu'il a eu que celuy qui s'offroit à luy eust esté aposté pour le tenter, & puis le faire sçauoir au Roy. Item pour couurir les assassinats qu'il a si fort machinez, & pour mieux acheminer & faciliter ceux apres lesquels il est tousiours.

Monsieur de Cherelles est encore icy à cause du grád chaud qui dure tousiours, & l'affaire du Bourg-Dieu est tellement depesché, que l'expeditionnaire m'a dit qu'il en enuoyera par cét ordinaire les bulles; qui est ce que j'auois à respondre à vostre lettre du 25. Aoust.

Au demeurant, i'obtins du Pape Mercredy dernier 17. Septembre moderation de l'expedition de l'Euesché de Dol à la somme de mille escus, où il en alloit six mille à la vigueur, & le M O R V P A P O R 2 1 0 en fut signé le lendemain. Et le Mercredy au parauant 10. de ce mois, ie parlay à sa Sainteté de Prieuré des Religieuses de Montargis de l'ordre de S. Dominique, & luy en laisay vn memoire par escrit que i'en auois dressé, de la tenenr que vous verrez par vne copie qui accompagnera ceste lettre. Sa Sainteté me dit qu'il en vouloit parler au General de l'ordre. Et de fait, i'ay sceu depuis que sa Sainteté aobitenuoyé ce memoire au Pere General, luy enioignant de luy en parler. L'enuoyay vers ledit Pere General pour le prier que lors qu'il en parleroit à sa Sainteté, il se souuint de ce qu'il m'auoit fait dire qu'il auoit eserit au Roy, & leudy 18. de cemois i'enuoyay sur le soir pour sçauoir s'il auoit eu commodité d'y parler, & il respondit & dit qu'il auoit parlé ce iour-là mesme au matin, & auoit compté tout le fait au Pape, lequel n'y auoit pris aucune resolution, & auoit seulement dit que ce seroit grand chose de dōner à des Religieuses vn Prieuré pour toute la vie sans eslection. C'est vn affaire qui ne se peut obtenir à vne fois, il faudra que j'en parle au Pape, & au General aussi, ce que ie feray, Dieu aydant, autant de fois que besoin fera.

Le seigneur Siluestre Aldobrandin aagé de quatorze ans, fils du feu seigneur Jean François Aldobrandin qui mourut au siege de Canke, & de la signora Olympia Aldobrandina. sœur de monfieur le Cardinal Aldobrandin, fut fait Cardinal seulen Consiatoire secret Mercredy des quatre temps, 17. de ce mois. Le bonnet luy fut donné par le Pape en sa chambre le Vndredy 19. & le chapeau en Consiatoire public le Samedi 20. Ce que ie vous escris, pour estre chose de Consiatoire, & faite moy present. A quoy j'ay presté, & ay, que lors que le Pape le proposa le dit iour Mercredy, il y eut vn Cardinal qui

qui ne fut point d'aduis de ceste promotion, alleguant le Concile de Trente. Sess. 24. au titre de la reformation, chapitre 1. où il est porté que le mesme aage, doctrine, & autres qualitez qui sont requises és Euesques, doiuent aussi estre és Cardinaux qui sont créés, bien que Diacres seulement. Ce Cardinal fut le Cardinal de sainte Cecile, autrement Sfondrat. A tant, & c. Monsieur, & c. De Rome ce 22. Septembre, 1603.

## A MONSIEVR DE VILLEROY.

CCCLI.

**M**ONSIEVR, Par le precedent ordinaire ie respondis à vos lettres non seulement du 25. iour d'Aoust, mais aussi du 7. Septembre, laquelle dernière ie receus comme l'acheuois de respondre à celle du 24. d'Aoust: mais i'oubliai à vous remercier des trois breuets qu'il vous auoit pleu obtenir, expedier, & m'enuoyer pour trois nepueux de monsieur Perrin Soudsdataire de nostre S. Pere, & maintenant auant toutes choses ie vous en remercie de toute mō affection, vous assurant que ceste grace est bien employee enuers ledit sieur Perrin, auquel cependant vous auez voulu monstrier que i'auois quelque part au bien & honneur que le Roy luy faisoit. C'est vostre coustume de faire toutes choses au mieux qu'elles se peuuent, & en vn bien que vous faites à quelque honneste homme, en obliger encore d'autres avec luy.

Depuis mes dernieres le Pape a tousiours esté absent de Rome, qui est cause qu'il ne s'est peu rien faire au fait de la dispense du Mariage de Monsieur & de Madame de Bar, ny aussi l'affaire du Prieuré des Religieuses de S. Dominique les Montargis; mais tout aussi tost que sa Sainteté sera de retour, il y sera trauaillé diligemment. Nous auons nouuelles comme Monsieur le Cardinal de Joyeuse est par les chemins de Venise icy, & l'attendons pour enuiron le 12. de ce mois, & demain partira monsieur de Cherelles pour s'en retourner vers vous. Le sieur Goeffier secretaire de monsieur de Bethune ayant entendu ce qui doit estre de monsieur d'Alincourt vostre fils d'icy à quelque temps, desireroit auoir le bien & honneur de le seruir aussi de Secretaire comme il sert à present monsieur de Bethune, & n'a requis de vous faire entendre ce sien desir de bonne heure, lequel office ie ne luy ay peu refuser. Mais comme ie le fais fort volontiers, le tenant pour vn fort honneste ieune homme, & croyant qu'il fera bien sa charge, aussi n'entends-je vous requerrir de rien, & moins vous conseiller là dessus, n'ayant autre cognoissance de ce qu'il scait faire, & vous qui en voyez tous les quinze iours pouuant en iuger trop mieux que tout autre, & outre la capacité, ayant à mettre en consideration beaucoup d'autres circonstances en vne charge de telle importance: qui est tout ce peu que ie puis vous escrire pour ceste heure, me recommandant bien humblement à vostre bonne grace, Monsieur, & c. De Rome, ce 6. Octobre, 1603.

QQQQ

A MONSIEVR DE VILLEROY.

CCCLII.

**M**ONSIEVR, Le vous escriuis hier par l'ordinaire, ce neantmoins ie n'ay voulu laisser aller Monsieur de Cherelles sans qu'il vous portast vne de mes lettres, luy estant vn de mes anciens amis, & vostre tres-humble & tres-affectiôné seruiteur, ce qui adioust beaucoup à l'amitié que ie luy porte d'ailleurs. Mais au reste ie n'ay que vous escrire par luy: car outre que ie ne me suis rien reserué cy deuant, il vous pourra dire des choses d'icy plus que ie ne sçauois vous en escrire. De vous le recommander, ce seroit bien chose selon mon cœur, mais au reste impertinente, puis que vous luy faites l'honneur de luy vouloir bien. Je me contenteray doncques de vous prier, comme ie fais tres-affectueusement, que lors qu'aux occasions vous vous mouuerez vous mesme à faire quelque chose pour luy, il vous plaira vous souuenir encor de moy, pour en faire quelque chose de plus s'il est possible, & que ie participeray à l'obligation qu'il vous en aura, pour vous en rendre bien humble seruiteur en tout ce qu'il vous plaira me commander. A tant, &c. Monsieur, &c. De Rome ce 7. d'Octobre, 1603.

A MONSIEVR DE VILLEROY.

CCCLIII.

**M**ONSIEVR, La lettre que vous m'escriuistes de Beaumont le Rogier le 22. de Septembre, me fut renduë le 10. de ce mois, au commencement de laquelle vous me representez les inconueniens qui sont pour aduenir si monsieur le Duc de Bar est esconduit de la dispense qu'il demande. Il y a long temps que nous les auons representees icy, & vous l'avez peu voir bien au long es escritures que ie vous ay cy deuant enuoyees. Nous continuerons tousiours de bien en mieux, & sommes à present sur le point d'en recueillir le fruit, ou d'en perdre du tout l'esperance. Depuis le retour du sieur Pirotis, ces exemples par luy trouuez es pays des Grisons semblent nous promettre quelque chose de mieux. I'ay dressé vne escriture sur iceux, & attends à la vous enuoyer iusques à ce qu'elle ait esté baillee au Pape & aux Cardinaux de la Congregation. L'absence de sa Sainteté de Rome a esté cause qu'il ne s'y est rien fait depuis ma dernière lettre.

Le 13. de ce mois monsieur le Cardinal de Ioyeuse, dont vous faites mention en vostre lettre, arriua en ceste ville. Sa presence apportera aux affaires & seruice du Roy grand aduancement. Et en sa compagnie est arrivé vostre nepueu nommé à l'Euesché d'Orleans, auquel i'ay offert, & rendray effect tout le deuoir possible.

Si monſieur le Cardinal de ſainct Cecile eſt gratifié des reliques qu'il demande, il ſ'en ſentira fort obligé au Roy. Cependant ie vous remercie bien humblement de la bonne ſouuenance que vous en voulez auoir.

Quant à mon affaire de l'Enſché de Bayeux, ie vous prie dire au Roy, & luy lire cét article, Que quelque difficulté qui ſ'y ſoit trouuée du commencement, ie ne puis croire que ſa M. ſoit pour me reſuſer ceſte grace, non pour aucun merite qui ſoit en moy, mais pour ſa propre bonté & conſtance, à laquelle il appartient que m'ayant ſa Maieſté fait de rien ce que ie n'euffe iamais oſé eſperer ny deſirer, elle ne ſe monſtre point à preſent refroidie en mon endroit, puis qu'en moy n'eſt point aduenu ny n'aduendra iamais aucun changement, & que ie ne luy demande point, & ne ſuis pour luy demander aucun nouveau bien, mais ſeulement que du bien qu'il m'a deſia donné il me permette d'en meliorer la condition, & le tout pour ſon ſeruiſſe, qui eſt ( apres Dieu ) la ſeule occupation & le ſeul penſement que i'ay en ce monde.

Iuſques icy i'ay reſpondu à voſtre lettre du vingt-deuxieſme de Septembre : à laquelle reſponſe i'adiouſteray que monſieur l'Ambaſſadeur m'a communiqué ce que vous luy auez eſcrit del'entention que le Roy a de faire faire au Printemps prochain le baptême de Monſeigneur le Dauphin ; ce que ie ne puis aſſez louer pour pluſieurs bons reſpects. Vous diſtes auſſi que par meſme moyen on fera le baptême de Madame de France, qui aura ſon parrain & marraine à part, à quoy n'y a rien à redire. Mais vous adiouſtez qu'on auroit quelque inclination de faire commere la Reine d'Angleterre au baptême de madite Danre. Le roy à la verité que cela tourneroit au Roy à quelque commodité, pour ſe concilier & gagner dauantage ceſte Princeſſe, & pour cela meſme ie deſirerois que cela ſe peult faire : mais puis que c'eſt vne choſe de plus grande importance qu'il ne ſemble de prime face, & qu'on en a voulu ſçauoir mon aduiſ, i'ay eſtimé eſtre de mon deuoir de vous eſcrire librement que cela ne ſe peut faire ſans vn tres-grand ſcandale des bons Catholiques, & ſans vn extrême deſplaiſir & offenſe du Pape. Vous preſuppoſez que la Reine d'Angleterre ſoit Catholique, mais icy on ſçait le contraire, aſſçavoir que l'on croye qu'elle ne ſoit point des pires heretiques, & qu'elle ait quelque inclination à la religion Catholique. Et ie vous diray de plus, que quand elle auroit en ſon cœur la foy & religion Catholique, Apoſtolique & Romaine, tout ainſi que le Pape meſme, ſi eſt-ce qu'ayant eſté nourri & eſſeuee en l'heréſie, & y perſiſtant exterieurement comme elle fait elle ne peut ſelon les Canons eſtre tenuë pour Catholique, & moins eſtre ſcenné aux aſſiões publiques de la Religion Catholique, que premierement elle n'ait & de viuë voix & par eſcrit ſigné de ſa main & abſuré toutes heréſes, & fait profeſſiō de ſa foy Catholique. Dequoy, & de toutes telles autres choſes vous deuez iuger par delà non ſelon la corruptiō du temps, ny lon la capacité ordinaire de ceux qui n'ont point eſtudié en telles choſes, mais ſelon les ſaiſcts decretz, & le conſentement vniuerſel de l'Egliſe Catholique, & le bon aduiſ & conſeil des bons & ſages Theologiſtes & Canonisſtes.

Or cela eſtant ainſi que la Roynne d'Angleterre ne doit eſtre tenuë pour Catholique, comme il n'en faut point douter avec le baptême qui ſe fera

QQQQq 2

de Monseigneur le Dauphin, duquel le Pape & la Duchesse de Mantouë se-  
ront parrain & marraine, vous faisiez faire le baptême de Madame, de la-  
quelle la Roynie d'Angleterre fust marraine quicôque au reste fust parrain,  
vous seriez intervenir la Reine d'Angleterre avec le Pape en vne mesme acte  
de Religion, & ainsi vous seriez que le Pape participeroit *IN DIVINIS* a-  
vec vn heretique : ce que le Pape tiendrait à vn grand affront, & à vne iniu-  
re atroce. Aussi le Legat qui en cet acte représentera sa Sainteté, n'auroit  
garde de s'y trouver s'il scauait ce qu'on y voudrait faire, & s'il estoit sur-  
pris ne le sachant point auparavant, il abandonneroit l'acte, & quitteroit  
tout là quand il s'aperceuroit de la chose.

Que si vous faisiez faire premierement le baptême de Monseigneur le  
Dauphin, & puis à quelque temps de là le baptême de Madame, auquel le  
Legat ne se trouveroit point, ce seroit moindre mal, & le Pape n'auroit à se  
plaindre d'aucune iniure particuliere faite à sa personne. Mais encore y au-  
roit-il trop de mal, & de quoy fascher sa Sainteté, & scandaliser les Ca-  
tholiques, & faire mal penser les ennemis du Roy, de ce que sa Maiesté  
auroit baillé à tenir sa fille aux fons de baptême à vne Reine heretique, at-  
tendu que le parrain & marraine sont instituez en l'Eglise de Dieu, pour  
estre pleiges & respondans que leurs fileuls venans en aage de pouuoir ap-  
prendre, les bonnes mœurs, & la doctrine Chrestienne & Catholique, y se-  
ront instruits fidellement & diligemment, ce qu'une Princesse heretique ne  
peut & ne voudroit promettre, & moins accomplir. Le Pape seroit enco-  
res fasché de ce que le parrain Catholique, & le Prelat qui baptisera Ma-  
dame, auroient participé *IN DIVINIS* avec vn heretique, lesquels parrain  
& Prelat, s'ils y pensent bien ne le voudroient point faire, & seroient tres-  
marris d'y estre contrains par respect & autrement. Et apres tout cela, enco-  
res seriez-vous en danger que la Reine mesme d'Angleterre n'eust point à  
plaisir ce cōperage, puisque cōme es Catholiques abhorrent les heretiques,  
aussi les heretiques ont en abomination les ceremonies de l'Eglise Catholi-  
que, & particulièrement celles du baptême, comme l'exorcisme, le sel, la sa-  
lie, l'huile, le cresse, la chandelle ardente, le cresseau & autres choses. En  
somme, comme tous bons Catholiques doivent soigneusement se garder de  
faire désincōgruitez en maniere de religion, le Roy en particulier doit auoir  
ce soin sur tous autres pour les choses passées, qui seront tousiours qu'un pe-  
ché ne seroit veniel en vn autre, soit trouué mortel en lui. Les Venitiens n'ont  
point plus de deuotion, qu'il ne leur en faut, mais ils se gouuernent avec tant  
de prudence qu'aucun autre Potent du monde. Vous pouuez vous souue-  
nir comme apres la mort du feu Re ils reconnurent le Roy d'apresent pour  
Roy, & traiterent monseigneur de Maye, qui lors y estoit Ambassadeur, tout de  
mesme qu'ils l'auoient traité du vivant du feu Roy, excepté qu'ils ne le vou-  
lurent iamais admettre à leurs Chapelles avec les autres Ambassadeurs, quoy  
qu'il fust Catholique, & que lorsqu'il en fist, iusques à ce que le Roy  
fust reconcilié avec l'Eglise Catholique & avec le saint Siege ; & ce pour  
monstrer au Pape, au Roy d'Espagne, & au reste du monde, que quoy qu'ils  
fissent pour raison d'Etat, ils ne lissoient point d'observer exactement  
les choses de la religion, & pouloient participer es choses de mines avec vn  
Prince non Catholique, & n'approuuèrent du saint Siege, si le Roy n'estoit

ainsi, il fera non seulement religieusement & Catholiquement, comme il appartient à la profession qu'il fait, mais aussi vilement pour le bien de ses affaires, & pour son honneur & reputation, & le temps luy apportera d'autres occasions de complaire à la Roynne d'Angleterre plus agréables à elle, & moins preiudiciables à luy.

Le sixiesme iour de ce mois ie receus vne lettre de monsieur le Cardinal Aldobrandin qui estoit à Frescati, par laquelle il me commandoit de la part du Pape que i'escriuisse par delà en faueur des Peres Iesuittes, selon que le Père General me diroit, & le 15. vint à moy ledit Pere General, lequel se plaignoit grandement de ces 4. 8. & 9. articles, des conditions apposees à leur restitution. Surquoy nous disputasmes longuement, & enfin ie le priay de me faire baillervn memoire de ce qu'il desiroit estre escrit. Il me l'enuoya le lendemain, & ie le vous enuoye à vous avec ladite lettre de monsieur le Cardinal Aldobrandin, n'y voulant rien mettre du mien, sinon de vous prier, comme ie fais, d'un petit mot de responce, afin que ie puisse montrer que i'ay obey. Monsieur le Nonce, comme vous verrez par ladite lettre, a encore chargé d'en parler au Roy, qui en ordonnera comme bon luy semblera. A tant, &c. Monsieur, &c. De Rome, ce 20. d'Octobre, 1603.

## A MONSIEUR DE VILLEROY.

## CCCLIV.

**M**ONSIEUR, l'ay rendu à Monsieur le Cardinal de sainte Cecile la lettre qu'il a pleu au Roy luy escrire, & l'ay accompagnée de propos conuenables au contenu de la copie que vous m'en auez enuoyee avec vostre lettre du 7. d'Octobre. Il en a esté tres-ayse, & dit qu'il se sentira plus obligé à sa Maiesté des reliques qu'il luy a demandeas, qu'il ne seroit de tout le Royaume de France, s'il se pouuoit ceder & transporter; ce sont ses mots. Il est vn de ceux que nous esperons tirer de nostre costé en occasion de Conclaué, pour nous aider à faire vn bon Pape, pour deux respects, de deuotion, & de la liberté Ecclesiastique. Si le Roy y adioust ce troisieme il s'y laissera tirer d'autant plus facilement.

Le Pape a pris du temps à deliberer sur nostre dispense de mariage, & dit qu'on luy en laisse faire, & qu'il y pense pour nous. Au premier Cōsistoire qu'il tint apres son retour de Frescati vn Mercredy 22. d'Octobre, ie luy parlay du Prieuré de Montargis pour sœur Anne Sallart.

L'Abbé Arnolfini Referendaire du Pape en l'une & l'autre signature, beau-frere du sieur Bartholomeo Cenami Lucquois, est vn fort honneste homme, & tres-affectionné au seruice du Roy, assidu chez monsieur l'Ambassadeur, & chez les Cardinaux François. Si le Roy vsoit de quelque gratification enuers des Prelats de ceste Cour, il est vn de ceux en qui elle seroit bien employee.

Le sieur Alfonse Fontanella qui fait les affaires de Monsieur le Cardinal d'Este, vient de partir d'avec moy, & m'a confirmé tout ce qu'il a dit à Monsieur l'Ambassadeur, & assure de la part dudit sieur Cardinal de s'en

uice qu'il a vouë au Roy, avec desir neantmoins que sa Maiesté luy face grace de quelques mois pour s'en declarer ouuertement, pour ne preiudicier à l'affaire du Comte de Saruolo qui se traite pour le Duc de Modena son frere, auquel il est aidé des Espagnols. A tant, &c. Monsieur, &c. De Rome ce 3. Nouembre 1603.

## A MONSIEVR DE VILLEROY.

CCCLV.

**M**ONSIEVR, La lettre qu'il vous plût m'escrire le 22. d'Octobre me fut renduë le 7. de ce mois. L'affaire de nostre dispense est au mesme estat qu'il estoit lors que ie vous escriuis ma dernière. Monf. l'Ambassadeur qui en a traité le dernier avec le Pape, & avec Monsieur le Cardinal Aldobrandin, vous pourra escrire d'avantage. Je ne m'esmerveille point de ce que le Duc de Sauoye fait si fort l'humble & l'affectionné enuers le Roy, car outre son mauuais naturel, & sa malice consommee, i'entends qu'il est entré en esperance & en dessein de retirer de sa M. par telles flatteries, & par l'aduis qu'il luy a donné de celuy qui le vouloit escroquer, & pour luy donner à entendre qu'il est mal content des Espagnols, & se veut du tout mettre de son costé contr'eux, la Bresse & tout ce qu'il a baillé pour le Marquisat de Salusses qui luy demeurera en pur gain. C'est vne pensèe des plus folles qui pourroie venir en l'esprit de qui que ce soit; mais il presume assez de son bel esprit pour penser en venir à bout, & y a des hommes si badants qu'ils n'en desesperent point.

Quant à la resignation de l'Euesché de Bayeux, comme vous attendiez response de moy à vos deux precedentes, aussi vous y ayant respondu cy-deuant, i'attendray response à celle que i'en escriuis au Roy & à vous le 2. de ce mois, par lesquelles ie pris la dernière resolution en cét affaire. A tant, &c. Monsieur, &c. De Rome ce 17. Nouembre 1603.

## A MONSIEVR DE VILLEROY.

CCCLVI.

**M**ONSIEVR, Hier 6. iour de ce mois nostre S. Pere tint deuant soy la Congregation sur le fait de la dispense du mariage de Madame seur du Roy avec Monsieur le Duc de Bar : & apres auoir dit comme il estoit grandement sollicité & pressé de la part du Roy de ceste dispense, à ce qu'il y mette vne fin, s'il estoit possible, il adiouta qu'en la première Congregation qui auoit esté tenuë sans luy, il auoit esté décidé que le Pape pouuoit donner la dispense qu'on demandoit, & puis on auoit proposé des causes de dispenser qui sembloient estre suffisantes; que maintenant on di soit auoir trouué des exemples, qui estoit vne chose qu'il auoit tousiours demandee, que les escritures appartenantes à ces exemples subissent esté en-

royées à chacun de nous; qu'il desiroit en auoir nostre aduis & mettre mes-  
huy fin à ceste affaire. Il y auoit en ladite Congregation quatre consultants  
Docteurs en Tgeologie, que ie vous ay autresfois nommé, à sçauoir le Com-  
missaire de l'Inquisition Religieuse de l'ordre de S. Dominique, le Pere Mo-  
nopoli Capuchin, le Pere Gregoire de l'ordre de S. Augustin Portugais de  
nation, & le Pere Benedetto Giustiniano Iesuite. Le 1. desdits consultants  
opina contre la dispense, & les autres trois pour la dispense; & de neuf Car-  
dinaux que nous estions, Ascoli, Borghese, Baronio, Bianchetto, Mantica,  
Arrigone, Visconti, San Marcello & moy, les 2. premiers furent d'opinion  
que la Sainteté ne deuoit point concéder ceste dispense, & les 7. autres au  
contraire furent d'aduis qu'il la deuoit accorder. L'inclination que les Car-  
dinaux ont remarquée au Pape qui en fin a recogneu qu'il ne falloit plus di-  
laier, & les exéples trouuez, que nous auons fait valloir tant enuers la Sain-  
teté, qu'enuers eux tout ce qui a esté possible, les ont en fin amenez à la rai-  
son pour la pluspart: & ainsi par la grace de Dieu nous aurons à la fin ceste  
dispense si long-temps poursuuie. Mais il n'a point encore esté conclu en  
quelle façon, ny à quelles conditions elle sera expediee; pour cet effect le Pa-  
pe cōmanda sur la fin de ladite Congregation, que nous nous assemblassions  
entre nous yn de ces iours à fin d'en deliberer & resoudre, ce que nous fe-  
rons Dieu aydant. Je me doute que cōme on nous a fait attendre la dispen-  
se, on nous voudra aussi maintenant rabbatte quelque chose de la façon or-  
dinaire & accoustumee des dispenses: toutesfois nous seruiteurs du Roy  
mettrons peine que la façon en soit la plus ample & la meilleure que faire se  
pourra. Cependāt Monsieur l'Ambassadeur vous a voulu despescher ce gen-  
til-hōme. Hier au soir arriua l'ordinaire avec vos lettres du 19. Nouembre.  
Ce que ie vous ay mis cy-dessus seruira de responce à ce que vous m'escri-  
uez tout au commencement sur le fait de ladite dispense.

Le demeurant n'a besoin d'autres repliques, sinon que dès la premiere fois  
que le Pere general des Iesuites me parla de ce qu'il vouloit faire reformer  
es conditions ia acceptees par les siens en Cour, ie taschay de moy-mesme à  
luy persuader ce que voulez, & luy donnay le mesme conseil dont vous m'a-  
duisez; mais ie perdis mon temps, & pour cela ie vous enuoyay simplement  
ce qu'il me fist depuis bailler par escrit sans y mettre rien du mien.

A tant, &c. Monsieur, &c. De Rome ce 7. Decembre, 1603.

## A MONSIEVR DE VILLEROY.

CCCLVII.

**M**ONSIEVR, Par ma lettre du 7. de ce mois, ie vous rendis com-  
pte comme en la Congregation tenuë deuant le Pape le 6. il auoit esté  
resolu que la dispense seroit donnée à Monsieur le Duc de Bar; mais quant à  
la forme & aux conditions de ladite dispense, le Pape auoit ordonné que les  
Cardinaux s'assemblassent entr'eux pour en aduiser. Or s'assemblerent ils  
Védredy 12. de ce mois, apres plusieurs disputes fut resolu par tous les neuf



Cardinaux vnanimement, que le Pape par vn sien bref, ou par vne lettre que Monsieur le Cardinal Aldobrandin escriroit de la part & au nom de sa Saincteté, commettrait ceste dispense à Monsieur l'Euesque de Verdun, qui est Prelat de grande pieté & deuotion, & qui escriuit de ce fait au Pape le 26. Nouembre 1602. Que par ledit bref ou lettre seroit donné pouuoir exprés audit sieur Euesque, non seulement d'admettre mondit sieur de Baraux Sacremens qui seroit seulement vne simple dispense tacite, & à laquelle seule quelques-vne tendoient du commencement, comme en la Congregation précédente il sembloit que le Pape mesme ne tendist qu'à cela, mais aussi de le dispenser expressément, apres l'auoir absous de l'excommunication, & autres censures & peines Ecclesiastiques, esquelles il est encouru pour raison del'inceste, & de l'inceste mesme, & apres aussi luy auoir enioint quelque penitence salutaire; le dispenser, dis ie, expressément sur le degré de consanguinité, à ce qu'il puisse contracter mariage de nouveau avec Madame sœur du Roy, & demeurer en iceluy librement & licitement; declarant en outre legitimes les enfans nais & à naistre de ce mariage, aux charges neantmoins & conditions suiuanes, & sans retardement de ladite dispense, Que le Roy, Monsieur de Lorraine, & Monsieur le Duc de Bar, promettront & s'obligeront chacun à part par lettres patentes, de procurer au plustost que faire se pourra l'instruction de madite Dame en la Religion Catholique, comme elle mesme s'est offerte à la recevoir apres ladite dispense par des lettres qu'elle a escrites au Pape, à Monsieur de Bethune Ambassadeur du Roy, & à moy; & en tout euenement que les enfans qui naistront de ce mariage seront nourris & esleuez en la Religion, Catholique, Apostolique, & Romaine. Quant à la façon de contracter le mariage de nouveau, si le Concile de Trente estoit publié en Lorraine, il faudroit qu'il fut contracté en presence du Curé de la paroisse & de deux tesmoins. Que si ledit Concile n'y estoit publié, il suffiroit qu'ils consentissent de nouueau en leur mariage, d'autant que le premier consentement est nul, à cause de leur parenté en degré prohibé par les Canons & saints decretz.

Voyla la substance de ladite resolution, laquelle deuoit estre rapportee & laissée par escrit au Pape le lendemain Samedy 13. de ce mois. Je ne sçay si sa Saincteté y voudra rien changer, d'autant qu'à la verité les Cardinaux sur la fin s'estendirent vn peu plus que l'intention de sa Saincteté ne sembloit estre. Monsieur l'Ambassadeur procurera qu'il n'en soit rien rabattu, & sollicitera auprès sa Saincteté deux choses; l'une, que ladite commission à Monsieur l'Euesque de Verdun, soit faite plustost par vn bref du Pape, que par vne lettre de Monsieur le Cardinal Aldobrandin escrite au nom de sa Saincteté, combien que quant à l'efficace aussi bonne & valable sera la lettre comme le bref. L'autre, que ceste dispense, comme qu'elle soit faite, luy soit mise en main pour l'enuoyer à sa Maiesté, laquelle l'enuoyera à Monsieur de Lorraine & à Monsieur le Duc de Bar pour la faire tenir audit sieur Euesque de Verdun.

Ce matin estant en Chappelle pour le 3. Dimanche de l'Aduenti' ay appris de monsieur le Cardinal San Marcello, que le rapport dece qui fut resolu Vendredy en ladite Cōgregatiō fut fait & baillé par escrit hier au matin au Pape & que sa Saincteté enuoya ledit escrit à luy Cardinal San Marcello,

pour dresser la lettre qu'elle veut estre escripte audit sieur Euesque de Verdun, & apres qu'elle sera dressée, l'enuoyer à chacun des Cardinaux de ladite Congregation pour la voir & bien considerer l'un apres l'autre, & puis y estre mise la dernière main par sa Sainteté mesme. Ledit seigneur Cardinal San-Marcello m'a accordé que ceste commission seroit vn peu mieux par bref que par lettre, & qu'il fera ce qu'il pourra pour y disposer le Pape.

Mais aussi sômes nous demeurés d'accord que pour ne retarder l'affaire il est bon de differer l'instance iusques à ce que ladite lettre soit dressée & veuë par chacun des Cardinaux, comme le Pape a commandé; car si en fin le Pape accorde que ladite lettre soit conuertie en bref, cela sera fait en vn rien, & cependant nous aurons gagné autant de temps, & arresté tout ce qui doit estre contenu tant au bref qu'en la lettre. En somme nous ferons tout ce qui se pourra pour auoir le bref; mais en quelque façon que la dispense soit concedée, la vertu & l'efficace en sera mesme; & Dieu nous aura fait vne belle grâce d'auoir mis vne si bonne fin à vn affaire si difficile & si desesperé, comme iel'ay veu par l'espace de plus de 4. ans & demy. A luy en soit l'honneur & la gloire, lequel ie prie aussi pour fin de la presente qu'il vous donne, &c. Monsieur, &c. De Rome, ce 14. Decembre 1603.

---

## A MONSIEVR DE VILLEROY.

### CCCLVIII.

**M**ONSIEVR, Par ma lettre du 7. de ce mois, qui vous aura esté renduë par vn gentilhomme de Monsieur l'Ambassadeur, ie vous aduisay sur la reception de vostre lettre du 19. Nouem. & respondis à ce peu qui me sembla auoir besoin de response. Depuis i'ay consideré la clause qui concerne Monsieur le Cardinal de sainte Cecile, & les repliques dont il a supplié le Roy & la Royne; par laquelle clause il semble que vous reuoquiez en doute ce que ledit sieur Cardinal tient pour assuré, & dont il s'est resiony avec tous ses amis, & non sans cause veu la lettre que le Roy luy escriuit le 8. Octobre, de laquelle ie vous renuoye la copie que vous m'en enuoyastes, à fin qu'il vous plaise la reuoir, & considerer que la chose ne semble plus estre en entier; Que outre que la parole du Roy y demeure engagée, vous alienerez vn grand Cardinal qui a suite d'autres, lequel vous acquerriés plus avec ceste gratification qu'avec aucune autre chose du monde. Que si en le gratifiant on craint la consequence, comme il semble par vostre lettre, on pourra y remedier en ordonnant que desormais on n'en donnera plus à qui que ce soit: dequoy personne ne se pourra offenser à l'aduenir, attendu quel'ordonnance en sera faicte auant toute demande future, & ledit seigneur Cardinal en estimera d'autant plus le bien & honneur que le Roy luy aura faict. A tant, &c. Monsieur, &c. De Rome, ce 15. Decembre, 1603.

## A MONSIEUR DE VILLEROY.

CCCLIX.

**M**ONSIEUR, Par la lettre que ie vous escriuis le 7. de ce mois, ie vous rendis compte comme le iour auparauant en vne congregation tenuë deuant le Pape il auoit en fin esté arresté que la dispense de mariage par nous si long temps pour suiue seroit expediee, & par vne autre que ie vous fis le 14. de ce mois, ie vous donnay aduis de ce qui auoit esté conclud en vne autre congregation de Cardinaux touchant la forme, les charges, & conditions de la dispense, & ce que i'auois appris de Monsieur le Cardinal San Marcello. Maintenant ie vous diray sur cette affaire mesme, que le Pape persiste tousiours à ce que la commission qui en sera enuoyee à Monsieur l'Euesque de Verdun soit non par vn sien bref, ains par vne lettre escrete neantmoins de la part & par commandement expres de sa Sainteté, & signee non par Monsieur le Cardinal Aldobrandin, comme les Cardinaux l'auoient entendu en ladite congregation, ains par tous les Cardinaux de ladite congregation, qui sont neuf. Ce que sa Sainteté fait à mon aduis pour sa plus grande iustification & satisfaction, & comme ie veux encore, pour vne plus grand bien de l'affaire mesme en soy. Car comme les *soings* de neuf Cardinaux monstrent euidemment que le Pape n'a accordé ceste dispense de sa teste, aussi feront ils plus de preuue que ne feroit le seing d'un simple Secretaire qui seul signe les brefs.

Et quant à l'anneau du peſcheur qu'on a accoustumé de mettre aux brefs, il n'equipole point à neuf seings de neuf Cardinaux; outre que quelquesfois il peut estre desrobé au Pape, & estre employé au desceu de sa Sainteté, comme il aduint du temps du Pape Sixte cinquiesme qu'un sien Couppier appelé Bellochio luy prit vn soir ledit anneau dās la poche de ses chausses, & en cacheta vn bref que le Pape n'auoit voulu passer, dont ledit Bellochio fut enuoyé en galere où il mourut dans vn an apres. Par ainsi nous ne ferions rien pour nous en pressant le Pape d'un bref plustost que d'une telle lettre, & ferions desplaisir à sa Sainteté, à laquelle il est plus que raisonnable que nous laissions prendre sa satisfactiō en chose où nous n'auons rien de moins pour nous, ains plus. Je l'ay ainsi dit à Monsieur l'Ambassadeur qui l'a trouuë bō. Ladite lettre est dresseë, & doit estre enuoyee à tous les Cardinaux l'un apres l'autre; de sorte que ie la verray à mon tour, Dieu aydant. Ces festes en ont vn peu retardé l'expedition, outre que Rome ne fait iamais tost rien de tels & ce Pape encore moins que les autres. Tanty a, que Dieu nous a fait vne belle grace d'auoir conduict cēt affaire en l'Estat auquel il se trouue.

Auant hier arriuerent vos lettres du 2. & 8. de ce mois. Mōsieur le Card. de Joyeuse, Monsieur l'Ambassadeur, & moy n'auons eu tēps d'en conferer ensemble comme nous pourrons faire apres la depesche de cēt ordinaire. Cependant ie louë Dieu & le Roy, vous & Monsieur de Rosny, de la grace que sa Maieſté m'a accordée touchant la resignation de l'Euesché de Bayeux, dont ie suis plus aise que du don mesme qu'elle m'en fit. C'est autant d'obligation adioustee à celle que i'auois dé-ia à sa Maieſté, & à vous. Je l'en re-

mercieray par lettre quand i'en auray. receu la dépesche. Cependant ie vous en remercie vous, &c. Monsieur, &c. De Rome, ce 29. Nouembre 1603.

## A MONSIEVR DE VILLEROY.

CCCLX.

**M**ONSIEVR, Auec les lettres du Roy & vostres du 11. Feurier qui arriuerent le 27. ie receus lettres de nomination à l'Euesché de Bayeux expediees en la façon que ie les desirois; dont ie suis infinimēt obligé au Roy & à vous, comme aussi du tesmoignage qu'il a plû à sa Maïesté adiouster en sa lettre, du gré qu'elle me sçait de ce peu de service que ie luy puis rēdre par deçà. A quoy ie m'efforceray tous les iours de plus en plus; & en particulier ie remonstreray au Pape ce que sa Maïesté me commande, du tort que les Espagnols ont fait du comēce, & des Grisons, & du plus que deuoir auquel sa Maïesté s'est mise enuers eux, pour euitier les inconueniens qui pourroient succeder de leur superbe, iniustice, & violence insupportable. Je serois marry en tout tēps de la perte de Madame sœur du Roy, mais ie la sentirois encore plus viuement en ce temps que nous venons d'obtenir la dispense si long temps poursuiuie, pour l'occasion que les malins en prendroient de blasmer ceste dispense, & le Pape qui l'accorde, & ceux qui l'ont demandee & sollicitée, & d'entret au secret de Dieu, & trēcher de sa procedur & de ses argumēts selon leur passion, temerité, & malice. Mais la verité & la raison demeurent toujours vne, quoy que les fols & les meschants la deguisent, & ne laïrra destre toujours recogneü par les gens de bien & d'entendement.

Comme les Peres Recollects sont des-là bien auant de leur reformation, par la grace de Dieu, & du Pape, qui faubrise grandement tous les Religieux reformez, & du Roy qui par sa bonté seconde les pies & saintes intentions de sa Sainteté, aussi depuis quelques annees il y a fort bon & beau commencement de reformation entre les Peres de l'ordre de saint Dominique, & mesmement en leur Couuent de Tholose sous le Pere Michaëlis Prieur dudit Couuent, avec grande edification & contentement de tous les gens de bien, & mesme de la Cour de Parlemēt, & principaux officiers & Magistrats, & de tout le peuple de ladite ville.

Mais ils sont grandement trauallez par leur Prouincial, qui ne peut souffrir que ces Peres fassent mieux que luy, & se soient retirez de ceste si lourde relaxation & dissolution, où quasi tous les ordres sont tombez. Nous auons fait icy tout ce que nous auons pu pour lesdits Peres reformez de Tholose, & pour reformer l'audace dudit Prouincial. Que s'ils ont besoin de quelque prouision du Roy, ie vous prie de leur departir vostre ayde & protection, & vous ferez vn œuvre fort meriteuse, dōt le Roy, & vous, & tous ceux qui les auront assistez receuront plusieurs benedictions de Dieu & des hommes.

A tant, &c. Monsieur, &c. De Rome, ce 6. Mars mil six cens quatre.

*Fin du vintiesme Liure.*

R R R R R



# LETTRES ET ADVIS de Monsieur le Cardinal d'Osset.

A MONSIEUR LE MARQUIS DE PISANI.



MONSIEUR, l'ay veu vne partie de ce que vous escriuistes par le precedet ordinaire à Madame la Marquise, sur les loqueurs dont on vse à vous permettre de venir aux pieds du Pape, & à vous esclarcir si vous y serez admis ou non. Et d'ailleurs il se dira par Rome, que si on vous en fait gueres plus long vous estes resolu de vous en retourner en France: de laquelle resolution plusieurs gens de bien, qui s'employent, & font tout ce qu'ils peuvent par deçà pour faciliter vostre venue, sont tres marris. Et quelques vns d'eux, qui scauent que ie suis bon François, & d'ailleurs vostre tres humble & tres-affectionné seruiteur, m'ont requis, exhorté, & coniué de vous escrire & supplier de leur part, qu'il vous plaise auoir patience, & n'abandonner point vostre sainte entreprise: m'alleguans que depuis quelques iours les choses sont grandement meilleures pour nous dans Rome, tant en la personne de nostre S. Pere le Pape & les siens, qu'au reste de toute ceste Cour, & que de iour en iour on les voit tousiours aller de mieux en mieux; comme pour vostre particulier le Pape a parlé de vostre personne à diverses fois fort honorablement, & s'assurant les dessusdits, qu'en donnant encor quelque temps à sa Sainteté vous en aurez audience, & en obtiendrez toutes choses raisonnables. Le leur ay mal volentiers accordé de faire cet office, pour estre chose contre mon humeur & que i'ay tousiours fuy sur tout autre, que de m'ingerer à quoy que ce fust, & mesmement à donner aduis à mes Seigneurs & Maistres. Aussi es choses mesmes qui me pourroient estre scantes, comme enuers personnes de ma condition, ie ne suis nullement propre à donner des esperances, estant en mes affaires propres desians de l'aduenir, prenant tousiours au pis les choses futures qui dependent de la volonteé des hommes, & de la varieté & incertitude des reuenemens, & ne faisant iamais estat de rien, sinon alors que ie le tiens bien. Toutesfois ie n'ay pour ceste fois pu faire de moins, que de prester ma main & ma plume aux iugemens & opinions de ceux qui scauent plus des affaires d'icy & de toutes autres choses que ie ne fay, & que ie cognois estre

affectionnez au bien & repos de la France, & qui en particulier desireront toute bonne & heureuse issue à vostre voyage & commission; & me suffira que cette mienne facilité ne soit de vous prise pour presumption, & que ie n'en perde rien de vostre bonne grace, comme ie l'attends aussi de vostre humanité & bonté.

Ceux cy doncques sont d'aduis, que quelque longueur dont on use en vostre endroit, vous ne vous en retourniez point, sinon qu'on refusast expressément de vous ouïr, ou qu'on vous r'appellast de France. Et passans encores plus outre, disent que de France on ne doit point vous r'appeller, ny vous aussi le conseiller, ains le détourner si vous pouuez. Et pour ce que ie leur ay dit que ie pêsois que cette irresolution en laquelle on vous tiét icy, si vous aurez audience ou nō, tiét possible aussi en suspens & irresolus de delà les Princes & Seigneurs qui vous ont prié de venir de plusieurs choses qu'ils ne peuvent bonement faire iusques à ce qu'ils sçachent si vous serez escouté ou nō, pendant que la Ligue, les Espagnols, & le Legat du Pape mesme font à Paris & ailleurs tout le pis qu'ils peuuent; ils m'ont respondu, qu'ils n'entendent point que lesdits Seigneurs & Princes en vous retenant en Italie, laissent cependant de faire en France rien qui soit vraiment utile au public, & necessaire au bien de leur party, & à la conseruation de leurs droicts: ains cōme on fait en leur endroit, qu'eux aussi prenās les choses au pis, & comme si on deuoit élire vn Roy à Paris, & iamaïs donner audience à Rome, ils facēt déjà à presēt, cōtre qui que ce soit, toutes choses bones & necessaires, qui ne leussent plus en entier quand l'vn desdits cas ou tous deux aduiendroient. Et ce fondement estant posé, ils disent que de vostre patience & longue attente il ne peut auenir aucun mal aux Princes & Seigneurs, ny aucun bien à la Ligue; ains au contraire plusieurs biens à tout nostre party, & plusieurs maux à tous nos aduersaires.

Ie leur ay encor allegué, qu'il y auoit de l'indignité & peu de reputation pour lesdits Seigneurs Princes, & pour vostre personne mesme, d'estre si long temps à attendre vostre audience, en laquelle mesmement celuy à qui on demande a plus d'intérest, que ceux-là mesmes qui font demander. Mais ils m'ont repliqué, que comme en la prise des villes par composition, quelque auantageuse que soit la composition pour ceux qui rendent la ville, l'honneur neantmoins & la reputation est iouissants à celuy à qui le profit en demeure, & qui a pū & sceu se rendre maistre de la place: aussi en ceste vostre legation, l'honneur en sera à ceux qui receuront le profit de leur patience & longanimité, & l'indignité demeurera à ceux qui par diuers artifices ayās en vain tasché de faire que vous n'eussiez point d'audience, en auront en fin le dommage & la honte. Dauidage, il n'est pas ainsi du Pape comme d'un autre Prince purement temporel, & peut-on bien sans indignité endurer du chef de l'Eglise & pere de tous les Chrestiens & Catholiques, ce qu'on ne souffriroit d'un autre. Le fils qui porte patiemment la rigueur de son pere n'encourt point d'indignité; & nous particulierement, que les Ligueurs taxent à tort de n'estre point bons Catholiques, auons besoin d'user de toute patience, modestie, & reuerence à l'endroit de sa Sainteté. Aussi auis-nous à nous souuenir de la nature & qualité de l'affaire pour lequel vous venez

On dit que c'est pour la conuersion & absolution d'un penitent. Si ainsi est, la chose d'elle mesme nous exhorte à patience, & à toute humilité. Un penitent ne doit point reputer à indignité de battre & attendre longuement à la porte de celui duquel l'absolution est necessaire: ains s'il se dépîte, & s'en va courroucé de ce que l'on la fait attendre quelque temps, il mōstre qu'il n'est point encor vray repentant, comme au contraire s'il a bonne & longue patience, il commence à faire preuue par là de sa vraye & non feinte conuersion: & ceux qui s'employent pour luy, doiuent aussi en certaine façon se reueilir de sa personne, & vser de la mesme submissiō & patience, comme nous auōs l'exemple de la Cananee, laquelle priant pour sa fille, & persistant, nonobstant les refus qui luy estoient faits, rapporta de la bouche mesme de nostre Seigneur Iesus Christ grande loüange de sa foy & perseuerance.

La conuersion & absolution que vous auez à negocier avec le Pape, ne se peut faire par le moyen d'autre que de luy, qu'il n'y ait trop à redire, & qu'elle ne soit suiuite à vne grande contradiction dedans & dehors la France: & ainsin s'en pourroit ensuiure le fruit que nous en attendons; à sçauoir la pacification entiere du Royaume, laquelle nous est tant necessaire, & à laquelle tous les bons François doiuent tendre. Or si vous vous-en estiez vne fois retourné, il est trop vray-semblable que lesdits Seigneurs Princes ne l'envoyeroient plus vers le Pape, ny vous, ny autre, & le Pape de son costé enuoyeroit encore moins vers eux; de façon que tout seroit rompu, & n'y auroit iamais fin au schisme d'entre le saint Siege & lesdits Seigneurs Princes & autres Catholiques, ny moyen d'accommoder entiere-ment les choses du Royaume. Et nous trouuerions en fin qu'en nous dépitant & quittant tout là, nous aurions fait ce que veulent les heretiques, & les Espagnols; à sçauoir que nous soyons toujours mal avec le saint Siege, & que les François Catholiques ne soient iamais entierement & fermement remis ensemble: & aurions de plus donné excuse à ceux qui refusent ou dilayent de nous ouir, & pretexte de dire qu'il auroit tenu à nous mesmes & à nostre impatience, si nous n'auions eu l'audience que nous deman- dions.

Et quand à ce que je mettois en auant, & que j'ay touché cy dessus, que le Pape perdrait plus en cette rupture, que lesdits Seigneurs Princes & autres de leur party, au nom desquels vous demandez audience; on m'a respondu que cela n'est pas si certain comme il pourroit sembler. Car outre le point de la conscience, qui s'apasse tous autres interets & considerations, auquel neantmoins on ne veut point entrer pour ceste heure, si la France se trouue auioierd'huy reduite en tel point, qu'elle ne puisse, pour plusieurs respects, estre entierement pacifiée sans le Pape, cōme il a ia esté dit, on ne voit point quel plus grand mal pourroit aduenir à la sainteté de l'edite rupture, qu'à nous tous. Mais comme qu'il en soit, la consideration du dommage que le Pape en pourroit receuoir, est bone pour le mouuoir luy à vous ouyr au plus tost, & à faire son deuoir de son costé: mais quand il ne se fera pas si tost, nous ne deuons point nous dépitier, & abandonner vne si sainte & si salutaire entre-prise que la conuersion & acceptatiō du Roy, & la pleine & entiere pacification & restauration de ce pauvre Royaume, & de la Religion Catholi-

que, & de toutes bonnes choses en iceluy, ny nous vanger de la rigueur & lo-  
gueur du Pape sur nous-mesmes. Pour la cognoissance que nous aurions  
d'un plus grand mal qu'il en recevroit, son mal ne gueriroyt pas le nostre. Et  
quand nous n'aurions point à faire au Pape, qui est nostre pere, ains à tout  
autre Prince, voire au Turc mesme, il vaudroit tousiours mieux qu'il fust  
bien de son costé & nous aussi du nostre, que non pas que nous fissions cho-  
se, dont il luy aduint vne grande ruine, & à nous aussi. Et non seulement en  
cét affaire si importât, & qui ne se peut faire bien & entieremēt sans sa Sain-  
cteté, mais aussi en toutes autres choses, l'estre bien avec nostre saint pere le  
Pape & le saint Siege, outre ledit respect de la Religion & de la conscien-  
ce, qui est le principal, ne peut tourner qu'à grand honneur, profit, grâdeur,  
& tout autre aduantage de Messeigneurs les Princes du sang, & de tous au-  
tres Princes & Seigneurs Chrestiens, pour infinies considérations que vous  
sçauiez trop mieux.

Ouy, mais le Pape nous fera attendre ceste responce, iusques à ce que cet-  
te assemblée de Paris, qu'on appelle Estats, soit du tout acheuee. Je le croy,  
& m'en desplaist trop: mais possible n'est-ce pas vn si grand mal cōme il sem-  
ble de prime face. Les choses du monde vont d'une façon, que bien souuent  
les hōmes se traouillent pour détourner ce qui leur reuiendroyt à grand pro-  
fit si il aduenoit, & quelquesfois aussi pour obtenir ce qui leur apporte puis  
apres vn grand dommage. Il pourroit estre que cette attente que nous crai-  
gnons tant, fust vne de celles-là, & qu'elle nous apportast en fin plus de bien  
que de mal. Car puis qu'il a esté dit cy-dessus, & posé pour fondement, qu'il  
ne faut obmettre à faire en France rien qui soit besoin & expedient en tout  
éuenement, & mesmes en cas qu'en ladite assemblée se fust l'élection preten-  
duë dont on parle tant, vostre attente n'aura causé aucun mal, quād bien au  
pis aller la Ligue s'accoucheroit de ce monstre d'Antiroy, dont elle monstro  
estre grosse long temps y a. Aussi bien quand le Pape vous donneroit l'au-  
dience dès maintenant, il pourroit tousiours differer, & de fait differeroit la  
resolution de vostre negociatiō, iusques à l'issuë de ladite assemblée, & ainsi  
ce seroit vne chose mesme, & nos affaires n'en iroient ny pis ny mieux.

Que si ladite grosseffe de la Ligue se trouuoit auoir esté de vent, & que cet-  
te leur assemblée s'en alast en fumee, cōme il n'y a que trop de raisons pour-  
quoy cēs deputez ne doivent s'accorder à l'empirement, & accroissement, &  
perpetuité des miseres communes, & des leurs particulieres, & de celles de  
leurs femmes & enfans, & toute leur posterité: en ce cas ie pense, que le de-  
lay que le Pape aura mis à vous ouir iusques à la fin de ladite assemblée, nous  
tournera à grand profit, & sera beaucoup meilleur pour nous, que s'il vous  
eust ouy plustost. S'il vous admettoit auant la conclusion de ces Estats pre-  
tendus, & qu'en iceux ne se dist point de Roy (car leur pretendu élire ne se-  
roit que dire) la Ligue diroit puis après, encore que sans cela ils n'eussent pu  
rien faire, qu'il auroit tenu au Pape que leur Roy n'eust esté fait, & que si sa  
Sainteté ne vous eust admis, l'électiō eust esté faite sans faute, & le Nauar-  
rois, qu'ils appellent, eust esté bien tost après abandonné de tous les Catho-  
liques qui à present, le suivent, & luy, & tous les heretiques auroient dās peu  
de mois esté chassés, & exterminés de toute la Frâce. Mais quād les choses de  
la Ligue aurot en vain fait ce dernier effort, & ietté tout leur venin, sās auoir



sur quoy s'excuset de n'auoir peu faire ce dont ils s'estoient vantéz, leur discorde, vanité, & foiblesse, sera cogneü d'un chacun dedans & dehors le Royaume; & eux ayants en ce dernier attentat consumé tous leurs artifices, & ne s'estans plus rien reserué pour abuser le monde, décherront de reputation & de credit auprès du Pape, & du Roy d'Espagne mesmes, & de tous autres Princes estrangers, & ce qui importe plus, dans la France mesme auprès des villes de leur party, qu'ils ont ruinees, & qui trop follement s'attendoient d'estre refaites de leurs pertes, par le moyen de ce beau & nouveau Roy tout d'or qu'on leur promettoit. De façon que la perte d'une seconde bataille, n'auroit pas apporté plus de dommage aux auteurs de la Ligue, qu'aura fait la vanité de ladite assemblée, & leur sera aduenü en cecy, comme en plusieurs autres choses qu'ils ont attendees par le passé, tout le cōtraire de ce qu'ils se proposoient.

Et outre que le party des Princes & Seigneurs qui vous ont enuoyé sera accru d'autr, il y aura ce bien parmy plusieurs autres, que vous en ferez icy plus honnorablement accueilly, plus volontiers escouté, & plus promptement & fauorablement expédié, que vous n'auriez esté auant la fin de ladite assemblée; pour autant que le Pape aura alors tant de iustification & d'auantage enuers la Ligue & les Espagnols, qu'ils ne se pourront honnestement plaindre de luy, quoy qu'il fasse en vostre endroit, après les auoir si longuement & en vain aidez d'argent, d'hommes, & de l'autorité du Pape & du S. Siege, l'ayât employée toute en tout ce qui leur a plu, & achepté à beaux deniers contents la desobeissance de la plus noble & plus puissante partie des Catholiques de France, à la diminution de son autorité & celles du S. Siege au premier Royaume de la Chrestienté autorisé par Bulle expresse, & par creation d'un Legat, l'assemblée, deliberation, éléction, & sacre de l'Antioy qu'ils vouloient faire d'entr'eux, & à leur appetit, refusé audience & accés à Rome à des Cardinaux & à des Seigneurs notables, enuoyez de la part de la plus illustre & valeureuse Noblesse du monde, & en sōme, fait pour eux contre soy-mesme toutes autres choses qu'ils ont peu desirer. De toutes lesquelles choses, & de la longueur mesme dont il vſe à present en vostre endroit, vous vous ferez par vostre patience vangé, de la façon qu'il est permis aux enfans se vanger de leurs peres, qui les mal-traitent à l'instigation & calomnie de leurs faux & malins freres: c'est que vous luy aurez donné tēps & moyen de se détromper, & d'apprendre ce qu'il ne ſcauoit point, ny d'eux ny de soy-mesme: c'est à dire de ses forces, & de ce qu'il pouuoit & ne pouuoit point: & moyen encores de se r'aduifer, & recognoistre que vous estes les bons & deuots enfans, & comme il ne peut de fait & de force vous des-heriter, qu'assi en auoit-il encor moins de raison.

Et quant au pis alles vous n'auriez rien gaigné en son endroit, ce qui repugne au grand meilleurement que nous voyons icy de iour en iour, tousiours seroit ce vne grande iustification pour les Princes & Seigneurs qui vous ont enuoyé, & pour vous en particulier, & vne grande accusation contre luy enuers le peuple de France, & enuers tous les Princes, Republiques, Potentats & peuples de la Chrestienté, d'auoir comme bons Catholiques & deuots enfans, perséueré en patience à demander, & attendre si

lang

long temps audience, & encorés à vous tous vne grande excuse & moyen de faire en fin finale tout ce qui seroit iugé expedient pour le bien & reputation de ces Princes & de la Coutonne. Que si pendant ledit delay il se faisoit accord en France, comme on dit qu'il s'en parle sur la proposition qu'en enuoyeroient à Paris le 27. Ianuier les Princes & Seigneurs qui estoient près le Roy, en ce cas ladite dilation nous auroit apporté cet aduantage, qu'il faudroit non seulement qu'on nous ouïs, mais aussi qu'on nous accordast de gré ou de force, ce que raisonnablement nous pourrions demander.

Et partant j'oseray icy à la fin, ce que du comencement ie n'eusse pu oser, c'est vous supplier, non seulement au nom de ceux qui m'ont imposé ce deuoir, mais encore au mien propre, s'il vaut rien, vous supplier, dis ie, comme ie vous supplie tres-humblement & tres-instamment, & autant qu'importe la reduction & acceptation du Roy, & la conseruation & amplification de la Religion Catholique, le repos & la restauration de nostre pauvre France, & de toutes bonnes & belles choses en icelle, qu'il vous plaise pendant que nous faisons icy, & ferons tout ce dont nous pourrons nous aduiser pour accellerer vostre venue, ne prendre aucune resolution qui rōpe le cours des belles-esperances qui nous luisent de tous costez depuis quelque temps en çà, puis que de vostre longue patience, comme il a esté dit, ne peut aduenir aucun mal, ains vne infinité de biens au public de la France & à toute la Chrestienté, & à vous, Monseigneur qui les auez procurez, outre vostre part desdits biens, & gloire immortelle à tous les siecles à venir, laquelle ie vous desire particulièrement, avec tres-longue & tres-heureuse vie. De Rome, ce 3. Auiil 1593.

## LETTRE A MONSIEUR N.

**M**ONSEIGNEUR, Je vous renuoye l'escriit qui vous fust enuoyé par Monsieur le Cardinal Camerino, que l'ay fait transcrire, & l'en pour la seconde fois. Ce sont gens d'esprit, de sçauoir, & de labour qui l'ont forgé, mais de fort mauuaise foy, ne faisant conscience, & n'ayans honte de traiter vn cas de conscience, & si important à la Religion Catholique, & à toute la Chrestienté, en chicaneries & sophistes; adoustant & ostans à l'escriit auquel ils respondent, & en déguisant & peruertissant le sens & les paroles, selon qu'ils ont pensé rendre le leur plus paussible, & plus aisé à tromper les ignorés, & entretenir les passionnez & interellez. Pour leur faire la resplicque qui leur appartiendroit, il faudroit estre hors de Rome, & de delà les monts; j'attends en ne disant que choses vrayes & propres, car de dire faux & d'exaggerer, il n'est possible en quelque part qu'on sois, comme aussi n'est il seur de dire la verité pour tout, & en toutes matieres.

Auue, etc. Monseigneur, &c. De Rome, ce 14. May, 1594.

## A MONSIEVR LE CARDINAL DE IOYEUSE.

**M**ONSEIGNEVR, La tres humble seruitude que i'ay avec vous, Mestainte avec tant d'obligations dont ie vous suis attentu, me rend grandement coupable de ce que i'ay tant demeuré à vous escrire, quand il n'y auroit autre chose. Mais la tres amiable & tres courtoise lettre dont il vous a plu m'honorer en passant à Lyon, aggraua ceste mienne coulpe plus que du double. Et i'avoit, que depuis que vous partistes d'icy, vous ayez esté la plus part du temps en voyage, & que Monsieur de Villeroy m'eust escrit par ses lettres du 17. Mars, qu'en partant d'auprés du Roy vous auiez promis à sa Maiesté d'estre icy dans trois mois, si est ce que ie ne laisse pour tout cela de recognoistre que i'ay tres-griefuement failly, vous en demandant pardon en toute humillté & de toute mon affection, & encores de ce cy mesme, que *MALVI DEPRECARI QVAM VITARE*, qui bien souuent est opposé à ceux-là mesme qui recourent au pardon, par ceux qui sont moins benins & clemens que vous, Monseigneur, qui avez comblé tant d'autres vertus avec vne incomparable benignité & bonté. En laquelle me confiant, ie ne consumeray plus de paroles à exprimer la faute passée, mais tascheray de l'amender, en vsant de plus grande diligence à l'aduenir, & en vous montrant par lettres & par tout autre deuoir exterior, l'interieure seruitude & deuotion que ie vous ay continuellement en mon cœur, & auray toute ma vie. Le Roy ne pouuoit mieux faire pour son service, & pour le bien de son Royaume, que de vous continuer la promotion de ses affaires en ceste Cour, Monsieur d'Eureux & moy en eusmes la premiere nouuelle par lettre de sa M. du 16. Ianuier, & par nous receuë icy le 10. Fevrier, avec commandement de le vous dire de sa part, en attendant qu'il le vous escriuist luy mesme. Cependant ie m'en suis resiouy de tout mon cœur, tant pour ladicte consideration du public, qui en sera très bien & tresdignement seruy, que pour vostre particulier, à qui a esté conserué ce qui de droit & par toute sorte de merite vous appartenoit & de qui ie suis d'ailleurs tres obligé & tres-fidelle seruiteur, & partant, tenu de servir & ressembler tout ce qui peut tourner à vostre contentement. Aussi me conioyns-je avec vous, de ce que vous partistes si à propos d'icy, & que vous auez tres-bien employé le temps par delà De Rome ce 17. Iuillet 1596.

## A MONSIEVR DE SULLY. Le 10. Fevrier.

**M**ONSIEVR, Je tiens à grand honneur & honneur la lettre que il vous m'a plu me faire de Suse le 15. Iuillet, & vous en baise tres-humblement les mains, non sans quelque honte d'auoir esté preuenu par vous en vn office que ie deuois à vostre dignité, & à vos rares merites & honnes, & comme aussi l'excuse du silence passé, qu'il vous a plu faire de grace & de courtoisie, me seroit à moy necessaire, qui deuois en vn si long temps vous auoir

rendu par mes lettres quelque partie de la reconnaissance & servitude que ie vous ay toujours conseruee en mon cœur. Mais il faut que l'honneur sorte toujours d'où elle abonde, & que nous seruiteurs, apprenions la civilité, voire l'humilité mesme de nos Seigneurs & maistres. Au demeurant, i'ay sceu de temps entemps vne partie des seruitices qu'en vn temps si diuers & dange-reux vous auez faits à la Couronne & au public de nostre France. Et quand vous n'aurez fait autre chose, c'est vne espece de miracle, qu'en vne extrême necessité, sans autre ayde ny moyen que de vostre prudence & au-thorité, vous ayez contenté ces peuples guerriers, & d'ailleurs tant recher-chez, en la confederation qu'ils auoient auec nostre Royaume, qui sem-bloit n'estre plus. Faveur particuliere dont Dieu a beny vostre integrité & saintes intentions, & la particuliere fidelité & deuotion que vous auez toujours inuolablement gardée euiers vostre patrie, si le traité de paix a-uec Monsieur de Sauoye n'est encores réuizy, on sçait bien à qui il a tenu, & de quel costé est la iustice; & peut estre que Dieu dispose ainsi les choses, a-fin que ceux qui ont le tort s'en repentent vn iour. Nous iey, auons esté vn temps peu fauorisez, mesmes depuis l'absolution, pource que depuis que la Bulle de l'absolution fust portee au Roy, sa Maiesté n'auoit eu commodité d'enuoyer vers nostre S. Pere, & attendant d'y enuoyer de iour en iour, al-uoit aussi différé de luy escrire par mesme moyen. Mais depuis quelque temps ayant sa M. eue de tres belles & ressemblables lettres à sa Sancteté, & fait des honneurs extraordinaires à son Legation France, on dit tout bien de nous, & monstre qu'on de nous vouloit gratifier & complaire cy a-pres, plus qu'on n'a fait par le passé. Qui est tout ce que ie puis pour ceste heure vous dire d'icy, où si ie puis vous faire quelque service, ie me tien-dray honoré de vos commandemens. De Rome ce 19. Aoust, 1596.

A MONSIEVR N. CONSEILLER EN LA COUR.

**M**ONSIEVR, Je dois responce à deux de vos lettres; à sçauoir à celle que le sieur Thomas l'Euesque m'appor-ta, & à vne autre que vous m'escriuistes dernièrement le 18. d'Aoust. Par l'une & par l'autre vous me faites les excuses de ce gentil homme qu'i'auois seruy de la soine de cent soixante escus, mais il n'estoit besoin que vous ny luy vous missiez en tant de peine. La chose est trop petite en soy, & l'amitié que ie luy porte est trop grande, pour auoir besoin d'une excuse si exquise. Je vous prie l'asseurer, que non seulement à present que ie suis payé de la somme, mais aussi aupara-uant i'estois tres-content de luy & marry en moy-mesme de ne luy auoir pu faire plus de seruice. Au demeurant, i'ay esté tres-aise que le voyage que vous fistes en Cour au partir d'icy vous aye si bien succédé, que la separa-tion des deux offices dont vous m'auiez parlé s'en estant ensuiuie, vous ayez esté receu Conseiller en la Cour, avec approbation & contentement de tous. C'est vn grand honneur à vous, qu'en vne grâde ieunesse, vous ayez esté ingé digné d'une place de Senateur, & fait membre d'une compagnie, qui a puissence sur la vie, honneur, & biens de tant de milliers d'hommes.

SSSSS 2

Aussi m'assuray-je que vous en appréhendez assez la charge & le poids, & sçavez la grande prudence, intégrité, rectitude, doctrine, diligence & sollicitude qui est requise, & que vous ne tenez pas cet office pour vne occasion & moyen d'estre des premiers & des plus honorez enfans de la ville, mais pour vne tres-grande & tres-estroite obligation que le prenant vous avez passée à Dieu & au monde, d'estre plus prudent & sage, plus iuste & droiturier, plus docte & entendu en toutes les bonnes choses, & plus diligent & soigneux que tous ceux qui sont au dessous de vous. Je ne doute point aussi que vous ne preniez le mariage, auquel vous estes entré peu de temps après, pour vne autre obligation d'une autre sorte de prudence, iustice, & sollicitude : & prie Dieu qu'il vous fasse la grace de vous bien acquiter de toutes ces obligations, dont j'ay grande esperance par sa bonté, & par la disposition & inclination qu'il vous a donnée à toutes bonnes choses, & par la provision qu'il a desia faite en vous des choses requises, tant que vostre aage l'a pu comporter ; & mesmement pour ce qu'il vous a fait si heureux que de vous conserver vostre Pere insques icy, auquel vous avez deuant les yeux tous les iours l'exemple d'un bon iuge, & d'un bon Conseiller & President, d'un bon pere de famille, bon mary, bon pere, bon maitre, & bon & honorable dispensateur de ses biens & moyens. Vous avez fait vne tres-bonne œuvre d'auoir accommodé Monsieur Guimard près de vous, & d'auoir apporté cette commodité à vos citoyens de profiter de sa doctrine. Je vous en louë, & vous en sçay bon gré, s'il m'est permis de parler ainsi familièrement à un Conseiller du Roy. C'est ainsi qu'il faut non seulement tascher d'auoir en soy la vertu & la doctrine, mais aussi la respecter & honorer en autrui. De Rome ce 6. de Decembre, 1596.

**MEMOIRE DONNE' EN ITALIEN**  
*au Cardinal Aldobrandin le 7. Avril, 1597. pour le faire voir  
 au Pape sur la clause, sans preiudice du Roy d'Espagne,  
 qu'on veut appliquer à la response de l'obedience quant au  
 Royaume de Navarre.*

LE sieur de Luxembourg, tant par sa propre inclination, que par commandement du Roy contenu en la lettre de sa Maieité du 12. Mars dernier, supplie tres-humblement le Pape, qu'à la response qui se fera à l'oraison de l'obedience qui se doit prester au nom de sa Maieité Tres Chrestienne, ne soit point apposee la clause, **SANS PREIUDICE DU ROY D'ESPAGNE**, de laquelle a esté parlé vosiours passez, & entendant pour tant empescher que les Espagnols ne soient admis à faire toutes les protestations qu'ils voudront faire pour le regard du Royaume de Navarre, &

que la Saincteté ne leur en donne acte : dequoy il semble que la Saincteté & les Espagnols aussi se doiuent contenter.

Premierement, pource que cecy suffit au Roy d'Espagne pour conseruation de tout le droit qu'il peut pretendre au Royaume de Nauarre, & que d'autres Princes en cas semblables s'en sont contentés, comme le Roy Tres-Chrestien Henry III. quand le Battori presta l'obedience au Pape Gregoire XIII. pour le Royaume de Pologne.

Secondement, pource que la lettre du Roy à la Saincteté sur l'obedience, dont a esté donné copie, ne parle point du Royaume de Nauarre, comme aussi l'oraison qui se doit prononcer au Consistoire n'en specifie rien : de façon qu'il se pourroit dire qu'il n'est besoin d'aucune protestation en quelque façon que ce soit.

En troisieme lieu, le Roy Tres-Chrestien possède du Royaume de Nauarre toute cette partie qu'on appelle la Basse Nauarre, où il y a Cour de Parlement, & autres sieges & iurisdicions, & vn Chancelier, & autres Magistrats & officiers separez de ceux de ses autres Estats & Seigneuries, en laquelle partie tenuë & possedee sans aucune intermission par la Maiesté & ses predecesseurs Roys de Nauarre, le Roy d'Espagne n'a iamais pretendu & ne peut pretendre aucun droit, ny mesme possession de fait: de façon que pour ceste partie ne faut faire aucune sorte de protestation.

Et ne faut s'arrester à ce que ladite clause, **SANS PREIUDICE DV ROY D'ESPAGNE**, a esté adiointe à deux autres actes. Car outre que les choses faictes sans raison ne se doiuent continuer contre raison, il n'appert point que le feu Roy Anthoine, ny le Roy d'apresent ayant rien sceu de ladite clause ny auant ny apres qu'elle fut apposee, ny que ceux-là mesmes qui les seruierent esdits actes en ayant eu cognoissance. Ains ceux qui seruierent le Roy d'apresent en l'obedience del'an 1573. ne sceurent pas mesme ce qu'ils faisoient, comme il se voit en l'acte de l'obedience, laquelle ils presterent tant au nom de la Royne Marguerite, qui n'y auoit que faire, come au nom du Roy, qui estoit & est Roy de Nauarre de son chef. Aussi n'auoit alors le Roy ny l'age, ny la volonté franche & libre pour scauoir & pouuoir disposer de ses affaires, & choisir ceux qui eussent peu, seu, & voulu le seruir fidellement & utilement.

Pour toutes ces susdites considerations, ledit sieur de Luxembourg desire que cette clause soit obmise. Et quád la Saincteté estimeroit ne pouuoir faire de moins que d'apposer ladite clause, comme nantmoins il semble qu'elle puisse & doine faire; du moins, pour les raisons dites, on la supplie de deux choses qui ne se peuent honnestement refuser l'une, qu'il soit bien exprimé & particularié que telle protestation se fait pour le regard du Royaume de Nauarre seulement, afin que les Espagnols ne la puissent à l'adaenir estender au Royaume de France comme leur ambition extrême ia par trop cogneü peut & doit donner à penser toutes choses.

L'autre, qu'apres ces paroles, **SANS PREIUDICE DV ROY D'ESPAGNE**, POUR LE REGARD DV ROYAUME DE NAVARRE, soient adiointes en cores celles cy, **ET QUE CETTE PROTESTATION S'ENTENDE AVSSI ESTRE ADIOUSTEE SANS PREIUDICE DE**

SSSSf3

SA MAIESTE' TRES CHRESTIENNE AV MESME ROYAVME  
DE NAVARRE. Autremēt ledit sieur de Luxembourg seroit reduict en ne-  
cessité de repliquer ces paroles en plein Consistoire, & d'en demander acte.

## TRAITTE FAIT ENTRE LE ROY

De ce trai-  
té est fait  
mentio cy-  
dessus.

Henry IV. & Ferdinand grand Duc de Toscane, pour la  
restitution du chasteau & isle d'If, & des foras & isle de  
Pomegues, par l'entremise du sieur d'Offat lors Euesque de  
Rennes, le 1. May 1598.

Comme ainsy soit qu'apres la mort du Tres-Chrestien Roy de France  
Henry III. le Capitaine Bosset Chastelain du chasteau d'If, destitué  
de munitions & solde necessaire pour la conservation de ceste forteresse &  
rocher, fust en peril par necessité forcez de la remettre au pouvoir des here-  
tiques, avec dommage evident de la cité de Marseille, & de toute la Com-  
té de Brouence, & partant sçachant que Madame la grande Duchesse avoit  
esté esleeue en France, eue recours à la protection, demandant garnison du  
Serenissime grand Duc son mary sous deux conditions. La premiere; que  
ledit chasteau & isle d'If se maintiendroient & conserveroient pour celuy qui se-  
roit declaré Roy de France, receu & admis pour tel, Catholique, par la  
sainte Eglise Romaine. L'autre; que ledit chastelain ne pourroit estre as-  
traint à delivrer ledit chasteau & isle à aucun autre Prince ou personne qu'à  
un Roy de France Catholique. Et comme ainsy soit que ladite Dame eust  
obteanu que le susdit Serenissime grand Duc mandast avec ses galeres des  
soldats, viures, & munitions de guerre audit chasteau, comme il a fait plu-  
sieurs fois, & amplifié depuis la forteresse, & payé continuellement la ga-  
nison qui a tousiours esté maintenuë depuis ledit temps; ayant de plus l'an-  
née passée, pour bonne fin, basti un nouveau fort, ou plusieurs en l'Isle de  
Pomegues, & iceux munis & pourvus de garnison, & pareillement payé  
la garnison, outre la fabrique faite. Et ayāt le Tres-Chrestien Roy de France  
Henry quatriesme dernièrement par le moyen du Reverendissime Mon-  
sieur d'Offat Euesque de Rennes son Conseiller d'Estat, & en certy son Pro-  
cureur, recherché son Altesse qu'elle luy restituast lesdites places apparte-  
nantes à la Couronne de France, & à sa Maiesté comme Roy Tres-Chre-  
stien d'icelle, & conformement à ce qui ault esté promis dès le commen-  
cement au Chastelain Bosset, comme il a esté dit cy dessus. De l'est qu'entre  
sa Maiesté, & pour elle ledit Reverendissime Monsieur d'Offat d'un part,  
& son Altesse pour luy d'autre, ont esté arrestez & accordez les suivans  
articles.

1. Que son Altesse retirera du chasteau & isle d'If dans quatre mois, à com-  
mencer de se iourd'huy premier May, & finir pour tout le mois d'Aoust pre-  
chain, les capitaines & soldats qu'elle y a, & delivra ledit chasteau & isle  
d'If à sa Maiesté sans aucune demolition.

2. Pourra neantmoins son Altesse en faire emporter son artillerie, armessalpestre, & autres choses siennes, laissant audit chasteau d'If l'artillerie, armess & autres choses du Roy, qui y estoient lors que les gens de son Altesse y entrerent; & aussi les poudres & balles qui ont esté portees par ceux de son Altesse, puis qu'elles doiuent estre payees à son Altesse, selon qu'il sera contenu en l'article prochain suiuant.

3. A esté calculté & verifié, avec la parole encore & affirmation de son Altesse en foy de Prince, & approuué par ledit sieur d'Ossat & arresté, que son Altesse y aye despendu vrayement & reellement, du iour qu'il y enuoya ladite garnison iusques & pour tout le mois d'Auril passé, pour l'entretènement d'icelle, & pour ladite fortification, poudres, & autres munitions, la somme & quantité de deux cens vingt-trois mille cinq cens cinq escus de monnoye Florentine, laquelle reduitte à escus au soleil, fait cent quatre vingt quinze mille cinq cens soixante & sept escus d'or au soleil; & la despenſe qu'il faudra faire pour les quatre mois prochains, a esté eualuee à raison de mille quatre cens soixante & sept escus par mois de monnoye Florentine; à la somme de cinq mille neuf cens huit escus Florentins, lesquels reduits à escus au soleil font cinq mil cét soixante & dix escus, qui adioustez aux precedens cent quatre vingt quinze mille cinq cens soixante & sept escus, font deux cens mille sept-cens trente sept escus sols.

4. Et partant ont conuenu pour ladite somme de deux cens mille sept cens trente sept escus, la M. auant que ladite restitution s'en ensuiue, se recognoiſtra debitrice à son Altesse en forme valable, & fera verifier & enteriner ladite recognoiſſance en la chambre des Comptes & ailleurs où besoin sera, sans aucune despenſe de son Altesse, & pour toute la susdite somme de deux cent mille sept cens trente sept escus d'or sol, la M. donnera assignations des meilleures & plus valables de son Royaume, pour en estre son Altesse remboursée à raison de cinquante mille escus au soleil, ou la valeur par chacun an, iusques à l'entier payement desdits deux cens mille sept cens trente sept escus d'or au soleil.

5. Et fera le Roy que douze personages François, que son Altesse fera nommer à sa Maieſté pour tout le mois prochain, (de ceux toutesfois qui au temps que ladite nomination se fera seront près sa Maieſté, ou à vingt lieues aux enuirs) s'obligeront eux, & leurs heritiers & successeurs vers son Altesse par instrument public, avec serment & autres ſolemnitez nécessaires, comme principaux & principalement, & chacun pour sa part & portion, en leur propre nom, de payer du leur toutesfois & quantes que lesdites assignations que sa Maieſté donnera; pour n'estre suffisantes, ou pour estre conuerties en autres vsages, içoit que ce fust par commandement du Roy; ou pour quelque autre cause que ce ſoit, & accident, bien que fortuit & inopiné & non accoustumé; ne ſortiront leur effet, de façon que son Altesse fust en tout ou en partie empêchée, ou ne puſt receuoir lesdits cinquante mille escus par chacun an, iusques à l'entier payement de toute la somme de deux cens mille sept cens trente sept escus au soleil; prenant lesdits prometteurs sur eux meſmes, & sur leurs heritiers & biens tout le perill qui en cecy pourroit aduenir pour quelque



accident ou cause que ce soit. Lesquelles obligations en bonne forme seront tenuës sa Maieſté faire conſigner dans les ſuſdits quatre mois à ſon Alteſſe ou à ſes Agnets en la Cour Tres-Chreſtienne, & zuant ladite conſignation ne s'enſuiura ladite reſtitution.

6. Son Alteſſe retirera auſſi dans les quatre mois ſuſdits de l'Iſle de Pomegues les Capitaines & ſoldats qu'elle y a laiſſés ladite Iſle libre au Roy, apres neantmoins que ſa M. de ſon coſté aura fait ce qui a eſté conuenu pour le regard du chasteau d'If & de ſes deſpences. Et quant au fort ou forts baſtis en ladite Iſle de Pomegues depuis l'an paſſé en çà, sô Alteſſe les pourra deſmolir dans ledit temps de quatre mois, ſans toutesfois deteriorer le port, ny autres lieux de ladite Iſle. Et pourra auſſi sô Alteſſe enleuer deſdits forts & Iſle de Pomegues librement & ſans exception l'artillerie & munitions de toutes fortes, & toute autre choſe que ſon Alteſſe y a.

7. Et pource que ſon Alteſſe pretend eſtre creditrice de la Couronne de France d'une partie des deniers dôt le feu Roy Charles IX. en ſon viuant fut accômodé par les Princes de Toſcane deſſuncts, és guerres contre les rebelles, & au beſoin tres vrgent de ce Royaume, comme ſon Alteſſe dit apparoir par inſtrumens publics, & par comptes faits & arreſtez en ce temps là, entezinez, & verifiez: Partant a eſté conuenu que ſur leſdites choſes ſa M. luy fera raiſon & iuſtice, ſi & comme par icelle il ſera obligé, ſans toutesfois qu'à l'occaſion de ceſte vieille dette la reſtitutiô du chasteau & iſle d'If, & de l'Iſle de Pomegues, doieue ou puiſſe en aucune façon eſtre retardée, ny que les ſuſdits douze perſonnages s'entendent eſtre obligez pour ceſte dette.

8. Et ces articles ſerô ſouſcrits par ſon Alteſſe, & par le ſuſdit Sieur d'Oſſat, avec appoſition de leurs ſeaux.

9. Sa Maieſté Tres Chreſtienne ratifiera le contenu des preſents articles dans deux mois, à compter dudit iour d'huy premier May: & ne voulant ſa dite M. ratifier, ſera le preſent accord & eſcriture entenduë nulle, & de nul eſſect & valeur de part & d'autre, & en particulier pour la ſouſcription & obligation de ſon Alteſſe. Fait à Florence au Palais de ſon Alteſſe appellé de Pitti, le ſuſdit premier May, 1598.

De ce me-  
moire ſur  
les articles  
eſt fait mé-  
mion cy-  
deſſus.

**MEMOIRE POUR LA DECLARATION & iuſtification des articles de l'accord fait par le ſieur d'Oſſat Eueſque de Rennes au nom du Roy avec le grand Duc de Toſcane, touchant le chasteau & iſle d'If, & les forts & iſle de Pomegues.**

#### SVR LA PREFACE.

Le grand Duc a deſiré que les articles de l'accord fuſſent conçeus de ſaçon qu'apres que le Roy les auroit ratifiez ils puiſſent eſtre vengs d'un chacun ſans

sans qu'il y eust aucun danger pour luy, & principalement du costé des Espagnols, qu'il craint grandement pour estre feudataire du Roy d'Espagne, à cause du Duché de Siemie que la maison de Mediceis tient en fief de la Couronne d'Espagne, par laquelle ledit fief pourroit estre retiré, comme à elle deuota par felonnie, au cas qu'il se peust prouuer que le grand Duc eust donné ayde & secours au Roy contre celuy d'Espagne. Et partant il a desiré que pour sa iustification enuers un chatun, & mesmement enuers lesdits Espagnols, cette preface fust mise deuant lesdits articles ainsi conceüe & minutée par l'Archeuesque de Pise. Ce que l'Euesque de Rennes ne luy a deub refuser, puis qu'il n'y auoit rien qui preiudiciaist en effect au seruice du Roy, & qu'au cōtraire il y auoit quelque chose de bon pour sa Maïesté. Entr'autres, que le grand Duc confesse là qu'il estoit obligé, auant qu'envoyer garnison à If, de conseruer & restituer ceste place à la Couronne de France; & en cela mesme monstre la fidelité, & iustifie la memoire du pauvre capitaine Boffet, qu'il ont tant calomnié depuis qu'ils l'eurent spolié du chasteau d'If, loins que ledit Euesque estime qu'en vne escriture qu'on ne vouloit estre cachée à personne, toutes choses y seroient arrestees & couchees avec plus de ciuilité & moderation.

Ledit Euesque s'arresta sur le mot d'**H E R E T I Q U E S**, qui est en la preface, & fit quelque difficulté de le passer: mais il fut fort instamment requis de le laisser ainsi. Ce qu'il fit en fin, après qu'il luy fut remōstré qu'encores que la verité requist qu'au lieu d'**H E R E T I Q U E S**, ilyeust **E S P A G N O L S**, ce n'antmoins cela ne nuisoit de rien au Roy qui auoit recen le seruice, & profitoit grandement à son Altesse qui l'auoit serny, en ce qu'on ne donnoit aucune prise aux Espagnols qui en estoient offensez, & luy en vouloient mal. Aussi ne vouloit ledit Euesque, qu'en la preface fut fait mention de Madame la grand' Duchesse, pour les raisons cy deuant escrïtes par luy à Monsieur de Villeroy 17. Auril: mais il luy fut remōstré que la verité du fait le portoit ainsi, & que cela ne nuisoit au Roy, & seruoit au grand Duc de quelque excuse & occasion de s'estre mellé de ces choses de Marseille, qui estoient relüffies tout au contraire de ce que les Espagnols vouloient. Bien fit oster ledit Euesque, là où il se parle du recours que le capitaine Boffet eut à ladite Dame, ces mots, **POVR LA SERVITUDE QUE LEDIT BOSSET FAISOIT PROFESSION D'AVOIR AVEC LE SERENISSIME DUC DE LORRAINE PERE DE LADITE DAME**, & au lieu de cela fit mettre, **SCACHANT QUE MADAME LA GRAND' DVCHESSE AVOIT ESTE' ELEVEE EN FRANCE**: afin que l'on cognoisse que l'adresse de Boffet à ladite Dame, & ce qu'elle en auoit fait, auoit esté pour le regard de la Frante & non de la Lorraine.

Là où il se parle des forts faits l'an passé en l'isle de Pomegues, où il y auoit, **QUE Ç'AVOIT ESTE' POVR LA DEFENSE DV CHATEAU D'IF**, ledit Euesque le fist oster, comme chose contraire à la verité, & à l'intention qu'il auoit de ne laisser passer rien de la dépense par eux faite à la construction desdits forts: & leur suggera ces mots, **POVR BONNE FIN**, dont ils se contenterent.

*Sur le premier Article.*

**A** V premier article n'y a rien dont ledit Euesque aye à rendre raison, si ce n'est du terme de quatre mois, lequel il a arbitré luy-mesme, pour les choses que le Roy auoit à faire de son costé, afin que le téps luy fust, comme pour ratifier, pour donner assignations, & pour trouuer & bailler les cautions. Au demeurant, par ledit article se voit qu'il a procuré pour le seruice du Roy plus que sa commission ne portoit, en ce que les Florentins ont à sortir non seulement du chasteau d'If, comme sa Maiesté demandoit, mais aussi du bas, & de toute l'Isle, où sa Maiesté se contentoit qu'ils demeurassent, croyant ledit Euesque qu'il estoit expedient que les estrangers voidassent de ces lieux là en tout & par tout, tant pour les inconnuans qui pouuoient s'en ensuiure semblables à ceux que nous auons veu auenir l'an passé, & plus grands si le temps s'y addonnoit, que pour éviter à la grande dépense qui s'alloit tousiours multipliant, & qu'il nous eust en fin fallu payer avec plus d'incommodité & de difficulté que nous n'aurions en ce qui a esté dépensé iusques icy. Aussi n'y eut-il plus eu aucune secreté pour ledit grand Duc à l'aduenir, attendu ce que ses gens auoient fait par le passé.

Le second article monstre son equité de luy-mesme, sans besoin d'autre éclaircissement ou iustification.

L'article troisiésme, comme aussi le quatriésme & cinquiésme, concernent la dépense faite par le grand Duc à l'entretienement de la garnison du chasteau & Isle d'If, & à la fortification & munition d'iceux, depuis le mois d'Aoust inclusiuement 1591. iusques à la fin d'Aoust de la presente annee 1598. & en ce troisiésme est définie & déterminée toute ladite dépense pour ledit temps à deux cens mille sept cens trente sept escus. Surquoy est à noter que ledit Euesque de Rennes insista fort à ce que ce compte & calcul se fust en France près le Roy, ou bien sur les lieux près Marseille, comme il estoit raisonnable. Mais le grand Duc au contraire a voulu en toutes façons qu'il se fust à Florence, & demandoit que le Roy enuoyast dans deux mois vn homme pour ouir & arrester ledit compte. Ce que voyant ledit Euesque qui desiroit abregier les matieres, & mettre fin au plustost à cét affaire, aimant mieux deuorer ceste molestie de comptes, que de souffrir que les choses fussent mises en plus grande longueur. Et s'estant offert à ouir ledit compte, on le dressa & le luy bailla de la façon qu'il l'enuoye au Roy, eux le faisant monter pour ledit temps depuis Aoust inclusiuement 1591. iusques à la fin d'Auril 1598. à deux cens quatre-vingts & six mille soixante escus monnoye Florentine, à raison de dix iules & demy l'escu, outre la dépense des quatre mois suiuaus; laquelle à l'instance dudit Euesque, qui ne vouloit rien laisser en arriere qui püst apporter longueur à la restitution des places, qu'il se proposoit pour fin principale, fut évaluée à cinq mille neuf cés huit escus Florentins. Ledit Euesque ne demanda qu'il fust rien rabbatu de ceste somme pour la dépense des quatre mois derniers, qui luy sembla assez modeste; mais pour les deux cens quatre-vingts & six mille escus luy semblât trop excessif.

fine, & plusieurs parties déraisonnables, il l'eut volontiers reduite bien bas & il eust peu, comme il en fit rabattre quelques parties. Toutesfois il estima n'y deuoit regarder de trop près, ains y procederent ciuilement, & passer plusieurs choses par conniuece. Premièrement, parce qu'il traittoit d'un grand affaire, & de la part d'un grand Roy. Secondemēt, pource que le grād Duc affirmoit lesdites parties estre vrayes, en parole & foy de Prince. Tiercement, pour ce que ledit Euesque vouloit traitter ledit grand Duc à toute rigueur en la dépense des sorts de Pomegues, & ne luy en rien passer, comme il a aussi fait. Quatriesimement, pour ce que le grand Duc tenoit & possedoit les sorts & Isles dont est question, & que la condition des possesseurs leur doane grand aduantage sur ceux qui demandent le leur, & ne peuuent tenir la rigueur que la chambre des Comptes tient aux comptables. Quintement, pource que ledit Euesque ne promettoit que ladite dépense seroit payee comptant, ains à termes, & sans aucun interest, & partant n'estima deuoit debatre que dix parties, où il ne voyoit rien qui concernast ledit chasteau & Isle d'If; mais il y en auoit qui contenoient des choses auenuës dès l'an 1590. auquel temps ledit grand Duc n'auoit encore enuoyé personne ausdits lieux. Et laçoit qu'en quelques vnes desdites parties il s'y parlast de Marseille toutesfois cela ne faisoit à propos, puis que Marseille estoit rebelle au Roy & à la Couronne.

Sur l'article quatriesme. Les promesses y contenuës à sçauoir que le Roy recognoistra ceste dette, & en donnera assignatiō, suiuant le pouuoir que ledit Euesque en auoit, pour en payer cinquante mille escus par an, semblent estre telles que le Roy n'aura occasion de s'en plaindre, ains plustost de loier qu'on luy ait obtenu terme de payer, & que pendant cela il n'en paye aucun interest, & neantmoins recouure ses places; & est vn des fruits de ce que le grand Duc a voulu que les articles de l'accord fussent conceus de façon, que chacun les pust voir apres que le Roy les auroit ratifiez. Et ce fut aussi vne des raisons que l'Euesque leur allegua quand on luy parla d'en promettre aussi l'interest au denier douze, à sçauoir qu'en vne escriture qu'on vouloit estre veuë vn iour d'un chacun, il ne seroit beau qu'on y vist vne stipulation d'interests entre Princes, laquelle mesme en Italie ne seroit licite entre marchands, iacqz qu'elle soit receuë en France.

L'article cinquieme est celuy qui moins plaira, & qui enuers plusieurs pourra faire perdre à l'Euesque de Rennes le gré qu'autrement on luy eust pensé auoir du bon accord qu'il a procuré & obtenu pour le seruice du Roy, repos & seureté du Royaume. Si est-ce que c'est celuy auquel est principalement deub l'accord & la restitution des places. Surquoy est à noter que le grand Duc, partie fesché de ce que le Roy ne luy a voulu fier ces places, & de ce que nous-mesmes en d'autres choses auons monsté, comme il dit, nous souuenir peu des seruices qu'il a faits à sa Maïeste, & au Royaume, & fesché encores de ce qu'on luy a manqué, comme il dit aussi, de l'assignation qu'on luy auoit baillée sur les parties casuelles, en détournât le deniers à autres vsages nō necessaires, & sās auoir daigné luy en escrire, ny faire dire vn seul mor: parue honteux de la nouveauté faite par les siens au chasteau d'If, & Isle de Pomegues, & enaigant que le Roy & les François ne l'ayent pris en

trop miduaife part, & ne s'en foudiennent plus qu'il ne voudroit; partie auffi fe défiant pour toutes les choses fufdites, d'efre iamais payé de rien qui luy foit deub, après s'efre deffaiſi defdites places: a voulu, & perfifté que la Maieſté luy donnast quelques répondans, qui au moins pour leur intereſt, ſi ce n'eſtoit pour la iuſtice, tinſſent la main qu'il fuſt bien aſſigné, & payé aux termes accordez, & que les aſſignations qui luy ſeroient & auoient eſté ia donnees, ne fuſſent diuerties à autres choses, au moins ſans luy en faire dire quelque mot, & en ſcaudir ſa volonté. Et ayant demandé premierement des Marchands & Banquiers en Italie, & puis recogneu que le Roy ne luy en pouoit donner, il fit monſtrer vne liſte à l'Eueſque de Rennes, où eſtoient nommez pluſieurs grands du Royaume & du Conſeil du Roy, & certains Italiens demeurans & conuerſans en France, comme les Bonuiſi & Capponi de Lyon, le ſieur Bartholomeo Cenani Luequois, les ſieurs Zamet & d'Atichi, & quelques autres, & vouloit que ledit Eueſque promiſt que le Roy feroit que tous ceux là, tant François qu'Italiens, répondroient tant des ſommes ſpecifices au troiſieſme article, que des autres par luy preſtees, dont on luy auoit ia donné aſſignation ſur les parties caſuelles. Ledit Eueſque debatit pluſieurs iours que ſon Alteſſe ne deuoit demander aucun répondant, & que luy ne pouoit luy en donner ny promettre, & vouloit pluſtoſt s'en aller ſans rien faire, que d'obliger le Roy à cela. Mais voyant que le grand Duc demouroit ferme, & ſe vouloit ſeruir du refus dudit Eueſque pour pretexte de retenir les places: luy apres y auoir bien penſé, & conſiderant l'importance du recouuement deſdites places, ſe reſolut de luy oſter ce pretexte, & de le mettre encôres plus en ſon tort, & acquerir, tant plus de iuſtification au Roy, quelque reſoluſion que ſa Maieſté priſt après le refus de ſon Alteſſe. Auſſi fut ledit Eueſque à ce enhardy, parce que la deſpenſe faite au chasteau d'If auoit ſeruy à preſeruer la ville de Maſſeille de l'inuaſion des Eſpagnols, & que les autres ſommes preſtees par ledit grand Duc, auoient pareillement ſeruy à maintenir le Roy en ſon Eſtat, & à conſeruer le Royaume, & que la voye d'auoir les dites places par guerre, eſtoit pour apporter infinis inconueniens, & que pour moindres occasions, & debtes moins fauorables on a autresfois veu bailler des oſtages, & les enuoyer hors du Royaume. Et partant il ſe reſolut en fin de promettre & bailler par eſcrit au grand Duc, que le Roy feroit que douze François que ſon Alteſſe nommeroit dans deux mois, de ceux neantmoins qui au temps de la nomination ſeroient près ſa Maieſté, ou à vingt liours esuenir d'iceux, s'obligeront de payer à ſon Alteſſe, chacun pour ſa part & portion, ce que les aſſignations à donner ou ia donnees rendtoient de moins que cinquante mille ſcus par an, rât pour ladite deſpenſe d'If, que pour les ſommes preſtees en diuers comptes. Ledit Eueſque mit, perſonnages François, pour ce qu'ils auroient plus d'interet, volôré, & zele d'entrer en obligation pour leur Prince & patrie que les eſtrangers: & cômme le Roy auroit plus d'autorité ſur eux pour les y faire condeſcendre, auſſi auroit il pluſmoyen de les preſerues d'un beſoyn de la trop grande rigueur des executions, ſi le grand Duc en vouloit abuſer, que d'en garantir les eſtrangers, qui ont la pluſpart de leurs biens & ſommes hors de France & protection de ſa Maieſté. Auſſi n'importe nombre de doute, pour ce

que l'apparence estoit plus grande envers le grand Duc, & que la facilité de porter en tout enchemement chacun sa part & portion, en seroit plus facile que d'un petit nombre. Ledit Euesque mit encores de ceux qui seroient près sa Majesté, ou à vingt lieues, afin que le Roy eust plus de moyen de leur parler, & persuader ce qui seroit de son service & bien du Royaume; & que le grand Duc nommant personnes estoignées du Roy, n'eust moyen ny pretexte de tirer en longueur la restitution, que ledit Euesque s'est toujours proposée d'asseurer & avancer par toute la negociation le plus qu'il luy a esté possible. Et quoy qu'on aye contesté de la part du grand Duc sur le mot de FRANÇOIS, & D'AVPREZ DU ROY, jamais ledit Euesque ne s'en est voulu départir. Mais au reste, l'Archeuesque de Pise a mis en l'article que ledit Euesque avoit dressé & baillé par escrit en la façon que dessus, tant de paroles rigoureuses, & tant de chicane, qu'à peine se trouvoit-il advocat, procureur, notaire, ny chicaneur au monde qui en eust tant fait. Et ledit Euesque ne reconnoist quasi plus rien du sien en tout cet article. Mais pour toutes ces paroles, qui sont pour faire peur à des enfans, ou à gens qui ne sçachent la force & efficace d'une obligation bien trouvée en peu de paroles substantielles, ledit Euesque n'a laissé de passer outre à servir le Roy & la France en occasion si importante, comme le recouvrement desdites places, seureté de Marseille & Provence, tranquillité d'esprit du Roy, & de tous les bons François de ce costé-là.

Le 6. article est conceu en tels termes qu'il n'a besoin de declaration; mesmes quand il plaira au Roy se souvenir, que ledit Euesque avoit pourvoir d'accorder audit grand Duc la dépense faite à Pomegues, que son Altesse n'estime pas moins de cent quarante mille escus. Et à la verité, encores que ledit Euesque en tout le reste de sa negociation ait esté fort patient, comme il en a esté besoin, si est-ce que quand l'Archeuesque de Pise, qui est un grand Docteur, & qui a esté long temps Auditeur de Rote, lui voulut maintenir en point de droict, que le Roy devoit rembourser cela, & autres choses faites par eux pour asséurer l'usurpation du chasteau d'If, la patience luy eschappa, & leur parla avec tant de raison & de vehemence, pour ne dire colere, qu'onques plus ils n'y retournerent, & ont mieux aymé subir le contenu de cet article. Bien voulut ledit Euesque qu'ils se fussent voulu contenter d'arbitrer une somme moderee, en retenant en pied lesdits forts de Pomegues, ou d'en estre quittes en les laissant ruiner par ledit grand Duc; mais ils ont tenu leur cœur à ne vouloir rien rabattre de ladicte somme, comme l'Euesque avoit tenu le sien à ne leur en vouloir rien passer absolument.

Sur le 7. Encores que le Roy eust escrit à l'Euesque de Rennes, que le grand Duc luy avoit fait dire que pour ceste heure il ne demandoit les sommes iadis prestées par les grands Ducs ses pere & frere, & que ledit grand Duc aye reconnu audit Euesque qu'il estoit vray; neantmoins il a fait grande instance, qu'en cet accord il en fut fait mention, afin que quand les Espagnols sçauroient qu'il auroit des Agens qui iroient & viendroient par la France, ils creussent que ce fust pour la seule dépense du chasteau d'If, & pour ses vieilles dettes, & non pour sommes qu'il eust prestées luy-mesme. Et ledit Euesque lui accorda tout son article 7. par lequel le Roy n'est obligé

ny plus ny moins qu'auparavant, & le grand Duc ne s'en peut proualoir, ny à la retention desdites places, ny à autre chose plus que deuant.

Sur le huitiesme, Comme le grand Duc auoit cherché d'envoyer ledit Euesque sans aucune cōclusion, de façon toutesfois qu'il semblast qu'il n'auoit tenu à luy, ains plustost au Roy, qui n'auoit point enuoyé procuration audit Euesque pour traitter, ny escrit quelles assignations il vouloit donner outre la premiere, ny à quelles autres conditions les places luy doiuent estre restituees, de sorte que sans vne grande patience dudit Euesque, il ne les eust peu faire entrer au traitté; aussi a le grand Duc fait grande difficulté de signer les articles accordez, & vouloit que l'Euesque se contentast que comme ledit Euesque signeroit pour le Roy, aussi le Cheualier Vinta principal Secetaire signast pour son Altesse. Mais apres que ledit Euesque eust dit audit Vinta plusieurs raisons pourquoy son Altesse ne deuoit faire difficulté de signer, ledit Euesque passant outre adiousta, que tout aussi tost que le grand Duc, apres auoir entendu ses raisons, auroit declaré ne vouloir signer, il monteroit à cheual, & s'en iroit à Ferrare sans plus dire ny escouter vn seul mot de cēt affaire. Qui fut cause que ledit grand Duc se resolut en fin de signer, apres neantmoins qu'il eut encores proposé en son Conseil de faire demander que ledit Euesque se contentast que Madame la grād Duchesse signast, & que sondit Conseil l'eust dissuadé de faire ceste demande, attendu la resolution en laquelle ils auoient veu ledit Euesque, qui n'accepteroit aucun autre seing que le sien. Ce que ledit Euesque sceut par vn de ceux qui en dissuaderent son Altesse.

L'article 9. concernant la ratification n'a rien d'extraordinaire, qu'un peu de chicane de l'Archeuesque de Pise sur la fin, qui n'importe de rien, & s'entendroit assez de foy quand il n'en eust esté rien dit.

La date a esté apposee du iour de May, pour la mention qui en auoit esté faite en quelques vns desdits articles combien qu'ils ne furent signez, ny bien arretez du tout iusques au 5. du matin. De façon que l'Euesque de Rennes fut iustement trois semaines à Florence, y estant arriué le Mardy 14. d'Auril, & partit ledit 5. de May.

*Sur l'escriture baillée à part hors lesdits articles au grand Duc  
par l'Euesque de Rennes.*

**L**E grand Duc pour les causes dites au commencement, a voulu que ceste Escriture luy fust baillée à part, & que le nom du Seigneur de Gondy y fust employé, comme en tout le reste qui s'est fait iusques icy pour le regard des sommes par luy prestees. Au demeurant, par ceste escriture ne luy est promise aucune nouuelle assignation, mais seulement que le Roy fera valloir celle qui lui a esté baillée de cinquante mille escus par an. A quoy ledit Euesque n'a deub fait aucune difficulté, puis que le contraiet fait avec ledit sieur de Gondy est tel qu'il en peut receuoir encōres plus grande som-

me, & qu'à celsa s'obligeront douze personages François, avec la chicane del' Archeuesque de Pise, & dont les pleiges sont garents, en tenant la main que le contract la passé soit bien gardé & entretenu, comme il est iuste & raisonnable.

Es se faut souuenir qu'encores que ceste promesse soit seperee des articles del'accord, ce nonobstant elle en fait partie aussi bien que si elle y estoit inferee. Et partant est besoin que le Roy ratifie & accomplisse aussi bien ceste promesse que les susdits articles, & que la ratification qu'il luy plaira en faire, soit aussi seperee de celle que sa Maiesté fera desdits articles, non seulement pour le contentement du grand Duc qui le desire ainsi, mais aussi pour le soin que de nous mesmes nous deuons auoir que son Altesse ne recoiue dommage des Espagnols pour nous auoir aidé contr'eux. Fait à Ferrare, le Mardy de la Pentecoste 12.iour de May 1598..

*Copie en François de la contre-lettre faite en Italien par le grand Duc touchant les douze fideiussieurs.*

De cett  
côtre le  
est fait  
mention  
pages p  
cedente

**D**Om Ferdinand de Medicis grand Duc de Toscane. Comme ainsi soit que le 1. May, de la presente année 1598. ayant esté arrestez & accordez certains articles entre nous & monsieur l'Euesque de Rennes, Conseiller d'Estat du Roy tres Chrestien, en nom de sa Maiesté tres-Chrestienne, sur la restitution du Chasteau & isle d'If, & de l'isle de Pomegues aupres de Marseille, & sur le remboursement des dépens par nous faits pour la conseruation dudit Chasteau & isles; & qu'entre lesdits articles il y en ait vn, par lequel est promis que sa Maiesté tres-Chrestienne fera que douze personages François, que nous luy ferons nommer, s'obligeront eux, & leurs heritiers & successeurs enuers nous, pour les sommes & en la façon qu'il est contenu au susdit article, & en vne promesse dudit sieur Euesque. Et ayant sa Maiesté tres-Chrestienne ratifié purement & simplement les susdits articles par ses lettres patentes du 25. de Iuin dernier passé, & puis fait nous requerir de vouloir pour plusieurs dignes respects le deliurer & quitter de la prestation des susdits douze fideiussieurs. Nous voulans complaire à sa Maiesté tres-Chrestienne, declavons par la presente, que nous n'entendons point & ne voulons nous aider ny seruir du susdit article, & promesse concernant lesdits douze fideiussieurs; ains y renouons, & quittons sa Maiesté tres-Chrestienne, & tout autre, En foy dequoy nous auons souscrit la presente, & y fait apposer nostre seel accoustumé. A Florence, en nostre Palais de Pitti, le 14.iour d'Aoust, 1598.



## CAUSES QUE LE ROY D'ESPAGNE a de desirer & de faire la paix avec la France, avec laquelle il n'a pas mesme guerre formelle & legitime.

Les Rois de France & d'Espagne ont plusieurs grandes occasions de desirer & faire la paix entre eux. Et quant au Roy de France, chacun la croira facilement sans qu'on allegue autre raison; d'autant que la plus part des hommes regarderont plus à la disgrâce de quelque peu de villes qui se sont perduës par la presumption & negligence des habitants, qu'à plusieurs centaines d'autres, & à tout vn Royaume que sa Maiesté tres-Chrestienne s'est acquis avec la grace de Dieu par sa valeur, vigilance, iustice & clemence. Mais du Roy d'Espagne qui semble auoir auourd'huy quelque prosperité, on ne le croit pas si facilement; & neantmoins il est tres-vray que luy aussi a ses occasions de desirer & faire la paix.

Et premierement, il a toutes celles qu'ont tous Princes, & principalement les Princes Chrestiens, pour deliurer leurs consciences de la participation de tant de maux qu'ils se font en toutes sortes de guerres pour imbecillité qu'ils soient, s'y commettant vns infamie de pechez & meschancitez, & s'y pervertissant ou retardant tout vray bien; comme il se voit auourd'huy que ces deux Rois ne peuvent faire ny dedans ny dehors leurs Estats, le bien auquel leur conscience & reputation, & leur seureté propres les oblige; & puis pour deliurer aussi leurs personnes, & leurs Estats & peuples qui sont sous eux, de la tempestueuse facherie, vexation, pertes, calamitez & dangers, dont sont menetz tous ceux qui ont guerre avec quelque ennemy que ce soit, & pour grands & puissans qu'ils soient.

Secondement, ledit Roy d'Espagne en a plusieurs autres causes qui luy sont propres & particulieres; comme son age vieux & decrepite, la ieunesse & peu d'experience du Prince son fils, la mauuaise satisfaction qu'ont certaines Provinces entieres, en Espagne mesme, come le Portugal, Arragon, Catalogne & autres, les inimitiez secretes qui sont entre plusieurs grans d'Espagne, & le peu d'intelligence que quelques vns pretendrent estre entre le Prince & l'Infante nourrie aux affaires, & non vuide d'ambition. Lesquelles passions à present cachees, pourroient esclater apres la mort de sa Maiesté Catholique, & causer des troubles tres-pernicieux.

La separation & grande distance des Estats qu'il a hors l'Espagne, & le mal contentement vniuersel de tous les peuples estrangers, qui mal-volontiers obeissent à la nation Espagnole; & mesme ment la noblesse, laquelle n'est retenuë de se rebeller que par faute d'vn Chef, & par le respect qu'on porte à sa Maiesté viuante.

La quantité & qualité des autres ennemis avec qui sa Maiesté Catholique a guerre outre le Roy de France, & le peu de fruit qu'en vingt-cingt ou trente ans il a fait contre les Anglois, Holandois, & autres des Pays-bas, où depuis

depuis plusieurs années il est allé perdant tousiours, excepté au dernier siege de Helt, qui neantmoins luy cousta bien cher.

La ialousie & crainte que sa grandeur cause à tous les Princes Chrestiens, entre lesquels n'y en a possible pas vn, qui pour le vele de la liberté continue, ne desire quelque moderation, pour ne dire humiliation, d'vne si grande puissance. A tout ce que dessus, on peut entores adlouster la haine grande que luy a causé la suspension des payemens qui le fit dernièrement, laquelle a causé non seulement dommage aux creanciers & autres interessez, mais aussi incommodité grande à tous les changes & autres commerces, & aux particuliers en diners endroits de la Chrestienté, pour ne dire aux affaires propres de sa Maiesté Catholique.

Mais bien doit estre en l'esprit du Roy d'Espagne pour vn million de raisons, l'obligation particuliere que sa Maiesté a, comme Roy Chrestien, tres-puissant, & comme chef de la maison d'Autriche, de secourir la Chrestienté, & la Foy & Religion Catholique, & sa maison propre, & ses parens plus proches contre le Turc ennemy commun des Chrestiens, & particulièrement de la maison d'Autriche.

Les prosperitez qu'on pretend que ledit Roy ait eu contre la France depuis quelques temps, non seulement ne le doiuent rerarder de la paix, ains l'y doiuent d'autant plus inuiter & pousser, pouuant par ce moyen faire à present la paix avec plus de reputation & aduantage, & deuant aussi sa Maiesté considerer l'instabilité des choses humaines, & l'incertitude des euemens de la guerre, & que continuant la guerre, il peut non seulement perdre ce qu'il a acquis sur autrui, comme en peu de temps il perdit Paris où il auoit garnison, & tant d'autres villes à sa deuotion, mais aussi beaucoup du sien propre, attendu mesme toutes les autres choses de cy dessus.

La difficulté puis apres de faire la paix n'est pas si grande qu'on croit, pourueu que la bonne volonté y soit. Aussi il se peut dire avec grand fondement, que iagoit qu'entre France & Espagne se facent aujourd'uy tous faits d'hostilité, ce nonobstant il n'y a point entre ces deux Couronnes guerre formelle & legitime, pource que le Roy d'Espagne sur la denonciation de la guerre que fit le Roy de France, respondit & publia qu'il ne pouuoit & ne deuoit admettre la rapture generale de la paix faite en l'annee 1559. qu'il auoit si longuement maintenuë avec la Couronne de France, & que le Prince de Beara, pour n'estre lors reconnu par le Pape pour Roy de France, ny absous, & pour autres causes, n'auoit peu legitimement rompre ladite paix. Maintenant estant la Couronne de France & tout ce Royaume, là reuiuy sous la puissance d'un Roy tres-Chrestien, par le moyen de l'absolution & autorité du Pape, & cessantes toutes ces choses qu'on prenoit alors, sa Maiesté Catholique ne peut & ne doit en conscience, ny avec reputation de Prince, veritable & seel, dire aujourd'uy qu'il a conyut avec ladite Couronne de France la guerre, qu'il dist alors n'auoir & ne uouloit point.

**DISCOURS DU SIEUR DOSSAT**  
*Euesque de Rennes à la Seigneurie de Venise, sur  
 la paix de Veruins.*

Est fait  
 mention  
 de ce dis-  
 cours és  
 pages pre-  
 cedentes.

**L**E 21. Iuliet de ceste année 1598. l'Euesque de Rennes executant le com-  
 mandement qu'il auoit du Roy; de donner aduis de la paix au Duc &  
 Seigneurie de Venise, & de s'en conjoynr avec eux, leur dit qu'ayant la  
 paix esté faite entré le Roy, & le Roy d'Espagne, sa Maiesté tres-Chre-  
 stienne n'auoit voulu faillir de leur en donner aduis, & s'en conjoynr avec  
 eux comme avec ses meilleurs amis, desquels il estimoit grandement le iu-  
 gement, & auoit espronné la bonne volonté enuers sa Maiesté & son Roy-  
 aume, s'assurant sa Maiesté que comme ils auoient comparty aux travaux  
 & miseres de la France, aussi se resioüiroient ils de son repos & meilleur  
 estat. Apres ce commencement il leur dit quand, & où la paix auoit esté  
 faite, publiee & iuree, & de là vint à leur déduire briefueiment les causes qui  
 auoient mené le Roy à la paix; & leur dit que ce n'auoit point esté la lâcheté,  
 & faute de vigueur en la personne de sa Maiesté, & moins faute de coura-  
 ge, ou d'amis, qui s'offroient plus que iamais, ny faute de moyens siens &  
 propres, apres auoir reduit en son obeyssance toutes les Prouinces de la Frâ-  
 ce, sans en rien excepter; ny faute non plus d'esperance de plus grand pro-  
 grez & de meilleure fortune, puisque de petits commencemens il estoit venu  
 à bout du tout: mais que sa Maiesté s'estoit meüé d'autres respects, dignes  
 vrayement d'un Roy tres-Chrestien tel qu'il estoit: desquels respects ledit E-  
 uesque reduisit à trois chefs; à sçauoir aux continuelles exhortations de no-  
 stre S. Pere le Pape, à l'humaine & benigne nature de sa M. & à la cōpasion  
 qu'elle auoit eüe de sō pauvre peuple, & de l'estat de tout sō Royaume. Sur  
 chascun desquels trois points il dit ce qui luy sembla estre le plus à propos.

Sur le premier. Que la Sainteté n'auoit iamais cessé de presser, admo-  
 nester, prier & coniuurer sa Maiesté, iusques à ce que l'entière auoir esté faite.  
 Et comme tous Princes Chrestiens & Catholiques deussent auoir en grand  
 de reuerence les records du Viceite de nostre Seigneur Iesus Christ; sa  
 Maiesté auoit estimé y deuoit deferer particulièrement, obligée à sa Sain-  
 teté pour les causes que lesdits Duc & Seigneurie sçauoient.

Sur le second. Que le naturel du Roy estoit aliéné non seulement de toute  
 vengeance, mais aussi de toute force & violence. Et encoré que par quelque  
 necessité il eust esté nourry & élevé dans les armes, & esté en guerres  
 continuelles, & fust devenu un grand guerrier qui chascun jour, & en tout  
 il n'auoit iamais pris plaisir à voir épandre le sang humain, & n'auoit toujours  
 fait mal volontiers la guerre, cōme il se pouuoit iuger par infinis actes de sa  
 clemence & insigne liberalité enuers ses plus capitaux ennemis, non seule-  
 ment es conditions & accords de sang froid & de sens rassis, mais aussi en la  
 ferueur mesme des batailles, assauts, rencontres, & autres facions de guerre.

Sur le troisieme ledit Euesque s'arrestant d'auantage, rememora au Duc & à la Seigneurie comme incontinent apres la paix de 1539. estant mort le Roy Henry II. & ayant laissé le Roy François II. fort ieune, à peine estoit la France deliuree de la precedente guerre estrangere, que les discordes ciuiles commencèrent à la vexer & tourmenter, pour la competence de quelques Princes du Royaume au gouuernement d'iceluy. Et le Roy François II. ayant vescu fort peu, & laissé le Roy Charles IX. encore beaucoup plus ieune que luy, lesdites discordes ciuiles s'estoient d'autant plus augmentees, & mesmement qu'à la competence du gouuernement du Royaume s'adioignit le different de la Religion, qui auoit causé infinis maux au Royaume en public, & à tous les François en particulier, durant les regnes de Charles IX. & de Henry III. Et sur la fin du regne de Henry III. estant suruenue la Ligue, & le meurtre de ce pauvre Roy, s'en estoit ensuiuy l'horrible trouble & confusion de toutes choses, qui auoient pësé ruiner l'Estat tout à fait, de façon que c'estoit vn grand miracle de Dieu de le voir auourd'huy reduit là où il se trouuoit. Qu'en tout le susdit temps, depuis la mort de Henry II. iusques à huy, qui estoient 38. ans, outre la guerre estrangere qui auoit precedé, la France auoit souffert non seulement les maux & miseres qui s'estoient veüs à l'œil, comme de conquestes d'armees, sacs de villes, meurtres particuliers, pilleries, brutallements & ruines de bastimens, vastité de champs, & autres calamitez semblables, dont chacun s'apperceuoit, mais auoit encore enduré beaucoup d'autres pires maux, qui ne se voyoient point des yeux du corps, mais la Malesté les voyoit bien de l'œil de l'entendement, comme la dissolution & peruertissement de tout ordre & police en l'Estat, l'irreligion & impieté des esprits particuliers, l'infidelité & perfidie, l'inhumanité & cruauté qui en vne si grande longueur de guerres estoient passées en coustume & en habitude. D'où concludoit ledit Euesque, que ceste cy auoit esté vne tres grande & puissante cause en l'esprit du Roy, & vne pie & sainte résolution de sa M. & digne d'un Roy Tres Chrestien tel qu'il estoit, d'accepter la paix, qui deuoit, & seule pouuoit arrester le cours de tant de vices & maux, & ramener les vertus & biens contraires, & mesmement estans offertes à sa M. conditions de paix raisonnables & honorables, qui ne se pouuoient honnestement refuser. Auquel propos il exposa briueuement les conditions de la paix les plus particulieres, substantielles, & aduantageuses pour le Roy & le Royaume, sans parler de celles qui estoient communes & generales à toute paix, ou qui n'importoient pas tant. Et à la fin de ce propos des conditions, adiousta come l'un & l'autre des Rois auoient compris leurs amis en la paix, & nommement ledit Duc & Seigneurie. Ce que le Roy auoit fait de son costé, non seulement pour le deuoir d'amitié qu'il auoit au eueux, & pour reuoir de plusieurs plaisirs qu'il en auoit receus, mais aussi pour ce qu'il tenoit à honneur & reputation d'estre & se dire amy, alié, & considéré de la Republ. de Venise. Et puis leur exposa le grand regret qui estoit au Roy, de ce qu'il n'auoit peu faire entretenir la paix avec luy ceux qui luy estoient aliez en ceste guerre, le grand deuoir que sa M. y auoit fait, le long temps qu'il les auoit attendus, de terme de six mois qu'apres la conclusion de la paix il auoit encore impetré pour les faire entrer.

& la ferme deliberation en laquelle il estoit de perséuerer, & ne cesser in-  
 quies à ce qu'il eust moyenné vne paix generale en toute la Chrestienté,  
 Apres cela ledit Euesque leur dit pour vn principal & dernier point, com-  
 me le Roy entendoit vser de ceste paix, & que ce seroit non seulement pour  
 le repos de sa personne, & de ses subiets, & pour la reputation de tant de  
 pertes & dommages endurez, mais encores beaucoup plus pour l'extirpa-  
 tion des vices & maux mentionnez cy-dessus, & pour remettre sur tout les  
 choses bonnes, & premierement le seruice de Dieu; entant que le Roy pour-  
 roit sans guerre civile, en laquelle sa Maiesté ne vouloit entrer en sorte de  
 monde, ains faire proceder par voye de douceur à la reduction des déuoyez,  
 & à la reformation de la discipline Ecclesiastique, & de toutes bonnes  
 mœurs & loüables coustumes. Auquel soin sa Maiesté se sent particuliere-  
 ment obligee, outre le commun deuoir que tous les Princes y auoient, par  
 infinies faueurs & graces receuës de sa bonté diuine, qui apres auoir pre-  
 seruë sa personne de plusieurs assassinats machinez & attentez contre luy,  
 luy auoit donné tant de victoires, pacifié son Royaume dedans & dehors, &  
 nonobstant les oppositions des plus grands Princes Chrestiens & de la plu-  
 part de ses subiets, & de la dispute & de la disette & necessité de choses in-  
 numerables, l'auoit eleué au suprême degré de grandeur, où il se trouuoit  
 auourd'uy pacifique sans contradiction de personne. Entédoit encores sa  
 Maiesté faire, qu'outre la religion, les autres choses du Royaume fussent  
 aussi faites & administrées avec plus d'ordre & pouruoyance que par le pas-  
 sé, faire reuiure & refleurir la iustice, festabliir l'autorité des Cours de Pa-  
 rlement & des autres Magistrats, reduire les garnisons & autres gés de guer-  
 re à certain nombre competent, & leur faire obseruer la discipline militai-  
 re, mettre ordre aux finances, & en oster inuisibles abus qui s'y commettoient,  
 s'en exigeant vne infinie quantité sur le peuple, & en tournant fort peu au  
 seruice du Roy & du public; bref, remettre sus la police & ordre ancien du  
 Royaume, releuer l'autorité Royale, abaissée par tant de souleuatiens &  
 rebellions, & ramener l'obeïssance, sans laquelle nul Estat, communauté, ny  
 compagnie ne pourroit subsister. Quand le Royaume seroit ainsi guerry,  
 renforcé & accommodé en soy-mesme, tant en l'ame qu'au corps de l'E-  
 stat, & tant au chef comme es membres, le Roy vouloit entendre & seruir  
 au bien-commun de la Chrestienté, es occasions qui s'en pourroient pre-  
 senter hors le Royaume. Et comme iusques icy il auoit en besoin d'autrui,  
 sans auoir peu aider à qui il eust voulu; aussi desiroit il cy apres estre vtile à la  
 Chrestienté, & mesmement à ses bons amis, & sur tout à la Republique de  
 Venise, non seulement pour l'ancienne amitié, alliance, & confederation de  
 ceste Seigneurie avec la Couronne de France, mais aussi pour particulieres  
 & propres occasions que sa Maiesté en auoit. Que sa Maiesté n'oublieroit  
 iamais comme apres le deceds du Roy Henry II. tous les autres Princes  
 & Potentats Catholiques estans contraires à sa Maiesté, ou luy favorisans  
 en cachette, ceste Republique, sans auoir esgard à tant de grands qui en  
 pouuoient demeurer offenzés; fut la premiere & la seule qui luy escriuint, &  
 l'appella Roy & luy donna le nom de Tres-Chrestien, qui est propre à la  
 Couronne de France, Ce qui fut à luy vn singulier & honorable annonciation & ben-

reux presage de sa future conuersion & exaltation, & aux autres Princes & Potentats vn bon exemple de ce qu'ils deuoiẽt faire en telle occasion vers la personne de sa Maieſté, & auioird'huy & à iamais seroit vn argumẽt certain & euident de la sapience & prouidence de ceste Republique, & de la faueur que Dieu preste à ceux qu'elle fauorise, comme si elle auoit preuẽ & iugé qui deuioit estre de ce Prince, & comme si Dieu n'auoit voulu repreneu celuy qu'elle auoit approuuẽ. Aussi auoit ceste Republique & premiere & seule teou dès le commencement, & continué de tenir tousiours vn Ambassadeur près sa Maieſté, luy donnant continuellement de tres-bons & salutaires records, & luy faisant tous bons offices près & loin. C'estoit elle encore qui auoit tousiours la premiere à enuoyer le colonnyr de ses prosperitez avec sa Maieſté, & apres que le Roy se fust declaré Catholique de professiõ & de fait, iapoit qu'il n'eust esté absous du Pape, ains fut reieté & rebuté plus que iamais, ceste Republique enuoya deuers luy vne tres noble & tres-honorable Ambassade de quatre personnages des premiers d'entr'eux, pour se conioiur de sa conuersion, & de plusieurs bõs & heureux succez qui s'e estoient ensuiuis, continuât par ce moyen à monſtrer aux autres Princes ce qu'ils deuoiẽt faire à l'endroit de sa Maieſté, dont sa Maieſté conserueroit à iamais viue la memoire, & la transmettoit à ses successeurs, afin que le tout fust reconnu en temps & lieu comme il appartenoit. Cependant sa Maieſté leur offroit tout le fruit qui prouiendroĩt de la paix mesme dõt il leur faisoit rendre compte, & tous les autres moyens, pour estre employez au bien de leur Estat, à toutes les fois qu'il leur plairoit. Esperant aussi sa Maieſté qu'ils continueroient à l'aymer tousiours de plus en plus, cõme il les en prioit de tout son cõur, & de luy conseiller encore ce qu'ils iugeroĩẽt bon estre sur les occurrences que le temps pourroit apporter; ce qu'ils pourroient faire par le moyen non seulement del' Ambassadeur qu'ils auoient près sa Maieſté, mais aussi par celuy que sa Maieſté enuoyeroit dans peu de iours pour resider aupres d'eux. Apres que ledit Euesque eut ainsi fait ce compliment, il adiousta que c'estoit tout ce qu'il auoit à leur dire de la part du Roy, & que sa Maieſté eust peu faire cõt office par quelque personne plus diserte, & plus apre & accoustumee à parler en public, mais non pas plus debute à leur Republique, laquelle ledit Euesque auoit tousiours eue en singuliere veneration & admiration, non tant pour la situation, antiquité, forterasse, grandeur, magnificence, beauté, & splendeur de leur ville, qui neantmoins estoient autant de miracles, comme pour la prudence & sapience du gouuernement, qui estoit l'ame de ce pays si beau & si auguste, en laquelle ils surpassoient non seulement les Estats presens, mais aussi tous ceux dont nous auions leu ou ouy parler. Et n'entendions auioird'huy beaucoup de choses que nous trouuõs prescrites de ces anciennes republiques qui ne s'ẽnt plus, si nous n'auions ce vif exemplaire, qui contenoit en soy non seulement toutes les bonnes choses que celles là auoient, mais aussi plusieurs autres encores meilleures, pour lesquelles elle auoit merité de durer plus que nulle autre Republique n'auoit oncques duré, & de ne finir iamais qu'avec le monde mesme. Priant Dieu ledit Euesque qu'ainsi fust, & qu'il la cõseruast heureuse à tousiours, & donast à la Serenité, & à ses Seigneurs qui pour le iourd'huy la gouuernent,

tres-longue & tres-heureuse vie.

Le Duc de Venise respondant à ce que dessus dit : Qu'à toutes les fois qu'ils oyent parler des choses de France, ils se souvenoient des belles & glorieuses actions du Roy, par lesquelles il auoit remis tous ses subiects en son obeissance, & en fin auoit eue la paix avec tous les Princes estrangers, d'où luy qui parloit, & tous ces Seigneurs se resioüissoient grandement, & prioient Dieu qu'elle fust perdurable; tenant à grande faueur & honneur l'admis qu'il auoit plu à sa Maïesté leur en faire donner, & recognoissans que les causes qui auoient mené sa Maïesté à la faire estoient tres-importantes, & dignes d'un Roy Tres-Chrestien. Aussi se sentoient ils grandement honorez de ce qu'il auoit plu à sa Maïesté de les faire comprendre en ladite paix, & tenoient pour leur principale fortresse la bonne affection que sa Maïesté porteroit à leur Republique. Que si sa Maïesté n'audirencore pû faire entrer ses allies en ladite paix, Dieu luy feroit la grace de les y amener au temps, en continuant de s'y employer, comme il vouloit faire. Louoient sa Maïesté des beaux & saincts desseings qu'elle auoit de bien user de ladite paix, & prioient Dieu qu'il luy fit la grace de les executer bien & heureusement. Au demeurant, ils auoient à la verité tousiours desiré la conseruation & restauration de la France, & l'exaltation de la personne de sa Maïesté, & estoient marri de ne y auoir peu contribuer tout ce qu'ils eussent bien voulu; & mercurians bien-humblement sa Maïesté, de la souuenir que'elle auoit de ce peu de demonstration qu'ils auoient peu faire de la deuotion qu'ils rendoient à la Couronne de France, & à la personne de sa Maïesté, & des offres qu'il luy plaisoit leur faire: & la priants de croire qu'ils ne manqueroient iamais de la deuotion, reuerence, & seruice qu'ils luy deuoient. Et à la fin respondit encorres ledit Duc, à ce que l'Euesque de Rennes auoit dit de soy: es que ledit Euesque obmet icy par modestie.

Le Vendredy vingt-quatriesme Iuillet au matin, ledit Euesque dit au Duc & Seigneurie qu'il n'auoit voulu manquer de venir prendre congé d'eux, & recevoir leurs commandemens, s'il leur plaisoit luy en departir quelque un; ce qu'il tiendrait à grand faueur & honneur: & se mettoit en deuoir de l'execution avec toute diligence & fidelité: Qu'il ne vouloit non plus faillir à les remercier tres-humblement du bon & honorable accueil, logement, & traitement qu'ils luy auoient fait. Et içoit que toutes ces choses eussent esté donnees au respect & amitié qu'ils portoiens au Roy, & que ledit Euesque entendit aussi faire ce remerciement au nom de sa Maïesté, fust ce qu'il ayât luy receu le fruit en sa personne propre, il luy sembloit aussi qu'une grande partie de l'obligation redondoit sur luy en son particulier. Par ainsi comme il en rendroit compte au Roy, afin que sa Maïesté cognust d'autant plus leur bonne affection enuers elle, & en tinst le compte qu'il vouenoit, aussi en conserueroit il à iamais en son ame la memoire & gratitude qu'il deuoit: & à la deuotion qu'il auoit déjà à leur Republique, comme il auoit touché vn mot à la fin de sa premiere audience, adiousteroit beste obligation recente pour seruir d'autant plus sa Seigneurie & ses ministres: Qu'il luy sembloit aussi qu'il les deuoit remercier, non seulement des honneurs qu'ils luy auoient faits immediatement & directement, mais aussi de ceux qu'à leur occasion

de imination luy auoient faict les Ambassadeurs & ministres des autres Princes: Que la Cour de Rome qui estoit à Ferrare auoit esté celle qui la premiere auoit parlé de paix, qui l'auoit procuree, qui l'auoit scellie apres qu'elle auoit esté faite, & auoit aussi esté la premiere à prendre actions de graces à Dieu, & à en faire les feux de ioye, & autres signes d'allegresse, & neantmoins n'auoit point encores eu ce contentement, que les Ambassadeurs des deux Roys s'y fussent visitez apres ladite paix, nō plus qu'auparauant. Mais à Venise tout aussi tost qu'il estoit apparu d'un enuoyé de la part du Roy Tres-Christien, qui auoit donné aduis de la paix, voila les Ambassadeurs des Princes pacifiez qui estoient venus le visiter & honorer. Et auoit esté vne chose bastante pour attendre les cœurs les plus durs, de voir les François & les Espagnols, qui s'entrehaissoient tant auparauant, s'entre-carasser, s'entre-muer, s'entre-suruir, & faire à qui se feroit plus de bonne chere, d'offres, & de seruice. Ce qui auoit esté fait non seulement dans Venise, mais en leurs logis propres & à leurs despens: Que tout cecy estoit deub au bon Ange de ceste Republique, laquelle auoit tant de vertu, qu'elle rédoit les autres meilleurs, & les dispoit à la reception & aux exercices de la paix, & de toutes choses bonnes & louables, & auoit encore tant de fortune, que les bonnes choses commençoient en elle, & qu'elle apportoit encores bonheur aux choses d'autrui, comme elle auoit bien heuré ceste annunciation de paix, & le voyage & commissiō dudit Euesque, lequel en signe de gratitude, ne pouuant faire autre chose, prioit Dieu qu'il leur conseruast & accroust, s'il estoit possible, ceste leur vertu & felicité pour iamais.

Le Duc respondit qu'il n'estoit point besoin de les remercier, & qu'ils n'auoient rien fait en comparaison de ce qui estoit deub au Roy, & à la personne mesme dudit Euesque, sur laquelle il s'arresta quelque peu: Qu'ils estoient fort ioyeux de ce que la paix auoit commencé à se pratiquer chez eux, par les ministres des Princes pacifiez: Que s'ils pouuoient faire quelque chose pour plus ample execution, & pour la perpetuatiō de la paix, ils le feroient volontiers. Apres cela il dit qu'ils auoient fait lire au Senat les lettres que ledit Euesque leur auoit apportees de la part du Roy, & fait rapport aussi au Senat de ce que ledit Euesque leur auoit apportees de la part du Roy, & fait rapport aussi au Senat de ce que ledit Euesque auoit dit en Colleege de la part de sa Maiesté, & que ledit Senat auoit aduisé d'y faire la response que ledit Euesque oyroit reciter par l'un de leurs Secretaires. Et cela dit, ledit Secrétaire commença, à lire un escrit qui commençoit *RAVABNDISSIMO MONSIEUR*, & portoit des le commencement comme ils auoient veu les lettres du Roy, & entendu ce que ledit Euesque auoit dit de la part du Roy: & au reste contenant les mesmes responses que le Duc auoit faictes à la premiere audience, mais un peu plus amplement, & y auoit cela de plus, qu'ils enuoyeroient un Ambassadeur vers le Roy pour respondre à l'honneur qu'il auoit plu à sa Maiesté leur faire.



De cét ad-  
uis est fait  
mention  
en la lettre  
du 11. Sep-  
tembre  
1600.

**ADVIS DONNE AU PAPE PAR LE**  
*Cardinal d'Ossat le Mercredi 6. Septembre 1600. sur ce que sa*  
*Saincteté auoit proposé au Consiſtoire le 30. d'Aoust, touchant*  
*la guerre de Sauoye.*

**T**res Sainct Pere, vostre Saincteté nous a commandé de penser aux mo-  
yens qu'il y auroit d'éteindre le feu de la guerre, qui s'est allumee ces  
iours passez delà les monts. I'y ay pensé de ma part, selon le peu de talent  
que Dieu m'a donné, & vous exposeray ce que i'en ay trouué, avec la liber-  
té & franchise que me donne la benignité & bonté de vostre Saincteté, &  
l'express commandement qu'elle nous a fait: & le feray non comme Fran-  
çois, & si fort obligé au Roy comme ie suis, mais comme Cardinal & mem-  
bre du Sainct Siege, & vostre creature & seruiteur tres-humble, & ne me pro-  
posant autre chose que le bien de l'affaire en soy: c'est à dire la paix, & la re-  
putation de vostre Saincteté.

Comme en toutes maladies l'intuention des remedes dépend principale-  
ment de la cognoissance des causes du mal, & de la composition & tempe-  
rament des malades; aussi estimay-ie que pour chercher les moyens de fai-  
re cesser ceste guerre, il faut sçauoir la cause d'icelle, & la complexion &  
disposition des parties.

Quant à la cause de la guerre, elle est toute manifeste. La Couronne de  
France en l'an 1588. & tant d'annees auparavant estoit en paisible posses-  
sion du Marquisat de Salusses, quand le Duc de Sauoye violant la paix pu-  
blique faite en l'an 1559. sous laquelle nous viuions à lors, s'en empara  
de fait & de force, rauissant ledit Marquisat à la Couronne de France & au  
Roy Henry III. son cousin germain & son bien-faicteur, qui lors estoient en  
grande affliction, travaillé par ses propres suiets. Et apres plusieurs choses  
interuenues sur cet attentat, qu'il n'est besoin de raconter, & mesmes à vos-  
tre Saincteté qui les sçait toutes, ledit Duc de Sauoye fit en fin vn accord à  
Paris en Fevrier dernier, par lequel il promit de rendre ledit Marquisat  
dans 3. mois, ou bien certaines autres choses en échange. Et depuis estant  
de retour en ses Estats, a confirmé & reconfirmé sa promesse en plusieurs  
façons. Eten fin ayant fait declaration le 27. Iuillet dernier de vouloir ren-  
dre le Marquisat, il n'en a rien voulu faire; ains tant auparavant ceste de-  
niere déclaration que depuis, ne se contentant de l'injure & de tort qu'il  
tient à la Couronne de France & à sa Maisté Tres-Christienne, il y a ad-  
iousté plusieurs procedures & termes de mequestrie & enépris auuers le  
Roy, qui à la fin n'en a plus peu endurer, & a esté contraint de faire ce  
que tout autre Prince feroit en tel cas, & peu en eussent tant enduré. Voi-  
la doncques la cause de ceste guerre, comme feroit d'vne maladie.

Quant à la complexion & temperament des parties, comme si c'estoient  
des

des malades, l'estime qu'il le faut considérer. premierement en Monsieur de Sauoye & aux Espagnols qui le fomentent, & puis au Roy; desquels j'entends parler quant à ce fait seulement, & non quant au reste, ne me plaissant aucunement à blasonner les Princes ny les nations. Monsieur de Sauoye donc est de telle complexion, qu'il veut prendre l'autrui, & sur plus grands qu'il n'est, & ne veut point rendre, veut encore contracter & faire des accords, promettre, signer, confirmer, & reconfirmer, & ne point tenir ny rien executer, prenant pour galâterie de violery sa foy & concorde. Avec tout cela, il se promet. & pense se maintenir en ceste façon de proceder par son bel esprit, fertile de toutes sortes d'inuentions & déguisements, & par les forces d'Espagne, & par l'autorité de vostre Saincteté, sçachant le respect & renerence que le Roy vous porte, & l'extrême desir & soin qu'il a de conseruer la paix. Voila iustement la disposition & l'assiette en laquelle il est. Quant aux Espagnols, ils sont anciens émulateurs de la Couronne de France, & enuieux de toutes ses prosperitez, comme de celle qui les a precedez de tout tēps, & qui auourd'hay sert de contrepoids à leur demesurée grandeur & puissance, & peut empescher qu'ils n'acheuent d'assuiettir ce peu de Princes & Potentats qui restent libres de leur domination; & partant veulent empescher non seulement que la France ne s'accroisse, mais aussi qu'elle ne reconure le sien, & voudroient la voir ruinee du tout. Ils sont puis apres fins & cauteleux pour déguiser les matieres, & pour couvrir leur enuie & émulation de diuers pretextes, & en outre importuns & pressants, tant enuers vostre Saincteté, qu'enuers toutes sortes de gens; presumās que toutes choses doiuent passer par là où il leur semble, & que vostre Saincteté mesme doit faire à leur mode.

Et outre que tous les Espagnols conuiennent en cecy, il y a maintenant vne partie d'eux, & principalement des ministres d'Italie, qui sont mal cōtents & indignez du gouuernement d'Espagne, lesquels veulent mettre leur ieune Roy en soin & necessité de se seruir d'eux, & de les priser & gratifier plus qu'il n'a fait encores; & à ceste fin luy donnent à entendre, que tout aussi tost que nostre Roy aura le Marquisat, il se riera sur le Duché de Milan, & par ainsi qu'il faut l'empescher de le recouurer, & l'arrester delà les monts.

Quant à la disposition & complexion du Roy Tres-Chrestien, il se sent chargé & obligé par tout droit diuin & humain à recouurer & maintenir les biens & droits de la Couronne, & n'endurer point que ce blâme & infamie demeure au nom François & à la reputation de sa Maiesté, qu'un Duc de Sauoye luy vsurpant par force & retenant un Estat de telle importance, le braue; & en outre picque le Roy de tergi-versations, cassades, & mocqueries, dont ce Duc luy a vsé si licentieusement & longuement. Et en somme est tellement persuadé, qu'il doit hazarder sa propre personne & tous ces Estats, plustost que d'endurer un tel outrage & un si grand mespris.

Au demeurant il n'importune vostre Saincteté de rien, & pouruoit à son fait de foy mesme le mieur qu'il peut, se contentant qu'encores qu'il ait le droit de son costé, toutesfois vostre Saincteté ne luy face ne pis ne miex

XXXXX

qu'à ceux qui ont le tort ; qui est vne equanimité non moindre que la justice est de la cause.

A present, tres saint Pere, que nous auons la cause du mal & de la complexion des malades, il est aisé à iuger des remedes propres & conuenables. Il faut oster la cause du mal, & radresser & corriger la mauuaise disposition des parties. Le Duc de Sanoye a pris & osté par force à la France le Marquisat ; il faut qu'il luy en face raison : il l'a accordé, promis & confirmé, & en fin déclaré ; il faut qu'il tienne sa promesse, & qu'il execute sa dernière declaration. Qu'il ne se mocque plus du Roy, ny de la foy & iustice, & ne veuille point vn droit à part pour soy contraire à toutes les loix diuines & humaines ; mais qu'il chemine par la voye commune des autres Princes & Potentats de la Chrestienté gardans leur foy, & par ce moyen se conseruant en paix & repos eux & leurs suiets. Qu'il ne présume point tant de son bel esprit, pensant que les autres n'ayent pas seulement le sens commun ny mesme aucun sentiment ny courage. Qu'il ne mesprise point la puissance voisine & tant de fois experimentee, se confiât es secours loingtrains, tardifs, & non gueres moins pesants & dommageables à luy & à ses Estats. Qu'il ne demande & attende de vostre sainteté que choses possibles, iustes, & raisonnables, & ne croye pas que vous qui estes Pere commun, deuiez iamais espouser les caprices & perfidies contre la iustice & droicts du Roy Tres-Chrestien, & du premier Roy de la Chrestienté.

Que les Espagnols ne se fomentent point en vne cause si iniuste ; & pour luy, ny pour leur ancienne enuie contre les François, ny pour les recents mescontentemens qu'ils ont les vns des autres, ne rompent point la paix qu'ils ont si cherement acheptee avec la France, lors qu'elle n'estoit à beaucoup près en si bon Estat qu'elle est maintenant, & eux n'ayants depuis rien accru, ny melioré de condition, & pouuans aujourd'huy plus perdre que gagner par la guerre tant en commun que pour le particulier des malcontents : ains comme les François, & les Princes d'Italie, & les autres Potentats de la Chrestienté portent patiemment que les Espagnols ayent le plus beau & le meilleur d'Italie, & infinis autres Estats dedans & dehors la Chrestienté, qu'eux Espagnols endurent aussi que les François ayent ce peu qui leur a esté laissé en paix de l'an 1559. & qui leur ayant esté osté en pleine paix, leur doit estre rendu par tout droit diuin & humain, & par le dernier accord du Duc de Sauoye.

Que si les Espagnols, à qui la paix est aujourd'huy aussi bien pour le moins qu'aux François, veulent neantmoins la guerre, qu'ils emploient leurs armes contre les rebelles & heretiques des Pays-bas, & cōtre les Turcs & infidelles en Hôgrie ; puis que les vns & les autres font la guerre à la maison d'Autriche, dont le Roy d'Espagne est le chef & doit estre le protecteur : autrement leur propre astuce & cautele les peut & doit admonester que leurs artifices & déguisemens, & leur presse & importunité, n'auroit point plus de creance & d'efficace que de raison enuers la Sainteté, ny enuers les autres.

Quant au Roy Tres-Chrestien, qui ne veut & ne demande que le bien, & ne voy point qu'en ceste complexion & temperament il y ait autre chose

à corriger & raconstrer, sinon qu'il faut contenter sa Maïesté en la reinte-grant reellement, & de fait en la possession du Marquisat, & par ce moyen la desliant & deschargeant de l'obligation qu'elle a de faire & continuer la guerre, pour repousser l'iniure, éunter blasme & infamie, & pour maintenir les droits de la Couronne, & sa propre reputation.

Voilà tres-sainct Pere, ce qu'il faut faire, & à quoy il est besoin de pour-noir pour faire cesser la guerre, & n'y a point d'autre moyé. Tous les autres que voustenterez, non seulement ne serviront de rien pour esteindre ce feu, mais seront autant de bois & de souffre pour l'accroistre & augmenter de plus en plus, comme seroient suspension d'armes, compromis, sequestre, échange, nouveaux traittez & accords sans execution réelle & presente, & telles autres choses ra vieilles & rances que les Sauoyards & Espagnols vôt encores auibourd'huy recuisants & remaschant; iroit que de deux partis ac-cordez à Paris le 4. Feurier dernier, le Duc de Sauoye aye purement & sim-plement opté & choisi la restitution, par déclaration solennelle & authentique faite le 17. Iuliet, comme pour estre ladite restitution executée incontinent.

Mais comme ces gens ne manquent jamais de pretextes, ils ont tasché long-temps y a, & taschent encores à present plus que jamais, d'imprimer en l'es-pirit de vostre Sainteté & des autres Princes d'Italie, que restituer le Mar-quifat à la France, c'est mettre en danger la Religion Catholique, & la paix & le repos d'Italie. A quoy comme il est besoin de respondre, pour estre la Religion & la paix deux choses les plus importantes qui se puissent imagi-ner, aussy a'il plusieurs responses pertinentes.

Premierement, que ce n'est point le zele de la Religion, ny de la paix, qui les fait ainsi parler, ains leur propre interest & ambition. Secondement, qu'il est & sera pouru à la religio, parce que les Edits de pacification n'ôt iamais eu, & n'auront cy apres lieu, es terres de la Couronne de France deçà les monts, & parce que le Roy vous a donné parole long-temps y a, par moy & par d'autres, qu'il ne mettra audir Marquisat aucun Gouverneur ny garnisō qui ne soient Catholiques, & qu'il est encores auibourd'huy tout prest à vous donner toutes les assurances possibles & raisonnables que vous scaurez de-sirer. Aussi est il pouru à la paix d'Italie, cōme des autres pays, par la paix generale faite dernièrement à Veruins; outre qu'il s'en pourra mettre vne clause en l'accord qui se fera, & par le moyen de se defendre que les Espa-gnols ont, tant separément, que coniointement avec les Princees d'Italie, si les François vouloient faire quelque remuement mal à propos. Et les Espa-gnols seroient & parleroient non seulement plus iustement, mais aussi plus genereusement & honorablement pour eux, s'ils disoient qu'ils n'entendent empescher que les François ne recourent le leur, & quand ils voudroient puis apres abuser de ce recoursment, on se scaura bien defendre d'eux & les bien rembarrer.

En troisiemesme lieu, tant s'en faut que par la restitution ne mette en dan-ger le repos d'Italie & la Religion qu'au contraire le danger est & sera si on refuse ou dilaye de rendre; d'autant que le Roy qui a ia pris les armes, sera contraint de faire la guerre en Italie pour recouurer le Marquisat, & de se servir du fa-  
-diguieres, & des autres de sa secte qui en sōt les.

X X X X x 2

plus voisins, & qui sçauent mieux les espires & aduenues du pays que tous autres.

En quatriesme lieu, il se peut dire avec verité, que quand il seroit au choix de vostre Sainteté & des autres Princes d'Italie, vous deuriez opter tous que le Marquisat fut rendu au Roy, & que sa Maiesté n'en prit point de recompense delà les monts, soit que vous consideriez l'Estat present d'Italie, quant aux Espagnols, ou celui qui peut aduenir.

Le Roy d'Espagne outre la grande puissance qu'il a hors d'Italie, tiét déjà en Italie le plus beau & le meilleur; Milan, Naples, Sicile, dont Sardaigne n'est gueres loing; en Toscane, Porto, Hercole, Orbitelle, Talamone; peut faire estat de Gennes; a là auprès Piombino, & n'agueres a achepté, ou est apres, Final & Monado, & autres lieux; outre l'adherence qu'ont avec luy pour le moins quatre Ducs d'Italie, Sauoye, Parme, Modena, & Urbino. Voila desia vne puissance formidable en Italie.

Que si le Roy d'Espagne & l'Infante sa sœur mouroient sans enfans, cōmeils n'en ont point encores; la Couronne d'Espagne & tous ses Estats venans à tomber en la maison de Sauoye, la puissance du Roy d'Espagne seroit encore plus grande & plus à craindre en Italie. Or si en vn ou en l'autre cas, comme la puissance d'Espagne est auourd'huy en Italie, ou cōme elle y peut augmenter, il prenoit volenté au Roy d'Espagne de faire guerre au Pape, ou à quelque autre Prince d'Italie, combien voudroit on lors auoir donné, & que les François eussent le Marquisat, & les moyens prompts de les aider & secourir? Ouy, mais il n'aduendra iamais qu'un Roy d'Espagne face la guerre au Pape ny à Rome. le prie Dieu qu'ainsi soit, & espere que telle chose n'aduendra point, au moins du temps d'un si bon & si S. Pape comme vous estes. Mais nous ne sommes pas assurez d'auoir tousiours vn si bon Pape, & ne sçauons encores quel sera ce ieune Roy, & moins quels seront ses successeurs. Toutesfois ie veux esperer qu'il ne cederà en religion, iustice, & bonté à Charles quint son ayeul, ny à Philippe II. son Pere, & ay opinion que vostre Sainteté se contenteroit qu'il fut aussi bon Prince, & aussi respectueux enuers le S. Siege comme ces deux ont esté. Et toutesfois l'armee de Charles quint commandee par ses Lieutenans; & composee principalement d'Espagnols, assiegea à Rome l'an mil cinq cens vingt-sept, la prit & sacraagea, sans acception des Eglises, monasteres, hopitaux, & autres lieux pieux; battit, traïna, déchira, emprisonna, & rançonna Cardinaux, Euesques & autres Prelats, Prêtres, & autres Religieux; raut & viola les Religieuses, & toutes sortes de femmes de bien & d'honneur, vierges, maries, & veufues; prit le Pape Clement VII. & letint prisonnier au chasteau S. Ange plus de 6. mois en grand danger de sa vie, d'autant que la peste se mit cependant au dit chasteau, de laquelle moururent mesmes au près de luy quelques vns de ceux qui seruoient à la personne de sa Sainteté, & ne voulurent iamais les Espagnols le laisser aller, iusques à ce que la crainte de l'armee du Roy François I. cōduite par Monsieur de Lautrec les y contraignist. Encores ne l'ellargirent ils qu'apres l'auoir rançonné de quatre cens mille ducats, & s'estre fait conuigner toutes les meilleurs forteresses de l'Estat Ecclesiastique, & auoir extorqué de luy

autres conditions vituperables & insupportables. Et apres tout cela il fallut encores que le pauvre Pape de peur d'estre tué par eux, sortist dudit chasteau de nuit en habit de marchand.

Et Philippes deuxiesme avec son armee conduite par le Duc d'Albe fit la guerre à Rome & à Paul IV. plus de deux ans; & apres auoir pris plusieurs places & fortresses del'Estat Ecclesiastique, assiegea & assaina Rome, les Cardinaux & tout le Clergé & peuple Romain; & sans l'armée du Roy Henry II. enuoyee expressement pour la desfence du Pape & du S. Siege sous la conduite du Duc de Guise, Rome & le Pape, & tout le reste eust enduré sous Philippes II. autant ou plus que sous Charles quint. Voilà donc, Tres-S. Pere, ce qu'ont fait de fraische memoire les deux derniers, & les deux plus haut louiez Roys d'Espagne; dont les exemples sont encores plus à craindre en leur posterité. Que si leur puissiance venoit à tomber es mains d'un Prince si fretilant & de si peu de foy comme s'est monstrelé le Duc de Sauoye, qu'est-ce qu'il n'oseroit attenter contre les Papes & contre tout autre Prince d'Italie, puisque n'estant que Duc de Sauoye, il a osé attaquier en pleine paix la Couronne de France si outrageusement?

Les hommes sages & preuoyants doiuent penser non seulement à ce qui est de present, mais à ce qui peut estre à l'aduenir, & en tēps de paix & prosperité, faire prouision pour le temps de guerre & d'aduersité qui peut suruenir, & se souuenans des choses passees, disposer tellement les presentes qu'elles leur seruent de precaution & de preseruacion pour les futures. Et si auourd'huy les Princes & Potentats d'Italie sont si prudens comme ils sont tenus, ils doiuent desirer que les François ne quittent point le Marquisat pour d'autres choses, ny qu'ils se laissent releguer delà les monts, d'où eux & leur posterité ne puissent au besoin receuoir secours sinon que trop tard, contre ceux qui icy leur tiennent le pied sur la gorge.

Et plus que tous les autres le doiuent desirer & procurer les Papes, desquels la grandeur tēporelle a tousiours esté enuiee & empeschee par les Espagnols, & est auourd'huy suspecte aux Princes mesmes d'Italie, & au contraire a tousiours esté desirée par les François. La reuersion & recouurement du Duché de Ferrare au saint Siege est chose toute fraische. le supplie vostre Saincteté de se souuenir si en ceste occasion il y eust aucun Roy ou Prince qui s'offrist à vostre Saincteté, ou qui vous fauorist seulement d'un bon souhait autre que le Roy de France. Ce qui sera dit non seulement sans reproche, mais avec protestation expresse qu'en cela le Roy n'entend auoir fait que son deuoir, & que nul Prince Chrestien ne fera iamais tant pour le S. Siege & pour l'Eglise, qu'il ne soit obligé à danantage. Mais puis que les Sauoyards & Espagnols calomnient les François, & les veulent rendre suspects à vostre Saincteté & aux autres Princes d'Italie, nous sommes en un des cas auxquels chacun se peut louer avec verité sans reprehension, dequoy vostre Saincteté se peut souuenir que Plutarque a fait un liure exprés.

Et si ie voulois maintenant vser de ce droit que la raison, la coustume, & la necessité me donnent, ie pourrois vous ramentenir les secours

XXXXX 3

prestez, les Estats donnez & les renonciations faites au S. Siege par les anciens Roys de France, à commencer au Roy Pepin: & pourrois leur opposer les torts que les Espagnols ont faits & font encores auourd'huy au S. Siege & à l'Eglise, tant au spirituel qu'au temporel. Mais ces choses vous doivent estre representees par les Cardinaux Italiens, en la bouche desquels elles auront esté seantes. Et si d'auanture ils n'en auoient fait leur deuoir, ie m'assure que vostre Saincteté se les representera elle mesme, partant ie ne m'y arresteray d'auantage, & concluray ce point, en vous disant qu'il sied tres-mal aux Espagnols de vouloir faire peur aux François au Pape & au sainct Siege; & que c'est iustement comme si les loups vouloient faire peur des chiens aux brebis: & que quoy que les Espagnols & Sauoyards vous disent, vous devez procurer en toutes façons que le Marquisat soit au plustost restitué aux François; pource qu'il est iuste en soy, pource qu'il est expedient à la Religion & au repos & liberté d'Italie, & en particulier du sainct Siege, & qu'en somme c'est le seul moyen de mettre fin à ceste nouuelle guerre, & de bien establir & assseurer la paix que desirez. La iustice, tres-sainct Pere, est celle qui conserue la paix, & qui fait cesser les guerres; comme l'iniustice au contraire trouble la paix & le repos, engendre les guerres, & seditions & les rend implacables. Ce neantmoins & nonobstant tout ce que dessus, le Duc de Sauoye & les Espagnols vous proposent des conditions iniustes & iniques, & recognoissants en eux mesmes que le Roy ne les doit point accepter veult vous en faire comme parrain, afin que vous les faciez offrir & preséter à sa M. de vostre part par quelque Legat, esperans qu'ils les obtiendront par vostre autorité que par le refus ils vous auront rendu mal-content de la M. & mis de leur costé. Mais outre le deuoir que vostre Saincteté a d'estre & demeurer pere commun, & de tenir la balance & la iustice égale, il vous plaira vous souuenir que la France est auourd'huy toute vostre, les Princes, Seigneurs, Gentils-hommes, villes, peuples, & tout ce qu'il y a de gens; iamais Pape n'y fut si aimé & reueré comme vous estes. Et pour maintenir ceste affection & deuotion de toute la France enuers vous & le S. Siege, il n'est point besoin que vous faciez rien contre Sauoye & Espagne; c'est assez que vous vous mainteniez pere cōmun, & ne faciez rien cōtre la France. Mais si l'importunité & malice d'antruy pouuoit tant que vos Legats se rendissent porteurs & promoteurs de conditions iniques en faueur de Sauoye, au dommage & honte de la Couronne & du Royaume de France (pardonnez-moy ie vous supplie, tres-sainct Pere, car ie ne sçay à quelle occasion me reseruer de vous parler librement & vtilement, si ie ne le fay à present que vostre Saincteté a voulu sçauoir mon aduis; & qu'il y va de tant) pardonnez-moy, dis-je, si ie vous mets en consideration qu'outre que vos Legats n'auanceront rien pour la paix, vous pourriez plus perdre en France que gagner en Sauoye, ny épargner au Duc de Sauoye.

Les choses d'Estat sont merueilleusement ialouses; comme vostre Saincteté sçait trop mieux, admettant facilement des soupçons & des offenses, & ont besoin d'estre traitées par les entremetteurs & moyennieurs de paix avec grande discretion, neutralité, & circonspection. Aussi ne faut-il point

exiger ny demander de personne, non pas mesme de ses propres subiects, les choses dont on peut iuger le refus estre certain. Les Princes seculiers complaisent & obeyssent au Pape iusques à vn certain terme: mais comme il y va de leur honneur & reputation, ils s'en sçauent fort excuser. Aussi sont ils obligez par tout deuoir, & mesme de conscience à maintenir leur honneur & reputation, & à conseruer les biens & droicts de leurs couronnés dont ils n'ont que l'administration & l'vsufruit leur vie durant, pour les laisser à leurs successeurs en aussi bon & meilleur estat qu'ils les ont receus de leurs predecesseurs.

Les Papes ont esté si soigneux de conseruer les biens temporels au saint Siege, qu'ils ont fait des constitutions terribles, qui sont gardees exactement par dessus toutes les autres, à sçauoir qu'on ne puisse alier ny infeoder aucun bien du S. Siege, non pas mesme pour cause de necessité ou utilité euidente, à peine d'excommunication à ceux qui seulement en parleroient, & qu'ils soient tenus pour rebelles du saint Siege, & criminels de leze Maesté au premier chef, & leurs biens confisquezz. Et s'il aduenoit qu'ils trouuassent grace & fussent reintegrez, que neantmoins ils demeurent à iamais infames & incapables de toutes dignitez & honneurs.

Or est il pour le moins aussi bien seant aux Princes purement seculiers, de se formaliser & remuer pour les biens temporels de leurs Estats, cōme aux Papes, desquels la dignité & authorité est plus spirituelle que temporelle. Aussi ont-ils & mesmement les Roys de France, leurs Ordonnances pour la conseruation & recouurement de leur domaine, comme le S. Siege a ses Bulles; & à leur Sacre & Couronation iurent, entre autres choses de conseruer & maintenir les droicts de la Couronne, comme les Papes iurent l'entretenement desdites Bulles.

Vostre Sainteté ne s'offensera point si pour sa grande louange ie luy allegue encores l'exemple d'elle mesme, & luy ramenteois comment elle en vsa apres la mort du Duc de Ferrare; en laquelle occasion vous fistes voir clairement à tout le monde que ceux là s'esloient trompez qui vous auoient eu opinion de Prince lent & tardif, & peu resolu. Vostre Sainteté n'attedit pas tant à prendre les armes apres l'ouuerture de ce chef, comme le Roy a attendu apres le terme expiré de l'accord fait avec le Duc de Sauoye. Elle ne voulut oncques souffrir que cet affaire fust mis en negociation vne seule minute de temps, ains sans aucun delay ou intermission prit & employa les armes spirituelles & temporelles, dont s'en ensuiuit la bon succez que vous & le S. Siege eustes. Aussi m'assuray-je que si ceste belle Ambassade qu'on vous vouloit enuoyer d'Espagne fust arriuee à temps, vous n'eussiez point accordé la suspension d'armes, ny le cōpromis & sequestre qu'on vous vouloit demander, ny perdu l'occasion de faire au plustost vos affaires & de recouurer le vostre, moins eussiez vous pris Modene pour Ferrare, ou autre telle chose à la discretion des Espagnols & autres qui s'en vouloient estre mettre. Et iagoit que ie recognoisse qu'au fait dont il s'agit auourd'huy & en tous autres la personne de vostre Sainteté & son autorité merite que que particulier respect & reuerence, chutes fois la chose au reste ne laisse d'estre souz



blable, & le Roy aura tousiours raison de suivre vostre exemple, & vous supplier de ne le presser ny requérir de ce que vous n'avez point trouué bon en vostre fait propre, & que vous ne feriez encore auioird'uy si vous estiez en sa place.

Au demeurant, quant aux particularitez qui se pourroient adiouster à ce que i'ay dit en general qu'il faudroit faire, la pluspart de ceux qui entendent parler disent que vostre Sainteté doit enuoyer vn Legat. Mais quand il le faudroit enuoyer, ie ne pense point qu'il en soit encore temps, estans les choses si cruës & bouillantes comme elles sont, & n'y ayant plus que deux mois de temps pour guerroyer, lesquels vostre Sainteté pourroit laisser écouler doucement auant qu'y enuoyer, & mesmement y ayant ia enuoyé le Patriarche de Constantinople, outre son Nonce resident près le Roy, & pouuant encor faire courir le bruit d'y vouloir enuoyer vn Legat, & de fait l'enuoyer au plustost que faire se pourra, avec quelque fruit & dignité du S. Siege. Pendant ce delay de deux mois, les parties auront iecté vne grande partie de leur colere, & appris chacun par experience, ce qu'elles n'ont point sçeu ny pensé du commencement; & par ce moyen se pourront trouuer plus dociles & plus disposées à quelque bon accord, ne pouuants mesmement faire en hyuer aucune faction de guerre de grande importance. Pourra aussi vostre Sainteté tirer parole assurée du Duc de Sauoye & des Espagnols que la restitution du Marquisat, de laquelle dépend la paix que vostre Sainteté desire, se fera reellement & presentement, avec quelque autre satisfaction qu'il faudra faire au Roy; des dommages & interets que sa Maiesté a soufferts, pour auoir esté contrainte à ceste guerre. Et ainsi vostre Sainteté enuoyera lors vn Legat, avec esperance de succez, & reputation du S. Siege.

Que si pour ne pouuoir vostre Sainteté résister à l'importunité de ceux qui vous pressent au plustost d'enuoyer vn Legat, ou pour vostre décharge en vous-mesme, & enuers le monde, vous voulés enuoyer à toute auanture dès maintenant, sans estre premierement assuré, comme il faudroit estre, que le Marquisat fut rendu incontinent, ie vous prie de vous disposer à patience, pour ne vous fâcher point quand vous entendrez que le Pape n'aura auancé, & qu'il aura perdu son temps & sa peine.

Et afin que si le voyage dudit Legat ne sert de rié à l'effet pour lequel il doit estre enuoyé, il n'épüre au moins les choses, il vous plaira l'admonester, & lui commander tres-expressément & sur tout qu'il monstre & soit à la verité neutre, faisant vrayement tout ce qu'il pourra pour faire approcher & joindre les parties en vn bon accord, comme telles entremises se doiuent faire à bon escient, & de bonne foy. Mais qu'il ne se rende point porteur ny fauteur de conditions qui soient en faueur de Sauoye ny d'Espagne contre France, & ne dise point que ce que le Roy quittera & donnera au Duc de Sauoye, vostre Sainteté le tiendra pour quitté & donné à foy-mesme, comme il a esté dit & escrit autrefois; ains face comme fit sagement & heureusement Monsieur le Cardinal de Florence, lequel estoit ce que les parties auoient à proposer d'un costé & d'autre, & ras-

choit

choit de les appointer & mettre d'accord, sans faire pour les vns contre les autres.

Aussi pour n'aigrir de plus en plus les matieres, & ne les rendre incurables, sera tres à propos que vostre Sainteté admoneste & exhorte les Espagnols de se contenir & de n'entrer point en guerre, pour le moins en ces deux mois qui restent avant l'hiver, puis qu'aussi bien ne pourroient ils avant l'hiver faire chose qui fust de grand soulagement au Duc de Savoye, lequel mesmes a particulièrement besoin d'estre vn peu humilié, pour se rendre plustraitable à vostre Sainteté & aux Espagnols mesmes, ny qui recompensast le dommage qui leur peut aduenir de se declarer cependant, & de faire guerre ouuerte aux François, lequel hyuer suruenant, selon que les choses s'accommoderont ou demeureront troublees, pourra, sans qu'ils subissent aucun hazard, les éclaircir de ce qu'ils auront à faire.

Quant à la personne du Legat qui devra estre enuoyé, j'en ay ia dit mon aduis, premierement à Monsieur le Cardinal Baronius, & puis à Monsieur le Cardinal Aldobrandin, sur ceux que l'un & l'autre me nommerent, me parlants de vostre part, m'ayant dès lors semblé qu'il n'y en auoit pas vn qui eust moins d'opposition, ny duquel toutes les parties euissent moins à soupçonner, que Monsieur le Cardinal Borghese, & n'ayant depuis entendu rien qui m'ayt fait changer d'opinion.

C'est, tressaint Pere, ce que j'ay estimé vous deuoir dire sur ce qu'il vous plust nous proposer au dernier Consistoire. Que si vostre Sainteté veut entendre quelque autre chose de moy, & qu'il luy plaise m'en demander, ie luy en diray ce que j'en estimeray.

Cependant, si en quelque partie de mon propos il vous a semblé que j'aye incliné à la France, ie vous supplie de croire que ce n'a point esté pour estre François, mais pource que j'ay pensé que la Iustice estoit de ce costé-là, & que j'en eusse dit autant quand j'eusse esté d'autre nation, & encores plus librement & plus amplement.

LETTRES DE MONSIEUR D'OSSAT A  
MONSIEUR DE LA BARRE, ABBE  
de Feuillans.

**M**ONSIEUR, Vostre lettre du huietieme Mars ne m'a esté rendue que iusques au 14. de ce mois, en ceste ville d'Aurillac en Auvergne; où Monseigneur de Foix est venu passer ces festes de Pasques, à cause que l'Abbaye de ceste ville est à luy. J'ay trouué plusieurs choses en vostre lettre desquelles ie me sens grandement honoré & obligé envers vous; mais ce qui plus m'y a plu, est que ie voy que vous commencez à vous reconcilier auement avec les hommes, & ne les hair tellement que vous n'incliniez à les vouloir rendre meilleurs, plustost que les punir du tout.

Y Y Y Y

Et le nom de saint Bernard qui m'a toujours esté saint & sacré, comme d'un des plus excellens Docteurs que l'Eglise ait, me sera encores cy apres plus venerable, pour vous auoir par ses escrits disposé à essayer de faire plus tost bien aux hommes qu'en les fuyant du tout vous faire mal à vous mesmes. l'en louë Dieu, & l'en remercie de tout mon cœur. Au reste, Monsieur, vous desirez que de plusieurs raisons de vostre dessein que vous dites m'auoir escrites autres fois, ie vous responde à vne, ce que ie feray tres volontiers; comme ie vous y eusse desia respondu si vous me l'eussiez escrit.

Mais cōme vous en pouuez auoir escrit plusieurs fois à Monsieur le Procureur nostre commun amy, aussi aßeureray-ie que iamais ie n'ay receu aucune lettre à ce propos de vous, qu'une, auant que venir de Paris en ce pays en laquelle vous me proposiez vostre desir nuëment sans y adiouster aucune raison de vostre intention; & à ceste lettre là ie vous escriuis celle dont vous faites mention en ceste cy à laquelle ie responds maintenant.

Vous dites donc, Monsieur, pour vostre raison, que le trouble d'esprit vient des mauuais esopinions. A quoy ie responds, qu'à la verité les mauuais opinions ont vne grande puissance pour troubler l'esprit, comme aussi auoir l'ame remplie de bonnes persuations, est vn grand fondemēt de la tranquillité de l'esprit. Mais aussi il nous faut confesser qu'il y a beaucoup d'autres choses qui troublent l'ame, cōme sont mesmement les affections & passions; qui à cause de cela sont appellees perturbations; entre lesquelles la douleur, la melancholie, le chagrin, la crainte, la cupidité, qui ne sont opinions, ny ne procedent ordinairement d'opinion, troubleroient l'esprit par les deserts loing des hommes, autant qu'il plus qu'ès villes ou autres lieux frequentez. Les maladies du corps aussi nous peuvent troubler, non seulement par la force & vehemence de la douleur, mais aussi en alterant les instrumens de l'ame. Il ne faut qu'une humeur colerique ou melancholique, occupant nostre cerueau, pour nous causer vne cholere & frenesie extreme, ou vne tristesse & frayeur insupportable, & nous donner mille & mille folles & horribles imaginations, & nous tourmenter d'un tourment plus cruel qu'aucune gehenne: & ces accidents viendroient plus aisément à celuy qui se proposeroit d'estre seul sans voir iamais homme; & ne se guatiroit si aisément ou iamais, puis que la nature ne pourroit estre aidée d'aucune medecine. Voila donc comment le trouble de l'esprit ne vient des opinions seulement, & cōme d'ailleurs nostre ame peut estre plus troublee loing que près des hommes. Dauantage, les mauuais opinions que nous aurions ouies ou leues, nous oublieroient pourtant en nous esloignant des hommes pour iamais, ains se reussilleroient; & se representeroient à nous en la plus grande & noire solitude, & nostre ame en seroit plus traitée & vexée qu'au parauant. Et à ce propos ie vous prie de vous souuenir d'auoir veu souuent es histoires, & es poëmes & Romans qu'on appelle, & auoir experimenté en vous mesme, que si nous auons ouy quelque chose scandaleux, ou si nous auons receu quelque desplaisir, brefs s'il y a quelque passion en nous, tout ainsi tost que nous sommes en nostre particulier seuls, & non occupez d'autres, cela se represente à nous, & nous fait faire mille discours fantastiques, & nous travaille plus que quand nous estions en quelque

bonne compagnie, ou occupez à quelque honneste besongne. Nous apporterions donc tousiours avec nous ce que nous fuirions, & mesme par vnetelle solitude nous accroistrions les forces à nostre ennemy, & nous nous trahirions nous mesmes. Vous adioustez puis apres, que les mauuaises opinions viennent des mauuais hommes. Je ne peux nier que les homes meschârs & fols ne soient cause de plusieurs opiniõs mauuaises; mais à parler Chrestienement, le diable en cause encore plus. L'Apostre nous apprend, que nous n'auons pas seulement à combattre contre la chair & le sãg, mais encores beaucoup plus contre le Prince des tenebres. Or ce teta-teur, ce pere de mensonge & de fausseté nous suggerera beaucoup plus de mauuaises opinions, & nous tentera plus hardiment, & plus à son aduan-tage, si nous quittons les hommes du tout, que non pas si nous nous en tenons près. Je n'ay point en souuenance d'auoir entendu que le diable ait tenté manifestement le moindre homme en bonne compagnie, mais au des-ert il a osé tenter Iesus Christ. Vous sçauiez ce que vous en auez presché le premier Dimanche de Careme.

Outre plus nostre ame mesme, qui a vne faculté naturelle de discourir, en composant & conioignant les notions simples par affirmation & les diuisât & separant par negation, & deduisant & concludant vne chose d'une autre par ratiocination syllogistique, se trompe souuent en ses discours, affer-mant en elle-mesme ce qu'il faudroit nier, & niant ce qu'il faudroit affer-mer, & deduisât bien souuēt d'une chose ce qu'il n'en faudroit point dedui-re, ou n'en concludant point ce qu'il en faudroit conclurre; & par tels moyẽs se forge d'elle-mesme plusieurs fausses & mauuaises opinions sans les auoir iamais entendus d'ailleurs. Et de fait, toutes les folles & méchantes opi-nions qui autresfois ont eu, ou maintenant ont la vogue, ont commencé quelquesfois, & ont esté inuentees par quelqu'un premieremēt, sans qu'il les eust apprises d'autrui. Par ainsi quand nous n'aurons iamais veu ny ouy aucun homme, nous ne lairriõs portant d'auoir de fausses & meschantes opinions; & outre cela serions plongez en vn abyisme de toute ignorance, misere, & damnation.

Mais ie veux bien vous dire d'auantage, que quand ainsi seroit que les mauuaises opinions vinssent seulement des hommes, encores ne faudroit-il pas pour cela s'effoigner de tous les hommes, & s'en aller par les montagnes & forests, mener vne vie de beste sauvage. Les coups d'espee viennent des hommes, & toutesfois si i'auois receu vn coup d'espee par vn homme, ie ne m'en irois pourtant par les montagnes & forests, fuyans tous les homes éga-lement, & rendant ma playe mortelle à faute d'estre pensée; ains m'en irois à quelque bon chirurgien, ou l'enuoyerois querir pour estre pensé & guarý par son moyen. Et maintenant que, graces à Dieu, ie ne suis blessé, ie n'a-bandonneray la societé humaine, & ne me rédray beste de peur d'estre blessé, ou tué; ains vseray de pourueoyance pour me garder de tomber en tel incon-uenient. Semblablement si j'ay ouy quelque propos scandaleux de quelque mauuais homme, ou si ie suis en crainte d'en ouyr, ie n'iray pour cela courir par les forests loing de tous les hommes, ains m'acosteray de gens de bien, & sages, bien entendus, & me tiendray sur mes gardes.

Et entre tout cela, Monsieur ie vous prie de considerer que si quelques mauuaises opinions viennent de quelques hommes, les remedes de ces mauuaises opinions, & toutes les vrayes & bonnes opinions viennent aussi des hommes, ou par le moyen des hommes. Les bonnes & salutaires opinions touchant la vertu, bñe vie, & mœurs nous ont esté enseignées par les hommes. Il n'y a aussi espece de vertu, de laquelle les hommes n'ayent appris le chemin. Il n'y a passion ny maladie d'esprit, de laquelle les hommes n'ayent enseigné les remedes.

Tous les saincts Docteurs, & autres qui ont escrit les belles œuvres, en la lecture desquelles vous plaisez tant, estoient hommes. La pieté mesme, la Religion, la Parole de Dieu, nous a esté donnée par le moyen des hommes. L'Apostre dit que la Foy mesme nous est donnée par l'ouye. Bref, toutes les sciences, tous les arts & disciplines, & la verité & certitude de leurs preceptes nous ont esté escrites & enseignées par les hommes; lesquelles ils n'eussent peu escrire ny sçauoir, ny nous aussi les apprendre, si eux & nous eussions preferé les deserts & la conuersation des bestes aux citez, & à la vie humaine & ciuile. Voila donc comment les bonnes & vrayes opinions viennent des hommes, comme font aussi les remedes & reputations des fausses & mauuaises. Et partant il est plus raisonnable d'aimer les hommes, & demeurer en la societé humaine pour l'amour des gens de bien, que de haïr & quitter le genre humain, & nous rendre bestes en haine des méchants.

Dauantage outre les preseruatifs & remedes que nous receuons de ceux qui sont plus entendus & plus aduisez que nous, Dieu nous a donné du iugement & quelque cognoissance à chacun en particulier, pour discerner le vray du faux, & pour ietter la fausseté, & embrasser la verité. Si i'oy ou lis vne opinion fausse & méchante, ce n'est pas à dire que pour cela ie sois tenu ny contrainct de la croire & suiure, ny d'entrer pour cela en inquietude & tourment d'esprit. Si ie voy faire du mal, ie ne suis pour cela contrainct de faire de mesme, ny d'entrer en impatience & phrenésie pour vne chose dont ie ne puis mais. L'homme a sa volonté franche & libre, & est luy-mesme maistre de ses actions, avec la grace de Dieu, & ne fera aucun mal s'il luy plaist. Aussi par la mesme volonté il a puissance de commander aux passions, & de les regir & moderer par prudence & vertu. Pour donc maintenir nostre esprit en tranquillité, il ne faut nous en aller par les deserts, où nous serions plus troublez que chez nous; mais il nous faut vser de ceste puissance qui est nee avec nous, & l'armer & fortifier de science, & encores plus de sagesse, moderation & autres vertus.

Vous me cognoissez; ie ne dois ny ne veux faire l'habile ny le sainct avec vous; ie me recognois ignorant & foible deuant Dieu, aussi entre les hommes, comme vn de la tourbe, mais ie ne craindray de vous dire à vous, qu'il y a bien peu de mauuaises opinions que ie n'ay leuës ou ouy dire, & toutesfois ie n'en suis de rien pire pour cela, & n'en sens en moy aucune inquietude d'esprit, & ne voudrois ceder à homme viuant d'estre mieux persuadé de la vertu, de Dieu, & de toutes bonnes choses, ny d'estre plus homme de bien que moy, ny d'auoir l'ame moins troublée & passionnée.

nee que j'ay. Et ne se peut dire que cette disposition me vienne d'estre riche ou bien aisé, & d'auoir des commoditez: car ie n'ay en ce monde aucun bien ny reuenu soit en temporel, ou en spirituel, & n'ay iamais eu moyen de me nourrir & entretenir que de mon travail, & du service que j'ay fait & fais à autrui, & ne s'en pourroit trouuer en ce Royaume ny ailleurs vn plus paure que moy: mais c'est trop parlé de moy-mesme.

Si donc nous auons le iugement & la discretion pour reietter les fausses opinions des méchants, ou moyen d'estre mieux informez & instruits par les doctes & gens de bien, tant decedez que viuans: & si nous auons la volonté, non seulement franche & libre pour nous garder de faire le mal que nous voyons en autrui, mais aussi Royne & Imperatrice pour commander aux passions, si d'ailleurs aussi les mauuais opinions peuvent naistre en nous mesmes par discours errans & fantastiques, ou nous estre imprimees par suggestion diabolique, & plus aisément es deserts que parmy les hommes; si aussi le trouble d'esprit peut venir d'ailleurs que des opinions, & plus facilement loing que près de nos semblables: & si encores les opinions que nous pourrions auoir veues ou leues nous viennent en memoire, & se rengrent en la solitude; si toutes ces choses, dis-je, sont vrayes, comme elles sont, que deuendra la conclusion que vous auez tiree des deux propositions precedentes, auxquelles j'ay particulierement respondu? Certainement elle ne pourra subsister; beaucoup moins encore s'ensuiura t'il que nous deuions fuir tous les hommes, & abandonner de tout en tout la vie humaine, & errer par les montagnes & forests, menans vne vie bestiale & brutale. Et à la verité, outre que par vn tel esloignement de tous les hommes, nous aurions euité, ains augmenté le mal que nous craignons, nous encourrions encores infinies autres maux, & nous nous priuerions d'infinis biens & commoditez que nous receuons les vns des autres, & sans lesquels nous ne pouuons pas mesme viure. Nostre vie est sujette à mille infirmités, esquelles nous auons besoin de l'aide d'autrui: à raisõ dequoy l'Esprit de Dieu nous dit que **MALHEUR A L'HOMME SEUL, LEQUEL S'IL TOMBE N'A PERSONNE QUI LE RELEUE**. Aussi a nostre vie besoin d'infinies choses qu'un homme seul ne se peut fournir luy-mesme, & est necessaire que nous les prenions les vns des autres, & que nous viuions en compagnie, & près de nos semblables. Si vous estiez tout seul par les deserts loing de tous les hommes, vous n'auriez du pain à manger, ny aucun pasture accoustumee & saine. Ie viurois de feuilles, comme j'ay fait quelque temps, me direz-vous. Vous ne trouueriez des feuilles tout le long de l'ay; & mesmement si vous vous proposiez d'aller par les lieux où nul homme ne püst voir, ny estre veu de vous. Et quand vous en trouueriez tousiours, vous n'en pourriez tousiours manger. Ce que vous auez fait pour quelques mois estant ieune & sain, vous ne le pourriez pourtāt faire estant venu sur l'age, ny à la moindre maladie qui vous viendrait, comme il seroit necessaire qu'il vous en vint bien tost de très griesues & extrêmes. Quand on est malade, à peine peut-on aualer les viandes les plus douces & liquides, cõment pourroit on donc alors manger des feuilles? Et puis quand vous seriez gisant par terre malade, & que vous ne pourriez vous leuer ny remuer, qui vous donneroit de ces feuilles: croitroiet elles aupres de vous sur le

Y Y Y Y y 3

rocher dans vne caverne ? où auriez vous seulement la force d'étendre vostre bras pour les prendre , & porter à vostre bouche ? Dieu me pourroit nourrir miraculeusement. Il est vray qu'il le pourroit s'il le vouloit , mais nous ne sçavons s'il le voudroit. Cela sçavons nous bien , & il le nous a appris , nous ne devons point tenter Dieu , comme ce seroit le tenter , & vouloit forcer la nature si on vouloit faire telles entreprises. Voila quant à la nourriture. Et des vestemens , quoy ? qui vous en feroit apres que ceux que vous auriez portez sur vous seroient acheuez d'y sçer ? Iriez vous tout nud. Ce seroit encores tenter Dieu , & vouloit forcer la nature , qui a vestu les bestes , & a laissé l'homme nud , pource qu'il auoit l'industrie pour se faire des habillemens. Vous vous en feriez possible vous mesme. Et où prendriez vous la matiere pour les faire : où l'eguille & le filet pour les coudre ? Vousiriez possible combattre les ours , les lions , & autres bestes pour vous vestir de leurs peaux ? ( car des brebis & autres bestes non sauages , vous n'en trouueriez point là où les hommes ne frequentoient point ) & comment les attendriez vous ? avec quelles armes les combatiez vous ? Mais elles vous déchireroient , & vous mangeroient vous mesme , encore que vous ne leur demandassiez rien. Et seroit vne belle chose que pour n'auoir pû conuerſer avec vos semblables , vous vous fussiez fait manger aux bestes sauages.

Les hermites du temps passé , & ceux d'à present , pour ces considerations , encores qu'ils ayent vescu seuls & à part , toutesfois ç'a esté tousiours assez près de quelque ville , pour y pouuoir aller querir du pain , & leurs autres necessitez , & pour pouuoir estre visitez & secourus quand besoin seroit. Et iamais homme , que ie sçache , quelque mécontentement qu'il eust des hommes , ne s'en éloigna du tout en retenant la vie , laquelle aussi ne se peut conseruer sans l'aide d'autres hommes ; non pas mesme Timon le Misantrope , lequel encore que contre nature & contre toute raison il portast vne haine mortelle aux hommes , toutesfois il habitoit la ville la plus frequentee de ce temps là , & ne pouuoit ny vouloit se passer de l'aide de ceux que tant il haïssoit.

Mais pour ce que vous ne vous souciez gueres de la vie , ie ne m'arresteray plus long temps sur ce point , & vous allegueray les estudes & lettres que vous aimez tant. Comment donc les cōtinueriez vous loing de tous les hommes : d'où prendriez vous les liures , les plumes , l'ancre , le papier , la chandelle , & autres outils de sapience ? avec qui communiqueriez vous les doutes , qui se presentent en estudiant , & de qui en pourriez vous prendre quelque bonne resolution ? à qui aussi pourriez vous faire part de vos belles & bonnes conceptions , ou de quelque vraye & bonne , & neantmoins nouuelle interpretation de quelque passage d'importance non encores entendu , laquelle vous pourroit venir en l'entendement : la distribution des heures & du temps qu'un homme d'estude doit faire , comment la feriez vous à la longue , quand apres quelque temps vous ne sçauriez , non seulement quelle heure il seroit , mais aussi quel iour , quel mois , ny le quantiesme an il y a infinies autres choses que i'aurois honte de vous dire , de peur de vous faire trop de honte à vous mesmes seulement d'auoir eu vne telle pensée. Ce peu donc soit dit pour le regard de ce que vous vous donnez , & du bien duquel vous vous

prîeriez. Je passeray à vne autre considération touchant ce que vous devez aux autres, à tous lesquels vous seriez banquerouter de vostre deuoit, si vous quittez du tout les hommes, instruit & enseigné par des hommes. Vous estes nay des hommes, vous auez esté nourry & eleué par des hommes, instruit & enseigné par des hommes & en la société humaine, bref, tout ce que vous auez de bon, & tout ce qui plus vous plaist, vous l'auéz par le moyen des hommes; & partant quand en la solitude que vous pensez vous pourriez auoir pour vous toutes choses à souhait (combien que vous n'y en trouueriez pas vne) encores ne deuriez vous pas abandonner la société humaine, à laquelle vous estes redevable de tout ce que vous auez de bon, & si vous le faisiez, vous seriez ingratement & iniustement, & vous rendriez indigne de tous les susdits biens que vous en auez receus. Si chacun en faisoit de mesme, & que nous ne nous voulussions iamais rencontrer ny voir les vns les autres, non seulement les Republiques, les loix, les lettres, les arts, la iustice, la religion, mais le genre humain periroit. Ainsi pouuons nous voir que la nature mesme, qui ne fait rien en vain, en ce qu'elle fait naistre les hommes avec la parole, elle nous ordône à tous de viure en compagnie, & perséuerer en la société humaine; autrement la parole nous seroit donnée en vain, puis qu'elle ne nous pourroit de rien seruir si nous demeurions seuls chacun à part soy.

Mais outre l'obligation & le deuoir commun que tout homme a envers la Société humaine, vous estes obligé particulièrement à l'entretenir, & ne pourriez l'abandonner sans parjure & impiété, & sans malediction & damnation. Vous auez les saints & sacrez ordres, vous auez fait le vœu & profession Monastique, vous auez esté promu à la dignité d'Abbé: toutes ces choses ont quelque charge, quelque fonction, & quelque deuoit conjoint avec elles, ce ne sont point des noms vains, lequel deuoit vous auez promis & juré de faire. Et toutesfois ce deuoit ne se peut faire qu'avec & entre les hommes, lesquels si vous quittez du tout pour n'en voir iamais pas vn, vous violeriez tous ces droits, & toutes lesdites promesses & sermens. Dauantage, Dieu vous a départy le don de prescher, & le bruit est par tout que vous preschez avec vn merueilleux fruit, & avec louange & admiration de ceux qui vous écoutent; & partant vous estant appelé à ce saint ministère, il faut que vous pensiez de vous mesme ce que l'Apôstre dit de soy V. & MIH SINON EVANGELIZEM. La condamnation de celuy qui cache son talent vous est cogneü, *INVILEM SERVVM BISITE IN TENEBRAS EXTERIORES, VBI ERIT FLETUS ET STRIDOR DENTIVM.*

Or si vostre dessein sortoit à effet, non seulement vous encourriez cesté malediction à faute de prescher, mais aussi par ce que vous quitteriez la possession & l'exercice de Chrestien & d'un bon Catholique, qui est la chose la plus esloignée de vostre volonté & intention, auquel inconuenient toutesfois possible n'auéz vous iamais pensé.

Vous vous excommunieriez vous mesme, & ne pourriez participer aux biens de l'Eglise, ny obéir à ses commandemens, & partant seriez hors la voye de salut, & au chemin de perdition: Et l'Eglise nous commande de



garder & observer les festes : vous ne pourriez avec le temps seulement sçavoir quand il seroit feste, vous dis-je, qui estes tenu dire certaines oraisons, certains suffrages & antiphones, & accommoder vostre office & seruice selon les festes, series, & diuers iours & temps de l'annee. L'Eglise nous commande d'ouyr la Messe les iours des festes pour les moins; vous qui estes obligé de la dire, ne la pourriez seulement ouyr. L'Eglise nous commande de confesser nos pechez, & communier au precieux corps & sang de nostre Seigneur Iesus Christ, pour le moins vne fois l'an; vous qui avez la puissance de lier & délier les pechez d'autrui, & qui estes obligé d'administrer les Sacrements aux autres, ne pourriez seulement confesser vos pechez, ny participer à aucun Sacrement de l'Eglise.

Passons outre la charité Chrestienne, & l'amour enuers le prochain qui nous est tant commandé & recommandé, & en laquelle consiste presque toute la loy, comment, & enuers qui l'exerceriez vous? Les œuvres de miséricorde, tant corporelles que spirituelles, comment, & enuers qui les feriez-vous? Cōment donneriez vous à manger à celuy qui aura faim? à boire à celuy qui aura soif? comment vestiriez vous les nuds; logeriez les estrangers & pelerins; visiteriez les malades, & les prisonniers? comment donneriez vous conseil à ceux qui seront en doute & perplexité? comment enseigneriez-vous les ignorans? conseilleriez les affligés, corrigeriez les pecheurs? Bref comment feriez vous les autres actes Chrestiennes; lesquels sont de telle importance au Chrestien pour son salut, que Iesus Christ venant pour iuger le monde, pour toutes raisons il dira aux damnez, *ESVRIVI ET NON DEDISTIS MIHI MANDV CARR*, &c. & aux sauuez & bien heureux il dira, *ESVRIVI ET DEDISTIS MIHI MANDV CARR*. Par toutes ces choses vous vbye que renoncer à la société humaine, seroit renoncer au Christianisme, & se retrancher de l'Eglise, le nom de laquelle mesme, comme vous sçavez, ne porte avec soy, & ne signifie solitude, ains compagnie & assemblée.

Ouy, mais les hommes sont méchants & fols; ie ne les puis endurer, & ie ne me puis comporter avec eux. Quand bien les hommes seroient si méchants comme vous les pourriez estimer, & quand nous aurions rencontré des personnes trop reuesches, estranges, & malignes entre eux, & que nous aurions à gouverner, pour cela les raisons que nous auons insques icy alleguees ne se changent point, & ne laissent d'estre vrayes pourtant. Si pour la méchanceté d'aucuns nous abandonnions la société humaine, & l'Eglise, les mesmes souldits inconueniens ne laisseroient pas d'arriuer, & nous en courrions tous iours la mesme malediction & damnation. Mais en cela nous auons à faire nostre deuoir, pour redresser & meliorer ceux que nous auons en gouvernement; & apres que nous l'aurons fait, la méchanceté & l'obstination d'autrui ne nous damnera point & ne nous sera imputee. Ceste resistance mesme & contradiction que nous trouuons à l'encontre du bien, nous doit exciter à mieux faire; & tant plus ce siecle est corrompu & méchant, tant plus les gens de bien doiuent tenir bon, & s'efforcer. Quand l'ennemi assiege & bat nostre ville, & veut donner l'assaut, il ne la fault alors abandonner & trahir en s'enfuyant; ains il faut aller defendre la préche, & repousser l'ennemy vertueusement.

vertueusement. Si tous les gés de bien se retiroient descôpagnies, il ne resteroit que les méchants, pour acheuer incontinent de tout ruiner & perdre.

La sainte Escriture, nous apprend, que combien que les hommes fussent méchants & ennemis de Dieu, ce nonobstant il leur a enuoyé son Fils, & l'a livré à la mort pour eux. Et son Fils Iesus Christ nostre Seigneur estant en ce monde, a conuersé avec les personnes débauchees & mal-vivantes : & quand on le luy a quelquesfois reproché, il a respondu que ceux qui estoient sains n'auoient besoin de medecin. Saint Paul semblablement nous appréd que le mary fidelle ne doit laisser sa femme infidelle, ny pareillement la femme fidelle le mary infidelle, & que le fidelle pourra sauuer l'infidelle. Voila comment pour la méchanceté des hommes nous ne deuons laisser de leur rendre le deuoir auquel nous sommes obligez. Et encores ne deuons nous abandonner ceux à qui nous n'auons point d'obligation particuliere, ains tascher de les reduire si nous y voyons quelque esperance. Et tout au pis, si nous ne nous pouuons comporter avec eux, il ne nous faut pour cela quitter tous les hommes, & nous en aller par les deserts nous faire manger aux bêtes, & mettre nostre ame en voye de damnation. Il ne faut que laisser là les méchants, incorrigibles, & desesperez, c'est à dire ne les hanter point. Chacun se peut rendre solitaire en vne ville bien peuplée, sans s'en aller aux montagnes & forests, & se priver de commoditez que nous receuons des homes, sans se mettre en danger de mort & de damnation. Vn homme qui a dequoy s'entretenir, pourra, s'il veut, faire vn desert de son estude, de sa chambre, de sa galerie, de sa metairie, ou de quelque autre tel lieu : & cependant auoir viures, habillemens, liures, & autres choses necessaires, soit pour l'estre, soit pour le bien estre : & seruir à Dieu demeurant en l'Eglise, & assistant au sermon & au seruice diuin, & communiquer & participer aux saints sacrifices, & aux autres graces que Dieu depart à son Eglise & en son Eglise, & faire son salut. Qu'est-il donc besoin d'aller querir aux deserts vne incommodité, & danger extrême de sa vie & de son ame, & en attendant de forcer la nature & de faire choses impossibles : d'aller querir, dis-je, la solitude que chacun peut trouuer & faire chez soy, avec tant de seureté & comodité de corps & de l'esprit ; Quant à moy, il me semble qu'un personnage de vostre sorte, qui apres auoir estudié seul quelques heures, vient en l'Eglise, où le peuple l'attend, monte en chaire, & presche vne heure sans que personne l'interrompe, & puis s'en va en sa chabre, se repose vn peu, & prend son repas sobrement, & quelque temps apres retourne en son estude, il me semble, disie, que cestuy-là, outre ce qu'il rend à soy & aux autres ce qu'il doit, est assez solitaire, comme vous avez esté l'Aduent & le Careme passé. Vn Religieux qui se trouue à matines, & aux autres heures & seruices ordonnez, & psalmodie & pense à ce qu'il chanté ; & employe le reste du iour à estudier, ou à quelque autre honeste occupation, est assez solitaire, & ne luy faut autre desert que son Conuent ; & les anciens en appellant le Conuent *COMNOBIVM*, & les Religieux *MONACHOS*, ont bien moustré qu'en communauté de vie & en société on peut estre solitaire. Somme, qu'es bonnes & grandes villes, & abondantes en toute commodité, chacun peut trouuer la solitude ; mais aux deserts loing de tous hommes, nul n'y peut trouuer

les choses necessaires pour la vie, ny rendre à Dieu & à son prochain le deuoir qu'il doit.

Et de ne pouuoir endurer d'estre quelquesfois destourné ou importuné, ou de ne pouuoir souffrir la mauuaistié de quelques-vns, de laquelle nous ne pouuons mais, & laquelle Dieu tout puissant tolere luy mesme, & pour cela abandonner la societé humaine, & se retrancher de l'Eglise, ce ne seroit pas tant amour de vertu & haine du vice, encores qu'il y en pourroit auoir, comme seroit foiblesse & petitesse de cœur, imprudence & inaduerterence de plusieurs grands inconueniens, & oubliance du deuoir deu à Dieu, à soy-mesme, & à son prochain.

Ce seroit aussi mourir deuant que mourir: car outre ce que les Latins disent quelquesfois *MIGRARE AB HOMINIBVS*, pour mourir, ce peu de vie qui resteroit seroit de pire condition que celle des bestes, lesquelles ont aux deserts ce qu'il leur faut, non seulement pour leur viure, mais aussi pour leur aise; & l'homme fait à l'image & semblance de Dieu, n'y auroit rien de ce qui luy seroit necessaire, ny pour le corps, ny pour l'ame. Aussi seroit-il impossible qu'un homme y durast & perseuerast, quand bien il l'auroit entrepris: & cependant, outre le danger qu'il y auroit pour le corps & pour l'ame, il se seroit rendu ridicule, tant en l'entreprise qu'en la repentance. Et partant, pour reuenir à mon commencement, ie loué & remercie Dieu de tout mon cœur de ce qu'il vous dispose la volonté conformément à son ordonnance & commandement; & le prie qu'il vous face la grace d'y persister, & que nulle telle phantasie ne vous vienne iamais en la pensee, moins en la volonté. A quoy par la presente, ou autrement, ie pouuois auoir contribué quelque chose, ie tiendray pour vn des plus grands fructs de ce peu de connoissance qu'il luy a plu me donner: vous assurant, Monsieur que ie tiens à une grande faueur & honneur de ce qu'il vous a plu me communiquer ce qui vous en estoit venu en pensee, & que ie me tiendray tousiours grandement fauorisé & honoré de vous quand il vous plaira cy-apres me faire part de vos desseins & affaires; esquelles ie vous seruiray tousiours avec toute fidelité, & de toute mon affection, & espere que si ie ne vous y puis ayder beaucoup, pour le moins Dieu me fera la grace que ie n'y empireray rien. Et si d'auenture en ceste mesme lettre i'auois parlé en quelque endroit trop obscurément, ou en sorte que vous n'en fusiez satisfait, ie vous prie m'en escrire afin que ie me mette en deuoir d'y satisfaire: car ie vous iure par l'humble affection & respect que ie vous rends, & appelle Dieu a témoin, que ie n'y ay rien déguisé pour seruir à la cause & que ie ne vous ay rien dit que ie n'estime bon & veritable. A tant, Monsieur, ie saluë vos graces de mes plus humbles & affectueuses recommandations, priant Dieu qu'il vous donne tres-longue & tres-heureuse vie. D'Aurillac ce dernier d'Auril 1577.

*Vostre plus humble & obeyssant  
seruiteur A. D'OSSAT.*

# TABLE.

## A



BBAYE de saint Aphrodisie, folio. 278  
 Abbaye de saint Remy de Reims, folio. 141.235.290

Absolution du Roy ne doit estre meslee avec aucun interest temporel, fol. 2.6

Raisons du Duc de Sesse pour empêcher l'Absolution, fol. 20

Absolution plus nécessaire pour Rome que pour le Roy, fol. 41.42.165.166

Absolution, comme elle se doit demander, fol. 28

Absolution du Roy, & les difficultez qui s'y rencontrent, fol. 17.18.35.36.37

Conditions que le Pape veut du Roy pour l'Absolution, fol. 25.26.27

Ambassade que le Roy doit envoyer pour son Absolution, & comme on s'y doit gouverner, fol. 28

Absolution du Roy, & ce qui s'est passé à Rome sur ce sujet, fol. 85.86.87. & suiv.

Qu'en l'Absolution il ne s'est rié passé contre les droits de la Frâce, & response à ceux qui en médisoient, fol. 107.108. & suiv.

Article de la ratification de l'Absolution, & comme il doit estre concen, fol. 164.190.191.162. & suiv.

Abiuration requise du Roy en son absolution, fol. 193

Procez verbal de l'Absolution, & de ce qui s'est passé en France sur ce sujet avec le Legat, fol. 206.207. & suiv.

Agria prise par les Turcs, fol. 220

Albert Cardinal d'Autriche, fol. 106  
 Le Sieur d'Albigny, Gouverneur de Savoie, fol. 609

Voyage du Seigneur Jean François Aldobrandin en Espagne, & les soupçons de ce voyage, fol. 40.41.42.62

Jean François Aldobrandin déclaré General destrouppes pour Hongrie, fol. 73.74  
 Sa mort, fol. 727.228

Cardinal Aldobrandin & sa louange, fol. 39

Cardinal Aldobrandin Protecteur de Savoie, fol. 402.403

Cardinal Aldobrandin, fol. 733

Cardinal Aldobrandin incline du costé de Savoie, & ses artifices pour se faire envoyer Legat, fol. 493.494. &c.

Cardinal Aldobrandin Legat vers le Roy, son equipage, & son arrivée, fol. 555.556 & suiv.

Sylvestre Aldobrandin fait Cardinal à 14. ans, fol. 854

Cardinal Alexandrin, fol. 229.464

Le Sieur d'Alincourt enuoyé par le Roy à Rome, & sa recommandation, fol. 484.485.486

Ambassadeurs des Princes, quoy que non legitimes, peuvent estre admis, fol. 701

Ambassadeurs du Roy à Venise, & de leurs visites par les Nonces du Pape, ibid. 715.716

Ambassadeurs nouvellement arrivez, s'ils doivent estre visitez les premiers par les Nonces & autres, fol. 701.702.716.717

Le Sieur d'Ambrac, fol. 205

Amiens repris par le Roy, fol. 288

Madame l'Amirale, & recommandation

ZZZZ 2 2

de son affaire au Pape, fol. 222. 223. 237.  
 254. 291. 440  
 Mort de Madame l'Admirale, fol. 478  
 Fille de Madame l'Amirale, fol. 481  
 Amurat Rais Corsaire, fol. 559. 560  
 André Ecoissois espion d'Espagne, fol. 612. 613  
 Roy d'Angleterre, fol. 831. 841  
 Royné d'Angleterre, fol. 247. 248. 178  
 Angleterre & son alliance necessaire à la France, fol. 178. 188. 189. 248  
 Vnion d'Angleterre & d'Escoffe, fol. 127. 128  
 Anglois heretique brulé à Rome fol. 178  
 Angleterre, & desseins du Pape & des Espagnols sur icelle, fol. 127. 128. 247. & suiu. 269. 659. 668. 688. 744. 745. 746. & suivant.  
 Anglois Catholiques comment instruits és Seminaires d'Espagne, fol. 746  
 Anglois Catholiques espions en France, fol. 750. 751  
 Archiprestre en Angleterre. ibid.  
 Arbelles, & ses pretentions sur l'Angleterre, fol. 478. 479  
 Anglois prennent Calis, fol. 183. 184  
 Cardinal Aquauina fol. 232. 265  
 Archeuesque d'Ambrun, & sa recommandation, fol. 98. 293  
 Archiduc Albert à Ferrare, & la reception par le Pape, fol. 380  
 Arrest du grand Conseil sur prouisions de benefices, fol. 225  
 Arrest contre Chastel, & les plaintes du Pape, & les raisons pour l'Arrest, fol. 49. 59. 55.  
 Arrest du Parlement contro les Iesuites. fol. 298. 299  
 Arrest du Conseil Priué contre les Iesuites, fol. 316. 317 & suiu.  
 Arrest de la Cour sur les prouisions de Cour de Rome, la plainte du Pape, & defense de l'Arrest, fol. 140  
 Assassins contre les Roys detestables, & comme il s'en faut garder, fol. 46. 47.

203. 214  
 Charles d'Auennes, & de sa deposition, fol. 202. 214  
 Monsieur d'Aumale, fol. 605  
 Maison d'Austriche ennemie de la France, fol. 251  
 Maison d'Austriche endure les heretiques en ses Estats, fol. 274

B

Cardinal Bandini, & ses qualitez, fol. 165. 167  
 Fait Cardinal avec consentement du grand Duc, fol. 187  
 Mario Bandini, fol. 267. 215. 341  
 Duc de Bar à Rome, & le suiet de son voyage fol. 520. 521  
 S'offre à quitter Madame, fol. 528. 529. 565. 566.  
 Le Seigneur Barberin Nonce en France pour se conioiir de la Naissance de Monseigneur le Dauphin, fol. 740  
 Archeuesque de Bari Nonce en Saouye, fol. 143  
 Cardinal Baronius, & ses qualitez, fol. 157. 158  
 Baronius imposteur, se disant neveu du Cardinal & sa Caballe, fol. 775. 776  
 De la iournée de S. Barthelemy, fol. 465  
 Mort du Cardinal Batori, & ce qui s'est fait à Rome sur ce suiet, fol. 482. 483  
 Bearn, fol. 140. 147. 427  
 Euesque de Beauuais, fol. 140. 841  
 Benedictins du Mont-Cassin, fol. 150. 151  
 Benefices vacquants en Cour de Rome, fol. 456  
 Prouisions des Benefices durant les defences d'aller à Rome, fol. 173. 174  
 Monsieur Benoit nommé à l'Euesché de Troyes, & le refus qu'on luy fait à Rome pour ses Bulles fol. 470. 471. 703.  
 Sa Bible Françoisse, fol. 428. 429  
 Monsieur de Bethune Ambassadeur à Rome, & sa louange, fol. 693. 737. 738. 701

# TABLE.

|  |  |
|--|--|
| Maréchal de Biron, & considerations sur la prise, fol. 778. la mort, fol. 784      | 779  |
| Le sieur Bongars calomnié par Schoppius, fol.                                      | 587. 588. 594                                  |
| Cardinal Borghese, fol.  | 157  |
| Borgo San Sepolchro, fol.  | 306  |
| Le sieur Bossu Secrétaire de Monsieur le Cardinal d'Ossat, fol.                    | 792  |
| Boucher Docteur, fol.  | 584. 605                                       |
| Archevesque de Bourges en quelle opinion à Rome, fol.                              | 212  |
| La difficulté d'obtenir ses Bulles pour l'Archevesché de Sens, fol.                | 212. 236. 242. 243. 244. & suiv. 409. 410. 417 |
| Son affaire expédié, fol.  | 772  |
| Bretagne non comprise és Concordats, fol.  | 121. 112. 753                                  |
| Pays d'obedience, fol.   | 838  |
| Son vnion à la Couronne, fol.  | 280  |
| Indult accordé au Roy par le Pape pour nommer aux benefices de Bretagne, fol.      | 291  |
| Regale en Bretagne, fol.   | 752. 753. & suiv.                              |
| Pretention du saint Siege de nommer aux benefices de Bretagne fol.                 | 121. 122. 752. 753                             |
| Rois de France pretendent de nommer aux benefices de Bretagne, fol.                | 212. 213                                       |
| Monsieur de Breues, & ses offices enuers les Chrestiens de Chio, fol.              | 693. 694                                       |
| Comte de Brienne, fol.   | 554  |
| Marthe Brosnier pretenduë demoniaque, & ce qui s'est fait à Rome sur ce fait, fol. | 495. 496. &c. 515                              |
| Pere Brulart Capuchin, fol.  | 755. 649                                       |
| Innocentio Bufalo Nonce, fol.  | 653  |
| Bulle de l'Absolution enuoyée au Roy fol.  | 100  |

C.

Caetan Cardinal Legat en Pologne, fol. 148

|  |   |
|--|---|
| Calais pris par les Espagnols, fol.  | 147   |
| Calis prise par les Anglois, & les discours sur ce sujet, fol.   | 183   |
| Como Camaiano, fol.  | 287   |
| Canonization du saint Espagnol, fol.   | 650. 651  |
| Capuchins ne veulent confesser, fol.   | 509   |
| Cardinaux pour l'Absolution du Roy, fol.   | 90  |
| Promotion de 16. Cardinaux, leurs conditions & qualitez, fol.  | 154. 155. 156. 163                                    |
| Cardinaux François ne se doiuent faire sans le consentement du Roy, fol.   | 155   |
| Cardinaux de la faction d'Espagne, fol.  | 152. 153  |
| Cardinaux creéz l'an 1599. leurs conditions & qualitez, fol.   | 413. 414. &c.   |
| Cardinal tué en guerre fol.  | 482. 483  |
| Alfonse Carillo Iesuite enuoyé à Rome par le Transylvain, fol.   | 143. 144  |
| Castagne Cordelier, fol.   | 579   |
| Catholiques pretendus zelez combien apportent de maux à la Religion, fol.  | 498   |
| Gazau, & ses pernicieux desseins, fol.   | 111. 112. 113. 114. 126. 127. &c.                     |
| Docteur Cecile Anglois espion, fol.  | 751   |
| Cardinal de sainte Cecile, fol.  | 859   |
| Marco Cellini, fol.  | 283. 284  |
| Barth. Cenami, & sa recommandation, fol.   | 459   |
| Ceremonies obseruees à Ferrare par le Pape aux esponsailles de la Roynie d'Espagne, & de l'Archiduc Albert, fol. | 379   |
| Cesar d'Este, & son accord avec le Pape, & les causes d'iceluy, fol.   | 309   |
| Chappellenies en l'Eglise S. Pierre font de droit patronat des Rois de France, fol.                              | 679. 713. 720   |
| Comte Charles vsurpateur du Royaume de Suede, fol.   | 729   |
| Chasteau Daufin, & la plainte du Pape pour ce qu'il y auoit vn Gouverneur heretique, fo.                         | 663. 664. 676. 799. 710. 718. 723. 724. 737. 738. 739 |

ZZZZz3

# TABLE.

|  |                                  |
|--|----------------------------------|
| Cheualiers creéz par le Pape, fol.           |                                  |
| 596  |                                  |
| Chiuerny Chancelier, contre l'absolu-        |                                  |
| tion du Roy, & pourquoy, fol.                | 110                              |
| Clisse ville de Dalmatie, & sa prise, fol.   |                                  |
| 149  |                                  |
| Coadiuteurs d'Eueschez quels doiuent         |                                  |
| estre fol.                                   | 278.279                          |
| Golford Anglois espion, fol.                 | 751                              |
| Concile de Trente, & la poursuite de sa      |                                  |
| publication en France par le Pape, la diffi- |                                  |
| culté qui s'y rencontre, fol.                | 262.282.424.                     |
| 425.426.430.504.505.519. & suiv. 531.        |                                  |
| 636.672.673.676                              |                                  |
| Concordats de France & d'Allemagne           |                                  |
| pour les benefices, fol.                     | 751.752                          |
| Prince de Condé, fol.                        | 217.218                          |
| Confratrie de nostre Dame de la com-         |                                  |
| pasion des sept douleurs esigee en Saouye,   |                                  |
| & leur cabale, fol.                          | 634 635                          |
| Connestable de Castille, fol.                | 389                              |
| Cordeliers de Guienne, & leur different,     |                                  |
| fol.   | 851                              |
| Cornac Abbé ennoyé à Rome par Mon-           |                                  |
| sieur de Mayenne, fol.                       | 129                              |
| Cornaro Cardinal, fol.                       | 182.215                          |
| Cout de Rome. fol.                           | 183.295.358.545.                 |
| 732. ses vſurpations, longueurs, & forma-    |                                  |
| litez, fol.                                  | 23.24.85.93.200                  |
| Cour de Rome doit estre conſeſuee, &         |                                  |
| comment, fol.                                | 825                              |
| Couriers, & l'ordre qu'il y faut mettre,     |                                  |
| fol.   | 199.200.264.265.361.362.690.691. |
| 695.697.705                                  |                                  |
| Camille de la Croix, & sa recommanda-        |                                  |
| tion, fol.                                   | 348                              |

## D

|  |                 |
|--|-----------------|
| Naissance du Monſeigneur le Dauphin,     |                 |
| & ce qui s'eſt fait à Rome sur ce ſuiet, |                 |
| fol.                                     | 731.732.740.741 |
| les belles eſperances qu'il donne, fol.  |                 |
| 838                                      |                 |
| Pour parler de mariage d'entre Mon-      |                 |

|  |             |
|--|-------------|
| ſeigneur le Dauphin, & l'Infante d'Eſpa- |             |
| gne, fol.                                | 812.813.827 |
| Aduis sur le Baptême de Monſeigneur      |             |
| le Dauphin, fol.                         | 859.860     |
| Dauphins de Viennois Seigneurs directs   |             |
| du Marquisat de Saluſſes, fol.           | 6.7         |
| Le ſieur Delbene, & sa recommandation,   |             |
| fol.                                     | 94          |
| Delfin Cheualier Venitien, f.            | 172.263     |
| Demoniaques, fol.                        | 497         |
| Diſpenſes en l'Egliſe, fol.              | 673         |
| Prince Doria, fol.                       | 196         |
| Archeueſque de Dublin donné à vn Eſ-     |             |
| pagnol, fol.                             |             |

## E

|   |                              |
|---|------------------------------|
| Eccleſiaſtiques d'Eſpagne chargez par         |                              |
| le Roy d'entretenir des Galeres; leur         |                              |
| plainte au Pape, fol.                         | 201.695.696.                 |
| 726   |                              |
| Edit à Rome pour la reſidence des Eueſ-       |                              |
| ques fol.                                     | 219                          |
| Edits de pacification en faueur de ceux       |                              |
| de la religion, & plainte du Pape ſur iceux,  |                              |
| fol.  | 272.273.420.421.422. & ſuiu. |
| Egliſe Collegiale, fol.                       | 27.833.834                   |
| L'Empire n'a droit ſur les Eueſchez de        |                              |
| Mets, Toul, & Verdun, fol.                    | 638.639                      |
| Roy d'Eſcoſſe, fol.                           | 129.130                      |
| Eſcoſſois Catholiques à Rome, & pour          |                              |
| quel ſuiet, fol.                              | 127                          |
| Eſpagnols empeſchent l'Abſolution, &          |                              |
| leurs artiſſes & menaces, fol.                | 71.72. & ſuiu.               |
| 87.88.  |                              |
| leurs inſolences & mauvais offices contre     |                              |
| le Roy à Rome, fol.                           | 144.148.149                  |
| leur haine, & entrepriſe contre le Roy &      |                              |
| ſon Eſtat, fol.                               | 102.200.251.681.             |
| 682.714.715.719.807.815.816. & ſui-           |                              |
| uans.   |                              |
| Entrepriſes des Eſpagnols ſur les Iſles d'Ie- |                              |
| res, fol.                                     | 195.196                      |
| Eſpagnols deſirent la paix avec le Roy,       |                              |

## TABLE.

Cardinal Farnese Protecteur d'Angle-  
terre, & ses desseins sur icelle, fol. 668.  
689.755.747. & suiv.

La maison de Farnese, fol. 780

Duc de Ferrare s'offre d'aller en Hongrie, fol. 180

est refusé de l'investiture de son Duché  
pour le Seigneur Dom Cesare, fol. 130

Duché de Ferrare deuolu au saint Sie-  
ge, l'aduis que le Pape en donne au Roy &  
la lettre du sieur d'Offat au Roy sur ce su-  
iet, fol. 304. 205. 206. & suiv.

Different de Ferrare accordé, fol. 309

Festes en trop grand nombre en France,  
& la plainte au Pape pour les retrancher, f.  
395.396.397.& suiv.

Abbaye de Fusillans, fol. 512

Final occupé par les Espagnols, fol. 763

Cardinal de Florence, déclaré Legat  
pour France, & ses qualitez, fol. 145

les honneurs à s<sup>e</sup> entrée dans le Royaume,  
contentement qu'on reçoit de luy, fol. 222.  
223

Duc de Florence hay des Espagnols, fol.

186. 337 donne aduis au Roy d'une entre-  
prise sur les isles d'Ieres, fol. 195 son affe-

tion vers la France, fol. 356. 357 desire estre  
compris au traitté de Veruins, & comment.

fol. 342.345  
Negotiation du sieur d'Offat avec le

Duc de Florence pour le chasteau d'If, fol.  
226.227.231.232. & suiv. 242.244.245 ses

confeils au Roy pour le gouverner durant  
la paix. fol. 357. 358

Duc de Florence aimé du Pape , & les  
dangers qu'ils se rendent fol



## TABLE.

Est en soubçon du Pape, fol. 338.344  
Emulation entre France & Espagne, fol.  
199.200.358.897  
France & sa situation & aduanantage contre  
l'Espagne, fol. 201.211  
France premier Royaume de la Chre-  
stienté, fol. 251  
Rois de France quels fol. 308.309  
Facilité des François à laisser passer les  
couriers d'Espagne sur leurs terres, fol.  
134.200.201.  
Frontieres de France mal fournies, fol.  
148.149  
Frangipani Abbé de saint Victor de  
Marseille, fol. 448  
Monsieur de Fraissnes Canaye, fol. 693  
Frontieres doiuent estre munies, fol. 340.  
341  
Comte de Fuentes, fol. 146.148.721  
Funerailles du Roy Henry III. pour sui-  
uies à Rome par le sieur d'Offat, fol.  
531  
Funerailles du Roy d'Espagne à Rome,  
fol. 371

**G**

**G**ageures à Rome sur la prise de Mont-  
melian, fol. 588. 589  
Galeres & leur armement necessaire en  
France, fol. 201. le moyen de les entretenir,  
fol. 202. 228. 229. 340. 341 353. 608  
Eglise Gallicane se ruine durant le schis-  
me, fol. 207. 217. 218  
Genebrad seditieux, fol. 79  
Generaux des Cordeliers doivent estre es-  
leus de diuerses nations tour à tour, fol.  
490. 491. 511  
Geneue, & sa protection, & l'interest du  
Roy qu'elle ne soit vsurpee fol. 603.  
615  
la consequence de ce passage, fol. 839  
Plainte de ceux de Geneue contre le Duc  
de Sauoye, fol. 710. 711  
Geneue desirée par le Duc de Sauoye,  
fol. 653

son entreprise dessus Geneue, fol. 807. 808.  
 Genes, fol. 316  
 Cardinal de sainct George mal auprès du  
 Pape son oncle, fol. 372. 409  
 Giury fait Cardinal sans requisition du  
 Roy, & la plainte qui en fut faite à Rome,  
 fol. 155. 159. 163. 179. 187. 222  
 Cardinal de Giury recommandé par le Pa-  
 pe, fol. 261  
 Cardinal de Giury, fol. 261. 265. 401  
 Cardinal de Gondy, fol. 222. 713  
 Gordon Iesuite, fol. 128  
 Gouvernement des Prouinces ne doi-  
 uent estre baillez à ceux qui ont des pre-  
 tentions, fol. 281  
 Gouuernement des villes & forteresses  
 ne doivent estre donnees à vne mesme per-  
 sonne, fol. 823  
 Monsieur le Grand Escuyer à Florence,  
 fol. 522. 523. 557  
 Gratis d'Abbayes & Eueschez, fol. 336.  
 291. 295  
 Le sieur Guérier, fol.  
 Plainte pour les Gratis excessifs, fol. 363  
 365  
 En gresse iuste on se peut servir du se-  
 cours des heretiques & infidelles, fol. 179  
 Cheualier Guiciardin, fol. 338  
 Guignard Iesuite, fol. 49  
 Duc de Guise, fol. 296. 197

# H

**H**enry III. & sa pieté, fol. 424. 429  
pour suite de ses obseques à Rome, fol.  
531  
Heretiques ne doiuent estre admis aux  
charges, fol. 692  
Heretiques tolerer en diuers Estats, fol.  
423. 424. 829  
S'il faut garder la foy aux heretiques, fol.  
245. 246  
Pere Hilaire Capuchin, son voyage à  
Rome, confere avec le Cardinal d'Osse,  
son impudence, &c. fol. 620. 621. 621. &  
suiu. 633. 651. 661. 662. 698. 715. 735. 755  
Hollandois

# TAB E:

Hollandois secourus par le Roy, & la  
plainte du Pape & des Espagnols, fol. 674  
681.700.701  
Paix de Hollande, si elle est utile à la Fran-  
ce, fol. 368.369  
Abbaye de saint Honorat de Lerins,  
fol. 151.300.312.824  
Huguenots, fol. 224.226.233.274.275.  
319.424

## F

**F** Esuites, f. 47. 49. 54. 319. 320. 369. 503.  
1816  
Quelles conditions leur seront proposées  
pour les recevoir, fol. 840.844  
Arrest du Parlement contre les Esuites,  
& les plaintes sur iceluy, fol. 398  
Arrest du Conseil Privé contre les mes-  
mes, & les plaintes, fol. 316.317. & suiv.  
Le Pape fait instance pour leur restabli-  
ssemēt, fol. 94  
General des Esuites, fol. 398  
Isle d'Ieres, & entreprise des Espagnols  
dessus, & les remedes pour y obuier, f. 195.  
196. & suiv.  
Isle d'If, & son importance, fol. 341  
Chasteau d'If, & negotiations du sieur  
d'Offat avec le grand Duc pour la reddi-  
tion au Roy, fol. 326.327.332.353. &c.  
Traite avec le grand Duc pour la red-  
dition de l'Isle & Chasteau d'If, &c. fol.  
278.379  
Indults donnez par les Papes aux Roys  
de France pour nommer aux benefices de  
Bretagne & Prouence, f. 120. 121. 122. 172.  
373. 174  
Poursuite de l'Indult pour nommer aux  
benefices du pays Melsin, fol. 295. 523.  
632. 242. 751  
Indults concedez par le saint Siege aux  
Ducs de Sauoye pour nommer aux benefi-  
ces, fol. 765. 766  
Poursuite de l'Indult pour nommer  
aux benefices de Breſſe, fol. 636. 637. 634.  
& suiv.

Inquisition, & le desir qu'on a de l'agra-  
dir, fol. 207. 208. 212  
Cardinal de Ioyeuse, & ses bons offices  
pour l'absolution du Roy, fol. 96. son affe-  
ction au service du Roy, fol. 117. 118  
Cardinal de Ioyeuse, fol. 406. 433. 438.  
439. 456  
Cardinal de Ioyeuse Protecteur de Frâ-  
ce, fol. 117. 132.  
Les bons offices rendus par luy à Mon-  
sieur le Cardinal d'Offat, fol. 416. 429  
Ioyeuse Capuchin, & la permission qui  
luy fut donnee de passer de l'Ordre des  
Capuchins à celuy de Malte, fol. 74  
Princes de Joinville au camp de l'Archiduc, fol. 681  
Princes d'Italie ennemis de la grandeur  
du Pape; leur jalousie entr'eux, fol. 304. 305  
Jubilé pour Paris, fol. 658  
Jurisdiction Ecclesiastique, & le diffé-  
rent survenu sur icelle entre l'Archevesque  
de Milan & le Gouverneur, fol. 318. 230.  
231. 239  
Autre différent survenu entre le Viceroy  
de Naples & l'Evesque de Benevento, fol.  
392  
Justice, & son origine, fol. 488

## L

**L** Eglise de saint Jean de Latran, & sa re-  
commandation, fol. 146. 150  
Leon Brulart, fol. 479  
Abbaye de saint Leon au pays Melsin,  
sçavoir si le Roy y a nomination, & le dif-  
férent sur ce fol. 691. 756. 757. &c.  
Duc de Lorraine ne veut la guerre, fol.  
950  
Monsieur de Lesdiguières, fol. 561  
Evesque de Liege, fol. 135  
Ligueurs, fol. 141  
Archevesque de Lyon d'Espinal pour-  
quoy n'a esté fait Cardinal, fol. 185. 186  
Cardinal de Lorraine Legat fol. 393  
394. ses facultez, & leur prejudice à la

AAAAA

# TABLE.

France, fol. 196. 197 & suiv.  
 Duc de Lorraine fait poursuivre l'erection  
 de Nancy en Euesché, fol. 393. 394. &c.  
 ses entreprises sur les Eueschez de Mets  
 Toul, & Verdun, f. 405. 683. 684. & sui. 759  
 Republique de Lucques,  
 Arrivee de Monsieur de Luxembourg, à  
 Rome pour presser l'obedience, fol. 277.  
 287. 366. son retour, fol. 389

## M

**M**adame sœur du Roy, offre de se fai-  
 re Catholique, & à quelle condition;  
 fol. 836  
 Lorenzo Magio Iesuite, f. 374  
 Duc de Mayenne, fol. 11  
 se plaint des Espagnols, fol. 72. 73  
 en mauvaise estime des Espagnols, f. 93  
 Religion de Malte recommandee par le  
 Pape au Roy, fol. 96  
 Resiouvances faites à Malte pour l'absol-  
 ution du Roy, fol. 102  
 Different entre les Cheualiers de Malte &  
 les Venitiens, fol. 225. 227  
 Different entre le grand Maistre de Mal-  
 te & les Cheualiers, fol. 12  
 Ambassadeurs de Malte vers le Roy, fo.  
 46  
 Differents des Cheualiers François, con-  
 tre l'Inquisiteur à Malte, fol. 302. 303  
 519  
 Grand Maistre de Malte mort, & ce qu'il  
 a laissé au thesor, fol. 81  
 Mauvaise Nonce en Flandre, & la plain-  
 te contre luy, fol. 42. 43. 208. 203  
 Mandosse Ambassadeur à Venise, f. 144  
 Duc de Mantouë, fol. 306  
 ses differents, fol. 267. 268. 277  
 Euesque de Mantouë destiné Nonce en  
 France, & ce qu'on disoit contre luy f. 140.  
 241  
 Dissolution de mariage du Prince de

Transylvanie, & de l'Archiduchesse Ma-  
 rie, & de ses formes qui furent gardees, f.  
 444. 445. 446. & suiv.  
 Mariages de differente Religion prohibez;  
 fol. 520. 521  
 Dissolution de mariage du Roy & de la  
 Roynne Marguerite; & des moyens qu'il  
 faut y tenir, fol. 443. 444. 447. 454. 458.  
 460. & suivans. 487. 488. & sui-  
 vans.

Dispence de mariage de Madame sœur  
 du Roy; & Monsieur le Duc de Bar, & la  
 difficulté qui s'y rencontre, & toute la ne-  
 gociation de cét affaire & à quelles condi-  
 tions elle a esté accordée, fol. 520. 521. &c.  
 524. 525. &c. 534. 535. 571. 654. 664. 771.  
 781. 782. 785. 892. 893. 795. 796. 800.  
 801. 836. 839. 832. 844. 846. 850. 860. 862.  
 862. 863

Le sieur Marquisetto, & son affection au  
 service du Roy, f. 690

Marçal au Diocèse de Mets usurpé par le  
 Duc de Lorraine, fo. 405. 431

Marseille, & desseins des Espagnols sur  
 icelle, fol. 111. 112. 113. & suiv.

moyens de la secourir, ibid.  
 sa Reduction à l'obeyssance du Roy, fol.  
 129

sa conservation necessaire au Pape & à l'I-  
 talie, fol. 170

Marthe Brosnier pretenduë demoniaque,  
 & ce qui s'est passé à Rome sur ce fait,  
 fol. 516. 495. 496. 497. & sui-  
 vans, 515

Dom Pietro de Medicis à Rome, & pour  
 quel suiet, fol. 138. 215

Mendians en France, fol.  
 Duc de Mercœur, fol. 212. 216

ses pretensions sur la Bretagne, & leurs re-  
 sutations, fol. 279. 280

Poursuite de l'indult pour nommer aux  
 benefices du pays Messin, fol. 295. 523. 639.  
 642

Pays Messin, non compris la Concor-  
 dat, fol. 244. 757. 759.

# TABLE.

|   |         |  |             |
|---|---------|--|-------------|
| Euesché de Mets, & les entreprises sur<br>iceluy par le Duc de Lorraine, fol. | 405.    | Nominations ecclmme introduites en<br>France, fol. | 648.661.662 |
| 408.431   |         |  |             |
| Prince de la Mirandola, fol.  | 703     |  |             |
| Euesque de Modena Nonce en France, &<br>ses qualitez, fol.                    | 400     |  |             |
| Monopoli Capuchin, f.   | 620.621 |  |             |

## N

**N**aissance de Monseigneur le Dauphin,  
& ce qui fut delibéré à Rome par le  
Pape sur ce sujet, fol.

Naissance de l'Infante d'Espagne, fol.

734

Poursuite de l'erection de Nancy en  
Euesché, & l'opposition & raisons du Car-  
dinal d'Ossat pour l'empescher, f. 393. 394.

399. 637. 666. 682. 683. 685. & suiv. 701

Eglise Collegiale erigee à Nancy fol.

833

Obedience pour le Royanme de Navar-  
re, & la forme d'y proceder, fol.

267. 268. 270. 271. & suiv.

Monsieur de Nemours, fol.

740

Different de Madame de Nemours avec  
le Seigneur Dom Cesare d'Este, fol.

371

Nominations du Roy aux benefices de  
Prouence & Bretagne, fol.

317. 318

Nominations aux benefices du pays  
Melsin, & le different pour l'abbaye de S.  
Leon de Toul, fol.

523. 632. 633. 639. 649.

759

Nomination aux benefices des pays cedez  
au Roy par le Duc de Sauoye, fo.

639. 640.

641

Nomination aux benefices des lieux de  
frontiere, & l'interet que le Roy a d'y  
nommer, fol.

630

Nomination aux Abbayes de Religieu-  
ses ne sont permises par les Concordats, fo.

648. 650

**O**bedience pour la Navarre, & la forme  
d'y proceder, fol.

269. 270. 273. 877

Oeconomats spirituels accordez par le  
Roy offensent la Cour de Rome, fol.

79

Abbé d'Orbais, fol.

345

Ordinaires de Lyon à Rome, de Venise,  
& autres, & l'ordre qu'il y faut mettre, fol.

199. 200. 361. 362. 690. 691. 695. 697. 698

Euesque d'Orleans, fol.

851

Pietro Orsino Euesque d'Auersa, & sa  
recommandation, fol.

302

Monsieur d'Ossat au service de Mon-  
sieur de Foix, & des Cardinaux d'Este, &  
loyeuse, fol.

120. 121

Monsieur d'Ossat, a charge des affaires  
de la Royne douairiere à Rome, fol.

13

Deputé par le Roy pour l'affaire de son  
Absolution, avec charge de le servir d'Amb-  
assadeur, & son remerciement au Roy, f.

84. 85

Chargé des affaires du Roy à Rome a-  
vec Monsieur de Luxembourg, en l'absence  
d'Ambassadeurs, fol.

290. 502

Enuoyé par le Roy vers le grand Duc &  
sa commission, fol.

334. 335. 350

sa reception, & negotiation à Florence, fol.

326. 327. 330. 331. 332. & suiv. 350. 351. &c.

Enuoyé par le Roy à Venise, pour ren-  
dre compte de la paix de Veruins à la Re-  
publique, fol.

346. 347. 878. 872

&c.

Sa reception, & honneurs qui luy furent  
rendus, fol.

349. 350. &c

soin.

Le sieur d'Ossat fait Euesque de Rennes,  
& son remerciement, fol.

120. 159. 160

279

AAAAa 2

pourveu de l'Euesché de Bayeux, fol. 418  
 desirer resigner cét Euesché, fol. 820.822.  
 867  
 fait Conseiller d'Estat, fol. 297  
 Prieur de Bellesme, & Abbé de Nant en  
 Rouergue fol. 651  
 Abbaye de sainct Nicolas de Verdun  
 donnee au sieur d'Ossat par le Roy, fol. 236.  
 241.242  
 le sieur d'Ossat fait Cardinal, fol. 413.414.  
 &c.  
 son remerciement fait au Roy, & à Mon-  
 sieur de Villeroy, fol. 436.437  
 fait de la Congregation du Concile, fol. 42  
 & suiv.  
 Vice-protecteur en l'absence du Cardi-  
 nal de Joyeuse, fol. 442.456  
 pension qui luy fut donnee par le Roy, fol.  
 330  
 plainte pour n'en estre payé, fol. 669.670  
 sa gratitude des bié-faits receus du Roy, f.  
 808  
 sa gratitude envers Monsieur de Villeroy, f.  
 40.67.151.189.190.21.517  
 peu de moyens du sieur d'Ossat, fol. 315  
 ses longs services, & zele au service du  
 Roy, fol. 29.782.784  
 sa franchise, & generosité, f. 160. 161. 742.  
 743.782 & suiv.  
 conseils libres par luy donnés au Roy pour  
 conseruer son Estat, fol. 807.808.817 818  
 son aage, fol. 671  
 prie le Roy de demander au Pape le Cha-  
 peau pour Monsieur du Perron, & l'estime  
 qu'il en fait, fol. 98.197  
 Testimoignage qu'il rend du Cardinal de  
 Joyeuse & de son proceder & l'estime qu'il  
 fait de luy, fol. 117.120

P

**P**ays bas & du démembrement de ces  
 Prouinces de la Couronne d'Espagne  
 & plusieurs considerations sur la guerre ou

la paix en ces pays.  
 Paix entre France & Espagne, si elle se  
 peut faire ou non, & les raisons de part &  
 d'autre, fol. 2.3.4.5.188.246.347. du lieu  
 où elle se doit traiter, fol. 255.256.269. &  
 suiv.  
 Paix de France utile au Roy d'Espagne  
 fol. 888.889  
 Pape Clement VIII. affectionné à la  
 France & ce qui l'a fait à l'entree de son  
 Pontificat, fol. 15. 16.56.65.117  
 non interessé, fol. 38.39  
 son naturel, fol. 216.180  
 sa naissance, fol. 314  
 ses acquisitions pour l'Eglise, f. 80  
 propose aux Cardinaux le fait de l'absolu-  
 tion, & son proceder sur ce fait, fol. 85.  
 86  
 sa deuotion en ceste action, fol. 87.88  
 ce qui l'a mené à donner l'absolutio, fol. 116  
 resolution du Pape pour le Duché de Fer-  
 rare, fol. 304  
 son voyage à Ferrare, & le subiect fol.  
 313  
 se plaint sur l'Edit de pacification avec  
 les huguenots, fol. 369.420.421. & sui-  
 uans.  
 sa plainte sur le fait de Chasteau Dauphin,  
 fol. 662.663.676.692.699.706.  
 708.710.717.723.724.726.737.738.749  
 761  
 ses desseins sur l'Angleterre, f. 248.667.  
 688.689  
 le Pape presse la publication du Concile  
 de Trente, fo. 140.217.262.282.425.426.  
 427. & suiv. 504.519.530.636.673.  
 676  
 fait instance pour le reestablisement des  
 Iesuites, fol. 369.505  
 Plainte du Pape sur le fait du Marquisat  
 de Salusse, fol. 559.567.599  
 ne desire que le Marquisat demeure au  
 Roy, & pourquoy, fol. 359.419  
 incline du costé de Saouye, f. 546.582.583.  
 596  
 son affection à la paix de Saouye, fol. 559

# T A B L E.

|   |             |   |                  |
|---|-------------|---|------------------|
| 596.602.603                                   |             | Picoté, fol.                            | 791              |
| saioye pour la paix, fol.                     | 618         | Marquis de Pisani, fol.                 | 475              |
| son desir d'entretenir la paix entre les deux |             | Marquise de Pisani,                     | ibid.            |
| Couronnes, fol.                               | 747         | Isle de Pomegues, & son importance f.   |                  |
| sa plainte de ce que le Roy a fait Monsieur   |             | 340.341                                 |                  |
| de la Trimouille Pair de France, fol.         | 485.        | la negociation du sieur d'Offat avec le |                  |
| 503   |             | grand Duc pour la retirer, fol.         | 337              |
| Papes n'ont accoustumé de quitter Ro-         |             | Predicateurs, fol.                      | 953              |
| me fol.                                       | 713         | Princes se maintiennent par reputation, |                  |
| Pape fait des Cheualiers, fol.                | 696.697     | fol.433.434.576.577                     |                  |
| Pape Paul IV. fol.                            | 142         | Cardinal Priuli, fol.                   | 360              |
| Pape Gregoire XIV. fol.                       | 842         | Protection de France à Rome en quoy     |                  |
| Duc de Parme, fol.                            | 306         | consiste, fol.                          | 118.119          |
| Patriarche de Costantinople envoyé par        |             | Protection de Savoye, fol.              | 401.403          |
| le Pape vers le Roy pour le fait de Salusses, |             | Prouence non comprise es Concordats,    |                  |
| fol.  | 418         | fol.                                    | 98.121.122.126   |
| Patriarche de Venise examiné à Rome           |             | Indul. pour les benefices de Prouence,  |                  |
| contre le desir de la Republique, f.          | 725         | fol.                                    | 121.122.173.767. |
| Pegna Auditeur de Rote Espagnol, fol.         |             |   |                  |
| 554   |             |   |                  |
| Cardinal de Pelleué, fol.                     | 122.245     |   |                  |
| Different de ceux de Pecquais pour le sel,    |             |   |                  |
| fol.  | 471.482     |   |                  |
| Pensions sur benefices, fol.                  | 458         |   |                  |
| Julio Pepoli, fol.                            | 790         |   |                  |
| Le sieur Perrin Soubfdataire, & recom-        |             |   |                  |
| mandation de son affaire, fol.533.535.650.    |             |   |                  |
| 633.691.726.754                               |             |   |                  |
| Monsieur du Perron envoyé à Rome par          |             |   |                  |
| le Roy pour son Absolution, fol.63. son ar-   |             |   |                  |
| riuee à Rome, & sa negociation, fol.83.84.    |             |   |                  |
| pourueu de l'Euesché d'Eureux, fo.105. son    |             |   |                  |
| saire, fol.110. recommandé au Pape pour       |             |   |                  |
| estre Cardinal, fol.                          | 97.98.99    |   |                  |
| son partement de Rome, & son estime, sa       |             |   |                  |
| recommandation au Roy & à Monsieur de         |             |   |                  |
| Villeroy, fol.                                | 136.137     |   |                  |
| Ambassadeurs de Perse près du Pape f.         |             |   |                  |
| 640.957.667.668.678                           |             |   |                  |
| Pere Personio Iesuite, & ses desseins, sur    |             |   |                  |
| l'Angleterre, fol.                            | 669         |   |                  |
| son liure sur la succession d'Angleterre, fo. |             |   |                  |
| 745.751.752.813.814.                          |             |   |                  |
| Frontiere de Picardie dégarnie, fol.          | 148         |   |                  |
| Allessandro Pico, & sa recommandation         |             |   |                  |
| pour le faire Cardinal. f.                    | 654.655.674 |   |                  |

R.

**R**atification de l'absolution, & les dif-  
ferents entre le Legat & les Deputez  
du Roy sur icelle, fol.205.208.209.& suiv.  
Article de la Ratification comment doit  
estre conceu, fol. 163.190  
Le sieur Reboul, fol. 762  
Peres Recollets, fol. 851  
Regale en Bretagne, fol. 751  
Rehabilitation du Roy desirée par le  
Pape, & comme ils'y faut gouverner, fol.  
25.26.36  
Religieux refusans à prier Dieu pour le  
Roy, fol. 61  
Residences d'Euesques, fol. 219  
Monsieur de Reuol, fo. 837.838  
Monsieur de la Rochepot Ambassadeur  
d'Espagne, & les outrages qui luy ont esté  
faits, & ses plaintes, fol.  
Si un Roy doit mangier à sa parole, fol.  
245

AAAAA 3

# T A B L E.

Royz obligéz à conseruer les droicts de  
leur Couronne, fol. 903.904  
Royz de France non vsurpateurs, fol.  
265.266  
protecteurs du saint Siege, fol. 308.309  
ne recognoissent que Dieu au temporel, fo.  
21  
Roy Henry III. & sa pieté, fol. 636.637  
Roy Henry III. arbitre de la Chrestien-  
té, fol. 817  
nouuelle de sa blesseure comment receuë à  
Rome, fol. 45.46.48.54  
Royne douairiere fait poursuiure les fu-  
nerailles du Roy Henry III. à Rome f. 511.  
512.513  
Royne d'Angleterre, fol. 277.278  
Comté de Rougo, fol. 314  
Ruscellay affectionné à la France, & leur  
recommandation, fol. 95  
Euesques de Rusie à Rome, recognoi-  
ssent le S. Siege, fol. 103.106.110

## S

**P** Retensions de l'Empire sur le Marqui-  
sat de Salusses, & leur refutation f. 507.  
508  
Marquisat de Salusses vsurpé par le Duc  
de Sauoye fief du Dauphiné, fol. 359.360  
droicts du Roy sur iceluy, fol. 403.404  
Marquisat de Salusses ne doit estre laissé  
au Duc de Sauoye, & les raisons, fol. 129.  
130.414.407.419.434.435.563.564.576  
& sui. 577  
Negotiation pour le Marquisat de Salus-  
ses, fol. 442.450.492.516.517.537.538.  
539. & sui. 564.598.607. &  
sui. 540  
son importance, fol. 540  
Duc de Sauoye, fol. 60.217.306.359.470.  
571.  
Duc de Sauoye lene des decimes sur son  
Clergé fol. 58

nommé aux benefices de ses Estats par  
l'Indult des Papes, fol. 640.641. &c.  
839  
Guerre de Sauoye, & comment le Roy s'y  
doit gouuerner au cas que les Espagnols  
s'en-mellent, fol. 551.552  
553.576  
Aduis donné au Pape par le Cardinal  
d'Osiat sur la guerre de Sauoye, fo. 808  
809  
Paix de Sauoye, fol. 606.607.608.616.  
628.627. & sui.  
Schoppius, fol. 594  
Monsieur de Seaux, & sa recommanda-  
tion, f. 846  
Sebastien pretendu Roy de Portugal, f.  
606  
Secretaires du college des Cardinaux, f.  
394  
Cardinal Segar, & son aduis sur les affai-  
res de France, fol. 11.12  
Le sieur Serasin recommandé pour estre  
Cardinal, fol. 136.153.154.159.  
167  
oppositions contre luy, fol. 159.160  
pourueu de l'Euesché de Rennes, fol.  
517  
Patriarche d'Alexandrie,  
Duc de Sesse Ambassadeur d'Espagne, fol.  
615  
conseil du Cardinal Sforce au Roy pour  
ruiner les Espagnols, fol. 231.232.  
Monsieur de Sillery Ambassadeur à Ro-  
me, fol. 377.431.407. son arriuee, & recep-  
tion à Rome, fo. 432.  
433  
sa dextérité à manier les affaires, fol. 458.  
492.535.591.632.633  
Pere Sirmond Iesuite, fol. 496.497  
Comte de Soissons, fol. 149  
Comte de Sore à Rome, fol. 589  
590  
Cardinal de Sourdis, fol. 630.634.635  
630

T

**T** Apifferie de la Couronne de France  
venduë par ceux de la Ligne & arrestee  
à Rome par le fleur d'Ossat, fol. 173. 174.

370

Debordement du Tibre, fol. 391

Cardinal Tolet affectionné à la France ses  
offices pour l'absolution du Roy, & ses  
louanges, fol. 88. 91. 129

sa mort, & son eloge, fol. 189

honneurs faits à sa memoire par le Roy fol.

214. 215

Euesché de Toul, & entreprises sur iceluy  
par Monsieur de Lorraine, fol. 759

Monsieur de la Trimouille Pair de Fran-  
ce, & la plainte du Pape sur ce, fol. 495

Ligue contre le Turc, fol. 105. 106. 510.

511.

Prise d'Agrisa par le Turc, fol. 220

Traitez des Roys de France avec le  
Turc utiles à la France & à la Chrestienté,  
fol. 252. 253

V.

**V** Altoline, fol. 652  
Velfer partisan d'Espagne, fol.

Venitiens, ne veulent que le Patriarche  
vienne à l'examen à Rome, fo. 709. 710

ennemis des Espagnols, fol. 720

leur prudence, fo. 858

jaloux de leur droits contre les pretensions  
de la Cour de Rome, fol. 712

Venitiens, & leur affection enuers le Roy  
& la France, fol. 892

la louange de leur Republique, ibidem, &  
894

Ambassadeurs du Roy à Venise & de  
leurs visites par les Nonces, fol. 701.

716

Chanoines & Chapitre de Verdun n'ont  
droit d'election, fol. 759

Euesque de Verdun, fol. 263

va à Rome, fol. 204. 220

subiect de sa venuë, fol. 229

Paix de Veruins, fol. 810

n'est approunee du Duc de Sesse, fol. 614  
615

Vice protection de France, & different  
sur ce entre les Cardinaux Aquasina & In-  
stinian, fol. 234. 235. 265. 266

baillee au Cardinal d'Ossat, fol. 456

Duc d'Vrbis, fol. 503. 608

Vscoques, fol. 228

F I N.











